

Bíblia Sagrada

Canela Bible (New Testament + Portions)

1990, 2012

© 1990, 2012 Wycliffe
Bible Translators, Inc.



Bíblia Sagrada
Canela Bible (New Testament + Portions)

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Language: Canela
Country:
Publisher: Wycliffe Bible Translators USA
Copyright: © 1990, 2012 Wycliffe Bible Translators, Inc.
Last Updated: 2022-10-28
ID: RAMWB1
ISO: ram
ISBN:



KAM TO IHTĚM XÀ	4	JOWĂW.....	171
ME CATOR XÀ.....	20	ME HÀPĚN XÀ	208
ME CAHYT XÀ.....	0	ROMAN.....	250
CUTE ME TO IHHIMPEJ XÀ	0	1 CORINTI.....	277
JOJUW	0	2 CORINTI.....	284
ME TO IHHIMPEJ CATĚJĚ	0	CARATI	288
RUTIKWÝJ	38	EPET	298
1 XAMER	40	PIRIP	306
2 XAMER.....	0	COROXO	312
1 PAHHI CATĚJĚ	0	1 TEXARÖN.....	319
2 PAHHI CATĚJĚ	0	2 TEXARÖN.....	324
2 ME HŮJARĚN XÀ	0	1 TIMOT	327
EXTRA	57	2 TIMOT	334
JO	59	TITO	339
MENCRER XÀ.....	61	PIREMŎ	343
ME HAPACKRE XÀ.....	81	IXAHER CATĚJĚ.....	345
IXAJ	88	TIJAC.....	351
JEREMIJ	96	1 PETRÔ	358
TANER.....	98	2 PETRÔ	366
JONA	103	1 JOWĂW.....	371
HAPAKUC	0	2 JOWĂW.....	377
MATEW	106	3 JOWĂW.....	378
MACÔ.....	117	JUTA.....	379
RUC	123	IPIPĚ XÀ.....	382

KAM TO IHTĚM XÀ

Ÿhÿ, pĕ Mojxe xwÿ pĕ Pahpãm jarkwa kôt, Ixaher catĕjĕ japackre catĕ. Ne ajco me cumã Pahpãm jarkwa jarĕ, ne ahna ihhòc. Ne cute ita to xíc ne ihhòc. Mam ihkàhhòc ita pĕ (Kam To Ihtĕm Xà). Ne ihkàhhòc ita, Pahpãm te pjĕ kam mam ampo cunea ton na me pamã harĕ. Ne hanea ne Atãw me, mehkra to me pamã awjarĕ. Ne hanea ne Nowe me, mehkra te, Pahpãm te cò to ampo cunea jipej xà ata pĕ me amji pytår na, me pamã to awjarĕ. Ne hanea ne Aprãw me, Ixac me, Jaco pĕ Ixaher me, mehkra to me pamã awjarĕ. Ne ihkàhhòc ita jicu xà kam ri, Canãn jò pjĕ pĭn, Ejit jò pjĕ wÿr Ixaher catĕjĕ pintuw na, me pamã harĕ.

Ÿhÿ, pĕ Aprãw jò caku atajĕ kam, ajteare mã pjĕ nõa kam me hũmre nõ japyr te Jo ita ihkrĭ. Nari hõ kàhhòc japyr te Jo (Jo). Ne ite cajpuw hõ kàhhòc nõr, Aprãw jarĕn xà cumam. Ne pĕ hũmre ata impeaj to impej, ne ihtÿj catyt kam Pahpãm kôt ipa, ne ampo cunea na Pahpãm cajpuaw. Mã me pahcurĕ xwÿn pĕ Xatanaj te Jo na Pahpãm wÿr, cute to kĕn prãmte. Mã cute Jo capi prãmte cumã hahkre. Mã cute to kĕanre. Mã cute amji pupun to kĕanre cakrô, nee cute Pahpãm na ihcakòc kĕn nare, ne ihtÿj ampo kĕn cunea mã awcanã, ne nee cute Pahpãm to amji mã ihhimpej jicu nare. Cwÿrjapĕ ri Pahpãm te cute amji pupun xà kĕanre ata jirô pĕ hacpyã mã to impej.

Pĕ Pahpãm amcro te xĕj kam ampo cunea to

Kam To Ihtĕm Xà 1.1-31

1 Pĕ nee jũm Pahpãm ton nare, ne nee jũ caxuw amji ton nare, ne ramã pjĕ ton xwÿjrea na ihkrĭ rohnÿtti mã. Pĕ mam Pahpãm còjkwa me pjĕ me, ampo cunea to. Ne nee pĕ ampo to, ampo itajĕ ton nare. **2** Pĕ pjĕ ata kam ampo hamreare, ne caprÿ, ne kam awcapàtkuti, ne cò me pjĕ cormã ajcacwa tu. Pĕ Pahpãm Carô Pejti ata, cò me pjĕ picacwÿr ata cwÿrpĕ, curia ajco apu ipa.

3 Mã Pahpãm te hũjarĕn to:

— Imã hàhcujro xà nõ na prãm! — hajÿr me ajkaam, mã amcro pyrentu. **4** Mã Pahpãm te amcro ita pupun, mã cumã impeaj to impej, mã cute amcro me caxwa to ipicapôn. **5** Ne cute amcro mã haprÿ to: “Apĕ” hajÿr, ne awcapàtkô mã haprÿ to: “Caxwa” hajÿr. Hõhõ, amcro cakônĭ ita na, pĕ hapĕn xà itajĕ kwÿ ton to hane.

Amcro pijakrut ata kam Pahpãm jàpĕn xà

6 Ne amcro pijakrut jò iràrà na, pĕ Pahpãm cò mã harkwa to:

— Amji to ajcapô, ne kÿj rũm còjkwa wÿr akwÿ api ne ahtwÿ, ne harã mã pjĕ kam akwÿ ahtwÿ — hane. **7** Mã cò te amji to ipicapôn pyrentu, ne kÿj pĕ ita jàhhuc, ne harã mã ita jàhhuc. **8** Mã Pahpãm te kÿj rũm ita mã haprÿ to: “Còjkwa” hajÿr. Hõhõ, amcro pijakrut kam pĕ hapĕn xà itajĕ kwÿ ton to hane.

Amcro incrĕ ata kam Pahpãm jàpĕn xà

9 Ne ahna amcro incrĕ jò iràrà na, pĕ Pahpãm pjĕ kam cò me amcrã mã harkwa to:

— Me amji to ajcapô, ne ita wÿr amcrã, ne ita wÿr cò — hane me ajkaam, mã cute amji to ipicapôn. **10** Mã cute amcrã mã haprÿ to: “Pĕ” hajÿr. Ne cute cò te

cuprôn ata mã haprÿ to: “Còxwa” hajÿr. Ne cute hõmpun, mã cumã impeaj to impej. **11** Pĕ Pahpãm pjĕ mã harkwa to:

— Amji kam pĭhhy me, pĭhhò me, ahpÿanre na ajpĕn caxuw me hàprã hy cunea to — hane. **12** Mã cute amji ton pyrentu, ne pjĕ kam apu hapôj. Ne ahpÿanre na ajpĕn caxuw kam ihhy, ne kam hô ne hapôj. Mã cute hõmpun, mã cumã impeaj to impej. **13** Hõ, ahna amcro incrĕ itajĕ kam, pĕ hapĕn xà itajĕ kwÿ ton to hane.

Amcro te cwat ata kam Pahpãm jàpĕn xà

14-15 Ne ahna amcro te cwat jò iràrà na, pĕ Pahpãm còjkwa mã harkwa to:

— Amji kam gàhcujro xà nõ to, mãr quĕ pjĕ kujro, ne caxwa me amcro to ajcapô, ne amcro me, putwÿr jò amcro me, caku jò putwÿr cahyt — hane. Mã cute amji ton pyrentu ne ajĕt. **16** Ne cute hàhcujro xà catia to ipi-jakrut ne ton. Pĕ amcro to ihhimpej catĕ ata ri ampeaj kam cati, ne caxwa to ihhimpej catĕ ata ri hapÿre mã increire. Ne hanea ne cute caxĕre ton. **17-18** Ne ma còjkwa kam apu haxôr, cute pjĕ kujro, ne caxwa me apĕ to ihhimpej, ne amcro me awcapàtkô to ipicapôn prãmte. Mã cute hõmpun, mã cumã impeaj to impej. **19** Hõ, ahna amcro te cwat itajĕ kam, pĕ hapĕn xà itajĕ kwÿ ton to hane.

Amcro te xíc ata kam Pahpãm jàpĕn xà

20 Ne ahna amcro te xíc jò iràrà na, pĕ Pahpãm còxwa me còjkwa mã harkwa to:

— Hã, ate amji kam ampo to me apijapar xà atajĕ to amji kam me hipu tu ne, còjkwa kam pryjara tor xà me, cò kam ampo cunea prar xà atajĕ mea mã — hane. **21** Ne Pahpãm te cò kam ampo te amji to ipi-japar xà atajĕ cunea ton, còxwa kam ampo catia atajĕ mea mã, ahpÿanre na ajpĕn caxuw, mã hàhtôa to

hàhtô. Ne hanea ne, ajpĕn caxuw pryjara cunea ton, ne hõmpun, mã cumã impeaj to impej. ²² Mã cute ih-cunea caxuw carõt jõr ne cumã harkwa to:

— Me akra to me hàhtôa, ne ma cô kam me api-camĕn to me mõi, ne me cô to hipu tu ne. Ne kýj pĕ cuwĕnre tore to hàhtôa ne, ne ma me apicamĕn to me mõi — hajýr. ²³ Hõ, ahna amcro te xíc itajĕ kam, pĕ hàpĕn xà itajĕ kwý to hane.

Amcro te xĕj ata kam Pahpãm jàpĕn xà

²⁴ Ne ahna amcro te xĕj jõ iràrà na, pĕ Pahpãm pjĕ mã harkwa to:

— Hã, pjĕ, amji kam ampo cunea capõnýre te amji to ipijapar xà atajĕ to, ne pjĕ na ampo apu ipa atajĕ to, ne ampo pry jàprĕhti atajĕ to, ne ahpýanre na ajpĕn caxuw — hane. Mã cute amji ton pyrentu. ²⁵ Ne Pahpãm te ampo pryre jàprĕhti itajĕ ton, ne ampo capõnýre itajĕ ton, ne pjĕ kam ampo apu ipa itajĕ cunea ton, ne ahpýanre na ajpĕn caxuw. Ne cute hõmpun, mã cumã impeaj to impej.

Pĕ Pahpãm me panquĕtjĕ to

²⁶ Jirõ pĕ mã ri Pahpãm te ajpĕn mã:

— Ita caxuw cu ha amji kõat me hũmre nõ to, quĕ ha cupĕ me pahpyràac, ne ihtýj amji kampa. Ne quĕ ha hanea ne cõxwa kam tep me, cõjkwa kam pryjara me, pjĕ kam ampo capõnýre atajĕ me, pryre jàprĕhti atajĕ me, pjĕ kam ampo apu ipa itajĕ jamãr to ipa, ne me to ihhimpej to ipa — hajýr. ²⁷ Ne cute amji kõat jũm xũmre ata ton, ne cahãj ita ton. ²⁸ Ne cute me cumã harkwa to:

— Me akra to me hàhtôa to hàhtô to me mõi, ne ma me apicamĕn to me mõi, ne pjĕ to me hipu to me mõi, ne amji mã me hũtà ne me to ahimpej to me mõi. Ne cõxwa kam tep to me ahimpej, ne cõjkwa kam cuwĕnre to me ahimpej, ne ampo cunea pjĕ kam apu ipa atajĕ to me ahimpej.

²⁹ — Ne ate me gõ to, me gàpàn xà caxuw, ite me amã ihhy cunea me, pĩxõ cunea ton, ate mehkur xà caxuw. ³⁰ Ne pryre me, pryjara me, pjĕ kam ampo ipa atajĕ me, por ampo cunea amji cajpĕ ne incaca atajĕ mã, ite ahtu me ahtetet cunea ton, cute ihkur xà caxuw — hajýr. Hõ, pĕ ampo itajĕ cunea ton to hane.

³¹ Ne cute ihcunea pupun, mã cumã impeaj to impej. Hõ, ahna amcro te xĕj atajĕ kam, pĕ hàpĕn xà atajĕ kwý ton to hane.

Pĕ Pahpãm amcro te xet ata kam kõt

Kam To Ihtĕm Xà 2.1-25

2 Pĕ Pahpãm cõjkwa me, pjĕ me, cõxwa jipĕj, ne kam ampo te amji to ipijapar xà atajĕ cunea to. ² Pahpãm te amcro te xĕj atajĕa kam, cute hàpĕn xà itajĕ cunea jipĕj. Cwýrjapĕ ri cute amcro te xet ton ita kam ri ihkõt xà, na ri nee kam hàpĕn xà nare. ³ Ne cute amcro kam ihkõt xà ata to ajteare mã, ne cute to impejti, kam ihkõt xà na. Ampo na? He cute amcro ata

xwýjrea na ampo cunea jipĕj, na quĕ ha cute xet ata kam cama kõt.

Pĕ Pahpãm Atãw xwý pĕ me panquĕtti to

⁴ Pĕ Pahhiti pĕ Pahpãm cõjkwa me pjĕ to. Pĕ harĕn xà catia hane he: ⁵⁻⁶ Pĕ nee cormã kam ampo hiprãj nare, ne nee kam ahkĕt tetetti nõ hamreare. Pĕ cormã Pahpãm nee kam ta to iwrýc nare, ne ahcakũm kam atãr ata pĕ ajco pjĕ inco. Ne hanea ne cormã pjĕ kam jũmjĕ jàpĕn xà caxuw me hamreare. ⁷ Mã Pahpãm te pjĕ te mehĩ ton ne pea hĩjakre jakõr, mã hĩa na cute amji ton. Hõ, pĕ mehĩ ton xà ita hane.

⁸ Mã Pahhiti te pjĕ impejti japyrý te Etĕ ita kam hàhkre, pyt japõj xà rũm, ne kam pjĕ te mehĩ xũmre jĩa mã hikran, kam ihkrĩ xà caxuw. ⁹ Mã Pahhiti pĕ Pahpãm te Etĕ jõ pjĕ kam ampo pej pit kre. Mã ahpýanre na ajpĕn caxuw pĩxõ pãr pej pit japõj ne hiprãj, ne ihkur xà caxuw ihcunea impeaj. Ne pjĕ ata jipõc ri Pahpãm te pĩxõ pãr to ipijakrut ne ihkre, atajĕ ri ihkwý pĕ ajteare mã. Ne pyxit ne cupĕ mehĩr rohnýtiti mã xà jõ pĩxõ. Na quĕ ha jũm te pĩxõ ata nõ krĕr na, quĕ ha jũ caxuw ihtyc nare, ne quĕt ihtĩr rohnýtiti mã. Ne ihnõ ata pĕ ri ampo pej me, ampo kĕn jahkre pej xà jõ pĩxõ pãr. Na quĕ ha jũm te pĩxõ ata nõ krĕr na, quĕ ha ihcunea na amji jahkre pej ne ihkrã kre. ¹⁰ Ne pjĕ ata kam Pahpãm te cô ton, mã ajpĕ, cute pjĕ inco xà caxuw. Ne Etĕ jõ pjĕ ata pĩn pĕ cô ata cato, ne kaam ihc-ahkũm, ne cute amji to cwat ne ajpĕ. ¹¹⁻¹⁴ Atajĕ ri ahpýanre na haprý itajĕ te hajýr he: Pixõ jõ cô me, Gijõ jõ cô me, Tice jõ cô me, Cõmpejti jõ cô.

¹⁵⁻¹⁷ Mã Pahpãm pĕ Pahhiti te pjĕ ata kam hũmre pĕ Atãw xwý ata mã hikran, kam ihkrĩ ne cute hamãr, ne kam hàpĕn xà caxuw. Ne cumã pĩxõ pãr pyxit ne ihcawpa ne cumã:

— Ca ha gapacta ne atýj pĩxõ pãr itajĕ xõ cunea ku, ne por ampo pej me, ampo kĕn jahkre pej xà jõ pĩxõ ata, ca ha nee ihnõ krĕr nare. Ampo na? Ca ha ate ihnõ krĕr na, ca ha ramã impejti xà jahkre pej, ne ihkĕanre xà jahkre pej, ne hanea ne amcro ata kam atýj atyc kam tĕ — hane.

¹⁸⁻²⁰ Ne pĕ ramã pjĕ ata kam ahpýanre na ajpĕn caxuw pjĕ kam pryre atajĕ to, ne kýj pĕ ahpýanre na pryjara ton pa. Ne ma ihcunea to mõi, Atãw wýr, ne cumã ihcunea jahkre, mãr quĕ Atãw ahpýanre na ihcunea mã haprý jõr pa. Mã cute amji mã ampo mã haprý jõr prãmti ata na, cute cumã hõr partu. Ne haprý ata na quĕ ha ipa rohnýtiti mã. Ne cute pryre capõnýre mã haprý, ne ahkĕt kam pryre atajĕ mã haprý, ne kýj pĕ pryjara cunea mã haprý jõr partu.

Pĕ Pahpãm cahãj pĕ me pahnã to

Ne ampo itajĕ cunea jipõc ri, Atãw te nee amji caxuw ampo pĕ ihnõ ata mã cator nare. Jirõ pĕ mã ri Pahpãm pĕ Pahhiti te amji mã:

— Imã hũmre ita ahte apu ipa ita na to prãm nare, na wa ha hĩa na cumã catĕ nõ to — hajýr. ²¹ Ne jũ mã cute Atãw ton ne to hõtxwaa to hõtxwa, mã hõt mã

ihytyctu, ne ihtỳj nõ ne gõr. Mă Pahpăm te hiwryhhi nõ caxàr, ne hacpỹa mă haxà to cumă ipijapỳn. ²² Ne hiwryhhi ata to cumă cahāj ton, ne ma hỹrmă to mõi, mă ramă ipimprar, mă cute cumă hõr.

²³ Mă Atăw te harkwa to:

— Taamă! Pahpăm te ijiwryhhi kwỳ caxàr ne to imă cahāj, na ri quêt cupê ijĩa kwỳ, cwỳrjapê wa ha cumă haprỳ to: “Cahāj” — hane. ²⁴ Cwỳrjapê quê ha ita caxuw me hũmre menxyrxwỳ me, me hũmjê jicu, ne me hikwa tuw, ne ma mehprõi wỳr me rê, ne mehprõi me, me ajcaxê ne ajpên kam me pyxit peaj.

²⁵ Pê Atăw me hĩxi nee mehkà to me amji pro nare, ne mehcrô ame ipa, ne nee ajco ajpên kam amehpahàm nare.

Pê Xatanaj me panquêtjê mă ihhêj

Kam To Ihtêm Xà 3.1-24

3 Ne pjê kam Pahpăm te ampo cunea ton atajê jirõa pê cagāti ita te amji jahkre kitre nare. Ne ma cahāj ata wỳr tẽ ne ahna hàhtêp, ne cute ihcukij, ne cumă:

— Xà ampeaj kam Apăm Cati te, ate me pĩxõ itajê cunea kur tête me amăn? — hajỳr.

²⁻³ Mă cahāj ata cumă:

— Quê, itỳj ite mehcunea kur xà. Ne por ipàr pyxit peaj ne ihkwỳ jipõc ri xa ata ri, Inxũ Cati te intête me imăn, wa nee mehnõi krêr nare, ne nee ahna me ijũhkra nõr nare, ne amehcupên nare. Nãmri wa ha mempar nare na, wa ha itỳj me ty, ita na ri Inxũ Cati pê Pahhiti te me imă harên — hane.

⁴⁻⁵ Mă cagāti cumă:

— Quê! Ame amă ihhêj, ca nee me atyc nare! Ampo na ri ame amă ihcawpa? Nee mă ampo na nare. He ate mehnõi krêr, ne cume, me apipêan, ne mempej jahkre pej ne mehkên jahkre pej cupate ri ame amă ihhêj — hane.

Pê me panquêtjê Xatanaj kampa

6 Mă cahāj ata te ihtỳj harkwa kõt pĩxõ ata kur xà na impeaj na amji mă to hajỳr. Ne cute pĩxõ ata pupun, mă cumă impejti, ne ihtỳj amji mă cute amji jahkre pej xà caxuw impej na cute to hajỳr. Ne cute hõi nõ hyr ne ihkrêr, ne hanea ne impjên mă ipyr ne cumă hõr, mă cute ihkrêr. ⁷ Me ajkaam cute ampo cunea jahkre pej kam ihtêm, ne cute mehcrô na me amji jahkre pej, ne amehpahàm pyrentu. Cwỳrjapê ri cute me pĩhhõi kêhkên, ne me cahyr, ne me to amji pro.

Pê Pahpăm me panquêtjê crôn xà kèanre to me cucrõi

8 Ne pyt ata kam ramă ahpreper to mõi kam, mă cute pjê impejti ata kam, me Pahhiti pê Pahpăm mõi na me kam hapac, ne ajwar cupê pĩ catàtkre na me ipimxur. ⁹ Mă cute me cumă hàkjêr ne me cumă:

— Atăw, ampo na mă ca apu ipê amxu? — hajỳr.

¹⁰ Mă Atăw cumă:

— Wa ite ajpên amõi na me apar, ne ate icakrõi na me ipupun cupate, wa apê me ipimxur — hane.

11 Mă cumă:

— Jũm te mă acakrõi na garên? Xà ajkĩ ate, ite amă pĩxõ pàr cawpa ata nõ krêr? — hane.

¹² Mă Atăw cumă:

— Ýhỹ, por ate imă cahāj jõi ata te ri imă hõr, wa ite ihkrêr — hane.

¹³ Mă Pahhiti pê Pahpăm te cahāj ita mă:

— Pỳhàpà, ampo na mă ajte ate me hajỳr? — hajỳr.

Mă cumă:

— Por cagāti ata te ri imă ihhêj, wa ite ihkrêr — hane.

¹⁴ Mă Pahpăm te cagāti ata mă:

— Ca ate me cumă amji kam gapac xà to hajỳr cwỳrjapê, wa ha acrõi xà kèanre ita to acrõi he. Ampo pryre capõnyre me hàprêhti atajê jirõa pê akèanre. Na quê ha apa xà ita pê ajteare mă, na ca ha pjê kam atu na apu pra, ne pjê jacrõi pit kur to apu apa rohnỳtti mă. Quê ha ampo pryre kwỳ cunea, ma ame acaca, ca ha ahnaa jũ caxuw gamre. ¹⁵ Hamre, ita caxuw ca ha cahāj ita me apê ajpên curê xwỳn. Quê ha hanea ne me atàmwxwỳ me, mehtàmwxwỳ pê ajpên curê xwỳn. Ne ca ha jũ caxuw amcro nõ na, cahāj ita tàmwxwỳ tàmwxwỳ nõ par kat kam ihtõi, quê ha taa mă ato hajỳr nare, ne quêt akrà gântu — hajỳr.

¹⁶ Ne cute hanea ne cahāj ita crõi xà ita to incrõi, ne cumă:

— Ita caxuw wa ha amă akra xà to ajcamê, ne kypê amă to hà nare. Cakrõi ca ha atỳj cormă amă ajpên kĩn, ca ha atỳj ahna amji to põi, quê ha cupê ato ihhimpej catê. Na quê ha me atàmwxwỳ me acukwa kam, ahnaa me to hãm ita na — hajỳr.

¹⁷⁻¹⁹ Ne cute Atăw mă hajỳr ne cumă:

— Ca ate gĩxia kõt amji kam gapac, ne ite amă pĩxõ pàr cawpa ata krêr, cwỳrjapê wa ha ita caxuw apê pjê ita to kèanre ne. Quê ha kam hõmjĩ pàr hapõi, ne kam ahkêt kèanre hapõi, na ca ha pĩhhõi me ampo hy pit kur to apa, ne apêa to apê, ne akuc na cõ pra, mår quê me amă gõi, ca me apà. Hõi, ca ha hajỳr to acuhhê ita kam ahnaa awej ne jũ caxuw ty, quê ha pjê ita to me garêt, ca ha hacpỹ mă pjê ita na amji jahkre. Ne pjê ata to pê wa ato, na ca ha hacpỹa mă pjê ita mă axà — hajỳr. Mă ajwar cute mempar.

²⁰ Ne Atăw te hĩxi mă haprỳ to Ewakwỳj, ne haprỳ ita kõt harên xà te “Mehcunea menxi”. ²¹ Mă Pahpăm pê Pahhiti te ampo pry curan, ne ihkà to me cumă mehkà.

²² Ne cute amji mă:

— Ita caxuw quê ha mehĩ itajê pê me pahpyràac, ne ihtỳj ihkên jahkre pej ne impej jahkre pej. Cwỳrjapê ri cute pĩxõ pê mehtĩr rohnỳtti mă xà ata nõ krêr xà nare. Nãmri quê ha cute ihnõi krêr na, quê ha ihtỳj cute ihkên mă hàr xà ita kam amji to ipijapar to ipa rohnỳtti mă — hajỳr.

²³ Cwỳrjapê ri Pahpăm te pjê impejti japrỳ te Etê ata tête me cator, ne ampỹa mă pjê nõ ata wỳr mehku-jahêc, mår quê, cute pjê to Atăw ton ata, curi kam apê ne apà. ²⁴ Cute me cator jirõi pê mă ri, pyt japõi xà rũm, Pahpăm te cõjkwa kam cumă hàprê catêjê kwỳ pyxwỳr, cute me harkwa jamår xà na. Ne hanea ne

cute wapo xwahhihti pôr ata xãm, cute mehtír rohnýtti mã xà ata jô pîxô pâr jamâr prãmte. Mã pra ne ipu na ajrô ita na.

Pê Cãn ihtô pê Aper cura

Kam To IhtĚm Xà 4.1-16, 25-26

4 Mã Atãw hĩxi me hikwa, ne cute kam ihkra, mã cumã ihkra xũmre pÿm. Mã cute cumã haprÿ to Cãn. Mã Ewakwÿj te amji jarĕn to:

— Pahhiti te itehcajpar, mã imã ikra xũmre ita cator — hajÿr. ² Jirô pê mã ri hipĕr cumã ihkra xũmre nõ pÿm ata japrÿ te ri Aper. Ne ajwar mehkà. Mã Aper pê carà cahàcre to ipijapar catĕ, ne Cãn pê ri pur to hàpĕn catĕ.

³ Ne amcro nõ na Cãn te Pahhiti mã hàprà ata jô xô nõ pyr ne to mǒ, ne cama cumã hǒr prãmte, to kam hapac. ⁴ Mã hanea ne Aper te Pahhiti mã hǒ parxare nõ cakônĩ pÿm ata curan ne hĩ pejti kwÿ pyr, ne to mǒ, ne to Pahhiti kam hapac. Mã cumã Aper jô hĩ ata kínti, mã cute ahna amji caxàr. ⁵ Ne ma apu Cãn pê hàprà xô ata caca. Mã Cãn incryac kam, ihkuc kêan kam, apu amji kam hapac to mǒ.

⁶ Mã Pahhiti cumã:

— Ampo na mã ca apu acryc, ne akuc kêan kam apu mǒ? ⁷ Ca ha ate icajpuaw ampo ton na, wa ha itÿj ahna amji capa. Nãmri ca ha ate apu amji kam gapac xà kêanre ton to apa na, quĕ ha akĕn xà ata pê ihhĕj rũm ampo pry jàprĕ kêanre ata pyràac, ne ihtÿj apro to prãm, ne taa ato ihhimpej to ipa. Na ca ha caa, akĕn itajĕ to amji mã capônÿre ne, ne tohĕj, ne caa to ahimpej to apa — hajÿr. Mã Cãn te impar, ne nee ihkôt amji kam hapac nare. ⁸ Ne amcro nõ na cormã ihtô kam incryc, mã cumã:

— Hacu ne pǒ kam apu mǒ — hane. Mã ma ihtô pê Aper ihkôt mǒ, mã pǒ kam hamreare ata kam, Cãn te Aper kam ihtĚm ne ihcuran.

⁹ Mã ahna ahtũm nare mã Pahhiti Cãn mã:

— Jô ri mã atô Aper? — hane.

Mã cumã:

— Pÿpÿn, wa ite nee hǒmpun nare. Xà ajkĩ ipĕ itô jamâr catĕ, mã ca apu ahna icukij? — hane.

¹⁰ Mã Pahpãm cumã:

— He pÿhàpà! Ampo caxuw mã ate atô to hajÿr? Pom atô caprô ita ihtÿj pjĕa kam imã akij, ne imã ate to kĕn jahpan xà ite ato kĕn na, awjahkre ita? ¹¹⁻¹² Atea amji mã acrôn xà kêanre na gàhwÿr, ne por ate pjĕ kam atô caprô jaxwÿr, mã cute to ihkôm ata, quĕ ha nee hipĕr amã gàprà xô nõ jǒr nare. Na ca ha ita caxuw cama apu amji jacĕj, pjĕ cunea kam — hane.

¹³ Mã cumã:

— Itĕ ikĕn mã ijũcanãr xà ita jirôa pê, ate imã ton.

¹⁴ Ca ha pjĕ ita pê ikujate, wa ha itÿj apĕ ampÿa mã pjĕ cunea kam ipa. Quĕ ha jũ ri cute me icajpar atajĕ cunea ihtÿj me icuran to prãm — hane.

¹⁵⁻¹⁶ Mã Pahhiti cumã:

— Hãpà, nee cute ahna hajÿr nare. Wa ha gĩ kam, cute me gahkre pej xà na amã ihhĕc, quĕ ha mehcunea me hǒmpu ne me gahkre pej, ne nee me

acuran nare. Nãmri quĕ ha jũm te acuran na, wa ha ihcura, ne ihkôt cormã mehkwyã kwÿ to xĕj ne me hipej — hane. Ne cute Cãn jahkre pej xà ita na kam ihhĕc, mã ma Cãn Pahhiti pê tĕ, ne pyt japôj xà rũm, pjĕ nõa kam ihkrĩ. ²⁵ Mã hipĕr Atãw te Ewa kam ihkra, mã cumã ihpÿm, mã cute me cumã haprÿ to Xet. Mã Ewa te harkwa to:

— Pahhiti te Cãn te Aper curan ata jaxà kam hipĕr imã ikra xũmre ita jǒr — hajÿr. ²⁶ Mã Xet ita ihkà, ne hikwa tuw, mã hanea ne cumã ihkra xũmre nõ cator, mã cute me cumã haprÿ to Enotti.

Ne caku atajĕa kam ri cute me Pahpãm cukij to: “Ihtír Rohnýtti Mã Ata” hajÿr, ne ahnaa me cukij kam ihtĚm. Hamre.

Pê me panquĕtjĕ me hàhtô to mǒ

Kam To IhtĚm Xà 5.1-6.7

ÿhÿ, pê Atãw me hĩxi pê Ewa caku jàhtôa kam amji to ajpa, ne ramã mehkra jàhtôa to me hàhtô. Ne mehkra itajĕ cukwa kam ramã me hàmtàr to mǒ, ne tapi me hikwa to mǒ, ne me hàmtàr to mǒ. Ne pê cormã Ewa ihkra to hapôj rohnýtti mã. Ne pê caku jàhtôa kam amehpÿpÿm itajĕ cunea kam ri me hàhtô to mǒ, ne pjĕ kôt me ipicràn to mǒ. Pĕ Pahpãm pê Pahhiti ata me hǒmpu, pê tàkamrÿ mehkĕn to me mǒ, ne ramã mehkĕanre. Ne ajco cute me amji kam hapac xà kĕn to pit mã me amji kam hapac to me mǒ.

Pê Pahpãm pjĕ kam ihkrĩ atajĕ cunea jipej na amji to

Kam To IhtĚm Xà 6.6-22

⁶ Mã Pahhiti te me ton catĕ ata ramã me kam ihpeacre, ne me kam cumã amji kíñ nare. Na ri cute me caxuw amji kam hapac xà nõ to ipintuw, ne ahna jĕt, cute me hajÿr xà ita kam. ⁷ Cwÿrjapĕ ri cute amji mã harkwa to:

— Itĕ me ton xà ita kam amji jũ na ipeacre, na wa ha pjĕ kam mehcunea to hamre tu. Ne pom wa ite mehĩ ton itajĕ me, pryre me, pryjara me, wa ha mehcunea to hamre tu. Nãmri ramã ite me caxuw amji kam ijapac xà nõ na ijĕt, ne imã me hapĕ nare — hajÿr. ⁸ Pĕ por me hũmre nõ pyxit peaj ne haprÿ Nowe ata pê Pahpãm cajpuaw. ⁹ Ne pê Nowe ata quĕt pyxit peaj ne ajco catyt kam ipa, ne ihcunea na impejti ne ajteare mã, pjĕ kam me hũmre atajĕ cunea cote na. Ne Pahpãm te amji kam hapac xàa to, ajco amji mã ihhimpej to ipa. ¹⁰ Ne cumã ihkra xũmre incrĕ, ne me haprÿ pê Xĕm me, Cãw me Jape.

¹¹⁻¹³ Ne pê pjĕ cunea kam mehcunea ajpĕn to me hàprĕ to me ipa. Ne Pahpãm mã, ramã cute amji kam me hapac xà cunea kêanre, ne ihhĕj ne ihcacu, ne ramã ihkro. Na pê Pahpãm Nowe mã amji jarĕn to:

— Wa ha pjĕ kam mehcunea to hamre tu. Ampo na? He imãa ramã pjĕ kam mehcunea kêanre. Me hàprĕ me, cute me ajpĕn curĕ me, ihcunea na cute amji kam me hapac xà kĕn itajĕ te ramã ihhĕj ne me to ihkro. Cwÿrjapĕ wa ha itÿj pjĕ kam me hũmre me, ampo tĩr itajĕ cunea to hamre tu.

14-15 — Ne Nowe, wa ha itÿj me akra me apytà. Na ca ha pÿ tÿj to pit mã, amji mã pàr kreti nõ to, ne to catia to cati to hane he. Ca ha iry na to gara capô to xetĕnta ne ihkôt xÿc, ne ihpo na to gara capô to cwatôxi, ne ihkà na to gara capô to ôjtô. Ne ca ha ihkre cahty xà tôtei pĕ penhóc hóc ata to cô mã hàr xà mã ihcahty. Ne pō rŭm to ihcahty, ne caxwãm pĕ to ihcahty, cô te cumã hàr cupate. ¹⁶ Ne ca ha kam pÿ to ikre, ne pÿ to hahêr to kam ikre ata tipre to gŭhkra capô to incrê. Ne ca ha kam to ihkre to incrê, harã mã me ita to, ne ihcote na me ita to, ne kÿj rŭm me ita to, ne ahpÿanre na kam to caxwÿn partu. Ne hÿpĕ kam ca ha harkwa to pyxit peaj. ¹⁷ Nãmri wa ha cô catia ne ihkujate, quĕ ha pjĕ kam ampo cunea pÿr pa.

¹⁸ — Ne wa ha ana amji ton to hane he. Ca ha ca me, aprō me, me akra me, mehprō me, ca ha me acunea pàr kreti mã me axà, mãr wa cô pĕ to me apytà. ¹⁹⁻²⁰ Ne pryre xwÿjĕ ca ha ajpĕn caxuw hŭmre me cahãj to apijakrut partu, ne pàr kreti mã to axà, ne kÿj pĕ ampo jara to ne pra itajĕ, ca ha ajpĕn caxuw hŭmre me cahãj to apijakrut partu ne to axà, mãr quĕ me acahê na ihtyc xà jahpa. Ne pom ite ampo na amĕn itajĕ, quĕ ha amji to ajkrut pa, ne amjia kôt awÿr ipa ne acjĕj. ²¹ Ca ha cumã hō cunea to cuprō ne to axà, ne amji mã me gō catia ne to cuprō ne me to axà — hane. ²² Hōhō, pĕ Pahpãm Nowe mã harkwa hyr to hane, pĕ harkwa kôt ampo atajĕ cunea ton pa.

Pĕ Pahpãm pàr kreti kam me panquĕtjĕ to ihtyc jahpa

Kam To Ihtĕm Xà 7.1, 7-12, 17-24

7 Ne pĕ Nowe jãpĕn xà ita kam ahna caku hàhtōa, pĕ hipĕj pa. Mã Pahhiti te Nowe mã:

— Hã, hamre, gapacta ne ajpĕn me akra mea mã pàr kreti ita mã me axà. Nãmri apyxit peaj, ca me hŭmre itajĕ cunea cote na catyt kam ijarkwa kôt apa — hajÿr.

⁷ Mã Nowe me, hÿxi me, mehkra me, mehprō me, mehcunea xàr, cute cô catia te me hipej xà pĕ me amji pytãr prãmte. ⁸⁻⁹ Mã pryre cunea me, pryjara cunea te ahpÿanre na amji to ipijakrut par, ne hÿrmã incjĕj par, Pahpãm te ahna me mĕn xà ata na. Mã Pahhiti pĕ Pahpãm te me ahna to harkwa jihê.

¹⁰⁻¹¹ Mã ramã me ahna amcro te xet, mã kam mehkri ne me cōhti jikaj. Ne pĕ caxuw ramã Nowe na caku xĕjxĕnta. Mã ihprôt pĕ hatuj xà cunea pÿn cô catôtóc, ne cute amji mã hŭhhyr, mã cōjkwa pÿn hanea ne ta catia te iwrÿc kam ihtĕm. ¹² Ne wrÿa to wrÿ, ne cute iwrÿc ita to amcro to cwarĕnta, ne hanea ne to caxwa to cwarĕnta.

¹⁷⁻²⁰ Mã tàkamrÿ cô catihti ita te pjĕ jaxir to mō, ne pea cute pjĕ cutor tu. Ne ihtua to ihtu, ne cute kĕn kãhti atajĕ cunea cutor tu, ne cormã kãj mã ihtu na me pajara capô te cwat. Mã pàr kre ihtÿj ihcajcoc, ne cô kam apu mō.

²¹⁻²³ Mã pjĕ kam ampo cunea incaca atajĕ tyc par ne me hamre tu. Pryre me, pryjara me, ampo to me ipijapar xà me, ampo jãprĕ me, mehÿ me, ampo kra me, ampo cunea jamre tu. Cô te me hipej tu. Mã Nowe pyxit peaj ne ihtÿr, mehkra me, por ampo cunea cahê

na pàr kre kam hànhuc atajĕ me. ²⁴ Pĕ cô pjĕ cunea to hipu ita na ahna putwrÿ xÿc.

Pĕ me panquĕtjĕ pàr kreti pĕ me cato

Kam To Ihtĕm Xà 8.1-22

8 ¹⁻² Mã nee Pahpãm te Nowe me, mehkra me cahê na pryre atajĕ to hapac kĕt nare. Ne cute pjĕ caxwãm pĕ cô jatuj xà jihê ne kōcti kujahêc, cute cô cajpĕr, ne to incrà xà caxuw. ³⁻⁵ Mã ihcajpĕ, ne tàkamrÿ cute to inxô ne to incrà to mō, mã pàr kreti ata mō, ne kĕnti kãhti catia japyr te Ararati ata na hànhuc. Mã hipĕr pjĕ kam cô ita te amji to putwrÿ to incrê, ne cormã inxô to mō.

⁶⁻⁷ Ne me ahna amcro te cwarĕnta, mã Nowe te harkwa krare nõ ita jihê mĕn, ne ma pō mã xōnti cahàc nõ kujahêc. Mã ihtĕm rohnytti mã, ne nee hacpÿ ne cute amji jaxàr nare.

⁸⁻⁹ Mã ihkôt cute tutti kujahêc, mã cute amji jaxàr pyrentu. Ampo na? Cormã nee pjĕ incrà nare ita kam, jō ri quĕ ampo na xa? ¹⁰ Mã me ahna amcro te xet jirō pĕ mã ri, hipĕr cute tutti kujahêc. ¹¹ Mã ramã ahna pyt xàr xàa kam, mã cute amji jaxàr, ne ihkrÿt kam pÿ hō nõ tetetti ita xa, mã to tĕ. Mã Nowe te ramã pjĕ kam cô incrà to mōr na hahkre pej pyrentu. ¹² Ne cute amji to amcro to xet jirō pĕ mã ri, ma hipĕr cute tutti kujahêc, mã nee hacpÿ ne cute amji jaxàr nare. ¹³⁻¹⁴ Mã hipĕr Nowe te pàr kreti ata kam amji to putwrÿ to ipijakrut, cô incrà jikaj xà, mã caxuw ramã ahna caku te xĕjxĕnta ne ihkôt pyxit. Mã cute pÿ te harkwa jihê ita jihê mĕn, ne pjĕ kam ramã cô incrà na hōmpun.

¹⁵⁻¹⁷ Mã Pahpãm te Nowe mã:

— Ajpĕn pàr kreti pĕ pō mã me acato. Ca me, gÿxi me, me akra me, mehprō me, pryre me, pryjara me, me acunea me acato. Ne pjĕ cunea kam atÿj me apicràn to me mō, ne me gãhtō to mō — hajÿr.

Nowe hakryte Pahpãm mã ampo gō

¹⁸⁻²⁰ Mã mehcunea japôj. Mã Nowe Pahpãm pyrĕn hakrya to hakry, na ri cute ampo pry ita curan, ne Pahpãm mã hōr prãmte to caxàr.

²¹⁻²² Mã Pahpãm te ampo pry to me kam hapac xà ita na cumã ihkÿn, mã cute amji mã harkwa to:

— Wa ha nee jŭ caxuw hipĕr pjĕ ita to kĕanre nare, ne nee mehcunea jipej nare. Ampo na? He cute me hajÿr tŭam, ne mehkĕanre. Ne wa ha ita caxuw pjĕ kam me caxuw ampo to ajpĕn catĕ partu. Na quĕ ha caku cunea kam me hàhkre xà caxuw, me cumã cô me amco, ne cute me hō kĕhkĕn xà caxuw amcrà me amcro, ne hanea ne, ajpĕn caxuw, amcro me caxwa. Na quĕ ha to hajÿr ita kam, ahnaa ampo cunea jicu xà mã to cumĕ — hajÿr.

Pĕ Pahpãm me panquĕtjĕ mã amji to awjahkre

Kam To Ihtĕm Xà 9.1-6, 9-17

9 Ne Pahpãm te Nowe to impejti ne cumã:
— Hamre, ita caxuw ca ha me gãhtō to mō, ne pjĕ cunea kam, quĕ ha me atãmxwÿ me hàhtōa to me

hàhtô to me mō, ne mehcahkūm to me mō. ² Ne quē ha pryre cunea ihtÿj amji mā megī itajê cupa, ne me cupê me gō tekjê, na ca ha me caa me to ahimpej.

³ Na ca ha gapacta ne atÿj me ampo itajê cunea ku. Nāmri pē wa mam me amā, ate me ampo hō kur xà itajê to pit mā hahkre. Ne ita caxuw ca ha atÿj me ampo cunea ku.

⁴ — Ne nee ca ha cormā ne apu hī caprō pijaxwÿr nare itajê kur nare. Ampo na? Kam caprō ata pē incaca xà xakat.

⁵⁻⁶ — Ne pē wa amji kōat me ato, ne megīa na me ato, cwÿrjapê ri nee me ate me ajpēn curan xà nare. Nāmri quē ha ampo jàprê te me anō curan na, nare quē ha jūm jīa te megīa nō curan na, ca ha hanea ne atÿj mehcura, cute ihcuran jahpan xà na.

⁹⁻¹⁷ — Ne wa ha me amā amji jarê, ne jū caxuw hipēr cō to pjê kam ampo cunea to ipictor to hajÿr nare. Cwÿrjapê wa ha cōjkwa kam ta jōxwÿn xō, mār wa hōmpu, ne amji mā:

— “Pē wa me cumā to awjahkre xà ata mā ajēt he. Na wa ha nee jū caxuw hipēr cō to pjê to ipictor nare” — hane. Hōhō, pē Pahpām me Nowe, ita na me amji ton to hane. Hamre.

Pē Pahpām me panquētjê mā harkwa to ahho

Kam To Ihtēm Xà 11.1-9

ÿhÿ, ne pē caku jàhtōa kam pjê cunea kam me hàhtô to me mō, ne ajco me harkwa pyxit peaj to mehcahkōc. Ne mehcuea te kēn te ikre kàhti ata xām na me ajpēn par. Ampo na? Nee mā ampo na nare, ma ame Pahpām par caca. Ne ma pjê cunea kam amehcahkūm caca, cwÿrjapê pē me krī catia ton to prām, cute amji to me catia prāmte. Ne me ajpēn mā:

— Hacme, ne me ikre nō kàhti to, ne ihkōat cōjkwa wÿr me api, ne nee pjê kōt ame papicràn nare — hane. Ne cute me ton. Mā Pahhiti wrÿc, ne cute krī ata me kēnti te ikre kàhti ata pupun, ne nee ahna cumā ihkīn nare. Mā me ajpēn mā:

— Mehcuea me harkwa pyxit peaj to mehcahkōc ita kam, quē ha me ampo cunea jahkre pej, ne ihtÿj jū caxuw me ampo kēn catia to. Hacu ne ahpÿanre na me cumā me harkwa pihho jōr pa, mār quē nee me ajpēn par nare — hane.

Ne me iwrÿc, ne cute mehcuea mā harkwa jōr par, mā ajpēn kaj na cute mehcahkōc kam mehtēm. Ne nee me ajpēn par nare ita kam, jū wÿr quē me ajpēn kam-pa. Ne ma pjê cunea wÿr cute me ipicràn kam mehtēm. Ne pea cute me ikre ita me krī ita jicu, ne me ipicràn partu.

Pom krī ita japrÿ te Meharkwapihho jō krī. Ita cwÿrjapê ri krīxàre cunea me harkwa pihho to pit mā mehcahkōc, ne ma pjê cunea kam amehcahkūm. Hamre.

Pē Pahpām menquētti Aprāw na ahwÿ

Kam To Ihtēm Xà 11.31-32; 12.1-8

Ne pē caku atajê kam pjê nōa kam, hūmre nō ita hō pjê mā hikra, ne ma Canān jō pjê wÿr mō. Ne amji kōt ihkra japrÿ te Aprāw me, mehkJêjê nō to mō. Ne Pjēncrāti jō krī mā me cator, ne curia hūmre nō ata tyc. Mā Aprāw pē ihkra ita te harêt.

Mā Pahpām te Aprāw mā ihcakōc ne cumā:

— Gō pjê me, acūmxwÿ jūrkwā me, me akwÿ pē acato, ne ma ite amā pjê jahkre xà ata wÿr mō. Wa ha amā pjê ata jahkre, ne me atāmxwÿ to hàhtōa to hàhtô. Wa ha ato impej, ne ato acatia to acati. Ca ate ito amji mā ahimpej, na ca ha me hàhtōa ne me to impej. Cwÿrjapê cute me ato impejti atajê jahpan xà na, wa ha ame to impejti ne. Ne cute ame ato kēanre atajê jahpan xà na, wa ha ame to kēanre ne. Ne acwÿrjapê wa ha pjê cunea kam me to impejti ne — hajÿr.

Mā Aprāw cator, hīxi me, hapar Ro me, me cumā hàpēn catêjê me, me hō parxare me, ne mehcuea Canān jō pjê wÿr me cutor, Pahhiti jarkwa kōt. Pē Aprāw cator xà ata kam ramā ahna caku xetēnta ne ihkōt xīc.

Mā ma Aprāw mō ne Canān jō pjê mā me cator. Mā Pahpām te Aprāw mā amji to ipipê ne cumā:

— Wa ha itÿj jū caxuw me atāmxwÿ mā pjê ita gō — hajÿr. Mā Aprāw te hakryte Pahhiti mā amji jōr, ne to cati prāmte cumā ihcakōc pejti.

Ne Aprāw me, hīxi me, hō parxare me, ma Peter jō krī cahê na kēn atajê wÿr me mō. Mā ihkōt hapar Ro hō parxare me, cumā hàpēn catêjê to mō, ne curia ame hàhhuc cri.

Pē Aprāw me Ro ajcapô

Kam To Ihtēm Xà 13.1-18; 15.5-6

Pē ampeaj kam Aprāw me Ro ita me hakrāj cati. Pē pjê kam me ahtwÿ ata incire, cute kam me hō parxare to me ipijapar xà caxuw, ne pē ampeaj kam me cumā hō carà cahàcre hàhtô. Cwÿrjapê ri Aprāw me Ro mā hō parxa jamār catêjê cama ame ajpu. Ne Aprāw jàhcajrēan to hàhcajrēn, cwÿrjapê pē Ro mā harkwa to:

— Cu amji to pajūkjê ita kam, jū wÿr cu ajpu. Ca ha amji mā pjê nō capi ne hÿrmā axy, cu ha ajcapô — hane.

Mā Ro te Cōpijapjêr jō cō cahê na pjê ata pupun, mā kam pōre, ne kam ahtu, ne impejti, ne impej ita pē mam Etē jō pjê pyrāac. Mā Ro te pjê pupun, ne amji mā capi ata kam pē mam ramā Krīhpōc me Krīhcumrārti atajê ihcuhhê. Mā ma hÿrmā hō parxa me, cumā hàpēn catêjê to hy. Mā Aprāw Canān jō pjê kam hàhhuc.

Pē Pahpām Aprāw mā amji to awjahkre

Pē Ro xy jirō pē mā Pahhiti Aprāw mā ihcakōc ne cumā:

— Hōmpu he, ne pom ca pjê cunea pupu ita, wa ha amā ihcuea gō, quē ha hanea ne me atāmxwÿ ihtÿj kam mehkṛī. Ne ite amā me atāmxwÿ jōr xà atajê, quē ha me hàhtōa to me hàhtô. Quē ha me hàhtô pē ihhêj

rŭm pjênxôm carôt pyràac, ca ha nee uu ne me cahyt par nare — hane.

Ne hipêr caxwa ri iriat kam, Pahpâm te cumã ihcakôc, ne cumã:

— Aprãw, nee ca apu pa nare. Ampo na? Wa ha itÿj ato impej ne gamã, ne apytà — hajÿr. Ne ma pö mã Pahpâm te haprôr ne cumã:

— Cöjkwa wÿr ca rît ne hõmpu, ca ha ate caxêre cahyt par na, ca ha cahyt pa. Ampo na? He wa ha amã atãmxwÿ to hàhtô to hanea, pom quê caxêre jãhtô he — hajÿr.

Mã Aprãw te Pahpâm kam hapac, ne ampeaj kam amji mã to ihhimpej. Ampo na? Cute Pahpâm te cumã harkwa to ihcakôc ata na, cute impar na ri.

Pê Hacakwÿj mã Ixamar pÿm

Kam To IhtĚm Xà 16.1-16

Ne ramã jũ mã me ahna caku te, mã cormã nee Aprãw me hixi pê Xarakwÿj ata mã ihkra nare kam, ramã ajwar mehwej. Cwÿrjapê ri Xarakwÿj te impjên mã harkwa to:

— Pom imã hàpên catê cahãj pê Hacakwÿj ita me, ca ha apu gôr ne kam akra, quê ha cumã ihpÿm, cu ha to pahkra, wa ha pa to ajpa — hajÿr.

Mã harkwa kôt Aprãw te Hacakwÿj ita to hajÿr ne kam ihkra. Mã cute amji cajpêr me mãã mã, ma apu hõ pahhi kwÿj pê Xarakwÿj ata par caca. Cwÿrjapê ri ma Xarakwÿj apu Hacakwÿj curê ne apu to kêanre, mã ma pö wÿr cupê tẽ.

Mã curia Pahhiti te cöjkwa kam cumã memprar catêjê nõ na amji jahkre ne cumã harkwa to:

— Ca ha nee gõ pahhi kwÿj ata mã hikran, ne hipêr cupê acator to hajÿr nare. Ne hacpÿa mã hÿrmã amji jaxà, ne atÿj amji caxuw kampa. Ne wa ite ramã amã akra jôr ita, quê ha amã ihpÿm, ca ha cumã haprÿ to Ixamar. Quê ha ampeaj kam ihtÿj, ne cukwa kam quê ha ampeaj kam amã atãmxwÿ hàhtô, ne ihtÿj mehkjêjêa me, me ajpu — hajÿr.

Mã Hacakwÿj te impar ne hacpÿa mã amji jaxàr. Mã cumã ihkra ata pÿm, mã Aprãw te cumã haprÿ to Ixamar.

Pê Pahpâm Aprãw mã ihkra to awjahkre

Kam To IhtĚm Xà 17.1-27

Ne ramã ahna caku te trëxi, mã Aprãw wÿr Pahpâm cator, ne cute cumã harkwa to:

— Ýhÿ, Aprãw, hipêr ite amã amji ton xà ata to intuw, quê ha ihtÿj amã akra xÿmre nõ cato. Na quê ha apê me hakat, ne apian quê ha pahhi catia catêjê kwÿ me hapôj. Wa ha amã Canãn jö pjê ita gõ, ne hanea ne me atãmxwÿ mã cugõ, ca ha kam me akri rohnÿtti mã. Ne ca ha caa me, me atãmxwÿ me, me apê me ikwÿ, na wa ha pa amji to me Apãm Catí.

— Ne mehcunea te, atê ipar ne apê me ikwÿ na, cute me gahkre pej prãm to, ca ha ite ato ihimpej xà ita na ikam gapac to hane he. Ca ha me akam, me hÿmre mehkri atajê me, me atãmxwÿ me, ca ha me acunea

me apy kà kryjre ne ajpên mã me hakep. Ne quê me atãmxwÿ nõ mã ihkra xÿmre nõ pÿm, ne ramã ahna amcro ôjtô, quê ha acuxà me cumã impy kà kwÿ jakep. Ne por jÿmjê te impy kà kwÿ jakep nare atajê quê ha nee me cupê me ikwÿ nare. Ampo na? He nee ite amã amji ton xà na, pahte ajpên par xà ita mã hàr nare na ri.

— Ýhÿ, Aprãw, ramã gixi Xarakwÿj me ajwar awej cakrô, quê ha ihtÿj me amã me akra xÿmre nõ cato. Ne cupê me atãmxwÿ cunea xakat — hajÿr.

Mã Aprãw te Pahpâm par, ne cuna mã ihpÿm, cute cumã incrive na amji jarên prãmte. Ne cute nee impar xà ita to amji mã hajÿr nare, na ri cama apu acxa, ne amji mã:

— Pÿhàpà, quê ha pijamã cormã imã ikra nõ cato? — hajÿr jirô pê mã, cute Pahpâm mã:

— Ca rÿ mã Ixamar to me itãmxwÿ tãmxwÿ xakat — hajÿr.

Mã Pahpâm cumã:

— Quê nare! Gixia pê Xarakwÿj kam quê ha akra xÿmre ita cato, caku nõ na, ca ha cumã haprÿ to Ixac. Ne cupêa quê ha me atãmxwÿ jãhtôti atajê xakat — hane. Ne ma cupê tẽ. Mã amcro ata na Aprãw me ihkra xÿmre pê Ixamar me, curi cahê na mehkri atajê me, mehcunea te amji mã mepy kà kryjre ne me hakep, Pahpâm te ahna mên xàa na.

Pê Pahpâm hipêr Aprãw mã ihkra to awjahkre

Kam To IhtĚm Xà 18.1-15

Pê Pahpâm hipêr awcahti nõ na Aprãw mã amji to ajpê to hane he. Pê Aprãw pyt te ihcahpa kam, harkwa mã incjêj xà ata na jÿ. Ne cute me hÿmre to incrê ne me hõmpun. Ne ma cute mehcajpar prãmte me cuna mã hãm ne tẽ. Ne cute mehcajpar ne mehkôt na me cumã hÿjahkre, ne cute hõ to me kam hapac. Mã ahna me cumã impejti.

Mã Aprãw te hÿr xà wÿr amji jaxàr, ne hixi pê Xarakwÿj mã harkwa to:

— Awjarêa ne me hÿmre itajê mã kwÿr te pro nõ to — hajÿr. Ne ma hõ carà cahacti hòhti wÿr tẽ, ne cute harintuwti nõ capi ne ahna cumã hàpên catê mên, quê ihcura ne ihkrêr xà caxuw to. Ne ramã cute amji jipêj mã hanea ne pryti kà cacô incrà me, ihkà cacô to me mõi, ne cute me cuna mã hÿxwÿr.

Mã cute mehkriêr, ne me Aprãw cukij to:

— Mër jö ri mã aprö pê Xarakwÿj ata? — hajÿr.

Mã Aprãw me cumã:

— Ma ihkri xà kam ri jÿ — hane.

Mã me hÿmre nõ pyxit ita pê Pahhiti pê Pahpâm, ne cute Aprãw mã harkwa to:

— Caku ajpên mõi ita kam, quê ha gixi mã ihkra xÿmre ihpÿm — hajÿr.

Mã Xarakwÿj te ita par ne cama apu amji na acxa. Ampo na? Nee cute amji mã Pahhiti jarkwa to hajÿr nare na ri. Ramã Aprãw me ajwar ihwejtu, ne mehkra xà jirô pê ihpÿm tu, ne cormã nee mehkra nare.

Mã Pahhiti te Aprãw mã:

— Ampo na mã gíxi apu acxa? Xà quê ipê gã Pahhiti nee ajkí ita ton nare? Wa ha itýj to. Caku pyxít ita jirô pê, quê ha ihtýj cumã ihkra xúmre nõ cato — hajýr.

Mã húpate Xarakwýj te ipicxar na cumã amji na hàprār to:

— Wa nee apu ipicxar nare — hane.

Mã cumã:

— Ca apicxar, wa ite apar — hane.

Pê Aprāw Pahpām mã Kríhpôc me Kríhcumrārti cajrēn

Kam To Ihtēm Xà 18.16-33

Jirô pê mã ri húmre itajê me hām, ne ma Kríhpôc jô krí wýr me mō. Mã ma Aprāw mehkôt mō. Mã Pahhiti te amji mã:

— Pom wa ite amji mã Aprāw pê me ikwý cunea xakat na capi ita? Nõ na mã wa apu cupê ite krí to kên xà ita to ipimxur to mō? Wa ha itýj cumã harē — hajýr, ne Aprāw wýr ipipkjêr ne cumã:

— Pom me húmre pijakrut itajê pê cōjkwa kam imã me hàpên catêjê, ne wa ha krí kam mehkêanre atajê wýr mehkujate, quê ha krí mea mã, me to hamre tu ne — hajýr.

Mã ma Kríhpôc me Kríhcumrārti wýr me ipijakrut itajê me mō. Mã Aprāw te hapar pê Ro ata te mehkra mea mã krí ata kam me cahê na mehkri na me to amji japackre, na ri cute Pahpām na hàhwýr to:

— Ýhý, mōrmō ihtýj curi me cahê na mempej te me xíncwēnta ne amehkrí. Xà ca ha ajkí mehkên catêjê cahê na mempej te me xíncwēnta atajê mea mã, me hipej tu? — hajýr.

Mã Pahpām cumã:

— Quê! Quê ha curi me cahê na mempej catêjê me xíncwēnta ne amehkrí, wa ha nee mehkêanre atajê kôt me hipej nare — hane.

Mã Aprāw cumã:

— Xà quê ihhêaj to mempej me xíncwēnta xà wýr, me xíc ne me hamre, ca ha ajkí atýj ahnaa me hipej? — hane.

Mã Pahpām cumã:

— Quê! Quê ha cute me cwarēnta ne ihkôt xíc itajê mempej pit, wa ha itýj mehkôt mekwý cunea caprí — hane.

Mã Aprāw cumã me harēn to ihkryj to mōr ita kam, tàkamrý me to hōkre nõ to mō. Ne cute cumã ihcakôc jicu xàa kam cumã:

— Xà quê ha mempej catêjê me tej peaj, ca ha ajkí atýj ahnaa mehkôt me hipej? — hajýr.

Mã Pahpām cumã:

— Quê! Quê ha cute me tej peaj cacrô, wa ha itýj mehkôt mehcunea caprí ne me hicu — hane.

Jirô pê mã ri ma tē, mã ma Aprāw te hürkwa wýr amji jaxàr.

Pê Ro krí te caxàr xà pê cato

Kam To Ihtēm Xà 19.1-28

Mã ma ramã me húmre pijakrut atajê Kríhpôc jô krí mã me cator. Mã Ro te ihtýj hürkwa kam me ahna amji

caxàr. Mã caxwa ata kam krí ata kam me húmre mehkri catêjê atajê jàhtôa ne cute me ahna me cuprôn, ne me Ro na hàhwýr, ne me cumã:

— Ramã ite me pyjê caxun to ihkín hi, na ca ha me imã me húmre impejti itajê jahkre, wa ame caxun to me ipa — hajýr. Hōhō, pê cute amji kam me hapac xà kēanre kam menxyre ita me cumã hajýr rohnýtti mã, na pê Pahpām ame hipej prām.

Mã cōjkwa pín me húmre pijakrut atajê te jũ mã me húmre atajê into ton, ne me to into puror, mãr quê nee me ikre jarkwa pupun, ne ahna me hýrmã mencjêj nare. Mã cute me Ro mã:

— Krí ita pê gūjarēan kam, me akra mea mã, me aca-to! Ne ma kên nõ na, ca me akrí. Ampo na? Wa ha pjê ita kam, krí itajê cunea to me hamre tu ne — hajýr.

Mã Ro te, por ramã ihwawý to cute ihkra me hikwa na cume ajpên par atajê mã hūjarēn, mã nee cute mempar nare, ne ihtýj cute ame cumã hapactu na amehcāmji. Mã pea me húmre pijakrut atajê te me Ro pa na ipyr, ne hanea ne me híxi pa na ipyr, mehkra cahāj pijakrut atajê mea mã, ne ma me to ipicahur, krí pê, pō mã me to cator prāmte. Ne ma me to cator, ne curia ri me cumã:

— Kên wýr me aprôt pyrentu, ne nee hacpý mã amji jahpan xà na mehwýr ame arít ne me gàhhuc nare. Ampo na? Wa ha mehcunea to me hamre tu ne — hane.

Mã ma mehpřôt, mã cōjkwa pín Pahpām te cuhy te ta kujahêc, mã cute Kríhpôc jô krí ata me, Kríhcumrārti ata na impýn, ne mehcunea to caxàr tu. Ne mehkôt ampo to me hàhcukrêj atajê me, me hō pur me, pjê ata kam ampo cunea to cute caxàr partu, mã pjê pit jàhhuc, ne carāre nõ.

Mã nee Ro me híxi ata te Pahpām mã hàpên catêjê ipijakrut atajê impar nare, ne krí japê xà to hacpý mã hýrmã irít, ne curia cute caaxwa carôt na amji jahkre, ne curia ihcuhhê rohnýtti mã. Mã ma Ro me mehkra quêt me pra, ne curia pê kên na mehkri.

Mã apê mã ma Aprāw hacpý mã mō ne kēnti nõ jimoac kam xa, ne ampýa mã krí wýr irít ne cute hōmpun. Mã krí atajê kũm, me pjê kũm pit kàj mã hàpir to mō, mã cute hōmpun.

Pê Xarakwýj mã Ixac pým

Kam To Ihtēm Xà 21.1-14

Mã Pahpām te me Aprāw me Xarakwýj mã ihkra to hūjahkre ita ihtýj cumã ihpým, caku pyxít jirô pê. Mã Aprāw te cumã haprý to Ixac, ne haprý ita jūjarēn xà pê "Ipicxar". Mã Xarakwýj te amji jarēn to:

— Pahpām te ihtýj ajte imã ikra xúmre ita jōr, cwýr-japê wa ame ikwý mea mã, me ijakryte ame acxa — hajýr.

Mã ramã Ixac kàre to mō, ne cute ihkà jicu. Mã cute ihkà jicu pyrên hũm pê Aprāw apu hakry, ne cute me to amji pyrác xà kôt, cumã amji kíñ catia ton.

Mã Ixamar pê Hacakwýj kra ata, cama apu Ixac mãn kēanre to mō. Mã Xarakwýj te ahna hōmpun, ne kam hapac, ne apu kam incryc ne impjên mã:

— Ixac me hũm, imã atyc jirô pê Hacakwỳj kra pê Ixamar ita te amji mã acukrêj nõ pyr na to prãm nare. Cwỳrjapê ca ha ma inxi me ajwar jũ kam mehkujate, quê me mõi — hajỳr.

Mã Aprãw mã ahna ihkĩn nare, ne ihpeacre. Mã ma apu jũ kam amehkujahêc caca.

Mã Pahpãm te ita to cumã ihcakôc ne cumã:

— Gapacta ne jũ kam Hacakwỳj me ihcãmter kujate. Wa ha pa me hamã, quê ha hanea cupê me hàhtôa xakat — hajỳr.

Mã Aprãw te impar ne ma Ixamar me inxi kujahêc, põi kam me hamreare ata wỳr. Mã curia mehkrĩ, mã ihtỳj Pahpãm me hamã. Na pê cupê me hàhtôa xakat ne ihtỳj ajco mehkjêjêa tãmwxỳ tãmwxỳ me, me ajpu.

Pê Pahpãm Ixac na, Aprãw capi

Kam To Ihtêm Xà 22.1-19

Ne ahna caku jàhtô nare mã ramã Ixac kàre. Mã Pahpãm te, Aprãw te to amji mã ihhimpej na capi, ne hahkre pej prãmte cumã:

— Por akra Ixac pyxit peaj ne amã ihkĩnti ata, ca ha to mõi, ne ate to ikam gapac xà na, imã ihcura. Ca ha to mõi, wa ha amã Morij jõi pjê ata jahkre, ca ha hàhkà jakôt atajê nõ na ihcura, ne imã to capa — hajỳr.

Mã apê mã Aprãw jỳr, ne cute to pĩ cahhêc, cute to cuhôn xà caxuw, ne cawrô cahàcre kam haxwỳr. Ne cute Ixac japrôr, ne ma amji kôt cute cumã me hàpên catêjê to ipijakrut ne to mõi. Ne cute me mõi ar to me amcro incrê jirô pê mã ri Aprãw te pjê ata pupun, ne cute cumã me hàpên catêjê itajê mã:

— Ita ri me ahtwỳ, cawrô cahàcre na. Wa ha ma ikra me mõi, ne ame Pahpãm to amji kampa, ne ampo to me kampa, ne ihkĩnti na me cumã amji jarên jirô pê, wa ha hacpỳa ne me amji jaxà — hajỳr. Ne Aprãw te Ixac jikre kam pĩ pre xir mã ma to mõi. Mã Aprãw te cuhy me wapo pyr, ne ma ajwar me mõi.

Mã Ixac te carà cahàcti hòhti japên, ne hũm cukij ne cumã:

— Inxũ, ihtỳj pamã wapo ne pĩ, ne jõi ri mã carà cahàcti hòhti ita, pahte to Pahpãm kam pajapac xà caxuw? — hajỳr.

Mã Aprãw cumã:

— Quê ha Pahpãm pamã ihnõi — hane.

Ne por Pahpãm te cumã pjê jahkre ata wỳr me cator, mã Aprãw te ajpên jipy kên jakôt, ne kam pĩ jaxwỳr. Ne cute Ixac cajpre, ne pĩ jipy hir. Ne caxuw wapo pyr, ne ramã cute Ixac curan xàa kam, mã cõjkwa pĩn Pahhiti te ihkrãhha kam Aprãw mã:

— Aprãw! Aprãw! Akra curan nare! Ita kôt wa ite, ca ampeaj kam ikampa na, gahkre pej. Ampo na? Ate imã akra pyxit peaj ata jõi xà caxuw ajmãr ihcuran — hajỳr.

Mã Aprãw rĩt, ne cute carà cahàcti hòhti xũmti te hĩpàr to ahkêt na hê, ne to hãm na hòmpun. Ne cute ihpro ne ihcuran, ne kên jipy hir ne to caxàr, cute Pahpãm mã hòr xà ata caxuw.

Cwỳrjapê ri Pahhiti te hipêr Aprãw to impejti na amji ton, ne cumã ihtãmwxỳ jàhtôa ne hòr na amji ton.

Ne hanea ne Pahpãm te cumã amji jarên, ne cumã:

— Ýhỹ Aprãw, ca ate ito amji mã ahimpej, cwỳrjapê wa ha krĩxàre jàhtôti atajê cunea to impejti ne, atãmwxỳ itajê cwỳrjapê. Quê ha krĩxàre itajê ihtỳj, pom ite me atãmwxỳ to impej ita na, quê ha me ina ahwỳ — hajỳr.

Jirô pê mã ri Aprãw me, Ixac me, cumã me hàpên catêjê me, cute hacpỳ mã ikre wỳr me amji jaxàr.

Pê Ixac me Repecakwỳj hikwa tuw

Kam To Ihtêm Xà 24.1-66

Ne ahna jũ mã caku te jirô pê mã ramã Aprãw weaj to ihwej, ne cute cumã me hàpên catêjê jõi pahhi kujahêc, quê ihcãmter mã ihprô japên to mõi. Nãmri cumã Ixac te curi jũm cuprỳ me hikwa na to prãm nare, ne hò pjêa pê Pjênçrati jõi pjê rũm, jũm cuprỳ me Ixac jikwa na to prãm.

Mã cumã hàpên catê ita te cawrô cahàcti kõi jarôti pê camer ita to tej, ne kam ampo kĩn xà to hipu tu, cute cuprỳhti ata jahpan xà na hũm mã hòr xà caxuw, ne ma to mõi. Mã jũ mã ahna amcro te, mã Aprãw na mehkwy jõi krĩ mã to cator. Ne cute Pahpãm mã ihcakôc, cute cumã cahãj cuprỳ ata jahkre prãmte. Ne cute ihwỳr to hajỳr he:

— Ýhỹ, me ijõi Inxũ pê Pahpãm. Ca ha ite Ixac mã hĩxi nõ mã icator na itehcajpa to hane he. Quê ha jũm cuprỳ te cawrô cahàcti pê camer mã cõ kwỳ jõi prãm ata pê, quê ha Ixac prõi — hajỳr.

Ne cormã Pahpãm mã ihcakôc to hỹr kwỳa kam, mã me cuprỳ nõ impejti japrỳ te Repecakwỳj ata curi cator. Pê cupê Aprãw na mehkjêjê cahãj nõa. Mã hàpên catê ita te cõ na ihwỳr, cute to ihkõm prãmte. Mã cute cumã hòr jirô pê cute camer mã kwa pĩn cõ kwỳ to hàpir na amji ton. Me ajkaam mã hàpên catê ata te, Pahhiti te Repecakwỳj capi na hahkre pej pyrentu.

Mã cute cumã hapac jakrõi xà jõi, ne hanea ne cumã wakỳre pràti pê ôr te ihpa xê xà to ipijakrut ne hòr. Ne ihcukij to:

— Xà hòtpê gũrkwa kam imã ijõt xà nõ — hajỳr.

Mã cumã:

— Hòtpê — hane.

Mã hàpên catê ita te Pahpãm te ihtehcajpar pyrên hakryti na cumã amji jarên. Jirô pê mã ri, ma Repecakwỳj kôt mõi, hũrkwa wỳr. Ne cute Repecakwỳj tõi pê Rapãw mã mòr xà atajê cunea na amji jarên partu. Ne hanea ne cute Pahpãm te cumã Repecakwỳj cuprỳhti ata pê Ixac prõi na to ihhimpej na harên.

Mã hũm me Rapãw pê ihtõi te hàpên catê ita mã Repecakwỳj to mòr xà na hahkre. Mã hanea ne ihtỳj ihkôt ihkràr. Mã hàpên catê ita te hũkjê mã cute ampo jõi xà atajê jõi par, ne caxwa mã curia hòt.

Mã iràrà na Repecakwỳj me Aprãw mã hàpên catê ita ma me mõi. Mã ma Repecakwỳj kôt ihtehcajpar catê cahãj nõ ita mõi.

Ne amcro nõ na ramã pyt xàr xàa wỳr, mã Canãn jõi pjê kam Ixac ma apu põi pê, Pahpãm mã ihcakôc to mõi. Ne irĩt ne cute ramã camer te hapõi to ipa na hòmpun. Mã Repecakwỳj camer pê wrỳc, ne cute Aprãw mã hàpên catê ita cukij ne cumã:

— Měr jūm xūmre mā pō pê apu mō, ne ajpên me pahcajpar to tē ita? — hajýr. Mā cumā:

— Ijō pahhi Aprāw kra ri ajpên tē — hane.

Mā cute cupêhkà to ihkuc pro. Pê mam cute me amji kam hapac xàa na cute cupêhkà to ihkuc pro, ihpahàm cupate.

Mā hàpên catê ita te Ixac mā mōr xà ata cunea na amji jarên par.

Mā ma Ixac te inxyrxwý krí xà wýr Repecakwýj japrōr, ne cute to amji mā ihprō kínti ata.

Pê Aprāw na caku jàhtōa pê xěj ne ihkôt xetēnta ne ihkôt xíc ne ramā ihweaj ne ty.

Pê Repecakwýj mā Exaw me Jaco pým

Kam To Ihtēm Xà 25.24-28

Ne caku te winti jirō pê mā ri Ixac me Repecakwýj mā mehkra pijakrut hiahpuro. Ne cormā inxi tu kam me jêt kwýa kam, pê Pahpām inxi mā me to hūjarên to:

— Kríxàre xakat pijakrut ne atu kam harij, quê ha pyxit ne ihnō jirōa pê carôt týj. Ne por carôt týj ata pê, quê ha hapu na ihpým ata, ne ihtýj cupê mam ihpým ata jō pahhi — hane.

Pê jū mā ahna amcro pê cumā ihkra xūmre ajkrut ne ihpým. Ne pê mam ihpým ata mā haprý to Exaw ne hapu na ihtō ita mā Jaco. Ne pea ajwar mehkà. Ne pê Exaw into capôc, ne ampeaj kam cumā hūjahêr prām, ne cupê pō jō xūmre. Ne Jaco pê amji mā ampejti ne hōtpê ajco ikre pua na ampo to ajpa. Pê Ixac mā ampeaj kam Exaw kíñ, ne híxi mā ampeaj kam Jaco kíñ.

Pê Ixac Jaco cajrên

Kam To Ihtēm Xà 27.1-46

Pê caku hàhtōa jirō pê ramā Ixac ihwej, ne ramā into tūm. Ne amcro nō na Exaw mā harkwa to:

— Ramā ita caxuw iwej, ne wa ha itýj amcro nō na ty. Ne ityc xwýjrea na, ca ha gō cuhê me gō krow cwa, ne ma pō mā to mō, ne imā ampo cura, ne hí to imā jū na wa ha cukrê, ite amji mā hàn xà ata na. Jirō pê mā wa ha itýj acajrên to acūmpejti ne. Nāmri apê ri mam kà — hane.

Mā Repecakwýj te ihcakôc xà ita na impar, ne Jaco mā hūjarên, ne ihkujahêc, quê carà cahàcre to ajkrut ne to mō ne ihcura. Ne cute Jaco mā harkwa to:

— Cu ha apām wej to tūm mā pahhêj. Wa ha cumā hō to cuxwa, quê ha cukrê, ne Pahpām mā acajrên to acūmpejti ne, Exaw cupyre mā — hajýr.

Mā Jaco te inxi par pyrentu, ne Exaw kà mā amji jaxàr, ne cute carà cahàcre kà to amji mā hitō kà, mār quê cupê Exaw pyràac ne ihpa hòhti ne. Ne ma hūm wýr hō to mō, por curi hikwa xà ata ri, ne cute cumā:

— Inxū, to jý ne apà, ne icajrên — hajýr. Mā hūm te ihcukij to:

— Me anō mā ca? — hajýr. Mā cumā:

— Ipê acāmter kà pê Exaw — hane.

Mā nee ajmār hūm te cupê Exaw na amji jarên xà ata na impar nare. Ne cute ihcukij to ipijakrut. Ne cute ihpa cupên ne ihtýj apu amji mā to Exaw. Ne cute hō ita

krêr jirō pê, cute Pahpām mā Jaco cajrên pejti to ihcajrên to hajýr he:

— Pahpām gōtpê gàhkre ita mā ta gō, ne kam ihhy to hàhtōa ne. Ca ha gakràj cati mār quê me hàhtōa ne cama me amā hàpên catêjê na me ipa. Ne ca ha atýj apê me akjêjê jō pahhi. Ne por jūmjê ame ato kēanre atajê, quê ha Pahpām hanea ne jūmjê ame to kēanre ne. Ne por ame ato impejti atajê, quê ha hanea ne jūmjê ame to impejti ne — hajýr. Ne cute ihcakôc jicu, mā ma Jaco cator.

Mā hakàn pê Exaw hōa to hūm wýr cator, ne cute cumā:

— Inxū, to jý ne apà, ne icajrên — hajýr. Mā hūm te ihcukij to:

— Me anō mā ca? — hajýr. Mā cumā:

— Ipê acāmter kà pê Exaw — hane.

Mā Ixac te amji mā ihhêj na amji jahkre pej pyrentu, ne to amji jigêc hyr, ne apu ihtertet. Ne jū wýr quê cute Jaco cajrên xà ita hacpý ne cupê capa. Mā Exaw te incwýr kam ihtēm, ne hūm mā incwýr kam amji na hàh-wýr, mār quê Pahpām mā ihcajrên.

Mā hūm te cumā:

— Mam iwýr atō te amji to hapu na kjê cator, ne cute imā ihhêj, wa ite cumā ato impejti xà ita cunea jōr ne to ihcajrên cakrô, wa ha itýj cuxà acajrên — hajýr. Ne cute ihcajrên xà cahàcre, kyre pê impej ata to ihcajrên.

Pê Ixac Pjên-cràti wýr Jaco kujate

Kam To Ihtēm Xà 28.1-5

Mā Exaw te hūm tyc jirō pê ihtō pê Jaco curan na amji ton. Mā Repecakwýj te ita par ne cute jū kam Jaco kujahêc to amji kam hapac pyrentu. Ne cute Ixac na hàhwýr, quê mehkwy wýr Jaco kujate, quê curia hikwa tuw.

Pê Ixac me Repecakwýj mā Canān jō pjê kam mehkří ata jō pyjê cuprý kíñ nare, na pê ma Ixac Jaco kujate, inquêtti Rapāw jürkwa wýr, mehkwyà jō pjê japrý te Pjên-cràti ata wýr.

Pê Pahpām Jaco mā amji to awjahkre

Kam To Ihtēm Xà 28.10-22

Mā Jaco ma me hūmjê jürkwa pê cator ne mō, Pjên-cràti jō pjê wýr. Ne cute mōr to pyt ne nōr xà ata na cator. Mā ahna caxwa mā nō, ne cute kên to, amji mā ihkrā japat xà ton, ne to ihkrā japat ne to nō ne gōr, ne ipimtir.

Mā ipimtir ita kam, cute cōjkwa wýr me hàpir xà pupun, mā ma cōjkwa mā hàr. Mā Pahhiti jarkwa na memprar catêjê ihkôt me api ne me irôroc. Ne cahi na Pahpām xa ne cute cumā harkwa to:

— Ipê Aprāw Pām Cati, me Ixac Pām Cati. Ne pom ca pjê kam nō ne gōr ita, wa ha amā cugō, ne hanea ne me atàmwxwý mā cugō. Quê ha me atàmwxwý itajê pê pjênxôm carôt pyràac, ne ampeaj kam me hàhtō. Wa ha pyt japôj xà me, pyt cjêj xà me, pjê cunea kôt me cucrà.

— Ne wa ha pjê cunea kam me to impej, me atâmxwÿ itajê cwÿrjapê. Wa ha itÿj acahê na apu ipa, ne jÿ ri apu amôr xà ata na, wa ha itÿj gamã, ne hacpÿa mã ate amji jaxâr na ato, ca ha pjê ita wÿr hacpÿ mã amji jaxà. Ne nee wa ha gicu nare, ne por ite ahna amã icakôc xà ton ata, wa ha itÿj amã to — hajÿr.

Mã ipimprar, ne cute amji mã harkwa to:

— Ampeaj kam ri Pahpãm pjê ita kam apu mō, wa nee ite ita ri ipa xà ita na hahkre pej nare. Ampeaj kam imã pjê ita cupa. Pjê ita pê Pahpãm jÿrkwa mã hàr xà, cōjkwa wÿr — hajÿr.

Ne Jaco awcahti xà wÿr hÿr, ne cute kën te ihkrã japat xà ata jarêc ne hãm, ne Pahhiti te kën to hō tekjê xà caxuw hipy ampo cacō incoti ata jaxwÿr. Ne cumã haprÿ to Peter, ne me harkwa na hÿjarên xà ata te “Pahpãm jÿrkwa”. Jirô pê mã ri cute amji mã harkwa to:

— Quê ha Pahpãm te ampeaj kam ikôt ipa, ne apu ipa xà itajê me, ijō me, ikà me, ipej pêa mã inxū me inxê jÿrkwa wÿr ito amji jaxâr na, quê ha cupê ijō Pahpãm to ijō Pahpãm, na wa ha itÿj to amji mã ihmpej ne cumã apê. Ne pom kën xa ita pê quê ha Pahpãm jÿrkwa. Ne pa wa ha ijōtpê Pahpãm mã ampo gō. Quê ha imã ampo tej, wa ha cumã pyxit ne cugō, quê ha imã ihcahur ahtwÿ — hajÿr. Ne cute amji jarên ita jirô pê mã, ma ihtêm xà ita na tē.

Pê Jaco Raquekwÿj me hikwa tuw

Kam To Ihtêm Xà 29.1-30

Ne ahna amcro jàhtōa jirô pê mã ri, ma inquêtti jō pjê wÿr cator. Ne ampÿa mã cute kwa pupun. Mã jÿm te kën to kwa kre ryti ata jihê, mã xa. Mã carà cahàcti hôhti jamãr catêjê ihtÿj mehkrÿ, ne me jÿm pahtÿjti te hihê mên na me hikaj.

Mã Jaco me hÿrmã cator, ne cute mehckukij to:

— Hàpà! Xà ajkÿ gōtpê me anō te Rapãw jahkre pej? — hajÿr. Mã me cumã:

— Ýhÿ — hane. Mã ramã ihcaxwÿj Raquekwÿj ajpên carà cahàcti hôhti to mō. Ne curi to cator.

Mã Jaco te kën te kwa kre jihê ata to hÿcapêr, cute carà cahàcti hôhti mã cô kwÿ jōr na, mehtehcajpar prãmte. Jirô pê mã ri cute cupê Raquekwÿj jÿkjêa na cumã amji jarên, ne apu hapête amrã.

Mã ma hÿm jÿrkwa wÿr, hÿm mã harên to ipicahur, ne cute cumã harên. Mã Jaco wÿr hÿm pê Rapãw cator, ne cute ihcajpar, ne haprôr ne hÿrkwa kam, cahê na hàhhuc prãmte cute huwahi. Ne Rapãw pê Jaco menxi tō.

Mã curia Jaco jàhhuc, ne apu inquêtti mã hàpên to ipa. Mã ahna putwÿr pyxit jirô pê mã ri Rapãw te Jaco cukij to:

— Ampo na ca ha ihprãm, imã gápên jahpan xà na? — hajÿr. Mã Jaco cumã:

— Wa ha hapu na akra cahãj pê Raquekwÿj ata na amã ijàpêan to caku to xet — hane.

Pê Jaco mã Raquekwÿj kÿn, ne ahna cumã amji to prãm, na pê ihtÿj cume hikwa to prãm. Pê Rapãw mã

ihkra cuprÿ cahãj ita ajkrut peaj, Rijakwÿj me Raquekwÿj.

Mã Jaco te caku te xet kam Rapãw mã ihkra cahãj na hàpên, jirô pê mã ri cumã:

— Hã, hamre imã iprō gō, nãmri ramã pahte amji mã amcro hyr xàa kam hàhhuc — hajÿr. Mã Rapãw te curi pjê ata kam, mehkrÿ atajê cunea to cuprôn, ne me cumã amji kÿn ton.

Mã caxwa mã Rapãw te aracri ihkra Rijakwÿj japrôr ne ma to mō, ne cute Jaco mã hōr. Mã nee Jaco te awcapàtkô kam, cupê Rijakwÿj na hahkre pej nare, ne ihtÿj apu to Raquekwÿj. Mã ahna apê, mã cormã cute Rapãw te cumã ihhêj na hahkre pej.

Mã Rapãw te cute me amji ton xàa na to hajÿr na, cormã cumã ihkôt harên to impej, quê nee mam ihkra ita xwÿjrea na cumã hapu na ihkra ita jōr, quê cume hikwa nare. Ne hipêr cute Jaco me ajpên par, cute Raquekwÿj na hipêr hàpên to caku to xet prãmte.

Mã amcro te xet jirô pê cute hanea ne cumã Raquekwÿj jōr, mã Jaco te Raquekwÿj me hikwa jirô pê mã, hÿm mã hàpên to caku to xet.

Ne pê Jaco mã ihprō ajkrut atajê kam, mehkra xÿmre tōxi ne hanea ne jÿ mã me cahãj me. Ne me hÿmre itajê pê me haprÿ hane he: Rupên me, Ximãw me, Rewi me, Juta me, Ixaca me, Xepurō me, Joje me, Pênjamÿ me, Tã me, Naptar me, Cate me, Axer.

Pê Pahpãm Jaco japrÿ to antuw, Ixaher wÿr

Kam To Ihtêm Xà 32.22-32

Pê Pahpãm caku te cwatōxi kam Jaco to impejti, ne cumã ihparxare jàhtōa ne cugō. Mã ma Jaco inquêtti jÿrkwa pê cator, ne ma hÿm jÿrkwa wÿr hacpÿ mã cute amji jaxâr. Ne mehprō me, mehkra cunea to mō, cumã me hàpên catêjê me, hō parxare cunea to mō. Ne ma, por pjê kam ihtō Exaw ihkrÿ ata wÿr me mō.

Mã caxwa ri Pahpãm te jÿm xÿmre na amji ton ne Jaco wÿr cator, ne cute me ajpên cujtêan to cōjkwa caprêc. Mã hÿmre nō ita te nee Jaco mã hÿcanãr nare na amji cajpêr, ne hapôr hi jagãn, cute cuprōan kam, ne cupê to ipicapôn.

Mã hÿmre pê Pahpãm ata cumã:

— Cama imã hikra, wa uu ne tē, ramã apê to mō he — hane.

Mã Jaco cumã:

— Wÿr wa ha, ate imã ihcunea to impejti na amji ton nare kam, amã hikra — hane.

Mã hÿmre ita cumã:

— Imã amji japrÿ jarê — hane.

Mã cumã:

— Ipê Jaco — hane.

Mã cumã:

— Hamre, hipêr apê Jaco nare. Ampo na? He gaprÿ ita kôt harên xà pê “Ihhêj xi”. Ne ita caxuw apê Ixaher. Ampo na? He gaprÿ ita kôt harên xà pê “Pahpãm me cute ajpên cujtên”. Ampo na? Ca ate ipê cōjkwa kam Apãm Cati me ajpên cujtên, cwÿrjapê ca atÿj, me hÿmre me, me Apãm Cati tohjê — hane.

Mã Jaco te ihcukij to:

— Jũ mã ri gaprý te? — hajýr.
 Mã hũmre ita cumã:
 — Ampo na mã ca apu ijaarý na icukij? — hane. Ne pea cute Jaco mã ihcakôc to impej, ne ma tẽ.
 Mã Jaco te pjê ata mã haprý to Paniher, ita jarẽn xà te “Pahpãm kuc”. Ne cute amji mã:
 — Wa ite Pahpãm pupun ne cormã itĩar — hajýr. Ne pyt cator, mã ma me mõi xà ita na me mõi. Ne cumã ihkjê xà, mã to jõt to mõi.

Jaco me Exaw hipêr me ajpẽn pupu

Kam To Ihtẽm Xà 33.1-20

Jirô pê mã ri Jaco te Exaw pupun, mã hỹmã cute me hũmre to cwatxẽnta ne me to mõi. Mã Jaco te hõmpun ne ampeaj kam cumã hũpa. Mã cute amji mã:
 — Pê wa cupê ihcajrẽn xà py, cwýrjapê quẽ ha ihtýj hahpan xà na icura — hajýr. Na ri Jaco te ihtõ cajpar xwýjrea na mam cute cumã ampo jõi xà atajê kujahêc. Ne hapua na mehkra to me mõi. Mã Jaco mam ihkrãa ri mõi, ne Exaw cuna mã hõpõrpo ne ihpýpým to xet.
 Mã Exaw ma hỹmã ipicahur, cute ihcajpar prãmtẽ. Ne cute me ajpẽn cajpar, ne me ajpẽn cahõr, ne me ajpẽn japête ame amrã. Mã Exaw rĩt ne cute pyjê atajê me, me ahkrare itajê pupun, ne Jaco cukij ne cumã:
 — Měr jũmjê mã akõt me mõi itajê? — hajýr.
 Mã Jaco cumã:
 — Pahpãm te ri ipê cumã hàpẽn catê ita mã mehkra itajê jõi — hane. Mã me hàpẽn catêjê cahãj me, mehkra me, mehprõ cunea te Exaw cuna mã mehkõn krã na me hỹr.
 Mã Exaw te ihcukij ne cumã:
 — Ne měr ampo na mã ate amji cumam ampo jãhtõa to me hũmre kujahêc, por wa ite mehcajpar atajê? — hajýr.
 Mã Jaco cumã:
 — Wa ite amji to acajpuaw prãmtẽ, ite amã ampo jõi xà atajê kujahêc, mãr ca nee ikam acryc nare — hane.
 Mã Exaw cumã:
 — He imã hàhtõa to hàhtõ, pom amã ampo itajêa ri hanea ne imã — hane.
 Mã Jaco cama apu ampo itajê to kam hapac to mõi ne cumã:
 — Quẽ ha amã ikĩn na, ca ha atýj ite amã ampo jõi xà itajê na amji capa. Ampo na? Wa ite akuc pupun, mã ihhêj rũm akuc ita pê Pahpãm kuc, na ri ijirõa pê acarõt týj. Ne gapacta ne ite amã ampo jõi xà itajê na amji capa. Ihkwýa ri Pahpãm te hàhtõa ne imã hõi, na wa ha amã itajê gõ — hane. Ne pea cute ihhi kwĩn.
 Mã Exaw te ampo itajê na amji caxàr, ne cute Jaco mã harkwa to:
 — Měr hacme, wa ha ma me akõt mõi — hajýr.
 Mã Jaco cumã:
 — Amã, imã cormã ikra kryjre na, me hahkre pej. Ne hanea ne imã pryti cahãjti kà cacõ na, amã hahkre pej. Cu ha me to pahkyhkyj, quẽ ha nee me hũcanãr nare, cwýrjapê wa ha hapua na akõt me to mõi — hane. Ne ma Jaco te Exaw pynãr, ne ma Xucot jõi krĩ kam me hàhhuc cri. Ne ma Krĩjikre wýr me mõi ne me cator.

Jirô pê mã ri krĩ ata na pire mã Jaco pê Ixaher te pjê nõ kwý japrõr, ne kam hũrkwa xãm ne kam ihkrĩ. Ne curia ri cute Pahpãm mã me ampo to caxàr xà caxuw ajpẽn jipy kẽn jakõt, ne ihtýj kam, cute Pahpãm mã me ampo jõi xà caxuw ampo pry to me caxàr. Ne cute cumã haprý jõi to Ererore Ixaher, ita jũjarẽn xà te “Pahpãm Carõt týjti ata pê ri Ixaher catêjê jõi Pahpãm”.

Joje pê Ixaher kra jarẽn xà

Kam To Ihtẽm Xà 37.1-35

Pê Raquewkwýj mã ihkra pým ata haprý Joje, ne Ixaher pê Jaco mã pê ampeaj kam Raquewkwýj kra pê Joje ata kĩn, mehkjêjê kwý jirõa pê. Na ri cute cumã ihkã impejti, crorti, pajapjêhti ton.
 Mã mehkjêjê te ramã me hũm te Joje kĩnti ita na me hahkre pej, ne hũ na ame amji to prãm. Cwýrjapê pê ma ame Joje curê, ne nee cumã amehcakõc pej nare.

Pê Joje amti

Mã Joje pimtir, mã ipimtir ita kam pur kam cumã hõ arýjhy pre ita xa, mehkjêjê jõi arýjhy pre cahê na. Pê mam cute me arýjhy pre xà ata, pê ajco ihcahkõa na me hakep, ne me ihpre ne me hũxwý. Mã mehkjêjê jõi arýjhy pre itajê ihcuhhê impejti kam, hõ tekjê cupate cuna mã ihcunea pýpým, mã hõ tekjê hãm to xa. Ita na ri Joje te mehkjêjê mã ipimtir ita jarẽn. Mã mehkjêjê te mencryac kam mehcukij to:
 — Xà ca ha ajkĩ apê me ijõ pahhi, ne me ito ahimpej, wa ha acuna mã acupate ame ipýpým? — hajýr. Ne pea hipêr kam me cumã mencryc picamẽn.
 Mã hipêr ipimtir.
 Mã pyt me putwýr me caxêre mehcunea cuna mã hõpõrpo ne hikwa. Ne pea cute hũm me, mehkjêjê itajê mã harẽn.
 Mã hũm te ihcukij ne cumã:
 — Xà wa ha ajkĩ me ipê caxêre pyrãc, ne acuna mã acupate me ijõpõrpo ne ame ijikwa? — hajýr. Mã mehkjêjê ame kam mencryac to amencryc. Ne hũm ri cama apu ipimtir jarẽn xà itajê to amji kampa.

Pê mehkjêjê mã Joje curan prãm

Amcro nõ na Joje kjêjê ma Krĩjikre jõi põi wýr, hũm jõi carã cahãcti hõhti to me mõi, cute ame hamãr to ipa xà caxuw. Ne me ahna amcro te jũ mãn jirô pê Ixaher pê me hũm ita te Joje mã hàkjêr ne cumã:
 — Me akjêjê kõt tẽ, ma Krĩjikre jõi põi kam ame carã cahãcti hõhti jamãr to me ipa. Ca ha tẽ ne me hõmpu, jũ mã ri cute me, ne ajpẽn imã me harẽn xà nõ to tẽ — hajýr.
 Mã Joje cumã:
 — Ma — hane. Ne ma Krĩjikre jõi põi wýr tẽ. Mã me hũmre nõ te põi kam apu Joje mõi na hõmpun ne cumã:
 — Jũm mã ca apu hapẽn to mõi? — hajýr.
 Mã Joje cumã:

— Wa me ikjêjê japên to mō. Xà ca atỳj ajkĩ imã me harê? Jō ri mōrmō ame carà cahàcti hōhti jamār to me ipa? — hane.

Mã hūmre ita cumã:

— Wa ite me akjêjê itajê impar, mã ijapac kam me amji mã: “Hacme Kwapijakrut jō pō wỳr” hajỳr, wa ite mempar — hane.

Mã cute impar ne ma mehkôt mō, ne Kwapijakrut jō pō kam me kôt cator.

Mã cute ampỳa mã amji wỳr me hōmpun, ne ihcuran na me amji ton pyrentu, ne me ajpên mã:

— Por ipimtir catê ata ri ajpên tē, hacme ne mehcura, ne cō kre crà itajê nō kam me cumê, ne ampo jàprê te ihkrêr na, hūm mã me harê. Ne caxi ipimtir ita te jū na ton ita na mehkôpĩ. Jū wỳr quê ha me pahto ihhimpej — hajỳr.

Mã Rupên pê mehkjêjê nōa, ma apu Joje curan ita na to ihcaca ne cute harkwa to:

— Cu ha cō kre kam cō nare nō kam mehtĩar mẽ, ne nee mehcuran nare — hajỳr.

Ne ampo na mã cute me cumã harkwa to hajỳr? Nee mã ampo na nare. Harkwa kôt cō kre nō kam, cute me mên, mã ahna ahtūm mã hacpỳa ne cute ihtēm, ne aracri amji mã caxàr prãm to, pê mehkjêjê mã harkwa to hane.

Pê mehkjêjê Joje to ihpore na apha

Mã Joje cator, mã mehkjêjê itajê te mehpro ne me cupê ihkà impejti ita caxàr, ne cō kre ryti, kam cō nare ata kam me mên. Ne ame kwỳr kur prãmte, me hỳr, ne pea cute me ampo to hàhpan catêjê kwỳ pupun, mã cawrô cahàc kō jarôti pê camer kam me mō. Atajê pê ihtỳj ampo to me hàhpan to me mō, Ejit jō pjê wỳr.

Mã mehkjêjê nōa japry te Juta ita te mehkjêjê kwỳ mã:

— Cu ha me pahkjê ita cura, ne nee me ampo pyr nare. Cu ha cama ihpore na me to apha, ne nee mehcuran nare, ampo na cupê me pahkjê na ri — hajỳr. Hō, pê me ajpên par to hane. Pê nee mehkjêjê nō pê Rupên ita me cahê na apu mōr nare.

Mã ampo to me hàhpan catêjê atajê me ahnaa me amji to mō, mã mehkjêjê itajê te cō kre ita pĩn me Joje caxàr, ne kyre pê me to hūpêr, ihpore hy pràti te winti peaj na cute me to hàhpan. Mã ma amji kôt Ejit jō pjê wỳr Joje to me mō.

Mã Rupên te amji jaxàr ne nee Joje pupun nare, na ri ihpeacre, ne cumã amji kĩn nare. Mã mehkjêjê te me carà cahàcti nō curan, ne caprô to cute ame Joje kà jatom, ne ma hūm wỳr me to pra ne me to cator. Ne me cumã ihkà pêr ne me cumã:

— Xà ajkĩ akra kàa mã ita? Wa ite pō kam me cumã icator — hane.

Mã pea, hūm te ihkà pupun pyrentu ne pea apu amrãhti ne amji mã:

— Ampo jàprêa te mōrmō ihkrêr — hajỳr. Ne amcro jàhtôa kam cormã ihkra tyc ata japê xà to ihkrĩ ne amrã. Pê tee mehkwy, cute ihkra ita to hapactu prãmte

ame to hahkre. Ne jū wỳr quê me cupê hūjapê ita cahpêrta.

Pê cahãj Joje kên mã cumê

Kam To Ihtēm Xà 39.1-23

Mã ampo to me hàhpan catêjê itajê Ejit jō pjê kam Joje to me cator. Ne cute krãhtare jō pahhi japry te Potipar ita mã ihpore na me to hàhpan.

Pê Pahpãm ajco Joje cahê na apu ipa rohnýtti mã. Ne Potipar jũrkwa kam cute hàpên xà ton xà atajê cunea na ihtehcajpa, ne Joje kôat pê Pahpãm ajco Potipar jũrkwa to impej. Na pê Potipar Joje to ikre kam me hàpên catêjê jō pahhi. Ne pê Pahpãm, Joje cwỳrjapê, ihcunea na ikre ata to impej. Ne Potipar ata pê ihtỳj Joje to amji mã ihhimpej, ne hũhkra mã hàpên xà cunea jaxà.

Pê Potipar me hĩxi ita ma Joje pupu, ne cumã ihkĩn, pê ajco te cama hōmpuu ne cumã:

— Icahê na nō — hane. Pê Joje ajco cumã:

— Wỳr wa ana amji capa. Ampo na? Ajpên te ihtỳj amji mã ito hane, ne apê ihprô. Wa nee ikên xà ita mã ixàr nare, Pahpãm cuna mã — hane. Ne pê ajco amcro cunea kam Joje wỳ.

Mã amcro nō na ikre kam me hamreare, mã ahte Joje me Potipar me hĩxi apu mō. Mã cute Joje kà na ipyr ne ihkjên to mō, cahê na nōr prãmte. Mã ma Joje te cupê amji caxàr ne tē, mã hũhkra kam ihkà jàhhuc.

Mã apu kam incryc ne apu caràr, ne cute pō pê me hàpên catêjê ame ipa atajê mã hàkjêr ne me cumã:

— Por Ixaher catêjê nō ata apu icahê na nōr prãm, ne cute ipro, wa icaràr mã cute ijicu ne jū kam tē — hajỳr.

Mã impjên te amji jaxàr, mã cute cumã Joje kà pêr ne hanea ne cumã ihhêj xi. Mã pea Potipar te hĩxi hêj xi xà ita kam hapac, ne Joje pro, ne Ejit jō pjê jō pahhi te me hacjên atajê cahê na, me hacjên xà kam haxàr. Mã putwry jàhtôa kam curi ihcuhhê.

Pê Joje me hacjên xà kam me ipimtir kôt harê

Kam To Ihtēm Xà 40.1-23

Ejit jō pjê kam pahhi japry pê Paro ata apu hō pĩxô cacô capi catêjê jō pahhi kam incryc, ne hanea ne apu hō pãw ton catêjê jō pahhi kam incryc. Ne cute ajwar me haxàr, me hacjên xà kam, por curi Joje me hacjên xà kam xa ata ri. Mã ajwar me ipimtir xà ita to me ipimtir, ne tee apu ihkôt me hakop to hahkre. Mã Joje te mehpeacre na me hōmpun, ne me cumã:

— Ampo na mã ca ita kam ame apec? — hajỳr.

Mã me cumã:

— Wa me ipimtir, ne jũm quê ajte me imã me ipimtir itajê kôt hakop ne harê? — hane.

Mã Joje me cumã:

— Pahpãm mã ri me apimtir xà itajê jahkre pej, ne ihtỳj imã harê, na ca ha me imã apimtir xà itajê jarê — hane.

Mã pĩxô cacô jō pahhi te cumã amji jarên ne cumã:

— Wa ipimtir, mã pĩxô kre xà kam pĩxô krô crê ne ihcuhhê. Ne pea kam irã ne kam hô. Ne ramã imã Paro kôm xà xa, wa ite pĩxô pyr, ne kam hatên, ne Paro mã hõr, mã cute to ihkôm — hajÿr.

Mã Joje cumã:

— Apimtir kam pĩxô krô incrê ita pê amcro incrê. Quê ha ana amcro incrê, quê ha acator na Paro me cumê, quê ha me acator. Ca ha hacpÿa mã mam gápên xà ata to apê. Ma ito amji japackre, ne Paro mã ijarê. Ampo na? Wa rÿ mã nee me hacjên xà ita kam ixãm nare. Ne nee ite ampo kên ton nare, ixâr xà ita caxuw, me hacjên xà mã — hane.

Mã pãw ton catêjê jô pahhi te hajÿar, ne Joje mã ipimtir ita jarên partu, ne cumã:

— Ijõt kam, ikrã kam pãw na kàhàre incrê ne ihcuhhê, wa ma Paro mã to mō, mã cuwênre pra, ne cute ikrã kam ihcunea pin partu — hajÿr.

Mã Joje cumã:

— Pom kàhàre incrê ita pê amcro incrê. Quê ha ana amcro incrê ita kam, quê ha Paro akrã jakep na me cumê, quê ha me akrã jakep, quê ha cuwênre gĩ krê — hane.

Ne amcro incrê ata kam pê Paro pÿm xà jô amji kĩn jô amcro. Mã cute me cumã me hápên catêjê pijakrut itajê cator na me mên, mã cute me cator, me hacjên xà pĩn. Mã cute pĩxô cacô jô pahhi mã hacpÿa mã hápên xà jõr, ne cute pãw jô pahhi krã jakep na me mên, mã cute me ihkrã jakep ne mehcuran. Mã Joje te me hacjên xà kam hũjarên xà ata na, cute me hõmpun. Mã Joje te amji jarên na, pĩxô cacô jô pahhi mên, mã ajte nee cute Paro mã harên nare, ne cama to hapac kêt.

Pê Joje pjê jô pahhi pê Paro mã ipimtir kôt harê

Kam To Ihtêm Xà 41.1-16, 25-36

Ne pea cute amji to caku to me ipijakrut, mã Paro pimtir. Ne ipimtir ita kam ma Nir jô cô cahê na xa. Mã pryti cahãjti jicotti itajê te xet, ne cô pĩn hãpir, ne apu ahtu kur to ipa. Mã hanea ne ihkôt cahãjti kwÿ kôkôtre, ihhire atajê te xet, ne cô pĩn hãpir. Ne pea cute impejti, jicotti itajê cunea pin par. Mã Paro pimprar.

Ne hacpÿa mã hõt ne hipêr ipimtir xà ita te hajÿr. Ipimtir ita kam ri cute põhy cahkô pyxit kam ihte te xet pejti, xwa pejti pupun. Ne hanea ne ihte te xet kânre, xwa nare, ihkrôkrôcre itajê japôj na hõmpun. Mã ihkânre itajê te impejti te xet itajê cunea pin par. Mã Paro hacpÿ ma mã ipimprar, ne ihkrã pictor tu ne nee hõt nare, ne ipimtir ita to pit apu mã amji kampa, ne irĩat na ahna apê.

Mã cute Ejit jô pjê jô xũmre krã kreti te me amji jahkre pejti atajê cunea na hàhwÿr, mã cute me cuprôn. Mã cute me cumã ipimtir itajê jarên, mã nee jũm te cumã ipimtir itajê kôt harên nare.

Mã cormã pĩxô cacô jô pahhi te Joje to amji japackre, me hacjên xà kam, ne cute Paro mã, pê Joje ihtÿj me ipimtir kôt harên xà ata na harê. Mã Paro te me hacjên xà pĩn Joje na hàhwÿr. Mã cute to hama hô mên, ne

ihkà to hàhpan, ne ma Paro wÿr cator, ne cuna mã xa. Mã Paro Joje mã:

— Wa ipimtir itajê to ipimtir, mã nee jũm te imã ipimtir itajê nõ kôt harên nare. Mã cute, ate atÿj me cumã me ipimtir kôt harên na, imã me garên. Na wa ite ana ijãhwÿr — hane.

Mã Joje cumã:

— Wÿr wa amjia kôt amã harê, quêt ijô Pahhiti, cõjkwa kam ihkrĩ ata, quê ha imã apimtir ita kôt harê, wa ha cormã amã harê — hane. Mã Paro te Joje mã hõt kam ipimtir itajê jarên partu.

Mã Joje cumã:

— Pom gõt pijakrut ita, quê ha hũjarên to hane. Pom pryti cahãjti impejti itajê me põhyhti impejti itajê pê caku kam ampeaj kam me cumã me hõ ata pyrãc. Ne pom pryti cahãjti te xet kôkôtre itajê, me põhyhti te xet kânre itajê pê ri prãm jô caku te xet ata pyrãc.

— Quê ha caku te xet itajê kam ihtÿj ame hõ kur to ipa. Ne hapu na caku te xet ita kam, quê ha prãm ihkânre ne. Quê ha caku kam me cumã prãm kânre xà ata kam, quê ha nee ame mam caku pejti atajê to me amji japackre nare. Cwÿrjapê ca ha Paro, atÿj jũm te amji jahkre pejti ata japê, quê ampo hy catia ne to cuprô, ne haxwÿr xà kam haxwÿ, por caku jahkre kêatre kam prãm te hajÿr xà atajê caxuw — hane.

Pê Joje pê pahhi, Ejit jô pjê kam

Kam To Ihtêm Xà 41.37-57

Joje te Paro japackre xà ata na cumã impejti ne cumã ihkĩn, mã cute to amji kam hapac, ne amji mã:

— Ihhêj ne cõjkwa kam Pahpãm te Joje mã, cute amji jahkre pejti jõr. Cwÿrjapê wa ha me cupê ijarkwa kôt pahhi catêjê jô pahhi na hãm — hajÿr. Ne cute cupê me hõ pahhi xà caxuw cumã hũhhi na hê xà caxâr ne cumã hõr, ne hanea ne cute cumã pahhi kà impejti jõr, mehcuranea te cupê Paro mã hápên catêjê cunea jô pahhi na, me hahkre pej prãmte. Pê Joje pahhi nõ kra cahãj me, me hikwa tuw. Ne pê cumã ihkra xũmre ajkrut ne ihpÿm, ne me cumã haprÿ to Manaxê me Eprĩ.

Ne ramã Joje na caku te trĩnta. Mã cute Ejit jô pjê cunea kam, krĩ cunea kôt, ampo hy to cuprôn na me mên. Mã ihtÿj ihkôt me amji jacjê. Mã caku te xet ita kam ampeaj kam me cumã hõ cati ne hàhtô ita kam, nee me to ipipên nare, ne ahnaa me haxwÿr. Ne Joje te ampo hy to ikre kwÿ jãhtôa to hipu par.

Pê Canãn jô pjê kam prãm

Kam To Ihtêm Xà 42.1-38

Ne pê hanea ne Canãn jô pjê kam prãm ata cato. Mã Jaco pê Ixaher te caku kam prãmte ata kam, Ejit jô pjê kam ampo hy me, me hõ jarên par. Mã ma Joje kjêjê atajê me ampo hy japrôr to me pra, Ejit jô pjê wÿr. Mã hapu na ihkjê Pênjamĩ ita ikre kam hũm me hàhhuc. Mã Ejit jô pjê kam mehkjêjê kwÿ cator, ne Joje mã amehcakôc.

Mã Joje te mehkjêjê pupun ne me hahkre pej pyren-tu, mã nee cute me Joje pê mehkjê na, me hahkre pej nare. Ne xwýjê mã pê nee me cumã amji jarên nare, na pê cuna mã mehpýpým, cute amji to mehkryre to prãm to. Mã Joje te mam ipimtir nõ ata to amji japackre. Ne cute mehcukij to:

— Jũ pĩn mã ca me mõi? — hajýr.

Mã me cumã:

— Canãn jõi pjê pĩn wa me ampo hy kwý japrõr to me mõi. Me ikjêjê me, me ipê hũmre pyxit peaj ata kra pit, wa me. Ne ite me tõi, ne hapu na intuwre ita ri curia ikre kam me ipãm me hàhhuc, ne me inõi pê rý pëa mã hamre — hane.

Mã Joje te me cajpëar prãmte ihhêj ne incryac kam me cumã:

— Me apê me hõmpun catêjê, ca pjê kwý to me gãhkij prãmte ame hajýr to me apa — hajýr. Ne cute me hacjên xà kam me hacjên, mã me ahna amcro in-crê. Mã Joje te me cumã harkwa to:

— Wa ite me gahkre pej prãmte, wa ha me acapi, mõrmõi ajkĩ me ahêj xi nare, nare, mõrmõi me ahêj xi. Ca ha me gũrkwa wýr me ampo hy to me mõi, ne hacpý ne ajpên ate me amji jaxàr xà ata kam, ca ha ajpên me atõi intuwre ita japrõ. Ne ca ha me anõi pyxit ne ahtwý, ne me hacjên xà kam xa, quê ha ahnaa me akwý me atõi intuwre ita to me cato — hajýr. Mã mehnõi ita japrý te Ximãw ita curia me hacjên xà kam hàhhuc.

Mã Joje mã hàpên catêjê te ampo hy to me cumã hàhcuprõn partu, ne por ihpore to ampo hy pan me hàmjõr ata, cute hacpýa mã Joje jarkwa kõt ampo hy cjên xà kam me hir. Mã nee mehkjêjê te me hahkre pej nare. Ne ma me to mõi. Mã me ahna caxwa, mã cute ampo hy kam mehpore mã cator, ne ampeaj kam me cumã amji na pa, mã cute amji mã me harkwa to:

— Jũ na xà na mã Pahpãm te me pahto hajýr? — hajýr. Ne me hũrkwa mã me cator, ne cute me hũm pê Ixaher mã mehcunea jarên par.

Mã cute harkwa to:

— Ramã nee Joje ipa nare, ne Ximãw nee ita ri apu mõi nare, ca ramã hacpý mãa mã Pẽnjamĩ to me amõi prãm cakrõ, ca ha nee me to amõi nare — hajýr.

Pê hipêr Ejit jõi pjê wýr me mõi

Kam To Ihtêm Xà 43.1-34

Mã jũ mã me ahna putwýr te mã me cupê, por cute me hõi japrõr ata jamre. Mã Ixaher te mehkra mã:

— Hacpý mã me amji jaxà, Ejit jõi pjê wýr, ne hipêr me ampo hy kwý jũhkà — hajýr.

Mã Juta te hũm mã:

— Ejit jõi pjê jõi pahhi ma ame ikjê intuwre ita to me imõi nare ita na, me ito ihcaca. Jũ wýr wa me Pẽnjamĩ japrõr nare ne me mõi — hajýr.

Mã Ixaher te amji kam hapac, ne amji mã harkwa to:

— Jũ wýr cu ita pê me amji pytà, mër pahhi ita mã ate me ampo jõi xà impejti to me mõi, ne hanea ne me Pẽnjamĩ to mõi. Quê ha Pahpãm pahhi ita cuna mã, cumã cute amji kam hapac xà nõ xi, quê ha ihtýj

Ximãw me Pẽnjamĩ to tojnõi, quê ha me amji jaxà — hajýr. Mã ma hipêr Ejit jõi pjê wýr me mõi.

Pê Joje hipêr mehkjêjê pupu

Ne ma Joje pê ihtõi wýr me cator. Mã Joje te mehkõt Pẽnjamĩ pupun, ne cute cumã hũrkwa jamãr catê mã:

— Quê ha me hũmre itajê ita kam ijũrkwa kam me apà, na ca ha me hàpàn xà caxuw me haprõ — hajýr.

Mã ma cumã hàpên catê ita te me haprõr ne me to mõi, Joje jũrkwa wýr. Mã ampeaj kam me cumã amji na pa. Ampo na? He ihtýj ampo hy cjên xà kam ihpore ata na ame amji na amjĩ na ri. Ne cute me Joje mã hàpên catê mã, por ampo te hajýr xà ata na, me amji jarên.

Mã me cumã:

— Ame pa nare, ne Pahpãm pê me amã ihpore ata gõi, ne ampo hy jõi pore, pê wa ramã cupy — hane. Ne cute Ximãw cator, me hacjên xà pĩn, ne ma Joje jũrkwa kãhti ata wýr me to mõi. Mã Joje te me ahna amji caxàr, mã cuna mã mehpýpým par, jirõi pê mã ri cute ame cumã ampo jõi xà atajê jõi.

Mã cute mehcukij to:

— Xà cormã me apãm ita tĩar? — hajýr.

Mã me cumã:

— Ýhý, cormã ihtĩar ne impeaj, ne cama ramã ihwej-tu — hane.

Mã apu Pẽnjamĩ pupu, ne cute me cumã harkwa to:

— Xà atõi ita pê mã me acahhur? — hajýr.

Mã me cumã:

— Ýhý — hane. Mã Joje te hapu na mehcahhur pê ihtõi ita mã harkwa to:

— Ikra, quê ha Pahpãm ato impej — hajýr. Ne ramã me kam incwýr xàa kam, ne ma põi mã cato.

Ne cute mehkjêjê mã ajkõt pit mã ihkrĩ xà jahkre par. Cute mam ita jýr, ne hapu na ita jýr, ne ihcote na ita jýr, ne hapua na mehcahhur na, Pẽnjamĩ jýr. Mã mehkjêjê mã hũpaa to hũpa. Ampo na? Jũ mã mã cute ne ajte ajkõt me pýpým xà ata na me hahkre pej, ne me krĩ par? Ne me hirõa pê cute Pẽnjamĩ mã hõi jõi. Mã mehcunea jàpàn.

Pê Joje hipêr mehkjêjê capi

Kam To Ihtêm Xà 44.1-34

Mã iràrà na ma ramã me mõi xàa kam, mã Joje te cumã hàpên catê mãn, ne cumã me hàmcjên xà kam ampo hy to hipu partu, ne kam ihpore nõr par. Ne Pẽnjamĩ jàmçjên xà kam, cute aracri cumã Joje kõm xà impejti ata xàr. Mã ma awcahti xà wýr me to mõi. Mã me ahna ahtũmre mã Joje te mehkõt cumã hàpên catê kujahêc, quê mehcukij, ampo na mã ajte cute me cupê ihkõm xà to hàhkij.

Mã ma cumã hàpên catê ata mehkõt tẽ, ne cute me cahuc, ne mehcukij, ne me cumã:

— Ampo na mã ate me ijõi pahhi pê ihkõm xà to gãhkij? — hajýr.

Mã mehkjêjê me cumã:

— Hamreare, wa nee me inõi te to ijãhkij nare. Ca hapên prãm ne gapacta ne hapê. Ca ha ate me inõi jõi

kàhà kam pahhi kôm xà ita mã acator na, quê ha ty, ne me icahhur, wa ha cama amji to me cumã ijàpên catêjê na — hane. Mã cute hõ pahhi kôm xà japên kam ihtêm, ne cute Pênjamĩ jõ kàhà kam cumã cator. Mã mehcunea amehpec, ne ma hacpý mã cute krĩ wýr me amji jaxàr.

Mã cormã ikrea kam Joje jý, mã cute me amji jaxàr ne hýrmã me cator, ne Joje cuna mã pjê kam mehpýpým. Mã cute harkwa to me cumã:

— He, xà ite ampo itajê cunea na me gahkre pej na, me apê ijahkre kêatre? — hajýr.

Mã Juta cumã:

— Me ijarkwa jũ to, wa ha amã me icakôc? Pahpãm te ri, por pê wa me ikên to ata jahpan xà na, ame ito kên. Na wa ha cama amji to amã me ijàpên catêjê na — hane.

Mã Joje te me cajpëar prãmtte me cumã:

— Quê! Por hõ kàhà kam ikôm xà nõ ata, quê ha pyx-it peaj ne cupê imã hàpên catê, ne me acahhur gapacta ne me acuto, me apãm wýr — hajýr.

Mã Juta cumã:

— Me ijõ inxũ ita ramã ihwejtu, ne ramã cumã ihkra kĩnti ata cupê ipictor, ne wa ihkra ita to me cumã imõr nare, quê ha hũjapê to amji cura. Ne ito ca ha haxà jahê, wa ha pa amji to amã ijàpên catê na — hane.

Pê Joje mehkjêjê mã amji jarê

Kam To Ihtêm Xà 45.1-28

Mã Joje te hũcanãr nare na amji cajpër, ne mehkjêjê intête, cute me cuprõn atajê cunea cator, mã mehkjêjê pit jàhhuc. Mã apu amrã ne cute mehkjêjê mã:

— He ipê Joje — hajýr. Mã Joje cupate mehkjêjê aracri amehcuhhê. Mã hipêr me cumã:

— Ipê Joje, ipê, por pê ca me atõ to ihpore na me ahpapa ata wa. Pê Pahpãm mam me acumam ikujate, mãr wa me ato me atyc xà jahpa. Na ca ha me pra, ne me pajõ inxũ mã me ijarê — hane. Ne cute Pênjamĩ pýn, ne ihkõt mehkjêjê japýn par.

Mã Paro te Ixaher pê Joje pãm na harên par, ne cute haprõr na mên, quê amji wýr haprõ quê cahê na ihkrĩ. Mã Joje te me cumã amji jarên jirõ pê mã ri, hũm mã cute ampo kĩn xà jõr xà atajê kujahêc.

Pê Ixaher mehkra mea mã Ejit jõ pjê wýr me antuw

Mã mehkjêjê te me amji jacjên, Canãn jõ pjê wýr, ne cute me hũm pê Ixaher ata mã Joje tĩar na me harên. Ne hanea ne cupê Ejit jõ pjê jõ pahhi na me cumã harên. Mã nee hũm te me hũjarên xà ita to amji mã hajýr nare, ne nee ajmãr hũpar nare, ne ihkrã pictor tu. Ne cute Joje te ampo kĩn xà te cawrõ jõ kujti to hipu tu na hõmpun, ne hacpýa mã amji krã kam hapac. Ne cute amji mã harkwa to:

— Xãmte cormã ikra pê Joje tĩar na ipa, na wa ha ityc xwýjrea na itýj hõmpu — hajýr.

Pê Pahpãm Ixaher to hàhtõa na cumã hũjahkre

Kam To Ihtêm Xà 46.1-7, 28-33; 47.1-11

Ne ma Ixaher ita hàhcukrêj me, hõ pryti me, mehkra cunea to mõ, ne ma pry cahti ri Pêxerpa jõ krĩ xa ata wýr me mõ, curi me hõt prãmtte, ne me cator. Mã caxwa mã cute ampo pry ita curan, ne cute to Pahpãm kam hapac xà caxuw to caxàr.

Mã caxwa ri Pahpãm te Ixaher mã ihcakôc, ne cumã:

— Ipê gõ Pahhiti, ne ipê apãm Pãm, na ca ha nee apu Ejit jõ pjê wýr amõr xà ita cupa nare. Ampo na? Wa ha ato gàhtõa to gàhtõ, ne jũ caxuw hacpýa ne Canãn jõ pjê wýr ajpên me atãmxwý tãmxwýjê to amji jaxà — hajýr.

Mã me ahna apê mã ma me mõ, Ejit jõ pjê wýr. Ne ramã me hàhtêp, mã Ixaher te amji cumam Juta kujahêc, quê Joje mã ramã hýrmã hàhtêp to mõr na harê. Mã tẽ ne Joje wýr cator, ne cute cumã hũm jarên. Mã Joje jũpar, ne cute hõ cawrõ na kujti to hàhcuprõn, ne ma cute hũm cajpar prãmtte tẽ. Ne cute ihcajpar, ne me ajpên pýn, ne ame ajpên kam me amrãhti, ne cute me ajpên kam mencwýr ita krýnre nare.

Mã Ixaher pê hũm ata te cumã harkwa to:

— Hamre, wa ha itýj ato ijapac xà nare kam ty. Ampo na? Wa ite atĩar na akuc pupun, ne hanea ne apeaj na apupun, na wa itýj ita caxuw ityc to prãm — hajýr.

Mã Joje te mehkjêjê mã:

— Hã, wa ha ma tẽ, ne Paro mã ramã me acator na me garê, ne hanea ne me apê carà cahàcti jamãr catêjê na cumã me garê. Quê ha ihtýj põ ita kam me gãhhuc na me gamã, ca ha kam me ahtwý — hajýr.

Ne ma tẽ ne cator, ne cute Paro mã me harên, ne cute mehkjêjê to xíc ne cumã me hahkre. Jirõ pê mã ri Joje te hũm japrõr ne ma Paro wýr to mõ, mã cute Pahpãm mã Paro cajrên to impejti. Mã Paro te Ejit jõ pjê kam me hàhhuc na me cumã harkwa, mã me hàhhuc. Hamre.

Pê Ejit jõ pjê kam prãm cati cato

Kam To Ihtêm Xà 47.13-20

Ne caku te xet ita kam hàhhuc, mã hamre, pjê cunea kam ampo cunea tyc par, ne ampeaj kam prãm cati.

Na ri ma Joje wýr mehcunea me pra, cute me ampo hy japrõr prãmtte. Mã hanea ne ampýa mã amehkrĩ atajê te hajýr, ne me hapõj. Ne me cupê ihpore jamre par, mã cute me hõ parxa to, ihpore na me hàhpan kam mehtêm, mãr quê ame to me hõ pê ampo hy japrõr. Ne me cupê pryti jamre par, mã ma cute me hõ pjê to, ihpore na me hàhpan kam ihtêm, ampo hy caxuw.

Pê Joje Paro mã ajco ampo itajê cunea japrõr to ipa. Mã hamre, Paro Ejit jõ pjê cunea to hõ tekjê ne to hõ pjê. Ne Joje pê ri me hõ pahhi catêjê jõ pahhi.

ME CATOR XÀ

Ýhỹ, hapu na ihkàhhôc ita kam, Mojxe pým xà me, cute amji kam hapac xà cunea jarě. Pê Ejit catêjê me hõ pjê kam, Ixaher catêjê to kêanre. Pê tee menquêtjê jõ pjê wýr ame amji jaxàr prãm. Na pê Pahpãm Mojxe te Ejit jõ pjê ata pê me to cator catê na hãm. Mã Ixaher catêjê cunea to pjê ata pê cator. Cwýrjapê ri ihkàhhôc ita japrý te (Me Cator Xà).

Pê Ixaher catêjê Ejit jõ pjê kam me amji pupun xà to kêanre

Me Cator Xà 1.1-22

Ýhỹ, pê caku jàhtôa kam, ajco Ixaher kra curi mehkrí. Pê Ixaher xwý ty, pê hakàn pê cormã me ahna caku hàhtôa pê Joje ty. Ne pê Joje tyc jirô pê, caku jàhtôa kam ihtàmwxwý me, mehkra me, me amtà, ne me hàhtôa to me hàhtô. Ne pê hanea ne ramã Paro ty.

Pê haxà kam jùm xàr ata pê Paro tuw, ne amji to pahhi. Ne nee pê Joje pupun nare, ne nee hahkre pej nare. Ne cute Ejit jõ pjê kam mehkrí catêjê mã harkwa to:

— Me pajirôa pê Ixaher catêjê kra jàhtô, cwýrjapê quê ha jũ caxuw me pahkam incryc, ne ihtýj me pajirô pê me xa, ne me pamã me hàpên jicu, ne ma jũ kam me papê me cato. Cwýrjapê cu ha amji mã me to cama me pamã hàpên catêjê na — hajýr.

Ne Ejit catêjê te Ixaher catêjê caxuw me hõ pahhi pahýtjiti atajê mã hapôj, ne me ahna me hũxwýr, mãr quê me cumã me hàpên xà týjiti atajê to hàhtôa, ne ahna me cumã quêt, quê ampeaj kam me apê. Pê me hàpên xà jirôa pê me hàpên to catia to cati, pê nee me cumã hàmjör nare. Ne cute me Ixaher catêjê mã, mã me harkwa kôt cute me cumã krí catia to ipijakrut ne me hãm.

Ne me apêa to me apê cacrô, cyt ne me hàhtô to tẽ ne me hàmtàr, ne cormã me ajhu. Mã Paro te me cumã mehkra pýpým catêjê atajê tehcajpar catêjê mã harkwa hyr, ne me cumã harkwa to:

— Quê Ixaher catêjê mã mehkra xũmre mehpyým, ca ha ma mehcura — hajýr.

Mã nee cute mempar, ne nee harkwa kôt cute me ita ton nare. Ampo na? Ampeaj kam me cumã Pahpãm cupa, na ri nee Paro te ampo na me mên ata to cute me nare. Mã Pahpãm te me cumã mehkra pýpým catêjê atajê tehcajpar to impejti, ne hanea ne cute mehtehcajpar, ne me cumã mehkra jör.

Mã Paro te mehkwy mã, cô kam Ixaher catêjê mã ihkra xũmre pýpým atajê cunea rên na hũjahkre, mãr quê cô me ipír pa.

Mojxe pým xà

Me Cator Xà 2.1-25

Pê amcro ata na Ixaher catêjê nõ pê Rewi tàmwxwý tàmwxwý cahãj nõ ita mã ihkra xũmre ita pým, ne impejti. Mã cute to ipimxur ita to putwýr to incrê. Jirô pê mã ri cupê to ipimxur jahkre kêatre, mã cute kàhà ton, ne cumã cô xàr cupate, cute ihtô xà to ihkre cunea jihê partu, ne to ihcahty. Jirô pê mã ri cute kam ihkra xũmre ata xàr, ne cô tohkà na têtêc krô ata catàt kre na hãm. Mã ihkjê cahãj japrý te Mirãnkwyj ita ampýa mã ahna xa ne irít, mã ampo te kam mare mã to jũ mã, mã cute ahna hõmpun prãmte.

Pê Paro kra cahãj cô kam Mojxe mã cato

Mã Paro kra wýr prãmte, ma cô mã mõi, ne cute cô tohkà na têtêc krô ata catàt kre na kàhà pupun, mã kam me ahkrare nõ ita nõ. Mã cute ahna cumã hàpên catê cahãj nõ mên, mã cute cumã to hàpir. Mã cute ihpro mên, mã cute incwýr kam ihtêm. Mã Paro kra mã hapê, mã cute harkwa to:

— Ixaher catêjê kra nõ mõrmõi he — hajýr.

Mã ahkrare tøj ita ampýa mã apu hamãr to mõi, ne ma Paro mehcaxwýj wýr tẽ, ne cute ihcukij ne cumã:

— Xà wa amã Ixaher catêjê cahãj nõ japrô, quê amã ahkrare nõ ita to pijahô ne to ajpa? — hajýr.

Mã cumã:

— Ýhỹ, mër tẽ, ne jùm japrô — hane. Mã ma tẽ, ne cute ihtõre menxi japrô, ne hýrmã to cator. Mã Paro mehcaxwýj ita cumã:

— Ca ha ahkrare nõ ita pý ne imã to ajpa, wa ha amã amgõ — hane. Mã hamre, ma hũrkwa wýr cute ihkra ata pýn ne to tẽ.

Pê jũ mã ahna caku pê ramã cati ne ihkà. Mã ma inxi ita to tẽ ne cute Paro kra ita mã hõr. Mã cute amji mã haprô, ne to amji kra, ne cumã haprý to Mojxe. Ne haprý ata kôt harên xà pê “Cô pê cute me to hàpir”.

Pê Mojxe Paro cupate põi kam me hamreare ata wýr tẽ

Mã ramã Mojxe na caku jàhtôa, mã ramã ihkà to mõi. Ne amcro nõ na apu mõi, ne cute Ejit catêjê nõ te Ixaher catêjê nõ cahhyr na hõmpun. Ne amji pu na irít mã me hamreare, mã cute hapête ihcuran, ne pjênxõmti kam me hamreare ata kam, to ipimxur.

Ne amcro nõ na ma hipêr apu mõ, ne cute Ixaher catêjê pijakrut te apu ipijapu na me hõmpun, ne me cumã:

— Ampo na mã ca ame ajpên cahhy, pom ca ajpên to me akjê ita? — hajÿr.

Mã ihnõ ita cumã:

— Jũm te mã ajkam me ito impej catê ita na axãm? Xà ca ate mam Ejit catêjê nõ curan ata cuxà mã, ca apu icuran prãmte, ito hane? — hane. Mã Mojxe te hàhcuran xà ita na amji jarên par na amji jahkre pej, ne ampeaj kam cumã pa.

Mã Paro te Mojxe na harên par to hajÿr, ne cute ihcuran na me mên. Mã ma ramã me wÿjrea na, Mitij jõ pjê wÿr ipictor ne tẽ. Ne curi cator, ne curia jũmjê cahê na hàhhuc, ikre ata kam, ne pea hikwa tuw, ikre kam hàhhuc ata kra nõ me.

Mã ahna caku jãhtõa jirõ pê Paro ata tyc jakàn pê, mã cormã Ixaher catêjê apu amji pupun xà kêanre to me amji pupu. Mã Pahpãm te mencwÿr kam hapac, ne cumã me caprĩ xà. Mã cute mehtehcajpar to amji kam hapac.

Pê Pahpãm Ixaher catêjê to ihmipej catê na Mojxe mã harkwa

Me Cator Xà 3.1-22

Mã amcro atajê nõ na, põ kam Mojxe apu hũprequêt jõ carà cahàcti hòhti jamãr to mõ. Ampyã mã, por Pahpãm jõ hàhkà jakõtti japry te Ihcuhyt jõ kên ata cahê na, apu hamãr to mõ. Mã Pahpãm te cõjkwa pĩn harkwa na memprar catê na amji ton, ne cuhy kam Mojxe wÿr iwrÿc. Mã Mojxe te ahpytĩ nõ pupun, mã kam cuhy põr, ne nee ajte to caxàr nare. Mã ma hÿrmã tẽ, cute hõmpun pej prãmte, ne taa amji mã:

— Ampo mã ajte apu hane? — hajÿr.

Mã Pahpãm te cumã hàkjêr ne cumã:

— Mojxe, nee ca ina gãhtêp tu nare, ne apar kà to põj. Ampo na? He pom ca pjê kam xa ata ajteare mã, ne cupê itekjê, na ca atÿj apar cakrõ kam xa — hajÿr.

Mã Mojxe te harkwa kõt hõ par kà to põj, ne ampÿa mã xa ne kampa. Mã cute cumã harkwa to:

— Ipê apãm Pãm Cati, ne cormã ipê me aquêtjê pê Aprãw me, Ixac me, Jaco Pãm Cati wa — hajÿr.

Mã Mojxe te ihkuc pro, cute Pahpãm pupun ne ihtyc cupate. Mã Pahpãm cumã:

— Wa ite Ejit jõ pjê kam me ikwÿ te amji pupun xà kêanre to me amji pupun na me hõmpun. Na wa ha pjê ata pĩn me to icato, ne ma pjê impejti ata wÿr me to ihmipej to imõr to prãm. Na wa ha pa pahhi pê Paro wÿr akujate, ca ha cumã ijarê, quê me ikwÿ mã hikra, quê Ejit jõ pjê pê me cato — hane.

Mã Mojxe cumã:

— Jũ wÿr wa ha apu amji mã hamã, ne ijãpên xà ita to — hane.

Mã Pahpãm cumã:

— He wa ha itÿj gãpên xà ita kam acahê na apu mõ — hane.

Mã cumã:

— Wa ha Ixaher catêjê wÿr mõ, ne icato, quê ha jũm icukij ne imã: “Jũm jarkwa kõt mã ca me iwÿr acator?” hane. Jũ mã wa ha cumã amji jarên ita to? — hane.

Mã Pahpãm cumã:

— Ca ha me cumã ijarên to hane he “Pahpãm te imã amji jarên to hajÿr he: ‘Ipê, por mam me aquêtjê Pãm Cati ata’ ” hane. Quê ha ahna me acukij to: “Jũ mã mã jũm ita japry?” hane, ca ha me cumã: “Jũm ata japry pê ‘Ipê’ hane. Ampo na? He cupê me Pahton catê me, me pajõ Pahhiti pê Pahpãm. Ne cute haprya na me awÿr ikujahêc” hajÿr — hane. Mã Mojxe te impar.

Mã hipêr Pahpãm te Mojxe mã harkwa to:

— Ca ha Ixaher catêjê pê prohkam atajê to cuprõ, ne me cumã ijarên to hane he: “Me Apãm Cati te me ate me amji pupun xà kêanre na me apupun, na quê ha Ejit jõ pjê pê me ato cato, ne ma pjê impejti ata wÿr me ato ihmipej to mõ” hane.

— Quê ha ihtÿj ate me cumã gũjarên xà ita to amji mã me hane, ne me akampa. Ne ihtÿj pjê jõ pahhi pê Paro wÿr akõt me mõ, ne me acunea acator xà ita na me ahwÿ. Ne ca ha me cumã: “Ca ha me ijamã, wa ha pjê kam me hamreare ata kam me imõar to amcro to incrê. Ne cõjkwa kam me ijõ Pahpãm to me amji kampa ne cumã me ampo gõ” hane. Ne ramã pahhi ata te me acator na me gamãr nare na imã hahkre pej. Cwÿr-japê wa ha ite Ejit jõ pjê me, me to kên prãmte, me hÿrmã ite to kêanre xà ata kujate. Jirõ pê mã quê ha ihtÿj pahhi ata me acator na me gamã, ca ha me acato — hajÿr.

Pê Pahpãm Mojxe te ampo to ipihho xà caxuw cumã carõt gõ

Me Cator Xà 4.1-31

Mã Mojxe te Pahhiti pê Pahpãm mã harkwa to:

— Mõrmõ quê ha nee me ikam hapac nare — hajÿr.

Mã Pahpãm te ihcukij ne cumã:

— Mêr ampo mã ate gũhkra to ipyr ita? — hajÿr.

Mã cumã:

— Pĩ cajrer — hane.

Mã cumã:

— Mêr pjê kam amẽ — hane. Mã Mojxe te pjê kam pĩ cajrer ata mên, mã cute cagã na amji jahkre, mã ma hũpate tẽ.

Mã Pahpãm cumã:

— Amji jaxà ne cagã ita japy na apy — hane. Mã cute amji jaxàr ne hapy na ipyr, mã hamre, hacpÿa mã cute pĩ cajrer na amji jahkre. Mã cumã:

— Ca ha me cumã ita to hane, quê ha me gahkre pej pyrentu — hane.

Mã Mojxe cumã:

— Ijõ Pahhiti, ipê icakõc xà to impejti jahkre kêatre — hane.

Mã cumã:

— Mêr jũm te mã me hũmre itajê mã harkwa ton? Pom wa itea me amã me garkwa ton ita? Ca ha ita caxuw ma mehÿr mõ, wa ha acakõc na atehcajpa — hane.

Mã cumã:

— Ajteare mã jũm ca ihkujate, ne pa, ca nee ikujahêc nare — hane.

Mã Pahpãm apu kam incryc ne cute cumã harkwa to:
— He atõ Arãw ri ihcakõc pejti, na wa ha acaxuw cumã ijarkwa ta, ca ha ca cumã harê, mãr quê taa pahhi mã awjarê. Wa ha pa me cumã acakõc na me atehcajpa, ne hanea ne me ate me cumã ampo ton xà atajê to hahkre — hajÿr.

Mã Mojxe te impar ne hĩxi me, mehkra japrõr ne cawrõ cahàcre kam me hÿr, ne ma me to mõi. Ne cute hũhkra to hõ pĩ cajrer te cagã na amji jahkre ata pyr ne to mõi.

Pê Mojxe prohti kam Pahpãm jarkwa jarê

Mã ramã Pahpãm te Mojxe tõi pê Arãw ata, hĩpê ihkujahêc, mã me ipicaxêr. Ne ma Ejit jõi pjê wÿr me mõi, ne me cator. Ne cute me Ixaher catêjê kà to pit mã me cuprõn, cute me ajpên par prãmte. Ne cute me cumã Pahpãm carõt to ipipê. Mã Ixaher catêjê pê prohti kam Pahpãm te me hũtâr xà na, me hÿrmã Mojxe me Arãw kujahêc na me hũpar, ne hũrên ame hakry. Na ri cute Pahpãm to cati prãmte me cumã:

— Me ijõ Inxũ Cati! Ampeaj kam acati ne apej! Na ri ate me iwÿr me ikên pê me ito cator catê kujahêc pyrên me ijakry — hajÿr.

Pê pahhi Paro hipêr Ixaher catêjê to kêanre

Me Cator Xà 5.1-7

Jirõ pê mã ri ma Paro wÿr Mojxe me Arãw mõi, ne cute me cumã hũjarên to:

— Ýhÿ, Paro pê pahhi, me ipê Ixaher catêjê jõi Pahhiti, ne cõjkwa kam me ijõ Inxũ Cati ata te amã harkwa to hajÿr he: “Me ikwÿ to tojnõ quê põi mã me cato, ne põi kam ame amji kĩn, ne ipejti na ame ijarê”. Hõhõ, cute amã harkwa to hajÿr — hajÿr.

Mã Paro jũpar ne me cumã:

— Wa nee ite me Apãm Cati pê Pahhiti ita na hahkre pej nare ita kam, jũ wÿr wa ha me apê mehwÿ itajê to tojnõ quê me mõi. Ne cama hacpÿ mã me gápên xà wÿr me amõr pyrentu! — hane. Ne caxuaw amcro ata na Paro te me ahna me hõ pahhi pahtÿjti ata to ihhimpej, ne me cumã:

— Me cumã me hápên xà to ajcamê ne to catia, mãr quê me apêa to me apê, ne me ahna cõ pra, quê hipêr me Mojxe me Arãw hêj xi xà ita par nare — hajÿr.

Pê Pahpãm Paro mã ihkrã tÿj jahpan xà na, cute amji pupun xà kêanre gõi

Me Cator Xà 7.1-24

Mã Pahpãm te hipêr Mojxe mã ihcakõc ne cumã:
— Hacpÿa mã Paro wÿr me amji jaxà ne cumã me ijarê. Quê ha ihtÿj meikwÿ pê Ixaher catêjê to tojnõ, quê ha me cato. Ne quê ihhêaj to Paro me acukij to: “Jũ mã wa ha ajte, ne me Apãm Cati te me akujahêc xà ita na me gahkre pej?” hane, me ajkaam quê ha Arãw pjê kam pĩ cajrer ita mẽ, quê ha Paro kam mare mã cagã na amji jahkre — hajÿr.

Mã ma Paro wÿr Mojxe me Arãw te amji jaxàr ata caxuw ri, pĩ te cagã na amji jahkre. Mã Paro te me hũxy xi catêjê to cuprõn, mã hanea ne cute me cagã ton. Mã Mojxe me Arãw te cagã ton ata te me cupê hõ cagã atajê cunea pin par.

Mã Paro te hõmpun cakrõ, nee cute mempar nare. Ne amjia kõt ihkrã tÿj mã hâr, na ri ma amempar caca. Ne nee cute hõ pjê pê, Ixaher catêjê cator na me hamãr nare.

Mã Pahpãm amji mã:

— Mã ajte Ejit catêjê itajê nee amji mã me icupa nare, ne ite amji mã me ampo ton atajê pit cupa to me ipa. Ne ampo itajê pê Nir jõi cõ me, ampo jarare me, ampo pry. Ne me cumã ampo itajê pê me hõ pahpãm. Na wa ha me cumã ampo itajê pê pahpãm nare na to ajpê, ne toa mehkên mã me cumê — hane.

Mã Pahpãm te ma amcro nõ jõi apê nõ na Mojxe me Arãw kujahêc, Nir jõi cõ tohkà wÿr. Mã hanea ne Paro curi cator. Mã kam mare mã Arãw te hõ pĩ to cõ cakwĩn, mã cõ te me caprõ na amji jahkre. Mã apu tep tyc partu. Ne jũ wÿr quê jũm cõ ata kwÿ to ikõ. Ne ampo itajê cunea te cama Paro mã ihkrã to ihtÿj cati to cator. Cwÿrjapê ri Pahpãm te cumã cute amji pupun xà kêanre atajê kujahêc.

Pê Pahpãm hipêr Paro mã cute amji pupun xà kêanre kujate

Me Cator Xà 8.1-22; 9.1-35; 10.1-29

Mã hipêr Pahpãm te Ejit catêjê mã mehkên xà nõ kujahêc. Ne Pahpãm hãn ne ampo itajê kujate, mã Paro hãn ne Mojxe me Arãw na ahwÿ, cute me ampo kên atajê to hamre prãmte, ne me cumã:

— Ca ha ampo kên itajê to me hamre, wa ha me acutor na me gamã, ca ha ma me acuto — hane.

Mã hãn ne Mojxe me Arãw ampo kên atajê to me hamre, mã hõmpu ne ma hacpÿ mã ame huwahi. Ne por Pahpãm ampo kên kujate itajê, cama Paro mã ihkrã to ihtÿj.

Na ri hipêr cute pôrõre jãhtõa ne ihkujahêc, mã cute pjê to hipu tu, ne ikre mã acjêj, ne hanea ne me hõ kam ajhu, ne hanea ne me hõt xà kam ajhu, ne ampo cunea kam ihkrĩ.

Jirõ pê mã ri hanea ne cute prũmre xàre kujahêc, jirõ pê mã ri hanea ne cute kõp kujahêc. Mã ma ajte cor mã Paro ame cator ita na ame to ihcaca.

Mã Pahpãm te me cumã hà pahtÿjti nõ ita kujahêc, mã cute Ejit catêjê pê hõ parxare cunea jipej.

Jirõ pê mã ri Pahpãm te me cumã cuhê kujahêc, mã Ejit jõi pjê kam me hãm catêjê cunea na cuhê.

Mã hanea ne cõ carõt te amji to kên itajê pÿpÿm, cõjkwa pĩn, ne cute apu põi pê me ipa catêjê kwÿ jixõn, ne ame hàprà atajê kwÿ to kên.

Mã hanea ne cute mehwÿr xycxyc jãhtõa ne ihkujahêc. Mã cõ carõt te amji to kên te ame hàprà to kên nare atajê, xycxyc te ma to irõ ne ipin partu.

Jirõ pê mã ri cute Ejit catêjê kam awcapãtkõ na amcro incrê ita kujahêc, mã me kam awcapãtkõ ita na

amcro incrê. Ne Ixaher catêjê kam, nee awcapatkô nare.

Mã ajte cormã nee Paro te Ixaher catêjê kujahêc nare, ne nee me cator na me hamãr nare, ne cama cute Mojxe me Arãw mã me harkwa to:

— Nee ca ha hipêr me amji jaxàr nare! Ca ha hipêr me amji jaxà ne me ty! — hajÿr.

Pê Pahpãm Mojxe mã me Hakren xà jô amji kîn to hahkre

Me Cator Xà 11.1-10; 12.1-51

Mã Pahpãm te hipêr Mojxe mã harkwa to:

— Wa ha hipêr Paro mã, hõ pjê kam mehkri atajê cunea mã, mehkên xà nõ kujate. Jirô pê mã quê ha ihtÿj me gamã, ca ha me acato. Wa ha awryc mã awcapatkô picapôn kam Ejit jô pjê cajpuw tẽ, quê ha me hũmre cakônĩ pÿpÿm atajê cunea ame ty. Quê ha mam Paro mã ihkra xũmre cakônĩ pÿm ata ty, ne ihkôt mehkwy cunea pê mehkra xũmre cakônĩ cunea ihtyc pa. Ne hanea ne ampo pry mã mam ihkra xũmre pÿpÿm atajê te hajÿar ne ihtyc pa.

— Ne pom putwry ita kam, pjê ita pê me acator xà, quê ha cupê caku cunea kam, me gõ amji kîn catia jô putwry, ne me gõ amji kîn ita quê ha hane he.

— Ca ha amcro te tej ita na ahpÿanre na ikre kôt ame carà cahàcre hõhti kra xũmti te xwÿ nare na caku pyxit atajê capi ne me to caprã, ne ma me hamã. Ne amcro te cwatôxi ita jô caxwa kam, ca ha me carà cahàcre kra itajê cunea cura. Ne me caprô cwa, ne me to me gũrkwa jarkwa jatom to me hũjê.

— Ne me acunea cuhy na me hĩ xêt, ne ampo hõ xÿre ata kam ame ku. Ne nee ame, por pãw kam ampo jacrô te pãw to cati xà atajê kur nare, ne quêt me pãw tÿjre pit ku. Ne por quê ha me gõ cahhur ahtwÿ atajê, ca ha me to caxàr partu. Ne me akà me, me apar kà mã me amji jacjê, ne me axy xà caxuw amji mã me gâhcuprôn hiahpuro, ne me acuhhêa kam me apà. Ne me gũjarêan kam, me gâpàn cati hiahpuro, por me aprar xà jũwryhti atajê caxuw. Pom me gõ ita pê me Apãm Cati jô amji kîn jô, ata wa me amã to hahkre.

— Ýhÿ, wa ha Ejit jô pjê cajpuw tẽ, ne mehkra cakônĩ cunea jipej tu. He, ipyxit peaj ne ipê me Apãm to me Apãm, ne imã me gõ amji kîn ita to, ate me ito amji japackre na me ato prãm. Na ca ha caku cunea kam atÿj me amji kîn ita to — hajÿr.

Carà cahàcre amji to Ixaher catêjê kritxwÿ

Mã Mojxe te Ixaher catêjê pê prohti kam mehcunea to cuprôn ne me cumã hũjarên to:

— Me acunea amji mã me carà cahàcre hõhti cakônĩ xũmre na caku pyxit atajê pyxit ne me capi, ahpÿanre na ikre kôt, ne me to amji tÿj. Ne mehcure, ne cratti kam me caprô cjê, ne caxuw me ahtu pre incwa, ne me to gũrkwa jarkwa jatom to me hũjê, ne hanea ne kÿj rũm me to hatom. Ne nee caxwa ri ikre pê ame gapôj nare, mãr quê Pahpãm me ana tẽ, ne hõmpu, ne nee ame akra caxun nare. Ampo na? Quê ha me Pahpãm

pjê ita kam wrÿ ne apu mõi, ne Ejit catêjê xũmre cakônĩ cunea jipej. Quê ha harkwa na carà cahàcre kra pê me pahkritxwÿ ata caprô pupu, ne nee mehcurean catê jamãr, quê ha me akra curan wÿr mencjêj nare — hajÿr.

Pê Pahpãm me cakônĩ jipej

Mã Ixaher catêjê te Mojxe te ampo na me mên atajê ton partu. Mã Pahpãm te caxwa ata kam cõjkwa pîn harkwa na cumã hàprê catêjê nõ kujahêc, mã cute Ejit jô pjê kam me cakônĩ catêjê jipej tu. Mã me hõ pahhi catêjê pê mehkra xũmre cakônĩ tyc par. Ne hanea ne me cupê pahhi nare catêjê pê mehkra cakônĩ tyc par. Ne hanea ne ampo pry pê ihkra cakônĩ atajê tyc partu.

Mã Paro me cumã me hàpên catêjê me Ejit jô pjê kam, hõ krí cunea kam, caxwa ri ajpên to me hÿr, ne ame amrãa to ame amrã. Ampo na? Nee ikre nõ pyxit ne kam mehtyc nare, ne Ejit jô pjê cunea kam mehtyc. Mã Paro te Mojxe me Arãw na hàhwÿr ne me cumã:

— Hamre! Gapacta ne me acunea me ipê me acato! Ne ma me gõ Pahhiti te amji mã me ato prãm xà ata to, ca me. Ne hanea ne me gõ carà cahàcre hõhti me, pryti cunea to me acutor tu, ne ma cumã me icajrên, quê me ito impejti ne — hajÿr.

Ne pê Ejit jô pjê pê me cator xwÿjrea na, ramã Mojxe mehkwy mã Ejit catêjê na me hàhwÿr na, harkwa ta. Mã harkwa kôt ma me hÿrmã ame pra, ne ihpore catia na cute me hàhwÿr, ne hanea ne mehkà jãhtôa ne cute ahna me hàhwÿr, ne cormã cute me kên pràti me, wakÿre pràti me, me hũhhi na hê xà me, ahna me hàhwÿr. Mã Pahpãm te Ejit catêjê na me hàhwÿr xà ata kam mehkwy tehcajpar, ne por ampo cunea na me hàhwÿr atajê, cute me cumã hõr partu.

Mã caxwa ata kam Ixaher catêjê te Ejit jô pjê pê me cator prãmte me mõi na me ipyr.

Pê Ixaher catêjê cunea Ejit jô pjê pê cato

Me Cator Xà 13.21-22; 14.1-14

Ýhÿ, pê Pahpãm mehkwy to mõi xà ita pê hane he. Pê me cumã ahcakrã nõ kujate, mãr quê ihkôt me ipa. Ne amcro mã mam ahcakrã ita ahpar mã iry to ipa, ne me cumã pry to ipipê to ipa, mã ihkôt me ipa. Ne caxwa mã amji to cuhy ne me cumã pry cujro to ipa, mã ihkôt me ipa. Mã Pahpãm te Mojxe mãn ne cumã:

— Me ikwÿ pê Ixaher catêjê mã awjarê, quê Cõxwa-tepti cahê na me ahtwÿ. Ampo na? Quê ha ihtÿj Paro ame apictor na ame acãmji, ne ihtÿj põi me cõxwa tohkà na ame gapê. Ne wa ha Paro mã ihkrã to ihtÿj, quê ha me pahpynã. Wa ha ita caxuw hõ krãhtare cahhur, me cute icatihti na me ijarêan to me ijarên na me to. Quê ha ita caxuw Ejit catêjê me ijahkre pej, ipyxit peaj ne ipê me Apãm carôt tÿjti cati na — hajÿr.

Mã Mojxe te impar ne me cumãa harên. Mã Ixaher catêjê jãhhuc, por curi Pahpãm te me to hũjahkre xà ata ri. Mã pea Ejit jô pahhi pê Paro ata wÿr, Ixaher catêjê te nee me amji jaxàr xà nare jarên cator.

Mã Paro te cumã me hàpên catêjê cukij, ne me cumã:

— Ampo na mã pahte me Ixaher catêjê jamãr, mã amũ me cutor ne cute me pamã hàpên jicu? Hacme mehkôt! — hajÿr. Ne cute hõ cawrô jõ kujti to hàncuprôn, ne cute cawrô jõ kujti to xêjxênta ne capi, ne kam hõ krãhtare to hipu, ne ahna me hõ pahhi pyxwÿr partu, Ixaher catêjê kôt me to imprar xà caxuw.

Mã Ixaher catêjê te amji kôt Ejit catêjê jõ krãhtare pupun, ne ampeaj kam me cumã me hũpa. Na ri cute Pahpãm te mehtehcajpar ne me hũtâr na me hàhwÿr, ne me Mojxe mã:

— Xà me ijipej xà caxuw mã, ate põ mã me ito acator? Ne ampo na mã ate Ejit jõ pjê pê me ito acator? — hajÿr.

Mã Mojxe me cumã:

— Nee ca ame pa nare, ca ha ita kam, me Pahpãm te me pahpytâr xà impejti ita na me hõmpu. Ampo na? Pom ca ita kam ame Ejit catêjê pupu itajê, ca ha nee hipêr jũ caxuw me hõmpun nare. Pahpãm quê ha jũ na me pahto ne me pahpytã. Jũ wÿr cu amjia kôt me amji pytã — hane.

Pê Pahpãm me cumã Cõxwatepti to ajcapô

Me Cator Xà 14.15-22

Mã Pahpãm te Mojxe mã harkwa to:

— Mojxe, Ixaher catêjê mã awjarê quê me cahi rê. Ne ca, ca ha cõxwa cwÿrpê gõ pĩ cajrer pê, quê ha ajcapô, ne ihcajpuw me amã pry. Ca hame acunea cõxwa cajpuw pry ata kôt, amcrãre kôt me rê — hajÿr.

Mã Pahpãm te ahcacrã to ipintuw, ne Ixaher catêjê me Ejit catêjê cote na inxôr. Ne hãn ne ahna caxwa mã ahcacrã ata amji to cuhy ne Ixaher catêjê rũm ahcujro, ne Ejit catêjê rũm ri awcapãtkô. Na quê nee Ejit catêjê Ixaher catêjê cahuc nare.

Mã Mojxe te cõ incwÿrpê hõ pĩ cajrer ita pÿr, mã pea Pahpãm te cõ to ipicapôn. Mã kôc pahtÿjti ata cõ cajpuw, pry ata kôt apêa to apê. Mã pry ita kôt amcrãre. Mã ihtÿj Ixaher catêjê Cõxwatepti cajpuw amcrã ata kôt me irêr par. Mã cõ te me hũjê kam amji to kwÿc ne xa.

Pê Ejit catêjê cõ kam ame ty

Me Cator Xà 14.23-31

Mã Ejit catêjê jõ krãhtare me, me hõ cawrô me krãhtare me, Paro jõ cawrô jõ kujti me, Ixaher catêjê kôt cõ mã me hàr. Mã awcahti xà wÿr Pahpãm te Ejit catêjê to kên, ne me huwahi kam ihtêm. Mã pea cawrô jõ kujti amjia kôt ipinkrên, ne ihpÿpÿm, cwÿrjapê quê nee ihtêm nare.

Mã Ixaher catêjê cunea cõxwa jĩkjê mã me irêr par, mã Pahpãm te Mojxe mã:

— Hãcÿã mã cõxwa cwÿrpê gõ pĩ cajrer pê, quê ha cõ amji jaxà ne Ejit jõ krãhtare me, cawrô me, hõ kujti cunea pro, ne me ipĩr partu — hajÿr.

Mã Mojxe te cõ incwÿrpê hõ pĩ cajrer ata pÿr, mã hãcÿã mã cõ picaxêr, ne cute Paro jõ krãhtare me, hõ kujti cunea pro, ne ihcunea to ipictor. Mã nee cõxwa na ame irêr prãm atajê nõ jãhhuc nare.

Hõhõ, Pahpãm te Ejit catêjê jũhkra pê Ixaher catêjê pytâr xà ita to ri, cute me cupê me hũtâr. Mã cõxwa tohkà na, cute Ejit catêjê tyc ne ame hikwa na ame hõmpun. Ne cute me ahna Pahpãm carôt tÿaj to ihtÿj pupun, ne ame amji mã hũpa. Ne cute amji mã Pahpãm to me cati prãmte me cumã:

— Apeaj to apej! — hajÿr. Ne hanea ne cute Pahpãm mã hàpên catê pê Mojxe ata to amji mã mehhimpej.

Pê Pahpãm mana to Ixaher catêjê mã harte

Me Cator Xà 16.1-36

Ne ma põti ata cajpuw cute me mõr kam me to incrã. Mã mehcunea Mojxe me Arãw cuna mã amehcakôc, ne me cumã me harkwa to:

— Cu rÿ mã curia Ejit jõ pjê kam ame ty na mã. Ampo na? He quêt curi ampeaj kam me pamã me pajõ cati. Mã ajte ate me põti ita mã me ito acator, ate prãm to me ijipej prãmte — hane.

Mã Pahpãm te mempar ne Mojxe mã:

— Hõmpu he, wa ha cõjkwa pĩn, iràrà cunea na me amã me gõ pê mana ata kujate. Quê hapacta ne, cute ame ampo na amji mã me prãm atajê cawrà, ne ame cuku. Ne me cumã quê amcro pyxit kam me cawrà to pyxit, ne amcro te xêj ita jõ iràrà na, quê ha me cawrà to ajkrut. Ampo na? He amcro te xet ita jõ iràrà na wa ha nee me amã ihkujahêc nare. Wa ha cute me ipar na me hahkre pej prãmte, me cumã ampo itajê to — hajÿr.

Mã Mojxe me Arãw te Ixaher catêjê to cuprôn, ne me cumã:

— He amcro ita kam, ca ha me Pahpãm te Ejit catêjê jõ pjê pê me ato cator na me hahkre pej. Ne apê ita jõ iràrà na, ca ha me Pahpãm carôt pupu. Ampo na? Me ate cuna mã ame acakôc na cute me apar. Na quê ha pyt kam me amã hĩ gõ, ne iràrà na me amã kwÿr xôm gõ — hajÿr.

Mã caxwa ata kam pryre jara jãhtôa ne cator, ne ihhêj rũm cupê tutre, ne cute põ ita to ipictor tu. Mã mehcura ne me cuku.

Ne iràrà mã ampeaj kam atâr, ne atâr ata crã me ajkaam, mã krãa, ampo pê kwÿr xôm pyrãcti, inxôti ita cator, ne apu ihkrĩ pjê kam. Mã cute me hõmpun, ne ahna me hàhcukjêr to:

— Mÿr ampo mã ita? — hajÿr.

Mã Mojxe me cumã:

— Kwÿr ri Pahpãm te me amã hõr, ne haprÿ te mana. Na ca ha amji mã, me gũrkwa caxuw, ate ahna me prãm atajê to ame cuprô — hane. Mã ame hapôj, ne ahpÿanre na cute ame hõ itajê incwÿr.

Mã Mojxe te me cumã:

— Ca ha nee me anõ gõ pê mana ata to ihhi, ne amcro nõ caxuw amji mã ihcahhur kwÿ xãm nare — hajÿr. Mã nee mehkwy kwÿ te amempar nare, ne amehcahhur pyxwÿr. Mã ahna apê mã cute ame hõmpun, mã

ramã kam ampo cõre, ne ihkro. Mã Mojxe ame kam incryc.

Mã iràrà cunea na me hõ ata pit cawrà to mehcuhhê. Mã hãn ne amcro cacro ne ihxêt, mã pjê kam kwÿr to ame cuprõ atajê hamre ne jũ kam pra. Ne amcro te xêj ita kam ri, cute me kwÿr to cuprõn to me ipijakrut. Mã me hõ pahhi catêjê te me Mojxe cukij, ampo na mã amcro te xêj ita kam hãn ne ame kwÿr to cuprõn to me ajkrut. Mã me cumã:

— Ampo na nare, me Pahpãm te ri me amã amcro ata to ajteare mã, cute me ato ihkõt prãmte. Ne amcro te ihkwÿ to xet ata ri, ajteare mã ne pyxit peaj ne cupê Pahpãm jõ amcro, ne impeaj to impej — hane. Mã Pahpãm jõ amcro ata kam hõtpê mehkwy kwÿ ma põ mã me cator, ikre pê, ne ame hõ japê, ne nee cute me ampo mã cator nare.

Pê Pahpãm kên pîn me cumã cô gõ

Me Cator Xà 17.1-6

Ne Ixaher catêjê me mõi xà ata kam, pjê nõ japry to ame Repitĩ ita mã me cator. Ne me cator xà ata kam me cupê cô jamreare, mehkõm xà caxuw. Mã cute me Mojxe mãn kam mehtêm, ne me cumã:

— Me imã cô kwÿ, wa me to ikõ — hajÿr.

Mã Mojxe me cumã:

— Ampo na mã ca ame ikam acryc, ne Pahpãm to ate me amji mã ahimpej nare kam, amji caxuw amehcyt to me apa? — hane.

Mã ampeaj kam me cumã kõi, mã me cute me Mojxe mã harkwa to:

— Ampo caxuw mã ca ate Ejit jõ pjê pê me ito acator, põtĩ ita wÿr, quê hakõi me ijipej, me ikra me, pryti mea mã? — hajÿr.

Mã Mojxe te Pahpãm mã amji jarên to hajÿr he:

— Ampo to wa ha ajte? Ramã kên to cute ame icapêr ne me to icuran xàa kam — hajÿr.

Mã Pahpãm cumã:

— Mër mam amji kõi prohti kam mehkwy to mõi, quê ha hapu na mehkwy jãhtõti atajê me akõt me mõi, kên-ti japry pê Ihcuhyt ata wÿr. Ne gõ pĩ cajrer ata to gapac kêt nare ne apy ne to mõi. Wa ha curia kenti pê Ihcuhyt ata krac ri kên na acajpa, ca ha to kên tac, quê ha cô cato — hane.

Mã Mojxe ma kên wÿr tẽ, ne curi cator. Ne me kam mare mã, cute hõ pĩ cajrer pyr, ne to kên tac. Mã hamre cô te amji mã hũhhyr pyrentu ne ajpjê. Mã mehcunea me to ikõ.

Pê Pahpãm Mojxe mã kên po kam hũhkrãhi te ihhõc ata gõ

Me Cator Xà 19.1-2, 16-18; 24.12-18

Ne Ejit jõ pjê pîn Ixaher catêjê cator na, putwÿr incrê kam ri, kenti ata jõ pjê mã, me cator. Mã pjê ata kam ampo hamreare. Mã kenti ata krac ri me hàhhuc. Mã Pahpãm te Mojxe mã:

— Ca ha kenti na api ne curia ahtwÿ. Wa ha amã, ite kên po kam ijarkwa na ihhõc ita gõ, ca ha me cumã to hãkre — hajÿr.

Mã Mojxe me, ihtečajpar catê pê Jojuw, ma Ihcuhyt jõ kên pê Pahpãm jõ kên ata wÿr me tẽ. Ne kên ata na me hàpir xwÿjrea na, pê prohti kam me cumã harkwa to:

— Ita ri me ijikaj, wa ha ahnaa me amji jaxà. Ne quê ihhêaj to me amã ampo na prãm, ca ha me itõ pê Arãw cukij — hane.

Ne ma kenti ita na me hàpir, ne pea ahcãkrã nõ ita wÿr me cator, ne cumã me hàr. Mã Pahpãm carõt jãhcujro te kên ata pro, ne cute ihcujroa to amcro to xêj. Mã kenti ata jãhcujrõn, ne kam cuhy, ne kam ihkũm, ne kypê hàhkrihkrit nare. Cwÿrjapê ri mehcunea mã hũpa, mã hũpate amehtertet.

Ne amcro te xet kam ri, me Pahpãm te ahcãkrã ita kam Mojxe mã hàkjêr. Mã ma hÿrmã hàpir, ne curia ahna amcro te cwarênta. Mã Pahpãm te Mojxe mã ihcãkõc jicu, ne cute cumã kên po kam hũhkrãhi te ihhõc ata jõi. Pê Pahpãm kam harkwa na ihhõc to hane he.

Me cumã harkwa to ihhimpej xà pyxit

Me Cator Xà 20.1-17

Ipê me gõ Pahhiti pê me Apãm Cati. Ne imã me akwÿ kian to me akĩn. Cwÿrjapê wa ite Ejit jõ pjê pê me ato icator, por curi me apê cama me cumã me gãpên catêjê ata pîn. Na wa itea me amã amji jõi, ne amji to me gõ Pahhiti. Na ca ha nee iràn xà na, hipêr amji mã me jũm to me gõ pahhiti prãm nare. Ne imã me pahte ajpên kinti ita na me ato prãm.

Me cumã harkwa to ihhimpej xà pijakrut

Ne pa wa ha ampo kên cunea pê me apytàr to ipa, ne me atehčajpar to ipa. Na ca ha nee ame apãm cahãc krekà itajê to amji kam me gapac nare, ne nee hanea ne ame ampo carõ kên pê cupê jarõti ata to amji kam me gapac nare, ne nee cute me atehčajpar xà na ame ahna gãhwÿr nare. Nãmri ca ha ate iràn xà na amji mã me jũm to hajÿr na, ca hama ramã ame icaca, wa ha itÿj ahna ame akam icryc, ne hãhpan xà na ame ato kên. Ne por pjê cunea kam me cumã ikĩnti, mã ijarkwa kam me hapac to me ipa atajê, wa ha imã mehkĩn, ne me caprĩ.

Me cumã harkwa to ihhimpej xà incrê

Ne imã me akwÿ kinti incwÿrjapê wa ite me amã ijarkwa me ijapry jõi. Na wa ha me amã gapry to “Me cupê Pahpãm tekjê”. Cwÿrjapê ca ha ijapry to me amji jamãr peaj ne. Ne catyt kam me apa, ne nee ame ampo kên ton to me apa nare. Nãmri ca ha ame ampo kên ton to me apa, quê ahna me apupu, ne ito amji kam me hapac to: “Mõrmõ me Hũm ita kãanre na mã, ihkõat mehkãanre” hane. Nãmri ca ha ate me ipar nare, ne mãnea mã ate me ampo kên ton to me apa to

hajÿr na, wa ha itÿj hahpan xà na ame akam icryc, ne ame ato kêanre ne.

Me cumã harkwa to ihhimpej xà te cwat

Imã me akwÿ kÿnti na pê wa, ite me amã pjê me ampo cunea impejti itajê jôr xà caxuw, to ijâpêan to amcro to xêj. Ne pom amcro te xet ata to, wa ite ajteare mã, kam me pahkôt xà na. Na ca ha atÿj me to amji japackrea ne, ne icuxà amcro te xêj itajê kam ca ha me apê, ne cute xet ita kam, ca ha nee ame gâpên nare, ne cama me kôt. Ne amcro ata kam, ito pit mã me amji kam gapac to me apa.

Me cumã harkwa to ihhimpej xà te xÿc

Imã me akwÿ kÿnti incwÿrjapê wa ite me amã me apãmjê me, me axyrxwÿ jôr, cute me gapackre xà caxuw. Ca ha pjê ita kam, amã amji to apijapar to irya to prãm na, ca ha atÿj me apãmjê me, me axyrxwÿ kam-pa ne amji mã me hÿpa.

Me cumã harkwa to ihhimpej xà te xêj

Imã me akwÿ kÿnti incwÿrjapê, pê wa pa amji mã me ato, ate amji to me apijapar xà caxuw. Na ca ha nee jÿ caxuw me jÿm curan nare.

Me cumã harkwa to ihhimpej xà te xet

Imã me akwÿ kÿnti incwÿrjapê wa ite ahpÿanre na me axÿmre mã, me aprô jôr par. Ne hanea ne ahpÿanre na me apÿjê mã, me apjê jôr par, ahte ate ame apa cupate, ate me ajpên kÿn, ne ajpên na me gÿjaxôr prãmte. Na ca ha nee amji jÿ na ame aprô kÿn nare, quê ha pyjê xwÿjê nee amji jÿ na amempjê kÿn nare, ne nee ajpên pê ame amji caxun nare.

Me cumã harkwa to ihhimpej xà te ôjtô

Imã me akwÿ kÿnti incwÿrjapê wa ite me amã ampo kwÿ cunea jôr, ate me to atekjêa to prãm to. Na ca ha atÿj ajpên mã me ampo itajê na pahti ne, ne nee jÿ caxuw jÿm pê ampo to me gâhkÿj nare.

Me cumã harkwa to ihhimpej xà te nowi

Imã me akwÿ kÿnti incwÿrjapê, ca gapacta ne atÿj amji mã me ikampa. Ampo na? Wa hãn ne ampo to icakôc, ne nee apu ihêj xi to icakôc nare. Na ca ha icuxà, nee ame ahêj xi jarên nare. Ne nee me akwÿ kên mã me irên prãmte, ame to ahêj xi to me apa nare.

Me cumã harkwa to ihhimpej xà te tej

Ne imã me akwÿ kÿnti incwÿrjapê ri imã me akwÿ me, me amã me ajpên kÿnti na me ato prãm. Na ca ha nee me akwÿ mã ampo atajê na ame amji caprêp nare. Ne ampo itajê pê: me hÿrkwa me, hÿxi me, cumã me hâpên catêjê me, cute ampo to me ipijapar xà me, ampo pej itajê cunea me.

Ixaher catêjê cunea mã Pahpãm cupa catia to cati

Me Cator Xà 20.18-21

Hôhô, ita to pê Pahpãm Mojxe mã ihcakôc. Mã pjê kam me hàhtôti atajê te me pahhàjê jàhcuxê me, kên kam ihkÿmti ata pupun, ne kam me hàhkrihkrit me, hõhhi jàkôrti catia ata kam me hapac, ne hÿpate amehtertet. Ne ampÿa mã amehcuhhê, ne cute me Mojxe mã me amji jarên to:

— Ca ha caa me imã Pahpãm jarkwa to acakôc, wa ha itÿj me akampa. Ne nee me ina Pahpãm te me imã ihcakôc na hamâr nare. Quê me imã ihcakôc, wa me icunea ame ty — hajÿr.

Mã Mojxe te me cumã harkwa to:

— Nee ame amji mã pa nare. Ampo na? He nee Pahpãm me amã ihkên jôr nare. Ne cama cute me acapi, ne ate amji mã me to ahimpej kam me to acrà na, cute me gahkre pej prãmte ri me amã carôt tÿjti ita to ipipê to mõi. Ca hame hõmpun to mõi, ne me hahkre pej, ne amji mã me hÿpahti to me apa. Ne ca ha nee cuna mã ame ampo kên ton nare, ne atÿj ame apej mã me apÿpÿm — hajÿr.

Mã ampÿa mã amehcuhhê, mã ma awcapàtkôti ata mã Mojxe pyxit peaj ne Pahpãm wÿr hàr. Mã hipêr Pahpãm te me hapackre to hàhtôa to hàhtô.

Pê Ixaher catêjê amji mã pahpãm cahàc krekà to

Me Cator Xà 32.1-35

Mã Mojxe curia kên na apu ihkên, mã me hàhtôti atajê te me hapêê ne Arãw wÿr me pra, ne me cumã harkwa to:

— Me imã ampo krekà pê pahpãm cahàc nõ to, quê ha taa me pahto ihhimpej, ne me pahto mõi. Ampo na? Pom Mojxe te Ejit jô pjê pê me pahto cator ata jÿ kam ipictor. Wa nee ampo te jÿmã ton xà ata na ite me hahkre pej nare — hajÿr.

Mã Arãw me cumã:

— Mêr ite ton xà caxuw me imã wakÿre pràti kwÿ — hane. Mã cute me cumã hõr, mã Arãw te pryti kra xÿmti krekà na ton. Mã me cumã impejti, mã cute me harên xà te cupan xà ata to me ajpên mã:

— Pryti kra krekà ita pê ri me pajô pahhiti pê pahpãm, mã Ejit jô pjê pê cute me pahto cator — hajÿr. Mã Arãw te cumã hãm xà ita to ihkàhti, ne himoac kam pryti krahti ata xãm, ne amji mã me harên to hane he:

— Apê quê ha me Pahpãm jô amji kÿn — hane.

Mã apê ata na cute me pryti kra krekà pê pahpãm cahàc ata mã ame ampo pry curan, ne cuna mã ame to caxàr, cute me to ihcajpuaw prãmte. Ne cute amehkÿn to ihhi jirô pê me hÿr, ne ame hàpàn ne amehkôm jirô pê, cute ame hapactu kam me to ihtêm.

Mã Pahpãm te Mojxe mã:

— Apu uua ne wrÿ, nãmri me hàhtôti atajê te nee me ijarkwa itajê impar nare, ne mehkên mã me hàr. Wa ite ramã me hõmpun, mã me hÿpar nare ne ampeaj kam mehkãr tÿj, na ri ahna ampeaj kam me kam icryc. Na

wa ha me hipej, ne ato irô ne akam me to hàhtôa — hajÿr.

Mã Mojxe te ahna hàhwÿr ne cumã:

— Ampeaj kam ri mehcunea kêanre cakrô, ca ha me caprî, ne nee ame kam acryc nare. Ne por pê ca mam amã me hàpên catêjê pê Aprãw me, Ixac me, Jaco mã ate amji ton xà ata to ca amji japackre. Pom pê ca mehtàmwxwÿ mã jÿ caxuw pjê pejti mã me hàr xà to awjahkre ata to, ca ha amji japackrea ne — hajÿr.

Mã nee me Pahpãm te me hipej nare, mã Mojxe te kên po kam Pahpãm jarkwa pyr ne ahpar mã to mō. Ne cute wakÿre pràti te pryti kra krekà pupun, ne hanea ne ipu na ame hapactu na me hōmpun, ne me kam incryac to me kam incryc. Mã cute pjê kam kên po ita to hūcapêr, mã ihpÿm ne ipicahhêc. Mã ma me hÿr mã tē, ne cute pryti kra krekà ita jÿhÿr ne gân par, ne kam cuhôn ne to caxàr, ne cō kam ihpro jaxwÿr, ne cute me to kōm partu na me mēn. Mã Pahpãm te me cumã hà nō pahtÿjiti ata kujahêc, cute ame pryti kra krekà pê pahpãm cahàc Kín jahpan xà na.

Mojxe te Pahpãm mã ihcakôc xà

Me Cator Xà 33.7-11

Pê Mojxe ajco Pahpãm mã mehcaôc xà caxuw ikre pyxwÿr to ramã amji pyrác tu, por curi jÿ ri me hàhhuc xà atajê kam. Ne pê ampÿa mã ajco me hàhhuc xà pê hÿxwÿ. Ne por pê ajco Pahpãm mã mehcaôc prãm atajê, quê ha curia hÿrmã me ipa. Pê ajco Mojxe Pahpãm mã mehcaôc xà jÿrkwa wÿr ipa, pê ajco mehkwÿ cunea me hÿrkwa jarkwa mã mehcuhhê, ne kam mento cuhhê ne me hōmpun itaa na, pê ajco acjêj.

Pê ajco ahcakrã catia ata harkwa mã irôrôc, pê kam Pahpãm ajco Mojxe mã ihcakôc. Ne pê hÿrkwa jarkwa mã amehcuhhê atajê ajco Pahpãm pejti na me harê. Pom ikre kam Pahpãm mã mehcaôc xà ita kam ri, hãn ne Pahpãm me Mojxe ajpên mã mehcaôc, ne hãn ne Mojxe kuc ri cumã awjarê. Pom hãn ne me hÿmre ame hō ikwÿ nō mã mehcaôc ita na mã, hãn ne Pahpãm Mojxe mã ihcakôc. Ne cute cumã ihcakôc jicu jirô pê mã, pê ma hãn ne Mojxe mehkwÿ wÿr amji jacê.

Ne pê Jojuw intuwti na cupê Mojxe tehcajpar catê ata, pê curia ajco apu Pahpãm mã mehcaôc xà jÿrkwa kam Mojxe jakàn pê ahtwÿ ne apu ipa.

Pê Pahpãm hipêr kên po kam harkwa na ihhōc

Me Cator Xà 34; 35.4-29

Ne amcro nō na Pahpãm te Mojxe mã harkwa to:

— Hipêr kên po to ajkrut ne cuprã, ne ajpên to mō, wa hipêr kam ijarkwa na amã ihhōc, ate ihcahhêc ata jaxà na — hajÿr. Mã cute cuprãr ne ma to tē, ne curia hipêr ahna amcro te cwarēnta. Ne ihtÿj Pahpãm me ajpên mã ihcakôc. Ne ma hacpÿ mã iwrÿc ne ihkuc pràti. Ampo na? Cute Pahpãm pupun na ri. Mã mehkwÿ ma ame hÿpa, mã cute cupêhkà to ihkuc pro, mār quê nee me hōmpun nare.

Ampo kà te Pahpãm jÿrkwa caxuw Mojxe te hàhcukrêj to hàhcuprôn

Ne pê cormã Mojxe apu kên jimoc ri mōr kwÿa kam, pê Pahpãm cumã hÿrkwa ton xà ata to hahkre, jÿ mã quê ha ne Pahpãm jÿrkwa xãm to ne hãm. Jirô pê mã ri Mojxe te Ixaher catêjê mã harkwa to:

— Pahpãm te imã me acaxuw harkwa hydr. Na ca ha me gâhcjãrēnti atajê, atÿj Pahpãm mã me ampo jōr prãm, ne ampo itajê to ca ha hÿrmã me apa he: wakÿre pràti me, wakÿre prà jakare me, wakÿti tÿjti me, cupêhkà kukÿmti, intepti, jakati, impejti atajê me, carà cahàcre kà me, pÿ caxwÿn tÿjti impejti atajê me, ihpôc xà caxuw pÿ xō cacô impêti atajê me, ampo cacô impêti cuxwati atajê me, wakÿre prà tepti atajê te hajÿr. Ne atÿj ajpên hÿrmã me to apa.

— Ne por Pahpãm te me anō mã cute me amji jahkre pej jōr atajê cunea, quê ha ajpên ame pra, ne me cuprō. Ne Pahpãm te, cute ampo to me hàpên xà me mēn atajê to, ame cumã apê. Cu ha Pahpãm mã ampo kà te me hÿrkwa nō xãm, ne hanea ne pÿ to me hàmcjên xà nō ata jÿjê, ahna cute me hapÿn xà caxuw, cu ha me to. Ne hàmcjên xà ita kam, por cute kên po kam, me pamã harkwa to ihhimpej xà te tej jirên, ne ahna ihhōc ata, cu ha caxwãm pê hir. Ne quê ha cupê Pahpãm te me pamã amji ton na, me pahte me ajpên par xà jàmciên xà.

— Ne hanea ne cupêhkà impejti te Pahpãm jÿrkwa caxwÿn tēte hahêr xà ata, cu ha me to, ne ahna me hàpàn xà nō me, me to, ne pÿ to me hÿjê, cute me hapÿn xà caxuw. Ne cō cuhhê xà itajê me, ampo jacrô cuxwati to caxàr xà atajê mea mã, cu ha me to. Ne hanea ne hÿrkwa caxwÿn nō to kujro xà caxuw, cu ha hàhcujro xà nō me to.

— Ne hanea ne Pahpãm mã me hàpên catêjê cunea kà impejti atajê me, Arãw kà me, mehkra kà mea mã, cu ha me cumã to. Hō, me pajàpên xà itajê cunea to, cu ha Pahpãm mã me — hajÿr.

Mã ma me hÿrkwa wÿr ame ipicràn, cute ame cumã ampo jōr xà atajê wÿr. Ne por Pahpãm Carō Pejti ata ri mehkrã caxwãm pê cute me cumã ampo jōr xà atajê to ihhimpej. Mã cute amenwÿr, ne ma hÿrmã me to amji jacjên. Mã pyjê kwÿ te cupêhkà ton jahkre pej atajê te me cupêhkà ton. Mã pyjê kwÿ nōa te carà cahàcre kà to me cupêhkà. Ne me hō pahhi catêjê atajê ri kên pràti itajê to me mō. Ne me hàhcjãrēan kam me hÿmre me pyjê te Pahpãm mã me ampo jōr xà atajê to me mō, ne me cumã hōr.

Pahpãm ampo kà te ikre mã hàr ne kam ihkrí

Me Cator Xà 40.34-38

Mã Mojxe te hàpên xà ata krã curan, me ajkaam mã ampo kà te Pahpãm jÿrkwa te amji jipêj ne xa. Mã Pahpãm jō ahcakrã te ikre pro, mã carôt jàhcujro te to hipu tu. Na quê nee Mojxe ahcakrã kam Pahpãm carôt jàhcujro ata mã hàr nare.

Pê ahcacrã ata ajco api ne ma me cumã ipa. Pê Ixaher catêjê ajco me hõmpu ne ma ihkõt me ipa. Ne ajco pry kà te ikre ata to ma me ipa. Ne ahcacrã ata pê ajco ahtwÿ, pê cume mã mã ajco me ahtwÿ. Ne amcro kam pê ahcacrã ata ampo kà te Pahpãm jürkwa cwÿr-pê ajco harij, ne ahna caxwa pê ajco kam cuhy, ne ahcujro, Ixaher catêjê te amji mã me irít xà caxuw.

Hõhõ, me ipa xà ita to pê ajco me ipa, ne me ahtwÿ. Ne ma Canãn jõ pjê mã me cator.

Pê me hũcapi catêjê me Canãn jõ pjê pupu

Me Cahyt Xà 13.1-33

Mã Pahpãm pê Pahhiti te Mojxe mã harkwa mën ne cumã:

— Jũmjê xũmre kujate, quê ite me amã Canãn jõ pjê jõr xà ata pupu. Ne ca ha ahpyanre na me aquêtjê te me amji jakrã te tôxi atajê kam, ajpën caxuw mehtãmwxwÿ pê me hõ pahhi to caprã ne mehkujate — hajÿr.

Mã cute me to cuprõn, ne me cumã harkwa to:

— Me pra ne me pjê pupu, jũ mã mõrmõ cute. Ne ma curi mehkří catêjê atajê pupu, mõrmõ ajkí mehtÿj, nare, ajkí mehpeacre, ne mõrmõ ajkí me hàhtõ, nare, mõrmõ ajkí mencre. Ne me pjê pupu, mõrmõ ajkí impej, kam me pajapên xà caxuw. Ne me krí pupu, mõrmõ intête kwÿc ne ajkí hihê, nare, mõrmõ ajkí hamãr xà atajê nõ hamreare. Ne me pjê ata pupu, mõrmõ ajkí ampeaj kam hõ to hakràj, ne kam pĩ jàhtõ. Ca ha amji to mehtÿaj, ne atÿj ajpên me pjê ita jõ pĩxõ nõ to me mõ, wa cukrê ne ihcajpẽ — hajÿr.

Mã ma me mõ, ne cute me Canãn jõ pjê pupun, ne cute kam ame ipa to me amcro to cwarênta. Ne ramã me mõr xàa kam, cute me pĩxõ jàhtõa ne me hirên. Ne ma me to amji jaxàr, ne me to cator. Ne cute Mojxe me, Arãw me, Ixaher catêjê mã ampo itajê cunea jarên par. Ne cute me cumã pjê jõ pĩxõ atajê jõr. Ne me cumã harên to:

— Wa Canãn jõ pjê mã me icator, ne ite me hõmpun, mã impeaj to impej. Ne ampeaj kam, kam me cumã me hõ, ne hanea ne kam pen ne kam pryti kà cacõ jàhtõ, ne kam me pĩxõ itajê pupu he.

— Ne ampeaj kam curi mehkří catêjê tÿj, ne ampeaj kam krí itajê cati, ne ipu na kwÿcti itajê kàa to ihkà. Wa ite kam mehĩ to cute me krí mã hikreti atajê kwÿ pupun, mã ampeaj kam mehkà, ne me catia to me cati — hajÿr.

Mã cute me hũmre kujahêc atajê nõ japyr te Carep ata te mehcunea mã Mojxe mã ihhi cuxêc na me ton, me kam mare mã, ne me cumã harkwa to:

— Hacme, ne me pjê ita pytã! Ampo na? Cu ha pahtÿj me tohjê, ne me hirõ pê xa, ne me hipej — hajÿr.

Mã mehkwy te me cumã, ne ahna me amji ton kam me cumã:

— Wÿr cu apu amji mã me hamã! Ampo na? He me pajirõa pê curi catêjê mehhi tÿj, ne me cati. Ne pjê ata kam ampeaj kam me hàprê catêjê jàhtõ, ne cute me hipu tu. Na ri me imãa me ipê xycxycrê pyrãac, ne

hanea ne me cumã me ipê xycxycrê pit, ne me cumã me ikryjre — hajÿr.

Pê Ixaher catêjê ma ame Pahhiti par caca

Me Cahyt Xà 14.1-45

14 Mã Ixaher catêjê cunea mehpec xà to cute mencwÿr kam mehtêm. Ne kÿj cati pêa mã ame amrã, ne cute mencwÿr to me apẽ. ² Ne mehcunea te me Mojxe me Arãw cuna mã me cumã amji capêr kam mehtêm, ne me cumã:

— Wa nee pjê mã me paxàr xà ita kam ame ityc prãm nare. Wa rÿ mã curia Ejit jõ pjê kam ame ty. Nare, wa põtĩ kam me hamreare ata kam ame ty. ³ Ihhêj ne me pajõ Pahhiti te pjê ita kam mehkří catêjê jõ krãhtare te me pajipej na, cama me hamãr xà caxuw ri cute me pahto cator. Ne quê ha me pahto hajÿr jirõ pê mã, quê ha cama me pahkra me, me pahprõ amji to me cumã me hàpên catêjê. Na cu ha pahtÿj ma hacpÿ mã Ejit jõ pjê wÿr me amji jaxà — hajÿr. ⁴ Ne me ajpên mã harkwa to:

— Cu ha amji mã me pajõ pahhi tuw nõ xãm, quê ha hacpÿa mã me pahto amji jaxà, Ejit jõ pjê wÿr — hane.

Pê Jojuw me Carep tee mehkwy mã apõ

⁵ Mã Mojxe me Arãw, Ixaher catêjê kam mare mã pjê kam mehpÿm, ne me hõpõrpo ne me nõ, mehpec xàhte. ⁶⁻⁷ Mã cute me pjê pupun catêjê pijakrut itajê japyr pê Jojuw, me Carep atajê me cute amji pê mehkà cokjêr, mehpec xàhte, ne mehkwy mã hũjarên to:

— Pom wa ite me pjê pupun ita peaj to impej. ⁸ Cu ha me pajõ Pahhiti cajpuaw na, quê ha ihtÿj me pamã pjê pejti ata gõ, cu ha pahtÿj amji mã me hũtà. Ne pjê ata kam me hõa to me hõ, ne ampeaj kam, kam pryti to ipijapar xà me, pur caxuw impej. ⁹ Nee ca amji tète ame Pahpãm jarkwa curê nare. Ne nee cuna mã ame acryc nare, ne nee ame, por curi amehkrí atajê cupa nare. Ampo na? Cu ha me pahtÿj me to cõ, ne me hipej ne me hirõ pê xa. He me pajõ Pahhiti ihtÿj ame pahkõt ipa, ne cute me pahpãm cahàc krekà pê me pahcurê xwÿn pytãr catêjê atajê cunea rên. Cwÿrjapê wa me amã, ca ame hũpa nare — hajÿr.

Pê Pahpãm mã Ixaher catêjê jipej prãm

¹⁰⁻¹¹ Mã me hàhtõtĩ atajê ajwar kën to ame capêr, ne to mehcuran prãm to pit mã amehcakõc. Mã Pahpãm carõt cati jàhcujrohti ata ampo kà te hũrkwa mã Ixaher catêjê cunea te cuprõn ata wÿr iwÿrc, ne Pahhiti te Mojxe mã harkwa to:

— Me hàhtõtĩ itajê ma ame icurê! Ne cute me hajÿr ita kam ri ihtÿj amji caxuw me icyt to me ipa. Ne jũ caxuw mã quê ha ajte, ite me kam ampo to amji to ipipê xà ita kõt me ijahkre pej, ne ikõt me amji to? ¹² Wa ha hà kên cunea to me kam icryc, ne ame to kên, ne ite me cumã ampo jõr xà to ijũjahkre ata xwÿjrea na me hipej. Ne akam wa ha quêt me to hàhtõ, quê ha mam itajê jirõa pê me atãmwxwÿ itajê cunea me carõt tÿj — hajÿr.

Pê Mojxe Pahpãm mã mehkwy cajrën

¹³ Mã Mojxe te Pahhiti pê Pahpãm mã harkwa to:
— Jũ mã quê ha Ejit catêjê cahhur me ita jarën pa, ne kam me amji cajpër to? Ne ramã Ejit catêjê te acarôt tÿjti to me akwy to acator ata na me gõmpun, ne me gahkre pej. ¹⁴ Ne ma cute pjê ata kam me ipa catêjê mã me garën. Ne hanea ne Ixaher catêjê kôt apê me hõ Pahhiti te amõr na, ne hũ na pire mã ajpën mã me acakõc na me cumã me garën. Ne ihtÿj me cumam ahcakrã kam apê me hõ Pahhiti te amõr na, cute me gõmpun. Ne ihtÿj amcro me caxwa ri ahcakrã ata te cuhy na amji jahkre ne harij na, cute me hõmpun. ¹⁵ Ne ca ha ate me akwy jipej pyrentu na, quê ha pjê ata kam, krìxàre kwÿ me ahna me garën pa, ne me ahna amji mã me garën kên to, ¹⁶ “He pê ihtÿj me hõ Pahhiti me cumã pjê to awjahkre ata wÿr me to mõr cakrõ, nee cute amji mã hamãr, ne me to hãr nare. Cwÿrjapê ri cute ahkêt me põti jipõac ri mehcunea jipej” hane.

¹⁷⁻¹⁸ — Na ca ha acarôt jãhcaprĩhti to me cumã ajpë, ne cute mehkên ton xà itajê to tojnõ, ne cama amã mehkĩnti ne. Ne pê ca ramã amji jarën to: “Imã me akĩnti ita kam, wa nee me akam icryc pyrentu nare, ne ca hame ate me ito kên, ne amji têtê me ijarkwa curê jicu na, wa ha itÿj me ate ito kên ita to tojnõ ne hucu. Nãmri ca ha me ate amji têtê me icurê to me axãm ita na, wa ha itÿj hahpan xà na me akên mã me amë, me akra me, me atãmxwÿ mea mã” hane.

¹⁹ — Na ite apar xàa na wa awÿ, pom hõtpê amã me ikĩnti rohnÿtti mã, ca atÿj cute mehkên ton itajê cunea to tojnõ ne hucu to hanea, pom ahnaa mã ca ajpën Ejit jõ pjêa rũm mehkên na me to tojnõ to mõ he, ita na ca ha ita kam me ito — hajÿr.

Pê Pahpãm Ixaher catêjê incrõn xà kãanre to me cucrõ

²⁰⁻²³ Mã Pahhiti te Mojxe mã amji jarën to:
— Hã, wa ha itÿj, pom ate iwÿr xà ita na me ato, ne cute me ito kên itajê to tojnõ. Ne wa ha pa amji japryã na me ahna amji to. Quê ha nee jũ caxuw, por pê wa me hũmjê mã pjê to ijũjahkre xà ata mã me hãr nare. Ne põti kam me hamreare ata kam, quê ha mehtyc pa.
— Ampo na wa ha me to hane? Nee mã ampo na nare. He pê ramã me icarôt tÿjti jãhcujro itajê kwÿ na me ipupu. Pê wa ramã me cumã me hõ japryã te mana ita gõ, ne me cumã cõ gõ, mã ajte nee ite Ejit jõ pjê me põti ita kam me cumã ampo ton xà itajê na, ito me amji japackre nare. Ne ajte cormã cute me icapi prãmte, icuna mã me ampo kên ton to me tej to me ipa, ne nee me ijarkwa par nare. Ne por me ijarkwa par nare atajê, quê ha nee, por pê wa me hũmjê mã pjê to awjahkre ata mã, me hãr nare. Ne pom ma ame icurê itajê nõ, quê ha nee mehnõ pjê ata pupun nare. ²⁴ — Ne pom imã hãpën catê pê Carep ita nare, ajteare mã quêt amji kampa, ne quêt cute ihtÿj ipar xà cunea to ipar. Na quê ha ihtÿj cute pjê pupun ata wÿr

axà, quê ha mehtãmxwÿ ihtÿj hakàn pê pjê ata kam me ipa, ne kam me amji to ajpa.

²⁵ — Ne apë quê ha ajte ma Amarec catêjê me, Canãn catêjê, por caprũm kam mehkri atajê japy, hacpy mã põ kam hamreare ata wÿr me amji jaxà. Ne Cõxwatepti cajpuw quê ha me mõ — hajÿr.

²⁶⁻²⁷ Jirõ pê mã ri Pahhiti te hipêr Mojxe me Arãw mã hũjarën to:

— Jũ caxuw mã quê ha ajte cute me imã amji kôt harën jãhcahhõn xiti itajê mã me hikra? Wa ite ramã cute imã me hãhcahhõn na mempar, ne ahna imã mehkĩn nare. ²⁸ Na ca ha me cumã ijarën to: “Ipê me gõ Pahhiti pê Pahpãm. Wa ha itÿj me amã, por me amã ampo cupahti na, ate me amji jarën ata to. ²⁹⁻³⁰ Na ca ha me acunea põti kam me hamreare ata kam me atyc pa, por ramã me ana caku te winti jirõ pê atajê, ca ha me atyc pa. Ampo na? Me acunea te imã me gãhcahhõn par, na ca ha me atyc pa, quê ha me ahkrare pit ite me cumã pjê to ijũjahkre xà ata mã me axà. Ne mehkã pijakrut japryã te Carep me Jojuw itajê, quê ha mehkã na me ajkrut peaj ne mehkõt pjê ata mã me axà.

³¹ “Ne me acunea te me akra pê, por Canãn jõ pjê kam me xa atajê mã, cama me hãpën catêjê na ate me harën cakrõ, wa ha itÿj me hamã, ne pjê ata wÿr me to icato, quê ha quêt kam me ipa. Ne ate me pjê kãanre na me harën ata kam, quêt ihcunea na me amji pupun pejti to me ipa. ³² Ne me ca nare. Quê ha me gĩ itajê ajhu ne ty, põti kam me hamreare ata kam. ³³ Ne quê ha me apê amji jahkre kêt, ca ha atÿj me akra me, põti kam me hamreare ata kam me apa to me caku to me cwarënta. Ne me akõt quê ha me akra me amji pupun xà kãanre to me ipa, ne ate amji mã me ito ahimpej nare ita kam, ca ha xa me acunea me atyc pa, jirõ pê mã quê ha cormã me akra me, me atãmxwÿ pit pjê ata mã me axà.

³⁴⁻³⁵ “Ne ca ha me apê, por pê me pjê pupun catêjê atajê pyrãac, pê me mõar to me amcro to cwarënta, jĩkjê na ca ha põti kam me hamreare ita kam ame apa to me caku to cwarënta. Ampo na? He wa ha ita caxuw me ato imej jicu, ca ha ame akên xà pytĩti atajê to ame acuhkwÿr. Quê ha ahpyãre na ate me ina ajpën par xà atajêa me gipej, põti kam me hamreare ata kam. He ipê me gõ Pahhiti, na wa itea me amã icakõc xà ita ton, na ca ha atÿj põti ita kam ame ty” — hajÿr.

³⁶⁻³⁸ Mã cute me tej te me pjê pupun catêjê atajê te me mõr têtê mehcunea hi kwĩn, ne mehcunea to me hãhcahhõn xi, na ri mehtyc xà kãanre kam mehcunea tyc pyrentu, me pajõ Pahhiti kam mare mã. Mã Carep me Jojuw pijakrut peaj ne mehtĩar na me hãhhuc.

Pê Mojxe tee mehkwy mã me curê xwÿn cawpa

³⁹ Mã Mojxe te mehkwy mã Pahpãm jarkwa ita jarën, mã me hũpar xà ita kam amehpeacre, ne me cumã amji kĩn nare. ⁴⁰ Mã amcro nõ na irãrã na mehcunea jÿr, ne ma, por pjê kam awjarõ to cute me cumã hũjahkre ata wÿr, cute me mõr na me ipyr. Ne cute me Mojxe mã me harkwa to:

— Wa itÿj ite me Pahpām cuna mā me ikēanre na me amji pupun, na wa ha itÿj ita caxuw, por me pajō Pahhiti te me pamā pjē to hūjahkre ata wÿr me ikrār — hajÿr.

⁴¹ Mā Mojxe te me cumā harkwa to:

— Ca rÿ mā mam me hane na mā, ca nee ajte ate me Pahpām par nare. Mā ramā ahna ahtūm rytu, ne ramā hō amcro jirō pê ihpÿm ita kam, jū wÿr ca ha curi me mō. Ca ha ita kam me ate me amōr na, ca ramā ate me pajō Pahhiti pê Pahpām jarkwa par nare. ⁴² Ne pom curmā ate amji kam me gapac xà jarēn itajē, ca nee kam me to acrà nare, ne me hīcu. Nāmri ca ha ate pjē kam awjarō ata pytār prām kam me to acrà na, quē ha me acurē xwÿn me ato hamre. Ampo na? He me pajō Pahhiti pê Pahpām nee me akōt mōr nare ita kam, quē ha ihtÿj me gipej. ⁴³ Xà ca nee me Amarec catējē me, Canān catējē to me amji japackre nare? He cormā me pahcumam me xa! Ca ate me pajō Pahhiti pê Pahpām mā hikran, cwÿrjapē quē ha hanea ne me amā hikra, ne nee me apijapu xà kam me atehcajpar nare, quē ha me acurē xwÿn ihtÿj me acura — hajÿr.

⁴⁴ Ne tee Mojxe te me cumā me cawpa cakrō, mā ajte ma me mōr kam menchrà, pjē kam kēnti atajē cajpuw. Mā curia me hakàn pê Mojxe me Pahpām jām-cjēn xà jàhhuc, mā me hàhtōa ne amū me pra. ⁴⁵ Mā kēnti na Amarec catējē me, Canān catējē mehkrī atajē mehwÿr me iwryc, ne cute me Ixaher catējē curan kam mehtēm, ne ma mehcuran to mō. Mā ma me hūpate mehprōt. Mā ihtÿj mehcuran to me mō, ne cute mehcuran itaa to, ma Horma jō krī mā me cator. Ne Ixaher catējē cahur te ma Mojxe kōt pōti kam me hamreare wÿr me amji jaxàr, ne kam ajco ame ipa.

Pē Ixaher catējē kwÿ Mojxe jūhhÿr prām

Me Cahyt Xà 16.1-35

Caku te cwarēnta atajē nō kam, amcro atajē nō na me hūmre atajē japyr te Cōre me, Tatā me Apirāw te Ixaher catējē jō pahhi te me xēj pijakrut ne ihkōt xīncwēnta me, me ajpēn par, cute me pahhi tēte me Mojxe jūhhÿr prāmte. Ne ma Mojxe me Arāw wÿr me cator, ne cute me cumā me harkwa to hajÿr he:

— Nee mā me ijirōa pê acati nare. Pahpām te Ixaher catējē cunea capi, cute me to amji kwÿ prāmte, ne me pahcunea kam ihkrī. Ne mēr ampo na mā ca atÿj ite me apar ita na, hān ne me imā garkwa jirē? — hajÿr.

Mā Mojxe me cumā:

— Xāmte icaxuw ate me amji kam me gapac xà te hajÿr? Hā, quē ha apē, quē ha Pahpām iràrà na me gō ikwÿ nō itajē mea mā, me amā cute amji mā jūmjē capi atajē jahkre, ca ha me hōmpu. Ca ha apē na ajpēn me Pahpām wÿr me mō, wa ha hanea ne Arāw me hÿrmā mō, cu ha curia me ajpēn cajpa — hane.

Mā apē mā Cōre me, mehwÿr te xēj pijakrut ne ihkōt xīncwēnta atajē me mō, ne ampo kà te Pahpām jūrkwā na cute me cuprōn. Mā hanea ne Mojxe me Arāw me, mehwÿr hajÿr ne harkwa ata jīkjē rūm cute me cuprōn. Mā me hàhtōa te me cuprōn ne cama ame-

hcuhhē, ne ame ampo te me to jū mǎn xà ata na ame hōmpu.

Mā pea Pahpām carōt jàhcujrohti te mehcunea mā amji to ipipē, ne cute Mojxe me Arāw mā harkwa to:

— Me cupē me hawry, ne me haprā, nāmri wa ha mehcunea jipej hiahpuro! — hajÿr.

Mā Mojxe me Arāw te Pahpām cuna mā mehkōn krā na me hÿr, ne me cumā mehcajrēn to:

— Me ijō Inxū Cati, pê ca me icunea mā ite amji kam ijapac xà ita gō. Xà ca ha me hūmre kēn incrē peaj atajē kōt mehcunea jipej? — hajÿr.

Mā Pahpām Mojxe mā harkwa to:

— Me cumā awjarē, quē me Cōre me, Tatā me Apirāw jō pryre kà te ikre ita pê me ajcamē — hane.

Mā Mojxe xām ne ma me hūmre itajē jūrkwā wÿr tē, ne cute mehwÿr mā carāar kam hūjarēn to:

— Me hūmre kēanre itajē jūrkwā pê me ajcamē, ne me hawry! Ne nee ame hàhcukrēj caxun ne amehcupēn nare! — hajÿr. Mā pea mehcunea cator, ne me cupē me hūjawry.

Mā Cōre me Tatā me Apirāw me hūrkwā jarkwā mā mehkra me, mehprō mea mā amehcuhhē. Mā Mojxe te mehcunea mā harkwa to:

— Ca ha ita caxuw me Pahpām te pahhi na ixām na me ijahkre pej to hane he. Quē ha pjē te catac ne me cumā ipicapōn, mā kam me hūmre itajē te me ipijaxwÿr, mā cute mehkrēr na, ca ha cormā Pahpām te me gō pahhi na ixām na me ijahkre pej — hajÿr.

Ne cormā cute ihcakōc jicu me ajkaam mā Cōre me, mehwÿr krac ri pjē catac ne me cumā ipicapōn, ne kre catia. Mā kam Cōre me, mehkjējē me, me kōt cute me Mojxe jūhhÿr prām catējē me, mehpÿm. Ne hanea ne kam ampo cunea to me hō tekjē atajē cunea pÿpÿm, ne mehtyc partu. Mā me ahna pjē pijapÿn. Mā ma Ixaher catējē mehkōt kre ata mā mehpÿpÿm cupate, ma me pra.

Mā kjÿ rūm Pahpām jō cuhy wrÿc, ne me hō pahhi kwÿ te me xēj pijakrut ne ihkōt xīncwēnta te Mojxe jūhhÿr na me ajpēn par atajē cunea to caxàr tu, mā me hamre.

Pē cagā me hàhtōa jipej

Me Cahyt Xà 21.4-9

⁴ Mā ma Ixaher catējē te me mōr kam menchrà, ne cute me Cōxwatepti jō pry kōt, me Hōr jō kēnti jakren. Ne ma Etō jō pjē pu na me ipijarō prāmte me mō. ⁵ Mā amehpec ne nee hipēr cumā me hikaj prām nare, mā ajpēn mā ame Pahpām jarēn to amehkēanre, ne cute me Mojxe to me hajÿr, ne ajpēn mā ame harēn to kēanre, ne me cumā harkwa to:

— Ampo na mā ate pōti ita mā, Ejit jō pjē pê me ito acator, ita ri me ityc xà ita caxuw? Ita ri ite me ampo krēr xà hamreare, ne nee me ikōm xà hamreare. Ne ramā me imā kwÿr pê mana ita kīn nare — hajÿr.

⁶ Mā Pahpām te me hàhcahhōn xà kēanre ata jahpan xà na, mehwÿr cagā jàhtōa ne kujahēc, cute mehcām xar prāmte. Mā ramā cute ame hàhtōa ne

amehcām̄xar, mā amehtyc. ⁷ Cwỳrjapê ri ma Mojxe wỳr mehprôt, ne cute me cumã me amji jarên to:

— Wa ame amji pupun kêanre! Wa ite Pahpãm me, me acuna mã me ikên xà kêanre itajê ton, cwỳrjapê ri me ikêanre. Na ca ha Pahpãm mã acakôc, ne cumã me icajrên, quê me itête cagãti itajê to hawry — hajỳr. Mã Mojxe te Pahpãm mã mehcajrên.

⁸ Mã Pahpãm te Mojxe mã harkwa to:

— Wakỳre nõ to cagã, quê ha cagã xàhti itajê mehcãm̄xa, quê ha me wakỳre te cagã ita pupu, ne nee amehtyc nare — hajỳr.

⁹ Mã Mojxe te Pahpãm jarkwa na wakỳre to cagã, ne me hipôc ri inxôr. Mã cagã xàhti atajê mehcãm̄xa, mã me wakỳre te cagã ita pupu, ne hacpýa mã mempej. Hamre.

Pê cawrô cahàcre Parãw mã ihcakôc

Me Cahyt Xà 22.1-41

Jirô pê mã pê Ixaher catêjê ramã Mowap jô pjê na me ahtêp. Mã Mowap jô pjê jô pahhi catêjê mã ampeaj kam me hũpa, mã cute me ahna hũxy xiti japyr te Parãw ata mên, mã quê mencrôn xà kêanre to me cucrô. Ne cute mencrôn xà kêanre to mencrôn jahpan xà na, ihtỳj cute me cumã ihpore to hũjahkre.

Mã Pahpãm te Parãw mã hũjarên, quê nee me hỳr-mã ihtêm nare. Mã Parãw ihtỳj apu Pahpãm ihtêm xà na ahwỳ. Mã apu kam incryc, ne cute mehwyr mör xà ita na to tojnô. Mã cute apu hõ cawrô cahàcre to hàhcuprôn, ne ma kam hỳr ne to tẽ, me hỳrmã.

Mã Pahpãm apu kam incryc, ne cute hỳrmã cõjkwa pñ cumã ipijapu catê nõ kujahêc, cute cupê pry jahêr xà caxuw. Mã ma tẽ ne xa.

Mã cawrô cahàcre te mam Pahpãm mã ipijapu catê ata te pry kam wapo to hãm na hõmpun, ne hũpate cute pry hyr. Mã Parãw te nee ihkĩnte hõmpun nare, ne apu cawrô cahàcre cahhy, cute pry wỳr to amji jaxâr prãmte. Mã hipêr Pahpãm mã me ipijapu catê te kên te pry to ihkre pucre ata wỳr ipicamên.

Mã cawrô cahàcre te hipêr hõmpun, ne tee apu hĩpê hahpan to hahkre, ne cute kên to Parãw par jaxôp. Cwỳrjapê ri hipêr apu ihcahhy. Mã hipêr hỳrmã me ipijapu catê ita picamên, pry kre pucre ata wỳr. Ne cute hahêr. Mã catàtkre jamreare ita kam, jũ na quê cawrô cahàcre ata mõ.

Ne cawrô cahàcre te hipêr me ipijapu catê ata pupun, ne hũpate Parãw to ihpým. Mã Parãw apu kam incryc ne hipêr pĩ cajrer to ihcahhy. Mã Pahpãm te cawrô cahàcre cakôc na mên, mã ihcakôc, ne cute Parãw cukij ne cumã harkwa to:

— Ampo to mã ite apê jũ mãn, mã ca ajte ate icahhyr ita to incrê? — hajỳr.

Mã pea Parãw caràr ne cute harkwa to:

— Ampo na mã ca apu imã? Quê imã wapo na mã, wa ha ramã acuran hiahpuro — hajỳr.

Mã cawrô cahàcre cumã:

— Pom ipê gõ cawrô cahàcre ita, ne ramã ite ato impej crire nare ita. Xà ita kam ite ijàpên xà ton ita to ramã ajkĩ ite amji pyràc tu? — hajỳr.

Mã cumã:

— Quê — hane.

Mã pea Pahpãm te Parãw mã into jahkjên. Mã cute amji cumam cõjkwa pñ me ipijapu catê nõ ata pupun. Mã ramã wapohti to cute caxwỳr xàa kam xa. Mã Parãw hũpate pjê kam ihpým.

Mã Pahpãm mã ipijapu catê ata te ihcukij ne cumã:

— Ampo na mã ate cawrô cahàcre cahhyr to incrê?

Wa ita ri ite amji to acurê xwỳn ne xa, ne apu gahkre. Ampo na? Por ca jũ ri amör xà wỳr mõ ata, nee Pahpãm mã impej nare. Ca cama ate ame to kên prãmte, ca mõ. Mã quêt mam cawrô cahàcre te ipupun ne ato hàhhuc, ne cute ato atyc xà jahpan — hajỳr.

Mã Parãw te cumã amji jarên to:

— Wa ajmãr itea amji kên mã amji mên, wa nee ite pry kôt amji cuna mã gahkre pej nare. Ne quê imör xà ita na Pahpãm pê ihkaj na, ca imã awjarê, wa ha nee imör nare, ne ita ri ijũrkwa wỳr amji jaxà — hajỳr.

Mã cumã:

— Gapacta ne atỳj me hỳrmã mõ, ne Pahpãm te amã ampo jarên itajêa to me cumã awjarê — hane.

Mã ma Parãw Mowap catêjê wỳr tẽ, ne curi cator. Mã me hõ pahhi Parac te cumã harkwa to:

— Ýhỹ Parãw, Ixaher catêjê jàhtôa to me hàhtô, ne imã me hũpaa to me hũpa. Cwỳrjapê ca ha Apãm Cati te me to hy xàa kôt me to hy, wa ha itỳj ate me to hy jahpan xà na amã ihpore catia ne cugõ — hajỳr.

Mã Parãw cumã:

— Wa ha caxi, pa me to hahkre, ne ijõ Inxũ Cati te me ahna imên xà kôt pit mã, wa ha me to hy — hane.

Pê Parãw tee mencrôn kêanre to hahkre

Me Cahyt Xà 23.1-30; 24.1-25

Mã ma Mowap catêjê jô pahhi pê Parac te Parãw japyr ne to mõ, ne kên na to hàpir. Mã ahpar mã, caprũm kôt, cute Ixaher catêjê jàhtôa ne me hõmpun. Mã cumã:

— Hamre, ca ha me hàhtôti itajê incrôn kam tẽ, ne mencrôn xà kêanre to me acrô. Ne me hũn xà kêanre to ame hũn, quê ha ate me hũn xà kêanre atajêa me to hy, ne ame to kêanre ne. Ne hanea ne cõjkwa kam gõ Pahhiti wỳ, quê ha ame to kêanre ne, ne me to hamre — hane.

Mã Parãw te harkwa to me cumãn kam ihtêm, ne me cumã:

— Mowap catêjê jô pahhi pê Parac te imã ihcakôc, ne me ahna imên to:

“Ixaher catêjê itajê to kên kam tẽ” hajỳr.

Ne jũ mã wa ha ajte,

ne por Pahpãm mehkwỳ to impejti atajê to apu ihkên?

He ajteare mã me, ne ampeaj kam me hàhtô, ne ihtỳj me ipicamên to me mör ita na.

Na wa itỳj mehkôat amji ton to prãm — hajỳr.

Mã Parac apu Parãw kam incryc to incryc ne cumã:

— Nãmri! Xà wa aracri ite amã ijarkwa to hajỳr? Mãr wa ite amã me to kêanre na ijarkwa hyr ta! Nõ na mã ca ate me to impejti ita to apu acakôc! — hane.

Mã Parāw cumā:

— Jū wŷr wa amjia kôt ampo to icakôc, por me ijō Inxū Cati te ijarkwa to icakôc xà na imēn atajêa to, wa ha icakôc — hane.

Mã Parac te hipêr ihcappêr to ipijakrut xà ata wŷr to hàpir, ne hipêr cute me to kên xà caxuw cumā harkwa hydr. Mã Parāw te amencrôn kên to hahkre, ne nee cute menchrôn xà kên nō to menchrôn nare, ne cama harkwa pejti to me ahna ihcakôc. Mã Parac apu kam incryac to incryc, ne cute cumā hãmjôr nare, ne ma hŷrkwa wŷr, hŷre kam ihkujahêc.

Pê Mojxe me amji pytar jō krī to mehhimpej

Me Cahyt Xà 35.6-34

Pê Pahpām Mojxe mã harkwa ta, quē Ixaher catêjê mã harê ne cumā:

— Ahtŷmre quē ha, por ite me cumā Canān jō pjê jahkre ata mã me cato. Ne wa ha cormã me hàhcuran catêjê kôt amã harê, ne amã me to hahkre. Ne ate me to amji pyrác xà ata kôt, quē ha jŷm amji pê hŷkjê nō cura, quē ha ihtŷj ihtyc ata jŷkjê hanea ne cute ihcuran catê ata cura. Ne quē ihhêaj to cute ihcuran prãm nare kam ihcuran na, quē nee hahpan xà na mehcuran nare.

— Cwŷrjapê ca ha me cumā garkwa ta, quē me krī to xêj ne me capi, mãr quē cute mehcuran prãm nare kam mehcuran catêjê atajê krī itajêa mã me acjêj, ne kam me amxu. Jū wŷr quē cute ihcuran ata jŷkjê krī kam ipimxur ata ri me pro, ne mehcura. Ne quē ha me cute mehcuran catêjê mehkŷrī, ne mehcuran ne mehcuran prãm nare kam ihcuran. Mōrmō ajkī cute ampo to jŷm jixôn prãm nare kam to hixôn. Quē cute nee jŷm curan prãm nare kam ihcuran na, quē ha ihtŷj mehcunea, cute ihcuran ata jŷkjê pê, amji pytar xà na mehtehcajpa.

— Ne quē ha curia cute apu ipa na, quē ha ahnaa imã mehcajrên catêjê jō pahhi ihweje ne ty. Jirô pê mã quē ha ihtŷj hapacta ne hō krī wŷr amji jaxà. Ne por amjia kôt mehcuran prãm kam mehcura atajê, quē ha cute me harên catêjê me ajkrut, ne ajpêan kôt me harên na, quē ha ihtŷj mehcura, cute jŷm curan jahpan xà na — hane.

Hipêr cute me to ihmimpej xà

Cute Me To Ihimpej Xà 6.4-16

Ne pê Mojxe hipêr Ixaher catêjê to ihmimpej to:

— Ixaher catêjê, me ikampa, Pahpām pê ri me pajō Pahhiti, ne taa mã ri pyxit peaj ne cupê Pahpām. Cwŷrjapê cu ha me pahna cuhkônre cunea me, me pahcaxwŷn cunea me, me pahcarôt cunea to, quē ha me pamã ihkŷn, ne to pit mã amji kam me pajapac to me papa. Ne nee me Pahpām ràn xà na, ame amji mã ampo kŷn nare. Ca ha atŷj, cute me acaxuw imã ampo na harkwa, wa ite me amã harên atajê to me amji japackre. Ca ha atŷj me pahkra mã harên xà itajê to me harê, ne me cumā to hahkre, ne hanea ne ikre kam

me cumā to awjarê, ne ca ha hanea ne pō pê ame apa xà ata kam, atŷj me cumā awjarê. Ne caxwa ri ca ha hanea ne me gikwa xà wŷr amji mã me harê, ne hanea ne iràrà na me akrī pê amji mã me harkwa ita to awjarê.

— Pê Pahpām me aquêtjê pê Aprāw me, Ixac me, Jaco mã pjê ita to awjahkrea na, quē ha ihtŷj ita caxuw hŷrmã me ato mō. Ne me amã, por pê ca nee me krī catia ton nare atajê gō, ne ramã kam me amã ampo pejti te hipu hiahpuro. Quē ha me amã ate me kwa kwŷn nare atajê gō, ne me amã me ate me pŷxô pâr kre nare atajê gō, ca ha me ku ne me to garte. Ata caxuw ca ha Pahpām te, por Ejit jō pjê kam ate me amji pupun xà kêanre, mã cute ihpŷn me ato cator na, ca ha atŷj me to amji japackre.

— Ne ame garte jirô pê, ca ha harkwa kôt ame apa, ne cumã pit mã me apê. Ne nee ca ame pahpām cahàc krekà atajê kŷn nare. Ampo na? Ca ha ate ame pahpām cahàc krekà atajê kŷn, ne ihkôt ame amji kam gapac, ne me Pahpām tŷar ita mã hikran na, quē ha hanea ne me Pahpām me amã hikra. Ne ame akam incryac to incryc, ne ame ato kêanre ne. Ca ha ampo kên cunea kam me amji pupun xà kêanre atajê to ame amji pupu, ne kaam me gamre. Cupate ca ha Pahpām kôt pit mã me apa, ne nee pahpām cahàc krekà to hipêr me amji japackre nare — hane.

Pê Mojxe me cute Pahpām mã ampo jôr xà to ihmimpej

Cute Me To Ihimpej Xà 26.1-11

Pê ajco Mojxe Ixaher catêjê japackre to hane he:

— Ca ha ma Pahpām te me amã pjê to hŷjahkre ata wŷr me acato, ne curi mehkrī catêjê tohŷjê, ne me hiwej ne hō pjê kam me akrī jirô pê, ca ha me gō pur ata kam mam ate me gō to me cuprôn atajê, Pahpām mã me agō.

— Ca ha kàhà kam me to hipu, ne ma Pahpām to me amji japackre xà jŷrkwa wŷr me to apa. Ne Pahpām mã mehcajrên catê mã me agō, ne cumã me amji jarên to hane he: "Ite Pahpām mã ampo jôr xà ita mã he. Cute pjê to imã hŷjahkre ata mã ito hàr na, harên xà mã he" hane.

— Quē ha Pahpām mã mehcajrên catê kàhà na me gō atajê incwa, ne Pahpām mã cute me hō to caxàr xà cuna mã me hŷxwŷ. Ca ha me acunea Pahpām mã me acakôc to me hane he. "Pê me iquêtjê menchrêre, ne Ejit jō pjê mã me axà. Ne ita caxuw ite me amji ràn ne me ijàhtôa to me ijàhtô. Ne ite ame amji pupun xà kêanre to me amji pupun, ca ate me ikam gapac, ne apa tŷjti ita to ate me ito acator, pjê impejti ita mã. Jahpan xà na wa amã mam pjê impejti ita jō intuw ita to mō" hane.

— Jirô pê ca ha me cumã cre, ne ma me gŷrkwa wŷr me amji jacjê, ne ame gápàn xà impejti atajê to ame apà, ne ame akwŷ cunea kam me gakryti ne — hane.

Mojxe jaxà kam Jojuw pê pahhi tuw

Cute Me To Ihimpej Xà 31.1-8; Me Cahyt Xà 27.15-23

Ne Mojxe te Pahpām mā ihcakôc ne cumã harkwa to:
— Me ijõ Inxũ Cati, pê ca me icunea mā ite amji kam me ijapac xà gõ, na ca ha me icaxuw me akwý nõ capi, ne to me ijõ pahhi tuw na. Ne por me hũmre nõ mã me ipijapu kam me to ihhimpej jahkre pej ata pê, quê ha me ijõ pahhi, mār quê nee me cupê me akwý pê carà cahàcre jamār catê nare atajê pyrác, ne amjia kôt ame ipa, ne me ipictor nare — hajýr.

Mã Pahpām Mojxe mã:

— Jojuw pê Nũm kra ata, ca ha ihpa na me apy. Ampo na? He kaam ri Icarõ Pejti te hipu tu. Ca ha Erexa pê imã mehcajrên catê ata wýr to tẽ, ne mehcunea kam mare mã me cuna mã ihkrã na gũ xi. Ne cumã me caxuw cupê pahhi ita gõ, mār quê mehcunea me kampa. Ne wa ha itýj ite cumã icakôc prãmte, caxuw Erexa pê imã mehcajrên catê ata mã ijarkwa juwahi.

— Hõ, wa ha me to hajýr to xa. Wa ha ampo na Jojuw mã icakôc prãm, ne mam Erexa mã icakôc, mār quê ikampa ne Jojuw mã ijarkwa jarê, quê ha Jojuw xwýjê ma amũ mehkwy mã ijarkwa to awjarê — hane.

Mã Mojxe te Pahpām te ampo na mên xà ata ton, ne ma Jojuw japrõr ne ihpa na ipyr ne to mõ, Pahpām mã cute mehcajrên catê japrý te Erexa ata wýr. Mã cormã mehcunea me xa ne me hõmpu, mã Mojxe te me kam mare mã Jojuw krã na hũ xir, ne cute cupê me hõ pahhi xà caxuw cumã carôt jõr.

Mojxe tyc xà

Cute Me To Ihhimpej Xà 34.1-10

Ne Mojxe ihtyc xà wýr pjê pupun prãmte, por Canãn jõ pjê cahê na kënti japrý te Nepo ata na hàpir. Mã Pahpām te cumã pjê ata jahkre, mã cute hõmpun, Krícuxwati me. Jirõ pê mã ri Pahpām cumã:

— Pjê ita pê wa Aprãw me, Ixac me Jaco tàmxwý mã to awjahkre, ne ite amã hahkre. Ca rý cama ate hõmpun, ne ca, ca ha nee curi mehkôt acator nare — hane. Me ajkaam mã Mojxe tyc, mã curia Pahpām te jũ ri harêt. Mã nee jũ ri Pahpām te harêt xà ata na jũm te hahkre pej, ne hõmpun nare. Pê Mojxe cormã irít peaj, ne cormã carôt pê mentuaw carôt, ne ahna caku xënti-winti pê ty.

Pê Ixaher catêjê Mojxe xwý to hapac xà te mencwýar to me putwry pyxit. Pê mam pahhi cati to cute amji kam me hapac xà te hajýr tũam, na pê me to hane. Mã Nũm kra pê Jojuw ata te amji jahkre pejti, Pahpām Carõ Pejti kôt. Ampo na? Pê Mojxe ihkrã incwýrpê hũhkra pê, na pê cumã amji jahkre pej. Mã Ixaher catêjê ihtýj me Jojuw kampa, por pê Pahpām Mojxe mã ahnaa harkwa to ata na.

Rý jũ caxuw Pahpām mã ihcakôc catê nõ pê Mojxe xwý pyrác nare. Pom ahnaa mã me hõ ikwý nõ mã ihcakôc ita na, pê me Pahpām ajco ihkuc ri cumã ihcakôc.

Pê me hũcapi catêjê me Krícuxwati pupu

Jojuw 2.1-24

Ýhý, pê Canãn jõ pjê kam Krícuxwati ata quê ha mam me hũtà. Mã pahhi pê Jojuw te me hũmre to ipijakrut ne mehkujahêc, cute me, por pjê to Pahpām te me cumã hũjahkre ata pupun prãmte. Mã me hũmre itajê ma hýr xà ata pê me cator, ne ma me pra. Ne Cõpi-japjêr jõ cô na me irêr, ne ma Krícuxwati ita wýr me cator, ne ma harkwa na me hàr, krí wýr, ne ma pyjê nõ inxyre japrý te Rapekwýj ata wýr me tẽ, curi me hõt prãmte. Mã jũm te Krícuxwati jõ pahhi mã Ixaher catêjê xũmre pijakrut te pjê pupun prãmte me cator na harên.

Mã krí jõ pahhi te me hýrmã krãhtare kwý kujahêc, cute me hũmre itajê pro, ne me hacjên prãmte.

Mã Rapekwýj te ikre jimoac ri me to ipimxur. Ne cute krãhtare kwý atajê mã ihhêj, ne cumã:

— Ita ri me hũmre pijakrut ne me cator, ne ma ramã me tẽ. Wa nee ite jũ ri me mõr xà na me hahkre pej nare ita kam, atýj ame hapê. Ca ha jũ ri me cumã me acato — hajýr.

Mã ma krãhtare kwý, ihcaprý na mehkôt me pra. Ne harkwa na me cator me ajkaam mã krí mã mencjêj xà jõ harkwa te amji jihê. Mã ma Cõpijapjêr jõ cô ri ihcaprý na ame hapê.

Mã Rapekwýj me hũmre pijakrut atajê nõr xàa kam me hýrmã hàpir ne jý, ne ame cumã amji to ihhimpej, ne cute me cumã:

— Ýhý, he wa ite me Apãm Cati te me amã pjê ita jõr na ramã me gahkre pejtu. Ne ampeaj kam ri ame acupa. Ampo na? Pê wa Ejit jõ pjê pê me acator na me garên pa, ne hanea ne me Apãm Cati te me amã cô jahkjên, ca ahna me arêr na me garên pa. Ne hanea ne ramã ite, me ate Amorit catêjê jõ pahhi to me ipijakrut ne mehcuran na me garên par. Cwýrjapê ri ampeaj kam me imã me acupa. Ampo na ri ame acupa? He me Apãm Cati pê cõjkwa jõ Pahpām, ne hanea ne cupê pjê jõ Pahpām, na ri ame acupa.

— Ne ita caxuw ca ha me imã amji ton xà nõ to me amji ton hiahpuro, me Apãm Cati japrýa na. Quê ha jũ caxuw me akwý me ijõ pjê ita pytà, ca ha atýj ite me ato me atyc jahpan xà na me ijamã. Wa ha me acahê na ame ipa, inxũ me, inxê me, pa me, me ikjêjê cunea me. Ampo na? Wa ha me atehcajpa, ca ha hanea ne jũ caxuw me itehcajpa — hajýr.

Mã me hũmre itajê te me amji kam hapac, ne me cumã harkwa to:

— Ca ha ate ita ri me ipimxur na me ijarên nare na, wa ha itýj me acunea pytà. Ne ite gũrkwa jahkre pej prãmte ca ha harkwa krare na pàr cuxê tepti nõ ata xõ — hajýr.

Mã Rapekwýj te me cumã harkwa to:

— Pom wa me amã ita. Me tẽ ne kënti atajê nõ na ca me amxu, ne curia amji to me amcro to incrê, quê ha xa krãhtare kwý atajê hacpý ne me amji jaxà, ca ha cormã me akwý wýr me tẽ — hajýr. Pê hũrkwa kên te krí tète kwýc ata jipya xa. Na ri cute põ rũm harkwa krare nõ ata na pàr cuxêti xõr, ne ahna me iwrýc na me ton. Mã ma krí pê ahna me iwrýc, põ wýr. Ne ma kënti nõ ita wýr me tẽ, ne curia cute amji to me amcro

to incrê. Jirô pê mã ri ma cô na me irêr, ne ma Ixaher catêjê jÿr xà ata ri me hÿrmã me cator. Ne cute me hõ pahhi Jojuw mã ihcunea na me amji jarên par, ampo te jÿ mã me ton xà atajê na.

Pê ame Cõpijapjêr jõ cô na rê

Jojuw 3.1-17; 4.18

Mã Jojuw te Ixaher catêjê cunea to Cõpijapjêr jõ cô na hàhhuc, ne curia ame ipa. Mã me ahna amcro incrê, mã me to ihhimpej catêjê atajê te ame to ihhimpej, ne me cumã:

— Quê ha Pahpãm mã mehcajrên catêjê Pahpãm jàmccjên xà to me mõi, ca ha me hõmpu, ne atÿj me hÿnâr pyrentu — hajÿr.

Ne pê ma ajco me pÿ po te Pahpãm jàmccjên xà ata pupu, ne Pahpãm me cute me ajpên par xà ata to me amji japackre pyrentu. Mã Jojuw te me cumã harkwa to:

— Quê ha apê, quê ha Pahpãm carôt tÿjti ata to me pamã ajpê. Cwÿrjapê ca ha caxuw ame amji cÿmpej to mempeaj ne, ate me amji kam gapac xà mea mã, mãr ca Pahpãm to pit mã me amji kampa — hajÿr.

Ne me ahna apê mã Jojuw te Pahpãm mã mehcajrên catêjê to ihhimpej, mam cute Pahpãm jàmccjên xà ata to cô wÿr me mõi prãmte. Jirô pê mã ri Jojuw te mehcunea mã hàkjêr ne me cumã:

— Ajpên me mõi ne Pahpãm te ihcakõc xà ton ata na me kampa. Ne ita kam ca ha me Pahpãm tÿar te me pahcahê na apu ipa na me hahkre pej. Por Pahpãm pê pjê cunea Pãm Cati ata jàmccjên xà ri hãn ne me acumam ipa, cô na me parêr xà na. Na ca ha me Pahpãm jàmccjên xà ata pupu, ne me Pahpãm te me pahpytâr na amji ton xà ata to me amji japackre pyrentu. Quê ha me hãmccjên xà to me ipa catêjê par cô kam ahtwÿ, me ajkaam quê ha cô ata me amã ajcapô — hajÿr.

Ne ta kam pê ita hane. Mã Cõpijapjêr jõ cô tàt te hipu tu, ne ihtu. Mã por me Pahpãm jàmccjên xà to me mõi atajê te cormã cô kam mehpar xãm, mã pea cô kÿj rÿm ajpjê ata cunea pinkrên, mã ahpar mã ihcahhur cunea pijapjêr par, ne ihcajpuw amcrà.

Mã Pahpãm mã mehcajrên catêjê atajê te hãmccjên xà ata to cô jipõc ri amcrà ata kam me hàhhuc, ne me to xa. Mã mehcunea rêr partu, hÿkjê mã, Krÿcuxwati wÿr. Mã Pahpãm mã mehcajrên catêjê hapu na me irêr, me ajkaam mã cô te ipijapjêr kam ihtêm, ne ipijapjêr ta to ajpjê, ne cute hipu tu.

Pê Ixaher catêjê Krÿcuxwati to hamre

Jojuw 6.1-25

Pê ramã Ixaher catêjê cupate, Krÿcuxwati jõ harkwati hihê, na pê nee jÿm hàr nare, ne nee pê hanea ne jÿm cator nare. Ampo na? He ramã ajpên Ixaher catêjê me hàhtêp to mõi, cute me krÿ ata pytâr, ne me to hamre xà caxuw. Mã Pahpãm te Jojuw mã hÿjarên, ne cumã:

— Imãa ramã Krÿcuxwati me, me hõ krãhtare me, hõ pahhi me, ramã me hamre tu. Ampo na? He wa ha me gÿhkra mã me haxà.

— Ne ca ha ita caxuw me hane he. Quê ha me gõ krãhtare catêjê cunea, amcro cunea kam krÿ ita pu na me ipixêr to pyxit, ne ma hacpÿ mã me amji jacjê, me gÿr xà wÿr. Quê ha hanea ne imã mehcajrên catêjê te xet itajê, ijàmccjên xà cumam me hàkôr xà atajê to me ipa. Ne ca ha me hajÿr ita to me amcro to xêj.

— Ne amcro te xet ita kam, ca ha me apixêr cahhur to krÿ pu na me ajxê to me xet. Quê ha imã mehcajrên catêjê me hàkôr xà itajê cakôr to me ipa, ne cute mehcajôr jicu xà wÿr, quê ha mehcajôr kam me to in-crà tune, quê ha Ixaher catêjê cunea kÿj cati pêa mã ame carâr. Me ajkaam quê ha krÿ tète kwÿc ata cunea apu ajxwÿ. Ca ha me acunea krÿ ata mã me axà, ne me hipej tu ne — hajÿr.

Mã Jojuw te Pahpãm mã mehcajrên catêjê me mehcunea to cuprôn, ne me to ihhimpej, ne me cumã:

— Ca ha nee cormã ne me anõ acarâr nare, ne nee acakõc nare. Wa ha pa me acarâr na me amê, ca ha cormã ame acarâr — hajÿr.

Ne me hõ krãhtare catêjê cunea me, Pahpãm mã mehcajrên catêjê kwÿ Pahpãm jàmccjên xà ata to hãn ne krÿ pu na me ipixêr to pyxit, ne ma hacpÿ mã me to ipa, me hÿr xà wÿr. Ne iràrà na Krÿcuxwati pu na cute me ipixêr to me pyxit, ne ma me amji jaxâr, me hÿr xà wÿr. Cute me ita to hajÿr to amcro to xêj.

Ne me ahna amcro te xet ata kam ri, cute krÿ ata pu na me ipixêr to xet. Ne me ipixêr jicu xà ata kam ri Pahpãm mã mehcajrên catêjê te kÿj cati pêa mã ame hàkôr xà atajê cakôr. Mã Jojuw te me cumã harkwa to:

— Ame acarâr! Pahpãm te me pamã krÿ ita jõr! — hajÿr. Me ajkaam, mã kÿj cati pêa mã ame carâr, mã krÿ tète kwÿc ita cunea apu ipijaxwÿr, mã Ixaher catêjê cunea xâr, krÿ ata wÿr.

Ne cute mehcunea jipej, me hÿmre me, pyjê me, me ahkrare me, me hõ parxare mea mã.

Ne cute me hipej xwÿjrea na Jojuw te, por pê mentuw me ajkrut ne me krÿ pupun to me tẽ ata mã:

— Mãr ca me jÿm cahãj pê Rapekwÿj pijapit xyre ata to me amji japackre, por ate mehkên pê me hÿtâr xà na me cumã amji ton ata na. Me tẽ ne me haprô, me hÿmjê me, me hÿkjê mea mã — hajÿr.

Mã ma mentuw itajê ajwar me tẽ, ne cute me pâr cuxê tepti te harkwa krare na harij ata pupun, ne cute me jÿm cahãjre ata me, me hÿkjê me, mehcunea japrôr ne amji cahê na me cumã ampo kà te hÿrkwa pyxwÿr.

Mã Ixaher catêjê te krÿ kam ampo atajê cunea to caxâr, ne kên pràti me, wakÿre pràti me, wakÿre te ampo run xà atajê ri, nee cute jÿ na me ton nare, ne Pahpãm jarkwa kôt, ma ampo kà te Pahpãm to me amji japackre xà jÿrkwa wÿr, ampo atajê cunea to me mõi.

Hõ, ita na ri Jojuw te pyjê nõ inxyre ita me, me hÿkjê cunea pytâr, pê mentuwjê me krÿ pupun to pra, pê mehtehcappa na pê.

**Pê Jojuw Pahpām wỳ, pyt me putwỳ to ipinkrên
prāmte**

Jojuw 10.1-15

Pê Jojuw na mehkwy Krícuxwati na kjêjê jipej jirô pê mã, hanea ne krí nō ita to me hamre. Na pê Krípinkrên jō pahhi, Jojuw te krí atajê jipej na harên pa, ne hanea ne cute Gipôm jō krí me, me ajpên mã me hō cō xām na me harên pa, ne ampeaj kam cumã me hūpaa to me hūpa. Mã cute Amorit catêjê jō pahhi kwỳ wỳr harkwa kujahêc, ne me cumã harkwa to:

— Ajpên me pra ne ite me Gipôm catêjê jipej na me itehcajpa. Ampo na? Cute Ixaher catêjê pê me pahcurê xwỳn atajê me, me ajpên mã me hō cō xām jahpan xà na, cu ha me hipej — hajỳr. Mã pahhi te xíc te Gipôm catêjê jipej na me amji par.

Mã Gipôm catêjê te amji na mempar, ne Jojuw wỳr me harkwa kujahêc to:

— Ajpên gūjarêan kam tē, ne me ipê amã me ijapên catêjê tehcajpa! Nāmri Amorit catêjê jō pahhi catêjê kwỳ ihtỳj me icuna mã me ipijapu prām, ne ramã ajpên me hō krãhtare to me iwỳr me mō — hajỳr. Mã Jojuw ma Ixaher catêjê jō krãhtare to mō, cute Gipôm catêjê tehcajpar prāmte.

Mã Pahpām te Jojuw mã harkwa to:

— Apu pa nare, wa ramã ite gūhkra mã mehcunea jaxàr, na ca ha atỳj mehcunea tohê ne me hirô pê xa — hajỳr. Mã ma caxwari Jojuw hō krãhtare to mō, iràràtia na, ne cama cute me curê xwỳn itajê mã me ipikrar, ne amehpro. Mã Pahpām te jū mã ame curê xwỳn itajê ton, mã ampeaj kam cumã me hūpaa to me hūpa. Mã Ixaher catêjê jō krãhtare te me hàhtôa ne me hipej, ne ma pry kôt mehkwy jahê, ne ihtỳj mehcuran to me mō. Mã Pahpām te kēnti te ta catia ne ihkujahêc, mã cute Ixaher catêjê jō krãhtare jirôa pê me curê xwỳn atajê jipej. Ne cute mehcuran to pyt.

Ne cormã Jojuw jō krãhtare ame curê xwỳn itajê jahêar kam, mã ramã pyt to mō. Mã caxwari ma jū kam, jūm tēm cupate, Jojuw te Ixaher catêjê mã Pahpām na hàhwỳr to hajỳr he:

— Me ijō Pahhiti, pyt me putwỳ to ankrê, cōjkwa kam, mār quê nee awcapàtkô nare — hajỳr.

Mã pyt me putwỳ curia cōjkwa kam ajwar ipinkrên ne ajêt, mã ahnaa Ixaher catêjê jō krãhtare te me curê xwỳn catêjê cunea jipej tu. Mã pyt ipinkrên itaa na ajêt.

Rỳ jū caxuw amcro nō pê amcro ita pyrác nare. Ampo na? Cōjkwa kam pyt me putwỳ ita pinkrên ne ajêt, me hūmre nō pyxit peaj ata te Pahpām na hàhwỳr na ri. Ampeaj kam Pahpām pê Pahhiti te Ixaher catêjê tehcajpar crire nare. Mã Jojuw me, mehkwy te me curê xwỳn jipej jirô pê mã, ma me amji jaxàr, mehkri xà wỳr.

Pê Jojuw mehkwy to ihmipej to caku to hàhtôa. Na pê pjê ata cunea pytà ne to hō tekjê, mehkwy caxuw. Na ri Ixaher catêjê te amji mã Canãn jō pjê kwỳ pytàr ne me cumã haprỳ to Ixaher jō pjê. Mã ahpỳanre na me hakrã cunea te amji mã pjê ata to ipicokjêr par.

Pê Rewi kra nee mehkjêjê cuxà me amji mã pjê nō pyr nare. Ampo na? Me cupê Pahpām te amji kam ha-

pac xà jūrkwã kam me hàpên catêjê, mehkjêjê cunea jaxà kam. Na pê mehkjêjê cunea ihtỳj me hō to Rewi kra tehcajpar xà. Pê Rewi kra jaxà kam, Joje kra pi-jakrut pê Manaxê me Eprí me amji mã pjê kwỳ cwa. Na pê ahpỳanre na me hakrã te tōxi atajê amji mã pjê ata to ipicokjêr par to hane: Ximãw jō pjê me, Juta jō pjê me, Rupên jō pjê me, Pênjamí jō pjê me, Tã jō pjê me, Eprí jō pjê me, Manaxê jō pjê pijakrut me, Cate jō pjê me, Ixaca jō pjê me, Xepurô jō pjê me, Naptar jō pjê me, Axer jō pjê.

Ne pê cormã Jojuw me, me cupê prohti kam mehtiar ajco me to ihmipej to me ipa, na pê ihtỳj mehkwy mehkôt Pahpām to me amji japackre. Ne pê Jojuw ihwej ne ty, pê pjê pê hō pjêa kam me harêt.

Pahpām na mehkwy to ihmipej catê pê Gitô

Me To Ihmipej Catêjê 6.1-4

Hō, pê me hajỳr to mōar kam, ajmār me pjê ata cunea pytà. Jirô pê mã pê cama Pahpām to me hapac kêt to me mō. Pê Pahpām hacpỹa mã amji wỳr me to ipipkjêr prāmte, ihtỳj me curê xwỳn jūhkra mã ajco me hacjê, ne me hỹrmã Mitij catêjê kujahêc to caku to xet. Pê Ixaher catêjê me hūpate ma ramã krí pê me cuto, ne kēn kre kam ajco amehkrí. Ne ajco Ixaher catêjê me hō pur kam ahkre, pê ajco me hapôj ne ma me cupê ampo to hàhkij partu, ne ma me to cuto, me hō parxare mea mã.

Cwỳrjapê ri Ixaher catêjê te hacpỹa mã Pahpām wỳr me amji jaxàr, ne amji tehcajpar xà na me ahna hàhwỳr. Mã amcro nō na Pahpām te harkwa to imprar catê nō na amji ton, ne ma Ixaher catêjê nō intuw japrỳ te Gitô ita wỳr cator, ne cumã:

— Hàpà! Cōjkwa kam Pahhiti pê Apãm Cati quê ha amã acaxwỳn kam acarôt gō. Pahhiti quê ha ato ihmipej, mār ca Mitij catêjê jūhkra pê Ixaher catêjê pytà — hajỳr.

Pê Pahpām Gitô pê hō krãhtare to incri

Me To Ihmipej Catêjê 7.1-8

Mã Gitô te impar ne ma tē, ne cute mehkwy xūmre jàhtôa to ajmār mir te trinta ne ihkôt mir pijakrut ne me to cuprôn. Pê ramã me caxuw, Mitij catêjê jō krãhtare me hirôa pê hàhtôa, ne kēnti cahê na caprūm ata kam me ahtwỳ. Ne pê me krãhtare atajê jàhtô, pê ihhêj rūm peture jàhtô. Ne hanea ne me hō cawrô kô jarôti pê camer atajê jàhtôa, pê ihhêj rūm pjênxôm carôt jàhtô, na quê nee jūm me cahyt par nare.

Mã Pahhiti pê Pahpām te Gitô mã me hūmre jàhtôa na me hōmpun, ne cumã harkwa to:

— Ampeaj kam amã me hūmre jàhtô. Ne wa ha nee me hàhtôti itajê pijapu na me hamār quê me ipijapu nare. Ampo na? Quê ha me hàhtôti atajê me ajpu, ne me cute ame amji pytàr na ihtỳj me amji cãmji, ne me amji mã: “Me itea, wa me amji pytàr” hane. Cwỳrjapê ca ha ma hacpỹ mã ikre wỳr me hàprê nare, ne me capônỹre, ne me cumã hūpahti atajê kujate — hajỳr.

Mã ma cute me mir te winti ne ihkôt mir pijakrut ne ikre wÿr me amji jaxàr. Mã cormã me hÿmre te me mir te tej ne me hàhhuc, ne ramã me ipijapu xà caxuw ame amji cÿmpej.

Mã Pahhiti pê Pahpãm te Gitô mã:

— Cormã ampeaj kam amã me hÿmre jàhtë. Ma cô mã me to mō, quê ha ame ikō, wa ha cormã amã jÿmjê atajê jarê — hajÿr. Mã ma cô mã me to mō, ne me iwÿc, mã ame ikō.

Mã Pahpãm te Gitô mã hÿjarên to:

— Por me cupê rop, ne me harkwa to ame cô to ikō atajê, quê ha ikre wÿr me amji jaxà, ne por me hÿhkra na ame ikō atajê quê ha me ajpu — hajÿr.

Mã me hÿmre te xêj crê peaj, ne me hÿhkra na me cô toikō. Mã Pahpãm te me hōmpun ne Gitô mã:

— Pom me hÿmre te xêj crê itajêa to, wa ha Mitij catêjê jàhtëa atajê me ajpu, ne me hipej tu. Ne mehk-wÿ itajê ca ha hacpÿa mã ikre wÿr mehkujate — hajÿr. Mã cute ikre wÿr me hàhtëti atajê kwÿ kujahêc. Mã cute me xêj crê peaj ne me hàhhuc.

Pê Gitô jô krãhtare incrêre atajê me curê xwÿn jàhtëa jipej

Me To Ihhimpej Catêjê 7.15-22

Mã caxwa ata kam Pahpãm te Gitô mã harkwa to:

— To jÿ, ne gō krãhtare to mō, me acurê xwÿn catêjê wÿr, ne me kam tẽ, wa ha me atehcajpa, ca ha me hipej tu — hajÿr. Mã Gitô te hō krãhtare na hàhwÿr, ne me cumã:

— Me to jÿ! Nãmri ramã Pahpãm te me pajÿhkra mã Mitij catêjê cunea jaxàr — hajÿr.

Ne cute me to hakrã to incrê, ne ahpÿanre na me cumã me hàkôr xà jôr par, ne ihkôt me cumã pjê te cô run xà caxwãm pê cuhy pôr atajê jôr par. Mã ma pô pê Mitij catêjê jàhhuc xà ata wÿr me to mō, ne curi awcapãtkô picapôn jirô pê me cator, ne me ahna me ipixêr. Ne ihprôt pê cute ame hàkôr xà cakôr, ne ame cô run xà kam cuhy ihcuhhê ne pôr atajê cahhêc, mã krã, ihpôc xà jàhcujro. Mã cute ame carâr to:

— Pahpãm me Gitô quê ha me gipej! — hajÿr.

Ne nee cute me kam ihtêm nare, ne cama mehkãrã ne me to xa, ne ame hōmpu, ampo te jÿ na ame ton xà ata na. Mã Pahpãm te jÿ mã me curê xwÿn atajê ton, mã me taa amehprôt ne awcapãtkô kam me amji kwÿa cura. Ne mehcahhur ma me pra, me hō pjê wÿr.

Hōhō, pê Pahhiti pê Pahpãm hō krãhtare to Mitij catêjê jipej to hane, ne Ixaher catêjê pytã. Pê Gitô me to ihhimpej to caku jàhtëa, pê ajco ihtÿj Pahpãm kôt me ipa.

Me to ihhimpej catê Xãnxã

Me To Ihhimpej Catêjê 14.5-6

Ne pê Gitô ty jirô pê mã, pê hipêr Ixaher catêjê Pahpãm to amji pê me hapac kêt, ne me cumã hikra. Cwÿrjapê pê Pahpãm me curê xwÿn pê Piritew catêjê te Ixaher catêjê jô pjê to ihhimpej na me to tojnō, mãr quê ha me taa caku jàhtëa kam me to ihhimpej.

Ne ajco amji to me curê xwÿn xà ata jô amcro kam pê Xãnxã pê Ixaher catêjê jô pahhi, ne me to ihhimpej ita to caku to winti. Ne ajco Piritew catêjê jàhtëa ne ihc-ura. Na pê Pahpãm me caxuw mehcunea jirôa pê hÿ kam cumã carôt tÿj catia ne cugō.

⁵ Pê amcro nō na Xãnxã hÿm me inxi me krÿ nō japyr te Timna wÿr me mō. Pê me mōr xà kôt me pÿxō in-tepre amji cwÿrpê me hōmpun to mō. Mã hamre, ih-prôt pê hÿrmã rop cahàc xãm tuwti nō kam intoj.

⁶ Mã Pahpãm Carō Pejti te Xãnxã mã carôt catia ne hōr. Na ri Xãnxã te hÿhkraa to rop cati ata curan.

Me to ihhimpej catê Xãnxã

Me To Ihhimpej Catêjê 16.1-3

Pê Xãnxã amcro nō na, ma Piritew catêjê jô krÿ nō wÿr mō, ne cumã hàr. Mã cute ahna me to me hō krÿ jô harkwa jihê, ne ihtÿj curia cute amji to apê na amehcãmjÿ. Mã irarã na me curê xwÿn jô xÿmre jàhtëa te me cuprôn, ne mehpro prãmte hÿrmã me mō.

Mã Xãnxã na awcapãtkô picapôn, mã ma mō ne cute krÿ jô harkwati ita hyr, ne impÿn, ne ma krÿ pê to cator ne kënti nō ita wÿr to mō. Ne ahna to hàpir ne himoac kam cute hir. Hō, cute harkwati ita hyr to hajÿr, ne Piritew catêjê jÿhkra pê amji pytãr.

Xãnxã te amji curan xà kam, me curê xwÿn jàhtëa ne mehcura

Me To Ihhimpej Catêjê 16.21-31

Ne ahna caku te winti ita jicu xà kam ri Xãnxã te Pahpãm kôt amji ton jicu, cwÿrjapê ri Pahpãm te intête carôt tÿjti ata cunea caxàr, mã hacpÿa mã carôt peacre. Ne ihprô ata pê ri Piritew catêjê kra nōa, na ri cupê curê xwÿn, mã cute Xãnxã pro na mehkwy tehcajpar prãmte cumã ihhêj. Mã cute mehpro, ne wakÿre to mehcajpre, ne cute mento krÿn. Ne kënti te kwÿr kên xà ata na, cute me hãm, ne me cumã hê. Mã ihtÿj ihcuhhê ne ame cumã to kwÿr kê.

Mã Piritew catêjê te Xãnxã pro xà ita to me amji japackre xà to, cute amji mã me amji kÿn nō ton. Ne me hō pahpãm cahàc krekã japyr te Tagō ita to me cati prãmte, ame to ihcakôc pejti, ne me amji mã:

— Me ijô pahpãm pê Tagō te ita caxuw me ijÿhkra mã Xãnxã jaxàr. Ne taa mã pê ramã me ikwÿ to kēanre, mã hahpan xà na me ijô pahpãm te me ijÿhkra mã haxàr. Ajpên me iwÿr Xãnxã to mō, wa ame to ijapactu — hajÿr. Mã ajpên mehwyr me to mō, ne pahpãm cahàc krekã Tagō jÿrkwati mã kên te ihcuhhê xàhti atajê cote na, cute me hãm.

Mã Xãnxã te me hōntuw nō mã harkwa to:

— Ikre mã ihcuhhê xàhti itajê nō na ijÿhkra xi, wa ahna cupy ne kôt — hajÿr. Ne pê Tagō jÿrkwati ata to me hipu tu. Pê me to ihhimpej catêjê cunea curi mehkÿr. Ne hanea ne kÿj rÿm ihkre nō kam, me hàhtë na me mir crê ne me jÿ, ne ahpar mã cute me Xãnxã pupun, ne ame hÿn kēanre to prãmte pê me jÿ.

Mã Xãnxã te Pahpãm mã ihcakôc ne ahna hàhwÿr ne cumã:

— Me ijõ Inxũ Cati pê Pahhiti, ito amji japackre, ne hipêr imã icarôt catia ne agõ, wa to Piritew catêjê to apu kê, cute me ito krÿn jahpan xà na — hajÿr. Mã Pahpãm te hacpÿa mã cumã carôt catihti jõr. Mã cute carôt cunea to ikre mã ihcuhhê xàhti atajê mã quêat ne ihkujahêc, mã me hipy ihcunea pÿm, ne cute mehcunea jipej tu.

Ne pê ihtÿr reria mã ajco me hàhtõa ne mehcura. Ne ita caxuw cutea mehkõt ikre to amji curan xàa kam hàhhuc, mã cute mam mehcuran atajê jirõa pê mehcuran. Mã me ahna ahtũm nare mã me hũkjê cator, ne ma cute me Xãnxã na hàhwÿr ne me to tẽ, ne hũm cahêa na me harêt. Hamre.

RUTIKWÝJ

Ýhý, ihkàhhôc ita ri jùm cahãj cuprý japrý te Rutikwýj pê Ixaher cahãj nare cokrô, ihtýj Ixaher catêjê jô xúmre nõ me hikwa na, me pamã harẽ. Ne cupê pahhi pê Tawi tocatyjre. Ne mehhimpej catêjê jô caku kam pê ita hane. Ne ihkàhhôc ita japrý te (Rutikwýj).

Rutikwýj jarěn xà

Rutikwýj 1.1-19

Pê Ixaher catêjê xúmre nõ ita Pãw jô krí kam, Juta jô pjê kam ihkrí. Pê caku atajê kam, Ixaher jô pjê cunea kam, me cupê hõ hamreare. Cwýrjapê pê ma Mowap jô pjê wýr mentuw nõ ita me hîxi japrý te Nomikwýj ita me, mehkra xúmre pijakrut itajê mea mã, me antuw. Ne curia mehkrí to me caku to hàhtôa ne ihtyc.

Ne pê ihtyc jirô pê, pê mehkra xúmre itajê ajwar me hikwa tuw. Ne mehprô atajê japrý pê Orpakwýj me Rutikwýj, ne me cupê Mowap jô pjê catêjê cahãj, na pê nee me cupê Ixaher catêjê cahãj nare. Ne pê me ahna caku jũũ mãn jirô pê mã ri, mempê itajê ajwar mehtyc. Jakàn pê mã ri Nomikwýj pijapit te hacpýa mã Ixaher catêjê jô pjê pê Canãn jô pjê wýr amji jaxàr na amji kam hapac. Ampo na? Pê ramã hacpýa mã me cumã hõ na me harên pa, na pê apu amji jaxàr prãm. Ne Nomikwýj te me wýjxwý itajê mã harkwa to:

— Wa ha ma ijô pjê wýr amji jaxà, ne me ca, ca ha ma hacpýa mã me akwý wýr me amji jaxà. Ne ramã iwej ita kam, ikra jũ wa hipêr me amã cugõ? Wa ha ate me ito impejti ita jahpan xà na, Pahpãm mã me acarjên, quê me ato impejti ne — hajýr.

Ne cute me cumã amji jarěn. Ne pea mencre itajê cunea amji to me hapac xà te ame amji kam amrã. Mã Orpakwýj te Nomikwýj cahôr ne cumã amji jarěn, ne ma hũm me inxi jũrkwa wýr amji jaxàr.

Mã curia quêt Rutikwýj hũprequêj na hàhhuc, mã cumã:

— Hõmpu he, ma ramã me anõ te mehkwy me, me hõ pahpãm cahàc krekà wýr amji jaxàr. Ne ca, xà ca ha nee cuxà mehwyr amji jaxàr nare? — hane.

Mã Rutikwýj cumã:

— Nee ite gicu na apu iton nare. Ampo na? He wa ha jũ ri amõr xà ata wýr, hanea ne ikràr. Ne ca jũ ri akrí prãm ata ri, wa hanea ne ikrí to prãm. Ne me akwý itajê pê me ikwýa, ne me gõ Pahpãm ita pê ijô Pahpãm ri, na wa ha itýj amji mã to ihmpej to ipa. Ne curi atyc xà ta ri, wa ha hanea ne ityc prãm, quê ha curia me ijarêt — hane.

Mã Nomikwýj cumã:

— Tahnaa, mër hacu — hane.

Ne ma ajwar Ixaher jô pjê kam, Pãw jô krí ata wýr, cute me amji jaxàr, ne me cator. Mã mehcunea te amji

mã me to ipikrar, cute caku jàhtôa kam me Nomikwýj pupun nare na ri.

Pê Powa me Rutikwýj hikwa

Rutikwýj 2.1-20; 4.13-17

Ne pê Nomikwýj pê impjê ty ata jũkjê xúmre nõ ita Pãw jô krí kam ihkrí, ne pê ampeaj kam hakràj cati, ne haprý pê Powa. Mã amcro nõ na Rutikwýj te hũprequêj mã amji jarěn to:

— Ito tojnõ wa mõi, ne jùm jô pur kam, cute ame arýjhy cupan mã pjê kam apu hikwa atajê to cuprõ — hajýr. Mã hũprequêj te to tojnõ, mã ma mõi, ne nee cute Powa te pur to hõ tekjê na hahkre pej nare kam hýrmã cator, ne kam apu arýjhy to cuprõn to mõi.

Mã krí pîn Powa cator, ne cute me cumã me hàpên catêjê jô pahhi cukij, ne cumã:

— Mër jùm cuprýhti mã apu mõi ita? — hajýr.

Mã cumã me hàpên catêjê jô pahhi cumã:

— Por Mowap jô pjê pîn, Nomikwýj kôt jùm cator ata ri apu pjê kam arýjhy pýpým atajê to cuprõn to mõi. Ne nee rý ihkôt nare, ne cute hàpên ita kam to incrà tu — hane.

Mã ma Powa hýrmã mõi ne cute cumã ihcakôc ne cumã:

— Ýhý, gapacta ne apu mõi. Quê ha ma me imã me hàpên catêjê me gamã, quê ha nee jùm apu acaxun nare. Quê amã kôr, ca gapacta ne mõi, ne imã me hàpên catêjê kôm xà kam cõkwý jaxà ne to ikõ — hajýr.

Mã cute Powa mã harkwa to:

— He ipê ampo kwýj cokrô, ca ate ito kênre nare, wa ha ahnaa mã — hajýr.

Mã Powa cumã:

— Wa ite, ate apjên tyc jakàn pê aprequej to impejti na garên par. Ne quê ha Pahpãm, ate aprequej to impejti ita jahpan xà na, ato impejti ne — hajýr. Ne ramã Powa jàpàn xàa kam hàhhuc, mã cute cumã hàkjêr ne cumã:

— Ajpên mõi ne me icahê na apà — hajýr. Mã ma mõi ne cumã me hàpên catêjê cahê na hýr. Mã cute ihu jirôa pê hàpàn xà kam me cumã hõ xãm. Mã hàpàn jirô pê, ma cute pur wýr amji jaxàr, ne cute hàpêan to pyt.

Ne ma krí mã cute amji jaxàr, ne hũprequêj wýr arýjhy to mõi, ne cute cumã hõr. Ne hanea ne cute

cumã me hõ to ihhi, ne to mõ ata jõr. Ne cute hũpre-
quêj mã ihcunea na amji jarên, mã hũprequêj hũrên
apu hakry, ne cute Pahpãm pejti kĩnti na harên.

Pê Powa na ahtũm nare pê Rutikwỳj me hikwa. Pê
Pahpãm me cumã ihkra xũmre japrỳ pê Opet ita gõ. Pê
Opet ata pê Tawi quêtiti. Hamre.

1 XAMER

Ýhỹ, pê Xamer pê Pahpãm jarkwa to ihcakôc catêjê nõ, ne cupê me to ihhimpej catê cahhur. Cwýrjapê ri hõ kàh-hôc pijakrut itajê japyr te (1 Xamer) ne (2 Xamer). Ne Pahpãm te Xamer te Xawrô pê Ixaher catêjê jô pahhi na hãm na hũjahkre. Ne ihkàhhôc ita hanea ne Tawi to ihcakôc.

Xamer pê Pahpãm jarkwa to ihcakôc catê

1 Xamer 1.1-28; 2.18-21

Pê Ixaher catêjê xũmre nõ ita japyr pê Ercãn. Ne pê ihprô ajkrut atajê japyr pê Anakwýj me Penkwýj. Pê Penkwýj mã mehkra, ne Anakwýj pê ihkra nare, ne ihkre crà. Pê ajco caku cunea kam Ercãn me, mehkra cunea krĩ cati nõ wýr me pra, Pahpãm mã cute me ampo jôr prãmte. Ne Ercãn pê ajco ihtýj mehkra mã cute ampo jôr xà atajê gô. Pê ihkĩnte Anakwýj pê ihkra nare, cute cumã ampo jôr xà na. Pê Penkwýj ajco Anakwýj curê to ipa, ihkra nare kam, ne ajco cumãn kêanre.

Pê caku cunea kam ajco to hajýr to xa. Pê Anakwýj ajco nee hãpãn nare, ne cama ajco apu amrã. Pê Ercãn hõtpê ajco ihcukij ne cumã:

— Anakwýj, ampo na mã ca apu amrã, ne nee gãpãn nare, ne cama apu apec? Xà wa akra te tej xà jirôa pê ato impej xà ata na amã ikĩn nare? — hane.

Mã amcro nõ na ma hipêr krĩ cati ata wýr me mõ, mã ma Anakwýj ampo kà te Pahpãm to me amji kam hapac xà jũrkwa wýr hãr, cute Pahpãm na hàhwýr prãmte. Mã Pahpãm mã mehcajrên catê pê Eri ata jý, harkwa mã mencjêj xà na, ne Anakwýj pupu. Mã cumã amji Kĩn nare, ne ihpeacre, ne cute Pahpãm mã ihcakôc na cumã amji ton, ne cumã:

— Ýhỹ, cõjkwa jô Pahhiti carôt týjti ita, ca ha ate ipupun, ne ito amji japackre, ne imã ikra xũmre nõ jôr na, wa ha hacpýa mã amã cugô, quê ha cupê amã hãpên catê rohnýtiti mã — hajýr.

Mã Eri te harkwa kà pupun, mã ihtýj amji cahhy, ne nee ihcakôc nare. Ampo na? Amji caxwãm pê Pahpãm mã ihcakôc na ri. Mã Eri apu ipipãn na ihcãmjĩ, ne cute cumãn to:

— Pĩxô cacô xýre to akõm jicu! — hajýr.

Mã cumã:

— Wa nee apu ipipãn nare, ne cama ipeacre, na wa apu Pahpãm mã amji jarê, ne apu ahna ahwý — hane.

Mã Eri cumã:

— Hã, apej pëa mã mõ. Quê ha Pahpãm ihtýj amã gãhwýr xà ita gô — hane. Mã cute amji jaxàr. Jirô pê mã ri jũ mã me ahna amcro te, mã ma cute me amji jaxàr, me hõ krĩ wýr.

Mã Pahpãm te cute ahna hàhwýr xà ata to amji japackre, ne cumã ihkra xũmre ita jôr. Mã cumã ihpým,

mã cute cumã hapýr to Xamer, ne hapýr ata kôt harên xà te “Pahpãm te ipar”.

Pê cormã Xamer incire, na pê nee hacpý mã krĩ cati wýr me to amji jaxàr nare to me caku to cwat. Jirô pê mã ri ma inxi me hũm to mõ, por curi Pahpãm to amji kam hapac xà jũrkwa kam, Eri apu ipa ata wýr. Ne pea Anakwýj te Eri mã amji jarên ne cumã:

— Ipê, por pê pyjê nõ hĩ cunea peacre to Pahpãm mã ihcakôc, ne ihkra na ahwý ata. Mã Pahpãm te imã ikra ita jôr, wa hacpýa mã cumã hõr to mõ. Cute ita ri, hãpên xà ita to cumã hãpên ita kam ahna ihwej xà caxuw — hajýr.

Mã Eri te Pahpãm mã, Anakwýj me, impjên cajrên. Mã impjên me ajwar Pahpãm mã increr jirô pê mã ri cute me amji jaxàr, me hõ krĩ wýr, ne curia cute me Eri na Xamer juwahi. Pê Pahpãm hipêr Anakwýj mã ihkra xũmre to incré ne cugô, ne cumã ihkra cahãj to ajkrut ne cugô.

Pê Xamer ajco Eri tehcajpar to ipa, ampo kà te Pahpãm jũrkwa kam hãpên xà atajê cunea na. Ne ajco ihkà impejti to ihkà, pê inxi caku cunea kam, ajco cumã hitô kà krare to ipa, impjên pê Ercãn me ipa xà ata kam.

Hõhõ, pê intuwre ata to ipijapar to me hane, ampo kà te Pahpãm to me amji kam hapac xà jũrkwa kam.

Pê Pahpãm Xamer cukij

1 Xamer 3.1-20

Pê ramã Eri ihwej ne ajmãr into tũm, ne ramã into puror. Ne amcro nõ na ramã hõr xà caxuw nõr. Mã Xamer ampo kà te Pahpãm jũrkwa kam nõ ne gõr, pĩ po te Pahpãm jãmcyjên xà cahê na. Mã Pahpãm te Xamer cukij ne cumã:

— Xamer, Xamer — hajýr.

Mã Xamer cumã:

— Ampo? — hane, ne ma Eri wýr tẽ ne cumã:

— Ampo? Wa ramã ita ri xa. Xà ca apu icukij? — hane.

Mã Eri cumã:

— Hacpý mã amji jaxà, anõr xà wýr. Wa nee apu amã ijãkjêr nare — hane. Mã ma Xamer te amji jaxàr.

Mã Pahpãm te hipêr ihcukij, ne cumã:

— Xamer! — hajýr.

Mã Xamer hipêr hýr ne ma Eri wýr tẽ ne cumã:

— Ampo? Xà ca apu icukij? — hane.

Mã Eri cumã:

— Quê, wa nee apu acukij nare. Hacıpỹ mã amji jaxà, anõr xà wýr — hane. Mã ma cute amji jaxàr.

He pê cormã Xamer kam Pahpãm jarkwa hamreare, ne nee cormã Pahpãm jahkre pej nare. Mã Pahpãm te hipêr ihcukij, mã ma hipêr Eri wýr tẽ ne cumã:

— Ca ate ampeaj kam imã gâkjêr, na wa ramã acuna mã xa — hajýr.

Mã Eri te Pahpãm te ramã apu Xamer tuwre ata mã hàkjêr na hahkre pej, ne to ihhimpej ne cumã:

— Anõr xà wýr tẽ ne kam nõ. Quê hipêr jũm acukij, ca cumã: “Pahhiti, pom ipê amã ijâpên catê ita, gapacta ne acakõc, wa ha itýj akampa” — hajýr. Mã ma Xamer te amji jaxàr ne tẽ ne nõ.

Mã Pahpãm te hipêr ihcukij, ne cumã:

— Xamer, Xamer! — hajýr.

Mã cumã:

— Pahhiti, pom ipê amã ijâpên catê ita, gapacta ne acakõc, wa ha itýj akampa — hane.

Mã Pahpãm cumã:

— Wa ha Eri na mehwý kam apu ampo to kêanre ne. Ne por pê wa ramã me cumã ampo cawpa, ata to wa ha mehwý cunea to hamre tu. Ampo na? He Eri kra xũmre ipijakrut itajê te ramã mehkên ton xà ita te ihhêj ne ramã amehtũmti. Ne ame to kêanre ita kam, jũ mã wa ha me to, ne hacıpỹ mã me to ihtetet? Ramã mehtũm ita te me hirõ pê ihpým tu! — hane.

Mã iràrà, mã Xamer te Pahpãm te ampo to cumã hũjarên atajê cunea to Eri mã hũjarên partu.

Mã Eri cumã:

— Ita na ri Pahpãm mã me to prãm — hane.

Pê Xamer ihkà to mõi, pê Pahpãm pê Pahhitia ajco cape na apu ipa. Ne pê mehwý cunea ihtýj harkwa na me kampa. Ampo na? Pê ajco Pahpãm jarkwa to pit mã, me cumã ihcakõc, na pê ajco me kampa.

Pê Piritew catêjê me amji mã Pahpãm jâmcjên xà pytà

1 Xamer 4.1-18

Pê caku ata jõi amcro atajê nõ na, Ixaher catêjê me Piritew catêjê ipijapu kam tẽ. Mã Piritew catêjê te Ixaher catêjê jõi krãhtare to mir te cwat ne mehcuran. Mã ma hacıpỹ mã mehwý te me amji jaxàr, por curi me hýr xà ata wýr, ne me cator.

Mã Ixaher catêjê pê prohcam cute me amji cukij, ne me amji mã:

— Ampo na mã me Pahpãm te me pahna Piritew catêjê jamãr, mã cute me pahkwý jipej? Hacme, ne me Pahpãm jâmcjên xà to ajpên me mõi, ne ma me papijapu xà wýr me to mõi, quê ha hàmcjên xà ata ihtýj me pahcurê xwýn pê me pahpytà — hajýr.

Ne ma cute Pahpãm jâmcjên xà wýr mehkujahêc, mã me cator. Mã Eri kra xũmre pijakrut atajê te me ahna hàhwý ne ma me ipijapu xà wýr me to tẽ.

Ne pê ihhêj ne Pahpãm jâmcjên xà ita to pit mã me amji mã mehhimpej, ne nee Pahpãm to amji mã mehhimpej nare. Ne hàmcjên xà to me cator pêê mã, Ixaher catêjê kýj cati pêa mã ame caràr, me hakryte.

Mã Piritew catêjê ihtýj ame Ixaher catêjê jõi Pahhiti te me ipijapu na mehtehcajpar na ame cãmjĩ, ne ame amji mã hũpa. Ne hacıpỹ ma mã Piritew catêjê te me kam ihtêm, ne ihtýj me hapu, ne mehcura. Ne cute me to mir te trĩnta ne mehcuran. Ne hanea ne cute me Eri kra xũmre itajê ajwar mehcuran. Mã ma mehcahhur me hũrkwa wýr me cupê ame pra. Mã Piritew catêjê ma me Pahpãm jâmcjên xà to me mõi.

Mã Ixaher catêjê nõ pyxit ne ma Eri jõi krĩ wýr cumã hũjarên to tẽ. Ne ihtêm ita kam cute ajkam hapac xà te apu amji pê ihkà cokjêr, ne apu amji tũm, ne Eri wýr cator. Mã ramã Eri pry jahkà kam ihkrĩ xà ata na jý.

Mã hũjarên catê ata cator, ne cute cumã me ipijapu xà atajê jarên to hajýr:

— Wa ita kam ma ajpên me ipijapu xà pê tẽ. Ne Piritew catêjê te me pahkwý jipej tu. Ne me akra xũmre atajê ajwar mehhi, ne Pahpãm jâmcjên xà te hajýr, ne ramã ipictor tu. Ma Piritew catêjê te me hũtâr ne me to mõi — hajýr.

Ne cormã jũm tuw ita te Eri mã Pahpãm jâmcjên xà jarên, me ajkaam mã Eri te amji mã ipikrar, ne ihkrĩ xà pê catuat to ihpým. Pê ramã ihwej ne ampeaj kam hicot, cwýrjapê pê catut to ihpým, ne imput kwĩn pyrentu ne ty.

Pê Pahpãm mehwý jõi pahhi na Xawrõ capi

1 Xamer 9.1-27; 10.1

Ne pê caku itajê nõ kam Ixaher catêjê xũmre nõ intuitu ita japyr Xawrõ. Ne pê hĩ to impeaj to impej, ne mehwý jirõa pê ihte ry ne ihhi ihtýj.

Ne pê Xamer ata ajco Pahpãm kampa, ne ma mehwý mã harkwa jarê. Ne pê mam ramã amcro nõ na, Pahpãm Xamer mã Xawrõ to ihcakõc, ne cumã:

— Piritew catêjê te ame ikwý pê Ixaher catêjê to kêanre, mã cama ame amrã, wa ite mempar ne imã me caprĩ xà. Cwýrjapê wa ha amã jũm xũmre kujate, wa ha me ikwý jõi pahhi catia na hãm xà caxuw. Ite ramã amji mã capi, mãr quê taa me hũtã — hane.

Ne pê amcro nõ na Xawrõ pãm ata ma Xawrõ me, cumã hàpên catê ita me ajwar ihkujate, por cawrõ cahàcre pictor ata japên to. Pê ma Xawrõ me hũm mã hàpên catê ita ame cawrõ cahàcre japên to me mõi. Ne ame mõi ita kam, Xamer me, cute me ajpên cajpar. Mã Xamer te Xawrõ pupun, mã Pahpãm cumã:

— Pom hũmre ita wa ite amji mã capi, ne amã harên. Ne cupêa quê ha me ikwý jõi pahhi, ne me to ihhimpej — hajýr.

Mã Xamer te Xawrõ me, hũm mã hàpên catê ita me ajwar cute me haprõr, ne ma amji kíñ cati nõ ata wýr me to mõi, ne me to cator. Ne mehkrĩ xà impeaj nõ kam cute Xawrõ jýr, ne hàwmrõ catê mã harkwa hyr, quê hõ nõ impeaj to hýrmã mõi.

Mã Xawrõ Xamer cahê na hàpàn, jirõ pê mã ri ma Xamer hũrkwa wýr Xawrõ to mõi, cute curi cahê na hõt prãmte. Ne caxwa ri jý ne ajpên mã amehcakõc, ne nõ ne me hõt. Mã iràrà na Xamer jýr ne ma põi mã, krĩ pê, Xawrõ to cator, ne cumã:

— Pahpām te imā acaxuw ampo jarēn xà ata ri, ite amā harēn xà — hane. Ne cute ampo cacō impēti, incoti ita caxàr ne ihkrā kam haxwȳr, ne to impē, ne me ajpēn pȳn, mā cumā:

— Ampo na mā wa apu ato hane? Nee mā ampo na nare. He Pahpām te ri Ixaher catêjê jō pahhi na amji mā acapi, ne harkwa kôt wa apu ato hane — hajȳr. Ne ma me ipicapôn.

Mā Pahpām te Xawrô mā cute amji kam hapac xà intuwti jōr, mā ihtȳj Pahpām kampa. Mā jū mā ahna amcro te, mā cute pahhi na amji ton, ne caku jàhtôa kam ajco Ixaher catêjê to ihhimpej to ipa. Ne caku jàhtôa kam, cute me curê xwȳn pē mehkwy jūtâr. Ne pē cute amji to cati prāmte, tàkamrȳ amji pē Pahpām to hapac kêt to mō.

Pê Pahpām Xawrô jaxà kam pahhi na Tawi capi

1 Xamer 15.11; 16.1-13

Pê ajkī Xawrô nee Pahpām jarkwa kôt ipa nare, ne amjia kôt ipa. Na pē jū mā ahna caku jirô pē mā, Pahpām te Xamer mā amji jarēn to:

— Wa ite Xawrô to pahhi ita jū na ri ipeacre. Ampo na? Nee ipar nare — hajȳr. Mā Xamer mā amji kīn nare, mā cute Pahpām mā Xawrô cajrēan to apē. Mā Pahpām cumā:

— Wa ramā ite pahhi tēte Xawrô camēn ita kam, Xamer, jū caxuw ca ha hū na apec jicu? Ca ha ma ampo cacō incoti ata nō py ne to tē, Pāw jō krī wȳr. Ne to acato, ne curi me hūmre nō japrȳ te Jexê ita na ahcukij, nāmri ramā ite pahhi na amji mā mehkra nō ata capi, quē ha jū caxuw Xawrô tyc xà jirô pē ihtȳj haxà kam axà, ne amji to pahhi — hajȳr. Mā cute impar ne ampo cacō incoti ita pyr, ne ma Pāw jō krī wȳr to tē ne to cator.

Mā curi pahhi catêjê te ihcajpar prāmte hȳrmā me pra, ne mehcukij to:

— Hàpà ijō pahhi! Ampo wȳr mā ca mō? — hajȳr. Mā Xamer me cumā:

— Hamreare, ite cama Pahpām mā ampo jōr xà jō amji kīn wȳr wamō. Ne ate Pahpām to amji kam gapac prāmte, ca ate to amji kam gapac xà itajê cunea to amji mā ahcuprō ne to amji cūmpej, ne ajpēn ikôt amji kīn wȳr me mō — hane. Ne ma cute Jexê jūrkwā na hàhcukjêr, mā cute me cumā harēn.

Mā ma hȳrmā mō ne hàr, ne cute mehkra to cuprôn na mēn, quē me to cuprō, ne amehcūmpej. Mā Jexê te mehkra to cuprôn, mā Xamer te mam kà ita pupun, ne amji mā:

— Pom ita mōrmō Pahpām te amji mā capi — hajȳr.

Mā Pahpām cumā:

— Hamreare, nee ipē me axūmre pyràc nare. Wa nee mehkucpupun xà kôt, jūm te amji kam hapac xà na hahkre pej nare. Ne me hūmre ri mehkuc pupun xà kôt, hān ne cute amji kam hapac xà na me hahkre pej. Ne pa wa quēt me caxwām pē, cute me amji kam me hapac xà kôt, me hahkre pej — hane.

Jirô pē mā ri hipēr Jexê te mehkra kwȳ pyxwȳr, Xamer kuc ri, mā ame ipa. Mā Pahpām Xamer mā:

— Por wa ite amji mā capi ata, nee ita ri apu mōr nare — hane.

Mā Xamer te Jexê mā harkwa to:

— Xà ajkī me akra itajê pit? Nāmri Pahpām te nee amji mā itajê nō capi nare. Xānee cormā jūm apu mōr nare? — hajȳr.

Mā Jexê cumā:

— Cormā intuwre japrȳ te Tawi ita pit apu mō. Ne nee ita ri apu mōr nare, ma pō pē apu carà cahàcre jamār to mō — hane.

Mā Xamer cumā:

— Hȳrmā garkwa kujate quē me haprô, ne me to cato. Cu ha nee cormā ne me pajàpàn nare. Quē ha xa cato, cu ha cormā me apà — hane.

Mā Jexê te Tawi japrôr na harkwa. Ne pē ampeaj kam Tawi ata imej. Mā cute me haprôr ne me to cator, mā Pahpām te Xamer mā harkwa to:

— Ita wa quēt ite amji mā capi he. Ne ihkrāa kam ca ha ampo cacō impēti, incoti ita jaxwȳ, cupē pahhi xà caxuw — hajȳr.

Mā cormā Tawi apu mehkjêjê cote na mōar kam, mā Xamer te ihkrā kam ampo cacō impēti ita jaxwȳr. Me ajkaam mā Pahpām Carō Pejti te cupē pahhi xà caxuw cumā cute amji jahkre pej catia ne hōr, ajpēn amcro te amji to hapu na kjê atajê caxuw.

Pê Tawi Piritew catêjê jàprê xakat cura

1 Xamer 17.1-53

Ne pē Piritew catêjê ajco hō krāhtare to cuprō, cute Ixaher catêjê wȳr me mōr, ne me ipijapu prāmte. Pê Ixaher catêjê me Piritew catêjê ajco ajpēn wȳr me ipa, ne ajpēn jīkjê na caprūam wȳr me ahtwȳ.

Ne pē Piritew catêjê jō krāhtare jō pahhi nō ita ihkàa to ihkà. Ne ihkà ita pē, ihhêj rūm me ipijakrut te amji jikre kam mehcuhhê kà. Ne ampeaj kam ihtȳj ne hàprê, ne haprȳ pē Gorijti. Ne ajco amcro cunea kam mehkwy pē hapôj, ne ajco Pahpām me Ixaher catêjê jō krāhtare na, hàprār xàa to me cumā akij, ne me cumā:

— Wa ha itȳj Piritew catêjê kôt ajpu, ne me ca, ca ha amji mā me jūm xūmre japê, ne me capi, quē me akôt ajpu. Ne quē ha jūm icuran na, wa ha me icunea pē cama me amā me ijàpēn catêjê. Nāmri wa ha ite jūm curan na, ca ha me acunea pē cama me imā me gápēn catêjê. Ampeaj kam wa me amā, ca ha me jūm xūmre ata mā me acato, wa ha itȳj cume ajpu — hane.

Pē nee jūm Gorijti catihti ita me ipijapu na amji ton nare. Na pē amcro cunea kam ajco me ahna hàprār to ipa.

Mā amcro nō na Tawi curi cator, ne cute hàprār xà ita na impar. Ne pē Tawi cormā intuwre cakrô, amji mā harkwa to:

— Wa ha itȳj cume ajpu. Wa hān ne apu inxū jō carà cahàcre hōhti jamār to ipa. Mā hān ne rop jōkre hōhti me rop tycti, ihkur prāmte hȳrmā hapôj, wa itȳj ihcura. Na wa ha itȳj Piritew catêjê jàprê xakat ata to hanea. Ampo na? Cute Pahpām tīar cuna mā ihcakôc kêanre. Ne Pahpām ihtȳj hān ne ropti atajê pē ipytà, na quē ha hanea ne ihtȳj Piritew catêjê nō ita pē ipytà — hane.

Mã pahhi Xawrô te ita kam hapac, ne cama apu ajpên na Tawi me Gorijti jamã.

Mã Tawi tẽ ne caprũm kam cute kên crecrti to xïc ne incwÿr, ne hõ kên cjên xà kam incjên. Ne cute hõ kõtãre pyr, ne hanea ne hũhkra na hũcapêr xà pyr, ne ma cuna mã to tẽ, ne Gorijti me cute ajpên cajpar.

Mã Gorijti te incryac kam cumã caràr, ne cumã:

— Xà ipê rop mã ca ajpên pĩ ita to pit mã iwÿr tẽ, pahte to papijapu xà ita caxuw? Jũ wÿr quê ha cõjkwa kam Apãm Cati ita atehcajpa, ne ipãm cati quê ha ite-hcajpa, wa ha apu ato kêanre ne — hajÿr.

Mã Tawi te cumã caràr ne cumã harkwa to:

— Ca ajpên gõ xwapo xwahhihti me gõ kruwxwa to tẽ, ne pa, wa quêt ijõ Pahhiti carõt tÿjti pẽ Ixaher catêjê jõ krãhtare jõ Pahhiti jarkwa kõt awÿr tẽ. Ne itakam quê ha ijõ Pahhiti ijũhkra mã gaxà. Wa ha acura, ne ihkõt akrã Jakep, quê ha ampo kên te mehtyc kur xà atajê gĩ me, gõ krãhtare itajê jĩ pin partu. Quê ha krĩ cunea kõt mehcunea me ijõ Pahhiti te Ixaher jõ pjê kam me cahê na ipa na me hahkre pej — hajÿr.

Mã ahna Gorijti jãhtêp. Mã hÿrmã Tawi picahur ne cute hõ kên cjên xà pĩn, kên nõ pyxit ne caxàr, ne hũhkra na hũcapêr xà ata kam hir, ne kam to hũcapêr. Mã kên ita te Gorijti kuc tÿj mã hàr, mã pjê kam ihkuc to ihpÿm. Mã Tawi te cupê hõ xwapo xwahhihti ata caxàr, ne toa inxec, ne to ihkrã Jakep.

Mã Piritew catêjê te me hàprê xakat tyc na me hõmpun, ne ma ame prõt. Mã Ixaher jõ krãhtare te me cumã me caràr, ne ma mehkõt me pra. Ne pry kõt cute me cahuc. Ne ihtÿj ajpên pẽ mehcuran to me mõi, ne me haxôp to me mõi, ne cute me hõkrã mã me haxàr. Mã hamre, pry kõt mehtyc me, me haxôp catêjê te ame hikwaati.

Pê Tawi Xawrô mã me hàprê catêjê kam jũ mã amji to putwÿr to, ne ajco me curê xwÿn catêjê jãhtôa ne me hipej.

Tawi me Jônata

1 Xamer 18.1-11; 20.1-42

Ne pẽ Jônata pẽ pahhi pẽ Xawrô kra xũmre, ne Tawi me ajpên cajpa ne me ajpên pupu, ne me cumã ajpên kĩn hyre nare. Mã Xawrô te Pahpãm te Tawi to ipa, mã mehcunea mã ihkĩn na, hahkre pej. Cwÿrjapê ri hũ na apu amji to prãm, ne apu Tawi kam incryac to incryc, ne amcro cunea kam, kam incryc ita cumã ajcamê. Mã tee apu ihcuran to hahkre.

Mã Tawi te cupê amji pytãr, ne ma tẽ. Ne cute Jônata me ajpên cajpar, mã cute ihcukij ne cumã:

— Ampo to mã ite jũ na, mã apãm apu icuran prãm? — hajÿr.

Mã Jônata cumã:

— Hamreare, nee apu acuran prãm nare — hane.

Mã Tawi cumã:

— Quê! Ihtÿj icuran prãm! Ca ha hanea ne hõmpu he. Apê quê ha putwÿr intuw jõ amji kĩn. Wa ijõtpê gũrkwa ri apà, ne apê wa ha ma põ mã icato, ne jũ ri amxu. Quê ha apãm ina acukij, ca ha cumã itẽm caprÿ na, ito ahêj ne cumã, wa ma inxũ jũrkwa ri amji kĩn

wÿr, Pãw jõ krĩ kam itẽm na, ijarê. Quê ha cute ita na amji caxàr na, cu ha ramã ihcunea impeaj na hahkre pej. Nãmri quê ha cute ita na ikam incryc na, cu ha ramã cute icuran prãm na hahkre pej — hane.

Mã Jônata cumã:

— Imã inxũ tyc jakàn pẽ Pahpãm te ato pahhi na gahkre pej. Ne ipê pahhi kra cakrô, wa ha nee ipê pahhi nare. Na wa ha ampeaj kam amã amji to, wa ha inxũ mã icakôc, quê ha cute apu akam incryc ne apu acuran prãm na, wa ha ma tẽ ne amã awjarê, ca ha hahkre pej, ne atÿj cupê amji pytã. Ne quê ha Pahpãm akõt ipa to hanea, pom quê pẽ ajco inxũ kõt ipa he. Ne ca, ca ha cormã itĩar kam ito impeaj ne, ne ityc jirô pẽ, ca ha hanea ne me ikra to impeaj ne, Pahpãm te amji mã ato ihhimpej xàa kõt — hane. Mã Jônata me Tawi te ajpên par pejti to hajÿr.

Mã ma Tawi tẽ ne põ kam ipimxur. Mã amji kĩn kam hàhhuc, mã Xawrô pẽ pahhi ata hÿr xà ata kam hÿr, ikre kat na pire mã. Mã hanea ne Jônata hũm cuna mã hÿr, mã Tawi jÿr xà kam caprÿ. Ne hipêr amcro nõ na, cormã hÿr xà kam caprÿ ita na. Mã Xawrô te Jônata cukij ne cumã:

— Ampo na mã nee ihnõ kam ajpên Tawi mõi ne cute ampo krêr nare, ne ita kam ajte cute hajÿar? — hajÿr.

Mã Jônata cumã:

— Tawi te iwÿr, wa ite to tojnõ mã ma Pãw jõ krĩ wÿr tẽ, me hũmjê wÿr. Curia quê ha apu amji kĩn ita to amji japackre — hane.

Mã Xawrô apu incryac to incryc ne caràar kam cute Jônata mã harkwa to:

— Quê ha ihtĩar na ipa, ca ha nee jũ caxuw apê pahhi nare, ityc xà xwÿjrea na. Tẽ ne hàprô, wa ha ihcura — hajÿr.

Mã Jônata te hũm jahkre pej, cute Tawi curan prãm na, ne ma me hàpàn xà pẽ incryac kam hãm ne tẽ. Ne nee hàpàn nare amcro ata kam. Ne amcro nõ na Jônata ma põ mã tẽ, ne cute Tawi me ajpên cajpar. Ne cute me ajpên cajpar xà ata kam me ajwar me cumã amji kĩn nare, mã cama ame amrã. Mã Jônata te Tawi mã harkwa to:

— Cu ramã pahte ajpên par to impejti, na ca ha gapacta ne apej pẽa mã tẽ — hajÿr. Ne ma Jônata hacpÿ mã krĩ mã cute amji jaxàr. Mã ma Tawi xwÿjê tẽ.

Pê Tawi mã Xawrô caprĩ

1 Xamer 24.1-22

Mã pahhi Xawrô ma Piritew catêjê me ipijapu to mõi, ne cute amji jaxàr. Mã cute me cumã Tawi te Engeti jõ põ kam apu ipa na harên. Mã Xawrô te krãhtare impej to pit mã mir crê ne capi, ne ma hàhkã jakõtĩ nõ ita wÿr me to mõi, ne ame Tawi japê. Ne pea kên kre nõ ita mã me cator, mã kên kre ita mã Xawrô ihkwÿr prãmte hàr. Mã Tawi curia hanea ne hõ krãhtare te xêjxenta atajê to cute ipimxur ne to jÿ, mã nee Xawrô te me hõmpun nare.

Mã Tawi cahê na ame ipa atajê cama ame Tawi mã incryc to hahkre, ne me cumã harkwa to:

— Ita kam Pahpām te amā acurê xwÿn ata jör he, ca ha caa, ate jÿ na ton xà nõ ata na to — hajÿr. Mā Tawi te amji mā ihprî, ne aracri Xawrô pê ihkà japijêhti ata kwÿ Jakep, ne nee cute ihcuran nare. Mā Xawrô kën kre pê cator, ne ramā hÿwryre.

Mā ihkôt Tawi cator, ne cute cumā caràr to:

— Hàpà, ijö pahhi! — hajÿr.

Mā hÿrmā Xawrô pipkjêr ne cute Tawi pupun, mā cuna mā ihkuc to pjê kam ihpÿm, cute amji mā hÿpahti to prām to. Ne cute cumā caràr to:

— Ampo na mā ca apu ite acuran na, cute me amā ito ihhêj catêjê kampa? Ita kam ate atoa to amehhêj xi xà ita na me hõmpun he. Pahpām te kën kre ita kam ijÿhkra mā gaxàr. Mā me ikwÿ acuran na me imā aw-jahkre, wa nee ite ita ton nare.

— Pê Pahpām amji mā pahhi na acapi, na wa nee ite acuran nare. Ne ijÿhkra kam ca rît ne kam akà ita kwÿ pupu he. Itē cama apê ihkwÿ Jakep, ne nee ite to gaxõp nare. Quê ha Pahpām ajpên na pahpupu, cu ha pahnö te ajpên to kên na, quê ha Pahpām apu pahnö to kên — hajÿr.

Mā Xawrô te cumā harkwa to:

— Xà Tawi ca mā ca? — hajÿr. Ne cama ihpahàmte apu amrā, ne hipêr cumā:

— Ijirôa pê apê me hÿmre impejti nõ. Ampo na? Wa ite, ate ito impejti na, gahkre pej. Na ca ha atÿj jÿ caxuw apê Ixaher catêjê jö pahhi — hane. Ne ma Xawrô te amji jaxàr ikre wÿr. Mā ma pö kam, kën kre wÿr Tawi te amji jaxàr.

Pê Tawi Amarec catêjê me ajpu

1 Xamer 30.1-18

Mā amcro nõ na Tawi apu hõ krî nõ japyr te Xicrac kaj na ampÿa mā me hÿmre cunea pê me hõ krähtare catêjê me ame ipa. Mā krî kam me cahäj me ahkrare pit jähhuc. Mā hamre, Amarec catêjê me hÿrmā cator ne cute me hõ krî ata to kēanre. Ne cute me hõ krî pôc ne cute me cahäj me ahkrare cunea pro. Ne nee cute me jÿm curan nare. Ne cama cute me ihcaypre par ne ma me hõ pjê wÿr me to mõ.

Mā hamre, mā Tawi te amji jaxàr, me hÿmre pê me hõ krähtare catêjê me, cute me amji jaxàr ne me cator. Mā krāa, me hõ krî pôc, mā cute me hõmpun. Ne mehcunea te amji mā me ipikrar ne amji mā:

— Pÿhàpà, mā ajte krāa me pajö krî ita pôc. Ne me pajö cahäj? Ne me pahkrare? Jÿ kam ame pra? Jÿm te mā jÿ kam me to cutor? — hajÿr.

Mā hamre, Tawi me hÿmre jähôtöti to me cator atajê cunea te mencwÿr kam mehtêm ne me amrāa to amrā. Ne cute mencwÿr ita to apu me amji pec tu. Mā Tawi te ita caxuw amji kam hapac xà nõ pytiti ita caji pēr. Ampo na? Nee mā ampo na nare. Mā me hõ krähtare pê me ahkrare pictor. Ne ita cwÿrjapê ri me hàprê mā me hàr ne ame kën to ame Tawi curan prām. Mā Pahpām te ri Tawi mā carôt tÿjti ata jör. Mā Tawi te Pahhiti pê Pahpām ata cukij:

— Xà wa ha pijamā Amarec catêjê kôt mõ? Xà wa ha pijamā mehpro? — hane. Mā Pahpām cumā:

— Mehkôt mõ! Mehkôt mõ! Ca ha atÿj mehpro ne me cumā ihpa caypre atajê cunea pre pôn partu ne — hajÿr.

Mā Amarec catêjê ihtÿj ame ipa jahpà, me hõ krî kôt. Ne me hàpàn xà impejti atajê cunea to ame amji mā amji kinti cunea ton to me ipa, me hàprê xà jö amji kîn xà caxuw. Ne hanea ne ihtÿj ame ihkôm xà pihhoti to ame ihkôm to me ipa.

Mā amcro nõ na iràrà na pyt krā cator pê mā, mā Tawi me, me hõ krähtare me, cute me Amarec catêjê curan na me mēn. Mā hamre, Tawi te ipijapu tÿaj to pyt tu, me hõ krähtare cunea me. Ne cute me Amarec catêjê jipej tu. Mā mentuw te cwatxēnta peaj ne me hàhhuc ne cute me cawrô kô jarôti pê camer atajê pro ne kam ame ihkrî ne maa ame to pra, jÿa kam. Mā hamre, Tawi te me cahäj atajê cunea pytär, ahkrare mea mā.

Tawi pê Pahhi tuw

1 Xamer 31.1-6; 2 Xamer 5.1-5

Mā caku nõ na Piritew catêjê hipêr apu Ixaher catêjê kam mehtêm, ne mehcuran to mõ. Mā Ixaher catêjê jö krähtare kwÿ ma me pra, mā Gipow jö kēnti na, cute hipêr mehkwy curan. Ne Piritew catêjê te hanea ne pahhi pê Xawrô me, mehkra mea mā mehkra, ne cute me hipej prämte me kam mehtêm. Ne cute me Jônata me, mehkjêjê curan ne me Xawrô caxwÿr ne me haxõp, ne ma me pra, ne ihtÿj ihtyc na amji mā me to hane. Mā ihtÿar cormā nõ, ne cutea hõ xwapo xwahhiti to amji curan ne ihtyc.

Jirö pê mā ri ma Tawi wÿr, Ixaher catêjê jakrā jö pahhi catêjê cunea me pra, Hepröm jö krî kam, ne cute me cumā amji jarên to:

— Ipê me akwÿa wa me, pê Pahpām ramā apê pahhi na ato ihcakôc. Na ca ha apê me ijö pahhi, ne ma me ijamär catê na amji to — hajÿr. Mā Tawi te Pahpām kam mare mā, mehkwy mā amji to ihhimpej to intuw, mā cute me to Ixaher catêjê jö pahhi. Pê Tawi me to ihhimpej ita to caku to cwarēnta.

Pê Tawi hacpÿa ne Pahpām jàmçjên xà to amji jaxà

2 Xamer 6.1-19

Pê rÿ pēa mā Piritew catêjê ma me hõ pjê wÿr pÿ po te Pahpām jàmçjên xà ata pytā ne ma me to mõ, pê curia ihcuuhê. Cwÿrjapê pê Pahpām Piritew catêjê kam incryc, ne ajco ame to kēanre. Ne jÿ mā me to, pê ame amji pupun xà kēanre to ame amji pupu.

Cwÿrjapê ri Piritew catêjê te hacpÿa ne Pahpām jàmçjên xà kujahêc, Ixaher catêjê jö pjê wÿr. Mā hàmçjên xà ita Apinatap jÿrkwa ri hàhhuc. Jirö pê mā ri Tawi, ma ajpên Krîpinkrēn wÿr Pahpām jàmçjên xà ata to mõr prām. Ne cute krähtare impej to pit mā mir te trînta ne ma me to ihhimpej to mõ, hàmçjên xà ata wÿr.

Pê Pahpām rÿ pēa mā hàmçjên xà to ipa xà to ramā me cumā hahkre. Quê nee ihtÿj amehcupên nare, ne nee cawrô jö kàhà kam me to ipa nare. Ne me to ipa

catêjê atajêa, quê ha me cumã pĩ jacjê, ne me hikre kam me to ipa.

Mã nee Tawi te ihhimpej xà ata kôt, hàmcjên xà ata to mör nare. Ne me to ipa xà ata kaj na hacpỹ ne me to mō. Ne cute pryti jō kujti intuw nõ kam me hãm, ne ma me to mō. Mã Apinatap kra pijakrut itajê mam pryti jō kujti to mehhimpej to me mō. Mã hapu na Tawi me, mehkwy cunea me, me mō, pryti jō kujti kôt. Ne Pahpãm kam mare mã ame hakrya to ame hakry, ne cama ame hãkôr xà atajê cakô, ne ame cre.

Mã pryti te amji tōc, mã Apinatap kra ata te hũkra to Pahpãm jãmcjên xà juwahi, ihpỹm cupate. Mã Pahpãm kam incryc pyrentu. Ampo na? Cute me hàmcjên xà ita cupên xà hamreare, na ri apu kam incryc, mã ihtyc pyrentu.

Mã Tawi mã Pahpãm cupaa to hũpa, amcro ata na, mã cute amji mã harkwa to:

— Jũ mã wa ha Pahpãm jãmcjên xà ita to, ne krĩ mã to mō? — hajỹr. Ne ma Opet jũrkwa wýr to mō, ne cute curia huwahi, mã hãhhuc ne ahna putwry incrê. Mã Pahpãm te Opet na mehkwy cunea to imej, hũrkwa kam hàmcjên xà jãhhuc ata jahpan xà na.

Mã Tawi te ita par, ne hacpỹa ne cute amji jaxàr, ne ma hõ krĩ wýr Pahpãm jãmcjên xà ata to me mō. Ne ita caxuw nee pryti jō kujti kam me to mör nare, ne quêt Pahpãm himpej xàa kôt me hikre kam me to mō, ne amji mã me hũpahti to mō. Ne cute me to mör xà ita kam me pryti me, carà cahàcti hõhti jãhtôa ne me to caxàr, cute me to Pahpãm cajpuaw prãmte.

Mã Tawi mã amji kían kam Pahpãm kam mare mã hàkrun to mō. Ne hanea ne ame hãkôr xà cakô, ne krĩ mã me to cator. Ne cute Pahpãm to me amji kam hapac xà jũrkwa kam, me hàmcjên xà ata xãm. Ne cute hipêr pryti nõ curan, ne me to caxàr, ne Pahpãm mã me hõr. Ne cumã mehkwy cunea cajrên, quê me to imej ne. Ne mehcajrên jirô pê mã ri cute ahpãanre na me cumã kwýr te pro me, pĩxô pijakrut crà ata jör. Mã ma ame cahkũm, me hũrkwa wýr. Mã ma Tawi te hũrkwa wýr amji jaxàr, cute mehkra cajrên prãmte.

Ne pê caku jãhtôa kam Tawi pê pahhi, ne cupê hõ krãhtare to ihhimpej catê imej. Ne ajco amji na mehkwy to cuprôn tu, ne Pahpãm jarkwa kôt me ipu na krĩxàre catêjê cunea me, me ajpu. Ne ihtýj ajco catyt kam Pahpãm kôt ipa, ne ihtýj amji kôt mehkwy cunea Pahpãm wýr to apkjê.

Pê Tawi ihkên to

2 Xamer 11.1-26; 12.1-19

Pê Tawi pê pahhi na ramã caku jãhtôa, ne ramã hakràaj to hakràj, ne cumã ampo pej hàhtôa to hàhtô. Mã amcro nõ na, ramã pyt pec kam, Tawi te pyjê imejti nõ pupun, ne ihtýj to ihpahàm nõ prãm. Ne ramã impjêa kam ri, ahnaa cute haprôr ne apu cume gõr, mã kaam ihkra.

Mã Tawi te amji mã huwahi prãmte, ma me ipijapu xà kêanre wýr impjên pê krãhtare ata kujahêc, mãr quê ahte ajpu ne ty. Ne cute impjên kujahêc, mã jũm te ihtehcajpar nare kam ipijapu ne ihtyc. Mã Tawi te

amji wýr hĩxi na hàhwýr, cahê na hàhhuc prãmte. Mã ahna ahtũm nare mã cumã ihkra pỹm.

Mã Pahpãm mãa Tawi te ampo ita ton xà ita kêanre, cwýrjapê ri cute hỹrmã cumã harkwa to ihcakôc catê nõ kujahêc. Mã hỹrmã cator, ne cute Tawi mã hũjarên xà ita to hũjarên to:

— Pê krĩ nõ ita kam, me hũmre me ajkrut, ne pyxit ita jakràj, neihnõ ita pê ihkĩnte hamreare. Ne hakràjti ita mã ampeaj kam pryti, ne cumã carà cahàcre hõhti hàhtô. Ne cupê hamreare ita pê cumã carà cahàcre hõhti krare incirre ita pyxit peaj, pê ajco to ajpa. Pê ajco ikrea kam mehkra cahê na apu ipa, ne curia gõr, ne mehcunea mã ihkĩnti.

— Mã amcro nõ na jũa rũm membrar catêjê kwý cator, hakràjti ata jũrkwa ri. Mã cute me cumã harte xà caxuw nee cute hõ pryti me, hõ carà cahàc hõhti nõ curan nare, ne cute cupê hamreare ata pê hõ carà cahàcre incirre pyxit peaj ata curan na me mên. Mã cute mehcuran, ne me to hàr, mã cute mehkrêr — hajỹr.

Mã Tawi te hũjarên xà ita par ne apu incryc to incryc, ne cute Pahpãm jarkwa to ihcakôc catê ita mã harkwa to:

— Ampeaj kam wa ha amã awjarê, pom hũmre jakràjti te ita ton ita, ihtýj cute mehcuran xà. Quê ha carà cahàcre pyxit jahpan xà na, to cwat ne ahna amgõ — hajỹr.

Mã cute Tawi mã:

— He apêa ri jũm xũmre ata! Ne atea ca ita ton. Ita caxuw ca ha Pahpãm jarkwa na kampa he. Cute garên to hajỹr he: “Wa ite ato Ixaher catêjê jõ pahhi, ne ite acurê xwýn Xawrô wýr pê ato ipimxur ne apytàr. Ne ite amã gũrkwa ton, ne amã me aprõ jör, ne hipêr amã ampo jör.

“Ampo na mã nee ate amji mã ijarkwa itajê cupa nare, ne ikam mare mã apu ampo kên itajê to? Ca ate impjên curan na me mên, mã cute mehcuran, ca ate cupê hĩxi to gãhkij. Cwýrjapê ca ha ita caxuw gõtpê me akwý me, me apijapu to me apa.

“Ne ca nee ate amji mã ijarkwa par, ne amji mã hũpa nare, incwýrjapê quê ha me akra atajê kôt me awýr ampo kên cato. Ne quê ha acuna mã me amji kam hapac to me hanea, pom quê ate ton he. Ne quê ha ihtýj jũmjê apê me aprõ to ahkĩ. Ne quê ha ihtýj mehcunea cute hajỹr xà ita na me hãkre pej” — hajỹr.

Mã Tawi te Pahpãm jarkwa to ihcakôc catê mã harkwa to:

— Ampeaj kam, wa ite Pahpãm cuna mã ikên xà kêanre ita ton — hajỹr.

Mã cumã:

— Pahpãm te ihtýj akên ita to amã imej ne to tojnõ, na ca ha nee atyc nare. Ne ate cahãj kam akra mã ramã ihpỹm ita, quê ha ihtýj apê ty. Ampo na? Quê ha Pahpãm curê xwýn, ate me kam mare mã akên xà ton ata jahpan xà na, nee amji mã hũpa nare — hajỹr.

Ne ma tẽ, hũrkwa wýr. Mã ahna ahtũm nare mã Tawi kra ata xà ne ihtyc.

Pê Tawi kra pê Axarâw mã amji to pahhi prãm

2 Xamer 15.10; 18.1-17, 33

Pê Tawi mã hapua na ihkra xũmre nõ ita, ne haprý Axarâw. Pê ihtýj hũm Tawi jaxà kam ajco amji to pahhi prãm. Ne cute caxuw krãhtare kwý me amji par, cute hũm cuna mã me ipijapu prãmte. Ne cute me ipijapu kam ihtẽm. Mã ahkêt kam Tawi jõ krãhtare te Axarâw jõ krãhtare tohjë, ne me to winti mir ne me hipej. Mã ma pjẽ cunea kõt apu mehkwy cahkũm. Ne mehtyc atajẽ jirõa pê me hàhtõa ne ahkêt kam me ipictor.

Mã Axarâw te hũm jõ krãhtare kwý me amji cajpar. Ne me hũpate ma jũ kam ihtẽm prãmte, hõ cawrõ to pĩ nõ catia ita krac ri hàr. Mã Axarâw kí japjẽhti ata te pĩ na hẽ, mã curia kam ajêt, mã ma hõ cawrõ ita tẽ. Mã Tawi jõ krãhtare nõ te hõmpun ne hõ pahhi Jõwape mã harẽn.

Mã Jõwape cumã:

— Mẽr ampo na mã ate mehcuran hiahpuro nare? Ca ha ihcura na mã, wa ha ate ihcuran jahpan xà na amã ihpore catia ne cugõ — hane.

Mã krãhtare cumã harkwa to:

— Wa ite pahhi pê Tawi par, mã ma apu jũm te ihkra curan na to ihcaca, na wa nee ite ihcuran nare — hane.

Mã Jõwape te wapo xwahhire to incrẽ ne incwýr, ne ma to tẽ. Ne por pĩ pa na Axarâw ajêt ata wýr cator, ne cute wapo to põj ne to Axarâw na cuhkõnre kam to caxwýr. Mã krãhtare te tej ne Axarâw curan na, cute me Jõwape tehcajpar.

Mã Jõwape te kýj cati pẽa mã hõ hõhhi cakõr, cute to hõ krãhtare mã hàkjẽr xà na, mã cute me ipijapu to hicu, ne me cuprõn. Ne cute me kreti catia kam Axarâw jĩ to me hũcapẽr, ne hipy me kẽn jakõt. Ne ma ikre wýr me amji jaxàr.

Mã pahhi Tawi te ihkra curan na harẽn par, ne cama apu hapẽte amrã.

Ne pê caku jãhtõa kam Tawi Ixaher catẽjẽ jõ pjẽ cunea to ihhimpej ne pea ihtyc. Ne pê ihcunea na catyt kam Tawi ajco Pahpãm kõt ipa. Ne hãn ne ajco ampo kẽn to, ne amji jũ na ajco ihpeacre, ne ajco hicu, ne ajco Pahpãm mã ahna amji jarẽ, ne nee hipẽr ton nare. Ne ampeaj kam Tawi mã Pahpãm kíñ, ne hanea ne cumã ihkĩñ. Na ri cute Pahpãm na increr xà jãhtõa ne to increr, ne ahna ihhõc par. Ne cute ahna ihhõc par itajẽ kwý mã ita ri he.

XARÔMÃW

Pê Pahhi Cati

Ýhý, *ihkãhhõc pijakrut itajẽ ri me pamã me cupẽ Ixaher catẽjẽ jõ pahhi catẽjẽ to awjarẽ, na ri ihkãhhõc itajẽ japrý te Mam Pahhi Catẽjẽ Jõ Kãhhõc (1 Pahhi Catẽjẽ) me Hapu na Pahhi Catẽjẽ Jõ Kãhhõc (2 Pahhi Catẽjẽ). Ne ihkãhhõc itajẽ kam pê Tawi xwý kra pê Xarõmãw to me pamã awjarẽ.*

Ne hanea ne ihkãhhõc pijakrut itajẽ nõa te mam pahhi catẽjẽ na ihkãhhõc atajẽ jũjarẽn xà jatujre hanea ne

harẽn. Cwýrjapẽ ri ihkãhhõc itajẽ japrý te Mam Me Hũjarẽn Xà Jõ Kãhhõc (1 Me Hũjarẽn Xà) me Hapu na me Hũjarẽn Xà Jõ Kãhhõc (2 Me Hũjarẽn Xà).

Pê Xarõmãw pê pahhi tuw ne cumã amji jahkre pej

1 Pahhi Catẽjẽ 3.5-13

Pê Tawi mã ihkra xũmre nõ ata japrý Xarõmãw, ne hũm tyc jakàn pê haxà kam amji to pahhi. Mã Pahpãm te caxwa ri Xarõmãw pimtir kam cumã amji to ipipẽ, ne cumã amji jarẽn, quẽ rý mã ampo na cuwý, quẽ ha ihtýj cumã ampo gõ.

Mã Xarõmãw cumã:

— Pê ca ampeaj kam inxũ Tawi caxuw apej.

Ne ampo na mã, pê ca caxuw apej?

He pê ampeaj kam akampa na pê,

ne ampeaj kam cumã gahkre pej.

Cwýrjapẽ pê ca amji mã to me akwý jõ pahhi.

Ne ipẽ ihhẽj rũm cormã me hõkre nõre pyrãac,

ne cormã ipẽ ijũpar hamreare.

Ne ipẽ ate amji mã me capi itajẽ to ihimpej jahkre kãatre.

Pom me akwý jãhtõti itajẽ caxuw

imã ite amji jahkre pejti gõ.

Mãr wa mehkẽn na me hahkre pej,

ne ahna mehcukij,

ne mempejti na me hahkre pej,

ne ahna mehcukij,

ne ajpẽn pê me to caprã,

ne catyt kam ajpẽn kam me to ihimpej to ipa,

ne ma ajpẽn na me hamã — hane.

Mã Pahpãm mã cute amji jarẽn xà ita na cumã ihkĩñ, mã cumã:

— Wa ha amã ate amji jahkre pejti gõ,

nãmri atea amji mã,

ate amji jahkre pej pê ampo pejti ita capi,

ne ahna gãhwýr.

Na wa ha mehcunea jirõa pê

amã ate amji jahkre pej gõ.

Ne hanea ne ate ampo na iwýr nare ata,

wa ha itýj amã cugõ.

Ne itýj amã gakràj catia ne cugõ,

quẽ ha mehcunea ihtýj amji mã me acupa — hajýr.

Ne cute Xarõmãw mã ihkrã kre te amji jahkre pej catia ne hõr. Mã cute amji jahkre pejti.

Pê Xarõmãw ajkam me cahãj pijakrut cukij

1 Pahhi Catẽjẽ 3.16-28

Mã amcro nõ na me cahãj pijapit xyre atajẽ pijakrut ne pahhi Xarõmãw wýr me cator, cute mehcukij prãmte. Mã pyxit ita te cumã harkwa to:

— Ýhý pahhiti, wa ikre pyxit peaj kam ajwar me ikrĩ, mã ajwar me imã me ikra pým. Mã caxwa ri cupẽ ihkra tyc, mã to hãm ne cute ipa kam hir, ne ma ipẽ ikra im-

pÿn. Wa ipimprar ne tee apu to pijahôr to hahkre, mã ramã xãmte ihtyctu. Ne ahna apê, wa ite hõmpun, mã nee cupê ikra nare, ne ihkra ri — hajÿr.

Mã ihnõ ata cumã:

— Quê, ihkraa ri cupê ihtyc, ne ihtîr ita ri, ikra — hane.

Ne cormã me ajpên mãn kwÿa kam mã pahhi te harkwa to:

— Ajpên me imã wapo xwahhihti nõ to tẽ — hajÿr.

Mã cumã hàpên catê nõ te cumã wapo xwahhihti pyr ne to tẽ.

Mã pahhi te cumã harkwa to:

— Hã, awryc mã me cumã to ahkrare nõ ita tîar jipô, ne ita mã hîkjê gô, ne ita mã hîkjê gô — hajÿr.

Mã ramã cute me to hipôn xàa kam, mã quêt inxi te harkwa to:

— Ame to hajÿr nare! Gapacta ne me cumã ihtîar na agô, nee ca mehcuran nare! — hajÿr. Ne ampo na mã cute harkwa ita to hajÿr? Ampeaj kam cumã ihkra japê na ri.

Mã ihnõ ita te harkwa to:

— Nee to hõ tekjê nare, wa pa xwÿjê nee to itekjê nare ita kam, gapacta ne me to hipô — hajÿr.

Mã pahhi te cumã hàpên catê mã:

— Hã, nee to hipôn nare! Por pyjê nõ ihkra tîar na ahwÿ ata mã ca me agô, nãmri cupêa ri ahkrare nõ ita nã — hajÿr.

Mã caxuaw Ixaher catêjê kam Xarômãw krã kreti na harên cahkũm pyrentu, mã mehcuea amji mã me hõ pahhi ata cupa. Ne pê Xarômãw ajco Pahpãm te cumã amji jahkre pej jôr xà ata kôt mehwÿ cukij, ne mehkên me, mempej to ajcokjê, ne ma ajpên na me hamã. Pê hanea ne ihkrã kreti kôt mehwÿ japackre, ne ajco ihkãhhôc kam me hapackre xà atajê hôc.

Pê Xarômãw cute Pahpãm to amji kam me hapac xà jürkwa xãm

1 Pahhi Catêjê 5-6

Ne pê caku atajêa kam Xarômãw Pahpãm mã kên te ikre pejti xãm, mãr quê kam Pahpãm to me amji kampa. Ne Xarômãw te ikre peaj ton na harkwa, ne me to hàpên catêjê mã:

— Ca ha me cumã pî tÿj pit pyxwÿr to mõ, ne kên jakati tÿjti impejti ata to pit mã me hahêr to mõ. Ne wakÿre prãti pê ôr ata to me catia ne me to ikre ita xãm. Ne imã me hürkwa cunea jirôa pê ikre ita peaj na to prãm. Ampo na? Imã Pahpãm kîan to ihkîn, na wa ha to hane — hajÿr.

Ne pê cute Pahpãm to amji kam me hapac xà jürkwa ata na caku xet pê cormã amji jipêj. Ne pê wakÿre prã tepti pê ôr to pit mã ikre kam me ampo atajê cunea jipêj.

Mã Pahpãm te Xarômãw wÿr harkwa kujahêc ne cumã:

“Ca ha ampeaj kam ate ikam gapac, ne catyt kam ijarkwa kôt apa na, wa ha itÿj, pom pê wa apãm xwÿ pê Tawi mã ijarkwa to icakôc ita to,

wa ha amã icakôc,
ne Ixaher catêjê cahê na ikri,
ne jÿ caxuw me cupê icator nare” hajÿr.

Pahpãm jàmçjên xà to ipintuw xà

1 Pahhi Catêjê 8.1-6, 22-30

Pê pî po te Pahpãm jàmçjên xà ata ampo kà te Pahpãm jürkwa ata kam ahtwÿ. Mã Xarômãw ma Pahpãm to amji kam hapac xà jürkwa mã to hàr prãm, por cute kên me ôr to ikre tuw xãm ata wÿr. Ne cute Ixaher catêjê pê prohti kam me cupê pahhi catêjê to cuprôn, cute me ajpên par, ne me Pahpãm jàmçjên xà ata to me ipintuw prãmte. Mã mehcuea Xarômãw te kên te Pahpãm mã hõ pyxwÿr xà ata cuna mã me xa ne me hõmpu.

Mã cute côjkwa mã hühkra pÿr, ne Pahpãm mã ihcakôc, ne cumã:

— Hàpà, me ijô Inxũ Cati,
apê Ixaher catêjê cunea Pãm Cati,
ne nee pjê me côjkwa caxuw jũm hamreare,
ne apyxit peaj ca ampo cunea to ahimpej.
Ne amã me ikînti.

Ne ca ha me akwÿ mã ampo na amji to, ne atÿj to. Ne por me hî cunea to ame akîn atajê mã, ca ha ita kam, pom pê ca inxũ Tawi xwÿ mã ampo na amji to awjahkre ata, ca ha atÿj imã to.

— Ýhÿ, Ixaher catêjê Pãm Cati,
ca ha ita kam,
pom pê ca inxũ Tawi xwÿ pê amã hàpên catê mã ampo na amji to awjahkre ata,
ca ha atÿj imã to.
Quê ha Tawi kra nõ te gô prya kôt ipa,
ne cute amã ampo na prãm atajê pit ton to ipa na,
quê ha ihtÿj cupê pahhi.

— Ne ampeaj kam acati,
na quê nee côjkwa ita acahuc nare,
ne quê ha nee hanea ne ikre ita acahuc nare cakrô,
ca atÿj gôtpê me ipupu.
Ne wa ijô Pahhiti, amã icakôc,
ca atÿj ikampa,
ne caxwa me amcro kam ma gürkwa ita pupu.
Ampo na? He ca ramã ate atÿj ita ri apu apa na amji ton.

— Ipê amã ijapên catê,
wa ita ri hãn ne amã icakôc,
ca atÿj hãn ne ikampa.
Ne quê hãn ne Ixaher catêjê pê me akwÿ ita ri,
gürkwa ita kam, me amã ihcakôc,
ca atÿj côjkwa rũm me kampa.
Ne atÿj cute mehkên ton atajê to impej,
ne to tojnõ ne hîcu hiahpuro — hajÿr.

Pê Xarômăw pahpăm cahàc kîn ita to apu amji to kên

1 Pahhi Catêjê 11.1-13; 12.17-20

Ne pê Xarômăw ramă hî tÿj tu ne hakràj cati, ne ajte amji pê Pahpăm to hapac kêt to mō. Ne pê hũm Tawi xwÿ Pahpăm par pejti ata kaj na apu to.

Pê Xarômăw pjê jàhtôa jō cuprÿ me hikwa. Ne pê pyjê jàhtôa atajê, nee ampeaj kam Pahpăm tïar kôt ame ipa nare, ne pahpăm cahàc krekà kôt pit mã ame ipa. Pê Pahpăm ramă mam Ixaher catêjê mã harkwa ta, mãr quê nee pyjê cahkrit pê Ixaher catêjê nare atajê me, ame hikwa nare. Nãmri quê ha me cupê Pahpăm na mehkwy nare atajê me ame hikwa na, quê ha cama mehprō itajê pahpăm cahàc krekà wÿr mempjê to apkjê, cupate pê Pahpăm ramă me cumă harkwa ta, quê me cupê Pahpăm na mehkwy cahāj pit me, ame hikwa.

Pê Xarômăw ajte, cute mam me amji kam hapac xà kôt, ihprō to hàhtôa to hàhtô, ne hanea ne pyjê kwÿ jàhtôa ne to ihpahàm nō, pê hũrkwa kam mehkř. Ne mehprō atajê pê amji kôat me Xarômăw to me Pahpăm curê xwÿn, ne pea ihwej. Mã mehprō itajê te amji kôat Pahpăm cuna mã Xarômăw te pahpăm cahàc krekà kîn na me ton, pê hũm Tawi xwÿ Pahpăm te amji kam hapac xà pejti ata kaj na.

Pê Xarômăw prō itajê mã kên te me hō pahpăm cahàc krekà itajê mã ahpÿanre na hũrkwa pyxwÿr pa, cute kam amehkîn prāmte. Ne me hō pahpăm cahàc krekà atajê te amji kam me hapac xà kêanre, ne me haprÿ te, Axarot me, Camot me Moroc. Ne pê ajco cute amji to me pahpăm cahàc kêanre krekà itajê cajpuaw prāmte, ihtÿj me ahkrare to me capa, mehtïr kwÿa kam.

Mã Pahpăm apu Xarômăw kam incryac to incryc. Ampo na? Nee hipêr apu Ixaher catêjê Păm Cati pê Pahpăm jarkwa kôt ipa nare, ne mehprō atajêa kôt apu ipa na ri. Cwÿrjapê ri Pahpăm te cumă harkwa to:

“Ca nee ite amă amji ton xà na, pahte ajpên par xà ata to amji japackre nare, ne nee ite ampo na amă ijarkwa ata par nare. Cwÿrjapê wa ha nee amă akra to, me akwÿ mã pjê cunea jō pahhi nare.

Quê ha me akwÿ kwÿa ajpên cuna mã mehcuhhê, ne me ajpu, ne ihtÿj amji to me ajcokjê.

Na wa ha me amă pjê jipô, mãr quê akra pê pjê jïkjê jō pahhi, ne hïkjê jō pahhi ata quê ha ajteare mã jũm to ihhimpej” hajÿr.

Xarômăw xwÿ himpej xà picapôn xà

Ne pahhi Xarômăw tyc jirô pê mã ri Canăn jō pjê to ihhimpej xà ata picapôn, ne kÿj rũm hïkjê ata japrÿ pê Ixaher, ne hară mã hïkjê ata japrÿ te Juta. Ne Juta jō pjê jō pahhi ata pê ri Xarômăw kra, ne Ixaher jō pjê jō pahhi ata pê ri ajtea mã jũm ita.

ERIJ ME ERIXÊW PÊ

Pahpăm Jarkwa To Me Cumă

MEHCAKÔC CATÊJÊ

ÿhÿ, pê Xarômăw tyc jakàn pê ri, pê Ixaher catêjê jakrà te tôxi itajê amji to me ajcapô. Na pê me hakrà te tej itajê amji to me kÿj catêjê, ne kÿj rũm, Krïrïtpej jō pjê kam me Hïpôjajo jō pjê kam me ahtwÿ ne amehkrï. Ne cute cormă amji mã me haprÿ to Ixaher catêjê.

Ne me hakrà pijakrut itajê te ri amji to me hară catêjê, ne hară mã Juta jō pjê kam amehkrï, ne cute amji mã me haprÿ to Juta catêjê. Ne hōtpê me hakrà te tej atajê pîn Ixaher catêjê jàhtôa ne ma Juta jō pjê wÿr me ipin-tuw, ne curi me cahê na me xa.

Pê Juta catêjê atajê me cupê Tawi tàmwxwÿ catêjê to pit mã amji mã me hō pahhi. Mã mehkïnte kÿj catêjê pê Ixaher catêjê atajê ri amjia kôt, amji pê me hō pahhi jÿrê, ne ihtÿj pahhi na mehkwy pyxwÿ.

Ne me ahna ahtũm nare mã kÿj catêjê pê Ixaher catêjê atajê ma ame Pahpăm caca, ne ihtÿj me to hapac kêt to me mō. Cwÿrjapê ri Pahpăm te me hÿrmă me cumă harkwa to mehcahôc catêjê kujahêc, atajê japrÿ te Erij me, Erixêw. Mã cute me cumă, cute mehkên ton jahpan xà na mehkên mã me hàr to me cumă hũjarên. Ne Pahpăm jarkwa kôt me hÿrmă me cator, ne Pahpăm te to ihkujahêc na me hahkre pej xà caxuw, ihtÿj me cumă Pahpăm carôat kôt ampo na amji to me ipipê to me ipa. Ne ihtÿj me hà capră ne mehtyc to ihtïr.

Erij pê Pahpăm jarkwa to ihcakôc catê

1 Pahhi Catêjê 16.29-33; 17.1-24

ÿhÿ, pê caku jàhtôa jirô pê, kÿj rũm pjê jïkjê ata pê Ixaher jō pjê jō pahhi nō ita japrÿ pê Acapê, ne pjê to ihhimpej ita to caku to winti ne ihkôt to ajkrut, ne hũm jirôa pê ihkêanre. Ne Ixaher catêjê kam me cupê pahhi catêjê cunea jirôa pê ihkêanre.

Pê curi Pahpăm jarkwa to me cumă ihcakôc catê nō ita japrÿ Erij. Ne Pahpăm jarkwa kôt, ma pahhi Acapê wÿr cator, ne cute cumă harkwa to:

— Acapê, Ixaher catêjê Păm Cati pê ri quêt Pahpăm tïar, na waipê cumă ijâpên catê, neimă ihkîn. Wa ite cumă icakôc, ne ihwÿr pejti, mãr quê nee ta nō to iwryc nare, ne nee cũmpêti nō to iwryc nare ita na, ahnaa caku to incrê, ate me akwÿ me, me akên ton xà atajê jahpan xà na. Jirô pê wa ha hipêr ahna ahwÿ, quê ha cormă ta nō to wry — hajÿr. Ne ma tẽ.

Jirô pê mã ri Pahpăm te Erij mã harkwa to:

— Ca ha acato, ne ma pyt cjêj xà wÿr tẽ, ne curia cō jarare nō ajpê ata ri, ca ha amxu, ne toa ikō. Wa ha awÿr pryjara kujate, quê ha awÿr gō to pra, ne amă to garte — hajÿr.

Mã Erij te Pahpăm te ampo na mên xà ata na ton, ne ma cō jarare na hàhhuc. Mã pryjara hÿrmă kwÿr me hî to pra, ne to cumă harte, iràrà me pyt cunea kam, mã

cô jarare ata to ikô. Mă ta nõ wrÿc nare ita kam, cô jarare ata crà. Mă Pahpăm te cumă harkwa to:

— Ca ha ma Xarep jô krÿ wÿr tē, ne curia ahtwÿ. Quê ha jũm cahăj pê impjên tyc mă impijapit ata ato ajpa. Wa ramă cute ato hajÿr xà na, ite cumă ijarkwa hyr — hajÿr.

Mă ma Xarep jô krÿ wÿr tē, ne krÿ jô harkwa na cator me ajkaam, cute jũm pijapit ata pupun, mă apu pÿ to cuprôn to mō. Mă cute cumă hăkjêr, ne cô na ihwÿr. Mă ma cô wÿr ihteam kam, mă hanea ne cute kwÿr na ihwÿr.

Mă cumă:

— Wa ha ampeaj kam Pahpăm krac ri amă amji jarē, ipê ampo xâr hamreare, ne imă kwÿr cuhtom pyxit peaj ne nõ, ne caxuw to impê xà incire ne xa. Wa caxuw apu pÿ to cuprôn to mō, wa ha ikra me to amji mă impê, ne mehkrêr hiahpuro. Quê ha hamre, ampo wa ha hipêr me cukrê? Quê ha prăm ajwar me icura — hane.

Mă Erij cumă:

— Nee apu amji na atyc cãmÿj to hajÿr nare, ne nee apu pa nare. Ne gapacta ne ate harên xà ita to. Ne mam ihkwÿ to impê, ne ajpên iwÿr to tē. Jirô pê mă ca ha cormă akra me amji mă atekjê to. Ampo na? Por Ixaher catêjê Păm Cati pê Pahhiti ata te imă ato hũjarên to hajÿr he: “Quê ha hōtpê gō kwÿr xôm cjên xà me, to impê xà cuhhê xà kam, amă ihcuhhê ita na, wa ha ahnaa hipêr me ta nõ to wrÿ” hajÿr. Ita na ri cute imă ato hũjarên — hane.

Mă cute Erij par pyrentu, ne ma tē ne harkwa kôt ton. Ne ihkra ita me, Erij me, me hâpân pej ita to cute me putwrÿ jâhtôa. Mă jũ caxuw me cupê me hō ita jamre nare. Ampo na? Pahpăm jũ mă to, mă hamre to ipa, ne hacpÿa mă hipu to ipa, cute to hũjahkre xà ata na.

Ne amcro nõ na cahăj kra xũmre ita xà ne ihtyc. Mă inxi te Erij mă harkwa to:

— Hàpà, Pahpăm mă hâpên catê ita! Ampo to mă wa ite? Ca me iwÿr mō, wa ite aracri ikên xà nõ ton, mă ca ate hahpan xà na ipê ikra to hy, mă ipê ihtyc? — hajÿr.

Mă Erij cumă:

— Hă, caxi, imă akra ita gō, wa ha Pahhiti pê Inxũ Cati mă ihcajrên — hane. Ne cute ihkra ita pÿn ne ma kÿj pê, hōt xà ata wÿr to hâpir, ne hikwa xà kam hir.

Ne cute Pahpăm mă hăkjêr ne cumă:

— Hă, ijô Pahhiti, ampo na mă ate impijapit te imă ijâhhuc xà jôr ne ito ajpa ita pê ihkra ita curan? — hajÿr. Ne cute intuw ita jipy amji capô to incrê, ne ampeaj kam Pahpăm mă ihcajrên ne cumă:

— Hă, ijô Inxũ Cati, ca ha intuw ita to hacpÿa mă ihtÿr — hajÿr. Mă Pahhiti te Erij te ahna hâhwÿr xà ita na impar, ne hacpÿa ne cute intuw ita mă carô kujahêc, mă hacpÿa mă ihtÿr.

Mă Erij te impÿn, ne ma inxi wÿr to mō, ne cumă:

— Hōmpu he, hacpÿa mă akra tÿr, ne quê ha ihtÿj amă amji to ajpa — hane.

Mă cute Erij mă harkwa to:

— Ita caxuw wa ampeaj kam apê Pahpăm mă gâpên catê na, ite gahkre pej. Ca atÿj Pahpăm jarkwa to acakôc to apa — hajÿr.

Pê Erij Ixaher catêjê mă Pahpăm carôt na to ajpê

1 Pahhi Catêjê 18.20-46

²⁰ Pê Pahpăm ta nõ kujahêc nare to caku to incrê, ne ihkôt to hÿkjê. Ampo na? Pê nee me Pahpăm jarkwa par nare, ne pahpăm cahàc krekà kôt pit mă me amji kampa na pê. Jirô pê mă ri Pahpăm te cumă ihcakôc catê pê Erij kujahêc, Acapê pê pjê jô pahhi ata wÿr, quê cumă awjarê, măr quê Carer jô kēnti na mehwÿ to cuprôn tu ne. Mă ma Erij tē, ne cute pahhi pê Acapê mă hũjarên.

Mă Acapê te mehwÿ pê Ixaher catêjê cunea to cuprôn tu, me pahpăm cahàc krekà pê Pahar ata mă me hâpên catêjê me, cute Carer jô kēnti na me to cuprôn. ²¹ Mă Erij te me hàhtôti atajê mă harkwa to:

— Jũ mă ca ha amji to me gâhtũm ry to, ne amji mă me ipijakrut itajê nõ te amji kam hapac xà nõ capi, ne mehnō pyxit peaj kôt me amji kampa? Quê ha Pahpăm pê ijô Pahhiti pê Pahpăm to Pahpăm na, taa mă ca ha me hũnă! Nāmri quê ha pahpăm cahàc krekà pê Pahar ata pê pahpăm na, taa mă ca ha me hũnă! — hajÿr.

Mă nee jũm te cumă jũ măn nare.

²² Mă hipêr me cumă:

— He wa me acatâtkre na, ipê Pahpăm pê ijô Pahhiti mă ijâpên catê pyxit peaj ne ijâhhuc. Ne Pahar mă me hâpên catêjê mă ajte me hàhtôa to me hàhtô, ne cute me cwatxēnta ne ihkôt xÿncwēnta. ²³ Hă, ajpên me pryti xũmti to me ajkrut ne me to mō. Quê Pahar mă me hâpên catêjê amji mă mehnō capi, ne mehcura, ne me to ihkryj ne to caxàr xà kam pÿ ata jipy me haxwÿ. Ne nee ajco, ihkrac ri pÿ ata kam me cuhôn nare. Wa ha hanea ne ihnō to hanea ne ihcura, ne to ihkryj, ne Pahpăm mă to caxàr xà kam pÿ ata jipy haxwÿ, ne nee ihkrac ri cuhôn nare. ²⁴ Ca ha me gō pahhiti pê pahpăm cahàc krekà pê Pahar ata na ahwÿ, jirô pê mă, wa ha hanea ne ijô Pahpăm pê Pahhiti na ahwÿ. Ne por quê ha me Pahpăm nõ me pahkampa, ne cuhy kujate, quê ha pÿ ita na cupÿ ne to capa ata pê, quê ha quêt Pahpăm peaj — hajÿr.

Mă ipu na amehcuhhê itajê cunea te ita na me amji caxàr, ne me cumă:

— Pom ate harên xà ita na ihkênre nare — hajÿr.

Pê Pahar mă hâpên catêjê cute cuhy kujahêc na tee Pahar wÿ

²⁵ Jirô pê mă ri Erij te Pahar mă me hâpên catêjê mă harkwa to:

— Ampeaj kam me gâhtô, cwÿrjapê ca ha me caa mam me pryti ita nõ capi ne mehcura, ne mam me apăm pê me gō pahhiti pê Pahar ata mă me acakôc, ne nee me pÿ jakôt ata krac ri me cuhôn nare — hajÿr. ²⁶ Mă cute me pryti ata curan, ne ame ton, ne cute me to caxàr xà ata jipy me haxwÿr.

Ne pea iràrætia na, me hõ pahpãm cahàc krekà pê Pahar ata pejti na me harèn kam mehtèm, ne tàkamrý cute me to pyt jàpir to me mõi, ne me caràr to:

— Hàpà, me ijõ inxũ pê Pahar, me ikampa, pom wa me awý ita? Me ijõ pahhiti, me ikampa ne ajpên cuhy kujate! — hane. Mã nee cute me kam hapac nare. Mã cute me pryti to caxàr xà ata pu na me hàkrun kam mehtèm, me cumã cuhy cator prãmte. ²⁷ Ne cute me hàkruan to ramã me pahkrã jimoc kam pyt to me hajýr to mõi.

Mã Erij te me ahna xwý kam ihtèm, ne me cumã harkwa to:

— Ca cormã kyre pê ame acaràr, me acaràr to mehtýaj ne — hajýr. Ne me ahna ahtùm ryre mã hacpý ma mã cute me cumãn kam ihtèm, ne me cumã harkwa to:

— Me gõ pahhiti pê Pahar ita mã me acaràr to ihtýaj ne, mãr quê me akampa. Mõrmõ cormã apu jùm mã ihcakõc, na ri nee cute me apar nare. Nare, mõrmõ ma ihkwýr xà wýr mõi, nare, mõrmõ ma jũ kam ihtèm xà ata na tẽ, nare, mõrmõ ihtýj nõ ne gõr, na ca ha ate mehcujrõn xà na me akrãhhia kam me cumã me acaràr! — hajýr.

²⁸ Mã mehkrãhhia kam me cumã me caràr, ne cute amji kam me hapac xàa na, ihtýj wapo xwahhihti to me amji jĩ jakep, ne me hõ kruwxwa to me amji caxwý, ne ajco me amji caprõ jaxwýr to me ipa. ²⁹ Ne cute me caràr týj ita to me pyt to mõi. Mã nee me hõ pahpãm cahàc pê Pahar ata te mempar ne me cumã jũ mãn nare, ne nee cute me caràr par nare, ne nee jùm par nare. Ne hamre, ramã pyt pec to mõr xà ata kam ri, quêt me Pahpãm peaj mã cute me ampo to caxàr xàa kam hàhhuc.

Pê Erij cute cuhy kujahêc na Pahpãm wý

³⁰ Mã Erij te mehcunea mã hàkjêr to:

— Ajpên me mõi, ne me ina ahtipre ne, mãr ca ahna me ipupun peaj ne — hajýr. Ne cormã cute ame Pahpãm mã ampo to caxàr xà hur ata to impej kwýa kam, mã cute ahna me cuprõn. ³¹ Mã cute kên te tõi atajê japýn. Ne kên atajê pê ahpýanre na me hakrã pê Ixaher kra te tõi atajê.

³² Ne Pahpãm jarkwa kôt cute ahpýanre na Ixaher kra atajê na kên te tõi atajê nõr par, Pahpãm mã cute ampo to caxàr xà to impej prãmte. Jirõ pê mã ri hõtpê cute ipu na cô mã hahkwýn to kre ryre. ³³ Ne cute kên jipy pĩ kwý jakõt, ne kam pryti jĩ kryj ne hakõt, ne cumã harkwa to:

— Me cô jacjên xà catia nõ to me cwat, ne me to hipu, ne pryti jĩ kam me haxwý, ne pĩ kam me haxwý, ne me to inco tu ne — hajýr.

³⁴ Mã cute me ton jirõ pê, hipêr cute me cumã harkwa to:

— Hipêr kam me cô kwý jaxwý — hajýr. Mã cute hipêr kam me haxwýr.

Mã hipêr me cumã:

— Kam me haxwýr to incrê mã — hane. Mã cute hipêr kam me haxwýr. ³⁵ Mã kên te tõi atajê kam pry-

ti jĩ ata pĩn, cô ajxwý ne tàkamrý cute ipu na kre jahkwýn ata to hipu.

³⁶ Mã pyt pec kam, cute me Pahpãm mã ampo to caxàr xà to me amji pyrác xà ata kam hàhhuc. Mã Erij xãm ne mõi, ne Pahpãm mã ampo to caxàr xà jĩkjê rúm hàhhuc ne xa, ne Pahpãm mã ihcakõc, ne cumã:

— Hàpà, me ijõ Pahhiti. Por apê Aprãw me, Ixac me, Ixaher pê me apynã atajê jõ Pahpãm. Ne ita kam me cumã apê Ixaher catêjê jõ Pahpãm na amji to ajpê, ne hanea ne ipê amã ijapên catê na me cumã ito ajpê. Pom ite ampo cunea ton itajê, wa nee amjia kôt ite ton nare, ne garkwa kôt wa ite ton! ³⁷ Ijõ Pahhiti ikampa, mãr quê itajê cunea apê ampeaj kam Pahhiti pê Pahpãm na, me gahkre pej, ne caa pê ca, amji wýr, amji mã mehĩ to apkjê — hajýr.

³⁸ Me ajkaam mã cõjkwa pĩn cuhy pým! Ne cute pryti me pĩ to caxàr, ne kên to caxàr, ne pjênxõm to caxàr, ne hanea ne cute cô to incrã tu, kre ata kam!

³⁹ Mã mehcunea te me ita pupun, ne hũpate, pjê kam, mehcunea mehkuc to mehpyým, ne me hũjarên to:

— Cõjkwa kam me pajõ Pahhiti ita pê ri Pahpãm to Pahpãm! Cõjkwa kam me pajõ Pahhiti ita pê ri Pahpãm to Pahpãm! — hajýr.

⁴⁰ Mã Erij te me cumã harkwa to:

— Me pahpãm cahàc krekà pê Pahar mã me hàpên catêjê cunea pro, mãr quê nee jũ kam jùm pyxit ne ihtèm nare! — hajýr. Mã cute mehcunea pro, mã ma Erij Quixõ jõ kàj mã nõre wýr me to mõi, ne curi cute mehcunea jipej.

Pê Erij cute ta kujahêc na Pahpãm wý

⁴¹ Mã Erij te Acapê mã harkwa to:

— Ita caxuw gapacta ne tẽ ne apà ne ikõ. Ampo na? He ramã ite ta nõ pahtýjti jãhkrihkrit kam ijapac, mã ajpên mõi! — hajýr. ⁴² Mã ma Acapê tẽ, hýr ne hàpàn ne ihkõm prãmte.

Mã ma Erij Carer jõ kënti ata jimoac wýr cumã hàpên catê me hàpir, ne pjê kam hýr, ne cute ihkuc to ihkõn krã catêc ne to jý. ⁴³ Jirõ pê mã ri cute cumã hàpên catê mã harkwa to:

— Mõi ne cõxwa wýr rĩt! — hajýr.

Mã ma tẽ, ne irĩt ne hacpýa ne cute Erij wýr amji jaxàr ne cumã:

— Wa nee ite ampo pupun nare — hajýr.

Mã Erij te ampo pupun xà atawýr ihkujahêc to xet, mã cute amji jacjên to xet.

⁴⁴ Mã cumã hàpên catê te amji jacjên to xet ita kam ri, cute cumã hũjarên to:

— Wa ite cõxwa pĩn ahcakrã nõ incire pê me hũmre jũhkra pyrãcti incire jàpir to mõr na hõmpun — hajýr.

Mã Erij te cumã hàpên catê ata mã:

— Atêm pyrentu, ne Acapê mã awjarê, quê hõ cawrõ jõ kãhà kam jý, ne kënti pê to wrý, mãr quê nee cõhtàm cupê pry jahêr nare — hajýr.

⁴⁵ Mã nee harkwa cràre nare. Ne cõjkwa kam awcapãtkõ pyrentu, ahcakrã kam. Mã kõc pahtýjti ata cator, ne pahhãjê kypê iwrýc nare. Mã Acapê hũjarêan

kam Jexer jô krî wÿr ihteam to tẽ. ⁴⁶ Mã Pahpãm te Erij mã ipicahur xà caxuw, carôt tÿj jôr. Mã cute Acapê jakren, ne ma mam hamrea kam tẽ, ne mam Jexer jô krî mã cator.

Erixêw pê Pahpãm jarkwa to ihcakôc catê

1 Pahhi Catêjê 19.15-21

Mã Pahpãm te Carer jô kënti na hõ cuhy kujahêc jirô pê mã, cute Erij mã harkwa hyr ne cumã:

— Amji jaxà ne jùm tuw japyr te Erixêw ata japê, mãr quê gaxà kam cupê ijarkwa to me cumã ihcakôc catê — hajÿr. Mã Erij te amji jaxàr ne Erixêw na cator, ne cumã Pahpãm te harkwa to ihcakôc catê na amji mã capi na harên. Mã Erixêw te impar, ne ma ihkôt mō.

HAPU NA PAHHI CATÊJÊ JÔ KÀHHÔC

Pê carÿre cõjkwa wÿr Erij to api

2 Pahhi Catêjê 2.1-14

Ne jũ mã ihkôt ipa na caku te, jirô pê mã ri, Pahpãm te ma amji wÿr cõjkwa wÿr, carÿre to Erij to hàpir xà jô amcroa kam hàhhuc. Mã cormã Erixêw apu Erij kôt mō. Ne ma Krÿjajo jô pjê pÿn me mō, mã Erij te Erixêw cajpêr prãnte cumã harkwa to:

— Ita ri ahtwÿ, nãmri quê ha ma Pahpãm Peter jô krî wÿr ikujate — hajÿr.

Mã Erixêw cumã:

— Wa ha Pahpãm kam mare mã amã amji jarê, jũ wÿr wa are — hane. Ne ma ajwar me mō, Peter jô krî wÿr. Ne pê curi Pahpãm jarkwa to hahkre xà jũrkwa nõ ita xa.

Mã Pahpãm jarkwa to hahkre catêjê kwÿ intuw itajê ajpên mehwyÿr me pra, ne cute mehcajpar ne me Erixêw mã:

— Xà ca ramã ate ita kam, Pahpãm te ma gõ pahhi pê Erij to ihtêm na, hahkre pej? — hajÿr.

Mã Erixêw me cumã:

— Wa ite ramã hahkre pej, mër me kêt — hane.

Mã Erij Erixêw mã:

— Quê ha ma Pahpãm Krícuxwati wÿr ikujate, ca ha ita ri ahtwÿ — hane.

Mã hipêr Erixêw cumã:

— Wa ha Pahpãm kam mare mã amã amji jarê, wa nee arer nare — hane. Ne ma me mō, Krícuxwati wÿr. Mã curi hanea ne Pahpãm jarkwa to hahkre xà jũrkwa nõ ita xa, mã curi me cator.

Mã me hÿrmã Pahpãm jarkwa to hahkre catêjê kwÿ me pra, ne cute me Erixêw cukij to:

— Xà ramã ate ita kam Pahpãm te ma Erij japyrôr ne to ihtêm na, hahkre pej? — hajÿr.

Mã Erixêw me cumã:

— Ýhÿ, wa ite hahkre pej, mër me kêt — hane.

Mã Erij Erixêw mã:

— Quê ha ma Pahpãm Cõpijapjêr jô cô wÿr ikujate, na ca ha ita ri ahtwÿ — hane.

Mã Erixêw cumã:

— Wa ha Pahpãm kam mare mã amã amji jarê, jũ wÿr wa ha are — hajÿr.

Ne ma Cõpijapjêr jô cô wÿr me mō. Mã ma Pahpãm mã me hàpên catêjê intuw te me xÿncwënta ne ihkôt me mō, ampÿa mã cute me hõmpun prãnte. Mã Erij te ihkà japjêhti ata to cajôt ne to cô cakwÿn, mã cô picapôn ne ihcajpuw amcràare. Mã me ipijakrut itajê ihkôt me irêr. Mã Erij te Erixêw mã harkwa to:

— Ca ha ampo na iwÿ, waha itÿj, itêm xwÿjrea na, amã ampo ata gõ — hajÿr.

Mã Erixêw cumã:

— Wa ha Pahpãm te ato acarôt tÿjti ita jirôa pê to ajkrut ne ahna awÿ — hane.

Mã Erij cumã:

— Ca ate atÿj ampo catia ne ahna iwÿr, ne ca ha ate itêm xà na ipupun na, ca ha atÿj amji mã ate ampo na iwÿr xà ita cwa. Nãmri ca ha ate itêm xà ita na ipupun nare na, ca ha nee ate ampo na iwÿr xà ata cwÿr nare — hane.

Ne ma me mör ita kam, me amji mã mehcakôc to mō, mã ihprôt pê cuhy te cawrô jô kujti ita cõjkwa pÿn cator, ne cute me to ipicapôn. Mã ma carÿre te cõjkwa wÿr Erij to hàpir. Mã Erixêw te ita pupun ne caràar kam cumã harkwa to:

— Inxũ, inxũ! Ixaher catêjê jô cawrô me hõ kujti, ca me hõmpu he! — hajÿr. Mã ma me ipictor.

Mã Erixêw te apu amji pê ihkà cokjêr, ne ma cute Erij pê ihkà pÿm ata pyr ne to mō, cô wÿr. Ne cute Erij cuxà to cô cakwÿn, mã cô picapôn ne ihcajpuw pjê incràre, mã ma irêr. Ne pê ita caxuw Erixêw pê Erij jakàn pê Ixaher catêjê mã Pahpãm jarkwa to ihcakôc catê.

Pê Erixêw cahãj pijapit mã hõ ampo to impê xà to aj-camê

2 Pahhi Catêjê 4.1-7

Pê Pahpãm jarkwa to hahkre catêjê intuw atajê nõ hikwa tuw, ne jũ mã ahna caku pê ty. Mã ma hÿxi Erixêw wÿr cator. Ne cute cumã amji jarên to:

— Por pê ipjê pê amã hàpên catê ata ramã ihtyc. Ne cumã Pahpãm kíñ na, amã hahkre pej. Pê jùm ita to new catia to cati, ne ahna ihtyc, mã ramã ina ahwÿ, ite cumã ipjê te to new ata jahpan xà na ijàmjör prãnte. Ne ampo to wa cumã amgõ? Na quê ha ma ipê ikra xÿmre pijakrut itajê japyrô, ne amji mã me tocumã hàpên catêjê na rohnÿtti mã — hajÿr.

Mã Erixêw cumã:

— Jũ mã wa ha ajte ato? Ampo mã gÿrkwa kam amã? — hane.

Mã impijapit ita cumã:

— Ipê ampo hamreare, ne imã ampo to impê xà na incjên xà pyxit peaj ne xa — hajÿr.

Mã Erixêw cumã:

— Hã, ca ha tẽ ne me acahi na amehkrÿ atajê pê ampo to impê xà run xà cunea incwa, ne amcro nõ na hacpÿa mã me cumã hõr na me cumã harên hiahpuro. Ne gÿrkwa mãto acjêj pa, ne amji na to hihê. Ne me hàmrùn xà atajê cunea kam ampo to impê xà pyxit ita jaxwÿ, quê ha amjia kôt hipêr amji to hipu to mō, ne

ihcunea to hipu partu, quê ha to hipu pa, me ajkaam incrà — hane.

Mã ma tẽ ne cute mehkra mãn. Mã cute cumã me hãmrun xà to cuprôn, mã cute to hipu partu. Ne ramã me hãmrun xà jamre, me ajkaam mã ampo to impê xà jamre.

Mã ma hacpỹ mã Erixêw wÿr tẽ, ne apu cumã harẽ, mã cumã:

— Hã, ca ha tẽ ne ampo to impê xà ata to ihpore na apha, ne ihpore to ate new ata jahpan xà na amgõ. Quê ha cormã ihpore cahhur ata me amã ahtwÿ. Ne pom quê ha ihpore cahhur ahtwÿ ita, quê ha ihtÿj akra me, ate amji to me apijapar na me atehcajpa — hane.

Mã cahãj pijapit ita te harkwa kôtton partu, ne ihkên pê amji pytâr.

Pê Namã ma Ixaher jõ pjê wÿr tẽ

2 Pahhi Catêjê 5.1-8

Ne pê caku atajê kam pê Xiri jõ pjê kam krãhtare jõ pahhi nõ ita japrÿ Namã. Ne ampeaj kam ihpa tÿj cakrô apu ihkà xêtti. Ne ihxêtti ata quê ha ihkêanre kam, ihtÿj jũ caxuw ihcura.

Pê Xiri jõ krãhtare ma Ixaher catêjê jõ pjê wÿr me pra ne ajco pyjê to me ahkĩ. Pê Namã hanea ne jũm cuprÿre ita japrô, ne hĩxi mã cugõ, cute amji mã to cumã hãpên catê prãmte. Ne amcro nõ na cahãj cuprÿre ita te hõ pahhi cahãj ita mã:

— Quê rÿ mã ijõ pahhi pê Namã ijõ pjê kam Pahpãm jarkwa to ihcakôc catê ata mã ihkà xêt ita na amji jarẽ, quê caprã — hajÿr.

Mã hĩxi te impjên mã hũjarên. Mã Namã te Xiri jõ pahhi mã ita na amji jarên. Mã hõ pahhi te cumã:

— Hã, mër mõ ne Pahpãm jarkwa to ihcakôc catê ita pupu ne cumã amji jarẽ. Wa ha Ixaher catêjê jõ pahhi mã ana ihkãhhôc kujate — hajÿr.

Mã Namã te amji caprãr jahpan xà na cumã ampo jõr xà na cumã kên prãti me, wakÿre prãti me, ihkà me, ma to mõ. Ne ma hanea ne hõ pahhi jõ kãhhôc ata, Ixaher catêjê jõ pahhi wÿr to mõ.

Mã ihkãhhôc ata hũjarên to:

“ÿhÿ, Ixaher jõ pjê jõ pahhi ita.

Ipê Xiri jõ pjê jõ pahhi.

Ne por amã ihkãhhôc to mõ ata pê imã hãpên catê. Ca ha imã, cumã ihkà xêtti ita caprã” hajÿr.

Mã Namã Ixaher jõ pahhi wÿr ihkãhhôc ita to cator, ne cute cumã hõr. Mã cute ihkãhhôc ita cahyt jirô pê mãri, cute ihpeacre na me hahkre pej prãmte, amji pê hitô kà jipôn, cute me amji kam hapac xàa kôt. Ne me cumã:

— Xiri jõ pjê jõ pahhi ita te imã ihkà xêtti ita kujahêc, wa caprã. Xà ajkĩ ipê Pahpãm, wa caprã, ne itÿj cumã cute amji kam hapac xà tuwti nõ gõ? Hãpà! Tee ame papijapu prãmte me pahto hahkre — hajÿr.

Mã Pahpãm jarkwa to ihcakôc catê pê Erixêw te pahhi peacre na harên par, ne cumã harkwa kujahêc ne cumã:

— Ampo na mã ca apu apec? Ajpên imã Namã kujate, wa ha pa caprã. Quê ha ihtÿj cormã ita ri, pjê ita kam, Pahpãm mã hãpên catê te ipa na hõmpu ne hahkre pej — hajÿr. Mã Ixaher jõ pahhi te Erixêw wÿr Namã kà xêtti ata kujahêc.

Namã caprãr xà

2 Pahhi Catêjê 5.9-17

Mã ma Namã tẽ ne Erixêw jürkwa wÿr cator, ne harkwa mã hõ cawrô me hõ kujti to hãhhuc. Mã Erixêw nee hÿrmã cator nare, ne cute hÿrmã cumã hãpên catê nõ pit kujahêc, quê to ihhimpej to hane he:

— Ca ha ma Cõpijapjêr jõ cô wÿr tẽ, ne kam amrõr to xet, ne amji cajpêr pyrentu, quê ha akà xêt ita amã hamre, ne akà tetet, ne ramã acaprãr — hajÿr.

Mã Namã apu incryac to incryc, ne ma mõ, ne cute cumã me hãpên catêjê mã harkwa to:

— Wa itÿj amji mã: “Mõrmõ quê ha iwÿr cato ne ijũ na cupy, wa ha ajpên mã me icakôc, quê ha ina hũ xi ne Pahpãm mã icajrên” hajÿr, cakrô mã ajte nee cute ito hajÿr nare, ne cama cute imã harkwa ita kujahêc. Ne ijõ pjê kam cô ita, Ixaher jõ pjê jõ cô itajê cunea jirôa pê ihtetet ne impej, cute jũm caprãr xà caxuw. Ne mër ampo na mã wa curi cô ata kam ixwÿr, quê icaprãr nare? — hajÿr. Ne apu incryc ne ma cawrô jõ kujti to tẽ.

Mã ihteam kam cumã me hãpên catêjê te me cumã harkwa to:

— Ijõ pahhi, quê Pahpãm jarkwa to ihcakôc catê ca ma ampo jahkre kêatre na amẽ na mã, ca ha atÿj to. Nõ mã mã ca ha ajte nee hahkre kêt nare ita ton nare? — hajÿr.

Mã Namã te cumã me hãpên catêjê impar, ne ma Cõpijapjêr jõ cô wÿr mõ. Ne cute kam mrõr to xet, mã pea ihkà impej pyrentu, ne ihkà ita pê ihhêj rũm ahkrare kà tetet. Mã Namã me, cumã me hãpên catêjê me, ma mehcunea te me amji jaxàr, Pahpãm jarkwa to ihcakôc catê wÿr, ne me cator, ne cuna mã me xa. Mã Namã te Erixêw mã harkwa to:

— Hamre, ita caxuw wa ite pjê cunea kam Pahpãm ita pyxit peaj na hahkre pej, ne cupê Ixaher catêjê Pãm Cati. Xà ca ha atÿj ate icaprãr jahpan xà na, ite amã ampo jõr xà ita na amji capa? — hajÿr.

Mã Erixêw cumã:

— Wa ha Pahpãm kam mare mã amã amji jarẽ, wa nee ihnõ na amji caxàr nare — hane. Mã Namã ihtÿj cormã to kampa, mã nee cute ihnõ na amji caxàr nare.

Mã Namã cumã:

— Wa ha ma ijõ pjê wÿr amji jaxà, ne por Ixaher catêjê Pãm Cati pyxit peaj ata, wa ha itÿj kampa, ne to pit mã, amji mã ihimpej to ipa — hane. Ne ma cute amji jaxàr, hõ pjê wÿr.

Cõjkwa pĩn Pahpãm jõ krãhtare

2 Pahhi Catêjê 6.8-18

Ne pê caku nõ na, Xiri catêjê me, Ixaher catêjê me ipijapu kam tẽ. Ne hãn ne ajco me kam imprar xà wÿr,

Xiri catêjê jô pahhi hõ krãhtare jô pahhi kwý me ajpên pa, ne me ajpên mã:

— Por curi me papicaxêr xà ata ri, pjê ata kam, cu ha me pajô krãhtare to me cuprô, pahte me Ixaher catêjê jô pahhi pro prãmte — hane.

Mã ramã Erixêw te me hahkre pej, ne Ixaher jô pahhi mã hũjarên, mãr quê amji to huphê, quê Xiri catêjê jô pahhi ata nee mehpro nare. Hõ, pê ajco Erixêw jũjarên xà ata me cumã amji jahkre pej gõ to hane, na pê me amji pytà. Ne ihtýj ajco me to hajýr to xa.

Mã Xiri catêjê jô pahhi tee apu amji jahkre, jũ mã quê ha ajte. Ne pea cute krãhtare jô pahhi catêjê na hàhwýr, ne me cumã:

— Jũm te mã ajte Ixaher jô pahhi mã pahte me ajpên par xà ita jarên? — hajýr.

Mã krãhtare jô pahhi nõ ita cumã:

— Nee me pahkwý nõ te me hõ pahhi mã hũjarên nare. Ne por Pahpãm jarkwa to ihcakôc catê pê Erixêw ata te ri hõ pahhi mã hũjarên, ne ihtýj cumã ate ahtee gũrkwa caxwýn kam acakôc xà ton ata jahkre pej — hane.

Mã Xiri catêjê jô pahhi te ahna me mên, ne me cumã:

— Me hapên to mõi ne mehpro — hajýr.

Mã amcro nõ na jũm te Xiri catêjê jô pahhi mã Kwapijakrut jõkrĩ kam Erixêw apu mõi na harên. Cwýr-japê ri pahhi te hýrmã hõ krãhtare jãhtõa ne ihku-jahêc, hõ cawrô me, hõ kujti mea mã. Mã caxwa ri Kwapijakrut jô krĩ mã me cator, ne cute me krĩ krã.

Mã Erixêw mã hàpên catê nõ intuwre nõ ita iràrà na hýr, ne cute põ pê, krĩ pu na Xiri catêjê jô krãhtare kwý pupun. Mã me cumã hũpa mã ma Erixêw wýr tẽ, ne cute cumã hũjarên to:

— Ijõ pahhi! He ramã me pahcurê xwýn te me pahkrã tu ita kam, jũ mã cu ha ajte? — hajýr.

Mã Erixêw cumã:

— Apu amji mã pa nare. Ampo na? Pom me cumã krãhtare jãhtõ ita jirõa pê ri me pamã hàhtõ — hane. Ne cute Pahpãm wýr ne cumã:

— Me ijõ Inxũ, wa ha awý, ca ha imã hàpên catê ita to jũ mã, quê cõjkwa pĩn me pra jô krãhtare pupu — hajýr.

Mã Pahpãm te ihhê ne into jahkjên, mãr quê ihtýj me hõ krãhtare pupu. Mã cute cuhy te cawrô me, hõ kujti ita me hàhkà jakõt nõ ita to hipu tu na hõmpun.

Mã ramã ajpên Xiri catêjê jô krãhtare te amji mã mõi, krĩ wýr.

Mã Erixêw te Pahpãm wýr ne cumã:

— Me ijõ Inxũ, me to into tũm — hajýr. Mã Pahpãm te Xiri catêjê jô krãhtare cunea to into tũm. Hõ, Pahpãm te me to hajýr, ne me cupê cumã hàpên catê ata pytàr. Hamre.

11

PJÊ JÕ PAHHI CATÊJÊ KWÝ

Ýhý, pê pahhi Xarõmãw tyc jakàn pê ri, pê Juta catêjê atajê me cupê Tawi tãmxwý catêjê to pit mã amji mã me hõ pahhi. Pê pahhi kwý crêre atajê impej ne ihtýj Pahpãm jarkwa kõt ame ipa. Ne mehkĩnte pahhi kwý

cati atajê ma ame Pahpãm caca, ne ihtýj, mehkwy meã mã, me to hapac kêt to me mõi.

Juta jõ pjê jõ pahhi Jõwat jarên xà

2 Pahhi Catêjê 11.1-21

Pê caku jãhtõa jirõ pê, Juta jõ pjê jõ pahhi nõa ty. Ne pê ihtýj ihkra jaxà kam, inxi amji to pahhi prãm. Ne pê cahãj ata japrý Atarijkwýj, ne ihkêanre. Ne cute ihtãmxwý itajê cunea jipej na me mên, mã cute me hipej. Pê pyxit peaj ne cormã incirre, ne haprý Jõwat. Pê into catýjre haprô, ne ma to tẽ, ne Pahpãm to me amji kam hapac xà jũrkwa kam to amxu. Mã nee cute ihcuran nare. Mã curia cute me to ipijapar to caku to xêj.

Mã Atarijkwýj te amji to pahhi, ne ihhimpej to caku to xêj. Mã Pahpãm mã mehcajrên catêjê jô pahhi pê Jojata te me hũjamãr catêjê jô pahhi na hàhwýr. Pom krãhtare Pahpãm to me amji kam hapac xà jũrkwa jamãr catêjê atajê jô pahhi me, me Atarijkwýj jũrkwa jamã atajê jô pahhi me, cute me ahna hàhwýr.

Mã cute me cuprõn, ne ma ajpên pê ame jũm te, jũm mã Jojata cakôc xà ata jarên tête me ajpên mã. Mã mehcunea te ampeaj kam, nee jũm mã me harên nare na me amji ton. Ne cute me cumã, por pê pahhi xwý ty ata kra pê Jõwat to ipipê, mã cute me hõmpun. Mã pea Jojata te me to ihhimpej to hajýr he:

— Ca ha me akwý me Atarijkwýj jũrkwa jamã, mãr quê nee jũ kam ihtêm nare. Ne me akwý me Pahpãm to me amji kam hapac xà jũrkwa krã, ne kam hũmre intuwre pê pahhi xwý kra ata jamã. Quê ihhêaj to jũm apu ihkra ita to jũ mãn prãm, ca ha me jũm ata pro ne mehcura — hajýr.

Mã Pahpãm mã mehcajrên catêjê jô pahhi te mam pahhi xwý kra intuwre ita japrô, ne me kam mare mã ihkrã mã pahhi krãhkà mên, nepea cupê pahhi xà caxuw, hanea ne ihkrã kam ampo cacô impêti ata jaxwýr. Ne cute cumã ihkãhhôc kam Pahpãm jarkwa ata jõr, ne to pahhi tuw. Mã mehcunea ame cumã me hũhkra cahhy, ne ame cumã caràr to:

— Pahhi tuw! Ca ha caku jãhtõa kam amji to ajpa! — hane.

Mã Atarijkwýj te mehtãmxwý jipej ata te me harkwa xãmti ata kam hapac, ne ma Pahpãm to me amji kam hapac xà jũrkwa wýr ipicahur, ne cute pahhi tuw pupun. Mã krãhtare te hũtãr tu ne to xa, ne cama ame hakry, ne ame hõhhi cakõ. Mã Atarijkwýj caràr, ne cute harkwa to:

— Cõt ca me acunea icuna mã me akên? — hajýr, ne ihpeacre.

Mã Jojata te krãhtare jô pahhi mã Atarijkwýj curan na hũjahkre ne me cumã:

— Me to acato, ne nee Pahpãm to me amji kam hapac xà jũrkwa kam mehcuran nare. Ne por jũm te ihte-hcajpar prãm ata mea mã, atýj mehcura — hajýr. Mã cute mehpro ne ma põ mã me to cator, ne cute mehcuran, mã hamre.

Ne caxuaw pê cormã Jõwat na caku te xet peaj cakrõ, ihtýj cute pjê to ihhimpej kam ihtêm. Mã Pahpãm mã

mehcajrên catêjê jô pahhi pê Jojata ata te ihtehcajpar kam ihtêm, ne ihtÿj hõtpê ihtehcajpa. Mã cute mehkwy mã, pahpãm cahàc krekà pê Pahar ata jûrkwa jûhhyr ne to hamre na, harkwa hydr. Mã hÿrmã me mõ, ne cute me hÿhhyr.

Pê pahhi pê Jôwat ata catyt kam Pahpãm jarkwa kôt ipa, ne Juta jô pjê to ihhimpej to caku to cwarênta ne ty.

Juta jô pjê jô pahhi Exequij

2 Pahhi Catêjê 18.13; 19.1-37

Ne caku nõa na pê Juta jô pjê kam pahhi nõ ita japyr Exequij. Ne Krÿpinkrên kam ajco ihhimpej. Pê Axiri jô pjê jô pahhi ata kêanre, na pê nee Pahpãm to amji kam hapac nare. Ne Exequij pê amji mã Juta jô pjê kam krÿ atajê cunea pytà. Pê hõ krãhtare kwÿa hanea ne Krÿpinkrên pytàr prãmta me hÿrmã me cato.

Pê ma Exequij Pahpãm to me amji kam hapac xà jûrkwa wÿr tẽ, cute Pahpãm wÿr, mã cute krÿ pytàr prãmta. Ne cute ihkà impejti ata jipôn, ne cupêhkà kêanre nõ ata to ihkà, cute me cumã amji kÿn nare na me hahkre pej prãmta. Ne ma cute Ixaj pê Pahpãm jarkwa to ihcakôc catê ata wÿr jÿm kujahêc, mãr quê jÿm cumã awjarê quê Pahpãm mã mehcajrên. Mã ma tẽ ne cute cumã hÿjarên. Mã Ixaj te Pahpãm mã krÿ kam mehkry atajê cajrên.

Mã Pahpãm te kam hapac ne cumã:

— Wa ha Axiri jô pahhi ata te hacpÿ mã hõ pjê wÿr amji jaxàr na me to, quê ha amji jaxà, quê ha curia jÿm ihcura — hajÿr.

Mã hamre, amcro nõ na ma hacpÿ mã krãhtare atajê te hõ pjê wÿr me amji jaxàr to me amji kam hapac. Mã ihtêm xà wÿr Axiri jô pahhi te Exequij mã ihkãhhôc juwahi, mã ihkãhhôc ata hÿjarên to:

“ÿhÿ, por cõjkwa kam me Apãm Cati ata, ca nee ampeaj kam ame kam gapac nare.

Quê Apãm Cati te, ite Krÿpinkrên to kên nare na me ijarên na,

ca ha nee kam me gapac nare.

Ampo na? Wa ha itÿj me amji jaxà ne ame ato kêanre ne.

Ne ramã mehcunea te, por wa pjê kwÿ kam ite me amji hi ata ri,

ite ame ampo to kêanre na me cumã me ijahkre pej.

Mã nee jÿ ri me hõ pahpãm cahàc krekà itajê nõ te jÿm pytàr nare,

na wa ite mehcunea to hamre tu” hajÿr.

Mã cute Exequij mã hõ kãhhôc ita kujahêc. Mã cute ipyr ne cahyt jirô pê, ma Pahpãm to me amji kam hapac xà jûrkwa wÿr to mõ, ne cute kam hir, ne Pahpãm mã ihcakôc to:

— Hã, me ijô Inxÿ Cati, apyxit peaj ne apê Ixaher jô pjê Pãm Cati, ne apê cõjkwa jô Pahhiti.

Ca pjê kam pahhi itajê cunea to ahimpej.

Ne caa pê ca cõjkwa me pjê to.

Me ijô Pahhiti ikampa, ne pom Axiri jô pjê jô pahhi te ihkãhhôc ton ita pupu he.

Cute atÿar cuna mã ihcakôc xà kêanre ita to ihcakôc he.

Me ijô Inxÿ, he ampeaj kam ri cute ampo kra me, krÿxàre kwÿ cunea jipej,

ne cute me hõ pahpãm cahàc krekà atajê to caxàr partu.

Ne por me hõ pahpãm cahàc krekà atajê akÿn te nee ihtÿr nare,

na ri cute me to hamre.

Ne ampo na ri cute mehcunea to hamre? Nee mã ampo na nare.

He me hÿmrea te ri pÿ me kên te me hõ pahpãm cahàc krekà atajê ton, cwÿrjapê ri cute to hamre.

Ne me ijô Pahhiti, pahhi ita pê me ipytà.

Quê ha mehcunea me apyxit peaj pê Pahpãm Cati na me gahkre pej — hajÿr.

Jirô pê mã ri Pahpãm jarkwa to ihcakôc catê pê Ixaj te pahhi Exequij mã Pahpãm jarkwa kujahêc. Mã harkwa ata hÿjarên to:

“Wa ite me ate Axiri jô pjê jô pahhi to me imã acakôc xà ata na me apar.

Na quê ha nee me gõ krÿ mã me hãr nare. Ampo na?

He pa wa ha me cupê me apytà” hajÿr.

Ne caxwa ata kam Pahpãm te Axiri jô pjê jô krãhtare jãhtôa jipej. Ne iràrà na Krÿpinkrên catêjê pimprar ne cute me curê xwÿn jãhtôa tyc pit pupun.

Cwÿrjapê Axiri jô pahhi te hõ pjê wÿr amji jaxàr pyrentu, ne hõ krãhtare cahhur me, me cator. Mã amcro nõ na mehkraa te mehcuran. Hõ, pê Pahpãm pahhi Exequij jô amcro kam Krÿpinkrên pytàr to hane.

Juta jô pjê pahhi pê Joxij

2 Pahhi Catêjê 22.1-20; 23.1-25

Ne pê caku jãhtôa jirô pê Juta jô pjê kam mehkry atajê cunea hipêr me Pahhiti pê Pahpãm to me hapac kêt ne me cumã hikra. Ne pê caku ata kam krÿ jô pahhi ata japyr Joxij, ne cupê hÿmre impeaj, ne quêt ihtÿj cumã Pahpãm pynãr prãm. Cwÿrjapê ri cute pahpãm cahàc krekà cunea to hamre, ne Pahpãm to amji kam me hapac xà jûrkwa to apu impej partu.

Mã amcro nõ na, Hirquij pê Pahpãm mã mehcajrên catê jô pahhi ata apu Pahpãm to amji kam me hapac xà jûrkwa kam mõ. Ne cute Pahpãm jô kãhhôc weaj nõ ita mã cator, ne cute ipyr, ne cute pahhi Joxij mã ihkujahêc. Mã jÿm te Joxij mã Pahpãm jarkwa na ihkãhhôc wej ata cahyt, mã cute impar, ne hÿ na ihpec pyrentu.

Ne cute Hirquij na hàhwÿr ne cumã amji jarên to:

— ÿhÿ Hirquij, ate imã Pahpãm jarkwa weaj kujahêc ata, jÿm te imã cahyt, wa ite impar, ne ajte ipeace. Ne

mõ ne Pahpãm to me amji kam hapac xà jürkwa mã axà, ne cumã icajrĕn. Ne cumã me papê Juta catêjê cunea cajrĕn. Ampo na? Cu ramã nee kam me pajapac nare. Mã ame pahkam incryac to incryc, mã hõ kàhhôc ita kam cute me pahna amji jarĕn — hajÿr.

Mã Hirquij me, mehkwy atajê te impar, ne ma Pahpãm mã mehcajrĕn catê cahãj ata wÿr me mõ. Ne cute me cumã pahhi Joxij te ampo cunea na ihpeacre, mã cute amji cajrĕn na hàhwÿr xà na, cumã harkwa kujahêc atajê cunea jarĕn.

Mã mehcajrĕn catê cahãj ita te Hirquij mã harkwa to:

— Ca ha pahhi mã awjarĕ, nãmri Pahpãm te pahhi ata mã harkwa kujahêc to:

“Pa wa ha krí ita cunea jipej tu.

Ne por ihkàhhôc kam ampo kĕn cunea na ihhôc ata, quê ha ihkĕn to hane.

Ampo na? He me ikwÿ pê Juta catêjê te cama ramã me ito hapac kĕt,

ne ahti na ame hõ pahpãm cahàc krekà atajê kĭn,

na ri ampeaj kam me kam icryc,

por cute ame ampo ton atajê incwÿrjapê.

Ne Joxij, atea ca gõtpe ipar, ne ikam mare mã, icuna mã,

ate apeacre na imã amji jarĕn, ne amji pê akà jipôn, ne acwÿr.

Cwÿrjapê ca ha nee ampo kĕn atajê cunea pupun nare.

Wa ha nee gõ krí to hamre nare, ca ha ahnaa jũ caxuw ty, wa ha cormã krí ita jipej” — hajÿr.

Mã hacpÿa mã pahhi Joxij wÿr cute me Pahpãm jũ-jarĕn ita to me amji jaxàr, ne me cumã harĕn, mã cute impar. Ne cute mehkwy to cuprôn, ne hũpar xà ita to me cumã hahkre.

Mã cute me hahkre pej ne krí cunea kôt ame ipicràn, ne kam cute ame pahpãm cahàc krekà jürkwa atajê cunea to me hamre partu. Ne quêt cute amji kam hapac xà cunea to Pahpãm to me amji mã ihhimpej, ne catyt kam ihkôt me ipa.

Pahhi Joxap jarĕn xà

2 Me HÛjarĕn Xà 20.1-30

20 Pê harã mã hĭkjê pê Juta jõ pjê kam Joxap pê Xarômãw xwÿ tàmxwÿ tàmxwÿ nõ, ne cupê Juta catêjê jõ pahhi. Ne ajco catyt kam Pahpãm jarkwa kôt ipa, na pê Pahpãm ajco ihtehcajpar to ipa.

Ne amcro nõ na Mowap catêjê jõ krãhtare me, Amonit catêjê jõ krãhtare me, Etõ catêjê te, ma pahhi Joxap me, Juta catêjê wÿr me harkwa kujahêc, ne me cumã:

— Wa ha me gapu ne me ato hamre tu — hajÿr.

2 Mã pahhi Joxap wÿr hanea ne cute me harĕn catêjê cator, ne me cumã:

— Ihmat rũm ajpĕn Cõxwatycti jĭkjê pĭn krãhtare jãhtõa ne me cator, Xiri jõ pjê me, Geti jõ cõ kôt pjê ata pĭn — hajÿr.

3 Mã Joxap te me harĕn par, mã cupê amji jahkre kêatre, ne cumã pa. Mã cute amji tehcajpar xà na Pahpãm wÿr na amji kam hapac, ne Juta catêjê cunea mã harĕn to hajÿr he:

— Cu ha me pajàpàn nare kam, Pahpãm mã me pahcakôc ne cumã me amji cajrĕn, me pamã amji kĭn nare kam — hajÿr. **4** Mã cute me kam hapac ne Juta jõ pjê kam krí cunea pĭn, Krĭpinkrĕn wÿr me cator, cute me cahê na me ipijacri xà ata kam me Pahpãm te mehtehcajpar xà na hàhwÿr prãmte.

5 Mã Joxap mehcunea jipôc ri hãm, cute Pahpãm to me amji kam hapac xà jürkwa tuw kam, ne Pahpãm mã ihcakôc to:

6 — Me ijõ Pahhiti pê me iquêtjê jõ Pahpãm!

He apyxit peaj ne cõjkwa kam apê Pahhiti,

ne apê pjê cunea kam Pahhiti.

Ne apê pjê cunea kam pahhi catêjê cunea jõ Pahhiti.

Ne ampeaj kam acarôt tÿj, ne ampeaj kam quêt atÿj.

Ne jũm quê ato cõ? Hamreare!

7 Me ijõ Pahpãm, pom pê ca pjê ita kam mehkří catêjê to me akwÿ mã to hamre ita?

Ne akwÿ nõ Aprãw tàmxwÿ catêjê mã, pê ca pjê ita to awjahkre,

mãr quê me to hõ tekjê rohnÿtti mã.

8 Ne me akwÿ itajê mehkří, ne cute gaprÿ to me cati prãmte

me amã gürkwa ita xãm,

ne me amã amji jarĕn to hajÿr he:

9 “Quê ha me ikam me ixà nõ cato,

nare, quê ha me ipijapu xà nõ cato,

nare, prãm cato,

wa ha itÿj gürkwa ita kam me acuna mã me icuhhê,

ne ate itehcajpar xà na me ana ahwÿ,

ca ha atÿj me ikampa ne me ikĕn xà nõ itajê pê me ipytà” hajÿr.

10 Ne ita caxuw, pjê incrê pĭn ajpĕn cute me ito hamre xà caxuw

me mör na, ca me hõmpu.

Ne pjê incrê atajêa inquêtjê tĕte,

pê came iquêtjê jiprõ,

pê nee me hipej nare,

Ejit jõ pjê pĭn me cator xà ata kam,

ne quêt cama me ipu na me ajrõ.

11 Ne hamre, ita kam mehtãmxwÿ te me iquêtjê kĭnte,

me ijipej to prãm to ajpĕn me mör na, ca me hõmpu he!

Hamre, ramã cute, pom ate me imã pjê jör ita tĕte me icator xàa caxuw ri, ajpĕn me mõ.

12 Me ijõ Pahpãm, ca ha me hõmpu ne me to amji kampa,

ne me imã jũ mã me to, ne me cupê me ipytà.

Ampo na? Me ipê krãhtare pahtÿjti ita pê jũ mã ite me amji ton,

ne me cupê me amji pytãr xà jahkre kêatre cakrõ,

wa itÿj apê me ijô Pahhiti te me cupê me ipytâr na me gikaj — hajÿr.

¹³ Ne Juta jô pjê cunea pîn me hÛmre cunea me, meh-prô me, mehkra mea mã cute me cuprôn, ne Pahpãm cuna mã me hãm.

¹⁴ Mã Pahhiti Carô Pejti ata mehcote na jÛm xÛmre nõ japyrÿ te Jajiwer ata mã amji jôr, mã cute mehcunea mã harkwa kôt hÛjarĒn to hajÿr he:

¹⁵ — Me acunea me apê Juta catêjê me, KrîpinkrĒn catêjê me, pahhi Joxap me, me acunea me ikampa! Pahpãm pê Pahhiti te me pamã hÛjarĒn to hajÿr he:

“Nee ca ame pa nare!

Ne nee krãhtare jãhtôa to hàhtô ne carôt tÿjti ita jarĒn par xà to ame amji mã me apec xà crÿn nare!

He me ipijapu xà ita, nee cupê me atekjê nare, ne cupê ipê me Apãm Cati tekjê, wa ha pa me to amji pytà.

¹⁶ “Ne apê quê ha Xic jô caprÛm jatuj xà kôt, me awÿr kàj mã me mō,

ca ha ajpĕan kam, ajpĕn wÿr ahpar mã me mō, ne Xeruwew jô pō jahkà kam me ajpĕn cajpa, ne cama me ajpĕn to xa.

¹⁷ Ne nee ame apijapu nare, ca ha cama ame acuhhê ne ite me apytâr xà ita na, me ipupu.

Me apê Juta catêjê me,
me apê KrîpinkrĒn catêjê me,
nee ca ame hÛpa nare, ne nee ca ame apeacre nare!
Ca ha apê na curi me hÿrmã me mō,
wa ha hanea ne ipê me gō Pahhiti me acahê na me hÿrmã mō” hane — hajÿr.

¹⁸ Mã pahhi Joxap jÛpar, ne Pahpãm to cati prãmte, pjê kam ihkôn krã to ihpÿm. Mã Juta catêjê me, KrîpinkrĒn catêjê te me hajÿar, ne ame Pahpãm kîn to amji kampa. ¹⁹ Jirô pê mã ri Rewi catêjê pê Cowat me Côre tàmxwÿ tàmxwÿ atajê te me amji to caprãr ne me xa, cute me Ixaher jô Pahpãm pê me hō Pahhiti cati na ame harĒn prãmte, ne kypê me cumã menrcrer nare, cute me harĒn xàa to.

²⁰ Mã apê mã iràràtia na, ma Juta jô krãhtare me hÿr-mã pō ata wÿr me mō, mã pry kôt Joxap jãhhuc ne cute me japackre to:

— Me ikampa, me apê Juta catêjê me, me apê KrîpinkrĒn catêjê, Pahhiti pê me pajô Pahpãm to, ca amji mã me ahimpej kam me to acrà tu ne, quê ha taa me apytà! Ne Pahpãm jarkwa to mehcajê catêjê te me amji mã me ahimpej ne, quê ha ampo cunea me pamã impej pit! — hajÿr.

²¹ Ne cute ame hō pahhi catêjê cunea me, me ajpĕn par jirô pê mã ri, Pahpãm mã menrcrer kam cute me to ihtĕm, ne ma me cumã increr to mō, ne menrcrer xà kôt me to cahi rĒn to mō. Mã mam menrcrer catêjê menrcrer to mō. Ne cute me to increr catêjê kà itajê ajteare mã, ne Pahpãm to amji kam me hapac xà cax-uw pit mã impej, mã me cumã increr to:

“Hōtpê ampeaj kam,
me amã ikîn rohnÿtti mã
pyrĒn me ijakry!”

to hajÿr to mōr kwÿa kam, cute me Pahpãm mã amji jarĒn, pry kôt.

²² Ne cute me Pahpãm mã menrcrer kam ihtĕm, me ajkaam mã Pahpãm te Amonit me, Mowap me, Etô jô krãhtare te ame ipijapu na me ton. Mã cutea me ajpĕn kam ihtĕm, ne me cutea me amji jipej tu, ne me amji to hamre tu. ²³ Mã Amonit catêjê me, Mowap catêjê te Etô catêjê kam mehtĕm ne cute me hipej tu. Jirô pê mã ri cute ajpĕn kam menrcryc ne me ajpĕn kam ihtĕm, ne cute me ajpĕn jipej tu!

²⁴ Mã ma Juta catêjê hawĕnti nõ kàa na me hàpir, ne ahpar mã me irĭt, ne cute me pjê kam mehtyc pit pupun, mã pjê kam mehtyc pit ame hikwa. Ne nee krãhtare pê me curê xwÿn catêjê atajê nõ cator ne ihtĭr nare, ne cute amjia kôt me amji jipej tu. ²⁵ Mã pahhi Joxap na kjêjê me hÿrmã me cator, ne cute me krãhtare tyc catêjê pê me hàhcukrêj cunea to me cutor tu, ne me to ihcuhkwÿr he. Ne cute me ampo na hĭ jãh-wÿrti atajê to ame amji jahêr partu. Ne cute me ampo itajê to me ipa to me amcro to incrê! ²⁶ Ne me ahna amcro te cwat kam ri Perac jô caprÛm kam cute me cuprôn, ne Pahpãm catihti na me cumã harĒn. Cwÿr-japê ri cormã ita kam caprÛm ita japyrÿ te “Pahpãm to me cati xà jô caprÛm”.

²⁷ Ne ma cute me amji jaxàr, KrîpinkrĒn wÿr, mã Joxap mehkwy mã mam mō, ne ampeaj kam me cumã amji kîn. Ampo na? Pahpãm te me curê xwÿn pê hÛtâr xà impejti ata to me hÛtâr na ri. ²⁸ Ne me cahi rĒn to mō, ne KrîpinkrĒn mã me hàr, mã mehkôt me hàkôr xà japàre me, hōhhi me pàtwÿ to me hàkôr to me mō, ne me catyatre na Pahpãm to cute me amji japackre xà jÛrkwa wÿr me mō.

²⁹ Mã pjê kwÿ jô pahhi catêjê te me Ixaher catêjê jô Pahpãm te mentĕte me curê xwÿn catêjê cunea jipej na me harĒn par, ne ampeaj kam me cumã Pahpãm cupa. ³⁰ Hō, ita na pê Pahpãm Joxap himpej xà carĭcti na to, mã kam ahcarĭcti. Pê nee hipêr me curê xwÿn nõ me kam ihtĕm nare. Hamre.

EXTRA

Ÿhÿ, pê Juta catêjê ajmâr mehcunea me hõ pjê pê me to cutor tu, ne curia Papirõn jõ pjê kam mehkří. Pê mehc-ahhur menchrêre ne me hõ pjê pê mam Canãn jõ pjê pê Ixaher jõ pjê me, Juta jõ pjê kam mehkří, ne jũ mã me, ne me hamre, ne me acto.

Pê pjê ata kam mehkří itajê ihtÿj mehkří, ne me ipicamên to me mõ. Pê Papirõn jõ pjê kam kríxàre catêjê ajco me hõ pahpãm cahàc krekà itajê kôt pit mã ame amji kampa. Pê Juta catêjê ma ame pahpãm cahàc krekà itajê kôt me amji kam hapac caca. Pê mam pahpãm cahàc krekà kôt me amji kampa, jahpan xà na mehkên mã me axà, ata to ri ma me amji japackre, ne ita caxuw quêt cõjkwa kam Pahpãm tĩar rohnÿtti mã ata to me amji mã mehhimpej to me ipa.

Ne me ahna caku te xetênta jirõ pê mã ri, hacpÿa mã Papirõn jõ pjê pĩn me hõ pjê pê Canãn wÿr mehkwy te amji jaxàr. Ne Extra me Nemij pê me to ihhimpej catêjê, ne me cupê me cumã Pahpãm jarkwa to mehcahôc catêjê. Ne me hÿrmã me cator, ne cute hacpÿa mã me Pahpãm to amji kam me hapac xà jũrkwa xãm, ne hanea ne hacpÿa mã Krĩpinkrên tête me kwÿc to intuw. Ne cute ihcunea na me hõ kàhhôc kam mehhôc, na ri cute me ihkàhhôc ata mã haprÿ to, (Extra), me (Nemij).

Ne caku atajê kam hanea ne mehkwyà kwÿ te hacpÿ ne me amji jaxàr, ne Krĩpinkrên to mentuw. Mã Pahpãm jarkwa to mehcahôc catêjê incrê itajê pê Agew, me Xacarij me, Maraquij itajê ihtÿj me hãpên xà na me cumã apô. Ne hanea ne catyt kam Pahpãm kôt ame ipa na me cumã apô. Ne me hõ kàhhôc japrÿ te (Agew) me, (Xacarij) me, (Maraquij). Ne ita caxuw Extra jũjarên na, hõ kàhhôc kwÿ mã he.

Pê Pahpãm hacpÿa mã me hõ pjê pê Canãn wÿr, Juta catêjê kujate

Extra 1-2

Pê me ahna caku xetênta jirõ pê mã ri ramã mam itajê mehwej partu, ne ramã mehtyc to mõ ne menchrêre. Ne por pê Juta jõ pjê me Krĩpinkrên pĩn mentuwre na me to cato atajê ri cormã ame ipa, ne hanea ne ramã amehwej. Ne mehtãmxwÿ ri hõtpê ampeaj kam me hàhtõ.

Mã ramã Pahpãm mã Juta catêjê caprĩ, mã cute Papirõn jõ pjê kam hipêr pahhi tuw japrÿ te Xiro ata mã, cute amji kam hapac xà nõ ita ton. Mã hanea ne cumã Juta catêjê caprĩ, mã cute me hõ pahhi catêjê to cuprõn, ne mehcukij, ne me cumã:

— Xà ca ajkĩ atÿj jũmjê hacpÿa mã me gõ pjê pê Juta jõ pjê wÿr me amji jaxàr to prãm? Quê ihhêaj to me akwÿ mã hacpÿa mã me amji jaxàr to prãm na, quê ha hapacta ne me amji jaxà, ne hacpÿa mã me gõ krĩ pê Krĩpinkrên ata to mentuw, ne mam cati mã hacpÿa mã kam me Pahpãm mã hũrkwa nõ xãm — hajÿr.

Mã Juta catêjê jõ pahhi kwÿ te cumã:

— Ÿhÿ, pahhi Xiro, me ijãhtõa wa me amji jaxàr prãm — hajÿr. Pê caku ata kam me hàhtõa ne Papirõn jõ pjê pĩn me amji jaxà, me hõ pjê wÿr, ne me krĩ xãm, ne kam mehkří.

Pê Extra Juta jõ pjê wÿr amji jaxà

Extra 7-10

Pê caku atajê kam Papirõn jõ pjê kam, me hũmre nõ ita japrÿ pê Extra ita ihkrĩ, ne cupê ihkàhhôc ton catê,

ne cupê me cumã ampo to hahkre catê. Ne cumã Mo-je xwÿ jõ kàhhôc kwÿ mã ampeaj ne hahkre pej.

Mã Juta catêjê jõ pahhi kwÿ jãhhuc atajê te mehkôt ihkujahêc, Canãn jõ pjê pê Juta jõ pjê wÿr, quê me ahna awcapi, jũ mã mõrmõ cute me. Ne hacpÿa ne amji jahpan xà Extra te me hõmpun xà atajê na, pahhi kwÿ mã ihkàhhôc nõ to, ne kujate.

Mã ma mehkôt mõ ne curi cator, ne cute krĩ na hũcapi, mã ramã krĩ te amji jipêj ne xa. Ne nee cormã kam, cute me Pahpãm to me amji kam hapac xà jũrkwa to imej par nare, mã ahna ihcuhê. Cwÿrjapê ri Pahpãm jarkwa kôt Agew te me cumã, ne me cumã:

“Me gõ krĩ to mempej jicu, ne mam me Pahpãm jũrkwa to mempej! Jirõ pê ca ha cormã ame gũrkwa to mempej!” hajÿr.

Mã hanea ne Extra te Juta catêjê xũmre te ampo kwÿj pê Pahpãm jahkre kêatre atajê me, ame hikwa na me hõmpun. Na ri Pahpãm jarkwa kôt me cumã:

“Ampo kwÿj itajê me, me gikwa to hicu, ne me cumã hikra! Ampo na? Ca hame hane, quê ha ihtÿj Pahpãm kaj na me amã ampo kêanre to hahkre to me ipa” hajÿr.

Extra jõ kàhhôc, me ho pahhi catêjê wÿr

Ne cute me ahna ihhôc par, ne ma hacpÿ mã, Papirõn jõ pjê kam Juta catêjê jõ pahhi kwÿ jãhhuc, ne ame ipa atajê mã, cute ihkujahêc. Ne cute ihkàhhôc kam harkwa to hajÿr he:

“Ÿhÿ, me ijõ pahhi, wa ita ri Juta jõ pjê kam icator, mã Juta catêjê pê pahhi kwÿ iwÿr me mõ, ne cute me hàhtõa to imã hÿjarên, ne me imã:

“Me pahkwÿa kwÿ jàhtõa pê ihhêj rÿm me cupê Juta catêjê nare atajê pyrãac, ne ihtÿj mehkêanre ton to me ipa. Ne mehkwyã Pahpãm jÿrkwa to me hàpên cakrõ, cormã mehkên ton to me ipa. Ne pê ramã me Pahpãm me pahkwÿa kwÿ te ampo kra cahãj me, ame hikwa tète me cumã cakrõ, mã cormã ihtÿj hãn ne ampo kwÿj me, ame hikwa. Mã hanea ne me cupê pahhi catêjê ihtÿj me ita to’ hajÿr. Hõhõ, cute me imã me pahkwÿ jarên to hajÿr. Wa Pahpãm cuna mã ipahàm xàhte ikõn krã na ijÿr, ne ite cumã ijarkwa to:

‘Me ijõ Inxÿ Cati,
ampeaj kam ri me ikêan to me ikên,
me ikên xà ita jÿ na ipahàmam to ipahàm.
Pê ramã rÿ pëa mã garkwa to mehcakõc catêjê me imã awjarê.
Me ikên te ramã ihhêj ne me ijõ pjê ita tÿam to ihtÿm.
Pê ca garkwa to:
“Ca nee ajteare mã ampo kwÿj me ame gikwa nare,
ne me akwÿa cahãj me, ame gikwa.
Ne nee hanea ne ita na ame akra jamãr nare,
ne nee cute hajÿr xà ita na ame jÿm tehcajpar nare”
hajÿr cakrõ,
wa ite me garkwa itajê impar pej nare’ hajÿr.

Wa cormã ipec xàhte Pahpãm to me amji kam hapac xà jÿrkwa cuna mã ijõ põrpo ne nõ, ne cormã icwÿar kam Pahpãm mã me ikên xà ita to icakõac kam, mã me hÿmre me, me cahãj me, me ahkrare me, me

hàhtõa ne me cator. Ne cute me cuprõn ne ihtÿj icahê na ame amrã, cute me amji kên xà kèanre ata pupun ne. Mã mehnõa xÿmre ita te imã harkwa to:

“Ÿhÿ, Pahpãm cuna mã ame pahkên crire nare. Ampo na? Cu pahtÿj ame cupê me pahkwÿ nare atajê cahãj me, ame pajikwa. Ne cu cormã pahtÿj me to. Ampo na? He cu me pahte Pahpãm kam mare mã me ajpên par, me pahte pyjê itajê me, mehkra itajê mã me hikran, ne mehkujahêc na me pamã harkwa.

“Hã, kepê cu ita caxuw Pahpãm jarkwa kõt ame amji ton to me papa nare, ne por quêt cormã Pahpãm jarkwa kõt me pajõ pahhi ame ipa atajê kampa. Ne Extra, caa ca ha amji to ihtÿj, ne ite me ampo ton xà ata na me imã awjahkre, wa ha itÿj me to” hajÿr.

Wa ixãm ne ite me cupê pahhi catêjê cunea mã ijarkwa hyr. Ne ite Pahpãm to me amji kam hapac xà jÿrkwa kam me hàpên catêjê me, me hàhtõti atajê cunea cukij, ne me cumã:

“Ca ha me acunea, pom hÿmre te harkwa to ihcakõc xà ita na me amji capa?” hajÿr.

Mã mehcunea te ita na me amji caxàr. Wa curia Pahpãm to me amji kam hapac xà jÿrkwa kam ijàhhuc, ne apu ipijacri to mõ, ne nee ite kwÿr nõ krêr nare, ne nee ikõm nare. Ampo na? He me ikwÿ kên xà atajê jÿ na ipec xàhte, wa apu ipijacri to mõ. Mã mehcunea te me imã harkwa to:

“Cu me pahcunea te Pahpãm cuna mã me pahkên xà ton, cwÿrjapê cu ha pahtÿj ita caxuw me kampa” hajÿr. Hõhõ, wa ite me kam ijapac to hajÿr, ne me amã ahna ihhõc, ne me amã ihkujahêc” hajÿr. Hamre.

JO

Pê Pahpām Jo capi na Xatanaj jamā

Jo 1.1-22; 2.1-10

Ne pê me ahna caku jàhtôa jirô pê mã ri hūmre nõ ita japry te Jo, ne pjê nõa kam ihkrĩ. Ne cupê hūmre krã impejti, ne ampeaj kam cumã Pahpām kĩn, ne nee ajco apu ihkên ton to ipa nare, ne quêt catyt kam ajco ipa. Pê cumã ihkra xūmre xet, ne cahãj incrê, ne hakràaj to hakràj. Ne pê ampeaj kam ihparxare to hakràj cati, me hūkjê kwý jirôa pê.

Pê mehkra ajco me amji mã amji kĩn to, ne ajco mehkjêjê kwý na ahwý, hūrkwa wýr. Pê ajco me cuprô, ne me apà, ne ajco me ikô, me hõ amji kĩn ata na. Ne pê me hõ amji kĩn ita na ajco jũ mã amji to me amcro to. Ne ajco mehkra me amji kĩn itajê jicu, pê Jo mehkra na ahwý, ne Pahpām mã mehcajrên. Ne ajco iràrà na ihkrĩ, ne Pahpām mã ampo pry to capa, mehkra kên xà itajê jahpan xà na. Ampo na? Pê ajco taa amji mã:

— Quê ihhêaj to me ikra Pahpām mã mehkên xà nõ to, ne nee me hĩ cunea kam me cumã Pahpām kĩn nare, cwýrjapê wa ha pa, me hahpan xà na, Pahpām mã ampo pry to capa — hane. Hõhõ, pê Jo ajco ita ton to hajýr to ihcuhhê.

Mã amcro nõ na Pahpām te me pahcurê xwýn pê Xatanaj ita cukij ne cumã:

— Xà ca ajkĩ atýj me imã hàpên catê pê Jo ata pupu? Pjê kam me hūmre kwý jirôa pê cupê hūmre impejti, ne ihtýj amji mã icupa, ne ma apu ampo kên cunea ca-ca — hajýr.

Mã me pahcurê xwýn Pahpām mã:

— Ca gõtpe ma hamã, ne ma hūrkwa jamã, ne ma cumã ampo atajê cunea jamã, na ri cumã akĩn. Ca cupê ampo itajê cunea to pôj, ne cupê to hamre, quê ha hipêr cumã akĩn nare. Quê ha ihtýj akuc ri acrôn xà kēanre nõ to acrô — hane.

Mã Pahpām cumã:

— Xatanaj, hã gapacta ne cupê hakràj itajê cunea to kên, ne hĩ ca nee caxun nare — hane.

Jirô pê mã ri me pahcurê xwýn te Jo to kên prãmte hýrmã tẽ. Mã ahna ahtũm nare mã Jo kra te hipêr me hūrkwa kam, amji mã me amji kĩn nõ ton. Mã pea Jo jũrkwa ri jũm jũjarên catê ita hýrmã cator, ne cute cumã hũjarên to:

— Wa ame gõ pryti to pur kam pjê to apkjê, mã cawrô cahàcre ihtýj apu ipa. Mã Xapêw catêjê kwý cator, ne cute me amã hàpên catêjê jipej, ne ma me ampo itajê cunea to mõi. Wa ipyxit peaj ne itĩr ne awýr icator — hajýr.

Ne cormã apu hũjarên kwýa kam, mã ramã ihnõ ita tẽ, ne cute Jo mã hũjarên to:

— Cõjkwa pĩn cuhy pým, ne cute gõ carà cahàcti me, cute me hamãr catêjê cunea to caxàr. Wa ipyxit peaj ne itĩr ne awýr icator — hajýr.

Ne cormã hũjarên kwýa kam, mã ita xwýjê cator ne cumã:

— Cartêj catêjê kwý cator, ne cute me amã hàpên catêjê cunea jipej, wapo xwahhihti to, ne ma me gõ cawrô kô jarôti pê camer atajê to me cutor tu. Wa ipyxit peaj ne itĩr ne awýr icator — hane.

Ne cormã apu hũjarên kwýa kam, mã ita xwýjê cator, ne cumã:

— Me akra te me hūrkwa kam amji mã me amji kĩn ton, ne cormã ame ahna akrua kam, mã kôc pahtýjti ita cator, ne cute ikre kwĩn. Mã me kam ihpým, ne cute me hipej tu — hane.

Pê Jo nee Pahpām kên jarên nare

Mã Jo jũpar par, ne ihtýj Pahpām to amji japackre, ne hãm ne xa. Ne cute amji pê ihkà jipôn, ne to ihkĩ cunea mên, cumã amji kĩn nõ xàhte. Ne cute harkwa to:

— Pê wa icakrô ipým, ne wa ha icakrô ty. Me ijõ Pahhiti, ca ate imã ampo atajê cunea jõr, ne hacpýa mã ate ipê ihcunea incwýr. Ne ijõ Inxũ Cati, imãa, cormã apejti — hajýr.

Ne pê Jo cute amji kam hapac xà ita kam, nee Pahpãm cuna mã ihkên xà nõ ton nare, ne nee pê Pahpãm cuna mã ihcakôc xà kên nõ to ihcakôc kên nare.

Jirô pê mã ri Xatanaj te hipêr Pahpãm na hàhwýr, cute hanea ne Jo jĩ to kên prãmte. Mã Pahpãm te ahna to tojnõ.

Mã ahna ahtũm nare, mã Jo jĩ cunea kam ihkà xêt, ne ihrôt ne ampeaj kam cumã hà. Na pê amji pupun xà kēanre to amji pupun cakrô, pê nee Pahpãm cuna mã ihcakôc kên nõ to ihcakôc nare.

Pê Pahpām hacpýa mã Jo to impej

Jo 3-41

Mã Jo jõ ikwý nõ catêjê te ahna me cuprôn, cute mehtehcajpar prãmte. Ne xãmte nee ihtehcajpar prãmte ahna cute me cuprôn nare, ne cama apu ihkên mã me mên prãm, ne me cumã:

— Jo, me ikampa. Akēanre, na ri Pahpãm te akên jahpan xà na apu ato kēanre. Jũ wýr quê Pahpãm jũm pejti to kên — hajýr. Ihtýj cute ampo kên ton na amehcãmji, na pê ame cumãn to hane.

Mã tee Jo me cumã cute ampo kên ton nare na amji jarê. Mã hõ ikwỳ nõ atajê te hapackrea to jũ mã me amcro jàhtô ton. Mã Jo te me cupê amji pytâr prãmte hajÿar, ne me cumã ampo jàhtôa jarên.

Jirô pê mã ri Pahpãm apu Jo jõ ikwỳ nõ catêjê kam incryc, ne me cumã:

— Me apê amji jahkre kêatre, na ca ame Jo to acakôc kêanre to hane. Ne Jo ri me girôa pê impej. Ne cama Jo na me ahwỳ, quê imã me acajrên, wa me ato impejti ne — hajÿr. Mã Jo te Pahpãm mã mehwỳ cajrên, quê nee me kam incryc nare.

Mã Pahpãm te Jo kam hapac, ne cumã hõ ikwỳ nõ te to kên xà ita to tojnõ. Ne hanea ne cute Jo mã mam cumã ampo itajê jirôa pê hõr to ipijakrut partu. Mã hanea ne Jo kjêjê xũmre me, mehkjêjê cahãj me, me hõ ikwỳ nõ catêjê me, cute ame cumã ampo jõr xà atajê to hÿrmã me mõi. Ne ame Jo caprĩ, cute amji pupun xà kêanre ata cwÿrjapê.

Mã Pahpãm te Jo mã ampej, ne to hakràj catia to cati, ne hipêr cumã ihkra xũmre to xet, ne ihkra cahãj to incrê, ne ihkra cahãj itajê ri, pjê cunea kam mempej atajê jirôa pê mempej. Pê Jo caku jàhtôa kam amji to ajpa, ne ajco mehtãmwxwỳ pupu. Hamre.

MENCRER XÀ

Ýhÿ, pahhi pê Xawrô tyc jakàn pê ri Tawi pê Ixaher catêjê jô pahhi. Ne pê mam cupê harã catêjê jô pahhi, ne hanea ne ita caxuw cupê kÿj catêjê jô pahhi. Ne pê pahhi cunea jirôa pê Tawi mã Pahpãm jahkre pej, na pê ajco Pahpãm mã ihcakôc, ne cumã menrcer xà na ihhòc. Na ri hõ kàhhòc ita japyrÿ te (Menrcer Xà). Ne ita caxuw increr xà kwÿ itajê mã he.

Ampeaj kam me pajakry xà na menrcer

1 Ýhÿ me ikwÿ, ca hãn ne me icukij to:
 “Jũ mã cu ajte ame, ne ame pajakryti,
 ne me pamã amji kĩnti ne?” hane.
 Ne ite me gapackre xà ita na, me ikampa he:
 Ca ha nee mehkrã kên catêjê te me pajapackre xà na,
 me amji to pôj nare.
 Ne nee mehkrã kên catêjê te amji kam hapac xà kôt,
 me amji ton nare.
 Ne nee hanea ne,
 cute me Pahpãm to me amji japackre prãm nare,
 mã cama me ahna xwÿ xi atajê kwÿ mã me acjêj nare.
 Ampo na?
 Ca ha ate me krã kên kôt me ampo itajê ton to me
 apa na,
 ca ha nee jũ caxuw me amã amji kĩnti nare.

2 Ca ha quêt me hane he:
 Ca ha atÿj me amã amji kĩaan kam,
 me amã ihkàhhòc cahyt prãm kam,
 me Pahpãm jarkwa pejti ita cahyt, ne ihkòat me apa.
 Ne amcro me caxwa cunea kam,
 ca ha Pahpãm jarkwa cupahti jô kàhhòc ita cahyt,
 ne ampeaj kam ihkòt me hakop to me apa.
 Ne ate ihkòt hakop xà ata kam,
 ca ha atÿj me gakry, ne me amã amji kĩnti kam me
 apa.

3 Ne ca ha me apê cô tohkà na pĩxô pàr amji to ajpa
 ata pyrãac.

Por pĩxô pàr hô xà jô amcroa kam hãn ne hô,
 ne ampeaj kam ihrôt,
 ne nee jũ caxuw ihhò incrà nare.
 Ata jĩkjê na, ca ha Pahpãm jarkwa cahyt ne ihkòt
 hakop,
 ne catyt kam ihkòt apa na,
 ca ha ampo cunea to me apê ata,
 quêt ha ihtÿj ahnaa me amã,
 ne nee jũ caxuw me apê ihkòt hamre nare.

4 Nãmri ca ha ate ma ame amji pê Pahpãm jarkwa
 curê na,
 ca ha me apê mehkrã kên catêjê atajê pyrãac,
 ne nee me apê pĩxô pàr pejti ata pyrãac nare.

Ampo na? He mehkrã kên atajê pê arÿjhy krekà
 pyrãac,

mã ihtÿj kôc mehcarê.

5 Jĩkjê na, quêt ha Pahpãm mehkrã kên atajê kên mã
 me curê,

ne quêt amji mã me to hõ tekjê catêjê juwahi.

6 Quêt ha ihtÿj catyt kam me ipa catêjê atajê jamã,
 ne mehken pê me hÿtà.

Ne mehkrã kên catêjê, quêt ha mehkiante ame to
 kèanre ne,
 quêt ha me acto.

Pahpãm te mehkwy mã pahhi capi ne hãm na menrcer

2 Ampo na mã amji caprÿ to krĩxàre kôt
 ame còjkwa kam Pahhiti pê Pahpãm kam men-
 cryc,

ne cute ame hapu prãmte ame cuprô?

Jũ wÿr quêt ame amji mã hamã.

2 Ne ampo na mã me cupê mehcahkrit atajê jô pahhi
 kwÿ,

hãn ne Pahhiti te me cumã hõ pahhi xãm ata cuna
 mã ame cuprô,

ne ahna ame ajpên pa?

Ne me hõ pahhi catêjê me amji to cuprô,

ne tee ahna me ajpên cukij to:

“Jũ mã cu ha ajte me,

ne cute me pahto ihhimpej xà ita pê me pahcato?”

hane.

3 Ne amji caprÿ to me amji mã:

“Jũ wÿr cu ha me harkwa kôt ame papa!

Ne nee quêt ha me cupê me pajô pahhi nare!

Ne nee cu ha me pahnô amji mã me hÿpa to ame pa-
 pa nare!

Quêt ha pea cute me pahto ihhimpej xà ita caxuw

me cupê me carôt hamre,

na cu ha pahtÿj ame papa” hane.

4 Mã còjkwa kam Pahhiti,

cute me to ihhimpej xà krĩ xà impejti ata kam jÿ,

ne nee me harkwa ita kam apu amji to hàptô nare,

ne cama ame ahna acxa, ne ame ahna xwÿ, ne amji
 mã:

“Me cumã ipar prãm nare catêjê amji caprÿ to ame
 ijÿhhyr prãm,

ne jũ wÿr quêt me ito cô, ne me ijÿhta” hane.

5-6 Pahhiti te me cumã me hõ pahhi xãm,
mã mehwỳ ma amehcaca atajê kam ri incryac to incryc.

Na quê ha ihtỳj jũ caxuw incryac kam, ame cumãn kam tẽ,

ne me cumã:

“He itea wa amji mã me gõ pahhi ata capi,
cupê pjê cunea kam me gõ pahhi xà caxuw!

Ne quê ha ihtỳj Xijãw jõ kẽn kam ihkrĩ xà ata kam ihkrĩ,

quê ha pjê cunea kam mehcunea me kampa!” hane.

Quê ha me hũpar nare atajê me kampa,
ne ampeaj kam me cumã hũpaa to hũpa,
ne mehkřã acto tu ne.

7 Mã Pahhiti te pjê cunea caxuw,
me cumã me hõ pahhi xãm ata te mehwỳ mã amji jarẽn to:

“Wa ha Pahhiti te ito hũjarẽn xà ata kõt me amã harẽ.

He cute cumã:

‘Apê ikra, ne ita caxuw ipê Apãm Cati.

8 Na ca ha ate mehcunea to ahimpej xà caxuw ina ahwỳ.

Wa ha amã krĩxàre cunea jahkre ne amã cugõ,
ca ha me to ahimpej to apa, quê ha me akampa.

9 Ne ca ha acarõt tỳjti ita to me to ahimpej to ihtỳaj to apa.

Ne me hũpar nare atajê, ca ha me to pjê te pot pyrãac,

ne cute me amji kam me hapac xà kẽn mea mã,
me kam acryac kam me gãn partu’ hane”.

Hõ, pê Pahhiti me to hũjarẽn to hane.

10 Cwỳrjapê ca ha me apê pjê jõ pahhi catêjê,
me amji to akrã kre japêa ne me ikampa!
Ne me apê me to ahimpej catêjê cunea, ajco me ikam gapac peaj ne!

11 Na ca ha amji mã me Pahhiti cupa to kryjre nare.

Ne ate amji mã hũpahti na cute gahkre pej prãmte,
ca ha cuna mã akõn krã na jỹ, ne cumã amji jarẽn to:

“Wa ha ite amji kam ijapac xà cunea kam,
itỳj ihcunea na akampa” hane.

12 Hõhõ, ca ha ita to hajỹr nare na,
quê ha ihprõt pê akam incryc pyrentu,
ne ihtỳj akẽn catia mã amẽ,
ca ha gamre.

Ne por me amji pytãr prãmte,
Pahhiti wỳr me pra atajê,
quê ha quêt ame hakry.

Me pajirõa pê Pahpãm cati cacrõ, ihtỳj me pahto amji japackre na menrcer

8 Ýhỹ cõjkwa kam Pahhiti, apê me ijõ Pahhiti.
Ne ampeaj kam pjê cunea kam,
mehcunea mã gaprỳ ita catia to cati, ne impeaj to impej!

Apej cati ita pê ihhêj rũm pyt me cõjkwa jãhcujro pyrãac,

ne ampo cunea jirõa pê cati ne impej.

2 Mã mehcunea acatihti ita na ihtỳj me ana cre,
me ahkrare me, mehkà na kjê kryjre atajê mea mã.
Ca ate me acurê xwỳn mã acarõt tỳjti ita to apipẽ,
mãr quê acuna mã amehcuhê catêjê atajê cunea carĩcti na me to,

quê mehcariç.

He ate me cupê amji têtê gãmtdãr,

quê nee jũm, jũ mã aton nare.

3 Wa hãn ne ate cõjkwa ton ita wỳr rĩt,
ne pom pê ca caa putwỳr me caxêre to,
ne ihkrĩ xàa kam ihkrĩ na me to, mã ihkrĩ atajê pupu.

4 Wa ampo itajê pupu ne amji mã:

“Pỳhàpà, he Pahpãm kĩnte me ipê me hũmre pit,
ne taa mã ri quêt ampeaj kam cati.

Ne mẽr ampo na mã,

ma me ito amji japackre ne me ijamã?”

Hõhõ, wa amji mã hane.

5 Pê ca me ijãa na me ito ixũmre.

Ne ate, cute amji mã me icupahti xà to ate me cumãn to hajỹr,

pom quê amji mã me pahhi cupa he.

Ne apyxit peaj ne me ijirõa pê acati.

6 Ne ate, ite ampo cunea to me ihmpej xà na me ixãm.

Ne ate ampo cunea ton itajê to ite me ihmpej,

ne hirõ pê me icuhhê na me iton.

7-8 Atajê pê carà cahãcti hõhti me, pryti me,
hanea ne ahkêt jõ ampo jãprẽ itajê me, pryrejara me,
tep me,

hanea ne, pom cõ kam ampo cunea amji to ajpa itajê

cunea jirõ pê

me icuhhê xà na,

ate me iton.

9 Ýhỹ Pahhiti, apê me ijõ Pahhiti!

Ne ampeaj kam pjê cunea kam mehcunea mã gaprỳ ita catia to cati,

ne impeaj to impej.

Me pahpỳpỳm pêa mã me pahcunea krã kẽnre na menrcer

14 Pom me amji mã:

“Pahpãm nee ite amji kam me ijapac xà na,
me ito amji japackre nare” hane.

Itajê krã nare, ne cute amji kam me hapac xà maj pit.
Ne ihcunea na mehkẽnre.

Ne nee jũm pyxit ne catyt kam ipa nare.

2 Mã cõjkwa kam Pahpãm ihkrĩ ne mehkõpĩ,
ne tee apu jũm krã kreti te catyt kam ipa ata japê,
ne nee cute jũm te to amji kam hapac ata mã cator nare.

3 Mã mehcunea te me pry cupan,

ne ihcunea na mehcunea kêanre,
ne nee mehnõ pyxitre catyt kam ipa nare.
Ne ampeaj kam ri, nee jũm catyt kam ipa nare!

4 Ne Pahpãm te mehkra kên itajê jarên to hajr he:
“Imãa ihcunea na me cupê amji jahkre kêatre!

Ne ihtyj cute amji to me ipijapar xà caxuw,
me ikwý pê me hàhkij to me ipa,
ne nee jũ caxuw ite me to ipijapar xà na,
amji mã me ina hàhwyr nare” hane.

5 Ne cute mehkên ton to me ipa xà ata kam,
quê ha ihtyj jũ caxuw Pahpãm cupate,
amehterteat to amehtertet.

Ampo na?

Pahpãm ihtyj catyt kam harkwa kôt me ipa catêjê
cahê na ipa,
ne ma me hamã.

6 Mehkrã kên catêjê mã,
ampeaj kam catyt kam me ipa atajê me,
me cupê hamreare catêjê atajê cahpêkâr prãm,
mã ihtyj Pahpãm me cupê mempej pytà.

7 Wa ityj Pahpãm mã me ikwý cajrên to hane he:
“Yhỹ, ijõ Pahhiti.

Jamã ne ca, ite me ato amji kam ijapac xà jũrkwa ita
pĩn,

me ijõ pjê cunea kam,
me cupê me ikwý pê Ixaher catêjê te me icurê xwýn
atajê tohjê na,
me itehcajpa” hane.

Yhỹ, quê ha ampeaj kam me pajõ Pahhiti te hacpỹ mã
me pampej pêa mã me papa na me pahon na,
cu ha pahytj hũrên me pajakryti to me cumã cre,
ne ampeaj kam me pamã amji kĩn.

Pahpãm cahê na mehkri catêjê jõ increr

15 Pahhiti, apê me ijõ Pahpãm!
Mêr itajê cunea jipõc ri, jũmjê mã ca ha gark-
wa to:

“Ajpên ijũrkwa wýr me mõ, ne icahê na ame apa?”
hane.

Ne jũmjê mã ca ha garkwa to:

“Ajpên ijõ hàpkajti pê Xijãw ata na me api,
ne kam me akrĩ, ne ito me amji kampa?” hane.

2 Ne cute hajr he,

quê ha jũm ihcunea na catyit kam ipa,
ne hãn ne ihcunea na akam hapac to ipa,
ne ampo pej pit ton to ipa,
ne ampeaj kam caxwãm catia mã, to ihcakõc to ipa
ata,

quê ha ma amã axà.

3 Ne hanea ne nee amehkwý kôt harên hêj xi xà atajê
jarên nare,

ne nee hanea ne mehkwy kên mã me irên prãm nare,
ne nee jũmjê jarên kên cràn to ipa nare ata,
quê ha ma amã axà.

4 Yhỹ ijõ Pahhiti, pom ca ha ma apu jũm kên curê ata,
quê ha hanea ne ma jũm acuxà, apu jũm kên ata
curê.

Ne hanea ne, ihtyj quêt cumã ihcunea na,
catyt kam cute me apar catêjê atajê te amji mã acu-
pahti xà.

Ne quê ha jũm mã cute ampo na, amji to hũjahkre xà
ata kam,

ihkên mã hàr cakrô,

ihytj cormã cute ahna cumã amji ton xà ata na to,
ata quê ha amã axà.

5 Ne hanea ne cute me cumã ampo jõr atajê,

quê ha hacpỹ ne cute hõr xà ata na,

taa pit cwa, ne nee hipy kam ihkwý mên nare.

Ne hanea ne, quê jũm cumã,

cute jũm peiti ata kôt harên kêanre to prãmte, cumã
ampo gõ,

quê ha nee ahna amji caxàr ne ipyr,

ne hahpan xà na jũm peiti ata kên mã mên nare.

Quê ha ma apu ampo jõr xà ata caca.

Yhỹ ijõ Pahhiti, he cute me hajr catêjê,

quê ha nee akrac ri ampo ihcaxun nare.

Ne quê ha quêt catyt kam acahê na ipa rohnýtta mã.

**Pahpãm te ampo cunea ton atajê me pamã catihti na
harên na me pancrer**

19 Yhỹ me ikwý,
wa ha me amã ite Pahpãm to amji kam ijapac
xà na harê.

Cu me cõjkwa pupu ita,

ihytj hirã pê me pamã Pahpãm catia to cati na harê.

Ne Pahpãm te ri kam caxêre me, kam ampo itajê
cunea ton.

2 Ne cu hãn ne amcro cunea kam,

me pyt japõj xà na me hõmpu, ne amji mã me harên
to:

“Ampeaj kam ri Pahpãm mã ihtyj ampo cunea ton xà”
hane.

Ne hanea ne cu caxwari cõjkwa kam me caxêre me,
putwry pupu,

ne hacpỹ ma mã me amji mã:

“Nee Pahpãm mã ampo pyxit ne hahkre pej nare,

ne cumã ampo cunea ton jahkre pej” hane.

3 He nee cõjkwa kam ampo ihkri itajê me pamã hark-
wa to ihcakõc nare,

cakrô cu me rĩt ne me hõmpu atajê kôat,

ramã me pamã Pahpãm catia to cati na hahkre pej.

4 Ne cõjkwa kam ampo peiti catihti itajê te amcro me
caxwa cunea kam,

ramã pjê cunea kam Pahpãm catia to cati na harên

cràn.

Ne nee jũ ri me cupê ita jahkre kêatre nare,

ne mehcunea te me hahkre pej xà.

Ne Pahpãm te cõjkwa kam pyt mã ihkri xà ton, mã
kaam ihkri.

5 Ne pom cu me pajikwa tuw xà wýr,

me pamã amji kïan kam me pahprõ wÿr me pra ita na ri cute,

ne amcro cunea kam, ihkrí xà pê hapôj,
ne cumã amji kïan kam catyatre na ma hàpir to im-
praar to pra.

⁶ Ne me pahnõ imprar tÿjti,
mã ihcuhhê pê cumã ipicahur prãmti, jïkjê na mã,
hãn ne pyt hapôj pê ma cumã cõjkwa cahpêrkàr to
prãam kam,
ihtÿj catyatre na ihcahpêrkà.

Ne jũ wÿr quê jũm apu amji mã hamã,
ne cacro pê amji to amxu, quê nee cacro nare.

⁷ Ýhÿ me ikwÿ, pom wa ite me amã harên ita jïkjê na,
cu nee me pahnõ amji mã hamã, ne Pahpãm pê me
papimxur nare.

Cwÿrjapê cu ha pahtÿj me pajõ Pahhiti jarkwa pejti,
kam ampo kên nare ata kam,
me pajapac na me amji to prãm.

Ne cute me pajapackre xà ata, ihtÿj me pamã me
pahcarôt to intuw.

Ne quê ha me pahnõ pê hahkre kêatre,
quê ha me pajõ Pahhiti te ampeaj kam
me pamã harkwa jirên atajê pictor,
ne ihkôt hamre xà nare atajêa to cumã hahkre,
quê ha hahkre pej,
na cu ha pahtÿj amji mã me to pahhimpej.

⁸ Ne me pajõ Pahhiti te me pamã ampo to hahkre xà
ata ri

quêt catyt kam ihcuhtacti.

Ne pahte me kam pajapac catêjê ri,
ampeaj kam me pajakry.

Ne cute me pajapackre xà kam ampo kên nare itajê,
ihtÿj pahte ampo cunea jahkre pej na me pahto,
cu me hahkre pej.

⁹ Cu ha pahte amji mã Pahhiti cupahti to me papa na,
cu ha kam me pajapac to me papa rohnÿtti mã.
Ne me pajõ Pahhiti ita pê ihhêj xi jahkre kêatre,
ne cumã ampo cunea jahkre pej.

Cwÿrjapê quê ha mehcukij xà jõ amcro kam,
cute jũm pejti na harên to:

“Ampeaj kam jũm ita pej” hane.

Ne hanea ne jũm krã kên ata jarên to:

“Jũm ita krã kêanre” hane.

¹⁰ Ne cu wakÿre prã tepti pê ôr na hĩ jãhwÿrti ata jirõa
pê

me Pahpãm jarkwa na prãm.

Ne pen cacõ jirõa pê ri Pahpãm jarkwa me pahca-
jpuaw.

¹¹ Ýhÿ cõjkwa kam ijõ Pahhiti pê Pahpãm.

Ate ijapackre xà itajê te ipê ampo kên cunea cawpa,
ne ikên mã ixàr cupate, cute intête ito hũjawry tu.

Ne wa itÿj amji mã acupahti to ipa, ca cormã ita jipy,
hahpan xà na ito impej.

¹² Ne wa hãn ne me to ihcupan xà na
me amji jahkre pej nare kam,
me to ihcupa,

ne hãn ne imã garkwa itajê jahkre pej nare kam,
hirõ pê me ipÿpÿm to ipa ata to tojnõ,
ne nee ca hahpan xà na ito kên nare.

¹³ Ne hanea ne ite garkwa jirõ pê ipÿpÿm,
ne garkwa kaj na ampo kên ton prãmti ata na ijamãr,
wa ton nare.

Ne intête ipê amtà,
mãr quê nee ampo kên itajê ito ihhimpej nare.

Ca ha ito hane, wa ha itÿj amã ipej,
ne nee ampo kên pyxitre nõ ton nare,
ca ha ina amji capa.

¹⁴ Ijõ Pahhiti, apê ikên pê itête gãmtàr catê,
na ca atÿj ikên xà cunea pê ipytã.

Imã icakõc xà me,

ite amji kam ijapac xà cunea te acajpuaw na to prãm.

**Tawi te amji pupun xà kêanre kam, Pahpãm te ihtehca-
jpar na hàhwÿr xà na mencrer**

22 Inxũ Cati! Inxũ Cati!

Ampo na mã ahte ate irer to hajÿr?

Wa tee ate itehcajpar xà na icagãgãa kam ana ahwÿ,
ca nee ate ipar nare!

Ca ihhêj ne ipê ampÿa mã apu mõ.

² Wa ihcaprÿ na ite amã icwÿr to pyt,

ne ite amã ijãkjêar to apê,

ca nee ate imã jũ mãn nare.

Cakrõ wa itÿj cormã amã akij,

ne nee wa ha uu ne ijãkjêr jicu nare.

Wa cormã pa xãhte ikrihkrit ita na ikrí,

ne ramã ijõt nare na, ina amcro jãhtõ.

³ Cakrõ, wa itÿj ate apejti,

mehcunea na atetetti to Pahhiti krí xà catihti ata kam
gÿr na,

imã gahkre pej.

Ne Ixaher catêjê cunea acatihti na amji mã me garên
to me ipa.

⁴ Pê me iquêtjê ihtÿj ajco amji mã me ato ihhimpej to
me ipa,

cwÿrjapê pê ca atÿj mehkên pê me to acato.

⁵ Pê ajco me amã akij,

pê ca ajco atÿj mehkên xà atajê pê me to gapõj.

He nee cute ihcaprÿ na amji mã me ato ihhimpej

nare.

⁶ Ne mehkĩnte nee ipê me hũmre te ihkên xà pê amji
pytãr xà ata nare.

Ne ihhêj rũm ipê ampo cõ pyrãac, ne icrire, ne icarõt
peacre.

Mã mehcunea ame ixũn, ne ma amji tête ame icurê.

⁷ Ne ame ipupu atajê cama ame ina xwÿ,

ne ame ina acxa,

ne me imã:

“Gõ Pahhiti ita te ramã amã hikran!

⁸ Pom ca ate gõ Pahhiti to amji mã hajÿr ita?

Měr ampo na mã nee akên mã axàr xà ita pê cute ato
cator nare?

Quê gõ Pahhiti ita mã akĩn na mã,

quê ha rÿ pëa mã atehcajpa,
ne akên mã axàr xà ita pê apytà!" hane.
Hõ, ame ina xwÿ to hane.

9 Ne cute me ijarën to hajÿr cakrô,
pê ca caa, ipÿm pëa mã, ajpën itehcajpar kam tẽ,
ne imã icaca xà gõ, ne icrire naa mã ijamãr kam tẽ,
ne cormã ijamãr to apa.

10 Ne ipÿm pëa mã ri, ipê atekjê,
ne apê ijõ Pahpãm rohnÿtti mã.

11 Ne hamre, wa ramã ikêan kam ipa,
na ca nee irer ne ipê gÿjawry nare.

Ampo na?

He nee aràn xà na

jÿm te itehcajpar xà caxuw hamreare.

12 Ramã me icurê xwÿn catêjê te me ito kên prãmte
me ikrãhtu,
ne me cupê ihhêj rÿm
Paxã jõ pjê jõ pryti xÿmti jàprêhti te apu ikam imprar
atajê pyrãac.

13 Ne me cupê rop tycti hãn ne pryre mã wa japrã,
ne cumã carõrõ,
ne kam intoj ne ihcakê, ne ihcãmxa
ita kôpit na mã,
ihtÿj me ito kên to prãm.

14 Ramã icarôt jamre xà ita pê ihhêj rÿm
cô te pjê kam ipijaxwÿr ne hamre.
Ne ajpën kam ihi ihcuhhê xà itajê,
ramã apu ajpën pê hapôj partu,
ne ihcuhhê xà kaj na apu ihcuhhê.
Ne ina cuhkõnre pê ihhêj rÿm
amcro te apu penhê to ihhorhot,
ne ramã ipigãn to mõ.

15 Ne ramã imã kôar to kôr,
ne ijõkre kam ihhêj ne pjê jacrô ne incrãre.
Mã ijõhto te ijapto na impÿn ita kam,
ca ihhêj ne ityc na apu icãmjÿ,
ne ihhêj ne ate pjê jacrô ita kam irer.

16 Ne mehkrã kên catêjê te me ito kên prãmte, me
ina cuprõn.
Ne me cupê ihhêj rÿm rop te apu pryre na cuprõn ne
ihkrã,

ne ajpën pê ihcyt to ipa atajê pyrãac.
Ne ramã cute ame ipê ipar me ijÿhkra caxwÿrti.

17 Ne wa icakrô te amji capô, ne ihire ita kam,
quê ha ihtÿj me ihi cunea pupu.
Ne me icurê xwÿn catêjê cama ame ikôpÿr to me ipa,
ne ite amji pupun xà kêanre ita pyrên ame hakry.

18 Ne cute ikà to ajpën mã me ipicràn,
ne ihkôt kên to ajpën pê me hÿhkàr.

19 Ijõ Pahhiti!

Nee ca ipê gÿjawry nare,

ne apu awjarêa ne itehcajpa!

He apêa ri ikên mã ixàr xà ita pê ipytàr catê!

20 Ityc xà ita pê ipytà!

Ne me icurê xwÿn pê me ikwÿ nare pê rop pyrãc itajê
pê ipytà.

21 He me cupê ihhêj rÿm rop tycti pyrãac,
ne me wa te icaxwÿr xà ata pê ipytà!
Ne jÿ wÿr wa ahte me cupê ihhêj rÿm
pryti xÿmti jàprê jÿpàr te icaxwÿr xà ata pê amji pytà!
Ne caa, ca ha atÿj me icurê xwÿn itajê pê ipytà!

22 Ca ha ito hane,
wa ha me ikwÿ cunea mã
ate ikên mã ixàr xà ata pê ito acator na garê,
ne itÿj cute me cuprõn xà kam mehcunea mã
apejti na garê, ne me cumã:

23 "Me apê Pahhiti kôt me apa catêjê,
ca ha me gõ Pahhiti to me gãmñãn prãmte me cumã:
'Imã acupa hyre nare, na wa itÿj garkwa kôt ipa!'
hane.

Ne me apê Jaco tàmwxwÿ tàmwxwÿ atajê,
ate me amji mã Pahpãm cupa prãm to, ca ha me
cumã:

'Apeaj to apej! Ne ampo cunea jirôa pê acati!' hane.
Ne me apê Ixaher catêjê pê Pahpãm na mehkwy ata-
jê,
ca ha Pahpãm to ate me cati prãmte me cumã:
'Apyxit peaj pê ri me ijõ Pahhiti pê Pahpãm!' hane" ha-
jÿr.

24 Ýhÿ me ikwÿ,
he Pahpãm nee amji tète
me cupê hamreare atajê curê to ipa nare.
Ne nee cute me amji pupun xà kêanre to
me amji pupun to me ipa atajê to hãn ne hapac kêt
nare.

Ne nee me cupê amji to ipimxur to ipa nare.
Na quê ha jÿm amji tehcajpar xà na cumã akij,
quê ha ihtÿj jÿm ata kampa.

25 Ýhÿ Ijõ Pahhiti, pê wa ikên kam ipa xà ata kam
amã:
"Ate itehcajpar jahpan xà na, wa ha itÿj amã ampo gõ"
hane.

Cwÿrjapê wa ha cute me cuprõn xà kam,
cute me ato amji kam hapac prãmte atajê cunea kam
mare mã,
amã ite ampo na amji ton xà ata to.

26 Ne wa ha mehcunea mã amji kÿn nõ to,
ne me cupê hamreare atajê mã harte.
Quê ha me cumã akÿn atajê me amã:
"Mehcunea jirô pê apej ne acati" hane.
Na quê ha hõtpê amji to ipijapar pej rohnÿtti mã.

27 Ýhÿ me ikwÿ,
quê ha pjê cunea kam krÿxàre Pahpãm to amji kam-
pa,

ne to amji japackre.

Quê ha jÿa ri amehkrÿ atajê,

ihtÿj Pahpãm wÿr me apkjê.

Ne quê ha ampo kra cunea me hõmpun xà ata kôt,

Pahpām to cute amji kam me hapac prāmte me cumā:

“Apêa ri me ijō Pahhiti,
na ri mehcunea jirōa pê me imā me akīn” hane.

28 Pahpām pê me pajō Pahhiti,
ne cupê pjê kam mehcunea to ihmipej catê,
ne ihtyj ampo kra cunea to ihmipej.

29 Ne cute amji to me cati prāmte atajê,
quê ha ihtyj cuna mā mehpypym,
ne mehkryre na cumā me amji jarê.
Ne cu me pahcunea me pahtyc to mō atajê,
quê ha Pahpām cuna mā mehkōn krā na me jỹ ne me
cumā:

“Wa ityj amji mā me acupa” hane.

30 Na quê ha mehtāmxwý tāmwxwý ihtyj amji mā me
hūpa,

ne me kam hapac to me ipa,
ne ihtyj mehkra mā me Pahhiti jarēn to me ipa.

31 Quê ha me kampa,
ne hanea ne cormā nee mehpypym nare atajê mā me
harēn to:

“Me pajō Pahhiti pê Pahpām
pê ajco mehkwy kēn mā mencjêj xà atajê pê me hūtà”
hane.

Pahpām pê me pajamār catê impeaj na menccrer xà

23 Ihhêj rŭm ipê carà cahàcre hôhti pyrāac,
mā Pahpām pê ijamār catê.

Cwýrjapê ri nee ipê ampo jamre nare.

2 Ne pom carà cahàcre hôhti jamār catêjê
cama hō ahtu kukūmti rericre kam hikwa na hamā,
mā kam hikwa,

ita na mā Pahpām ito,
ne ihtyj imā ite ijikwa ne ikôt xà ita gō.

Ne pom carà cahàcre hôhti jamār catêjê cō pinkrinti
wýr,

hō carà cahàcre hôhti to ipa, mā to ikō,
ita na mā ihhêj ne Pahpām ito,
ne ihtyj ite amji kam ijapac xà kam ikrihkritti ita to
imā ihcarīc,

ne imā to ankrê.

3 Ne hōtpê imā, ite amji kam ijapac xà to intuw.
Ne carà cahàcre jamār catêjê hān ne pry cuhtacti kôt
catyt kam ipa na to,

mā ihkôt ipa,
ita kōpit na mā, Pahpām catyt kam ite ipa na ito ipa,
mār wa ampo pej pit ton to ipa.

Hō, pê cute ijamār na amji to awjahkre ata na mā
ijamār to ipa.

4 Ýhỹ ijō Inxū Cati,
pom hān ne carà cahàcre hamār catê cām̀tā rŭm,
nee cumā awcapātkō cupa nare,
ita na mā ite.

He apê ijamār catê,
ne wa ityj akôt cormā caprŭm kôt
ityc xà jō awcapātkō jakren to ipa.

Ne ca icumam apa ita kam ri, acām̀tā rŭm,
nee imā ampo kēn te icuran xà ata cupa nare.
Ne pom carà cahàcre jamār catêjê hō parxare jamār
caxuw,

hō kôtāre incwa ne to ipa,
mā curê xwýn hýrmā hapōj,
mā kō ata to ihcura,
ita na mā ate, ne ramā ate icurê xwýn catêjê caxuw
amji mā gāhcuprōn hiahpuro.
Mā ihhêj ne, gō kôtāre ma icurê xwýn pê itēte hām̀tār
to ipa.

Ne ca hanea ne gō pīcajrer ita to, prya kôt icapōr to
apa.

Na ri ate ijamār xà ita pyrēn,
imā amji kīnti.

5 Ne pom carà cahàcre jamār catêjê,
hān ne ampo pê curê xwýn atajê cunea jipōc ri cumā
harte,

ita kōpit na mā,
ca ate cute me icurê xwýn catêjê kam mare mā,
gāpān xà wýr ijator.

Ne ate ijator ita kam,
quê nee me icurê xwýn itajê nō jŭ mā iton nare.

Ca hān ne ina amji tohpōj to hanea,
pom quê hān ne me catia na me amji tohpōj he.

Ne gōtpê ikōm xà kam
imā ampo cacō impejti ata to hipu tu, mā ajxwý,
ca imā agō.

6 Ne quê ha amā ikīnti itaa na, imā gahkre pej.
Na ca ha imā gāhcajrēn to axām itaa na, wa ha ahnaa
ty,

ne ityj gŭrkwa kam amji to ipijapar rohnýtiti mā.

**Cu ha Pahpām mā pahte me to kēn xà na me amji jarê
na menccrer**

32 Ýhỹ me ikwý!

Ampo pyrēn cu ha ame pajakry?

He Pahpām te me pamā, por pahte harkwa jirō pê me
pahpým,

ne ihkaj na me pahkēn xà ton atajê jicu,
ne to tojnō ne ihhur ata pyrēn,
cu ha ame pajakry.

2 Por Pahpām te ampo kēn ton atajê na
me pajarēn kēn nare atajê pyrēn,
cu ha ame pajakry.

Por me pahcaxwām pê
me pahte amji kam me pajapac xà hēj xi nare atajê
pyrēn,
cu ha ame pajakry.

3 Ne pê wa cumā ite ikēn ton xà to icakōc nare ri mā,
ajco amcro cunea kam icwýr to amji pectu, ne
ipeacre.

4 Ýhỹ, ijō Inxū pê Pahpām,
wa ityj ite ikēn ton jahpan xà na,
ajco amcro me caxwa cunea kam ate ito kēn xà atajê
cajpē,
ne ramā ipê icarôt jamre to mōr te hajýar,

pom quê pyt cacro atâr to incrà to ipa he.
 5 Jicu xà kam, pê wa amji mã:
 “Wa ha Pahpãm mã ite to kên na amji jarê” hane.

Pê wa amã ikên xà cunea na amji jarê.
 Ne nee pê wa ite ampo kên ton xà atajê nõ to apê ip-
 imxur nare.

Ne ite amã ihcunea to icakôc xà ata kam,
 pê ca ampo to ite ato kên atajê cunea to tojnõ, ne
 hicu.

6 Ne por mehcunea mã akîn,
 mã amji mã me ato ihhimpej atajê te ri,
 ihtỳj me amã amji cajrên to ipa xà.
 Mãr quê jũ caxuw me hỹrmã ampo kên catia te cator
 xà ata kam,
 nee cute me amã amji cajrên catêjê wỳr cator nare.

7 He apêa ri ito apimxur catê.
 Ca ampo kên atajê cunea pê ito amxu ne itête amtà.
 Wa ate itête me cupê gàmtdâr xà ita pyrên ijakry to
 kỳj cati pêa mã, amã cre.

8 Ỡhỹ me ikwỳ, Pahpãm te me pamã amji jarên to:
 “Wa ha jũ ri me amõr xà ata jõ pry to me amã hahkre,
 ca ha ihkõt me mõi.

Wa ha pa me gapackre, ne me gamãr to mõi.

9 Na ca ha nee me apê cawrõ me,
 cawrõ cahàcre jũpar nare atajê te mempar prãmte,
 mehkrã na hê,
 ne jũ kam me to mõi xà ata wỳr
 mehkjên to me ipa atajê pyrác nare” hajỳr.

10 Ỡhỹ me ikwỳ, ampeaj kam ri,
 mehkên catêjê hãn ne me amji pupun kên to ihkryjre
 nare.

Ne quêt me Pahpãm to amji mã mehhimpej catêjê
 atajê ri,

Pahpãm te me to ihhêj rũm pryjara pyrác,
 ne ma mentête hara to kwỳc to ipa ita na,
 ampo kên atajê cupate.
 Ne ihtỳj hàhcajrêan kam, cumã mehkĩan kam,
 mentête hàmtâr to ipa.

11 Ne pom ca me acunea catyt kam me apa atajê,
 me acunea me gakry!
 Ne Pahpãm te me ato impejti xà atajê pyrên
 hanea ne me amã amji kĩan ne!
 Pom ca me amji mã kam gapac pejti,
 ne catyt kam me apa itajê,
 me gakrya ne,
 ne pom me gakryti itajê to, me cumã cre!

Pahpãm to hàmnãn na menchrer

33 Ỡhỹ me ikwỳ, por ca me acunea catyt kam me
 apa atajê,

Pahpãm pyrên me gakrya ne.
 Mempejti catêjê te me Pahpãm mã catihti,
 ne impejti jarên xà ri quêt ahnaa.
 Na ca ha atỳj me cumã cati ne impejti jarê.

2 Ca ha Pahpãm mã catihti ne impejti jarên xà ata
 kam,
 atỳj me cumã cre ne me gækôr xà cakô,
 ne cumã cuhkônre cakô.

3 Ne Pahpãm mã me acrer xà intuwti to
 kỳj cati pêa mã, me cumã cre,
 ne cuhtõj cajrôn pejti ata to,
 ca ha me gakryti to me cumã cre.

4 Ne mër ampo na mã cu ha me to hajỳr to prãm?
 Nee mã ampo na nare, he Pahpãm jarkwa pê ri quêt,
 ampeaj kam, ne catyt kam,
 ne quêt cute ampo cunea ton xà na,
 ihtỳj amji jarkwa na amji kampa.

5 Ne Pahpãm mã, pjê kam mehkrĩ atajê cunea kĩn,
 mã me hamãr to impejti.
 Ne cumã ihtỳj catyt kam me ipa atajê kĩn,
 ne catyt kam, cute mehkwỳ to amji kam hapac na
 cumã me to prãm.

6 Pê Pahpãm ihcakôc xàa to, cama ihcakôc,
 ne ramã cõjkwa to,
 ne kam caxêre me ampo cunea ihkrĩ atajê to.

7 Pê Pahpãm cõxwa cunea to cuprõ, ne hỹr xàa kam
 hỹr,
 mãr quê hàhhuc tu rohnỳtti mã.

8-9 Pê cama Pahpãm pjê ton xà ata to cumã ihcakôc,
 pê ramã pjê amji to,
 ne ampo cunea te amji ton xà na cumã harkwa,
 pê ramã ampo cunea amji to.
 Na ca ha pjê cunea kam me akrĩ itajê,
 ate atỳj amji mã me Pahpãm cupa xà.
 He me pahcunea mã,
 pahte amji mã me Pahpãm cupahti kam
 me cumã amji jarên xà.

10 Ne mër ampo na mã pahte me to hajỳr xà?
 Nee mã ampo na nare.
 Pahpãm ihtỳj krĩxàre te me ajpên par xà kêanre atajê
 to

me cupê hamre,
 mãr quê nee ihkõt me ampo kên ton to me ipa nare.

11 Ne quêt Pahpãm te ampo na amji ton xà ata ri,
 nee ihkõt hamre xà nare,
 ne ihtỳj quêt cute ahna amji ton xà, ne ahna to hãm
 ita na.

12 Pê Pahpãm cute me pahto hõ tekjê xà caxuw
 amji mã me pahcapi,
 na ri hũrên me pajakryti.
 He ampeaj kam quê ha jũ ri, krĩ nõ kam,
 Pahpãm to amji mã me hõ Pahhiti,
 ne por toa amji mã mehhimpej atajê,
 quê ha ihtỳj hanea ne me hakry.

13 Ne ampo na mã
 cu ha cumã cati me impejti to cumã me cre?
 Nee mã ampo na nare.
 Cõjkwa pĩn Pahhiti pjê kam mehcunea mehkrĩ atajê
 cunea pupu.

14-15 Ne cutea ri me pamã pahte amji kam me pajapac xà ton,
ne ihtÿj pahte me ampo cunea ton atajê na me pahpupu,
ne kam amji kampa.
Ne ihtÿj ihkrĩ xà ata pĩn pjê kam,
por mehcunea mehkĩ atajê pupu,
cwÿrjapê cu ha pahtÿj me cumã cre.

16 Ne mër ampo na mã cu ha me cumã cre?
Nee mã ampo na nare.
Jũ wÿr quê Pahpãm krãhtare jõ pahhi tehcajpar nare kam,
quê apu amji mã hamã, ne curê xwÿn tohjê.
Ne quê ha tee krãhtare pahtÿj cackrô,
quê Pahpãm cumã carôt jõr nare,
quê nee ihtyc xà ata jahpan nare.

17 Quê me pamã cawrô carôt tÿjti cati cackrô,
jũ wÿr quê Pahpãm ihtehcajpar nare kam,
quê cawrô ata me pahcurê xwÿn pê me pahpytã.

18 Ne Pahpãm ihtÿj quêt amji mã me hũpahti atajê jamã.

Cu ha me Pahpãm jãhcaprĩa kam,
cumã me pahkĩn rohnÿtti mã ata te,
me pahtehcajpar xà na aracri me hikaj,
quê ha ihtÿj me pajamãr to ipa.

19 Ne quê ha ihtÿj pahte me pahtyc xà jahpan na me pahto,
cu ha me hahpa.

Ne prãm catia te cator xà ata kam,
quê ha nee prãm ata te me pajipej na hamãr nare.

ÿhÿ me ikwÿ,
cu ha Pahpãm te me pahto impejti itajê cunea pyrên
me pajakryti na cumã me amji jarê,
ne cumã me cre to hane he.

20 “ÿhÿ me ijõ Pahhiti, apê me itehcajpar catê,
ne apê ampo kên pê itête gãmtàr catê.
Na wa itÿj aracri ahna me gikaj to me ipa ita na.

21 He apyrêan ri me ijakryti.

Na wa itÿj apejti ita to amji mã me ihmpej to me ipa.

22 Ne wa itÿj cormã aracri me gikaj to ipa ita kam,
ca ha gãhcaprĩa kam, amã me ikĩn ita na” hane.

**Mehkrã kên mehkên mã me acjêj, ne mehkãrã pej
mempej mã me acjêj na menrcer**

37 ÿhÿ me ikwÿ,
nee ca mehkãrã kên catêjê jũ na ame akrihkrit
to me apa nare.

Ne nee ame hũ na cute mehkên ton atajê kĩn nare.

2 Ampo na? He me cupê ahtu te êê ne apu incrà
pyràac,

quê ha me ahna ahtũm nare quê ha me hamre.
He ampeaj kam ri me cupê pøre pit,
na quê ha ihtÿj me hamre tu.

3 Ca ha cõjkwa kam me Pahhiti pê Pahpãm to amji
mã me ahimpej,
ne me ampo pej pit ton to me apa.

Mã cute me amã pjê jõr, ca kam me akrĩ,
mã kam me atête ampo kên pê amtà.
Ne ca ha hàmtàr xà ata kĩan kam, kam me akrĩ.

4 Ca ha Pahhiti cukwa kam,
me amã amji kĩnti kam me apa na,
quê ha ihtÿj me amã,
ate amji mã me ampo na prãmte xà atajê cunea gõ.

5 Ne ca ha Pahhiti mã me ate amji kam me gapac xà
cunea gõ,

mãr quê taa, ate amji kam me gapac xà to ihmpej.
Ne ca ha ate amji mã me to ahimpej to me apa na,
quê ha me ato impejti to hane he.

6 Pom quê pyt hapôj mã mehcunea me hàhcujro
pupu,

ita jĩkjê na,
quê ha Pahhiti mehcunea te me apupun na me to,
mãr quê cutea me ana amji caxàr na me gahkre pej.

Ne me pahkrã jimoc kam pyt ihkrĩ, mã me ihprã
pupu,

ita jĩkjê na,
quê ha Pahhiti ihtÿj mehcunea te catyt kam me apa
na,

cute me gahkre pej na me to,
quê ha me gahkre pej.

7 Na ca ha aracri, amji mã me aprĩa kam,
me Pahhiti te me atehcajpar xà na me hikaj.

Ne quê mehkãrã kên catêjê
hãn ne me ampo kên ton to me ipa xà ata kôt,
amji to me cati to me ipa,

ca ha nee me hũ na ame akrihkrit to me apa nare.

8 Ne nee ca ame kam acryc, ne me kam acàcàc nare.
Ne nee ame hũ na ame akrihkrit nare.

Ampo na?

Ca ha ate, cute me ampo kên ton ata kam akrihkrit
na,

quê ha ihtÿj ate ampo kên ton wÿr ato mõ.

9 Ne quê ha Pahhiti mehkãrã kên atajê
mõr pejti kam, me to hamre hiahpuro.

Ne por ca quêt

me Pahhiti te mehkên mã me hàr xà pê
me hũtãr xà na me hikaj atajê,
quê ha ihtÿj cute pjê to me cumã hũjahkre ata kam
me amji to ajpa.

10 Ne quê ha mehkãrã kên atajê na ahtũm nare,
quê ha me hamre partu.

Ca ha tee ame hapê, ne nee hipêr me jũm mã acator
nare.

11 Ne quêt cute amji to mehkryjre prãm atajê,
quê ha ihtÿj cute pjê to me cumã hũjahkre ata kam
me amji to ajpa.

Ne curia, quê ha mehcãrĩcti kam,

nee amji mã me ampo kên cupa nare kam me ipa.

12 Ne mehrã kên catêjê tee cute catyt kam me ipa itajê to kên prãmtê,
ahna ame ajpên kampa.
Ne ihtÿj me kam incryac kam ame wa gyj to me ipa.
13 Ne Pahhiti mã ramã mehrã kêanre atajê jamre xà jô amcro jahkre pej,
na ri cama ame ahna acxa.

14 Ne ramã mehrã kên catêjê te me hõ wapo xwahhihti tohpôj,
ne ramã me hõ cuhê na cute ame amji cohe,
cute me cupê hamreare atajê me,
catyt kam me ipa atajê jipej prãmtê.
15 Cakrô, quê ha nee me to hajÿr nare.
He quê ha me hõ wapo xwahhihti atajêa
me ahna cuhkônre japôc, ne me hõ cuhê itajê,
quê ha hanea ne me cupê impàt pa.

16 Pahpãm mãa, catyt kam me ipa itajê pê ampo crêre atajê ri,
mehkrã kên mã ampo jàhtôti itajê jirôa pê impej.

17 Ampo na?
He quê ha Pahhiti mehrã kêanre atajê pê me carôt to hamre,

ne quêt catyt kam me ipa atajê,
quê ha mehtehcajpar to impeaj ne.

18 Quê ha Pahhiti amcro cunea kam,
catyt kam me ipa atajê jamãr to ipa,
quê ha ihtÿj cute me cumã pjê jôr xà ata kam,
amji to me ipijapar to me ipa rohnÿtti mã.

19 Ne quê ha me hÿrmã ampo kên catia te cator xà ata kam,
quê ha nee me to hamre nare.
Ne quê ha me hÿrmã prãm catia cato,
quê ha ihtÿj me cumã hõ.

20 Ne mehrã kêanre catêjê,
quê ha me acto tu.
Ne Pahhiti curê xwÿn atajê,
quê ha me cupê põ kam pĩrã pejti atajê pyrãac,
ne êê ne me hamre.
Ne me cupê cuhy kũm te apu hamre pyrãac,
ne ma jũ kam me acto.

21 Ne mehrã kên catêjê hãn ne mehkwy pê ampo cwa,
ne nee hacpÿ mã me hõr na me amji to hũjahkre ata na,

me amji jarkwa par nare.
Ne quêt catyt kam me ipa catêjê ri me hàhcajrëan kam,
ampo to mehkwy tehcajpar to me ipa.

22 Pahhiti te mehrã kam harcô mën atajê,
quê ha pjê to cute me cumã hũjahkre ata kam
me amji to ipijapar rohnÿtti mã,
ne mehkĩnte,
cute mencrôn atajê, quê ha me mör pejti kam me to hamre.

23 Ne quê ha Pahhiti pry kam jũm mẽ ata,
quê ha catyt kam pry ata kôt ipa,

quê ha jũm ata mã cute amji kam hapac xà kĩn hyre nare.

24 Ne Pahhiti me hũhkra na cucwa ita kam, quê ha me ajhu,
ne nee me ipihur tu nare.

25 Pê wa ituwre na,
Pahhiti te jũmjê pejti te catyt kam me ipa atajê mã hikran na
me hõmpun nare,
ne ahnaa ramã iwej.
Ne nee hanea ne,
rÿ ite mehkra nõ te apu hõ na hàhwÿr to mör na hõmpun nare.

26 Ne ihtÿj cumã ampo,
mã hàhcajrënti kam to mehkwy tehcajpar to ipa.
Ne quê ha Pahhiti ihtÿj mehkra itajê to impej,
ne ma me hamã.

27 Ne ca ha ate ampo kên ton to apa ata pê amji to awpjê,

ne quêt ate ampo pej pit ton to apa xà ata kam,
quê ha Pahhiti ihtÿj gõ pjê kam me akrĩ rohnÿtti mã na me ato,
ne ampo kên cunea pê atête hàmtàr to ipa.

28 Ampo na?

He Pahhiti mã catyt kam, cute mehkwy to impejti atajê kĩn,
mã me to impejti to ipa.

Na quê ha nee cute amji mã me to hajÿr to ipa catêjê mã hikran nare,
ne ma mentête ampo kên pê hàmtàr to ipa rohnÿtti mã.

Ne quê ha mehkĩnte
mehkrã kên tàmxwÿ atajê me mör pejti kam,
mehcunea me hamre.

29 Ne catyt kam me ipa atajê,
quê ha Pahhiti te me cumã pjê to hũjahkre ata mã me axà,
ne kam mehkĩ rohnÿtti mã.

30-31 Ne catyt kam me ipa catêjê kam ri,
ihtÿj hõ Pahpãm te amji kam hapac xà,
na quê ha nee catyt kam ipa xà ita to ihcupan nare.
Ne ihtÿj mehcakôc xà te amji jahkre pejti to mehcakôc to me ipa,
ne cute me hapackre xà atajê, quê ha mehcajpuaw.

32 Ne mehrã kêanre atajê ri,
ihtÿj pry cahtiri,
catyt kam me ipa atajê jikaj, cute me hipej prãmtê.

33 Cakrô, quê ha nee Pahhiti mehrã kên jũhkra mã,
catyt kam me ipa atajê incjêj na me hamãr nare.
Quê ha ma cute mehcukij catêjê wÿr me to axà,
quê ha Pahhiti, cute mehkên mã me mën xà ata na nee me hamãr nare,
ne taa mentête amtà.

34 Ca ha atÿj me Pahhiti jikaj,
ne cute amji kam hapac xàa kôt me apa.
Quê ha ihtÿj jũ caxuw ato acati,

ne cute amã pjê to hũjahkre ata, quê ha ihtÿj amã cugõ,
ca ha to gõ tekjê.
Ne quê ha akam mare mã, mehrã kên mör pejti kam me hipej.

35 He pê wa ramã ito jĩa to, cute ita ton na hõmpu.
Pê hũmre nõ ata ihkrã kêanre,
ne hàprêa kam ajco mehwÿ to kên to ipa.
Ne cute me to kên to ipa xà ata kôt,
cute amji to cati to hajÿar,
pom quê pjê impejti kam pĩ ihkà to ipa,
ne catia to cati he.

36 Cakrô, mã ahna ahtũm nare, mã hamre,
ata jĩkjê na ri cute hajÿar.
Wa tee apu hũmre ita krĩ xà japê,
mã ramã hamre, wa nee ite hipêr hõmpun nare.

37 Ne ca ha catyt kam me ipa catêjê me, mempejti,
ne nee ame ipijapu to ipa nare atajê kôpĩr to me apa.
Quê ha ihtÿj cumã mehtãmxwÿ hàhtôa.

38 Ne mehkĩnte, cute mehkên ton to me ipa catêjê
atajê,
quê ha ihtÿj me to hamre.
Quê ha mehkĩnte nee me cumã mehtãmxwÿ nare.

39 Ne quê ha ihtÿj Pahhiti,
ampo kên pê catyt kam me ipa catêjê pytà,
ne ampo kên te me hÿrmã hapôj xà atajê kam,
quê ha cupê ikre tÿjti ata pyrãac, ne ihtÿj mentête
amtà.

40 Ne ma Pahhiti te mentête hàmtàr xà ata wÿr me
pra,
quê ha taa mehtehcajpa,
ne mehrã kêanre atajê pê me hũtà, ne mentête
amtà.

Jũm xũmre ita hũrkwa pê ampÿa mã Pahpãm mã amji
na increr xà

42 Ýhÿ, Inxũ Cati, ca ihhêj ne ipê ampÿa mã apa.
Pom cõjkwa crà kam, carà mã hatuj xà jõ cõ to
kõrti,

ita na mã ite,
ne wa apê ampÿa mã apu ipa.
Na wa hacpÿa mã awÿr amji jaxàr to prãam to prãm,
mãr cu hipêr ajpên pupu, ne ajpên cahi na papa.

2 Inxũ tĩr rohnÿtti mã ata, he ihhêj rũm apê cõ,
ne imã ato kôar to kôr.

Ne jũ caxuw mã wa ha ajte awÿr icato,
ne ite ato acati prãmte imã akĩnti ita na amã amji
jarê?

3 Me icurê xwÿn catêjê me icukij to:
“Mêr jõ ri mã cõjkwa kam Apãm Cati ita?
Ihhêj ne hamreare” hane.
Cwÿrjapê ri imã amji kĩn nare, ne ipeacre,
ne wa ijàpàn nare kam, amcro me caxwa cunea kam
amrã.

Mã ito cacõ pit ajxwÿ.

Ne ito cacõ pijaxwÿr ita pê ihhêj rũm ijõ,
wa to pit mã apà.

4 Wa hãn ne ituwre na
mam ite ato amji kam ijapac xà atajê to amji japackre,
ne ijĩ cunea kam ikàj xà pyrentu.
Pê wa me ikjêjê jàhtôa to ajco amji kôt ipa,
ite me ato amji kam ijapac xà jũrkwa wÿr.
Ne me icuhtom pej pêa mã,
me imã amji kĩan kam me ipa,
ne ajco me icrear kam
apê Inxũ Catihti na me ato ijũjarên to me ipa.
Ata to wa amji japackre.

5 Ne mër ampo na mã wa imã amji kĩn nare ne
ikrihkrit ita na ipa?
Xà quê ha ajkĩ Inxũ Catihti ita hipêr itehcajpar nare?
Hãpà! Quê ha ihtÿj hacpÿa mã imã amji kĩnti na ito.
Cwÿrjapê wa ha hacpÿa mã Inxũ Cati to amji mã ih-
himpej,
ne to amji japackre, ne to cati prãmte wa ha cumã:
“Apeaj to apej,
ne apê Inxũ Cati pê Pahpãm
pê ikên pê ipytàr catê rohnÿtti mã” hane.

6-7 Wa Pahpãm jũrkwa me, me ikjêjê pê, ampÿa mã
ipa,
ne Cõpijapjêr jõ cõ jatuj xà na kēnti itajê kam ikrĩ.
Mã kên cati itajê pĩn, cõ catia ne ikam ajxwÿ,
ne kypê hàhkrihkrit nare, ne tee icuran prãm.
Ita pê ihhêj rũm imã amji kĩn nare te ikam ipijaxwÿr.
Cwÿrjapê ri imã amji kĩn nare ita pê ihhêj rũm
ijĩ cunea kam ikàj xà,
ne Pahpãm te ri imã amji kĩn nare ita na iton,
na wa itÿj to amji japackre.

8 Ne amcro cunea kam Pahpãm imã:
“Imã akĩn rohnÿtti mã” hajÿar to pyt.
Ne wa caxwa ri cumã cre, ne cumã:
“Mehcunea jirôa pê apeaj to apej” hane.
Ne itÿj cumã icakôc ne cumã:
“Apê ite amji kam ijapac xà xakat,
na ca ha atÿj ijamãr rohnÿtti mã” hane.

9 Pahpãm pê ikên pê ipytàr catê, na wa cumã:
“Ca ihhêj ne ate ito gapac kêt!

Mã me icurê xwÿn catêjê ame ito kêanre,
wa imã amji kĩn nare kam ipa” hane.

10 Mã amcro cunea kam me icurê xwÿn catêjê ame
ina xwÿ,

ne me imãn to:

“Jõ ri mã Apãm Catihti ita?
Ihhêj ne hamreare ita kam,
jũ wÿr quê ha atehcajpa” hane.

Ne cute me imãn xà ita pê ihhêj ne ramã me icuran to
mõ.

11 Ne mër ampo na mã wa imã amji kĩn nare,
ne ikrihkrit ita na ipa?
Xà quê ha ajkĩ Inxũ Catihti ita hipêr itehcajpar nare?

Hāpà! Quê ha ihtÿj hacpÿa mã imã amji kînti na ito. Cwÿrjapê wa ha hacpÿa mã InxÛ Cati to amji mã ih-himpej,
ne to amji japackre, ne to cati prãmte cumã:
“Apeaj to apej,
ne apê InxÛ Cati pê Pahpãm pê ikên pê ipytâr catê rohnÿtti mã” hane.

Tawi te Pahpãm mã amji cajrën na menrcer

43 Ýhÿ, ijõ Pahhiti pê InxÛ Cati,
me icurê xwÿn itajê kêanre, ne ampeaj kam mehêj xi,
ne nee me ato amji japackre prãm nare.
Ne cute me ijarën to kêanre atajê pê ipytà.
Ne me cumã ijarën to:
“Imãa cupê jÿm pejti ata” hane.
2 He pom apê ampo kên pê ipytâr catê ita?
Nõ na mã ihêj ne ate imã hikran.
Mã me icurê xwÿn imã amji kîn nare na me ito,
wa imã amji kîn nare kam ipa,
ca ihêj ne nee ita na ito amji japackre nare.

3 Pom hãn ne hàhcujro xà,
awcapàtkô kam jÿm pictor ata tehcajpa
mã hacpÿa mã pry kam ajhu,
ita kôpit na, ca ha iwÿr garkwa te ijapackre xà nõ hêj
xi nare,
pê ihêj rÿm gâhcujro xà nõ ata kujate,
mãr quê hacpÿa mã awÿr ito amji jaxà.
Ne ate ijapackre xà ita kôt,
wa ha hacpÿa ne Xijãw jõ hàpkàjti na
ite ato amji japackre xà jÿrkwa kam akrÿ xà ata wÿr
amji jaxà.

4 Ne ate imã amji kînti wÿr
ito amji jaxà xà ata pyrên ijakryti,
ne hahpan xà na wa itÿj amã ampo gõ.
Ne amã ijàkôr xà cakô, ne amã icrer to:
“Apê imã amji kînti jôr catê xakat” hane.
5 Ne mër ampo na mã wa imã amji kîn nare
ne ikrihkrit ita na ipa?
Xà quê ha ajkÿ InxÛ Catihti ita hipêr itehcajpar nare?
Hāpà! Quê ha ihtÿj hacpÿa mã itehcajpa ne imã amji
kînti na ito.

Cwÿrjapê wa ha hacpÿa mã InxÛ Cati to amji mã ih-himpej,
ne to amji japackre, ne to cati prãmte wa ha cumã:
“Apeaj to apej.
Ne apê InxÛ Cati pê Pahpãm pê ikên pê ipytâr catê rohnÿtti mã” hane.

Tawi te to kên na amji jahkre pej, ne Pahpãm mã cute to tojnõ na hàhwÿr na menrcer

51 Ijõ InxÛ pê Pahpãm, icaprÿa ne.
Wa itea ikên xà pê ampo kên ita to amji tÿm.
Ne amã ikîn ne amã ijapê rohnÿtti mã ita kam,
ca ha imã ikên cunea cuhhõ,
ne nee hipêr to amji japackre nare.
Ite acuna mã ampo kên ton ita kam ri amã ikêanre.

Na ca ha imã ite amji kam ijapac xà kên kam,
ite ikên ton ata to caprã.
2 Ne gâhcaprÿa kam, ite ikên ton ata cunea pê icuhhõ,
ne ite garkwa jirô pê ipÿm ata hur pa,
ne to tojnõ, mãr wa hacpÿa mã itetet.
3 He ramã imã, ite to ihcupan xà itajê cunea na, amji
jahkre pej,
na wa amã ahna amji jarê.
Ne ikên xà itajê, ihêj ne icunaa mã imã hikwa,
na wa hõtpê to amji japackre.
4 He wa ite nee jÿmjê cuna mã ikên xà ita ton nare,
ne acuna mã wa ite ton.
Ne itÿj ate ita cwÿrjapê ito kên xà na ramã gahkre pej.
Ne ca catÿt kam apa na ri ate icurê mã imên xà ita
caxuw,
quêt ampeaj kam apejti.
5 Pê wa ipÿm pêa mã ramã ite amji kam ijapac xà
kêanre.
Ne ampeaj kam pê wa ipÿm pêa mã,
ramã ajpên acuna mã ampo kên itajê ton to mõ.

6 Ne amã, ate amji kam gapac xà impejti, hêj xi nare
ita pyr na
ito prãm,
mãr wa catÿt kam, ihêj xi nare to ipa.
Na ca ha imã ate amji kam gapac xà impejti,
krã kreti ita to hahkre,
ne imã agõ.
7 Ne itête imã, ite amji kam ijapac xà kên tÿm ita cuh-
hõ,
wa itetetti to hanea, pom quê hàcwÿn jaka he.
8 Ite ato kên jahpan xà na,
ate imã amji kîn nare ne ipeacre na iton.
Ne ita caxuw ca ha hacpÿa mã imã amji kînti na ito.
Mãr wa ate ito impejti ita pyrên ijakryti to amã cre.
9 Ne ate imã ikên cunea ton itajê to caprãr ne ihhur
partu na,
imã ato prãm,
mãr ca nee hipêr hõmpun nare.
Ne ite acuna mã ikên ton ita to tojnõ,
ne nee hipêr to amji japackre nare.

10 Ýhÿ, ijõ InxÛ Cati,
imã ite amji kam ijapac xà tetetti impejti gõ,
mãr wa ato pit mã hupkre cahkô to ipa ita na.
Ne ite ato amji kam ijapac pejti xà caxuw,
imã ite amji kam ijapac xà tuwti gõ.
11 Ne nee amji tète põ mã imên nare,
ne nee ipê ikam Acarõ Pejti ita caxàr nare,
ne quêt hipêr ajpên kam pahhônco na ito.
12 Ne cama hipêr imã ate ipytâr pyrên ijakryti na ito,
ne ita caxuw ite akam ijapac prãm na ito,
mãr wa akampa.
13 Ca ha ito hajÿr jirô pê mã,
wa ha itÿj cute mehken ton catêjê mã,
ate me imã garkwa jirên itajê to hahkre,
quê ha me gahkre pej,
ne hacpÿa mã awÿr me amji jacjê.

14 Ijõ Inxũ Cati, apê ampo kên pê ipytâr catê,
ne nee ca ite jũm curan xà ata kôt amji mã ihcuhtom
nare.

Wa ha imã amji kĩan kam, mehcunea mã,
ca catyt kam apa, ne apejti na garên to ipa.

15 Ijõ Pahhiti, mehcunea mã icakôc na itehcajpa,
mãr wa itỳj me cumã acatihti ne apejti na ato ijãmnãn
to ipa.

16 Ne ite amã ampo to acajpuaw prãmte,
ite amã ampo pijapar to caxàr xà ata na, nee amã
ihkĩn nare.

Ca ha ma apu ite amã ampo jõr xà atajê caca nare na
mã,
wa ha ramã amã cugõ ne to capa.

17 Ỡhỹ ijõ Inxũ Cati,
wa ite ampo to acajpuaw prãm xà ata na amã ihprãm
nare,

ne quêt amã icrire na ito prãm.
He wa ite ikên ton ita to amji japackre, ne imã amji
kĩn nare,

ne ipeacre ata na ri amã ito prãm.
Ne ite ikên ton jicu ne akôt pit mã ipa to prãm ata kôt,
ca ha ina amji capa.

18 Ỡhỹ Pahpãm, ate itehcajpar xà ita na,
ca ha hanea ne me akwỳ cunea tehcajpa.
Ne por ramã Krĩpinkrên tête kwỳc nare,
mã me curê xwỳn te ame to kêanre,
na ca ha hipêr gahcajrêan kam
Xijãw jõ kên cahê na krĩ ata to impej, ne itehcajpa.

19 Ate me itehcajpar jahpan xà na,
wa ha ihcunea na me amã amji gõ.
Ne ahna ate me ijahkre pej xà na,
wa ha me amã pryti krahti xũmti nõ to capa,
ne catyt kam me to akam ijapac to me ipa.

Me hõ kēhkēn pyrēn me pajakry na menrcer

67 Ỡhỹ, me ijõ Inxũ Cati, me icaprĩa ne,
ne me ikrã kam garcô mẽ, ne me ito impej,
mãr wa me ipej.

2 Mãr quê pjê cunea kam, mehcunea, krĩxàre mea
mã,
ate amji kam gapac xà impejti na me gõmpu,
ne mehcunea apê me hũtâr catê na me gahkre pej.

3 Ỡhỹ, me ijõ Pahpãm,
imã krĩxàre cunea te acatihti na me garên na me to
prãm.

Ne hanea ne imã ampo kra cunea te apejti na
me garên na me to prãm.

4 Imã mehcunea mã amji kĩn,
ne me hakryte amenrcer na me to prãm.

Ampo na?
He caa ca ha quêt catyt kam mehcukij jirô pê
mempej to impej,
ne mehkřã kên to kên,

ne pjê cunea kam mehkřĩ atajê japackre
ne ma me to ahimpej to apa.

5 Ỡhỹ, imã krĩxàre cunea te acatihti na me garên na
me to prãm.

Ne hanea ne imã ampo kra cunea te apejti na
me garên na me to prãm.

6 Ỡhỹ me ikwỳ, pê Pahpãm me pamã me pajõ pjê gõ.
Ne ramã cute me pahkrã kam harcô mẽn,
ne me pamã pajàprà cunea jõr.

7 Pê Pahpãm ramã me pahto impej.

Ne imã pjê cunea kam,
mehcunea te amji mã me hũpa to ipa na me to prãm!

**Pahpãm catyt kam mehkřã pej me mehkřã kên to ipi-
cokjêr na menrcer**

73 He imã, Ixaher catêjê te amji kam hapac xà
cunea kam

mehkên nare, ne mehtetetti atajê caxuw ri,
Pahpãm peaj to impej na,
imã hahkre pej.

2-3 Ne mam pê wa nee hahkre pej to hajỳr nare.

Pê wa mehkřã kên me,
amjia kôt ame ipa catêjê atajê jũ na,
apu cute me amji kam hapac xà pê me hàhcukrêj cati
atajê kĩn.

Na pê wa ajmãr Pahpãm kôt ipa xà ita na atij, ne
ipỳm,
ne ajmãr ikên mã axà.

4 Ampo na?

Me cumãa, cute me amji kam hapac xà cunea kam
mehcarĩcti.

Ne nee ame hà nare, ne me capēnti, ne mehtỳjti.

5 Ne me cumãa, cute me amji pupun xà kêanre nõ
hamreare.

Pom ahnaa mã mehkwy te me amji pupun xà kêanre
to

me amji pupu ita na,
cute me hajỳr nare.

6 Ne por me hakrãj cati na amji to me ipipê to me ipa
atajê ri,

ihhêj ne me cumã impej to impej.

Ne ramã cute me cupê hamreare,

ne me cupê mehkryjre atajê to me hàprê to me ipa to
cute me amji pyrãc tu.

7 Ne cute amji kam me hapac xà kên to pit mã,
cute ame caxwỳn to hipu tu.

Ne ramã amji jirôa pê

cute me amji kam hapac xà kên jãhtôa to

amji to mehhimpej to me ipa.

8 Ne mehcunea mã xwỳ xà kêanre to me ipa,

ne ampo kên to pit mã mehcakôc to me ipa.

Ne ihtỳj mehcunea jirôa pê amji to me cati prãm to
me ipa.

Ne cute me cupê hamreare, ne mehpeacre atajê mã mehhêj,
ne mehkên mã me irên to pit mã me amji kampa.

9 Ne ihtýj còjkwa kam Pahpãm to mehcaôc kêanre to me ipa.

Ne cute amji to me cati prãmte,
ihtýj pjê kam mehcunea mã me harkwa jirê,
ne tee ampo cunea to mehhimpej to me ipa prãm.

10 Hõhõ, ata to ri Pahpãm na mehkwy to ihcuhê ne mehhi kèhkê,

mã ma mehkôt me ipa,
ne ihtýj cute me ampo jarên xà atajê kôt me ipa.

11 Mã ajpên mã ame hũjarên to:
“Quê ha nee Pahpãm ampo itajê nõ na me pajahkre pej nare.

Quê ha Carôt Týjti ata nee ampo itajê nõ na me pamã cator nare” hane.

12 Mehkrã kêen catêjê te me hajýr he.

Me cumã ampo catia,
ne ma hõtpê me ipicamên to me ipa,
ne ampeaj kam me hakràj.

13 Cwýrjapê wa ajmãr ite amji jarên to hajýr he:

“He wa ihhêj ne amji capry to,
ite ikên ton tète amji jiprôn to ipa.

Ne mër ampo caxuw mã wa ikên pê ijũhkra to awpjê,
ne to ihtetetti to prãm?

14 Ne pom ite ipej cwýrjapê amji cajpêr xà kêanre itajê to,

ite amji pupuan to pyt ita?

Ne wa ipej ton to ipa cakrô,
amcro cunea kam ajte ihhêj ne ampo kêen mã icjêj to ipa” hajýr.

Hõ, wa ajmãr ite amji jarên to hajýr.

15 Ýhý ijõ Pahhiti, wa ha ampo itajê na amji jarê na mã,

wa ha ramã ipê aracri me akwy kêen mã me irên catê hiahpuro.

16 Cwýrjapê wa ite ampo itajê cunea jahkre pej xà na, ite amji to hahkre ne hahkre pej.

Na ri imãa ampo itajê jahkre pej xà nee hirã pê nare.

17 Ýhý me ijõ Inxũ Cati,

wa amã icakôc prãmte gũrkwa mã ixàr,
ne ite mehkrã kêen catêjê te amji kam me hapac xà jicu xà mã mên na,

me hahkre pej pyrentu.

18 Ca ate mehkrã kêen catêjê itajê kêen mã me irên xà itajê pê ihhêj rũm

ate pry cuwryhti kôt ame hũxwýr,

mã me hãtij to me ipa,

ne ma mehkên xà ata mã mehpyým, ne me hamre ata pyrãac.

19 Ne quê ha ihprôt pê, me mõr pejti kam,
por amji mã me ampo cupahti ata pê Pahhiti te me to hamre xà ata,

me hýrmã cato ne me kam tẽ,

ne me to hamre partu.

20 Ýhý me ijõ Pahhiti, he ihhêj rũm mehkrã kêen atajê pê,

pom me amti, ne me ahna apê,
mã jũ kam me cupê pra ata pyrãac.

Wa ha amti ne ampra ne to ijapac kêt,
ita jĩkjê na,

ca ha ma amji cuna mã amehkrã kêen catêjê atajê ca-ca.

21 Ne pa, pê wa ajmãr acuna mã ixãm týj pyrentu,
ne ajmãr akêanre na ato amji kampa.

22 Ne pê wa ihhêj rũm ipê ampo jũpar nare ta,
ne ihhêj rũm ipê mehkrã nare ata pyrãac,

ne nee ajte ate amji kam gapac xà itajê na gahkre pej nare.

23 Cakrô ca atýj icahi na apa,
ne awpôc rũm ate ipa na ijuwahi tu,

na wa ha nee ikên mã ipým nare.

Ne ikĩnte nee ate mehkrã kêen atajê juwahi nare.

24 Na ca ha ate amji jahkre pejti ita to ijapackre to mõ,

ite amji kam ijapac xà itajê cunea kam.

Jirô pê mã, ca ha ma amji wýr ijaprô,

ne còjkwa kam, amji jĩkjê rũm ijýr.

Quê ha mehcunea acahê na me ipupu.

25 Ne jũm to wa aràn xà na amji mã ijõ Inxũ Cati?

He aràn xà na jũm hamreare!

Ca imã akrĩ ita kam,

wa nee pjê me còjkwa kam imã jũm na prãm nare.

Ne ampo na wa amji cuna mã ihprãam to prãm?

Ampo nare, he ca!

Ana wa ihprãam to prãm!

26 Quê icapênti xà ita ihtýj ipê hamre,

quê ha ijĩ cunea ihtýj ipê hà,

ne apê ri imã ijĩ to ihtýj catê.

Ne apêa ri còjkwa kam imã,

ite amji kam ijapac xà to impej,

ne to hakràj catê rohnýtti mã.

27 Ne por jũm apu amji tète acurê ne ma apu acaca ata,

quê ha ihtýj hamre.

Ne por quê ha jũm amã hikra ne apê hawry ata,

ca ha ihkên mã amẽ, ne to hamre.

28 Ne wa pa ate amji cahi na ito apijapar ita na ite amji cajpêr,

ne ahna imã impeaj to impej.

Ýhý me ikwy, Pahpãm pê ri me pantête hàmtàr catê,

cwýrjapê wa mehcunea mã,

cute imã ampo ton itajê cunea na, harên to ipa.

Pahpãm jũrkwa to me pajapac xà na menrcer

84 Ýhý Pahpãm, apê ampo cunea jõ Pahhiti,
ne mehcunea jirõa pê ampeaj kam quêt acarôt týj.

Ne ampeaj kam imã ite me ato amji kam me ijapac xà jürkwa kîn.

² Ne imã gürkwa ata ri apu imör prãmti, ne ampeaj kam to ijapac xà.

Wa ite amji kam ijapac xà cunea to, wa apê me ijõ Inxũ Cati tîar ata pyrên ijakryti to amã cre.

³ Apê ijõ Pahhiti pê Pahpãm!
Quêt ampeaj kam acarôt tÿjti!

Acatihti cakrô,
mã ihtÿj cute me ato me amji kam hapac xà jürkwa kam

cuwênre me, xiprôre amji mã hahê to, cute kam amji mã intore to ipijapar xà caxuw.

⁴ Por cute me ato amji kam hapac prãmte, gürkwa mã hãn ne me acjêj, ne me hapôj atajê ri hãn ne ampeaj kam me hakry xà, ne hõtpê acatihti na me amã cre!

⁵ Ne por apîn amji mã me carôt cwa, ne ma Krîpinkrên jõ hàpkàjti pê Xijãw na me to hàpir, gürkwa wÿr me to cator prãmte atajê ri, ampeaj kam me hakry xà.

⁶ Ne caprũm crãre nõ kôt me mör xà ata kam, ca ha atÿj me cumã ihkôt cô catõc ne ipijapjêr na to, quê ha ajpjê.

Ne quê ha hanea ne ta cakônĩ nõ wrÿ,
quê ha ampeaj kam hîpô hàhtô.

⁷ Ne me mör kwÿa kam,
quê ha ihtÿj me carôt ita me cumã ipicamên to mō.
Ne ma Krîpinkrên kam,
cute me ato amji kam me hapac xà jürkwa wÿr me cato,

ne me apê pahpãm cahàc krekà cunea jirôa pê acati ne apê Pahhiti impeaj na me apupu.

⁸ Mehcunea jirôa pê ijõ Pahhiti pê Pahpãm carôt tÿjti ita,

ite amã icakôc xà ita na, ikampa.

Apê iquëtti pê Jaco xwÿ jõ Pahpãm ita, ikampa.

⁹ Pahpãm, ate amji mã me ijõ pahhi capi ne hãm ata krã kam garcô mẽ,
ne to impeaj ne.

¹⁰ Wa ite jũ ri amji to amcro jãhtô to mir romã, wa ha gürkwa kam amji to amcro pyxit peaj.
Ne mehkrã kên jürkwa pejti kam ijãhhuc romã ri, imã cormã gürkwa jarkwa mã mencjêj xà kam ixãm na

amji to prãam to amji to prãm.

¹¹ Pahpãm, apê me ijõ Pahhiti, ne apê pyt pyrãac, ne ampeaj kam acati ne aprãti, ne apê me itête gãmtàr catê.

Ne gãhcãjrënti to, amã me ikĩnti kam, ca hãn ne me ito impej,

ne mehcunea kam mare mã me ito me icati.

Ne por catyt kam, mempejti to ame ipa atajê pê ri, nee ate ampo pejti intê xà nare.

¹² Mehcunea jirôa pê apê ijõ Pahhiti carôt tÿjti ita.

He ampeaj kam ri amji mã me ato ihhimpej atajê cunea jakry pit.

Pahpãm pê ampo kên pê me pahpytãr catê na men-cr-er

91 Ÿhÿ me ikwÿ!

Quê ha me anõ mã, ampo kên pê amji pytãr to prãm na,

ca ha Pahpãm mã amji cajrên,
quê ha Pahpãm pê me pahcunea jõ Pahhiti pahtÿjti ata,
ihtÿj atête amtã.

Cwÿrjapê ca ha gapacta ne me pajõ Pahhiti pê mehcunea jirôa pê ihpahtÿjti ata mã me amji jarên to,

² “Apê ipytãr catê,
ne apê ampo kên cunea pê itête gãmtãr catê,
ne apê ijõ Pahpãm,
na wa itÿj ate ijamãr na amji mã ato hane” hane.

³ Quê ha Pahpãm ihtÿj ampo kên pimxur te akên mã amên xà ata pê apytã, ne atête axà te acuran xà ata pê amtã.

⁴ Quê ha ihtÿj amji jarkwa pa,
ne ampo te ato kên xà ata pê apytã.

Quê ha ihhêj rũm cupê ampo jara, ne hara to apro, quê ha nee ihkrac ri ampo acaxun nare.

⁵ Cwÿrjapê quê ha nee amã caxwa ri ampo kên awÿr pra atajê cupa nare.

Ne quê ha ihprôt pê amcro kam ampo kênre ata awÿr cato,
ca ha nee hũpate apu akrihkrit nare.

⁶ Ne nee amji mã, por awcapãtkô kam,
hã kênre picrãn ata cupa nare,
ne nee amji mã amcro kam ampo te ame ato hamre xà ata cupa nare.

⁷ Ne quê ha me mir ne me ty, ne awke rũm me ajxwÿ,
ne me tej mir ne me ty, ne awpôc rũm me ajhu cakrô,
quê ha nee ampo kên ato kên nare!

⁸ Na ca ha cama xa ne ankrêre ne apu rît.

Ne ca ha atÿj Pahpãm te me hũpar nare me,
mehkrã kên te ampo kên ton atajê jahpan xà na,
cute ame to kên na me to ihtÿj tu na me hõmpu.

⁹⁻¹⁰ Ate amji jarên to:

“Pahpãm catia pê ijõ Pahhiti ata pê ri,
por curi ipimxur xà ata,
ne cupêa ri itête hàmtãr catê!” hajÿr.

Cwÿrjapê quê ha nee ampo kên gürkwa wÿr cator ne jũ mã aton nare.

¹¹ He quê ha Pahpãm côjkwa kam cumã me hàpên catêjê mã harkwa ta,
quê ha harkwa kôt,
por ca jũ ri apu amör xà ata kam me gamã,
ne me atête me hàmtãr to ipa.

¹² Ne quê ha me gamãr to hanea,

pom què jùm xùmre pry kam kèn te ihkra par tõi cu-pate,

ma hũkra to, to huphê ne hamã he.

13 Ca ha Pahpãm cãmtàa rũm

atỳj me acurê xwỳn pê rop jõkre hòhti me,

me cupê cagã kêanre pyrãc atajê me,

me ajpu, ne me kam acuhhê, ne me tohjê.

Què ha nee jũmjê itajê nõ ato kèn nare.

14 Na què ha Pahpãm amji mã garên to:

“Wa ha itỳj me cumã ikĩnti itajê pytã.

Ne cute amji mã me ito ihhimpej atajê, wa ha itỳj mentête amtã!

15 Ne què ha kam ampo kèn cato, què ha imã amji cajrên,

wa ha kampa ne ramã curia cahê na xa,

ne pa ampo kèn pê hũtà,

ne pa mehcunea te amji mã me hũpahti xà na me to,

què ha amji mã me hũpa.

16 Wa ha cute amji to ipijapar to irya na to,

ne cute amji to ipijapar xà ata kam,

ahnaa mã, wa ha itỳj hũtàr to ipa” hane.

Pahpãm to me hàmnãn na menrcer xà

95 Hacme, ne me pajõ Pahhiti pê Pahpãm to me cati prãmte,

me cumã me pahcakõc!

Ne cupê me pahpytãr catê pyrên me pajakryti to,

cu me cumã cre!

2 Hacme, ne Pahpãm to me amji kam hapac xà jũrk-wa mã me axà!

Ne curia cu ha cuna mã,

cute me pahto impejti ita pyrên me pajakryti to

cumã me amji jarê,

ne pahtỳj me cumã cre!

3 Ne mër ampo na mã cu ha me to hane?

Nee mã ampo na cu ha me to hajỳr nare.

He me pajõ Pahhiti pê Pahpãm carõt tỳjti ata ri,

pjê cunea kam,

pahpãm cahàc cunea jõ pahhiti carõt tỳjti atajê

jirõa pê cati.

4 Ne pjê cunea to ihhimpej,

ne ahkre ryti rũm to ihhimpej kam pra,

ne ma kèn kàhti ata mã to hahê.

5 Ne taa cute cõxwa ton ata to ihhimpej,

ne taa hanea ne cute pjê ton ita to ihhimpej.

6 Cwỳrjapê cu ha ma me pra ne Pahhiti cuna mã

me pahkõn krã na me jỳ,

ne cumã impejti na me harê.

Hacme ne me cumã:

“Apê me ijõ Pahhiti pê me iton catê” hane.

7 He cupê me pajõ Pahpãm to Pahpãm,

ne me papê mehkwy, mã me pajamã.

Ne me papê hõ parxare pyrãac,

mã ihtỳj me pamã me pahte ampo pej na prãm xà atajê gõ.

Cwỳrjapê cu ha ita kam

cute me pamã ihcawpa xà atajê na me kampa:

8 “Nee ca me apê me aquêtjêa ne me gãprãr xi nare.

He pê me aquêtjê me hàprãr xi cwỳrjapê

pê põi kam me hamreare ata kam,

ajco amji caxuw cõ na me icyt to me ipa.

9 Pê wa caku te cwarênta kam,

me kam mare mã icarõat kõt

ajco ampo catia pihhoti atajê ton to ipa,

ne ajco me cumã harte,

ne ajco me cumã cõ gõ,

ne ajco me curê xwỳn pê mentête amtã.

Pê mento jĩa to ahna me ipupun cakrõ,

cute me icapi prãmte amji caxuw me icyt,

ne ajpên mã me ijarên to:

‘Nee Pahpãm me pajamãr pej nare’ hane.

10 Pê wa caku jãhtõti ita cunea kam me aquêtjê itajê kam icryc,

ne ma amehcaca ne pa amji mã me to icakõc to:

‘Mehkrã kèn atajê te amji kam hapac xà kêanre,

ne cama ijarkwa jirõ pê mehpỳpym to me mõ,

ne ma ame ijarkwa par caca’ hane.

11 Ne wa me kam icryc to icryc,

ne ampeaj kam ite me cumã amji jarên,

ne me ahna amji jarên tu, ne me cumã:

‘He me gũpar nare ita kam,

ite pjê to me amã ijũjahkre ata mã me acunea xàr.

Ne kam me akõt xà ata kam,

ca ha nee jũ caxuw curi me axàr nare.

Na ca ha ita ri põi ita kam me atyc pa,

què ha me akra pit pjê ata mã me axà’ hane”.

Hõ, me pajõ Pahhiti, amcro ita kam me pamã ihcawpa to hane,

na cu ha pahtỳj me kampa.

Pahpãm te mehkwy mã pahhi xãm te me curê xwỳn tohjê na menrcer

110 Pahpãm pê Pahhiti te ijõ Pahhi mã:

“Icahê na, Pahhi jỳr xà kam, awpõc rũm jỳ.

Wa ha apar krac ri me acurê xwỳn atajê cunea nõr na me to,

què ha me nõ.

Ca ha ate me tohjê na cute me gahkre pej xà na,

me hipy apar xãm” hajỳr.

2 Què ha Pahpãm Krĩpinkrên pĩn, ijõ Pahhi mã,

cute pjê to ihhimpej xà ata caxuw carõt cunea gõ, ne cumã:

“Apê pjê jõ Pahhi ne acarõt tỳj.

Ne acarõt tỳjti ita to,

ca ha acurê xwỳn catêjê cunea jirõ pê acuhhê partu,

ne me to ahimpej.

3 Ne ca ha me cume apijapu kam me tẽ me ajkaam,

què ha me acahê na me ipijapu xà caxuw,

me akwỳ me hàhtõa ne me amji to ajpê.

Ne me cupê pĩhhõ na atãr pyrãac,

ne pjê cunea kam me hàhtõa to me hàhtõ.

Què ha mentuwjê, me cumã amji kĩa kam,

Krīpinkrên jō kên pejti atajê kam me acajpa,
akôt me ipijapu xà caxuw” hane.

4 Ne Pahpãm pê Pahhiti te ampeaj kam ijō Pahhi na
amji jarên to hajÿr,
na quê ha nee jū caxuw amji pê
cute cumã amji jarên xà ata to hapac kêt nare.
Na ri Pahpãm te ijō Pahhi mã:
“Ca ha gōtpê apê me akwÿ jō Pahhi.
Ne hanea ne apê imã mehcajrên catê rohnÿtti mã.
Ca ha apê mam imã mehcajrên catê pê Merquixê pê
Pahhi ata pyrãac,
ne hapua na apê imã mehcajrên catê pê Pahhi” hajÿr.

5 Ÿhÿ Pahpãm, ca ijō Pahhi tehcajpar xà caxuw,
cahê na akrī ita na.

Ne ca ha jū caxuw pjê jō pahhi kwÿ kam acryc,
ne mehcunea to hamre.

6 Ne quê ha cute jū caxuw pjê cunea kam ate
mehcunea cukij,
ne me to apicokjêr xà jō amcro kam ahtwÿ,
ca ha mehkên jahpan xà na,
pjê kam me hàhtôa ne mehcura ne me to hakôat to
hakôt,
ne pjê cunea kam pahhi catêjê cunea to hamre partu.
7 Ne quê ha ijō Pahhi pry cahê na cô ajpjê ata to ikō,
quê ha cumã carôt catia to cati,
cute me hirô pê ihcuhhê xà caxuw.

Pahpãm jarkwa jō kàhhôc na menrcer

97 Ÿhÿ me ijō Inxū Cati, wa ha garkwa na amã amji
jarê.

He ampeaj kam imã acaca xà itajê cunea kīn!

Wa to amji japackrea to pyt.

98 Ca gōtpê ate imã, ate ijapackre xà jōr,
wa ite amji mã huwahi ata kôt,
ca ha me icurê xwÿn jirôa pê hăn ne ito amji jahkre
pej.

99 Wa cute me imã ampo to hahkre catêjê jirôa pê
hăn ne imã hahkre pej.

Ampo na?

Wa hăn ne ate imã ampo itajê to hahkre xà impejti
itajê to amji kampa na wa.

100 Wa itÿj acaca xà kampa, ne amji mã hūpahti to
ipa,

na ri mehwej jirôa pê imã hahkre pej.

101 Itÿj imã garkwa par to prãm,
cwÿrjapê wa nee ampo kên ton to ipa nare.

102 Ne nee wa ate ampo na garkwa atajê ton jicu
nare.

Ampo na?

He caa pê ca imã to hahkre na ri.

103 Ne ate imã garkwa jirên itajê cunea inxô pit!
Ne imã ihhêj ne pen jirôa pê inxô.

104 He ate imã ampo to hahkre xà kôt ri imã hahkre
pej,
na wa ma apu cute me amji kam hapac xà hêj xi xà

atajê cunea impar caca,
ne ma ame curê.

105 Garkwa ita pê ihhêj rŭm
hàhcujro xà nō te imã gō pry cujro,
ihkôt imōr xà caxuw.

Na wa ihkôat amji kam ijapac xà to impejti to ipa.

106 Na wa ite apar na amã amji to ijūjahkre,
ne wa ha itÿj ampeaj kam,

amji mã ate ito ahimpej xà cuhtacti itajê kampa!

107 Ijō Pahhiti, imã ite amji pupun xà itajê kêanre!

Ne pom ca ate imã ampo pejti na amji to gūjahkre ita
na ca ito,

ne imã icarôt gō, mār wa ityc xà jahpa.

108 Ÿhÿ, Pahpãm, ate ito kênre nare ita pyrên wa
ijakryti to,

ite amã amji jarên xà ita na, ca ha atÿj amji capa,
ne ate ampo to imã ahimpej xà ita to imã hahkre.

109 He ihtÿj hōtpê jŭmjê atajê ame icuran prãm cakrô,
wa nee ate amji kam gapac xà to, ite amji pê ijapac
kêt nare.

110 Ne mehrã kêanre atajê te me imã ipro xà ton,
ne me imã hãm, cute me to ipro prãmte,
cakrô wa nee ite,

ate ampo na ito ahimpej xà atajê kam ijapac jicu nare.

111 Ate imã ampo to hahkre xà itajê pê itekjêa.

Na wa ha itÿj amji mã me huwahi, ne amji caxwãm pê
me cunō,

mã ihtÿj ina cuhkônre kam me imã ijakryti to.

112 Na wa ite amji mã garkwa ita par to ikrī,
ne ahnaa to hicu xà mã mên na amji ton.

Pahpãm pê me pahpupun catê na menrcer

121 Wa hăn ne rīt ne hàhkà jakôt pupu ne pa amji
cukij to:

“Xà quê ha ajkī hàhkà jakôt ita pīn,
cute itehcajpar catê ata cato?” hane.

2 Hãpà!

He quêt Pahpãm pê Pahhiti

pê pjê me cōjkwa to ata pê ri itehcajpar catê!

3 Ne cupê me pajamãr catê, mã ma me pahto huphê
ita kam,

quê nee ampo te me pahnō mên na hamãr nare.

4 Ne cupê me pahkwÿ pê Ixaher catêjê jamãr catê ita
kam,

quê nee jū caxuw hōtxwa quê nō ne apu hōt nare.

Ne nee apu hōt nare, ne irīat na quêt ihkrī.

5 Me pajō Pahhiti pê me pajamãr catê,

quê ha ihtÿj me pahcahê na ipa ne me pahpytār to
ipa.

6 Quê ha nee pyt cacro me pahnō mên nare,

ne nee quê ha caxwa ri, putwÿr na,
ampo xà me pahwÿr cator nare.

7 Quê ha me pajō Pahhiti

ampo te me pahto jū măn xà atajê cunea pê me pah-
pytā,

ne nee què ampo te me pahnõ to jũ mǎn na hamǎr nare.

⁸ Ne cu ha ma jũ kam me pra, què ha ihtỳj me pajamǎr to mõ,
ne cu ha hacpỹ ne me amji jaxà,
què ha hanea ne ihtỳj me pajamǎr to mõ.
Ne què ha me pahto hajỹr to hǎm ita na,
ne nee jũ caxuw me pajicu nare.

Krĩpinkrên to me hǎmnǎn na menccrer

122 Ijõ krĩ kam cute Pahpǎm jũrkwa wỳr me ija-tor, ne me imǎ:

“Hacme, Pahpǎm to cute me amji kam hapac xà jũrk-wa wỳr!” hajỹr,

ata pyrên ijakry, ne imǎ amji kĩn crire nare.

² Na wa ramǎ hỹrmǎ me icator, ne itỳj Krĩpinkrên kam ame ipa.

³ Ne ramǎ hacpỹ mǎ cute me Krĩpinkrên to impej.
Mǎ ramǎ Ixaher catêjê jakrǎ amehcuhhê atajê te hỹr-mǎ me cuprõn.

Mǎ jũm te mehcukij to,

⁴ “Měr ampo na mǎ me hõ krĩ cunea pĩn,
Krĩpinkrên wỳr, me hǎpir to me ipa?” hane.

Wa cumǎ:

“Nee mǎ ampo na nare!

He cute ampo pej cunea pyrên me hakryti na,
me Pahhiti pê Pahpǎm mǎ me amji jarên prǎmte ri me ipa” hane.

Hõ, ita na ri cute mehcunea mên,
mǎ harkwa kõt cute me ton.

⁵ Ne ita ri mehcukij xà kam hõtpê me pajõ pjê jõ pah-hi.

Ne cute ajpên kõt me harên catêjê atajê kampa,
ne catyt kam mehcukij,
ne ajkam me to impej.

Ne ita ri me cupê pro kam atajê ihcunea na,
ihtỳj me ajpên kampa.

⁶ Hacme, ne Pahpǎm mǎ Krĩpinkrên kam amehkrĩ atajê cajrên.

Cu ha mehcajrên to hane he:

“Ca ha ma me hamǎ,
mǎr què ajpên na mehhõncoti to me ipa.

Ne por krĩ kwỳ mǎ, Krĩpinkrên kam amehkrĩ catêjê kĩn atajê,

ca ha hanea ne me to impej,
mǎr què me cuxà mempej pêa mǎ me ipa.

⁷ Ne imǎ Krĩpinkrên têtê kwỳc tỳjti me,
cute me hamǎr catêjê jũrkwa tỳjti atajê to,
cute me curê xwỳn pê, me amji pytǎr pejti na me to prǎm,

mǎr què ikre atajê cunea kõt me ankrê,
ne nee ame amji mǎ ampo cupa nare, ne mehcarićti ne.

⁸ Ne por krĩ ata kam, me ikwỳ me, me ikjêjê ame ipa atajê,

ca ha hanea ne me to impej, què mempej pêa mǎ ame ipa.

⁹ Ne měr ampo na mǎ wa ame ana ijàhwỳr to hane?
He apê me ijõ Inxũ Cati pê Pahhiti to
ite amji kam me ijapac xà jũrkwa ita,
ita ri krĩ ita kam ihcuhhê,
na ca ha ipu na amehkrĩ atajê to hanea ne impej,
mǎr què me cumǎ amji kĩn jakryti kam me ipa” hane.

Pahpǎm pyxit peaj pê ampo kên cunea pê me pah-pytǎr catê na menccrer

124 Ite me ikwỳ cukij to hajỹr he:
“Ỳhỹ, me ikjêjê, wa ha me acukij,

ca ha me imǎ me amji jarê.

Què ha me parũm Pahpǎm hamreare na mǎ,
jũ mǎ què ha ampo te me pahto kên xà ata me pah-to?” hajỹr.

²⁻⁵ Mǎ me ikwỳ te imǎ me amji jarên to:

“Què ha me parũm Pahpǎm hamreare na mǎ,
què ha me pahcurê xwỳn te me pahkam incryc to imprar xà ata pê ihhêj rũm,
cute me pahťiar na me pahkur xà pyrǎac.

Nare, què ha cupê ihhêj rũm cõ te hipu ne me pahcu-tor tu,

ne ma ahpar mǎ hũwrya wỳr me pahto imprar,
ne irorociti pahťyiti to cute me papĩr pyrǎac” hajỹr.

⁶ Ite mehkwy mǎ harkwa to hajỹr he:

“Pê me pajõ Pahhiti te me pahcurê xwỳn te me pahto hamre na

hamǎr nare pyrên me pajakryti to,
cu ha cumǎ me amji jarê.

⁷ Pê cu ihhêj ne me papê cuwênre pyrǎac.

Pê Pahpǎm cuwênre jahêr catêjê te me pahpro xà ton atajê pê
me pahpytǎ.

Ne ihhêj rũm me pahte na hê xà ata ta, pê pàt,
ne hamre, pê cu pahťyj ame papa.

⁸ Me pajõ Pahhiti pê cõjkwa me pjê ton catê,
ne cupêa ri me pahtehcajpar catê ata pyrên me pa-jakryti na,

cu ha me cumǎ amji jarê” hajỹr.

Pahpǎm jàhcajrênti na amji mǎ me to hajỹr na menccrer

127 Què me pajõ Pahhiti pê Pahpǎm
ikre xǎm na ikre pyxwỳr catêjê ràn nare na

mǎ,
què nee me amji mǎ hamǎr, ne me hǎm nare,
què tee ame to hahkree, ne me to hǎpên jicu.

Què me pajõ Pahhiti
krǎhtare pê krĩ jamǎr catêjê te krĩ têtê hǎmtǎr na mehràn nare na mǎ,

què tee ame krĩ têtê hǎmtǎr to hahkree ne me hicu.
Ne jũ wỳr què apu amji mǎ hamǎ ne me hũtǎr to im-pej.

2 Jũ wỳr cu me pajàpên pejti to prãm to, iràràa na me pahkrĩ,
 ne me pajàpêan pê me pajàpên kam pra,
 ne me pajàpên to awcapàtkô rytu ne me cumã hikra ne pra,
 ne me pajikwa ne ame amji mã hamã.
 Ampo na?
 He Pahpãm mã mehkĩnti atajê te me hàpên xà jicu jirô pê
 me hikwa ne ame hõt.
 Mã cutea me cumã harte xà caxuw ihtỳj me cumã hõ to.

3 Ne me pahkra pê ri ihhêj rũm
 Pahpãm te me pamã ampo pejti jõr xà atajê,
 mã ihtỳj me pamã cugõ.
 Cwỳrjapê ri ihtỳj amji kôt me pahwỳr
 me pamã ampo pejti jàhtôa ne me to hapõj.
 4 Ne me hũmre, mentuw kwỳa kam
 me cumã mehkra hàhtôa to me hàhtõ.
 Ne hãn ne mehwej mã me taa me hũtà, ne me hamã.
 Atajê pê ri ihhêj rũm krãhtare jũhkra kam
 cute amji tète hàmtàr xà caxuw me cumã hõ kruw
 jàhtôa pyrãac,
 na quê ha mehkra atajêa to amji tète hàmtàr to ihkrĩ.
 5 Por me hũmre mã mehkra jàhtôa to me hàhtõ atajê
 pyrên
 ampeaj kam me hakry.
 Ampo na?
 He me cupê ihhêj rũm krãhtare mã hõ kruw jàhtôa to
 hàhtõ pyrãac.
 Ne jũ wỳr quê curê xwỳn nõ amji mã hamã ne me to-
 hjê.
 Jĩkjê na mã
 me hũmre mã mehkra jàhtôa to me hàhtõ atajê te
 me hajỳr.
 Quê ha mehcukij xà kam curê xwỳn nõ me ajpên kam
 tẽ,
 quê ha cumã hamãr catêjê pê mehkra jàhtõti itajê me
 hũtà,
 quê ha nee jũm tohjê nare.

**Pahpãm te me pahtehcajpar na me pajàhwỳr na men-
 crer**

130 Pỳj me hêj xi ijõ Pahhiti!
 He ityc xàa wỳr ikrã pictor tu ata kam,
 wa itỳj ate itehcajpar prãmte ana ijàhwỳr.

2 Ijõ Pahhiti, ite amã icaràr xà ata na ikampa!
 Ne ite amji pytàr xà na ijàhwỳr xà ata to, ca ipytà!
 3 Ca ha ite ato kên xà itajê to,
 ate amji japackre prãmte ahna ihkàhhõc to na mã,
 jũ mã wa ha, ne ate icurê mã imên xà ata pê icato,
 ne ma jũ kam tẽ?
 Hamreare!
 Ca ha atỳj hahpan xà na ikên mã imẽ.
 4 Cakrõ, ca nee ate ito hajỳr nare.
 Ne quêt cama atỳj, ite ato kên xà itajê to tojnõ,

ne nee hipêr to amji japackre nare,
 mår wa ihkõt amji mã acupahti to ipa.

5 Ýhỹ me ikwỳ, wa ite amji kam ijapac xà cunea to
 Pahhiti te itehcajpar na hikaj.
 Ne ampeaj kam wa itỳj cute ampo na
 imã amji to hũjahkre xà ata na
 amji mã to hane.

6 Ne pom krãhtare pê caxwari krĩ jamãr catêjê apê xà
 jikaj ata jirôa pê,
 wa itỳj ijõ Pahhiti jikaaj to hikaj.
 7 Me ikwỳ pê Ixaher catêjê atajê,
 ca ha atỳj ampeaj kam Pahpãm to me amji mã hanea
 to me hane.

Ampo na?
 He cumã me akĩn rohnýtta mã,
 ne hõtpê ihtỳj cumã me apytàr prãm.

8 Na quê ha ihtỳj Ixaher catêjê
 pê mehkwỳ atajê te ame to kên jahpan xà na,
 cute mehkên mã me hàr xà ata pê me hũtà.

**Pahpãm mã ihcunea na me pajahkre pej pejtu na
 men-crer**

139 Ijõ Pahhiti, ca ramã ate ipupun pejtu
 na ri amã ijahkre pej.

2 Ne ramã ite ampo ton xà atajê cunea na amã
 ijahkre pej.

Ne ampỳa mã amã ite amji kam ijapac xà cunea na
 ijahkre pej.

3 Ca ijàpên xà cunea me, ite apu ikõt xà atajê cunea
 kam ipupu,

ne ite ampo ton xà atajê cunea na
 amã ijahkre pej.

4 Ne ite jũm mã ampo jarên xà ata xwỳjrea na,
 ramã ite harên xà ata na amã ijahkre pej.

5 Ne jũ ri apu imõr xà ata ri,
 ca atỳj ipu na apa,

ne acarõt to itête gàmtàr to apa,
 ne imã ijõ pry to hahkre to apa.

6 Ne ramã ate ijahkre pej xà ita pupun pejtu,
 wa nee ajte akĩnte ite amji pupun pej xà ita na,
 ite amji jahkre pej nare.

Ne ite ahna amji jahkre pej xà ita ipê ipimxur tu.

7 Ne jũ kam wa ha apê tẽ?

Ca pjê cunea kam apa xà ita kam,
 jũ mã wa ha ajte ne jũ kam apê hawry?
 He wa nee jũ kam, apê ijũjawry nare.

8 Wa ha ma cõjkwa wỳr api,
 ca ha curia ramã apu mõ.

Nare, wa ha ma pjê krac ri mehtyc krĩ xà wỳr wrỳ,
 ca ha curia ramã apu mõ.

9-10 Wa ha pyt japõj xà wỳr ite itor ne itêm na,
 nare, ampỳa mã pyt cjêj xà kam amji to ipijapar cakrõ,
 quê ha cormã gũhkra imã ijõ pry to hahkre to mõr ita
 na.

Ne wa ha jũ ri cormã apu mõ,
 ca ha curi atỳj itehcajpa.

11 Wa ha awcapàtkô mã ijarkwa to:
 “Ito amxu” hane,
 ne hanea ne amcro mã ijarkwa to:
 “Amji to awcapàtkô” hane,
 quê ha kam awcapàtkô cakrô,
 wa ha nee apê ipimxur nare.

12 Ampo na?
 He amã awcapàtkô kam ampo pimxur ata pimxur nare.
 Ne amã awcapàtkôti ata pê amcro jô apê.
 Ne amã awcapàtkô me amcro pipëan.

13 Ne caa pê ca ahpÿanre na imã icukrã xà ton pa,
 ne inxê cahã xà caxwãm pê ajkam ipyxwÿr pa.

14 Na wa itÿj amji mã apejti na garë.
 Ampo na?
 He ate ampo ton xà atajê cunea pihho
 ne hahkre pej xà pimxur tu,
 ne ajtea mã, ne quêt impejti.
 Wa ite amji kam ijapac xà cunea to gápên xà ita na,
 ite gahkre pej pejtu.

15 Pê ca inxê tu kam ihi ton xà me, ite amji jipêj xà na ipupu.

Pê wa aracri, jÿm te ipupun nare kam,
 inxê cahã xà kam ipicamën to icati to mō.

16 Ne pê ca ipÿm xwÿjrea na ramã ipupu.
 Ne caa ramã imã jÿ mã ite amji to ipijapar xà na
 amcro atajê na gō kàhhôc kam ihhôc hiahpuro, mã
 hikwa,

cormã amcro jamre reria mã.

17 Pÿhàpà ijô Pahpãm,
 ate amji kam gapac xà itajê cunea jahkre pej xà
 jahkre kêatre!

Ne ampeaj kam hàhtô ne impej pit.

18 Wa ha hàhtô na ite hahkre pej prãmte cahyt xà na mã,
 quê ha imã hàhtô pê ihhêj rÿm pjênxôm carôt jàhtô.
 Wa cahyt, ne cahyt,
 ne nee jÿ caxuw cahyt jicu xà mã to mën nare,
 ne kaam gōr.

Ne wa iràrà na ampra, ne hãn ne acahê na ipa,
 ne ato amji japackre pyrentu.

19 ÿhÿ ijô Pahpãm,
 he imã ate atÿj mehkrã kên te ampo kên ton to ipa
 atajê curan,

ne me to hamre na to prãm.

Ne imã ate me hàprêhti jÿhcaprô prãmte atajê to
 ipê gÿjawry tu na to prãm,
 mãr quê me hawry, wa icarÿcti na ipa.

20 Ne me acurê xwÿn atajê ato mehcakôc xà kêanre
 to me ipa,
 ne ihcaprÿ na gaprÿ to mehkêanre to me ipa.

21 Ijô Pahhiti, pom ma ame acurê,
 ne ma ame apynãr caca itajê ri,
 ite hajÿar ne ihtÿj imã me curê, wa ma amehcaca!

22 Wa me curê xà cunea to me curê to ipa.
 Ampo na?

He acurê xwÿn itajê pê hanea ne icurê xwÿn to icurê
 xwÿn.

23 ÿhÿ, ijô Pahpãm!

Gapacta ne ikôpÿ ne icaxwÿn na awcapi,
 ne ite amji kam ijapac xà cunea na ijahkre pej.

24 Ne imã, ihhêaj to ite ijô pry cupan xà nō ata jarë,
 ne quêt mehtÿr rohnÿtti mã xà ata jô pry wÿr ca ito
 mō,
 ne kam imë, wa ihkôt mō.

Pahpãm to me pajàmñan na menccrer

145 Ijô Pahpãm pê ri ijô Pahhiti,
 wa ha mehccunea kam mare mã acatihti ita
 na ana cre!

Wa ha jÿ caxuw acati na garën to amji pê ijapac kêt
 nare,
 wa ha quêt garën to ipa rohnÿtti mã.

2 Ne amcro cunea kam wa apyrên ijakryti na amji
 jarë,

ne ato amji kam ijapac to ipa rohnÿtti mã.

3 Ijô Pahhiti, ampeaj kam acati!

Na wa ite amã acatihti to icakôc xà ata na amã ihkên
 nare,
 ne quêt acajpuaw.

Ne jÿ wÿr wa me inō amji mã hamã ne acatihti ita na
 gahkre pej.

4 Ne pom ate ampo pejti carôt tÿjti ton itajê cunea,
 quê ha ihtÿj me hÿmre mehkra mã me harë,
 quê ha me kampa.

Ne me taa, hanea ne mehkra mã me harë,
 ne me to hajÿr to mōr rohnÿtti mã.

5 Quê ha gâhcujrohti me apê Pahhiti pejti ita to
 mehcakôc.

Wa ha pa gápên xà impejti itajê cunea kôt
 itÿj ato amji kam ijapac to ipa.

6 Ne quê ha me taa mehccunea mã
 gápên xà carôt tÿjti atajê cunea kôt harën to me mō.
 Na wa ha hanea ne me cuxà gápên xà catia na garë,
 ne mehccunea mã ato icakôc pejti ne.

7 Ne quê ha mehccunea ihtÿj me hirôa pê apejti ita na
 me ato amji japackre xà kôt me amji mã,
 amji kÿn ton to me ipa.

Ne ihtÿj ate amji kam gapac xà cuhtacti ita na me cre.

8 ÿhÿ me ikwÿ, Pahhiti pê jÿm peaj to impej ata.

Ne nee cupê ampo kam incryc kam imprar pyrentu
 catê nare.

Ne cumã me pahkÿan to me pahkÿn, mã ihtÿj me pah-
 caprÿ.

Ne hãn ne hōtpê pahte me pahkên ton jicu jirô pê
 mã,

ihÿj me pahkên to tojnō, ne hicu.

9 Ne mehccunea mã impeaj to impej.

Ne cumã cute ampo cunea ton itajê caprÿ xà.

10 Hàpà me ijô Pahhiti pê Pahpãm!

Wa ha pjê kam me icunea itỳj amji mã me acupa,
ne ato amji kam me ijapac prãmte me ana cre.
Ne me akwỳ cunea, quê ha apyrên me hakryti na me
amã amji jarê.

11 Quê ha me hirôa pê apê Pahhiti ita na
mehcunea amji mã me ato ihcakôc.
Ne ihtỳj acarôt tỳjti ita na amji mã me garê.

12 Mãr quê mehcunea
ate acarôt to gâpên xà ton atajê cunea na me apupu,
ne apê Pahhiti catihti ata na me gahkre pej.
Ne quê ha ihtỳj mehcunea mã
ahimpej xà jâhcujro tetetti carôt tỳjti ata jahkre pej.
13 Ne ate me ito ahimpej xà ita jamre xà hamreare.
Ne apê Pahhi pê Pahhiti rohnỳtti mã.

Ỡhỹ me ikwỳ, Pahpãm hãn ne ampo to awjahkre,
ne ihtỳj hõtpê harkwa ata to amji japackrea rũm ihkrĩ.
Ne cute ampo ton xà atajê cunea kam, cumã me
pahkĩn pit.

14 Ne ihtỳj ampo kên mã mencjêj atajê tehcajpa,
ne ihtỳj hanea ne cute me to ihcupan atajê tehcajpa,
ne hacpỹa mã catyt kam me ipa na me to.

15 Por ampo cunea tĩar atajê,
ihtỳj hõ to hàpàn xà ata kôt Pahpãm pupu.
Ne cute me cumã ampo na me prãmti jõr xà atajê na
ihtỳj me hikaj.

Mã hãn ne cute me cumã me hõ jõr xàa jõ amcro na
me cumã cugõ.

16 Ne ihtỳj hãn ne hũhkra mã hikra, ne nee apu hũ in-
tê nare,
cute ampo cunea tĩr atajê mã ampo na prãmti atajê
jõr prãmte.

17 Pahhiti te ampo cunea ton xà caxuw ihcunea na
catyt kam ipa,
ne ampeaj kam hàhcaprĩ.
Ne ampo cunea na cute me pahto impej, ne cumã me
pahkĩn.

18 Ne por amji tehcajpar xà na ampeaj kam me cuwỳ
atajê cahi na ipa,
cute mehtehcajpar prãmte.

19 Pahhiti ihtỳj cute amji mã me hũpahti atajê mã
ampo na me prãmti atajê gõ.

Ne ihtỳj me caràr kampa, ne hãn ne me hũtã.
20 Pahhiti ihtỳj me cumã ihkĩnti atajê tète amtã,
ne mehkĩnte mehkêanre atajê intête nee hàmtàr
nare,
ne cama hãn ne me to hamre.

21 Ne ampo itajê cunea cwỳrjapê,
wa ha ijõtpê Pahhiti catihti na harên to ipa rohnỳtti
mã.

Ne imã pjê ita cunea kam,
icuxà cute me Pahhiti japrỳ pejti na me harên na
me to prãm rohnỳtti mã.

ME HAPACKRE XÀ

Ýhÿ, Tawi xwÿ kra krã kreti japry te Xarômãw xwÿ pê Ixaher catêjê jô pahhiti catia, ne cute ihkrã kreti kôt ihkàh-hôc to incrê ne ihhôm. Ne mam ita japry te (Me Hapackre Xà). Ne kaam ri Pahpãm jarkwa kôt, cute me pamã, pahte amji to me pahhimpej to me papa to hahkre. Ne pahte amji mã me Pahpãm cupa to me pamã hahkre. Ne ihkôt ihkàhhôm nõ ita ri Xarômãw te ramã ihweitu kam, cute me pamã ihhôm. Ne me pamã me pahkam Pahpãm nare kam, ihcunea na me pahkôt hamreare na to hahkre. Cwÿrjapê ri ihkàhhôm ita japry te (To Hahkre Xà). Ne ihkàhhôm crê ita kam ri cute me hikwa tuw jô increr na ihhôm, cwÿrjapê ri ihkàhhôm ita japry te (Xarômãw Crer Xà).

Pê Pahpãm Xarômãw mã cute amji jahkre pej catia ne cugõ, cute ihkên ton xwÿjrea na. Ne ita caxuw Me Hapackre Xà ita kwÿ mã he.

Me hapackre xà itajê ri ampo cunea caxuw impej

Me Hapackre Xà 1.1-19

1 Pê pahhi Xarômãw xwÿ pê pahhi Tawi xwÿ kra, ne cupê Ixaher catêjê jô pahhiti. Ne pê ihkrã krea to ihkrã kre, mehcunea jirõa pê, ne ajco cute me hapackre xà jarê, ne ahna ihhôm. **2** Ne cute me pajapackre xà itajê, ihtÿj me pahkrã kreti me, cute me pajapackre xà impejti itajê jahkre pej na me pahtehcajpa, ne hanea ne cute me pajapackre xà kam me pajapac jahkre kêatre atajê jahkre pej na, me pahtehcajpa. **3** Ne cute me pajapackre xà itajê, ihtÿj ihcunea na catyt kam pahte amji to me papijapar pejti to me pamã hahkre. Ne hanea ne me pahkwÿ to me pahhêj xi nare kam, catyt kam pahte me to papipênti to me papa to me pamã hahkre. Ne pê Xarômãw xwÿ mã, cute me amji kam me hapac xà impejti to me ipa na me to prãm, na pê me hapackre to hane he.

Xarômãw mã ampo cunea jahkre pej na me to prãm

4 Imã me cupê ampo jahkre kêatre atajê te me ampo cunea jahkre pej na me to prãm. Ne imã cormã mentuwre, mehkà to me ipa atajê jûpar pejti na me to prãm to, wa me cumã mehkã kên cawpa to ipa. Ne imã catyt kam, cute amji kam me hapac xà to, amji to me ipijapar na me to prãm. **5-6** Ne por ramã mehkã kre atajê ri, cute mehkã kreti to me amji mã me ipi-camên na, imã me to prãm. Ne imã cormã cute mehkã kre itajê to me hahkre, ne caxwãm catia mã me hûpar na, imã me to prãm, cwÿrjapê wa itajê cunea na me cumã ihhôm.

Cu ha amji mã me Pahpãm cupahti to me papa

7 Ýhÿ, ca ha akrã kre to prãm, ne mam cati mã Pahhiti pê Pahpãm to amji mã ahimpej to apa, ne amji mã hûpahti to apa. Ne nee apê, por cute me amji jahkre kêatre te ma ame hûpar pejti caca atajê pyrãc nare.

8-9 Ne anã me apãm te amã ampo to hahkre xà atajê na, ca impar to impeaj ne. Quê ha mehcunea ahna me

apupu, ne me gahkre pej, ne apejti na amji mã me garê.

10 Quê ha jûmjê krã kêanre atajê kwÿ me acapi prãmte, cute me amji kam hapac xà kêanre ton xà ata wÿr me gato, ca ha ma apu gitõt. **11-15** Quê te me amã:

— Hacme ne amji kîn ata na ame jûmjê cura, ne ame cupê ampo kwÿ to ahkĩ, ne amji mã ame to ajcrà, ne ahnaa me pajûrkwa to amji mã me hakràj — hajÿr cakrô, ca ha nee mempar nare, ne nee mehkôt amji ton nare. Ca ha me cupê ampÿa mã apu apa. **16** Ne pom mehkêanre itajê mã me hûjarêan kam, cute ampo kên to mehcuran to prãm, ne ihtÿj toa mehcura.

17 Quê ha pryjara nõ te, ate cumã to catêc xà inxôr na apupun na, quê ha nee hÿrmã ihtêm nare, ne ma tẽ ne hawrya ne apu kwÿ. **18** Ne me hÿmre itajê te ihtÿj mehkÿ mã me catêcêc xà jaxôr na amji to me hane, ne aracri cute amji mã me to haxôr. **19** Ne por amji to me hakràj prãmte mehcuran to me ipa itajê, quê ha ihtÿj jûm me hipej xà kêanre to me hipej.

Mentuwjê japackre xà

Me Hapackre Xà 3.1-18

3 Ýhÿ me ikra, nee ca ite me gapackre xà ita to amji pê me gapac kêt nare, ne ite me amã ijark-wa jirên itajê, ca ha amji mã me huwahi. **2** Ampo na? He quê ha ihtÿj ate amji to me apijapar to me caku jàhtôa na, me atehcajpa. Na ca ha ate ihkôt me ampo ton to me hahkre na, quê ha ihtÿj ihkôt me amã ampo. **3** Ne quê hõtpê amã mehcunea kinti ne, ne hanea ne jûm mã ampo to awjahkre, ne atÿj ate amji ton xà ata na amji jarkwa na amji par to apa. Ne hõtpê ita to apa to, nee amji pê gapac kêt nare. **4** Hõ, ca ha ate hajÿr to apa na, quê ha Pahpãm ihtÿj ato impej. Ne Pahpãm me, mehcunea, quê ha me garên pejti to me ipa.

5 Ca ha gĩ cunea to Pahpãm tÿr rohnÿtti mã ata kam gapac to impeaj to apa, ne nee ca amjia kôt akrã kre na amji ton to apa nare. **6** Ne ca ha ate ampo ton xà atajê cunea kam amji caxuw Pahpãm cukij na, quê ha ihtÿj amã hõ pryja jahkre.

⁷ Ne nee ca ate amji jahkre pejti na apu amji to hajÿr nare, ne cama amji mã Pahpãm tÿr rohnÿtti mã ata cupa to apa. Ne nee ate ampo to ihcupan xà atajê nõ ton nare.

⁸ Ca götpê mehxêt cahê xà pejti to amji mã axêt cahê, mãr quê amã to incrí, ca quêt acapënti na apu apa, ita jÿkjê na, ca ha ite amã ate ampo ton xà na ijÿjahkre itajê kôt ate apa na, quê ha ihtÿj amã, ate amji kam gapac xà këanre to impej.

⁹ Ne Pahpãm mã ca ha impejti to acakôc to apa. Ne cumã mam gô pjê kam gâprà kam gô atajê jôr to apa.

¹⁰ Ca ha ate itajê to hajÿr na, quê ha gÿrkwa kam amã arÿjhy hipu tu ne, ne ampeaj kam gô pur kam amã pÿxô hàhtôa to hàhtô, quê ihhêaj to gÿrkwa nee amã cahuc nare.

¹¹ Ikra, quê hãn ne Pahpãm pê Pahhiti ata gÿpar pejti xà caxuw, amji mã ato ihhimpej xà to, ca ha ate kam gapac nare na, quê ha ihtÿj akàj xà na ato, ca ha akàj xà. Ne akàj xà ata kôt ca ha ampeaj kam amji mã kampa, ne cute amji to amã hahkre na amji mã to hane.

¹² Nãmri Pahpãm pê Pahhiti ata mã mehkÿnti atajê to ihtÿj hàpên xà ton to ipa, ahnaa mã me hÿmjê amji mã mehkra to impejti prãmtë, hãn ne mehkra to me hàpên to me ipa he, me hÿpar prãmtë. Ampo na? He cumã mehkÿnti na ri ihtÿj me to hajÿr to ipa.

¹³ Ne por mehkra kreti atajê ri me hakryti, ne ihtÿj me cumã ampo cunea kôt hakop jahkre pejti. ¹⁴ Ne pom mehkra kreti itajê mã ri ihpore cati ata me, kën prà tepti pê ôr atajê jirôa pê cati ne impej, ne ahna hÿ jàhwÿrti. ¹⁵ Ne pom me hÿpar te amji jahkre pejti itajê ri me hõkre xê xà pràti itajê jirôa pê impej. Ne pom cu amjia kôt ame ampo pejti na prãm itajê, nee impej te me pahte amji kam me pajapac xà impejti ita cahuc, ne to ipipên nare.

¹⁶ He me pahkra kreti ita ihtÿj caku jàhtôa kam, pahte amji to papijapar na me pahto, ne hanea ne me pajakràj na me pahto, ne mehcunea te me pampejti na me pahpupun na me pahto. ¹⁷ Ne me pahkra kreti ita ihtÿj me pamã pahte amji mã, pahte amji kam me pajapac xà kÿnti ata na me pahto, ne ihtÿj catyt kam, me pahcarÿcti kam, me pahte ampo cunea ton xà atajê na me pahtecajpar to ipa. ¹⁸ Ne por ampeaj kam me hÿpar te amji jahkre pej krã kre atajê ri me hakrya to me hakry, mã ihtÿj mehkra kre ita me cumã cute amji kam me hapac xà jôr to ipa.

Pyjê xyre pijapit tète mentuwjê japackre xà

Me Hapackre Xà 7.1-27

7 Ýhÿ ikra, ite amã ampo jarën itajê to amji japackrea ne, ne nee jÿ caxuw ite gapackre xà itajê to gapac kêt nare. ² Ne pom wa amã ampo jarë itajê, ca ha to, ne atÿar na amji to apijapar ita na. Ne ite amã ampo to hahkre itajêa kôt, ca ha amji to guphê to hanea, pom ca ato to guphê he. ³ Wa amã ampo jarë itajê, ca ha akrãa kam amji mã anô, ne ma gÿ cunea to, amcro cunea kam, gâpên xà cunea kam to amji japackre. ⁴ Ne ate ampo jahkre pejti ita to, ca ha ihhêj rÿm amji mã atôj, ne cahì na apu apa. Ne ate ampo

par pejti ita to, ca ha amji mã akwÿ nõ to impeaj ne, ne cume ajwar apu apa. ⁵ Quê ha pyjê inxyre këanre atajê pê ampÿa mã ato ajrô. Ne pyjê te mehhêj xi to me hÿmre mã amji to hàkjêr prãmti atajê pê, ampÿa mã ato ipa.

Cahãj xyre pijapit te amji kam hapac xà kên

⁶ Pê wa jÿ ata caxuw ijÿrkwa jarkwa mã xa, ne apu rÿt. ⁷ Ne mentuwjê jàhtôa ne me hõmpu, por cormã mehkra kre nare atajê kwÿ. Ne ite mehnô pyxít krã nare ata mã icator ne hahkre pej, ne ampeaj kam ri ihkra nare. ⁸⁻⁹ Pê mentuwjê nõ ita apu krÿ cape na mõi, pry japôj na, ne ma, por jÿm cahãj ihkrÿ ata jÿrkwa cahì na mõi, mã ramã ahna caxwa to mõi. ¹⁰ Mã pyjê nõ inxyre pijapit te amji kam hapac xà këanre ata te ihkà impejti nõ ata mã amji jaxàr, ne ma cuna mã mõi, ne cute me ajpên cajpar. ¹¹ Ne cahãj xyre pijapit ata pê amji wÿr me hÿmre na hàhwÿr catê, na pê nee ihpahàm nare, ne ihkrãhhia kam ajco me hÿmre cukij, ne ma ajco krÿ cape na apu ipa. ¹² Ne hãn ne ajco pry japôaj na hirãa pê ame hikaj to ipa, ne por jÿ ri me hÿmre me cuprô ata ri, hirãa pê ame hikaj to ipa.

¹³ Ne mentuwjê nõ ita cator, mã cute impÿn ne cahôr, ne ihcakôc xà na ihpahàm nare ata to cumã:

¹⁴ — Ita caxuw imã amji kÿn jô catia ne hàhhuc, ne imã hÿa to hÿ. ¹⁵ Cwÿrjapê wa ajpên apu gapên to mõi. Ne wa tee apu acajpar to prãm to ipa. Ne hamre, ita caxuw pahte ajpên cajpar! ¹⁶ Ne ramã ite, por ihneat rÿm cupêhkà impejti krorti cator ata to panôr xà cahty. ¹⁷ Ne ite ampo cacô cuxwati ata to panôr xà ita cuxwa. ¹⁸ Ajpên ikôt mõi, cu ha ita kam amji to pahpahàm nõa to apê, ne ajwar ajpên pyrên pajakryti ne. ¹⁹ Ipjê nee ijÿrkwa kam apu mõi nare, ne ma ihtêm xà jÿwrya wÿr amÿ tẽ. ²⁰ Ne cute ihpore catia ne ipyr ne amÿ to tẽ, ne quê ha jÿ mã amji to amcro to, ne cormã hacpÿ ne amji jaxà — hajÿr.

²¹ Ne cute ihhêj xi xà atajê to ihcãjpëar prãmtë cama cumã ihhêj xi. Mã pea cute ahna amji caxàr. ²² Ne ahna ahtÿm nare mã ma ihkôt mõi, ne ihhêj rÿm cupê pryti te apu ihcuran xà wÿr ipa, ne ihhêj rÿm cupê ampo pry te catêtêc xà wÿr apu ipicahur. ²³ Por curi ampo te hapôc tu xà ata wÿr. Ne ihhêj rÿm cupê cuwênre te ihpro xà na, nee amji jahkre pej nare kam apu imprar ata na, pê wa hõmpun to hane.

²⁴ Ikra, ita caxuw ikam gapac to impeaj ne, ne ma ihkôt hakop, pom wa amã ampo jarë itajê kôt. ²⁵ Ne nee amji na pyjê nõ te hajÿr ata jamãr quê apê gÿ te amji kam hapac xà pyr nare, ne nee apu pyjê te hajÿrjê kôt apa prãm nare. ²⁶ Ramã me hÿmre kwÿ te pyjê nõ ata cwÿrjapê amji na mehpahàm catia incwÿr. Ne ramã incwÿrjapê mehtyc atajê jàhtôa, ca nee me hàhtô na me cahyt par nare. ²⁷ Ca ha ate pyjê te hajÿrjê jÿrkwa wÿr apa na, ca ha ramã mehtyc jô pjê wÿr, ca ha apa, ne amã gô pry hatujre ne.

Pahpãm te amji jahkre pej catia

Me Hapackre Xà 9.1-18

9¹⁻² Pahpām pyxit peaj ne cute amji jahkre pej catia to cati. Ne cumāa ri jū mā pahte amji kam me pajapac xà ata na me pajahkre pej. Ne cupêa ri me pahkrā kreti to cute me pamā hahkre catê, na cu catyt kam ihkôt me papa jahkre pej.

Pahpām te amji jahkre pej catia ata pê me hūmre nõ te hūkwati catia ton, ne kam amji kīn nõ ton ata pyrāac. Ne cute me hō jàhtōa to cuprōn, ne hāpàn xà na me cumā hām. ³⁻⁶ Ne hanea ne cute cumā me hāpèn catêjê kwỳ kujahêc, krī cape na, mā ame cumā me hàkjêr to me pra, mā cute me to cuprōn xà caxuw me cumā:

— Me amā prām, ne me amā kôr atajê! Ajpên ijūrkwā wỳr ame pra ne ame apà ne ame ikō! — hajỳr.

Ita jīkjê na mā Pahpām te me pamā ampo to hahkre xà itajê pê me pajō pyrāac. Ne ihtỳj me pamā to hàkjêr to ipa ne me pamā:

— Ate me amji jahkre kêatre ne me akrā nare atajê! Ajpên iwỳr me apkjê, ne ite me amā ikrā kreti to hahkre xà ita na me ikampa, ne ate me amji jahkre kêt itajê mā me hikra. Ne catyt kam amji to me ajpa. Ne me akrā kreti itajê to me hahkre, ne me hahkre pej. Ampo na? Me akrā kreti itajêa kôt ca ha quêt me apej pēa mā me apa — hajỳr.

⁷ Ýhỳ me ikwỳ, ca ha mehkēanre nõ to ate impejti to prāmte cumā, cute amji kam hapac xà pejti to hahkre, quê ha cama ajte apu akam incryc, ne ihtỳj apu ato kên prām. Ca ha ate jūm te hajỳr to impej prām to apu amōr na, ca ha caa apu amji to akên japên to mō, ne apu apahàm. ⁸ Cwỳrjapê ca ha cute me hajỳr catêjê to tojnō, ne nee apu catàtkre na me acjêj nare. Ampo na? Nee mā ampo na nare, ca ha ate ampo kên tēte cumān jahpan xà na, quê ha ihtỳj apu acurê.

Ne mehkṛā kreti te nee me hajỳr nare. Ca ha ampo kên tēte cumā, quê ha ate ampo kên tēte cumān xà ita jahpan xà na, ihtỳj cumā akīn. ⁹ Ne me hūpar pejti catêjê ca ha me jūm japackre, quê ha hipêr me hūpar krā kreti ata to amji mā me ajcamê. Ne me hūmre catyt kam me ipa atajê quê ha hipêr me hūpar to me ajcamê, ne catyt kam ame ipa.

¹⁰ Ne quê ha jūmjê amji to ihkrā kreti to prām, ne mam cati mā amji mā Pahpām cupahti to ipa. Ýhỳ, por jūm amji mā Pahpām pejti cupa ata, quê ha ihtỳj cute amji kam hapac xà impejti te Pahpām cajpuaw ata to amji to ajpa. ¹¹ Ne mehkṛā kreti atajê, mehkṛā kre atajêa mehtehcajpa, mā amji to me ipijapar to me irya to me iry.

¹² Ca ha ate amji mā Pahpām krā kre te amji jahkre pejti ata pyr na, ca ha atỳj to amji mā ampo pejti jàhtōa ne to. Nāmri ca ha ate amji pê Pahpām krā kreti ita caca na, ca ha me pahcurê xwỳn pê Xatanaj te amji kam hapac xà kēanre ata py ne caa akên mā amji jaxà.

¹³ Ne Xatanaj ata pê ihhêj rūm jūm cahāj xyre ata pyrāac, mā me hūmre to hapactu to pit mā amji kampa, ne ma apu Pahpām kôt ampo pej krā kreti itajê to amji kam hapac caca. ¹⁴ Ne hān ne ikre jarkwa mā ihkrī to ipa, ne krī cape te amji jacjên kam ipa. ¹⁵ Ne hān ne me hūmre, cute amji kam me hapac xà wỳr me

pra atajê jator to me cumā hàkjêr to ipa. ¹⁶ Ne cute me amji cajpêr, krā kre nare atajê mā harkwa to:

— Ajpên ijūrkwā wỳr ikôt mō, ne ipjê pê ina gūhkra! ¹⁷ He, ampo to me pajàhkīj itajê ri quêt impej! Ne kwỳr te pro to me pajàhkīj itajê ri quêt papimxuar pê pahte mehkur xà, ne ampeaj kam cuxwa! — hane. ¹⁸ Mā me hūmre jàhtōa ne hān ne ihtỳj me kampa, ne amji mā me to hane, ne ma mehtyc xà wỳr me pra, cute me amji jahkre pej nare kam. Ne ramā me hàhtōa te amji mā mehkên xà ita capi, na quê ha ma jū caxuw cuhy tyc xà nare ata wỳr me pra.

Ampo kwỳ jàhtōa to me hapackre xà

Me Hapackre Xà 10.1-32

10 Ýhỳ, jūm xūmre mā ihkra krā kreti ata pê, hūm me inxi mā amji kīnti ton catê.

Ne ihkīnte jūm kra krā kēanre, jūpar nare ata pê ri hūm me inxi mā amji kīn nare ton catê.

² Ne por mehhêj xi xà jàhkīj kôt amji to me hakrāj atajê, mā nee me hakryti xà nare.

Ne quêt catyt kam me ipa xà ata pê ri me hakryti me, ne caxwām pê me carīcti ton xà.

³ Ne Pahpām pê Pahhiti ata nee hān ne prām te mempejti curan na me hamār nare.

Ne mehkên catêjê te amji mā ampo na mehprām̄ti atajê ri, Pahpām ma ame cupê intê, ne intête ame to jūa mā, mempejti atajê kīnte.

⁴ Ne cute me xuwcacati atajê pê ri ampo hamreare.

Ne quêt me hāpèn prām̄ti catêjê mā ri, ampeaj kam ampo mā me to hakrāj.

⁵ Ne por jūm ampeaj kam amji kampa ata ri, hān ne hàprā kēhkên xàa jō amcro na ihkēhkê.

Mā hàprā kēhkên xà jō amcro kam hān ne hōtxwaa to hōtxwa mā gōr ata ri, cama ihkīnte amji na ihpahàm rē.

⁶ Pahpām hān ne ihcunea na mempejti catêjê to impej.

Ne mehkēanre catêjê ri mempejti kīnte me harkwa pejti kam, cute amji kam me hapac xà jàprēhti itajê to me amxu.

⁷ Ne mempejti catêjê to, nee me hapac kêt xà nare.

Kīntee mā ri mehkēanre catêjê to, ihtỳj me hapac kêt xà.

⁸ Me hūmre krā kreti atajê ri, ihtỳj me hakrya kam amji mā, cute me hapackre xà atajê incwa.

Kīntee mā, quê ha jūmjê amji to mehkṛā kreti pyrentu prām atajê me amji jarên to:

“Wa ramā ite itajê impar jahkre pejtu” hajỳr na, quê ha taa ramā amjia pê, cute amji kam hapac xà caca to mō.

9 Ne por jùm mã cute amji kam hapac xà impejti jahkre pejti ata, quê ha nee apu amji mã ampo cupa to hajÿr nare.

Kĩntee mã quê ha jùm apu ihhêj xi to mõi ata, quê ha ihtÿj ihkên mã me axà.

10 Quê ha jùm te ampo kên na jùm pupun, ne nee in-tête cumãn nare na, quê ha ihtÿj jùm ata cama amji mã ihkên to ajcamẽ.

Ne quêt quê ha jùm ampo kên tôte me cumãn kam incrà, quê ha cama mehkwy to impejti japên to ipa.

11 Ne por catyt kam me hũmre cakôc xà impejti ata, ihtÿj mehkwy te catyt kam me ipa na mehtehcajpa.

Kĩntee mã ri me hũmre cakôc xà kêanre atajê, cama mehkwy to kêanre to prãm to me ipa, ne cumã hàwxũn me, me to kên pit jahkre pej.

12 Me pancryc me, pahte me pahkwÿ curê me, pahte me ajpên par nare ita, ihtÿj me papijapu na me pahto.

Ne me pahte me ajpên kĩnti ata pê ri quêt pahte me pahkên cunea to me pajapac kêt xà.

13 Ne mehkra kre cakôc xà atajê cunea kam ri quêt me pamã amji jahkre pej pit.

Ne mehcakôc xà kra kêanre atajê pê ri mehkĩnte ca-ma mehkên mã me irên xà.

14 Ne cute me amji jahkre pejti atajê ri, hãn ne amji mã, cute mempejti atajê pupun xà cunea kôt amji mã me nõr to me ipa.

Ne mehkra kêanre catêjê ri, mehkĩnte nee me harkwa kôt hakop nare kam, hãn ne me to ihcakôc to me ipa, ne toa amji mã mehpahãmti ton to me ipa.

15 Ne me hakràjti atajê ri, me hakràj te amji kam hapac xàa to me amji kampa.

Ne me cupê hamreare atajê ri, mehkĩnte hãn ne me cupê hamreare te amji kam hapac xàa to me amji kampa.

16 Ne mempejti japên xà atajêa, hãn ne me to ajcamẽ.

Ne mehkêanre atajê ri mehkĩnte, pom mam mehkên xà itajê jirôa pê, amji mã mehkên to me ajcamẽ.

17 Ne por ampo kên tôte mehkwy mã, mã ahnaa me ampo jicu atajê, quê ha me hõ pry pejti kôt me ipa.

Ne por ampo tôte me cumã, mã nee me hũpar nare atajê, quê ha mehkĩnte me hõ pry cupa ne mehkên mã me acjêj.

18 Ne mehhêj xiti atajê ri hãn ne me harkwa hêj xia to mehkwy kam incryc to me amxu.

Ne hãn ne ampo kên na mehkwy jarên pa, ne amjia kôt hãn ne me to cati to mençràn to ipa atajê ri mehkra nare.

19 Ca ha acakôc xà to ihcupan to cati, ca ha amji mã akên xà to cati.

Nãmri ca ha ate akra kre na, ca ha ma garkwa kên to acakôc na amji jamã, ne garkwa cakôc xà impej to pit mã acakôc to apa.

20 Ne mempejti cakôc xà kôt ihtÿj ampo pejti hapôj, ne cupê ihhêj rũm wakÿre prà pejti ata, ne cupê ahna hĩ jàhwÿrti ata pyràac.

Ne mehkên catêjê cakôc xà ri ihkĩnte ihkôt hamreare.

21 Ne mempejti cakôc xà ri me hàhtôa ne me to impej.

Ne mehkêanre catêjê cakôc xà ri mehkĩnte, ma mehtyc xà wÿr me to ipa.

22 Ne me Pahpãm tĩr rohnÿtti mã ata, ihtÿj caku cunea kam amã ate amji kam me gapac xà to ipi-camên to ihcuhhê tu.

Ne jũ wÿr quê iràn xà na, ampo me amã acaca xà te hajÿr xà ita to.

23 Ne me hàprêhti atajê mã, me hàprê xà ata pê ihhêj rũm me hapactu xà, ne me cumã ihkĩn.

Jĩkjê na ri, mehkra kreti atajê mã cute amji kam me hapac xà impejti atajê, mã hũrên ame hakry.

24 Mehkên catêjê mã ihtÿj ampo cupaa to hũpa, ne cumã hũpahti ata quê ha ihtÿj to hanea to, to hane.

Ne mempejti atajê ri quêt ihtÿj cute me amji kam hapac xà impejti na me hapôj.

25 Quê ha kôc pahtÿjti ajpên mõi ne cato, ne mehkên to hamre tu.

Ne quêt mempejti kra kreti atajê, quê ha ihtÿj amehcuhhê, quê ha nee kôcti ata jũmjê atajê rên, ne me to ihtêm nare.

26 Ca ha nee jũ caxuw ampo ton xà ata wÿr jùm te xuwcatati ata kujahêc nare.

Ampo na? He cute me hajÿr catêjê pê ihhêj rũm ampo cacô te me wa cahhêc xà, nare, me cupê ihhêj rũm me panto kam cuhy kũm, ne ihtÿj ihhahac.

27 Ne por jùm amji mã Pahpãm tĩr rohnÿtti mã cupahti ata mã, cute amji to ipijapar xà japjêa to hapjê.

Ne por mehkra kêanre, ne nee amji mã Pahpãm cupa nare atajê, quê ha mehkĩnte, cute amji mã me to amcro hyr xà ata japyre mã me ty.

28 Ne por mempejti atajê ri ihtÿj cute me ampo pejti cwÿr xà atajê jikaj, ne ihtÿj hãn ne me cucwa.

Ne mehkên catêjê te nee me hajÿr nare, na quê ha nee jũ caxuw me ampo pyr nare.

29 Pahpãm tĩr rohnÿtti mã ata ihtÿj mempej pytà.

Ne mehkĩnte mehkên catêjê mã ihtÿj mehpahãmti gõ.

30 Ne por catyt kam me ipa atajê mã ri ihtÿj mehkra xà.

Ne mehkĩnte mehkêanre atajê pê ri mehkřĩ xà hamreare, ne nee mehkřĩ kam mencrã xà hamreare.

³¹ Ne por mehkřã kre te amji jahkre pejti atajê mã ri, ihtỳj mehcakôc xà krã kreti to me hapackre xà.
Ne por mehkêan kam ampo kêanre to me hapackre to me ipa atajê, quê ha ihtỳj mehkên xà kêanre atajê mã me amji gô.

³² Me hũmre krã kreti atajê, ihtỳj hãn ne mehcakôc xà kam me hapac prãmti atajê to, me cumã mehcakôc.
Ne mehkřã kêanre atajê ri ihkĩnte cama me harkwa kêanre to mehkwy kên mã curê.

Xarômãw te mehkwy japackre xà te trĩnta itajê

Me Hapackre Xà 22.17-29

¹⁷ Me ikampa. He wa ha me amã mehkřã kreti te me hapackre xà itajê to hahkre. Ca ha ampeaj kam, cute me hapackre xà impejti itajê to me hahkre, ne ate me hahkre pej na, ca ha ihkôat me amji jahkre pej. ¹⁸ Ne ate to amji japackre xà ata kam, quê ha ampeaj kam amã mehkĩn na, ca ha atỳj ihkôat me apa, ne toa me acakôc to me apa. ¹⁹⁻²⁰ Wa ha ita kam me amã me hapackre xà itajê to hahkre, mãr ca Pahpãm to pit mã amji mã me ahimpej, ne toa amji mã me ahimpej to me apa. Ne wa ha, ite me gapackre xà te trĩnta itajê na, me amã ihhêc. Quê ha taa amji to me amã hahkre, ne ihtỳj me gapackre xà impejti to me gapackre. ²¹ Ata quê ha ihtỳj catyt kam ate amji kam gapac xà impejti to me apa jahkre pej na, me atehcajpa. Quê ha jũm te ahna me acukij na, quê ha ihtỳj amã catyt kam, ate me cumã harên xà atajê hahkre pej.

²²⁻²³ Nee ca ha me cupê hamreare atajê pê hamreare na harên xà kôt ame to kêanre nare. Ne nee cute mehcukij xà kam, cute me amji pytar xà caxuw me cupê hamreare atajê to, ame amji to pejpej nare. Côt mã Pahpãm ihkřĩ rohnýtiti mã ata me hũtà, ne mencwyrjapê cute me cupê hamreare atajê mã amji cawpa catêjê atajê to kêanre ne.

²⁴⁻²⁵ Ne nee me hũmre jãprêhti incryc xiti atajê to ame amji kwỳ nõ prãm nare. Côt ca ihhêaj to amji mã cute amji kam hapac xà atajê incwa, ne ihkôt apu apa, ne nee jũ caxuw cupê acator nare.

²⁶⁻²⁷ Ca ha nee jũm jũ jahpan xà na, gãmjôr na amji ton nare. Ampo na? Ca ihhêaj to gãmjôr nare, quê ha ihtỳj cute to new ata jahpan xà na, amji mã apê gikwa xà cunea to cutor tu.

²⁸ Ca ha nee me aquêtjê te me amã pjê rer ata hyr xà jirô pê to apỳm nare, ne nee acahê na jũm jô pjê ata to cupê incri nare.

²⁹ Xà ajkĩ jũm te hãpên xà to impejti ata na amã hahkre pej? Quê ha ahtũm nare, quê ha hãpên xà impejti to cute hãpên xà ton ata na, me hõmpu. Quê ha pahhi cati impej nõ amji mã to cumã hãpên catê, quê ha cumã apê.

Me Hapackre Xà 23.1-35

²³ ¹⁻³ Quê ha jũm jãmkrã cati te amji cahê na gãpên xà na gator na, ca ha ma hãmkrã cati ata na to amji japackrea ne. Ca ha ate gãpãn cati na, ca ha nee cuna mã gãpãn cati nare. Ca ha nee cupê cute hõ kur xà ata kur to gũjarên nare. Ampo na? Quê ihhêaj to cute amã ihhêj prãmte quê gato.

⁴⁻⁵ Nee ca amji to gakrãj prãmte, gãpên xà to amji curan prãm nare, ne nee to pit mã, amji mã ahimpej to apa nare. Ampo na? Quê ihhêaj to gô pore ita ihtỳj kam hara to hanea, pom quê hãcti kam hara mã to he. Ne ma to, ne apê ampỳa mã apu ipa.

⁶⁻⁸ Ne nee ca cute me hakrãj cati to pit mã me amji kam hapac atajê cahê na gãpãn to prãm nare. Ca ihhêaj to ate cahê na gãpãn na, ca ha nee cumã hõ impejti ata kur to gũjarên prãm nare. Côt mã amã:

— Hipêr incire ne krê — hane, ne cama apu amã ihhêj. Cute hõ ata jahpan xà na apê ampo catia pyr prãmte ri amã ihhêj. Ca ha ate ihkôt amji kam gapac, ne atỳj garte cati na, quê ha pea hõ ata jahpan xà na ana ahwỳ. Ca ha ate hacpỳa mã cumã hõ ata jôr xà na, atỳj to gôjahĩr prãm. Quê ha ampeaj kam cama akam incryc, ne nee ate cumã acakôc xà ata na apar nare.

⁹ Nee ca apu cute me amji mã hamãr nare atajê me, nee catyt kam me ipa to prãm nare atajê mã, acakôc xà krã kreti atajê to acakôc nare, cute me apar to mã apu.

¹⁰⁻¹¹ Ne nee ca me huwatĩ atajê pê me hõ pur to gãhkĩj prãmte, gô pur hyr xà to apintuw, ne me hõ pur kam hãm nare. Ampo na? He por ihtỳj Pahpãm me huwatĩ to ajpa, ne me hamã, ata quê ihtỳj mehtehcajpa, quê me ahna apupu ne ate me to amji kam gapac xà ata to ana apkjê, ne to akên mã amê.

¹² Ampeaj kam cute me amji jahkre pej catêjê te me amã ampo to hahkre xà atajê na me kampa, ne hahkre pej ne amji mã anô, ca ha quêt mã ca, amji krã krea japê.

¹³⁻¹⁴ Ne nee ca akra japackre jicu nare. Nãmri quê ha cute apar nare na, ca ha atỳj hũhcatêtêc. Quê ha ate hũhcatêtêc ita nee ihcuran nare. Quê ha cama to ihtyc xà jahpa.

¹⁵⁻¹⁶ Ýhỹ, ikra xũmre. Ca ha ate akrã kreti na, wa ha ampeaj kam apyrên ijakry, ate acakôc xà krã kreti to acakôc ata pyrên. Ne wa ha itỳj ijakryti na amji cajpê.

¹⁷⁻¹⁸ Nee ca mehkên ton catêjê jũ na, cute amehkên ton xà atajê kĩn nare. Ate amji mã Pahpãm cupahti na, ca ha amcro cunea kam amji to ahcukij. Ita na quê ha acumam amã ate amji kam gapac xà impejti ne, ne por ca ampo pejti jikaj atajê, ca ha atỳj acwa.

¹⁹⁻²¹ Ýhỹ, ikra xũmre ikampa. Ca ha ate amji jahkre pej na, ca ha atỳj caxwãm catia mã amji kampa. Ne nee apu cute me cõxyhti xenti catêjê kôt apa nare, ne nee ame hõ to mehtũm prãmti jãpãn catihti atajê kôt me apa na me amji to prãm nare. Ampo na? Pom cute me cõxyhti xenti atajê me, caxuw me hãpãn catihti atajê, ampeaj kam me hõtxwa, mã cama me hikwa ne

ame gôr. Ne me cupê ampo hamreare, mã mehkà kèanre kam ame ipa.

22-25 Apãm kampa, cute gapackre xà atajê cunea na. Ampo na? Ate impar na ri amã impej. Ne anã krã kreti ata, ca ha atýj kampa, ne nee ca ramã ihwej kam apu impar caca nare. Ne por ampeaj kam ampo pejti to hahkre xà atajê, ca ha kampa, ne amji mã huwahi, ne catyt kam apejti na apa, ne nee jũ caxuw amji pê to gapac kêt nare. Por me hũmjê nõ mã ihkra xũmre te catyt kam ipa, ne ihkrã kre ata, quê ha ampeaj kam hũrên hakry. He apyrên apãm jakryti na to, quê gũrên hakryti ne. Ne anã to hanea, ne cumã amji kĩnti jakryti to.

26-28 Ýhý ikra xũmre, acaxwýn cunea to, ite gapackre xà itajê kôt ca amji to, ne ampeaj kam ahna ikampa. Ne mempijapit pê ampýa mã apu apa. Nãmri me cupê me gô pry tète me akên mã me arên catêjê. He me cupê ihhêj rũm aracri cute me apê ampo to hàhkij catêjê pyrãac. Ne cute me hũmre jàhtôa ne ramã me cumã ihhêj, cõjkwa kam Pahpãm me, mehprõ mã cute mehhêj prãmte.

29-35 Jũm mõrmõ hĩ kam cute amji pupun xà kèanre me, ihkàj xà te cumã hipu? Měr jũm mã ihtýj ame ipijapu xà mã incjêj to ipa, ne mehkên mã incjêj to ipa? Ne měr jũm mã hõtpê me haxõp, mã ihkàj xàa na ipa? Ne měr jũm mã hõtpê into kàhtuhti ita na apu ipa? He jũm nare, por me hũmre nõ me hàkrun xà kam apu ipa, ne cormã mã ihtýj ajpên caxuw cõxyhti to ajcacwa, ne to ikõ ata te ri hajýr.

Ne nee acuhhê ne mehkõm xà kam ampo cacõ xyre jiwryhti ata pupun nare, nãmri ampeaj kam hý pahtýj. Ampo na? Quê ha ihtýj itajê cunea jicu xàa kam hacpýa mã cupê cagã kèanre ata pyrãc, ne ihtýj axa ne acura!

Ca ha ampo te jũa na ata pupu, ne atýj garkwa te amji jahkre kêatre ata nõ to acakõc. Ne ato kam waj akam tẽ, ca ha apê ihhêj rũm cõ harõ to imprar kam, pàr kre kam me ipa atajê pyrãac, ne atýj ampo kam garij to apa, ne to amji jahyr to apa, ne atýj apu apýpým to mõ. Ne ampo na mã ca ha apy ne ahna amji juwahi?

Ne ana ahtũmre, ca ha cormã jũm ata te acahyr na amji cajpê, ne amji mã garkwa to:

— Mõrmõ jũm aracri apu icaahy, wa nee ite ikàj xà nõ na amji cajpêr nare — hane. Ne cormã akrã ajrõ, ca ha amji mã garkwa to:

— Jũ caxuw wa ha ajte ikrã impej ne xa? Wa tee apu ixãm to hahkre. Wa ha to xa ne itýj hipêr ihkwý incrire ne to ikõm prãm — hane.

Me Hapackre Xà 24.1-22

24 1-2 Nee apu mehkên catêjê jũ na mehkên kĩn nare, ne nee ame to amji kwý prãm nare. Ne mehkên catêjê me hàprê to pit mã ame amji kam me hapac to me ipa, ne mehcakõc xà kên to pit mã mehcakõc to me ipa.

3-4 Ca ha ate ampo pejti to acukrêj to prãm na, ca ha xa akrã kreti to gakràj, ne cormã ampo pejti pê acukrêj atajê to gakràj. Hõhõ, ita na ca ha me akra te me amã

ampo na prãm xà atajê cunea to me cumã, ne me cumã agõ.

5-6 Ne quêt mehkã kreti ita ri mehhi týj jirõa pê impej. Ca ha jũ caxuw apijapu prãmte me ipijapu catêjê wýr axà, ne nee amji pê cute me amã ihkrã kreti to hahkre catêjê atajê to gapac kêt nare, mãr quê me amã akrã kreti to hahkre. Quê me amã ampo to hahkre catêjê me hàhtôa to me hàhtô, ca ha cute me ampo to hahkre xà itajêa kôt atýj me hirõ pê xa.

7 Ne por amjia kôt ame ipa to prãm atajê, quê ha jũ caxuw mehkã kre nare, cwýrjapê ca ha nee cute amã ate catyt kam ampo to hahkre xà na ihwýr nare. Ampo na? Ampo to quê amã hahkre?

8-9 Por me hũmre hãn ne mehkwy cuna mã amji mã, cute amji kam me hapac xà kèanre capõ, mã ahna me hahkre pej, atajê ri hãn ne mehcunea kam mencryc, ne me cupê ampo kên cunea xakat. Ne por mehkã nare atajê cakõc xà kèanre, mã hãn ne ihtýj mehkên mã me curê. Ne por mehcunea ihtýj ame cumã to, me cumã me hàhcahhõn to me ipa atajê kam ri, mencryc pit.

10 Quê ha akam ampo kên te cator xà ata kam, ate kam akrã pictor tu na, ca ha apê jũm peacre caprĩ xàre ata.

11-12 Ne por cute me jũm curan xà caxuw me cupjê ata, ca ha ajte mehtehcajpar ne me hũtâr to hahkre xà kaj na, ca ha ajte ahna me amji jarên to:

— Xà aracri ite amji kam ijapac xà, wa ajte ihcote na axà? — hajýr na, ca ha atýj Pahpãm te me pahcunea mã, me pahte amji kam me pajapac xà pupun na, me to amji japackrea ne. Ampo na? He quê ha ihtýj Pahpãm te ampo kên na me pahpupun xà atajêa jahpan xà na, me pamã me pahkên atajêa to amgõ.

13-14 Ýhý ikra, pen ca ku, ne inxõti ita na ihcajpê, quê ha acajpuaw. Ahnaa mã ca me pen cajpê mã garkwa kam inxõti he. Jĩkjê na mã, ate me amji jahkre pej krã kreti ita me acaxwýn mã impeaj to impej. Ca ha ate to hamãr na, quê ha acumam amã ate amji kam gapac xà cunea amã ihkênre nare. Na ca ha nee amji pê ate hikaj ata to apictor prãm nare.

15 Ne ca, me hũmre nõ kèanre ita! Nee ca apu hũmre krã kre te amji jahkre pejti ata jũrkwa wýr arĩt nare, ca ate cupê ampo pytâr, ne cupê ipyr prãmte, ca apu hýr mã rĩt. 16 He mehkã kre catêjê ihtýj me hipy mã me acjêj, ne hõtpê hacpýa mã mempej mã me acjêj, ne mehcuhhê. Ne mehkên catêjê, quê ha mehkĩnte mehkên kam mehpahàmti atajêa kam me hamre.

17-18 Pahpãm ihtĩar ihkrĩ rohnýtiti mã ata mã mehkèanre catêjê to hamre prãm nare, ne quêt cama cumã cute mehkên ton jicu na to prãm. Na ca ha nee ame acurê xwýn kên xà kam mehpahpahàmti atajêa kam me hamre atajê pyrên ame gakry nare. Mã Pahpãm ahna me gahkre pej, ne ahna cumã me akĩn nare ne, quê ihhêaj to cute gahpan xà na acurê xwýn to kên xà ata jicu.

19-20 Ne nee cute ame to kên xà kôt, cute amji to me cati atajê jũ na apu akrihkrit nare. Ne nee me hũ na amehkên to atajê kĩn nare. Ne cute mehkên ton catêjê

cumam me cumã, nee cute me amji kam hapac xà impejti hamreare. Ne ihhêj rûm me cupê ramã ihpôc xà tyc xàa wÿr, ne ihpôc crire ne.

21-22 Ýhÿ ikra, he amji mã, por Pahpãm tíar rohnÿtti mã ata cupaa ne, ne amji mã pahhi catêjê cupa. Ne nee, por ame pahhi cuna mã, ame kam incryc atajê mã acjêj nare. Ampo na? He Pahpãm pê Pahhiti, quê ha cute me hajÿr catêjê to hamre, me mör pejti kam.

Me hirôa pê me pahprô pejti ita

Me Hapackre Xà 31.10-31

10 Ýhÿ ikra, ita caxuw wa ha aprô na ato ihmpej, ne amã to hahkre. Pyjê jàhtôa to hàhtô, ne jÿ wÿr ca ha uu ne me catàtkre na aprô nõ impejti ata mã acator pyrentu. Nãmri ca ha ate me catàtkre na cumã acator na, ca ha amji mã huwahi to impeaj ne, nãmri ihpore jakôtti ita jirôa pê impej. He me pahprô pejti te hajÿr, pom quê ite me amã ampo jarên itajê he.

11 Mã ramã impjên te híxi pejti ita pupun pejtu ihcunea na, na ri nee jÿ caxuw cupê ampo hamreare nare.

12 Mã amcro cunea kam, cute amji kam hapac xà cunea kam to impejti to ipa, rÿ jÿ caxuw cute apu amji pê to kên nare.

13 Ne hõtpê ampo cunea to hàpên to catia to ipa, ne mehkra mã cupêhkà te mehkà ton to ipa.

14 Ne cupê, pom hãn ne pàr kre hÿwry catia pÿn ampo to ipa atajê pyràac, ne hÿwry catia pÿn hãn ne hÿrkwa wÿr amji mã hõ to hapôj, mehkra wÿr.

15 Ne hãn ne awcahti xà wÿr ihkrí, ne mehkra mã apu hõ ton to ipa. Ne ma cumã hàpên catê pupu, ne hamãr to ipa, ne ma cumã harkwa jirê, ne to ihhimpej to ipa.

16 Ne por hàpên to ipa ita jô porea to, me cupê amji mã hõ pjê jÿhkà, ne kam amji mã pÿxô pejti kre to ipa.

17 Ne hàpên xà cunea caxuw ihcuhtÿjre.

18 Ne cumã hàmjixur pejti na hahkre pej. Na ri ihtÿj to hí to ahwÿa to ahwÿ. Ne ampo pej pit japrôr to ipa, ne hãn ne hàpên to caxwa rytu.

19 Ne taa amji mã to cupêhkà hy, ne amji mã to ihkà.

20 Ne hãn ne me cupê ampo jamreare atajê tehcajpa, ne me cumã ampo jôr to ipa, ne ame hàhwÿr to ipa atajê mã ampo jôr to ipa.

21 Quê ha krya to kry, quê ha nee apu amji mã hÿpa nare. Ampo na? Ihtÿj mehkra mã mehkà.

22 Ne ihtÿj amji mã me hàhpro xà to, na ri ihtÿj taa amji mã ihkà hêrhêtre tÿjre ata to, ne to ihkà.

23 Mã mehcuea amji mã mempjên pejti na harê, ne ihtÿj amji mã me hÿpa to me ipa. Ne ampeaj kam me cumã cati, hõ krí ata kam.

24 Ne ihtÿj ahhy, ne cute me hÿhkàr catêjê mã ihpore na to apha.

25 Ne cattyt kam ipa. Ne nee cumã cute amji to ipi-japar cupa nare, ne cumã ahna mehphàmti xà.

26 Mã ihcakôc xà te amji jahkre pejti, jàhcapríhti to ihcakôc to ipa.

27 Ne jÿ caxuw apu xuwcaca nare, ne ihtÿj mehkra jamãr to ipa.

28 Mã mehkra amji mã me harên pejti to me ipa. Mã impjên ihtÿj amji mã híxia jarê, ne amji mã harên to:

29 — Mehprô kwÿ kên nare cakrô, ca me hirôa pê apê iprô impejti — hane.

30 Ýhÿ, ikra, pyjê jí cunea na impeaj to mempej cakrô, quê ha impejti ita ihtÿj jÿ caxuw ihwej, ne ihcunea na impejti ita hamre.

Ne por pyjê kwÿ quêt amji mã Pahpãm tíar cupahti atajê, quê ha ihtÿj quêt amji mã mempejti na me harên rohnÿtti mã.

31 Ýhÿ ikra, ca ha ate amji mã aprô te hajÿr nõ mã acator na, ca ha amji mã to impeaj ne, ne hãn ne cumã garkwa to:

— Ihcunea na imã akênre nare gápên xà me, acakôc xà cunea kam. Mã mehcuea amji mã me garên to impejti to me ipa — hane. Hamre.

IXAJ

Ýhý, harã catêjê pê Juta catêjê atajê, hanea ne kÿj rÿm catêjê pê Ixaher catêjê cuxà, Pahpãm to me hapac kêt to me mõi. Cwÿrjapê ri Pahpãm te me hÿrmã me cumã harkwa to mehcakôc catêjê jàhtôa ne ihkujahêc. Mã Pahpãm te ahpÿanre na me cumã ampo to hahkre atajêa to me cumã ihcakôc to me ipa, ne cute me hõ kàhhôc kam ahna mehhôc.

Ne Pahpãm jarkwa to me cumã mehcakôc catêjê pijakrut itajê japrÿ te Ixaj me Jeremij. Na ri ahpÿanre na ihkàh-hôc atajê kam me haprÿ te (Ixaj) me, (Jeremij). Mã Jeremij te hõ kàhhôc nõ kam ramã ampo pej cunea jamre ata to cute me amji japackre xà caxuw ahna ihhôc, cwÿrjapê ri hõ kàhhôc ata japrÿ te (Mencwÿr). Cwÿrjapê ri ajwar me hõ kàhhôc catihti atajê kam, cute me Juta catêjê mã me Pahpãm cawpa. Ne ita caxuw Ixaj me Jeremij jõ kàhhôc kwÿ mã he.

Pahpãm amji wÿr mehkwy to ipipkjêr xà caxuw me cumã akij

Ixaj 1.1-4, 10-20

Me ikwÿ, me ikampa! Pahhiti pê Pahpãm me amã ihcakôc to hane he:

“Pê wa Ixaher catêjê jakrã te tôxi atajê to amji mã ikra,
ne ajco me hamãr to impejti.
Mã ajte icuna mã mehkêanre.
Pryti me cawrô cahàcre,
ihtÿj to ipijapar catê pupu.
Mã ajte nee ihkÿnte me ikwÿ pê Juta catêjê me ipupun nare.

Ne imãa ihhêj ne me ikwÿ jàhtôti itajê,
nee me ipar nare.
Ne me cupê mehkên catêjê,
ne iwÿr me catut to me ipipkjêr,
ne cute me imã hikran.

“Me ikwÿ, xà ca cormã me amã ite ame ato kên xà ata na me prãm?

Xà ca ha ajkÿ ipê me gõ pahhi na,
ma ame icaca ita na?
Ca ha ame hane,
quê ha me acurê xwÿn me akrã rÿm me ato kên na cucwa,
ne ma me apar mã to ajhu.
Quê ha me gõ krÿ
hanea ne caxàr tu ne.

“Me ikampa he:
Pom ca me akên jahpan xà na,
me imã ampo pryre to me capa itajê kam, ramã ipeacre.

Hipêr me imã ihnõ ton nare.
Imã hipêr carà cahàcti hôhti twÿmti na prãm nare.
Ne imã hipêr ampo itajê nõ caprô pupun prãm nare.
Ne imã hipêr me akên jahpan xà na,

ate me imã ampo pryre to caxàr ita na prãm nare.
Ampo na? He ca nee me akên xà itajê jÿ na me apec nare.

“Ca ha me imã acakôc,
ne kàj mã cõjkwa wÿr me imã gÿhkra curor, ne me apê,
wa ha nee me apupun nare,
ne nee me apar nare.
Ca ha ampeaj kam, tee imã me acakôac to me acakôc,
wa ha nee me apar nare.
Ampo na?
Me gÿhkra itajê pê mehcuran catêjê jÿhkra.
Ne ihhêj ne cormã ahna ate mehcuran atajê caprô.

“Imã me ate me amji cuhhôn ne me atetet na me ato prãm.

Nãmhã, ne me akên ton jicu.
Ne ampo pejti ton to ca me amji kampa,
ne me to amji pyràc.
Ne me cupê hamreare atajê me,
me cupê me hÿmjê nare atajê me,
me cupê mempjê nare atajê,
ca mehtehcajpa.

“Ca ha ita to hane,
wa ha ana amji capa ne ato impej.
He ampeaj kam wa me amã amji jarê.
Ca ha te ate me akên itajê ton,
mã cute me acaxwÿn to kên cakrô,
ate ihkên ton jicu jahpan xà na,
wa ha itÿj hacpÿa mã me amã to impej.
Ne ca ha ampeaj kam me ikampa,
ne ito pit mã amji mã me ahimpej,
wa ha itÿj me ato me gakraaj to me gakraj.

“Nãmri ca ha ma ate ame ipar caca,
ne icuna mã ame akên ton na,
wa ha cama me ana me acurê xwÿn jamã,

quê ha jũ mã ame ato,
ne me gipej tu" hane.

Hõhõ, quê ha ita me ato hane he.
He me gõ Pahpãm, pê Pahhitia te ri me amã hũjarën
xà ita to hajjã.

**Pê Pahpãm Mexij pê mehkên catia pê me tohpôj catê
to awjahkre**

Ixaj 11.1-11

11 Pê Pahpãm hipêr harkwa to ihcakôc catê pê
Ixaj ata mã harkwa kujahêc to hane he:

"Quê ha jũm pĩ pàr nõ kat na hakep,
quê ha ihtjy ipàr wej ata kat kam, haxà kam hitêr,
ne kam ipàr tuw nõ cato.
Jĩkjê na, quê ha pahhi xwỳ pê Tawi tàmwxỳ tàmwxỳ
nõa cato.

Ne quê ha ramã pahhi xwỳ pê Tawi ihtyc cakrô,
quê ha ihtjy ihtàmwxỳ tàmwxỳ nõa cato,
ne cupê imã hãpên catê.

² "Quê ha ipê Pahhiti Carõ Pejti ata cumã amji gõ,
ne ihkôt cumã ihkrã kre te amji jahkre pejti gõ,
mãr quê carôt tỳjti to me hapackre,
ne ihtjy cumã ijahkre pej, ne cumã icupa.

³ Ne quê ha ampeaj kam ihcunea na, cumã ipar prãm
pit.

Ne cupê ajpên pê mehkra kên me, me mempejti to
ipicokjêr catê impeaj.

Ne nee quê ha cute mempar xà kôt pit mã,
põ rũm cute me hõmpun xà kôt mehkên mã me irên,
ne mempej mã me irên nare.

⁴ Ne quêt cute catyt kam,
me cupê ampo hamreare atajê tehcajpar prãmte,
cute ame to kên catêjê atajê kên mã me curê.
Ne harkwa to cute me cumã ihcakôc xà to, quê ha me
hipej.

⁵ Ne ihtjy catyt kam ahpãanre na,
mehcunea to impej to ipipenti to ipa.
Ne ihtjy cute ampo to hũjahkre xà ata na, amji jarkwa
par to ipa.

Quê ha mehcunea ahna me hõmpu,
ne me cumã impejti ne.

⁶ "Ne quê ha pahhi xwỳ pê Tawi tàmwxỳ tàmwxỳ ata
himpej xà jõ amcro ata kam,
quê ha ampo cunea hacpã mã,
mam cute amji ton pê mã,
amji ton xà ata na quê ha.
Ne rop cahàc jàprêhti atajê hacpã mã capônÿre ne,
ne ihtjy carà cahàcti hõhti atajê cahê na apu ipa.
Ne ropkror jàprêhti atajê hacpã mã capônÿre ne,
ne ihtjy carà cahàcre atajê cahê na apu hikwa.
Ne hanea ne rop cahàc jõkre hõhti atajê,
quê ha ihtjy pryti krahti atajê me ajpên cahê na apu
hàpàn to ipa.

Quê ha hanea ne, ihtjy ahkrare kwỳ amji kôt ame to
ipa.

⁷ Ne quê ha ihtjy ampo jàprêhti pê uxô atajê hacpã
mã capônÿre ne,
ne ihtjy pryti cahãjti atajê cahê na apu hàpàn to ipa.
Quê ha pryti krare me uxô kra xwỳjê ihtjy ajpên cahê
na hikwa.

Ne rop cahàc jõkre hõhti atajê,
quê ha cupê pryti pyrác,
ne ihtjy ahtu pit kur to ipa.

⁸ Ne me ahkrare kryjre itajê,
quê ha ihtjy cagã pahtjy ihkrĩ xà atajê cahê na
ame hàkrun to me ipa,
ne ahkrare kàre itajê,
ihtjy hũhkra to parpup krĩ xà kam hahê atajê caxun to
me ipa,
quê ha nee mehcãmjar nare.

⁹ Ne quê ha ijõ pjê impejti ita kam,
nee ampo te me to kên xà caxuw hamreare ne,
ne nee kam ampo jamre xà nare.
Ne mër ampo na mã quê ha ampo itajê cunea to
hane?

Nee mã ampo na nare.
Pom cõxwa hãn ne hipu,
ne ampo cunea pro ne inco,
mã nee incrà nare,
ita jĩkjê na,
quê ha pjê kam mehkra atajê cunea
ipê Pahhiti na me ipupu,
ne me ijahkre pej pejtu ne,
na quê ha nee jũm pê ijahkre kêt nare.

¹⁰ "Ne amcro ata kam,
quê ha pahhi xwỳ pê Tawi ata tàmwxỳ tàmwxỳ ata pê
pjê cunea jõ Pahhiti catia.
Quê ha krĩxàre cunea me,
pjê cunea kam ampo kra cunea,
hỹrmã me cuprõ,
ne me cumã amji kĩa kam ihhimpej xà krac ri me
axà.

Ne ihtjy ihkrac ri mempejti to ame kôt.

¹¹ Ne amcro ata kam,
quê ha pjê cunea pĩn,
hipêr Pahhiti na mehkwy pê Juta catêjê me Ixaher
catêjê cahhur to caprã,
ne amji na me to cuprõ,
mãr quê hanea ne ihhimpej xà krac ri me axà" hane.

Pê Pahpãm mehkwy mã caprĩ

Ixaj 40.1-31

40 ¹⁻² Yhỹ me ikwỳ, Pahpãm te me acaxuw ito
cumã ihcakôc catê na, ne imã ampo jarën ata,
wa ha me amã harẽ. Cute imã hajjã he:

"Ca ha Krĩpinkrên kam me ikwỳ pê Juta catêjê mã ito
gũjarën picre to awjarẽ, ne me cumã:
'Ate me amji pupun kên tỳjti ata hamre.
Ne ate me ito kên jahpan xà na,

wa ramã ite me amji pupun xà kêanre na me aton to ipijakrut,
na wa nee hipêr ate me ito kên ita to amji japackre nare' hane" hajÿr.

³ Ne Pahpãm te imã harkwa to imprar catê nõ kujahêc, mã cute imã caràr to:

"Me pajõ Pahhiti mã, ate amji kam me gapac xà kên atajê jicu,

ne me to impej xà te hajÿr he:

Ca ha gõ pahhi mã pöti kam,
pjê kam me hamreare ata kam pry nõ to,
mãr quê cumã ihcuhtacti ne,
ne ajpënti ne.

⁴ Ne hanea ne me caprũm to hipu,
ne me kên to hõkre nõ,
ne ahkre jituw to me hipu pa,
ne me awjarõ to ajpën pa,
ne cumã pry jikõtti atajê to ihcuhtac,
mãr quê ahna mõr xà ata cumã ajpënti ne.
Jĩkjê na, ca ha me cumã

ate amji kam gapac xà impejti ton to me apa,
ne catyt kam me apa.

⁵ Ne quê ha pjê kam mehcunea mehkri atajê me pajõ Pahhiti carõt jãhcujro ata pupu.
Ne Pahpãm te ri ita ton na amji jarën,
na quê ha ihtÿj ton to hane" hajÿr.

⁶⁻⁷ Mã jũm ita te imã:

"Acaràr!" hajÿr.

Wa cumã:

"Mër icaràr xà jũ to mã, wa ha icaràr?" hane.

Mã cute imã:

"Ca ha acaràr to hane he:

'Pom mehcunea pjê kam mehkri atajê pê ihhêj rũm ahtu pyrãc,

ne me hàpên xà impejti atajê pê pĩrã pejti pyrãc!

Ne quê ha ahtu me pĩrã incrà,

ne cyt ne hamre,

ita jĩkjê na,

quê ha mehcunea cyt ne me hamre,

me hàpên xà mea mã!

Quê ha hanea ne ahtu me pĩrã

põ kam kôc pahtÿjti cacrohti ita apê,

ne to incrà pyrentu,

ita jĩkjê na,

quê ha Pahpãm me hakõ,

quê ha me hamre pyrentu!

⁸ Ne ihtÿj jũ caxuw ahtu incrà xà,

ne hanea ne ihtÿj ampo rã inxõ,

ne hamre xà.

Ne quêt me pajõ Pahpãm jarkwa nare,

quê ha quêt ihtÿj ihkri rohnÿtti mã! hane" hajÿr.

⁹ Mã hipêr jũm ita te imã:

"Ca ha ate me gũjarën pejti to me gũjarën catêjê nõ,
hawënti nõ kãa na api,

ne Kripinkrën kam mehkri atajê mã acaràr,

ne akrãhhia kam me cumã acaràr,
ne nee apu amji mã me ampo cupa nare.

Ne Juta jõ pjê kam

krí cunea kam mehkri atajê mã:

'Ramã me gõ Pahpãm cator to mõ! hane" hajÿr.

Pahpãm ri mehcunea jirõ pê carõt cati ne cute amji jahkre pej cati

¹⁰ Ýhÿ, Pahhiti pê Pahpãm ri ramã carõt tÿjti catia to cator to mõ!

Ne quê ha carõt kam ihhimpej xà tÿjti ata me to ihhimpej.

Ne quê ha ahpÿanre na cute me ampo ton atajê jahpan xà na,

me cumã hàmjõr xà impejti ata to ajpën ahpar mã mõ.

¹¹ Ne pom hãn ne carà cahàcre hòhti jamãr catêjê hamãr prãmte to ipa,

ita jĩkjê na,

quê ha ihtÿj mehkwy atajê to amji pytã,

ne taa cupê me hamãr catê impejti ata na amji to.

Ne ihpa kam quê ha mehkare japÿ ne me to ipa,

ne ma menxyrxwy me,

me hamãr peaj to ipa.

¹² Ne jũm te mõrmõ Pahpãm cuxà,

hũhkra to cõxwa to ipipën?

Hamreare,

nee jũm te cuxà ton nare!

Nare, jũm te mõrmõ Pahpãm cuxà,

hũhkra to cõjkwa to ipipën?

Hamreare,

nee jũm te cuxà ton nare!

Ne jũm te mõrmõ Pahpãm cuxà,

hõ kãhà kam pjê jacrõ cunea to cuprõn?

Hamreare!

Nare, jũm te mõrmõ, cute ampo to ipipën xà kam,

hawënti jõ kên cunea to ipipën ne hũti na hahkre pej?

Hamreare!

¹³ Ne jũm te mõrmõ Pahpãm cuxà,

Pahhiti Carõ Pejti ata jahkre pej pejtu?

Hamreare!

Ne jũm te mõrmõ Pahpãm Carõ japackre prãmte,

cumã ampo to hahkre?

Hamreare!

¹⁴ He xà ajkĩ Pahhiti te,

jũm te cumã ampo to hahkre xà na,

jũm na hàhwÿr?

Hãpà!

He xà ajkĩ jũm te Pahhiti mã catyt kam ipa to hahkre?

Hãpà!

He xà ajkĩ jũm te, cute ampo jahkre pej xà to cumã

hahkre,

mã cute hahkre pej?

Hãpà.

He xà ajkĩ jũm te cumã cute amji jahkre pejti ita to

hahkre?

Hãpà!

15 He Pahpãm mã pjê kam ampo cunea na,
krĩxàre mehkrĩ itajê jamreare.
Ne cumã me cupê cuhkõn kam,
cõ kryjre ne ahtwỳ
ne ihpehpec pyxit peaj ata pyràac,
ne ihcunea na me hamreare.
Ne cumã me cupê ihhêj rũm
ampõ te ipipẽn xà kam
pjê jacrõ to amji japackre xà nare ata pyràac.
Ne cumã cõ jipõc ri pjênocrà itajê to ipipẽn xà te ha-

jýar,
pom quê ampo cajcucre to ipipẽn xà nare he.

16 Quê ha te kẽn catia atajê na pĩ cunea to me cuprõ,
ne cumã kẽn atajê kam pryre apu ipa atajê cunea jõr
prãmte,

pĩ ata kam haxwỳ ne me to caxàr cacrõ,
quê ha nee Pahhiti mã ihnõ na cormã cati nare!

17 Ne cumã ampo na,
krĩxàre atajê jamreare ata,
ne cumã me cupê ampo kõt hamreare atajê japyre
mã me.

Pahpãm cahàc krekà atajê pê nee Pahpãm pyràc nare

18 Ne mër ampo me ca ha Pahpãm ita to me ajpẽn?
Xà ajkĩ pahpãm cahàc krekà me ipipẽn?
Hãpà!

19 He pahpãm cahàc krekà ton catêjê,
ihtỳj hãn ne caręc to me to,
ne wakỳre prà tepti pê ôr ata to hipy me ahna pra ne
me to incururo,
ne ihkõt wakỳre jakati to,
cumã me hakrõ xà to.

20 Ne me cupê hamreare pê wakỳre prà tepti pê ôr
me,
wakỳre prà jakati na hĩ jàhwỳr atajê jamreare,
na quê ha ihtỳj amji mã pĩ impejti atajê nõ capi,
cute cumã pahpãm cahàc krekà na ton prãmte.
Ne cute me pĩ to ipihho catêjê nõ te amji jahkre pejti
nõ mã cugõ,
mãr quê cumã pahpãm cahàc krekà cuhhê impejti nõ
to.

Ne nee ampo itajê nõ pê Pahpãm pyràc nare.

21 He xà nee jũ caxuw ate Pahpãm jahkre pej nare?
He xà nee ajkĩ jũm te me amã harẽn nare?
He pom pê mam me amã Pahpãm to hahkre ita?
He xà pê ca, pjê te amji ton pê mã,
ramã cute ihcakõc xà ton ata na,
ate hahkre pej nare?

22 He Pahpãm ri pjê jajoti ita jipy ihkrĩ,
ne cumã me pahkryjre te hajýar,
pom quê me pamã xycxycre kryjre he.
Ne taa mã ri cõjkwa capõ,
ne ihkrac ri ihkrĩ to hanea,
pom cu ahpykrã xà caxuw me cupêhkà capõ,
ne ihkrac ri me pahkrĩ he.

23 Ne taa mã ri pjê kam,
pahhi carõt tỳjti me,
me to ihhimpej catêjê catia atajê to ihkryjre,
mã cumã me ampo na me hamreare.
24 Ne cumã me cupê ampo kre xà ata pyràac,
ne pom me ampo hy kre,
mã kam harê me ajkaam,
mã kõt to incrà, mã carýjre ma to ahhi, ne to cuto ita
na mã,
cumã pahhi atajê te hajýr,
mã cyt ne me to hamre.

25 Ampo cunea jirõ pê Pahpãm pejti ata te amji na
hàhcukjêr to hajýr he:

“He ampo me, ca ha me ito ajpẽn?
He xà ajkĩ ipê ampo pyràc?
He xà ajkĩ jũm me ipipẽn?
Hãpà” hane.

26 Ne ca ha caxwa ri cõjkwa wỳr rĩt,
ne caxêre jàhtõtì atajê cunea pupu,
ne jũm te mõrmõ ton?
He Pahpãm te ri ton,
ne ahpýanre na haprỳ atajêa na,
cute cumã hàkjêr par,
ne ihkrĩ xà kam ihkrĩ par.
Ne carõt pahtỳjti catihti ata kõt,
nee ihnõ jamre nare.

27 Hàpà, Pahpãm na mehkwy pê Juta catêjê itajê!
Ampo na mã ca ame Pahpãm mã me gàhcahhõn itajê
to ame amji jarẽn to:

“He Pahhiti te nee ite amji kam ijapac xà na ijahkre
pej nare,
ne cupê ipimxur tu.

Mã nee cute, ite ampo na prãm ata na ito amji
japackre nare” hane?

28 He xà apê Pahpãm jahkre kêatre?
Xà nee jũ caxuw ate harẽn par nare?
He Pahhiti pê Pahpãm tĩr rohnỳtti mã ata,
ne cupê pjê me kam ampo cunea ton catê.
Ne nee quê ha jũ caxuw ihtycrĩ, ne ihpeacre nare.
Ne nee jũm te, Pahpãm te amji jahkre pej krã kreti
atajê cunea na hahkre pej nare.

29 Ne taa mã ri mehtycrĩ atajê mã carõt to ihtỳj,
ne mehpeacre atajê mã carõt to ajcamẽ.

30 Ne mentuwjê intuw cacrõ,
ihtỳj jũ caxuw mehtycrĩ, ne mehpeacre xà.
Ne mentuw picahur na mehte tỳjti cacrõ,
quê ha ihtỳj jũ caxuw ame ajhu,
ne ame hikwa.

31 Ne quêt Pahhiti to amji mã mehhimpej,
ne me hikaj to me ipa atajê,
quê ha ajteare mã me,
ne hõtpê amji mã me carõt to intuw.
Ne me cupê hàcti jara tỳjti,
mã to ne kỳaj pê apu ipa to pyt ata pyràac,
ne ampo cunea mã me hũcanãr to ipa.

Na quê ha Pahpãm jarkwa na memprar catêjê na
ame pra,
ne nee amehtycrî nare.
Ne quê ha harkwa kôt catyt kam ame ipa xà ata cax-
uw,
nee me cupê me carôt hamre nare.

**Mexij te mehkwy pytâr xà caxuw ihtyj amji pupun to
kêanre**

Ixaj 53.1-12

53 Pahpãm te jũm ita na, me pamã harkwa ku-
jahêc,
cu pahte ahna mehkwy mã me harên cacrô,
mã ihhêj ne, nee cute mempar,
ne amji mã me to hajyr nare.
He Pahhiti te me cumã mehkritxwý to hũjahkre ata to
ipipê cacrô,
mã ma hỹrmã ame irît,
ne ame hõmpun caca.
² Ne pom pjê incrà kam me ahkêt jakep,
mã kam harê ahtwý, ne hacpyã mã kam hitêr ne
hapôj,
ita jĩkjê na mã,
jũm ita te Pahhiti kam mare mã, ampo kên cunea
jipôc ri,
amji to ipijapar ne ihkà.
Ne põ rũm pê hĩ kam,
ihhêj ne nee impej nare.
Ne ihhêj ne, nee cupê jũm catihti ata nare,
ne cupê me pajĩ te hajyrre ata pyrãac.
Na ri nee ihhêj ne cute amji wýr me pahto hàhtêp xà
caxuw,
hirã pê impej ne cati nare.
³ Ne cupê hũmre te amji pupun xà kêanre kam ipa
catê,
cama hanea ne amehcaca,
ne ame curê.
Na ri nee hỹrmã me irît,
ne me hõmpun prãm nare,
ne ma amehcaca.
Cu nee ajte pahte amji mã me to cati nare.

⁴ Ne me pahte hajyr cacrô,
mã ihtyj cutea me pahte me amji pupun xà kêanre
ata mã amji jõr,
ne cutea amji kam me pahte me amji cajpêr xà kàj
xàhti atajê cunea jaxwýr.
Cacrô, cu pahtyj ajpên mã me harên to:
“Pahpãm ri apu hũmre ita to kên he,
ne taa mã ri apu ihcahhy,
mã ihkàj xà” hane.

⁵ He pahte ajpên mã me harên to hajyr cacrô,
mã nee cute hajyr nare.
Ne pahte me to kên,
ne me to ihcupan xà atajê cwýrjapê ri,
cute me hũmre ata caxwýr.
He pahte me ampo kên ton atajê jahpan xà na ri,

ma cute me to irô,
ne cupê me hĩ to kêanre.
Ne cute me to kên xà ita kôt ri,
cute me pamã ampo cupa nare na me pahton,
mãr cu me pahcarĩcti kam me papa.
Ne cute me haxôp xà ata kôt ri,
ihhêj ne hacpyã mã, me pahcaprãr, ne me pahcapên-
ti.

⁶ Ne pom carà cahàcre hòhti me hamãr catêjê kaj na
apu ipa,
ne cute amji to ipictor,
ita jĩkjê na mã,
cu pahte me Pahpãm jõ pry cupan,
ne amjia kôt me pajõ pry itajê pynãr.
Ne Pahhiti te,
pahte me to kên ne me to ihcupan xà atajê jahpan xà
na,
nee me pahto kên nare,
ne ma jũm pê me pahkritxwý ata to irô, ne cute apu
to kêanre.

⁷ Mã cute mehkôt harên hêj xi xà kêanre to me
harên,
ne to me cumã ihkàj xà catia ton cacrô,
mã nee cute amji pytâr xà na
me cumã ampo to ihcakôc nare,
ne nee amji jahpan xà na mencrôn nare.

Ne pom ma carà cahàcre kra curan xà wýr me to ipa,
mã aracri ipa,
ita jĩkjê na ri cute mehcuran na, cama amji na me
hamãr,
mã cute mehcuran.
Ne pom me carà cahàcti hòhti hò jakep, mã nee in-
cwýr nare,
ita jĩkjê na mã cute,
ne nee amji jahpan xà na cute ame to kên catêjê mãn
kên nare.

⁸ Ne cute mehpro, ne mehhêj xia to cute me to ihhêj
xi,
ne mehcukij xà kêanre to mehcukij,
ne nee cormã ihkra nare kam mehcuran,
mãr quê nee hipêr ita ri me hipôc ri apu ipa nare.
Ne me pahkwý te me to kên,
ne me to ihcupan xà cwýrjapê ri amehcahhy.
⁹ Ne nee apu hàprê to ipa nare,
ne nee apu ihhêj xia to ihcakôc to ipa nare cacrô,
mã ihtyj cute me hàhcuran catêjê cahê na me harêt
na harkwa cacrô,
mã me hakràjti jarêt xàa kam, cute me harêt.

¹⁰ Ne nee cute ampo to kên nare cacrô,
mã Pahhiti te to mehkên catêjê pyrãac,
ne cumã ihkàj xà ton.
Ne pê mam ramã Pahhiti ita ton xà ita na amji kam-
pa,
na pê to hane.
Ihhêj ne Pahhiti te, jũm te me to ihcupan xà jahpan
xà na,

cute me hũmre ita curan na me hamār,
mã cute mehcuran cakrô,
quê ha ihtÿj hacpÿa mã ihtĩr,
ne ihtĩar na apu ipa rohnÿtti mã.
Na quê ha ihtÿj jũ caxuw cumã mehkra jãhtôti atajê
pupu,
ne Pahhiti mã ihkôt pjê kam me hàhtôa to ihkra
prãm.

11 Ne cute amji cajpěr xà kēanre to amji cajpěr xà ata
jakàn pê,
quê ha cormã me hàhtôa atajê,
cute amji cajpěr xà kēn ata cwÿrjapê
cupê Pahpãm kra na me hahkre pej,
na quê ha ampeaj kam hũrēn me hakry.
Ne quê ha cupê Pahpãm mã hàpēn catê, ne caty
kam ipa.
Na quê ha me hàhtôa ne, cupê mehkritxwÿ ita na me
hahkre pej,
ne ihtÿj amji mã me to ihhimpej.
Ne quê ha taa, cute me to ihcupan xà jahpan xà na,
ihkēn cunea mã amji gō,
mãr quê Pahhiti me ahna amji capa,
quê ihtÿj mempej pêa mã ame ipa.
12 Cute mehcuran xà mã amji jōrtu.
Mã cute me to ihcupan catêjê cahê na
cute mehcuran xà ata pê,
cute amji mã mehkēn ton xà atajê cunea juwahi,
ne ihtÿj cute me to ih cupan catêjê cajrēn.
Na quê ha Pahpãm pê Pahhiti itajê cunea jahpan xà
na to catia to cati,
ne ampeaj kam to carôt tÿj.

**Pê Pahpãm mã mehcunea te hÿrmã ipipkjêr na to
prãm**

Ixaj 55.6-13

6 Ỡhÿ me ikwÿ, cormã Pahhiti te ita ri apu mōr ita
kam,
ca ha atÿj me hapê,
ne cormã ame acahê na mōr xà ita kam,
ca ha atÿj cute me apytār xà na me wÿ.
7 Ne quê ha mehkra kēn catêjê,
cute me amji kam hapac xà kēn ton jicu,
ne nee hipêr cute me ton na me amji to amji japackre
nare,
ne rÿ mã me pajō Pahhiti pê Pahpãm wÿr me apkjê
na mã,
quê ha taa ame caprĩ,
ne cute me to kēn atajê to tojnō hiahpuro,
ne nee hipêr to amji japackre nare.

8 Pahhiti te me pamã, me pahna amji jarēn to:
“Ite amji kam ijapac xà pê nee me ate amji kam me
gapac xà pyrãc nare.
Ne nee ijapēn xà pê me gápēn xà pyrãc nare.
9 Pom pjê jirôa pê cōjkwa te pjê jirãr,
ita jĩkjê na mã,
ijapēn xà te me gō tekjê jirãr.

Ne ite amji kam ijapac xà te gō tekjê jirãr.

Pê Pahpãm jarkwa cakôc xà kôt ihtÿj ampo

10 Ne pom hãn ne cōjkwa pĩn cō carôt wrÿ, ne ta wrÿ,
ne xa pjê inco,
mãr quê pjê kam ampo cunea to ajcamě,
quê ha me cumã cute me hō kur xà atajê,
ne cute mehkra xà caxuw me cumã ihhy,
ne cormã hacpÿa mã api,
ita jĩkjê na,
quê ha ijarkwa hane he.
11 Ne ipĩn, ijarkwa hapôj ata,
quê ha nee hacpÿ ne caprÿ iwÿr amji jaxàr nare.
Ne cute me kam hapac prãmte,
wa ite mehwÿr ihkujahêc,
na quê ha nee ahna mehprãr nare ne ihtÿj me kam-
pa.

12 Na ca ha atÿj, jũ caxuw, me gakrya kam,
me acurê xwÿn catêjê jō pjê pê me acato,
ne me acarĩcti kam,
me amã ampo cupa nare kam,
ma me gō pjê impejti ata wÿr me axy.
Na quê ha, me amãa ihhêj ne hàhkà jakôt me, awjarô
atajê cunea,
ate me amji jaxàr xà ita pyrēn hakryte apu cre.
Quê ha hanea ne pĩ cunea
me apyrēn cumã amji kĩnte,
ihhêj ne apu hũhkra cahhy.
13 Ne curi hōmjĩ jaxà kam,
quê ha quêt pĩ tÿjti pejti cuhtacti atajê hapôj.
Ne curi pĩhhô jãprēhti hapôj ata jaxà kam,
quê ha quêt ampo pĩhhô cuxwati atajê hapôj.
Ne ampo pejti itajê,
quê ha quêt ijaprÿa na hapôj.
Ne ipê Apãm Cati pê Pahhiti to
ate me amji japackre rohnÿtti mã xà na,
quê ha ita hane.
Na quê ha nee jũ caxuw hamre nare” hajÿr.

Quê ha Mexij ihtÿj me cupê hamreare atajê tehcajpa

Ixaj 61.1-11

61 Ỡhÿ me ikwÿ, por Pahpãm te me pamã jũm ku-
jahêc na to hũjahkre ata te amji jarēn to:

“Pahhiti te ampo cunea to ihhimpej catê ata te me
cupê hamreare atajê mã,
ite ijũjarēn xà pejti jarēn catê na ixãm,
cwÿrjapê ri Carō Pejti te imã amji jōr.
Ne cutea ri mehkwy wÿr ikujahêc,
mãr wa mehpeacre me,
me cumã amji kĩn nare atajê caprĩ,
ne hacpÿa mã me cumã me carôt gō.
Ne hanea ne cute awcapãtkôti kam me hacjēn catêjê
mã:
‘Gapacta ne me gapôj’ hajÿr to ipa.
2 Ne wa hanea ne mehcunea mã Pahhiti jarē, ne me
cumã:

'Quê ha caku itajêa kam
Pahhiti me akên cati pê me gapôj
ne me ato impej,
ne amji jahpan xà na,
mehkrã kêanre atajê to kên' hane.
Ne wa hanea ne mehcuea ame amrã atajê mã caprĩ.

³ "Ne por Xijãw jô kên cahê na Krĩpinkrên kam mehkrĩ
ne ame amrã atajê,
wa ha itỳj cute ame ampo na prãm atajê,
me cumã cugõ.

Ne me cumã amji kĩn nare na cute me hahkre pej
prãmte,
pro to cute me amji krã cunea jipro atajê,
wa ha quêt me cumã pahhi krãhkà impejti gõ,
hacpỹa mã me cumã amji kĩn na, cute me hahkre pej
prãmte.

Ne mehpeacre atajê,
wa ha me cumã ampo cacô cuxwati gõ,
mãr quê me hakry.
Ne jũm mã amji kĩn nare ne cupê amji jahkre kêatre
atajê,
wa ha me cumã cupẽhkà impejti gõ,
ne cute me Pahpãm pej na hũrên hakryti na harên na
me to.

Ne pom hãn ne me ampo pĩxô pejti pàr kre,
mã cati ne ihkô, mã mehcuea amji mã ihkre catê
jarên pejti,
ita jĩkjê na,
quê ha mehcuea me Pahhiti na mehwỳ pê catyt
kam me ipa na ame hõmpu atajê,
ihtỳj me Pahpãm jarên to impejti ne.

Quê ha Mexij hacpỹa mã mehwỳ to ajcamẽ ne to cati

⁴ "Yhỹ me ikwỳ, por pê mam me curê xwỳn me pan-
quêtjê pê me hõ krĩ to kên ne me to hamre atajê,
ca ha hacpỹa mã me to impej.

⁵ Quê ha me cupê mehcahkrit atajê,
ihtỳj me amã me aparxare jamãr to me ipa.
Ne me cupê me akwỳ nare atajê,
quê ha ihtỳj me gõ pur kam me amã me apê.

⁶ Ne quê ha mehcuea mã me apê Pahhiti mã ame-
hcajrên catêjê,
ne apê cumã me gápên catêjê na
me gahkre pej.
Ne ca ha krĩxàre cunea jô to amji mã garte,
ne to garte tu.
Ne ca ha me hàncukrêj atajê pê me atekjêa na ahna
me amji jarê.

⁷ "Ampeaj kam quê ha me ikwỳ te amehpahàm catia
pro xà kaj na,
mehcuea kam mare mã me ampo pejti catia pyr to
me ajkrut.

Ne mehpahàm xàhte amencwỳr xà kaj na,
quê ha cute me ampo pejti ita pyr pyrên ame hakryte
ame cre.

Ne quê ha pjê to hõ tekjê ata kam me to ajkrut ne me
cukwa.

Na quê ha hũrên cumã amji kĩn rohnỳtti mã.

Pahpãm ma apu ampo kên cunea caca

⁸ "Ne ampo na mã quê ha me hane?

Nee mã ampo na nare.

Pahhiti te me ahna amji jarên to hajỹr he:

'He ipêa ri me hõ Pahhiti,

ne quêt imã,

catyt kam jũm te me ampo kên ton jahpan xà na,

cute mehckuj xà hêj xi nare kam mehckuj ata na ri,
imã ihprãm.

Newa ma apu hàhkĩj xi me,

ampo kên cunea caca.

Ne wa itỳj ite me cumã ampo to ijũjahkre ata na,

amji jarkwa kampa,

ne wa ha itỳj

ite me cumã ijàmjõr xà gõ.

Ne itỳj me ajpẽn pa.

Ne quê ha ite me ajpẽn par xà ata kôat me ipa
rohnỳtti mã.

⁹ Ne quê ha pjê cunea kam,

krĩxàre cunea, me ikwỳ tàmxwỳ tàmxwỳ jahkre pej.

Ne quê ha mehcuea ame hõmpu atajê me amji mã
harên to:

"Itajêa kam ri Pahpãm te harcô mẽn, ne me to impej
he" hane' hajỹr.

Hõ quê ha ihtỳj amji jarên to hane" hane.

¹⁰ Na quê ha Pahpãm na mehwỳ me amji jarên to:

"Pahhiti pê Pahpãm pyrên

me ijakrya to me ijakry,

ne me imã amji kĩn hyre nare" hane.

Ampo na?

He pom me hakràjti me cupê hamreare tehcajpar
prãmte,

me cumã ihkat kà impejti me,

hitô kà pejti gõ,

mãr quê impej pêa mã apu kam me ipa,

ita jĩkjê na ri,

Pahpãm te me itehcajpar prãmte,

ampo kên catia pê me ipytàr,

ne catyt kam me ipa na me ito,

mãr wa catyt kam ame ipa.

Ne pom me hikwa tuw catêjê

me amji krã jakrô,

ne me hakrô xà to me amji cũmpej,

ita jĩkjê na mã,

Pahpãm te me ito impej,

mãr wa me ipej pêa mã ame ipa.

¹¹ Ne pom pjê kam me ampo hy kre,

mã huprãj hapôj,

ita jĩkjê na mã,

Pahhiti te ampo cunea to ihhimpej catê ata,

pjê cunea kôt krĩxàre cunea te catyt kam me ipa na
me to,

quê ha catyt kam me ipa.

Ne quê ha Pahpãm to cute me cati prãmte,
ihtÿj cumã impej ne cati na me harên to me ipa.

Quê ha Pahpãm ampo cunea to antuw ne to impej

Ixaj 65.17-25

17 Ne Pahpãm pê Pahhiti pê ampo cunea to ihhimpej
catê ata te amji jarên to:

“Wa ha ijâpên xà to ita
ca hõmpu he:
Wa ha cõjkwa tuw me, pjê tuw to,
ne ramã ampo cunea tuw pit ita kam,
quê ha nee jũm hipêr mam ihtũm atajê to me amji
japackre nare.

18 Ne ite me amã ampo tuw ton itajê pyrên,
ca ha ame gakry,
ne me amã amji kĩn rohnÿtti mã.
Ne quê ha pjê cunea kam
me hàhtõa Krĩpinkrên me,
kam mehkrĩ atajê pyrên me cumã amji kĩn,
ne ame hakry.
19 Ne pa, ite hajÿar, Krĩpinkrên pyrên ijakry,
ne hanea ne kam mehkrĩ atajê pyrên imã amji kĩn.
Na quê ha nee hipêr jũm incwÿr nare,
ne nee hipêr jũm, amji japête incwÿr kam hapac nare.

20 “Ne nee quê ha hipêr jũm krare amji to ipijapar to
incri
ne hacpÿ ma mã ihtyc nare,
ne ihtÿj amji to ipijapar to ipa.
Ne mehwej catêjê, quê ha ihtÿj mehwej to me ipa,
ne maa, cute me to hõ caku mã hahêr xà ata mã me
to hahêr tu,
ne cormã mehweaj to ihwej,
ne mehtyc to hane he.
Ne cormã jũm na caku te xěj ne ihtyc ata,
quê ha me amji mã harên to:
‘Pÿhàpà, nee cormã ihwej nare,
ne intuw kwÿa kam ihtyc’ hane.
Ne nee cormã ahna caku te xěj nare, ne ihtyc ata,
quê ha me amji mã harên to:
‘Ihhêj ne ihkrã kêanre,
ne cute Pahpãm to kên cwÿrjapê ri,
intuw kwÿa kam cute ihcuran’ hane.
21-22 Ne pom pĩ tÿjti, ihtÿj caku jàhtõa kam awcanã ne
ihcuhhê,

ita jĩkjê na,
quê ha ihtÿj me ikwÿ caku jàhtõa kam me awcanã,
ne mempej pêa mã me amji to ipijapar to me ipa.
Ne por wa ite amji caxuw me ikwÿ capi atajê,
quê ha ihtÿj caku jàhtõa kam,
cute hũhkra to hàpên xà ton atajê to me amji ca-
jpuaw to me ipa.

Ne nee hipêr amji mã me ikre nõ xãm,
quê kam jũmjê mehkrĩ nare.
Ne nee hipêr kam amji mã pĩxõ kre,
quê ha ajteare mã jũmjê cupê mehkrêr nare.
Ne quêt amji mã me hũrkwa pyxwÿ,
ne me taa kam mehkrĩ.
Ne kam me amji mã pĩxõ kre,
ne quêt me taa me cuku.

23 “Ipê me hõ Pahhiti,
ne hanea ne ipê mehtãmwxwÿ jõ Pahhiti.
Ne paa, wa ha me kam ijarcõ mẽ,
ne me to impej ita kam,
jũ wÿr quê me apê,
ne me hàpên xà kôt hamreare ne.
Ne quê ha mehkra ihpÿpÿm,
quê ha nee ampo kêanre mehwxwÿ cator nare.
Ne mehkra hãn ne me cumã me ajhu,
ne mempejti kam me amji to ajpa.
24 Ne hãn ne ampo na me icukij,
wa ha itÿj me kampa.
Ne cute amji tehcajpar xà na me iwÿr xwÿjrea na,
wa ma ramã ite mehtehcajpar xà caxuw me cahê na
ipa.

25 “Hõhõ, amcro atajêa kam,
quê hacpÿa mã rop cahàc jàprêhti atajê,
carà cahàcre kra me ajpên cahê na hàpàn to ipa.
Ne rop cahàc jõkre hõhti,
quê ha cupê pryti pyrãac, ne ahtu pit kur to ipa.
Quê ha mehkĩnte cagã,
pjê jacrõ pit kur to ipa ita na.
Ne quê ha ijõ pjê pejti ita kam,
nee ampo te to kên xà hamreare,
ne nee jũ caxuw ampo te to hamre xà nare” hajÿr.

Hõ, Pahhiti te amji jarên to hajÿr.

JEREMIJ

Jeremij pê Pahpām jarkwa to ihcakôc catê

Jeremij 1.15-16; 20.1-6

Ne Ixaj tyc jirô pê mã, hacpỹ ma mã Juta catêjê nee hipêr me Pahpām par nare. Cwýrjapê pê Pahpām hipêr me cumã harkwa to mehcakôc catêjê atajê kujate, pê me cumã, por quê ha Pahpām te ampo kên to jũ mã me to ata cawpa. Pê Pahpām me cumã ihcakôc catêjê atajê nõ japrỹ te Jeremij ita me hỹrmã kujate, pê Krĩpinkrên kam ihkrĩ.

Mã Pahpām te cumã harkwa hyr, mã ma Pahpām to me amji kam hapac xà jũrkwa wýr mō. Ne harkwa nã cute me hàhtōa mã harkwa to:

“Me ikampa! Cōjkwa jō Pahpām pê Ixaher catêjê Pãm Cati ame amã amji cawpa to:

‘Wa ha, por ite me akên xà to me amã icakôc ata to krĩ ita to apu ihkên,

ne cahi na krĩ atajê to kên.

Ampo na?

Ca nee ate me ipar nare kam,
wa ha me ato hane’” hajỹr.

Ne pê Jeremij amehcunea mã Pahpām cawpa to hajỹr to incirre nare.

Mã Pahpām to me amji kam hapac xà jũrkwa jamãr catê ata japrỹ te Paxur, ne cute Jeremij jarkwa na impar, ne ma apu ihcakôc xà ata na impar caca. Na ri cute haxàr ne ame caprêprêc, ne me huwapre. Mã huwapre ita na me hacjên xà kam, cute amji to apê.

Mã amcro nõ na Paxur te Jeremij mã hikran, mã cute cumã harkwa to:

— Wa ha Pahpām jarkwa kôt me amã ijũjarên xà ita to awjarê, ne amã:

“Paxur, wa ha jũ mã me ato,

ca ha me akwỹ mea mã,

me amã paa to me amã pa.

Ne ca ha atỹj me acurê xwýn jō wapo xwahhihti te me acuran na me hõmpu.

Ampo na?

He wa ha ma Papirõn jō pjê jō pahhi mã Juta jō pjê himpej xà ita gō.

Quê ha ma me ato mō ne me gacjê,

ne me gàhtōa ne me gipej.

Ne cama me ana me acurê xwýn jamã,

quê ha Krĩpinkrên pê me hakràj cunea to cutor tu.

Quê ha ma wakýre prà tepti me,

wakýre prà jakati me,

kên pràti itajê cunea to me cutor tu,
Papirõn jō pjê wýr.

“Ne ca, Paxur, quê ha me akra mea mã me ato mō,
ca ha gũrkwa me gō pjê pê ampýa mã ty,
Papirõn jō pjê kam” hane —

hajỹr xà ata na, tahnaa cute hajỹr.

Pê Pahhi Joquĩ Jeremij jō kàhhôc kam Pahpām jarkwa to capa

Jeremij 36.1-31

Pê Joxij pê pahhi pejti ata ty, pê ihkra japrỹ te Joquĩ ata pê pahhi, Juta jō pjê kam. Ne cupê hũmre kêanre, ne cute Pahpām jarkwa to ihcakôc catê pê Jeremij ita pro prãmte, apu hahêr to ipa. Mã Pahpām te Jeremij mã ihcakôc ne cumã:

— Ca ha ihkàhhôc nõ py, ne kam ite Ixaher catêjê na icakôc xà itajê cunea na ihhôc. Ca ha mam ite Joxij pê pahhi mã, ite ampo jarên xà ata rũm ahna to apy, ne curmã ite ampo jarên itajê mea mã, ahna ihhôc. Quê ha Juta catêjê te icuna mã mehkên ton xà atajê jahpan xà na, ite me to kên xà atajê, wa ha me cumã ihcunea cawpa. Quê ha ihhêaj to mehkên itajê jicu, ne iwýr me apkjê, ne me hõ pry kên ita jicu, wa ha mehkên ita to impej, ne to ijapac kêt — hajỹr.

Mã Jeremij te ihkàhhôc kam ihhôc catê japrỹ te Paruc na hàhwýr. Ne cute cumã Pahpām te harkwa cunea na ihhôc xà jarên atajê jarên partu. Mã Paruc te ahna ihhôc partu, ne cute me hipêj.

Mã Jeremij te Paruc mã amji jarên to:

— Wa ha ita ri, ipimxur xà kam ahtwý. Quê ha jũ caxuw, amcro nõ na, Pahpām to me amji kam hapac xà jũrkwa kam me amji kĩn nõ to, ca ha me cumã ihkàhhôc ita cahyt. Ampo na? Quê ha amcro ata na Juta catêjê cunea curi me cuprõn tu — hajỹr.

Mã amji kĩn nõ na Pahpām to me amji kam hapac xà jũrkwa kam, cute me cuprõn. Mã Paruc te Jeremij te ampo na mên xà atajê cunea ton. Ne cute me cumã Pahpām te harkwa kujahêc xà itajê cunea cahyt partu, Pahpām to me amji kam hapac xà jũrkwa kam.

Jirô pê mã ri me hàhtôti atajê jō pahhi catêjê kwý, mã ampeaj kam me hũpar xà ata cupaa to hũpa. Mã cute me Paruc mã:

— Wa ha itỹj pahhi Joquĩ mã me awjarê. Ne me imã amji jarê, jũ mã mã ate, ne ajte gũpar xà ita to gũpar? — hajỹr.

Mã Paruc me cumã:

— Pahpām jarkwa to ihcakôc catê pê Jeremij ata te ri imã ita jarên, wa ite ahna ihhôm par — hane.

Mã me hàhtôti atajê jô pahhi te Paruc mã:

— Mër Jeremij ita me amxu, ne nee jûm mã jû kam me amôr na me amji jarên nare — hajÿr. Ne me hõ pahhi itajê te jû ri me Pahpām jarkwa ita to ipimxur, ne ma pahhi Joquĩ mã me hũjarên to me mõi, ne cute me cumã ihkàhhôm ita jarên.

Mã ma pahhi Joquĩ te Pahpām jô kàhhôm ita wÿr jûm ita kujahêc, quê cumã cupy. Mã ma hÿrmã tẽ, ne cute cumã cator ne ipyr ne hÿrmã to cator, por curi pahhi me, me cumã me hàpên catêjê mehkrĩ ata wÿr. Pê ampeaj kam me cumã kry, pê cuhy na mehkrĩ. Mã jûm ita te me cumã Pahpām jô kàhhôm ita hô to incrê ne cahyt. Mã pahhi te wapore to hakep, ne cuhy kam haxwÿr. Ne cute to hajÿr to mõi ita kam, ihcunea to caxàr par. Mã pahhi Joquĩ mã hàpên catêjê itajê mã nee cute Pahpām jarkwa to caxàr xà ata na hũpa nare, ne nee pahhi te ampo kên ton xà ata na kam mencryc nare.

Mã Pahpām te hipêr Jeremij mã harkwa nõ ata jarên ne cumã:

— Wa ha apu pahhi ita me, mehkra mea mã, ame to kêanre ne, pom ite mehkên to me cumã icakôc xà ata to, wa ha ame to kên, pahhi me, mehkwy me, cute me ipar nare na, wa ha ame to kêanre ne — hajÿr. Hamre.

Pê Juta catêjê mehkên to me amji cator, Papirôn jô pjê wÿr

Jeremij 39.1-10

Ne caku te jû măn jirô pê mã ri, Papirôn jô pjê jô pahhi japrÿ te Napuc ita, ma Juta jô pjê kam Krĩpinkrên wÿr hõ krãhtare to me mõi. Ne cute me ahna krĩ krã, ne me kam ihtêm ne ame ajpu.

Mã Juta catêjê jô pahhi japrÿ te Xetequij ita te nee hõ krãhtare to mehcapên nare na, ramã amji cajpêr. Na ri me curê xwÿn te me hÿrmã krĩ pu na kwÿc ata cahhêc xà ata kam ri ma caxwa ri me curê xwÿn cupate mehcahkũm.

Mã ahkêt wÿr, Papirôn jô pjê jô krãhtare ma amehkôt me pra, ne cute me pahhi Xetequij pro, ne ma Papirôn jô pjê jô pahhi wÿr me to mõi. Mã pea pahhi ita te Xetequij kra cunea jipej na me mên, hũm kam mare mã. Mã cute me hipej tu, mã cormã Xetequij to impeaj ne ihtÿj cute mehkra jipej xà na me hõmpun. Jirô pê mã ri cute me Xetequij to tũm prãmte, into krÿn na me mên. Mã wakÿre to cute me huwapre, ne mento krÿn, ne me to amji mã me cumã hàpên catê, mã Papirôn jô pjê kam me cumã ampo pytãa to hàpên to ipa.

Mã Papirôn jô krãhtare te Krĩpinkrên to caxàr partu. Ne cute me pahhi jũrkwa catia ata me, Pahpām to me amji kam hapac xà jũrkwa ata to me caxàr. Ne cute krĩ me, intête kwÿc ata cunea hur partu. Mã krãhtare jô pahhi te me cupê Juta catêjê cunea to cutor tu na me mên. Mã ajmãr cute mehcunea to cutor tu, Papirôn jô pjê wÿr, cama cute me cumã me hàpên xà caxuw. Ne cute me cupê hamreare atajê to pit mã tojnõ na me cumã hũjahkre, mãr quê me ahtwÿ ne pur to me apê.

Hõhõ, Pahpām te mehkwy to kên xà ita to ri cute ame to kên. Ampo na? Nee amempar nare.

TANER

Ýhý, pê Exeker pê Juta catêjê nõ, ne Papirõn jô pjê kam me cupê Juta catêjê mehkrí atajê mã cupê Pahpãm jarkwa to ihcakôc catê. Ne cute ihcunea na hõ kàhhôc kam ihhôc. Cwýrjapê ri hõ kàhhôc ata japyrý te (Exeker). Ne hõ kàhhôc kam, cute Juta catêjê te mehken ton atajê cunea na ihhôc. Ne cute kam me pamã Krípinkrên jamre xà na ihhôc. Ne hanea ne hõtpê jũ caxuw Juta catêjê cahhur me, Ixaher catêjê cahhur te me cuprõn, ne ajkam mehpyým ne hacpyã mã Canãn jô pjê kam, cute me cuprõn. Quê ha Pahpãm me cumã jũm pê Tawi xwý tàmxywý pê me hõ pahhi catia ata kujate, quê ha me to ihhimpej to impejti ne.

Ne caku atajê nõa kam ri Juta catêjê caháj nõ impejti japyrý te Extikwýj ita Papirõn jô pjê jô pahhi nõ me hikwa tuw. Na ri hõtpê cute mehkwyý pê Juta catêjê tehcajpar ne me curê xwýn catêjê pê me hũtar. Na ri hõ kàhhôc japyrý te (Extikwýj).

Ne Taner pê Juta catêjê jô xũmre nõ ne cormã incuire, ne Krípinkrên kam ihkrí, pê ahnaa mehpro ne ma Papirõn jô krí wýr me to mõ. Mã curia ihkrí, ne catyt kam Pahpãm jarkwa kôt ipa rohnýtti mã. Cwýrjapê ri Pahpãm te cumã cute amji jahkre pej krã kreti catia ne hõr, na pê Papirõn jô pahhi kwý tehcajpar to ipa to caku to hàhtôa. Na ri hõ kàhhôc ita japyrý te (Taner). Ne ita caxuw Taner jô kàhhôc kwý mã he.

Papirõn jô pjê kam Taner ipa na harên xà

Taner 1.3-19

Pê Papirõn jô pjê jô pahhi pê Napuc ita te me cumã me hàpên catêjê jô pahhi mã harkwa to:

— Ca ha imã Juta catêjê intuw kwý capi, por pê ijô krãhtare Juta jô pjê pín me to cato atajê kwý — hajýr.

Ne pê me hàpên catêjê jô pahhi cumã Juta jô pjê kam mehhimpej catêjê kra to pit mã caprã, cute me cumã Papirõn jô pjê jarkwa me, cute amji kam me hapac xà to hahkre prãmte. Ne pê mempejti atajê me, me capënti atajê me, me hũpar krã kreti atajê to pit mã caprã.

Pê pahhi pê Napuc ita, cute hõ kur xà atajêa to me cumã harte na, cumã me hàpên catêjê jô pahhi mã harkwa. Ne pê ihkàhhôc to hahkre xà kam, me cumã ihkàhhôc to hahkrea to caku to incrê na awjahkre, mãr quê ame amji jahkre pej, ne ihtýj me pahhi catêjê tehcajpa. Ita na pê pahhi Napuc me to prãm.

Mã cute me to caprãr atajê kam, cute me cwat itajê ri, mehkwyý jirôa pê cute me amji jahkre pej. Ne cute me cwat itajê nõ ita japyrý pê Taner. Mã Taner ma apu pahhi jàpàn xà itajê caca, ne ma apu hõ pìxô cacô xýre ata to ihkôm caca. Ampo na? Pê ramã Pahpãm me cupê mam Ixaher catêjê atajê mã me hàpàn xà itajê me, me hõ pìxô cacô xýre ita cawpa, ne me to ihkôm tète me cumã. Cwýrjapê ri ma apu ihcaca, ne cute me hàpên catêjê jô pahhi mã amji jarên, quê ihtýj me hõ pê ampo hy me, ampo hô me, ampo xô pit to me cumã harte.

Mã me hàpên catêjê jô pahhi ihtýj apu ita na amji mã hõ pahhi cupa, ne Taner mã:

— Ca ihhêaj to ame gápàn xà itajê to ame apà, ne me akwý kínte me ahire, ne me apeacre ne, quê pahhi me gõmpu, ne apu ikam incryc — hajýr.

Mã Taner cumã:

— Cu ha ajpên par to hane he. Wa ha itýj ame ijàpàn xà itajê to me ijàpàn to amcro to me tej, jirô pê mã ca ha me ipupu, ne me icapi. Wa ha ite, cute me pahhi jô kur catêjê japyre mã me ijicot ne me itýj na, wa ha itýj me cuxà pahhi jàpàn xà ata to me apà, ne ihkôm xà ata to me ikô — hajýr. Mã me hàpên catêjê jô pahhi te mehkôat amji ton.

Mã Taner me, mehkwyý incrê itajê te me ampo hy me, hô me, ihhô kur, ne cô to mehkôm to me amcro to tej. Jirô pê mã ri cute me hõmpun, mã mentuw kwý itajê jirôa pê ame hicot ne amehtýj. Mã pahhi te hõtpê me hàpàn xà itajêa na me to ihtýj.

Mã Pahpãm te mentuw te cwat itajê mã, me cute me amji jahkre pej jôr, ne ihtýj ihkàhhôc to hahkre xà kam mehtehcajpar. Mã cute me cyt ne me ampo cunea ton jahkre pej. Mã Pahpãm te Taner mã me ipimtir jarên to hahkre, mãr quê hahkre pej. Ne pê caku jãhtôa kam ajco pahhi pê Napuc tehcajpar to catia.

Pê Napuc ipimtir kêanre to amti

Taner 2.1-13

Pê Napuc ramã Papirõn jô pjê kam ihhimpej to caku to ajkrut. Ne cute ipimtir catia to ipimtir. Ne ihkrã pictor tu ne nee hõt nare. Ne cute Papirõn jô pjê jô xũmre krã kreti cunea me, me hũxy xi catêjê cunea me, me cute me caxêre cunea te amji kam hapac xà to me hahkre catêjê cunea me na hàhwýr, mãr quê me cumã ipimtir xà kôt harê. Mã me cator ne cute me cuprõn. Mã pahhi me cumã:

— Wa ipimtir kêanre to ipimtir ne ikrã pictor tu. Quê ha nee jũm imã ipimtir xà ita kôt harên nare, wa ha cormã ikrihkrit ita na ikrí — hane.

Mã me cumã:

— Hàpà pahhi! Me imã, ate amji to apijapar xà rohnýtti mã ita na ato prãm. Wa me awý, ca ha mam me imã apimtir xà ita jarê. Jirô pê wa ha amã cormã apimtir xà ita kôt me harên pa — hane.

Mã quêt pahhi me cumã:

— Quê! Ca ha me caa me imã ijôt kam ipimtir ita jarê. Ne ca ha hanea ne me imã ihkôt harê. Ca ha nee me imã harên nare, wa ha me axexec to mô ne hanea ne me apê gürkwa to hanea. Ca ha quêt ate me imã ipimtir ita jarê, ne ca ha me imã ihkôt harên na mã, wa ha me amã ampo pejti jãhtôa ne cugô ne amji mã me acatihti na me acapi — hajýr.

Mã me hũmre atajê cunea te hipêr me cumã harên to hajýr:

— Pahhi, wa me awý, ca ha caa me imã apimtir xà ita jarê. Jirô pê wa ha me amã ihkôt harê — hane.

Mã pahhi te amji kam hapac xà to huwahi týjti, ne me cumã:

— Imã me acaca xà jahkre pej. Ca cama amji mã ame amcro ata pyr prãm. Ampo na? Mõrmõ wa ame acuran prãm na mã, ca ame icupa! Imã me gahkre pej. Ate me amji par xà ita na, na ca me imã ahêj prãm. Ne me ahêj xi atajê to, ca me amji mã amcro ita juwahi prãm. Imã mam ipimtir jarê! Ca ha ita ton na, ampeaj kam me amã ipimtir kôt harên xà ita jahkre pej! — hane.

Mã mehkrã kreti atajê pahhi mã:

— Wýr quê jũm hõt kam ipimtir ita jarê! Jũ caxuw jũm pjê ita kam hajýr nare. Pahhi, ca ahna prãm, quê nee hajýr nare! Wýr quê jũm to hane. Cõjkwa kam me pahpãm cahac atajê pit mã ita jarên jahkre pej. Ne ampýa mã me ihkrí, ne ita cwýrjapê ri wa ha nee mempar nare — hane.

Mã hamre, pahhi te mehcunea mã harkwa kêanre to ihcakôc kam ihtêm ne me cumã:

— Na wa ha me ahna cumê, quê ha ijõ pjê kam me akrã kreti catajê me, me apê hũxy xi catêjê me, me apê caxêre pupun catêjê me, me acunea curan partu — hane.

Pê pahhiti jarkwa na mehhôc catêjê mehhôc ne me hõ pjê cunea kôt apu cucrà. Na pê pahhi jõ krãhtare apu Taner me, me hõ ikwý nõ catêjê me, ame hapê, mehpro prãmte.

Pê Pahpãm Taner mã ipimtir kôt harên xà to ajpê

Taner 2.19-48

Pê caxwa ata kam Taner apu iriat kam ampo pupu. Mã Pahpãm te cumã iriat ita kam Napuc pimtir ita kôt harên xà ita to ipipê. Hamre, mã Taner pimprar ne ma Arioc pê krãhtare jõ pahhi wýr tẽ. Ampo na? Pê Napuc Arioc mã harkwa ta quê mehkrã kreti catêjê cunea curan pa. Mã Taner Arioc mã:

— Arioc, wa ha awý, ca ha nee mehkrã kreti catêjê curan nare! Ca ha ma pahhi wýr ito mô! Wa ha pa cumã ipimtir ita kôt harê. Nee ca cormã ame curan nare — hajýr.

Mã Arioc te hũjarêan kam Taner japrôr ne ma to tẽ, pahhi jürkwa wýr. Mã pahhi te Taner mã:

— Xà ca atýj imã ipimtir xà ita jarê? Ne xà ca hanea ne atýj imã ihkôt harê? — hajýr.

Mã Taner cumã:

— Nee pjê ita kam mehkrã kreti me, hũxy xi catêjê me, cute me caxêre pupun catêjê me, jũm hamreare, me amã apimtir xà jarên xà caxuw. Nee jũm quê ate ahna prãm xà ata jahkre pej nare. Mã quêt kýj pê, cõjkwa kam Pahpãm pyxit pej. Ne cupêa ri ampo cunea jahkre pej catê. Ne cumã ampo pimxur cunea jahkre pej. Ýhý, pahhi, apimtir ita kôt Pahpãm quê ha amã mam cute pjê cunea kam ampo na prãm xà ita jarê. Pahhi, hamre, wa ha amã apimtir xà ita jarê.

Ýhý, pahhi, ate gõt kam ampo carõ japjêhti cupahti ata pupun, mã akuc ri xa. Ne ampo carõ ita ihprãti, ne amã hũpa. Ne ihkrã pê ôr prãti me, ne hitô me ihpa pê wakýre prã jakare, ne ihu pro xà pê wakýre prãti in-tepti, ne ihkjê me ihte hi kam pê wakýti, ne ihpar hĩkjê rũm wakýti, ne hĩkjê rũm carêc tõi.

Pom pahhi, gõt kam ate hàhkãj jakõtti catia pupun. Ita pĩn kên carõtti catia ita amjia kôt cator ne tẽ. Mã ajpên ajpõ xàhti pĩn ampo carõ japjêhti ita wýr tẽ ne cute ihpar kwĩn, me ajkaam apu ipicagãn tu ne to hamre tu. Me ajkaam mã, krãa, cute ampo jacrõre na amji ton. Ne hacrõre ita pê arýjhy jacrõre pyrãac. Mã krãa, kôc cator ne ma to cutor tu. Mã hamre, mã hakãn pê hamreare. Mã kên carõtti catia ata hakãn pê hàhhuc ne curia amji kôt cati to mô ita na. Ne cute kënti catia na amji ton. Ne cute pjê cunea jahêr tu. Hamre. Pom gõt kam apimtir ita te hajýr he.

Ne hamre, wa ha amã ihkôt harên to hane he: Ýhý, pahhi, apê pahhiti peaj, ne apê pjê cunea kam pahhiti cunea jirô pê acarôt týaj to ihtýj. Ýhý, cõjkwa jõ Pahhiti pê Pahpãm te ri amã pahhi ita ton ne amã pahhi ita na hãm. Ne cutea ri amã acarôt týjti ita jõr. Apê ihhêj rũm ampo carõ krã prãti pê ôr ata pyrãc. Ne hamre, pahhi, quê ha Papirõn himpej xà hamre, ne pahhi tuw nõ quê ha cato. Ne ihhimpej xà ita ahimpej xà ita japyre mã carôt týj. Ne ita jirô pê mã quê ha pahhi tuw nõ himpej xà quê ha cato. Cupê wakýre prãti in-tepti te ihu pro xà ita pyrãc. Ne hamre, taa mã quê ha pjê cunea to ihhimpej to ipa. Ne hamre, ita jirô pê quê ha pahhi tuw nõ himpej xà quê ha cato. Ne carôt ita pê wakýti týjti ata pyrãc. Ne quê ha mehcunea hi kwĩ ne me cupê carôt to hamre.

Pahhi, ate hõmpun, ihpar jĩkjê rũm wakýti, ne ihpar jĩkjê rũm carêc tõi ata. Jũm quê ha ihhimpej xà to ajcapô cakrô, cormã cumã carôt týj ita na, hĩkjê rũm. Amcro ata na, quê ha cormã cõjkwa jõ Pahhiti jũm ata pê pahhi tuw kujate. Ne quê ha nee jũm pahhi ata to kên ne intohjê nare. Mã quêt ihhimpej xà tuw ata quê ha pahhi catêjê cunea tohjê ne hàhhuc rohnýtti mã. Ne ihhimpej xà tuw ita pê ihhêj rũm ate gõt kam kënti carõtti pupun ata. Kënti ata te ampo carõ cunea to hamre tu. Ýhý, mã hamre.

Mã cõjkwa jõ Pahhiti quê ha amã apimtir kôt harê cute mam ampo to amji kam hapac atajê to — hane.

Mã hamre, pahhi pê Napuc ita Taner mã:

— Ne me gō Pahpām ata pê ampeaj kam me pahpām cahàc cunea jirôa pê carôt tÿaj to ihtÿj. Ne taa mã ri pahhi catêjê cunea jirôa pê cati ne impej. Ampeaj kam ri cupê ampo pimxur ata jarên catê, ne nee cupê ampo pimxur nare. Ne ita cwÿrjapê ca ate imã ipimtir kôt harên — hajÿr. Ne hipêr cumã:

— Ne hamre, wa ha ita caxuw mehcunea jō pahhiti na axãm, Papirôn jō pjê kam. Ne wa ha hanea ne mehkrã kreti jō pahhi na axãm — hajÿr.

Ne ita jirô pê pahhi Napuc te Taner mã ampo pejti jàhtôa ne hōr. Ne tahna hĩ jàhwÿrti atajê jōr.

Me hō ikwÿ nõ incrê cuhy pôcti kam

Taner 3.1-28

Pê caku nõ na pahhi Napuc harkwa ta:

— Imã wakÿti te pahpām cahàc krekà jappjêti to ne hãm. Ca ha kam mare mã me acunea akõn krã na me acuhhê ne cumã me amji cajrên. Quê ha nee jūm to hajÿr nare, ne to caxàr xà pê kÿjti ata wÿr axà — hane.

Ne por amcro ata kam cute me amji jahkre pej atajê pê ajco caxêre cunea te amji kam hapac xà to me hahkre to me ipa atajê kwÿ ma me Juta catêjê caca. Na pê ma Napuc wÿr me mō ne me cumã me ahna harkwa kêanre to mehçakôc ne me cumã:

— Hàpà pahhi! Me imã, ate amji to apijapar rohnÿtti mã na, ato prãm. Pê Juta catêjê mençrê pê Xatrac me, Mexac me, Apet-Nego me, ma ame apar caca, ne nee gō pahpām cahàc krekà ata mã me amji cajrên nare, ne nee kam mare mã mehkrã krã na mehkrĩ nare — hane.

Mã Napuc te cute me hūmre incrê atajê na mehçakôc xà kêanre ata par. Na pê me kam incryac to incryc ne me krãhtare mã quê mehpro. Mã cute mehpro ne pahhiti wÿr me to mō.

Mã me hūmre incrê atajê ma pahhi mã:

— Me ijō pahhi, wa ha garkwa kôt nee me amji pytâr nare. Ampo na? Nee mã ampo na nare. Me imã Pahpām pê Pahhiti kÿn. Quê ha cumã apê me ipytâr prãm na mã, quê ha to hane he. Ne quê ha cumã cuhyhti pê me ipytâr prãm na mã, quê ha to hane.

Ne quê ha Pahpām nee apê me ipytâr nare, wÿr wa ha gō pahpām cahàc krekà ita cuna mã me ikõn krã na me jÿ — hane.

Ne mehçakôc xà ita cwÿrjapê ri Napuc ma apu mehçaca ne ihkuc kêan kam me kam incryac to incryc. Na pê harkwa ta quê cuhy to me catia to cati, ne mençrê pro ne cuhyhti kam me curê, quê me to capa.

Pê krãhtare mençrê pro ne me huwapre ne me to hane. Ne cute me cuhy kam me irên. Mã quêt cuhy cacroti te pō pê krãhtare atajê cunea jipej tu.

Mã ahtūm nare mã, pahhi Napuc amji mã ipikrar ne hãm ne hūphêa rūm cute me to ihhimpej catêjê cukij ne me cumã harên to hajÿr he:

— Xà ampeaj kam me krãhtare te me hūmre mençrê peaj ne me pro ne cuhy kam me irên? — hane. Mã me cumã: — Ýhÿ, pahhiti, mençrê peaj pit! — hajÿr. Mã pahhi me cumã:

— Ne ampo na mã wa apu me hūmre te cwat itajê pupu, cuhy caxwãm pê? Ne me hōmpu, me hūwapre nare kam ihtÿj ame ipa! — hajÿr.

Ne ampeaj kam ri cuhy caxwãm pê me hūmre incrê me impej kam ame ipa, ne nee cute mehkrên nõ cajpêr nare. Ne hūmre nõ pyxit ata pê ihhêj ne cōjkwa pÿn Pahpām jarkwa to imprar catêjê atajê nõ pyràac.

Ýhÿ, mã cuhy pôc jarkwa mã pahhi Napuc me hÿrmã hàhtêp ne me cumã caràr ne me cumã:

— Xatrac me, Mexac me, Apet-Nego me, apê Pahpām pê Pahhiti mã hàpên catêjê, cuhy pê me acato ne ajpên iwÿr me mō! — hane. Mã cuhy pê mençrê itajê cator. Ne nee cuhy pôc te jū kam me to caxàr nare, ne nee jūm kÿ caxàr nare, ne nee mehkrã nõ te caxàr nare. Ne nee me ahna cuhy kūm cuxÿ nare. Na pê pahhi Napuc harên to hane:

— Hacme, cu ha me Xatrac me, Mexac me, Apet-Nego jō Pahpām pejti na me harê. Cute harkwa to imprar catê ata mençrê wÿr kujahêc ne cuhy pê me hūtar prãmte. Ampo na? Nee mã ampo na nare. Mençrê itajê hōtpê Pahpām to amji mã mehhimpeaj to mehhimpej, na pê me to hane — hane.

Pê Taner me cumã ikre kat kam ihhōc kôt harê

Taner 5.1-30

Pê caku jàhtôa jirô pê, pê pahhi ata ty, pê ihtàmwxÿ pê Perxar haxà kam amji to Papirôn jō pjê jō pahhi. Ne amcro nõ na cute me cumã amji kÿn catia nõ ita ton, ne cute pahhi to mir ne me hator. Mã ihtÿj ame ikō, ne ame ajpã.

Ne cormã Perxar apu ihkōm kwÿa kam, cute Krÿpinkrên pÿn, por pê pahhi Napuc xwÿ Pahpām to me amji kam hapac xà jūrkwã pÿn, mehkrãm xà impejti to cato atajê to cute amji japackre. Ne amji wÿr ahna hàhwÿr. Mã hÿrmã me to mō, mã Perxar me, pyjê atajê me, pom cute ame hator atajê me, ame ampo cacō xÿre to ame ikō, mehkrãm xà atajê kam. Ne pê ramã Pahpām ihkōm xà impejti itajê intête me cumã, quê nee jūm çahkrit kam ampo to ihkōm nare çakrô, mã ihtÿj kam amehkōm.

Jirô pê mã ri ame pÿ me kên te me hō pahpām cahàc krekà itajê kÿn. Me ajkaam mã ikre kat kam jūm jūhkrahhi te ihhōc kam ihtêm. Mã nee jūm te ikre kat kam ihhōc catê ita jÿ na hōmpun nare, ne me hūhhi pit pupun. Mã pahhi ita te ikre kat kam jūm jūhhi te apu ihhōc na hōmpun, me ajkaam hūpate apu ihtertet ne ihkōn to apu amji jahy, ne cupê ihte peacre, ne ihkuc jakare. Ne cumã hūpaa to hūpa. Mã cute ihkrãhhia kam harkwa to:

— Ajpên cute me amji jahkre pej atajê cunea to me cuprô. Quê ha jūm te ikre kat kam ihhōc ita cahyt na, wa ha jūm ata mã pahhi kà gō, ne amji mã to imã hàpên catêjê jō pahhi na, quê ha cupê pahhi catia — hajÿr.

Mã cute mempar ne cute me amji jahkre pejti atajê cunea to cute me cuprôn, mã nee jūm te ikre kat kam ihhōc ita cahyt nare.

Mã pahhi menxi te ita par, ne ma Perxar wÿr tē ne cute cumã hÿjarēn to:

— Ikra, apu ita to amji japackre nare, ne nee apu hÿpa nare. He ita ri jÿm xÿmre ita pē aquēt xwÿ pē Napuc ata tehcajpar catē, ne kam cōjkwa kam Pahpām ata Carō, ne cupē hÿràac, ne cumã ampo cunea jahkre pej. Pē amji mã to cute me amji jahkre pej catêjē me, me hÿxy xi catêjē jō pahhi na hām ata apu mō, ne haprÿ te Taner. Ata ca haprōr na awjahkre, quē me haprō, quē ha ihtÿj amã ikre kat kam ihhōc ita jÿjarēn xà jarē — hajÿr.

Mã pahhi te inxi jÿjarēn xà ata na impar ne ahna hãhwÿr. Mã hÿrmã cator, mã pahhi te Taner cukij ne cumã:

— Xãmte apē mã Taner, por pē pahhi pē Napuc xwÿ Juta jō pjē pÿn ato cato, ne amji mã ato cumã hãpēn catē ata mã ca? Wa ite akam me Pahton catē te amji kam hapac xà te amji jahkre peji na garēn par, ne ana ijãhwÿr. Wa ite tee cute me amji jahkre pej catêjē cunea to cuprōn, mã ihtÿj me ikre kat kam ihhōc ita cahyt, ne nee cute me hahkre pej nare, ne tee ame hahkre.

— Wa ite ate ampo jahkre kēatre atajē jahkre pej na garēn par, na wa ite ana ijãhwÿr. Ca ha ate ikre kat kam ihhōc ita cahyt, ne imã hÿjarēn xà ata jarēn na, wa ha amã pahhi kà gō, ca ha apē imã me hãpēn catêjē jō pahhi, ne apē pahhi catia — hajÿr.

Mã Taner cumã:

— Imã ate imã ampo jōr xà ata kÿn nare, ne ahna imã prãm nare, ne gapacta ne jÿm mã agō. Wa ha itÿj ca ma amã ikre kat kam ihhōc ita cahyt, ne amã hÿjarēn xà jarē.

— Cōjkwa kam me Pahton catē pē me ijō Inxÿ Cati te ri ikre kat kam harkwa itajē na ihhōc to hajÿr he: “Cahyt, Cahyt, Ihcajpēr, To Ipicapôn”. Ne hãhhōc itajē hÿjarēn to hane he. Wa ha amã harē.

— Ne por ihhōc to “Cahyt” hane ata hÿjarēn xà pē me ijō Inxÿ Cati te gō amcro cahyt xà cahhur mã ita. Na ca ha atÿj ita kam ty.

— Ne por ihhōc to “Ihcajpēr” hane ita hÿjarēn xà pē me ijō Inxÿ Cati te ramã ate amji kam gapac xà cajpēr, mã ramã cumã ihkēanre, ne ramã hamre.

— Ne por ihhōc to “To Ipicapôn” hane ita hÿjarēn xà pē me ijō Inxÿ Cati te apē ate gō pjē to ahimpej xà to ipicapôn, ne pahhi tuw pijakrut atajē mã me hōr xà. Ne ampo cwÿrjapē ri me ijō Inxÿ Cati te ato hajÿr? Nee mã ampo na nare. Akēanre, ne ate amji kam gapac xà kēanre, incwÿrjapē ri cute ato hajÿr — hajÿr.

Mã caxwa ata kam krãhtare pē me curē xwÿn catêjē krÿ mã me cator, ne cute me pahhi Perxar curan, ne hanea ne mehkwy jãhtōa ne amehcuran. Ne nee cute me Taner curan nare. Mã ihtÿj ihkrÿ, ne pahhi tuw ata tehcajpa.

Pē mehkēn catêjē rop jãprēhti mã me Taner mē

Taner 6.1-28

Pē Papirōn jō pjē kam pahhi tuw ita japrÿ Tarir. Ne cute me hō pahhi catêjē to incrē ne me hÿxwÿr, ne

atajē nō pē Taner. Ne pē Taner mã Pahpām par jahkre pej, na pē, por me ipijakrut atajē jirōa pē cumã ampo cunea jahkre pej. Ita cwÿrjapē pē pahhi Tarir ata amji mã Taner to cute me to ihhimpej catêjē atajē jō pahhi to prãm.

Na pē mehkwy itajē mã hÿ na amji to prãm, ne tee ame to hahkre, cute jÿ mã me ton, ne hãpēn xà ita kam ihkēn mã me mēn prãmte. Ne jÿ wÿr quē jÿ mã me to, ne ihkēn mã me cumē. Ampo na? Pē nee hãpēn xà kam apu ampo kēn ton nare, ne ajco ihcunea na catyt kam ipa, ne impejti.

Mã amcro nō na me curē xwÿn itajē te amji to me cuprōn, ne me ajpēn mã:

— Jÿ wÿr cu me Taner ita kēn mã me cumē, hÿmre ita peaj to impej, hãpēn xà ita kam. Ne cōjkwa kam me Hÿm Cati kōt ipa ita to, cu ha me to hahkre ne ihkēn mã me cumē — hane. Ne ma pahhi Tarir wÿr me pra, ne cute me cumã hÿjarēn to hajÿr he:

— Hàpà pahhi! Me imã, ate amji to apijapar rohnÿtti mã na, ato prãm. Wa pahhi kwÿ me ite me amji par to hajÿr he, quē ha nee putwÿr pyxit ita kam, jÿm aràn xà na pahpām nō na hãhwÿr nare, ne nee ampo na jÿm xÿmre wÿr nare. Ne ampo na me hãhwÿr prãm, ne ana pit mã me ahwÿ.

— Quē ha jÿm te hō pahpām nō na hãhwÿr na, nare, quē ha jÿm xÿmre na cute hãhwÿr na, quē ha ma ropti jōkre hōhti jãprēhti ata jō kreti kam, cute me mēn xà. Ne me imã, ite me amã icaca xà ton ita na ihhōc, ne kam gaprÿ xir na to prãm, mãr quē nee jÿ caxuw ipintuw nare — hajÿr. Mã pahhi te Taner to mencaca xà ita jahkre pej nare kam, ihhēj ne cumã impejti, mã cute ahna ihhōc, ne kam haprÿ xir.

Mã Taner te hō pahhi jō kãhhōc cahyt, ne nee cute amji kam me hapac xà ita par nare, ne ma ikre wÿr mō ne ihtÿj Pahpām mã ihcakōc, ne amji na cuwÿ. Ne hōt-pē amcro cunea kam Pahpām mã ihcakōc to incrē, ikre jō harkwa krare krac ri, ne ampo cunea pyrēn hakryti na Pahpām mã amji jarē, ne amji mã ahna ahwÿ. Ne pē ramã Pahpām mã ihcakōc ita to amji pyrãc tu.

Mã me hÿmre itajē te me Taner kēn mã mēn prãmte, ma hÿrkwa ri me mō, ne cute Pahpām na amji mã hãhwÿr na me hōmpun. Ne ma pahhi wÿr me pra, ne cute me cumã hÿjarēn to:

— Xà nee ate amji mã acaca xà ita na ihhōc nare? Pom ate putwÿr pyxit ita kam jÿm te aràn xà na, nee ampo na jÿm wÿr nare ahna ihhōc ita? Xà ate cute me akaj na ampo na me jÿmjē wÿr mã ate ropti jãprēhti jōkre hōhti jō kreti kam me irēn na ate me imã, me cumã ihhōc nare? — hajÿr.

Mã pahhi Tarir me cumã:

— Ýhÿ, ampeaj kam me pahte amji kam me pajapac xàa kōt wa ite ita ton, na ri nee to ipintuw xà nare — hane.

Mã me cumã:

— Ne pom Juta jō pjē rÿm Taner ita, nee acaca xà ita kōt amji kam hapac, ne to amji japackre nare, ne ihtÿj amcro cunea kam cōjkwa kam Hÿm Cati ita na amji mã hãhwÿr to incrē — hane.

Mã pahhi te ita par, ne hacpÿa mã amji mã incryc. Ampo na? Pê cumã Taner kînti na pê. Ne tee apu Taner pytâr to hahkre.

Mã ramã pyt xàa xàa kam, mã hacpÿa ne pahhi wÿr me to ihhimpej catêjê itajê me pra, ne cute pahhi mã me harkwa to:

— Pahhi, jÿ mã ca ha ajte Taner ita to? Pom ate pahte amji kam me pajapac xàa kôt ita ton ita, ca nee to apintuw nare — hajÿr.

Mã pahhi Tarir te Taner na hàhwÿr. Mã cute me haprôr, mã pahhi te cumã harkwa to:

— Pom ca Apãm Cati mã gâpên to apa ita, quê ha apytâ — hajÿr. Jirô pê mã ri cute kreti kam rop jâprêhti jôkre hôhti ata kam me Taner mên. Ne kenti catia nõ to me ahna harkwa jihê. Mã cormã pahhi Tarir te ihtô xà to ahna ihtô, jÿm te aracri hihê mên cupate.

Ne ma pahhi ita mō, ne cumã amji kîn nare, ne cumã prãm nare, ne hàpàn nare, ne cama nõ. Ne nee hanea ne caxwa ri hôt nare.

Pê Pahpãm ropti jâprêhti atajê pê Taner pytâ

Mã ramã ahna apê jàhtêp, mã ma ropti jôkre hôhti jô kre wÿr mō, por kam cute me Taner mên ata wÿr. Mō, ne cumã amji kîn nare kam, incwÿar kam cute Taner cukij ne cumã:

— Taner, Pahpãm tîar mã hàpên catê ita, xà Apãm Cati ita te ihtÿj ropti jâprêhti itajê pê apytâr? — hajÿr.

Mã xãmte Taner cormã ihtîar xa ne cute pahhi ita mã:

— Pahhi, he wa itîar xa. Ijô Pahpãm te cōjkwa pîn harkwa na imprar catê nõ kujahêc, mã cute itête ropti jâprêhti itajê jarkwa to ipijapÿn partu, mã nee jÿ mã ih-nõ te iton nare. Ne wa Pahpãm krac ri nee ite ampo to

ihcupan nare, ne nee hanea ne acuna mã ite amji kam ijapac xà nõ to kên nare, Pahpãm kam mare mã — hajÿr.

Mã pahhi te hihê mên ne Taner tîar na hōmpun, ne hÿrên apu hakry, ne cute caxà na hÿjahkre. Mã cute me caxà, ne tee amehkôpî, mã nee ropti itajê nõ te jÿ kam ihcakên nare, ne nee cute jÿ kam inxar xà ham-reare. Mã tee cute amehkôpîr par.

Mã pahhi Tarir te me cupê pahhi catêjê te ame Taner to kên prãm atajê cunea me, mehkra me mehprô mea mã me ahna hàhwÿr. Ne ma kre kam ropti jâprêhti ata kam, cute me irên na hÿjahkre. Mã kam cute mehcunea rên. Mã ropti itajê te amji wÿar mehpro par, ne me hipej tu.

Jirô pê mã ri pahhi te hō pjê kam mehcunea mã ihkâhhôc ton, ampo kra mea mã, ne cute kam me cumã harkwa to:

“Me amji to impej ne,
nãmri wa ite Taner jô Pahpãm kam mare mã,
me ate amji mã me hÿpahti to ame atertet na,
ite me amã ihhōc, ne ahna me amã ijÿjahkre.
Ampo na? Quêt hō Pahpãm ita ihtîar cumã ihkrî, ne
nee apu amji kam hapac xà to ipintuw nare.
Ne por ihhimpej xà atajê,
quê nee jÿm to cô nare.
Ne pom carôt ita quê nee jÿ caxuw cupê hamre nare,
cwÿrjapê ri ihtÿj amji mã mehkwy pytâ.
Ne ihtÿj ampo pej pit to.
Ne jÿ wÿr quê jÿm cuxà ampo pejti itajê nõ to.
Ne cutea ri ropti jôkre hôhti jâprêhti itajê pê Taner
pytâr” hajÿr.

JONA

Ýhý, me hũmre pijakrut nõ japry te, Jona me Nahũm, ne me cupê Pahpãm jarkwa to mehcakôc catêjê nõa. Na ri me hõ kàhhôc japry pê (Jona) me (Nahũm).

Mã Pahpãm te me Xiri catêjê pê Ixaher catêjê curê xwýn atajê mã amji cawpa xà caxuw, mam me hỹrmã Jona kujahêc. Mã hõtpê cute me Jona kam hapac ne me kên ton jicu.

Jirô pê mã ri hacpỹa mã Xiri catêjê te mehkên ton kam mehtêm, cwýrjapê ri hacpỹ ma mã cute me hỹrmã Nahũm kujahêc cakrô, mã cute nee ihkôt me Pahpãm jarkwa par prãm nare. Ne caku nõa kam cute Ixaher catêjê, por kýj rũm pjê jĩkê kam me hakrã atajê cunea pro, ne ma me hõ krĩ japry te Ninew wýr mehcunea to mõi. Mã curia me ipicacwýr, ne curia me hàhhuc, ne me ipictor. Cwýrjapê ri Pahpãm te Xiri catêjê atajê to kêanre, ne me to hamre. Ne ita caxuw Jona jõ kàhhôc kwý mã he.

Jona pê Pahpãm jarkwa to ihcakôc catê

Jona 1.1-4

Pê caku atajêa kam Xiri jõ pjê kam Ninew jõ krĩ catêjê pê Ixaher catêjê curê xwýn, ne mehcunea kêanre.

Cwýrjapê pê Pahpãm mã me hipej prãm. Ne cumã me caprĩ, cwýrjapê pê cormã me cumã amji cawpa pyxit, cute ame to kên xwýjrea na. Quê ihhêaj to hacpỹ mã Pahpãm wýr me apkjê, quê ha nee me hipej nare xà na, cute Jona na hàhwýr. Ne Jona ata pê Ixaher catêjê nõa, ne cupê Pahpãm jarkwa to me cumã ihcakôc catê.

Mã Pahpãm te Jona mã harkwa to:

— Ca ha ma krĩ catia japry te Ninew ata wýr tẽ, ne me acurê xwýn pê Xiri catêjê atajê mã ijarẽ, nãmri wa ha amehkên itajê jahpan xà na, ame to kêanre ne. Wa ha me cumã mehkên ita kujate ne to me hipej, cute mehkên jicunare ita kam — hajýr.

Mã ma Jona apu hitõt. Ampo na? He ihtýj cumã Ninew catêjê pê Jona na mehkwy curê xwýn atajê jamre na to prãm, na pê ma amjia kôt apu hitõt, ne ma cama côxwa tohkà ata wýr tẽ. Ne cute Ninew jõ krĩ wýr ihtêm xà kaj na, Cra jõ pjê wýr amji mã pàr kreti nõ mõi ita mã cator. Ne cute ihtêm xà ita na hàmjôr ne ma cumã hàr. Pê pàr kreti ata ihkre ita ajkrut, ne kýj rũm ita, ne harã mã ita. Mã harã mã ita mã Jona xà, ne curia caxwãm pê nõ ne apu gõr.

Pê Pahpãm Jona kôt kôcti kujate

Jona 1.5-17; 2.1-10

Mã ramã côxwa jipôac ri pàr kre me to mõi, mã Pahpãm te kôc pahtýjti nõ kujahêc, mã ampeaj kam côxwa to harô to pra. Mã pàr kre mõi xà ata kêanre. Ne tàkamrý kam me hàpên catêjê mã hũpaa to hũpa, mã ihtýj amehtyc na ame amji to hane. Ne cute me hõ pahpãm cahàc krekà mã me caràr kam mehtêm. Ne cute côxwa kam me ampo pytiti atajê to me hũcapêr kam mehtêm.

Mã Jona ihtýj caxwãm pê nõ ne gõr, ne nee cute ampo te hajýr xà ata na hahkre pej nare. Mã ma pàr kre jõ

pahhi apu hapên to tẽ, ne cute ahna cator, ne cumã harkwa to:

— Ampo na mã ca nõ ne apu gõr? Jũ wýr ca ha ita caxuw gõr! To jý ne gõ Pahpãm mã me pahcunea cajrên, quê me pahtehcappa! — hajýr.

Mã pàr kre kam me hàpên catêjê te jũm cwýrjapê kôcti ita te ame to hajýr xà ata jahkre pej prãmte, ajpên mã hũtâr xà ata rẽ, ne ame hõmpu ne ihkôt me hakop, ampo cwýrjapê mõi kôc ita ame to hane. Ne pea cute me Jona mã cator, ne mehcukij, ne me cumã:

— Ampo to mã ate, mã Pahpãm te me pahwýr kôcti ita kujahêc? Me anõ mã ca? Ampo to mã caapê? Jũ pĩn mã ca mõi? Jũmjê kwý mã ca? — hajýr.

Mã me cumã:

— Ipê Ixaher catêjê nõ, ne wa itýj me cõjkwa kam Pahpãm pê me ijõ Pahhiti pê ampo cunea to ata to amji kam ijapac to ipa. Por pê cõjkwa me, pjê me, côxwa to ata mã wa apê — hane. Ne hanea ne cute ma Pahpãm pê ihtêm ita na, me cumã amji jarên par.

Mã cute me hũjarên xà ata par, ne me cumã paa to pa, mã me cumã:

— Měr ampo na mã ate hajýr? Jũ mã wa ha me ato, quê cõjkwa kam Apãm Cati kôcti ita to ankrê? — hajýr. Pê cormã kôcti ita xwý kam, ajco hàpêr týj to ipicamên to ipa nare, na pê ame Jona cukij to hane.

Mã Jona me cumã:

— Měr cô kam me imẽ, quê ha kôcti ita ankrê. Wa ite ramã kôc ita jahkre pej. Icwýrjapêa ri ame ato hane, ijũpar nare kam — hane.

Mã ma cô kam ame mên caca, ne ma cama kre wýr, pjê wýr me to ihcakrýn to, me hahkre to mõi, ne nee cute me to mõi ita mã hamãr nare. Ampo na? Ma kôcti ita hàpêr to ihtýj to ipa.

Mã pea Pahpãm mã ame caràr, ne me caràr to:

— Pahhiti, ca ha nee me ite cô kam Jona mên ita jahpan xà na, me ikam acryc nare — hane. Ne cute me Jona pro ne cô kam me mên. Me ajkaam mã kôc ita pinkrên. Mã me hũmre itajê ame Pahpãm cupa, ne ihtýj cute Pahpãm par na me amji ton.

Mã Pahpãm te tepti catia nõ ita kujahêc, mã cute Jona cunea na iħkrêr. Mã cute tepti ita caxwãm pê amji to amcro to incrê, ne cute Pahpãm mã ihcakôc, ne amji tehcajpar xà na ihwÿr. Mã Pahpãm te tepti mã, Jona to amcrà na pire mã hõjahir na hũjahkre. Mã tepti te Jona to hõjahir, mã ihtĩar na pjê wÿr hàpir.

Pê Jona Ninew jõ krĩ catêjê mã ahcawpa

Jona 3.1-10

Mã Pahpãm te hipêr Jona mã ihcakôc ne cumã:
— Ca ha ma Ninew jõ krĩ catia ata wÿr tẽ, ne ite amã ijũjarên xà ita to me cumã awjarê — hajÿr. Mã ita caxuw Jona te Pahpãm par pyrentu, ne ma Ninew jõ krĩ wÿr tẽ.

Ne pê Ninew jõ krĩ ata catia to cati, quê jũm ihcunea ton to prãm, ne apu iħkôt mõi to amcro to incrê, ne cormã apu ton pa. Mã krĩ mã Jona xà, ne amcro ata na, cute Pahpãm te cumã hũjarên xà ata to me cumã hũjarên kam ihtêm, ne cute me cumã ihcawpa to:

“Quê ha ajpên amcro te cwarênta xà ita jirô pê me akên itajê jahpan xà na, Pahpãm me gõ krĩ ita cunea jipej tu!” hajÿr.

Mã ihtÿj ajte cute me Jona par. Ne cute mehken ton jicu. Ne nee ame hàpàn nare, ne nee amehkõm nare. Ne cute amehkên jũ na mehpeacre na ame amji jarên xà na, cute amehkà impejti atajê to pôj, ne amehkà kêanre pê xãc te amehkà itajê mã ame amji jacjên, ne kam ame ipa. Mã hanea ne Ninew jõ krĩ jõ pahhi te Jona jũjarên xà ita par, ne apu amji tũm. Cute iħkên xà ton atajê na amji jahkre pej, na ri cumã amji kĩn nare. Mã cute iħkà impejti ata krÿn, ne cute xãc te iħkà ita mã amji jaxà, ne ma mõi ne pro jipy to hÿr, cute hũ na ihpeacre na to amji jarên xà caxuw.

Ne pahhi ita me, cumã me hàpên catêjê me, cute me ajpên to hÿr, ne me ajpên par. Mã pahhi te mehkwy mã iħkàhhôc ton, ne cute kam harkwa kujahêc to hajÿr he:

“Cu ha nee, me pajõ parxare mea mã, ame pajàpàn nare, ne nee me pahkõm nare.

Ne me pahcunea me pahkà kêanre mã me amji jacjê, ne ampeaj kam Pahpãm pejti ita mã me amji cajrên.

Ne me pahcunea me pahte amji kam me pajapac xà kên atajê mã me hikra,

ne me pajàprê to me papa jicu, quê ihhêaj to Pahpãm ihtÿj amji mã me pajapê, cu ha pahtÿj me xa, quê ha nee me pajõ krĩ to ipictor nare” hajÿr.

Ne cute hõ kàhhôc ita to, ma cumã me hàpên catêjê kwÿ kujahêc. Mã cute mehcuea mã iħkàhhôc kam harkwa itajêa cahyt, ne harên partu. Mã mehcuea te harkwa kôt mehkên xà itajê jicu.

Mã Pahpãm te me hõmpun, ne cumã me caprĩ, mã nee cute me to ipictor, ne me hõ krĩ to hamre nare, mã ihtÿj me xa. Hamre.

Hapakuc 3.1-19

3 Ýhÿ, Hapakuc pê Pahpãm jarkwa to me cumã ihcakôc catê ata te Pahpãm to cati prãmte, cumã increr xà to increr to hane he:

2 “Ýhÿ Pahhiti Cati, ca ate imã ate amji kam gapac xà na amji jarên. Ne ca ate gápên xà ton xà ata catia to cati, na wa itÿj amji mã hũpa to catia to ipa. Ne pom pê ca mam me iquêtjê tehcajpar to catia, pê wa ahna garên pa, ita na ca ha hipêr ita kam me itehcajpa, mãr wa hanea ne me cuxà me ahna me apupu. Ne wa ite me ato kên jahpan xà na me ikam acryc cakrô, ca ha atÿj ate me icaprĩ na amji to amji japackre.

3 “Wa ite Etõ jõ pjê kam kenti japrÿ te Parã ata pĩn, ate apejti to ajpên iwÿr amõi na apupun.

Mã acarôt prà jãhcujro te cõjkwã cunea cujro. Mã pjê cunea kam me amã acatihti to mehcakôc.

4 Ne apê pyt japõj pê mã hàhcujro pyrãac, ne ate gũhkra kam acarôt tÿjti to apimxur ata pĩn gãhcujro catia cator.

5 Ne acumam me hà catia mõi, ne hanea ne akôt me hà nõ kêanre ata ajpên mõi.

6 Ne gãhhuc ne apinkrên me ajkaam mã pjê te hàhcujrõn kam ihtêm.

Ca ate krĩxàre pupun ne mehkõpĩr, mã acupate amehtertet.

Mã rÿ pëa mã kenti kãhti iħkrĩ atajê pijaxwÿr par. Mã hanea ne rÿ pëa mã awjarô iħkrĩ atajê acupate pÿpÿm ne hamre par.

Ne ate amji kam gapac xà atajê, jũ caxuw hamre xà nare, ne quêt iħkrĩ rohnÿtti mã.

7 “Ite Cuxã catêjê krã pictor na me hõmpun.

Ne hanea ne ite Mitij catêjê te acupate amencwÿr na me hõmpun.

8 Ne ate cõ cunea te apu amji hohoc na ton, mã apu amji hohoc na ite hõmpun.

He xà ajkĩ cõxwa me cõ cunea kam acryc na mã, ca apu to hane?

Hãpà! He ca ate amã me hàprê catêjê jõ cawrô me, hõ kujti kam mehkĩr atajê te me ipytàr xà ata caxuw ihkujahêc,

na ri cõ cunea apu ahhoc.

9 Ate to gõ cuhê xê kre tÿj, ne ate krow jãhtõa na gãhwÿr, ate to acurê xwÿn catêjê jipej prãmte.

Ne ate pjê cunea kôt cõ pijapjêr na cumã gũjahkre, mã ihtÿj pjê cunea kôt apu ajpjê ne cute capahkre ton par.

10 Mã kenti te iħhêj ne apupun, ne acupate apu ihtertet, mã cõ catia ne cator ne ihpahtÿjti to ajpjê,

ne cute pjê to hipu par.
Mă côxwa ihhêj ne carâr,
ne kâj mă harôti catia to pra.

11 “Ne pyt me putwry jirôa pê gô kruw me,
gô kruwxwa prâti ita te pyt me, putwry jirâr,
mă ihhêj ne kam awcapàtkô.

12 Ne ca pjê kam,
me kam acryac kam apu mǎ,
ne ate acàcàac kam, krîxàre kam axãm.

13-14 “Ne ca ate amji mă me akwỳ capi,
ne me cumã pahhi na me hũxwyr atajê pytâr prãmte,
ca me hỹrmã acator.

Wa me icurê xwỳn catêjê jǎ krãhtare cupate ame
amxu.

Mă ihtỳj cute me ijipej jahkre kêt nare kam,
me ijipej na amji to ame hajỹr.
Ne cute me icràn prãmte me cupê carĩjti pyrâc,
ne me ikam ihtêm.

Ca ate me kam atêm,
ne me hǎ pahhi jǎ kruw xwaa to
ate me hǎ pahhi krã caxwỳr.

Ne ate hĩ gãn par,
ne mehhi pit juwahi.

15 Ne ca côxwa kam gǎ cawrô to apu gãnhuc,
na ri cô ita apu ahohoc.

16 “Ne wa ite ampo itajê kam ijapac,
ne apu itertet pyrentu.
Mă ijahkà ampo itajê cupate apu ihtertet,

ne icahi apu amji cahhy ne icarôt peacre” hane.
Hǎ, pê Hapakuc Pahpãm mă increr to hane.

Pê hanea ne ihkwỳ mă amji jarê ne me cumã:
“Yhỹ me ikwỳ!

He Pahpãm te imã, por rỳ nee ampo te jũ mãn nare
atajê jahkre,

wa ite hǎmpun,
ne quê ha cormã me pahwỳr cato.

Ne wa ha apu hũpa cakrô,
ityj aracri hikaj to ipa,
quê ha ahnaa Pahpãm, cute ame pahto kên prãm
catêjê to hamre partu.

17-18 “Quê ha pĩxô pâr cunea irã nare,
ne hanea ne pĩxô krô na hô nare,
ne pur cunea kam me hǎ nare,
ne nee ikre pu na carà cahàcre hamreare,
ne nee kwỳc kam pryti hamreare cakrô,
wa ha itỳj Pahhiti pyrên ijakryti ne.
Ne Pahpãm te ipytâr catê ata kam ri ijakryti ne.

19 Pahhiti Cati pê mehcunea to ihhimpej catê ata pê
ri icarôt.

Ne pom hĩjaxy kěnti kàa jimoc na,
carôt tỳj imprar tỳjti to apu ipa,
ne nee ihpỳpỳm nare,
ita jĩkjê na ri Pahpãm ito,
ne ite ampo kên cunea mă
ijũcanãr xà caxuw
imã icarôt gǎ” hane. Hamre.

MATEW

Pê Joje cute ajpên par xà to ajmār hamre

Matew 1.18-25

18 Pê Jeju Cixtô pòm xà hane he. Pê Marijkwỳj me Joje ramã ihcunĩ kam, cute me hikwa xà na, me ajpên par pejtu. Ne me hikwa xwỳjrea na, cormã Marij cunĩ kam, ramã Pahpãm Carõ Pejti kôt ihkra ne ihtic. 19 Ne Joje pê hũmre pê catyt kam ipa catê, ne hàhcaprĩ, ne hàhcajrēnti, na pê Marij te apu ihpahàm cupate, nee mehcunea kam mare mã, jũm te ahti na kam ihkra na ihkôt harēn kēanre prãm nare. Cwỳrjapê ri aracri cute Marij me hikwa tuw na me ajpên par xà ata to hamre to prãm.

20 Ne caxwa ata kam, nōr xà kam nō ne ita to amji kampaa, ne hōt. Mã ipimtir kam, cōjkwa pĩn Pahhiti pê Pahpãm jarkwa na imprar catê nō hỹrmã iwryc ne cumã:

— Hàpà Joje, apê pahhi xwỳ pê Tawi tàmxwỳ tàmxwỳ ita! Nee ca apu amji mã pa nare, ne atỳj Marij pê gĩxi ita na amji capa. He nee jũm te kam ihkra nare, ne Pahhiti Carõ Pejti kôt ri ihkra. 21 Quê ha cumã ihkra xũmre nō ihpòm, ca ha caa cumã haprỳ to Jeju. Ne haprỳ ita kôt harēn xà te “Pahpãm te me hũtār catê”. Ampo na? He quê ha akra ita ihtỳj mehkwy kēn catia ata pê me hũtā. 22 Ne ampo na ri gĩxi te hajỹr? Pê ramã Pahpãm jarkwa to ihcakōc catê japrỳ te Ixaj xwỳ ata gĩxi to awjarē, na quê ha hane. Na pê to hũjarēn to:

23 “Quê ha jũm cuprỳ ne ihcunĩ kam ihkra, ne cumã ihkra xũmre nō cato, quê ha cumã haprỳ to Emanew” hane. Ne Emanew ita kôt harēn xà te “Pahpãm me pahcotea na ipa” — hajỹr.

Hōhō, Pahhiti jarkwa to imprar catê te Joje mã hũjarēn to hajỹr, ne ma hacpỹ mã cōjkwa wỳr cute amji jaxār. 24 Mã Joje pimprar, ne cute Pahhiti jarkwa na imprar catê ata jarkwa kam hapac pyrentu. Ne ihtỳj cute Marij pê hĩxi na ahna amji caxār, ne nee cute me ajpên par xà ata to hamre nare. 25 Cakrō, pê nee cormã hĩxi tic ata na ihcaxun nare, pê ahnaa cumã ihkra xũmre pòm, pê cumã haprỳ to Jeju.

Pê mehkrã kreti kwỳ Jeju pupun prãmte me cato

Matew 2.1-23

2 Pê Juta jō pjê kam, Pãw jō krĩ kam Jeju ihpòm. Pê caxuaw Heroti pê Juta jō pjê to ihhimpej catê. Ne

amcro ata kam me hũmre krã kreti te amji jahkre pejti kwỳ ajco me caxêre cunea te amji kam hapac xà to me hahkre to me ipa. Ne cute me pyt japôj xà rũm, Juta jō pjê kam, Krĩpinkrên wỳr me caxêti pupun, ne ma ihkōat pyt cjêj xà wỳr me pra. Ne krĩ mã me cator. 2 Ne curia amehkrĩ catêjê cukij ne me cumã:

— Jō ri mōrmō jũm krare pê Juta catêjê jō pahhi ata pòm? He wa ite ihmat ri pyt japôj xà rũm, me ijō pjê pĩn, ite me hō caxêti pupun, na wa ajpên ite amehkĩn, ne amji mã hũpahti to prãmte hỹrmã me pra — hane.

3 Mã Heroti pê Juta jō pjê jō pahhi ata te me hũjarēn xà ita par, ne ampeaj kam, jũm te hũhhyr ne haxà kam pahhi na hàr na, cumã hũpa. Mã curia mehkrĩ catêjê cunea mã, pahhi ata te me kam incryc cumã hũpa.

4 Mã cute Pahpãm mã mehcajrēn catêjê jō pahhi me, me cumã Mojxe xwỳ te me hapackre xà to hahkre catêjê te me cuprōn, ne pahhi pòm xà na me hàhcukjêr to:

— Jō ri quê ha Cixtô pê pahhi na Pahpãm te capi ne ihkujahêc ita ihpòm? — hajỹr. 5 Mã cute me cumã harēn to:

— Ita ri Juta jō pjê kam, Pãw jō krĩ kam ri ihpòm xà. Ampo na? He pê ramã Pahpãm jarkwa to mehcajōc catêjê Pahpãm jō kàhhōc kam ita na mehho c to me hane he:

6 “Pãw jō krĩ, acrire cakrō, krĩ cunea jirōa pê acati.

Ampo na?

He akaam ri me ijō Pahhiti cator xà.

Ne quê ha cato,

ne me ikwỳ pê Ixaher catêjê cunea to ihhimpej, ne me hamã” hane — hajỹr.

7 Mã aracri Heroti te pyt japôj xà rũm me hũmre krã kreti me mō atajê na hàhwỳr, ne cute me ajpên par, mã cute caxêti na mehcuakij to:

— Jũ caxuw mã caxêti ata cator? — hajỹr. Mã me cumã:

— Caku pyxit jirōa pê ri ramã cator — hane. 8 Jirō pê mã ri cute Pãw jō krĩ wỳr mehkujahêc, ne me cumã harkwa hêj xia hyr to:

— Ca ha me pra ne jũm krare ita na me acato, ne me imã harēn par peaj ne. Mār wa hanea ne me acuxà hōmpu, ne itỳj amji mã hũpa, ne imã ihkĩnti ne — hajỹr.

9-10 Mã cute me pjê jō pahhi ata jarkwa par jirō pê mã ma me pra, ne pry kôt hipêr cute me pyt japôj xà rũm caxêti ata pupun. Ne cute me caxêti pupun xà ata

pyrên ampeaj kam me hakry, ne me cumã amji kîn. Mã caxêti ata me cumam tẽ, ne Marij ikre kam ihkra to hÿr xà ata cwÿrpê hàhhuc. ¹¹ Mã ikre mã me hâr, ne cute me Marij me ihkra ata pupun, ne cute amji mã me hÿpahti na amji to me ipipê prãmte, cuna mã mehkôn krã na me hÿr. Ne me cumã mehkînti na me amji jarên jirô pê, cute me cumã ampo cjên xà jihê mên, ne me cumã me ampo pejti jôr xà atajê jôr. Atajê pê wakÿre prã tepti pê ôr me, ampo jacrô cuxwati ata me, ampo pê pÿnhôc pê rãm jÿn pyrãc, ne cuxwati ata me. Ne ampo atajê cunea na hÿ jãhwÿar to hàhwÿr.

¹² Mã caxwa ata kam Pahpãm te me hôt kam me cumã hÿjarên, ne me cumã:

— Me apê pyt japôj xà pÿn me acator catêjê, ca ha nee hacpÿ mã Heroti pê pjê jô pahhi ata wÿr me amji jaxàr, ne me cumã ahkrare nõ ata jarên nare — hajÿr. Cwÿrjapê ri me hõ pjê wÿr, ma pry nõa kôt, cute me amji jaxàr.

Pê Ejit jô pjê wÿr me cuto

¹³ Mã me hõmpun catêjê, ma ramã memprar jirô pê, cõjkwa pÿn Pahpãm mã memprar catê nõ te Joje jôt kam cumã ihkra to hÿjarên to:

— To jÿ ne gÿxi me ihcãmter to atêm pyrentu, ma Ejit jô pjê wÿr, ne curia me ahtwÿ ne me akrÿ. Wa ha pa jÿ caxuw ate me amji jaxàr xà to me amã awjarê! Ampo na? Nee mã ampo na nare. Pjê jô pahhi pê Heroti ihtÿj apu ahkrare ita japê, cute ihcuran prãmte — hajÿr.

¹⁴ Mã Joje jÿjarêan kam hÿr ne cute ihkra impÿn, ne ma caxwaa ri inxi me, Ejit jô pjê wÿr me to tẽ, ne amcro nõa na curi me cator. ¹⁵ Ne curia me hàhhuc ne mehkÿrÿ, ne curi mehkÿrÿ ita na mã me ahnaa Heroti tyc, mã cormã hacpÿ mã, cute me amji jaxàr. Ne pê rÿ pëa mã ramã Pahpãm jarkwa to ihcakôc catêjê Jeju na, me hõ kãhhôc kam, mehhôc ata harên to hane he:

“Ite, por Ejit jô pjê kam apu ikra mõ ata na, ijãhwÿr” hane.

Pê ihkãhhôc kam ahna mehhôc xà ata na pê hane.

Pê Heroti me ahkrare jipej

¹⁶ Mã Heroti te pyt japôj xà rÿm cute amji jahkre pejti te caxêti pupun catêjê te mempar nare na, me hahkre pej, ne ame kam incryac to me kam incryc. Ne cute hõ krãhtare mã ahkrare xÿmre curan na harkwa hÿr to:

— Ca ha Pãw jô krÿ me, krÿ ajpên cahi na ihcuhê atajê cunea kôt me ahkrare xÿmre na caku pijakrut nare atajê cunea curan to me mõ — hajÿr. Mã harkwa kôt cute me hipej. ¹⁷ Ne pê Jeremij pê Pahpãm jarkwa to ihcakôc catê ata ramã rÿ pea mã ita jarên to hane he:

¹⁸ “Quê ha krÿ ata kam ame amrãhti.

Quê ha pyjê cunea amehkra japê xà to amencwÿr to me ipa kam me to incrà tu.

Ne tee ame hõhtÿj to prãm.

Ampo na?

Nee mã ampo na nare.

Quê ha me cupê mehkra xÿmre cunea me ty, cwÿrjapê quê ha cama amencwÿr to ame ipa” hane.

Mã hÿjarên xà ata na cute hajÿr.

Pê Ejit pÿn me amji jaxà

¹⁹ Mã Heroti tyc jirô pê mã, cõjkwa pÿn Pahpãm mã memprar catê nõ te Joje jôt kam hÿrmã cator, Ejit jô pjê kam, ne cute cumã hÿjarên to:

²⁰ — To jÿ ne gÿxi me ihcãmter to ma hacpÿ mã me gõ pjê wÿr amji jaxà. Ampo na? He nee mã ampo na nare, ramã, por cute me akra curan prãm atajê tyc par — hajÿr.

²¹ Mã Joje jÿr, ne cute ihkra impÿn, ne ma inxi me, hacpÿ mã me to amji jaxàr, ne me to mõ, Juta jô pjê wÿr. ²² Ne cute me Arquirãw pê Heroti xwÿ kra pê hÿm jaxà kam pahhi na me harên par. Na ri curi me mehkÿrÿ na me cumã hÿpaa to hÿpa. Cwÿrjapê ri hipêr Pahpãm te Joje jôt kam Hÿpôjajo jô pjê wÿr me hator. ²³ Mã ma harkwa kôt hacpÿ mã Hÿpôjajo jô pjê wÿr cute me amji jaxàr. Ne curia hipêr Naxare jô krÿ kam mehkÿrÿ. Ne pê Pahpãm jarkwa to ihcakôc catêjê nõ ramã rÿ pëa mã Pahpãm kra pê ahkrare ata jarên to hane he:

“Naxare jô krÿ pÿn pê cato” hane.

Parixêw catêjê jirôa pê me pampej na me pamã ihprãm

Matew 5.17-30

¹⁷ Ne Jeju hanea ne me cumã:

— Nee ca, ite Mojxe xwÿ me, Pahpãm jarkwa to mehcakôc catêjê te me hapackre xà ata to hamre prãmte icator na, ame icãmÿi nare. Wa quêt catyt kam, cute me hapackre xà ita kôt ipa, ne me amã ihkôt harên to impej to ihcuhtacti, ca ate kam me gapac, ne icuxà catyt kam me apa prãmte, wa icator.

¹⁸ — He wa nee ame amã ihêj xi jarên nare, ne ampeaj kam wa me amã awjarê. Quê ha nee cõjkwa me, pjê kam ampo cunea jamre xà wÿr Mojxe xwÿ me Pahpãm jarkwa to mehcakôc catêjê te me amji kam hapac xà na ihkãhhôc ata hõc pyxitre nõ ipictor nare. Quê ha hajÿr to ihcuhê rohnÿtti mã, ne ihkãhhôc kam cute mehhôc catêjê te ampo te jÿ mãn xà atajê quê ha ihtÿj hane. ¹⁹ Na quê ha jÿm te Pahpãm te me pamã harkwa jirên xà ata par nare, ne amjia kôt, amji kôat jÿm jÿpar nare to cumã hahkre na, quê ha ihtÿj cõjkwa kam Pahpãm himpej xà kam incire ne, ne Pahpãm cuna mã ihkëanre. Jÿkjê na, quê ha jÿm te Pahpãm te me pamã harkwa jirên atajê kam hapac, ne amji kôat catyt kam, jÿm jÿpar to cumã hahkre ata, quê ha cõjkwa kam Pahpãm himpej xà kam catia to cati.

²⁰ — He ampeaj kam wa me amã harê. Parixêw catêjê me, Mojxe xwÿ te me hapackre xà to hahkre catêjê me, me cumãa ihhêj ne catyt kam me ipa. Ne Pahpãm mãa nee catyt kam me ipa nare. Na ca ha Pahpãm himpej xà mã me acjêj prãm na, ca ha itajê jirôa pê catyt kam me apa to prãm.

Cu ha nee jũm kam me pancryc nare

21 — Xà pê ca nee Pahpãm te me aquêtjê mã harkwa hyr to:

“Nee ca amehcuran nare.
 Quê ha jũm ahcura,
 ca ha ma cute mehcukij catê wÿr me to pra,
 mãr quê mehkên na me hahkre pej,
 ne mehkên jahpan xà na mehkên mã me cumẽ”

hajÿr kam me gapac nare? 22 Ne wa ha me amã ihkwÿ jirô pê tÿj ita jarê he: “Quê ha jũm te apu mehkwy nõ kam incryc na, quê ha ihtÿj cute apu kam incryc ita na hanea ne mehcukij. Ne quê ha jũm mehkwy nõ mã harkwa to: ‘Ampo cunea na gamreare’ hajÿr na, quê ha ihtÿj cute cumãn xà ita jahpan xà na cute mehcukij catê wÿr me to mō. Ne por jũm apu mehkwy nõ mã haprÿ kêanre pyxwÿy ata, quê ha ramã me pahcurê xwÿn pê Xatanaj jō cuhy wÿr mōr xàa kam ipa”.

Cu pahte me to ihcupan xà to impej pyrentu to prãm

23-24 — Na ri cute hajÿr. Nãmri ca ha ate Pahpãm mã hÿrkwa kam ampo jōr to amōr na, ne curia ate me akwÿ nõ te ampo na akam incryc na to amji japackre na, ca ha curia ate Pahpãm mã ampo jōr xà ata jicu, ne ma tẽ ne mam me akwÿ nõ me ajpên mã acaprÿ, jirô pê ca ha amji jaxà, ne cormã ate Pahpãm mã ampo jōr xà ata gō.

25 — Ne quê jũm akam incryc na, ato xwahna prãmte, ma mehkên cukij xà wÿr me ato mōr kwÿa kam, ca ha me amji to impej. Ampo na? Ca ha ate me amji to impej nare kam ahnaa mehkên cukij catê acato, ne cumã me agō, quê ha ma krãhtare mã me agō, quê ha me gaxà. 26 He ampeaj kam wa ha me amã awjarê. Quê nee gãmjōr par nare kam, jũm amã hikran nare.

27 — He xà cute me amã Pahpãm jarkwa jarên to: “Nee ca ahti na ame pyjê to me axy nare” hajÿr na gÿpar nare? 28 He wa ha me amã ihkwÿ jirôa pê ihpa tÿj ita jarê he: “Quê ha jũm cama pyjê nõ pupu, ne kam cumã amji caprêp ata, pê ihhêj ne ramã cute ahna hÿhkra” hane.

29 — Cwÿrjapê quê ihhêaj to awpôc rÿm ato akên na aton prãmte ampo kên pupu, ca capa ne to awcapê. Nãmri ca ha ate caxàr nare na, quê ha gÿ cunea ihkên mã axà. 30 Ne quê ihhêaj to awpôc rÿm gÿhkra akên na aton prãmte ampo kên to, ca hanea ne hakep ne to awcapê. Nãmri ca ha ate hakep nare na, quê ha gÿ cunea ihkên mã axà. He me pamã me pahcukrã xà te amji jÿkjê ita na, cute jũ mãn nare, ne Xatanaj jō cuhy kam me pajÿ cunea pÿpÿm xà ata ri ampo kên itajê cunea jirôa pê ihkêanre.

Cu ha nee ihcaprÿ na Pahpãm japrÿ na to amji mã me pahcakôc nare

Matew 5.33-37

33 — Pê Mojxe xwÿ me panquêtjê mã: “Ca ha ate Pahpãm japrÿ na ampo na cumã amji ton na, ca ha atÿj to” hane. 34 Ne pa, wa ha quêt cama amã to hahkre to hane he: “Ca ha ate ampo na amji ton xà ata kam, ca ha nee ihkaj na Pahpãm japrÿ to acakôc to, ‘ÿhÿ, wa ha Pahpãm japrÿa na itÿj to’ hajÿr nare. Ne nee ca hanea ne ihcaprÿ na cōjkwa pê Pahpãm krÿ xà to amji mã acakôc nare. Ampo na? He curÿam ri me pahto ihhimpej. 35 Ne nee hanea ne pjê to amji mã acakôc nare. Ampo na? He pjê ita pê ri ihhêj rÿm ihpar pyxwÿr xà. Ne nee ca Krÿpinkrên to amji mã acakôc nare. Ampo na? He cupê Pahpãm pê Pahliti jō krÿ. 36 Ne hanea ne nee ampo kôt akrãa to amji mã acakôc nare. Ampo na? Jũ wÿr ca me anō amjia kôt me pahkÿ nõ pyxit peaj to haka, nare, to ihtÿcti ne. 37 Ne quêt ca ha cama harên to, ‘ÿhÿ, wa ha to’, nare, ‘Quê, wa ha nee ton nare’, hane. Ne nee hirô pê mã garkwa nõ to acakôc nare. Ampo na? Pom ca me acakôc to impejti jirô pê, hipêr me ampo na me amji to itajê, Xatanaj pê me pahcurê xwÿn pÿn ri hapôj” hane.

Cu ha nee jũm te me pampejti na me pajarên na, meh-prãm nare

Matew 6.1-8

6 — Ne wa ha hanea ne me amã ihnō ita cawpa he. Co he! Nee ca cute ahna me apupun prãmte me kam mare mã Pahpãm mã hàpên xà impejti atajê ton to apa nare. Nãmri ca ha ate me ita to hajÿr na, ca ha nee me cōjkwa kam Apãm Cati te me amã ampo pejti jōr xà ata cwÿr nare.

2 — Ne ca ha ate jũm pê hamreare ata mã cute ampo na ihprãm ata jōr na, ca ha aracri cumã agō. Ne nee ca ha apê jũm pê caxwãm pê cute amji kam hapac xà kên, ne pō rÿm ihhêj ne impej atajê nõ pyrãc nare. Ne nee ca me cuxà Pahpãm mã mehcakôc xà jÿrkwa me, krÿ cape na apu amji pejti jarên to amōr nare. He jũm te impejti na amji mã me harên prãmte ri, ame hajÿr to mō. Ne cute amji mã me harên pejti ata pê ri ihhêj rÿm hàmcwÿr xà. Na quê ha nee Pahpãm hipêr cumã ampo jōr nare na, ca me to amji japackrea ne.

3 — Ne ca ha cute ampo na me prãm catêjê mã ampo gō, ne ate cumã ampo jōr xà ata na amji to amxu, quê nee gō ikwÿ nõ peaj ahna gahkre pej nare. 4 Ca ha ampo pejti to, ne atÿj to amxu, ne ahna amji to apimxur peaj ne, quê nee jũm ahna gahkre pej nare, quê ha Apãm Cati pit ate apimxuar pê ampo ton xà ata na apupu, ne hahpan xà na amã amgō.

5 — Ca ha Apãm Cati mã acakôc prãm, ne nee apê me caxwãm pê mehkêanre, ne pō rÿm mempejti atajê pyrãc nare. He mehkêanre itajê me kam mare mã Pahpãm mã mehcakôc xà jÿrkwa kam mehcuhhê, ne krÿ cape kam mehcuhhê, ne me kam mare mã me cumã Pahpãm mã mehcakôc, ahna mehcunea te me hōmpun prãmte. Ne cute amji mã me harên pejti ata pê ri ihhêj rÿm me hàmcwÿr xà na, ca me to amji japackrea ne. 6 Na ca ha, jũm te Apãm Cati pupun xà nare ata mã, me acakôc to prãm, ne gÿrkwa caxwÿn mã me acjêj ne amji na me to hihê. Ne curia ca ha aracri jũm

te, me ate me Apām Cati mā me acakôc na, me apupun nare xà ata mā me acakôc. Quê ha me Apām Cati ata aracri cumā me acakôc na me apupu, ne hahpan xà na cute me amā hāmjôr xà ata to me amā amgõ.

⁷ — Ne ate Pahpām mā me acakôc xà atajê kam, ca ha nee me apê mehcahkrit pê Pahpām jahkre kêatre atajê pyrâc, ne amji cuxà cumā me acakôc xà atajê pit jarên nare. He ihtÿj amji mā cute me Pahpām mā mehcahôc to iryti ata kôt, cute me kam hapac na amji mā me to hane. ⁸ Ne me apê me hūrâc nare. Ampo na? He ate me Apām Cati wÿr xà atajê xwÿjrea na, ramā ahna cumā me gahkre pej.

Pê Jeju Hÿm Cati mā mehcahôc to hahkre

Matew 6.16-18

¹⁶ — Ca ha gâpân nare kam apijacria kam, Pahpām mā amji cajrên kam pra, ne nee apê jÿm pê põ rÿm ihêj ne impej ata ne aracri caxwām pê cute amji kam hapac xà kên ata pyrâc nare. Ampo na? He cute me hajÿr catêjê quê ha Pahpām mā mehcahôc tÿaj kam pra, ne ihtÿj pro to ame amji kuc jipro, mâr quê mehcunea ahna me hõmpu, ne cute me ipijacri tÿaj kam Pahpām mā mehcahôc na mehcāmjÿ. Ne cute ampo na amji mā me harên pejti ata pê ri ihêj rÿm me hâmcwÿr xà. Na ca me to amji japackrea ne. ¹⁷⁻¹⁸ Ca ha Pahpām mā acakôc prâm, ne quêt akuc cuhhõ, ne akÿ pê, ne amji cÿmpej, mâr quê nee jÿm apijacria kam Pahpām mā me acakôc xà ata na me gahkre pej nare. Quê ha Apām Cati pupun xà nare ata pit, ate cumā me acakôc xà ata na me gahkre pej. Ne quê ha ate apimxuar pê ampo pejti ton atajê jahpan xà na, cute amā ampo pejti jôr xà ata gõ.

Pahpām wÿr pry me harkwa hire

Matew 7.13-14

¹³⁻¹⁴ — Me ate ito amji mā me ahimpej xà ata pê ihêj rÿm Pahpām wÿr pry me harkwa hire, ne ipimxurure ata. Mā nee ahna me hàhtõa ne mencjêj nare, ne me pyxitre ne ahna me acjêj. Ne amjia kôt me ipa xà ata pê ihêj rÿm me pahcurê xwÿn jõ cuhy wÿr pry, me harkwa pohti ne catihti ne hirâa pê hikwa ata. Mā me hàhtõa ne ahna me acjêj. Na ca ha me pry hire pimxurure me harkwa hire ata japê — hane.

Pê me hàhtõtî me amji mā me ajkra

Matew 7.28-29

²⁸⁻²⁹ Ne cute me cumā ampo to hahkre jicu, mā me hàhtõtî atajê te, cute mempar xà ata to amji mā me ipikrar, ne me ajpên mā:

— Pÿhàpà, mā ajte hÿmre ita te me pamā ampo to hahkre xà ita, pê nee cute me pamā Mojxe xwÿ te me pajapackre xà to hahkre catêjê atajê pyrâc nare, ne quêt amjia kôt, harkwa kôt, me pamā ampo to hahkre to ipa — hajÿr.

Pê Jeju mento tÿm to ajkrut ne me caprã

Matew 9.27-38

²⁷ Pê pjê nõ kam Jeju apu mõ. Mā mento tÿm pi-jakrut ne ihkôt me cumā hàkjêr to mõ, ne me cumā carâr to:

— Pahhi Tawi xwÿ tàmwxwÿ ita, me icaprãa ne — hane.

²⁸ Mā ma Jeju mõ ne ikre nõ mã me to hàr, mã mento tÿm atajê hÿ na pire mã me xa. Mā cute mehcuji to:

— Xà ca ampeaj kam ajkÿ amji mā me ito ahimpej? Xà ampeaj kam ite me acaprâr na ate amji mā me ito hajÿr? — hajÿr. Mā me cumā:

— Ýhÿ pahhi, ca ha atÿj me icaprã — hane.

²⁹ Mā Jeju te hÿhkrahhi to mento huc, ne me cumā harkwa to:

— Pom ca ampeaj kam ito amji mā me ahimpej xà ita te ri me acaprâr — hajÿr. ³⁰ Mā hamre, mento itajê caprâr pyrentu, mã ihtÿj me rÿt. Mā Jeju te me cumā harkwa to:

— Ca ha nee jÿm mã ite me ato hajÿr xà ita na me iarên nare — hajÿr. ³¹ Mā ma me pra, ne cute me to ihhimpej xà ata kaj na, ihtÿj pjê ata kam mehcunea mã Jeju jarên to me mõ.

Pê Jeju ipêrkêt caprã

³²⁻³³ Ne memprar jirõ pê mã ri ajpên Jeju wÿr me jÿm xÿmre kam ampo carõ kên, mã ipêrkêt ne nee ihcakôc nare to me mõ. Mā Jeju te intête ampo carõ kên ata cator. Mā cute ihcakôc kam ihtêm. Mā cute me hõmpun catêjê atajê te amji mā me to ipikrar, ne me ajpên mã:

— Wa rÿ jÿ caxuw ite me pajõ pjê ita kam, ite me ampo pejti te hajÿrjê nõ pupun nare — hajÿr.

³⁴ Cakrõ mã Parixêw catêjê te ajteare mã me harên to:

— Ampo carõ kên jõ pahhi te ri cumā cute mehkwy japôj xà caxuw carôt jôr, ne nee mã Pahpām te cumā hõr nare — hajÿr.

Pê Jeju mã me caprÿ cati

³⁵ Mā Jeju krÿ cati me krÿ kryjre cunea pupun to ihkôt hapôj to ipa. Ne ihtÿj Juta catêjê te me cuprôn xà atajê kôt, me cumā Pahpām te me to ihhimpej xà jarên xà impejti na harên to ipa. Ne ihtÿj Hÿm carôt kôt hâpên xà pihho ton, ne me hà catêjê cunea caprâr to ipa.

³⁶ Mā Jeju te me hàhtõtî atajê pupun, ne ampeaj kam cumā me caprÿ xà. Ampo na? Por atajê mã amji kÿn nare, ne me caxwām pê mehpeacre, mã cama mehkÿr ne ame ajkampa. Ne me cupê ihêj rÿm carà cahàcre pê hamâr catê nare ata pyrâc, ne ihtÿj ame ipa, na ri ampeaj kam cumā me caprÿ xà. ³⁷ Ne cute ihkôt me ipa catêjê mã harkwa to:

— Ampeaj kam me pajâpên xà pê Pahpām wÿr me to me papipkjêr xà ita cati. He me pajâpên xà ita pê ihêj rÿm pur kam ampo hy to cuprôn xà pyrâc. Ne me to hâpên catêjê ri cormã menchrê. ³⁸ Na ca ha cõjkwã

kam Pahhiti na me ahwỳ, mār quē hipêr ajpên me pamā me hâpên catêjê kwỳ kujate, quē me cumā hâpên xà ita to apê — hajÿr.

Cu ha Pahpām jarkwa to hahkre catêjê na me amji to pōj

Matew 10.40-42

⁴⁰ Pê Jeju ihkôt me ipa catêjê te tōxi japackre to hane he:

— Ca ha ma Juta catêjê jō krī atajê wÿr me pra, ne mehcuea mā ijarē. Ne quē ha me ana amji to pōj me ajkaam, ramā hanea ne ina me amji to pōj. Ne hân ne ina me amji to pōj me ajkaam, hanea ne ramā, por In-xū Cati te ajpên pjê wÿr ikujahêc ata na me amji to pōj.

⁴¹ — Ne por quē ha jūm, jūm pê Pahpām jarkwa to ihcakôc catê cwÿrjapê ahna amji capa ata, quē ha ihtÿj jū caxuw cuxà, Pahpām te cumā hāmjōr xà ata cwa. Ne quē ha jūm, jūm xūmre impejti incwÿrjapê ahna amji capa ata, quē ha hanea ne cuxà, Pahpām te cumā hāmjōr xà ata cwa. ⁴² Ne quē ha jūm te, jūm pê ikôt ipa catê cwÿrjapê, cumā cô pit jōr cakrô, quē ha hanea ne, me cuxà, Pahpām te hahpan xà na jūm ata mā hāmjōr xà ata cwa. Ita to ca me amji japackrea ne — hane.

Pê Jeju mā amji to cati prām nare

Matew 12.15-21

¹⁵⁻¹⁶ Mā Jeju te amji na Parixêw catêjê te amehcuran prām na me hahkre pej, ne ma tē. Mā me hàhtôa ne ma ihkôt me mō. Mā cute me hà catêjê cunea caprār, ne me to impej, ne me cumā:

— Ca ha nee me cumā ite me acaprār ita na me ijarên nare — hajÿr. ¹⁷ Ne ampo na ri cute me to hajÿr? He pê rÿ pēa mā ramā Pahpām jarkwa to ihcakôc catê pê Ixaj xwÿ ata, ita na ihhōac na ri cute hajÿr. ¹⁸ Ne pê ihhōc to hane he. Pahpām hūjarên to:

“Ihnām hã, ite amji mā imã hâpên catê capi ita he.

Ne taa mā ri imã ihkînti.

Ne taa mā ri imã amji kînti to

ne amji to icajpuaw.

Ne wa ite cumā Icarō Pejti kujahêc,

mã cute cumā amji jōr,

mār quē ha Icarō Pejti ata kôat mehçukij,

ne me to ajcokjê.

Ne quē ha me cupê mehçahkrit atajê pê Juta catêjê nare

pê me ijahkre pej nare atajê mā,

ite catÿt kam me to ipicokjêr xà jarê.

¹⁹ Ne nee cute amji to cati prāmte jūm me ajpên krac ri ihcakôc nare,

ne nee apu hàkjêr nare,

ne nee quē ha cà pê cute mempar prāmte ihcakôc to irÿti nare.

²⁰ Ne quē ha jūm pê ihhêj rūm cajcaj hô nõ ata pyrâc, ne cajôc ne ihcapa na xa, quē ha nee ihkwîn pej nare, ne quêt hacpÿa mā hãm to impej, ne ihcuhtac.

Jîkjê na, quē ha jūm, cute amji kam hapac xà ramā ihpeacre, quē ha nee jūm ata mā hikran nare, ne quêt hacpÿa mā to impej.

Ne quē ha jūm pê ihpôc xà nõ pyrâac, ne ramā kyre pê pôr ne ihpôc crire ne, quē ha nee ipîr quē ha ihtÿc nare, ne quêt to ihpôc cati,

quē ha pôr.

Jîkjê na, quē ha jūm,

cute amji kam hapac xà kêanre to apu ipa,

quē ha taa ihtehcajpa,

quē ha catÿt kam apu ipa.

Ne quē ha catÿt kam me to hajÿr to hãm ita kam, ahnaa me curê xwÿn tohjê.

²¹ Ne quē ha pjê cunea kam,

krîxàre pê mehçahkrit atajê cunea

jūm ata jikaj, ne to pit mā amji mā mehhimpej to me ipa” hane.

Hōhō, pê Ixaj xwÿ Jeju na ihhōc to hane.

Arÿjhy cahàc kên jarên xà

Matew 13.24-30

²⁴ Ne Jeju te hipêr me cumā hūjarên xà nõ jarên, mār quē ampeaj kam hūjarên xà ita to me amji kampa, ne me cumā:

— Ýhÿ, cōjkwa kam Pahpām himpej xà ata pê ihhêj rūm me hūmre te ame pjê impejti kam ame arÿjhy impejti kre pyrâac. Ne me hō pur kam arÿjhy pit, ne nee kam ampo hy cahàc nõ te ihho nare. ²⁵ Mā caxwa ata kam ihtÿj nõ ne gōr. Mā ihwÿr curê xwÿn cator, ne aracri cute arÿjhy cahê na ampo hy kên ata kre, ne ma tē. ²⁶ Ne ahna putwÿr pyxit, mā pea arÿjhy cahkô ata kà, ne cute amji to ihhy, mā hanea ne ampo hy kêanre pê ahkê ita cator ne kam ihhy.

²⁷ — Mā hamre pur kam me hâpên catêjê atajê te me hōmpun, ne ma hō pahhi wÿr me cator, ne me cumā: “Me ijō pahhi, mār ca ate gō pur kam arÿjhy impejti kre ita? Nō na mā ajte jū rūm ampo hy kên ita cator?” hajÿr.

²⁸ — Mā me hō pahhi me cumā: “Me pahcurê xwÿn nõ te mōrmō ita ton” hajÿr. Mā cute mehçukij to: “Xà wa itÿj me ampo hy kêanre ita to pōj pyrentu?” hajÿr.

²⁹ — Mā me cumā: “Quê. Ampo na? Ca ha me to pōj pyrentu ne aracri ihkôt mempej nõ capa. ³⁰ Quêt taa ampo hy kên ita ihcuhhê, quē ha ahnaa ampo tep xà kam ahtwÿ, wa ha cormã me amã harê, ca ha mam me ampo hy kên ata jarê ne mehpre ne cuhy kam me haxwÿ. Jirô pê ca ha cormã me arÿjhy impejti ata jirê ne mehpre, ne nõr xà kam me haxwÿ” — hajÿr.

Arÿjhy cahàc kên jarên kôt harên xà

Matew 13.36-52

³⁶ Mā Jeju te me hàhtôti atajê jicu, ne ma ikre nõ ma hàr. Mā ihkôt me ipa catêjê te ahna me hàhtêp, ne mehçukij to:

— Me ijõ pahhi, ampo jarën mã ca ame imã harë?
Ampo kôt harën xà mã ampo hy kèanre ita? — hajÿr.

³⁷ Mã Jeju me cumã:

— Ipê me Ahàkà pè ampo hy impejti kre catê ata pyrãac. ³⁸ Ne pur ata pè pjê pyrãac. Ne ampo hy impejti itajê pè me hũmre pè Pahpãm tekjê atajê pyrãac. Ne ampo hy cahàc kèanre ita pè me hũmre kèanre atajê pyrãac. Ne me cupê me pahcurê xwÿn pè Xatanaj tekjê, na ri taa me to ihhimpej. ³⁹ Ne arÿjhy kèhkèn xà ita pè ri ampo cunea jamre xà kam Pahpãm te ajpèn pè me ato ipicokjêr xà pyrãac. Ne me hàpèn catêjê itajê pè cõjkwa pĩn Pahpãm mã memprar catêjê.

⁴⁰ — Ahnaa mã ampo hy kèn ata te caxàr xà na cuhy kam me haxwÿr xà he, jĩkjê na quê ha ampo cunea jamre xà ata kam, ihtÿj me hũmre kèanre itajê to hane.

⁴¹ Quê ha ipê me Ahàkà pjê ita wÿr cumã memprar catêjê kujate, quê ha Pahpãm pè Pahhiti himpej xà ata pè, cute mehkwy kèn na me ton catêjê atajê me, cute me ampo kèn ton to me amji pyrãc catêjê atajê mea mã, me to pøj partu. ⁴² Ne jũ caxuw Xatanaj jõ cuhy prà tyc xà nare ata kam me haxwÿ, quê ha ame amrã, ne me wa gyj, mehkàj xàhte. ⁴³ Ne Pahpãm na mehkwy, quê ha quêt Pahpãm pè Pahhiti himpej xà ata kam mehtetetti ne, ne curia ihhimpej xà ata krac ri, cahê na mehkri. Ne quê me gũpar xà caxuw me akam me gapac na, ca ha atÿj me awpa.

Ampo pejti pimxur jarën xà

⁴⁴ — He cõjkwa kam Pahpãm himpej xà pè ihhêj rũm jũm xũmre nõ te jũm jõ pjê kam wakÿre prà tepti pè ôr na hĩ jàhwÿr catia mã cator, ne hacpÿa mã curia to ipimxur pyrãac. Ne cumã amji kĩan kam cumã hàhcukrêj atajê cunea to ihpore na hàhpan, ne hàhcukrêj jõ pore ata to, cute pjê kam ôr jĩ jàhwÿr catia to pimxur ata japrô. Ne cute pjê ata to hõ tekjê jirô pè mã ri cormã cute ôr jĩ jàhwÿr catia caxàr.

Kèn jaka pràti jarën xà

⁴⁵ — He hanea ne Pahpãm himpej xà pè ihhêj rũm jũm te kèn jaka pràti japrô catê nõ pyrãac. ⁴⁶ Quê ha jũ ri ihnõ impejti na, hĩ jàhwÿrti ata nõ pupu, ne ma tẽ ne caxuw cumã hàhcukrêj atajê cunea to ihpore na ahpa, ne ma to tẽ, ne to kèn jaka pràti ata japrô.

⁴⁷ — Ne hanea ne Pahpãm himpej xà pè ihhêj rũm cõ kam kryhti to tep pro xà ata pyrãac, ne ajpèn caxuw tep cunea na ihpro. ⁴⁸ Ne quê ha tep to hipu, quê ha cumã ipêr catêjê amcrà wÿr me cupjê, ne me to api, ne me to ihkri, ne tep to ame ajcokjê pyrãac. Ne impej catêjê quê ha kàhà kam me cucjê, ne ihkèanre catêjê quê ha ma põ mã me to awcapê.

⁴⁹ — Ita jĩkjê na quê ha ampo cunea jamre xà wÿr, quê ha Pahpãm mã memprar catêjê, cõjkwa pĩn me hapôj, ne mempej pè Pahpãm na mehkwy tète me hũmre kèn to haprãr partu. ⁵⁰ Ne Xatanaj jõ cuhy tyc xà nare ata kam mehkèn catêjê cunea to me awcapê, quê ha curia mehkàj xàhte ame amrã, ne ame wa gyj — hane.

Ampo wej me intuw jarën xà

⁵¹ Mã Jeju te ihkôt me ipa catêjê cukij to:

— Xà ca ate me ampo ita par? — hajÿr. Mã me cumã:
— Ÿhÿ — hane.

⁵² Mã me cumã:

— Ca ha me ate, ite amji kam ijapac xà kam me gapac, ne hanea ne ate me Mojxe xwÿ te me hapackre ne me cumã to hahkre na, ca ha me apê ihhêj rũm jũm pè mehkra mã hũrkwa pĩn cute ampo wej me ampo tuw to hapôj pyrãac. Ne ihtÿj me cumã mam cute amji kam me hapac xà wej me hapu na, curmã cute amji kam me hapac xà intuw ita to hahkre — hane.

Pê Petrô cõ cwÿrpê mõ

Matew 14.28-33

²⁸ Mã Petrô Jeju mã:

— Quê ha apê ijõ pahhi na mã, ca ha imã garkwa ta, wa ha awÿr mõ, cõ cwÿrpê — hajÿr.

²⁹ Mã Jeju cumã:

— Mër hõhõ, ajpèn iwÿr mõ! — hane. Mã Petrô pàr kre pĩn iwÿr ne ma cõ cwÿrpê Jeju wÿr mõ.

³⁰ Hamre, mã kòc apêa to apê, mã Petrô mã hũpaa to hũpa, ne ma mrõr to mõ. Mã hamre, caràr kam cute ihtem ne Jeju mã:

— Pahhiti, ipytà! — hajÿr.

³¹ Mã ata caxuw, Jeju te Petrô mã hũhkra pèr ne cute hũhkra na ipyr ne hũtãr ne cumã:

— Ampo na mã ca cormã kyre pè ito amji mã ahimpej? — hajÿr.

³² Mã ajkam pàr kre kam me hàpir. Mã hamre, kòc te amji to pec.

³³ Mã Jeju kôt me ipa catêjê te me Jeju pejti na me harën ne cumã:

— Xãmte ampeaj kam apê Pahpãm kra to ihkra — hajÿr.

Pê Jeju Hũm Cati jũrkwa caxuw ihpore gõ

Matew 17.24-27

²⁴ Mã Jeju me, ihkôt me ipa catêjê me, ma Capernam jõ krĩ wÿr me cator. Mã me hõ pahhiti jarkwa kôt me hũhkra kam me hàmcwÿr catêjê nõ te me Petrô cukij to:

— Xà quê ha gõ pahhi, Pahpãm jũrkwa jamãr catêjê jõ pahhiti mã hàmjõr nare? — hajÿr. Mã Petrô cumã:

²⁵ — Quê ha ihtÿj me cuxà hàr jahpan xà na amgõ — hane. Ne cormã ikre mã Petrô xàr, mã Jeju te ihcukij pyrentu, ne cumã:

— Jũ mã mã ca ita to amji kam gapac to? Ne jũmjê quê ha krĩ ita jõ pahhi mã me amgõ? Xà ajkĩ krĩ kam mehkri catêjê nõ, nare, jũm cahkrit mã curi ihkri prãm ata quê ha ajkĩ amgõ? — hajÿr.

²⁶ Mã Petrô cumã:

— Mehcahkrit catêjê quê ha me amgõ — hane. Mã Jeju cumã:

— Ate to hamãrti mã ne harën, ampeaj kam ri ita! Ne ita jarën xà te, quê nee curia mehkri catêjê nõ hàmjõr

to prām nare. Cwÿrjapê ri nee ijāmjōr xà nare. Ampo na? Inxū Cati jūrkwā ri, ne ipê ihkra.

27 — Ne nee imā me hūhkra kam me hāmchwÿr catê ita te, pahte amji mā me Pahpām cupa nare na, cute me pahto amji kam hapac na to prām nare. Cwÿrjapê ca ha ma hīpō wÿr tē ne kam ajore mē. Ne mam ate to tep pro ne to gāpir ata jarkwa kam, ca ha ihpore hy pupu ne capa, ne ma hāmchwÿr catê wÿr to tē, ne paxàr jahpan xà na to amgō — hane. Pê harkwa ita kōat ita hane.

Cute ampo kên tēte jūm japackre xà

Matew 18.15-35

15 Ne Jeju te hanea ne ihkōt me ipa catêjê mā:

— Quê Pahpām na mehkwy nõ acuna mā ihkên xà nõ to, ca ha ma hÿrmā mō, ne ahte ajpēn na me ajkrut peaj ne cumā cute ato kên xà ata jarē. Quê ha cute apar na, ca ha curia hacpÿ mā me ajpēn to impej.

16 — Quê apar nare, ca hacpÿa mā amji jaxà ne amji caxuw jūmjê to ajkrut, nare, menchrê ne me haprô, ne ma hÿrmā me to mō. Quê ha cute ato kên xà na me hōmpun xà atajêa na me cumā harē. Nāmri pê mam ramā Pahpām jō kàhhōc harēn to hane he: “Quê jūm pyxit peaj mehcukij catê wÿr tē, ne cumā jūm jarēn to kên na, quê ha nee impar nare, nāmri quê ha jūmjê inchrê ne cute hōmpun xà na ajpēan kōt me harēn na, quê ha ihtÿj me kampa” hane. Quê ihhêaj to me akampa ne ihkên ton jicu, ca ha hacpÿa mā me ajpēn to impej.

17 — Quê ihhêaj to me akwÿ nõ ata me apar nare, ca ha Pahpām na mehkwy mā ihcunea na harēn pa, mār quê taa me acuxà cumā mehcahôc. Quê ha nee Pahpām na mehkwy par nare na, quê ha cupê mehcahkrit pyrâc, ne cupê Pahpām jarkwa jahkre kêt catêjê nõ, ne cupê Pahhiti jarkwa jirô pê ihpÿpÿm catê. Ne cupê amjia kōt ipa to prām catê, ne ihtÿj ampo kēanre ton to ipa.

Me pahte ampo ton itajê cunea na, Pahpām me pahto amji japackre

18 — Ÿhÿ, pom ate pjê kam ampo kên cahpêrhyr ita, hanea ne cōjkwa kam ate ihcahpêrhyr. Ne hanea ne ate pjê kam ampo pej to tojnō ita, hanea ne cōjkwa kam ate to tojnō.

19 — Ne hanea ne pjê kam cute ito amji mā mehhimpej atajê, quê ha jūmjê ajkrut ne ijapÿa na, ajpēan kōt me hàhwÿr na, quê ha cōjkwa kam Inxū Cati ihtÿj ampo na me hàhwÿr xà ata to me cumā. 20 Ne quê jū ri jūmjê inchrê cakrô, amji mā ijapÿy to pōj xà ata kam, wa ha ramā ame cahê na ipa — hajÿr.

Cu ha jūm te me pahto kên ata kam me pancryc jicu ita na

21 Mā Petrô Jeju na hàhtêp ne ihcukij ne cumā:

— Ijō Pahhi, jū mā wa ha? Xà wa ha ikjê te ito kên to xet xà ata na kam icryc jicu, ne cute ito kên atajê na to tojnō to xet? — hane.

22 Mā cumā:

— Jū wÿr ca cute ato kên xà ata jahpan xà na, kam acryc jicu to xet peaj. Ca ha cute ato kên ata na to tojnō to xetxēnta, ne nee cormā kam acryc jicu to tojnō nare — hane.

Jūm te nee ihkwÿ nõ te to new ata to tojnō nare jarēn xà

23 Ne Jeju mehcunea mā ihkōt harēn to:

— He cōjkwa kam Pahpām himpej xà te amji kam hapac xà pê ihhêj rūm jūmjê te hō pahhi mā me hàpên, ne cute ajpēn mā me hō new to mehcahôc, ne ahna me ajpēn par ata pyrâc. 24 Ne mam cute ihpore to, cute to new to mirjāw ata, pahhi ata wÿr cator. 25 Mā cumā hàpên catê ata pê cute to new catihti ata caxuw ihpore jamreare. Mā hamre, hō pahhi te jūm te to new ata to ampo na hàhpan na me mēn, hÿxi me mehkra mea mā. Ne hanea ne hàhcukrêj cunea to hō new ata caxuw ihpore na me to hàhpan par na, cute me mēn.

26 — Mā cumā hàpên catê ita hō pahhi cuna mā ihkōn krā na hÿr, ne cute ahna hàhwÿr ne cumā:

— “Ijō pahhi, ito amji mā awjamā, wa ha itÿj amā ijāmjōr to imōr ita kam ijāmjōr pa!” hane. 27 Mā hō pahhi mā caprÿ xà, mā cute hō new catihti ata mea mā, ihcunea na to tojnō.

28 — Mā ma cute hō pahhi to new ata na tē. Ne cute jūm te ihpore hy te xěj peaj to, to new ata cajpar. Mā cute jūm ita jōkre ri ihcuhtom, ne apu to ahcujrō ne cumā:

— “Imā amgō! Ampo to ate ito new ata jahpan xà na imā amgō!” hajÿr.

29 — Mā jūm ita cuna mā ihkōn krā na hÿr, ne ahna hàhwÿr, ne cumā harkwa to:

— “Ito amji mā awjamā, wa ha itÿj amā ijāmjōr to imōr ita kam ijāmjōr pa!” hajÿr.

30 — Cakrô, mā nee ajte cute impar nare, ne ihkên mā mēn. Ne cute me hacjên xà kam haxàr, mār quê curia ihcuhhê, ne ihcuhhê xà ata to cumā amgō.

31 — Mā hamre, me hàpên catêjê na mehkwy nõ, cute ihkên ton ita na hōmpun, ne apu kam incryc to incryc, ne ma hō pahhi te to tojnō ata wÿr tē, ne cute cumā harēn par.

32 — Mā pahhi te hipêr cumā hàpên catê ata na hàhwÿr ne cumā harkwa to:

— “Imā hàpên catê kēanre ita! Ca ate iwÿr, wa ite ate ito new catihti ata na ato tojnō, ca ma tē. 33 Ne nee ate amji cuxà akwÿ nõ ata caprÿ, ne to tojnō nare icuxà, pom wa ite acaprÿ ne amā hikran, ca ma tē ita? Ampo na mā ate icuxà to hajÿr nare?” hane. 34 Ne hō pahhi ita apu kam incryc to incryc, ne ma me hacjên xà wÿr cute cumā hàpên catê ata kujahêc, mā cute me haxàr. Na quê ha curia ihcuhhê, ne amji pupun to kēanre to ihcuhhê, ne xa cute ampo to hō pahhi to new atajê cunea jahpan xà na hàmjōr pa, ne cormā amji caprā — hajÿr.

35 Ne Jeju te me cumā hūjarēn jicu xàa kam me cumā:

— Ca ha cute me ato new catêjê me, cute me ato kên catêjê atajê to tojnô ne me hîcu nare na, quê ha côi-kwa kam Inxû Cati me acuxà nee ate me to kên atajê to tojnô ne hîcu nare — hajÿr.

Pur jô pahhi me cumã hàpên catêjê jarên xà

Matew 20.1-16

20 Mã Jeju te hipêr me cumã hûjarên ne me cumã:

— Côi-kwa kam Pahpãm himpej xà te amji kam hapac xà pê ihhêj rûm pîxô krô kre catêjê jô pahhi pyrâac. Ne ma hân ne iràrâtia na, cumã me hàpên catêjê japên to pra, cute mehkwy cajar, ne hàpên xà na me ajpên par prãmtê. ² Ne pê pjê ata kam, pê amcro pyxit to me hàpên jahpan xà na ihpore hy pyxit to ajco me amji mã amgô. Na ri mehkôat amcro pyxit to me hàpên to pyt jahpan xà na ihpore ihhy pyxit to me cumã hàmjôr xà na cute me ajpên par. Ne ma cute me hàpên xà wÿr mehkujahêc, mã me hàpên to mō.

³ — Mã ramã ahna pyt jàpir, mã ma krí cape na hipêr cumã me hàpên catêjê japên to tē. Ne curi cute me hûmre kwÿ te nee ampo to me hàpên nare, ne cama ame ipa atajê kwÿ pupun. ⁴ Mã me cumã: “Ca ha me hanea ne me imã ijô pîxô to apê, wa ha ate me gâpên xà atajê jahpan xà na catyt kam me amã amgô” hane. ⁵ Mã ma me mō.

— Mã ramã pyt me pahkrã jimoc kam hÿr xàa kam, cute hipêr itajê to hajÿr, ne cute me haprôr, cumã me hàpên xà caxuw. Ne ramã pyt pec to mō, mã cute hipêr itajê to hajÿr. ⁶ Ne ramã pyt xàr xàa wÿr, mã ma hacpÿ mã curi cute me cumã hàpên catêjê japrôr xà wÿr amji jaxàr. Ne cute hipêr me hûmre kwÿ pupun, mã mehkri, mã cute mehcukij to: “Ampo na mã ita kam ampo to me gâpên nare kam, me ana pyt?” hajÿr.

⁷ — Mã me cumã: “Ampo na? He nee jûm te me imã me ijâpên xà nõ jarên nare na ri” hajÿr. Mã pîxô na pur jô pahhi te mempar ne me cumã: “Ca ha hanea ne imã me apê” hajÿr.

⁸ — Mã pyt xàr xàa kam, mã pîxô na pur jô pahhi te cumã me hàpên catêjê jô pahhi na hàhwÿr ne cumã: “Me hàpên catêjê mã akij, ne me cumã gâmjôr pa. Ne ca ha hapua na ite me haprôr atajê mã mam gâmjôr kam tē, ne hapua na ite mam me haprôr itajê mã amgô” hajÿr. Mã harkwa kôt cute ton.

⁹ — Mã ramã pytre kam, me hàpên kam cute me to ihtêm catêjê atajê te ahpÿanre na ihpore ihhy pyxit ne mencwÿr par. ¹⁰ Mã iràrâtia na cute me hàpên kam ihtêm catêjê atajê, ihtÿj me hirôa pê me hàmcwÿr na me amji cãmÿ cakrô, mã cute me cumã ihpore ihhy to ihcahkûm atajêa jôr. ¹¹ Mã cute amencwÿr, ne me hō pahhi na mehcakôc kam mehtêm. ¹² Ne me cumã: “Pÿhàpà! Pom hapua na me hûmre japên kênre itajê jâmcwÿr xà me, me ijâmcwÿr xà ita pipëan ajte? Wa iràrâtia na ite me ijâpên kam itêm. Ne amcro mã me ijûcanãar kam, ite me ijâpên to pyt cakrô, mã ajte me ijâmcwÿr xà itajê pipëan!” hajÿr.

¹³ — Mã pîxô na pur jô pahhi te me cumã harkwa to: “Me ikwÿ nõ catêjê me ikampa, wa nee ite to ihnô cu-

pan nare. Mãr cu pahte ihpore hy pyxit peaj na ate me gâpên to pyt na, pahte me ajpên par ta? ¹⁴ Me gō pore incwa, ne ma me gûrkwa wÿr me to pra. Wa mam ite hûmre mã ijô pore to ijâmjôr to prãm ata to, wa ite hapua na hûmre itajê mã ijâmjôr, ne me ato ipipên partu. ¹⁵ Xà wa ha nee ajkí ite ijô pore to ijâmjôr na prãm ata to ijâmjôr nare? Xà ca ite me to impejti xà ita jû na, ca ame kam acryc?” — hajÿr.

¹⁶ Ne Jeju te harên jicu xà kam me cumã:

— Quê ha jû caxuw Pahpãm pê pîxô na pur jô pahhi ata pyrâac. Ne mehkryjre me, me cati to ajpëan. Ne hapua na me ipa itajê me, mam me ipa catêjê to ajpëan — hajÿr.

Mehkra te hûm kam hapac, ne me kam hapac nare jarên xà

Matew 21.28-32

²⁸ Ne Jeju te cute amehcukij catêjê mã ampo to hahkre prãmtê me cumã:

— He pê hûmre nõ mã ihkra xûmre ajkrut. Mã cute mam ihkà ita mã harkwa to: “Ikra, ita kam ca ha imã ite pîxô krô kre xà ata kre” hajÿr.

²⁹ — Mã ihkra ita te impar ne cumã harkwa to: “Imã imôr prãm nare” hane. Ne hapu na cute amji kam hapac, ne ma tē.

³⁰ — Mã hanea ne ihkra nõ mã cute harkwa to: “Ikra, ita kam ca ha imã ite pîxô krô kre xà ata kre” hajÿr. Mã ihkra ita te impar ne cumã: “ÿhÿ inxû, wa ha itÿj tē” hajÿr cakrô, nee mōr nare.

³¹ — Mër hōhō, wa ha ita na me acukij. Me amã, jûm mã pê hûm te amji mã ampo na to prãmti xà ata to? Xà mam kà ita, nare, hapu na ita? — hane. Mã cute impar ne cumã:

— Por mam ihkra xûmre kà ata — hajÿr. Mã Jeju cumã:

— He me apê hapu na jûm mã ihkra ata pyrâac. Ne atÿj me garkwa to me apê Pahpãm kôt me apa catêjê na me amji jarê, ne nee ihkôt me apa nare. Me amãa me hûhkra kam me hàmcwÿr catêjê atajê me, pyjê inxyre atajê me girôa pê mehkëanre cakrô, mãramã me acumam Pahpãm himpej xà mã mencjêj to me mō.

³² Ampo na? Pê Jowãw ajpên me awÿr mō, cute me amã pry ata jarên prãmtê, ca ajte nee ate mempar ne amji mã me to me ahimpej nare. Ne me hûhkra kam me hàmcwÿr catêjê me, pyjê inxyre atajê te mempar pyrentu. Ca ate me ita pupun cakrô, ca nee ate me to amji mã me ahimpej ne mempar nare — hane. Mã ma me pra, ne nee hipêr cute mehcyt nare.

Pyjê te tej jarên xà

Matew 25.1-13

25 Mã Jeju te, cute amji jaxàr xà to me cumã hahkre prãmtê me cumã:

— Amcro ata kam, quê ha côi-kwa kam Pahpãm himpej xà ata pê ihhêj rûm me cuprÿ te tej atajê pyrâc. Ne cute ahpÿanre na me hō pôc xà incwÿr, ne pry cahti ri me to jûm xûmre jikwa tuw xà ata jikaj. Ne caxwa ri

ihťyj mehkřĩ ne me hikaj, cute me hũnãr ne mehkõt cahãj ata jũrkwa kam amji kĩn wýr me hãr prãmte.

² — Ne me cupřý te xĩc ne mehkřã nare, ne mehkwy te xĩc itajê quêt mehkřã kre te amji jahkre pejti. ³ Ne por mehkřã nare atajê te ame hõ põc xà incwýr, ne nee caxuw amji mã me cacõ incwýr nare. ⁴ Mã quêt mehkwy te amji mã me cacõ incwýr. ⁵ Mã cormã hũmre jikwa tuw xà na mehkwy itajê apu mehkên, mã ame hõt ne pry cahti ri ame hikaj xà ame hikwa ne ame gõr.

⁶ — Mã ramã caxwa picapõn kam, cute mehkřãhĩa kam mençrer na mempar. Mã me cumã caràr to: “Ramã me hikwa tuw xà na mehkwy me amji to mõi! Ajpên cuna mã me pra!” hajýr.

⁷ — Mã me cupřý te me tej itajê amehkřĩ, ne ame ip-imprar, ne cute ame hõ põc xà atajê to imej par, mãr quêt me cumã ihpõc pej. ⁸ Mã hamre me cupřý krã nare atajê pẽ ihpõc xà cacõ jamre, mã me cupẽ ihtyc, mã mehkwy mã: “Me imã gõ põc xà cacõ kwý incire ne. Ampo na? Ramã me ipẽ me ijõ põc xà cacõ jamre, ne ramã ihtyc to mõi” hajýr.

⁹ — Mã me cupřý krã kreti atajê me cumã: “Jũ wýr quêt. Hamreare, jũ wýr quêt incire ita kam me pah-catwy. Ca ha ma me pra ne caxuw amji mã mehkwy japrõ” hane.

¹⁰ — Mã ma ihpõc xà cacõ kwý japrõr to me pra, mã me hakàn pẽ me hikwa tuw xà na mehkwy cator. Mã cute me cumã me hikwa tuw atajê jũrkwa jarkwa jihẽ mẽn, mã amji kĩn wýr mehkõt me hãr. Mã me ahna cute me to hihẽ.

¹¹ — Mã me ahna ahtũmre, mã mehkřã nare atajê te amji mã me cacõ japrõr, ne me cator, ne ame caràr to: “Pahhi, pahhi, cama me ijamã, wa me cuxà me acjêj!” hane.

¹² — Mã me cumã: “Ipẽ me gahkre kêatre, wa nee ite pry cahti ri me anõ pupun nare. Ne ramã ikre mã mencjêj xà jirõ pẽ ihpým, mã hihẽ” hane.

¹³ — Hõhõ, cwýrjapẽ ca ha me amji jamã, ne me gãhcuprõn hiahpuro, nãmri me apẽ ipẽ me Ahàkà te amji jaxàr xà jõ amcro ata jahkre kêatre, cõt ca ihhẽaj to ahtwy — hajýr.

Me ajpên pẽ me pahcunea to ipicokjêr xà

Matew 25.31-46

³¹ Mã Jeju te me cumã Pahpãm te mehcukij xà to hahkre prãmte me cumã:

— Quêt ha me Ahàkà amji to Pahhiti, ne ajpên ahpar mã mõi, cumã mempar catêjê cunea me, ne pahhi křĩ xà catia ata kam me jý. ³² Quêt ha pjê kam mehkřĩ atajê cunea cuna mã me cupřõ, quêt ha me to ajcokjê. Pom ahna mã carà cahàcre hõhti to me ipijapar catêjê, hãn ne ihhõhti ita pẽ, increçerti to capřã ne to ajcokjê he, ita na quêt ha me ato. ³³ Ne quêt ha awpõc rũm carà cahàcre hõhti to cupřõ, ne awke rũm ihhõ nare itajê to cupřõ.

³⁴ — Ita na wa ha ipẽ me gõ Pahhiti awpõc rũm me xa itajê mã ijũjarên to: “Por Inxũ te me ato imej atajê, ajpên me mõi. Ajpên me mõi ne ihhimpej xà krac ri me axà. Por pẽ mam pjê te amji ton xwýjrea na, Inxũ me

amã ihhimpej xà to ata mã, ca me acjêj. ³⁵ Ampo na? Nee mã ampo na nare. He pẽ imã prãm, pẽ ca me imã ijarte. Ne imã kõr, pẽ ca me ikõm. Ne icahkrit cakrõ, pẽ ca me gũrkwa wýr me ijaprõ. ³⁶ Ne pẽ ipẽ ikà nare, pẽ ca me imã ikà gõ. Ne pẽ wa ixà, pẽ ca me ijamã. Ne pẽ me hacjên xà kam me ijaxà, pẽ ca ma me ipupun to me apa” hajýr.

³⁷ — Mã mempejti atajê te mehcukij to: “Pahhiti, jũ caxuw ri amã prãm, wa ite me amã gõ jõr? Ne amã kõr, wa ite me amã cõ jõr? ³⁸ Ne jũ caxuw ri acahkrit, wa ite me ijũrkwa wýr me gaprõr? Nare, apẽ akà nare, wa ite me amã me akà ita jõr? ³⁹ Ne jũ caxuw ri axà, nare, cute me gaxàr, wa ite me apupun prãmte awýr me mõi?” hajýr. ⁴⁰ Mã Pahhiti te impar ne me cumã: “Ampeaj kam wa ha me amã awjarẽ, por ikõt me ipa catêjê kryjre nõ mã ate me acaca xà ton ata, imã ca ate me ton” hajýr.

⁴¹ — Jirõ pẽ mã ri cute awke rũm amehcuhhẽ atajê mã: “Icuna mã me akẽanre atajê, ipẽ me ajcamẽ. Ne ma Xatanaj me, cumã mempar catêjê mã, ite me to kên xà na cuhy tyc xà nare ton ata wýr me pra. ⁴² Ampo na? Nee mã ampo na nare. He pẽ imã prãm, pẽ ca nee me imã ijarte nare. Ne imã kõr, pẽ ca nee me ikõm nare. ⁴³ Ne pẽ icahkrit, pẽ ca nee me gũrkwa wýr, me ijaprõr nare, ne ipẽ ikà nare, pẽ ca nee me imã ikà jõr nare. Ne pẽ ixà, pẽ ca nee me ijamãr nare, ne pẽ me hacjên xà kam me ijaxà, pẽ ca nee kam me ito amji japackre ne me ipupun nare” hane.

⁴⁴ — Mã mehkên catêjê te mehcukij to: “Pahhi, jũ caxuw wa ite me amã prãm na me apupun, ne amã kõr me, acahkrit me, apẽ akà nare me, axà me, me hacjên xà kam ite me apupun, ne nee ite me atehcajpar nare?” hajýr.

⁴⁵ — Mã Pahhiti me cumã: “Ampeaj kam wa ha me amã awjarẽ, ca hãn ne mehkryjre atajê tehcajpar prãm nare, ne me hĩcu ita kam, nee ate me itehcajpar nare, ne hanea ne ate me ijicu, ne me icaca” hane.

⁴⁶ — Hõhõ, pom mehkên te me hajýrjê, quêt ha ma mehkên mã mencjêj xà ata wýr me pra, ne curia quêt ha amji pupun to kẽanre to mehcuhhẽ rohnýtĩ mã. Quêt ha hanea ne, mempejti atajê ma mencaca xà im-pejti tĩr rohnýtĩ mã xà ata wýr me pra — hane.

Pẽ Juta amji cura

Matew 27.3-10

³ Pẽ Juta Carijot xwý ata te Jeju curẽ xwýn catêjê mã hahkre. Mã cute ihkên mã me mẽn. Mã cute nee me curẽ xwýn pẽ amji pytãr nare na hahkre pej, me ajkaam amji mã:

— An! Wa ite to ihcupan crire nare! Ne ite ijõ Pahhiti kên mã mẽn. Ne quêt ha ihtýj xãmte mehcura! Wa ha tẽ ne intête mehcahpẽrta — hajýr. Ne cute ihpore hy te trĩnta atajê pyr, ne ma hacpý mã Pahpãm to amji kam me hapac xà jũrkwa wýr, cute Pahpãm mã mehcajřen catêjê jõ pahhi me, prohti kam wýr to tẽ. ⁴ Ne curi to cator ne me cumã:

— Pom ite me amã ihpore hy te trĩnta na ijõ Pahhi kên nare ata jõr ita. Nãmhã he, mĩ! Hacpýa mã me apy!

Imã ihkîn nare. Wa ite to ihcupan. Ampo na? He nee hũmre ita kên nare, ne impejti cakrô, wa ite me amã hõr xà ita kôt ca ha xãmte mehcura — hajÿr. Mã me cumã:

— Wa nee ita na me ato amji japackre prãm nare, atea ca amji mã ita ton — hane. Ne nee me cumã hacpÿ mã me ihpore pyr prãm nare.

⁵ Mã Juta te Pahpãm to me amji kam hapac xà jũrka kam ihpore hy ata to me cumã hũcapêr, ne ma tẽ. Ne jũ ita ri cute amji jõkre kwÿr ne ihtyc.

⁶ Mã cute mehpoere ata to cuprõn ne me ajpẽn mã: — Ihpore ita te ri jũm tyc xà ata japrõr, na ri cupê me caprõ jõ pore. Na ri Mojxe xwÿ te me pajapackre xà kam, Pahpãm jũrkwa kam pahte me ihpore ita to me pajàhhuc xà na ihkaj na — hajÿr. ⁷ Cwÿrjapê ri cute ihpore ata na me ajpẽn par, ne cute me to carêc te pot ton catê ata pẽ, hõ pjê ata japrõr, mehcahkrit jarêc xà caxuw. Ne cute mehcahkrit jarêc xà na me ton. ⁸ Cwÿrjapê ri ita kam cormã cute me pjê ata mã haprÿ to: “Me caprõ jõ pjê” hane. ⁹⁻¹⁰ Ne pẽ ramã rÿ pẽa mã Jeremij xwÿ pẽ Pahpãm jarkwa to ihcakõc catêjê nõ ata Pahpãm jarkwa na hõ kàhhõc kam, ita na ihhõc to hane he:

“Mã Juta catêjê te me hõ pahhi kên mã me mẽn jahpan xà na, mehpoere hy te trĩnta jõr na me ajpẽn par, ata ri hacpÿa ne cute me ipyr, ne me to pjê te pot ton catê pẽ hõ pjê japrõr” hane.

Mã ahnaa cute hajÿr.

Pê Pirat mã hĩxi cupê Jeju cawpa

Matew 27.19

¹⁹ Ne cormã Pirat pahhi krĩ xà kam jÿ ne apu Jeju cukij, me ajkaam mã hĩxi te harkwa kujahêc ne cumã: — Ca ha nee hũmre pejti te jũ caxuw ampo kên ton nare ata to kên nare. Ampo na? He caxwa ri ite hũtir kênre — hajÿr.

Pê pĩ na me Jeju xõr na harkwa

Matew 27.24-31

²⁴ Mã Pirat te nee me cupê Jeju mã hikran nare na amji jahkre pej. Mã ame hàhkrihkrit catia kam, me hàhtõtĩ atajê ihtÿj me pahhi jũhhÿr prãm. Mã pahhi ata te nee Jeju curan na me cumã hũjahkre nare na amji jarên xà caxuw, cõ na hàhwÿr, ne kam hũhkra cuhhõn, mehcuea kam mare mã. Ne hũhkra cuhhõn kwÿa kam cute me cumã:

— Wa nee ite hũmre ita curan na me amẽn nare, ne me atea ri mehcuran xà — hajÿr. ²⁵ Ne mehcuea te caràr to:

— Me imã, ite mehcuran jahpan xà na, ihtÿj me ikam me ikên pÿm, ne hanea ne me itàm xwÿ kam ihpÿm na to prãm — hajÿr.

²⁶ Mã Pirat pẽ pahhi ata te me cumã Parapa mã hikran. Ne cute pryti kà to Jeju cahhyr na me mẽn, ne

pea cute krãhtare mã me hõr, mår quẽ mehcahhy catia, ne pĩ na me cuxõ ne mehcura.

²⁷ Mã ma krãhtare atajê me to ihhimpej catê pẽ Pirat ata jũrkwa wÿr Jeju to me mõi, ne curia cute krãhtare cunea to cuprõn, mã cute mehkrã tu ne to xa. ²⁸ Ne cute me cupê ihkà to põi, ne me ahna pahhi kà tepti japjêhti ata mẽn, ne me cumã to ihkà. ²⁹ Ne hõmjĩ to me pahhi krãhkà ne ihkrã mã me haxàr. Ne awpõc rũm hũhkra mã pĩ nõ to pahhi jõ kõ ne me haxàr. Mã curia me cuna mã to xa. Ne me to hapactu xà kênre ata kam me to incrà, ne cuna mã mehkon krã na mehkrĩ ne me cumã:

— Apê Juta catêjê jõ pahhi catia ne apej! — hane. ³⁰ Ne kam me harcõ rẽ, ne hũhkra kam me cupê pĩ ata to põi, ne ihkrã kam me to ihcahhy. ³¹ Ne cute me to hapactu xà kênre ata jirõ pẽ intête me cupê pahhi kà tepti ata caxàr, ne hacpÿa mã ihkàa to me cumã ihkà. Ne ma pĩ na cute menxõr ne mehcuran xà ata wÿr me to mõi.

Jeju tyc xà wÿr awcapàtkõ

Matew 27.45-46

⁴⁵ Mã ramã pyt me pahkrã jimoac kam hÿr xàa kam, cute hàhcujro to hucu, ne ampeaj kam awcapàtkõ, ne awcapàtkõ ita na pyt pipkjêr. ⁴⁶ Ne pyt pec pejti kam Jeju kÿjti pẽa mã caràr ne:

— Inxũ Cati, Inxũ Cati! Ampo na mã ahte ate irer to hajÿr? — hane.

Pê krĩ jamãr catêjê Jeju kre jamã

Matew 27.62-66

⁶² Ne ramã Juta catêjê kõt xà jõ amcro ata cator. Ne Pahpãm mã mehcajrên catêjê jõ pahhi kwÿ me, Parixew catêjê me, Pirat pẽ pahhi me, cute me ajpẽn par. ⁶³ Ne me cumã harkwa to:

— Me ijõ pahhiti, wa ite cormã me Jeju xwÿ hẽj xi xà ata to me amji japackre, nãmri cute amji jarên to: “Quẽ ha ina amcro incrê, wa ha hacpÿa mã itĩr” hajÿr. ⁶⁴ Ne cu ha pahtÿj me harêt xà ata jamãr to impeaj ne, quẽ ha xa ahna amcro incrê, cu ha cormã me hamãr jicu. Nãmri cu ha me ita ton nare, quẽ ihhêaj to ihkõt me ipa catêjê me hĩ to ahkĩ, ne me harên to: “Hacpÿa mã ihtĩr!” hane. Quẽ ha mehhej xi xà ita, mam ita jirõa pẽ ihkênre ne — hajÿr. ⁶⁵ Mã Pirat te me cumã harkwa to:

— Nãmã ijõ krãhtare catêjê amehcuhhê he. Ca ha me haprõ, ne me to mõi, ne cute me harêt xà ata jamãr na me amẽ, quẽ me hamãr to mempeaj ne — hajÿr.

⁶⁶ Mã ma cute me haprõr, ne me to pra. Ne cute me kên kre kam me harêt xà ata jarkwa na, me ihtõ xà to me ihtõ, jũm te aracri ihcaxun cupate. Ne curia ame ahna me ipa, ne ame hamãr to ame ipa, ne ma mehcuhe ne me hõmpu, ne me hamã.

Krãhtare ame cumã hẽj xi jarên na ajpẽn pa

Matew 28.11-15

¹¹ Ne cormã pyjê krĩ wÿr pry kôt me mör kwÿa kam, mã krãhtare te Jeju kre jamãr atajê kwÿ te Juta catêjê jô pahhi kwÿ atajê mã Jeju kre te jũ mãn xà atajê cunea na harên par. ¹² Jirô pê mã ri cute jũ mã me ton xà ata na ahna me ajpên par, ne me krãhtare kwÿ mã ihpore catia ne hõr, ne me cumã:

¹³ — Ca ha me gũjarên to ame apa to me hane he: “Wa me ijikwa ne me gõr, mã Jeju kôt me ipa catêjê cator, ne ma cute me hĩ to hàhkĩj ne me to tẽ” hane.

¹⁴ — Quê ha me pajõ pjê jô pahhiti ita kampa, ne ajteare mã ampo to kam amji kampa, wa ha me cumã ate me harên xà itajêa na harê. Hamre quê ha cute, me ite me to amji kam me ijapac xà ita na to amji kampa, quê ha nee me amã ihkên xà nõ cator nare — hajÿr. ¹⁵ Mã pea Jeju kre jamãr catêjê atajê te me ihpore ita pyr, ne ihtÿj ame cumã mehhêj xi xà na cute me ajpên par atajê jarên to me ipa. Mã mehhêj xi xà atajê Juta jô pjê cunea kôt ihcahkũm. Ne cormã ita kam mehhêj xi xà ita ipa.

Pê Jeju pjê cunea kôt ihkôt me ipa catêjê kujate

Matew 28.16-20

¹⁶ Mã Jeju kôt me ipa catêjê te me õxi atajê, ma, por pê Jeju Hĩpôjajo jô kên to me cumã ihcakôc ata wÿr me mõ. Mã curia Jeju te me cumã amji to ipipê. ¹⁷ Mã cute me hõmpun ne cuna mã mehcunea pÿpÿm, ne Jeju to cute me cati prãmte me to ihcakôc pejti. Mã cormã mehkwy me amji mã: “Xà Jejua mõrmõ ajkĩ?” hane.

¹⁸ Mã ma Jeju me hÿrmã mõ, ne me cumã:

— Inxũ te imã pjê me cõjkwa kam ampo cunea to ite ihmpej xà caxuw imã carôt jõr, ne ahna imã harkwa. ¹⁹ Cwÿrjapê ca ha pjê cunea kam mehkri atajê wÿr me pra, ne catyt kam ijarkwa kôt me ipa catêjê na me to, quê catyt kam ikôt me ipa. Ca ha Inxũ me, Carõ Pejti me, ipê ihkra japrÿ na cô kam mehcumrã. ²⁰ Ne ite me amã ampo cunea to ihmpej atajê to me cumã hahkre, mãr quê catyt kam ihcunea kam me hapac to me ipa. Ne wa ha itÿj amcro cunea kam me acahê na ipa, quê ha ahnaa ampo cunea jamre xà kam hàhhuc na, ca me to amji japackrea ne — hane.

MACÔ

Pê Jeju me, ihkôt me ipa catêjê Hîpôjajo jô pjê kam me ipa

Macô 3.7-12

⁷ Mă Jeju me, ihkôt me ipa catêjê ma Hîpôjajo jô pjê wÿr me pra ne me cator, ne hîpô tohkà na ame ipa. Mă krî kwÿ kôt cute me Jeju te curi apu mör na me harën par, ne cute ahna me cuprôn tu. ⁸ Mă Hîpôjajo catêjê jàhtôa te me cuprôn. Ne hanea Juta jô pjê me, Krîpinkrên me, Côpijapjêr jô cô jîkjê pîn hanea ne cute me cuprôn, Pjêhcaprêcti me, Kên jô krî me, Teppro jô krî me. Ne pê mehcunea, cute me Jeju cajpar prämte, hÿrmă me mö. Ampo na? Pê ajco me Jeju te ampo ton xà atajê cunea na me harën pa na pê. ⁹ Mă Jeju ma ame hàhtôti te me ahna ihtÿj ita na ihcaca, na ri cute ihkôt me ipa catêjê nõ mã harkwa, quê pàr kre nõ na ahwÿ, quê kam jÿ ne me cupê to ajcamê crire ne. Mă harkwa kôt cute me ton.

¹⁰ Ne pê Jeju ajco me hà jàhtôa ne me capră. Na pê me hà catêjê jàhtôa ne cute Jeju tât ne me amji caprăr prämte, me hî to întête hÿrmă me amji pê amtà. ¹¹ Ne me kam me pahcurê wxÿn carô kên atajê pê ajco me Jeju pupu, ne ajco cuna mã me ajhu, ne me caràr to:

— Apêa ri Pahpăm kra — hane. ¹² Pê Jeju ita tète incryac kam me cumă:

— Nee hipêr ipê Pahpăm kra na me ijarën nare — hane. Ne pê mehcapêrta.

Hÿmre te pjê kam ampo hy kre jarën xà

Macô 4.26-29

²⁶ Pê Jeju me cumă harkwa to:

— He Pahpăm himpej xà pê ihhêj rÿm me hÿmre te pjê kam ampo hy kre. ²⁷ Ne ma tē ne ihtÿj apu ipa. Mă pjê krac ri ampo hy ata aracri huprăj to mõ, cute huprăj to mör xà ata na hahkre pej nare kam. ²⁸ He pjê ita ri cumă hô gō, quê ha mam hiprăj cato, jirô pê mã, quê ha kam ihhy krekà cato, ne ahna ahtÿm nare quê ha kam ihhy, ²⁹ ne intep, quê ha caxuw wapo py ne to hakep. Ampo na? Ramă intep ne hakep xàa kam na ri — hane.

Jowăw pê me cumrăr catê tyc xà

Macô 6.17-29

¹⁷ Pê ramă putwÿ nõ na pahhi Heroti ita Jowăw pê me cumrăr catê ata pro na to awjahkre. Pê me hÿhkra cajpre ne hacjên xà mã me haxà. Ne ampo na mã pê me to hane? Nee mã ampo na nare. Pê pahhi Heroti tō japyrÿ pê Pirip ata prō japyrÿ Herotijkwÿj. Pê Heroti mã

ihthō prō ata kînti, mã cute cupê caxàr ne cume hikwa. Mă ihtō pê Pirip ata ahte apu ipa. ¹⁸ Mă Jowăw pê me cumrăr catê ata te me hōmpun, ne ma pahhi pê Heroti ata wÿr tē ne cumă:

— Ampo na mã ate atō pê ihprō caxàr? He ate Mojxe wxÿ te me pajapackre xà kaj na ton — hajÿr.

¹⁹ Mă pahhi prō pê Herotijkwÿj te harën xà ita par, ne ahna cupê ihkaj na. Na ri ma apu Jowăw curê ne ihtÿj cumă ihcuran präm. ²⁰ Mă jÿ wÿr quê ihcura. Ampo na? He Jowăw pê hÿmre impeaj ne ajco catyt kam ipa, na pê Heroti mã hÿpa, ne ihtÿj ihkên pê hÿtâr to präm. Pê ajco Jowăw pahhi japackre, pê kampa ne cupê amji jahkre kêatre cakrô, ihtÿj kam hapac to präm.

²¹ Ne pê amcro nõ na pê pahhi ata pÿm xà jô amcro cator, cwÿrjapê ri cute amji kîn catia ton, ne cute me cupê pahhi cati catêjê cunea na me hàhwÿr. Ne hanea ne krăhtare jô pahhi kwÿ me, Hîpôjajo jô pjê catêjê jô pahhi kwÿ na me hàhwÿr, cahê na cute ame amji kîn prämte. Mă mehcunea te amji kîn ata wÿr mehcuprôn, ne ihtÿj cute ame ampo kur catia ne ame ikôm catia to präm to, cute mehcuprôn.

²² Ne ihprōtpê Herotijkwÿj kra cahăj cuprÿ japyrÿ te Xarômkwÿj ata me amji kîn ata wÿr hàr, ne me cuna mã hàkrun to mõ. Mă pahhi Heroti me pahhi cati kwÿ atajê cunea mã Xarômkwÿj jàkrun xà ita kîn, ne ahna me hakry. Ne pea pahhi te cuprÿ ata mã harkwa to:

— Wa ite me gàkrun xà ata kînti jahpan xà na, gapacta ne ampo na ihpräm xà ata na iwÿ, wa ha itÿj me akampa ne amă cugō — hajÿr. ²³ Mă cuprÿ ata xà ne kampa. Mă pahhi te hipêr cumă amji ton ne amji ton tu ne cumă:

— He ampeaj kam! Ca ha ijàhcukrêj jîkjê na ahwÿ, wa ha itÿj amă cugō! — hajÿr.

²⁴ Mă cute impar ne ma inxi pê Herotijkwÿj ata wÿr tē ne cumă:

— Ampo na mã wa ha ahwÿ? — hajÿr. Mă inxi cumă:

— Ca ha cumă: “Ajpên ca ha imă Jowăw pê me cumrăr catê kră to tē, crat kam” hane — hajÿr. ²⁵ Mă hacpÿ ma mã hÿjarêan kam, cute amji jaxàr ne pahhi mã:

— Ajpên ca ha imă Jowăw pê me cumrăr catê kră to tē, crat kam — hajÿr. ²⁶ Mă Heroti te impar ne cumă amji kîn nare, ne nee cumă Jowăw curan to präm nare. Ne cute me kam mare mã amji ton ita kam, ihpahàm cupate, cute ihcuran na harkwa hydr. ²⁷⁻²⁸ Mă pyt jÿr xà ata kam, cute krăhtare pê hamăr catê ata kujahêc ne cumă:

— Hacjên xà wÿr tē ne ajpên cumă Jowăw kră jakep, ne crat kam to tē — hajÿr. Mă krăhtare ata wrÿc ne ma

hacjên xà wÿr tē, ne cute Jowāw krā Jakep, ne crat kam to tē ne cahāre mā hōr. Mā cute inxi mā hōr. ²⁹ Mā Jowāw kōt me ipa catêjê atajê te ihtyc xà ata jarēn par, ne ma me hacjên xà wÿr me pra, ne cute me hī pÿn ne cute me harēt. Hōhō, pê Jowāw pê me cumrār catê tyc xà ita hane. Cwÿrjapê pê Heroti Jeju to amji mā Jowāw xwÿ te hacpÿ mā ihtīr na ihcāmĵ.

Pê me hà me Jeju kà jahkà cyt atajê cunea impej pyrentu

Macô 6.53-56

⁵³ Mā cute Hūm carōt kōt hàpēn xà pihho ata ton, ne ame harte jirō pê Jeju me, ihkōt me ipa catêjê me, ma Hīpōjajo jīkĵ rūm, pjê japrÿ te Pīrā jō pjê ata wÿr me irēr, ne curia cute me pâr kre mā hē, cō tohkà na. ⁵⁴ Mā pâr kre pê Jeju cator, mā me hàhtōti atajê te me Jeju pupun pyrentu. ⁵⁵ Mā pea curia pjê ata kam cute me amji rēc, ne ihtÿj krī cunea kōt me hà catêjê kōt ame pra. Ne ma me hà jikwa xà kam me cunō, ne me ahna ahwÿ ne ma curi, por cute me Jeju jàhhuc xà na, jū ri me hahkre pej xà ata wÿr me to pra. ⁵⁶ Pê krī jacot me krī cunea kōt ipa xà ata ri pê ajco hān ne prya kam, cumā me hà nō, ne me cumā Jeju na ahwÿ, ne ajco me cumā:

— Cama amji na me ijamā, wa akà jahkà cyt — hane. Ne por mehcunea te me Jeju kà jahkà cyt atajê cunea mempej pyrentu.

Pê Jeju curê xwÿn catêjê ihkēn mā me mēn prāmte, mehcukij

Macô 7.1-37

7 ¹⁻⁴ Pê Parixēw catêjê kwÿ me, cute me cumā Mojxe xwÿ jō kàhhōc to me hahkre catêjê atajê me, Krīpinkrēn pīn me cato. Pê Parixēw catêjê ajco Juta catêjê cunea mā mam cute ampo to me hahkre xà atajê to ihhimpej. Na quē ha menquêtjê te me to amji pyrác xà te me amji ton xàa kōt, me hàpàn curê, ne mam me amji mā ampi ne hūhkra cuhhō, ne cormā me apà. Ne por me hō japrōr xà pīn cute me ampo xō japrōr atajê, quē ha cute mehkur xwÿjrea na cuhhō. Ne cormā, rÿ pēa mā cute ampo to me amji pyrác xà atajê ton to me ipa, ne mehkōm xà cuhhōn xà ata na mehcuhhō, ne me pjê te pot cuhhō, ne wakÿre te me hàwmrō xà atajê cuhhō. Parixēw catêjê atajê kwÿ te me Jeju kōt me ipa catêjê nō ata te menquêtjê te me amji pyrác xà ata kōat nee hūhkra cuhhōn pej nare kam, ahnaa hàpàn na me hōmpun. Por pê Parixēw catêjê ajco ahna me cumā awjahkre ata kaj na, cute ton. Mā cute Jeju na me cuprōn ne mehkra.

⁵ Mā pea Mojxe xwÿ jō kàhhōc to me cumā hahkre catêjê nō te Jeju mā harkwa to:

— Ampo na mā ajte akōt me ipa catêjê nee me panquêtjê te ampo to me amji pyrác xà atajê kam me hapac, ne ihkōat me hūhkra cuhhōn nare, ne ahnaa me apà? Jū wÿr quē ha cute me hajÿr xà ita kam me Pahpām cajpuaw me — hajÿr.

⁶ Mā Jeju te me cumā harkwa to:

— Pō rūm ri ihhêj ne ate amji kam me gapac xà impej, ne me acaxwām pê me akēanre! Xāmte ampeaj kam pê Pahpām jarkwa to ihcakōc catê japrÿ te Ixaj xwÿ me ate amji kam me gapac xà ita na me garē, ne me ana ihhōc to hane he:

“Mehkwÿ Pahpām mā me harkwa to: ‘Pahpām, apeaj to apej, ne imā akīn’ hane, ne ajte cute amji kam me hapac xà to, ampÿa mā cupê me ipa.

⁷ Ne cute me Pahpām to mehcakōc xà impejti ita kōt hamreare.

Ampo na?

He me cumā me hūmre te amji kam hapac xà to pit mā hahkre to hān ne me ipa,

ne cute me cumā to hahkre xà ata kam, quē ha ihtÿj mehkwy mā mehhêj xia jarēn to:

‘Pom wa me amā ampo to hahkre itajê pê Pahpām te amji kam hapac xà’ hane”.

Hō, pê Ixaj xwÿ me ato hūjarēn to hane.

⁸ — Ca ma ame ihimpej xà caca, ne ajte me aquêtjê te amji kam me hapac xà to pit mā, cute me hahkre xà ata na ca me prām. ⁹ Ca gōtpê jū mā me, ne amji tēte me Pahpām jarkwa himpej xà to ne me hūrē, ne amji tēte me hajo, me ate me aquêtjê te amji kam hapac xàa kōt me apa prāmte.

¹⁰⁻¹¹ — Pê Mojxe harkwa hyr to:

“Amji mā me apāmĵê cupa, ne amji mā me axyrxwÿ cupa, quē ha ihtÿj cute me hūmxwÿ mǎn catêjê curan partu”

hajÿr cakrō, ca ate me amji kam me gapac xà to me amji pyrác xà ata kōt, ajte ajteare mā me cumā to hahkre, ne me cumā: “Quē ha jūm mā ampeaj kam hàhcukrêj, quē ha ihtÿj to hūm me inxi tehcajpa. Nāmri quē ha cute Pahpām jūrkwā jamār catêjê mā, cute hūm me inxi mā ampo jōr xà atajê jōr na, amji to hūjahkre na, quē ha xwahna nee hūm me inxi mā ampo jōr xà atajê nō nare. Ne cama me cumā harkwa to: ‘Wa ramā me Pahpām mā ite ijāhcukrêj ita to ijūjahkre, na wa ha nee amā ampo ata jōr nare’ ” hajÿr. ¹² Ne me ate amji kam me gapac xà ita kam quē ha nee hipêr me hūmjê me, menxyrxwÿ tehcajpar to prām nare.

¹³ — Ca ha ate me hajÿr na, ca ha ma amji tēte ame Pahpām te amji kam hapac xà curê, ate me aquêtjê te amji kam hapac xàa to ate me amji kam me gapac, ne me cumā to hahkre prāmte. Ne ramā ate amji to me hajÿr to me amji pyrác tu, na ca atÿj me ampo itajê cunea ton to me apa — hane.

Pê Jeju ampo te me pahto kēn xà cawpa

¹⁴ Na pê hipêr Jeju me hàhtōa na ahwÿ, ne me cumā harkwa to:

— Ampo to icakōc xà ita na me ipar mā hamāa ne, mǎr ca me kampa. ¹⁵⁻¹⁶ He xà cu me pajō ku itajê,

ihčtj pahte me pahkên ton na me pahto? Hãpà! Pom hãn ne pō rüm me pajarkwa wÿr me pajō pra ne acjêj itajê, nee me pahto kên nare. Ne pom me pahte amji kam me pajapac xà pîn hapôj itajê ri ihtj me pahto kên. Xà me gūpar xà caxuw me amã me gapackre nare? Me ikampa ne ite me amã ampo to icakôc xà atajê kôt hakop to mempeaj ne — hane.

¹⁷ Mã Jeju te me hàhtôti atajê mã ihcakôc jicu, ne me huwahi, ne ma ikre mã hàr. Mã ihkôt me ipa catêjê te hūjarên xà ata na mehckij. ¹⁸⁻¹⁹ Mã cute me cumã harên to:

— Pÿhàpà, me hūmre itajê! Xãmte nee cormã ate me icakôc xà ita na me ipar nare. Me apê me ikwÿ kwÿa cakrô, ca ajte nee ijūjarên xà atajê na me ipar nare. Pom ampo me garkwa mã acjêj ca me ku itajê, quê nee ame ato kên nare. Ampo na? Quê ha nee ate amji kam me gapac xà mã hàr nare, ne atu mã quê ha axà, jirô pê mã quê ha gí pê cato — hajÿr. Por pê Jeju me pajō to hūjarên to hane ata kôt, cu pahtj me pajō itajê cunea ku, ne nee ampo itajê nō ihkên nare na, ramã me pamã hahkre pej. Ne cormã Jeju me cumã:

²⁰⁻²¹ — Ne por quê ha jūm te amji kam hapac xà pîn ampo cato ata, quê ha jūm ata to kêanre ne. Ampo na? Cute amji kam me hapac xà ata pîn, quê ha cute ampo to amji kam hapac xà kêanre ata cato. Atajê pê ri cute amji kam hapac xà kên me; ampo kam me pahpahàm kêanre ata me; me hàhkj me; me hàhcuran me; amji pê mehprō caxun me; ²² cute mehpor me, me hàhcukrêj kîn me; mehkwy to kên xà caxuw me hū na hàhtat nare me; mehhêj xi me; mehpahàm nare me; hū na amji mã ampo kîn me; mehkwy mã mehkwy to mehckôc kên me; amji to me hàmra me; mehkra nare me. ²³ Ne ampo itajê quê ihtj ate amji kam me gapac xà cunea pîn hapôj, ne quê ihtj me ato kêanre — hane.

Pê cahj cahkrit nō amji tehcajpar xà na Jeju na ahwÿ

²⁴ Jirô pê, pê ma Jeju krí pê cato ne mō, Kên jō krí pu na pjê ata wÿr. Ne pea ikre nō ita mã hàr, ne tee ame hàhtôti atajê pê amji to ipimxur to hahkre, ne jū wÿr quê amji mã hamã ne amxu. ²⁵ Pê cahj nō pê ihkra cahj kam, me pahcurê xwÿnti carō kên ata te Jeju jarên par. ²⁶ Cupê kríxàre pê cōxwa cahê na Xiri jō pjê catêjê nō, ne nee cupê Juta catêjê nō nare cakrô, mã ma hÿrmã tē, ne cuna mã ihkôn krã na hÿr ne ahna hàhwÿr ne cumã:

— Ikra intête ampo carō kên ita capa — hane.

²⁷ Mã Jeju te cahj ata capi prãmte cumã:

— Ite ato hajÿr xà ita na ihkaj na. Ampo na? Nee apê Juta catêjê nare, ne acahkrit, cwÿrjapê ri apê roap pyrãc. Ne wa ite mam mehkra mã harte xà caxuw wa ajpên me hÿrmã mō, ne nee rop mã mam ite harte xà caxuw wa ajpên me hÿrmã imōr nare — hajÿr.

²⁸ Mã cahj cumã:

— Ýhÿ pahhi, he ampeaj kam ri icahkrit ne Juta catêjê kînte ipê roap pyrãc cakrô, wa itj hanea ana prãm to prãm. Pom quê hãn ne ahkrare hàpàn xà pê ampo krut cupa mã ajhu, mã rop krare cuku, ita jikjê na ite

hajÿr. Na wa ate itehcajpar xà kênre ita na ahna awÿ — hane. ²⁹ Mã Jeju cumã:

— Ate acakôc xà ita ton, cwÿrjapê gapacta ne amji jaxà gūrkwa wÿr, ne ramã me pahcurê xwÿn carō kên, akra cahj ita pê cator — hane.

³⁰ Mã ma pyjê nō ata te amji jaxàr, ikre wÿr, ne cator. Ne cute me hikwa xà kam ihkra pupun, mã ihtj nō, mã ma cupê me pahcurê xwÿn carō kên cator.

Pê Jeju jūm xūmre japac tu caprã

³¹ Jirô pê mã ri ma Jeju krí pê cator ne mō. Ne ma Kên jō krí jō pjêa na mō, krí atajê kôt, ne Teppro jō krí na mō. Ne cute Krítetj jō pjê jakren, ne ma Hÿpôjajo jō pjê na cator. ³² Mã jūmjê itajê te Jeju wÿr me jūm xūmre japac tu, ne nee ihcakôc pej nare ata to me cator. Ne cute Jeju na me hàhwÿr, quê ahna hūhkra xi ne to impej.

³³ Mã Jeju te me hàhtôti ata pê to cator, ne pea cute hūhkrahi to ajpên cuna mã hapac jūjê. Ne cute hūhhi kam harcô mên, ne cute harcô ita to hūmre ata jōhto cupên. ³⁴ Jirô pê mã ri kàj mã, cōjkwa wÿr irít ne cute higêc mên, ne Juta catêjê jarkwa to cumã:

— Epata! — hajÿr. Ita jūjarên xà te: “Amji jihê mẽ, ne akre!” ³⁵ Me ajkaam mã, hapackre ne hōhto jiro, mã cute ihcakôc kam ihtem pyrentu, ne nee hipêr ihcakôc kên nare.

³⁶ Mã Jeju te amji jarên tète me cumã harkwa to:

— Nee ame cumã ijarên nare — hajÿr cakrô mã tàkamrÿ cute me harên to cati to mō. ³⁷ Ne por pê ajco me harên pa atajê to pê ajco me amji mã ajkra, ne ajpên mã me harên to:

— He cumã ampo pej cunea ton jahkre pej, na ri ihtj to, ne me to impej! Ne ihtj hacpÿa mã me hapactu jūpar na me to, mã me awpa, ne jū mã me ipêrkê to, mã hacpÿa mã mehckôc! — hane.

Pê Jeju hipêr me cumã harte

Macô 8.1-26

8 Mã me ahna amcro jãhtô nare, mã ma pō kam, mūhÿràn me hàhtôa ne cute Jeju na me cuprôn. Ne me hàpàn xà caxuw ampo hamreare xà ata kam, mã Jeju te ihkôt me ipa catêjê mã:

² — Ampeaj kam imã me caprã xà. Ampo na? Ramã ikôt ame ipa ita to cute me amcro to incrê, ne pōti ita kam me cupê me hàpàn xà caxuw ampo hamreare.

³ Wa me hàpàn nare kam me hūrkwa wÿr ame cucrà, quê ha pry cahti ri prãm ame curê, nãmri mehkwy hūwrya pîn me hapôj — hajÿr.

⁴ Mã ihkôt me ipa catêjê te mehckij ne me cumã:

— Jō ri wa pō ita kam, me hamreare ita kam me hàhtôti itajê mã harte xà caxuw me hō nō mã me ica to? — hajÿr. ⁵ Mã Jeju me cumã:

— Jū mã ri me amã kwÿr te pro jãhtô na cute? — hane. Mã me cumã:

— Imã kwÿr te pro te xet — hane.

⁶ Mã cute pjê kam me hàhtôti atajê jÿr na me cumã hūjahkre, mã me hÿr. Mã cute kwÿr te pro te xet ata

cwÿr, ne to Pahpãm mã hÿrên hakryti to ihcakôc. Jirô pê mã ri cute me cumã ihkryj par, ne ihkôt me ipa catêjê mã hÿr, mã cute me cumã to ipicràn par. ⁷ Ne hanea ne caxuw tep xêt nõ atajê, mã Jeju te to Pahpãm mã hÿrên hakryti to ihcakôc, ne ihkryj ne ihkôt me ipa catêjê mã hÿr. Mã hanea ne cute me cumã to ipicràn.

⁸ Mã mehcunea jàpàn kênre nare, ne ame harte. Mã cormã ihkôt me ipa catêjê te ihcahur jàhhuc itajê to me kàhà to xet ne me to hipu partu. ⁹⁻¹⁰ Ne pê me apà atajê pê me hàhtô na me mir to cwat. Mã ma Jeju te mehkujahêc par, jirô pê mã ri pàr kre mã hâr, ihkôt me ipa catêjê me, ne ma Tarman jô pjê wÿr cô ita na me irêr, ne me cator.

Pê Pariêw catêjê kwÿ me Jeju te ampo pihho catia ton ne me ahna ahwÿ

¹¹ Mã Parixêw catêjê kwÿ hÿrmã cator, ne cute me Jeju te ampo pihho catia ton na me ahna hàhwÿr kam ihtêm. Ne nee mã cute amji mã me to ihhimpej xà caxuw amehcukij nare. Ne cama cute mehkên mã mên prãmtè ri amehcukij, ne me cumã:

— Mêr me imã còjkwa pÿn ampo pihho catia to, wa ha me hÿmpu, ne cormã me Pahpãm te me iwÿr akujahêc na me gahkre pej — hajÿr. ¹² Mã Jeju te caxwãm catia mã incaca mên, ne me cumã harkwa to:

— Ampo na mã ca me akwÿ mea mã, ite ampo pihho catia ton na me ina gàhwÿr to ame apa? Wa ramã ite, me ate amji mã me ito ahimpej nare na me gahkre pej. Cwÿrjapê wa ha nee me amã, ate ampo pihho catihti na me gàhwÿr xà itajê nõ ton nare — hajÿr.

Pê Jeju apu ihkôt me ipa catêjê mã

¹³ Ne ihkôt me ipa catêjê me pàr kre mã me hâr, ne ma hacpÿ mã hípô jÿkjê wÿr me to tẽ. ¹⁴ Mã ihkôt me ipa catêjê te me kwÿr te pro to me hapac kêt, ne pyxit peaj ne pàr kre mã me to hâr. ¹⁵ Mã Jeju te me cumã mehcapa to:

— Co he, ma amji na me Parixêw catêjê me, pahhi Heroti jô kwÿr te pro to me guphêa ne! — hajÿr.

¹⁶ Mã ihkôt me ipa catêjê te ita to ajpên mã mehcakôc kam ihtêm, ne me ajpên mã:

— Pahte me kwÿr te pro nõ pyr nare, na ri apu hÿjarên xà ita to hane — hajÿr.

¹⁷ Mã Jeju te mehcakôc xà ita na me hahkre pej, ne mehcukij to:

— Ampo na mã ca me apê kwÿr te pro nare ata na ame ajpên cukij to ame apa? He xà ajkÿ me apê ijÿjarên xà ita par kôt hakop jahkre kêatre? Xà wa ajkÿ amji jarte to pit mã amji japackre to ipa prãm? Ampeaj kam ate me ampo par xà itajê cunea na me akrã tÿj. ¹⁸ Xà nee me arÿt xà caxuw me ato nare? Ne nee me gapac nare, me gÿpar xà caxuw? ¹⁹ He xà ca nee ajte me kwÿr te pro te xÿc to, ite me hàhtôa mã harte xà ata na, me ito amji japackre nare? Jÿ mã ca ate mehcatur to me kàhà to me hipu ton? — hajÿr. Mã me cumã:

— Kàhà te tôxi — hane.

²⁰ Mã hipêr cute mehcukij to:

— Ne por wa ite mam me hàhtôti te me mir te cwat mã kwÿr te pro te xet kryj xà ata, jÿ mã ri ihcahur na kàhà jàhtô na cute, ca ate me to hipu? — hajÿr. Mã me cumã:

— Kàhà te xet — hane. Mã Jeju me cumã:

²¹ — Mêr hÿhÿ, xà ca ajte cormã nee ite me amã Parixêw jô kwÿr te pro jarên xà ita jahkre pej nare? — hane. Mã cormã ihkôt me ipa catêjê te Parixêw te amji kam me hapac xà kên pê kwÿr te pro cawpa xà ata na me hahkre pej.

Pê Jeju into tÿm caprà

²² Jirô pê mã ri Jeju me, ihkôt me ipa catêjê me, ma krÿ jacot pê Tep jô krÿ mã me cator. Mã curi catêjê te me jÿm to tÿm japrôr ne hÿrmã me to cator, Jeju te ihcupên prãmtè. ²³ Mã Jeju te into tÿm ata jÿhkra na ipyr, ne ma krÿ pê to cator. Ne cute hÿmre ata to na harcô to ihtêm, ne ahna hÿ xir ne cumã:

— Xà ca atÿj ita caxuw ampo pupu? — hajÿr. ²⁴ Mã hÿmre ita rÿt ne apu rÿt, ne cute cumã harkwa to:

— Wa itÿj me hÿmpu, ne cama me hÿmpun xà ita pê ihhê rÿm me hÿmre pê pÿ pàr te ipa pupun — hajÿr.

²⁵ Mã hipêr Jeju te into na hÿ xir. Mã pea hÿmre ata rÿt pej, ne capràr, ne ihtÿj ihcunea na irÿt pej. ²⁶ Ne ma cute krÿ pê hÿmre ata kujahêc, hÿrkwa wÿr, ne cumã:

— Tẽ ne nee hacpÿ ne Tep jô krÿ wÿr amji jaxàr nare — hajÿr.

Pê Jeju curê xwÿn catêjê ihkên mã me mên prãmtè hipêr ihcukij

Macô 10.2-12

² Mã ma Parixêw catêjê kwÿ Jeju wÿr me mÿ, cute ampo na mehcukij prãmtè. Ne nee mã cute me ampo jahkre pej prãmtè hÿrmã me mÿr nare, ne cute me Jeju te ihcakôc xà nõ to ihcupan na me ton to prãmtè ri, hÿrmã me mÿ. Ne hÿrmã me cator, ne me cumã:

— Xà cu ha ajkÿ Mojxe xwÿ te me pajapackre xà ata kôt, pahtÿj me pahprô mã me hikra? — hane.

³ Mã Jeju te mehcukij to:

— Jÿ mã pê Mojxe ita na ihhÿc to? — hajÿr.

⁴ Mã me cumã:

— Pê Mojxe me pamã to hahkre to hane he: “Ca ha aprô mã hikran prãm, ne ate cumã hikran xà na cumã ihkàhÿc to, ne cumã agÿ, ne atÿj jÿ kam ihkujate” — hane.

⁵ Mã Jeju me cumã:

— He me akrã tÿj, ne me gÿpar nare kam pê Mojxe me gapackre xà ita to hane. ⁶⁻⁸ Ne rÿ pèa mã, mam Pahpãm te pjê ton xà ata kam, pê mam hÿmre to ne ihkôt cahÿj to, ne ajteare mã quêt harên to hane he: “Quê ha ita caxuw me hÿmre menxÿrxwÿ me, me hÿmjê jicu, ne me hikwa tuw, ne ma mehprô wÿr me rê, ne mehprô me, me ajcaxê, ne ajpên kam me pyxit peaj” hane. Cwÿrjapê ri nee ita caxuw Pahpãm mã ajpên kam me ipijakrut nare, ne ajpên kam me pyxit peaj. ⁹ Cwÿrjapê quê nee Pahpãm te ajkam me to

cuprôn ne me to pyxit peaj ata to, hipêr ajpên pê me ipicapôn xà nare — hane.

¹⁰ Ne Jeju te me cumã hũjarên to hajÿr jirô pê mã, ma hacpÿ mã ikre wÿr, ihkôt me ipa catêjê me, me mō. Ne ikre mã me hàr, mã ihkôt me ipa catêjê te me hahkre pej prãmte ahna mehcukij. ¹¹ Mã Jeju me cumã:

— Ýhÿ, quê ha jũm xũmre híxi mã hikra, ne ajteare mã cahãj nõ me hikwa na, quê ha ramã híxi ata cuna mã ihkên xà ton ata kôt, Pahpãm mã cupê cute amji kam hapac xà kam inxyre kêanre atajê ton catê.

¹² Nare quê ha jũm cahãj te impjên mã hikran, ne ajteare mã jũm xũmre me hikwa na, quê ha ramã impjên ata cuna mã ihkên xà ton ata pê Pahpãm mã, cupê cute amji kam hapac xà kam inxyre kêanre atajê ton catê — hane.

Pê Tijac me Jowãw me amji to cati prãmte amji mã Jeju na ahwÿ

Macô 10.35-45

³⁵ Jirô pê mã ri Tijac me Jowãw pê Xeptew kra atajê mehkwy pê ampÿa mã, ahte Jeju wÿr me hàhtêp, ne me cumã:

— Me ijō Pahhi, ate amji kam gapac xà na, ite me ana ijãhwÿr xà kampa, ne nee me ipê jũ mãn nare ajco — hane.

³⁶ Mã Jeju me cumã:

— Ampo to wa ha me amã? — hane.

³⁷ Mã me cumã:

— Ca ha amcro nõ na ate pjê cunea to ahimpej xà caxuw gÿr xà catia carôt tÿjti ata kam jÿ, ne ca ha pijamã amji na me inō jamã, wa ha me inō acahê na awpôc rũm jÿ, ne me inō awke rũm jÿ, ne acahê na me ihmpej! — hane.

³⁸ Mã Jeju me cumã:

— Pom ca ate ampo na me gãhwÿr xà ita, ca ate nee me hahkre pej nare kam, atÿj ahna me iwÿr. Xà ca ha ajkí atÿj icuxà me ikên xà itajê mã me awcanã? Ýhÿ, wa ha ihmpej xwÿjrea na itÿj amji pupun xà kêanre to amji pupu. Ne por ite amji pupun xà kêanre ata pê ihhêj rũm ite ampo kêanre te ito kên xà to ite ikôm, ne kam amji cumrãr xà ata — hane.

³⁹ Mã me cumã:

— Wa ha itÿj me awcanã — hane. Mã Jeju me cumã:

— Ampeaj kam ca ha atÿj icuxà me amji pupun xà kêanre to me amji pupu. ⁴⁰ He wa nee pa me amã jũ mãn nare, nãmri ramã Pahpãm te amji mã icahê na mehkri ne mehhimpej catêjê atajê capi, ne por cute amji mã jũmjê capi atajê mã quê ha ihkri xà itajê jahkre, quê ha kam mehkri — hane.

⁴¹ Mã ihkôt me ipa catêjê kwÿ te me ita par, ne ame Tijac me Jowãw kam mencryac to amencryc. ⁴² Mã Jeju te amji wÿr mehcunea to cuprôn ne me cumã:

— He me amã pjê ita kam kríxàre jō pahhi catêjê te kypê mehkwy to ihmpej nare na, me hahkre pej.

⁴³ Na wa ha intête me amã, mãr quê nee jũ caxuw me akam ampo itajê nõ hajÿr nare. Nãmri quê ha me anō mã amji to acati to prãm na, ca ha me akwÿ cunea mã

gápên to apa. ⁴⁴ Ne por quê ha mam jũmjê mã amji to prãm atajê, quê ha nee pahhiti na me amji to prãm nare, ne quêt amji to cama mehcunea mã hàpên catêjê.

⁴⁵ — He nee jũm xũmre te ito impejti xà caxuw wa ajpên pjê ita wÿr, ipê me Ahàkà cati te me hũmre na amji ton, ne iwryc nare. Ne quêt ite me atehcajpar prãmte wa ite amji to me akritxwÿ, ne me gaxà kam ityc xà caxuw, wa icator, mãr wa me hàhtôa ne me hÿtã ne me to impej — hajÿr.

Pê Jeju pĩxô pàr nõ ata crô

Macô 11.12-14

¹² Ne jũ mã me ahna amcro te, mã ma hacpÿ mã Mehkênupunxà jō krí pín cute me amji jaxàr ne me mō, mã ramã Jeju mã prãm. ¹³ Mã ampÿa mã cute pĩxô pàr nõ hōncoti pupun, ne ma hÿrmã mō ne cator, cute ahna hō japên prãmte, mã ahna hō nare. Pê cor-mã hō xà kaj na, na pê nee hō nare. ¹⁴ Mã Jeju te harkwa to pĩxô pàr ata crôn to:

— Quê ha nee hipêr jũ caxuw jũm apàr xō nõ krêr nare — hajÿr. Mã ihkôt me ipa catêjê te incrôn xà ita na mempar.

Pê Jeju pĩxô pàr crôn ata incrà tu ne xa

Macô 11.20-26

²⁰ Mã apê mã iràrà na, ma hacpÿ mã Jeju me ihkôt me ipa catêjê pry ata kôt me mō, pĩxô pàr ata na, ne cute me hōmpun, mã harê mea mã incrà tu ne xa.

²¹ Mã Petrô te pĩxô pàr crà ata pupun, ne Jeju te cumã harkwa hyr na to amji japackre ne Jeju mã:

— Ijō Pahhi, hōmpu he, mãr ca ate pĩxô pàr crôn ta, incrà tu ne xa he — hajÿr.

²²⁻²³ Mã Jeju cumã:

— Ita to amji japackrea ne he, ca ha ate ampeaj kam Pahpãm to amji mã ahimpej na, ca ha hàhkà jakôtti ita mã garkwa to: “Amji capa, ne cōxwa kam amji to awcapê” hane, quê ha hàhkà jakôtti ata ihtÿj akampa, ne garkwa kôt amji capa ne amji to awcapê. Ýhÿ, ca ha ate gũjarên xà ata kam ramã amji caxwãm pê amji mã:

“Wa ramã ite Pahpãm te ita to hajÿr to prãm na hahkre pej” hajÿr na, quê ha ihtÿj garkwa kôt amji to awcapê. Nãmri ca ha ate gũjarên xà ata kam, amji mã: “Mōrmō Pahpãm mã ajkí ita na to prãm nare, mōrmō ajkí ahna cumã to prãm” hajÿr na, quê ha nee apar nare.

²⁴ — Cwÿrjapê wa me amã awjarê, ca ha me Pahpãm mã acakôc ne ampo na me wÿ, ne atÿj cute me amã hōr na amji mã me to hajÿr pyrentu, mãr quê ihtÿj me amã cugô, ca ha me acwa. ²⁵ Ca ha hãn ne Pahpãm mã me acakôc kam pra, ne atÿj jũm te me anō to kên xà atajê jicu, ne to tojnō, mãr quê cōjkwa kam Inxũ Cati jÿ ata hanea ne, me acuxà, ate me akên ton atajê cunea jicu, ne to tojnō. ²⁶ Nãmri ca ha ate me jũm te me anō to kên ata to tojnō nare na, quê ha Inxũ Cati, cōjkwa kam ihkri ata, me acuxà, nee ate me to kên ata-jê to tojnō nare — hane.

Pê Pahpãm ampo cunea jamre xà jô amcro jahkre pej

Macô 13.32-37

³² Jeju te pjê jamre na harên jicu xà to:

— Nee jũm mã amcro me, caxwa me, pyt jÿr xà nõ jahkre pej nare, Inxũ te amji mã ihhyr xà ata na. Ne nee cõjkwa kam cumã me hàpên catêjê nõ me, ipê ikra mã, cute amji mã amcro hyr xà ata jahkre pej nare. Ne Inxũ pyxit peaj mãri cute amji mã amcro hyr xà ata jahkre pej. ³³ Cwÿrjapê ca ha me guphêa rũm me apa, ne nee ca atÿj ame apa nare, ne ma me amji jamãr to me apa. Ampo na? He nee me anõ mã hõ amcro ata cator xà jahkre pej nare.

³⁴⁻³⁵ — Quê ha ihhêj rũm me Ahàkà cator xà ata pê jũa kam, hũwrya kam me hũmre nõ tẽ, ihtêm xà ata to

ihhtëm pyrãac. Ne ihtêm xà ata wÿr, quê ha ahpÿanre na cumã me hàpên catêjê mã, me hàpên xà jõr partu. Ne pea hũrkwa jamãr catê mã harkwa to: “Ma ijũrkwa ita jamã, nãmri me apê hacpÿ ne icator xà na ijahkre kêatre, mõrmõ wa ha pyt kam icato, nare, wa ha caxwa picapôn kam icato, nare wa ha awcapàtkô cahtiri icato, nare, wa ha iràràtia na ajkĩ icato” hane.

— He me apê ikre jamãr catêjê atajê pyrãac, ne ipê ikre jô pahhi ata pyrãac. Cwÿrjapê ca ha me gũjamãr pejtì to me apa, ne ma me ijikaj. ³⁶ Ca ihhêaj to me ijikaj nare kam, wa ha krãa me awÿr icato, ne nee me gõt na icator, ne me gõt na me apupun nare! ³⁷ Ne pom wa amã awjarê ita, wa nee apyxit peaj mã harên nare, wa mehcunea mã harê, ca ha nee atÿj ame apa nare, ne ma me amji jamãa ne! — hane.

RUC

Ÿhÿ, pê rÿ pëa mã Pahpãm pjê ita wÿr cumã ihkra pyxit peaj ata kujate, pê cõjkwa pÿn wÿr, ne ita ri, pjê ita kam apu ipa, ne haprÿ pê Jeju.

Mã me hÿmre te cwat itajê te ahna me ihhõc. Ne cute me ihpÿm xà me, ihkà to mõr na me ahna ihhõc. Ne hanea ne cute me cumã ampo to hahkre xà me, cute me hapackre xà me, cute ampo cunea ton atajê na, ahna mehhõc. Ne me hÿcu xà kam, cute me ihtyc xà me, hacpÿa mã ihtÿr xà me, hacpÿa mã cõjkwa wÿr hàpir xà na me ahna ihhõc par.

Ne cute me cwat te me ahna ihhõc itajê japrÿ te, Matew me, Macõ me, Ruc me Jowãw. Ne caku crê kam Matew me Jowãw Jeju kôat ame ipa. Ne cute mento jÿa to me Jeju te ampo ton atajê cunea na me hõmpun. Ne cute me hapackre xà atajê cunea na me kam hapac par, ne ahpÿanre na, me hõ kàhhõc kam, me Jeju te amji kam hapac xà pejti na mehhõc par.

Ne Macõ pê Petrõ pê Jeju kôt ipa catêjê nõ ata jõ ikwÿ nõ. Ne cormã intuwre ita kam, nee cupê Jeju kôt ipa catê nare cakrõ, ihtÿj ampÿa mã cumã hahkre pej. Mã Petrõ te hõtpê catÿt kam ihcunea na cumã Jeju jarën par, mã cute harën par xà atajêa kôt, cute hõ kàhhõc kam ahna ihhõc par.

Pê mehkiñte Ruc nee into jÿa to me cuxà Jeju pupun nare cakrõ, pê ihtÿj ajco Jeju jahkre pej pejtu catêjê atajê cukij, ne cute me cumã Jeju jarën xà kôt, hõ kàhhõc kam ahna ihhõc.

Ne Ruc me Jowãw te hõ kàhhõc kam me Jeju na ihhõc itajê cunea, wa ramã me ite mehÿ jarkwa wÿr ihcunea to me ipintuw partu, cwÿrjapê ca ha gapacta ne atÿj me cahyt pa.

Ne Matew me Macõ jõ kàhhõc, wa nee me ite ihcunea to me ipintuw nare. Ampo na? He Matew me Marco te me Jeju jarën xà itajê jàhtõa me, Ruc me Jowãw te harën xà itajê pipën pit, na wa ite nee hipêr to ipintuw nare. Ne quêt ajteare mã cute me harën xà atajê, wa ite catÿt kam ihkàhhõc ita kam me to ipintuw par. Ne catÿt kam Ruc jõ kàhhõc kam me to ipicacwÿr. Ne ihkàhhõc japrÿ pê (Ruc).

Ruc te amji jarën xà

1 Taamã Tejopir, ipê Ruc, pa wa Jeju na amã ihhõc. Pê ampeaj kam me hàhtõ ne hãn ne Jeju na, ame ampo pupu atajêa na mehhõc to me ipa. **2** Pê mam cumã kat kam jÿmjê itajê ampo cunea pupu, ne ajco mehcuea mã ampo itajê jarën to me ipa. Ne cute me imã ampo itajê cunea jarën. Na wa ite ampo itajê cunea na amã ihhõc.

3 Ÿhÿ, pahhi Tejopir, wa ite amji mã iprÿa ne ampo itajê to hahkre. Ne ampo itajê ri, cute mam, cumã kat kam, mam me hõmpun xà. Ita cwÿrjapê ri ahna imãa impejti, na wa catÿt kam ite ihcunea na amã ihhõc to impejti. **4** Ihhêj ne ramã jÿm te amã ampo itajê to hahkre. Na wa ite ita kam ahna amã ihhõc, ca ampo itajê cunea pupu ne hahkre pej pëa ne, nãmri ampeaj kam ri.

Me cumrãr catê pê Jowãw pÿm xà to hÿjahkre xà

5 Ÿhÿ, pê cormã Heroti pê pjê jõ pahhi, Juta jõ pjê kam, pê curi Pahpãm mã mehcajrën catêjê nõ ita japrÿ pê Xacarij. Pê cupê Apij xwÿ kwÿ kwÿ nõ. Ne hÿxi japrÿ pê Ixapewkwÿj, ne cupê Arãw xwÿ tàmwxwÿ tàmwxwÿ nõ.

6 Ne pê ajwar catÿt kam me ipa, ne mempejti to me amji kampa, Pahpãm cuna mã. Ne ajco me Pahpãm jarkwa cunea kampa. **7** Ne pê Ixapewkwÿj ita ihkra

nare. Ampo na? Pê hahÿm ita na ipa, ne ramã ajwar mehwejtu.

8 Mã hamre, Apij xwÿ kwÿ jàpên xà jõ amcroa kam hàhhuc, mã Xacarij Pahpãm cuna mã apu hàpên to mõ, Pahpãm to amji kam hapac xà jÿrkwa kam. **9** Mã jÿm ita te Xacarij capi, hàr ne cute Pahpãm cuna mã ampo kÿm cuxwati ita mã haxàr, mã cute caxàr prãmte. Ata to pê Pahpãm mã mehcajrën catêjê kwÿ hãn ne ame. Mã hamre, ma hàr, Pahpãm to amji kam me hapac xà jÿrkwa caxwãm pê. **10** Mã jÿmjê atajê jàhtõa ne cute me cuprõn, ne põ pê me xa, ne Pahpãm mã mehcajõc. Mã Xacarij xàr ne xa, ne apu ampo kÿm cuxwati ata to capa.

11 Mã ihprõt pê, Pahpãm jarkwa to memprar catêjê nõ cõjkwa pÿn cator, ne ampo kÿm cuxwati te caxàr xà ata cuna mã awpõc rÿm xa. **12** Mã Xacarij te hõmpun, ne ampeaj kam cumã hÿpa, ne cupê amji jahkre kêatre, ampo to mõrmõ quê ha ajte. **13** Mã Pahpãm jarkwa to imprar catê cumã:

— Xacarij, nee ca apu icupa nare, ca ate Apãm Cati mã acakõc, mã cute apar. Na quê ha gÿxi mã ihkra xÿmre nõ, ca ha me cumã haprÿ to Jowãw. **14** Quê ha ihpÿm xà ata kam ca ha gakry, ne amã amji kÿn. Quê ha hanea ne jÿmjê hàhtõa ne ame hakry.

15 — Ampo na? Quê ha Pahpãm cuna mã cupê hÿmre catia. Quê ha nee ampo te ame to ipipên xà ata to apu ihkõm nare. Ne quê ha ihpÿm ata caxuw, quê ha Pahpãm Carõ Pejti cumã amji gõ, ne to hipu tu ne, ne

to carôt tÿj. ¹⁶ Ne quê ha Pahpãm wÿr, Juta catêjê jàhtôa ne to amji jaxà, quê ha hipêr Pahpãm to me amji japackre.

¹⁷ — Ne quê ha Pahpãm Erij xwÿ cuxà to ihtÿj, quê ha cupê Pahpãm jarkwa to imprar catê, ne ampo to impej pa, Pahpãm kra cator xà jahkà na. Pom pê Pahpãm jarkwa to ihcakôc catê Erij xwÿ ata mã mam carôt tÿjti gô ata cuxà, quê ha cumã hÿ cunea kam carôt tÿjti gô. Ne hacpÿa mã ajpên na me cumê, quê ha me hÿmjê me, mehkra hacpÿa mã me cumã ajpên kÿn. Ne mehkrã kên atajê, quê ha hacpÿa mã catyt kam me ipa catêjê atajê krã kre te amji jahkre pejti kôt me to impej, quê ha mempej pynã. Ne quê ha hanea ne Pahpãm na mehkwÿ mã, quê me amji to impeaj ne, nãmri quê ha cõjkwa pÿn, Pahhiti cato ata ri, hãn ne me hõmpu — hane.

¹⁸ Mã Xacarij te Pahpãm jarkwa to imprar catê cukij, ne cumã:

— Pÿhàpà, jÿ mã wa ha ajte, ne ate imã harên xà ita to amji mã hane? Jÿ mã wa ha ajte ne hahkre pej, mõr-mõ ajkÿ gÿjarên xà ita ampeaj kam? Ramã iwej, ne iprõ te hajÿar ne ramã ihwej, nõ na mã ca imã ikra pÿm na ijarê — hajÿr.

¹⁹ Mã Pahpãm jarkwa to imprar catê cumã:

— Pÿhàpà, Ipê Caprer. Wa ijõtpê Pahpãm capi na apu ipa, ne cutea ri ikujahêc, wa xa ne amã icakôc, ne amã ampo pejti te hajÿr xà ita jarê. ²⁰ Ca ate nee ite amã harên xà ata na ipar nare, ne quê ha ihtÿj hane, amcro ata kam. Ca nee ate ipar nare, incwÿrjapê ca ha apêrkêc, ne ahnaa apa, quê ha ahnaa amã akra ihpÿm — hane. Ne ma tẽ.

²¹ Mã cormã apu ihkên, mã põ pê me xa atajê cormã me xa ne me Xacarij jikaj, ne me amji mã:

— Pÿhàpà, ampo to mã apu, ne apu ihkên? — hane.

²² Mã cator, ne ipêrkêc ita kam, jÿ wÿr quê ihcakôc. Mã ipêrkêc ita kôt cute me Xacarij te irÿat kam Pahpãm to me amji kam hapac xà jÿrkwa kam, cute ampo pupun ata na me hahkre pej pyrentu, ne jÿ wÿr quê amji mã hamã ne ihcakôc, ne cama hÿhkra to ame cumã ihhimpej.

²³ Ne Xacarij te hàpên xà jipêj, mã hamre, ne hõ amcro jamre, mã cute amji jaxàr ne ma tẽ. ²⁴ Mã ahna ahtÿm nare mã hÿxi mã ihkra ajêc, mã nee põ mã to hapôj nare, ne ahnaa cute amji to putwÿr to xÿc. Mã Ixapewkwÿj amji jarên to:

²⁵ — Hamre, ramã ijahÿm ita na iwej, ne ityc xàa wÿr ajte ikra. Ne Pahpãm te ri itehcajpar ne imã ikra jõr. Ne hamre, ita caxuw, quê ha hipêr nee jÿm imãn nare — hane.

Pahpãm kra pê Jeju pÿm xà to hÿjahkre xà

²⁶ Mã cormã Ixapewkwÿj mã ihkra ajêc, ne ramã ahna putwÿr te xêj, mã Pahpãm te hipêr cõjkwa pÿn harkwa to imprar catê pê Caprer kujahêc, mã ma Hÿpôjajo jõ pjê kam, krÿ nõ japÿr te Naxare jõ krÿ ata wÿr tẽ.

²⁷ Ýhÿ, pê curia cahãj nõ japÿr te Marijkwÿj ita ihkrÿ, ne cormã increcer, ne ramã Joje me ajpên pa, cume hikwa xà caxuw. Pê Joje pê pahhi Tawi xwÿ tãmwxwÿ

tãmwxwÿ nõ. Mã Pahpãm jarkwa to imprar catê te Marij mã Pahpãm jarkwa par. ²⁸ Ne cõjkwa pÿn hÿrmã to cator ne cumã:

— Hàpà Marij! Gakry! Ampo na? He Pahpãm te apej mã amên. Xãmte ihtÿj Pahhiti acahê na apu ipa — hane.

²⁹ Mã Marij te ita par, ne hamre, ihkrã pictor tu, ne amji mã:

— Pÿhàpà, ampo na mã apu imã hane? — hajÿr.

³⁰ Mã cormã Caprer cumã:

— Nee apu pa nare, Marij. Apyrên Pahpãm jakry, na ri cute ato impejti. ³¹ Ne quê ha amã akra xÿmre gô, quê ha harij ne amã ihpÿm, ca ha cumã hapÿr to Jeju.

³² Quê ha cupê hÿmre catia, quê ha me cumã hapÿr krut gô, ne me cumã “Pahpãm Catia Kra” hane. Quê ha Pahpãm acãmter to pahhi, quê ha cupê mam aquêt xwÿ Tawi pê pahhi ata pyrãac. ³³ Ne quê ha hõtpê cupê Juta catêjê jõ Pahhiti ita na. Ne cupê Pahhiti rohnytti mã, ne nee jÿ caxuw cute ihhimpej xà ita cupê hamre nare — hane.

³⁴ Mã Marij Caprer mã:

— Mêr jÿ mã wa ha ajte? Nãmri wa cormã itÿj apu ipa, ne cormã icunÿ — hane.

³⁵ Mã cumã:

— Pom Pahpãm me hirôa pê cati ita Carõ Pejti quê ha amã axà. Ne carôat kôt, quê ha akra. Ita cwÿrjapê quê ha acãmter ita pê Pahpãm kra impeaj, ne ajtea mã, ne impej, ne cupê catyt kam ipa catê.

³⁶ — Mêr hõhõ Marij, pom Ixapewkwÿj pê gÿkjê wej ita, mehcuea me harê, xwahna hahÿm na ipa. Ne ramã ihkra, ne ramã ahna putwÿr te xêj mã ihkra cumã harij ita. ³⁷ Ampeaj kam Pahpãm mã ampo cunea ton jahkre pej, quê ihtÿj me hÿmre nare kam jÿm cunÿ mã ihkra to — hane.

³⁸ Mã hamre, Marij cumã:

— Ýhÿ, ipê Pahpãm mã ijàpên catê. Quê ha Pahpãm ito hane, wa ha ahnaa mã — hane. Mã ma Pahpãm jarkwa to imprar catê tẽ.

Pê Marij Ixapewkwÿj pupu

³⁹ Ita jirô pê mã amcro nõ na, Marij te amji cÿmpej, ne ma hÿjaréan kam tẽ, Juta jõ pjê kam kenti jõ pjê ata wÿr. ⁴⁰ Ne Xacarij jÿrkwa wÿr cator ne hàr, ne cute Ixapewkwÿj cukij ne cumã:

— Hàpà, hàpà — hajÿr. ⁴¹ Mã hamre, Ixapewkwÿj te Marij jõkre par me ajkaam mã ihtu kam ihkra jàhcujrõn. Mã Pahpãm Carõ Pejti te Ixapewkwÿj mã amji jõr, mã cute kÿj cati pèa mã ihcakôc kam ihtêm. ⁴² Ne Marij mã:

“Ýhÿ, quê ha pyjê kwÿ cunea jirôa pê Pahpãm quêt ato impejti ne.

Ne pom akra ita, quê ha hanea ne Pahpãm mehkwÿ jirôa pê quêt to impejti ne.

⁴³ Ne akÿnte icrire. Ampo na? Quêt apê ijõ Pahhiti menxi cakrõ, ca ahnaa iwÿr tẽ ne ate ipupun, ne ampeaj kam apyrên ijakry.

44 Ne ca ate icukij, mã ikra ita hakryte itua kam hàhcujrôn.

45 Ca ate Pahpãm to amji mã ahimpej, cwÿrjapê quê ha ihtÿj amã to, pom cute amã amji jarên xà ita na, ca ha hÿrên gakryti ne" hane.

Marij crer xà

46 Mã Marij te Pahpãm pejti na harên to: "ÿhÿ, wa ha ite amji kam ijapac xà cunea to Pahpãm jarê.

Pahpãm ri quêt cati ne impej.

47 Ne Pahpãm pê ikên pê ito cator catê, na ri hÿrên ampeaj kam ijakry.

48 Mã cute ito amji japackre, ihkÿnte icrire na, ne ipê cumã ijapên catê wa. Ne ita caxuw quê ha mehcunea, pjê cunea kam, Pahpãm mã ikÿn, mã cute ito impej na, me ito awjarê.

49 Pahpãm carôt tÿjti, na ri cute imã ampo catia ne ton. Ne Pahpãm quêt ajteare mã, ne impej.

50 Pahpãm hõtpê me pahcunea caprÿ, pom cu ampeaj kam me kampa atajê ri, ihtÿj me caprÿ.

Mam me panquêtjê me, hapu na me pajÿ itajê me, ne quê ha hapua na me pahtãmxwÿ to hanea ne cumã mehcunea te kam me hapac atajê caprÿ.

51 Pahpãm te hÿhkra to hàpên xà catia ne ton. Pahpãm te, cute amji to me cati prãm catêjê atajê cunea incràn.

Cute hirôa pê amji to me cati prãm catêjê atajê te me amji kam hapac xà mea mã, Pahpãm te menchràn.

52 Pahpãm te me hõ pahhi carôt catihti atajê jÿrên partu,

ne me to ihkryjre.

Ne amji to me cati prãm nare atajê ri, cute me to ihkà.

53 Pahpãm te me cupê hamreare atajê me, me cumã prãmte atajê mã harte, ne me cumã harte kam to incrà tu.

Ne me hakràj catêjê atajê, Pahpãm te hÿ kam amenchràn.

54 Ne Pahpãm pê me panquêtjê mã, mehtehcajpar xà to awjahkre.

Ne hamre, ihtÿj cute me cumã ton, quê ha ihtÿj Juta catêjê tehcajpa.

55 Ne cute Aprãw xwÿ me, ihtãmxwÿ tãmxwÿ caprÿ na amji to amji japackre, por pê ramã ahna amji jarê ata na" hajÿr.

Hõ, Marij te Pahpãm to hÿjarên to hajÿr.

56 Ne cute Ixapewkwÿj cahê na amji to putwÿrÿ to incrê jirô pê ma amji jaxàr, hÿrkwa wÿr.

Jowãw pê me cumrãr catê pÿm xà

57 Mã hamre, Ixapewkwÿj mã ihkra pÿm xà jõ amcro kam hàhhuc, mã cumã ihkra pÿm. 58 Mã cahê na amehkrÿ catêjê me, me hÿkjê me, cute Pahpãm te Ixapewkwÿj to amji kam hapac xà impejti na me harên par. Mã hamre, mehcunea ame hakry, Ixapewkwÿj mea mã.

59 Mã ihkra xÿmre ita na amcro te ôjtô, mã hamre cute me cumã hapÿrÿ jõr xàa kam hàhhuc, ne hanea ne cute mempy kà incire ne me hitep xàa kam hàhhuc. Pê me cupê Juta catêjê incaca xà ita ajteare mã me cumã. Pê ajco me cumã ihkra xÿmre ajhu, pê ajco me cumã impy kà Jakep, mehcunea te me cupê Juta catêjê na me hahkre pej prãmte, nãmri ajteare mã me. Mã hamre, me cumã hÿm japyrÿ pê Xacarij xãm prãm.

60 Mã inxi me cumã:

— Hamreare, hamreare, quê ha hapÿrÿ Jowãw — hane.

61 Mã me cumã:

— Hamreare, gÿkjê nõ japyrÿ te Jowãw nare — hane.

62 Mã cute hÿhkra to hÿm cukij, hapÿrÿ jÿ ri cumã hõr prãm. 63 Mã Xacarij te ihhóc xà na hàhwÿr, ne cute kam ihhóc to hajÿr he: "ÿhÿ, hapÿrÿ te Jowãw" hane. Mã hamre, mehcunea krã pictor. 64 Me ajkaam mã hacpÿa mã Xacarij te ihcakóc kam ihtêm, ne Pahpãm mã ihcakóc, ne cute Pahpãm peaj na cumã harên. 65 Mã cahê na mehkrÿ catêjê cunea mã ampeaj kam pa cati. Mã hamre, apu harên xà ita cahkÿm, Juta jõ pjê kam, kÿnti jõ pjê ata cunea kôt. 66 Mã mehcunea te me ita par atajê, ita to pit mã ame amji kampa, ne ahna me amji cukij, ne me amji mã:

— Pÿhàpà, jÿ mã mõrmõ quê ha hÿmre krare ita ajte? — hajÿr. Ampo na mã ame amji cukij to hane? Pê hirã pê hÿmre krare ita kam Pahhiti carôt catia na pê.

Pê Xacarij Pahpãm jarkwa kôt harê

67 Mã Xacarij pê hÿmre krare ata me hÿm, hacpÿa mã ihcakóc. Ne Pahpãm Carõ Pejti jarkwa kôt cute hacpÿa mã Pahpãm to hÿjarên kam ihtêm, ne harên to:

68 "Hacme, ne me pajõ Pahhiti to me awjarê, por Pahhiti catihti ne impejti pê me papê Juta catêjê Pãm Catihti ata to me awjarê.

ÿhÿ, Pahpãm te me pahtehcajpar prãmte cator, ne cute pahte me to ihcupan xà pê me pahto cator.

69 Pê Tawi xwÿ pê Pahpãm mã hàpên catê, mã Pahpãm te ihtãmxwÿ tãmxwÿ nõ, cute me pahkên pê me pahto hapôj catê na hãm, mã ampeaj kam carôt tÿj.

70 Ne pê ramã rÿ pêa mã Pahpãm ita jarê. Pê Pahpãm jarkwa to me cumã ihcakóc catêjê impejti atajê harkwa na ahna mehhóc pa.

Ne pê Pahpãm jarkwa na mehhôc catêjê ajco ita to me hane.

71 Pê Pahpãm me pahcurê xwÿn pê me pahto cator xà to hane,

ne me pahcurê xwÿn carôt pê me pahto hapôj pa.

72 Pê Pahpãm me panquêtjê mã

jũ caxuw cute me caprí to cator xà ata to awjahkre.

Ne me cumã awjarê,

mãr quê me to amji japackrea rûm me ipa,

ne nee jũ caxuw me to hapac kêt nare.

73-74 Pê Pahpãm me panquêtiti Aprãw xwÿ mã ita to awjahkre,

ne to awjahkre tu.

Ne ampeaj kam cumã harê,

quê ha me pahcurê xwÿn têtê me pahto pôj pa.

Cu ha me Pahpãm mã me apê,

ne nee ame pahcurê xwÿn cupa nare.

75 Ne cu ha Pahpãm mã me pajàpên catêjê na ame papa.

Ne catyt kam ame papa,

ne me pancaca xà impeaj to amji kam me pajapac to me papa,

ne ahnaa Pahpãm krac ri me pajamre.

76 Ýhÿ ikra, hamre,

ca ha jũ caxuw Pahpãm me hirôa pê catia ita jarkwa kôt acakôc catê na apa,

ne ca ha têtê ne me pajô Pahhiti cator xwÿjrea na apu carã pa.

77 Ca ha me Pahpãm krac ri me ipa atajê mã me awjarê,

quê ha Pahpãm nee mam cute ame to kên xà ton ata to amji japackre nare,

ata kôt quê ha Pahpãm mehkên pê me to pôj pa.

78-79 Me Pahpãm jàhcaprí cati, ne cupê me pamã impej pit ton catê,

cwÿrjapê quê ha me pamã hàhcujro gô.

Cu ha me pahte amji kam me pajapac xà impejti pupu,

ne catyt kam me papa,

ne me pampej pëa mã me papa.

Ne me pamã pahtyc cupa itajê,

quê ha Pahpãm me pahpupu ne me pamã incaca xà gô,

cu ha nee ame pahtyc xà ita cupa nare, ne cama me pahcaxwãm pê me pahcarĩcti na me papa" hane.

80 Mã hamre, Xacarij kra xũmre ita ihkà to mō, ne carôt tÿj to mō. Ne pê hanea ne cute amji kam hapac xà cati ne impej to mō. Ne ramã ihkàa kam pê pōti kam me hamreare ata kam ihkrĩ. Ne cormã Juta catêjê mã amji to ajpê.

Jeju pÿm xà

2 Caku ata kam, putwÿrÿ atajê nō na, pê pjê cunea jō pahhiti japrÿ te Xexa Aguxō ita harkwa ta, mehcunea mã, por hō pjê kam krĩ atajê cunea kôt, quê

mehcunea me amji japrÿ nōr pa, ne me amji cahyt, ne me hàhtō na me amji jahkre pej. ² Ne pê mam ramã me amji cahyt, pê Xiren pê Xiri jō pjê to ihhimpej catê ata kam, pê mam me amji cahyt pyxit, ne me hàhtō na me amji jahkre pej. ³ Mã hamre, mehcunea te me amji japrÿ nōr partu, ahpÿanre na me hō krĩa kam, men-quêtjê ihpÿpÿm xàa kam.

⁴ Ita cwÿrjapê ri Joje pê Hĩpōjajo jō pjê kam, Naxare jō krĩ kam, ihkrĩ catê, na ri ma Juta jō pjê wÿr, Pãw jō krĩ ata wÿr têtê. Ampo na? Pê curia inquêt xwÿ pê pahhi Tawi xwÿ ihpÿm, ne cupê ihtãm xwÿa, na ri ma Pãw jō krĩ wÿr têtê, híxi Marijkwÿj me. ⁵ Ne cute me amji japrÿ xir. Ne pê ramã me hikwa na me ajpên pa. Mã ramã Pahpãm Carō Pejti to Marij tictu. ⁶ Ne pê cormã Pãw jō krĩ kam ame mōr reria mã, ramã cumã ihkra pÿm xàa kam hàhhuc. ⁷ Ne cumã ihcãmter pÿm, mã cute cupêhkà to ihcupu, ne pĩ po te crat kam ampo jàpàn xà ata kam hir. Ampo na? Ramã me hàhhuc xà cunea te hipu partu, ita kam, jũ ri quê me ahtwÿ? Cwÿrjapê ri ampo jũrkwa kam me hōt.

Pê carà cahàcre jamãr catêjê Jeju pupu

⁸ Mã pjê ata kam, carà cahàcre jamãr catêjê hōtpê ame hamãr to me ipa. Ne amcro me caxwa kam, hōtpê ame to ipa. Ne caxwa ri, pjê ata kam, pō pê ame hamãr to ame ipa. ⁹ Mã ihprôt pê Pahpãm jarkwa to imprar catê cator, cōjkwa pĩn. Mã hàhcujro pê Pahhiti jàhcujro impejti ata hàhcujro pyrentu, ne ipu na hàhcujrohti, ne ihpràti. Mã cute me hōmpun ne me cumã hũpaa to hũpa. ¹⁰ Mã Pahpãm jarkwa to imprar catê me cumã:

— Nee ame icupa nare.

Wa ite me amã ijũjarên pejti to prãm to, wa me awÿr icator.

Ne wa ha me amã awjarê, ca ha me ijũjarên xà ita kôt, ca ha me gakry, quê ha ampeaj kam mehcunea mã amji kĩan to amji kĩn, me cati me, mehkryjre me, quê ha mehcunea mã amji kĩan to amji kĩn.

¹¹ Ýhÿ, ita kam, caxwa ita kam, me gō Pahhiti pê me akên pê me ato hapôj catê pÿm, Tawi xwÿ jō krĩ kam.

Ne cupê, por pê Pahpãm me amã to awjahkre ata.

¹² Ne ampeaj kam ca ha ita kam me hōmpu.

Quê ha ahkrare xũmre nō cupêhkà ihcupu, ne ampo jàpàn xà kam nō, ca ha hÿrmã me acato ne me hōmpu, ne me hahkre pej — hane.

¹³ Mã hamre, ihprôt pê cōjkwa rûm Pahpãm jarkwa to memprar catêjê jàhtōa ne hipêr me iwÿrc, ne me hÿrmã me cator. Ne cōjkwa kam mehkĩrĩ catêjê pê me pajō Pahhiti jarkwa to memprar catêjê itajê te me Pahpãm na mencrear kam mehtêm, ne increar kam me harên to:

¹⁴ "Quê ha cōjkwa kam mehcunea jirôa pê Pahpãm pejti ne cati na me harê.

Ne pjê kam, quê ha Pahpãm me to impej atajê, quê ha me caxwãm pê mehcarĩcti ne" hajÿr.

¹⁵ Mă hamre, Pahpām jarkwa to memprar catêjê hacpŷa mă cute me amji jaxàr, ne me hàpir, cōjkwa wŷr. Mă carà cahàcre jamār catêjê, hakàn pê ame amji mă harê, ne me amji mă:

— Hacme, Păw jō krí wŷr, ne Pahpām te me pamă ampo jarên xà ita pupu — hane.

¹⁶ Ne ma me hŷjarêan kam me pra, ne ame hapê, ne Joje me Marij wŷr me cator, ne cute mehkrare pupun, mă ampo jàpàn xà kam nō. ¹⁷ Mă cute me hōmpun, ne ma me pra ne mehcunea mă, Pahpām jarkwa to memprar catêjê te me cumă ahkrare jarên xà ata jarên to me mō. ¹⁸ Mă hamre, mehcunea te mempar atajê te amji mă me ipikrar, ne me amji mă:

— Pŷhàpà? — hajŷr. ¹⁹ Mă Marij apu carà cahàcre jamār catêjê atajê te cumă ampo jarên xà atajê cunea to apu amji japackre, ne to amji japackre ita na. ²⁰ Mă ma carà cahàcre jamār catêjê te amji jaxàr, ne ma me Pahpām pejti, ne catihti na me harên to me mō. Pom Pahpām jarkwa to imprar catê te me cumă hŷjarên xà atajêa na, cute me hōmpun, mă ahnaa. Na ri ame hakry ne ma Pahpām pejti na me harên to me mō.

Pê Jeju mă me haprŷ gō

²¹ Mă ramă ihkrare ata na amcro te ôjtô, mă cute mempy kà incire ne me hitep xàa kam hàhhuc, mă cute me cumă haprŷ jōr, ne me cumă Jeju. Ne haprŷ ita pê Pahpām jarkwa to imprar catê cormă jêt nare kam, Marij mă harê.

Pê Pahpām mă me Jeju gō

²² Ne ita jirô pê mă ri ahna putwŷrŷ pyxit, mă cute me ipijacri xà to hamre xà jō amcro kam hàhhuc. Mă caxuw ma Krípinkrên wŷr me ihkrare ata to me mō, Pahpām to cute me amji kam hapac xà jŷrkwa wŷr. Ne me to cator, ne cute Pahpām mă me ihkrare xŷmre ata pēr ne me cumă:

— Atea ri me imă me ikra ita jōr, ne cupê atekjêa — hajŷr. ²³ Ampo na ri cute me to hajŷr? Pê rŷ pēa mă Pahpām Mojxe xwŷ kôt Juta catêjê mă harkwa ta, ne me cumă:

“Mam me akra xŷmre me hapôj atajê cunea pê itekjê” hane.

Pê Pahpām jarkwa na mehhôc catêjê me ita pa, ne ahna mehhôc pa. ²⁴ Mă cute me Pahpām mă me ihkra pēr, ne harkwa kôt me ipijacri xà to me hamre xà caxuw, cute me Pahpām mă tutti into to me ipijakrut ne me hōr.

²⁵ ŷhŷ, pê Krípinkrên kam hŷmre japrŷ te Ximāw ita ihkrí. Ne ampeaj kam impej, ne ihtŷj ajco Pahpām kampa, ne to amji mă ihhimpej. Ne ajco Pahpām te Juta catêjê kên tēte me to pōj xà jō amcro ata jikaj. ²⁶ Mă Pahpām Carō Pejti apu Ximāw cahê na mō, ne pê ramă Ximāw mă ihtyc xà nare to awjahkre ne cumă:

— Ca ha xaa, por pê Pahpām Juta catêjê mă mehkên pê me to hapôj catê to awjahkre ata pupu, jirô pê ca ha cormă ty — hane. ²⁷ Ne Pahpām Carō Pejti te

Ximāw japrôr ne ma to mō, Pahpām to me amji kam hapac xà jŷrkwa wŷr. Mă Joje me Marij hanea ne ma curi me ihkra pê Jeju to me mō, cute me Pahpām jarkwa kôt me ipijacri xà to me hamre xà wŷr, ata wŷr.

²⁸ Mă Ximāw te me hōmpun, ne ihpa kam ihkrare ita pŷn, ne Pahpām mă harên pejti, ne cumă:

²⁹⁻³⁰ “Hamre, ijō Pahhiti, pê ca ito gŷjahkre xà ata ramă kaam hàhhuc. Ne pê ca ito gŷjahkre xà ata na ate ton, wa ite hōmpun.

Ne atea ca me iwŷr me ikên pê me ito hapôj catê ita kujahêc,

wa ite ito jŷa to hōmpun.

ŷhŷ, ipê amă ijàpên catê,

ne hamre, ramă iwej, ne icaxwām pê icarŷcti, ne gapacta ne ityc na ito tojnō, wa ty.

³¹⁻³³ Ne ca ate mehcunea kam mare mă me ikên catia pê me ipytàr catê ita me iwŷr ihkujahêc. Na quê ha pjê kam mehcunea mehkrí atajê mă hàhcujro catê na ipa.

Ne quê ha me cumă mempejti to hahkre,

quê ha mehcahkrit atajê,

por me cupê Ixaher catêjê nare atajê mă hanea ne ato ajpê,

măr quê me hanea ne me gahkre pej.

Ne quê ha hanea ne me akwŷ pê Juta catêjê pê Ixaher catêjê mă impejti ne.

Quê ha mehcunea me akwŷ jarên pejti to me harê” hajŷr.

Mă inxi me hŷm te Ximāw te ihkra to ihcakôc xà ata na mempar, ne to amji mă me ipikrar. ³⁴ Mă Ximāw te mehcajrên, ne Marij pê Jeju menxi mă:

— Pahpām te akrare incire ita capi.

Ne quê ha akra ita Juta catêjê jō pjê kam me hàhtôa to hōkre nō, ne me to hamre, ne hanea ne me hàhtôa kwŷ to ihkà, ne me to impejti ne, ne ma mehkên pê me to hapôj.

Ne Pahpām te ri akra ita kujahêc, măr quê me cumă Pahpām cawpa.

Ne quê ha me hàhtôa ne ahna amehcakôc kên, ne ame curê.

³⁵ Ita kôt quê ha me hàhtôa mă cute amji kam hapac xà pē.

Pom amji caxwām pê cute me amji kam hapac xà to me ipimxur to ipa prămti atajê to, quê ha mehkŷ mă ajpê.

Ne ca, quê ha amă apec xà catia to cati, ne ajkam gapac xà hyre nare.

Quê ha amă hà pê ihhêj rŷm wapo xwahhihti te ana cuhkônre jitep, ne hà.

Hōhō, ita na quê ha ana cuhkônre kam amă hà — hajŷr.

³⁶⁻³⁷ ŷhŷ, pê hanea ne curi cahăj wejti japrŷ te Anakwŷj ita apu ipa. Ne Pahpām to me amji kam hapac xà jŷrkwa kam apu ipa. Ne cupê Paner xwŷ kra, ne

cupê menquëtti Axer xwÿ tàmxwÿ tàmxwÿ nõ. Pê hik-wa tuw ne ahna caku xet, pê cupê impjên ihhi. Hamre, pê apu increcrer ipa, ne cormã ahnaa apu ipa, pê ramã ahna caku ôjtênta ne ihkôt cute cwat, ne ramã ihwejtu. Ne pê cupê Pahpãm jarkwa to me cumã ihcakôc catê, ne rÿ jÿ caxuw Pahpãm to me amji kam hapac xà jÿrkwa pê cator nare. Ne amcro me, caxwa me, pyt cunea kam ipijacri to ipa. Ne ajco ipijacri kam, Pahpãm to amji kampa ne cumã ihcakôc to ipa. ³⁸ Mã Ximãw cormã apu Marij mã ihcakôac kam, mã me hÿrmã Anakwÿj ata cator, ne cute mehkra ata pupun, ne Pahpãm mã hÿrên hakryti na amji jarên pyrentu. Ne ihtÿj cute, por Krÿpinkrên kam mehkri ne me Pahpãm te mehkên tète me to pøj catê to me cumã hÿjahkre, mã me hikaj atajê mã, harên kam ihtêm.

Pê Naxare jô krÿ wÿr me amji jaxà

³⁹ Mã hamre, Joje me Marij te me Pahpãm te amji kam hapac xà cunea ton partu, ne ma ihkra me, cute me hÿrkwa wÿr me amji jaxà, Hÿpôjajo jô pjê wÿr, Naxare jô krÿ kam. ⁴⁰ Mã ihkra ita ihkà to mõi, ne carôt tÿj to mõi. Ne ampeaj kam cute amji jahkre pej cati. Mã Pahpãm te to impejti.

Pê Hÿm Cati jÿrkwa kam Jeju ahtwÿ

⁴¹ Ýhÿ, pê caku cunea kam Jeju hÿm me inxi ajco Krÿpinkrên wÿr me ipa, me Hakren xà jô amji kÿn wÿr. Ne me hõ amji kÿn ita pê, por pê Pahpãm Ejit jô pjê pê mam menquëtjê to cato ata.

⁴² Mã hamre, ramã Jeju na caku te tõi, mã hanea ne mehkôt amji kÿn ata wÿr mõi, ne cator. ⁴³ Ne ramã amji kÿn jamre jirô pê, cute me amji jaxà, me hÿrkwa wÿr. Mã xãmte aracri Krÿpinkrên kam Jeju jàhhuc. Mã nee hÿm me inxi te hàhhuc xà ita na me hahkre pej nare. ⁴⁴ Ne ihtÿj me hàhtôti atajê kôt cute amji jaxà na amehcãmjÿ. Ne ihtÿj cute me mõi to pyt, ne cormã ne, nee me hapên nare, ne ma me hÿkjê me, me hõ ihkwÿ nõ catêjê kôt ame hapê. ⁴⁵ Ne nee cute me cumã cator nare, na ri ma cute me amji jaxà, Krÿpinkrên wÿr, cute curi me hapên prãmte.

⁴⁶ Ne me ahna amcro incrê jirô pê mã ri cute me Jeju cajpar, Pahpãm to me amji kam hapac xà jÿrkwa kam. Mã Jeju ihtÿj me cumã ampo to hahkre catêjê jipôc ri jÿ, ne ame kampa, ne amehcukij. ⁴⁷ Mã mehcunea te Jeju te amji jahkre pejtÿ to me cumã ihcakôc atajê to amji mã me ipikrar. ⁴⁸ Mã inxi me hÿm te me hõmpun, mã inxi cumã:

— Ikra, ampo na mã ate me ito hajÿr? Ate me ijigêc hyr, na wa apãm me apu gapên to mõi — hajÿr.

⁴⁹ Mã Jeju me cumã:

— Ampo na mã ca ame ijapê? Pom wa ita ri Inxÿ Cati to me amji kam hapac xà jÿrkwa kam jÿ, ne hapên xà to apu cumã apê ita? — hane. ⁵⁰ Mã nee hÿm me inxi te me hÿjarên xà ita kam hapac, ne kam me amji jahkre pej nare, ne me cupê hahkre kêatere.

⁵¹ Mã ma Jeju te mehkôt amji jaxà, Naxare jô krÿ wÿr. Ne pê ihtÿj ajco hÿm me inxi kampa. Na pê inxi ihtÿj ampo itajê cunea to amji japackre to ipa.

⁵² Pê Jeju hÿ to ipicamên to mõi, ne ajco ihkà to mõi, ne hanea ne ihkrã kre te amji jahkre pej to amji kà to mõi. Ne pê mehcunea mã ihkÿn, ne hanea ne cõjkwa kam Pahpãm jÿ ita mã ihkÿn.

Pê Jowãw pê mehcumrãr catê awjarê

³ Ýhÿ, caku jàhtôa jirô pê, pê Tiperij ata pê Roman catêjê jô pahhiti, ne pê ramã ahna caku quÿxi, pê hanea ne Juta jô pjê kam Pirat pê pahhi. Pê hanea ne Hÿpôjajo jô pjê kam Heroti pê pahhi. Pê hanea ne Heroti tõi pê Pirip pê Iturij jô pjê me Taconiti jô pjê kam pahhi, ne Rixin pê Apirên jô pjê jô pahhi. ² Pê hanea ne Anati me Cajpa pê me Pahpãm mã cute mehcajrên catêjê kwÿ jô pahhi.

³ Ýhÿ, pê cormã Jowãw pê Xacarij kra ata, ahkêt kam ihkrÿ, põi kam me hamreare ata ri. Pê amcro ata na, Pahpãm Jowãw mã harkwa ta, quê Cõpipajêr jô cõ kôt cute me ihcajpar atajê mã harkwa jarê. Pê Pahpãm jarkwa kôt harên to hane he, ne me cumã:

— Me akên mã hikra, ne amji tète me ate amji kam me gapac xà kên jÿrê, wa ha ahna cute me gahkre pej xà na cõ kam me acumrã, quê ha Pahpãm me akên to hapac kêt, ne to tojnõi ne me amã to impej — hane.

⁴⁻⁵ Ne pê hanea ne Jowãw me cumã Ixaj xwÿ pê Pahpãm jarkwa na ihcakôc catê ata jô kàhhôc cahyt. Ne me cumã cahyt to hane he:

“Ýhÿ, põi kam me hamreare ata ri jÿm apu caràr to mõi, ne apu hÿjarên to hane he:

‘Pom ca me pry kên to impej prãm ne atÿj me hituw cunea to me hipu pa, ne me hakôt cunea pên pa, ne pry jikôtti atajê, ca ha hanea ne me to ihcuhtac pa, ne pry kên kam kre atajê, ca ha me to impej ne me to increcrer pa. Ita jÿkjê na,

ca ha me ate amji kam me gapac xà kên to mempej, ne intête me ampo kên cunea to pøj pa.

⁶ Quê ha mehcunea Pahpãm te me akên pê me ato hapøj xà ita na, me gahkre pej’ ” hane.

⁷⁻⁸ Mã hamre, me hàhtôa ne cute me Jowãw cajpar, cute cõ kam mehcumrãr prãmte. Ne cute mehcunea mã harên to hajÿr he:

— Ýhÿ, me apê cagã kên kra kwÿ pyrãac! Mã ihhêj ne jÿm te me amã ite cõ kam me acumrãr xà na ijarên. Wa xwahna ite me acumrãr xà ita kôt, ca ha xwahna Pahpãm te ame ato kên xà ata pê me acato. Hamreare, cute ahna hajÿr xà nare! Ca ha xa me akên ton jicu, jirô pê mã wa ha cormã cõ kam me acumrã. Ne me apê pÿxõ pãr kam hô impej nare ata pyrãac, ne ca ha xaa me amji kampa, ne me apej wÿr me apkjê, ne me kam mare mã me akên jicu, ne atÿj me akên pê me

acato. Hõhõ, quêt cute hajÿr. Ne nee ca me amji mã: “Aprãw pê me panquëtiti, incwÿrjapê ri hũne mã me papê Pahpãm na mehkwy, ne jũ wÿr quê Pahpãm mehkwyã nõ to kên” hajÿr nare. Ampeaj kam wa me amã awjarê. Nãmri nee Pahpãm me ana prãm nare, he quê tee me apê Aprãw tãmwxÿ tãmwxÿ cakrô, quê ihtÿj ame ato kêanre ne. Quê Pahpãm Aprãw tãmwxÿ tãmwxÿ na prãm na mã, quê ha ramã kên apu krĩ itajê nõa to Aprãw tãmwxÿ na mehkwy. Cwÿrjapê ca nee me amji mã hajÿr nare.

9 — Ýhÿ, he me apê pĩxô xÿhti atajê pãr pyrãac. Co he! He ramã ihhêj ne wakÿ te harê jakep xà ata na hàhtêp. Ne pĩxô pãr kêanre atajê cunea kam hô impej nare atajê, quê ha hitep ne cuhy kam me haxwÿ — hane.

10 Mã cute me Jowãw cukij, ne me cumã:

— Mêr hõhõ, ampo to wa ha ajte me? — hajÿr.

11 Mã Jowãw me cumã:

— Me anõ mã hitô kà pijakrut ata, ca ha jũm pê hamreare ata mã ihnõ. Ne hanea ne me anõ mã gõ ata, ca ha me cupê hamreare atajê mã to ajcokjê — hane.

12 Mã hanea ne pahhi mã me hũhkra kam me hàmcwÿr catêjê cator, ne cute me Jowãw cukij, ne me cumã:

— Hàpà, me to ihhimpej catê, ne me pa, ampo to wa ha me? — hajÿr.

13 Mã Jowãw me cumã:

— Ca ha nee gõ pahhi jarkwa jirõa pê me hũhkra kam me gãm-cwÿr nare — hane.

14 Mã hanea ne krãhtare kwÿ cator, ne cute mehcukij, ne me cumã:

— Ne me pa, ampo to wa ha me? — hajÿr. Mã Jowãw me cumã:

— Hã, ca ha me hane he, ca ha nee me gãprêa kam me cupê ihpore to pøj nare. Ne nee ca ha mehcukij catê cuna mã jũm to ame ahêj nare. Ne ca ha me gãm-cwÿr xà ata pyrên me gakry — hane.

Pê Jowãw nee cupê Mexij na me cumã amji jarên nare

15 Mã mehcunea ramã me Pahpãm te jũm catihti impejti ata kujahêc prãm ata jikaj, na ri ihtÿj ame Jowãw cãmji, ne me amji mã:

— Pÿhàpà, cõt mã pê Jowãw ita to Pahpãm awjahkre? — hane. 16 Mã Jowãw mehcunea mã amji jarê ne me cumã:

— Hamreare, quê ha cormã jũm ita cato, ne jũm ata ri ijirõa pê cati, ne ihkĩnte icrire. Jũ wÿr wa icrire ita kam cupê hõ par kà to pøj. Ýhÿ, wa ha cõ cakrô to me acumrã, quê ha cormã jũm catihti cato ata, quê ha quêt cormã Pahpãm Carõ Pejti me, cuhy kam me acumrã. 17 Co he, nãmri me apê arÿjhy pyrãac. Na quê ha ihtÿj ajpên pê me ato haprã. He ihhêj ne ramã hũhkra kam cumã crat cute kam arÿjhy ata carêr xà caxuw. Quê ha kam ihcarê, ne ihhy caxwÿn to cuprõ, ne huwahi, ne ihkrekà to cuprõ ne cuhy kam haxwÿ, quê ha to capa. Ne cuhy te to caxãr xà ata, quê ha jũ caxuw ihtyc nare. Ne quê ha ihtÿj me ato hane — hane. 18 Hõhõ, pê Jowãw hane, ne ajco me hapackre

ne me cumã awjarê. Ne me cumã hũjarên xà itajê jãhtõa to hàhtõ, pê ajco me cumã harê. Ne ajco me cumã mehkên pê me hapøj xà to hahkre.

Pê Heroti Jowãw pro

19 Ýhÿ, pê hanea ne Jowãw pjê jõ pahhi pê Heroti ita mãn kêanre. Ampo na? Pê Heroti ihkên ton to hàhtõa, ne ihtõ pê hĩxi capa, ne cume hikwa, cwÿrjapê pê Jowãw cumãn to kêanre. 20 Pê hamre ita cwÿrjapê Heroti mam cute to kên xà ata jirõa pê to kên, ne Jowãw na harkwa ta, pê me Jowãw pro, ne me hacjên xà mã me haxà.

Pê Jowãw Jeju cumrã

21 Ýhÿ, cormã cute me Jowãw jaxãr nare kam ri mehcunea mã awjarê, ne cõ kam me cumrã. Mã hanea ne Jeju hÿrmã cator, mã Jowãw te cõ kam ihcumrãr. Mã cute ihcumrãr xà ata ri xa, ne Pahpãm mã ihcakõc.

22 Mã hamre, cõjkwa te amji jihê mên, mã Pahpãm Carõ Pejti te tutti na amji ton, ne cupê tutta pyrãc, ne ajpên ahpãr mã tẽ, ne Jeju na hãm. Mã hamre, cõjkwa rũm Pahpãm Jeju mã ihcakõc, ne cumã cupê Hũm Cati na amji jarên to:

— Ýhÿ, apê ikraa to ikra, ne apê ikra impeaj to impej ata, ne imã akĩnti, ne apyrên ijakryti — hane.

Jeju quêtjê japyrÿ

23 Ýhÿ, pê ramã Jeju na caku trĩnta pê hàpên xà kam to tẽ, ne Joje kõt Jeju mã menquêtjê japyrÿ te hajÿr he, ne ahpÿanre na mehkra itajê japyrÿ partu. Pê mehcunea ihtÿj Jeju pê Joje kra na amehcãmji. Ýhÿ, pê Joje pê Eri kra, 24 ne Eri pê Matat kra, pê Rewi kra, pê pahhi Merqui kra, pê Jana kra, pê Joje kra, 25 pê Matatij kra, pê Amoti kra, pê Nahũm kra, pê Eti kra, pê Naca kra, 26 pê Mate kra, pê Matatij kra, pê Xemi kra, pê Joje kra, pê Juta kra, 27 pê Jowanakwÿj kra, pê Rexa kra, pê Xoropapew kra, pê Xarati kra, pê Neri kra, 28 pê Pahhi Merqui kra, pê Ati kra, pê Coxam kra, pê Ermatãw kra, pê Er kra, 29 pê Jojuw kra, pê Erixê kra, pê Jorim kra, pê Matat kra, pê Rewi kra, 30 pê Ximãw kra, pê Juta kra, pê Joje kra, pê Jonã kra, pê Eriquim kra, 31 pê Merej kra, pê Mena kra, pê Matat kra, pê Natã kra, pê Tawi kra, 32 pê Jexê kra, pê Opet kra, pê Powa kra, pê Xara kra, pê Naxon kra, 33 pê Aminati kra, pê Atmin kra, pê Arni kra, pê Exom kra, pê Pere kra, pê Juta kra, 34 pê Jaco kra, pê Ixac kra, pê Aprãw kra, pê Tera kra, pê Naco kra, 35 pê Xerunque kra, pê Racaw kra, pê Parec kra, pê Epew kra, pê Xara kra, 36 pê Cana kra, pê Arpaxat kra, pê Xêm kra, pê Nowe kra, pê Ramec kra, 37 pê Matuxarem kra, pê Enoc kra, pê Jaret kra, pê Marer kra, pê Cana kra, 38 pê Enotti kra, pê Xet kra, pê Atãw kra, pê Pahpãm kra. Hõhõ, Joje quêtjê itajê pê me haprÿ itajê hane.

Pê me pajõxwÿn pê Xatanaj Jeju cajpê

4 Mã hamre, Pahpãm Carõ Pejti te Jeju mã amji jõr, ne to ihhimpej, mã ma cute Cõpijapjêr jõ cõ

pñ amji jaxàr, ne pō kam me hamreare ata wỳr mō. Ne Pahpām Carō Pejti pē pō mã Jeju to mō, Xatanaj te ihcajpēr prāmte. ² Ne pom Xatanaj pē me pahcurē xwỳn ita pē Jeju to kēn prām. Mã ramã Jeju te hàpàn nare na amji to amcro to cwarēnta, jirō pē mã ramã cumã prām to prām.

³ Mã hỳrmã me pahcurē xwỳn cator, ne cute capi. Ne cute Jeju kēn mã mēn prāmte cumã:

— Quē ha ampeaj kam apē cōjkwa kam Apām Cati ihkrī ita kra na, ca ha atỳj kēn itajē mã, quē amã pāw na amji to, ca ha krē — hajỳr.

⁴ Mã Jeju cumã:

— Jũ wỳr wa akampa ne ita to hane. Ampo na? Inxũ Cati jarkwa na, hō kàhhōc kam harēn te hajỳr he:

“Ỡhỹ, ca ha atỳj me apà,
ne nee me gō to pit mã me amji japackre nare.
Jũ wỳr quē jũm hō pit to amji to ajpa” hajỳr.

Hō, cute harēn to hajỳr, cwỳrjapē wa ha nee akōt amji kam ijapac nare — hane.

⁵ Mã me pahcurē xwỳn te Jeju japrōr, ne ma kēn kàhti ata na to hàpir. Ne cute cumã pjē cunea kam, krī cunea jahkre, ne cumã:

⁶ — Pjē itajē cunea itekjē pit, ne wa itỳj jũm mã cugō. Na ca ha xa icuna mã akōn krã na jỹ ne ipejti na ijarē, wa ha amã ampo pejti itajē cunea gō. ⁷ Ca ha ate ito hajỳr na, wa ha amã pjē ita kam krī itajē cunea jahkre, ca ha ihcunea to ahimpej to apa, quē ha cupē atekjēa — hajỳr.

⁸ Mã Jeju Xatanaj mã:

— Jũ wỳr wa ha ato hane. Ampo na? Inxũ Cati jarkwa jō kàhhōc kam harēn te hajỳr he:

“Ca ha apu Pahpām pit kīn,
ne amji mã taa pit cupa,
ne impejti na me harē,
ne to pit mã me amji kampa,
ne cumã me apē” hajỳr.

Hō, cute harēn to hajỳr, cwỳrjapē wa ha nee akōt amji kam ijapac nare — hane.

⁹ Jirō pē mã ri me pahcurē xwỳn te Jeju japrōr ne ma Krīpinkrēn wỳr to mō, ne me kam mare mã, kỳaj pē Pahpām to me amji kam hapac xà jũrkwa cwỳrpē hãm, ne cumã:

— Krãa caxi, quē ha ampeaj kam apē cōjkwa kam Apām Cati ata kra na, ca ha ita ri ahpar mã amũ amji to awcapē, ne nee atyc nare. ¹⁰⁻¹¹ Ampo na? Apām Cati jarkwa jō kàhhōc kam, cute ihkra jarēn to hajỳr he:

“Quē ha cōjkwa kam ijarkwa to memprar catējē ikra jamãr to mō,
ne ma me hũhkra to ihpỳm cupate me to huphē to ipa,
mãr quē nee kēn nō ihpar tōc nare” — hane.

¹² Mã Jeju cumã:

— Jũ wỳr wa ha hane. Ampo na? Inxũ Cati jarkwa jō kàhhōc kam harēn te hajỳr he:

“Ca ha nee gō Pahhiti cajpēr nare,
ne nee Apām Cati capi nare” hajỳr.

Hō, cute harēn to hajỳr, cwỳrjapē wa ha nee akōt amji kam ijapac nare — hane.

¹³ Pē me pahcurē xwỳn pē Xatanaj tee apu Jeju to hahkre, ne apu ihcajpēr pa jirō pē mã, ma cure ne tē, ne quē ha ihtỳj jũ caxuw hipēr capi.

Pē Jeju hàpèn xà kam to tē

¹⁴ Pē Pahpām Carō Pejti Hīpōjajo jō pjē wỳr hacpỹa mã Jeju to amji jaxà. Pē Jeju jarēn pjē ita cunea kōt apu ihcahkũm. ¹⁵ Pē Juta catējē te cuprōn xà jũrkwa kam ajco me cumã ampo to hahkre. Pē mehcunea ajpēn mã me Jeju jarēn to:

— Ampeaj kam Jeju te amji kam hapac xà ita pej — hane.

Pē Jeju Naxare jō krī kam apu mō

¹⁶ Pē Jeju ma Naxare jō krī wỳr mō, por pē curi ihkà ata ri. Ne mehkōt xà jō amcro kam, ma Juta catējē te cuprōn xà jũrkwa wỳr mō. Ampo na? Pē ramã ita ton to amji pyrác na pē mō, ne axà ne jỹ. Ne cute Pahpām jarkwa jō kàhhōc cahyt prāmte hãm. ¹⁷ Mã cute me cumã, por Pahpām jarkwa to ihcakōc catē ata pē Ixaj xwỳ jō kàhhōc jōr. Mã cute ihkàhhōc ita capō, ne por kam ihhōc te hajỳr ata mã cator ne me cumã cahyt to:

¹⁸ “Ỡhỹ, Pahpām Carō Pejti icahē na ipa,
ne cute icapi,
mãr wa me cupē hamreare atajē cunea mã
Pahpām jũjarēn xà impejti itajē jarē.
Ne me hacjēn xà kam mehkkrī atajē japōj,
quē ha amjia kōt pō pē ame ipa.
Ne mento tũm atajē mã mento to impej, quē me rīt.
Ne mehkwyà te ame to kēanre atajē tehcajpa,
quē cute ame to kēn itajē pē me cato.

¹⁹ Wa ha itỳj me cumã ijũjarēn xà impejti itajē to awjarē.

Ampo na?

He caku ita kam quē ha me pajō Pahhiti mehkwyà tehcajpa” hane.

²⁰ Ne Jeju te cahyt jicu, ne hacpỹa mã ihkàhhōc ita krã ne hacpỹa ne hamãr catē mã hōr, ne hỹr. Mã cuprōn xà kam me jỹ atajē cunea ampeaj kam me Jeju pupu. ²¹ Mã Jeju te me cumã harēn kam ihtēm, ne harēn to:

— Ỡhỹ, me ikampa. Pom ite ita kam ihkàhhōc cahyt ita, Pahpām te ita kam amji jarkwa kōt ton — hajỳr.

²² Mã mehcunea te amji mã me ipikrar ne me amji mã:

— Pỳhàpà, ampeaj kam hũjarēn xà ita pej, ne Jeju pē hũmre impej. He cupē Joje kra cakrō, ahnaa hũjarēn xà itajē impej — hajỳr.

23 Mă Jeju me cumă:

— Mōrmō ca me imă: “Por hà caprār catê ata ihtÿj mehcunea capră, ne quē ha jū caxuw hà, quē ha ihtÿj hanea ne taa amji capră. Ata cuxà ca ha ita ri, gō pjêa kam me akwÿ mã ampo pihhoti to, quē me hōmpu. Por ate amji jahkre pejti kôt ramă Capernam jō krī kam ampo ton, wa ite ahna me garēn par, ata cuxà” hane. Hōhō, mōrmō ca me imă garkwa to hane.

24 — Ne ampeaj kam wa ha me acunea mã amji jarē. He ihtÿj pjê cunea kam Pahpām jarkwa to mehcakōc catêjê na me amji to pōj, mã ajte mehkīnte, hō krīa kam mehkwyā mã nee ahna me amji caxār prām nare. 25-26 Me ikam gapac to impeaj ne he. Ampeaj kam pê Erij jō amcro ata kam, Juta jō pjê kam me cahāj pijapit wej atajê me hàhtō. Pê hanea ne nee ta iwryc nare to caku to incrē ne ihkôt hīkjê jirō pê mã, pê pjê ata kam prām catia cato. Pê nee Pahpām mēpijapit wej cunea tehcajpar na Erij mēn nare. Ne por pê Xarep jō krī me, Teppro jō krī kam ihkrī ata, pyxit peaj ne ihtehcajpar na Pahpām cumē. 27 Ne pê hanea ne Erixêw xwÿ jō amcro kam, Juta jō pjê kam, mehkà xētti atajê jàhtōa ne ame ipa. Pê Erixêw nee mehkwy cunea caprār nare. Pê hūmre nō japyr te Namă xwÿ ata pyxit peaj ne ihkà xētti, ne Xiri jō pjê catêjê ata rūm cato. Pê Erixêw pyxit peaj ne capră, pê impej. Ata cuxà wa ha nee ita ri, ijō krīa kam ampo pej catia ton nare — hane.

28 Mă cute me cuprōn xà kam me jÿ atajê cunea te Jeju cakōc xà na mempar, ne ame kam incryc. 29-30 Ne me hām, ne cute me Jeju pro, ne pō mã me cupjê. Ne krī pê, pō mã me to cator, ne krī cahē na hàpkajti ata wÿr me cupjê, cute ahna me mēn, mã ihpÿm ne ihtyc prāmte. Mă me hàhtōa jipōc ri me hūhkra pê cator, ne ma jū kam tē.

Pê hūmre nō kam me pahcurê xwÿn carō

31 Mă ma Jeju Hīpōjajo jō pjê ata kam, Capernam jō krī ata wÿr mō, ne cator ne ame cumă ampo to hahkre, mehkôt xà jō amcro kam. 32 Ne ampo to hahkre xà impejti to me cumă hahkre. Mă mehcunea te Jeju catia to cati na me to amji mã me ipikrar. Ne pê Jeju carôt tÿj, ne Pahhiti jarkwa kôt ipa, ne harkwa kôt ihcakōc.

33 Mă cute me cuprōn xà ata kam, hūmre nō ata kam, me pahcurê xwÿn carō kēn nō hī mã axà, ne caxwām pê ihkrī, na pê cupê to ipijapar catê.

34 Mă carār, ne Jeju mã:

— Pÿhàpà, Jeju pê Naxare jō krī kra ita, ampo wÿr mã ca ita ri mō? Ampo to mã ca ha ita ri apu? Côt mã ca ita ri me ijipej prāmte mō? Wa ite ramă apê cōjkwa kam Apām Cati kra, ne acati, ne apejti, mã Apām Cati te rīn wÿr akujahêc na, gahkre pej — hane.

35 Mă Jeju cumă:

— Mēr kêt! Ne hūmre ita pê acato! — hane. Mă me kam mare mã me pahcurê xwÿn carō kēn ata te hūmre ita mēn, mã pjê kam ihpÿm. Ne hamre, me pahcurê xwÿn carō kēn nō ata te hūmre ata jaxōp nare kam cupê cator. Mă hūmre ata pej pyrentu.

36 Hamre, mã mehcunea te amji mã me ipikrar, ne me amji mã:

— Pÿhàpà, Jeju te amji jahkre peaj to amji jahkre pej, cama ihcakōc, mã hūmre ita pej pyrentu. Mōrmō hūmre ita carôt catia to cati, ne ihtÿj cama hān ne ihcakōc, mã me pahcurê xwÿn carō kēn ita hapōj pyrentu — hajÿr. 37 Ne Jeju jarēn ita pjê cunea kam apu ipicràn.

Pê Jeju me hàhtōa capră

38 Mă Jeju ma cute me cuprōn xà pê cator, ne hūmre nō japyr te Ximāw ata jūrkwā wÿr mō, mã hūpān cacroa to cacro. Mă cute Jeju mã harēn, ne me ahna hàhwÿr quē cahāj ita capră. 39 Mă Jeju hÿrmă mō, ne hikwa xà ata jīkjê rūm xa, ne cute cacro ita mã harkwa cator ne cumă:

— Cahāj ita pê acator pyrentu! — hajÿr. Mă cacro ita cupê cator pyrentu, mã cahāj ita xām, ne cute me cumă harte kam ihtēm pyrentu.

40 Ne ramă pyt xār xàa kam, cute Hūm Cati carôt kôt hapēn xà pihho ton. Mă mehcunea Jeju wÿr me hà cunea na me to pra. Mă cute mehcunea na hū xir, ne mehcunea caprār. 41 Mă me pahcurê xwÿn carō kēn me hàhtōa pīn hapōj, ne hān ne me cupê hapōj xàa kam mã me carār to:

— Apê cōjkwa kam Apām pejti kra — hane. Pê me pahcurê xwÿn carō mã Jeju pê Pahpām kra na hahkre pej. Ne cumă Jeju pê Crixto, por pê Pahpām me cumă hūmre to awjahkre ata na hahkre pej. Cwÿrjapê ri Jeju te mehcakōc tēte me cumă harkwa hyr, quē nee me to ihcakōc nare.

Pê Jeju me cumă Hūm Cati jarkwa jarē

42 Mă apē, mã ma Jeju krī pê cator, ne pō kam me hamreare ata wÿr tē. Mă cute me huwahi prāmte, me hapēn kam ihtēm, ne cute me cumă cator. Ne ma ame huwahi, quē nee jū kam ihtēm nare, ne curia ame cahē na ipa. 43 Mă Jeju me cumă:

— Wa ha hanea ne krī nō kam, Pahpām te ampo cunea to ihhimpej xà na harēn xà impejti to harēn to mō. Ne wa ite mehcunea mã ita jarēn to ipa xà caxuw ri cute ikujahêc — hane.

44 Ne hūjarēn xà ita kôt, cute Juta jō pjê kam, cute me cuprōn xà cunea kam, me cumă Pahpām jarēn pejti jarēn par.

Pê Jeju ihkôt me ipa catêjê capi

5 Ỳhÿ, pê amcro nō na Jeju Hīpōjajo tohkà na xa, ne ampo to ame cumă hahkre. Pê me hàhtōa ne ahna me cuprōn tu, ne me hī to ajpēn wÿr mehkujahêc to me mō, cute me Pahpām jarkwa par prāmte. 2 Pê Jeju pàr kre pijakrut caprÿ pupu, pê cō tohkà na ajêt. Pê ramă tep pro catêjê cupê me cato ne jū ita ri ame hō kryhti cuhhōn to mehcuhkwÿr. 3 Mă Jeju te Ximāw jō pàr kre pupun ne cumă hàr, ne cute ahna hàhwÿr, quē pàr kre to ipicamēn crire ne, cō tohkà pê. Mă to ipicamēn. Mă pàr kre kam hÿr, ne cute me hàhtōti ata-jê mã ampo to hahkre kam ihtēm.

⁴ Ne cute ampo to me cumã hahkre partu, ne cute ihcakôc to ihhi, ne Ximãw mã:

— Ca ha côhtu wÿr me akwÿ me, me to pàr kre cakrÿ ne cô kam me gô kryhti mẽ, ate me to tep nõ pro xà caxuw — hajÿr.

⁵ Mã Ximãw cumã:

— Pahhi, ita kam, caxwa ita kam, ite me ijàpêan to me apê, ne nee ite me to tep ita nõ ihpro nare. Wa ha pijamã amcroa kam me to tep ita nõ mẽ? Wÿr wa ha me ihnõ mẽ! Cakrô ca ha caa me ikujate, wa ha itÿj me mō, ne mūhūràn me ijō kryhti mẽ — hane.

⁶ Ne cute harkwa kôt me ampo na mên xà atajê ton to hajÿr, ne me to tep jàhtôa na kryhti to me ipixêr, ne me to pro. Mã ampeaj kam hūti, ne ajmār cute ame cupê hō kryhti cokjêr. ⁷ Mã cute mehkwÿ mã hū to hàpêr, quê me hÿrmã pàr kre nõ to me tē, ne tep na me to ihtecajpa. Mã ma hÿrmã me to tē. Mã tep jàhtôa to hàhtô, ne hūti te ajmār cô mã pàr kre ajwar to mrōr. ⁸ Mã Ximãw te ita pupun, ne Jeju cuna mã ihkôn krã na hÿr, ne cumã:

— Me ijō Pahhi, imã acupa hyre nare. Ampo na? Acatia to acati ne akĩnte icrire, ne ikêanre — hajÿr.

⁹ Ampo na ri cute cumã harkwa ton to hajÿr? Cute me tep jàhtôa ne me to pro na ri, ne cute to amji mã ame ipikrar crire nare. Mã mehkwÿ te me hajÿr, ne me to tep jàhtôa ne me to pro, na ri cute amji mã ame to ipikrar. ¹⁰ Mã Jeju Ximãw mã:

— Apu pa nare. Ita caxuw ca ha quêt mehĩ to pit mã cuprôn kam tē — hane. Mã cute mempar.

¹¹ Ne ma pàr kre atajê to me hàpir amcrà wÿr, ne ampo cunea to me tojnō, ne ma Jeju kôt me pra.

Pê Jeju ihkà xêtti nõ caprã

¹² Mã ma Jeju krĩ nõ wÿr mō, ne curia apu ipa. Mã curi me hÿmre kà xêtti nõ ita ihkrĩ. Ne cute Jeju pupun, ne pjê kam ihpÿm, ne cute pjê na ihkuc xir ne amji na cumã awjahkre, ne cumã:

— Pahhi, ca ha icaprãr prãm, ne atÿj icaprã — hajÿr.

¹³ Mã Jeju te hūhkra curor ne ahna hir ne cumã:

— Ýhÿ, imã acaprãr prãm, cwÿrjapê wa ite ramã acaprãr — hajÿr. Mã hamre, ihkà xêt ita hÿmre ita pê cator pyrentu.

¹⁴ Mã Jeju cumã:

— Ca ha nee mō ne apu jÿm mã ite acaprãr ita na ijarên to amōr nare, ne ma Pahpãm mã mehcajrên catê wÿr tē, ne cumã amji jarê, ne cumã amji to ajpê, quê apupu ne akôpĩr to impej. Jirô pê mã ca ha Pahpãm mã ampo gō. Por pê Mojxe xwÿ ramã me panquêtjê mã Pahpãm mã ampo jōr xà na ihkàhhôc juwahi ata na, ca ha cumã ampo gō. Jirô pê quê ha mehcuea ramã acaprãr ita na me gahkre pej — hane.

¹⁵ Pê pjê ata cunea kôt Jeju te Hÿm carôt kôt hàpên xà pihho ton xà jarên apu ihcakūm. Pê me hàhtôa ne mehkrĩ atajê ajco Jeju wÿr me pra, cute mempar prãmte. Ne hanea ne me hà hÿrmã me pra, cute me caprãr prãmte. ¹⁶ Pê Jeju ma ajco pō mã hapôj, me hamreare ata wÿr, ne ahte ajco Hÿm Cati mã ihcakôc.

Pê Jeju cukrã xà peacre nõ caprã

¹⁷ Pê amcro nõ na Jeju ikre kam jÿ, ne ame cumã ampo to hahkre. Pê Parixêw catêjê me, me cumã Mojxe xwÿ jō kàhhôc to hahkre catêjê hanea curi me jÿ. Pê Hĩpôjajo jō pjê me, Juta jō pjê pĩn, krĩ cunea me hÿrmã cutor tu. Pê Pahpãm Jeju mã carôt to ihtÿj, ne cumã cute amji jahkre pejti gō, cwÿrjapê ri ihtÿj me hà caprã. ¹⁸ Mã me hÿmre cukrã xà peacre nõ pàrkwÿc kam nõ. Mã hÿmre kwÿ pê me hō kwÿ nõ atajê te me to cator, ne tee ame to hàr to hahkre, Jeju cuna mã cute me hir prãmte. Ne jÿ wÿr quê harkwa na me to axà, cute me hipu tu, ne me hahêr tu ita kam. ¹⁹ Cwÿrjapê ri tee Jeju wÿr ame to hàr to hahkre. Ne ma me to hàpir, ikre jimoc na. Ne cute me kên po te ikre ton ata nõr par, ne me to ihkre, ne pàrcuxê to me hÿmre nõr xà ata na hê, ne ma me to iwÿrÿc, me hàhtôti atajê jipôc ri, ne Jeju cuna mã me hir.

²⁰ Mã Jeju te ampeaj kam, cute amji mã me Pahpãm to ihhimpej na me hōmpun, na ri cute hÿmre cukrã xà peacre nõ ata mã:

— Ikwÿ nõ, wa ha ita kam ate Pahpãm to kên xà ita to tojnō, ne nee hipêr to amji japackre nare — hajÿr.

²¹ Mã hamre, Parixêw catêjê me, me cumã Mojxe xwÿ jō kàhhôc to hahkre catêjê me, me amji mã:

— Pÿhàpà, Jeju ita apu ihcakôc to kêanre. Ne ihtÿj Pahpãm to ihcakôc kêanre. Xà ajkĩ cupê Pahpãm, quê hÿmre te ihkên ton xà ita to tojnō? Pahpãm quê ha quêt ihtÿj jÿm te ihkên ton xà nõ to tojnō, ne me paxÿmre nõ te ita ton xà nare — hane.

²² Mã Jeju te me hahkre pej pyrentu, cute amji kam me hapac xà ata na, ne me cumã:

— Pÿhàpà, ampo na mã ca ame amji cajpêr xà ita to me acaxwãm pê ame amji cajpê? ²³⁻²⁴ Ikam me gapac peaj ne he. Ipê me Ahàkà, wa itÿj jÿm te Pahpãm to kên xà ata to tojnō. He me ikampa, ne me ipupu, ne me ijahkre pej to impeaj ne. Harên xà jÿ ri amji jirôa pê ihtÿj? Xà wa ha ajkĩ hà ita mã: “Ate Pahpãm to kên xà ita, wa ha to tojnō?” nare, wa ha ajkĩ cumã: “To xa ne anōr xà py ne atêm pyrentu?” hane. Harên xà itajê nõ ri amji jirôa pê ihtÿj? He pom harên xà te: “To xa ne tē” ata ri, ite harên xà nõ ata jirôa pê ihtÿj ita? Ne hamre, ita caxuw ca ha me ijahkre pej to impej, wa itÿj jÿm te Pahpãm to kên xà ata to tojnō — hane. Ne cute cukrã xà peacre ata mã harkwa to:

— To xa ne anōr xà py, ne atêm pyrentu, gÿrkwa wÿr — hajÿr.

²⁵ Mã hà ita me kam mare mã hãm pyrentu, ne cute nõr xà pyr, ne ma hÿrkwa wÿr tē. Ne ampeaj kam Pahpãm te cumã ampej pyrên hakryti na cumã amji jarên to tē. ²⁶ Mã mehcuea te ita to amji mã me ipikrar, ne mehcuea mã hÿpaa to hÿpa. Mã cute me Pahpãm to amji kam hapac pyrentu, ne me amji mã:

— Pÿhàpà, rÿ jÿ caxuw me pahnō te ampo pejti itajê nõ pupun nare, ne ita kam mã rÿ pahte me hōmpun — hajÿr.

Pê Jeju Rewi to ihkôt ipa catê

²⁷ Ita jirô pê mã ri ma Jeju cator, ne cute, por Rewi pê pjê jô pahhi jarkwa na me hũhkra kam hãmcwÿr catêjê nõ ata pupun. Mã me hũhkra kam hãmcwÿr xà kam jÿ, mã Jeju te hõmpun ne cumã:

— Ajpên ikôt mō — hajÿr. ²⁸ Mã Rewi xãm ne cute ihcunea jicu, ne ma ihkôt mō.

²⁹ Ne cute hũrkwa kam, Jeju mã amji kĩn catia ton. Mã pahhi mã me hũhkra kam me hãmcwÿr catêjê jãhtôa ne me cahê na me jÿ. Pê mehkwy hanea ne mehkřĩ. ³⁰ Mã me cumã Mojxe caca xà to hahkre catêjê me, Parixêw catêjê te me amji kĩn ita pupun. Ne ame Jeju kôt me ipa catêjê kam mencryc, ne ame hũn, ne me cumã:

— Pÿhàpà, ampo na mã ca ame cahê na ame apà, ne ame ikō? Pom me hãmcwÿr catêjê pê mehkřã kên catêjê ita? Pom hõtpê pahhi jarkwa jirôa pê ame hãmcwÿr to me ipa ita? Pom me cupê mehkên ton catêjê ita? Ampo na mã ca me cahê na ame hane? — hane.

³¹ Mã Jeju Parixêw catêjê kwÿ mã:

— Ýhÿ, me ikampa! Me capên catêjê me, mempej catêjê, nee mehcahhê catê na prãm nare. Ne me hà catêjê ri quêt ihtÿj mehcahhê catê na mehprãm. Na ri ita pê hũràc ne ipê mehcahhê catê pyràac. ³² Na wa ite mehkřã kên catêjê to impej prãm to wa ajpên mō, mãr quê mehkên pê amji to me antuw, ne mempej. Wa nee mempej catêjê to impej to icator nare — hane.

Pê Jeju ipijacri kôt harê

³³ Mã amcro nõ na jũmjê itajê Jeju wÿr pra, ne me cumã:

— Ýhÿ, Jowãw kôt me ipa catêjê ihtÿj me ajcri to ame ipa, ne hõtpê me ipijacri to me ipa xà ata kam, ihtÿj Pahpãm mã mehcahõc to me ipa. Mã hanea ne Parixêw catêjê kôt me ipa catêjê ihtÿj me ajcri. Ne akôt me ipa catêjê, mã ajte nee mehkĩnte me ipijacri nare. Ne mër ampo na mã akôt me ipa catêjê nee itajê cuxà ame ipijacri to me ipa nare? — hane.

³⁴ Mã Jeju me cumã:

— Ýhÿ, amji kĩn catia kam, quê ha pijamã jũm ipijacri to ipa? Jũ wÿr quê jũm amji kĩn kam hàpàn nare ne apu ipa. Quê ha ihtÿj mehcunea me hàpàn to me ipa. ³⁵ Ne quê ha amji kĩn jô pahhi ma jũ kam tẽ, quê ha amji kĩn hamre, jakàn pê quê ha ihtÿj me ipijacri to ame ipa — hane.

³⁶ Ne hanea ne Jeju te me cumã, cute amji kam me hapac xà capô to impej partu, mãr quê me hahkre pej, ne me cumã:

— Ýhÿ, jũ wÿr quê jũm cupêhkà wej to impej prãmte, cupêhkà tuw kwÿ Jakep, ne ihwej ita na cuxô ne to ajpÿ. Quê ha to hane, quê ha intuw ita ihwej ita to kên nare ne hipô, jũ wÿr quê ha cupêhkà wej ita intuw ita mã awcanã. ³⁷ Ne jũ wÿr quê ha jũm pryti kà te ampo cacô cjên xà wej ita kam ampo cacô tuw ru. Quê ha jũm te incjêj xà wej kam irun na, quê ha incjên xà wej ita ajcahte, quê ha ampo cacô ita acto. ³⁸⁻³⁹ Ne jũ wÿr

quê jũm ampo itajê nõ to hane, ramã me pahcunea te me hahkre pej. Cu ha ampo cacô incjên xà intuw pit kam ame ampo cacô tuw ru. Pê mã nãm ampo cacô wej ata, ampo cacô tuw jirôa pê impej. Na ri jũ wÿr quê jũm ampo cacô tuw ita na prãm, cormã intuw na ri, ne quêt ampo cacô wej ata ri ramã impejtu — hajÿr. Ita jÿkjê na mã, ramã cute me amji kam hapac xà tũm wej to me amji pyràc xà ata pit kĩn, nare, nee cumã to ipin-tuw prãm nare.

Pê Jeju mehkôt xà jô amcro kôt harê

⁶ Ne amcro nõ na, mehkôt xà jô amcroa kam, Jeju na mehkwy te pur nõ ita cajpuw me arÿjhy cahàc ata jakren to me mō. Mã ihkôt me ipa catêjê te mehkêhkên ne me caxwÿn kur kam me to ihtêm. ² Mã Parixêw catêjê kwÿ te me hõmpun, ne me cumã:

— Ampo na mã ca ajte ame gápên to me apa to hane? Ca ihhêj ne ate me pancaca xà kaj na, hirô pê me apÿm, ne ma ame pahkôt xà jô amcro caca. Pom pê me panquêtti pê Mojxe wÿr me pamã Pahpãm jarkwa jô kàhhõc gõ ne hõ amcro ata juwahi ata kam, me gápên xà ita na ihkaj na, me pahkôt xà jô amcro kam — hajÿr.

³ Mã Jeju me cumã:

— Nee ite Pahpãm jarkwa jirô pê me to ipÿm nare. Atea ca me hirô pê me to apÿm. Xà ate me panquêtti pê Tawi wÿr jô kàhhõc cahyt nare? Pê Tawi wÿr me, mehkwy itajê mã prãm. ⁴ Pê me Pahpãm to me amji kam me hapac xà jũrkwa mã me axà. Pê curi Pahpãm mã hõ pyxwÿr xà na pãw pejti itajê hikwa. Ne por pãw hikwa atajê quê nee jũm pê Pahpãm mã mehcajrên catêjê nare ihnõ krër xà nare. Cakrô pê ihtÿj Tawi cucwa ne mehkwy atajê mã cugõ, pê me cukrê.

⁵ — Ýhÿ, ipê me Ahàkà, na pê wa ixũmre na amji to. Na wa Pahhiti jarkwa kôt ipa, ne taa mã pê ite me pahkôt xà jô amcro to ihmpej catê na ixãm — hane.

Pê Jeju hũmre jũhkra te wÿr caprã

⁶ Mã mehkôt xà jô amcro nõ na, ma Jeju Juta catêjê te cuprôn xà mã hàr, ne cute me cumã ampo to hahkre kam ihtêm. Pê hanea ne curi hũmre nõ awpõc rũm hũhkra kên ita jÿ. ⁷ Mã hanea ne Parixêw catêjê kwÿ me, me cumã Mojxe wÿr caca xà to hahkre catêjê kwÿ curi amehkřĩ, ne ame Jeju pupu, ne ihtÿj amehkõpřĩ to me ipa, cute ihkên mã me mën prãmte. Quê ihhêaj to Jeju mehkôt xà jô amcro kam jũm caprã, quê ha hàhcaprãr xà ata kôt me to ihtÿj tu ne, cute mencaca xà jirô pê ihpÿm cwÿrjapê.

⁸ Pê Jeju ramã amji na cute me amji kam hapac xà ita na me hahkre pej partu cakrô, cute hũmre jũhkra kên ata mã:

— To xa, ne me hipõc ri ca xa — hajÿr. Mã hũmre ata xãm, ne me hipõc ri xa.

⁹ Mã Jeju te, por ame hõmpu atajê cukij, ne me cumã:

— Ýhÿ, me pahkôt xà jô amcro kam, por ihkàhhõc kam me pancaca xà jô amcro ata, ampo pê Mojxe wÿr

Pahpām jarkwa kôt me pamã to hahkre? Xà cu ha pahtỳj amcro ita kam ame ampo pej to? Nare, xà cu ha me pahtỳj amcro ita kam ame ampo kên to? Xà cu ha pahtỳj amcro ita kam me jũm tehcajpa ne me to ihtyc xà jahpa? Nare, xà cu ha pahtỳj amcro ita kam me jũm cura? — hajỹr.

¹⁰ Ne Jeju mehcunea kôt into to amji jacjê, ne cute hũmre jũhkra kên ita mã:

— Gũhkra curor — hajỹr. Mã hamre, hũmre ita te hũhkra curor, ne hũhkra impej pyrentu. ¹¹ Mã Parixêw catêjê kwỳ atajê ame Jeju kam mencryc, ne cute Jeju to amehkên na me ajpên par.

Pê Jeju ihkôt me ipa catêjê te tôxi capi

¹² Ne pê amcro atajê nõa kam Jeju kên na api, Pahpãm mã ihcakôc prãmte. Ne curia Pahpãm mã ihcakôc to apê. ¹³ Ne cute ihkôt me ipa catêjê mã hàkjêr, ne me to tôxi ne me to caprãr. Ne cute me tôxi atajê to ri cute amji mã harkwa na memprar catêjê. ¹⁴⁻¹⁶ Ne Jeju mã memprar catêjê japrỳ itajê pê Ximãw, por pê Jeju cumã haprỳ krut pê Petrô gõ ata me, Ximãw tõi pê Antre ata me, Tijac me, Jowãw me, Pirip me, Partômew me, Matew me, Tome me, Tijac pê Arpew kra me, Ximãw, por cumã hõ pjê kĩnti ata me, Juta pê Tijac kra me, Juta Carijot pê Jeju curê xwỳn ata me.

Pê Jeju me hà caprã

¹⁷ Ne Jeju te kên pĩn mehcunea to iwryc, ne me to mõi, ne pjê impejti pipenti ata kam me to hàhhuc. Mã curi pjê cunea rũm cute me cuprõn, ne me hàhtõa ne ame ipa. Juta jõi pjê pĩn me cator, ne Krĩpinkrên pĩn me cator. Ne cõxwa cahê na krĩ pijakrut pê Kên jõi krĩ me, Teppro jõi krĩ ata pĩn me cator. Ne krĩ jãhtõa pĩn cute me cuprõn. ¹⁸ Ampo na? Cute Jeju kam me hapac ne me amji caprãr prãmte me cuprõn. Mã Jeju ihtỳj ame caprãr to mõi. Ne ihtỳj cute me pahcurê xwỳn carõ kên atajê mã, me hĩ tète harkwa japõj to mõi. Mã mentête hapõj, mã amempej pyrentu. ¹⁹ Cwỳrjapê ri mehcunea ame Jeju tãt to prãm. Ampo na? He ihtỳj Jeju jĩ pê Pahpãm carõt hapõj, ne mehcunea caprã.

Pê Jeju amji kĩn me amji kĩn nare kôt harê

²⁰ Mã Jeju te ihkôt me ipa catêjê pupun, ne me cumã harkwa to:

— Ýhỹ, me akwỳ pê ampo hamreare atajê, ame gakry!
Ampo na?

He me caa, ca ha quêt Pahhiti pê Pahpãm himpej xà ata kam ame akrĩ, na ca ha ame gakrya ne!

²¹ — Me akwỳ mã prãm atajê, ame gakry!

Ampo na?

He me caa, ca ha quêt me garte tu ne, na ca ha ame gakrya ne.

Ne ca me akwỳ ame amrã atajê, me gakry!

Ampo na?

He me caa, ca ha me hirõa pê ame acxa, na ca ha ame gakrya ne.

²² — Ne ca me akwỳ ampo kêanre kam me amji pupu atajê,

ame gakry!

Ampo na?

He ma ame acurê, ne ma ame acaca, ne ame axũn, ne akên na ame garên cakrõ,

Inxũ mã nee me akên nare.

Ca ipê me Ahàkà kôt ame apa, ita cwỳrjapê ri ame ato hane,

ne ame ato kêanre.

²³ Ne cute ame ato kên jõi amcro itajêa kam,

ca ha ame gakry!

Gapacta ne me gakryte ame atoj.

Ampo na?

He quê ha jũ caxuw Pahpãm hahpan xà na,

cõjkwa kam me amã hàmjõr catia,

ne me amã impejti gõ.

Na ca ame gakrya ne!

Ampo na?

He me cupê menquêtjê pyrãac,

ne ihtỳj me ato kên to me ipa,

pom pê mam menquêtjê ajco me Pahpãm to mehkên to me ipa

ata na ri me ato he.

²⁴ — Pỳj me hêj xi,

me akwỳ pê me gakraj atajê,

ca ha atỳj ame amrã!

Ampo na?

He amcro ita pyxit peaj kam ri me gakryti ita.

Na ca ha atỳj ame amrã!

²⁵ — Pỳj me hêj xi,

me akwỳ mã ampo cunea atajê,

ca ha atỳj ame amrã!

Ampo na?

Quê ha cormã jũ caxuw me amã prãm catia me awỳr cato,

na ca ha atỳj ame amrã!

— Pỳj me hêj xi,

me akwỳ ame acxa atajê,

ca ha atỳj me apicxar jicu ne cama ame amrã!

²⁶ — Pỳj me hêj xi,

me akwỳ pê, pom mehcunea me apejti na ame garên catêjê atajê,

ca ha me amrã!

Ampo na?

He me cupê menquêtjê pyrãac.

Pom pê mam menquêtjê ajco mehhêj xi catêjê pejti na ame harê,

ata cuxà ri ihtỳj me apejti na me garên to me ipa.

Na ca ha atỳj ame amrã!

Pê Jeju me curê xwÿn kÿn na me cumã harkwa

27 — Ýhÿ, ampeaj kam wa ha me amã Pahpãm jark-wa jarë. Ca ha me amã me acurê xwÿn kÿn. Ne ame acaca atajê, ca ha me to impeaj ne.

28 — Ca ha cute me acrôn atajê jahpan xà na, me to impejti to prãm, ne Pahpãm mã mehcajrën. Ne cute me ato kên atajê, ca ha Pahpãm mã mehcajrën, quê me to impeaj ne.

29 — Quê jÿm apahàm prãmte akuc kam acakwĩ, ca ha hÿkjê to cumã apkjê, quê hanea ne kam cakwĩ. Ne quê jÿm apê gitô kà capa, ca ha hanea ne akat kà caxàr na to tojnõ, quê amji mã capa ne to tẽ.

30 — Ne atÿj me cumã, por ampo na me awÿ atajê gõ. Ne quê jÿm apê ampo capa, ca nee hacpÿ ne ahna gâhwÿr nare.

31 — Ne quê ha amã cute me ato amji kam hapac to impejti to prãm na, ca ha atÿj me to amji kam gapac to impejti to apa.

32 — Quê ha amã cute me acurê atajê kÿn na, quê ha Pahpãm ihtÿj ate mehkÿn jahpan xà na amã amgõ. Nee quê ate amji mã mehkÿnti atajê pit kÿn jahpan xà na, quê Pahpãm me amã hàmjõr nare. Quê ha amã cute me akÿn catêjê atajê pit kÿn na, ca ha me apê mehkên catêjê jõ ikwÿ nõ pyràac, ne me cuxà akêanre ne.

33 — Ca ha cute me ato kên atajê to impejti na, quê ha Pahpãm ihtÿj hahpan xà na me amã amgõ. Ne jÿ wÿr quê ha Pahpãm ate, cute me ato impej catêjê pit to impejti jahpan xà na, me amã amgõ. Ca ha cute me ato impej catêjê pit to impejti na, ca ha me apê mehkên catêjê jõ ikwÿ nõ pyràac, ne me cuxà akêanre ne.

34 — Ca ha atÿj mehcunea mã ampo gõ, por ampo na me ahwÿ atajê, ca ha me cumã agõ. Ne nee hacpÿa ne cute me amã ampo jõr catêjê mã pit mã ame ampo jõr nare. Ca ha jÿmjê te jÿ caxuw hacpÿa ne amã ampo jõr nare atajê mã ampo jõr na, quê ha Pahpãm ihtÿj hahpan xà na me amã amgõ. Ne jÿ wÿr quê ha Pahpãm hõtpê hacpÿa ne cute me amã ampo jõr atajê jahpan xà na me amã amgõ. Ca ha ate hajÿr na, ca ha me apê mehkên catêjê jõ ikwÿ nõ pyràac, ne me cuxà akêanre ne.

35 — Ne ca ha atÿj amã me acurê xwÿn catêjê kÿn, ca ha me to impej. Ne ampo cunea na me ahwÿ atajê, ca ha atÿj agõ, ne nee hacpÿa ne cute amã ampo jõr na amji mã to hajÿr nare. Ca ha me ate ite me amã ampo jarën itajê cunea to hajÿr na, quê ha Pahpãm hÿrkwa kam, me acunea mã hàmjõr xà impejti to hàmjõr to catia, ca ha me to amcwa, ne ca ha apê Pahpãm me hirõa pê cati ata kra impeaj. Pahpãm mã mehcunea kÿn, ne hàhcajrën cati, ne ihtÿj cute me to kên catêjê caprÿ, ne ihtÿj cumã cute me ampo cwÿr atajê jahpan xà na me hakryti na me amji jarën nare atajê caprÿ.

36 — Na ca ha Pahpãm cuxà me gâhcajrënti ne, ne mehcunea caprÿ to me apa. Hõhõ, ita to ca ha me hajÿr to me apa.

Pê Jeju me ajpën to impej na harkwa

37 — Ca ha ate nee ampo na amehpro rën nare na, quê ha Pahpãm me acuxà nee ame apro rën prãm nare. Ca ha nee ame curê mã me irën nare na, quê ha Pahpãm me acuxà nee me acurê mã me arën nare. Ca ha ate cute ame ato kên ita to tojnõ ne hÿcu na, quê ha ihtÿj Pahpãm me acuxà, ate me to kên ita to tojnõ ne hÿcu.

38 — Ca ha gõtpê me cumã ampo jõr to apa na, quê ha ihtÿj Pahpãm hõtpê me acuxà me amã ampo jõr to ipa. Ne ampeaj kam ca ha atÿj me amcwa. Quê ha Pahpãm me amã me acrat to hipu, ne to hipu tu ne, ne ampeaj kam quê ha me acrat kam me amã cucjê, ne kam me amã curua to curu. Ne pom ca ampo kam me akwÿ mã ampo to ajpën ata kam, quê ha Pahpãm hanea ne me amã ampo to ajpën ne cunõ. Ca ha jÿm mã ampo crire ne agõ, quê ha Pahpãm ate ton xà ita na, acuxà hanea ne amã ampo crire ne cugõ. Nãmri ca ha ate jÿm mã ampo catia ne hõr na, quê ha Pahpãm hanea ne acuxà amã ampo catia ne cugõ.

39 — Ýhÿ, jÿ wÿr quê jÿm to tÿm, amji kõt into tÿam nõ to mõ. Quê ha mento tÿam me ajpën to mõ, ne ajwar ihtÿj kre nõ mã mehpÿm.

40 — Ne por me cumã ampo to hahkre atajê ri cute ampo to hahkre catêjê japyre mã me. Na quê ha xa ampo to hahkre ne hahkre pej jirõ pê, quê ha cormã cute cumã to hahkre catê ata me ajpëan.

41 — Ca me akwÿ jirõa pê akên ton to me apa cacrõ, ca atÿj me akwÿ te ampo kên kryjre ton atajê to me cumã acakõc to me apa. Ne ca ihhêj ne me akjêjê into kam me ahhi kryjre pupu, ne nee mehkÿnte amji toa kam pÿ kwÿcti ata pupun nare. ⁴² Ne jÿ mã ca me akjêjê mã harën to, ne ajte ne me cumã: "Ikjê, cama amji na ijamã, wa ato kam amã ahhi kryjre ita to pôj" hane. Ne mër ampo na ca caa, atoa kam amji mã pÿ kwÿcti ita caxàr nare? Ne ihcaprÿ na amji pej na ame amji jarën to me apa, ne mehkÿnte me akêanre. Ca ha mam me ato kam amji mã pÿ kwÿcti itajê to pôj, ne me arÿt pej, ne cormã me akjêjê into kam ahhi kryjre ita pupu, ne me cumã to pôj.

Pahte amji kam me pajapac xà ihtÿj me pahcakõc xà to ihhimpej

43 — Ýhÿ, jÿ wÿr ca ha pÿxõ impejti pàr nõ intête, pÿxõ kên nõ capa, ne jÿ wÿr ca ha pÿxõ kên pàr tète, pÿxõ impejti nõ capa. ⁴⁴ Ca ha ampo pÿxõ pàr cahkrit nõ pupu, ne ramã hahkre pej pyrentu, xà pÿxõ pàr ita ajkÿ impej, nare, mõrmõ ihkêanre. Ne jÿ wÿr ca ha hõmjÿ pàr kam ahkrÿt nõ ta, ne jÿ wÿr ca ha ahkrõ kam crowkwÿj xõ nõ ta. ⁴⁵ Jÿkjê na, jÿm xÿmre impejti ata hõtpê amji caxwãm pê cute amji kam hapac xà pÿn ampo pejti to hapõj, mã ihkÿnte jÿm xÿmre kên ata hõtpê amji caxwãm pê cute amji kam hapac xà pÿn ampo kên to hapõj. Ýhÿ, ampeaj kam pahte amji kam me pajapac xà me, me pahcakõc xà te hipu, cu ihkõat me pahcakõc — hane

Ikre mã ihcuhhê xà pijakrut

46 Ne Jeju me cumã:

— Ampo na mã ca ame imã: “Me ijõ Pahhiti” hane, ne nee ijarkwa kôt ame apa nare? 47 Wa ha me amã ijũ-jarên xà ita jarê, mãr ca me amã ahna icaca xà jahkre pej. 48 Ýhỹ, quê ha jũm te ijarkwa kam hapac ne ijarkwa kôt ipa na, quê ha cupê ihhê rũm hũmre te pjê týjti kam ikre xãm ata pyrãac. Mã cô te hipu, ne ma ikre wýr cô tẽ, ne cute ikre ata cakwĩn, mã nee hàhcujrõn nare, ne hãm peaj na ihtýj xa. 49 Mã ihkĩnte jũm te cama ijarkwa kam hapac, ne nee to amji japackre, ne ihkôt ipa nare, ata pê ihhê rũm hũmre nõ te pjênxôm crãre kam ikre xãm pyrãac. Mã cô te hipu ne ma ikre wýr tẽ, ne cute ikre ata cakwĩn, mã ihpým pyrentu, ne ikre ata jamre — hane. Hõ, pê Jeju hũjarên to hane.

Pê Jeju pahhi mã hàpên catê nõ caprã

7 Mã Jeju te me cumã ampo itajê jarên jicu, ne ma Capernam jõ krĩ wýr mõ. 2 Ne pê curi Roman catêjê nõ ihkrĩ, ne cupê krãhtare te xěj jõ pahhi. Pê pahhi mã hàpên catê hà, ne ramã ihtyc xàa kam nõ. 3 Mã pahhi ata te Jeju jarên par, ne ihwýr Juta catêjê pê pahhi kwý kujahêc, cute me Jeju japrõr, mã cute hà ata caprãr prãmte. 4 Mã cute me Jeju cajpar, ne me ahna hàhwýr crire nare, ne me cumã:

— Ýhỹ, Roman catêjê nõ ita peaj to impej, cwýrjapê ca ha ihtehcajpa. 5 Nãmri cumã me papê Juta catêjê kían to ihkĩn, ne cutea ri me imã ite me cuprõn xà jũrka ton. Cwýrjapê ca ihtehcajpa, ne me ikôt mõ, ne hà ata caprã — hajýr.

6 Mã ma Jeju mehkôt mõ. Ne ramã cute ikre tẽp, mã krãhtare jõ pahhi te hõ ikwý nõ catêjê kujahêc, cute me Jeju mã hũjarên prãmte. Mã cute mehcajpar ne me cumã:

— Me ikwý nõ te amã harkwa kujahêc to hajýr he: “Pahhi, akĩnte icrire ne ikêanre ita kam, wa nee acahpêrkãr prãm nare. Cwýrjapê ca ha nee ijũrkwa mã axãr nare. 7 Ne jũ wýr wa ijã kam amã icakõc, nãmri apê Pahhiti ne akĩnte jũ na xà na ijamreare, ne ipahãm crire nare. Ca ha cama hà ata mã garkwa ta, quê ha imã hàpên catê ita impej pyrentu, ne capên. 8 Ne wa hanea ne me ijõ pahhi jarkwa kôt ipa, ne wa ha ijõ krãhtare catêjê mã ijarkwa ta, quê ha ihtýj me ikampa ne ijarkwa kôt me ipa. Ne wa ha jũm mã, ‘Tẽ!’ hane, quê ha ihtýj tẽ. Ne wa ha mehnõa mã, ‘Ajpên tẽ!’ hane, quê ha ihtýj ajpên iwýr tẽ. Ne hanea ne wa ha imã hàpên catê mã, ‘Ca ha to hane!’ hane, quê ha ihtýj to. Ne ijirõa pê acati ita kam, ca ha cama hà ata mã garkwa ta, quê ha imã hàpên catê ita impej, ne capên pyrentu” — hajýr.

9 Mã Jeju xa, ne cute hũpar xà ita to hũpar, ne to amji mã ipikrar. Ampo na? Cumã hũpar xà ita peaj to impej. Na ri cute amji mã ipikrar, ne me hàhtõa ne ihkôt me mõ atajê wýr ipipkjêr, ne me cumã:

— Ýhỹ, ampeaj kam wa me amã awjarê, Roman jõ krĩ kra ita ihtýj ikampa, ne ihtýj amji mã ito ihhimpej. Wa

rý Juta jõ pjê kam jũ caxuw, ampeaj kam jũm te amji mã ito ihhimpej to hajýr nõ na, impar nare — hane.

10 Mã Roman jõ krĩ kra ita jõ ikwý nõ itajê, hacpýa mã me hũrkwa wýr cute me amji jacjên, mã hamre ramã cumã hàpên catê ata pej, ne capên pyrentu.

Pê Jeju impijapit kra tyc to ihtýr

11 Ýhỹ, pê nee curi Jeju na amcro hàhtõ nare, pê ma Põre jõ krĩ wýr mõ. Pê ihkôt me ipa catêjê me, me hàhtõa ne ihkôt me mõ. 12 Pê Jeju ramã krĩ jõ harkwa tẽp, pê cute me harêt catêjê krĩ jarkwa na, jũm tyc jarêt to me cato. Por pê cahãj pê ihkra ty ata pê ihcãmter cumã pyxit peaj. Ne iràn xà na cumã mehkjêjê nõ hamreare. Ne pê rý pẽa mã ramã impjên cupê ty. Pê cute me ihkra jarêt catêjê kôt incwýr to mõ. Pê hanea ne me hàhtõa ne krĩ pĩn, mehkôt me mõ. 13 Mã Jeju te cahãj ita cwýr na hõmpun, ne ampeaj kam cumã caprĩ xà, mã cumã:

— Apu acwýr nare — hajýr.

14 Ne ihkra jarĩj xà ata na hàhtẽp, ne cute me to hàh-huc prãmte ahna hũ xir, mã me to hàhhuc, mã Jeju ihtyc ata mã:

— Hũmre, wa ha amã ijarkwa ta. To xa! — hajýr.

15 Mã hũmre ita jýr pyrentu, ne cute ihcakõc kam to ihtẽm. Mã Jeju te inxi mã hõr. 16 Mã mehcunea mã hũpaa to hũpa. Ne ame hakry pyrên ajpên mã Pahpãm to me hàmnãn to me mõ, ne me ajpên mã:

— Me pamã Pahpãm jarkwa to ihcakõc catê catia nõ ita cator! Me Pahpãm mõrmõ cator, cute me pahtehcajpar xà caxuw — hane.

17 Pê Jeju jarên pejti ita pjê ata cunea kam apu ajcrã. Pê hanea ne cahê na pjê atajê kôt harên apu ajcrã.

Jowãw te me cumrãr catê jarkwa jarên catêjê

18 Ýhỹ, por Xacarij me Ixapewkwýj kra pê Jowãw ata, cormã apu ipa, ne ihtýj mehcunea mã Pahpãm cator xà caxuw ame amji cũmpej to hũjarên to ipa. Ne por Jowãw kôt me ipa catêjê na cute me amji ton to prãm atajê ri, Jowãw te amji caxuw cô kam mehcumrãr. Cwýrjapê ri cute me cumã haprý krut jõr, ne me cumã: “Jowãw te me cumrãr catê” hajýr. Mã hamre, Jowãw kôt me ipa catêjê nõ te Jeju pupun, ne ma amji jaxàr ne cumã Jeju jarên. 19 Mã Jowãw te ihkôt me ipa catêjê to ipijakrut ne me cumã hàkjêr, ne me cumã harkwa hyr to:

— Jeju wýr me tẽ ne mehcukij, ne me cumã: “Xà apê hũmre cator xà ata mã ca? Xà Jowãw te me imã garên ata mã ca ramã acator? Nare xà wa ha pijamã ajkĩ cormã me jũm xũmre nõ ata jikaj?” hane — hajýr.

20 Mã hamre, ma Jeju wýr me pra, ne me cumã:

— Ýhỹ, Jowãw te me cumrãr catê te me imã harkwa hyr, wa me acukij: “Xà apê hũmre cator xà ata mã ca? Xà Jowãw te me imã garên ata mã ca ramã acator? Nare xà wa ha pijamã ajkĩ cormã me jũm xũmre nõ ata jikaj?” — hane.

21 Mã amcro ata kam Jeju te me kam mare mã me hà catêjê jãhtõa ne me caprãr. Ne hanea ne cute me

pahcurê xwÿn carô kên jàhtôa mã me hĩ tète hapôj na harkwa hyr, mã me cupê hapôj. Ne hanea ne cute mento tũm jàhtôa ne me caprâr, mã ihtÿj me irĩt. ²² Ne Jeju te ame to hajÿr jirô pê mã ri, cute Jowãw kôt me ipa catêjê mã:

— Ýhÿ, me amji jaxà, ne ate mempar atajê me, ate me hõmpun atajê to Jowãw mã me awjarê. Pom mento tũm catêjê ihtÿj me irĩt he, ne mehkjê te xwÿ catêjê ihtÿj me capên, ne me hapactu catêjê ihtÿj me awpa, ne mehtyc catêjê hacpÿa mã mehtĩr, ne me cupê hamreare atajê ihtÿj me Pahpãm himpej xà jarên xà impejti kampa. ²³ Quê ha jũmjê ikampa, ne cute ikam hapac mã hũcanâr, ne nee ito amji pê hapac kêt nare na, quê ha hakrya to hakry — hajÿr.

Pê Jeju Jowãw te me cumrâr catê jarê

²⁴ Mã ma Jowãw kôt me ipa catêjê te me amji jaxàr ne me pra. Mã Jeju te me hàhtôti atajê mã Jowãw jarên kam ihtêm, ne me cumã:

— Ýhÿ, pê ca me Jowãw cajpar prãmte ma põ kam me hamreare ata wÿr me pra. Ne ampo pupun prãm to mã, pê ca ame pra? He pê ca nee me hũmre nõ pê kôc te apu pĩhho to tertet pyrãcti ata pupun nare. ²⁵ Ne mẽr ampo pê ca me hõmpu? Pê ca nee me hũmre ata na cupêhkà impejti nõ pupun nare. Ne por mehkà impejti kam ame ipa atajê, ihtÿj quêt ampo pejti cunea jipôc ri, pahhi jũrkwa pejti ne catihti ata kam mehkĩr. ²⁶ Ne me imã amji jarê, ampo pupun prãm to mã pê ca me pra ne me hõmpu? Xà Pahpãm jarkwa to mehcahôc catê nõ pupun prãmte pê ca ajkĩ me pra? Ýhÿ, ampeaj kam ri Jowãw pê Pahpãm jarkwa to ihcahôc catêjê nõa, ne mehkwy jirôa pê cati. ²⁷ He pê rÿ pëa mã ramã Pahpãm jô kàhhôc Jowãw jarên to hane he:

“Ýhÿ, pê Pahpãm ihkra mã:

‘Wa ha acumam ijarkwa na ipa catê kujate, quê ha amã gõ pry to impej’ ” hane.

Hõhõ, pê Pahpãm ramã Jowãw jarên to hanea, na ri cator.

²⁸ — Ne ampeaj kam wa ha me amã awjarê. Jowãw ri catia to cati, ne taa mã ri quêt me aquêtjê jirôa pê cati cakrô, quê ha jũm crire ramã Pahpãm himpej xà krac ri ipa ata, quê ha Jowãw jirôa pê cati — hane.

²⁹ Ne pê mehcunea me ampo ita kampa. Pê ihtÿj hanea ne pahhi jarkwa na me hàmcwÿr catêjê atajê me Pahpãm jarkwa kampa ne hÿrmã me apkjê. Cwÿr-japê pê ramã Jowãw caxuw, cô kam mehcumrã. ³⁰ Pê mehkĩnte Parixêw catêjê me, cute me Mojxe xwÿ jô kàhhôc to me cumã hahkre catêjê me, ma ame Pahpãm te me to ihhimpej xà ita caca, na pê nee amji na me Jowãw to tojnõ, pê cô kam me cumrâr nare. Na pê Jeju me cumã:

³¹ — Ýhÿ, me atoa wa ha me amã icakôc. Pom ca amcro ita kam, pjê kam ame apa itajê, me apê ahkrare te xuwacati atajê pyrãac. ³² Ne me apê me ahkrare te ame hàkrun pyrãac. Ne me akwÿ amji mã me acaràr

to: “Wa ite me amji kĩn jô increr to me icrer, ca ajte nee me icuxà me acrer nare. Ne ite me harêt japête mencwÿr to me icwÿr, ca ajte nee me icuxà me acwÿr nare, ne cama ame xuwacaca to ame apa”. ³³ Ýhÿ, me apê ahkrare kwÿ te xuwacati atajê pyrãac. Ampo na? Pê Jowãw cato ne ihtÿj ajco ipijacri to ipa, ne nee ampo cacô to ihkôm nare. Cakrô, ca nee ajte ate mempar ne me hũnâr nare, ne cama me to gũjarên to: “Cupê me pahcurê xwÿn carô kên to ipijapar catê” hane. ³⁴ Wa quêt ipê me Ahàkà, itÿj ampo cunea ku, ne ampo cunea to ikôm to ipa cakrô, ca ajte nee hanea ne ate me ipar ne me ipynâr nare, ne cama me ito gũjarên to: “Hõmpu he, hũmre ita jàpàn cati, ne ihkôm cati, ne me cupê pahhi jarkwa na me hàmcwÿr catêjê me, jũmjê kèanre itajê jô ikwÿ nõ nõ” hajÿr. ³⁵ Ýhÿ, he Pahpãm te amji kam hapac xà cunea impej pit, quê ha jũm Pahpãm te amji kam hapac xàa kôt ipa na, quê ha cumã amji jahkre pejti ne — hane. Hõ, pê Jeju me cumã hũjarên to hane.

Pê Jeju Parixêw catêjê nõ jũrkwa kam apà

³⁶ Mã Parixêw catêjê nõ japÿr te Ximãw te, Jeju te hũrkwa kam cahê na ampo krêr prãmte, hator. Mã ma Jeju hũrkwa wÿr ihkôt mõ. ³⁷ Pê krĩ ata kam cahãjre inxyre nõ ihkrĩ, ne cumã Jeju te Parixêw catêjê nõ jũrkwa kam apu mõr na hahkre pej. Ne cute ampo cacô incjên xà kam, ampo cacô cuxwati ata to hipu tu, ne ipyr ne ma hÿrmã to tẽ. ³⁸ Ne cute Jeju na hàhtêp, ne ihkôn krã na hÿr, ne cute ihkên ton xà atajê jũ na ihpahàm te incwÿr kam to ihtêm, ne into cacôa to Jeju par co, ne ihkĩa to cumã incrà. Ne ma hõtpê ihpar pã, ne cute kam ampo cacô cuxwa pejti ata jaxwÿr.

³⁹ Mã Ximãw te ita pupun, ne amji caxwãm pê amji mã:

— Pÿhàpà, xà mõrmõ ajkĩ hũmre ita pê ampeaj kam Pahpãm jarkwa to ihcahôc catê? Quê cupê Pahpãm jarkwa to ihcahôc catê na mã, quê ha ihtÿj cahãj ita kèanre na hahkre pej. Wÿr quê cupê Pahpãm jarkwa to ihcahôc catê quê amji na cahãj kèanre inxyre ita jamã, quê ihtêp ne ihcupê — hajÿr.

⁴⁰ Mã Jeju te Ximãw caca xà ita na hahkre pej pyrentu, ne cumã:

— Ýhÿ, Ximãw, wa ha amã ampo jarê — hajÿr. Mã cumã:

— Hã, gapacta ne imã harê, pahhi — hane.

⁴¹ Mã Jeju cumã:

— Ýhÿ, pê hũmre ajkrut ne ihpore to jũm jakràjti ata to new. Pê ita to new cati to quĩjênta, ne ita hapyre mã to new to xĩncwênta. ⁴² Ne pê ajwar me cupê ihpore hamreare, me cumã hàmjôr xà caxuw. Ne ampo to quê me hũhkra kam hàmcwÿr catê ita mã amgõ? Mã me hũhkra kam hàmcwÿr catê mã me caprĩ, mã cute ajwar me to tojnõ. Mẽr hõhõ, wa ha me ahna acukij, mẽr jũm quê ha amji jirôa pê hakry, ne cumã to new catê ata kĩn? — hane.

⁴³ Mã Ximãw cumã:

— Imãa, pom cute to new catihti ata ri hakry — hane. Mã cumã:

— Ýhÿ, ate to hamãar ne harën — hane.

⁴⁴ Ne Jeju cahãj ita wÿr ipipkjêr ne Ximãw mã:

— Cahãj ita pupu he. Wa ixàr, ca ate ihkĩnte nee imã cô kwÿ nare, ite to ipar tũm cuhhõn xà caxuw, mã quêt cahãj ita te into cacõa to imã ipar cuhhõn, ne ihkĩa to imã incrà. ⁴⁵ Wa icator, ca nee ate ihkĩnte ijũhkra na ipyr nare, ne nee ate ipãr nare. Mã quêt cahãj ita te nee ipar pãr jicu nare. ⁴⁶ Ne nee ate ihkĩnte imã ikrã caxuw ampo cacõ cuxwati nõ jõr nare. Ne cutea ri quêt ipar kam ampo cacõ cuxwati jaxwÿr. ⁴⁷ Ýhÿ, he ampeaj kam wa me amã awjarê, Pahpãm te cahãj ita to impej ne cute to kên catihti ita to tojnõ, ne hicu, cwÿrjapê ri ampeaj kam cumã Pahpãm kĩn. Ne jũm te Pahpãm to kên crire ata, quê ha cute cumã to tojnõ na, quê ha kyre pê cumã Pahpãm kĩn — hane.

⁴⁸ Ne Jeju cahãj ita mã:

— Ite ramã ate ampo to Pahpãm to kên ita to tojnõ ne hicu — hane.

⁴⁹ Mã me hàpàn xà na mehkrĩ atajê te me amji mã harën kam mehtêm, ne me amji mã:

— Pÿhàpà, jũm xũmre mã ajte, mã ihtÿj cute jũm te Pahpãm to kên ita to tojnõ ne hicu? Cõt mã cupê Pahpãm? — hajÿr.

⁵⁰ Mã Jeju cahãj ita mã:

— Ampeaj kam ate ito amji mã ahimpej, cwÿrjapê ri Pahpãm te apytàr. Na ca ha apej pèa mã mõi — hane.

Pê pyjê kwÿ Jeju kõt ipa

8 Pê amcro nõ na, ma Jeju krĩ jàhtõa kõt mõi, ne ma krĩ wên kõt me hapõj to me mõi, ne Pahpãm pê Pahhiti na harën xà impejti atajê jarën to mõi. Pê ajco ihkõt me ipa catêjê te tõi atajê ihkõt me mõi. ² Pê hanea ne pyjê kwÿ cahãj tète Jeju me pahcurê xwÿn carõ kên kwÿ japõj atajê me, hà kwÿ na me caprã atajê me, ihkõt me mõi. Atajê japrÿ pê hane he: Marij Matarkwÿj, pom pê Jeju cupê me pahcurê xwÿn carõ kên te xet japõj ata me, ³ Jowanakwÿj pê Cuxa pê pahhi Heroti mã hàpên catê ata me híxi me, Xuxankwÿj me. Mehkwÿj jàhtõa itajê pê ihtÿj ajco me Jeju tehcajpa, ne pyjê atajê pê ihtÿj Jeju kõt me ipa catêjê ajco me hamãr to me ipa, ne me hàhcukrêj to mehtehcajpar to me ipa.

Ampo hy kre catê jarën xà

⁴ Ýhÿ, pê krĩ jàhtõa pĩn, cute me Jeju pupun prãmte, me cuprõ. Mã Jeju ame cumã ampo to hahkre, ne me cumã hũjarën xà jarê, quê mempar to impeaj ne, ne me cumã:

⁵ — Ýhÿ, ampo hy kre catê ma hõ pur wÿr tẽ. Ne hÿr mã cator, ne ampo hy kre to mõi. Ne pê ihkre xà ata hane he, pê cama ihcahkũm to mõi. Mã hamre, ampo hy itajê kwÿ prya kam ipijaxwÿr, mã incwÿar pê me pra, mã hanea ne pryjara te ihkwÿ krêr, mã hamre.

⁶ Mã ampo hy ita kwÿ pjê kam kënti ata kam ipijaxwÿr, ne huprãj pê incrà pyrentu. Ampo na? Kënti kam pjê ita pururure, ne incràre, ne nee inco nare, na ri incrà ne hamre. ⁷ Ne ampo hy ita kwÿ hõmjĩ me hipe kam

ipijaxwÿr itajê, hipe me ajkaam huprãj. Mã hipe te hipej, mã hamre. ⁸ Mã hõtpê ampo hy ita kwÿ pjê impejti kam ipijaxwÿr, ne huprãj, ne cati to mõi, ne ipi-camên to mõi, ne apu ihkà, ne hàhtõa to hàhtõ. Ýhÿ, ca ha me ikam gapac to impejti na, ca ha atÿj me hahkre pej — hane.

Ampo hy kre catê jarën kõt harën xà

⁹ Mã me cumã hũjarën jirõ pê, ihkõt me ipa catêjê te mehckuj, ne me cumã:

— Ýhÿ, ampo to mã ca ame imã hahkre? Gũjarën xà jũjê to mã ca ame imã awjarê? — hajÿr. ¹⁰ Mã Jeju me cumã:

— Ýhÿ, quê ha catyt kam Pahpãm me amã ampo cunea to hahkre, ne me amã to capõ to impej partu ne. Ne pom Pahpãm me apê ampo cunea jarën to amxu atajê, quê ha me amã harën to capõ partu ne. Na wa ha nee jũmjê atajê mã hirã pê ampo itajê to hahkre nare, wa ha cama me cumã hũjarën xà itajê incwÿrpê harën to ipa, mãr quê ha cama me ikampa, ne nee me hahkre pej pej nare, ne me rĩt, ne nee me ampo pupun pej nare.

¹¹ — Ýhÿ, wa ha me amã cõjkwa kam Inxũ Cati himpej xà jũjarën xà pê ampo hy kre catê jarën xà itajê capõ pa. Ne pom ampo hy itajê pê ihhêj rũm Pahpãm jarkwa pyrãac, ne pom pjê kam ipijaxwÿr itajê pê ihhêj rũm, mehĩ pyrãac.

¹² — Ne pom pry kam ampo hy pijaxwÿr itajê pê ihhêj rũm jũmjêa pyrãc, ne cute me Pahpãm jarkwa par pyrentu. Ne me ahna ahtũm nare mã me pahcurê xwÿn te mentête Pahpãm jarkwa to põi. Ne ampo na ri cute me to hajÿr? Quê nee hipêr me Pahpãm jarkwa kõt ame ipa nare to prãm to ri, cute me to hajÿr.

¹³ — Ne pom pjê kam kënti atajê pê jũmjê pyrãac, ne cute me Pahpãm jarkwa par, ne kam me hapac to impejti, ne hũrên ame hakry, ne me hũpar kam mehtêm. Ne me ahna ahtũm nare mã me pahcurê xwÿn te me capi, ne ame to kên, mã cute ahna ame amji jicu, ne me hamre.

¹⁴ — Hanea ne, pom hipe kam hõmjĩ kam ipijaxwÿr atajê pê jũmjê pyrãac, ne cute me Pahpãm jarkwa par pyrentu, ne me hũpar kam mehtêm. Ne hanea ne me ahna ahtũm nare, mã me caxwãm pê mehcrihkrit te me kam ihtêm, mã ihtÿj amji to me hakrãj cati prãm, ne me hakrãj atajêa to hãn ne amji mã me amji kĩn ton to me ipa to prãm. Ne cute me hajÿr itajê te me to hamre. Cwÿrjapê, quê nee jũm ata ihkà ne ampo pejti ton nare.

¹⁵ — Ne pom pjê impejti kam ipijaxwÿr itajê pê jũmjê pyrãac, ne cute me Pahpãm jarkwa par, ne me hũpar pyrentu, ne Pahpãm jarkwa kõt me mõi. Ne ihtÿj harkwa kõt me hũcanãr to me mõi, ita kam cute me ampo pej jàhtõa ne me ton — hane. Hõ, Jeju te hũjarën to hajÿr.

Hàhcujro xà jarën xà

¹⁶ Pê cormã Jeju me cumã:

— Ýhÿ, jũ wÿr quê ha jũm ihpôc xà nõ jàhcujro xà caxuw ihpôc, ne paraj krac ri hãm, nare pàrkwÿc krac ri hãm. Quê nee jũm ihpôc xà nõ to hajÿr nare. Quê ha quêt hàhcujro xà ata pôc ne hãm xàa kam hãm, cute mehcujiro mã mencjêj, ne me hàhcujro pupun prãmte. ¹⁷ Ne por jũ ri ampo pimxur atajê, quê ha ihtÿj mehpro mẽ, ne me hõmpu. Ne hanea ne awcapàtkô kam ampo pimxur atajê, quê ha ihtÿj me hõmpu, ne me hahkre pej. Ampo na? Ramã hàhcujro xà ata te ihcujiro na ri, cute me hõmpun.

¹⁸ — Cwÿrjapê ca ha me ikampa, ne ikam me gapac peaj ne. Pom ramã jũm mã ampo ata, quê ha Pahpãm cumã ata jirôa pê, hipêr cumã cugô, ne por ramã jũm pê ampo kryjre, ne cupê hamreare ata, quê ha ihtÿj hacpÿa mã Pahpãm cupê to pôj pa — hane.

Pê Jeju menxi me, mehkjêjê ahna me ahcukij

¹⁹ Mã hamre, Jeju menxi me, mehkjêjê me, hÿrmã me mõ. Ne jũ wÿr quê cute ahna me hipu tu ita kam hÿrmã me axà. ²⁰ Mã jũm te Jeju mã me harên to:

— Ýhÿ, ihmat xà pö pê anã me, me akjêjê me, mehcuhhê ne me gikaj, cute me amã mehcahoc prãmte — hajÿr.

²¹ Mã Jeju mehcunea mã:

— He quêt Pahpãm jarkwa kam me hapac catêjê me, me hÿpar to me ipa atajê pê ri ijö inxê me, me ikjêjê — hane.

Pê Jeju kôcti to ankrê

²² Ne amcro nõ na Jeju pàr kre mã hàr, ihkôt me ipa catêjê me, mã me cumã:

— Hacme, ne hÿpô jÿkjê mã me rê — hane. Ne ma me mõ. ²³ Ne cormã me irêr to me mõ, mã Jeju jôt, mã kôc pahtÿjti te hàpêr kam ihtêm, mã ramã cô harô to pra, ne ihtu to pra, ne ihtÿj pàr kre mã incjêj to mõ. Ne tàkam ry cute pàr kre to hipu to mõ, ne ramã mehkên mã me hàr xàa kam me mõ.

²⁴ Mã Jeju kôt me ipa catêjê ma hÿrmã me tẽ, ne cute mehcujiro, ne me cumã:

— Me ijö Pahhi, cu ramã me papictor xàa kam me mõ — hajÿr. Mã Jeju jÿr, ne cute kôc me cô mã harkwa to:

— Me ankrê! — hajÿr. Mã pea kôc me cô pinkrên pyrentu, ne ihcunea pinkrên. ²⁵ Mã ihkôt me ipa catêjê mã:

— Ampo na mã ca nee amji mã me ito ahimpej nare — hane. Mã cute amji mã me ipikrar crire nare, ne ame hÿpa, ne me amji mã:

— Pÿhàpà, jũm xÿmre mã ajte? Mã ihtÿj ajte kôc me cô te impar — hajÿr.

Pê Jeju hÿmre nõ kam me pahcurê xwÿn carô kên kwÿ caprã

²⁶ Ne ma, Querat catêjê jö pjê kam, Hÿpôjajo jö pjê jÿkjê kam me cator. ²⁷⁻²⁹ Mã Jeju pàr kre pê cator pêe mã hÿmre nõ hÿrmã cator, ne cute ihcajpar. Ne pê kam me pahcurê xwÿn kwÿ carô kên jàhtôa ne cumã

acjêj ne kam ihkrÿ. Cwÿrjapê pê ihcakrô apu ipa, ne nee ihkà kam apu ipa nare, ne nee ikre nõ kam ihkrÿ nare, ne ma me harêt xà, pê kên kre kam pê ihkrÿ. Ne pê ramã me pahcurê xwÿn carô kên itajê, hÿmre ita mã incjêj to hàhtôa to hàhtô, ne ihtÿj ajco cute amji to kên na cumã hÿjahkre to ipa. Pê amji caprÿ to me hÿkjê atajê ajco mehpro, ne wakÿre te me huwapre xà to me hÿhkra me, mehpar juwapre. Pê ajco ampo carô kên atajêa me cumã hirên pa, ne ma pö mã haprô ne ajco to ipa. Mã Jeju te hÿmre nõ ata kam me pahcurê xwÿn carô kên pupun, ne cupê cator na cumã harkwa hyr. Mã hamre, hÿmre ita te Jeju pupun, ne cute caràr kam ihtêm, ne cuna mã ihpÿm, ne kÿj cati pêa mã cumã:

— Pahhiti me hirôa pê cati kra pê Jeju, ampo to ca ha me imã? Wa ha me awÿ, ca nee ame ito kên nare — hajÿr.

³⁰ Mã Jeju te ihcukij, ne cumã:

— Jũ mã mã gaprÿ te? — hajÿr. Mã Jeju mã:

— Ijapry te Me Hàhtôti — hane. Ne ampo na pê amji jarên to hane? Pê ramã me pahcurê xwÿn carô jàhtôa ne hÿmre ita mã acjêj, na pê amji jarên to hane. ³¹ Mã me pahcurê xwÿn carô kên itajê kwÿ Jeju na ahwÿa to ahwÿ, mãr quê nee pjê ata tète ihkãkãnti kam cuhyhti ata wÿr mehkujahêc nare.

³² Ne pê curia hàhkà jakôt na crô hàhtôa ne apu hàpàn to ipa. Mã ampo carô kên atajê te cumã incjêj prãmte ahna Jeju wÿr, quê me to tojnô, quê crô atajê mã ame acjêj. Mã Jeju te ahna me cumã harkwa, ne me to tojnô. ³³ Mã me pahcurê xwÿn carô kên jàhtôti atajê cunea me hÿmre nõ ata pê cator, ne ma crô mã incjêj. Mã ma cô mã ihprôt, ne hàpkajti pÿn hÿpô kam ihpÿpÿm, mã cô te hipej tu.

³⁴ Mã crô jamãr catêjê te ita pupun, ne ampeaj kam me cumã hÿpa. Mã ma hÿpate me pra, ne pry me, pur me, krÿ kôt ame harên to me ipa. ³⁵ Mã cute mempar catêjê ma Jeju pupun prãmte, ma hÿrmã mehprôt. Ne me cator, ne ahna me hàhtêp, ne cute me Jeju te hÿmre intête me pahcurê xwÿn carô kên to pôj ata pupun, ne hõmpun xà ata to amji mã me ipikrar crire nare, ne me cumã hÿpa. Ampo na? He hÿmre ita aracri ihkàa kam ihcarÿcti jÿ, Jeju cahê na. ³⁶ Mã cute me ampo ata pupun atajê te mehcunea mã Jeju te hÿmre caprãr ata na harên. ³⁷ Mã Querat catêjê jö pjê kam mehcunea mehkÿr atajê mã Jeju jÿpaa to hÿpa, mã cute me hõ pjê pê cator na hàhwÿr. Mã Jeju pàr kre mã hàr.

³⁸ Mã hÿmre pê ampo carô kên japôj ata te Jeju na hàhwÿr, ne cumã:

— Ito tojnô, wa akôt mõ — hajÿr.

³⁹ Mã Jeju cumã:

— Hãpà, ca ha amji jaxà, ne ma gÿrkwa wÿr tẽ, ne me akwÿ wÿr acato, ne me cumã Pahpãm te ato impej na amji jarê — hane. Ne ma ihkôt me ipa catêjê me, me mõ. Mã ma hÿmre ita krÿ cunea kôt Jeju te cumã ampo pejti ton xà ata na me cumã amji jarên to mõ.

Pê Jajrô ihkra caxuw Jeju mã akij

⁴⁰ Mã ma Jeju te hÿpô jÿkjê wÿr amji jaxàr. Mã curi mehcunea jàhhuc. Ne por curi ame Jeju jikaj to me ipa

atajê, cute amji jaxàr xà pyrên ame hakry. ⁴¹ Mă hũmre nõ japry te Jajrô hỹrmă cator, ne cupê Juta catêjê te me cuprôn xà kam me to ihhimpej catê, krĩ ata kam. Ne Jeju wýr cator, ne cuna mă ihpým ne cute ahna hãhwýr, măr quê hũrkwa wýr mō. ⁴² Ampo na ri cute to hajýr? Nee mă ampo na nare, cumă ihkra cupryre pyxit peaj na caku te tōxi ata caxuw ri, cute to hajýr. Pê cupê hà ne ramă ihtyc xàa kam nõ na pê. Mă ma Jeju ihkôt mō. Mă me hàhtôa ne ihkôt me mō, ne me hĩ to amji wýr me Jeju kujahêc to me mō.

⁴³ Mă me hàhtôti ata catãtkre na cahãj nõ ata cator, ne pê cahãj ata ramă hà ita na ahna caku tōxi, mă hà ita na ipa. Pê ajco caprô ajxwý, pê ramă amji na caj jãhtôa ne cumê, pê tee ame caprã, pê nee impej nare. Pê cama amji na ramă hõ pore cunea rên pa, ne nee impej nare. ⁴⁴ Ne Jeju kôt mō, ne cute ahna hàhtêp tu, ne hõ kôt ahna hitô kà cyt. Mă caprô crã pyrentu.

⁴⁵ Mă Jeju te mehcukij to:

— Jũm te mă ikà cyt? — hajýr. Mă mehcunea amji na me hàprãr pit, mă Petrô cumă:

— Pýhãpà me ijô pahhi, pom mehcunea apu ajpên wýr me hĩ to me akujahêc to me ipa ita? — hane.

⁴⁶ Mă Jeju me cumă:

— Jũm te icyt, mă ipê icarôt cator, wa ite amji cajpêr — hane.

⁴⁷ Mă cahãj ata te cupê amji to ipimxur nare na amji jahkre pej, ne ma Jeju wýr ihterted to mō, ne mehcunea jipôc ri, cuna mă ihpým, ne cute ihcyt na cumă amji jarên. ⁴⁸ Mă Jeju cumă:

— Ikra, ca ate ito amji mă ahimpej to hajýr, cwýrjapê ri ramă apej. Na ca ha apej pêa mă mō — hane.

⁴⁹ Ne cormă Jeju apu cumă ihcakôac kam, mă Jajrô wýr cumă hàpên catê ata cator, ne cumă:

— Ijô pahhi, hamre, ramă akra cupryre ata tyc, na ca ha nee hipêr apu Jeju cahpêrkàr to amôr nare — hane.

⁵⁰ Mă Jeju te kam hapac, ne Jajrô mă:

— Apu pa nare, ne cama ito pit mă amji mă ahimpej, quê ha ihtýj amă akra impej — hajýr.

⁵¹ Ne ma curi Jeju cator, ne amji kôt Petrô me Jowãw me Tijac me, me to hàr, mă nee mehkôt hũm me inxi me, jũmjê xàr nare. ⁵² Pê mehcunea ikre kam ame amrã, ne me hàhkrihkrit catia to cati, pê ramă cupryre ata ty na pê ame amrãhti. Mă Jeju te me cumă:

— Hamre, me acwýr jicu, he nee cupry ita tyc nare, ne cama nõ ne gõr — hajýr.

⁵³ Mă mehcunea, cute me cupry ata tyc na me hahkre peaj xà na ame cumă. ⁵⁴ Mă Jeju hỹrmă mō, ne cute hũhkra na ipyr, ne kýj cati pêa mă cumă:

— Cupry ita, to xa! — hajýr.

⁵⁵ Mă cupry ita hacpýa mă ihtĩr, ne hãm pyrentu. Mă Jeju te cumă harte na me cumă harkwa. ⁵⁶ Mă hũm me inxi te amji mă ipikrar, ne me cumă paa to pa, mă Jeju te me cumãn, quê nee jũm mă hacpýa mă cupry ita tĩr na me harên nare.

Jeju kôt me ipa catêjê te tōxi jãpên xà

9 Amcro nõ na Jeju te ihkôt me ipa catêjê mă hàkjêr, ne cute me cumă harkwa hyr to:

— Ca ha ma krĩ kôt me ajcrã, ne me kam me pahcurê xwýn carô kên atajê, ca ha mentête mehcunea japôj, ne me hà catêjê cunea caprã — hajýr. Ne cute ampo na me cumă hũjahkre ata caxuw carôt týj catia ne hõr. ² Ne cute me cumă harkwa, quê mehcunea mă Pahpãm pê Pahhiti na me harên to me mō, ne hanea ne me hà catêjê caprãr to me mō.

³ Ne cute me cumă harên to hajýr he:

— Ýhỹ, ca ha nee amji mă ampo catia tur nare. Ne nee pĩ cajrer to ame aprar nare, ate ahna me amji cajpar xà caxuw. Ne nee akàhà me, me gõ me, ihpore to me aprar nare. Ca ha me akatkã pyxit peaj to me pra, ne nee amehkwý incwýr nare. ⁴ Ne ca ha jamã ne krĩ mă me gapôj, ne jũ ri ikre kam, cute me guwahi xà ata ri ame apa, ne ahnaa krĩ ata pê me gapôj. ⁵ Quê ma krĩ nõ kam ame acurê, ca ha cupê me gapôj pyrentu. Ne me gapôj xà wýr hãn ne me apar tete me pro jacrô capĩ, ne me hũrê. Ne me hũrêan kam me cumă gũjarên to hane he: “Ýhỹ, ca nee me gũpar nare, ne nee me ipar nare ijũjarên xà ita na, cwýrjapê wa ha nee hipêr ita ri ame imôr nare!” hane — hajýr.

⁶ Mă ma ihkôt me ipa catêjê cahkũm, ne ame pra, krĩ kryjre cunea kôt, ne me Pahpãm jarkwa pejti jarên to ame ipa. Ne pjê cunea kam me hà caprãr to me ipa.

Pahhi pê Heroti pê amji jahkre kêatre

⁷ Pê Heroti pê Hĩpôjajo jõ pjê jõ pahhi, ne ajco Jeju te Pahpãm carôt kôt ampo pihho jãhtôa ne ton atajê na harên pa. Ne hũpar xà atajê na, cupê amji jahkre kêatre. Pê ajco ame cumă hũjarên to hane he:

— Ýhỹ, Jowãw xwý te me cumrãr catê ri hacpýa mă ihtĩr — hane.

⁸ Pê ajco mehkwy me hũjarên to, quê Erij xwý te ri amji pêr, nare, mam Pahpãm jarkwa to ihcakôc catê nõ ata mormô hacpýa mă ihtĩr. ⁹ Pê pahhi Heroti ajco taa amji mă:

— Pýpýn, pê wa pa Jowãw xwý krã jakep na ijarkwa ta, pê me hakep ta? Ne mër jũm xũmre mă ajte? Pom wa ampo itajê na harên pa ita? — hane. Ne tee pahhi Heroti apu Jeju pupun prãm.

Pê Jeju me hàhtôa mă harte

¹⁰ Mă ma Jeju kôt me ipa catêjê te me amji jaxàr, ne Jeju mă cute me ampo cunea ton atajê na me amji jarên partu. Mă ma Jeju te me haprôr, krĩ jacot japry te Tep jõ krĩ ita wýr, ne ahte curi ame ipa xà. ¹¹ Mă me hàhtôti atajê te mempar, ne ma me hũnãr. Mă Jeju te ihtýj me ahna amji caxàr, ne me cumă Pahpãm pê pjê cunea jõ Pahhiti na harên, ne cute me amji caprãr prãm catêjê atajê caprãr.

¹² Mă ramă caxwa xàa kam, mă ihkôt me ipa catêjê te tōxi atajê ma hỹrmă me pra, ne me cumă:

— Ýhỹ, ca ha me cumă quê ame ajcrã ne ihtýj ame pra, me pahcahê na krĩ kryjre apu ihcuuhê itajê kôt, ne curia quê ha ame apà, ne curia ame ahtwý, nãmri ita ri põ pê ampo hamreare — hane.

¹³ Mă Jeju me cumă:

— Ca ha me caa me cumã harte — hane. Mã me cumã:

— Pÿhàpà, ampeaj kam me hàhtôa to me hàhtô, ne me pamã kwÿr te pro te xïc peaj ne tep pijakrut peaj ita kam, jũ wÿr quê me catwÿ. Ca ha pijamã me hàhtôti itajê mã ite ihpore to me hõ japrôr na me ito? — hane.

¹⁴ Pê curi me hũmre me hàhtô na me mir to xïc, mã Jeju te ihkôt me ipa catêjê mã harkwa hyr, ne me cumã:

— Ame cumã, quê ame amji jakrã ne amehkrĩ. Quê ahpÿanre na ame xïncwënta partu ne amehkrĩ — hajÿr.

¹⁵ Mã ihkôt me ipa catêjê te mempar, ne cute me cumãn, mã cute ahpÿanre na me amji jakrã ne amehkrĩ. ¹⁶ Mã Jeju te kwÿr te pro te xïc itajê, me tep pijakrut atajê incwÿr, ne kàj mã cõjkwa wÿr to irĩt, ne Hũm Cati mã to ihcakôc. Jirô pê mã ri cute kwÿr te pro kryj, ne tep pijakrut ita kryj, ne ihkôt me ipa catêjê mã hõr, mãr quê ame cumã me cugõ. Mã cute ame cumã me hõr. ¹⁷ Mã amehcunea jàpàn, ne ame harte partu. Mã ihkôt me ipa catêjê te me hõ cahhur to me kàhà to tõi ne me to hipu.

Pê Petrô Jeju jarê

¹⁸ Ne amcro nõ na Jeju ahte mehkwy to pit mã cator, ne apu Hũm mã ihcakôc, mã ihkôt me ipa catêjê te me hàhtêp. Mã cute mehckuj, ne me cumã:

— Jũ mã mã me hàhtôti atajê ito amji kam me hapac to? — hajÿr.

¹⁹ Mã me cumã:

— Mehkwÿ me garên to, apê Jowãw xwÿ te me cumrãr catê ata, ne mehkwy me garên to, apê Erij pê rÿ pëa mã Pahpãm ihtĩar to api ata, ne mehkwy me garên to, apê mam Pahpãm jarkwa to mehckakôc catêjê nõ, ca hacpÿa mã atĩr — hane. Mã Jeju me cumã:

²⁰ — Ne me ca? Jũ mã mã ca ito amji kam me gapac to? — hane. Mã Petrô cumã:

— Apê Crixto, ne apê, pom pê Pahpãm me panquêtjê mã jũm to awjahkre ata mã ca — hane.

Pê Jeju ihtyc xà me hacpÿa mã ihtĩr xà na amji jarê

²¹⁻²² Mã Jeju te me cumã harkwa hyr, ne me cumãn, quê nee cormã ne jũm mã ita na me harên nare, ne hanea ne me cumã:

— Ýhÿ, wa ha ipê me Ahàkà cati, cormã jũmjê jũhkra kam amji pupun xà kèanre to amji pupu. Quê ha Juta catêjê pê prohkam atajê ma ame ipê Ahàkà curê. Quê ha hanea ne me cuxà Pahpãm mã mehcajrên catêjê jõ pahhi kwÿ me, me cumã Mojxe xwÿ jõ kàhhôc to hahkre catêjê me, ma ame icurê. Quê ha me Ahàkà ty, ne ahna amcro incrê jirô pê hacpÿa mã ihtĩr. Na wa me amã awjarê.

²³ — Ýhÿ, quê ha jũm mã ikôt amji ton to prãm na, quê ha amjia kôt apu ipa jicu, ne ikôat amji kampa, ne icuxà amji mã ihtyc cupa nare to ipa. Quê ha jũm ata

pê ihhêj rũm cute amcro cunea kam hõ pĩ na ihtyc xà ata japjêr to ipa.

²⁴ — Ýhÿ, quê ha jũm te amji to ipijapar prãm to, ca ma apu amji jamãr to ipa na, quê ha ihtÿj ty. Ne por quê ha quêt jũm icwÿrjapê ty ata, quê ha icahê na ihtĩr na ipa rohnÿtti mã.

²⁵ — Xà quê ajkĩ jũm pjê cunea kam amji mã ampo pejti atajê cunea to hõ tekjê xà caxuw to cuprõ, ne nee iràn xà na Pahpãm to amji kam hapac nare, ne ihkaj na apu ipa ne ahnaa ty, quê ha pijamã cute ampo pejti to cuprõn atajê cunea, ihtyc jirô pê ihtehcajpa? Hãpà, quê ha cama amji to acto, ne nee Pahpãm cahê na amji to ipijapar nare.

²⁶ — Ne por quê ha jũm ijũ na apu ihpahàm, ne hanea ne ite ampo to hahkre xà ita jũ na apu ihpahàm na, quê ha ipê me Ahàkà hanea ne jũm ita jũ na apu ihpahàm. Por cõjkwa pĩn me Ahàkà te Pahpãm pê Pahhiti mã me ipijapu catêjê jàhcujro impejti ata to cute amji jaxàr xà ata kam, quê ha hanea ne apu jũm ita jũ na ihpahàm.

²⁷ — Ýhÿ, me ikampa, ne me ipar xà ita to amji japackrea ne, he wa nee me amã ihêj xi xàa jarên nare. He ca ha me anõ atÿj atĩar kam Pahpãm te ihhimpej xà ata na hõmpu ne cormã ty — hajÿr.

Jeju me Mojxe xwÿ me Erij

²⁸ Ne amcro te xet jirô pê, Jeju te Petrô me Jowãw me Tijac me, me haprôr. Ne ma kên nõ ita wÿr me to mõ, ne cute Pahpãm mã ihcakôc prãmte, hàhkà jakôtti nõ na me to hàpir. Ne curia Hũm Cati mã ihcakôc, mã ihkôt me ipa catêjê jõtswa te me kam ihtêm, mã ihtÿj me hikwa ne ame gõr.

²⁹ Mã cormã Pahpãm mã ihcakôc kam, Jeju kuc pintuw ne ihkà te amji to hakati, ne ihpràti. ³⁰ Mã cõjkwa pĩn me hũmre pijakrut pê Mojxe xwÿ me Erij te amji to me ipipê, ne me cumã ihcakôc kam ihtêm. ³¹ Ne pê ajwar mempeaj to mempej, ne me ipu na cõjkwa pĩn hàhcujrohti ita impejti. Ne ame Jeju mã, por quê ha putwÿr nõ na Krĩpinkrên kam ihtyc xà ata to mehckakôc.

³² Mã Petrô na mehkwy ramã ame hõtswa mã ame hikwa, ne amentohkà to ipijapÿn, ne ihprôt pê ame ip-imprar, ne cute me Jeju jàhcujrohti ata pupun, ne hanea ne cahê na ajwar me xa atajê pupun. ³³ Mã me hũmre pijakrut atajê te me Jeju mã ihcakôc jicu xàa wÿr, mã Petrô te Jeju mã:

— Me ijõ Pahhi, ita ri me pahkrĩ na ri imãa impejti, na wa ha me amã ikrere nõ xãm, ne Mojxe xwÿ mã mehnõ xãm, ne Erij mã mehnõ xãm — hajÿr. Ne pê Petrô ihtÿj xa ne apu ihcakôc, ne nee ihcakôc xà ata na amji par nare.

³⁴ Ne cormã Petrô apu ihcakôc kwÿa kam, mã ahcakrã cator, mã ihkôt me ipa catêjê mã ampeaj kam ahcakrã te mehpro ata cupa. ³⁵ Mã ahcakrã pĩn cute me jũm jõkre ata par, mã me cumã:

— Hũmre ita pê ikra. Pom pê wa amji mã capi ata. Ne quê hãn ne ihcakôc, ca atÿj me kampa — hajÿr.

³⁶ Ne ihkêt, mã mehcarĩcti, mã ihkôt me ipa catêjê te me Jeju pit pupun, ne nee cute me amcro atajê nõ na, jũm mã cute me ampo pupun xà ata jarên nare.

Pê Jeju ahkrare nõ caprã

³⁷ Ne amcro nõ na, hàhkà jakôt pê me iwryc, mã me hàhtôa ne cute me Jeju cajpar. ³⁸ Mã me hàhtôti atajê jipôc ri me hũmre nõ ata te caràr kam ihtêm, ne kÿj cati pëa mã Jeju mã:

— Pahhi! Wa ha icãmter caxuw ana ahwÿ! ³⁹ Nãmri ampeaj kam ikra pyxit peaj ata kêan to kêan. Pê me pahcurê xwÿn carô kêan nõ ihpro, pê mör pejti kam, ihprôt pê caràr kam tẽ, ne amji rên kam tẽ, ne ajco ihhàr to ipa, ne apu catàt tÿj, ne harkwa na hàmprô. Ne ampo carô kêan nõ ita apu to kêanre, mã amji cahhy, ne nee jũ caxuw rÿ cute to tojnõ nare. ⁴⁰ Ne wa ramã amji caprÿ to ite akôt me ipa catêjê mã harên ne me ahna ijàhwÿr, cute ampo carô kêan ita to pøj prãmte, mã nee cute me to pøj nare. Ne jũ wÿr quê ame amji mã hamã, ne intête me cator — hajÿr.

⁴¹ Mã Jeju me cumã:

— Pÿhàpà, ampeaj kam ri pjê ita kam, me acunea kêanre. Ca nee ajte ito amji mã me ahimpej nare ita kam, xà wa ha itÿj ajkĩ me amã awcanã? Jũ mã wa ha ajte ne awcanã, ne me acahê na jũ mã amji to amcro to? — hane. Ne cute hũmre ata mã:

— Ajpên acãmter to mō — hajÿr.

⁴² Mã cute Jeju wÿr me haprô, mã me pahcurê xwÿn carô kêan ita te hipêr pjê kam ihkra ita mên. Mã Jeju te carô kêan ita mã harkwa hyr, quê cupê cato. Mã hamre, cupê cator pyrentu, mã ihkra ita capên pyrentu. Mã Jeju te hũm mã hõr. ⁴³ Mã mehcunea te Pahpãm carôt catia ata to amji mã me ipikrar.

Pê Jeju hipêr ihtyc xà na amji jarê

Ne ma cormã Jeju te ampo ton xà ata to me amji mã me ajkra, mã Jeju te ihkôt me ipa catêjê mã hũjarên to hajÿr he:

⁴⁴ — Ýhÿ, ikam me gapac to impeaj ne. Quê ha jũ caxuw jũmjê ihtÿj Ahàkà cati curê xwÿn jũhkra mã me cugô — hajÿr.

⁴⁵ Mã nee cute me ita par pej nare, ne nee me hahkre pej nare. Cute me hahkre pej xà ita me cupê ipimxur tu ne nõ ita kam, jũ wÿr quê me hahkre pej. Ne mehpahàm cupate nee cute ampo ata na me Jeju cukij nare.

Pê Jeju amji jirôa pê jũm cati kôt harê

⁴⁶ Mã ihkôt me ipa catêjê te ajpên jirôa pê me cati to ajpên mã mehcahôc kam mehtêm. ⁴⁷ Mã Jeju te ramã, por ampo to ame amji kampa ata na me hahkre pej. Na ri cute ahkrare nõ ita pÿn, ne amji cape na hãm, ne me cumã:

⁴⁸ — Ýhÿ, me ahkrare nõ ita pupu he, incirre ne capônÿre. Ne imã quêt ahkrare ita cati, ne ihkĩnte me acunea kryjre. Ne quê ha jũm te icwÿrjapê ahkrare nõ ita na amji caxàr na, quê ha hanea ne ina amji capa.

Ne quê ha jũm te ina amji caxàr na, quê ha hanea ne cute ajpên ikujahêc catê ata na amji capa. Ne por me akam me gapyre mã mehkryjre atajê ri, imã me catia to me cati — hajÿr.

Jeju tehcajpar catê nõ

⁴⁹ Mã Jowãw Jeju mã:

— Ýhÿ, me ijô Pahhi, wa ite me hũmre nõ ita pupun, mã ihtÿj gaprÿa to ame pahcurê xwÿn carô kêan to pøj to mō. Wa ite ahna me hõmpun ne me cupê ihcahpêrhÿr. Ampo na? Nee cupê me pahkwÿ nare na ri — hane.

⁵⁰ Mã Jeju me cumã:

— Nee ca me jũm ita cahpêrhÿr nare. Ampo na? Quê ha jũm nee ame ato kêan nare na, quê ha ihtÿj me atehcajpar to ipa — hane.

Pê jũmjê itajê nee Jeju na me amji caxàr nare

⁵¹ Mã ramã cõjkwa wÿr Jeju jàpir xà jô amcro na hàhtêp to mō. Cwÿrjapê ri Jeju te Krĩpinkrên wÿr amji kràr. ⁵² Ne cute mam ihkôt me ipa catêjê nõ kujahêc. Ne ma me mō ne Krĩrĩtpej jô pjê kam, krĩ jacot ata na me cator, cute me hàhhuc xà to me hàhcuprôn prãmte. ⁵³ Mã xãmte curi mehkri catêjê atajê ma ame Jeju na amji caxàr caca. Ampo na? He cute me Jeju te Krĩpinkrên wÿr ihkràr na me hahkre pej na ri. Pê ajco Krĩrĩtpej jô pjê kam mehkri catêjê atajê ma ame Juta catêjê curê, na pê ma ame Jeju na me amji caxàr caca. ⁵⁴ Mã Tijac me Jowãw te ita na mempar, ne me Jeju cukij to:

— Xà ajkĩ amã ite cõjkwa pĩn cuhy pÿm na ijàhwÿr, mã cute krĩ ita kam mehcunea to caxàr na me ito prãm? — hajÿr. ⁵⁵ Mã Jeju ihkôt me ipa catêjê wÿr ipipkjêr, ne hõtpê me kam incàcàcre, mã me cumã:

— Me apê ite amji kam ijapac xà na ijahkre kêatre. Ampo na? He nee me Ahàkà ita me hipec xà caxuw mehwÿr cator nare, ne me hũtâr xà caxuw ri mehwÿr cator — hane. ⁵⁶ Ne ma krĩ jacot nõ ita wÿr me mō.

Pê Jeju kôt mehkwy ame ipa prãm

⁵⁷ Mã Jeju ihkôt me ipa catêjê me, me mō, mã mam jũm xũmre nõ me hÿrmã cator, ne Jeju mã:

— Ýhÿ, wa ha itÿj ma akôt mō, ca ha jũ ri tẽ, wa ha ma akôt tẽ — hane.

⁵⁸ Mã Jeju cumã:

— Xà ca ha pijamã awcanã? He hõtpê xore mã ihkre, mã kam ihkrĩ, ne hõtpê cuwênre mã hahê, mã kam hikwa, ne ihkĩnte ipê me Ahàkà pê hũrkwa kam hàhhuc xà caxuw hamreare — hane.

⁵⁹ Ne ihkôt Jeju te ihnõ cator ata pupun ne cumã:

— Mër ikôt mō — hajÿr. Mã cumã:

— Wa ha itÿj akôt mō, mër ito tojnõ wa ha ma amji jaxà, ne inxũ tyc xà na hõmpu ne harêt, ne cormã me akôt mō — hane.

⁶⁰ Mã Jeju cumã:

— Quêt taa ty, quê ha mehtyc catêjê kwÿa me harêt. Ne ca nare, ca ha quêt ikôt tẽ, ne me cumã Pahpãm pê pjê cunea jô Pahhiti na harên to mō — hane.

⁶¹ Mã jũm xũmre nõ mehkôt Jeju wÿr cator ne cumã: — Ýhÿ, wa ha ma amji jaxà ne tẽ, ne inxê me inxũ mã amji jarẽ, ne me akôt imõr pyrentu — hane.

⁶² Mã Jeju cumã:

— Quê ha jũm hàpên xà kam apu pjê to ipipkjêr to ihcuhtacti to mō, ne hacpÿ mã amji jahpan xà rít, ne amji pê to hikôt, ne ahna cupê ihkaj na. Jíkjê na quê ha jũm te Pahpãm pê Pahhiti ata mã hàpên kam ihtêm, ne cumã hàpên cahtiri cute hicu na, quê ha nee jũm xũmre ata Pahpãm mã hàpên xà caxuw impej nare — hane.

Jeju kôt me ipa catêjê kwÿ jàpên xà

10 Ita jirô pê mã pê Jeju me hũmre to xetënta ne ihkôt me to ajkrut ne me capi, cute amencrán xà caxuw. Ne cute me hũmre to ipijakrut partu ne amehkujahêc par, quê mam ame pra ne krí cati me krí jacot cunea kôt, por jũ ri Jeju apu ipa prãm ata wÿr, cute amji cumam amehkujahêc. ² Ne me cumã:

— Ýhÿ, pom me gápên xà pê Pahpãm wÿr ate me to apipkjêr xà ita pê arÿjhy intep to cuprôn xà pyràac. Ne pur catia to cati, ne ramã inteptu, ne cute me to cuprôn catêjê ri cormã mencre. Cwÿrjapê ca ha me pur catihti to hõ tekjê ata na ahwÿ, quê hipêr me amã me to cuprôn catêjê kwÿ kujate. ³ Ne wa ha me ato ampo pryre capônÿre atajê kra pyràac, ne rop cahàc jàprêhti atajê cajpuw me akujate. ⁴ Ca ha nee ame kàhà cwÿr nare, ne nee amehpore incjên xà me, ihpar kà incwÿr nare. Ne me acatyatre na krí wÿr me pra, pom ite me amã krí to ihmpej xà atajêa wÿr. Ne nee pry kôt ame gàhhuc, ne cama ame acakôc to me apa nare.

⁵ — Ne ca ha krí ata kam ikre nõ mã axà, ne mehcajrên, ne me cumã: “Hàpà, quê ha Pahpãm ikre ita kam me ato impejti ne, ne me acaxwãm pê me ato acarícti ne” hane. Quê ha jũmjê nee cumã amji caxwãm pê amji carícti na prãm nare na, quê ha ate mehcajrên xà ita hacpÿa ne me awÿr amji jacjê. ⁶ Ne por curi me gàhhuc xà nõ ata ri, quê ha jũmjê mã amji caxwãm pê amji carícti na prãm na, quê ha Pahpãm ihtÿj jũmjê itajê to mehcarícti ne. ⁷ Ca ha ikre ata kam me ahtwÿ, ne kaam me apà, ne kaam me ikõ, ne por cute me amã me hõ jõr atajê, ca ha atÿj me ku. Me apê me gápên catêjê, ne me hàpên catêjê cunea hõtpê ihtÿj me hàpên jahpan xà na me apà, ne me ikõ. Ne ikre kam me gàhhuc xà ata ca ha kam me gàhhuc tu, ne nee atÿj ihkwÿ kôt ame gapôj to me apa nare.

⁸ — Ne hãn ne krí atajê mã me gapôj, quê me ana me amji to pøj, ne me amã ampo gõ atajê, ca ha atÿj me ku. ⁹ Ne curia krí kam me hà atajê, ca ha atÿj me caprã, ne krí kam atajê cunea mã atÿj gũjarên to hane he: “Ýhÿ, por Pahpãm pê Pahhiti te pjê to ihmpej xà ata ri, ramã hàhtêp” hane. ¹⁰ Ne ca ha jũ ri krí nõ kam me acato, quê jũmjê mehkĩnte curi mehkĩr catêjê ma ame acaca, ne nee me ana amji caxàr nare na, ca ha

krí cape wÿr me gapôj, ne me cumã gũjarên to hane he: ¹¹ “Me amã me ipar prãm nare ita kam, wa ha itÿj me ipar tẽte pro jacrô jürê, ne me acunaa mã me gõ krí ita jacrô capĩ. Quê ha te me amã me ipar prãm nare cakrô, ca ha atÿj Pahhiti te pjê to ihmpej xà ata te me awÿr cator xà ata to me amji japackrea ne” hane.

¹² — Ýhÿ, ampeaj kam wa ha me amã awjarẽ, quê ha cute me acukij ne me ato ipicokjêr xà jô amcro kam ahtwÿ, quê ha Pahpãm nee krí ata caprĩ nare. Ne quê ha krí ata jirôa pê cumã Krĩhpôc jô krí wej ata caprĩ — hane.

Pê Jeju krí krã nare atajê kên mã hàr na harẽ

¹³ — Pÿj me hêj xi Coraxim jô krí, me Tep jô krí ata, ca ha atÿj amji kên mã me amji jaxà. Ne wa ha me amã mam krí wej itajê jarẽ. Pê krí wej itajê japrÿ pê Kên jô krí me Teppro jô krí. Pê ajco cama ame Pahpãm to kên, pê Pahpãm cute ame to kên jahpan xà na, me hipej tu. Ýhÿ, ampeaj kam wa ha me amã awjarẽ, quê ha mam krí wej atajê kam, pom curmã me akam ame hàpên xà pihho impejti ton to ipa itajê to me apê na mã, quê ha rÿ pèa mã ihkên jicu, ne quêt catyt kam, impejti na ipa, ne caxuw hihô na ipa, ne hipro na ipa, ne ihkà kên na ipa. ¹⁴ Ne mehcukij ne me to ipicokjêr xà jô amcro kam, quê ha Pahpãm mã me girôa pê Kên jô krí me, Teppro jô krí caprĩ. ¹⁵ Ne ca Capernam jô krí ita, ca atÿj kàj mã, cõjkwa wÿr gápìr na amji cãmjĩ cakrô, quê ha Pahpãm ahpar mã akujate, ne mehtyc jaxà kam amẽ — hane.

¹⁶ Ne Jeju ihkôt me ipa catêjê mã:

— Ne por jũmjê me akampa atajê, quê ha hanea ne me ikampa, ne por jũmjê ame acurê atajê, quê ha hanea ne ma ame icurê. Ne por jũmjê me icurê atajê, quê ha hanea ne ma ame Inxũ Cati te ikujahêc ata curê — hane.

Pê mehkwy me amji jaxà

¹⁷ Mã ma ihkôt me ipa catêjê te me xetënta ne ihkôt me ipijakrut itajê me cutor, ne ma pjê cunea kôt ame ipa. Ne amcro nõa na cute me amji jacjên, ne me hakrya to me hakry, mã cute Jeju mã me amji jarên to:

— Ýhÿ, me ijô Pahhi, wa me gaprÿ to pøj, mã me pahcurê xwÿn carõ kên kwÿ ihtÿj me ikampa — hajÿr.

¹⁸ Mã Jeju me cumã:

— Ýhÿ, wa ite me pahcurê xwÿn jô pahhiti pê Xatanaj ata pupun. Mã cõjkwa pĩn ihpÿm xà ita pê ihhêj rũm pahhãjê cuxê pyràac ne ihpÿm. ¹⁹ Me ikam gapac to impeaj ne he. Wa ite me amã icarôt catia me, ite amji jahkre pej catia jõr, na ca atÿj gapacta ne cagã me, pacti kam ame gàhhuc to me apa, ne ate atÿj me pahcurê xwÿn pê me carôt to ihpec. Na quê ha nee jũ caxuw ampo itajê nõ me anõ to kên nare. ²⁰ Nee ca me pahcurê xwÿn carõ kên te me apar xà pyrên ame gakry nare. Ne quêt Pahpãm te mehkwy caxuw me acapi, ne amji mã cõjkwa kam hõ kàhhôc kam me gaprÿ nõr pyrên, ca ame gakry — hane.

Ampeaj kam Jeju jakry

21 Mā pyt jÿr xà ata kam, Pahpām Carō Pejti kōt Jeju jakrya to hakry, mā cute harēn to hajÿr he:

— Inxū, apē cōjkwa me pjē kam Pahhiti. Ne ate me cupē hahkre kēatre atajē mā ampo pimxur atajē cunea capō, ne me cumā to apipē. Ne mehķĩnte ate me cumā hahkre pej catējē me, cute me amji jahkre pej catējē pē ampo itajē to apimxur. Ÿhÿ Inxū, pom ite ampo na garēn par itajēa to, pē ca ramā amji to ahimpej. Ne imā acaca xà ita cunea impej pit.

22 — Inxū, ca ramā ate imā ampo cunea jōr. Ne amā pit mā ijahkre peaj to ijahkre pej, ne nee arān xà na jūm mā ijahkre pej nare. Ne hanea ne imā pit mā gahkre peaj to gahkre pej. Na wa ha jūm mā ato hahkre, quē ha hanea ne jūm ita mā gahkre pej pejti ne — hajÿr.

23 Ne cute ihkōt me ipa catējē mā pit mā harēn, ne me cumā:

— Me gakry, hamre me apej mā me apÿm. Por ate me ampo pupun ata pyrēn ca ame gakry. 24 Ampeaj kam wa me amā harē, Pahpām jarkwa to ihcakōc catējē jāhtō, ne pjē jō pahhi catējē jāhtō, ne tee ame ampo itajē pupun prām cakrō, quē me hōmpun nare. Ne me ca nare, ca atÿj me hōmpu ne me kampa. Mā me akĩnte tee ame ampo ita par prām cakrō, nee cute mempar nare — hajÿr.

Hūmre pē me hàhkĳ na ihtečajpar catē

25 Mā amcro nō na me cumā Mojxe xwÿ jō kàhhōc to hahkre catējē nō xām, cute Jeju capi ne ihkēn mā mēn prāmte ihcukij, ne cumā:

— Ÿhÿ, Pahhi, wa ha acukij, jū mā wa ha ajte ne Pahpām cahē na itĳr rohnÿtti mā na ipa? — hajÿr.

26 Mā Jeju cumā:

— Ÿhÿ, pom pē Pahpām Mojxe xwÿ mā harē, pē harkwa kōt ahna ihhōc ita? Ne mēr ampo ca ate hō kàhhōc kam cahÿt ne kam gapac? — hane.

27 Mā hūmre ita cumā:

— Ÿhÿ, wa ite cahÿt, mā harēn to: “Ca ha ate ģĩ cunea me, acarōt cunea me, acaxwÿn cunea me, ate amji kam gapac xà cunea to, amā Pahpām pē Pahhiti ata ihkĳn. Ne hanea ne amā amji kĩnti ita na, quē amā me akwÿ kĳn” hajÿr — hane.

28 Mā Jeju cumā:

— Ÿhÿ, ca ate to hamār, ca ha ate ampo itajē cunea ton to apa na, ca ha Pahpām cahē na atĳr rohnÿtti mā na apa — hane.

29 Mā me cumā Mojxe xwÿ jō kàhhōc to hahkre catē ita te cute amji mā ihpahām hi prāmte, hipēr Jeju cukij, ne cumā:

— Mēr jūmjē mā me ikwÿ itajē? — hajÿr.

30 Mā Jeju te cumā jūmjē pē mehkwy atajē to hahkre to impejti prāmte, cumā hūjarēn xà ita jarēn, mā cumā:

— Ÿhÿ, hūmre nō ma Krĳpinkrēn pĳn, Krĳcuxwati wÿr iwÿrĳc. Mā pry cahtiri me hàhkĳ xi catējē te me kam

ihēm, ne amehcahhy, ne me cupē ihkà caxàr, ne ma me to mō. Ne curia cute me hĳcu mā ihtyc cahàc ne nō.

31 — Mā ahna ahtūmre mā hūmre nō ita pry ata kōt mō, ne por me hūmre nō pry kōt mō ita pē Pahpām mā mehčajrēn catējē nō. Ne cute hūmre ata pupun, mā pry kam ihcujpāt ne ihtyc cahàc ne nō. Mā ajte nee cute ihtečajpar nare, ne cute pry hyr, ne pry ĳĳkjēa rūm tē ne hakren, ne ma mō.

32 — Mā ahna ahtūm nare, mā ihkōt me hūmre nōa cator. Ne por hapu na cator ata pē Pahpām jūrkwā jamār catējē nō. Mā ma mō ne cute hūmre ata pupun, mā ihtyc cahàc ne nō. Mā cupē mam ihnō ita pyrāac, ne ajte nee cute ihtečajpar nare, ne cute pry hyr, ne pry ĳĳkjēa rūm tē ne hakren, ne ma mō.

33 — Mā ahna ahtūm nare, mā me hūmre nōa pry ata kōt mō, ne curi cator. Ne cupē nee Juta catējē nō nare mehķĩnte, ne cupē Krĳrĳtpej jō pjē catējē jō xūmre nō, ne ihcakrit. Mā cute hōmpun, ne ampeaj kam cumā caprĳ. 34 Mā ahna hàhtēp, ne cute ihtečajpar pyrentu. Ne cumā inxec ata cuhhōn, ne ampo cacō xÿhti ata to cumā ihcahhē. Ne hanea ne ampo twÿm to cumā ihcahhē, ne cupēhkà to cumā ihcupu, ne hō cawrō cahàcre kam hÿr, ne ma to mō. Ne me hàhhuc xà wÿr to cator, ne curia cute hamār to apē.

35 — Ne apēa kam, cute ikre jō pahhi mā ihpore hy pijakrut ata to hàmjōr, ne cute cumā: “Hamre, ca ha hamā, ne ahna ģō pore kwÿ rē, wa ha hacpÿ ne amji jaxà, ne itÿj amā amġō” hajÿr — hajÿr.

36 Ne Jeju te me cumā Mojxe xwÿ jō kàhhōc to hahkre catē ita cukij ne cumā:

— Mēr hōhō, imā amji jarē, mencre atajē nō te mōr-mō jūm xūmre ihtyc cahàc ne nō ita to amji kwÿ? — hajÿr.

37 Mā cumā:

— Por cumā caprĳ ata te ri hūmre ata to amji kwÿ — hane. Mā Jeju cumā:

— Mēr hōhō, ca ha tē, ne cuxà ate amji kam gapac xà to hanea, ne amā me akwÿ kĳn — hane.

Pē Jeju Martakwÿj me Marijkwÿj pupu

38 Ita jirō pē mā pē ma Jeju ihkōt me ipa catējē me pry kōt me mō, ne ma krĳ jacot ita mā me cator. Mā curi cahāj japrÿ te Martakwÿj ata te hūrkwā kam me ahna amji caxàr, mā me hàhhuc. 39 Mā Marta tōj japrÿ te Marijkwÿj ita Jeju cape na hÿr ne jÿ, ne apu cute ampo to hahkre xà na kampa. 40 Mā ihķĩnte Marta ikre kam hàpēn xà jāhtōti atajē to apu amji to ahtwÿ, ne apu ihkrihkrit, na ri Jeju na hàhtēp ne cumā:

— Xà ca nee ito amji kam gapac nare, pom wa itōj kĩnte ahte ijāpēn xà jāhtōti to apu apē ita? Na ca ha ijāpēn xà ita caxuw imā itōj kujate, quē itečajpa — hane.

41 Mā Jeju cumā:

— Marta, Marta, ampeaj kam ca apu amji to ahtwÿa to amji to ahtwÿ, ne apu akrihkrit, ne to apu amji cahpērka. Ne ca atōj kĩnte, ġāpēn xà to pit mā amji kam gapac to apa. 42 He quēt atōj te amji mā ampo pyxit peaj catihti ata capi ata pē ina hÿr, ne cute ikam hapac.

Ne jũ wÿr quê jũm cupê ihkrã kam, cute ipar xà itajê to pøj — hane.

Pê Jeju Pahpãm mã mehcakôc to me cumã hahkre

11 Amcro nõ na Jeju apu Hũm mã ihcakôc, ne cute cumã ihcakôc jicu, mã ihkôt me ipa catêjê nõ te Jeju mã:

— Pahhi, Jowãw xwÿ cuxà me imã Apãm Cati mã me icakôc to hahkre. Pê ajco ihtÿj ihkôt me ipa catêjê mã to hahkre — hajÿr.

² Mã Jeju me cumã:

— Ýhÿ, ca ha Inxũ Cati mã me acakôc prãm, ne me gũjarën to hane he:

“Me ijõ Inxũ, wa me icunea quêt acatihti ne apejti na, me gahkre pej to prãm.

Ne wa ate pjê kam mehcunea to ahimpej na me prãm.

³ Ne ahpÿanre na, amcro cunea kam, me imã me ijõ gõ.

⁴ Ne ite me ato kên itajê, ca ha me icuxà to tojnõ ne hicu, ahnaa mã wa ite ramã cute me ito kên atajê to tojnõ ne me hicu.

Ne me ipytà me pahcurê xwÿn pê, quê nee me imã incaca xà kêanre to hahkre nare.

Hamre” — hane.

⁵ Ne Jeju te ihkôt me ipa catêjê mã hũjarën xà ita jarën, mãr quê cute Pahpãm mã mehcakôc, mã ihtÿj me kampa na me hahkre pej, ne me cumã:

— Me ita to amji kampa, ne ihkôt me hakop. Quê ha me anõ mã gõ ikwÿ nõ nõ, ca ha caxwa cahtiri ahna gahwÿr xà na hũrkwa wÿr tẽ, ne cumã: “Ikwÿ nõ, imã kwÿr krã to incrê ne agõ, wa ha amcro nõ na hacpÿa mã amã cugõ. ⁶ Curmã ihmat pĩn, iwÿr ikwÿ nõ cator, ne ipê cumã ampo jõr xà jamreare, na ca ha imã ihnõ, wa cumã cugõ” hane.

⁷ — Quê ha akwÿ nõ ita ikre caxwãm pê amã: “Quê, hamreare, nee ca ame icahpêrkàr nare, wa ramã ite to harkwa jihê, ne ramã me ikra mea mã ame ijikwa, jũ wÿr wa to xa ne amã kwÿr krã itajê nõ gõ” hane.

⁸ — Ne ampeaj kam wa me amã awjarë, quê ha ate cupê hõt cahpêrkàr cupate, ihtÿj to xa ne amã ate ampo cunea na prãm atajê gõ. Ne nee mã apê hõ ikwÿ nõ cwÿrjapê quê ha amã hõr nare.

⁹ — Cwÿrjapê wa me amã awjarë, ca ha ate me gahwÿr na, ca ha atÿj me acwa, ne ate me hapên na, ca ha atÿj me cumã gapôj, ne ate me harkwa cahhyr na, quê ha ihtÿj me amã amji jihê mẽ.

¹⁰ — Ýhÿ, mehcunea ame ampo na ahwÿ atajê, quê ha ihtÿj me cucwa, ne mehcunea ame hapê atajê, quê ha ihtÿj me cumã hapôj, ne ame harkwa cahhy atajê mã, quê ha ihtÿj amji jihê mẽ.

¹¹ — Měr hõhõ, xà quê me anõ kra tep na ahwÿ, ca ha tep kaj na ajkĩ cumã cagã nõ gõ? ¹² Nare quê akra hĩ xêt kwÿ na ahwÿ, ca ha ajkĩ ihkaj na cumã pacti nõ to irõ ne agõ? Jũ wÿr ca me anõ akra to hane. ¹³ He me apê me hũmre pit, ne Pahpãm kĩnte me akêanre

cakrõ, ca atÿj hõtpê me akra mã me ampo pej pit gõ. Měr hõhõ, quê ha quêt Pahpãm cõjkwa kam ihkrĩ ata, ihtÿj me amã, por ca Carõ Pejti na me ahwÿ ata gõ — hane.

Jeju me, me pahcurê xwÿn carõ kên jõ pahhi

¹⁴ Ne amcro nõ na Jeju ame hũmre nõ përkêt ita pê me pahcurê xwÿn carõ kên to pøj. Pê ampo carõ kên nõ ata nee ajco hũmre ata cakôc na hamãr nare, na pê nee ihcakôc nare. Pê Jeju cupê cator pêê, pê ihcakôc kam ihtêm pyrentu. Mã me hàhtõtì atajê te ahna me hõmpun, ne hõmpun xà ata to cute amji mã me ipikrar. ¹⁵ Ne mehkwy ajpên mã me harën kên to:

— Ýhÿ, Jeju ihtÿj ame pahcurê xwÿn carõ kên to pøj to ipa. He nee me Pahpãm carõt to ame hapôj nare. Ampo carõ kên jõ pahhiti japyr pê Perxep pê Xatanaj te ri Jeju mã me caxuw carõt jõr — hane.

¹⁶ Ne cute Jeju kên mã me mën prãmte mehkwy ihtÿj hipêr mehcukij, cute me kam mare mã ampo pihho cattia ton, mã mehcunea te me hõmpun, ne cormã quêt Pahpãm te cumã carõt jõr na me hahkre pej prãmte.

¹⁷ Mã ramã Jeju te cute amji kam me hapac xà ata na me hõmpun, ne me cumã ihkôt harën to hajÿr he:

— Ýhÿ, quê pjê nõ kam amehkrĩ catêjê atajê me amji jakrã, ne me taa me ajpu ne ihtÿj me amji jipej. Ne quê ikre ry nõ kam mehkjêjê atajê me, me amji jakrã, ne taa me ajpu, ne hanea ne ihtÿj me amji jipej. ¹⁸ Ita pyrãc pej ne, quê Perxep pê Xatanaj, pê me pahcurê xwÿn atajê me mehkwy me, me amji jakrã, ne taa ame ajpu, ne ihtÿj me taa me amji jipej. Ca me pahcurê xwÿn carõ kên jõ pahhi te imã icarõt jõr, wa carõt kôt ampo carõ kên to pøj na, ame ijarë. ¹⁹ Ne měr jũm te ri me akôt me ipa catêjê mã me carõt jõr, cute ampo carõ kên to pøj xà caxuw? Xà Xatanaj te ri ajkĩ me cumã carõt jõr? He quê ha taa me amã amji jarë, ca ha me caa ate me to ihcupan xà ita na me amji jahkre pej. ²⁰ Ne ampeaj kam, wa quêt Pahpãm carõat to ampo carõ kên japôj to ipa, cwÿrjapê ri ihkõat ramã me acunea te me Pahpãm pê Pahhiti himpej xà te me awÿr cator na me hahkre pej.

²¹ — Ýhÿ, quê ha jũm xũmre tÿjti mã hàprê xà cunea, quê ha hàprê xà atajêa to amji jamãr to impeaj to ipa, quê ha nee jũm cupê hõ tehkrêj nõ caxàr nare.

²² Nãmri quê ha me hũmre nõ te jũm xũmre ata jirõa pê ihtÿjti na, quê ha kam tẽ, ne to apkjê, ne cupê hàprê xà itajê cunea pytà, ne amji mã cupê hõ tehkrêj cunea pytà, ne ma to tẽ.

²³ — Ýhÿ, quê ha jũmjê te itehcaypar to prãm nare na, quê ha me cupê icuna mã hàprê catêjê. Ne quê ha jũmjê imã ampo to cuprõn nare na, quê ha me cupê ito me ipicràn catêjê.

Ampo carõ kên te amji jaxàr jarën xà

²⁴ — Quê ha jũm pê me pahcurê xwÿn carõ kên nõ te cator na, quê ha carõ kên ata ma amcràti kam apu ipa, ne apu ihkôt xà japên to ipa. Ne nee ihkôt xà nõ na cator nare, ne taa amji mã: “Wa ha ma, por hũmre jĩ

pê ijûrkwa pê icator ata wÿr amji jaxà" hane. ²⁵ Ne amji jaxà, ne ihhêj ne ikre caprÿ, ne ihcapôn pejti te hãm na hõmpu. ²⁶ Ne ma tẽ, ne cute hirõa pê me pahcurê xwÿn carõ kên te xet atajê japrõr, ne mehcunea ikre pê hĩ ata mã me acjêj, ne curia amehkrĩ. Mã hũmre mã mam ampo carõ kên xàr ata kam, cute amji cajpêr xà ata jirõa pê kam cute amji cajpêr xà, ne ihkêanre — hane.

Pahpãm jarkwa kòat ipa catêjê ri ampeaj kam me hakryti

²⁷ Ne Jeju te itajê jarên jirõ pê mã ri me cahãj nõ te me hàhtõa jipõc ri kÿj cati pëa mã, cumã harkwa to:
— Jeju ampeaj kam apej. Ne mõrmõ pê ca anã kam apÿm ata ihtÿj ajco ato pijahõ, ne ampeaj kam apejti ita kam apyrên hakry — hajÿr.

²⁸ Mã Jeju cumã:

— He cute me Pahpãm jarkwa par ne me hũpar tu, ne ihkòat me ipa catêjê atajê ri, inxê jirõa pê me hakry — hane.

Pê Jeju ampo pihho catihti na me hàhwÿr catêjê mã cawpa

²⁹ Mã me hàhtõa te Jeju pu na me cuprõn tu, mã cute me cumã ihcakõc kam ihtêm, ne me cumã:
— Ýhÿ, amcro ita kam me apê Juta catêjê, ca pjê kam ame akrĩ atajê cunea kêanre. Na ca ajte me ina gàhwÿr to me hane he: "Me imã ampo pihho catihti me ampo pejti to, wa ha me hõmpu, ne cormã Pahpãm te aku-jahêc na me gahkre pej" hane. Cakrõ wa ha nee me amã ampo pihho catihti, impejti atajê nõ ton nare. Ne wa ha cama amji to irõ, ne me amã Jona xwÿ jarên xà ita jarê. Ampo na? He ipê hũràac, na wa ha me amã harê.

³⁰ — Ýhÿ, pê me cumã Pahpãm jarkwa to ihcakõc catê na Jona xwÿ ata ipa, ne ma Ninew jõ krĩ catêjê wÿr tẽ. Ne curi mehkrĩ catêjê mã Pahpãm jarkwa jarê, por pê Pahpãm Jona mã harên xà atajêa na me cumã harên pa. Na quê ha me Ahàkà Jona xwÿ cuxà ita kam amehkrĩ itajê mã Pahpãm jarkwa jarê. ³¹⁻³² Ne Pahpãm te mehcukij ne me to ipicokjêr xà jõ amcro kam, quê ha Ninew jõ krĩ kam mehkrĩ catêjê me acuna mã me hãm pyrentu, ne ame ana mehcakõc kêanre ne, ne ihtÿj me acurê mã me amê. Ampo na? Pê Ninew jõ krĩ catêjê atajê ihtÿj me ampo kên ton jicu, pê Jona xwÿ me cumã Pahpãm jarkwa jarên xà atajê kòt, pê me hicu. Ne wa ampeaj kam me amã amji jarê. He ipê me Ahàkà, wa amcro ita kam, pjê ita kam apu ipa, ne me Ahàkà ita ri Jona xwÿ jirõa pê cati. Ne ihnõ xwÿjê, pê Juta catêjê jõ pahhi pê Xarõmãw xwÿ ita, me cupê pahhi catêjê kwÿ jirõa pê amji jahkre pej. Mã me cupê pahhi catêjê jàhtõa ne hÿrmã me cator, cute cukwa kam ame ampo jahkre pej prãmte. Ne pê cô cati jĩkjê rũm pjê xa ata jõ pahhikwÿj cahãj, ne ma Xarõmãw wÿr tẽ, cute krã kre te amji jahkre pejti to hahkre xà atajê na impar prãmte. Ne Pahpãm te mehcukij ne me to ipicokjêr xà jõ amcro ata kam, quê ha pahhikwÿj cahãj ata, ihtÿj me

acuna mã ihcakõc kêanre, ne me acurê mã me amê. Ampo na? He amcro ata kam, pjê ita kam, ipê me Ahàkà ihtÿj me amã ampo itajê to hahkre to ipa, ne pa wa Xarõmãw xwÿ jirõa pê icati cakrõ, ca nee me ipar prãm nare.

Pahte amji kam me pajapac xà pejti pê hàhcujro xà

³³ — Ne ihnõ xwÿjê, jũ wÿr quê jũm hàhcujro xà nõ pôc ne hãm xà kam hàhcujro impejti kaj na hãm, ne jũ wÿr quê paraj krac ri hãm. Quê ha quêt hàhcujro xà ata xãm xàa kam hãm, quê ha mehcunea me acjêj atajê hàhcujro kam me irĩt pejti ne.

³⁴ — He me panto pê me pajĩ mã hàhcujro xàa. Quê ha me panto irĩt pejti, ne ampeaj kam me pajĩ kam me pamã me pajàhcujro hipu. Nãmri quê ha me panto te ihkêanre na, quê ha me pajĩ cunea kam awcapàtkò. Jĩkjê na ca ha ite amji kam ijapac xà pejti pupu, ne mehkõpĩ ne ihkòat me apa na, ca ha atÿj kam me gapac to me apa. Nãmri ca ha ate me hajÿr nare na, ca ha atÿj ame apa, ne me apê amji jahkre kêatre ne.

³⁵ — Cwÿrjapê ca ha ma me amji jamã, ne ma ihhêj rũm me gĩ kam me gàhcujro xà ita jamã, cõt mã ca gàhcujro xà ata to amji pê kam awcapàtkò. ³⁶ Quê ha me gĩ cunea kam hàhcujro xà ita te me ato hipu na, quê ha nee me gĩ kam awcapàtkò nare, ne me gĩ cunea kam hàhcujro ita ihpràti ne. Ne ihhêj ne me acaxwãm pê hàhcujro xà nõ xa ne ahcujro — hane.

Pê Jeju Parixêw catêjê nõ jûrkwa kam apà

³⁷ Mã Jeju te ihcakõc jicu, mã Parixêw catêjê nõ te hũrkwa ri hàpàn prãmte hator. Mã ma Jeju ihkòt mõ, ne hõ pyxwÿr xà na hÿr. ³⁸ Pê nee Jeju Parixêw catêjê te me amji ton xà ata kòt, hũhkra cuhhõn nare. Mã Parixêw catêjê nõ ita te, cute nee hàpàn xà wÿr hũhkra cuhhõn nare ita na hõmpun, ne to amji mã ipikrar.

³⁹ Mã Jeju te me cumã:

— Ýhÿ, me apê Parixêw catêjê, ca nee ampo caxwãm pê me to amji japackre nare, ne põ rũm pit mã me to amji japackre. Ca põ rũm me gõ cuhkõn me, me gõ incrat catut cuhhõn to pit mã me amji japackre. Ne me caa, põ rũm pit mã me ate me gàhcukrêj cuhhõn ata kĩnte, me acaxwãm pê me akên te me ato hipu tu. Cakrõ ca ajte nee me acaxwãm pê ate amji kam me gapac xà kên itajê to me amji japackre nare.

⁴⁰ — Ne ampeaj kam ca ame ato kam waj, ne pom Pahpãm te põ rũm aton ita te ri hajÿr ne acaxwãm pê aton. ⁴¹ Ne gapacta ne me gõ incrat caquêc cuhhõn to me gapac kêt, me akõm xà me. Ne impejti ita ri quêt me amã impej he, ca ha me gõ incrat kam ampo itajê me, me akõm xà kam ampo itajê, ca ha me cupê hamreare atajê mã me agõ. Ca ha ate me cupê hamreare atajê caprĩ na, quê ha põ rũm ampo itajê cunea me amã ihtetetti ne.

⁴² — Pÿj me hêj xi Parixêw catêjê kwÿ! Ca ha atÿj me akên mã me axà ne me gamre! He pê ihtÿj Pahpãm me amã ampo cati me ampo kryjre ton na awjahkre. Na ca gõtpe Pahpãm mã, por ca ihcunea to me ajpa atajê

jĩkjê kryjre ne me agõ. Pom ca pàrhyre me, ampo kwỳ na kyre pê hĩ jàhwỳr atajê pyxit ne hãn ne me cumã agõ, ne icahhur to me gõ tekjê na ri Pahpãm mã im-pej. Cakrõ, ca nee me akwỳ to impej nare, ata pê me amã Pahpãm kĩn nare. Na ri Pahpãm mã, me ate amji kam me gapac xà itajê na me akam, cupê ihkaj na. Ampo na? He cumã ampo ita catia to cati, ihkryjre itajê jirõa pê. Na ri cumã me ate ajwar me ton na, me ato prãm.

43 — Pỳj me hêj xi Parixêw catêjê kwỳ! He ca gõtpe me hũjamãr catêjê catia krĩ xà ata kam me cahê na me akrĩ prãm, ate me cuprõn xà kam. Ne ca gõtpe krĩ cape na cute me apejti na me garên na me to prãm.

44 — Pỳj me hêj xi! He me apê mehtyc kre kam me hikwa, mã nee me hõmpun ne me hahkre pej nare kam, incwỳrpê me pra atajê pyrãac. Ne ihhêj ne põ rùm me apejti, ne me acaxwãam pê ate amji kam me gapac xà kên pit apu hikwa — hajỳr.

45 Mã me cumã Mojxe xwỳ jõ kàhhõc to hahkre catêjê nõ hanea ne curi jỳ, ne cute Jeju jũjarên xà ita kam hapac, ne cumã:

— Pỳhàpà, Pahhi, ca acakõc xà ita to ate acakõc ne hanea ne me ixũn — hajỳr.

46 Mã Jeju cumã:

— Pỳj me hêj xi me apê me cumã Mojxe xwỳ jõ kàhhõc to hahkre catêjê! Ca hãn ne mehcunea mã harên to hajỳr to me apa ne me cumã: “Ỗhỹ, ca ha atỳj Pahpãm jarkwa cunea kõt me apa. Nãmri ca ha nee ihcunea na, catyt kam ihkõt me apa nare, quê ha ihtỳj Pahpãm me ato kêanre ne” hane. Me gũjarên xà itajê ihtỳaj to ihtỳj, ne cupê ihhêj rùm ate me kam me hõ kàhà pytĩa pyxwỳr. Jũ wỳr quê jũm awcanã, quê jũm hũcanãr nare. Ne por ca ihhêj ne nee me to ipa xà caxuw gũhkrakhi pyxit to mehtehcajpar prãm nare ata pê nee ate Pahpãm jarkwa na mehtehcajpar, mã catyt kam ihkõt me ipa xà nare.

47 — Pỳj me hêj xi! He ca ha atỳj me akên mã me apỳm! Ne ca gõtpe Pahpãm jarkwa to mehcakõc catêjê tyc atajê jarêt xà caxuw me cumã kre pejti to. 48 He ca atỳj me aquêtjê japua na ita to me hajỳr to me apa, ahnaa mã pê me aquêtjê me acumam ajco me Pahpãm jarkwa to mehcakõc catêjê cura he. Pê taa mehcura, pê ca me caa ajco me harêt.

49 — Cwỳrjapê pê Pahpãm, cute amji jahkre pejti te hajỳr romã mã, ramã harkwa to: “Wa ha me cumã me ijarkwa to mehcakõc catêjê me, me imã memprar catêjê kujate. Quê ha me jũm cura, ne ame jũm to kên” hane. 50 Hajỳr cwỳrjapê quê ha amcro ita kam, cute harkwa to mehcakõc catêjê curan jahpan xà na, ame ipa itajê cunea to hanea, ne ame to kêanre ne. 51 Pê mam pjê intuw kam me Aper xwỳ cura, ne caxuw awjapên me amji curan na me cupy, ne awjapên me amji curan to me mõi. Ne Pahpãm to amji kam me hapac xà jũrkwa kam, cute me amji curan jicu xà to me Xacarij xwỳ curan. He ampeaj kam wa me amã awjarê. Na quê ha Pahpãm, cute mehcuran jahpan xà na, pom ita kam mehtĩar ame ipa itajê to apu ihkêanre ne.

52 — Pỳj me hêj xi me apê me cumã Mojxe xwỳ jõ kàhhõc to hahkre catêjê! Ca ha me akên mã me apỳm! Ampo na? Ca nee me Pahpãm jarkwa jahkre pej prãm nare, ne nee me amã jũmjê te hahkre pej na me to prãm nare. Na ri ihhêj rùm me apê cute me ikre jihê rên xà incwỳr, ne ma amentê, mã nee me to incjêj nare, ne nee jũm mã me hõr, mã cute to hihê mên, ne hãr na me amã to prãm nare — hane.

53 Ne ma Jeju me cupê mõi, mã Parixêw catêjê me, me cumã Mojxe xwỳ jõ kàhhõc to hahkre catêjê me, cama ame cumãn to mehcyt to amencrõn to me ipa. Ne mencryac kam ampo jàhtõa na mehcukij. 54 Ne tee Jeju jarkwa nõ to me to ipipkjêr, ne cute mehpro prãmte ame to hahkre.

Mehkrã kên caca xà

12 Ne pê me hàhtõa ne me cuprõ, ne me hàhtõ kam, ihtỳj ajco amji kam mehcuhhê. Mã Jeju te ihkõt me ipa catêjê mã mam harên, ne me cumã:

— Co he, ma amji na me Parixêw catêjê to me guphêa ne, nãmri ihhêj ne ampeaj kam põ rùm mempej, ne me caxwãm pê mehkêanre. Ne amehhêj xia jarên to me ipa, ne me cupê pàrhyre xỳ pahtỳjti to me hõ cunea to hỳ ita pyrãac. 2 Ne hanea ne ihtỳj ampo cunea to me ipimxur to ipa. Quê ha amcro nõ na cute ampo to me ipimxur itajê cunea pro mẽ, ne ampo cunea pupu. 3 Ỗhỹ, ca ate awcapàtkõ kam me ampo cunea jarên atajê, quê ha ihtỳj amcroa kam me kampa. Ne ca ate ikre caxwỳn kam ampo cunea to me apimxur, ne ahna me to hihê ne caxwãm pê me harên atajê, quê ha ihtỳj cà pê mehcunea me harê, ne me kampa.

Cu ha amji mã me Pahpãm pit cupa

4 — Me ijõ ikwỳ nõ, ampeaj kam wa ha me amã awjarê, nee ame, por me gĩ pit cura atajê cupa nare. He quê ha nee hipêr me ato kên nare. 5 Ne Pahpãm ca ha quêt amji mã me hũpa. Pahpãm quê ha ihtỳj quêt jũm jĩ cura, ne cormã hipêr apu to kên, ne ma ihkãkãnti kam cuhy kam cumê. Cwỳrjapê wa ha hipêr me amã harê, na ca ha quêt amji mã me Pahpãm pit cupa.

6 — Ỗhỹ, por hãn ne cuwênre te xĩc to ihpore pijakrut peaj na me hàhpan cakrõ, quê ha nee Pahpãm cuwênre ata nõ to hapac kêt nare. 7 Ne hanea ne Pahpãm te ahpỳanre na me akĩ cunea cahyt par. Ne me caa ri cuwênre jàhtõtĩ itajê jirõa pê me acati. Cwỳrjapê ca ha nee amji mã ampo cupa nare.

Cu ha Jeju na amji jarê

8 — Ỗhỹ, he ampeaj kam wa me amã awjarê, quê ha jũm me akam mare mã cute ijahkre pej na amji jarên na, quê ha me Ahàkà hanea ne cõjkwa kam Pahpãm jarkwa to imprar catêjê kam mare mã, cute jũm ata jahkre pej na amji jarê. 9 Ne por quê ha me kam mare mã, ma ame icaca atajê, quê ha me Ahàkà hanea ne cõjkwa kam Pahpãm jarkwa to imprar catêjê kam mare mã, ma apu jũm ata caca.

10 — Ýhÿ, he quê ha jÿmjê ipê me Ahàkà na ihcakôc kên na, quê ha Pahpãm ihtÿj ihkên ata to tojnô ne hïcu. Nãmri quê ha jÿmjê te Pahpãm Carô Pejti na ihcakôc kên na, quê ha nee Pahpãm ihkên ata to tojnô ne hïcu nare.

11 — Ne quê ha amcro nõ na me acukij xà caxuw, cute me cuprôn xà jÿrkwa wÿr me gaprô. Ne cute me akên mã me amên prãmte, pahhi catêjê me, me cupê pahhiti catêjê cuna mã me apyxwÿ, ne me acukij. Ne amcro ata na, ca ha nee ame akrihkrit nare, ne nee amji caxwãm pê me amji mã: “Jÿ mã wa ha ajte amji jarên to, ne pahhi catêjê itajê pê amji pytà?” hajÿr nare. 12 He Pahpãm Carô Pejti quê ha amcro ata kam, me amã me ate me amji jarên xà to hahkre, cwÿrjapê ca ha nee ame akrihkrit nare — hane.

Hakràjti krã cunĭ jarên xà

13 Mã me hàhtôa jipôc ri hÿmre nõ xãm, ne Jeju mã ihcakôc ne cumã:

— Ýhÿ, Pahhi! Ca ha itô mã garkwa ta, quê imã hÿm xwÿ jàhcukrêj to ajcapô — hane.

14 Mã Jeju cumã:

— Pÿhàpà, xà ajkĭ jÿm te me amã ampo to ipicràn catê na ixãm? Hãpà. Nee ipê ampo to ipicràn xà caxuw me acukij catê nare — hane.

15 Ne me hàhtôti atajê japackre, ne me cumã:

— Krãa, me ikampa! Ca ha nee ame hàhcukrêj to me acukrêj to prãm to me apa nare. Gapacta ne ampo to amji mã me cuprô, ne nee me acukrêj itajê to pit mã ame amji japackre nare. He ampeaj kam ri me pahcukrêj itajê pê nee pahte amji kam me pajapac xà to ihhimpej catê nare.

16 — Ýhÿ, wa ha me amã jÿm jakràjti nõ jarê, ca ha me hahkre pej, ite me amã harên xà ita kôt.

— Ýhÿ, hakràj cati ita mã hõ pur catia, ne hõ pur ita kam cumã ampo jàhtôa to hàhtô. 17 Mã cute pur kam ampo itajê cunea pupun, ne to amji kam hapac pyrentu, ne amji mã: “Pÿhàpà, ampeaj kam ipur kam ampo jàhtô, ne ipê caxuw nõr xà cati nare ita kam, jÿ mã wa ha ajte to?”

18 “Ýhÿ, wa ha to hane he. Wa ha nõr xà incire ita hu, ne amji mã nõr xà catia nõ xãm, ne curia wa ha ijô cunea jaxwÿ. 19 Ne wa ha amji mã, ‘Hamre, ramã imã ijôa to ijô, ne ijakràj catia, na wa ha nee hipêr pur nõ xir, ne kam ijàpên nare. Ita caxuw wa ha caku jàhtôa kam cama ikrĭ ne cuku, ne apu to ikôm to ipa, ne ijakry ita na apu ipa’ ” hane.

20 — Mã cõjkwa kam Pahpãm jÿ, ne cute amji kam hapac xà ita na hõmpu, ne cute hakràj cati ita mã: “Ate amji jahkre kêatre. Pê wa amã acaca xà gõ, ne ita kam ca ha caxwa ri ty, ne hacpÿa mã imã agõ. Quê ha jÿmjê amji mã gõ jàhtôti ita to me ahtwÿ” hajÿr. Hõhõ, Inxÿ te hakràj cati ata mã harkwa to hajÿr.

21 — He Pahpãm to ate amji kam me gapac to me apa xà ata pê ihhêj rÿm cõjkwa kam ate amji mã me gâhcukrêj pejti to me cuprôn. Kĭn pej ne, ca ajte pjê ita kam me gâhcukrêj me, me gõ to pit mã me amji kam me gapac to me apa, ne nee hĭkjê na, hõtpê Pahpãm

to me amji kam me gapac nare na, ca ha me apê hakràj cati ata pyràac, ne me amji to acto — hane.

Cu ha pahÿj Pahpãm to amji mã me pahhimpej to prãm

22 Ne Jeju te ihkôt me ipa catêjê mã, cute ampo kên na ame amji to hàptô to me ipa nare xà jarên, ne me cumã:

— Cwÿrjapê wa ijõtpê me amã harê, ca ha nee me gõ me, me gápàn me, me akà to pit mã me amji to gápôt to me apa nare. 23 He me pajĭ ri me pahkà jirôa pê cati, ne pahte amji kam me pajapac xà ri me pajô jirôa pê cati, na ca ha itajê to pit mã me amji kam me gapac to me apa jicu.

24 — Ca me wakê pupu, mã nee amji mã pur ton nare, ne nee kam hàhkre nare, ne nee amji mã to cuprôn nare, ne nee caxuw amji mã hõ nõr xà pyxwÿr nare. Cakrô mã Pahpãm hõtpê me cumã harte. Ne mër hõhõ, Pahpãm mã wakê itajê jirôa pê me acati. Cwÿrjapê quê ha ate ampo itajê cunea na, amji to me gâhhuc xà nare kam, quê ha me gamã. 25 Xà ca ha me atyc nare na, amji to me gâhhuc xà ata to, ajkĭ atÿj amji mã me atĭr jô caku to ajcamê? Hamreare, ca ha nee amji mã me to apicamên nare. 26 Mër hõhõ, he ca ramã nee ampo to ate amji kam me gapac xà atajê to, amji mã me apicamên nare ita kam, ampo caxuw mã ca cormã ampo kryre na me amji to me gâhhuc to me apa?

27 — He pĭrã te hajÿr he. Nee hàpên nare, ne nee amji mã ihkà ton nare cakrô, mã ihtÿj ajcamê ne impejti. Ýhÿ, ampeaj kam wa me amã awjarê, por pê pahhi xwÿ pê Xarômãw jakràj jàmkrã catia ata, pê te ihkà impejti cakrô, pê pĭrã kà ata Xarômãw kà jirôa pê impej. 28 Ne Pahpãm ri, pom ahkêt amcro kam ihcuhhê ne ajcamê atajê mã ihkà to. Mã hãn ne ahna apê mã cuhy to capa. Mër hõhõ, quê ha Pahpãm ihtÿj me amã me akà to. He ca ihhêj ne cormã kyre pê Pahpãm to amji mã me ahimpej, mã Pahpãm ihtÿj me gamãr to prãm.

29 — Cwÿrjapê ca nee ame akrihkrit nare, ne nee ate me ampo kur xà me, me akôm xà to pit mã na, ame amji to hàptô nare. 30 Por pjê kam krĭxàre mehkrĭ, Pahpãm to amji kam me hapac nare atajê ri me hõ me, mehkà to pit mã ame amji kam hapac to me ipa. Ne me Apãm Cati mã, ate ampo na me prãm atajê na me gahkre pej. 31 Ca ha mam cati mã Pahpãm pê pjê cunea jô Pahhiti to amji kam me gapac to me apa, ne harkwa kôt ame apa, jahpan xà na, quê ha Pahpãm cormã hipêr me amã ampo cunea na, ate me ahna prãm atajê gõ.

Cu ha cõjkwa kam me papê pahhi catêjê

32 — Ýhÿ, tee me acrêre cakrô, ca nee ame hÿpa nare. He Pahpãm te amji cahê na, me apê pahhi na me apyxwÿr to amji kam hapac. 33 Gapacta ne me acukrêj to ihpore na me ahpa, ne ihpore ata, ca ha gapacta ne me cupê hamreare atajê mã me agõ. Ca ha ate me ita to hajÿr na, ca ha cõjkwa kam amji mã ampo jàhtôa ne

me to acukrêj. Ne ihpore incjên xà itajê, quê ha còjkwa kam me gõ pore me amã to hipu tu rohnÿtti mã. Wÿr quê curi me hàhkÿj xi nõ apê ihnõ to ahkÿ, ne nee quê ha krir nõ curi apê ampo pejti ihkrêr nare. ³⁴ Ne còjkwa kam ca quêt me acukrêj pejti itajê to me amji kam gapac to me apa.

Me hàpên catêjê me hàpên xà to mento juphê jarên xà

³⁵⁻³⁶ — He me apê ihhêj rûm me gõ pahhi jikwa tuw mã me gâpên catêjê pyrâac. Ne ate hahkà na hõ amji kÿn ata to me gâhcuprôn, ne me amji cûmpej, ne me hikaj na cute me amên. Cwÿrjapê ca ha me amji cûmpeaj ne. Ne me atu na hê xà to me akat kà juwahi, ne me gâhcujro xà nõ mã me haxà, ne mehpoç. Quê ha cato ne ikre jarkwa cahhy, ca ha me cumã hihê mên pyrentu. ³⁷ Ca ha me apê cumã me gâpên catêjê me hikaj, ne nee ame gõt pej nare, ne quêt me arÿat ame apa, ne ampo cunea caxuw ame apa, cwÿrjapê ca ha quêt me apej mã me apÿm. Na quê ha me gõ pahhia, amji tu na, ihtu na hê xà to ihtÿj, ne me apê me cumã hàpên catêjê atajê mã hàpân xà na me akrÿ na awjahkre, ca ha me akrÿ, quê ha taa me amã me garte. ³⁸ Quê ha tee awcahti xà wÿr awcapàtkô picapôn kam, me gõ pahhi me awÿr cator cakrô, me arÿat wÿr cato, ca ha me apej mã me apÿm. Ca ha to hane, ne me apê me gõ pahhi jikwa tuw ata mã me gâpên catêjê impejti pyrâac.

³⁹ — Ýhÿ, quê ha ikre jõ pahhi nõ, me hàhkÿj xi catêjê cator xà na me hahkre pej na, quê ha nee ikre mã jÿm xà, ne jÿm te cupê ampo pyr na hamãr nare. ⁴⁰ Ne me ca xwÿjê, ca ha me arÿat ame apa. Co he, quê ha me Ahàkà cati ate me hikaj xà jahkre pej nare ata kam, ihprôt pê me awÿr cato. Hõhõ, ata to ca ma me amji japackrea ne — hajÿr.

Hàpên catê impej me ihkên jarên xà

⁴¹ Mã Petrô Jeju cukij, ne cumã:

— Ijõ pahhi, pom ca ame imã ampo jarê ita, xà me imã pit mã, nare, xà ajkÿ mehcunea mã? — hane.

⁴² Mã nee Jeju te cumã jÿ mãn nare, ne cama cumã:

— Ýhÿ, wa ha amã ikre jamãr catê nõ jarê. Por quê ha hõ pahhi ikre jamãr na cumê ata, quê ha catyt kam, ahpÿanre na mehkwy mã me hõ jõr to ipa. ⁴³ Quê ha cute hõ pahhi cator xàa kam, catyt kam cumã hàpên to hajÿr na, quê ha impej mã ihpÿm. ⁴⁴ Ýhÿ, quê ha hõ pahhi ihtÿj cumã hàpên catê ita te ikre me, pjê me, ampo cunea jamãr catê na hãm. Quê ha ihtÿj hÿpar pyrentu, ne me hàpên catêjê to kênre nare.

⁴⁵ — Nãmri quê ha cute hÿpar nare, ne me hàpên catêjê to impejti nare na, quê ha ihkên mã axà. Quê ha ikre jamãr catê ata amji mã: “Pÿhàpà, ijõ pahhi cator xà ita jÿwrya to hÿwry, ne ramã cator xà jirô pê ihpÿm, cwÿrjapê wa ha ipxixit peaj ne amji to pit mã amji kampa” hane. Ne cute hàpân ne ihkôm kam ihtêm, ne ipipãn kam ihtêm, ne hõ pahhi mã hàpên catêjê kwÿ xÿmre me, me cahãj cahhyr kam ihtêm na, quê ha ihkên mã axà. ⁴⁶ Ampo na? Quê ha nee jÿ caxuw hõ

pahhi te hÿrmã cator xà jõ amcro jahkre pej, ne nee hikaj nare ata kam, quê ha amji jaxà ne cato, quê ha mehpro mẽ. Quê ha ihkên ton jahpan xà na ihcura, ne cute me Pahpãm par nare atajê cuhhê xà kam cumê.

⁴⁷⁻⁴⁸ — Ýhÿ, quê ha me hàpên catêjê nõ mã hõ pahhi jarkwa jahkre pej nare, ne cupê hahkre kêt kam nee cute amji cûmpej nare, ne apu hàpên to kêanre ata jahpan xà na, quê ha hõ pahhi nee ihcahyr to ihtÿj nare, ne kyre pê ihcahy. Nãmri quê ha me hàpên catêjê nõ te hõ pahhi jarkwa jahkre pej cakrô, nee amji cûmpej nare, ne nee hàpên xà to impej nare, quê ha hõ pahhi hahpan xà na, ihcahyr to catia. Ne quê ha jÿm, jÿm jÿhkra kam, ampo catia ne cupy, quê ha hahpan xà na hacpÿ ne ampo catia ne ahna ahwÿ. Ne quê ha jÿm ampo crire ne cupy ne hahpan xà na hacpÿ mã incrire ne cugõ. Jÿkjê na mã Pahpãm me ato hanea.

Quê ha Jeju cwÿrjapê ame amji to ajcokjê

⁴⁹ — Ýhÿ, ite pjê ita to cuhôn prãmte wa hÿrmã icator. Ne ramã ihpôç to mör na ri imã to prãm. ⁵⁰ Wa ha cormã amji pupun xà kêanre to amji pupun to hanea, pom quê, cô kam cute me amji cumrãr xà ita na, wa ha ite amji pupun xà kêanre ita kam amji cumrã. Ne imã amji kÿn nõiti ita kam ahnaa ikên na amji pupun to ihhi.

⁵¹ — Mõrmõ ca atÿj amji mã me ito, ite me amã me acarÿcti jõr, ca nee ame apijapu nare prãmte, mõrmõ wa me awÿr icator na, ca me ito amji kampa. Hamreare, wa nee ita caxuw me awÿr icator nare. He wa ita kaj na, ite me ato ipicokjêr xà caxuw wa quêt icator. ⁵² Ýhÿ, ita caxuw quê ha icwÿrjapê ikre kam cute me xÿc atajê ame ajcokjê, quê ha mençrê itajê me ipijakrut atajê kam mençryc kam ame ipa. ⁵³ Ne quê ha me hÿmjê xwÿjê mehkra xÿmre kam incryac kam ame ipa. Quê ha mehkra xwÿjê me hÿmjê kam mençryac kam ame ipa, ne mehkra cahãj atajê, quê ha mençryxwÿ kam mençryac kam hanea ne ame ipa. Quê ha me hÿprequêj hanea ne me wÿjxwÿ kam mençryac kam ame ipa. Quê ha me wÿjxwÿ hanea ne me hÿprequêj kam mençryac kam ame ipa.

Amcro cajpêr jarên xà

⁵⁴ — Ýhÿ, ca ha ita ri Juta catêjê jõ pjê kam pyt cjêj xà rûm me ahcakrã nõ pupu, quê ha hàpir to mõ, ca ha me amji mã harên to hane he: “Quê ha ta wrÿ” hane. Quê ha ihtÿj wrÿ. ⁵⁵ Ne ca ha hanea ne me crõtne jõ kôç cajpê, ne amji mã me harên to: “Quê ha ita kam ampeaj kam me pahcacro” hane. Quê ha ihtÿj me pahcacro. ⁵⁶ Mër hõhõ, pom ihtÿj me amã ampo itajê cunea jahkre pej, ne me amã pjê me, còjkwa jarên jahkre pej ita. Ne mër ampo na mã me apê amcro ita kam, ite ampo to ijãpên xà itajê jahkre kêatre? He ca cama ame ahêaj to ame ahêj!

Cu ha me pahcurê xwÿn to impejti ne

⁵⁷ — Ne mër ampo na mã ca catyt kam me apa na me apê amji jahkre kêatre? ⁵⁸ Ýhÿ, quê ha jÿ caxuw acurê xwÿn nõ apro mên prãmte mehcukij xà wÿr

gaprôr prâm, ne gaprô. Ne pry kôt cormã ato mör kwya kam, ca ha cume ajpên par peaj ne, ne me acator xaa kam me amji to impej. Nãmri ca ha ate me ita to hajÿr nare, ne nee me amji to impej nare na, quê ha acurê xwÿn nõ ita, mehcukij catê mã agô, quê ha mehcukij catê ma krãhtare mã agô, quê ha ma krãhtare me hacjên xà mã gaxà. ⁵⁹ He wa ampeaj kam me amã awjarê, ca ha me hacjên xà kam akrí ita kam ahnaa, por ate acurê xwÿn to new ata to gãmjör par nare kam, quê nee me acator nare — hane.

Cu ha me pahkên ton jicu nare, ne me ty

13 Ne amcro ata na jÿmjê atajê te Jeju mã Hípôjajo catêjê curan xà jarên, ne me cumã:

— He ma Hípôjajo catêjê kwÿ Krípinkrên wÿr me mō, cute me ampo curan, ne Pahpãm mã me hör prãmte. Ne cormã Pahpãm mã me ampo jör prãam kam, mã pahhi Pirat te me hipej na harkwa hydr. Mã cute me hipej — hajÿr. ² Mã Jeju me cumã:

— Ýhÿ, Hípôjajo catêjê itajê tyc xà kêanre, ne mōrmō ca me amji mã me to: “Cute mehkwy jirôa pê mehkên ton, cwÿrjapê ri cute me amji pupun xà kêanre ita to ame amji pupun, ne amehtyc” hane. ³ Hamreare, he nee mehkwy jirôa pê mehkã kê nare. Ampeaj kam wa me amã awjarê, ca ha me caa me acunea te me akên ton jicu nare na, ca ha atÿj me cuxà ame ty.

⁴ — Ne por Krípinkrên cahê na cute me tejôjtô ne mehkri atajê kam kên te ikre kãhti ata pÿm, ne cute me hipej atajê, mōrmō ca amji mã me to: “Krípinkrên kam mehkwy mehkri atajê jirôa pê cute mehkên ton, cwÿrjapê ri cute me amji pupun xà kêanre ita to ame amji pupun ne amehtyc” hane. ⁵ Hamreare, he nee mehkwy jirôa pê mehkã kê nare. Ampeaj kam wa me amã awjarê, ca ha me caa me acunea te me akên ton jicu nare na, ca ha atÿj me cuxà amehtyc xà ita to ame ty — hane.

Píxô pàr na hô nare jarên xà

⁶ Ne hipêr cute me cumã me hÿjarên xà nõ jarên, cute ame hahkre pej prãmte, ne me cumã:

— Ýhÿ, pê jÿm xÿmre nõ mã hō pur kam píxô pàr ramã hō xaa kam, ne nee cormã hō nare. Pê ajco hō japê, tee hōmpu, ne nee ihnō na hōmpun nare. ⁷ Ne cute pur jamãr catê mã: “Hōmpu he, ramã píxô pàr ita na caku crê, wa tee apu hō japê, ne nee rÿ ite hō nõ pupun nare. Ne hamre, gapacta ne píxô pàr ita jakep pyrentu. Cama ihcuhhê ne pjê pytã, ne nee hō nare” hane.

⁸ — Mã hamãr catê cumã: “Íjô pahhi, ca nee ite hakep na imã gÿjahkre nare caku ita kam, wa ha xa ipu na hahkwÿ, ne kam ampo jÿn to hipu. ⁹ Quê ha ajpên caku mō ita kam, cute hō na, quê ha ahna impej, nare, quê ha cute hō nare na, ca ha gapacta ne cormã hakep na imê, wa ha itÿj hakep” hane. Ne cute to hajÿr. Jíkÿjê na mã Pahpãm me ato hanea, ne ihtÿj cormã me ato hamre xà to ipinhuc to mō — hane.

Pê mehkôt xà jô amcro kam Jeju cahãj caprã

¹⁰ Ne mehkôt xà jô amcro nõ na Jeju ame cumã ampo to hahkre, Juta catêjê te cuprôn xà jÿrkwa kam.

¹¹ Mã curi me cahãj nõ kam me pahcurê xwÿn carô kên, ne cute apu to kêanre, mã ihkô cajôc ne cumã hà, ne jÿ wÿr quê capô. Ne pê ramã ihkô ita capô nare na ahna caku te tejôjtô. ¹² Mã Jeju te hōmpun ne cumã hãkjêr, ne cumã:

— Ýhÿ, cahãj ita, ramã acaprãr — hajÿr.

¹³ Ne cute ahna hÿ xir, mã ihkô capô pyrentu, mã cahãj ita te amji jahpan xà na, cōjkwa kam Pahpãm mã impejti jarên to mō, ne cumã:

— Ýhÿ, me ijô Inxÿ Cati, ampeaj kam apej ne acati, ne ate icaprãr pyrên ijakry! — hajÿr.

¹⁴ Mã cuprôn xà jô pahhi apu, Jeju te mehkôt xà jô amcro kam jÿm caprãr ata na, apu kam incryac to incryc, cwÿrjapê ri mehkwy mã:

— Pÿhãpã, pom me pajãpên xà caxuw amcro te xêj ita? Mêr hōhō, amcro te xêj itajê kam, ca ajpên me ate me amji caprãr prãm catêjê me apa, ne nee me pahkôt xà jô amcro kam ajpên me amji caprãr prãmte me apa nare — hane.

¹⁵ Mã Jeju me cumã:

— Me apê me cumã mehhê xi catêjê, me ahê xi hyre nare. Pom ca me acunea me pahkôt xà jô amcro ita kam atÿj me gō pryti me, cawrô cahacre mã me hê pô, ne me to apa, mã ikô ita? Nō na mã ca ame hane?

¹⁶ Mêr hōhō, me cahãj ita pupu he, taa xwÿjê pê me panquetti Aprãw xwÿ tãmxwÿ tãmxwÿ nõ. Pê Xatanaj pê me pahcurê xwÿn carô kên ihpro ne huwapre, ne ramã huwapre ita na ahna caku te tejôjtô. Xà wa ha ajkí me pahkôt xà jô amcro kam nee cumã hê pôn, ne caprãr nare? — hane.

¹⁷ Mã Jeju jarkwa ata kam Jeju curê xwÿn itajê amehpahãm. Mã me hàhtôti atajê Jeju te ampo pejti ton ata pyrên quêt ame hakry.

Ampo hy kryjre jarên xà

¹⁸ Mã Jeju me cumã:

— Wa ha me amã Pahpãm pê Pahhiti te pjê to ihhimpej xà ata to hahkre, ca ha me hahkre pej. He ihhimpej xà ita pê ampo hy pyrãac. ¹⁹ Ýhÿ, cupê ampo hy kryjre pyrãac. Mã hÿmre nõ te ipyr, ne hō pur kam ihkre. Mã ampo hy kryjre ita hiprãj ne ihkã, ne ipàr pê pí catia pàr. Mã pryre jara ihtÿj ihpa atajê kam amji mã hahê to. Hōhō, ita na quê ha Pahpãm te pjê to ihhimpej xà ata.

²⁰⁻²¹ — Ne hanea ne cupê cuhy incire ata pyrãac. Quê ha cuhy incire ata to me ahkêt mã haxà, quê ha ahna ahtÿm nare, quê ha ihtÿj ahkêt apu ihpôc to ipa. Ita na mã Pahpãm himpej xà te hajÿr, ne mam cupê ampo kryjre pyrãc, ne ma ihtÿj cati to ipa — hane.

Harkwa jatàtre jarĕn xà

²² Pê ma Jeju Krîpinkrĕn wÿr mō, ne ajco krî atajê cunea kôt me cumã ampo to hahkre to ipa. ²³ Pê jÿm ata Jeju cukij ne cumã:

— Ÿhÿ, Pahhi, xà mehkĕn catia ata pê cute me amji pytâr xà atajê incrĕre? — hane.

²⁴ Mă Jeju cumã:

— Ÿhÿ, cōjkwa kam Pahpām wÿr harkwa ata jatàtre. Ca ha ate amji mă ame acarôt na, ca ha atÿj harkwa ata na ame acjĕj. Wa ampeaj kam me amã awjarĕ, he me hàhtōa ne tee ame hàr to prām, ne jÿ wÿr quĕ me axà.

²⁵ — Quĕ ha ikre jō pahhi ikre jarkwa na ahtwÿ ne xa, ne to harkwa jihĕ. Ca ha pō pê ame apa, ne tee cumã me harkwa cahhy, ne tee me cumã amji jarĕn to: “Pahhi, me imã hihĕ mĕ, wa me axà” hane. Quĕ ha me amã: “Jÿmjĕ mă ca me? Ca jÿmjĕ itajĕ ame apa, ipĕ me gahkre kêatre” hane.

²⁶ — Ca ha me cumã: “Por pê wa ramã me acahĕ na me apà, ne ame ikō ata? Por pê ca ramã me ijō krĭa kam ampo to me imã hahkre ata?” hane.

²⁷ — Quĕ ha hipĕr me amã: “Ipĕ me gahkre kêatre. Wa ite rÿ jÿ caxuw jÿmjĕ itajĕ me apupun nare. Ne me acuto, ate ame ampo to kêanre atajĕ!” hane.

²⁸ — Ca ha me Pahpām te pjĕ to ihhimpej xà ata kam, me Aprāw xwÿ me, Ixac xwÿ me, Jaco xwÿ me, pê mam Pahpām jarkwa to mehcajōc catĕjĕ atajĕ cunea pê me panquĕtjĕ na me hōmpu. Ne mehkĭnte pō pê ca ha ame acwÿr to ame apa, ne me akàj xàhte me axwa gyj to me apa. ²⁹ Quĕ ha me hàhtōa ne me cato, pjĕ cunea pĭn, quĕ ha pyt japôj xà me, pyt cjĕj xà me, ne kÿj rÿm me cato, ne harã rÿm me cato, ne me hàpàn xà na amehkrĭ, Pahpām te pjĕ to ihhimpej xà ata ri, ca ha cama ame hōmpun to me apa.

³⁰ — Ÿhÿ, ita kam, por hapua na me ipa atajĕ, quĕ ha jÿ caxuw mam ihkrãa ri amehcuhhĕ, ne pjĕ ita kam mam mehcuuhĕ itajĕ, quĕ ha hapua na jÿ caxuw me ipa — hane.

Pê Pahhi Heroti mă Jeju curan prām

³¹ Ne Jeju xa ne apu awjarĕ ata caxuw ri hÿrmã Parixĕw catĕjĕ kwÿ cator, ne Jeju wÿr me hàhtĕp ne me cumã:

— Atĕm pyrentu, nāmri Heroti apu acuran to prām — hane.

³² Mă Jeju me cumã:

— Me pra ne me cagã ata mă me ijarkwa jarĕn to hane he: “Wa ha ita kam ame pahcurĕ xwÿn carō kĕn japôj to mō, ne ame hĭ caprār to mō. Ne amcro incrĕ kam wa ha cormã ijapĕn xà ita jicu” hane. ³³ Ne wa ha itÿj ijapĕn xà ita kam to icrà, ne cormã ma Krîpinkrĕn wÿr ikràr, ne amcro nō na wa icator to prām. Nāmri rÿ jÿ caxuw Krîpinkrĕn kaj na Pahpām jarkwa to mehcajōc catĕjĕ nō tyc nare, na wa ha curia me cuxà ty — hane.

Pê Jeju mă Krîpinkrĕn kĭnti

³⁴ Ne cute Krîpinkrĕn kôt harĕn to hajÿr, ne cumã: — Krîpinkrĕn, Krîpinkrĕn, por akam mehkrĭ catĕjĕ atajĕ hōtpĕ Pahpām jarkwa to mehcajōc catĕjĕ cura, por me Pahpām te me amã ihkujahĕc atajĕ, ca gōtpĕ ate kĕn to mehcuran prāmte ame to capĕ. He wa tee ame ato cuprōn prām to hanea, pom quĕ hōxãhxãc hãn ne intore to hara krac ri cuprō he. Ne ipĕ hōxãhxãc ata pyrãac, ca ma ajte ame icaca. ³⁵ Ne ita caxuw quĕ ha gō krĭ caprÿ, ne kam hamreare ne. Ampeaj kam wa me amã awjarĕ, ca ha hipĕr me ipupun nare ita kam, ahnaa jÿ caxuw me ijarĕn to: “Por jÿm Pahpām jarkwa kôt me iwÿr tĕ ata pê impejti” — hane.

Pê Jeju mehkàj xà nō ita caprã

14 Mă mehkôt xà jō amcro nō na Parixĕw catĕjĕ nō te Jeju jator, hÿrkwa kam me cahĕ na hàpàn prāmte. Mă ma Jeju ihkôt mō, ne cator, ne hàr ne hÿr. Mă me hàhtōa ne me xa atajĕ ame Jeju kōpĭ. ² Mă hÿmre jara me ihkjĕ tuhti Jeju na hàhtĕp. ³ Mă Jeju te Parixĕw catĕjĕ me, Mojxe xwÿ jō kàhhōc to hahkre catĕjĕ me, mehcukij ne me cumã:

— Xà quĕ ha ihtÿj ajkĭ Mojxe xwÿ jō kàhhōc ata kôt me pahĕ amji kam me pajapac xà na, me pahkôt xà jō amcro kam jÿm caprār na me jÿm jamã? — hajÿr. ⁴ Mă nee jÿm te cumã jÿ măn nare. Mă Jeju te hÿmre ata cupĕn ne caprār, ne ma ihkujahĕc, mă ma tĕ.

⁵ Jirō pê mă me cumã:

— Xà quĕ ha me anō jō cawrō cahàcre me, pryti nō, me pahkôt xà jō amcro ita kam, kwa mă mrō, ca ha nee ajkĭ me anō caxàr nare? — hane.

⁶ Mă nee jÿm te cumã ampo jarĕn nare, ne aracri mehkrĭ.

Cu ha me amji to me pahcati prām to me papa nare

⁷ Jirō pê mă ri Jeju jÿ ne apu cute me hator atajĕ kōpĭ, mă ihtÿj amji mă me hÿr xà impeaj japĕn to me mō. Mă Jeju te me hàpàn xà na mehkrĭ atajĕ japackre, ne me cumã:

⁸ — Ÿhÿ, quĕ jÿm me hikwa tuw jō amji kĭn wÿr gato, ca nee gÿr xà impeaj kam gÿr nare. Quĕ ihhĕaj to me girōa pê jÿm catia ata jato, quĕ ha curi cato. ⁹ Quĕ ha ikre jō pahhi te gator catĕ ata amã harkwa to: “Cumã gÿr xà impejti ita jahkre, quĕ kam jÿ” hane. Hamre, ca ha cama apu apahàm to mō, ne mō ne me hōa kam hapua na jÿ. ¹⁰ Cupate ca ha nee hajÿr nare, ne quĕt hane he. Quĕ jÿm gato, ca ihkôt mō ne hapua na me hōa kam, gÿr xà ata kam ca jÿ. Quĕ ha ikre jō pahhi ata apupu ne amã: “Ikwy nō, ajpĕn mō ne ita ri ca gÿr xà impejti ita kam jÿ” hane. Ita na quĕ ha quĕt mehcuenea jipōc ri me kam mare mă acati.

¹¹ — Ÿhÿ, pom me amji to cati prām itajĕ, quĕ ha Pahpām me to ihkryjre ne. Ne pom amji to mehkryjre prām atajĕ, quĕ ha quĕt me to cati — hane.

¹² Jirō pê mă ri Jeju te ikre jō pahhi japackre ne cumã:

— Ýhÿ, ca ha jũ caxuw me gápàn xà catia ton to prãm, ne nee me akwÿ nõ catêjê jator, ne me akjêjê me, me gũkjê jator nare. Ne hanea ne nee me acahê na me hakràj catêjê mehkří atajê jator nare. Ca ha ate me hator na, quê ha ate me hator jahpan xà na, cute me amã hãmjör xà na ihtÿj amcro nõ na me gato. Na ca ha nee ita to me hajÿr nare, ne quêt me to hane he.

13 — Ca ha jũ caxuw amji kíñ nõ ton to prãm, ne me cupê hamreare atajê ca ha me hato, ne cute me xwÿ jato, ne mehkjê xà jato, ne mento tũm jato. 14 Ca ha ate ita to hajÿr na, quê ha Pahpãm quêt apej mã amê. Ne jũ wÿr quê me cupê hamreare atajê, ate ame to hajÿr ata jahpan xà na, me amã amgö. Cwÿrjapê quê ha Pahpãm, catyt kam ame ipa catêjê te hacpÿa mã mehtír xà jö amcro ata kam, ihtÿj me amã amgö — hane.

Amji kíñ catia jarên xà

15 Mã por jũmjê me hápàn xà na me jÿ atajê nõ te ita na Jeju par, ne cumã harên to:

— Taamã, por jũ caxuw Pahpãm pê pjê jö Pahhiti te me hator, mã me hápàn xà na me jÿ atajê ri mempej mã mehpÿm xà — hajÿr.

16 Mã Jeju me cumã to hũjarên to:

— Ýhÿ, por me hũmre nõ te me hàhtôa ne me hator, quê me cuprö, quê me cumã hõ amji kíñ to. 17 Mã ramã amji kíñ jö amcroa kam hàhhuc, mã cute cumã hápên catê kujahêc, cute ame hator atajê jator prãmte. Ne me cumã harkwa kujahêc to: “Ajpên ame aprar pyrentu, nãmri ramã ampo cunea te amji jipêj” hane.

18 — Mã xãmte aracri ahpÿanre na cute me cumã amji jarên xà atajê. Mã mam pyxit ita te hápên catê ita mã: “Wa ite pur jũhkàr, ne wa ita kam hõmpun prãm, cwÿrjapê wa ha nee gö pahhi jö amji kíñ ita wÿr imör nare. Na wa ha awÿ, ca nee ikam acryc nare” hane.

19 — Mã ihnö ita te hajÿr ne cumã: “Wa ite pjê to ip-
ipkjêr xà caxuw pryti to tej ne hũhkàr, ne wa ita kam hápên xà to capi prãm, cwÿrjapê wa ha nee gö pahhi jö amji kíñ ita wÿr imör nare. Na wa awÿ, ca nee ikam acryc nare” hane.

20 — Mã ihnö ita te hajÿr ne cumã: “Wa curmã ijik-
wa tuw, cwÿrjapê wa ha nee imör nare” hane.

21 — Mã cumã hápên catê ita te amji jaxàr, ne hõ pahhi mã me harên. Mã ame kam incryac to incryc, ne cumã: “Atêm pyrentu, ijö amji kíñ ita caxuw, ne pry me krí cape kôt ajpên me cupê hamreare atajê japrö, ne cute me xwÿ me, mento tũm me, mehkjê xà me, ca ha ame haprö” hajÿr.

22 — Mã ma tẽ, ne ahna ahtũm nare mã cumã hápên catê ita hacpÿ ne tẽ ne hõ pahhi mã: “Hamre, wa ite, por ate ampo na imên ata ton cakrö, mã cormã nee cute me ikre to hipu nare” hane.

23 — Mã hõ pahhi cumã: “Hipêr tẽ ne krí catut na pry atajê kôt ame pra atajê jator to ihtÿaj ne, ne hanea ne pur kam ne ahkêt kam ame ipa atajê jator to ihtÿaj ne, mãr quê ijũrkwa ita to me hipu tu ne. 24 Ne ampeaj kam wa amã awjarê, quê ha nee mam ite ame hator

atajê nõ ipê ijö ita kwÿ krêr nare” hane. Jíkê na mã quê ha Pahpãm me ato hanea — hajÿr. Hõ, Jeju te me cumã hũjarên to hajÿr.

Pê Jeju ihkôt me ipa catê na, cute me amji ton kôt harê

25 Mã amcro nõ na hipêr me hàhtôa ne ma Jeju kôt me mõ, mã me hÿrmã ipipkjêr ne cute me cumã hũ-
jarên to:

26 — Ýhÿ, ca ha me anö te ikôt apa prãm na, quê ha ihtÿj me anö mã ikĩñ, ca ha ikôt apa. Ne me apãmjê jiröa pê amã ikĩñ, ne me axyrxwÿ me, me aprö me, me akra me, me akjêjê me, me akjêjê cahãj jiröa pê me amã ikĩñ. Nãmri ca ha itajê jiröa pê amã ikĩñ nare, ne amji jiröa pê amã ikĩñ nare na, ca ha nee apê ikôt ipa catê nare. 27 Ne quê ha jũm mã ikôt amji ton to prãm na, quê ha jũm ata ihtÿj amjia kôt ipa jicu, ne ikôt pit mã ipa, ne amcro cunea kam icuxà, hõ pĩ na ihtyc xà ita japjê. Nãmri quê ha amã ita to hajÿr prãm nare na, ca ha nee jũ caxuw apu ikôt apa nare.

28 — Ýhÿ, ca ha me anö ikre kàhti nõ xãm prãm, ne mam jÿ ne amji kampa, ne gö pore cahyt, mãr ca hahkre pej, jũ mã quê ha gápên xà ata hàhwÿr to. Ne jũ mã quê ha apê gö pore to ne capa. 29 Ca ha nee apu amji mã hahkre pej par nare ne kam to tẽ, ne apu ihhê pit pyxwÿ, ne nee hipêj nare. Quê ha mehcunea me ikre ita pupu, ne me ato hapactu kam tẽ, ne me ajpên mã, 30 “Me hõmpu he, hũmre ita te ikre ton kam ihtêm, ne nee cute hicu xà mã to mên nare” hane. Ca ha atÿj apu apahàm to apahàm.

31 — Ne ihnö xwÿjê te hajÿr he. Quê ha krí pijakrut jö pahhiti atajê me ipijapu to prãm, ne ihnö mã hõ krãhtare jãhtö te mir te tej, ne hiröa pê ihnö ita mã hõ krãhtare te mir te winti. Quê ha me harên pa, ne jÿ ne to amji kampa, ne amji mã: “Pÿhápà, me ijiröa pê me icatêjê jãhtö, wa ha pijamã me cuna mã menchrêre itajê to ahtwÿ? Jũ wÿr wa ha me to amji mã hamã” hane. 32 Ne ihtÿj me catêjê jö pahhiti nõ ata mã harkwa kujahêc pyrentu, cormã ampÿre mã apu mõr reria mã, mãr quê nee ame ipijapu nare.

33 — Mër hõ, ca ha me amji kampa, ne me gãhcukrêj cunea mã me hikra, ne cormã ikôt me apa catêjê na me amji to. Nãmri ca ha ate me to hajÿr nare na, ca ha nee me apê me ikôt me apa catêjê nare — hane.

Caaxwa xen nÿre jarên xà

34 Ne hipêr Jeju me cumã:

— Hõtpê caaxwa pê ampo pejti ata, ne quê ha hàn nõ mã axà, jũ mã cu ha me to, ne hacpÿ mã me to wa?

35 Hamre, quê ha ihkên mã axà, ne ampo cunea caxuw ramã ihkêanre, ne nee ampo xô mã cute pjê to caxà xà na impej nare. Na cu ha me pahtÿj caaxwa xen nÿre ata to me awcapê. Por ate me ipar xà na, me akam me gapac ihcuhhê ata, mër me to ikam gapac to impeaj ne — hane.

Carà cahàcre hôhti pictor jarĕn xà

15 Ne amcro nõ na Jeju wÿr me hàhtôa ne me mō, cute mempar prāmte, mã pahhiti jarkwa na me hũhkra kam me hàmcwÿr catĕjĕ jàhtôa ne ih-wÿr me mō, ne mehkwy te amji kam me hapac xà kĕanre. ² Mã Parixĕw catĕjĕ me, me cumã Mojxe xwÿ jō kàhhôc to hahkre catĕjĕ me, cute me Jeju te mehkřã kĕn catĕjĕ mã ampo to hahkre na me hōmpun, ne me ahna xwÿ kam mehtĕm, ne me ajpĕn mã:

— Me hōmpu he, hũmre ita ihtÿj mehkĕn na amji to pōj, ne me cape na apà — hajÿr.

³ Mã Jeju te me hapackre kam ihtĕm, ne me cumã:

⁴ — Ýhÿ, quĕ me anō mã carà cahàcre hôhti te xĕj, ne pyxit ne apĕ acto, xà ca ha ajkĭ nee hapĕn nare? Ca ha atÿj cute nowĕntinowi atajĕ mã pō kam hikra, ne ma pyxit ata japĕn to mō, ne cumã acato. ⁵ Ne hũrĕn gakry, ca ha apÿ ne ma to amji jaxà. ⁶ Ne ikre mã to acato, ne acahĕ na gō ikwÿ nõ mehkřĭ atajĕ to cuprō, ne me cumã: “Me gakry, nãmri wa ite carà cahàcre hôhti pictor ata mã icator” hane.

⁷ — He me apĕ carà cahàcre hôhti jàhtô na, cute nowĕntinowi atajĕ pyrãac, ne atÿj amji pej na me amji cãmĭjĭ. Ne por me anō pyxit te ihkĕn jicu, ne hacpÿa mã Pahpãm wÿr amji jaxàr ata pĕ ri carà cahàcre hôhti pyxit pictor ata pyrãac.

— He wa ampeaj kam me amã awjarĕ, ita kōpit na, quĕ ha cōjkwa kam mehkřĭ atajĕ ihtÿj me apej catĕjĕ pyrĕn ame hakry. Ne por quĕ ha jũm pyxit peaj ne ihkĕn jicu, ne catyt kam ipa kam tĕ, ata pyrĕn quĕ ha cōjkwa kam mehkřĭ atajĕ me girôa pĕ me hakry.

Ihpore hy pictor jarĕn xà

⁸ — Ne ihnō xwÿjĕ, quĕ ha cahãj nõ mã wakÿre prã jakare te ihpore hy tej, ne cupĕ pyxit ne acto, quĕ ha ihtÿj hapĕ. Ne cute cumã cator xà caxuw, quĕ ha hàhcujro xà nõ pōc, ne ikre capō ne hapĕn to impeaj to mō, ne ihtÿj cumã cato. ⁹ Ne me hō ikwÿ nõ catĕjĕ me, me cahĕ na amehkřĭ atajĕ to cuprō, ne me cumã: “Me gakry, ite ihpore hy pictor ata mã icator” hane.

¹⁰ — He wa ampeaj kam me amã awjarĕ, ihpore hy pictor ata pĕ jũm te ihkĕn ton to ipa ata pyrãac. Ata kōpit na, quĕ ha Pahpãm jarkwa to imprar catĕjĕ cōjk-wa kam, por jũm pyxit peaj te amji kam hapac xà kĕn mã hikran, ne hacpÿa mã Pahpãm wÿr amji jaxàr ata pyrĕn, quĕ ha ame hakry.

Ihkra xũmti pictor jarĕn xà

¹¹⁻¹² — Ne ihnō xwÿjĕ te hajÿar. Ýhÿ, pĕ jũm xũmre nõ mã ihkra xũmre ajkrut. Pĕ amcro nõ na hapu na ihkra intuw ita hũm ita mã: “Inxũ, ita kam imã ate atyc jirô pĕ imã ampo jōr xà atajĕ gō. Jũ wÿr wa ha atyc xà ita jikaj” hane. Mã hũm te cume amji mã ampo to ipi-capôn.

¹³ — Mã ahna amcro jàhtô nare, mã hapu na ihkra ita te ampo to hō tekjĕ ita to cuprôn, ne ma pjĕ nõ wÿr to mō. Ne curia ihkřĭ, ne cute ihkĕn to amji to hipu tu,

ne por cute hũm pĕ ampo cwÿr atajĕ to ampo kĕn cunea na hamre partu.

¹⁴ — Ne hamre, cute ampo to hamre jirô pĕ, ampeaj kam pjĕ ata kam me cumã prãm cati. Mã prãm te kam ihtĕm. ¹⁵ Mã cute pjĕ ata kam jũmjĕ křĭ atajĕ na hàh-wÿr, cute me cumã hàpĕn ne amji mã harte prãmte. Mã cute crô to ipijapar xà wÿr mehkujahĕc, cute crô mã harte, ne me cumã hamãr xà na. ¹⁶ Mã curia apu crô jamãr to ipa, ne ampeaj kam cumã prãm. Mã tee crô jō ata kwÿ křĕr to prãm cakrô, mã nee jũm te cumã crô jō ita kwÿ jōr nare.

¹⁷ — Mã cute hÿr, ne amji kam hapac ne amji mã: “Ampeaj kam inxũ mã me hàpĕn catĕjĕ jàhtô, ne me cumã hō cati, ne cute me hakren tu. Wa mehkĭnte ajte ita ri tee prãm to amji curan prãm. ¹⁸ Ne wa ha ma in-xũ wÿr amji jaxà, ne cumã amji jarĕn to hane he: ‘Inxũ, wa ite cōjkwa kam Pahpãm me, acuna mã ikĕanre ton. ¹⁹ Na wa nee hipĕr ate ito amji kra na ana ijàhwÿr nare. Ca ha ito amji mã cama amã ijàpĕn catĕ’” hane. ²⁰ Ne ma hacpÿ mã hũm wÿr cute amji jaxàr.

— Ne hũm wÿr cator to mō, mã hũm te pry cãmpun, mã cormã ampÿa mã mō. Ne cumã capřĭ, mã hÿrmã tĕ ne cute impÿn, ne cahôr.

²¹ — Mã cumã: “Inxũ, wa ite cōjkwa kam Pahpãm me acuna mã ikĕanre ton. Na wa nee hipĕr ate ito amji kra na ana ijàhwÿr nare” hane.

²² — Mã hũm te cumã me hàpĕn catĕjĕ nõ mã hark-wa hyr, ne me cumã: “Ame kware ne ajpĕn me cumã ihkà impeaj nõ to tĕ, ne me cumã haxà, quĕ to ihkà. Ne hũhhi na hĕ xà nõ to cumã me hũhkrahhi na hĕ, ne hanea ne ihpar kà nõ mã me haxà. ²³ Ne hanea ne ajpĕn me pryti krahti nõ jicotti to me mō, ne mehcura, cume to amji kĭn to. ²⁴ Nãmri, wa ikra pictor ita tyc na amji mã to hajÿr cakrô, mã ihhĕj ne hacpÿa mã ihtĭr ne mō ne cator, cwÿrjapĕ ri hũrĕn ijakry” hane. Ne cute amji kĭn kam me to ihtĕm.

²⁵ — Ne cormã ame amji kĭn ita toan kam, mã ihkra kà ita pur kam apu apĕ. Ne cute amji jaxàr, ne ramã ikre na hàhtĕp to mō, ne cute me hōkrepôj me, me hàkrun jàhkrihkrit kam hapac. ²⁶ Ne cute me hàpĕn catĕjĕ nõ na hàhwÿr, ne ihcukij ne cumã: “Ampo na mã ame hane?” hajÿr.

²⁷ — Mã hàpĕn catĕ nõ ata cumã: “Gapyre te amji jaxàr ne impej pĕa mã cator. Cwÿrjapĕ ri apãm te amji kĭn ita caxuw pryti kra jicotti curan na me imĕn, wa ite mehcuran, mã ame to amji kĭn” hane.

²⁸ — Mã ihkra kà te ita kam hapac, ne apu kam in-cryc. Ne ma apu ikre mã hàr caca, ne ma amehkôt amji kĭn ita na amji ton caca. Mã hũm pō mã cator, ne tee apu to hàr to hahkre. ²⁹ Mã cute hũm mã: “Rÿ pĕa mã wa ipĕ amã ijàpĕn catĕ pyrãac, ne amã ijàpĕn to ipa. Ne nee wa rÿ jũ caxuw ite garkwa par caca nare cakrô, ca rÿ jũ caxuw ate imã carà cahàcre nõ jōr, wa ite ijō ik-wÿ nõ catĕjĕ me, me to amji kĭn nõ ton nare. ³⁰ Mã akra kĕanre ita te, por me cahãj pijapit xyre atajĕ na, ate cumã ampo jōr atajĕ rĕn partu. Ne cute amji jaxàr, ca ate quĕt cumã pryti jicotti ita curan, ne ame to amji kĭn” hane.

31 — Mă hũm te cumă: “Ikra, apu hajŷr nare, ca gõt-pê icahê na apu apa. Ne wa ampo cunea to itekjê itajê, pê atekjêa ri. 32 Ne ampeaj kam wa ite amji kĩn ita ton na amji mã prãm, me pajakry prãmte. Ampo na? He me pamã amji kĩn nõti ita na ipê ihkaj na. Ne ampo na wa ite ita ton? He gapyre ita ramã ihhêj ne ihtyc, ne hacpŷa mã ihtĩr, ne hanea ne ipictor ne hacpŷa ne cator cwŷrjapê wa ite ton” — hajŷr.

Me hũrkwa jamãr catê hêj xi jarẽn xà

16 Ne Jeju te hipêr ihkõt me ipa catêjê mã hũ-jarẽn, ne me cumã:

— Ÿhŷ, por hakràj cati nõ mã hũrkwa jamãr catê. Mã jũmjê atajê te ikre jõ pahhi mã, cama cute apu cupê hõ tehkrêj rên to ipa na harên to kêanre. 2 Mã cute ahna hàhwŷr ne cumã: “Pŷhàpà, xà ampeaj kam mã me garê? Krãa caxi, imã amji jarê, ne imã ijõ ampo itajê cunea na ihhõc. Ne cute me ito new catêjê japyr atajê cunea na imã ihhõc, wa gápên xà jahkre pej. Ne ca ha nee hipêr apê imã ijũrkwa jamãr catê nare” hane.

3 — Mã hũjamãr catê ita mõ ne hŷr, ne cute amji kam hapac ne amji mã: “Pea hito, wa itea amji pê ijápên xà ita to ipictor. Ne nee imã icarõt cati nare ite pjê jahkwŷn xà caxuw, ne me ahna ijàhwŷr na ipahãmti ita kam, ampo to mã wa ha ajte? 4 Ÿhŷ, wa ite hajŷr ita kam, quê ha ijõ pahhi ikujate, wa ha nee hipêr cute me to new catêjê jũhkra kam ijàm cwŷr to ipa nare. Ne wa ha to hane, wa ha mam cute me ijõ pahhi to new catêjê to impeaj ne, mãr quê cute ijápên xà pê icator jirõ pê, ihtŷj me hũrkwa kam me ijuwahi. Ne me taa me itehcajpa” hane.

5 — Ne cute me hõ pahhi to new catêjê cunea na hàhwŷr. Mã cute me cuprõn, mã cute ahpŷanre na mehcukij par. Ne cute mam ita cukij ne cumã: “Jũ mã ca ate ijõ pahhi to new ton?” hane.

6 — Mã cumã: “Hàhcujro xà cacõ incjên xà te xěj to wa ite to new” hane. Mã cumã: “Ihnãm ate new na gõ kàhhõc ita he, to jŷ ne cute xĩncwënta peaj na, ca ihhõc” hane.

7 — Ne cute ihnõ ita mã: “Ne ca, jũ mã ca ate new ton?” hajŷr. Mã cumã: “Arŷjhy incjên xà te mir to wa ite to new” hane. Mã cumã: “Cute òjtõxënta peaj na ca ihhõc” hane. Ne cute me to new catêjê cunea to hajŷr partu.

8 — Mã hõ pahhi te ita par, ne cumã: “Ahêj xi cakrõ, ampeaj kam ate amji jahkre pej” — hajŷr.

Ne Jeju te ihkõt me ipa catêjê mã:

— Ÿhŷ, ihhêj ne catyt kam me ipa nare catêjê atajê te ri, catyt kam me ipa catêjê jirõa pê me amji jahkre pej. 9 Cwŷrjapê wa me amã: “Gapacta ne amji to me gakràj, ne gapacta ne catyt kam me ipa nare catêjê to me amji kwŷ nõ. Quê ha jũ caxuw amã ampo atajê cunea apê hamre, quê ha me gõ ikwŷ nõ catêjê ihtŷj me hũrkwa kam me ana amji to pøj” hane.

10 — Ÿhŷ, quê ha jũm hõtpê ampo kryjre atajê jamãr to impejti na, quê ha hanea ne ampo catia jamãr to impeaj ne. Quê ha jũm apu ampo kryjre atajê to ihhêj to ipa na, quê ha hanea ne ampo catia to ihhêj to ipa.

11 Ÿhŷ, ca ha pjê ita kam me gàhcukrêj to ame ahêj to me apa, quê ha nee jũm me amã Pahpãm jàhcukrêj nõ jõr nare. 12 Na ca ha jũm jàhcukrêj to ate ame ahêj to me apa na, ca ha nee me gàhcukrêj cwŷr nare.

13 — Ne jũ wŷr quê jũmjê hõ pahhi pijakrut jarkwa kõt me ipa. Ampo na? Quê ha cumã hõ pahhi pyxit nõ ata pit kĩn, quê ha cumãa apê. Ne ma apu ihnõ ita ca-ca, ne hicu ne cumã hikra. Ita jĩkjê na, ca ha Pahpãm mã me apê, ne nee ate meh pore catia ne ipyr na, me amji cãmjĩ nare. Nãmri ca ha ate ih pore ita to pit mã me amji japackre na, quê ha cupê ihhêj rũm me gõ pahhi, ca ha ihkõt me apa ne atŷj Pahpãm mã hikra — hajŷr.

Pê Jeju Parixêw catêjê mã ih pore cawpa

14 Mã Parixêw catêjê mã ih pore pit kĩn atajê te me ita par, na ri ame Jeju xũn. 15 Mã Jeju me cumã:

— Ihhêj ne mehcunea cuna mã me apê me hũmre impejti, ne Pahpãm mã ri quêt me ate amji kam me gapac xà cunea jahkre pej. Ÿhŷ, me hũmre mã pjê kam ampo pej ne cati na prãm atajê ri, Pahpãm mã ihkĩn nare, ne ahna cupê ihkêanre.

16 — Pê Jowãw te me cumrãr catê cator xà wŷr, ihtŷj ajco me Mojxe xwŷ jõ kàhhõc kampa, ne me Pahpãm jarkwa na ihcakõc catêjê kampa, ne ajco ihkõt ame ipa. Ata japu na, wa mehcunea mã Pahpãm pê pjê jõ Pahhiti na harên to mõ, ne ahpŷanre na Pahpãm himpej xà mã mencjêj prãmte ame amji mã carõt. 17 Xà quê ha pijamã jũ caxuw cõjkwa me pjê hamre? He quê ha ihtŷj jũ caxuw hamre, ne Pahpãm jarkwa nare, quê ha quêt jũ caxuw hamre nare. Quê ha nee Mojxe xwŷ jõ kàhhõc kam hàhhõc kryjre hikwa itajê nõ ipictor nare.

18 — Ne quê ha me hũmre nõ apu hĩxi caca ne cumã hikra, ne ma tẽ ne ajteare mã cahãj nõ me hikwa na, quê ha cupê hũmre inxyre ata, ne ihkêanre ne. Quê ha cupê hũmre nõa te cahãj mã hikran ata me hikwa ata, ne hanea ne cuxà inxyre ne, ne ihkêanre ne.

Hakràjti me Raxaro pê hamreare nare ata jarẽn xà

19 — Ÿhŷ wa ha me amã me hakràj te amji kam hapac xà kõt harê. Ÿhŷ, pê hũmre nõ jakràj cati, ne ajco ihkà impej to pit mã ihkà, ne ajco amcro cunea kam hõ impej pit kur to ipa, ne ajco amji kĩn catia ton to ipa.

20 Pê hanea ne hũmre nõ pê hamreare ata japyr Raxaro. Ne ihkà xêt, ne hĩ cunea kam ahna cuhê. Pê Raxaro jũkjê atajê ajco hũmre jakràj cati ata wŷr me to pra, ne hũrkwa jarkwa mã me cunõ. 21 Pê ajco curia harkwa mã hikwa. Por hakràj catê ata jàpàn xà pê hõ pihur, mã cute to harte prãmte ajco hikwa. Pê hanea ne rop ajco hŷrmã pra ne cumã cuhê atajê cũmtwŷ.

22 — Ne ty, pê me hĩ jarêt, pê Pahpãm mã imprar catêjê cõjkwa pĩn, ma mempejti tyc atajê krĩ xà wŷr me caxwŷn to tẽ, ne me panquëtiti Aprãw xwŷ kjê kam me hŷr, pê huwahi ne to jŷ. Pê hanea ne hakràj catê ata ty, pê me hĩ jarêt.

23 — Pê Raxaro kînte mehtyc kēanre atajê krî xà kam, cute me amji pupun xà kēanre xà ata kam amji pupu. Ne irît, ne ihmât ri cute Aprâw xwÿ pupun, ne cute hîkjê rûm Raxaro xwÿ pupun. 24 Ne cumã carâr to: “Quêtti Aprâw, icaprîa ne! Imã Raxaro kujate, quê cô to hûhkrâhi inco ne to ijarkwa jakry! Ampo na? He wa cuhy ita kam amji pupun xà kēanre to amji pupu!” hane.

25 — Mã Aprâw cumã: “Itâm xwÿ, he pê ca cormã atîr reriã mã ajco quêt amji mã ampo pejti cunea incwa ata to ca amji japackrea ne. Pê Raxaro ajco akînte girôa pê amji mã ihkên pit cwa. Ne ita caxuw ri quêt imã caprî, mã apu hakry ne ampo ita cunea to amji mã amji kîn. Ca ihkînte, ita caxuw amji pupu he. 26 Ne xwÿjê mã, me pahcote na pjê catacti ita kam, cu nee me pahnô ajpên wÿr parêr nare” hane.

27 — Mã hakràj cati ita cumã: “ÿhÿ, quêtiti Aprâw, wa ha awÿ, ca kepê inxû jûrkwa wÿr Raxaro kujate. 28 Quê cormã curi me ikjêjê te xîc ne me hàhhuc atajê mã mehkên cawpa, mãr quê mehkên ton jicu, ne nee ikrî xà kēanre ita wÿr memprar, ne icuxà me amji pupun xà kēanre to hajÿr nare” hane.

29 — Mã Aprâw cumã: “Pom ramã me akjêjê mã Mojxe jô kàhhôc me, Pahpãm jarkwa na mehcakôc catêjê jô kàhhôc itajê. Ne quê ha taa me cumã ita to hahkre, ne me hapackre ne me cumã ihcawpa. He me cumã ihcawpa xà ita caxuw ri ihkàhhôc atajê” hane.

30 — Mã cumã: “Hamreare quêtiti, jû wÿr quê ha ihkàhhôc itajê kampa. Quê ha quêt jûm tyc ata hacpÿa mã ihtîr, ne me hÿrmã cato, quê ha ihtÿj me kampa, ne mehkên itajê jicu” hane.

31 — Mã Aprâw cumã: “Quê ha cute nee Mojxe jô kàhhôc par nare, ne hanea ne nee me Pahpãm jarkwa na ihcakôc catêjê jô kàhhôc par nare na, quê ha nee jûm hacpÿa mã jûm tîr ata kam hapac nare” — hane. Hô, Jeju te Parixêw catêjê mã hÿjarên to hajÿr.

Mehkên cunea jicu kôt harên xà

17 ¹⁻² Ne Jeju te hipêr ihkôt me ipa catêjê mã: — ÿhÿ, ampeaj kam quê ha hôtpe mehkÿwÿ, Pahpãm cuna mã mehkên xà kēanre to. Ne pÿj me xi, por cute me cumã mehkên to hahkre, ne me cumã to mehhimpej atajê, quê ha ame amrãa to ame amrã. Ampo na? He quê ha Pahpãm, por cute jûmjê kryjre mã mehkēanre to hahkre atajê, quê ha Pahpãm mehkên mã me cumê. Ne mehkên mã me hàr xà ata ri ihkēanre. Quê rÿ mã mehkên kēanre ata xwÿjrea na memput na kên pytîa nõ mã hê, ne côxwa tua kam ahna me cumê, quê cô me hipej. ³ Co he, me guphê! Quê ha atô ampo to ato kên, ca ha intête cumã. Quê ha ihkên ita jicu, ca ha cute ato kên ata to tojnô, ne nee to amji japackre nare. ⁴ Quê ha atô, amcro pyxit kam, ato kên to xet, ne awÿr pra ne amã: “Wa ha ite ato kên ita jicu. Ne nee hipêr ato hajÿr nare. Ikam acryc nare” hane. Ca ha atÿj cute ato kên ita to tojnô, ne nee to amji japackre nare — hane.

Cu ha pahtÿj Jeju to amji mã me pahhimpej to prãm

⁵ Mã ihkôt me ipa catêjê te ita na me Jeju kam hapac, cwÿrjapê ri cute ahna me hàhwÿr to:

— ÿhÿ, me ijô Pahhi. Wa me hirôa pê amji mã me ato ihmpej na me itehcajpa — hajÿr.

⁶ Mã me cumã:

— Ca nee cormã ito amji mã me ahimpej nare. Kepê ca ito amji mã me ahimpej kryjre to hanea, pom quê ampo hy kryjre ita he, ne atÿj ampo pîr pâr catia xa ita mã garkwa ta, ne cumã: “Garê mea mã amji capa, ne ma côxwa kam amji kre” hane. Quê ha pîr pâr ita ihtÿj me akampa, ne me akam hapac to kênre nare, ne ma côxwa kam amji kre — hane.

Cama me cumã hàpên catê jàpên jarên xà

⁷ Ne hipêr me cumã:

— Quê jûm cama me anô mã hàpên catê na ipa, ne amã pur kam apê, ne amã carà cahàcre hòhti jamã, ne pyt xâr xàa wÿr pur pîn amji jaxà, ca ha ajkî cumã:

“Hamre, ate gápên xà jicu ita kam gapacta ne gápàn xà na jÿ ne apà” hane? ⁸ Jû wÿr ca ha cumã hane. Ca ha ajteare mã cumã garkwa to: “Hamre, ita caxuw ca ha akà pro xà to amji pro, ne imã ijô nõ to, ne imã agô, wa ha apà ne ikô, jirô pê mã ca ha gapacta ne apà” hane.

⁹ Nare ca ha ajkî amã hàpên catê ata mã: “Ca ate ipar pejti, ne ate itehcajpar to catia, cwÿrjapê ri apyrên ijakry” hane? Jû wÿr ca ha cumã garkwa to hane.

¹⁰ — Mêr hõhõ, he me apê hàpên catê nõ ata pyrãac. Na ca ha ate me, pom ite ampo cunea na me amên itajê ton na, ca ha me amji jarên to hane he: “Me ipê me amã me ijàpên catêjê kēanre, wa me ite, por ampo na ate me imên ata to pit mã me ijàpên, ne nee garkwa jirô pê, amjia kôt hipêr me ijàpên nare” — hane. Hô, Jeju te ihkôt me ipa catêjê mã to hahkre to hajÿr.

Pê Jeju mehkà xêt te tej caprã

¹¹ Pê ma Jeju Krîpinkrên wÿr mõi, ne Krîrîtpej me Hîpôjajo jô pjê te ajpên mã ahhyr cajpuw mõi. ¹² Ne ramã krî jacot mã hàr xàa kam, pê mehkà xêt catêjê me tej ne hÿrmã me pra. Ne ampÿa mã me ahtwÿ ne me xa. ¹³ Ne ame carâr, ne me caràar kam me Jeju na hàhwÿr to:

— Pahhi pê Jeju! Me icaprîa ne! — hane.

¹⁴ Mã Jeju te me hõmpun, ne me cumã:

— Amÿ me pra, ne Pahpãm mã mehcayrên catêjê wÿr me axà, quê me gaxàjre ata jakàn pê ame apupu, ne ame akôpîr to impej, ne ame garkrô — hajÿr. Mã me hÿrmã memprar kwÿa kam, mã ramã mehcunea impej to mõi.

¹⁵ Mã mehkà xêtiti atajê nõ te ramã caprãr na amji cajpêr, ne amji kà pupun, ne Jeju wÿr amji jaxâr pyrentu, ne kÿj cati pēa mã caprãr pyrên hakryti na, côjkwa kam Pahpãm to hàmnãn to mõi. Ne jûm ata pê nee Jutta catêjê nõ nare, ne cupê Krîrîtpej jô pjê catêjê nõ.

¹⁶ Ne Jeju wÿr cator, ne cuna mã hõ pôrpo ne nõ, ne cumã:

— Ýhÿ, ikrã tũm ampeaj kam apej, ne ate icaprãr xà ita pyrên ampeaj kam ijakry — hane.

¹⁷ Mã Jeju te ihcukij ne cumã:

— Pÿhàpà, jô ri mã me akwÿ cahhur? Xà nee ite me acunea caprãr nare na mã apyxit peaj te amji jaxàr? Jô ri mã me akwÿ kwÿ te me nowi atajê? ¹⁸ Ampo na mã apê mehcahkrit pê nee Juta catêjê nõ nare ita te pit mã amji jaxàr, ne Pahpãm mã hũrên gakry na amji jarên to mõi? ¹⁹ To xa ne mõi. Ca ito amji mã ahimpej, cwÿrjapê ri ramã acaprãr pejtu — hajÿr, mã ma tẽ.

Pahpãm te pjê to ihhimpej kôt harên xà

²⁰ Mã amcro nõ na Parixêw catêjê nõ te Jeju cukij, ne cumã:

— Jũ caxuw mõiर्मõ quê ha Pahpãm pjê cunea to ihhimpej kam tẽ? — hajÿr. Mã Jeju cumã:

— Quê ha ihtÿj Pahpãm cato, cute pjê ita to ihhimpej xà caxuw. He jũ wÿr ca ha ampo pupu, ne ihkôt amcro nõ na cator xà ata jahkre pej. ²¹ Quê ha ihprôt pê cato. Cwÿrjapê jũ wÿr quê ha jũm amã harên to: “Hõmpu he, pjê ita to ri Pahpãm himpej xà” hane. Nare, quê ha amã: “Hõmpu he, ihmat ri pjê ata to quê ha ihhimpej” hane. He ramã Pahpãm te me acaxwãm pê, me anõ mã, cute amji kam hapac xà to ihhimpej — hane.

Jeju te amji jaxàr xà kôt harên xà

²² Mã cute mehkôt me ipa catêjê mã:

— Quê ha jũ caxuw ipê me Ahàkà jô amcro kam ahtwÿ, ca ha amcro atajê pupun prãm cakrô, nee hõmpun nare. ²³ Quê ha mehkwy me amã: “Ita ri ca Pahpãm pupu he” nare quê ha me amã: “Ihmut ri ca hõmpu he” hajÿr cakrô, quê ha nee cator xà hajÿr nare. Cwÿrjapê ca ha nee me harkwa kôt apu hapên to apa nare. ²⁴ Quê ha ipê me Ahàkà jô amcro ihprôt pê cato. Quê ha me icator xà pê ihhêj rũm pahhàjê cuxê pyràac. Pom pahhàjê cuxê ne cõjkwa cunea cujro ita na, quê ha icator xà hane. ²⁵ Ne icator xà ita wÿr, quê ha xa me amji pupun xà kêanre to me amji pupu, ne ame icurê.

²⁶ — Ne por pê me panquetti Nowe xwÿ jô amcro ajco hapôj ata na, quê ha me ijô amcro hane. ²⁷ Ne por ihtÿj ajco mehcunea me apà ne me ikõ to me ipa. Ne nee amji na me ampo cãmji nare kam, me hũmre me pyjê ajco me hikwa tuw to mõi ata kam, pê ahnaa Nowe xwÿ te pàr kreti mã hàr jô amcro kam ahtwÿ. Ne me hàr jirô pê, pê cô cati cato, ne mehkwy jipej tu.

²⁸ — Ne menquetti Ro xwÿ jô amcro ata kam pê me hanea. Ne nee amji na me ampo cãmji nare kam mehcunea ajco me apà, ne ajco me ikõ, ne ajco ame ampo jũhkàr to me ipa, ne ajco ihpore to ampo na me hàhpan to me ipa, ne ajco pur kam ame ampo hy kre to me ipa, ne ajco amji mã me ikre pyxwÿr to me ipa. ²⁹ Ata jô amcro kam, pê Ro xwÿ Krĩhpôc jô krĩ pê cato, pê ihprôt pê kên te cuhy cõjkwa pĩn ihpÿm, ne krĩ me, mehkwy cunea to caxàr tu.

³⁰ — Hõ, quê ha me Ahàkà cator xà jô amcroa kam ahtwÿ, quê ha hanea. ³¹ Ne amcro ata kam, ca ha me

anõ ikre jô mã ahtyc mã apu mõi, ne ma atêm pyrentu, ne nee ampo pyr prãmte gũrkwa mã axàr nare. Ne me anõ pur kam apu apê, ne nee hacpÿ ne gũrkwa wÿr atêm nare. ³² Co he, Ro xwÿ prô te hacpÿ mã Krĩhpôc jô krĩ wÿr ihtêm prãm, cwÿrjapê ri ihtyc, na ca me to amji japackre. Na ca ha nee me hajÿr nare! ³³ Quê ha jũm apu ihtĩr prãm, ne ihtÿj amji to acto. Ne jũm te amji to ipictor prãm ata, quê ha Pahpãm cahê na ihtĩr rohnÿtti mã.

³⁴ — Ne caxwa ata kam, quê ha me hũmre ajkrut ne me nõ, me hikwa xà kam, quê ha pyxit ne me haprô, quê ha pyxit ne ahtwÿ. ³⁵ Quê ha me cahãj me ajkrut ne ame arÿjhy twÿ, quê ha me pyxit ne me haprô, quê ha pyxit ne ahtwÿ. ³⁶ Ne me hũmre ajkrut ne pur kam ame apê, quê ha me pyxit ne me haprô, quê ha pyxit ne ahtwÿ — hane.

³⁷ Mã ihkôt me ipa catêjê te mehcukij, ne me cumã:

— Jeju, jô ri quê ha ita hane? — hajÿr. Mã Jeju me cumã:

— He me apê xõnti pyrãc, ne nee cormã ne ate me hahkre pej xà nare cakrô, quê ha jũ ri cumã ampo ty, quê ha ihtÿj ahna cuprô — hane.

Mehcukij catê te cahãj tehcajpar prãm nare jarên xà

18 Quê hãn ne hõtpê Pahpãm mã mehcakôc, ne nee quê jũ caxuw intête me amji hi kwĩn nare, prãmte ri Jeju te me cumã hũjarên xà ita jarên. Hõ, cute harên to hajÿr he:

² — Ýhÿ, pê hũmre nõ ata pê mehcukij catê, ne cupê me hõ pahhi. Ne nee ajco amji mã Pahpãm cupa, ne harkwa kôt ipa nare. Ne hanea ne nee cumã jũm cupa nare, ne krĩ nõ ita kam ihkrĩ. ³ Pê hanea ne krĩ ata kam jũm cahãj pê impjên ty ata ihkrĩ. Ne ahte ajco apu ipa. Ne ajco mehcukij catê wÿr pra ne cumã: “Itehcajpa, ne icurê xwÿn ata na ahcukij, ne cumã garkwa ta, quê hacpÿa ne imã ampo pê itekjêa atajê gõ” hane.

⁴ — Pê amcro jàhtôa kam ma mehcukij catê ita apu cahãj ita tehcajpar caca. Pê ajco mãnea mã cahãj ata amji caxuw ihcukij to ipa. Mã jũ ita caxuw cute amji mã: “He nee imã Pahpãm cupa nare, ne nee imã jũm cupa nare cakrô, wa ha itÿj cahãj ita tehcajpa. ⁵ Ampo na? Cahãj ita cama apu icahpêrkàr to ipa, cwÿrjapê wa ha ahcukij ne hũtà. Nãmri wa ha ite to hajÿr nare na, quê ha ihtÿj ito hamre” — hajÿr.

⁶ Ne Jeju ihkôt me ipa catêjê mã:

— He mehcukij catê kêanre ita jarên kam me gapac to impeaj ne. ⁷ He Pahpãm pê nee mehcukij catê kêanre ata pyrãc nare. Ne quêt ihtÿj mehkwy, caxwa me, amcro kam amji tehcajpar xà caxuw ame cumã caràr to me ipa atajê tehcajpa ne me hũtà. Xà quê ha ajkĩ cute mehtehtcajpar xà ita wÿr apu ihkên? Quê nare! ⁸ Ampeaj kam wa me amã awjarê, Pahpãm quê ha ihtÿj mehkwyã pytà, ne mehtehtcajpa, mehcukij ne me to ipicokjêr xà jô amcro kam, ne hũjarêan kam to.

— Ne quê ha pijamã pjê kam jũm ipê me Ahàkà cator xà ata jô amcro kam, amji mã ito ihhimpej? — hane.

Me hũmre pijakrut Pahpãm mã mehçakôc jarẽn xà

⁹ Ne pê me hũmre kwỳ atajê mehkwy jirôa pê mempej na me amji to hane. Cwỳrjapê ri Jeju te me cumã hũjarẽn xà ita to hũjarẽn to hajỳr he:

¹⁰ — Ýhỹ, me hũmre pijakrut ne ma Pahpãm to me amji kam hapac xà jũrkwa wỳr me tẽ, cumã mehçakôc prãmte. Ne ihnõ ata pê ri Parixêw catêjê nõ, ne ihnõ ita pê ri pjê jõ pahhi jarkwa kôt me hũhkra kam hàmcwỳr catê.

¹¹ — Mã Parixêw catêjê nõ ita xa, ne hirãa pê Pahpãm mã ihçakôc, ne ampo pyrên hakry na cumã amji jarẽn to: “Ýhỹ, me ijõ Inxũ, nee mã ipê ijãhkĩj xi catê nare, ne nee ipê me cumã ihêj xi catê nare, ne nee wa apu, por me ikwỳ amji pê mehprõ caxun to ipa atajê cuxà me cupê mehprõ caxun to ipa nare, wa nee hajỳr nare. Nee mã ipê pjê jõ pahhi jarkwa na me hũhkra kam hàmcwỳr catê xa ata pyrãc nare pyrên ijakry.

¹² Wa ijõtpê ipijacri impejti to ipa, ne amcro te xet ita kam, amcro pijakrut ita kam, wa nee ampo kur to ipa nare. Ne wa hanea ne ampo cunea to itekjê atajê, quê ha imã ihkrã tej wa ha ijõtpê to ajcrã, ne hãn ne pyxit ne gũrkwa mã hacjê. Cwỳrjapê ca ha ito impejti ne” hane. Hõ, cute Pahpãm mã ihçakôc xà to hajỳr.

¹³ — Mã me hũhkra kam hàmcwỳr catê ita ihpahãmte, ihkĩnte ampỳa mã xa, ne nee kàj mã, cõjkwa wỳr, ihkuc to irĩt nare. Ne cama apu hitõhkre kam amji cahhy, cumã amji kĩn nõ xàhte, ne ma Pahpãm mã ihçakôc ne cumã: “Ijõ Inxũ, he ipê ikên ton catê, icaprĩa ne” — hane.

¹⁴ Mã Jeju me cumã:

— Ampeaj kam wa me amã awjarẽ. Pom hũmre te Pahpãm mã ihkêanre na amji jarẽn ita ri, cuna mã cumã impej, ne nee ihkên nare. Ne ma quêt impej pëa mã, cute amji jaxàr ikre wỳr. Mã ihkĩnte Parixêw catêjê nõ ata ri Pahpãm mã ihkêanre, na ri nee impej nare.

— Ýhỹ, quê ha jũm apu amji to cati prãm to ipa, quê ha ihtỳj Pahpãm to inciri. Ne jũm amji to incire prãm to ipa ata, quê ha ihtỳj Pahpãm to cati — hane.

Jeju me, me ahkrare

¹⁵ Mã krĩ ata kam mehkwy te me ahkrare kwỳ japỳn, ne ma Jeju wỳr me to pra, cute me ahna hũ nõr, ne Hũm mã mehçajrẽn prãmte. Mã ihkôt me ipa catêjê te ahna me hõmpun, ne ame kam mencryc, ne ma intête ame huwahi. ¹⁶ Mã quêt Jeju te amji wỳr me ahkrare na hàhwỳr, ne ihkôt me ipa catêjê mã harkwa to:

— Quêt taa me ahkrare itajê ajpên iwỳr me mõ, amehçahpêrkàr nare. Quê ha jũmjê itajê pê me ahkrare itajê pyrãc, ne ihtỳj jũmjê itajê Pahpãm himpej xà mã me axà. ¹⁷ Ita to me amji japackrea ne, quê ha jũm Pahpãm himpej xà na amji caxàr to hanea, pom quê ahkrare te ahna me amji caxàr he, ita na quê ha ihtỳj jũ caxuw Pahpãm krac ri me axà — hane.

Pê pahhi jakràjti nõ ata Jeju cukij

¹⁸ Mã Juta catêjê nõ pê pahhi cator, ne cute Jeju cukij, ne cumã:

— Me imã ampo to hahkre catê, pom quêt apejti ita, jũ mã wa ha ne ityc jirô pê me Pahpãm jõ krĩ kam apu ipa to? — hajỳr.

¹⁹ Mã Jeju cumã:

— Ampo na mã ca apu ipej na ijarẽ? Ampo na? Nee me pahnõ impej nare. Me Pahpãm pyxit peaj ri ne impej to impej. ²⁰ Pom ramã ate me Pahpãm jarkwa jahkre pej ita, pê me pamã harkwa to hane he: “Nee ame cupê mehprõ caxun nare, ne nee amehcuran nare, ne nee apu gãhkĩj nare, ne nee apu ahêj xi jarẽn nare, ne atỳj me apãmjê me, me axyrxwỳ jarkwa to me amji japackre to me apa” — hane.

²¹ Mã hũmre ita cumã:

— Ýhỹ, icrire naa mã, wa Pahpãm jarkwa kôt amji to ihmpej to ipa — hane.

²² Mã Jeju te ita na impar ne cumã:

— Ýhỹ, ca ha cormã ampo pyxit peaj ata to. Ca ha amũ tẽ, ne amji pê ampo cunea to ihpore na ahpa, ne me cupê hamreare atajê mã ihpore cunea jõr pa. Ca ha ate ampo itajê to hajỳr na, wa ha cõjkwa kam ate amji pê ampo jõr atajê jirôa pê amã ampo pej pit gõ. Ýhỹ, ca ha ate hajỳr ne ampo itajê to amji caprãr na, ca ha ajpên tẽ, ne atỳj amji to ikôt apa catê na — hajỳr.

²³ Mã hũmre ita te ita na impar, ne cumã amji kĩn nare, ne ihpeacre. Ampo na? Cupê hakràj cati na pê cumã hàhcukrêj atajê japê. ²⁴ Mã Jeju te cumã amji kĩn nare na hõmpun, ne ihkôt me ipa catêjê mã:

— Hamreare, jũ wỳr quê jũm jakràj cati ihtỳj Pahpãm te ihmpej xà ata mã axà. ²⁵ Ampeaj kam, quê ha nee jũm jakràj cati nõ Pahpãm te ihmpej xà ata mã hàr nare to hane, pom quê nee cawrô cahàc kô jarõti nõ aguj te kre na cator xà nare he — hajỳr.

²⁶ Mã cute me ita par catêjê ita na me ahçukij, ne me cumã:

— Měr, jũ mã quê ha me, ne jũm amji pytà, ne cumã axà? — hane.

²⁷ Mã Jeju me cumã:

— Jũ wỳr quê me hũmre nõ ampo itajê nõ to. Ne quêt me Pahpãm mã ri ihtỳj ampo itajê cunea ton jahkre pej — hane.

²⁸ Mã Petrô cumã:

— Me ipupu he, wa ite me ijũrkwa jicu, ne me apynãr — hane.

²⁹⁻³⁰ Mã Jeju cumã:

— Ýhỹ, ampeaj kam wa ha me amã awjarẽ, quê ha jũm te Pahpãm himpej xà ata cwỳrjapê hũrkwa jicu, ne ihprõ rer, ne mehçjêjê rer, ne me hũmjê rer, ne menxrxwỳ rer, ne mehkra rer na, quê ha pjê ita kam ampo itajê jirôa pê cucwa, ne ihtyc jirô pê mã Pahpãm cahê na ipa, ne ihtĩr rohnýtĩ mã — hane.

Pê Jeju hipêr ihtyc me hacpÿa mã ihtír xà jarê

31 Mã ma Jeju te me hàhtôa atajê intête ihkôt me ipa catêjê te tóxi atajê japrór ne me to mō, ne me cumã:

— Me ikampa! Cu ha ma Krípinkrên wÿr me mō, por pê rÿ pêa mã Pahpãm jarkwa to ihcakôc catêjê ahna ihhóc ata wÿr, ne curia quê ha ame ipê Ahàkà to kên. 32-33 Quê ha Roman catêjê jũhkra mã me haxà, quê ha ame cumã, ne ame hũn, ne ame kam harcô rê, ne amehcahhy, jirô pê mã quê ha mehcura. Quê ha ahna amcro incré, quê ha hacpÿa mã ihtír — hajÿr.

34 Mã ihkôt me ipa catêjê te me ita par pej nare, ne nee cute me Jeju jũjarên xà ata jahkre pej pej nare. Ne cute me hahkre pej xà ita me cupê ipimxur tu.

Pê Jeju into tũm nõ caprã

35 Pê Jeju Krícuxwati na hàhtêp to mō, pê hũmre into tũm nõ pry jahkà kam jÿ, ne ajco me ahna ahwÿ. 36 Ne cute cahê na amji to me mōr na mempar, ne cute mehckij, ne me cumã:

— Ampo mã? — hajÿr.

37 Mã me cumã:

— Pom Naxare jō krí pĩn Jeju cator ita ri mō — hane.

38 Mã into tũm ita jũpar, ne cute caràr kam ihtêm, ne Jeju mã:

— Jeju! Apê pahhi Tawi xwÿ tàmxwÿ ita, icaprãa ne! — hajÿr.

39 Mã mam me mō itajê cama ame kam incryc, ne ame cumã:

— Kêt! Ne aracri jÿ! — hane. Mã hipêr cute caràr to:

— Pahhi Tawi xwÿ tàmxwÿ ita, icaprãa ne! — hajÿr.

40 Mã Jeju te impar ne hàhhuc, ne cute cumã hàkjêr na me mên. Mã ajpên into tũm ata to me mō, ne Jeju na me to hàhtêp. Mã cute ihckij ne cumã:

41 — Ampo na ca prãm? Ampo to wa amã? — hajÿr. Mã cumã:

— Ýhÿ, Jeju, wa hacpÿa mã irít prãm — hane.

42 Mã Jeju cumã:

— Rít! Ramã acaprãr. Ate ito amji mã ahimpej, cwÿrjapê wa ite hacpÿa mã ato to amã imej — hane.

43 Mã hũmre ita irít pyrentu, ne ma cute Jeju pynãr, ne hacpÿa mã cumã into imej ita jahpan xà na cõjkwa kam Pahpãm pejtí, ne catihti na harên to mō, ne cumã into imej pyrên hakryti na amji jarên to mō. Mã mehccunea te me ita pupun, ne Pahpãm pejtí na cute me harên kam mehtêm.

Jeju me Xaquêw

19 Pê Jeju Krícuxwati mã axà ne ma krí japôc to mō. 2 Pê curi hũmre nõ japrÿ pê Xaquêw ita ihkrí. Ne pê hũmre ata pê hakràj catê. Ne cupê pjê jō pahhi jarkwa kôt me hũhkra kam hàmcwÿr catêjê jō pahhi, ne ajco hō pahhi jarkwa jirôa pê me hũhkra kam amcwa, ne amji mã huwahi. Cwÿrjapê pê mehccunea mã ihkín nare ne ma ame curê. 3 Pê tee ajco apu Jeju pupun ne hahkre pej prãm, ne jũ wÿr quê hōkre nõre ita kam, ipu na me hàhtôti ita kam hõmpu.

4 Ne ma cute hõmpun prãmte, hípê cumam ipicahur ne pìxô pàr na hàpir, por pê ihkrac ri mōr xà ata na.

5 Mã Jeju mō ne kàj mã irít, ne cute Xaquêw pupun, ne cumã:

— Xaquêw, awrÿc pyrentu, wa ita kam gũrkwa kam ijàhhuc to prãm — hajÿr.

6 Mã Xaquêw jũjaréan kam iwÿc, ne cute cumã amji kían kam hũrkwa kam ahna amji caxàr. 7 Mã mehccunea te me ita pupun, ne ahna me cupê ihkaj na, cwÿrjapê ri cute ahna mehccakôc kên kam mehtêm, ne me amji mã:

— Pÿhàpà, quê ha Jeju ajte ihkrã kên catê ita jũrkwa kam ahtwÿ — hajÿr.

8 Ne me hàpàn jirô pê mã ri Xaquêw xãm, ne cute Jeju mã amji jarên, ne cumã:

— Ijō Pahhi, ikampa, wa ha me cupê hamreare atajê mã ijàhcukrêj jíkê gō. Ne me cupê ijàhkÿ atajê, wa ha hacpÿa mã me cupê ijàhkÿ pyxit jahpan xà na, me cumã ijàmjōr to cwat — hajÿr.

9 Mã Jeju cumã:

— He ampeaj kam ate amji kam gapac xà ton ita na imej. Ne toa ca ate mehccunea mã hanea ne apê Aprãw xwÿ tàmxwÿ na amji jarên. Cwÿrjapê quê ha ita kam, Pahpãm ikre ita kam mehkří catêjê itajê kên catia pê me hütà. 10 Ýhÿ, ampo na ri ipê me Ahàkà pjê ita kam cator? He cute me pictor catêjê japên, ne Pahpãm wÿr me haprór xà caxuw — hane, ne ma ihkôt me ipa catêjê me, me mō.

Ihpore hō catia te tej jarên xà

11 Ne ramã Krípinkrên na hàhtêp, cwÿrjapê ri me cumãa ramã Pahpãm te ihhimpej xà ata cator xà kam hàhhuc xàa kam na amehcãmjĩ. 12 Cwÿrjapê ri Jeju te me cumã Pahpãm himpej xà to hahkre prãmte me cumã hũjarên xà nõ ita jarên, ne me cumã:

— Ýhÿ, pê hũmre ita cati, ne cupê pahhi nõ ita kra. Ne ajco amji to pjê jō pahhi to prãm, cwÿrjapê pê ma pjê nõ jũwrya kam pahhiti cati ihkrí ata wÿr tē, cute amji to pjê jō pahhi prãmte. Ne hÿrmã ihtêm jirô pê, quê ha cupê pahhi ne amji jaxà. 13 Ne ihtêm xà wÿr, cute cumã me hàpên catêjê te tej atajê capi, ne me hahkre pej prãmte me ahna hàhwÿr, ne cute ahpÿanre na me cumã ihpore hō catia pyxit ne hōr par. Ne cute me cumã harkwa hyr, ne me cumã: “Ihpore hō cati ita py ne to tē, ne gapacta ne kam me to apixô to mō. Krãa caxi, jũ mã ca ha me, ne ihpore hō ita kam me to hàhtô to amōr to? Mãr wa amji jaxà, ne cormã me gahkre pej” hajÿr. Ne ma pjê nõ wÿr tē.

14 — Pê hō pjê kam me curê xwÿn kwÿ amehkrí atajê ma hũmre ita pê me hō pahhi na amehcaca. Ne ma ihkôt me jũmjê itajê kujate, cute pahhiti mã me hũjarên prãmte, ne me cumã: “Wa ma ame me ijō pahhi na me hũmre ita caca” hajÿr cakrô, mã hũmre ita ihtÿj amji caxuw hō pahhiti cukij, mã cute pjê jō pahhi na ton.

15 — Mã cupê pahhi, ne hũrkwa wÿr cute amji jaxàr. Ne cute me cumã hàpên catêjê mã ihpore hō cati jōr

atajê na hàhwÿr, cute me hahkre pej prãmtê, jũ mã mǒrmǒ cute me, ne ihpore ita to me ipicamên.

16 — Mã mam ita hÿrmã cator, ne cute hǒ pahhi mã: “Ýhÿ, ijǒ pahhi, ate imã ihpore hǒ pyxit ne hǒr ata, hamre, wa ite kam to ipixǒ, ne hipêr hipy to tej ne kam incwÿr” hajÿr.

17 — Mã cumã: “Ahnaa ri ita! Apê imã gápên catê impeaj to impej. Ne apê ampo kryjre jamãr pejti catê, na ca ha ita caxuw ampo catia jamã. Wa ha krí te tej jǒ pahhi na axãm” hane.

18 — Mã cumã me hãpên catêjê nõ ita hÿrmã cator, ne cumã: “Ýhÿ, ijǒ pahhi, ate imã ihpore hǒ pyxit ne hǒr ata, hamre, wa ite kam to ipixǒ, ne kam to xíc ne incwÿr” hane.

19 — Mã pahhi ata cumã: “Taamã, ita caxuw wa ha krí te xíc jǒ pahhi na axãm” hane.

20 — Mã hapua na cumã hãpên catê ita hÿrmã cator, ne cute hǒ pahhi mã: “Ýhÿ, ijǒ pahhi, ate imã ihpore hǒ pyxit ne hǒr ata, wa ite cupêhkã kam haríj ne ma apu intê. Na wa ha hacpÿa mã amã cugǒ. 21 Ne acupate wa ite nee kam ampo to ipixǒ nare. Wa ite ramã gahkre pej pejtu, apê hũmre jãprêhti na. Ne ca atÿj me cupê ampo to ate atekjê nare atajê to pǒj. Ne ate ampo kre nare atajê, ca gǒtpê ame cupê ihkêhkê” hane.

22 — Mã cumã: “Apê imã gápên catê kãanre, wa ha garkwa ita kǒt apu ato kên. Pom ramã ate ijãprêhti ita na ijahkre pej pejtu ita? Pom wa me cupê ampo to itekjê nare atajê incwÿr to ipa, ne pom wa ite ampo kre nare itajê, wa hãn ne me cupê ihkêhkên to ipa ita? 23 Měr ampo na mã ate nee me ihpore jamãr catêjê mã ijǒ pore ita jǒr, mã kam cute me to imã ipicamên crire nare? Měr ampo na mã ate me cumã hǒr nare? Ca ha kepê to hane na mã, wa ha ijǒtpê hipêr ihkwÿ in-crire ne kam cupy” hane.

24 — Ne cute cahê na mehcuhhê atajê mã: “Intête me ijǒ pore hǒ ita capa, ne jũm mã cute tej ata mã, ca me agǒ” hajÿr.

25 — Mã me cumã: “Pÿhãpã, me ijǒ pahhi, pom ramã cumã ihpore hǒ te tej ita” hane.

26 — Mã me hǒ pahhi me cumã: “Ampeaj kam wa me amã awjarê, por ampeaj kam me cumã hàhtǒ atajê, quê ha me cumã hàhtǒ atajê jirǒa pê me cucwa. Ne mehkĩnte me cupê ihkryjre atajê, quê ha me cupê capa. 27 Ne hamre, ita caxuw, ajpên me icurê xwÿn atajê cunea japrǒ ne me to mǒ, por ma me hǒ pahhi na ame icaca atajê, ne icunaa mã, ikam mare mã me hipej tu!” — hane.

Pê Jeju Krípinkrên mã axà

28 Ne hamre, Jeju te me cumã hũjarên xà ita jarên jicu jirǒ pê, ma Krípinkrên wÿr ihkǒt me ipa catêjê me, me pra. 29 Mã ramã krí jacot japrÿ to ame Píxǒ jǒ krí me, Mehkênupunxà jǒ krí na me hàhtêp, por Píxǒ jǒ kên cahê na krí atajê na. Ne ma mam cute ihkǒt me ipa catêjê to ipijakrut ne mehkujahêc, ne cute me cumã harkwa hyr to:

30 — Mam me tẽ, me pahcumam krí jacot ata wÿr, ne ca ha ramã me axãr xàa kam, me cawrǒ cahàcre kam

nee cormã jũm jÿr nare ata pupu, ne ramã cumã hê hi-ahpuro ne xa. Ca ha me cumã hê pǒ, ne ajpên me to tẽ. 31 Quê ha jũm ate me cumã hê pǒn na me apupu, ne ahna me acukij, ca ha me cumã: “Pahhi ri apu ahna prãm, ne cute hÿrmã me ikujahêc” — hane.

32 Mã ma ajwar me tẽ, ne Jeju te hũjarên xà atajêa na cute me hǒmpun. 33 Ne cormã ame cawrǒ cahàcre mã hê pǒan kam, mã cute me to hǒ tekjê catêjê te ahna me hǒmpun, ne mehcukij to:

— Ampo na mã ca ame cawrǒ cahàcre ita mã hê pǒ? — hajÿr.

34 Mã me cumã:

— Pahhi ri apu ahna prãm, ne cute hÿrmã me ikujahêc — hane.

35 Ne ma Jeju wÿr me to mǒ ne to cator. Ne kam cute me cumã cupêhkã jaxwÿr, ne cute kam hÿr na mehte-hcajpar, mã kam hÿr. 36 Ne cormã to mǒr prãam kam mã, cumam me cumã me hǒ cupêhkã capǒ, ne pry kǒt me cumã nõr to mǒ.

37 Ne ma ramã Krípinkrên na me hàhtêp to mǒ, ne ramã Píxǒ jǒ kên jǒ ajpǒ xà mã me iwÿc to mǒ. Mã ihkǒt me ipa catêjê jãhtǒa ne ihkǒt me mǒ. Ne cute me Pahpãm carǒt kǒt Jeju jãpên xà pihho catia pupun atajê pyrên ame hakrya to ame hakry. Cwÿrjapê ri kÿj cati pãa mã cute me Pahpãm pejti na me harên kam me to ihtêm. 38 Ne me carãr to me hane he:

“Me pajǒ Pahhiti me pahwÿr cator!

Ne Pahpãm jarkwa kǒt hãn ne ipa!

Mã cǒjkwa kam mehkří catêjê atajê cunea pinkrinti.

Ne mehcunea te ramã cupê Pahpãm catia na me hahkre pej” hane.

39 Mã Parixêw catêjê kwÿ me hàhtǒa jipǒc ri amehcuhhê atajê ame Jeju mã, ne me cumã:

— Me cumã ampo to hahkre catê, akǒt me ipa catêjê mã garkwa ta, quê me kêt — hane.

40 Mã Jeju me cumã:

— Ampeaj kam wa ha me amã awjarê, quê ha me kêt, quê ha ihtÿj kên itajê me haxà kam, carãr kam ihtêm pyrentu — hane.

Pê Jeju Krípinkrên kam amrã

41 Ne Jeju te Krípinkrên na hàhtêp, ne cute hǒmpun ne apu caprí, ne apu kam amrã. 42 Ne incwÿar kam cute hũjarên to:

— Pÿj me hêj xi!

Krípinkrên kam me akrí catêjê, he me apê amji jahkre kêatre.

Wa tee me amã, me ate amji kam me gapac xà carícti to hahkre, ca ajte nee me amji caxwãm pê me amji to me acarícti prãm nare.

Me apê amji jahkre kêatre!

43 Ýhÿ, quê ha amcro nõ na me acurê xwÿn me akrã tu ne, ne me ana ajxê.

Quê ha ame ana pjê hakǒt ne ajpên wÿr me gagã, ca ha nee ame gapǒj nare.

⁴⁴ Quê ha me gürkwa cunea to amehkêanre ne, ne me to hamre tu. Ne por kên te kwÿc caxwãm pê amehkrí atajê, quê ha mehkrare me, me hamre tu.

Nee quê ha krí ita jaxà kam kên nõ hàhhuc nare. Ne nee hakàn pê cumã hãm xà nõ hàhhuc ne hãm nare.

Me apê amji jahkre kêatre to, ca nee ate me ipupun pej nare, cwÿrjapê ca ha me akên mã me axà.

Ne nee me amã Pahpãm jô amcro cator xà ata na hahkre pej nare.

Ne cute me apytâr xà jô amcro ata kam, ca ha ma hÿrmã ame apipkjêr caca — hajÿr.

Pê Jeju me to Hÿm Cati jÿrkwa caprã

⁴⁵ Ne Jeju Pahpãm to me amji kam hapac xà jÿrkwa wÿr mõi ne cumã hàr, ne cute kam ihpore to ampo na me hàhpan catêjê japôj kam ihtêm. ⁴⁶ Ne cute me cumã harkwa to:

— Inxÿ Cati jô kàhhôc kam, ihhôc te harên xà ata te hajÿr he:

“ÿhÿ, ijÿrkwa pê kam imã mehcahôc xà” hajÿr.

Ca ajte ate harkwa kaj na me to me hàhkij xi jÿrkwa — hajÿr.

⁴⁷ Ne pê Jeju ajco amcro cunea kam me cumã ampo to hahkre. Pê Parixêw catêjê me, me cumã Mojxe jô kàhhôc to hahkre catêjê me, me hõ pahhi me, ajco tee ame Jeju curan prãm. ⁴⁸ Ne jÿ wÿr quê me ita to. Ampo na? Pê mehccunea mã Jeju par prãm na pê.

Pê Jeju Hÿm Cati jarkwa kôt apê

20 Ne amcro nõ na, Jeju ame cumã ampo to hahkre, ne ame cumã Pahpãm jarên to mõi. Mã mehkwy cator, Jeju cukij prãmte. Ne mehkwy atajê pê Pahpãm mã mehcajrên catêjê jô pahhi kwÿ me, Mojxe xwy jô kàhhôc to hahkre catêjê kwÿ me, me prohti kam kwÿ. ² Ne hÿrmã me cator, ne cute me Jeju cukij to:

— ÿhÿ, me imã amji jarê, jÿm jarkwa kôt mã ca apu ampo itajê to? Ne jÿm te mã ahna amã harkwa? — hajÿr.

³ Mã Jeju mã cormã cute mehpro na to prãm nare, na ri me cumã:

— ÿhÿ, wa ha hanea ne me acukij pyxit, ca ha me imã amji jarê, jirô pê wa ha itÿj hanea ne me amã amji jarê.

⁴ ÿhÿ, jÿm te mã Jowãw mã harkwa, mã cute cô kam me cumrâr? Xà côjkwa kam Pahpãm te mã cumã harkwa? Nare xà ajkí pjê kam me hÿmre nõ te mã cumã harkwa? — hajÿr.

⁵ Mã cute me ajpên cukij kam mehtêm, ne me ajpên mã:

— Ampo cu ha ajte me cumã harê? Cu me cumã: “Pahpãm te ri Jowãw mã harkwa” hajÿr na, quê ha hipêr me pahcukij, ne me pamã: “Mêr hõhõ, ampo na mã ca nee ate amji mã me Jowãw to hajÿr nare?” hane.

⁶ Nare, cu ha me cumã: “Me hÿmre nõa te ri Jowãw mã harkwa” hajÿr na, quê ha me hàhtôtì itajê ma ame

pahcaca, ne kên to ame pahcapê. Ampo na? Ampeaj kam ri me cumã Jowãw pê Pahpãm jarkwa na ihcakôc catê — hane.

⁷ Cwÿrjapê ri me Jeju mã:

— Wa nee ite me jÿm te Jowãw mã harkwa hyr ata na me hahkre pej nare — hane.

⁸ Mã Jeju me cumã:

— Ca ma ame imã amji jarên caca, cwÿrjapê wa ha hanea ne nee me amã, por wa jÿm jarkwa kôt apu ampo itajê ton to ipa ata na amji jarên nare — hane.

Pur to me hàpên catêjê kên jarên xà

⁹ Ita jirô pê mã ri Jeju te me cumã hÿjarên xà itajê nõa jarên, ne me cumã:

— ÿhÿ, hÿmre nõ te hõ pur ata cunea kam amji mã pÿxô krô japÿr te uwa atajê kre. Ne cute pur jamãr catêjê kwÿ mã hõ pur ata jahkre, mãr quê ma me hamã, quê hõ ne intep. Ne ma pjê nõ wÿr tẽ, ne curi cute amji to putwÿr jàhtôa.

¹⁰ — Mã cute uwa to cuprôn xà jô amcroa kam ramã hàhhuc, mã cute me hÿrmã cumã me hàpên catêjê nõ kujahêc, mãr quê pur jô pahhi mã ihkwÿ ta, ne cute me hamãr catêjê mã cute me to hàpên jahpan xà na ihcahhur cunea juwahi prãmte. Mã ajte pur jamãr catêjê atajê amji mã pÿxô atajê cunea juwahi prãmte, cama amehcahhy, ne ma cute hÿre kam mehkujahêc.

¹¹ Mã cute hipêr me cumã hàpên catêjê nõ kujahêc, mã cute me to hajÿr ne me cumã ihpahàm catia ton, ne hanea ne amehcahhy, ne ma hÿre kam cute mehkujahêc. ¹² Mã hipêr cute cumã me hàpên catêjê nõa kujahêc, mã pur jamãr catêjê te me to hajÿr, ne hanea ne ame to kêanre, ne ma pur pê me to cator.

¹³ — Mã pur jô pahhi ita te amji kam hapac, ne amji mã: “Jÿ mã wa ha ajte? ÿhÿ, wa ha hane, ne ma mehwyr imã ikra kinti ata kujate. Quê ha ihhêaj to amji mã me hÿpa, ne nee amehcaxun nare” hane. Ne ma cute me hÿrmã ihkra ita kujahêc.

¹⁴ — Mã pur jamãr catêjê itajê te amji wÿr mehkra ata pupun, ne me ajpên mã: “Me hõmpu he, pom ihkra xÿmre ajpên mõi ita pê pur jô pahhi kra. Hacme ne mehcura, ne me to hamre, quê ha pur ita pê me pahtekjêa” hane.

¹⁵ — Ne cute pur pê mehkra xÿmre ata to me cator, ne cute amji mã me mên, ne mehcuran — hajÿr. Hõ, Jeju te me cumã hÿjarên xà ita to hajÿr jirô pê mã ri cute mehccukij to:

— Jÿ mã mõrmõ quê ha pur jô pahhi ita cute amji kam hapac xà ita to? ¹⁶ ÿhÿ, quê ha me to hane he. Quê ha mehwyr cato ne me hÿjamãr catêjê kêanre atajê cunea jipej tu, ne ajteare mã me hÿjamãr catêjê kwÿ mã pur ita jahkre — hajÿr. Mã cute me ita par ne me cumã:

— An! Ampo na mã cute mehkra ita curan? Quê me pa mã mã, wa ha nee mehcuran nare! — hajÿr.

¹⁷ Mã Jeju me hõmpun tÿjti, ne me cumã:

— He ihhêj ne me caa, ca ha ito me jÿm kra ata pyrãc ne me icura. Ampo na? Pahpãm jô kàhhôc kam ramã harên xà ita te hajÿr he:

“Pom ikre to me hàpên catêjê ma ame ikre mã hãm xà caxuw kên pejti caca ita te ihkwỳ jirôa pê amji to cati, ne ihcuhtac tỳjti” hane.

18 Ne ihhêj rûm ipê ikre mã hãm xà caxuw mam kên pejti cuhtacti ata pyrâac, mã ma ame icaca, ne cute me ijicu. Co he, por quê ha jûm kên ata kam ihpỳm ata, quê ha apu hirên tu. Nare, quê ha kên ata jûm kam ihpỳm ne to hacrôre ne — hane.

Pê me curê xwỳn hipêr Jeju cukij, cute ihkên mã me mên prãmte

19 Mã me cupê Mojxe xwỳ jô kàhhôc to hahkre catêjê me, me cupê Pahpãm mã mehcajrên catêjê atajê te, Jeju te me to hũjarên xà ata na amji na me hahkre pej pyrentu, cwỳrjapê ri ma ame curê, ne cama mehpro ne me haxàr pyrentu to prãm. Mã me hàhtôti te me Jeju par atajê mã ampeaj kam ihkîn. Ne Jeju curê xwỳn atajê mã ampeaj kam me hàhtôti atajê cupa, cwỳrjapê ri nee cute me Jeju pro nare. ²⁰ Ne ihtỳj cama amehkôpĩr to me ipa. Ne cute mehkhôpĩr catêjê atajê mã me hàmjôr, mãr quê amehkôpĩ, ne ihtỳj ampo na mehculij to ipa, ne ampo kênre kôt mehpro, ne krĩ jô pahhi jũhkra mã me haxàr to prãm to ri ame ipa. Ýhỹ, ihhêj ne pô rûm kam mempejti, ne me caxwãm pê, kam cute me amji kam hapac xà kêanre.

²¹ Mã me hũmre atajê ame Jeju cukij, ne me cumã: — Ýhỹ, ampo to hahkre catê, wa ite ramã me acakôc xà me, ate ampo to me imã hahkre xà atajê pê ampeaj kam na me hahkre pej. Ne nee amã jûm cupa nare, na ca mehculinea to amji kam gapac xà to apipenti to apa. ²² Ne ampeaj kam caxi me imã awjarê. Xà wa ajkĩ itỳj me pjê cunea jô pahhiti mã pjê jahpan xà na me ijàmjôr xà ata to me amgô? — hane. Ne pê cute mehculij xà ata to, ihkên mã me mên prãmte pê amehculij. Ampo na? Quê ihhêaj to Jeju me cumã: “Ca ha atỳj me amgô” hane, quê ha me hàhtôti atajê ihtỳj ame kam incryc. Ampo na? He me cumã hàmjôr prãm nare, na quê ha ame kam incryc. Nare, quê ihhêaj to me cumã harkwa to: “Ca ha nee me gàmjôr nare” hajỳr na, quê ha pjê jô pahhi mã me hàpên catêjê atajê ihtỳj ame kam incryc, na pê amehculij to hane.

²³ Mã Jeju te me cumã, cute amji kam me hapac xà kêanre ita na hũcapi pyrentu, ne me cumã:

²⁴ — Ajpên me imã ihpore hy nõ, wa hõmpu — hajỳr. Mã cute me cumã hõr. Mã cute me cumã:

— Mêr jûm japry me, ampo carõ mã ihpore hy ita kam nõ? — hajỳr. Mã me cumã:

— Pjê cunea jô pahhiti pê Xexa carõ me hapry — hane.

²⁵ Mã Jeju me cumã:

— Mêr hõhõ, ca ha me pjê cunea jô pahhiti pê Xexa mã me hàhcukrêaj gõ, ne hanea ne Pahpãm mã me hàhcukrêaj gõ — hane.

²⁶ Mã mehculij catêjê itajê pê ihpro jahkre kêatre mã aracri mehculhê ne me ajpên mã:

— Pỳhàpà, cu amehpro prãm cakrô, mã cute ihcakôc xà ita to hamãr kênre nare ita kam, jũ mã cu ha me to, ne mehpro? — hane.

Hacpỹa mã ihtĩr na ihkôt harên xà

²⁷ Mã Xato xwỳ kôt me ipa catêjê ma apu mehtyc te hacpỹ mã ihtĩr na ame ahna aprã atajê kwỳ Jeju na me hàhtêp. Ne cute hanea ne me hàhcukjêr xà ata to, Jeju kên mã me mên prãmte, cute mehculij to:

²⁸ — Ýhỹ, ampo to me cumã hahkre catê, pê Mojxe xwỳ me pamã incaca xà ita na ihhôc to hane he:

“Quê jûm ihprô nõ me hikwa, ne nee kam ihkra nare kam ty, quê ha hĩxi ahte apu ipa.

Quê ha impjên tyc ita tõa cahãj pijapit ata me hikwa, ne kam ihkra.

Quê ha ihkra ita to amji mã me mam impjên tyc ata kra” hane.

²⁹ Hõ, pê me pamã ahna ihhôc to hane. Ne pê xwahna jũmjê itajê me xet ne ajpên to mehkhjêjê pit. Pê mam ihtõ kà ita hĩxi ata me hikwa, ne nee kam ihkra nõ juwahi nare kam ty. ³⁰⁻³¹ Mã hanea ne ihtõ te amji to hapu te hajỳr ne cume hikwa, ne hanea ne kaam ihtyc. Ne pê me xet itajê cunea mehprô pyxit ata me, me hikwa partu, ne mehprô ita kam jûm te mehkra nõ rer nare kam mehculinea mehhi. ³² Mã hapu na mehkhôt mehprô ita te hajỳr ne ihtyc. ³³ Ne mehtyc jirô pê, hacpỹa mã amehĩr jô amcro kam, cute me xet itajê cunea cume hikwa ita kam, jûm quê ha mehprô ata to ihprô? — hane.

³⁴ Mã Jeju me cumã:

— Me amãa, nee hacpỹ mã mehtyc tĩr xà nare, na mã ca ame icukij to hane. Ne ca ihkaj na ame to. He pjê ita kam pyjê me, me hũmre ihtỳj ame hikwa. ³⁵ Ne por me Pahpãm kampa, ne catyt kam me ipa, ne me ty, ne hacpỹa mã mehtyc xà jahpa ne mehtĩr, ne Pahpãm wỳr me api, ne cahê na mehkrĩ atajê ri, nee me hikwa tuw xà nare. ³⁶ Ne me cupê cõjkwa kam Pahpãm jarkwa to memprar catêjê pyrâac. Jũ wỳr quê jûm ty, ne jũ wỳr quê hanea ne jũm hikwa tuw. Ne me cupê Pahpãm kra. Ampo na? Hacpỹa mã amehĩr, cwỳrjapê ri me cupê Pahpãm kra.

³⁷ — He pê Mojxe xwỳ hirãa pê me amã hacpỹa mã mehtyc ne mehtĩr na to hahkre. Xà ca nee me aprêj pôc ne nee cute caxàr nare ata jarên to me amji japackre nare? Pê aprêj pôc te caxàr nare ata kam Pahpãm jõkre Mojxe mãaw jarê, ne cumã:

“Ipê apãm Pãm Cati, ne cormã ipê me aquêtjê Aprãw me, Ixac me, Jaco Pãm Cati wa” hane.

Ne nee pê amji jarên to:

“Pê ipê Aprãw me, Ixac me, Jaco Pãm Cati” hajỳr nare.

³⁸ Ne cute amji jarên xà ita kôt ri me pamã Pahpãm pê mehtĩr jô Pahpãm na hahkre pej, ne nee cupê mehtyc jô Pahpãm nare. Pahpãm mã mehculinea tĩr pit, ne nee

cumã jüm tyc nare. Cwÿrjapê cu me pahte me Aprãw xwÿ me, Ixac xwÿ me Jaco xwÿ tÿar na me harên par — hane.

³⁹ Mã Mojxe jô kàhhôc to hahkre catêjê nõ kwÿ hanea ne curi mehcuhhê itajê te me cumã:

— Nee ate gÿjarên xà ita to ihcupan nare. Ne gÿ-jarên xà ita peaj to impej — hajÿr.

⁴⁰ Hamre, mã hipêr jüm mã ihcukij xà nõ to ihcukij prãm nare.

Pê Jeju hacpÿa mã mehcukij

⁴¹ Mã Jeju cormã me cumã:

— Wa ha por pê Pahpãm jüm pê Crixto to awjahkre ata na me acukij. He ca ajte Crixto pê Tawi xwÿ tàm xwÿ tàm xwÿ na me harê. ⁴² Ne pê Tawi xwÿa ajco ihkàhhôc kam increr xà kam ihhôc to hane he:

“Ijô Pahhiti te ijô pahhi mã harkwa to hajÿr he:

‘Icahê na, Pahhi jÿr xà kam, awpôc rÿm jÿ.

⁴³ Wa ha apar krac ri me acurê xwÿn atajê cunea nõr na me to, quê ha me nõ, ca ha ate me tohjê na cute me gahkre pej xà na, me hipy apar xãm’ ” hane.

⁴⁴ Pom pê Tawi xwÿ Crixto to hõ pahhi na ihcukij ita kam, jÿ mã quê ne cupê ihtàm xwÿ? Ampo na? He cormã Tawi ihtÿar na Pahpãm cahê na cõjkwa kam apu ipa — hane.

Pê Jeju me cumã Mojxe xwÿ jô kàhhôc to hahkre catêjê cawpa

⁴⁵ Mã me hàhtôti atajê ame Jeju kampa, mã Jeju te ihkôt me ipa catêjê mã harkwa to:

⁴⁶ — Co he, me cumã Mojxe xwÿ jô kàhhôc to hahkre catêjê to me guphêa ne, nãmri mehkà impeaj kam hãn ne ame ipa to prãm, ne hãn ne cute me hÿpa kam me cumã mehcahôc na me to prãm. Ne ma hãn ne cute me cuprôn xà kam apu pjê kam mehkri caca, ne mehkri xà impeaj kam hãn ne mehkri to prãm. Ne hanea ne me hõ pahhi jô amji kÿn kam, hãn ne me hõ impeaj na mehprãm. ⁴⁷ Ne hãn ne pyjê pê impjên tyc ne impijapit atajê mã amehhêj, ne hãn ne me cupê ampo to ahkÿ. Ne me cupê me hàhkÿ xi na amji to me ipimxur prãmte, hãn ne mehcunea kam mare mã Pahpãm mã mehcahôc to mehkrynre nare. Cwÿrjapê quê ha mehkên xà te me kam ipihur xà atajê me cumã ihkêanre ne — hajÿr.

Pê impijapit Pahpãm mã hõ pore cunea gõ

²¹ Ne amcro nõ na Jeju, Hÿm Cati to me amji kam hapac xà jÿrkwa kam hãm ne xa, ne ame hakràj catihti atajê te mehporê jôr na me hõmpu, mã ihpore incjên xà kam me cucjê. ² Ne hanea ne cute jüm cahãj pê impjên tyc ne impijapit ata pupun, mã cute ihpore incjên xà kam ihpore hy to ipijakrut peaj ne hàr. ³ Mã Jeju te ihkôt me ipa catêjê mã harkwa to hajÿr he:

— Ampeaj kam wa ha me amã awjarê. Cahãj pê hamreare ata te ri mehcunea jirôa pê ihpore jôr. ⁴ Ne mehkwy jakràjti catêjê te me hõ pore cahhur jàhhuc atajê pit jôr. Ne cahãj ita nare, cute to amji to ipijapar xà ita ri, cute amji pê ihcunea jôr — hajÿr.

Pê Jeju Hÿm Cati jÿrkwa jamre na harê

⁵ Mã mehkwy Pahpãm to me amji kam hapac xà jÿrkwa to amehcahôc to:

— Ampeaj kam ikre ita pej! Ne ahna kên itajê impejti! Ne kam cute ame Pahpãm mã ampo pejti jôr atajê cunea impejti — hane. Mã Jeju te mempar ne me cumã:

⁶ — Ýhÿ, pom ampo cunea impejti ca ame hõmpu itajê, quê ha ihtÿj jÿ caxuw ihcunea hamre tu, ne nee pom ca ame kên pupu itajê nõ hàhhuc, ne amji jipy nõr nare — hajÿr.

Amji pupun kên jô amcro jarên xà

⁷ Mã cute me Jeju cukij to:

— Me imã ampo to hahkre catê, jÿ caxuw quê ha ita hane? Ampo quê ha jÿ na me imã, wa ha ihkôt me ita te hajÿr xà ita jahkre pej? — hajÿr.

⁸ Mã Jeju me cumã:

— Me guphêa ne, quê nee jüm me anõ mã ihhêj nare. Ampo na? He quê ha me hàhtôa ne ijapry na ame amji to mehhêj to me ipa, ne me amã: “Hamre, ramã amcro hyr xàa kam hàhhuc” hane, nare, quê ha me amã: “Ipê Pahpãm te Crixto to cõjkwa pÿn me amã hÿjahkre ata mã, wa he” hane. Cakrô, ca nee me anõ ihkôt amji kam gapac nare. ⁹ Ca ha jÿ ri me ipijapu nõ jarên pa, ne nee ame hÿpa nare. Nare, quê jÿ ri, krÿ nõ kam pahhi na ame ajpên jÿrê, ca me harên pa, ne nee ame hÿpa nare. Quê ha ampo itajê cunea hane cakrô, nee cormã me hamre xà kam hàhhuc nare, ne ihtÿj hõtpê ita hapôj to ipa.

¹⁰ — Quê ha krÿxàre kwÿ me, mehkwyà ame ajpu, ne krÿ kwÿ me, krÿ kwÿa me ajpên kam pra. ¹¹ Ne pjê jàhtôa kam pjê ahcujrô, ne pjê jàhtôa kam prãam to prãm, ne pjê jàhtôa kam quê ha ame hà catia to cati. Quê ha ihprôt pê cõjkwa kam ame ampo kêanre pupu, ne pjê kam cute me ampo kêanre pupun xà ata, quê ha mehcunea mã hÿpaa to hÿpa.

¹² — Ne ita te hajÿr xwÿjrea na, ca ha ame amji pupun xà kêanre to ame amji pupu. Quê ha ame gahê ne me apro, ne hãn ne ame acahhy, ne me hacjên xà mã me gacjê, ca ha kam me acuhhê. Jirô pê mã quê ha, cute me cuprôn xà jÿrkwa kam mehcukij catêjê jÿhkra mã me gacjê, quê ha me acukij pa, jirô pê mã quê ha hipêr me hacjên xà kam hãn ne me ato awcapê. Ne icwÿrjapêa quê ha pjê jô pahhi cuna mã me apyxwÿ. ¹³ Ca ha cuna mã me acuhhê, ne me ijarên pejti to me cumã ijarê. ¹⁴ Ne nee me acakôc xà to ate ame amji pytâr xà atajê to cormã ne ame amji japackre nare. ¹⁵ Ampo na? He wa ha cormã me amã acakôc xà gõ, ne me amã ate me amji jahkre pejti gõ, quê ha nee me acurê xwÿn atajê ame ato hÿràc nare.

16 — Ne quê ha ajte me apãmjêa me, me akjêjêa me, me gũkjê catêjêa me, me gõ ikwý nõ catêjêa me, amjia kôt me hacjên xà kam me ato awcapê, ne ihtýj me anõ cura. 17 Ne icwýrjapêa quê ha mehcunea ame acurê. 18 Ne me awcanãa ne. Ampo na? Quê ha nee me apê akĩ nõ pyxitre nõ ipictor nare. 19 Na ca ha ampeaj kam me awcanã, ne atýj me amji pytà.

Pê Jeju Krípinkrên jamre na harê

20 — Ca ha krãhtare me, me hàprê catêjê me, cute me Krípinkrên krã na me hõmpu, ne krí ata jamre na me to amji japackre pyrentu. 21 Por ca jũmjê Juta jõ pjê kam ame apa atajê, kënti wýr me aprar pyrentu! Ne Krípinkrên jõ kría kam ame apa atajê, krí pê me gapôj, ne me aprar pyrentu! Ne por ca pur kam ame apa atajê krí wýr me aprar nare! 22 Ampo na? He amcro atajê pê quê ha Pahpãm te Juta catêjê to kên xà jõ amcro. Ne pê ramã Pahpãm hõ kãhhôc kam, amcro atajê na, ampo cunea kên xà te hajýr na to awjahkre.

23 — Pýj me hêj xi, pyjê mehkra to tic atajê, ne hanea ne pyjê mã me kra kryjre atajê me, mehkà na kjê catêjê atajê! Ne pjê ita kam, quê ha me ate amji pupun xà kên crire nare me awýr cator. Quê ha Pahpãm me awýr me akên xà kêanre kujate, pjê ita wýr. 24 Quê ha me hàhtôa ne wapo xwahhi to mehcure, ne hanea ne me hàhtôa ne mehpro ne pjê cunea wýr ame to ajcrà. Por kríxàre pê mehcahkrit te me Pahpãm jahkre kêatre atajê, quê ha ihtýj Krípinkrên kam ame ipa ita na, quê ha ahnaa hõ amcro cahhur kam ahtwý.

Pê Jeju pjê wýr cute amji jaxàr xà jarê

25 — Ne itajê cunea te hajýr xà wýr, ate me hahkre pej xà, quê ha pyt kam hapôj, ne putwýr kam hapôj, ne caxêre kam hapôj, na quê ha pjê kam itajê mehkra ac-to tu ne. Cõxwa jãhkrihkrit kêanre ata cupate, quê ha nee jũm cute amji kam hapac xà nõ na amji jahkre pej nare. 26 Ne mehcunea mã, quê ha pjê wýr ampo kên cator xà ata hũpaa to hũpa. Na quê ha pjê kam me ajhu ne me hikwa. Ampo na? He quê ha cõjkwa kam caxêre cunea amji mã ihkrí xà to apha, cwýrjapê quê ha hũpate amjia kôt pjê kam ame ajhu.

27 — Ata caxuw quê ha cõjkwa pĩn ahpar mã ipê me Ahàkà carôt týjti me, hàhcujrohti ata mea mã, ahpar mã iwrýc to mõi, ahcakra kam. Quê ha mehcunea me hõmpu ne me Ahàkà pê Pahhiti catia na me hahkre pej. 28 Quê ha ampo itajê hajýr kam tẽ, ca me awcanãa ne, ne me amji týaj ne, ne cõjkwa wýr, ca kàj mã me rít. Ampo na? He ahtũm nare wa ha me apytà. Ne por ite me apytàr xà ata kôt harên xà te hajýr he.

Pĩxô kôt harên xà

29 — Por pĩxô pàr nõ ata, nare, ampo pàr ata he. 30 Quê ha ramã ihhõ tetet cato, ca ha me hõmpu, ne me amji jahkre pej pyrentu, ne me amji mã harên to: “Ahtũm nare, quê ha ta iwrýc pyrentu” hane. 31 Quê ha ampo itajê cunea apu hane, ca ha me hõmpun to hane, ne me to amji japackre pyrentu, nãmri Pahpãm

te pjê to ihmipej xà jõ amcro ata ramã cator xàa kam.

32 — Ne me to amji japackre peaj ne, nãmri quê ha mehtír itajê tyc xwýjrea na ampo itajê cunea hajýr to hane. 33 He me ijarkwa ita to amji japackrea ne, nãmri quê ha pjê me cõjkwa ihtýj jũ caxuw hamre, ne icakóc xà ita, quê ha quêt hàhhuc rohnýtta mã, ne nee jũ caxuw hamre nare.

Cu ha me amji jamãr prãm to me papa

34 — Ne me ca, me amji kôt hakop to impeaj to me apa. Ne nee amji kĩn na me gàkrun to pit mã me amji japackre to me apa nare. Ne nee cõxýhti to amji to me apipãn to pit mã ame amji japackre nare. Ne nee me ate amji to ame apijapar xà to pit mã ame amji japackre to me apa nare. Ca ha itajê to pit mã ate ame amji japackre to me apa na, quê ha ampo cunea jamre xà jõ amcro awýr cato, ne amõr pejti kam apro to hane, pom quê ampo pro xà ihpro he. 35 Ne quê ha pjê cunea kam amehkrí atajê cunea wýr amcro ata cato. 36 Cwýrjapê ca ha gõtpe me amji kôpĩr peaj to me apa, ne ma Pahpãm mã me amji cajrên, mãr ca xwý mã ampo itajê pê me amji pytà, ne cupê me gapôj, ne icuna mã me acuhhê tu — hane.

37 Pê Jeju amcro cunea kam ajco me cumã ampo to hahkrea to pyt, Pahpãm to me amji kam hapac xà jũrkwa kam. Ne ahna caxwa, pê ma krí pê hapôj, Pĩxô jõ kên wýr, ne curia hãn ne amji to apê. 38 Pê cõjkwa caprêc kôt ajco me hàhtôa ne ma Pahpãm to me amji kam hapac xà jũrkwa wýr me pra, cute me Jeju kam hapac prãmte.

Pê Jeju curê xwýn ahna me ajpên pa

22 Pê ramã me Hakren xà jõ amji kĩn ata wýr amcro incrêre ne nõ. 2 Pê ajco Pahpãm mã mehcajrên catêjê jõ pahhi me, Mojxe xwý jõ kãhhôc to me cumã hahkre catêjê me, ihtýj ame Jeju curan prãm, ne tee ame to hahkre. Ampo na? Pê ampeaj kam ihkôt me cumã me hàhtôti atajê cupa na pê.

Pê Juta ihpore kôt Jeju kên mã mên prãm

3 Pê me pahcurê xwýn pê Xatanaj carõ kên ata Jeju kôt me ipa catêjê te tõi atajê nõ, pê Juta Carijot ata mã axà. 4 Pê ma Juta tẽ, ne Pahpãm mã mehcajrên catêjê jõ pahhi me, Pahpãm to me amji kam hapac xà jũrkwa jamãr catêjê me, Jeju na cute me ajpên par. Mã Juta te me hũhkra mã Jeju to hahkre ne haxàr na, me cumã amji ton. 5 Mã ame hakry, ne cute me Juta mã ihpore jõr na me amji ton. 6 Mã hamre, Juta te ihpore pyr na ihtýj cute me cumã Jeju jõr na amji ton. Quê ha nee me hàhtôti atajê nõ Jeju pupun nare kam, cute jũ ri ahte me cumã hõr na, me ajpên par.

Pê Jeju me Hakren xà jõ amji kĩn jõ na awjahkre

7 Mã ramã me Hakren xà to cute ame amji japackre xà jõ amcroa kam hàhhuc. Mã amcro ata kam, amji kĩn ata caxuw Juta catêjê te ahpyanre na ame carà cahàcre

hòhti kra pê mehkritxwỳ ata curan. ⁸ Mă Jeju te Petrô me Jowāw kujahêc, ne me cumă:

— Me mō ne me pamă pyt caxuw me Hakren xà jō amji kîn jō nō to — hajÿr.

⁹ Mă cute me Jeju cukij ne me cumă:

— Jō ri wa ha mēr ame pajō ita to? — hajÿr.

¹⁰ Mă Jeju me cumă:

— Me ikampa, ca ha ramă krī mā me axàr xàa kam, quê ha me hūmre nō ata cō jacjê ne to ipa, ca ha me ajpên cajpa, ne ma me hūnă, ne ihkôt me mō. Quê ha jū ri ikre nō mā axà, ca ha hanea ne ihkôt me axà.

¹¹ Ne me ikre jō pahhi ata cukij, ne me cumă: “Me cumă ampo to hahkre catê te me acukij xà na me iku-jahêc, wa me acukij, jū ri mōrmō ikre caxwỳn nō ita, pom quê ha ihkôt me ipa catêjê me kam me me Hakren xà jō to apà ita?” hane. ¹² Quê ha kÿaj pê me amă ikre caxwỳn cati nō ata jahkre, ne ramă kam ampo cunea, kam cahôn xà, ne kam ahna mehkri xà, ne kam ahna me hâpàn xà, quê ha me amă hahkre. Ca ha curia pyt caxuw me me Hakren xà jō nō to — hane.

¹³ Mă hamre, ma me pra, ne krī mā me hâr, ne Jeju te me cumă ampo cunea jarên xà atajê cunea na me cator, ne cute pyt caxuw me hō ita ton.

Pê Jeju ihtyc xà na amji jarên

¹⁴ Mă ramă kaam hàhhuc, mā Jeju me, ihkôt me ipa catêjê me, me hâpàn xà na me hÿr, me hâpàn xà caxuw. ¹⁵ Mă Jeju me cumă:

— Wa ijōtpê ikên mā ixàr xwỳjrea na, me acahê na me Hakren xà jō ita kur na amji to prām. ¹⁶ He ampeaj kam wa ha me amă amji jarê, wa ha hipêr me Hakren xà jō ita nō krêr nare, quê ha ahnaa Pahpām pjê kam mehcunea to ihhimpej kam tē, wa ha cormă ihnō krê — hane.

¹⁷ Ne cute mehkôm xà pyr, ne cute Pahpām mā to hūrên hakryti na amji jarên, ne ihkôt me ipa catêjê mā:

— Mī, me akôm xà ita py, ne me acunea me to akôm pa. ¹⁸ Ampeaj kam wa ha me amă amji jarê, wa ha hipêr jū caxuw pîxô cacô ita kwỳ to ikôm nare, quê ha ahnaa Pahpām mehcunea to ihhimpej kam tē, wa ha cormă ihnō kwỳ to ikô — hajÿr.

¹⁹ Jirô pê mā ri cute pāw pyr, ne Pahpām mā to hūrên hakryti na cumă amji jarên, ne ihcokjêr ne ihkôt me ipa catêjê mā hōr par, ne me cumă:

— Pom pāw ita, ijīa mā he, wa hân ne me amă cugō, ca atÿj me ku. Jirô pê mā, ca ha ate me ito amji japackre prāmte, atÿj pîxô cacô ita to me ikô, ne me pāw ita kur to me acuhhê tu — hane.

²⁰ Ne me hâpàn jirô pê, cute hajÿar ne pîxô cacô na me cumă ihkôm xà jōr, ne me cumă:

— Pom pîxô cacô ita, icaprôa mā he, ne me anaa wa ha haxwỳ. Ata to wa ha me amă ite amji kam ijapac xà intuw to awjahkre.

²¹ — He ramă, pom ca me jÿ itajê nō te icurê xwỳn catêjê jūhkra mā ijaxàr, mā cute me icuran na, imă hahkre pej. ²² Ÿhÿ, wa ha itÿj ipê me Ahàkà cati ityc to prām. Ampo na? Pê ramă Pahpām ityc xà ata na amji mā to ihhimpej hiahpuro. Pÿj me hêj xi, por quê ha me

ikên mā ijaxà ata, quê ha ijirôa pê amji pupun xà kêanre to amji pupu — hajÿr.

²³ Mă ahpÿanre na, cute me ajpên cukij kam mehtêm, ne me ajpên mā:

— Pÿhàpà, jūm mā quê ha ajte me hūhkra mā haxà? — hajÿr.

Jūm ri amji jirôa pê cati

²⁴ Mă me ahna ahtūmre, Jeju kôt me ipa catêjê te ajpên jirôa pê me cati na me amji jarên kam mehtêm.

²⁵ Mă ahna Jeju pê ihkaj na me kam, mā me cumă:

— Ÿhÿ, pjê ita cunea kam krīxàre jō pahhi cati catêjê cunea mā amji to me catia prām. Ne cumă mehcunea te hâpên na to prām, na ri ihtÿj me to ihhimpej. Ne por mehcunea tehcajpa atajê te ri amji to me cati prāmte amji mā me hapÿy to: “Mehcunea Tehcajpar Catêjê” hajÿr.

²⁶ — Itajê cunea te hajÿr pit, ne me akwÿa kam, quê nee itajê nō hajÿr nare. Me akwÿa kam, quê ha jūm catihti ata pê curmă jūm tuw ata pyràac. Ne por me gō pahhi ata, quê ha ihhêj rūm cupê me amă hâpên catê pyràac. ²⁷ Mēr jūm ri, me hūmre mā amji jirô pê cati? Xà ajkī hâpàn xà na jÿ ata? Nare, xà ajkī me cumă me hō jōr to pra ata? Ÿhÿ, por hâpàn xà na jÿ ata ri, me hūmre mā me hirôa pê cati. Ne Pahpām mā ita na ihkaj na. Ne cumăa, por me cumă hō jōr to pra ata ri quêt cati. Ne ipêa ri me amă hâpên catê ata pyràc.

²⁸ Ca gōtpê ikôt me apa, ne icahê na ramă me ate me amji pupun xà kêanre kwỳ to ame amji pupun.

²⁹ Cwÿrjapê ri Pahpām te me acunea to ihhimpej xà na ixām. Ne pa, wa ha hanea ne me ate me to ahimpej xà na me apyxwỳ. ³⁰ Ca ha, por curi ite ihimpej xà kam, ijàpàn xà na me akrī xà ata kam me apà, ne ahna me ikô. Ne ca ha hanea ne me Pahhiti krī xàhti catia ata kam me akrī, ne Ixaher catêjê kwỳ te tōxi atajê mā cute amji kam me hapac xà na awcapi, ne ahna mehcukij, ne me cumă to ahimpej to me akrī — hane.

Pê Jeju Petrô mā awjarê

³¹ Ne cute Ximāw Petrô măn ne cumă:

— Ximāw, Ximāw, nāmri ajco, nāmri ramă me pahcurê xwỳn pê Xatanaj te ato arÿjhy, ne acarêr ne acajpêr prāmte acaxuw amji mā Pahpām na hàhwÿr.

³² Wa ramă ite, ca nee ate ito amji mā ahimpej jicu nare na, Pahpām mā acajrên. Na ca ha gōtpê ipê ampÿre mā apu mō, ne ana ahtūm nare, ca ha hacpÿa ne iwÿr amji jaxà, ne acato, ne me akwÿ mā hūcanâr xà to ihtÿaj ne ajco — hajÿr.

³³ Mă Petrô Jeju mā:

— Ÿhÿ, wa ita kam ihcunea caxuw apu mō. Quê ha hapacta ne akôt me ijaxà, ne jū na me ito. Wa ha itÿj awcană ne akôt ty. Ne nee imă ihnō na hūpa kênre hamreare — hane.

³⁴ Mă Jeju cumă:

— Petrô, ampeaj kam wa amă awjarê. Ca ha caxwa ita kam, hōxāhxác kàr xwỳjrea na ate jahkre pej nare na, amji to ahêj to incrê — hane.

Ihpore cjên xà me wapo xwahhi jarën xà

³⁵ Jirô pê mã ri Jeju te ihkôt me ipa catêjê cukij, ne me cumã:

— Xà ca gôtpê amcro ata to me amji japackre, mâr pê wa me akujate ata to? Pê wa me apê ihpore cjên xà nare kam me akujate, ne me apê me akà nare kam me akujate, ne me apê ampo hamreare kam me akujate. Xà ca gôtpê ajkí ite me apê ampo hamreare kam me akujahêc ata to me amji japackre? Xà pê ajkí hõtpê me apê ampo hamreare? — hajÿr. Mã me Jeju mã:

— Quê, me ipê ampo hamreare nare, pê hõtpê me imã ampo cunea — hane.

³⁶ Mã Jeju me cumã:

— Por me amã ihpore cjên xà atajê me, me gâhcukrêj atajê me, gapacta ne ita caxuw me acwa. Ne por me apê wapo xwahhi nare atajê, atÿj me gitô kà to ihpore na me ahpa, ne amji mã me to wapo xwahhihti japrô. ³⁷ Pê ramã Pahpãm jarkwa na mehçakôc catêjê nõ hõ kâhhôc kam, ina ihhôc to hane he:

“Quê ha mehkên catêjê me, me to ajpëan” hane.

Ampeaj kam wa me amã awjarê, por pê ramã ihkâh-hôc ina ampo to hÿjarën xà to awjarê ata, quê ha ihtÿj ito hanea to ito hane — hane.

³⁸ Mã ihkôt me ipa catêjê me cumã:

— Me ijô Pahhi, nãmhã, ramã wapo xwahhihti pi-jakrut he — hane. Mã Jeju me cumã:

— Mër nãmhã, quê ha taa mã — hane.

Pê Jeju Píxô jô kën wÿr mō

³⁹ Mã hamre, ma caxwa ri Jeju Píxô jô kën wÿr mō. Pê ramã curi ipa to amji pyrãac, na pê mō. Pê ma ihkôt me ipa catêjê ihkôt me mō. ⁴⁰ Ne curi me cator, mã cute amji mã hÿr xà ata mã cator ne kam hÿr, ne ihkôt me ipa catêjê mã:

— Ma Pahpãm mã me acakôc, ne cumã me amji ca-jrën, ne ahna me ahwÿ, mâr quê ma me atête me pahcurê xwÿn to pên to mō, mâr quê nee me acyt, ca ame cumã me apec nare prãmte — hajÿr.

⁴¹ Ne hãm, ne cute cahi rën to trînta ne ihkôn krã na hÿr, ne cute Hÿm Cati mã ihçakôc kam ihtêm, ne cumã:

⁴² — Inxÿ Cati, pom wa ikên xà na amji pupu ita pê ihhêj rÿm ikôm xà pyrãac. Wa ma apu ikên ita cunea to ikôm caca. Quê ha amã itête ikên to ikôm xà ita camën prãm na, ca ha gapacta ne atÿj itête camê, nãmri quê ha amã ite to ikôm na ito prãm na, wa ha itÿj to ikô. Ampo na? Por ate ampo to amji mã ina prãm xà ata na, wa ha itÿj ahna mã akôt amji kampa — hajÿr.

⁴³ Mã cõjkwa pîn Pahpãm jarkwa na imprar catê nõ hÿrmã iwÿc, cute cumã hÿcanãr xà to ihtÿj prãmte.

⁴⁴ Mã cumã amji kîn nare ata te ihçãmxêr, ita pê ihhêj rÿm ampo xà ihtÿaj te ihçãmxêr. Mã hÿcanãr kam cormã Hÿm Cati mã ihçakôc. Mã ahna cõ pehpec ita pê ihhêj rÿm caprô te pjê kam apu ihpehpec pyrãac.

⁴⁵ Mã cute cumã ihçakôc jirô pê hãm, ne ma ihkôt me ipa catêjê wÿr mō. Ne me hõt wÿr cator, mã ihtÿj me hikwa ne ame gôr, ne pê me cumã amji kîn nare, na pê me hikwa ne ame gôr. ⁴⁶ Mã cute me cumã harkwa cator, ne me cumã:

— Ampo na mã ca me gikwa ne ame gôr? Ame ampra ne ame to acuhhê, ne Pahpãm na ame ahwÿ, mâr quê nee me pahcurê xwÿn me amã ampo kên to hahkre nare — hajÿr.

Pê Jeju cama amji na me hamã, quê mehpro

⁴⁷ Ne Jeju cormã ame cumã ihçakôc kwÿa kam, mã me hàhtôa ne hÿrmã me cator. Ne pê Juta Carijot ita pê Jeju kôt me ipa catêjê te tõi atajê nõa, Jeju wÿr me hàhtôa ne me to mō, ne ma Jeju wÿr tẽ, ne cute cahôr prãmte ahna hàhtêp. ⁴⁸ Mã Jeju cumã:

— Xà ca ha ajkí atÿj ipê me Ahàkà cahôr xà ita to kên mã amê? — hane.

⁴⁹ Mã Jeju kôt me ipa catêjê te ita na me hõmpun to hajÿr, ne cute me Jeju mã:

— Me ijô Pahhi, xà wa ha itÿj me ijô wapo xwahhihti ita to me kam tẽ? — hajÿr.

⁵⁰ Mã mehnõa te wapo xwahhihti to Pahpãm mã mehçajrën catêjê jô pahhi mã hàpên catê nõ ata kam ihtêm, ne cupê hapac jakep, awpôc rÿm. ⁵¹ Mã Jeju cumã:

— Ame hajÿr nare! — hane. Ne cute hapac jakep ita na hÿ xir, ne cumã ihcupên, ne cumã to impej pyrentu.

⁵² Jirô pê mã ri Pahpãm mã mehçajrën catêjê jô pahhi me, Pahpãm jÿrkwa jamãr catêjê me, prohti kam me, cute mehpro. Mã Jeju te me cumã harkwa to:

— Pÿhàpà, xà ajkí ipê cute me pahhi jÿhhÿr na me to ihhimpej catê jô pahhi na mã, ca me gô kôtàre me, me gô xwapo xwahhihti itajê to me ipro to me mō? ⁵³ Pom wa amcro cunea kam Pahpãm to me amji kam hapac xà jÿrkwa kam me acape na apu ipa ita? Ca rÿ jÿ caxuw ate me ipro prãm nare. Ne hamre ita kam ri me gô amcro, ne me pahcurê xwÿn jô amcro, na ca ha atÿj me pahcurê xwÿn jô awcapãtkôa kam ame apê — hajÿr.

Pê Petrô Jeju pupun nare na amji to ihhêj

⁵⁴ Ne hamre, cute me Jeju pro, ne ma cute Pahpãm mã mehçajrën catêjê jô pahhi jÿrkwa wÿr me to mō, ne me to hàr. Mã Petrô hapua na Jeju na mehkôt mō.

⁵⁵ Mã ikre jarkwa cahê na, carã ata kam cute me cuhôn, ne ipu na amehkrí, mã ma Petrô mehkwÿr mō, ne me cahê na cuhy na hÿr.

⁵⁶ Mã ikre kam hàpên catêjê cahãj nõ ata te Petrô pupun, ne xa ne hõmpun tÿjti, ne cumã:

— Pom jÿ ita pê Jeju na mehkwy nõa ri — hajÿr.

⁵⁷ Mã Petrô cumã:

— Pÿhàpà, pyjê nõ ita, wa nee ite jÿm ita jahkre pej nare — hane.

⁵⁸ Ne ahna ahtÿmre mã mehkwyã xÿmre nõ ita tẽ ne cumã:

— Apê mehkwy nõa mã ca — hane. Mã Petrô cumã:

— Hümre nõ ita, nee ipê mehwý nare, ipê jümjê itajê jahkre kêatre — hane.

⁵⁹ Ne hamre, ahna ahtüm rya mã mehnõa hýrmã mõ, ne cute Petrõ mã:

— Ýhý, he ampeaj kam ri cupê mehwýa nõ mã, pom hanea ne cupê Hípõjajo catêjê nõ ita? — hajýr.

⁶⁰ Mã Petrõ amji tète apu cumã ihhêj, ne cumã:

— Hãpã, hümre nõ ita, pom ca apu ampo jarê ita, ipê hahkre kêatre, wa nee ite hahkre pej nare — hane. Ne cormã jy ne apu ihcakõc kwýa kam mã hõxãhxãc kâr.

⁶¹ Mã ikre kam, hacpý ne Jeju Petrõ wýr ipipkjêr ne hõmpun týjti. Mã cute Jeju te cumã: “Caxwa ita kam, hõxãhxãc kâr xwýjrea na, ca ha ate ijahkre pej nare na amji to ahêj to incrê” hajýr na, to amji japackre pyrentu. ⁶² Ne ma hãm ne cator ne mõ. Mã ihpahàm te ihcãmxêr pyrentu, mã amrãa to amrã.

Pê krãhtare Jeju cahhy

⁶³ Mã me hümre ame Jeju jamã atajê ame hün kêanre, ne amehcahhy. ⁶⁴ Ne mento pro ne mehcukij to:

— Mër jüm te mã acakwîn? Harê! — hane. ⁶⁵ Mã hamre, me hümre itajê ame hapactua kam ame ahna xwý.

Pê Jeju prohti kam me cuna mã xa

⁶⁶ Mã apê, mã cute me amji to cuprõn. Prohti kam me, cute Pahpãm mã mehcajrên catêjê jõ pahhi me, me cumã Mojxe xwý jõ kãhhõc to hahkre catêjê me, cute me amji to cuprõn. Ne cute me cuprõn jirõ pê mã ri cute me Jeju na hãhwýr, prohti kam me hipõc ri hãm prãmtẽ. Mã cute me hãm.

⁶⁷ Mã cute mehcukij, ne me cumã:

— Me imã amji jarê, xà apê, por pê Pahpãm Crixto capi ne to awjahkre ata mã ca? — hajýr. Mã Jeju me cumã:

— Ýhý, xà wa me amã amji jarê, ca me ikampa ne gõtpe amji mã me ito ahimpej? Hãpã. ⁶⁸ Xà wa hanea ne me acukij, ca ajkí me imã ampo jarê? Hãpã. ⁶⁹ Ne hamre, quê ha hãn ne ipê me Ahàkã, Pahpãm carõt ca-tia kam, awpõc rüm, hĩkjê rüm jy — hane.

⁷⁰ Mã mehcunea me cumã:

— Pýhãpã, xà ampeaj kam apê Pahpãm kra? — hane. Mã Jeju me cumã:

— Ýhý, pom ca me caa ipê Pahpãm kra na me ijarê ita? — hane.

⁷¹ Mã cute mempar ne ajpên mã me harkwa to:

— Ýhý, ita caxuw cu nee jũ rüm me jüm te harên xà kên nõ kam me pajapac prãm nare. Ampo na? Ramã harkwa te harên xà kêanre to harên, cu pahte me pajapac jã to mempar — hajýr.

Pê Jeju Pirat cuna mã xa

23 Mã prohti kam mehcunea xãm, ne ma Jeju to, por Pirat pê Roman jõ pahhiti jarkwa kõt krí to ihhimpej catê ata wýr me mõ, ne cuna mã cute me

hãm. ² Ne cute me Jeju kõt harên to me hêj xi xà kêanre kam me to ihtêm, ne me cumã:

— Ýhý pahhi Pirat, wa ampo na ite me hümre ita pro ne awýr me to imõr nare. Wa ite me ijapac jã to mempar, mã apu Roman catêjê jõ pahhiti pê Xexa jũhhyr prãm. Ne hanea ne, me ikam mare mã, quê nee pjê jahpan xà na me Roman catêjê jõ pahhiti mã me hãmjõr nare na, me to ihcakõc to ipa. Ne hanea ne apu cupê Crixto na amji jarê, ne quê ha xwahna ihtýj amji to me ijõ pahhiti — hajýr.

³ Mã Pirat te Jeju cukij ne cumã:

— Xà ajkí apê Juta catêjê jõ pahhiti? — hajýr. Mã Jeju cumã:

— Pom ca caa ijarê ita? — hane.

⁴ Mã Pirat te Pahpãm mã mehcajrên catêjê jõ pahhi me, me hàhtõa atajê mã:

— Ampo cwýrjapê wa ihcuran na me cumê? Wa nee ite hümre ita kam ampo kên pupun nare — hajýr.

⁵ Mã hipêr Pirat cunaa mã, cute me harên kam mehtêm ne me harên to:

— Krí cunea kõt cute ampo to hahkre xà itajê to ajpên caxuw me irêc to ipa. Hípõjajo jõ pjê kam ri cute kam to ihtêm, ne ramã me pajõ krí pê Krípinkrêan kam, cute ton kam ihtêm he — hajýr.

Pê Jeju Heroti cuna mã xa

⁶ Mã Pirat te me kam hapac ne me cumã:

— Pýhãpã, xãmte hümre ita pê Hípõjajo jõ pjê catêjê nõ mã? — hajýr. Mã me cumã:

— Ýhý — hane.

⁷ Mã Pirat te Jeju pê Hípõjajo catêjê nõ na hahkre pej, ne ma pahhi Heroti pê Hípõjajo jõ pjê jõ pahhi mã ihkujahêc. Pê ramã Krípinkrên kam Heroti apu mõ, na pê hýrmã ihkujate. ⁸ Mã curi me to cator, mã Heroti apu hakry. Ampo na? Cumã Jeju pupun prãm, cwýrjapê ri apu hakry. Ne rý pëa mã hãn ne Heroti Jeju te ampo cunea pihho impejti ton xà atajê na harên pa. Ne rý jũ caxuw cute hõmpun nare, ne cormã cute hõmpun, cwýrjapê ri apu hakry. Ne apu Jeju cukij, Jeju te kam mare mã cumã ampo pihho pejti ton, mã cute hõmpun prãmtẽ. ⁹ Ne cute ampo jãhtõa ne ahna ihcukij, mã nee Jeju te cumã jũ mãn nare, ne aracri cupê xa.

¹⁰ Mã hamre, Pahpãm mã mehcajrên catêjê jõ pahhi me, me cumã Mojxe xwý jõ kãhhõc to hahkre catêjê me, Heroti wýr me cator, ne Heroti kam mare mã cute me Jeju to mehhêj xi xà kêanre to mehhêj xi kam mehtêm. ¹¹ Mã Heroti jõ krãhtare atajê cama apu Jeju to hapactua xà kêanre to me hapactua. Ne ame ahna xwý, ne pea cute me pahhi kã mã haxàr, ne me hapactua kam ame to pahhi. Ne pahhi kã impejti ata mã cute me haxàr, jirõ pê mã ri hacpýa mã cute pahhi Pirat mã mehkujahêc.

¹² Mã hamre, amcro ata kam, Heroti me Pirat te amji to me ikwý nõ. Pê mam nee amji to me hõ ikwý nõ nare. Pê mam nee me amji cajrên nare, ne ajco me ajpên curê.

Pê Pirat Jeju curan na harkwa

13 Mă Pirat te me Pahpăm mă mehcajrën catêjê jô pahhi me, Juta catêjê jô pahhi me, por curi me hàhtôa ne ahna me xa atajê me, cute me to cuprôn, ne me cumă:

14 — Pom ca iwÿr me hÿmre to mō, ne ate me imă cute pahhi jÿhhyr na harën ata na, ite ramă ihcukij, ne nee ite kam ampo kên mă icator ne hōmpun nare, pom ca ampo na ame imă to awjarê atajê na. 15 Mă hanea ne Heroti te harkwa kên nō na impar nare, cwÿrjapê ri hacpÿa ne cute imă ihkujahêc. Ne nee me anō kam mare mă hÿmre ita te ampo to kên nare. Ne mēr ampo cwÿrjapê wa ha ajte ahna me cumê, quê mehcura? 16 Wa ha cama pryti kà kam wakÿre to ihc-ahhyr na me cumê, quê ha amehcahhy, jirō pê mă wa ha ma ihkujate, quê ha tē — hajÿr.

17 Ne me Hakren xà jô amcroa kam ri cute ampo to me amji pyrác xà ata pê hane he. Pê Pirat hăn ne hōt-pê me harkwa kôt me cumă me hacjên catêjê pyxit ne hapôj. 18 Mă me hàhtôti atajê te me caràr kam mehtēm, ne ame caràr to:

— Me imă hÿmre ita tyc na to prām, ne Parapa mă ca ha me imă hikra — hajÿr. 19 Ne pê Parapa ata pê apu pahhi jÿhhyr prām, pê hanea ne ramă jÿm ita cura, cwÿrjapê pê me haxà, pê ajco hikwa.

20 Mă hacpÿ ma mă Pirat te me hàhtôa atajê cukij, cute Jeju mă hikran prāmte. 21 Mă hipêr mehcuea te me caràr to:

— Pī kam me axô, quê ty! Pī kam me axô, quê ty! — hajÿr.

22 Mă hamre, Pirat te mehcuikij to incrê ita caxuw ri me cumă:

— Nee cute ampo to kên nare, wa ha ajte ihcuran na me cumê. Wa ha cama pryti kà to apu ihcahhyr na pit mă me cumê, quê ha amehcahhy, wa ha ma cumă hikra, quê ha tē — hajÿr.

23 Hamre, mă kÿj cati pêa mă ame caràr, ne pī kam menxôr na awjahkre, me caràar kam. Ne cute me caràr ita to me Pirat hi kwīn. 24 Mă Pirat te Jeju curan na me mēn. Pom pê ahnaa ajco me to prām ata na ri cute ahna me mēn. 25 Ne cute Parapa te apu pahhi jÿhhyr prām, ne ramă jÿm curan ata mă hikran. Ne me hÿhkra mă Jeju jaxàr, quêt taa jÿ na me to, por jÿ mă cute ame ton prām xà ata na.

Pê Jeju ma ihcuran xà wÿr mō

26 Mă hamre, ma Jeju to me mō. Ne me to mōr kwÿa kam cute pry kôt me Xiren jô krí catêjê nō cajpar, pê hapÿr Ximăw. Pê pur pīn mō, pê mehcajpa ne mehpro ne pīhti ata krac ri me haxà, ne ahna me cumă quêt to mō, pê ma Jeju kôt to kwÿ.

27 Mă me hàhtôa ne hapu na Jeju na me hōmpun to me mō. Mă pyjê kwÿ Jeju kôt me mō atajê ahna ame hōmpu, ne cama ame caprī ne ame kam amră. 28 Mă hacpÿ mă me hÿrmă pipkÿêr, ne cute me cumă harkwa to:

— Krīpinkrên jô pyjê itajê, nee ca ikam ame acwÿr nare, ne me akra kam ca quêt ame amră. 29 Ampo na? He quê ha cormă krí ita jô amcro kēanre kam ahtwÿ, quê ame garên to:

“Por jÿ caxuw pyjê itajê nō mă ihkra nare, mă nee cute to pijahôr nare, ne nee to ipijapar nare atajê, quê ha ame hakrya to ame hakry” hane.

30 Quê ha jÿ caxuw amcro ata kam ahtwÿ, quê ha me hÿmre kwÿ me kēnti nō mă:

“Hă, kēnti ita me ijipy apÿm” hane.

— Quê ha hanea ne me hÿmre kwÿ kên jawênre atajê mă:

“Me ito amxu” hane.

31 Ÿhÿ, me papê cuhy caxuw pī pyrác, ne pa ri cormă icoti na wa apu amji pupun xà kēanre to amji pupu. Ne me ca nare, ca ha jÿ caxuw me acrà, ne ijirôa pê ame amji pupun xà kēanre nō to ame amji pupu — hane.

Pê pī na me Jeju xô ne me ahna xwÿ

32 Ne Jeju kôt me hàhkÿj xi pijakrut ne me to mō, cute mehcuran prāmte. 33 Ne kên japÿr te Corcota ata kôt harên xà te “Mehkrăhhi jô kên” ata wÿr me to cator. Ne pī na cute wakÿti to me Jeju jÿhkra me ihpar cuhhêc, ne ahna me hăm. Ne hanea ne me hàhkÿj xi atajê to cute me hajÿar ne pī na me haxôr, ne awpôc rÿm me ita xôr, ne awke rÿm me ita xôr.

34 Mă Jeju te Hÿm Cati mă mehcajrën to:

— Inxÿ Cati, pom ame ito kên itajê pê ijahkre kēatre, cwÿrjapê ri ame ito hane, na ca ha nee ame kam acryc nare, ne cute me ito kên ita to tojnō — hajÿr. Mă krăhtare atajê te Jeju kà to ame ipicràn, ne kên te amji pê hÿhkàr xà to ihkôt ame amji pê hÿhkà, jÿm mōrmō quê ha amji pê to ihkà itajê jÿhkà.

35 Mă me hàhtôa ne ahna me xa, ne ame hōmpu. Mă me kam mare mă, Juta catêjê jô pahhi kwÿ apu Jeju na xwÿ, ne me cumă:

— Pÿhàpà, pom ca atÿj mehkwyÿ pytâr to apa ita? Pom apê Pahpăm kra ita, ca mēr pī ita pê amji capa ne wrÿ ne amji pytâ. Me imă nee apê Pahpăm kra nare. Quê ha apê Pahpăm kra na mă, ca ha atÿj pī ita pê wrÿ — hane.

36 Mă hamre, krăhtare catêjê ame ahna xwÿ ne ame cumă. Mă mehkwyÿ xwÿjê ame cumăn kēanre, ne me hapactua kam ame ahna xwÿ. Mă krăhtare nōa Jeju wÿr pīxô cacô xÿre ata to tē, ne cute to kam hapac, ne cumă:

37 — Krăa, pom apê Juta catêjê jô pahhi ita, mēr ampo na mă ca pī ita pê ate amji caxàr ne awrÿc nare? — hajÿr.

38 Ne Jeju kră incwÿrpê pī na ihkàhhôc ajêt ata pê hÿjarên to hane he: “Cupê Juta Catêjê Jô Pahhiti” hane.

³⁹ Mă me hàhkîj xi pijakrut ne pî na Jeju cahê na me ajêt atajê nõ apu Jeju mă, ne cumăn to:

— Pÿhàpà, pom apê Crixto ita? Xà ca ha amji pytâr ne amji kôt me ipytâr nare? — hane.

⁴⁰ Mă me hàhkîj xi catê nõ Jeju jîkjê rûm ajêt ata apu Jeju cwÿrjapê ihnõ ita kam incryc, ne cumă:

— Pÿhàpà, xà nee amă Pahpâm cupa nare? Ampo na mă ca apu cumă? Pom cu me pancrê itajê cunea me amji pupun xà kêanre to me amji pupu ita? ⁴¹ Pahte ri ampo kêanre ton, ne hûmre ita te nee ampo kên ton nare cakrô, ihtÿj me pahcunea kên xà ita mă hàr. Ne pahkên xà ita pê cu ajco amji to hapê, ne hûmre impejti ita pê nee ajco amji to kên xà ita japên nare — hane.

⁴² Ne cute Jeju mă amji jarên, ne cumă:

— Jeju, ca ha jû caxuw Juta catêjê jô pahhi na amji to, ne hacpÿ ne ate amji jaxâr xà ata kam, ito amji japackrea ne — hajÿr.

⁴³ Mă Jeju cumă:

— Ÿhÿ, wa ha ampeaj kam amă awjarê, ca ha ita kam icahê na, por curi mempejti tyc caxwÿn tîar ame ipa ata ri, cu ha ajwar apu mō — hane.

Jeju tyc xà

⁴⁴⁻⁴⁵ Mă Pahpâm to me amji kam hapac xà jûrkwa kam Pahpâm jûrkwa caxwÿn me, me hûmre tekjê ata te amji mă ahhyr xà na, cupêhkà pohti ajêt ata te awryc mă amji jipôn, ne ajpên wÿr ihkre. ⁴⁶ Mă hamre, Jeju hipêr kÿj cati pêa mă carâr, ne caràar kam cute Hûm Cati mă harkwa to:

— Inxû Cati, hamre, wa ha ty, ne icarõ quê ha ma awÿr api — hajÿr. Ne cute amji jarên jirô pê mă ihtyc.

⁴⁷ Mă Roman catêjê nõ pê krâhtare jô pahhi cati ata te Pahpâm pej na amji mă harên, ne taa amji mă:

— Xâmte ampeaj kam hûmre ita peaj to impej — hajÿr.

⁴⁸ Ne por cute mehtyc xà na me hõmpun xà caxuw me cuprôn atajê te me ita pupun, ne ma ame amji jacjên, ne me cumă amji kîn nõ xàhte, amji jôkôt kam ame amji cahhyr to me ipa. ⁴⁹ Mă Jeju jô ikwÿ nõ catêjê me, pyjê me, por pê Hîpôjajo jô pjêa rûm ajpên ihkôt me mō atajê, ampÿa mă mehcuhhê ne ahna ame hõmpu.

Pê me Jeju jarêt

⁵⁰⁻⁵¹ Pê me hûmre ihnõ japyr pê Joje, ata pê Krîhkàhti catêjê nõ, ne ajco catyt kam ipa. Ne cupê hûmre impejti, cute amji kam hapac xà cunea to, ne ajco Pahpâm himpej xà kujahêc xà ata japên to hikaj to ipa. Ne nee cupê mehkwy, ne Jeju cuna mă harkwa kên nõ to ihcakôc nare, ne catyt kam ahna ihcakôc, ne mehkwy te amji kam hapac xà kaj na ajco amji kampa. ⁵² Ne ma Pirat jûrkwa wÿr tē, cute Jeju na ihwÿr, ne pî pê ihtyc caxâr prâmtē. ⁵³ Mă Pirat te cumă hahkre, mă ma tē ne cute pî pê caxâr. Ne cute cupêhkà jakati impejti ata to Jeju jî cunea cupu, ne ma rÿ jû caxuw jûm te kên kre ita kam amji jarêt nare, ne cormă intuwti ata

wÿr to kwÿ, ne cute kam hir, ne ahna to hihê. ⁵⁴ Ne mehkôt xà jô amcro xwÿjrea na pê ita hane.

⁵⁵ Ne por Hîpôjajo jô pjê rûm, pyjê Jeju kôt me mō atajê te Joje te kên kre ata kam Jeju jarêt na me hõmpun. ⁵⁶ Ne ma ikre wÿr cute me amji jacjên ne me mō. Ne cute me to amji pyrâc xà ata kôt, cute me Jeju jî cuxwa prâmtē ame ampo cacô cuxwati, incoti ita cwÿr, ne ame to ipicacwÿr. Ne nee amcro ata kam hacpÿ mă cute me to amji jacjên nare, ne curia amehkôt to ame ipa, mehkôt xà jô amcro atajê kam.

Pê Jeju hacpÿa mă ihtÿr

24 Ne mehkôt xà jô amcro atajê jirô pê mă ri, iràrà na, ma Jeju kre wÿr pyjê atajê ampo cacô atajê te me pra. ² Ne ramă kre na me hàhtêp to pra, ne ampÿa mă cute me kre pupun. Mă kre jihê xà pê kên te kujti pyrâcti ata jûm te ramă hihê mên, mă hihê mên xa. ³ Mă kên kre mă me hàr, ne nee cute me Jeju jî pupun nare, ne mehkô pictor tu.

⁴ Mă krâa, me hûmre pijakrut ne mehkà jakati pràti kam me cuna mă me xa. ⁵ Mă hamre, me hûpate pjê kam ame ipihur. Mă me hûmre itajê te pyjê itajê mă me harkwa to:

— Ampo caxuw mă ca amehtyc cote na ramă hacpÿa mă jûm tîr ata japê? ⁶ He ramă hacpÿa mă ihtÿr, ne nee ita ri apu mōr nare, ne por Hîpôjajo jô pjê kam cute me amă amji jarên ata na ca me to amji japackre. ⁷ Pê me amă amji jarên to hane he: “Quê ha ihtÿj jûm mehkên catêjê jûhkra mă, ipê me Ahàkà jaxà, quê ha mehkên catêjê pî na me cuxô. Quê ha ty ne ahna amcro incrê, quê ha hacpÿa mă ihtÿr” — hajÿr.

⁸ Mă pyjê itajê te harkwa to me amji japackre pyrentu. ⁹ Ne ma ikre wÿr me pra ne me cator, ne Jeju kôt me ipa catêjê te ôxi atajê me, mehkwy mă, ame awjarê. ¹⁰ Ne pyjê itajê pê ame awjarê he: Marij Matarkwÿj me, Jowanakwÿj me, Tijac menxi pê Marij me, por pê mehkwyà kwÿ mehkôt me mō atajê mă, pê ihtÿj hanea ne ame harê. ¹¹ Mă Jeju kôt me ipa catêjê te nee me pyjê atajê te me cumă hûjarên xà itajê na me kam hapac nare, ne ihtÿj cute ame hûjarên to ame ipa na, amji mă me to hajÿr.

¹² Ne Petrô nare, pê hãm pyrentu ne ma kên kre wÿr ajcahu. Ne kên kre ri cator, ne cumă nör, ne nee Jeju jî pupun nare, ne cupêhkà te hî cupu, mă cupê cator ata na, ahnaa hakàn pê nõ. Mă ma hacpÿ mă ikre wÿr cute amji jaxâr ne tē, ne ita to cama apu amji kam hapac to amji mă ipikrar to mō.

Pê Mewÿrcacro jô krî jô pry kôt me mō

¹³ Mă amcro ata na ma krî wên japyr te Mewÿrcacro ata wÿr Jeju kôt me ipa catêjê pijakrut ne me mō. Pê krî wên ita hõtpê Krîpinkrên pê ampÿre mă xa, mōrmō pê hÿrmă rec pyxit ne ihkôt hîkjê kam pê xa. ¹⁴ Ne pry kôt ihtÿj Jeju pupun xà kêanre atajê to, ajco amji mă me hûjarên to me mō. ¹⁵ Ne cormă amji mă me hûjarên to me hàhpan to me mōar kam, mă krâa, Jeju me ahna cator ne ma mehkôt mō. ¹⁶ Mă cute me hõm-

pun, mã jũa mã cute amji tète mehrã ton, mã nee cute me cupê Jeju na me hahkre pej nare.

17 Mã me cumã:

— Ampo ca pry kôt amji mã me harên to me mō ata? — hane. Mã me hàhhuc ne me cumã amji kîn nare.

18 Mã ihnō japry te Cripa ita cumã:

— Pÿhàpà, xà ca apyxit peaj ne ajte Krĩpinkrên kam akrĩ, ne nee ate cormã amcro incrê cahhur ita kam ampo te hajÿr xà ata na hahkre pej nare? — hane.

19 Mã Jeju cumã:

— Ampo? — hane. Mã cumã:

— Por Naxare jō krĩ pĩn Jeju cator ata pê me pamã hũmre pê Pahpãm jarkwa to ihcakôc catê. Ne ampeaj kam Pahpãm jarkwa to ihcakôc, ne hàpên xà to into ihtÿj, ne me pamã cupê Pahpãm to Pahpãm. 20 Mã ajte Pahpãm mã mehcajrên catêjê jō pahhi me, me pajō pahhi me, cute me hũhkra mã me haxàr, mã cute ame to kêanre. Ne cute pĩ kam me inxôr, ne hũhkra me ihpar kam me wakÿre cuhhêc, ne toa mehcuran. 21 Ne pê wa ajco cute Juta catêjê to amji pytâr na mehcamjĩ, ne ahna me hikaj. Ne cormã ampo te hajÿr xà ita na amcro incrê peaj. 22 Ne me ikwÿa kam pyjê nõ ma kên kre kam cute me harêt ata wÿr me pra. Ne nee cute hipêr me Jeju jĩ pupun nare. Cwÿrjapê wa me icunea amji mã me to ijapôj to me ipa. 23 Ne pyjê atajê te me amji jaxàr ne ame imã awjarê, xwahna cute me cōjkwa pĩn Pahpãm jarkwa to memprar catêjê pit pupun. Mã xwahna ramã hacpÿa mã ihtĩr na ame cumã harê. 24 Mã me ikwÿa kwÿ te me hahpan, ne pyjê te me harên xà atajêa na cute me hõmpun, ne nee cute me Jeju jĩ pupun nare — hajÿr.

25 Mã Jeju te me cumã hũjarên to:

— Pÿhàpà, mã ajte ca nee uu ne ame pamã Pahpãm jarkwa to mehcajê catêjê jarkwa kam me gapac nare.

26 Pê ihtÿj Crixto ata kên na amji pupun to prãm. Ne quê ha cute amji pupun xà kêanre na amji pupun ata jahpan xà na, quê ha mehcuea jirôa pê hàmtâr cati na, hãn ne mehcuea me hahkre pej — hajÿr.

27 Ne cute ihkrãa kam me cumã Mojxe xwÿ jō kàh-hôc rũm cahyt kam ihtêm, ne ihkôt harên, ne ihkôt Pahpãm jarkwa to mehcajê catêjê cunea jō kàhhôc kwÿ cahyt par. Ne me cumã, por ampo te ihkàhhôc kam jũ mã ton xà atajêa na amji kôt harên partu.

28 Ne krĩ wên ata na ramã me hàhtêp, ne ramã me cator xàa kam, mã Jeju ma mehhyr ne ihtêm prãm.

29 Mã ma amji na ame huwahi, ne me cumã:

— Atêm nare, ne ita ri me ina ahtwÿ, nãmri ramã pytu — hane. Mã Jeju me ipijakrut atajê cahê na hàhhuc.

30 Ne me cahê na hÿr, ne cute pãw pyr ne to Pahpãm mã hũrên hakryti na amji jarên jirô pê, cute ihcokjêr ne me cumã hõr. 31 Ne cute me cumã hõr me ajkaam mã cormã mehrã kre, mã cute cupê Jeju na me hahkre pej, me ajkaam, mã hãm xà ata kam hamre, ne ma tẽ.

32 Mã ajwar ajpên mã me harê, ne me ajpên mã:

— Pÿhàpà, pry kôt pamã ihkàhhôc krã krutre jarên to mõr ata kam, cu ramã pahna cuhkõnrea kam amji mã to hajÿr pyrentu — hane.

33 Ne me hãm pyrentu, ne ma hacpÿ mã Krĩpinkrên wÿr me pra, ne ihkôt me ipa catêjê kwÿ wÿr me cator, ne ame cumã harê. 34 Mã mehkwy me ipijakrut atajê mã:

— Ampeaj kam ri me pajō Pahhiti hacpÿa mã ihtĩr! He hanea Petrô te hõmpun! — hane.

35 Mã me ipijakrut itajê te hajÿr ne, por pry kôt cute me hõmpun, ne hanea ne ikre kam me cumã pãw cokjêr na cute me hõmpun ata na, cute me cumã harên.

Pê Jeju ihkôt me ipa catêjê mã amji pê

36 Ne cormã me amji mã harên kwaa kam, mã krãa, mehcute na Jeju cator, ne cute me cumã harkwa to:

— Hàpà, mãr me apeaj? Nee ca icupate ame akrihkrit nare — hajÿr.

37 Mã mehcuea pikrar ne mehcuea mã paa to pa. Ampo na? He ihtÿj cute me jũm carõ pupun na ame amji cãmjĩ, na ri ame paa to ame pa. 38 Mã Jeju me cumã:

— Ampo na mã ca ito ame amji mã ajkra, ne ame ahkrihkrit? Ampo na mã ca cormã nee me akrã kam amji mã me ito hajÿr nare? 39 Me ijũhkra pupu, ne me ipar pupu. He ipê Jeju, pa wa. Me icupê ne me ijahkre pej, pom wa ijãa xa ita. He me carõ jĩ nare, ne nee mehhi nare — hane.

40 Ne cute ita jarên jirô pê cute me cumã hũhkra me ihpar jahkre, mã cute ihtÿj me wakÿre te caxwÿr xà xwa kre pupun. 41 Ne me hakryte ma ajmãr cupê Jeju na ame ahna aprã. Ne ihtÿj cormã amji mã me ajkra. Cwÿrjapê ri Jeju te mehcuran ne me cumã:

— Xà ajkĩ ita ri me apê ampo krêr xà hamreare? Wa ihkwÿ krê, ca ihkur na me ipupu — hajÿr.

42 Mã cute me cumã tep xêt nõ ita kwÿ. 43 Mã me kam mare mã xa ne cuku. 44 Ne me cumã:

— Ne por wa ame acahê na imõr kwÿa kam, amji na ite me amã ampo jarên atajê te ito hajÿr to prãm, ata na ri cute ito hajÿr. Por pê Mojxe xwÿ jō kàhhôc me, Tawi xwÿ jō kàhhôc me, mehkwy jō kàhhôc ito hũjarên xà to awjarê atajêa na mã, cute ito hajÿr — hane.

45 Ne jũa mã cute mehrã ton, mã ihtÿj me Pahpãm jarkwa par pejti.

Pê Hũm Cati Carõ Pejti jikaj na, Jeju me cumã harkwa ta

46 Mã hacpÿ mã Krĩpinkrên wÿr cute me amji jaxàr ne me cator. Mã hipêr Jeju te curi me cumã amji to ipiê, ne me cumã:

— Por pê Inxũ Cati jō kàhhôc kam ito hũjarên to:

“Quê ha, pê Pahpãm Crixto cator na me amã to awjahkre ata, ihtÿj amji pupun xà kêanre to amji pupu ne ty. Ne amcro incrê kam hacpÿa mã ihtĩr” hane.

— Ne hanea ne ihkàhhôc ata ito hũjarên to hane he:

47 “Hamre, quê ha cute harkwa jarên xà itajê cunea,

krĩxàre cunea kòt ajcrà.
 Ne Krĩpinkrên kam quê ha ipicràn kam tẽ,
 quê ha me harkwa itajê cunea jarên pa,
 ne me hahkre pej, ne mehkên ton jicu,
 ne amji mã me Pahpãm na ahwỳ,
 quê ha mehkên to tojnõ ne me to impej” hane.

⁴⁸ — Ne me ca, ate me ijarên pej xà caxuw ca ate me
 ato jĩa to me ipupun, ampo atajê cunea na. ⁴⁹ Ne me
 ca, por Inxũ Cati te ate me ijarên xà caxuw me amã
 carôt tỳjti to hũjahkre ata, quê ha ihtỳj me amã cugõ.
 Ne pa wa ha itỳj hanea ne me amã cugõ, ne ahna me
 ato ihmpej. Na ca ha ita ri, Krĩpinkrên kam, me hikaj.

Quê ha ita ri còjkwa pĩn, me amã me acarôt tỳjti ata
 wrỳ, ca ha me acwa — hane.

Pê Jeju còjkwa wỳr api

⁵⁰ Ne Jeju te krĩ pê me to cator, ne ma amji kòt
 Mehkênpupunxà jõ krĩ wỳr me to mõi, ne curia ri cute
 mencwỳrpê hũhkra curor, ne cute mehcajrên. ⁵¹ Ne
 cute mencwỳrpê hũhkra curor me ajkaam, ma còjkwa
 wỳr hàpir to mõi. ⁵² Mã ame Jeju pejti na harẽ, ne ma
 Krĩpinkrên wỳr cute me amji jaxàr. ⁵³ Ne amcro cunea
 kam, ma Pahpãm to me amji kam hapac xà jũrkwa wỳr
 me ipa, Pahpãm mã mempejti to mehcakôc prãmte.
 Hamre.

JOWĂW

Ýhÿ, pê Jowăw ihkàhhôc ita to, ne Jeju na mehkwy cunea mã ihkujate. Ne pê cupê Jeju jarkwa na memprar catêjê nõ. Ne pê mam cupê tep pro catê, pê Jeju amji kôt ipa catê na ahna ahwÿ. Pê caku crê kam ajco Jeju kôt apu ipa, ne pê Jeju te amji kam hapac xà cunea na hõmpu. Ne pê Jeju mã mehkwy jirôa pê Jowăw kîn. Ne hõ kàhhôc kam cute pjê ita kam Jeju te mör reria mã cute ampo kwÿ ton, ne ihkwÿ jarên xà itajê kwÿ na ihhôc. Ne hõ kàhhôc ita kam cute, me pahte ampeaj kam Jeju to amji mã me pahhimpej to me pamã hahkre. Ne ampeaj kam ri cupê Pahpãm kraa to Pahpãm kra, ne taa mã ri Pahpãm cahê na me papa rohnÿtti mã na me pamã to hahkre. Ne hõ kàhhôc japyrÿ pê (Jowăw).

Jeju pê Pahpãm

1 ¹⁻² Mam, ampo cunea cumam, pê ramã me pajõ Pahhiti ipa. Ne me pamã cupê Pahpãm cakôc xà me harkwa. Ampo na? Taa mã ri me pamã Pahpãm te amji kam hapac xà me, incaca xà to ipipê to ipa. Ne pê Pahpãm cahêa na maam ajco apu ipa ne me ajpëan. ³ Na pê me pajõ Pahhiti Hũm Cati jarkwa kôt ampo cunea ton partu, pê nee iràn xà na, ampo hũhkra kaj na, amjia kôt amji ton nare.

Pê Jeju me pamã Hũm Cati jahkre

⁴ Na ri cupê me pahte amji kam me pajapac xà cunea xakat. Ne pom hãn ne pyt pjê cunea kujro, cu hàhcujro kôt me ampo cunea pupu, ita na mã me pajõ Pahhiti me pahcunea mã pahte me hahkre pej xà gõ, mãr cu ihcunea na me Pahpãm pê Hũm na me hahkre pej ne me hõmpu, ne cahê na me papa rohnÿtti mã. ⁵ Pyrác pej na mã me pajõ Pahhiti pê me pahcujro xà, ata kôt cu me Hũm Cati jahkre pej ne me hõmpu. He jũ wÿr quê mehkên ton catêjê nõ, pê ihhêj rũm awcapátkô kam mehkří catêjê atajê kwÿ, me pahte me Pahpãm pupun nare prãmte, me papê cute me pahcujro xà ita pro ne cupĩ.

⁶ Ne pê me pajõ Pahhiti cator xwÿjrea na, mam Pahpãm me pamã harkwa na imprar catê pê Jowăw te cô kam me cumrãr catê ata kujate, cute me pamã me pahcujro xà pê me pajõ Pahhiti ita to hũjarên, ne to hahkre xà caxuw. ⁷⁻⁹ Ne pê Jowăw xwÿ pê me cumrãr catê ata nee ihcakôc xà to:

— Ipê ihhêj rũm me acujro xà — hajÿr nare, ne cama harkwa to:

— Quê ha cormã me pamã me pajõ Pahhiti cato, ata pê ri ihhêj rũm me pahte amji kam me pajapac xà cunea kujro xà, pjê cunea kam. He cupêa ri quêt me pahcujro xàa to me pahcujro xà — hane. Ne pê Jowăw me pamã me pajõ Pahhiti to hahkre, pahte me hahkre pej ne to amji mã me pahhimpej xà caxuw, pê me pahwÿr cato.

Quê ha jũm te Jeju to amji mã ihhimpej na, quê ha cupê Pahpãm kra

¹⁰ Ne me pajõ Pahhiti pê Hũm cakôc xà me harkwa ata pê mam ampo cunea to, ne taa mã pê pjê ita wÿr wÿr ne apu ipa. Mã xãmte pjê kam mehcunea te nee cupê ampo cunea ton catê na me hahkre pej nare.

¹¹ Ne ma Juta catêjê jõ pjê wÿr cator, mã nee ajte cute ahna me amji caxàr nare. ¹² Mã mencreêre pyxitre te ahna me amji caxàr, ne cumã me amji jõr, ne toa amji mã mehhimpej to me ipa, ne me cumã:

— Apê Pahpãm kraa to ihkra — hajÿr. Cwÿrjapê ri Hũm te ihtÿj ihkôt me to amji kra.

¹³ Cu me paxũmre nee ame pahkra ton to hajÿr nare, ne ajteare mã me. Quê ha me paxũmre nõ mã ihkra prãm, quê ha xa ihprõ nõ me hikwa, ne ajpën kam mehkra, quê ha cormã me cumã ihkra. Ne Pahpãm te nee hajÿr nare. Quê ha cama, por jũmjê me pajõ Pahhiti to amji mã mehhimpej atajê mã harkwa to:

— Imã me ato amji kra to prãm. Na wa ha amã Icarõ Pejti kôt, ate amji kam gapac xà tuw pejti gõ, mãr ca apê ikra — hane. Pea quê ha jũmjê atajê amji to Pahpãm kra pyrentu.

¹⁴ Ne pê me pajõ Pahhiti pê Hũm Cati cakôc xà me harkwa ata, me pahwÿr wÿr, ne me pajãa na amji to, ne ajco apu ipa. Pê wa me hõmpu. Pê cupê Hũm mã ihkra pyxit peaj ata. Cwÿrjapê ri carôt tÿj me Hũm carôt tÿj pipëan, ne impej me Hũm pej pipëan. Na ri cute Hũm cuxà amji mã me pajapêti to cator, ne cute me pahpytâr catê na amji ton. Ne cupê Hũam, ne nee apu ihhêj xi jarên nare, ne quêt catyt kam, ampeaj kam mehcunea mã Hũm Cati jarkwa to hũjarên to ipa.

¹⁵ Ne pê Jowăw pê me cumrãr catê ramã ita na me cumã to hũjarên to hane he:

— Pom Jeju ita pê Pahhiti, pê wa ramã me amã to icakôc ne harên to: “Taa mã quê ha hapu na ikôt cator cakrô, ijrôa pê cati. Ampo na? He pê ramã ipÿm xwÿjrea na ajco apu ipa, na ca ha ijrôa pê amji mã me hũpa” — hane.

¹⁶ Ne Jeju mã ri ampeaj kam me pahcunea caprí, ne cumã me pahkîn. Cwÿrjapê ri hõtpê me pamã ampo

pej cunea ton to ipa rohnýtti mã. ¹⁷ Ne pê rý pêa mã Mojxe xwý ramã me cumã Pahpãm harkwa jirên xà atajê gõ, ne pyxit peaj to me cumã hahkre. Ne Jeju nare, quêt ihtýj cumã me pahcaprî, mã me pahtehcajpa. Ne me pamã Pahpãm jarkwa pejti pê ampeaj kam ata to hahkre. ¹⁸ Ne rý jũ caxuw jũm te pjê kam Pahpãm pupun nare. Mã ihkra pejti pyxit peaj ata pê Hũam pyrãc ne cume ipipëan. Na pê cu hĩa na me hõmpu, ne taa mã ri Hũm cahê na amji kôt me pamã Hũm to hahkre, ne ihkôat cu ha me hahkre pej.

Pê Jowāw pê me cumrār catê, ramã Jeju cator xwýjrea na mehcũmpej

¹⁹ Mã Krípinkrên kam Juta catêjê jõ pahhi kwý te Jowāw te me cumrār catê wýr, Pahpãm mã mehcajrën catêjê me, Rewi catêjê pê Pahpãm jũrkwa jamār catêjê me, mehcujahêc, cute me Jowāw cukij prãmte. Mã cute mehcukij to:

— Me anõ mã ca? — hajýr. ²⁰ Mã Jowāw te hirãa pê me cumã amji jarën to:

— Nee ipê, por pê Pahpãm mehkwy mã me hũtār catê to awjahkre ata nare — hajýr.

²¹ Mã hipêr cute mehcukij ne me cumã:

— Ne mër me anõ mã ca? Xà ajkĩ apê Erij xwý mã ca hacpýa mã atĩr? — hajýr. Mã Jowāw te me cumã harkwa to:

— Quê, ipê jũm ata nare — hajýr. Mã me cumã:

— Xà apê, por pê Pahpãm me imã harkwa to ihcakôc catê to awjahkre, wa me hikaj ata mã ca? — hane. Mã Jowāw me cumã:

— Quê! Pa nare! — hane.

²² Mã hipêr cute me Jowāw mã harkwa to:

— He me anõ mã ca? Me imã amji jarë. Wa me gahkre pej ne ma hacpý mã cute awýr me ikujahêc atajê wýr me pra, ne me cumã garê — hajýr.

²³ Mã Jowāw te me cumã Ixaj xwý jõ kãhhôc kôt harën to:

“Ipê, por põ kam me hamreare kam me cumã ijũjarën to hajýr to ipa catê ata he:

‘Me pajõ Pahhiti mã me hõ pry to ihcuhtac ne, mãr quêt ihtýj ihkôt mör pejti ne’ hajýr.

Jĩkjê na quêt ha mehcunea cator xà ata caxuw cute me amji kam hapac xà to impejti to me ipa, ne catyt kam me ipa” hajýr.

²⁴ Ne por pê ame Jowāw cukij atajê pê Parixêw catêjê kwý. ²⁵ Ne hipêr cute mehcukij to:

— Pom nee apê, por pê Pahpãm me pamã jũm to awjahkre ata nare, ne nee apê Erij xwý ata nare, ne nee apê Pahpãm jarkwa to ihcakôc catê wa me hikaj ata nare, nõ na mã ca atýj cô kam me cumrã? — hajýr.

²⁶ Mã Jowāw te me cumã harkwa to:

— He wa cô cakrô kam me cumrã, ne por me acote na quêt jũm apu ipa ata, ca nee rý ate me hahkre pej nare. ²⁷ Ne taa mã quêt ha ijakàn pê cator cakrô, wa nee ite hũpa cahi ne cupê hõ par kã tũm caxàr xà cax-

uw ipej nare. Ampo na? He taa mã ri ijirôa pê cati — hajýr.

²⁸ Hõhõ, ita pê hane, ma Cõhnameirêrxà jõ krĩ kam, Cõpijapjêr jõ cô jĩkjê rũm. Por pê curi Jowāw ajco apu cô kam me cumrãr to ipa ata ri.

Pê Jowāw pê mehcumrār catê me cumã Jeju jahkre

²⁹ Mã amcro nõ na Jowāw te amji wýr Jeju mör na hõmpun, ne me cumã harën to:

— Me Pahpãm jõ Caràcahàcre Kra ca me hõmpu he, ramã ajpên mõ he. Ne taa mã quêt ha pjê kam me pahcunea kên jũhta ne to hamre! To hanea, pom cu pahte amji kam me pajapac xàa na, me pahkên jahpan xà na, Pahpãm mã me pajàmjör xà caxuw me ampo pê me pahkritxwý cura, ne me cumã to amgõ he. Ita jĩkjê na, quêt ha me pajaxà kam ty, ne me pahkên cunea to hamre. ³⁰ Wa ite ramã catyt kam me amã to icakôc to: “Quêt ha cormã ikôt hapua na jũm xũmre cato ata, quêt ha ijirô pê cati. Ne ampo na mã ijirôa pê cati? Nee mã ampo na ijirôa pê cati nare. He pê quêt ramã ixwýjrea na apu ipa, cormã ipým nare kam” hajýr. ³¹ Pê wa nee cupê jũm te hajýr xà ata na hahkre pej nare cakrô, pê wa itýj cô kam ihcumrã. Ne nee mã pê wa ampo na apu to hajýr nare. Ite Juta catêjê mã cupê jũm te hajýr xà ata na to ipipê to hajýr prãmte, pê wa to hane.

³²⁻³³ — Ne pê wa nee cute hajýr xà ata na hahkre pej nare, mã Pahpãm te cô kam mehcumrār catê na imên ata te imã harën to: “Ca ha Icarõ te tutti na amji jahkre, ne cõjkwa pĩn ahpar mã pjê wýr tẽ, ne jũm xũmre cwýrpê hàhhuc na hõmpu ata, quêt ha cupê me cumã Icarõ Pejti jõr catê. Mãr quêt Icarõ Pejti ata me cumã ite amji kam ijapac xà to hahkre” hajýr. Wa irĩt, ne ite cõjkwa pĩn Pahpãm Carõ Pejti te tutti na amji jahkre ne ajpên ihtêm, ne Jeju cwýrpê hàhhuc na hõmpun. ³⁴ Ne ite hõmpun xà ata kôt wa ite hirãa pê me amã Jeju pê Pahpãm kra na harën — hajýr.

Pê Jowāw pê mehcumrār catê kôt me ipa catêjê me Jeju pynã

³⁵ Mã hipêr amcro nõ na Jowāw curia apu ihkôt me ipa catêjê pijakrut atajê me, ame ipa. ³⁶ Mã hipêr cute me ahnaa Jeju mör na hõmpun, ne me cumã harën to:

— Nãmhã, Pahpãm jõ Caràcahàcre Kra apu mõ he! Cupêa ri me pahkritxwý, ne taa mã quêt ha me pahkên jahpan xà na ty — hajýr.

³⁷ Mã ihkôt me ipa catêjê pijakrut atajê te mempar, ne ma me Jeju pynãr ne ihkôt me mõ. ³⁸ Mã hacpý mã Jeju rĩt, ne cute me hõmpun, ne mehcukij to:

— Ampo japên to mã ca ikôt ame mõ? — hajýr. Mã me cumã:

— Ikrã tũmti, jõ ri mã ca akrĩ? — hane.

³⁹ Mã Jeju me cumã:

— Ajpên ikôt me mõ, ne imã me ikrĩ xà pupu — hane. Mã mã ihkôt me mõ, ne cute me cumã ihkrĩ xà pupun. Ne curia pyt xà wýr, cahê na ame mõ, pê ramã me ahnaa pyt to mõ.

40 Pê me ajkrut ne Jowāw te Jeju jarēn na me kampa, ne me Jeju pynā atajê nō pyxıt ata japrÿ pê Antre, ne cupê Ximāw Petrô tō te amji to hapu na kjê. 41 Ne ma Antre ihtēm pyrentu, ne mam ihtō kà Ximāw wÿr cator ne cumā hÿjarēn to:

— Wa ite, por pê Pahpām me pamā me pajō Pahhiti pê Mexij to awjahkre ata na icator — hane.

Por pê Juta catêjê jarkwa na haprÿ Mexij, ne Crec catêjê jarkwa na me cumā haprÿ to Crixto ata. Ne pê haprÿ pijakrut itajê kôt harēn xà pê “Cute capi ne ahna hām” hane.

42 Ne ma Antre te ihtō kà japrôr ne to mō, Jeju wÿr. Mā Jeju te Ximāw pupun ne cumā:

— Gaprÿ te Ximāw, ne apê Jona kra, ne hamre ita caxuw quē ha gaprÿ pê Xepa — hajÿr. Pê Crec jarkwa na Xepa ita pê Petrô, ne ihkôt harēn xà te “Kēn”.

Pê Jeju Pirip me Natanew te ihkôt me ipa xà na me cumā akij

43 Ne amcro nō na Jeju te ma Hîpôjajo jō pjê wÿr mōr to amji kam hapac. Ne mōr xwÿjrea na cute hÿmre nō japrÿ te Pirip ita cajpar ne cumā:

— Ajpên ikôt mō! — hajÿr.

44 Ne Pirip ata pê Tep jō krî kam mehkwy nō, por pê curi Antre me Petrô ihkrî atajê kwÿ nō. 45 Mā Pirip apu hō kwÿ nō pê Natanew japê, ne cute ihcajpar ne cumā:

— Wa ite, por pê Mojxe xwÿ me pahte amji kam me pajapac xà jō kàhhôc kam, jÿm na ihhōc ata na icator. Ne cupê, por pê hanea ne Pahpām jarkwa na mehhōc catêjê ahna mehhōc ata! Ne cupê Jeju, ne cupê Naxare jō krî kam, Joje ihkrî ata kra — hajÿr.

46 Mā Natanew te ahna ihcukij to:

— Xà quē ajkî ihtÿj Naxare jō krî pîn ampo pejti cato? Jÿ wÿr quē ampo pej cato! — hajÿr. Mā Pirip cumā:

— Ajpên mō ne hōmpu mā — hane. Mā ma ihkôt Jeju wÿr tē.

47 Mā Jeju te ajpên Natanew te hÿrmā mōr na hōmpun, ne mehkwy mā to hÿjarēn to:

— Me hōmpu he! Ajpên hÿmre pê quêt catyt kam ipa catê nō ata mō he. Ne nee quêt ihhêj xi nare, ne cupê Ixaher catêjê nōa, ne impejti! — hajÿr.

48 Mā Natanew te impar ne cumā:

— Jÿ mā mā ate ne ijahkre pej? — hajÿr. Mā Jeju cumā:

— Wa Pirip te gaprôr xwÿjrea na ite apupun, ca ihmat ri pîxô pâr krac ri jÿ — hane.

49 Mā Natanew Jeju mā:

— Ikrā tÿmti, apê Pahpām kraa to ihkra! Ne wa itÿj apê Juta catêjê jō Pahhiti na amji mā ato hane! — hane.

50 Mā Jeju cumā:

— Xà wa ite ihmat ri pîxô pâr krac ri ajÿr na apupun ne garēn xà ita kôt mā ca cormā ate ito amji mā ahimpej? Ca ha cormā jÿ caxuw quêt ampo ita jirōa pê ihnō catia ata pupu — hane. 51 Ne cute mehkwy mā harēn to:

— Wa ha ampeaj kam me amā awjarē, ca ha atÿj cōjkwa te amji jihê mēn na me hōmpu, ne ajpên iwÿr

Pahpām mā hâpên catêjê te me irôrôc, ne hacpÿ mā me hâpir na me hōmpu. Ampo na? He ipê cōjkwa kam me Ahàkà cati ata wa, ne cama ite me hÿmre na amji ton ne me awÿr iwÿr — hajÿr.

Pê Jeju cō kam pîxô cacô xÿre to

2¹⁻² Ne ahna amcro pijakrut jirô pê mā ri cute me hikwa tuw catêjê nō jō amji kîn jarēn par, Têtêc jō krî wēn kam, Hîpôjajo jō pjê kam. Mā cute amji kîn ata caxuw me Jeju me, me ipê ihkôt me ipa catêjê jator. Wa ma ihwÿr me mō ne me icator. Mā ramā curia Jeju menxi apu mō. 3 Mā amji kîn ita cahti ri ampo pîxô cacô xÿre ata jamre. Mā Jeju menxi te pîxô cacô jamre na hōmpun, ne ma ihcāmter wÿr tē ne cumā:

— Ikra, hamre, me cupê pîxô cacô jamre — hajÿr.

4 Mā Jeju te impar ne cumā:

— Ampo caxuw mā ca inxê apu imā ita jarē? Nee ate imā ita jarēn xà hamreare, wa ramā ite hahkre pej. Ne cuna mā cormā nee ite ampo itajê nō ton xà kam hâhuc nare — hajÿr.

5 Mā ma inxi amji kîn jō pahhi mā me hâpên catêjê wÿr tē, ne cute me cumā:

— Ca ha atÿj ikra te ampo na me amā hÿjahkre xà atajê to me cumā — hajÿr.

6 Pê curia kēn te pot catia to cati te xêj atajê ihcuhhê. Ne ihkwÿ ihtÿj cō to rit to ôjtēnta ne cucwa, ne ihkwÿ ihtÿj cō to rit to xêj ne cucwa. Pê Juta catêjê ihtÿj ajco cō ata to me amji cuhhō, cute to me amji pyrâc xà ata kôt.

7 Mā ahtÿmre mā, Jeju amji kîn jō pahhi mā me hâpên catêjê atajê wÿr tē, ne cute me cumā harkwa to:

— Cō to me pot itajê to me hipu partu — hajÿr. Mā ihtÿj harkwa kôt cute me to hipu partu. 8 Jirô pê mā ri cute me cumā harkwa to:

— Caxi me cō ita crire ne me haxà, ne amji kîn jō pahhi wÿr me to tē, ne me cumā agō, quē capi — hajÿr.

9 Mā jÿm ita te ihkwÿ jaxâr, ne hÿrmā to ihtēm kwÿa kam, mā ramā cute pîxô cacô na amji ton. Mā cute amji kîn jō pahhi mā hōr, mā cute capi, ne nee cute cō te ampo pîxô cacô xÿre na amji jahkre ata na hahkre pej nare. Ne nee cute jÿ rÿm cator xà ata na hahkre pej nare. Ne cumā me hâpên catêjê mā ri quêt hahkre pej. 10 Na ri amji kîn jō pahhi te hikwa tuw catê ata na hâhwÿr ne cumā:

— Pÿhâpà, ajte ihhêj ne mam ate me cumā kyre pê pîxô cacô impej ata jōr, mā cute ame to ihkôm. Jirô pê mā ca ate cormā me cumā impeaj ita jōr. Ne ihhêj ne ate pahte me to amji pyrâc xà ata to gâhpan, ne ate hîcu xà caxuw impejti ata juwahi — hajÿr.

11 Hōhō, pê Jeju carôt kôt ampo pihho ton kam to tēm to hane, ne ajco carôt to ipipê to ipa, Têtêc jō krî kam, Hîpôjajo jō pjê kam. Ne pê carôt tÿjti impejti ata to me cumā ajpê. Pê wa me ipê ihkôt me ipa catêjê, itÿj amji mā me to ihmpej, ne mempar pyrentu.

12 Ita jirô pê mā wa me ipê ihkôt me ipa catêjê me, Jeju me, inxi me, mehkjêjê me, ma Capernam jō krî

wÿr me mō, ne curia wa ite ijōtpê me amji to amcro kwÿ kujahêc.

Pê Jeju Hÿm Cati jÿrkwa pê ihpore to me hàhpan catêjê cato

¹³ Ne Juta catêjê jō amji kĭn japrÿ te, me Hakren xà jō amji kĭn jō amcro ata, pê ramã cator xàa kam, ne ramã hÿ na pire mã. Ne amji kĭn ata pê, por pê Ejit jō pjê kên pĭn, menquêtjê cator xà atajê jō amji kĭn. Na wa ma Jeju me Krĭpinkrên wÿr mō. ¹⁴ Ne Pahpãm to me amji kam hapac xà jÿrkwa kam, Jeju te jÿmjê te carà cahàcre hòhti me, pryti me, tutti to ihpore na ame hàhpan na me hōmpun. Ne hanea ne cute jÿmjê atajê te mehkrĭ ne me hàhtôa mã ihpore to hàhpan na me hōmpun. ¹⁵ Ne ame kam incryc, ne me caxuw cute pàrcuxê to mehcahhyr xà ton, ne pō mã mehcuea to cator, ampo atajê mea mã. Ne cute ihpore to me hàhpan catêjê pê ihpore pyxwÿr xà mēn, ne pjê kam hō pore jaxwÿr partu. ¹⁶ Ne cute, por ihpore na me tutti to hàhpan to me ipa atajê mã harkwa to:

— Ikre ita pê ampo itajê cunea to me gapôj partu! Ne nee ca Inxÿ jÿrkwa kam apu amji mã ampo itajê to ihpore na me gâhpan to me apa nare. Xà aracri Inxÿ jÿrkwa ita pê ampo to ihpore na kam me hàhpan xà? — hajÿr.

¹⁷ Cwÿrjapê wa me ipê ihkôt me ipa catêjê te Pahpãm jō kàhhôc kam ita to hÿjarēn na me to amji japackre, pê ramã harēn to:

“Imã Pahpãm to amji kam me hapac xà jÿrkwa ita kĭan to ihkĭn.

Na wa nee kam ampo kên xãm na hōmpun prãm nare, ne wa ampo pej to pit mã kam me amji japackre” hajÿr.

Pê pahhi catêjê Jeju te ampo pihho catia ton na mehckuj

¹⁸ Mã Juta catêjê jō pahhi kwÿ te ita na harēn par ne mehckuj to:

— Jÿm te mã, ate ame to hajÿr xà ita na, amã harkwa? Jÿm te mã ahna amēn? Xà ajkĭ Pahpãm te mã ahna amēn? Mēr hōhō, acarôt cati pahtÿjti ita to me imã ajpê, wa ha ahna me apupu, ne cormã Pahpãm te ahna amēn na me gahkre pej — hajÿr. Mã Jeju te me cumã amji jarēn to:

¹⁹ — Ca ha me Pahpãm jÿrkwa ita hu, wa ha hacpÿa mã amcro incrê peaj kam hãm, ca ha cormã ihkôt Pahpãm te ahna imēn na me ijahkre pej — hajÿr.

²⁰ Mã cute me Jeju mã ikre jarēn to:

— Pê me Pahpãm to pahte me amji kam me pajapac xà jÿrkwa ita to me hàpêan to me caku to cwarēnta ne ihkôt xêj, ne me hipêj, nō na mã ca ajte amcro incrê peaj kam hacpÿa mã ate hãm na amji jarē? — hajÿr.

²¹ Por pê Pahpãm jÿrkwa to Jeju ihcakôc ata pê nee kên te ikre ata nare, ne amji jĭa to pê me cumã ihcakôc. ²² Ne pê hacpÿa mã ihtĭr, pê wa cormã hÿjarēn xà ata to me amji japackre, ne itÿj me ihkàhhôc kam Pahpãm jarkwa kampa, ne Jeju cakôc xà na me kampa.

Pê Jeju nee amji mã me hàhtôti atajê to hajÿr nare

²³ Pê Jeju me Hakren xà jō amji kĭn na Krĭpinkrên kam apu ipa xà ata kam, pê me hàhtôa ne ihtÿj cupê Pahpãm kra na amji mã me to hane. Ampo na? Nee mã ampo na nare. Pê ajco Jeju ihtÿj Hÿm carôt kôt, rÿ jÿ caxuw, jÿm te ampo cupahti pihho pupun nare atajê to na pê. ²⁴ Cakrô pê nee Jeju cormã amji mã me hàhtôti atajê to taa mã nare. Ampo na? Pê ajco mehcuea mã cute me amji kam hapac xà pupu, ne me hahkre pej to ipa na pê. ²⁵ Ne pê jÿm te cumã me harēn nare kam, pê ajco taa cute me amji kam hapac xà na me hahkre pej.

Pê Pahpãm te me pahto ipintuw xà pê hacpÿa mã me pahpÿpÿm xà pyrãac

³ Ne pê hÿmre nō japrÿ te Nicotem ata pê Juta catêjê jō pahhi na mehkwÿ nōa, ne cupê Parixêw catêjê kwÿ nō, ne cupê Mojxe wÿr jō kàhhôc to me cumã hahkre catêjê nōa. ² Ne ma caxwa ri Jeju wÿr mō, cute hōmpun, ne cumã ihcakôc prãmte. Ne hÿrmã cator ne cumã:

— Ýhÿ Jeju, wa ite, Pahpãm te me imã apê ampo to hahkre catê na akujahêc na gahkre pej. Ampo na? Ca atÿj Pahpãm carôat to ampo pihhoti jàhtôa ton to apa atajê, ihtÿj Pahpãm carôt tÿjti to ipipê to mō. Jÿ wÿr quê Pahpãm jÿm kujahêc nare, quê jÿm ampo itajê nō to — hajÿr.

³ Mã Jeju cumã:

— Ýhÿ, wa ha nee amã ihêj xi jarēn nare. Quê ha jÿmjê mã Pahpãm himpej xà mã mencjêj to prãm na, quê ha xa hacpÿa mã amehpÿpÿm — hajÿr.

⁴ Mã Nicotem cumã:

— Pÿhàpà, jÿ wÿr quê ha ramã jÿm kàhtu ata amji mã hamã, nehacpÿa mã inxi tu mã axà ne hipêr ihpÿm — hane. ⁵⁻⁶ Mã Jeju te cumã ihkôt harēn to:

— Ýhÿ, wa nee apu amã ihêj xi jarēn nare. Quê ha jÿmjê te Pahpãm himpej xà mã incjêj prãm na, quê ha xa hacpÿ mã amehpÿpÿm, jirô pê mã quê ha cormã me acjêj. Pê ca mam gĭ to, anã tu kam cô ata kôt apÿm, ne apê anã kra. Jĭkjê na, ca ha hipêr Pahpãm Carô Pejti kôt, acaxwÿn carô to amji mã intuw, ne apê Pahpãm kra.

⁷ — Nee ca ite amã hacpÿa mã, me acunea pÿpÿm na me garēn ita to amji mã ame apikrar nare. ⁸ Ampo na? He Pahpãm Carô Pejti kôt amehpÿpÿm xà ata pê ihhêj rÿm kôc pyrãac. Jÿ wÿr ca ha jÿ kam kôc te hàpêr xà na amji mã prãm xà ata wÿr hàpêr na hōmpu. Ca ha me hàmcoco pit kampa, ne nee hōmpun nare. Ne nee ca ha jÿ pĭn cator xà me, jÿ kam ihtēm xà ata na hahkre pej nare. Jĭkjê na mã, Pahpãm Carô Pejti jàpên xà pê hÿrãac. Ne nee quê ha jÿm Pahpãm Carô Pejti te jÿm to amji mã ihkra xà ata na hahkre pej ne hōmpun nare — hajÿr.

⁹ Mã Nicotem cumã:

— Jÿ mã quê ajte ita, ne hane? — hane.

¹⁰ Mã Jeju cumã:

— Pÿhàpà, pom apê Juta catêjê mã ampo to hahkre catê ita! Nõ na mã apê ampo ita jahkre kêatre? ¹¹ Wa ha nee amã ihêj xi jarên nare. He wa amcro cunea kam me akwÿ mã, ite ampo jahkre pej itajê to hahkre to ipa. Ne hanea ne ite ito jãa to ampo pupun atajê pupun xàa kôt, wa me amã harên to ipa cakrô, ca ajte nee cormã ate me ipar nare. ¹² Ne wa ramã ite me amã pjê ita kam ampo te jũ mãn xà ata na harên, ca nee ajte ate ikam me gapac nare. Ita kam, ca ha pijamã ite me amã cõjkwa kam ampo jarên xà atajê cunea na me ikampa? Me gũpar nare ita kam, ca ha nee me ikam gapac nare. ¹³ Ne rÿ jũ caxuw cõjkwa wÿr jũm jàpir ne hacpÿ ne cute amji jaxàr nare. Ne pa nare, he ipê kÿj pê, cõjkwa kam me Ahàkà, cwÿrjapê wa curũam ite me hũmre na amji ton ne iwryc.

Cu ha amji mã Jeju to pahhimpej na, cu ha Pahpãm cahê na amji to me ajpa

¹⁴ — Ne pê Mojxe xwÿ mat ri, põ kam me hamreare ata ri, wakÿre te cagã to, ne pĩ na cuxô. Ampo na? Nee mã pê ampo na wakÿre te cagã ata xôr nare. Pê cagã ajco me cãmxa, pê me wakÿre te cagã ata pupu, ne hacpÿ mã mempej. Ita jĩkjê na wa ha hanea. Quê ha jũ caxuw me ito wakÿre te cagã ata pyràac, ne me icuran xà caxuw, pĩ na me ixô. ¹⁵ Quê ha jũm ito cagã ata ne ipupu, ne ito amji mã ihhimpej, quê ha ihtÿj ihtyc xà jirô pê ampo kên catia ata pê amji pytà, ne Pahpãm cahê na amji to ipijapar rohnÿtti mã.

¹⁶ — He ampeaj kam Pahpãm mã pjê kam mehcunea ame ipa itajê kĩn, mã cute me cumã, ipê cumã ihkra pyxit peaj kĩnti ata to hũjahkre ne hõr, ne pjê wÿr ajpên ikujahêc. Mãr quê cute ito amji mã mehhimpej atajê me ty, ne nee mehtyc tu ne Pahpãm kaj na ame ipa nare, ne quêt hacpÿ mã mehtĩr, ne Pahpãm cahê na me ipa rohnÿtti mã. ¹⁷ Pê nee Inxũ imã harkwa to: “Cute mehkên ton jahpan xà na, pjê wÿr wrÿ ne curê mã me amẽ” hajÿr nare. Ne quêt cama imã: “Ca ha wrÿ ne mehkên pê me hũtã” hane.

¹⁸ — Na quê ha jũmjê te, ipê Pahpãm kra na amji mã ito mehhimpej na, quê ha nee Inxũ cute cuna mã ihkên ton xà atajê to me cumã ihcakôc, ne curê mã me irên nare. Ne por nee amji mã me ito mehhimpej nare atajê ri, ramã curê mã cute me mên na, me ahna me amji ton. Ampo na? Nee cute amji mã me ito ihhimpej nare, na quê ha curê mã me cumê.

Pê Jeju me hàhtôa atajê mã mehkên jarên na cumã to prãm nare

¹⁹ — Cu ha ampo kên tũmti ata wÿr me pajàhcujro xà nõ, pôc pejti ata to mõi, ne me to ihtũmti ata pupun pyrentu. Jĩkjê na ri ipê pjê kam mehcunea jàhcujro xà. Ampo na? He wa itÿj me cumã cute mehkên ton xà atajê jarê, mã me hõmpu, ne cute me hahkre pej xà ita caxuw wa me hÿrmã iwryc, ne amehcujro to mõi. Mã ma mehkwy apu ite mehcujro ita na mehcaca, ne me cumã amji kam awcapàtkôti ita na pit mã me to prãm. Ampo na? Awcapàtkô ita kam ri hãn ne ihtÿj ame am-

po kên ton to me ipa, cwÿrjapê ri ma ame icaca. Ne quê ha, cute me icaca catêjê cute me ampo kên ton atajê jahpan xà na, Pahpãm ame to kêanre ne.

²⁰ — Ýhÿ, por awcapàtkô kam ame ampo kên ton to me ipa atajê mã amji cujro prãm nare. Ampo na? Cute ampo kên ton atajê na me hahkre pej cupate ri ma ame amji cujro caca. Cwÿrjapê ri mehkên catêjê ipê ampÿa mã ame ipa. ²¹ Ne por catyt kam Pahpãm jarkwa kôt me ipa atajê ri, ijàhcujro imejti ata kam ihtÿj ame ipa xà. Mãr quê mehcunea catyt kam, Pahpãm jarkwa kôt me ipa na me hõmpu, quê nee ame ampo kên ton nare, na ri ihtÿj ame ipa. Na ri hanea ne ihtÿj mempejti catêjê atajê ikôt me ipa — hane.

Jowãw te mehcumrãr catê pê Jeju jarkwa to imprar catê

²² Ita jirô pê mã, wa ma Jeju me, me ipê ihkôt me ipa catêjê me, Krĩpinkrên pê me icator, ne ma põ pê Juta jõ pjê kam ame ipa. Ne curia me cahê na ite jũ mã amji to me amcro ton, wa itÿj harkwa kôt cô kam amehcumrãr to me ipa. ²³ Pê hanea ne ihtÿj Jowãw, cô japÿr te Enõ pê Xarim jõ krĩ na pire mã xa ata kam, cô kam amehcumrãr to mõi. Ampo na? Ampeaj kam quêt curi cumã cô cati. ²⁴ Ne pê caxuw cormã nee me Jowãw jaxàr nare.

²⁵ Mã amcro nõ na Jowãw kôt me ipa catêjê kwÿ atajê me, Juta catêjê jõ pahhi kwÿ te ajpên mãn kam mehtêm, Pahpãm mã cute me amji cũmpej xà na cô kam me amji cumrãr xà ata ri. Ne nee jũmjê te me ajpên par pej nare. ²⁶ Cwÿrjapê ri ma Jowãw te mehcumrãr catê pê me hõ pahhi ata wÿr, me amji to mõi, ne cute me cumã amji jarên to:

— Me ijõ pahhi, wa ite me amji cũmpej xà ita kam, nee ite me ampo par pej nare, ne me ikrã pictor tu. Ne por pê ca jũm xũmre to me imã awjarê ata, ihtÿj mehcũmpej prãmte, acuxà Cõpijapjêr jõ cô kam amehcumrãr to mõi, mã quêt mehcunea ihtÿj hÿrmã me pra! Ne jũ mã mã cu ha ajte me? — hajÿr.

²⁷ Mã Jowãw te me cumã harkwa to:

— Nee ca ita to ame amji kam gapac nare. Cõjkwa kam Pahpãm te ahpÿanre na me hũmre mã me hàpên xà jõr par. ²⁸ He ijàpên xà ita pê Jeju pê hũmre ata mã ite pry to imej xà, mãr quê pry ata kôt me hàhtôa ne ihwÿr me apkjê. Ne nee ipê, por pê Pahpãm me pamã to awjahkre ata nare, ne ite amji jarên xà na ramã ate me ipar. Ne hõ pry to ite cumã imej xà caxuw pê wa mam icato. ²⁹ Ne quê ha jõ ri me hàhtôa mã jũm pyxit peaj ne me hirôa pê imej, quê ha hÿarmã me pra. Ita jĩkjê na, quê ha jũm hikwa tuw, quê ha hĩxi impjên ata wÿr pit mã tẽ, ne nee impjên jõ ikwÿ nõ atajê wÿr ihtêm nare cakrô, quê ha ihtÿj hũ na hõ ikwÿ nõ atajê ame hakry. Ita jĩkjê na wa itÿj Jeju jũ na ijakry. ³⁰ Na quê ha ihtÿj quêt Jeju ipicamên to mõi, ne cati to mõi, ne pa nare, wa ha ihkĩnte cama hacpÿa mã icri to mõi.

³¹ — Ne Jeju quêt cõjkwa pĩn cator ata ri ijirôa pê cati. Ne pa nare, pê wa ihkĩnte pjê ita kam icato, ne imã pjê kam ampo itajê to pit mã icakôc jahkre pej. ³² Ne taa mã nare, quêt cute cõjkwa kam ampo par ne

hõmpun atajêa to hãn ne ihcakôc to ipa cacrô, mã ajmār nee jūm te ahna amji caxār nare. ³³⁻³⁴ Ne men-crêre te cute ampo jarēn xà atajê na me kam hapac, ne ihtj̄y ampeaj kam cute me Pahpām catyt kam ihcakôc ata kam me hapac. Ne Pahpām te ri ihkujahêc na, cute me hahkre pej. He ampeaj kam ri Pahpām cakôc xàa to Jeju ihcakôc to ipa. Ampo na? Nee mã ampo na nare. Pahpām Carô Pejti catia te cumā amji jōr na ri, ne nee kam Pahpām Carô Pejti ata crire nare.

³⁵ — Ne Hūm mã ihkra ita kīan to ihkīn, mã cute cumā hõ tekjêa na ampo atajê cunea jōr, ne taa mã ri ita caxuw to hõ tekjê, ne ihcunea jamā. ³⁶ Na quê ha jūmjê te amji mã Pahpām kra te me hūtār catê na me to amji mã hajj̄r na, quê ha quêt Pahpām cahê na mehtīr rohnj̄tti mã na ame ipa. Ne por nee me kam hapac nare, ne nee amji mã me harkwa cuna nare atajê, quê ha nee cōjkwa wj̄r me hāpir, ne me Pahpām pupun nare. Quê ha cama me kam Pahpām cryc ata me hj̄rmā apkjê, ne ame to kēanre ne — hajj̄r. Hõhõ, Jowāw te ihkôt me ipa catêjê mã hūjarēn to hajj̄r.

Krīrītpej kam me cahāj nõ te amji to ipintuw xà

⁴ Jeju te Jowāw jirôa pê mecumrār, ne hirôa pê cumā ihkôt me ipa catêjê jãhtô. Mã Parixêw catêjê te ahna harēn par. ² Ne nee pê Jejua ajco me cumrār nare, me ipê ihkôt me ipa catêjê pê wa ajco me cumrā. ³ Mã Jeju te ita na Parixêw catêjê jahkre pej, ne me harēn par, ne ma Juta jō pjê pê cator, ne ma Hīpô-jajo jō pjê wj̄r ihkôt me ipa catêjê me, me mō. ⁴ Ne Krīrītpej jō pjê cajpuaw pry nõ ata kôt pê me imōr xà.

⁵ Ne ma Krīrītpej jō pjê kam krī japrj̄ te Xica ita mã me icator, por pê Jaco xw̄y ihkra pê Joje xw̄y mã pjê jahkre ata cahi na. ⁶⁻⁸ Mã curia cormã Jaco jō cōhkre ata ihcuhê. Mã pyt ramã me pahkrã jimoac kam jj̄, wa curi Jeju me, me icator, mã ramã mōr mã ihpeacre, mã cōhkre ata cahê na hj̄r. Wa ma me ikw̄y me krī ata kam ite me ampo krēr xà japrôr to me pra, mã ahte hãhhuc.

Mã pyjê nõ pê Krīrītpej jō pjê catêjê nõ ata, cute cō jaxār prãmte hj̄rmã tē, mã Jeju cumā:

— Ate amji kam gapac xàa na, imã cō ita kw̄y incirre ne, wa to ikō — hane. Mã jūm cahāj ata Jeju mã:

⁹ — Apê Juta catêjê nõ, ne ipê Krīrītpej jō pjê catêjê nõ, ne mēr ampo na mã ca apu cō ita na iw̄y? — hane. Ne ampo na pê cumā ihcakôc xà ita to? Nee mã ampo na nare, pê ajco Krīrītpej jō pjê catêjê me, Juta catêjê me ajpēn kaj na me amji kampa, na pê cumā hane.

¹⁰ Mã Jeju cumā:

— Ca ate cōjkwa kam Pahpām te amã ampo jōr xà ata na hahkre pej na mã, ca ha ahna iw̄y. Ca ate ite cō na awj̄r xà ata na ijahkre pej na mã, ca ha mehtīr xà rohnj̄tti mã xà jō cō na iw̄y, por ca ha cō to ikō ne atīr rohnj̄tti mã na apa xà ata na iw̄y — hane.

¹¹ Mã pyjê nõ ata cumā:

— Amã cō jacjên xà hamreare, ne cōhkre ita rya to iry. Ne mēr jū mã ca ha, ne mehtīr rohnj̄tti mã xà ita jō cō ita kw̄y py, ne imã ihkw̄y? ¹² Xà ajkī gō cō ita me panquêt xw̄y pê Jaco jō cō jirôa pê impej? He pê me

panquêtī Jaco me imã cōhkre ita jahkw̄y, ne mehkra me, cute me ampo to ipijapar xà mã hahkre, mã ihtj̄y me to ikō. Ne xà ajkī Jaco xw̄y jirôa pê acati, mã ca ha ajte imã cō impejti nõ ita gō? — hane.

¹³ Mã Jeju cumā harkwa to:

— Quê ha jūm, pom cō ita kw̄y to ikō, ne hacp̄y ma mã cumā kōr. ¹⁴ Ne por wa ha jūm mã cō kw̄y, quê ha to ikō ata, quê ha quêt nee hipêr cumā kōr nare. Ampo na? Quê ha jūm kam cō ata ipijapjêr rohnj̄tti mã xà ata pê ihtj̄ar na ipa xà ata, na quê ha nee jū caxuw ihtyc nare — hane.

¹⁵ Mã cahāj ita cumā:

— Mēr imã cō ita kw̄y, mār wa imã kōr nare ne, nãm-ri wa nee hipêr hacp̄y ne cō ita jaxār to imōr prãm nare — hane. Mã Jeju cumā:

¹⁶ — Mō ne apjên japrô, ne hacp̄y ne to amji jaxà mã — hane. Mã cahāj ata Jeju mã:

¹⁷ — Ipê ipjê nare — hane. Mã ramã Jeju te hahkre peaj xà na cumā harkwa to:

— Ampeaj kam ca apjê nare na ate imã amji jarēn.

¹⁸ Ne pom ramã ate apjê to xīc, ne cumā hikran ita. Ne pom cute ihkw̄y to xēj ca apu cume apa ita te hajj̄ar, ne nee cupê apjên nare. Wa nee ato ahêj xi nare — hajj̄r.

¹⁹ Mã cahāj ita Jeju mã:

— Ampeaj kam ca ate ijarēan to ijarēn. Ne ita caxuw wa ite apê Pahpām jarkwa to acakôc catê na gahkre pej. ²⁰ Ne caxi imã awjarê. Jō ri mōrmō cu ha ajte ame Pahpām to ame amji kam pajapac to me papa? Wa me ipê Krīrītpej jō pjê catêjê Pahpām to amji kam me ijapac, ne catihtī to me cumā icakôc prãmte, ma hàhkã jakôtti ita wj̄r ijōtpê me pra. Ca ajte me apê Juta catêjê Krīpinkrên kam ajte, me pahte Pahpām to amji kam pajapac xà na me harê. Ne amãa, jū ri mōrmō Pahpām to pahte amji kam me pajapac xà? — hane. Mã Jeju cahāj ita mã:

²¹⁻²² — Ikam gapac to impeaj ne he. Ca me apê Krīrītpej jō pjê catêjê ate Pahpām to amji kam me gapac xà atajê na, me amji jahkre pej nare kam me to amji kam gapac to me apa. Ne me pa nare, wa itj̄y quêt ite me Pahpām to amji kam me ijapac xà ita na, me imã amji jahkre pej. Ampo na? Nee mã ampo na nare. He pê me apytār catê ita, me ipê Juta catêjê pīn me awj̄r cato. Na cu ha nee jū caxuw hipêr hàhkã jakôtti ata me, Krīpinkrên kam, ame Pahpām kīnti na jūm te cumā me amji jarēn xà hamreare. ²³ Ne hamre, ramã pahte Pahpām to amji kam me pajapac xà cunea pintuw. Na quê ha ita caxuw jūm ampeaj kam Pahpām to amji kam hapac na, quê ha Pahpām amji caxuw cumā cute to amji kam hapac xà to hahkre, mār quê ha harkwa kôt to amji kampa. Hõhõ, cute me hajj̄r catêjê ri Pahpām amji mã me hapê, cute me to amji kam hapac xà caxuw. ²⁴ Inxū pê Pahpām ata nee hĩa na ipa nare, ne quêt cupê Carô Pejti ata, ne pjê cunea kam ipa. Na quê ha hanea ne cute me to amji kam hapac catêjê me carô caxw̄yn cunea to me to amji kampa, pjê cunea kam — hane. Mã cahāj ata te cumā harkwa to:

25 — He imā, por jūm pē me pahpytār catē japrÿ te Cixtō ata to Pahpām te hūjahkre ata cator xà na imā hahkre pej. Ne quē ha cato, ne me pamā ampo cunea to hahkre partu ne — hajÿr. Mā Jeju te cumā amji jarēn to:

26 — He ipē jūm ata, ne ipē Cixtō, ne pa wa amā icakōc — hajÿr.

Pē Jeju kōt me ipa catējē amji mā me ajkra

27 Wa caxuaw ramā curi me ipē ihkōt me ipa catējē cator, ne ite amji mā ame ipikrar kryjre nare. Ampo na? Ite me Jeju te Krīrītpej jō pyjē nō mā apu ihcakōc na me hōmpun, na wa ite amji mā me ipikrar. Ne nee ajte me inō te ampo ata na cahāj ata cukij to:

— Ampo na mā ca prām? — hajÿr nare. Ne nee me inō te Jeju cukij to:

— Ampo na mā ca apu jūm cahāj ita mā acakōc? — hajÿr nare, ite me hahkre pej xà na.

28 Mā ma cahāj ata te hō pot rer, ne krī kam mehkrī atajē wÿr tē, ne cator ne cute me cumā hūjarēn to:

29 — Ajpēn me mō ne me hūmre nō ita pupu, cute ite ampo ton xà atajē cunea na ijarēn partu. Ne mōr-mō ajkī cupē, por pē Pahpām Cixtō to awjahkre ata? — hajÿr.

Jeju mā Pahpām mā hāpēn xà ata pē hō

30 Mā ma me hàhtōa ne krī pīn, por curi Jeju apu mō ata ri, ihwÿr me mō. Ne cormā ajpēn me iwÿr me mōr kwÿa kam, wa ite me Jeju mā:

31 — Me ijō Pahhi, ampo krē! — hajÿr. Mā Jeju te me imā harkwa to:

32 — Imā ijō, wa cuku, ca nee ite ihkur xà na me ijahkre pej nare — hajÿr.

33 Wa ite mempar, na wa ahna ite me ajpēn cukij to: — Xà ramā ajkī jūm te cumā hō nō rer? — hajÿr.

34 Mā Jeju te me ipar ne me imā:

— Por Inxū te ikujahēc ata te amji mā ampo kīnti ata to wa cumān to mō, ne ata pē ri ihhēj rūm ijō, wa to amji mā ijarte, mā itÿj. Ne wa ha itÿj cute imā ijāpēn xà jōr ata to cumā ihkrā cura, cupēa ri ihhēj rūm ijō.

35 — Ca ramā ate me harēn to hajÿr to me amji pyrāc tu he: “Cormā pahte me pajō kēhkēn xà wÿr putwÿr te cwat ne nō” hane. Ne mēr me hàhtōti itajē pupu he. He me cupē ijō pur pyrāc. Ne ihhēj rūm me cupē ramā ampo hy inteptu, ne ramā ihkēhkēn xà kam hàhhuc atajē to ri pahte amji mā me cuprōn xà. ³⁶ Quē ha jūm te, jūm mā pur to hāpēn na, quē ha ihtÿj amji mā ampo cwa. Ita jīkjē na, quē ha jūm te imā me to cuprōn to ipa na, quē ha ihtÿj, cumā cute me to cuprōn to ipa jahpan xà na, hàmcwÿr xà. Na quē hame hàhtōa ne mehtīr ita na ame ipa, Pahpām cahē na. Ne quē ha imā me hāpēn catējē hakrya to me hakry to hanea, pom quē cute me ampo hy kre catējē me, cute mehkhēkēn catējē he, ne ajwar me hakry. ³⁷ Ampo na? He hūjarēn xà ita nee ihhēj xi jarēn nare, ne ampeaj kam ri awjarē: “Quē ha mam jūmjē te hàhkre na, quē ha ihtÿj ihkōt cormā ihkēhkēn catējē ihkēhkē” hane.

38 Wa ite ramā me ate iwÿr me to apipkjēr na me amēn. Ne pē mam rÿ pēa mā, Pahpām jarkwa to mehcakōc catējē pē me hàhkre catējē atajē pyrāc, ne ramā me cumā Pahpām jarkwa jarē. Na ca ha mehkhōt cama iwÿr me to apipkjēr to me apa — hajÿr.

Pē Krīrītpej jō pjē catējē cute amji kam me hapac xà to me antuw

39 Mā Krīrītpej jō pjē catējē kam me hàhtōa ne, ampeaj kam cute Jeju to amji mā me hajÿr tÿj pyrentu. Ampo na? Por cahāj te harēn to: “Cute imā ite ampo cunea ton atajē to ihcakōc partu” hajÿr, na ri mehcuea te amji mā me to hajÿr pyrentu. ⁴⁰ Mā Krīrītpej jō pjē catējē kwÿ cator, ne cute me Jeju wÿr, quē me cahē na amji to jū mā amcro to. Wa curia me cahē na me ijāhhuc, ne ite me amji to amcro to me ipi-jakrut.

41 Mā hūjarēn xà atajē kōt, me hàhtōa ne cute Jeju mā me amji jōr, ne mempar pyrentu. ⁴² Ne cute me cahāj ata mā harkwa to:

— Wa itÿj ita caxuw me kampa. Ampo na? Wa ramā ite me hīa kam ijapac, ne nee mā ate me imā harēn xà ita kōt pit mā, ite mempar nare. He ampeaj kam ri me imāa Jeju pē me pahkēn catia pē me pahto hapōj catē, pjē cunea kam — hajÿr.

Pē Jeju cama ihcakōc xà to pahhi kra caprā

43 Ne wa ite amji to me amcro to ipijakrut jirō pē mā, wa ma ite Jeju me, Hīpōjajo jō pjē wÿr me iprar kam me itēm. ⁴⁴ Ne pē Jejua ajco me imā amji jarēn to:

— Ipē Pahpām jarkwa to mehcakōc catējē nō. Ne ipē me ikwÿ pyrāc, mā ijō krī kaj na ihtÿj me ikampa. Ne ijō pjēa kam, nee amji mā me icupa, ne nee ikam me hapac prām nare — hane. ⁴⁵ Wa curi me icator, ne curia me cahē na me ijāhhuc. Mā curi mehkrī catējē te meito kēnre nare. Ampo na? Pē ramā Krīpinkrēn kam Hīpōjajo catējē mam me Hakren xà jō amji Kīn ata na me Jeju te ampo pejti atajē ton na me hōmpu na pē.

46 Jirō pē mā wa ma Tētēc jō krī wÿr Jeju me, me pra, por pē curi cō to ampo cacō xÿre na ata ri. Mā curi pahhi mā hāpēn catē nō catia, Capernam jō krī kam ihkrī ata pē ihkra xà, hūrkwa kam. ⁴⁷ Ne cute Jeju te Jutta jō pjē pīn mōr na harēn par, ne ma Jeju wÿr Tētēc jō krī wÿr tē, cute ahna hàhwÿr mā ihkōt Capernam jō krī wÿr mōr. Ne cute cumā ramā ihkra ihtyc xà kam ata caprār prāmte. ⁴⁸ Mā Jeju te pahhi mā hāpēn catē ata mā:

— Xà wa icarōt to ampo pihho catia to, ca ahna me ipupu ne cormā ihkōt me ikampa? — hajÿr.

49 Mā Jeju mā:

— Ijō Pahhiti, ikra tyc xwÿjrea na, ajpēn gūjarēan kam atēm pyrentu! — hane.

50 Mā Jeju cumā:

— Gapacta ne ikre wÿr amji jaxà! Hamre, ramā akra caprār, ne quē ha ihtÿj amā impej, nee quē ha ihtyc nare — hane. Mā cute Jeju par pyrentu, ne ma tē.

51 Mā ikre wŷr pry cahtiri cumā me hāpēn catêjê kwŷ te mehcajpar, ne me cumā ihkra jarēn to:

— Hamre, hacpŷa mā akra impej — hane. 52 Mā cute pyt jŷr xà jŷ kam ri ihkra te amji cajpēr na, mehckukij. Mā me cumā harēn to:

— Ihnō kam ri, ramā pyt te ihcahpa crire kam ri, akra mā kry jamre — hane.

53 Mā pyt jŷr xà ata kam hŷm te, Jeju te cumā harkwa to:

— Quē ha ihtŷj akra amā impej — hajŷr na to amji japackre pyrentu. Cwŷrjapê ri curi ikre kam cahê na mehkrŷ atajê cunea te ihtŷj Jeju to amji mā me hajŷr pyrentu.

54 Pê Jeju ramā carôt to ampo pihho catia ton to ajkrut, Hŷpōjajo jō pjê pŷn mōr xà ata kam.

Pê Jeju cō cahê na cukrā xà peacre hikwa ata caprā

5 Ne ita jirō pê mā ri Juta catêjê te amji mā me amji kŷn nō ata ton, wa ma me hŷrmā Jeju me, me ikwŷ me, Krŷpinkrēn wŷr me mō. 2 Ne krŷ ata pê kēn to mehccunea intête kwŷc, ne mencjêj xà na hōtpê me harkwa jāhtōa ne me to. Atajê nō na pê carā cahàcre hōhti jamār catêjê ajco hapōj ne me to acjêj. Cwŷrjapê ri cute me cumā haprŷ to Caràcahàcre Hōhti Jō Harkwa. Ne cahi na kēn te kwŷc kam cō ata ri me ijarkwa na haprŷ te Krŷjāhcaprŷ. Mā ipu na hàhpykrā xà na kēn po te ikre po atajê te xŷc ne ihcuhhê. 3-4 Mā me hà cunea cō ata pu na me nō, ne me Pahpām mā imprar catê te cōjkwa pŷn iwŷc, ne cō ata to ipicwŷc na me hikaj. Pê ajco hān ne hōtpê jŷa mā ahna amcro pê ajco irōrōc, ne cō ata to acwŷc. Ne pê ampo na me hikaj nare. Quē ha cō ata acwŷc, quē ha me hà atajê nō mam cumā mrō, ne impej pyrentu. Na pê ipu na mento tŷm me, cute me xwŷ me, me cukrā xà pec me, me nō. 5 Mā curia me cahê na jŷm xŷmre xà na, ramā ahna caku te trŷnta ne ihkôt ôjtō ata nō. 6 Mā Jeju curi cator ne cute ramā hà ita na ahna caku jāhtōa na hōmpun, ne hahkre pej. Ne cute ihcukij to:

— Xà amā amji caprār na amji to prām? — hajŷr.

7 Mā cute Jeju par ne cumā:

— Hewhŷ, jŷm te cō ita kam ito mrōr xà caxuw hamreare. Cwŷrjapê ri hān ne acwŷc, wa tee hŷrmā icuhkwŷr, mā ma mam me ikwŷ kwŷ me ire ne kam me mrō. Ne quēt mempej ne ma me pra, wa ita ri mehkiŷte ijikwa xà ita kam ijikwa — hajŷr.

8 Mā Jeju cumā:

— Hā to xa, ne anōr xà ata py ne to amōr pyrentu — hane. 9 Me ajkaam mā hŷmre ata pej ne hām, ne cute nōr xà ata pyr ne ma to ihtēm pyrentu. Ne mehkiŷt xà jō amcro pê xap na, pê ita hane.

10 Mā Juta catêjê jō pahhi catêjê kwŷ te jŷm ata te nōr xà pyr ne to ihtēm na me hōmpun, ne me cumā harkwa to:

— Pŷhàpà, he ita kam me pahkôt xà jō amcro pê xap, nō na mā ca ajte ate anōr xà ita pyr ne to tē? He ate amji kam gapac xà ita nee me pahte amji kam me pajapac xà cajpuaw nare, ne ihkaj na! — hajŷr.

11 Mā cute mempar ne me cumā:

— Por hŷmre te icaprār ata te imā harkwa to: “Anōr xà py ne to amōr pyrentu” hajŷr. Wa harkwa kôt tē — hajŷr.

12 Mā cute mempar ne mehckukij to:

— Jŷm te mā anōr xà ita pyr ne to atēm na amēn, mā ca apu to tē? — hajŷr.

13 Mā me cumā:

— Pŷhàpà, nee cute icaprār catê ata te imā amji japrŷ jarēn nare, ne ite hōmpun pej nare kam, ma me hàhtō mā hàr — hajŷr.

14 Mā ramā ahna ahtŷm ryre mā Jeju te Pahpām to me amji kam hapac xà jŷrkwa kam ihcajpar ne cumā:

— Ramā acaprār ne apej ita na amji pupun peaj ne he. Ne hipēr mō ne amji caxuw ampo kēn nō ton nare. Nāmri ca ha ate ihnō ton na, quē ha mam ata jirōa pê acaxuw ihkēanre ne — hajŷr, ne ma tē.

15 Mā hŷmre ata xwŷjê cator ne ma tē, ne cute me cupê Juta catêjê jō pahhi kwŷ mā amji jarēn to:

— Xāmte nee jŷm te icaprār nare, Jeju te ri icaprār — hajŷr.

Pê Jeju cupê Pahpām na amji jarē

16 Ne cute me Jeju te mehkiŷt xà jō amcro na, cute hàhcaprār na me harēn par ne me ajpēn mā:

— Cute me pahkôt xà jō amcro kam hàhcaprār, ne apu to kēn, cwŷrjapê cu ha hanea ne ame to kēanre ne — hajŷr. Ne ma Jeju wŷr me pra, ne cute me cumān kam mehtēm.

17 Mā Jeju me cumā:

— Me ikampa, rŷ jŷ caxuw cōjkwa kam Inxŷ Cati te ihkôt xà caxuw hāpēn xà impejti atajê to hāpēn jicu nare. Na wa ha hanea ne cuxà hāpēn xà ita to ijāpēn to ipa kam to icrà tu — hane.

18 Pê me cupê pahhi catêjê kwŷ harkwa ita na me kampa ne ame kam incryac to ame kam incryc, na pê me cumā ihcuran prām to ihcuran prām. Ampo na? Nee mā ampo na nare, pê mehkiŷt xà jō amcro kam hà ata caprā, ne cormā hipy cupê Pahpām kraa to ihkra na me cumā amji jarē, ne Hŷm me ipipēan na amji jarē. Na pê ihtŷj cupê Pahpām kra na cute amji jarēn to apu ihhēj na amehcāmŷj, cwŷrjapê pê kam amencryac to amencryc.

Pahpām kra himpej xà

19 Mā Jeju cormā me cumā:

— Ikam me gapac to impeaj ne he. Ipê Pahpām kra, na wa ha nee amjia kôt ampo itajê nō ton nare. Ne por Inxŷ ampo to, wa ahna hōmpu atajêa to wa ijāpēn to ipa. Ne por Inxŷ ampo cunea to atajê, wa itŷj hanea ne to. 20 Ampo na? Inxŷ mā ikŷnti, na ri ihtŷj imā cute ampo cunea ton xà itajê to ipipē to ipa, wa hōmpu. Ne quē ha cormā imā cute ampo ton xà itajê jirōa pê cute ton xà atajê to ajpē, wa ha to, ca ha ahna me ipupu. Ne atŷj hōmpun xà ata to me amji mā ajkra. 21 Ne pom Inxŷ hacpŷa mā mehtyc to ihtŷr, ita na wa ha ipê hŷràac ne ite amji mā jŷm tyc to ihtŷr prām ata to, itŷj hacpŷ mā ihtŷr. 22 Ne nee Inxŷ Cati pê mehkiŷt me,

mempej to ipicokjêr catê nare. Ampo na? He ite ita to ijâpên xà caxuw ri cute imã hõr. Ne pa wa ha cute mempejti ton atajê jahpan xà na, me cumã ijâmjõr xà impejti atajê to amgõ. Ne cute mehkên ton atajê jahpan xà na, wa ha me cumã ijâmjõr xà kêanre atajê to amgõ, ne cama mehkên mã ame curê. ²³ Quê ha icati na me ipupu, ne amji mã me icupa to hanea, pom quê amji mã me Inxũ cupa he. Ne por jũm amji mã ipê Pahpãm kra na icupa nare ata ri, hanea ne nee amji mã, por Inxũ te ikujahêc ata cupa nare.

²⁴ — He ampeaj kam wa ha me amã awjarê. Por quê ha jũm icakõc xà itajê cunea to amji mã ihhimpej ne kampa, ne Inxũ te ajpên ikujahêc na amji mã ito ihhimpej ata, quê ha ihtÿj ihtÿr rohnÿtti mã. Ampo na? He wa nee ite jũm ata kên mã mên nare, ne cama quêt to ihtyc xà jahpan, na quê ha ihtÿr rohnÿtti mã na ipa, Inxũ cahê na. ²⁵ He ampeaj kam wa ha me amã awjarê. Quê ha ita caxuw, por cormã mehtÿr na ame ipa, mã ramã Inxũ mã mehtyc itajê, jũ caxuw ipê ihkra na me ijõkre kampa, ne hacpÿ mã ihcunea na amehÿr pyrentu. ²⁶ Ne pom Inxũ pê mehcunea mã, cute me amji kam hapac xà jõr catê xakat ata te ri imã hõr. Na wa itÿj hacpÿ mã mehtyc to ihtÿr. ²⁷ Ne ampeaj kam ri ipê Pahpãm kra, ne hanea ne ipê me Ahakã, cwÿrjapê ri hajÿar ne Inxũ Cati te ito mempej me, mehkên catêjê cukij ne me to ipicokjêr catê.

²⁸ — Ne nee ca ite icakõc xà to icakõc itajê impar xà to ame amji mã me apikrar nare. Ampo na? He ramã amehÿc catêjê te me ijõkre par, ne hacpÿ mã amehÿr ne kre pê me hapõj xà kam ri ramã hàhhuc to mõ. ²⁹ Ne por mempejti ton to me ipa atajê, quê ha mehtyc xà jirõ pê hacpÿ mã mehtÿr, ne Pahpãm cahê na amji to me ipijapar rohnÿtti mã. Ne por mehkÿnte mehkêanre ton to me ipa atajê, quê ha mehtÿr, ne cama mehkên mã me axà, ne ampÿa mã, Pahpãm pê amji to me acto.

³⁰ — Ne pa wa nee amjia kõt jũm kên mã mên nare, ne Inxũ te catyt kam amji jahkre pejti te me hahkre pej xà ata kõt, wa ha me to ajcokjê. Na wa nee apu ampo itajê to ihcupan nare. Ampo na? He wa nee ite amji kam ijapac xà na jũm kên mã mên nare. Ne por Inxũ te ikujahêc ata te amji kam hapac xà kõt wa hãn ne mehkên catêjê kên mã me curê, ne mempejti catêjê atajê impej mã me curê.

Pê Jeju hàpên xà ton atajê, ihtÿj cupê Pahpãm na harê

³¹ — Ne wa ha pa ipyxit peaj ne me amã amji kõt harê na mã, quê ha ite amji jarên xà itajê kõt hamreare ne. ³² Ne nee mã ipyxit peaj nare, ne ihtÿj icaxuw jũm ata, ne cupê ijõ Inxũ. Ne por ito ampo na awjarê atajê, ampeaj kam ri, nee mã Inxũ apu ihhêj xi jarên nare na, ramã imã hahkre pej. Inxũ te ijarên xà ata ampeaj kam ri, ne nee ihkõt hamre xà nare.

³³ — Ne ate me ina gâhcukjêr ne me ijarên par prãmte, Jowãw te me cumrãr catê wÿr me jũmjê kujahêc, mã cute me cumã ito hũjarên par atajê ri nee ihhêj xi xà nare, ne ampeaj kam ri. ³⁴ Ne nee imã pjê ita kam, cute me cumã me ito hũjarên xà ita na prãm

nare, ne quêt Inxũ te ito hũjarên xà atajê ri imã impej, ne nee ihkõt hamre nare. Ne mër ampo na ri Jowãw te me cumrãr catê te me amã ijarên to hajÿr? He ca ihhêaj to ijarên par xà atajê kõt me ikampa, ne ate amji mã meito ahimpej na, ca ha nee me akên mã me axàr nare, ne atÿj me atyc xà jahpa.

³⁵ — Ne pom ihpõc xà hãn ne amji na ampo jarare jãhtõa ne to cuprõ, ita jÿkjê na ri Jowãw te me cumrãr catê ata amji na me ato cuprõ. Ne cupê ihpõc xà pyrãac ne me amã ahcujro, ca atÿj ahna ate me cuprõn to amcro to incrêre xà, mãr quê me amã ampo to hahkre. Ca hũrên ame gakry cakrõ, ca ajte nee ate me hũjarên xà atajê cunea na me kam gapac nare. ³⁶ Ne ampeaj kam pê Jowãw hirãa pê me amã ijarê. Mã cormã Inxũ Cati te ijâpên xà catia ita na imên, wa to ijâpên to ipa, atajê ri Jowãw jirõa pê, hirãa pê ijarê, ne hanea ne ihtÿj ajpên Inxũ te ikujahêc na ijarê. ³⁷ Ne hanea ne Inxũ te ikujahêc ata, ihtÿj ito me amã awjarê cakrõ, ca rÿ jũ caxuw ate me hõkre par ne me hõmpun nare. ³⁸ Ca nee ajte icakõc xà itajê na me ipar, ne amji mã me ito ahimpej nare. Ne ca rÿ jũ caxuw ate me Inxũ te ajpên ikujahêc ata jõkre me, cute me amã harkwa jirên atajê nõ impar nare. ³⁹ Ne cormã ihnõ xwÿjê, he ca atÿj me Inxũ pê Pahpãm jarkwa na ihkãhhõc to hahkre to me apa. Ne ate me to hahkre xà atajê kõt atÿj nee jũ caxuw ate ame atyc nare na, ame amji cãmjÿ. Ne por ihkãhhõc ata ihtÿj ito awjarê. ⁴⁰ Cakrõ ca ma ajte ite me amã me atÿr rohnÿtti mã xà ata jõr xà wÿr ame gitõt.

⁴¹ — Ne imã Inxũ te ito ihcakõc to impejti naa pit mã to prãm. Cwÿrjapê ri imã pjê kam me hũmre te ikõt me harên to impejti na me to prãm nare. ⁴² Ne wa ite ramã me akrãhky na me amã Pahpãm kÿn na me gahkre pej, ne nee me amã caxwãm catia mã Pahpãm kÿn nare. ⁴³ Ne wa Inxũ te amji kam hapac xà na ajpên me awÿr icator cakrõ, ca ajte ma ame icaca. Ne quê ha pjê ita kam, ita ri, ajte jũm xũmre amjia kõt cute amji kam hapac xà na me awÿr cato, ca ha atÿj ahna me amji capa, ne ihkõat me amji to. ⁴⁴ Ne ate pjê kam me hũmre te me apejti na me garên na ri, me amã impar prãm. Ne Pahpãm te me apejti na me garên na ri, nee amji to me amã gâhcukjêr to prãm nare, ita kam jũ mã ca ha ne ito amji mã me ahimpej? Wÿr ca ha amji mã hamã ne me to.

⁴⁵ — He xà pa wa ha ajkÿ Inxũ cuna mã me garên to kêanre ne? Hãpã. Ne pom ca me Mojxe xwÿ te me hapackre xà to me amji kampa, ne cute me atehcajpar xà na amji mã me to hane ita, quê ha Pahpãm mã me apê mehkên ton catêjê na me amã hacjê. ⁴⁶ Nãmri ca ha me ate caxwãm catia mã amji mã me Mojxe kam gapac na, ca ha atÿj hanea ne ito amji mã hane. Ampo na? Taa mã pê ina ihhõc. ⁴⁷ Ca nee ramã Mojxe to amji mã me ahimpej nare ita kam, jũ wÿr ca ha ito amji mã me ahimpej — hajÿr. Hõ, Jeju te Juta catêjê jõ pahhi kwÿ mã harkwa to hajÿr.

Pê Jeju hõ incire to me hàhtôa mã harte

6 Ita jirô pê mã, wa ma Jeju me, me ikwý me, Hípôjajo jõ cô na me irêr, ata japyrý nõ te Tiperij jõ cô. ² Mã me ikôt me hàhtôa ne me mõi. Ampo na? Cute me Jeju te me hà caprâr, ne me to impej pyrentu na me hõmpun na ri. ³ Wa hàhkà jakôt nõ na Jeju me, me ipê ihkôt me ipa catêjê me, me ijàpir ne me ijýr. ⁴ Pê caxuw ramã me Hakren xà jõ amji kîn me Pãwtýjre jõ amji kîn na ahtipre.

⁵ Mã Jeju te amji wýr, por ihkôt me hàhtôa ne me mõi atajê pupun, ne cute Pirip mã harkwa to:

— Jõ ri cu ha ajte me hàhtôti itajê mã me hõ nõ mã me pahcato, ne me hũhkà? — hajýr.

⁶ Ne pê ramã cute me cumã pãw kryj ata kam to hàhtô to amji kampa, ne cama cute Pirip cajpëar prãmte pê cumã hane.

⁷ Mã Pirip cumã:

— Ahpýanre na me pyxit te me pãw kryjre ne mencwýr xà caxuw, cu ha me putwýr te ôjtô jàpên xà jõ pore jirôa pê ahna me cumê cakrô, quê ha nee me cahuc nare — hane.

⁸⁻⁹ Mã Antre pê Petrô tõi te cumã harkwa to:

— Ihnãm hã ahkrare xũmre nõ ita mã pãw kryjre te xíc, ne caxuw cumã tep pijakrut ne hàr hiahpuro mã to jý he, ne jũ wýr quê me hàhtôti itajê catwý! — hajýr.

¹⁰ Mã Jeju te me imã harkwa to:

— Me cumã, quê mehcunea pjê kam me to jý — hajýr. Ne pê ampeaj kam pjê ata kam põre. Mã mehcunea jýr, pjê kam, ne por me hũmre me hýr atajê pê me hàhtô na me xíc mir, me hũmre pit. ¹¹ Mã Jeju te pãw kryjre atajê incwýr ne hũrên hakryti na Hũm pê Pahpãm mã to amji jarên. Ne cute ihcokjêr ne me imã hõr, wa ite me cumã hõr par, mã cute tep pijakrut atajê to hajýr. ¹² Mã ajte me hõ pãw kryjre itajê to mehcunea jarte partu. Ne cute me hàpàn tohhi jirô pê mã ri, Jeju te me imã harkwa to:

— Cute ame cahhur tohhi itajê to kàhà kam me cuprô, quê nee ihnõ ipictor nare — hajýr. ¹³ Wa ite me to cuprôn, ne me to kàhà to tõi ne me to hipu par, por pãw kryjre te xíc atajê cahhur to.

¹⁴ Mã cute Jeju te ampo pejti ton xà ita na me hõmpun, ne amji mã me harên to:

— He ampeaj kam ri hũmre ita pê me pamã Pahpãm jarkwa to ihcakôc catê, por pê Pahpãm me pamã cator xà na to awjahkre ata mã he — hajýr. ¹⁵ Mã Jeju te, cute me hàprêa kam amji mã me to hõ pahhi na me hahkre pej, ne ma ahte tẽ, ne kënti kàa nõ na hàpir.

Pê Jeju cô incwýrpê mõi

¹⁶ Mã ramã me ina caxwa, wa curia ite me Jeju rer, ne ma me iwýrýc, hípô tohkà wýr. ¹⁷ Ne pàr kre mã me icjêj, ne ma Capernam jõ krí wýr ite me to irêr na me amji to hajýr. Ne ramã ihcajpuaw pàr kre to me mõi, mã ramã awcapàtkô, mã nee cormã me iwýr Jeju cator nare. ¹⁸ Mã kôc pahtýjti ata te hàpêr kam ihtêm, ne cô to harô to pra. ¹⁹ Wa ramã ite me imõi jũwýr to me rec

pyxit, cô kam, ne ma me to cakrýn to mõi. Ne me ite amji wýr ajpên cô jipy Jeju te mõi na me hõmpun, ne ampeaj kam me imã hũpa.

²⁰ Mã pea me ina hàhtêp, ne cute me imã harkwa to:

— Ame icupa nare, pa wa mõi, nee mã ipê me carô nare — hajýr. ²¹ Wa ite me hahkre pej, ne hacpýa mã hũrên ame ijakry, ne itýj ite ahna me amji caxâr. Mã me iwýr hàr, ne jũ mã cute pàr kre ton, mã cyt ne me imõi xà ata wýr me ito icator.

Pê me hàhtôti atajê ame Jeju japê

²² Ne pê Jeju curi me cumã harte xà ata ri, wa ahte ite pàr kre pyxit peaj mã me icjêj na cute me ipupuan na, curia cormã me ahtwý, ne me Jeju jikaj. Ne nee pê ramã me iwýr Jeju cator na me hahkre pej nare. ²³ Mã ma me ijakàn pê Tiperij jõ krí jõ pàr kre kwý cator, por curi Jeju te Hũm mã pãw pyrên hakryti jarên, ne me cumã kryj, mã cute ame to harte tu ata ri. ²⁴ Ne cute me ijapên, ne curia ame Jeju jikaj atajê kwý te pàr kre kwý mã mencjên, ne ma me ikôt Capernam jõ krí wýr me to cator, cute me Jeju japên prãmte.

Jeju pê me pahto ihtír rohnýtti mã catê

²⁵ Ne curia ri me hàhtôti atajê te me Jeju mã cator ne me cumã:

— Hàpà me Ikrã tũm! Jũ caxuw mã ca ita ri acator? Wa ihcaprý na curi ame gikaj, ca ate jũ mã ajte ne ramã ita ri acator? — hajýr. Mã Jeju me cumã:

²⁶ — Ampeaj kam wa ha me garê! Ca ate ijàpên xà catia na me ipupun, ne Pahpãm kra na ate amji mã me ito hajýr to, ca ikôt me acator nare. Ne ame garte prãm ita to pit mã, ca ikôt me acator. ²⁷ He ame hajýr nare! Nee ca pjê ita kam, ate amji to me apijapar prãmte, me gápàn to pit mã ame amji kam gapac nare. Ne quêt Pahpãm cahê na ate amji to me apijapar rohnýtti mã xà ata to, ca ha me amji kampa. Ampo na? He ate me to amji kam me gapac ata pê ihhêj rũm me gõ te me ato me atír rohnýtti mã xà. He ipê me Ahàkà, na wa ite me axũmrea na amji ton, ne me amã Inxũ Cati to hahkre, ca ate cahê na amji to me apijapar rohnýtti mã xà caxuw. Mã ihtýj Inxũ pê Pahpãm te, ite to ijàpên xà caxuw imã carôt jõr. Ampo na? He cumã ipej na ri — hajýr.

²⁸ Mã cute ita na mehcukij to:

— Ampo ton na ri Pahpãm mã me ito prãm, wa me cumã to? — hajýr.

²⁹ Mã Jeju te me cumã harkwa to:

— Ate ito amji mã me ahimpej na ri, Pahpãm mã me ato prãm, cwýrjapê ri cute me awýr ikujahêc — hajýr.

³⁰ Mã me cumã:

— Ca ha hipêr acarôat to ampo pihho pejti to! Wa ha ahna me apupu, ne itýj amji mã me ato ihmpej! ³¹ He pê me panquêtjê põi kam me hamreare ata kam ajco me hõ pê mana ata pit kur to me ipa, ata pê Pahpãm jõ kàhhôc kam harên to: “Cute côjkwa pîn me cumã me hõ jõr, mã cute mehkřêr” hajýr. Na ca ha pijamã

ajkî cuxà me imã to? Wa ha me hõmpu, ne me cukrê, ne itÿj amji mã me ato ihmipej — hane.

32-33 Mã Jeju me cumã:

— Ýhÿ, ampeaj kam wa ha me amã cõjkwa jõ ata kõt harê. Pê rÿ pëa mã Mojxe xwÿ jõ caku kam, cute pjê kam amji to me ipijapar xà caxuw pit mã, pê Pahpãm me cumã me hõ japrÿ te mana ata gõ. Ne nee mã pê Mojxe me cumã hõ ata jõr nare, Pahpãm pê me cumã cugõ. Ne pom curmã cõjkwa pîn Pahpãm jõ intuwti cator ita pê ri cõjkwa kam Pahpãm cahê na ate amji to me apijapar rohnÿtti mã xà caxuw impej — hane.

34 Mã me cumã:

— Me Ikrã tũmti, gõtpê amcro cunea kam, mër me imã Pahpãm jõ intuwti ita gõ! — hane.

35 Mã me cumã:

— He ipê ri ihhêj rûm cõjkwa pîn Pahpãm jõ intuwti ata, na wa ha me to ihtÿr rohnÿtti mã. Quê ha jũm ty, ne ihtyc jirõ pê hacpÿa mã ihtÿr, ne nee hipêr jũ caxuw ihtyc nare. Quê ha prãm na jũm te apu ipa na, quê ha apà ne hacpÿa mã ihtÿj, ne cumã amji kîn, ne harte pyrên hakry. Ne quê ha hanea ne jũm kôr na apu ipa ne ikõ, ne hacpÿa mã ihtÿj ne cumã amji kîn. Jíkê na, quê ha jũm te Pahpãm jahkre pej ne cumã amji jõr, ne ahna mehwÿ mã hàr to prãm na, quê ha iwÿr apkjê ne ito amji mã ihmipej, ne Pahpãm jahkre pej, ne ahna mehwÿ mã hàr pyrên hakry.

36 — Wa ramã ite me amã me atoa icakõc to, ca atÿj me ipupun cacrõ, ca nee cormã me ikam gapac nare.

37 Ne por Inxũ te ijũhkra mã me hacjên xà atajê, quê ha ihtÿj ijũhkra mã me acjêj, wa ha itÿj amji mã me huwahi, ne jũ caxuw põ mã, amji pê, jũm to ijũcapêr, quê ha ipictor nare. 38 Ne por Inxũ te ampo na amji mã ito prãmti xà ata wÿr pê wa cõjkwa pîn wrÿ. Ne nee amjia kõt ite amji mã ampo na prãmti ata wÿr, iwÿr nare. 39 Ne ite, cute ijũhkra mã me hacjên atajê to hajÿr xà caxuw ri, cute me awÿr ikujahêc he. Quê ha nee jũm ipê ipictor nare. Wa ha jõ ri pjê jamre xà ata kam, me to ipicokjêr xà jõ amcro kam, itÿj amji kõt hacpÿa mã mehcunea to ihtÿr. Hõhõ, ita caxuw ri Inxũ te iku-jahêc. 40 Ita na ri Inxũ ito prãm he. Quê ha ihtÿj ipê Pahpãm kra te hajÿr romã mã iwÿr me apkjê. Ne por quê ha ito amji mã mehhimpej atajê, wa ha jũ caxuw, pjê jamre xà ata kam, hacpÿa mã me to ihtÿr. Quê ha me to ipicokjêr xà jirõ pê Inxũ cahê na mehtÿr rohnÿtti mã na ame ipa — hajÿr.

41 Mã Juta catêjê kwÿ te ajpên mã me Jeju to ihcakõc kên kam mehtêm. Ampo na? Cute cõjkwa pîn cupê me hõ tuaw pyrác ne iwÿr na amji jarên, na ri ame ajpên mã harên to hane he:

42 — Pom cupê Joje me Marij kra ita? He wa ramã ite me hõmpun pejtu, nõ na mã ajte cõjkwa pîn iwÿr na amji jarê? — hane.

43 Mã Jeju te mempar ne me cumã:

— Nãmhá ne apu ihêj xi na amji mã me ito hajÿr jicu. 44 Jũ wÿr quê jũm amjia kõt amji to ikõt ipa catê. Nãm-ri quê ha Inxũ te jũm pê ikõt ipa catê na ton na, quê ha ihtÿj cupê ikõt ipa catê. Na wa ha itÿj hacpÿa mã to ihtÿr, ampo cunea jamre xà ata kam. 45 Ne Pahpãm

jarkwa to mehcakõc catêjê jõ kàhhõc kam hũjarên xà te hajÿr he: “Quê ha Pahpãm pê mehcunea mã ampo to hahkre catê” hane. Quê ha cute me kam hapac, ne amji mã me to ihmipej atajê, quê ha ajpên iwÿr me apkjê, ne iwÿr me pra, ne ihtÿj amji mã me ito ihmipej. 46 Ne rÿ jũ caxuw ita ri, pjê kam catêjê nõ te Inxũ pupun nare, ne pa nare. Wa ipyxit peaj ne itÿj quêt hõmpu. Ampo na? He curũam wa icator, na ri imã hahkre pej.

47 — He wa ampeaj kam me amã awjarê, quê ha jũm te amji mã ito ihmipej na, quê ha ihtyc jirõ pê hacpÿa mã ihtÿr, ne ihtÿr ita na apu ipa rohnÿtti mã. 48 Na ri ipê me gõ te me ato atÿr rohnÿtti mã xà ata. 49 Ne pê mam me panquêtjê põ kam me hamreare ata kam ame hõ pejti japrÿ te mana ata pit ku cacrõ, pê ihtÿj amehweje ne amehwyc partu, ne nee cama hacpÿa mã jũm tÿr nare. 50 Ne por mehwÿr cõjkwa pîn me hõ tuwti wrÿc ata, quê ha jũm te ihkwÿ krêr na, quê ha Pahpãm cahê na ihtÿr ita na apu ipa rohnÿtti mã. 51 Ne ipêa ri cõjkwa pîn me cumã me hõ tÿr wrÿc ata. Ne ipêa ri me to ihtÿr rohnÿtti mã xà. Wa ha pa, pjê kam mehcunea mã amji gõ. Na quê ha jũm te ihhêj ne ikwÿ krêr na, quê ha Pahpãm cahê na ihtÿr ita na apu ipa rohnÿtti mã — hajÿr.

52 Mã Juta catêjê kwÿ ame kam incryac to ame kam incryc, na ri cute me ajpên mã harên kên kam ihtêm, ne me harên to:

— Jũ mã quê ajte hũmre ita ne me pamã amji jã gõ, cu ame cuku? — hajÿr.

53 Mã Jeju me cumã:

— He ampeaj kam wa ha me amã amji jarê, ca ha me ate ame ipê Ahàkà jÿ kur nare, ne nee ame icaprõ ita to ame akõm nare na, ca ha nee Pahpãm cahê na amji to ame apijapar kam me to acrà nare, ne atÿj ame atyc pa, ne me akõt hamre rohnÿtti mã. 54 Ne quê ha jũm te ijÿ kwÿ krêr, ne icaprõ ita kwÿ to ihkõm na, wa ha itÿj jũm ata to hacpÿa mã ihtÿr, por jũ caxuw me to ipicokjêr xà jõ amcro pê ampo cunea jamre xà ata kam.

55 Quêt ijÿ ita ri pjê kam me hõ itajê jirõa pê impej. Ampo na? He ijÿ ita pê ri quêt me hàpàn xà impejti ata, ne icaprõ ita pê ri quêt mehkõm xà impejti ata, me to ihtÿr rohnÿtti mã xà caxuw. 56 Na quê ha jũmjê te ijÿ kwÿ krêr, ne icaprõ to mehkõm na, wa ha ramã me aj-cacwa, ne ajpên kam me ihõnco tu ne. Quê ha ramã Icarõ Pejti me cumã acjêj, quê ha Icarõ Pejti ata carõat kõt me ipa. 57 Ne por Inxũ pê mehtÿr xà cunea xakat ata te ri ajpên ikujahêc, na wa itÿr na ipa. Na quê ha jũm te ijÿ kwÿ krêr na, quê ha hanea ne ihtÿr ita na apu ipa. 58 Hõhõ, pê mam me panquêtjê me hõ pejti pê mana krêr cacrõ, ihtÿj amehweje pa, ne amehwyc partu. Ne pom curmã cõjkwa pîn ipê me hõ intuwti wrÿc ita caca xà te nee hajÿr nare, ne ajteare mã, wa quêt mehtÿr rohnÿtti mã na me to — hane.

59 Pê Capernam jõ krÿ kam, cute me cuprõn xà jũrk-wa kam Jeju me cumã hũjarên xà ata to awjarê to hane. Ne nee pê cormã ne Jeju me cumã amji to ipipê nare, mehcunea te me hahkre pej cupate. Cwÿrjapê pê ajco cute me cumã amji jarên xà itajê cwÿrpê me cumã

amji jarĕn to ipa. Ne Jeju jĭ kur xà ata kôt harĕn xà te hajĭr he. Quĕ ha ihtÿj jŭm amji mã Jeju to ihhimpej, ne ihkôat ipa, ne ihkôt ipa xà ata pê ri cute hĭ kur xà.

Pê me hàhtôa ne me Jeju mã hikra

⁶⁰ Mã Jeju kôt me ipa catêjê jàhtôa ne cute me ita par, ne ajpĕn mã me harĕn to:

— Pom me pamã ampo to hahkre itajê impar kôt hakop jahkre kêatre! Ne jŭ mã quĕ ha jŭm kam hapac to, ne hahkre pej ne ahna amji capa? — hajĭr.

⁶¹ Ne nee jŭm te Jeju mã me harĕn nare kam, mã cutea ramã me ahna ihcakôc xà ata jahkre pej, cwÿr-japê ri cute mehçukij to:

— Xà ita cwÿrjapê mã ca ame icaca, ne ame imã hikran prãm? ⁶² He ca ha atÿj jŭ caxuw còjkwa wÿr ipê me Ahàkà te hacpÿa mã hàpir na me hõmpu. Jirô pê mã ca ha cormã me ijŭjarĕn xà itajê kôt me hakop, ne me hahkre pej. ⁶³ Ne Pahpãm Carõ Pejti ata ri cahê na me ato ipijapar rohnÿtti mã. Ne jŭ wÿr ca me anõ amjia kôt amji mã hamã ne ca amji to ajpa, ne me ca ajpĕn to me ajpa. Ne ca ha ate me icakôc xà ita na ikam me gapac na, quĕ ha Pahpãm Carõ Pejti me amã acjêj, ne me ato ipijapar rohnÿtti mã. Hõhõ, ita pê ri ate me ijĭ kur xà ata, pom wa me amã harĕ ita. Ne wa ampeaj kam me amã ampo itajê jarĕn cakrô, ca ajte nee me akwÿ ito amji mã me ahimpej nare — hajĭr.

⁶⁴ Ampo na pê Jeju me cumã ita jarĕ? Nee mã ampo na nare. He pê ramã rÿ pĕa mã, mam jŭmjê atajê te to amji mã mehhimpej xà nare na me hahkre pej, ne hanea ne jŭm te ihkĕn mã mĕn xà ata na hahkre pej.

⁶⁵ Ne cute me cumã:

— Cwÿrjapê wa ite ramã me amã harĕn xà ata na, quĕ ha Inxŭ te ikôt jŭm te ipa catê na hãm nare na, quĕ ha nee cupê ikôt ipa catê nare — hajĭr. ⁶⁶ Na ri Jeju kôt me ipa catêjê jàhtôa ne cute ihkôt me ipa jicu, ne nee hipĕr ihkôt me ipa nare.

Pê Jeju kôt me ipa catêjê te tôxi atajê nee me cumã hikran nare

⁶⁷ Mã cute me ipê ihkôt me ipa catêjê te tôxi itajê cukij to:

— Xà ca ha hanea ne me ijicu, ne ma me aprar prãm? — hane. ⁶⁸ Mã Ximãw Petrô te cumã harkwa to:

— Jŭm wa ha ajte me hŭnã? Me ijõ Pahhiti, pom acakôc xà itajêa ri quĕt me imã ite amji to me ipijapar rohnÿtti mã xà to hahkre. ⁶⁹ Wa ite me Pahpãm te apê jŭm pejti ata kujahĕc na me gahkre pej, na wa itÿj ite amji mã me ato hajĭr — hajĭr.

⁷⁰ Mã Jeju me imã harkwa to:

— Ÿhÿ ita cwÿrjapê wa ite amji mã me ate tôxi itajê capi cakrô, mã me anõ pyxit ne kam me pahçurê xwÿn carõ kĕn jõ pahhi — hane.

⁷¹ Ne pê Jeju, Juta Carijot pê Ximãw Carijot kra ata to, pê me imã ihcakôc. Ampo na? Juta ata pê ihkôt me ipa catêjê te tôxi atajê nõa cakrô, quĕ ha ihtÿj jŭ caxuw Jeju curê xwÿn tehçajpa, ne ihkĕn mã cumê.

Pê Jeju kjêjê intuwre atajê ame cumã xwÿ

⁷ Ita jirô pê mã ri ma Jeju ame ito mõ, Hĭpôjajo jõ pjê kam, ne pê nee Juta jõ pjê kam ajco apu ipa nare. Ampo na? Pê curi me hõ pahhi catêjê apu mehçuran prãm na pê. ² Mã ramã caxuw Juta catêjê jõ amji kĭn nõ japrÿ te Ikrere jõ amji kĭn ata to me cator xàa kam. Pê ajco me hõ amji kĭn ton xàa na, ihtÿj ikrere atajê kam amehkrĭ, ne nee me hŭrkwa pej kam amehkrĭ nare. ³⁻⁵ Mã cormã hapu na Jeju kôt mehçjêjê atajê te ihtõ kà pê Pahpãm kra na amji mã me to hajĭr nare, na ri cute me hapactua kam cumã harkwa to:

— Juta jõ pjê wÿr atĕm pyrentu, ne curi acato, ne acarôat to me cumã ampo pihho catihti itajê cunea to, quĕ me hàhtôti atajê me hõmpu! Quĕ ha jŭm mã amji to cati prãm na, quĕ ha nee apu ipimxur to ihcuhwÿr nare. Ne mĕr ampo na quĕ ate ampo jahkre pej xà itajê na me apupun nare? Me cumã to, quĕ ahna mehçunea me apupu! — hajĭr.

⁶ Mã Jeju me cumã:

— He cormã nee ite mehçunea mã amji to ipipĕ xà jõ amcro kam hàhhuc nare! Ne me amã amji kĭn wÿr me aprar xà caxuw amcro cunea impej. ⁷ Mã pjê kam catêjê itajê nee quĕt ame acurê nare. Ne pa nare, me ikam incryc kam ame ipa. Cwÿrjapê ri ma ame icurê, ne ma ame icaca! Ampo na? Wa itÿj me cumã, cute me ampo to kĕn atajê jarĕn to ipa na ri, ma ame icurê.

⁸ Ne me ca nare, gapacta ne amji kĭn ita wÿr me mõ. Waha ita ri apu mõ. Ampo na? He cormã amji kĭn wÿr imõr xà caxuw nee ijõ amcro kam hàhhuc nare — hane. ⁹ Hõ, Jeju te me cumã amji jarĕn to hajĭr, ne curia Hĭpôjajo jõ pjê kam hàhhuc, ne apu mõ, me hakàn pê. ¹⁰ Wa me hakàn pê ame ipa, mã me ina jŭ mã amcro te, wa ma me ipimxuar pê Jeju me, me mõ. Mã nee jŭm te me imõr xà na me ipupun, ne me ijahkre pej nare.

Me hàhtôti atajê mã Jeju to cute amji kam me hapac xà pijakrut

¹¹ Mã tee Juta catêjê jõ pahhi kwÿ amji kĭn ata na, me hàhtôti atajê catàtkre na ame Jeju japê. Ne ame hapĕn to me ahna hàhcukjĕr to hajĭr to me ipa he:

— Jõ ri mõrmõ Jeju apu mõ? — hajĭr.

¹² Mã me hàhtôti atajê kwÿ kàjpej pê, ajpĕn mã me Jeju jarĕn to:

— Ampeaj kam jŭm ita pej — hane. Ne mehkwÿ ajpĕn mã me harĕn to:

— Quĕ, he jŭm ita ihtÿj mehkwÿ mã ihhĕj xi to ipa — hane.

¹³ Mã Juta catêjê jõ pahhi kwÿ mã Jeju kĭn nare na, cute me hahkre peaj xà na, nee jŭm me kam mare mã ajpĕn mã Jeju kôt harĕn nare, me hõ pahhi kwÿ te ame kam incryc, ne ame to kĕn cupate.

Pê Jeju me cuprõn xà kam me cumã ampo to hahkre

¹⁴ Ne ramã cute me to amji kĭn ata krã curan xà wÿr, ihcahti na cute me to hajĭr. Mã ma Jeju Pahpãm to me

amji kam hapac xà jūrka wūr mō ne hār, ne curia hūr ne ame cumā ampo to hahkre. ¹⁵ Mā Juta catêjê kwỳ te mehcaok xà atajê na mempar, ne me amji mā harên to:

— Pÿhàpà! Pê nee ihkàhhôc to hahkre cati nare cakrô, ampeaj kam cute amji jahkre pej — hajÿr.

¹⁶ Mā Jeju me cumā amji jarên to:

— Pom wa me amā ampo to hahkre itajê, wa nee amjia kôt hahkre pej, ne me amā to hahkre nare, ne nee cupê itekjê nare. Ne cupê Pahpām te ikujahêc ata tekjê. Ne curūam ri ajpên ampo itajê pra, wa cama me amā to hahkre. ¹⁷ Ne quê ha jūm mā Pahpām te amji kam hapac xà jahkre pej, ne ihkôt amji ton to prām na, quê ha ite ampo to hahkre xà itajê na ikampa, ne hahkre pej pyrentu, Pahpām pīn hapôj na, ne nee ikrā pīn hapôj nare.

¹⁸ — Ne quê ha mehcuea te amji mā me jūm cupa to prām to, quê ha ihtÿj amjia kôt, ihkrāa kam me cumā ampo jarên to ipa. Ne pa nare, wa nee ite hajÿr nare. Ampo na? Imā ate amji mā me icupa ita na me ato prām nare, quêt ate me amji mā me Pahpām te ikujahêc ata cupahti na ri, imā me ato prām. Na wa itÿj catyt kam me amā ijūjarên xà, hêj xi nare ita to ijūjarên to ipa, ne nee wa ame amā ihêj xi jarên to ipa nare.

¹⁹ Ne pê ramā Mojxe xwỳ me panquêtjê mā Pahpām jarkwa gō cakrô, ca ajte nee amji mā me kam gapac nare, ne mēr ampo cwÿrjapê mā ca tee ame icuran to hahkre? — hane.

²⁰ Mā mehcuea te Jeju mā me harkwa to:

— Mōrmō ca apu akrā kam waj, na mā ca apu amji na me ikraj! Jō ri mā jūm apu acuran prām ita? — hajÿr.

²¹ Mā Jeju me cumā:

— Por wa ite me pahkôt xà jō amcro na icarôat to ampo pihho pyxit peaj ton, ne ite jūm xà ata caprār, ne to me amā ipikrar ata to, wa ite amji na me amên, ca ajte ame ikam acryc. ²² Ne ca hanea ne atÿj me pahkôt xà jō amcro na me apê. Ampo na? Quê ha me pahkôt xà jō amcro na jūm cahāj mā ihkrare ihpÿm, ca ha atÿj ajte me pahkôt xà jō amcro itajê nō na me cumā impy kà kwỳ jakep, pê Mojxe xwỳ me amā to hahkre xàa na. Ne nee mā pê Mojxea ita to ipipê nare, ne mam Mojxe quêtiti pê Aprāw xwỳ ata mā pê ita to me amā ajpê.

²³ Ne Mojxe xwỳ te me hapackre xà ita kôt, mā ca atÿj me pahkôt xà ita na me ahkrare mā mempy kà jakep. Ne nee ipê me apyràc, wa ite jūm ita pê ihkà kwỳ jakep nare, ne quêt cumā ihkà cunea na to impejti, ca ajte ita na ame ikam acryc? ²⁴ Ne ca hān ne ajte ampo na me hōmpun pyxit peaj kam, ramā ihkēanre na me harê. Ahna cute hajÿr nare, ca ha xa ate hōmpun xà ata kôt to amji kampa, ne ihkôt hakop, ne impejti na hahkre pej, nare, ihkēanre na hahkre pej jirô pê, ca ha cormā atÿj harê — hane.

Jeju pê ri Mexij pê me to awjahkre ata

²⁵ Mā Krīpinkrên catêjê kwỳ Jeju na me ajpên cukij to:

— Xà Jeju ita mā me pajō pahhi catêjê amehcuran prām? Ne mēr ampo na mā cute mehpro nare? ²⁶ Pom

me pahcunea jipôc ri xa ne ame pamā ihcakôc ita? Mā nee ajte jūm te cumā ampo jarên nare? Nare, mōrmō me pajō pahhi catêjê, por pê Crixto toPahpām me pamā awjahkre ata na, mōrmō amji mā me to hane? ²⁷ He me imāa, nee cupê Crixto nare! Quê ha jū caxuw me pahwÿr Crixto ata cato, cu ha nee jū rūm cator xà na me hahkre pej nare. Ne pom jūm xūmre ita ri ihtÿj jū rūm cator xà ata na me pamā hahkre pej, he cupê Naxare jō krí catêjê nō — hane.

²⁸ Mā cormā Jeju Pahpām to me amji kam hapac xà jūrka kam xa, ne cute me cumā ampo to hahkre xà ata kam, ihkrāhhia kam me cumā:

— Xà ajkí ampeaj kam me amā jū rūm icator xà ita na ijahkre pej? Hāpà! Wa nee amjia kôt icator nare, ne me apê, por ajpên cute ikujahêc ata jahkre kêatre. Ne por jūm te ikujahêc catê ata pê ri amji jarkwa par catê, ne catyt kam ipa! ²⁹ Ne imāa ri quêt hahkre pej. Ampo na? He ihpīan wa icator, ne cutea ri ajpên ikujahêc — hane.

³⁰ Mā cute mempar, ne tee amehpro to hahkre, ne nee jūm te ihcupên nare. Ampo na? He nee cormā cute mehpro, ne ihkên mā me mên xà kam hàhhuc nare na ri. ³¹ Mā me hàhtôti atajê jipôc ri me hàhtôa te ihtÿj Pahpām te Jeju to me cumā hūjahkre na amji mā meto ihhimpej. Na ri me ajpên mā harên to:

— He ihhêj ne me imāa, cupê, por pê Crixto to Pahpām me pamā awjahkre ata! Ne quê ha jū caxuw ajkí Crixto cato, ne ajkí, pom Jeju te ampo ton xà itajê jirôa pê ajkí to? Hāpà. Taa mā ri ramā cator — hane.

Pê krāhtare amji caprÿ to Jeju pro to, hÿrmā pra

³² Mā Parixêw catêjê kwỳ te kàjpej pê cute amji mā me harên to hajÿr na mempar, cwÿrjapê ri cute Pahpām mā mehcajrên catêjê jō pahhi kwỳ me, cute Jeju pro na me ajpên par. Ne cute hÿrmā me hō krāhtare kwỳ kujahêc, cute mehpro ne me haxār prāmte. Mā hÿrmā me cator ne cama mehcuhhê ne me kampa.

³³ Mā cormā Jeju me hàhtôti atajê jipôc ri xa ne me cumā:

— Wa ha itÿj cormā ijōtpê ame acahê na imōr crire ne, ne quê ha ina ahtūm nare, wa ha ma hacpÿ mā cute ajpên ikujahêc ata wÿr amji jaxà ne tē. ³⁴ Ca ha me ipupun prāmte, tee ame ijapê ne nee me ipupun nare. Ampo na? Jū wÿr ca me anō, por wa curi apu mō ata ri ikôt acato! Na ca ha nee me imā acator nare! — hane.

³⁵ Mā Juta catêjê te ajpên mā me harên kam mehtêm, ne me ajpên mā harên to:

— Jū kam mā quê ha ajte tē, cu ha ajte nee cumā me pahcator nare? Xà quê ha ajkí ma me cupê Crec catêjê jō pjê wÿr tē, ne curia me cupê Juta catêjê kwỳ mā apu ampo to hahkre to ipa? ³⁶ Ne mēr ampo mā hān ne harên kam pra ne harên to: “Wa ha ma tē, ca ha tee ame ijapê, ne nee hipêr me imā acator nare”, ne “Jū wÿr ca me anō curi itêm xà ata wÿr ikôt tē” hane? — hajÿr. Hōhō, pahhi catêjê te ajpên mā harên to hajÿr.

Pahpām Carō Pejti ata pê cô te me pahto ihtîr xà rohnýtti mã ata pyràac

37 Ne pê me hō amji kîn cahhur ata, cute kam me to ihtēm xà jirōa pê impej, na pê Jeju me hipôc ri xa, ne ihkrāhhia kam me cumã hūjarēn to:

— Quê ha me anō mã, Pahpām jahkre pej xà pê amã kôr pyrãcti ata na prãm na, ca ha iwýr tē, wa ha amã Pahpām to ajpē, ca ha hahkre pej pyrēn gakry. 38 He pê ramã Pahpām jarkwa ita jarēn to hane he:

“Quê ha jūm te amji mã ito ihhimpej na, quê ha cute amji kam hapac xà tuw pejti atakôt me hàhtōa ne Pahpām wýr me apkjê,

quê ha taa mehtîr rohnýtti mã na me to.

Quê ha cute amji kam hapac xà tuw pejti ata pê cô catia pijapjêr ata pyrãac, ne ipijapjêr ita na” — hane.

39 Ne por cô to mehkôm xà to Jeju te me cumã ihcakôc ata pê Pahpām Carō Pejti incwýr xà. Ampo na? Por quê ha jūmjê amji mã me Jeju to mehhimpej atajê, quê ha ihtýj me Pahpām Carō Pejti ata cwa. Ne ampo na pê cormã ne nee ame Pahpām Carō Pejti ita cwýr nare? Pê cormã Jeju nee hacpý mã ihtîr ne Hūm wýr amji jaxàr, ne hacpýa mã amji to cati nare na pê.

Pê me hàhtôti atajê ahpýanre na Jeju na cute me amji to hajýr xà

40 Ne pê me hàhtōa ne cute cô to mehkôm to me cumã ihcakôc na me kampa, atajê ajco ajpēn mã me harēn to:

— Ampeaj kam ri hūmre ita pê me pamã Pahpām jarkwa to ihcakôc catê catia, cu me hikaj ata, ne taa mã ri cator — hane.

41 Ne pê mehkwy ajpēn mã me harēn to:

— Me imã cupê Crixto to Crixto, ne toa pê Pahpām me pamã awjahkre — hane. Ne mehkwy ajco ajpēn mã me harēn to:

— Pom Jeju pê Hípôjajo catêjê nõ ita? Xà quê ha ajkî ihtýj Crixto jū caxuw Hípôjajo jō pjê pîn cato? Jū wýr quê ha curúm cato! 42 Ampo na? Pê ramã Pahpām jō kàhhôc kam to hūjarēn to hane he:

“Quê ha ihtýj jū caxuw pahhi pê Tawi xwý tàmwxwý nõ kam Crixto cato,
ne por pê curi Juta jō pjê kam, Pãw jō krî kam Tawi xwý ihkrî ata kam, quê ha ihpým” — hane.

43 Mã pea me hàhtôti atajê te Jeju to me amji kam hapac xà to me ipicapôn. 44 Ne pê mehkwy ihtýj me pro ne ihkên mã me mēn prãm, ne me hacjên xà mã me haxàr prãm. Ne pê nee jūm ajte ihcupēn nare.

Pê krãhtare nee me Jeju pro nare

45 Na ri ma hacpý mã krãhtare atajê te me amji jaxàr, ne me hū kam me pra, Pahpām mã cute mehcjãrēn catêjê jō pahhi kwý me, Parixew catêjê atajê wýr. Mã cute me Jeju japēn ne ahna mehcukij to:

— Ampo na mã ca nee ate mehpro ne ajpēn iwýr me to amôr nare, ne ajpēn gū kam me pra? — hajýr.

46 Mã krãhtare atajê me cumã harēn to:

— Wa rý jū caxuw ite me jūm te ihcakôc xà nõ to ihcakôc to hajýr na mempar nare, ne ihcakôc xà itajê ajteare mã — hane.

47 Mã Parixew catêjê atajê krãhtare atajê mã:

— Pýhàpà? Xà hanea ne ajte cute me amã ihhêj?

48 Xà ajkî me ipê pahhi catêjê kwý me Parixew catêjê kwý nõ te mã amji mã Jeju to ihmpej? Hãpà! 49 He por Jeju to amji mã mehhimpej to me ipa atajê pê me pahte amji kam me pajapac xà jō kàhhôc jahkre kêatre! Cwýrjapê quê ha Pahpām ame to kêanre ne, ne mehkên mã me cumē — hane.

Pê Nicotem Jeju tehcajpar prãm to prohti kam ihcakôc

50 Pê Nicotem ramã jū caxuw caxwa ri Jeju mã ihcakôc ata pê mehkwyã nõ, ne cute mehkwy mã harkwa to:

51 — He cu nee me pajō kàhhôc kam pahte amji kam me pajapac xà ata rer, ne me jūm ata cukij ne mempar nare kam ihkên mã me mēn nare. Cu ha xa mehcukij, ne me kampa, ne ihkên na me hahkre pej, ne cormã ihkên mã me cumē — hajýr.

52 Mã mehkwy me cumã harkwa to:

— Pýhàpà, xà ajkî apê Hípôjajo jō pjê catêjê nõa, mã ca atýj apu Hípôjajo jō pjê pîn Crixto ata cator na amji mã to hane? Apu hajýr nare, ne cama Pahpām jō kàhhôc to ca hahkre ne hahkre pej, he nee rý jū caxuw Pahpām jarkwa to mehcakôc catêjê nõ te Hípôjajo jō pjê pîn cator nare — hane.

Pê Jeju cahãj xyre ata te hipêr ampo kên ton nare xà caxuw hũtà

8 Jirô pê mã ri ikre wýr mehcunea cutor, mã ma Jeju Píxô jō kên wýr mō. 2 Mã amcro nõ na, awc-ahti xà wýr, Jeju te amji jaxàr, Pahpām to me amji kam hapac xà jürkwa wýr, ne hàr ne jý. Mã me hàhtōa ne ahna me ipixêr, ne me xa, ne cute ampo to me cumã hahkre xà atajê na ame kampa. 3 Mã cute me cumã Mojxe xwý jō kàhhôc to hahkre catêjê me, Parixew catêjê te me pyjê nõ te ahti na impjê kaj na jūm me nõ ata pro, ne ma me to mō. Ne cute Jeju cuna mã me hãm xà caxuw, ame cumã quêt. Mã mehcunea jipôc ri hãm ne xa. 4 Mã cute Jeju mã me harēn to:

— Me Ikrã tūm, pom cahãjre ita ihtýj ahti na mō ne hūmre ita to nõ, impjên kaj na. Mã jūm te ajpēn kam me hōmpun, wa ite mehpro, ne ajpēn awýr me to mō. 5 Ne pê Pahpām jō kàhhôc kam Mojxe xwý me pamã pyjê te hajýrjê atajê kên to curan to hajýr na, awjahkre he: “Quê ha pyjê nõ apu hajýr to mō ata ri kêan to cute mehcuran xà” hane. Ne ca? Jū mã ca ha cute hajýr xà ita na me imã ihkôt harēn to? — hane.

6 Ampo na pê pyjê nõ ata kôt ame Jeju mã harēn to hane? Nee mã ampo na nare. Jeju te me hapackre xà nõ to ihcupan, mã cute mempar ne mehpro prãmte, pê tee ame to hahkre. Mã Jeju te cama hýr ne me kam

hapac, ne pjê na hikôt ne hühkrahhi to kam ihhóc to mō. ⁷ Mā mehcukij ita na. Mā cute amji capô ne hÿr pej, ne me cumã harkwa to:

— Por rÿ jÿ caxuw me anō te Pahpām cuna mā ampo kên ton nare ata, ca ha mam kên nō to cahãjre ita kam awcapê, ate to ihcuran xà caxuw — hajÿr.

⁸ Jirô pê mā ri hacpÿa mā pjê na hikôt, ne ihtÿj jÿ ne kam ihhóc. ⁹ Mā cute me Jeju te me cumã hÿjarên to hajÿr na kam me hapac atajê, ma me pyxit ne me pra. Ne por mam jÿm kàhtu ata ri ma mam me cumã tē. Ne ahnaa me pyxit ne ajkôt memprar ita kam me cutor. Mā ahte Jeju me jÿm cahãjre ata pit jàhhuc. ¹⁰ Mā Jeju te amji capô ne hÿr pej, ne jÿm cahãjre ata mā:

— Hàpà? Ne mēr jō ri mā kên to cute ame acapêr prām atajê? Ne mēr jō ri mā ame akôt harên to kēanre atajê? — hajÿr.

¹¹ Mā jÿm cahãjre ata Jeju mā:

— Hamreare, nee jÿm jàhhuc nare — hane. Mā cumã:

— Wa nee pa xwÿjê ato kên nare. Mēr gapacta ne tē, ne nee hipêr mō ne ampo kên ton nare — hane.

Jeju pê hàhcujro xà pyràac, ne me pamã ampo cunea to ajpê

¹² Jeju te hipêr me hàhtôa mā ampo to hahkre kam ihtēm, ne me cumã amji jarên to hajÿr he:

— Ipê, pom hàhcujro xà ampo cunea kujro, ca me hōmpu ne me hahkre pej ita pyràac. Ipê Pahpām wÿr me amã ijàhcujro catê. Na ca ha ate me amji mā ito me ahimpej na, ca ha jÿ caxuw awcapàtkôti kam, me apê amji jahkre kêatre kam, me Pahpām pê apictor xà ata kam ame apa nare — hajÿr.

¹³ Mā Parixêw catêjê kwÿ te me Jeju kam hapac ne me cumã:

— Ca ramã ca apu amji to acakôc, na ri acakôc xà itajê kôt hamreare — hajÿr.

¹⁴ Mā Jeju me cumã:

— Pom wa ampeaj kam me amã amji jarên to ipa itajê kôt nee hamre nare. Ampo na? He ampeaj kam, wa nee apu ihê xi nare. Ne pa ri quêt imã, por jÿ rÿm icator xà ata na amji jahkre pej, ne hanea ne imã hacpÿ mā ite amji jaxàr xà ata na amji jahkre pej. Ne me ca nare, me apê jÿ rÿm icator xà ata na ijahkre kêatre, ne hanea ne jÿ kam itēm xà ata na me apê ijahkre kêatre.

¹⁵ Na ca me ate amji kam me gapac xàa kôt, amji mā me ikēanre na me ito hane, nare, mōrmō ca amji mā me ipej na me ito hane. Ne imãa, ate me ijarên xà itajê cunea kôt hamreare. Ne nee cormã ite mehkên me, mempejti cukij ne me to ipicokjêr xà jō amcro cator nare. ¹⁶ Wa ha ite ramã me ato ipicokjêr xà na mā, wa ha itÿj catyt kam me akên me, me apejti to ipicokjêr to ipa. Ampo na? He wa ha ite ton xà ata kam, nee ahte ton nare. Quê ha hanea ne, por Inxÿ te ikujahêc ata icahê na jÿ, ne ite me ato hajÿr xà to imã hahkre. ¹⁷ Ne Mojxe xwÿ te me amã incaca xà te hajÿr ata rer, na quê ha jÿmjê ajkrut ne jÿm te ampo ton xà ata na me hōmpu, ne cute me hōmpun xà ata na ajwar ajpēan kôt me harên na, quê ha me amã ampeaj kam ri cute ton.

¹⁸ Ita jÿkjê na wa Inxÿ te ikujahêc ata me ajwar me ijÿjarên xà caxuw me ipijakrut, cwÿrjapê ca ha atÿj ite amji jarên xà itana me ikampa — hane.

¹⁹ Mā me cumã:

— Jō ri mā apām ita? — hane. Mā Jeju me cumã:

— He me apê Inxÿ jahkre kêatre, ne hanea ne me apê ijahkre kêatre, quê ha me amã ijahkre pej na mā, quê ha hanea ne me amã Inxÿ jahkre pej — hane.

²⁰ Ne por cute Pahpām to amji kam me hapac xà jÿrkwa kam, cute me cumã ihpore to cuprôn xà ata cahê na, pê Jeju me cumã hÿjarên xà itajê to awjarê. Mā nee cute mehpro ne me haxàr nare, me hacjên xà kam. Ampo na? Pê cormã nee cute mehpro xà jō amcro hÿrmã cator nare, na pê.

Pê Jeju pahhi catêjê cunea mā amji jarê

²¹ Mā Jeju te hipêr me cumã amji jarên to:

— He wa ha ma tē, ca ha ate me ipupun prāmte, tee ame ijapê, ne nee me ipupun nare. Ampo na? Jÿ wÿr ca me anō, por wa ha curi tē ata ri, ikôt acato. Na ca ha ita ri ame apa, ne ca ha atÿj me akên itajêa kam ame ty. Ampo na? He Pahpām te nee me amã me akên itajê to impej ne to tojnō nare ata kam, ca ha ame ty — hajÿr.

²² Mā Juta catêjê ajpên mā me harên to:

— Jÿ kam mā quê ha ajte tē? Cu ha nee hipêr me hōmpun nare? Xà quê ha ajkí amji cura? — hane.

²³ Mā Jeju me cumã:

— He me apê pjê kam me apa catêjê, ne quêt ipê kÿj pê, cōjkwa kam Pahpām na mehkwy, na ri nee ipê pjê kam me akwÿ nare. Ne ate amji kam me gapac xà itajê pê pjê te amji kam hapac xà, ne ite amji kam ijapac xà pê ri kÿj pê, cōjkwa kam, Pahpām te amji kam hapac xà. ²⁴ Ca ate nee ite me amã amji jarên xà ita to amji mā me hajÿr nare, cwÿrjapê wa ite me akên atajêa kam me atyc na me amã harên. Ca me ate, por Pahpām te ajpên ikujahêc ata to amji mā me hajÿr nare, ne amji mā me ito ahimpej nare na, ca ha atÿj me atyc partu, ne nee hacpÿa mā me atír ne Inxÿ cahê na me akrí nare — hajÿr.

²⁵ Mā cute me Jeju cukij to:

— Ne mēr me anō mā ca? — hajÿr. Mā Jeju me cumã amji jarên to:

— He ipê, por pê wa mam ramã me amã amji jarê ata, nepa wa cormã. ²⁶ Ne wa ha cormã, hipêr me amã me ate me akên ton itajê cunea jarê. Ne nee wa ahte cama me amã me akên xà itajê to icakôc to ipa nare. Ampo na? He wa, por Inxÿ Cati pê cute amji jarkwa par catê, ne catyt kam ipa, ne ajpên cute ikujahêc ata jarkwa to, wa pjê kam mehkí atajê cunea mā icakôc to ipa. Ne wa ha itÿj jÿ caxuw amjia kôt me amã me akên xà ton itajê cunea jarê — hane.

²⁷ Pê nee cute me cumã cōjkwa kam Hÿm to ihcakôc xà ata na me hahkre pej, ne me kam hapac nare.

²⁸ Cwÿrjapê pê Jeju me cumã amji jarên to:

— He ca ha jÿ caxuw, ipê me Ahàkà te me hÿmre na amji jahkre, mā cute pí na menxôr na me hōmpu, ne cormã me ijahkre pej. Na wa nee amjia kôt ampo

itajê ton to ipa nare, ne Inxū te ahna imā harkwa ne to imā hahkre atajê to pit mā ijâpên to ipa. ²⁹ Ne ampo na ri ajpên cute ikujahêc ata nee amji pê irer nare, ne ihtÿj apu icahê na ipa? Wa cumā cute amji mā ampo na prām̄ti xà atajê to pit mā ijâpên to ipa na ri — hane.

³⁰ Ne Jeju te ihcakôc xà to hajÿr jirô pê mā ri me hàhtôa te cupê Pahpām kra na amji mā me to ihhimpej kam mehtêm.

Jeju pê me pahcunea pytàr catê

³¹ Mā Jeju te Juta catêjê kwÿ te amji mā me to ihhimpej kam mehtêm atajê mā:

— Ca ha ate amji mā me ito ahimpej kam me to acra na, ca ha me apê ikôt me apa catêjê impej pit. ³² Na ca ha me ite amji kam me ijapac xà impejti itajê cunea jahkre pej partu. Na ca ha nee me apê cama me jūm jarkwa kôt me cumā hàpên catêjê atajê pyrâc nare, ne atÿj quêt ame apa — hajÿr.

³³ Mā me cumā:

— He me ipê Aprāw xwÿ tàm xwÿ tàm xwÿ, mā nee rÿ jū caxuw jūm te amji mā me ito cama me harkwa kôt me cumā hàpên catêjê nare, ne wa itÿj ame ipa, nõ na mā ca ajte jūm pê ate me ipytàr na amji jarê? — hane.

³⁴ Mā Jeju me cumā:

— Jū wÿr quê cama jūm pê me cumā hàpên catê ata apu hàpên to mō, ne amjia kôt hicu. Quê ha hō pahhi cute hicu na cumā harkwa, quê ha cormā hicu. Ita jÿkjê na mā, me pahcurê xwÿn pê Xatanaj me ato hane, ne ihtÿj cormā me ato ihhimpej ita kam, ca nee me akên ton jicu nare. Ne ampeaj kam wa me amā awjarê, wa nee ame amā ihê xi jarên nare. ³⁵ Ne ihnō xwÿjê te hajÿr he. Quê ha nee cama me hō pahhi jarkwa kôt me cumā hàpên catêjê nõ hō pahhi jūrkwā kam ihkrī kam incrà nare. Ampo na? Quê ha ramā hō pahhi mā ihkīn nare, quê ha ihtÿj hūrkwā tète cator, ne jū kam ihkujate. Ne quêt ihkra ata quê nee amji tète cator nare, ne nee jūm mā ihpore na to hàhpan nare. Ampo na? Cupê ihkra, na quê ha hūrkwā kam ihkrī rohnÿtti mā. ³⁶ Ne ipêa ri Inxū Cati kra. Nāmri wa ha itea me acurê xwÿn pê Xatanaj pê me apytàr na, ca ha atÿj cama ame apa rohnÿtti mā, quê ha nee iràn xà na hipêr jūm me ato ihhimpej nare.

Pahpām pê me pajō Inxū Cati

³⁷ — He ampeaj kam ri me apê me panquêt xwÿ Aprāw tàm xwÿ tàm xwÿ, wa ramā ite me gahkre pej. Nõ na mā ca ajte ame icuran prām. Ne mēr ampo na mā ca ame icuran prām? Nee mā ampo na nare, ca ma ame ite me amā ampo to hahkre xà itajê caca, na ca ame icuran prām. ³⁸ Ne Inxū te imā ampo jahkre, ne imā to hahkre xà atajêa na wa to icakôc to ipa. Ne me amā ajtea mā, me apām pê Xatanaj ata ihkrī, ne me ato ihhimpej. Na ca ihkôat me amji kampa, ne atÿj me ampo kên ton to me apa — hane.

³⁹ Mā me Jeju mā:

— He me ipām pê Aprāw xwÿ — hane. Mā Jeju me cumā:

— Quê ha me apê Aprāw xwÿ kra na mā, ca ha cute amji kam hapac xà to amji kam me gapac to me apa. Ne imāa, nee me apê ihkra nare. Ampo na? Ca nee me cute amji kam hapac xà to me amji kam gapac nare.

⁴⁰ Na wa ite ampeaj kam me amā Inxū te imā ampo to hahkre na harên. Atajê jarên cwÿrjapê mā, ca ame icuran prām. He pê Aprāw xwÿ nee jū caxuw jūm pejti curan prām nare. ⁴¹ Ne ajteare mā, Inxū Cati kaj na me apām te me amā ampo ton to hahkre xà atajêa mā, ca me ton to me apa he — hane. Mā Juta catêjê Jeju mā:

— Ne nee me ipê jūm mā ajteare mā hūm ata nare. He Pahpām ita pê ri me ipām, wa me to amji mā me ijō Pahpām, ne me ipê mehkra impeaj wa me — hane.

⁴² Mā Jeju me cumā:

— Hamreare, me apê Pahpām pê Inxū Cati kra nare. Quê ha me apê Pahpām kra na mā, quê ha ihtÿj me amā ikīn. Ampo na? He ihpīan wa icator. Ne nee wa amjia kôt apu ipa nare, ne cute amji kam hapac xà to wa apu ipa. Ne cutea ri ajpên ikujahêc. ⁴³ Ne ampo na mā ca nee me icakôc xà itajê impar jahkre pej nare? Nee mā ampo na nare. Ca nee caxwām catia mā ito amji kam me gapac prām nare. Cwÿrjapê ca ha nee me icakôc xà itajê impar jahkre pej nare. ⁴⁴ Ne me apê Pahpām curê xwÿn pê Xatanaj ata kra, na ca cumā ampo kīnti itajê to pit mā me gâpên to me apa. Ne cute amji kam hapac xà ato, ca me amji kam gapac to me apa he. Ne pjê te amji ton pê mā, pê ramā me apām ita mehcuran kam tē. Ne nee cupê catÿt kam, ampeaj kam ampo to ihcakôc catê nare, ne amji cām̄ta rūm ri cupê ampo cunea to ihhê xi to ihcakôc to ipa catê. Ne cupê ampo cunea hê xi pām, na ri ampo hê xi xà to pit mā ihcakôc to ipa. Ne rÿ jū caxuw ampeaj kam ampo to ihcakôc nare. Ne ramā cute me acaxuw incaca xà ita ton to amji pyrâc tu. ⁴⁵ Ne wa quêt catÿt kam, ampeaj kam ampo hê xi xà nare to ijūjarên to ipa, ca ampo ita na ajte ma ame ipar caca. Ampo na? Ca nee caxwām catia mā ito amji mā me ahimpej, ne me ipar nare to prām to mā ca ame hane. ⁴⁶ Ne gapacta ne ite ampo to kên japê ame amji cukij, ca ha nee me anō amji mā ite ampo to kên xà nõ na ijarên nare. Ampo na? He wa rÿ jū caxuw ite ampo kên ton nare. Na wa hān ne catÿt kam ampo atajê jarê, ca ma ajte ame ipar caca. Ne mēr ampo na mā ca ajte nee amji mā ito me ahimpej nare? ⁴⁷ Ne me cupê Pahpām kra catêjê ihtÿj amji mā me harkwa cunea na me kampa, ne mempar to kênre nare. Ne me ca nare, nee me apê ihkra nare, na ca ma amempar caca — hane.

Pê Jeju Aprāw xwÿ pupu

⁴⁸ Mā me Jeju mā:

— Nee mā apê Juta catêjê kra impeaj nare, ne me ikīnte apê Krīrītpej jō pjê catêjê nõ, ne ihpīan pê ca acato, ne akam ampo carō kên te hipu tu — hane.

⁴⁹ Mā Jeju me cumā:

— Hamreare, ikam quêt ampo carō kên hamreare, na wa quêt amji mā, por Inxū te ajpên ikujahêc ata pit cupahti to ipa, ne ma haprÿ to cati to ipa. Ne me ca nare, ca ajte nee amji mā me icupa nare, ne cama me

ito icrire to prām. ⁵⁰ He wa nee cute amji mā me icupa to prām to icator nare cacrō, quē ha ihtÿj Inxū Cati ata, por nee amji mā me icupa nare itajē cukij, ne mehkēn mā me cumē. ⁵¹ Ne ampeaj kam wa ha me amā aw-jarē. Por quē ha me ijarkwa kampa, ne amji mā me icupahti to me ipa atajē, quē ha jū caxuw amehtyc nare, ne mehtīr ita na ame ipa rohnÿtti mā, Pahpām cahē na — hane.

⁵² Mā me cumā:

— Hamre, ita caxuw wa ite me akam ampo carō kēn na me gahkre pej pejtu. Ne pē ramā Aprāw xwÿ me, por me cupē Pahpām jarkwa to mehcaōc catējē catia atajē mehtyc partu. Nō na mā ca ajte amji jarēn to: “Quē ha jūm amji mā ikampa, ne cute ijarkwa kōt ipa na, quē ha nee jū caxuw ihtyc nare” hane? ⁵³ Pom me ipāmjē pē Aprāw me, cute Pahpām jarkwa to mehcaōc catējē atajē ihtÿj ramā amehtyc par ita? He xà ajkī me hirōa pē acati? Jū mā mā ca apu amji to, amji kam gapac xà itajē to? Mōrmō ca atÿj apu amji catia na amji cāmjī? — hajÿr.

⁵⁴ Mā Jeju me cumā:

— He wa ha ipyxit peaj ne amji mā ipejti to icakōc to ipa na mā, quē ha icakōc xà atajē kōt hamreare ne. Ne pom ca Inxū to amji mā me Apām ata ri ihtÿj ijapÿ to cati to mō. ⁵⁵ Ne ikīnte me apē Pahpām jahkre kēatre, ne imāa ri quēt hahkre pej. Wa ha ipē hahkre kēatre na amji jarē na mā, wa ha ipē me apyrāac ne ampeaj kam ihēj xi. Ne nee ite hajÿr nare, ne itÿj quēt imā hahkre pej, na wa amji mā harkwa na kampa, ne amji mā hūpahti to ipa. ⁵⁶ Ne me aquēt xwÿ pē Aprāw ata pē ramā icator xà ata na ipupu ne ijahkre pej, cwÿrjapē pē ampeaj kam hūrēn hakry — hane.

⁵⁷ Mā me Jeju mā:

— Pÿhàpà? Xà pē ca atÿj ajte Aprāw xwÿ pupu? Pom nee cormā ana caku te xīncwēnta nare ita? Ne cormā atuwre, nō na mā ca ajte ate Aprāw xwÿ pupun na amji jarē? — hane.

⁵⁸ Mā Jeju me cumā:

— He wa ha ampeaj kam me amā amji jarē. Pē wa ramā Aprāw pÿm xwÿjrea na apu ipa, ne cormā apu ipa rohnÿtti mā — hane. ⁵⁹ Mā Juta catējē te mempar, ne caxuw kēn to me amji tÿj, cute me to kam hūcapēr, ne to mehcuran prāmte. Ampo na? Cupē Pahpām pyrāac ne rÿ pēa mā mam ipa rohnÿtti mā na cute amji jarēn, na ri kēn to amehcuran prām. Mā me cupē Jeju pimxur ne ma Pahpām jūrkwā pē cator ne tē.

Pē Jeju jūm to tūm ita caprā

⁹ Ne Jeju cormā mōr kwÿa kam, cute jūm to tūam na ihpÿm ata pupun. ² Wa me ipē ihkōt me ipa catējē te ahna mehcukij, ne me cumā:

— Me ijō Pahhi, ampo na mā pē hūmre ita into tūm ita na ihpÿm? Xà pē ajkī ihkēn xà nō to jahpan xà na mā cute hajÿr? Nare, xà ajkī hūm me inxi te ihkēn xà nō ton jahpan xà na mā into tūam na ihpÿm? — hajÿr.

³ Mā Jeju te me ipar ne me imā:

— Nee mā ihkēn nō cwÿrjapē into tūm nare, ne nee mā hūm me inxi kēn nō cwÿrjapē cute hajÿr nare. Am-

po na ri into tūm? He Pahpām te hūmre ita kōt carōt tÿjti to ipipē to prām to ri, cute to into tūm. ⁴ Pom hān ne ihtÿj amcro kam me hāpēn xà to me hāpēn to me ipa, ne caxwari nee me hāpēn nare. Ita jīkjē na mā ite hajÿr. Na wa ha cormā ita ri pjē kam apu imōr reria mā itÿj, por cute ajpēn ikujahēc ata mā, apu ijāpēn to ipa. Ne wa ha ma jū caxuw hacpÿ mā tē, ne nee hipēr ita ri cumā ijāpēn nare. ⁵ Ne pom pyt me parīt xà caxuw me pamā pjē cujro, cu me rīt, ne me ampo pupu ne me hahkre pej, ita jīkjē na mā ipē me cumā Inxū te amji kam hapac xà cunea to hahkre catē, mār quē mehcuea me hahkre pej — hajÿr. ⁶ Hō, cute ita jarēn to hajÿr jirō pē mā ri cute pjē kam harcō mēn, ne to pjē to incrire ne to ihtō, ne to carēc ne cumā into na to ihtēm, ne cumā harkwa to:

⁷ — Tē ne Kujahēc jō cō kam akuc cuhhō — hajÿr. Mā into tūm ata te mōr ne ihkuc cuhhōn, ne hacpÿ ne amji jaxār, ne ramā ampo cunea pupun to mō. ⁸ Mā cahi na mehkīr catējē me, hàhwÿr na cute me hōmpun pejtu atajē te me hōmpun, ne ahna me ajpēn cukij to:

— Xà into tūm ihkrī ne me pahna ahwÿ ata mā? — hajÿr.

⁹ Mā mehkwy me cumā:

— He taa mā ri! — hane. Mā mehkwy me cumā:

— Quē nare! Taa mā nare! — hane. Mā mehkwy me cumā:

— He mā ajte cupē hūrācti — hane. Mā me cumā amji jarēn to:

— He pa wa! — hane.

¹⁰ Mā cute mehcukij ne me cumā:

— Ne mēr jū mā mā ate ne atÿj rīt? — hajÿr.

¹¹ Mā me cumā:

— He jūm japÿr te Jeju ata te ri harcō to pjē incrire ne carēc na ton, ne ito na imā to ihtēm ne imā: “Tē ne Kujahēc jō cō kam ca akuc cuhhō” hane. Wa ma mō ne ite ikuc cuhhōn, ne amji jaxār, ne ramā ampo cunea pupun to imōr pyrentu — hane.

¹² Mā ahna mehcukij ne me cumā:

— Jō ri mōrmō jūm xūmre ita apu mō? — hane. Mā me cumā:

— Pÿpÿn — hane.

Pē Parixēw catējē me ahcukij

¹³ Mā ma me cupē Parixēw catējē wÿr, por pē mam into tūm ata to me mō. ¹⁴ Ne por pē amcro nō na Jeju carēc to ihtō, ne hūmre into tūm ata na to tē, ne hacpÿa mā cumā irīt to impej jō amcro ata kam pē mehkōt xà jō amcro. ¹⁵ Mā Parixēw catējē kwÿ te ahna mehcukij ne me cumā:

— Jū mā mā cute aton ne acaprār? — hajÿr. Mā me cumā:

— Pjē kam cute harcō mēn ne to carēc to ihtō, ne ito na imā to ihtēm, wa ma tē ne ite ihcuhhōn ne irīt pej pyrentu — hajÿr.

¹⁶ Mā Parixēw catējē kwÿ ajpēn mā me harēn to:

— Por jūm te ita ton ata pē nee Pahpām tekjē nare. Xà ajkī Pahpām jarkwa kōt mā cute hāpēn xà ita to hajÿr? Ne mēr ampo na mā nee me pahkōt xà jō amcro

ita pupun, ne amji mā hūpa nare, ne ihtÿj apu ahna apê? — hane. Mā mehkwyā nō te me cumā harēn to:

— Xà quē ajkī jūm kēanre ata ihtÿj carōat to ampo pi-hho catia pejti atajê nō ton to hane? — hajÿr. Ne ajpēn mā me harēn ita cwÿrjapê cute amji to me ipicapōn.

17 Mā hipêr Parixêw catêjê atajê te ahna mehcukij ne me cumā:

— Ca ate cute amā ato tūm caprār na amji jarēn, ne-jū mā mōrmō ca to amji kam gapac to? — hajÿr. Mā me cumā:

— Imā cupê Pahpām jarkwa to ihcakōc catêjê nōa ri — hane.

18 Mā Juta catêjê jō pahhi kwÿ te nee amji mā, jūm te into tūm caprār, mā hacpÿa mā irīt na, amji mā me to hajÿr nare. Cwÿrjapê ri cute hūm me inxi na me hāh-wÿr, cute ahna mehcukij prāmte. 19 Mā hÿrmā me cator, mā cute ahna mehcukij to:

— Xà me akra mā ita? Pê ca into tūm ita na ihpÿm na me imā harē, nō na mā ajte ihtÿj rīt? — hajÿr.

20 Mā hūm me inxi atajê me cumā:

— Wa cupê me ikra na ite me hahkre pej, ne pê into tūam na ihpÿm. 21 Ne pom jūm te caprār, mā hacpÿa mā irīt ita na ri, me ipê hahkre kēatre. Ne ramā ihkàhtu. Mehcukij, quē ha taa me amā amji jarē — hane.

22 Ampo na pê hūm me inxi me cumā harēn to hane? Nee mā ampo na nare. Quē ha jūm te Jeju pê, por pê Crixto to Pahpām awjahkre ata jarēn pejti to harēn na, quē ha ma cute me cuprōn xà pê me jūm cator, quē ha jū caxuw hacpÿ ne amji jaxār nare na, cute me hahkre pej. Na ri nee me kam mare mā me cumā Jeju pê me pahkritxwÿ jarēn xà impejti nō jarēn nare. 23 Cwÿrjapê pê me hūpate hūm me inxi me cumā harēn to:

— Ramā ihkàhtu, mehcukij, quē ha taa me amā amji jarē — hane.

24 Ne hipêr cute me hūmre into tūm ne hacpÿa mā irīt ata na hāhwÿr, ne me cumā:

— Me imā ahêj jicu ne Pahpām kam mare mā ampeaj kam me imā gūjarēn na amji to. Ampo na? He wa ite me Jeju kēanre na me hahkre pej — hajÿr.

25 Mā into tūm ne hacpÿa mā irīt ata me cumā:

— Pÿpÿn, ipê Jeju kēanre ita na hahkre kēatre, ne ampo pijakrut ita na ri imā amji jahkre pej he, mam ito tūm, newa itÿj ita caxuw rīt — hane.

26 Mā hacpÿ ma mā cute mehcukij to:

— Jū mā ri cute aton ne amā ato tūm ita to impej? — hajÿr.

27 Mā hipêr me cumā:

— Wa ite ramā me amā amji jarēn, ca ma ame ipar caca. Ne mēer ampo caxuw mā ca hipêr ahna me icukij? Xà ca ha ajkī hanea ne amji to ihkōt me apa catêjê na me amā amji to prām? — hane.

28 Mā cute me hūn kam ihtēm, ne me cumā:

— He apêa ri ihkōt apa catê, ne me ipê ri Mojxe wÿ te amji kam hapac xà kōt me ipa catêjê. 29 Ne wa ite me Pahpām te Mojxe wÿ mā ihcakōc, ne cumā ampo to hahkre na me hahkre pej. Ne jūm xūmre ita, wa nee ite jū rūm cator na me hahkre pej nare — hajÿr.

30 Mā me cumā:

— Pÿhàpà! Xāmte me apê jū rūm cator xà ita na hahkre kēatre? Cakrō mā ihtÿj cute icaprār, wa hacpÿa mā itÿj rīt. 31 He me pahcunea mā Pahpām te mehkēn catêjê impar nare na me pamā hahkre pej. Ne por amji mā me Pahpām cupa, ne me cumā, cute ampo na ih-prāmte xà ton to me ipa atajê ri, ihtÿj quēt me kampa. 32 Ne cu rÿ jū caxuw pjê te amji ton pê mā, me pahnō te jūm te jūm to tūam na ihpÿm ata caprār na me harēn par nare. Mā ihtÿj Jeju te icaprār, ne imā ito to impej. 33 Xà quē ajkī Pahpām ihkujahêc nare, quē ihtÿj ajkī ampo itajê nō to? Hāpà, ne imāa ampeaj kam ri Pahpām te ihkujahêc — hane.

34 Mā cute mempar, ne me cumā harkwa to:

— Pê ca apÿm pê akēn ton kam tē, nō na mā ca ajte cormā me ipê pahhi catêjê mā ampo to hahkre prām? Me ipê ahna ihkaj na! — hajÿr. Ne ma cute pō mā cute me cuprōn xà jūrkwā pê me into tūm ata to cator. Cwÿrjapê quē ha nee jū caxuw hipêr cute me cuprōn xà ata mā hār nare.

Me cupê Pahpām te amji kam hapac xà jahkre kēatre atajê

35 Mā Jeju te, cute me cuprōn xà jūrkwā pê pō mā me hūmre ata cator na harēn par. Na ri apu hapê ne ahna cator ne cute ihcukij to:

— Xà ca ha ajkī atÿj Pahpām kra to amji mā ahimpej? — hajÿr.

36 Mā cute Jeju mā harkwa to:

— Ijō Pahhi, jūm pê mā Pahpām kra ita? Wa itÿj amji mā to ihimpej — hajÿr.

37 Mā Jeju te cumā amji jarēn to:

— Pom ca ipupu ita! He pa wa amā icakōc — hajÿr.

38 Mā hūmre ata te Jeju kīnte amji crire na Jeju mā amji jarēn prām to, cuna mā ihkōn krā na hÿr, ne cumā:

— Wa ha itÿj ato amji mā ihimpej — hajÿr.

39 Mā Jeju te cumā hūjarēn to:

— He wa nee mento tūm caprār to pit mā pjê ita wÿr icator nare. Ne ite mempej te amji kam me hapac xà me, mehkēn te amji kam me hapac xà pupun prāmte wa icator. Ne wa itÿj mento tūm caprā, mār quē hacpÿa mā me irīt pej, ne ihtÿj me ampo cunea pupun to me ipa. Ita jīkjê na mā wa itÿj me cumā Pahpām te amji kam hapac xà to hahkre to ipa, mār quē me hahkre pej, ne ihtÿj ihkōt me ipa. Mā mehkwy ihtÿj, cute ramā me Pahpām jarkwa cunea jahkre pej na ame amji cāmjī, atajê pê ihhêj rūm mento tūm pyrāac. Ampo na? He nee cormā me cumā Pahpām jarkwa jahkre pej nare, na wa ite me cuna mā icakōc to prām to, wa mehwyr icator — hajÿr.

40 Mā curi me cahê na Parixêw catêjê kwÿ ihcuhhê atajê te me Jeju cukij to:

— Pÿhàpà! Xà mōrmō ajkī hanea ne me ipê mento tūam pyrāac, ne me ipê Pahpām jarkwa jahkre kēatre? Hāpà! He wa itÿj ite me Pahpām jarkwa jahkre pej — hajÿr.

41 Mā Jeju me cumā:

— Quê ha jūm to tūm amji jarēn to: “Me anō itehcajpa, jū wūr wa ito tūm ita kam ahte mō” hane, ne me kam mare mā kre kam ihpēm na, quê ha nee taa amji curê caxār nare. Ne me apê Parixêw catêjê te nee me hajūr nare. Me apê jūm to tūm te amji jahkre kêatre ata pyrâac. Ne ihtyj irīt na amji jarē, ne ma jūm te itehcajpar na apu ihcaca, ne amjia kôt kre kam ihpēm ata pyrâac. Ne ca me amji jarēn to: “Ramā me imā Pahpām jahkre pej” hajūr cakrô, cormā me apê Pahpām jahkre kêatre. Cwūrjapê ca rÿ ate me amji curê caxār ne me akên mā me axār — hane.

Jeju pê me pajamār catê

10 Mā Jeju te hipêr mehcunea mā harēn to: — Wa ha me amā ijūjarēn xà nō ita jarē. Ca ha ihkôat me ijahkre pej. He Pahpām himpej xà ata pê ihhêj rūm kwÿc kam, cute me carà cahàcre hôhti jamār xà ata pyrâac. Ne hÿrmā harkwa pyxit peaj. Ne por quê ha jūm nee carà cahàcre jō kwÿc jarkwa na hār nare, ne ihtyj intoj ne hār ata pê ri me hàhkij xi, ne cupê me hàprêa kam me cupê ampo cwÿr catê. ² Ne por quê ha harkwa na axà ata pê ri carà cahàcre hôhti jamār catê. ³ Quê ha harkwa jihê rēn catê caxwām pê jÿ ata ihtyj cumā harkwa jihê mē, quê ha axà ne hō carà cahàc mā haprÿa na akij, quê ha ihtyj hōkre kampa. ⁴ Ne hÿrmā pra, quê ha ma kwÿc pê to cato, pō mā, ne ma mam cumā mō, quê ha ihtyj ihkôt ipa. Ampo na? Ihtyj hōkre kampa na ri. ⁵ Ne jū wūr quê ajteare mā jūm kôt pra. Quê ha ma cama jū kam cupê pra. Ampo na? Jū wūr quê cute jūm cahkrit jōkre par nare ne hahkre pej nare kam ihkôt pra — hajūr.

Jeju pê Pahpām wūr me pancjêj xà jō pry

⁶ Hō, Jeju te me cumā hūjarēn xà ita to hajūr. Mā nee cute mempar ne me hahkre pej nare cormā, por cute me cumā ampo jarēn xà ata na.

⁷ Cwūrjapê ri hipêr Jeju te me cumā hūjarēn xà ita kôt harēn to impej ne me cumā:

— Wa ampeaj kam me amā amji jarē. He ipê, por harkwa na carà cahàcre incjêj xà ata pyrâac. Cwūrjapê wa ha nee me hÿrmā me curê xwÿn cjêj na me hamār, quê ha me hÿrmā mencjêj nare.

Jeju pê me pajō Pahhiti impeaj

⁸ — Ne por quê ha icumam ramā me pra atajê pê ri me hàhkij xi, ne me cupê me hàprêa kam me cupê ampo cwÿr catê, mā me ikwÿ pê carà cahàcre pyrâc atajê te nee me hōkre par nare. ⁹ Ýhÿ, ipê Pahpām te me hamār xà ata wūr harkwa. Ne quê ha jūm ina Pahpām wūr axà ata, quê ha ampo kên cunea pê amji pytà. Quê ha cupê hō parxa pyrâc ne ihtyj acjêj ne hapôj, ne apu hàpàn to ipa. ¹⁰ Ne ikĩnte me hàhkij xi atajê quê ha cama me hàhkij me, cute me carà cahàcre hôhti curan ne me to hamre to prām to, quê ha hÿrmā me pra. Ita jĩkjê na mā me ikwÿ curê xwÿn me hÿrmā pra, cute me to kên prāmte. Ne pa, wa quêt ajpên mehwÿr icator,

cute catyt kam amji to me ipijapar xà impejti cunea to me amji to ipijapar prām to.

Jeju pê me pajamār catê impejti ata

¹¹ — Ipê me ikwÿ pê carà cahàcre hôhti jamār catê impeaj ata pyrâc. Ne ipê cumā cute amji kam hapac xà jōr catê, na wa itÿj me hūtār prāmte ityc to prām.

¹² Ne por ihpore na pit mā me hàpên catêjê atajê ikĩnte nee me carà cahàcre jamār to impejti nare. Ampo na? Carà cahàcti hôhti atajê pê nee me hō tekjê nare. Cwūrjapê quê ha rop cahàc jàprêhti nō ihwÿr cato ne apu cucrà, quê ha cute me hamār to kêanre atajê hūpate nee me to amji japackre nare, ne me cumā hikra, ne ma ame pra. Quê ha pea rop cahàcti jàprêhti ata carà cahàcre hôhti atajê kam tē, ne ihtyj apu cucrà ne ihcura. ¹³ Ampo na? Ihpore na pit mā me apê, na ri nee me cumā carà cahàcre hôhti jamār to impej prām nare.

Jeju me mehwÿr mā ajpên jahkre pej

¹⁴⁻¹⁵ — Ne ipê carà cahàcre hôhti jamār catê impejti ata pyrâac na Inxū mā ijahkre pej, ne hanea ne imā Inxū jahkre pej. Ita jĩkjê na mā ite hajūr, ne imā me ikwÿ pê carà cahàcre jahkre pej, ne hanea ne me cumā ijahkre pej. Na wa itÿj me hamār to impejti to prām to ityc to prām. ¹⁶ Ne mehwÿr pê itekjê atajê, nee ite me hamār xà ita mā cormā mencjêj nare. Na wa itÿj hanea ne ajpên amji wūr me to ijàhtêp prām. Na wa ha me cumā akij, quê ha me ijōkre kampa, ne mehwÿr me ina me cuprô, ne ajkam me pyxit peaj. Na wa ha ipê me hamār catê pyxit peaj ata.

¹⁷⁻¹⁸ — Ne pê Inxū ramā imā harkwa to: “Ca ha ate jūm te acuran na hamār nare na, quê ha nee acuran nare. Nāmri ca ha ate cute acuran na amji na hamār na, quê ha ihtÿj acura, ca ha atÿj hacpÿa mā atír. Xà caxuw wa ite amā icarôt cunea jōr, ne ate hajūr xà na ri imā ato prām” hane. Wa ite Inxū jarkwa kôt hajūr, cwūrjapê ri cumā ikĩn — hajūr.

Jeju to cute me amji kam hapac xà pijakrut

¹⁹ Mā Juta catêjê te me ita par, ne hipêr amji to me ipicapôn. ²⁰ Ne me hàhtôa ne ajpên mā me harēn to: — Apu into kam waj! Ne kam ampo carō kên! Ampo kôt mā ca, cute me amā ampo jarēn xà itajê na ame kampa? — hane.

²¹ Mā mehwÿr ajpên mā me harēn to:

— Jū wūr quê jūm kam ampo carō kên quê ihcakôc xà to hane! Xà quê ajkĩ jūm kam ampo carō kên quê ihtÿj jūm to tūm caprār to hane? — hane.

Pê Juta catêjê kwÿ ma ame Jeju caca

²² Ne pê hacpÿa mā Pahpām jūrkwā to impej xà jō amji kĩn na, Jeju Krĩpinkrēn kam apu mō, ta jō putwÿa kam. ²³ Pê Jeju Pahpām to amji kam me hapac xà jūrkwā jarkwa mā mencjêj xà cwÿrpê hàmkrà xà japrÿ te Xarômāw Jō Amkrā ata krac ri apu mō. ²⁴ Mā Juta

catêjê kwÿ te Jeju na me cuprôn, ne ahna me ipixêr, ne cute mehcukij to:

— Ne rÿ pêa mã wa tee ate me imã amji jarên, wa ite me apar pej japê tee me akampa. Ne jÿ caxuw ca ha me imã amji jarên to impej, wa me akampa ne me gahkre pej to impej? Ne me imã amji jarê, xà ampeaj kam ri ajkî apê Crixto pê, por pê Pahpãm me imã ato awjahkre ata mã ca? — hajÿr.

²⁵ Mã Jeju te me cumã amji jarên to:

— Wa ite ramã me amã amji jarên, ca nee ate ijÿ-jarên xà ata kôt amji mã ito me ahimpej nare. Ne pom wa Inxÿ carôt kôt ijapên xà pihho pejti ton to ipa itajê, hanea ne ihtÿj ito awjarê. ²⁶ Ca nee ajte ikam me gapac nare. Ampo na? Me apê me ikwÿ nare, na ca nee me ikam gapac nare. ²⁷ Ne quêt me ikwÿ atajê pê carà cahàcre hôhti atajê pyràac, ne ipê me hamãr catê impejti ata pyràac. Na wa ite ramã me ikwÿ pê me ijô parxa kwÿ pupun pejtu, mã ihtÿj me ijôkre kampa, ne ma ikôt me ipa. ²⁸ Cwÿrjapê wa ha nee ampo te me to hamre na me hamãr nare, quê ha Pahpãm cahê na amji to me ipijapar rohnÿtti mã, ne nee jÿ caxuw Inxÿ pê me ipictor nare. Ne jÿ wÿr quê jÿ caxuw ijÿhkra pê jÿm mehnô capa. ²⁹⁻³⁰ Ampo na? Por Inxÿ te imã me hÿr ata ri quêt mehcunea carôt jirôa pê carôt tÿj, cwÿr-japê quê nee jÿm hÿhkra kam cupê jÿm caxàr nare. Ne taa mã pê imã icarôt ita gô, na wa me ipipêan. Ne quê ha nee jÿ caxuw jÿm ijÿhkra kam ipê jÿm caxàr nare — hajÿr.

³¹ Mã hacpÿ ma mã Juta catêjê kwÿ te kên to me amji tÿj, cute me to capêr, ne me to ihcuran prãmta. ³² Mã Jeju te me cumã harkwa to:

— Wa ite me akam mare mã icarôat to ampo pejti pihho jàhtôa ne ton, por Inxÿ te ton xà na imã harkwa atajêa na. Ne mÿr ampo pejti itajê nõ incwÿrjapê mã, ca kên to ame ikam gÿcapêr prãm? — hajÿr.

³³ Mã Juta catêjê te me cumã:

— Wa nee ampo pejti itajê nõ incwÿrjapê apu kên to me acapêr prãm nare, ne pom ca apu apê Pahpãm na amji to acakôc, ita to ca ramã apu Pahpãm mãn kêanre. Ne ihkÿnte apê me hÿmrea to me hÿmre, nõ na mã ca ajte apu amji to Pahpãm to apa — hajÿr.

³⁴⁻³⁵ Mã Jeju te me cumã harkwa to:

— Pê Pahpãm me panquêtjê mã cute amji kam hapac xà me harkwa gô, pê me amã ihkàhhôc kam ihhôc. Cu me pahcunea te ihkàhhôc ita kam ihhôc itajê nõ te ihhêj xi xà nõ jarên nare na me pamã hahkre pej. Ne catÿt kam ampeaj kam hÿjarên rohnÿtti mã. Ne pê Pahpãm me panquêtjê te me kam hapac xà caxuw me cumã ihkàhhôc ita gô, ne me cumã:

“Me apê me ikraa to me ikra, cwÿrjapê ri me ate amji kam gapac xà me, ite amji kam ijapac xà pipêan” hane.

³⁶ — Ne pa nare, pê Pahpãm icapi ne ajpên ikujate, ite ate me harkwa ita par na me atehcajpar xà caxuw. Cwÿrjapê ri me panquêtjê jirôa pê icati. Na wa itÿj ipê Pahpãm kra impeaj na amji to icakôc. Ne mÿr ampo na mã ca ame ikam acryc? ³⁷ Nãmri wa ha ite Inxÿ jàpên

xà ton nare na, ca ha nee me ikam gapac nare.

³⁸ Nãmri wa ha ite hàpên xà ton na, ca ha atÿj ite Inxÿ Cati carôt kôt jàpên xà pihho ton ata kôt me ikampa. Ca ha ate ite me amã ijÿjarên xà to ijÿjarên ita na me ikam gapac nare cakrô, ca ha atÿj, pom wa hàpên xà to apê itajê kôt me ikampa. Ne ihkôat ca ha Inxÿ me ipipêan, ne me ipÿxit peaj na me ijahkre pej — hajÿr.

³⁹ Mã hacpÿ ma mã amehpro prãm cakrô, mã ma me hÿhkra pê cator.

Pê Côpijapjêr jô cô jÿkjêa kam Jeju apu mô

⁴⁰ Ne ma Jeju te amji jaxàr, Côpijapjêr jô cô jÿkjê wÿr, mãr pê curi Jowãw wÿy ajco cô kam mehcumrã ata ri. Ne curia apu ipa. ⁴¹ Mã me hàhtôa ne hÿrmã me ipa, ne ajpên mã me harên to:

— Pê Jowãw wÿy pê me cumrãr catê ata, nee Pahpãm carôt kôt hàpên xà pihho pejti te hajÿrjê nõ ton nare cakrô, pê ihcunea na ihtÿj Jeju jarên xà to harê atajê, ampeaj kam pê — hane.

⁴² Mã curi me hàhtôa ne cute me Jeju kam hapac, ne amji mã me to ihhimpej to me ipa.

Raxaro tÿc xà

11 Pê hÿmre nõ ita japrÿ te Raxaro ita xà. Ne pê mehcjêjê pê Marij me Marta mea mã krÿ jacot japrÿ te Mehkênpupunxà jô krÿ ata kam mehkri. ² Ne Marij ata pê amcro ata na Jeju par kam ampo cacô cuxwati ata jaxwÿ, ne ihkÿa to cumã incrà. ³ Mã Raxaro kjêjê cahãj itajê te Jeju mã hÿjarên to hajÿr xà ata kujahêc he:

— Me ijô Pahhi, por amã gô ikwÿ nõ kÿnti ata xà! — hajÿr.

⁴ Mã Jeju jÿpar ne cute harkwa to:

— Quê ha nee hÿcu xà kam hà ita ihcuran nare. Ne hà ata kôt quê ha me hàhtôa ne quêt ipê Pahpãm kra carôt tÿjti na me ijahkre pej. Ne hà ata kôt quê ha me hàhtôa ne quêt me Pahpãm carôt tÿjti ata pupu ne amji mã me hÿpa — hajÿr.

⁵ Ne pê ihtÿj Jeju mã Marta me ihtôj Marij ata kÿn, ne hanea ne cumã Raxaro kÿn. ⁶ Mã Jeju te Raxaro xà na harên par cakrô, curia hàhhuc xà ata kam apu mô, ne apu ihkên, ne ahna amcro pijakrut. ⁷ Jirô pê mã ri cute me ipê ihkôt me ipa catêjê mã harkwa to:

— Hacme, hacpÿ mã Juta jô pjê wÿr — hajÿr.

⁸ Wa me cumã:

— Me ijô Pahhi, mãr curmã curi Krÿpinkrên catêjê kên to ame acapêr prãm ta? Ca ajte ramã hacpÿa mã amji jaxàr prãm? — hane.

⁹⁻¹⁰ Mã Jeju me imã:

— Nee ita na cute imã jÿ mãn nare, ne jÿ wÿr quê jÿ na me ito. Pom ca me pyt pupu, mã hapôj ne ma acjêj mã caxwa ata jÿkjê na ri ite hajÿr. Ne wa cormã ite ijapên xà jipêj nare kam, quê nee jÿ na me iton nare. Ne hanea ne cu caxwari me papa, ne pahtÿj me papihur to ame papa. Ne pom pyt me pamã ahcujro, cu kam ame papa, ne me pamã papa xà jahkre pej, ne nee ame papihur, ne me pahkên mã me pancjêj nare.

Ita jĭkjê na mã Inxũ te ito hajÿar. Mã Pahpãm te ikrã kam imã ite amji jahkre pej jõr, cwÿrjapê ri imã ampo te amji kam hapac xà cunea jahkre pej, na wa nee ikên mã icjêj nare.

¹¹ — Me pajõ ikwÿ nõ Raxaro ramã nõ ne apu gõr cakrõ, wa ha itÿj ihcujrõ ne hÿr — hane.

¹² Na wa me cumã:

— Pahhi, quê ha cute nõ ne hõt na, quêt taa nõ ne gõr, ne amji cajpê. Ampo na? He cormã me hÿrmã me pahcator xà ita ampÿa mã — hane.

¹³ Ne pê tee Jeju ame imã ramã Raxaro tyc na harên to hahkre, na wa itÿj amji mã me to hõtxwa mã hõt na amji mã ame to hane! ¹⁴⁻¹⁵ Mã Jeju hirãa pê me imã:

— Ramã Raxaro tyc, ne me acwÿrjapêa ri, ampeaj kam hÿrên ijakry. Quêt taa ty, wa nee curi apu imõr nare na ri ihtyc. Ne ihkõat ca ha atÿj ito amji mã me ahimpej. Hacme, ne me hõmpu — hane.

¹⁶ Mã Tome ita me imã:

— Hacme, me pajõ Pahhi kõt, quê cuxà me pajipej — hajÿr.

Jeju pê me pahto ihtÿr catê

¹⁷ Mã ramã cute kên kre kam me Raxaro jarêt na amcro te cwat, wa Jeju me, me icator. ¹⁸ Mã Mehkên-pupunxà jõ krĭ ata ri rec pyxit jĭkjê kam xa, Krĭpinkrên wÿr. ¹⁹ Cwÿrjapê pê Juta catêjê hàhtõa ne me cato, cute me Marta me Marij pupun, ne me cupê hÿjapê cutor prãmtte. ²⁰ Mã Marta te Jeju te ajpên hàhtêp to mõr na harên par, ne ma hÿrmã tê ne cute pry kõt ihcaypar. Pê Marij curia ikre kam jÿ. ²¹ Mã Marta Jeju mã:

— Ijõ Pahhi, ca ha ita ri apu mõi na mã, quê ha nee ikjê ipê ihtyc nare, ne ramã ihtyc, ca hakàn pê acator. ²² Cakrõ ca ha ahnaa Pahpãm na ahwÿ, quê ha amã ate ampo cunea na gãhwÿr xà atajê gõ — hane.

²³ Mã Jeju cumã:

— Quê ha akjê ihtÿj hacpÿa mã me amã ihtÿr — hane.

²⁴ Mã Marta cumã:

— Quê ha ampo cunea jamre xà ata jõ amcro kam ihtÿj hacpÿa mã ihtÿr na, imã hahkre pej — hane.

²⁵ Mã Jeju cumã:

— He ampeaj kam ri, ipê hacpÿa mã mehtyc to ihtÿr catê. Na quê ha jÿm te ihkên ton to ipa na, quê ha ramã Pahpãm mãa jÿm ata tyc pyrãc. Cakrõ quê ha ito amji mã ihhimpej na, wa ha cumã cute amji kam hapac xà tuw pejtĭ gõ, quê ha Pahpãm mã jÿm ita ihtÿr rohnÿtti mã. ²⁶ Ne por jÿm ito amji mã ihhimpej to ipa ata, quê ha nee jÿm ata ihtyc ne ihtyc tu nare. Ne ca? Xà ca ha ajkĭ pijamã ijÿjarên xà ita to amji mã ahimpej? — hane.

²⁷ Mã cumã:

— Ýhÿ ijõ Pahhi, wa itÿj apê Pahpãm kraa to ihkra na amji mã ato hane, ne imãa apê Crixto pê, por pê Pahpãm pjê ita kam ate me ito ahimpej xà na ato awjahkre ata mã ca — hane.

Pê Marij pê Raxaro tõi Jeju cajpa

²⁸ Jirõ pê mã ri Marta te amji jaxàr ne ihtõj mã hàkjêr ne kyre pê cumã hÿjarên to:

— Pajõ Pahhi cator ne cute ana hàhwÿr — hajÿr.

²⁹ Mã Marij te harên par, ne hãm pyrentu, ne ma Jeju wÿr tê. ³⁰ Pê nee cormã krĭ mã hàr nare, ne cormã Marta ihcaypar xà ata kam, curia pry kam apu mõi.

³¹ Ne pê ramã hõtpê Juta catêjê kwÿ ikre kam ame ipa, cute me Marij jÿjapê têtete me cumãn prãmtte. Ne cute me Marij xãm na me hõmpun, mã hÿjarêan kam hãm ne ma tê, mã ma ihkõt me pra. Ne pê ihtÿj cute kre wÿr ihtêm ne kam apu incwÿr na amji mã me to hane.

³² Mã Marij Jeju wÿr cator, por curi xa ata ri, ne ihpar cahê na ihkõn krã na hÿr, ne cumã:

— Ijõ Pahhi, ca ha ita ri apu mõi na mã, quê ha nee ikjê ipê ihtyc nare, ne ramã ihtyc, ca hakàn pê acator — hane.

³³ Mã Jeju te Marij cwÿr na hõmpun. Ne hanea ne cute Juta catêjê kwÿ incwÿr na me hõmpun. Ne hõtpê ahna incrycre, ne cumã amji kĭn nare. ³⁴ Mã cute mehckij, ne me cumã:

— Mër jõ ri ca ate me hir? — hajÿr. Mã Marij cumã:

— Ajpên mõi ne hõmpu — hane.

³⁵ Mã Jeju te ahna kên kre pupun ne apu kam amrã.

³⁶ Mã Juta catêjê me ajpên mã:

— Me hõmpu he, cumã Raxaro kĭan to ihkĭn na mã apu kam amrã! — hane.

³⁷ Mã mehwÿ me harên to:

— Hõtpê cute into tÿm caprãr, ne quê rÿ mã Raxaro tyc xwÿjrea na jÿ na to, quê ha nee ihtyc nare. Ne hamre ramã ihtyc, ne jÿ mã mã quê ha to? — hane.

Pê hacpÿa mã Raxaro tÿr

³⁸ Mã hipêr ahna Jeju crycre, ne cumã amji kĭn nare, mã ma kên kre wÿr tê, ne cute kên kre jarkwa pupun, mã kên nõa te kre ata jarkwa jihê, Juta catêjê te amji jarêt xà ata kõt.

³⁹ Mã cute kre na harkwa hyr to:

— Me kên te kre jarkwa jihê ita capa — hajÿr. Mã Raxaro kjê pê Marta ita te cumã harên to:

— Ijõ Pahhi, ramã harêt na amcro te cwat ita kam ramã ihkro — hajÿr.

⁴⁰ Mã Jeju cumã:

— Xà wa ite curmã me amã amji jarên to: “Ca ha ate me ipar na, ca ha atÿj me Pahpãm carõt pupu” hajÿr nare? — hane.

⁴¹ Mã cute me kên kre ata jihê mên. Mã Jeju kàj mã irĭt ne cute Hÿm mã harkwa to:

— Inxũ, wa hõtpê amã icakõc, ca atÿj ikampa pyrên ri ijakry. ⁴² Ampo na mã wa ite icakõc xà ita ton? He me hàhtõti atajê mã wa ite icakõc xà ita ton, mã cute me ipar. Ne ate ikujahêc na me ijahkre pej to prãm to wa ite me cumã hajÿr — hajÿr.

⁴³ Ne cute hÿjarên to hajÿr jirõ pê mã ri cute Raxaro mã hàkjêr to:

— Ikwÿ nõ Raxaro, ajpên põi mã acato! — hajÿr.

⁴⁴ Mā por Raxaro tyc ata tīr pyrentu. Mā cupēhkà te ihpar me hūhkra cunea cajpre ita kam, jū wūr quē mōr pej, na ri ajpēn pō mā to amji rēn to mō. Mā hanea ne ihkuc na hē. Mā Jeju te ame hōmpu atajē mā harkwa to:

— Intēte me cupēhkà te ihcupu ata pô, quē ihtỳj tē — hajỳr. Mā cupē ipôt par, mā ma pō mā tē.

Jeju cuna mā mencaca xà kēanre

⁴⁵ Mā Juta catējē jàhtōa ne me Marij pupun to mō atajē, te me Jeju te Inxū carôt kôt hāpēn xà pihho pejti ton ata na me hōmpun, ne ihtỳj amji mā me to ihhim-pej pyrentu. ⁴⁶ Ne mehkwy te nee me hajỳr nare, ne ma cute me amji jacjēn, ne Parixēw catējē mā, Jeju te ampo ton xà atajē na harēn.

Pê Jeju curan na, me curē xwỳn me ajpēn pa

⁴⁷ Mā Parixēw catējē me, cute Pahpām mā mehcaj-rēn catējē jō pahhi me, cute me cuprōn, prohti kam catējē me, ne cute me ajpēn par, ne me ajpēn mā:
— Ampo to mā cu ha ajte me? Nāmri jūm xūmre ita carôt catia to hāpēn xà pihho pejti pit ton to mō. ⁴⁸ Cu cama ahna me hamā, ne nee intēte mehcahpērkar nare, quē ihtỳj me cumā ton to mō, quē ha mehcunea ahna me hōmpu, ne me kampa, ne ihkōat me amji kampa. Quē ha Roman catējē jō pahhi me hōmpu, ne ihtỳj hacpỹa mā me pahna apkjē, ne me pahkam tē, ne me papē Pahpām to amji kam me hapac xà jūrkwā pytā, ne ame pajō krī to kēanre ne — hajỳr.

⁴⁹ Mā caku ata na Cajpa ata pê Pahpām mā cute mehcaj-rēn catējē jō pahhiti. Na ri cute harkwa to:

— Pỳhàpà, ajte me acunea pê amji jahkre kēatre!
⁵⁰ Ne imāa ite amji kam ijapac xà te hajỳr he. Quē ha jūm xūmre pyxit peaj ne ty, cu ha nee me pahcunea me pahtyc nare. Nāmri quē ha pyxit peaj te ihtyc nare na, cu ha me pahcunea me pahhi tu. Cwỳrjapē ri Jeju pyxit peaj ne ihtyc xà — hajỳr.

⁵¹ Ne pê Cajpa ihcakōc xà ata kam, nee amjia kôt ihcakōc nare, Pahpām pê cumā ihcakōc xà ita to hahkre. Ne pê cupē Pahpām mā cute mehcaj-rēn catējē jō pahhiti. Cwỳrjapē pê Jeju te Juta catējē cunea incwỳrjapē ihtyc na, me cumā amji jarē. ⁵² He nee mā Juta catējē incwỳrjapē pit mā ihtyc xà nare. Ne pjē cunea kam, mehcunea pê Pahpām kra ame ipicrān atajē to cute cuprōn, ne me to pyxit peaj prām to, quē ha ihtỳj ty.

⁵³ Ne amcro ata kam cute me Jeju curan prāmte pê me cupē Juta catējē jō pahhi kwỳ cunea ahna me ajpēn pa. ⁵⁴ Cwỳrjapē pê nee Jeju hirā pê ajco apu Juta jō pjē kam ipa nare. Na wa ma, por pō na pire mā, pjē kam pō kam me hamreare ata wūr Jeju me, me mō, por Pīxōhrôt jō pjē ata wūr, ne curia wa me ijāhhuc.

⁵⁵ Ne pê ramā amcro incrēre me Hakren xà jō amji kīn wūr. Pê amji kīn ata xwỳjrea na Juta catējē jàhtōa ne Krīpinkrēn wūr me cato, cute ame ampo kēn ton atajē to me hapac kēt, ne ame amji cūmpej. Ne amji kīn ata na mempejti na ame ipa xà caxuw. ⁵⁶ Ne pê mehcunea ame Jeju japēn to me ipa, ne ajco ahna ame

ajpēn cukij, Pahpām to me amji kam me hapac xà jūrkwā kam. Ne me ajpēn mā:

— Pỳhàpà, mōrmō quē ha ajkī ihtỳj ajpēn Jeju amji kīn ita wūr mō, nare, quē ha nee mōr nare? — hajỳr.

⁵⁷ Me Pahpām mā cute mehcaj-rēn catējē jō pahhi kwỳ me, me cupē Parixēw catējē kwỳ me, cute me Jeju jaxàr na me ajpēn par. Cwỳrjapē ri cute ahna me harkwa, quē jū ri jūm hōmpu, ne uua ne me cumā harē, por jū ri apu mōr xà ata ri.

Pê Marij Jeju par kam ampo cacō na hī jàhwỳrti ata jaxwỳ

12 Ne ramā me Hakren xà jō amji kīn wūr amcro te xēj, wa ma Jeju me, Mehkēnpupunxà jō krī wūr me mō. Por pê curi hacpỹa mā Raxaro to ihtīr mā ihkrī ata ri. ² Mā cute Jeju te hacpỹa mā Raxaro to ihtīr na me to amji japackre, ne amji mā me to catia to prām to ri, cute me cumā hō ton. Mā Marta apu mehtehcajpa, mā Raxaro me cahē na me hāpān xà na jỹ. ³ Mā Marij te ampo cacō cuxwati ata japỹ te nartō cacō te rit cahti na hajỳr ata pyr. Ne pê ampeaj kam nartō cacō ata na hī ahwỳ. Mā cute Jeju par kam haxwỳr, ne ahna haxwỳr partu ne cute to cumā ihpar cuhhōn, ne ihkīa to cumā incrà, mā ikre cunea cuxwaa to cuxwa.

⁴ Mā me ikwỳa nō pê Juta Carijot te cormā Jeju kēn mā mēn catē ata te harkwa to:

⁵ — Pom ampo cacō ita na ihpore jàhtō na cute xēj crē, ne cupē caku pyxit jàpēn xà jō poreā. Ne mēr ampo na mā cama cute haxwỳr, ne nee cute ihpore na to hàhpan ne imā hōr, wa ite me cupē hamreare atajē mā hōr nare? — hajỳr.

⁶ Ampo na pê Juta Carijot ihcakōc xà ita to hane? Nee mā pê ampo na nare. Pê hàhkīj xi, na pê harkwa ita to hane. Pê nee cute me cupē hamreare atajē tehcajpar prāmte harkwa ita to hajỳr nare. Pê ajco me cupē me hō pore incjēn xà cwa, ne ajco me cupē ihpore to ahkī na pê. Pê ramā hàhkīj ita to amji pyrāc tu.

⁷ Mā Jeju te cumā harkwa to:

— Quēt taa Marij ito hane! Cute ijarēt xwỳjrea na ramā icuxwa, me panquētjē te amji ton xàa kôt. ⁸ Ne me cupē hamreare atajē, quē ha hōtpē ame ipa me ac-ahē na. Ne pa nare, wa ha nee ame acahē na imōr kam to icrà nare — hajỳr.

Pê Raxaro curan na me hō pahhi kwỳ ajpēn pa

⁹ Mā Juta catējē jàhtōti atajē te me Jeju te Mehkēnpupunxà jō krī kam apu mōr na me harēn par. Ne ma curi me cator. Ne nee pê Jeju pit wūr me mōr nare, ne Raxaro me ajwar hỹrmā me mō, por hacpỹa mā Jeju te to ihtīr ata. ¹⁰ Mā hamre, Pahpām mā cute mehcaj-rēn catējē jō pahhi kwỳ te me ajpēn par, ne hanea ne ihtỳj me Raxaro curan prām. Ampo na? Nee mā ampo na nare. ¹¹ Pê Juta catējē jàhtōa ne Raxaro tīr xà ata kôt, me hō pahhi mā me hikra, ne Jeju to amji mā mehhim-pej to me ipa na pê.

Pê me hakrya kam, Krîpinkrên mã Jeju axà

12 Ne amcro ata na, pê me hàhtôa ne me Hakren xà jô amji kîn na ame ipa. Ne cute me Krîpinkrên wÿr Mehkênpupunxà jô krî pîn Jeju mör na me harên par.

13 Ne cute me ampo hô pê crowràti hô pyràcti ita to me amji tÿj, ne ma hÿrmã me to pra, cute me to ihcajpar prãmtē. Ne me to ihcajpar, ne me hakryte cama cumã ame to hàpêr to me ipa, ne ame cumã caràr to:

— Pahpãm cati ne impej! Pahpãm ri me pahwÿr mō! Pahpãm te amji japrya na me pahwÿr me pajō Pahhiti kujahêc! Me imã Pahpãm te me pajō pjê to ihhimpej na to prãm! — hane.

14 Mã Jeju cawrô cahàcre nō ita na cator, ne kam hÿr ne to mō. Por ahnaa rÿ pēa mã ramã Pahpãm jô kàh-hôc kam harên to:

15 “Krîpinkrên pê Xijãw jô hàpkàjti me, ca kam me akrî atajê, ca ha nee hipêr amji mã ame ampo cupa nare.

Nãmri ramã ajpên me gō Pahhiti cawrô cahàcre in-tuwre nō kam hÿr ne to mō he” hane,

mã ahnaa.

16 Ne amcro ata kam pê wa nee me ipê ihkôt me ipa catêjê nō ampo atajê nō kam ijapac, ne hahkre pej nare. Mã Jeju tyc, ne hacpÿa mã ihtîr, ne ma Pahpãm wÿr hàpir, wa cormã ite me ita to amji japackre, por ramã ampo te to hajÿr xà ata na Pahpãm jô kàh-hôc kam ahna ihhôt ata to. Na pê ihtÿj to hanea to hane.

17 Mã me hàhtôa ne Jeju kôt me mō, mã me kam mare mã cute carôt tÿjti to Raxaro mã hàkjêr, ne hacpÿa mã to ihtîr ata na, cute me hōmpun catêjê te ihtÿj me harên cràn. 18 Mã me hàhtôa te me harên par, na ri ma mehcajpar to me mō. 19 Mã Parixêw catêjê kwÿ ajpên mã me harên to:

— Me hōmpu he, wÿr cu ame amji mã hamã ne in-tête me cuta. Ne ramã pjê cunea pîn mehcuea ihkôt ame ipa — hane.

Cu ha mam pahte me amji kam me pajapac xà kên ita mã hikra

20 Ne por Krîpinkrên wÿr, amji kîn wÿr me mō atajê kôt hōtpê Crec jô pjê catêjê kwÿ me mō. 21 Atajê ma me ikwÿa nō japry pê Pirip ata wÿr me pra. Ne Pirip ata pê Tep jô krî kam Hîpôjajo jô pjê kam me xa atajê jô xÿmre nō. Mã cute ahna me hàhwÿr, ne me cumã:

— Jeju pupun prãmtē wa me mō — hajÿr.

22 Mã Pirip hō ikwÿ nō Antre wÿr tē, ne cute cumã hÿjarên, ne ma ajwar Jeju wÿr me mō, ne me cumã:

— Crec catêjê kwÿ cator, ne ame amã ihcakôc to prãm — hane. 23 Mã me cumã:

— Ipê me Ahàkà, ne ipê, por pê cōjkwa kam amji to incirre ne hÿmrea na amji to, ne me awÿr wrÿ ata. Ne hamre ramã ite hacpÿ mã amji jaxàr, ne icati taa to, icati xàa kam ramã hàhhuc to mō. 24 Wa nee ame amã ihêj nare, ampeaj kam wa me amã awjarê. Quê ha pjê kam jÿm ampo hy kre, quê ha cute amji to ipixô nare na, quê ha nee kam hiprãj ne ihhy nare, ne ihhy atapit

cormã nō. Nãmri quê ha cute me hàmhîr na, quê ha amji to ajxô ne kam hiprãj ne ihtÿj kam ihhy hàhtôa to hàhtô. Jîkjê na mã ite hajÿr. Wa ityc ne amji jarêt nare na mã, wa ha nee hacpÿa mã me acunea to atîr nare.

25 Jîkjê na mã me acunea te me hajÿr. Ca ha me amã mam ate amji kam me gapac xà kên tÿm ata kîn, ne me amã hapêti na, ca ha nee me amji mã intuw pejti ita nō pyr nare. Nãmri ca ha ate mehcaca, ne me cumã hikran na, ca ha hirôa pê me amji mã ate amji kam me gapac xà tuw pejti ita py. Ata quê ha me amã irya to iry, ca ha cōjkwa kam Pahpãm cahê na ame apa rohnytti mã. 26 Ne quê ha jÿm te ikôt amji ton, ne imã hàpên prãm na, quê ha jÿm ata ipynã, ne ikôt amji to. Ne wa ha jÿ ri apu mō, quê ha hanea ne ikôt imã hàpên catê apu mō. Quê ha Inxÿ pê Pahpãm, por jÿm imã apê ata to impejti ne.

Pê Pahpãm Jeju pê ihkra na harê, cōjkwa pîn

27 — Wa ita kam imã amji kîn nare catia na ite amji cajpêr. Ne jÿ mã wa ha ajte? Xà wa ha ajkî amji mã In-xÿ na ahwÿ ne cumã: “Inxÿ, itête ampo kên te ito jÿ mãn xà ita camê” hane? Hãpà, jÿ wÿr wa ha cumã ijarkwa to hane, he ita caxuw wa icator, pjê ita kam — hajÿr. 28 Ne cute Hÿm mã:

— Inxÿ, imã ate amji mã gapry to catia to cati na ato prãm — hajÿr. Mã cōjkwa pîn jÿm jōkre ita te cumã:

— Wa ramã ite to cati, ne wa ha cormã hipêr itÿj to cati to mō — hajÿr.

29 Mã me hàhtôti atajê te me hōkre ita par, ne mehkwÿ ajpên mã me harên to:

— Pahhãjê jàwrãrãc mōrmō — hane. Mã mehkwÿ amji mã me to:

— Cōjkwa kam Pahpãm jarkwa to imprar catê nō te cumã ihcakôc — hane. 30 Mã Jeju te me cumã harên to:

— Nee mã icwÿrjapê jÿm jōkre ita cakôc nare, me acwÿrjapêa ri hōkre ita cakôc. Ampo na? Ate me hōkre par xà ata kôt ca ramã ate Pahpãm te ihtÿj ikam hapac na, me ijahkre pej. 31 Ne ramã pjê cunea kam ame icurê catêjê cukij ne mehken mã me hàr xàa kam ri hàhhuc. Ne por me pahcurê xwÿn pê Xatanaj pê pjê kam me to ihhimpej catê ata, quê ha Pahpãm mentête hÿrê. Quê ha nee hipêr me kam ihhimpej nare. 32 Quê ha pî na me ixô, ne kÿj pê ina me hãm, wa ha kam ityc to imör me ajkaam amji wÿr me hàhtôa ne me to ap-kjê, mãr quê ito amji mã ihhimpej to me ipa — hajÿr.

33 Ne hÿjarên xà ata to pê ajco cute jÿ mã mehcuran xà ata to amji jarên to ipa.

Jeju te amji kam hapac xàa to me papa xà

34 Mã me hàhtôti atajê te me Jeju kam hapac ne me cumã:

— Pÿhàpà! He wa ijōtpê hãn ne me Mojxe xwÿ jô kàhhôc cahyt, ne kam me, por pê ramã Pahpãm me pamã jÿm te jÿ caxuw me pahto ihhimpej xà to me pamã awjahkre ata jarên par. Ca ajte cōjkwa pîn me hÿmrea na ate amji ton, ne awrÿc ne apu apa na, me

imã amji jarë. Cwÿrjapê ri apê ihhêj rûm, por pê Pahpãm jûm to me pamã awjahkre ata. Ne quê ha apê Pahpãm te ato hÿjahkre ata mã impàràpên, ca ha atyc nare, ne me icunea to ahimpej kam acrà tu ne, ne jÿ caxuw atyc xà nare. Nõ na mã ca ajte, cute me acuran ita na amji jarë ita kam, me icunea pê gahkre kêatre. Na ca ha hirãa pê me imã apê jûm te cõjkwa pîn me hÿmrea na amji jahkre ne iwrÿc ita na amji jarë, wa me gahkre pej — hajÿr.

³⁵ Mã Jeju me cumã:

— He cormã nee ate me ite me amã ampo jarën xà itajê cunea par xà hamreare, ne jÿa caxuw ca ha cormã me kampa ne me hahkre pej. Ne me ijÿjarën xà ita kampa ne mehkök hakop. Ne me hõmpu he, cu ha hàhcujro xà nõ to ampo cujro, ne hõmpun kêne nare, quê ha ampo kêanre na, cu ha me hõmpu ne me hahkre pej pyrentu. Na ri ipê hàhcujro xà nõ ata pyrãac. Na wa ha ihhêj ne me acujro, ne me amã ate amji kam me gapac xà pupu, mãormõ ajkÿ impej, nare, mãormõ ajkÿ ihkêanre. Na ca ha ihkõat amji mã ate amji kam me gapac xà jahkre pej. Ampo na? He wa ha nee ita ri me acahê na apu imõr kam to icrà nare, ite me amã ijãhcujro xà caxuw. Na wa ha ita ri cormã apu imõr kwÿa kam, ca ha amji mã ate amji kam me gapac xà to antuw, ne me to intuw. Nãmri quê ha ahtÿm nare wa ha ma me apê tẽ, quê ha me apê awcapãtkõ, ne jÿ mã ca ha me, ne ite me atehcajar nare kam, ame amji mã hamã? Ne jÿ mã ca ha me amji mã me ate amji kam me gapac xà to me antuw? Wÿr ca ha ame amji mã hamã. ³⁶ Nãmri ca ha ate amji mã me ito ahimpej na, ca ha gãhcujro jarwrÿhti ita na me akrÿ, ne icuxà jÿmjê kwÿ cujro, mãr quê cute amji kam me hapac xà to me antuw — hane. Hõ, Jeju te me cumã ihcakõc xà to hajÿr, ne ma tẽ, ne me cupê ipimxur.

Pê me hàhtõtì atajê nee amji mã me Jeju to ihhimpej nare

³⁷ Ne pê ramã me kam mare mã Pahpãm carõt tÿjti ata to hàpên xà pihho catia to, pê me hõmpu cakrõ, nee me kam hapac ne amji mã me to ihhimpej nare. ³⁸ Na pê Ixaj xwÿ pê Pahpãm jarkwa to ihcakõc catêjê nõ ata ramã ita na ihhõc to hane he:

“ÿhÿ me ijõ Pahhiti, ca ate me cumã acarõt tÿjti ata to apipê,
ne to gãpên xà catia ton na ite me cumã garën cakrõ,
mã nee jÿm te me ipar nare” hane.

Hõ, ita na pê Ixaj xwÿ ihhõc, mã ahnaa cute.

³⁹ Ampo na? He mehkwy amjia kõt ma amempar ca, na pê Ixaj xwÿ me ahna ihhõc to hane he:

⁴⁰ “Pahpãm te cute ampo pupun cupate, ihhêj ne me to into puror, ne cute mempar cupate, ihhêj ne me to me hapacture.

Cute amji kam hapac xà to me ipintuw ne hÿrmã amji to me ipipkjêr, mã cute me to impej cupate” hane.

Hõ, pê ma ame Pahpãm par caca, na pê me to hane.

⁴¹ Ampo na pê Ixaj xwÿ ihhõc to hane? Nee mã ampo na nare, pê ramã mam rÿ pêa mã Jeju te carõt tÿjti to ampo catia to hàpên xà ata na me hõmpu, na pê ahna ihhõc to hane.

Pê pahhi kwÿ cupate, nee ame Jeju jarën pejti to me harën nare

⁴² Mã me hàhtõa ne nee me Jeju par nare cakrõ, mã Juta catêjê jõ pahhi kwÿ te hõtpê mempar. Ne nee cute me kam mare mã, amji mã me Jeju pejti na me harën nare. Ampo na? Nee mã ampo na nare. Parixew catêjê te cute me cuprõn xà intête, põ mã me hapõj mã hipêr na mencjêj nare cupate. ⁴³ Ne me cumã Pahpãm te mempejti na me harën na ihkÿn nare, ne ajte me cumã me hÿmre te mempejti na me harën na, amji to prãm.

Pê Pahpãm Jeju mã ampo to hahkre atajêa to ri, me cumã hahkre

⁴⁴ Mã Jeju te ihkrãhhia kam mehcunea mã hÿjarën to:

— Quê ha jÿm te amji mã ito ihhimpej na, quê ha nee ipyxit peaj ne amji mã ito ihhimpej nare. Quê ha cute ito amji mã ihhimpej me ajkaam, por cute ajpên ikujahêc ata to hanea ne amji mã ihhimpej. ⁴⁵ Ne hanea ne, por jÿm ipupu ata, ramã ajpên cute ikujahêc catê ata pupu. ⁴⁶ Ne pjê ita kam cute me amji kam hapac xà kêanre jãhtõ, ne me cupê cute amji to me ipintuw jahkre kêatre. Na ri ihhêj ne awcapãtkõ kam ame ipa. Na wa ihhêj rûm ipê mehcujo xà, ne me hÿrmã icator, ite cute amji kam me hapac xà to ipintuw ne ihhêj ne awcapãtkõti to mentête hamre xà caxuw. Na quê ha jÿm te amji mã ito ihhimpej na, wa ha itÿj cumã cute amji kam hapac xà to antuw.

⁴⁷⁻⁴⁸ — Ne por ma ame icaca atajê me, ma apu ite me hapackre xà itajê caca atajê, quê ha ihtÿj jÿ caxuw hahpan xà na Pahpãm mã me amgõ. Ne pa nare, wa nee ite me hÿhkra kam ijãmcwÿr xà caxuw pjê ita wÿr icator nare. Quê ite me to impej ne mehken catia pê me hÿtãr xà caxuw wa icator. Ne pom wa me cumã icakõc xà ton to ipa itajê, quê ha me ahna ahwÿ, quê ha, por jÿ caxuw ampo cunea jamre xà ata kam, ihtÿj me cumã amgõ.

⁴⁹ — Ampo na? Inxÿ rûm ri ajpên icakõc xà itajê imã pra. Na wa Inxÿ te ampo to, ite icakõc xà na irên atajê to pit mã, me cumã icakõc to ipa. Wa nee amjia kõt icakõc to ipa nare. ⁵⁰ Na quê ha jÿm te icakõc xà atajê kam hapac, ne to amji mã ihhimpej na, quê ha Inxÿ cahê na amji to ipijapar rohnÿtti mã. Caxuw ri, Inxÿ te imã ite to ijÿjarën xà itajê jõr — hajÿr.

Pê Jeju ihkõt me ipa catêjê mã ihpar cuhhõ

13 Pê ramã me Hakren xà jõ amji kÿn jõ amcro wÿr amcro pyxit peaj ne nõ. Pê Jeju te ihtyc, ne pjê ita rer, ne ma hacpÿ mã cõjkwa wÿr, Hÿm wÿr cute ihtêm jõ amcro ramã hàhtêp na, cumã hahkre pej. Ne pê hõtpê cumã pjê kam me cupê me hõ tekjê atajê kÿn,

ne cumã mehkĭan to mehkĭn ita na mã ahnaa ihtyc xà ita mã cute to hahêr. Mã cute me ikĭnti ita to me imã hahkre to hajÿr he.

² Wa Jeju me, me ipê ihkôt me ipa catêjê me, ramã caxwa xàa kam, me ikrĭ ne ame apà. Pê ramã caxuw me pahcurê xwÿn pê Xatanaj ata me ikwÿ nõ japrÿ pê Juta Carijot ata mã, cute amji kam hapac xà kêanre ata jôr, mã ihkôt aracri cute Jeju kên mã mên xà caxuw.

³ Mã Jeju te, Hÿm te cumã carôt cunea jôr na, cumã amji jahkre pej. Ne hanea ne cumã Hÿm pĭn cator, ne quê ha hacpÿa mã hÿrmã api na, cumã amji jahkre pej.

⁴ Cakrô mã hãm ne cute ihkà ata caxàr, ne cute cupêhkà nõ ita to amji cahti na hê. ⁵ Ne cute crat nõ ita kam cô kwÿ mên, ne ahpÿanre na kam me imã me ipar cuhhôn kam ihtêm. Ne ihcuhhô ne ma cupêhkà ata to me imã incrà.

⁶ Ne ma Ximãw Petrô na to cator, mã cute Jeju cukij to:

— Pÿhàpà ijô Pahhi, pom ampeaj kam acati ita, nõ na mã ca ha ajte me ipar cuhhô? — hajÿr. Mã Jeju te cumã harkwa to:

⁷ — Ca ha nee ita kam ampo caxuw ite amã apar cuhhôn xà ita jahkre pej nare, ne jÿa caxuw ca ha hahkre pej. Na ca ha ito tojnô wa amã apar cuhhô — hajÿr. Mã Petrô cumã:

⁸ — He apêa ri ijô Pahhi, na wa ha nee ate imã ipar cuhhôn ita na ato tojnô nare — hane. Mã Jeju cumã:

— Wa ha ite amã apar cuhhôn nare na, ca ha nee hipêr apê ikôt apa catê nare — hane. Mã Petrô te ahna hàhwÿr to:

⁹ — Ijô Pahhi, mêr imã ipar pit cuhhôn nare, ne hanea ne imã ijÿhkra me ikrã cuhhô! — hajÿr. ¹⁰ Mã Jeju cumã:

— Hamreare, nee mã gĭ cunea xwÿr xà nare, ne apar pit cuhhôn xà. Por ramã jÿm xwÿr ata tÿm nare, ne cumã ihpar pit cuhhôn xà. Ampo na? Pjê kam apu to ipa mã ihtÿm, cwÿrjapê ri cumã ihpar pit cuhhôn xà. Ne imã ihhêj ne ramã me acunea tetet pit, ne por jÿm ata ri pyxit peaj ne nee ihtetet nare ne ihtÿmti — hajÿr.

¹¹ Ne pê ramã Jeju cute ihkên mã mên catê ata jahkre peaj, na pê harkwa ita to hane he:

— Ramã me acunea tetet, ne jÿm ata ri pyxit peaj, ne nee ihtetet nare ne ihtÿmti — hajÿr. Ne nee mã mehtÿm to pê Jeju hÿjarên to hajÿr nare, ne cute me amji kam hapac xà kên to pê hÿjarên to hane.

Pê me hàpên catêjê me hàpên xà na me ajpên tehcajpa

¹² Mã cute me imã ipar cuhhôn par jirô pê mã ri hacpÿa mã cute ihkà mã amji jaxàr, ne me ijàpàn xà na hÿr, ne cute me icukij to:

— Xà ate me ite curmã ampo ton xà ita kam me gapac, ne me hahkre pej? Mõrmô nee ate me hahkre pej nare, cwÿrjapê wa ha me amã ihkôt harê. ¹³ Ca me ito amji mã: “Me imã ampo to hahkre catê” hane. Ne hanea ne amji mã me ito: “Ijô Pahhi” hane. Ne ampeaj kam ri ate me ijarêan to me ijarêan. ¹⁴ Ýhÿ, he tee ipê me gô pahhi, ne ipê me amã ampo to hahkre catê

cakrô, wa itÿj me amã ijàpên, ne ite me amã me apar cuhhôn par. Cwÿrjapê ca ha me caa icuxà ajpên mã me apar cuhhôn pa. Ne ampo cunea na me ajpên tehcajpa, ne ajpên to me acati, ne ajpên mã me apê. ¹⁵ Ne ite me amã to hahkre na, ca ha ikôat me to, ne ajpên mã me apar cuhhôn pa. ¹⁶ Wa ampeaj kam me amã awjarê, he me hàpên catêjê nõ hõ pahhi jirôa pê cati nare. Ne nee hõ pahhi japyre mã hàpên nare. Ne quêt hõ pahhi ri me hirôa pê cati. Ne hanea ne, por harkwa na cumã imprar catê ata, nee cute ihkujahêc catê ata jirôa pê cati nare. ¹⁷ Hamre, ita caxuw ca ha ite amji kam ijapac xà na me ijahkre pej kam me to tẽ. Na ca ha ate ikôat me ton to me amji pyrãc na, ca ha atÿj hÿrên me gakry.

Pê Jeju, por cute ihkên mã mên catê ata jarê

¹⁸ — Wa nee ite me acunea to icakôc nare. Ampo na? Wa itÿj ite amji mã me acapi atajê pupu, ne imã me gahkre pej. Ne pê Pahpãm jô kàhhôc kam ramã me anô ata to hÿjarên to: “Por icahê na ijô pãw ku ata, quê ha ihtÿj icuna mã ahtwÿ ne amji to icurê xwÿn” hane. Ne ampeaj kam quê ha caxwa ita kam, jÿm ita ito hane. ¹⁹ Ne wa ha ita kam ampo te ito hajÿr xà ita xwÿjrea na, me amã harê. Mãr quê jÿm ita ito hane, ca ha ramã me ipê Pahpãm kraa to Pahpãm kra na me ijahkre pej. ²⁰ Ne ampeaj kam wa me amã awjarê, quê ha jÿm te, por ite jÿm kujahêc ata na amji caxàr me ajkaam, hanea ne ina amji capa. Ne quê ha jÿm te ina amji caxàr me ajkaam, hanea ne Inxÿ te ajpên ikujahêc ata na amji capa — hajÿr.

Pê Jeju cute ihkên mã mên catê jahkre

²¹ Cute ita jarên jirô pê mã ri cumã amji kĭn nare, ne hĭ cunea kam ihpeacre. Mã hirãa pê me imã amji jarên to:

— Wa ampeaj kam me amã amji jarê, ca ha atÿj me anô me icurê xwÿn tehcajpa ne me cumã igô, neikên mã imê — hane.

²² Wa tee ame ajpên pupu, ne nee me ite, por cute jÿm to ihcakôc ata jahkre pej nare. ²³ Ne pê ampeaj kam Jeju mã ikĭn, cwÿrjapê pê wa cahi na jÿ. ²⁴ Mã Ximãw Petrô te hÿhkra to imã hàpêr, ne hÿhkra to imã, ite jÿm ata na Jeju cukij na awjahkre.

²⁵ Wa Jeju wÿr ipipkjêr ne ite kyre pê ihcukij to:

— Ijô Pahhi, jÿm mã ajte? — hajÿr. Mã Jeju imã:

²⁶ — Por wa ha jÿm mã pãw co ne cugô ata — hajÿr.

Ne cute pãw kwÿ hyr ne crat kam cô cacro to inco, ne Juta Carijot mã hõr. ²⁷ Mã cute pãw ata pyr me ajkaam mã Xatanaj te cumã amji jôr. Mã Jeju te cumã harkwa to:

— Gapacta ne ate amji mã acaca xà nõ na prãm ata ton pyrentu — hajÿr.

²⁸ Mã me ikwÿ me ijàpàn xà na me jÿ atajê te nee me ita jahkre pej nare, por Jeju te imã harên xà ata na.

²⁹ Ne pê Juta ihpore incjên xà to amji pytà, ne ajco apu to ipa na, pê ihtÿj cute amji kĭn caxuw cute ampo japrôr na Jeju te cumã harkwa na amehcãmĭj, nare,

cute me cupê hamreare atajê mã ihpore nõ jôr na amehcãmji. ³⁰ Mã Juta te pãw pyr, ne ihrêr ne ma ihtêm pyrentu. Mã ramã awcapãtkô ne caxwa.

Pê Jeju ihtêm xà na ihkôt me ipa catêjê mã amji jarê

³¹ Ne ma Juta tēm jakàn pê ri Jeju te me imã hũjarên to:

— He ipê me Ahàkà ata pê wa me hũmre na amji to, ne cõjkwa pĩn wrý. Ne ita caxuw quê ha mehcunea me hirôa pê icati na me ijahkre pej. Ne icwýrjapêa quê ha hanea ne me Inxũ japrý to me catia to me cati na me hahkre pej. ³² Wa ha mehcunea mã Inxũ carôt catihti impejti cupahti ata to ajpê, ne ahtũm nare, quê ha hanea ne me cumã icarôt catihti impejti cupahti ata to ajpê. ³³ Me apê me ikrare pyrãac. Ne wa ha nee me acahê na apu imõr kam icrà nare, ne ahtũm nare wa ha ma tẽ. Na ca ha tee ame ijpê. Ne por wa ite ramã Juta catêjê mã amji jarên xà ata to, wa ha me amã amji jarê, ne me amã: “Jũ wýr ca ha curi imõr xà ata ri me mõ” hane.

Cu ha me pamã ajpên kĩnti ne

³⁴ — Na wa ha me amã ite ijarkwa hyr xà intuwti ita ta, ne me amã harên to: “Atýj me acunea mã ajpên kĩnti, to hanea, pom quê wa me akĩnti to amji kampa he, ita to quê ha hanea ne me amã ajpên kĩnti ne” hane.

³⁵ Quê ha me acunea mã ajpên kĩnti na, quê ha mehcunea ajpên na me apupu, ne me apê ikôt me apa catêjê na me gahkre pej pyrentu — hane.

Pê Jeju Petrô mã cute hõmpun nare na harên na cumã harê

³⁶ Mã Ximãw Petrô te Jeju cukij to:

— Jõ ri ca ha ajte mõ? — hajýr. Mã Jeju cumã:

— Jũ wýr ca ha ita kam curi imõr xà ata ri mõ, ne jũa caxuw ca ha atýj curi ikôt acato — hane.

³⁷ Mã hipêr Petrô Jeju cukij to:

— Mër ampo na wa ha nee ita kam akôt imõr nare? Pom ipê akôt ipa catê ita, cwýrjapê wa ramã ita kam akôt ityc xàa caxuw apu mõ — hane. ³⁸ Mã Jeju cumã:

— He xà ca ajkĩ ampeaj kam ikôt atyc xàa caxuw apu mõ? Hamreare. Wa ha amã ijũjarên hiahpuro. Ca ha ita kam, hõxãhxãc kàr xwýjrea na, ate ipupun nare, ne apê ijahkre kêatre na, amji jarên to incrê — hane.

Pahpãm cahê na ampeaj kam me pamã me pahkrĩ xà jãhtõ

14 Jirõ pê mã ri cute me pahcunea mã harkwa to: — Nee ca me amji mã pa, ne ame akrihkrit nare. Ne Pahpãm to ca quêt amji mã me ahimpej, ne hanea ne ito amji mã me ahimpej. ² Ne Inxũ krĩ xà kam ampeaj kam mehkrĩ xà caxuw mehkrĩ xà jãhtõ, na wa ha ma hacpý mã tẽ, ne me amã ihnõ cũmpej hiahpuro. Wa nee ame amã ihêj xi jarên nare, quê ha curi mehkrĩ xà caxuw ikre caxwýn atajê hamreare na mã, wa ha nee me amã harên to hajýr nare. ³ Na wa ha ihcũmpej par jirõ pê mã, wa ha hacpýa ne me awýr

amji jaxà, ne me gaprô, mār wa curi apu ipa ata ri, ca hanea ne ikôt curi ame apa.

⁴ — Ne ramã me amã jũ kam itêm xà ata jõ pry jahkre pej — hajýr.

Jeju pê ri Pahpãm wýr me pancjêj xà jõ pry

Mã me ikwý nõa pê Tome ata te ihcukij to:

⁵ — He me ipê cormã jũ kam atêm xà ita na gahkre kêatre ita kam, jũ mã wa ha ajte me, ne me gõ pry ita jahkre pej? — hajýr.

⁶ Mã Jeju cumã:

— He Pahpãm wýr pry pyxit peaj. Ne ipêa ri pry ata. Cwýrjapê ca ha ipyxit peaj kôt Inxũ wýr me acato. Ne ipê me amã ite Inxũ to ipipê xà to ihêj xi nare xà xakat. Ne ipê me ate amji kam me gapac xà impejti cunea xakat. ⁷ Ne ramã ate me ipê Pahpãm kra na me ijahkre pej, na ca ha atýj hanea ne ita caxuw me Inxũ jahkre pej. Ýhý, he pê ca ramã me hõmpu — hane.

Jeju me Pahpãm pipëan

⁸ Mã me ikwý nõa pê Pirip ata te Jeju mã:

— Me ijõ Pahhi, me imã Apãm to ajpê, wa me hõmpu, ne tahnaa mã ihkôt me amji kampa, ne nee wa iràn xà na me ampo pupun prãm nare — hajýr.

⁹ Mã Jeju cumã:

— Pýhàpà, he rý pèa mã wa me acahê na ipa, ca ajte nee cormã ate me ipupun nare? Por jũm ipupu ata, ihtýj hanea ne Inxũ pupu, ne mër ampo na mã ca cormã imã: “Me imã Apãm to ajpê, wa me hõmpu” hane?

¹⁰ Pirip, xà ca nee ajte, wa Inxũ me ajpên kam ihõnco, ne ajkam me ipyxit peaj na amji mã me ito hajýr nare? — hane. Ne Jeju me icunea mã:

— Ne pom wa me amã awjarê itajê, wa nee amjia kôt harên nare. Ne wa ite Inxũ me ajpên mã amji jôr, ne ajpên kam me ihõnco, na ri taa hàpên xà itajê cunea to. ¹¹ He, wa Inxũ me ite ajpên mã amji jôr, ne ajkam me ipyxit peaj, na wa me amã amji jarê, ca atýj me ikampa. Nãmri quê ha me amã icakôc xà itajê na ipar jahkre kêatre na, ca ha me ijapên xà itajê pupu, ne ihkôat amji mã me ito ahimpej ne me ikampa.

Ampo na pahte me Jeju wýr xà atajê, ihtýj me pamã cugõ

¹² — Wa ampeaj kam me amã awjarê, quê ha jũm te ampeaj kam ito amji mã ihhimpej na, quê ha, pom wa ijapên xà to itajê jirôa pê hàpên xà ton to ipa. Ampo na? Wa ha ma Inxũ wýr hacpý mã tẽ, na quê ha ajpên me amã icarôt kujate. ¹³ Ne wa me ato amji kwý cwýrjapê ca ha ampo na me iwý, wa ha itýj me amã hõr pa, mār quê mehcunea me acwýrjapê Inxũ catia to cati na me hahkre pej. ¹⁴ Ne wa me ato amji kwý cwýrjapê, ca ha ampo na me iwý, wa ha itýj me amã cugõ.

Pahpãm Carõ Pejti te me pamã caprĩ xà

¹⁵ — Nãmri quê ha me amã ikĩn na, ca ha atýj ite ampo na me amã ijarkwa jirên atajê na me ikampa. ¹⁶ Ne wa ha me amã Inxũ na ahwý, quê ha ijakàn pê ijaxà

kam, me amā jūm kujate, quē ha me atehcajpa. Ne taa mā quē ha quēt me acahê na ipa rohnýtti mā. Ne jūm ata pê ri Inxū Carō Pejti. ¹⁷ Ne taa mā quē ha me amā Inxū te amji kam hapac xà impejti to ipipê to mō. Ne por me cupê Inxū tekjê nare, ne hanea ne me cupê me ikwý nare atajê, quē ha nee amji mā me Inxū Carō Pejti itacwýr nare. Ampo na? Jū wýr quē ha me hahkre pej, ne me hōmpu. Ne me ca nare, ca ha atýj quēt me hōmpu. Ampo na? He quē ha ihtýj quēt me acaxwām pê ihkrī, quē ha me acahi na ipa.

Quē ha Jeju me parer, cu ahte ame papa nare

¹⁸ — Ne quē ha ina ahtūm nare, wa ha ma tē cacrō, wa ha nee me ato tojnō ne me amā hikran, ca ha ahte ame apa nare. Ne itýj me awýr amji jaxà, ne me acahê na apu ipa. ¹⁹ Ne quē ha ina ahtūmre quē ha me cupê Pahpām tekjê nare atajê nee hipêr me ipupun nare, ne me ca nare, ca ha quēt atýj hipêr me ipupu. Ne wa ha itýj hacpýa mā itír ne Pahpām cahê na apu ipa. Cwýr-japê ca ha icuxà hanea ne hacpýa mā me atír, ne me atír ita na Pahpām cahê na ame apa. ²⁰ Ne quē ha jū caxuw, amcro nō na me awýr Pahpām Carō Pejti cato, ca ha Inxū me ite ajpên mā amji jōr, ne ajkam me ipyx-it peaj na me ijahkre pej. Ne hanea ne me amā, wa Inxū Carō Pejti kōt, me akam ikrī na ijahkre pej, na cu ha ajpên mā me amji gō, ne ihhê ne ajkam me pahpyxit peaj.

²¹ — Ne por quē ha jūmjê ito amji kampa, ne ijarkwa kōt me ipa atajê, quē ha me cumā ikīnti na me to ipipê to ipa. Ne quē ha hanea ne Inxū mā, por jūmjê mā ikīnti atajê kīn, wa ha hanea ne imā mehkīn, na wa ha me cumā amji to ajpê, mār quē me ipupu ne me ijahkre pej pejtu ne — hane.

²² Mā me ikwý nōa pê ajtea mā Juta nō ata, pê nee Juta Carijot nare ata te Jeju cukij to:

— Jū mā ca ha ajte ne me imā pit mā amji to ajpê? Ne nee me cupê me akwý nare atajê mā amji to apipê nare? — hajýr.

²³ Mā Jeju cumā:

— Quē ha jūm mā ikīn na, quē ha ihtýj ite cumā ampo na ijarkwa jirên itajê na ikampa. Cwýrjapê quē ha ihtýj Inxū mā ihkīn, wa ha Inxū me ajwar me cumā amji to ajpê, ne ajpên kam me ihōnco, ne me cahê na me ipa rohnýtti mā. ²⁴ Nāmri quē ha jūm mā ikīn nare na, quē ha nee ite ampo na cumā ijarkwa jirên atajê na ipar nare. Ne cute hajýr xà ita kam jūmā wa ha ajte, ne me cumā amji to ajpê, ne ajpên kam me ihōnco to ipa? Jū wýr wa ha me to hane — hane.

Carō Pejti ri pahte me Pahpām te amji kam hapac xà impar na me pahto

Ne cute me icunea mā:

— He wa ampeaj kam me amā awjarē. Pom wa icakōc xà to icakōc, ca ahna me ikampa itajê nee cupê icakōc xà nare, ne cupê, por pê Inxū ajpên ikujate ata cakōc xà.

²⁵ — Ne wa ita ri cormā ame acahê na imōr xà ita kam, ramā ite me amā ampo itajê cunea to icakōc par-tu. ²⁶ Na quē ha Inxū hacpý ne ajpên ijarkwa kōt me awýr Carō Pejti kujate, quē ha taa me atehcajpa, ne me amā ampo cunea to hahkre. Ne taa ite ampo to me amā icakōc xà itajê to, ate me amji japackre na me ato, ca ha me to amji japackre.

Quē ha Jeju me pahcaxwām pê me pamā me pahcarīc-ti gō

²⁷ — Ne wa ha me amā, pom wa icarīcti kam ipa ita gō, mār ca nee amji mā ame ampo cupa nare, ne nee ampo cupate ame akrihkrit nare. Ampo na? He wa ha pa me apê ate amji mā me ampo cupa, ne ame akrihkrit xà atajê to hamre, ca ha atýj ame apa. Ne wa ha nee ipê me cupê Inxū na mehkwy nare atajê pyrác, ne ijarkwa cacrō to me amān, ca ha me anō akên nō mā axār nare, ne me apej pêa mā ame apa, ne quēt me acarīcti kam ame apa. ²⁸ Ne wa ramā ite me amā: “Wa ha ma tē, ne hacpýa ne me awýr amji jaxà, ne me acahê na apu ipa” hajýr na, ate me ipar. Ampo na? He wa ha ma, por ijirōa pê Inxū Cati ata wýr amji jaxà. Ne quē ha me anō mā ikīn na, ihtýj itēm xà ita pyrên hakry. ²⁹ Wa ha ampo itajê te ito hajýr xà xwýjrea na me amā harên to ipa, mār quē jū caxuw ito hane, ca ha amji mā me ito ampeaj kam pyrentu. ³⁰⁻³¹ Ne jū wýr wa ha ahkri xa ne ame amā icakōc. Ampo na? Quē ha ahtūm nare, quē ha me pahwýr me cupê Pahpām na mehkwy nare atajê jō pahhi, pê me pajō xwýn cato. Ne cupê me pajō xwýn cacrō, quē ha nee jū na iton nare. Ampo na? Hirōa pê icarōt cati na ri. Ne pê ramā Inxū imā: “Cama amji na me pajō xwýn jamā, quēt taa acura” hane. Na wa ha itýj Inxū te imā harkwa to hajýr xà ita na kampa. Ampo na? Mehcunea te imā Inxū kīnti na me ijahkre pej prāmte, wa ha hane. Me to xa cu uu ne me — hajýr. Wa ite me ajpên mā:

— Mēr hacme — hajýr.

Jeju pê pīxō pàr pyrác

15 Ne wa cormā pry kōt me imōar kam, mā Jeju te me imā amji jarên to:

— He ipê pīxō pàr ata pyràac, mā Inxū pê pīxō pàr ata jamār catê ata pyràac, ne ma ijamā. ² Ne por amji mā me ito ihhimpej catêjê atajê pê ihhêj rūm ipajūhtê atajê pyràac. Cwýrjapê quē ha nee jūm te amji mā ite amji kam ijapac xà impar nare na, quē ha ihtýj Inxū itête pō mā mên to hanea, pom quē hān ne pīxō pàr pajūhtê hô nare, mā hamār catê hakep ne curē, ata jīkjê na Inxū te hajýr. Ne quē ha pīxō pàr nō pajūhtê na hô pyxitre apu harij, quē ha hamār catê hōmpu, ne intête ahna xà me, ahna ampo kên cunea harij atajê jūrên pa, cute cumā hô to hàhtōa to prām to. Ita jīkjê na mā Inxū hān ne cute amji mā me ito ihhimpej catêjê atajê to hane. Cute amji kam hapac xà kam, cute me ampo kên to me amji kam hapac atajê cunea jūrê, mā mempej, ne ma ijarkwa kōt, me hàpên xà impejti to amji mā me ipicamên to me ipa. ³ Ne ramā In-

xū te, ite me amā ampo to hahkre itajêa kôt, cute me amā ate amji kam me gapac xà kên jūrên ne to impej. ⁴ Nāmri quê ha pīxô pâr pajūhtê nō te impât ne ihpým na, quê ha nee hô nare, ne cama incrà. Ita jīkjê na, ca ha me anō, ate ijarkwa kôt gâpên xà impejti to gâpên to apa nare, ne amjia kôt gâpên na, quê ha gâpên xà ata kôt apê hamreare ne. Cupate ca ha ikam me akrī kam me to acrà, wa ha hanea ne me akam ikrī kam to icrà. Na cu ha me ajpēan, ne ajkam me pahpyxit peaj, ne atýj ijarkwa kôt me apê. Ne me apê pīxô pâr pajūhtê pejti ata pyrâac, ne ampeaj kam me axô hūhhīc itajê pê me gâpên xà jàhtōa ne impej.

⁵ — Ipê pīxô pâr cati pyrâac, ne me apê ihpajūhtê pyrâac. Quê ha pīxô pâr pajūhtê nō ipàar kam ihcuhhê, ne ihtýj ahna hô. Ita jīkjê na, ca ha ikam me akrī kam me to acrà, ne atýj ijarkwa kôt me gâpên xà impejti to me gâpên to me apa. Nāmri ca ha ate ikam me akrī kam me to acrà nare, ne amjia kôt ame apa na, ca ha nee me ampo pejti ton nare. ⁶ Quê ha jūm te ijicu, ne nee ikam ihkrī kam to incrà nare na, quê ha cupê, cute me pīxô pajūhtê jakep mā incrà, mā cute me to cuprôn, ne cuhy kam me haxwýr, ne me to caxâr ata pyrâac. Quê ha jūm te ipê ampýa mā apu ipa na, quê ha ihtýj amji to acto. ⁷ Ca ha ate amji mā me ito ahimpej kam me to acrà, ne atýj ikam me gapac kam me to acrà na, cu ha me ajpēan, ne ajkam me pahpyxit peaj, ca ha ampo na me iwý, wa ha itýj me amā cugō. ⁸ Na ca ha ate ijarkwa kôt gâpên xà impejti jàhtōa to gâpên to apa na, quê ha ahna me apupu, ne apê ikôt me apa catêjê na me gōmpu, ne me akam ihtýj me Inxū catia to cati. Ne cute amji kam hapac xà impejti ata na me gahkre pej, ne hanea ne Inxū, ihtýj jūm te amji kam hapac xà to impej na hahkre pej.

Jeju mā me pajakryti na me papa na me pahto prām

⁹ — Ne pom Inxū mā ikīnti, mā ma ipupu ne ijamā ita na, wa ha hanea ne me ato, ne imā me akīn, wa ha ma me apupu, ne ma me gamā. Cwýrjapê ca ha nee amji tēte ame ijarkwa curê nare, ne ikôat quêt ame apa, mār wa imā me akīn ita na. ¹⁰ Wa hān ne amji mā Inxū jarkwa na kampa, na ri cumā ikīn, ita na ca ha icuxà hān ne ijarkwa na me ikampa, wa ha imā me akīn ita na.

¹¹ — Ne mēr ampo na mā wa ame amā icakôc xà ita to icakôc? He icuxà me gakryti cunea kam me apa rohnýtti mā na me ato prām, cwýrjapê wa ame amā icakôc xà ita to icakôc.

Cu ha me pamā ajpên kīnti kam me papa

¹² — Ne wa hān ne ijōtpê me amā ijūjarēn to: “Pom imā me akīnti ita cuxà, ca ha me amā ajpên kīnti ne” hane. ¹³ Imā me akīn crāti ita kam, wa ha pa me icurê xwýn mā amji gō, quê ha me acwýrjapê me icura. Ca ha cormā imā me akīn crāti ita na me ijahkre pej.

Me papê, por Jeju te amji mā me pahcapi atajê jō ikwý nō

¹⁴ — Ca ha ate ijarkwa kôt me gâpên na, ca ha me apê me ikwýa to me ikwý. ¹⁵ Ne imā, nee me apê cama me imā me gâpên catêjê atajê nare, ne me apê me ikwýa to me ikwý. Ampo na? Nee mā ampo na nare. He cama me cumā me hâpên catêjê atajê pê me hō pahhi te amji kam hapac xà jahkre kêatre, ne me ca nare. Wa itýj quêt me amā, por Inxū te imā ampo cunea jarēn atajê jarēn to ipa. ¹⁶ He pê ca nee amji mā me icapi nare, ne pa pê wa quêt amji mā me acapi. Ampo na? Nee mā ampo na nare. He ijarkwa kôt ate me gâpên xà pejti ton to me apa to prām to, pê wa amji mā me acapi. Ne me gâpên xà impejti atajê pê quê ha ampo pīxô pejti te jū caxuw hamre xà nare ata pyrâac, ne ihcuhhê rohnýtti mā. Cwýrjapê ca ha ijaprya na ampo na me Inxū wý, quê ha ihtýj me amā cugō. ¹⁷ Ne wa ha hipêr me amā me ate me ajpên kīnti xà ita na awjahkre.

Me cupê Pahpām na mehkwy nare atajê ma ame cupê mehkwy atajê curê

¹⁸ — Ne wa ha ma itēm jakàn pê, quê ha me cupê Pahpām na mehkwy nare atajê, ma ame acurê. Ca ha me acumam cute ame icurê na me to amji japackrea ne. ¹⁹ Ne me cupê Pahpām na mehkwy nare atajê mā mehkwy pê me hūrâcti catêjê pit kīn. Na quê ha me apê me hūrâc na mā, quê ha ihtýj me cumā me akīn. Ne cama nee me apê me hūrâc nare. Ampo na? He wa ite amji tekjêa na amji mā me acapi. Cwýrjapê ri ma ame acaca ne ame acurê. ²⁰ Ne curmā ite me amā ijūjarēn xà ata to ca me amji japackrea ne. “Me cumā hâpên catêjê, nee me hō pahhi catêjê jirōa pê me cati nare. Ne hanea ne nee me hō pahhi japyre mā, me amji pupun to kên to me ipa nare” hajýr. Na quê ha me cupê Pahpām na mehkwy nare atajê, me imā ite amji pupun xà kêanre na me ito. Cwýrjapê quê ha hanea ne ame ate amji pupun xà kêanre na me ato, ca ha ahna me amji pupu. Ne por me pyxitre amji mā me ijarkwa kampa atajê, quê ha hanea ne ihtýj amji mā me akampa. ²¹ Ne mēr ampo na mā quê ha ate me amji pupun xà kêanre na me ato? Nee mā ampo na nare. He me apê ikôt me apa catêjê, na quê ha me ato hane. Ne hanea ne me cupê Inxū te ajpên ikujahêc ata jahkre kêatre, na quê ha ma ame acurê.

²² — Na wa ite me cumā cute mehkên ton xà atajê intête me cumān, ne me cumā harēn prāmte, wa me hýrmā icator. Mā cute me hahkre pej cacrô, ajte nee cute me ton jicu nare. Cwýrjapê quê ha Pahpām ame to kêanre ne. Wa ha icator ne me cumā, cute mehkên xà ton ita jarēn nare na mā, quê ha nee me hahkre pej nare, quê ha Pahpām xwýjê nee ame to kên nare. Ne hamre, jū wýr quê ita caxuw, cute mehkên ton xà ata pê jū kam me cato. ²³ Ne por ma ame icaca, ne ame icurê atajê, hanea ne ma ame Inxū caca ne ma ame acurê. ²⁴ Wa icator, ne me kam mare mā ite icarôt týjti

to, rỳ jũ caxuw jũm te ampo pejti pihho ton nare atajê cunea ton par. Wa ha me kam mare mã ampo itajê ton nare na mã, quê ha nee Inxũ me cumã harkwa to: “Me apê ate me akên ton catêjê” hajÿr nare. Mã ajte cute ita na me ipupun cakrô, ajte ma Inxũ me ajwar ame icurê. ²⁵ Ne pê ramã rỳ pêa mã Mojxe xwÿ ina ihhôt to hane he: “Wa ite ampo kên ton nare cakrô, mã ajte ma ame icaca, ne ma ame icurê” hane. Hajÿr ata na mã cute me iton he.

Pahpãm Carô Pejti ri me pamã Jeju to hahkre

²⁶ — Ne quê ha ampo kên itajê te ame ato hajÿr cakrô, ca ha nee ame amji mã pa, ne nee ame akrihkrit nare. Ampo na? He wa ha itÿj me amã Pahpãm Carô Pejti te catyt kam me amã ampo to hahkre catê ata kujate. Quê ha me atehcajpa, ne me amã ihcunea na ikôt harên to hahkre. ²⁷ Ne me ca, ca ha hanea ne mehcunea mã ikôt harên to me apa. Ampo na? He pê ca mam quêt ikôt me apa, na ri ihcunea na ramã me amã ijahkre pej.

Quê ha me pahte amji pupun xà kêanre ata nee me pahto jũ mãn nare

16 — Ne wa ha jũ caxuw ampo te ito hajÿr xà ata kam, ate ame icaca, ne ame imã hikran cupate, wa ite ramã me amã ampo itajê cunea jarên hiahpuro. ² Nãmri quê ha ihtÿj ikôt me cumã me acurê, ne quê ha cute me cuprôn xà jũrkwa pê, ihtÿj me gapôj. Ne quê ha mehkwy kwÿ te amji to me Pahpãm cajpuaw na me amji cãmjĩ xà to, quê ha ihtÿj hanea ne me acura. ³ Ne ampo na quê ha ame ato hane? He me cupê ijahkre kêatre, ne me cupê Inxũ jahkre kêatre, na quê ha ame ato hane. ⁴ Ne quê ha ampo itajê me ato hane, ca ha ite ramã me amã harên hiahpuro na, me ito amji japackre pyrentu. He pê wa mam aracri ame akôt ipa, ne nee ajco me amã ampo itajê jarên to hajÿr to ipa nare. Ampo na? Pê wa pa me apytâr to ipa na pê.

Quê ha Jeju me pamã Pahpãm Carô Pejti kujate

⁵ — Ne hamre, ramã ma hacpÿ mã ajpên cute ikujahêc catê ata wÿr ite amji jaxâr xàa kam ramã hànhuc to mõi, na wa itÿj me amã ampo itajê cunea jarên to mõi. Ca nee ajte jũ kam itêm xà ita na me icukij nare. ⁶ Ne wa ramã ite me amã hacpÿ mã amji jaxâr xà ata na amji jarên, cwÿrjapê ri ajte me amã amji kĩn nare, ne me apeacre. He nee ame apec nare! ⁷ He ampeaj kam wa me amã amji jarê, ne wa nee apu ihêj xi jarên nare he. Imãa hacpÿ mã ite amji jaxâr xà ita na ri me amã ihkênre nare. Ampo na? He wa hacpÿa ne amji jaxâr nare, quê ha nee ajpên Pahpãm Carô Pejti te me atehcajpar catê ata me awÿr iwrÿc nare. Na wa ha ma tẽ, ne itÿj ajpên hacpÿ ne amji jaxà kam me amã ihkujate.

Quê ha Carô Pejti hÿrmã me cupê mehkwy nare atajê pipkjêr na me to

⁸ — Ne quê ha Inxũ Carô Pejti te catyt kam me amã ampo to hahkre catê ata te me awÿr cator na, quê ha taa me cupê Pahpãm na mehkwy nare atajê mã ampo crê atajê to hahkre, quê hame hahkre pej. Atajê pê, cute me ampo kêanre ton xà na cute me amji jahkre pej xà me, cute catyt kam imã ite amji kam ijapac xà to impejti jahkre pej xà me, jũ caxuw Pahpãm te, cute me hàpên xà ton na amehcukij na cute me hahkre pej xà. Hõi, ampo crê itajê to, quê ha Inxũ Carô Pejti ata cute me hahkre pej na me to he. ⁹ Quê ha Carô Pejti, por nee ito amji mã mehhippej nare ne ame ampo kêanre ton to ame ipa atajê na, cute me amji jahkre pej na me to. ¹⁰ Ne quê ha hanea ne ipê Pahpãm mã catyt kam ipa catê na, cute me ijahkre pej na me to. Na wa hama hacpÿ mã Inxũ wÿr tẽ, ca ha nee me ipupun to acuhê tu nare. ¹¹ Ne quê ha hanea cute mehkên ton xà atajê jahpan xà na, Inxũ te mehcukij ne mehkên mã me irên na, cute me hahkre pej na me to. Na ri cute me ampo kên ton xà itajê jõi pahhi pê Xatanaj ata kên mã mên xàa kam xa.

Quê ha Pahpãm Carô Pejti me pamã, ampo cunea to hahkre

¹² — Ne cormã ampeaj kam imã me amã ampo jarên xà itajê jàhtô, wa me amã ampo itajê cunea jarê na mã, ca ha nee mempar, ne me hahkre pej nare. ¹³ Ne nee ita na cute me amã jũ mãn nare. Ampo na? Quê ha jũ caxuw Inxũ Carô Pejti te catyt kam me amã ampo to hahkre catê ata ajpên me awÿr cato, ne ta ame amã ampo itajê cunea to hahkre pa. Ne catyt kam, harkwa kôt, Inxũ te amji kam hapac xà impejti itajê to pit mã me amã hahkre, ne nee mã, quê ha amjia kôt me amã to hahkre nare. Ne me amã, por ajpên cormã me awÿr ampo cator nare atajê to hahkre. ¹⁴ Ne me akam mare mã amji mã icatia to icati na ijarê, ne cute amji mã me icupa na me to, quê ha ihtÿj amji mã me icupa. Ampo na? He quê ha icakôc xà to pit mã ihcakôc, na quê ha hane. ¹⁵ Ne por Inxũ mã ampo cunea atajê te hajÿr, ne cupê itekjê. Na wa ha Pahpãm Carô Pejti mã ampo jarê, quê ha ma me amã to awjarê.

Pê Jeju hacpÿa mã ihtÿr na me cumã amji jarê

¹⁶ — Ne quê ha ina amcro hàhtô nare, ca ha nee hipêr me ipupun nare. Ne hanea ne ina amcro hàhtô nare, ca ha hacpÿa mã me ipupu — hajÿr. Jeju te me imã amji jarên to hajÿr.

¹⁷ Wa ite me ajpên cukij kam me itêm, ne me ajpên mã:

— Ne mër ampo na mã tee ame pamã amji kôt harên to hahkre. Ne ajte amji jarên to: “Quê ha ina amcro hàhtô nare, ca ha nee hipêr me ipupun nare. Ne hanea ne ina amcro hàhtô nare, ca ha hacpÿa mã me ipupu” hane. Ne hanea ne ajte amji jarên to: “Ita cwÿrjapê wa ha ma hacpÿ mã Inxũ wÿr tẽ” hane. ¹⁸ Ne mër

ampo jarĕn xà pĕ mǎ: "...amcro hàhtô nare..." ita? Wa nee me ite ihcakôc xà itajê nõ na mempar, ne me hahkre pej nare — hajÿr.

¹⁹ Mǎ ampo na ite me Jeju cukij prǎm ata na cute me hahkre pej pyrentu, cwÿrjapĕ ri me imǎ:

— Xà ite me amǎ: "Quê ha amcro hàhtô nare, ca ha nee me ipupun nare, ne ina amcro hàhtô nare ca ha hipĕr me ipupu" ata na mǎ ca ame ajpĕn cukij? ²⁰ Ampeaj kam wa ha me amǎ ijÿjarĕn xà ita to awjarĕ. Ca ha atÿj jÿ caxuw ame amrǎ, ne me amǎ amji kĭn nare ne, ne me apeacre ne. Ne me cupĕ Pahpǎm na mehk-wÿ nare atajê, quĕ ha ihtÿj quĕt ame hakry. Cakrô, quĕ ha hacpÿ ma mǎ mam me amǎ amji kĭn ata jirôa pĕ me amǎ amji kĭn. ²¹ He pom hǎn ne me cahǎj mǎ mehkra hà mǎ me cumǎ amji kĭn nare, mǎ me cumǎ ajhu, mǎ hacpÿ ma mǎ mehkàj xà to me hapac kĕt, ne me cumǎ amji kĭn, ne me cumǎ mehkra pÿpÿm pyrĕn ame hakry, ita jĭkjĕ na ca ha me hanea. ²² Ne amcro itajê kam me amǎ amji kĭn nare cakrô, cu ha hipĕr me ajpĕn pupu. Jirô pĕ mǎ quĕ ha me amǎ amji kĭn to amji kĭn ata, quĕ ha nee jÿm me apĕ caxàr, ne me apĕ to hamre nare.

Cu ha Jeju japrÿa na me Pahpǎm mǎ me pahcakôc

²³ — Ata caxuw ca ha nee hipĕr ampo na me iwÿr nare, ne me apĕ me ikwÿ te hajÿr romǎ mǎ, ca ha ijaprÿa na, ampo cunea na ate Inxÿ na me gǎhwÿr xà atajê, quĕ ha ihtÿj me amǎ cugô. ²⁴ Ca ajte nee cormǎ me ate ijaprÿa na ampo na me Pahpǎm wÿr nare. Na ca ha ita caxuw atÿj ijaprÿa na ampo na me Inxÿ wÿ, quĕ ha ihtÿj me amǎ cugô, ca ha me acwa, ne me to mam me amǎ amji kĭnti ata ràn, quĕ ha me girô pĕ ih-pÿm tu ne.

²⁵ — He wa nee cormǎ hirǎa pĕ me amǎ ijÿjarĕn xà itajê jarĕn to ipa nare, ne incwÿrpĕ me amǎ harĕn to ipa. Ne wa ha jÿ caxuw quĕt hirǎa pĕ me amǎ Inxÿ te amji kam hapac xà jarĕ, ne me amǎ to ajpĕ. ²⁶ Ne ca ha jÿ caxuw me apĕ me ikwÿ te hajÿr romǎ mǎ ijaprÿa na ampo na me Pahpǎm wÿ, wa ha nee hipĕr ahna cumǎ me acajrĕn to prǎm nare. ²⁷ Ampo na? He ihtÿj ita caxuw cumǎ me akĭn, cwÿrjapĕ quĕ ha taa me akampa, ne me amǎ ampo atajê gô. Ampo na ri cumǎ me akĭn? He ca ihpĭan icator xà na amji mǎ me ito me ahimpej, ne me amǎ ikĭnti incwÿrjapĕ ri ihtÿj cumǎ me akĭn. ²⁸ Ne wa Inxÿ pĭn ajpĕn pjĕ ita wÿr icator, na wa ha ita caxuw pjĕ ita re, ne ma hacpÿ mǎ hÿrmǎ tĕ — hajÿr.

Pĕ Jeju ihkôt me ipa catĕjĕ mǎ cute me cumǎ hikran na harĕ

²⁹ Wa ite me cumǎ:

— Hamre, ca ita caxuw hirǎa pĕ gÿjarĕn xà itajê kôt harĕn to mǎ. Ne nee incwÿrpĕ me imǎ ihkôt harĕn to amôr nare. ³⁰ Na wa ita caxuw, ite me ate ampo cunea jahkre pej na me gahkre pej, ne amǎ cute ampo na me acukij xà xwÿjrea na, ramǎ amǎ me hahkre pej, me

hàhcukjĕr xà atajê na. Cwÿrjapĕ wa ita caxuw itÿj Pahpǎm pĭn acator na amji mǎ me ato ihimpej — hajÿr.

³¹ Mǎ me imǎ:

— Xà ita kam cormǎ, ajkĭ ate amji mǎ ito me ahimpej? ³² Co he, nǎmri ramǎ ihhĕj ne ipĕ me apicràn xàa kam hàhhuc to mǎ. Ca ha atÿj me irer pa, ne ma ame gÿrkwa wÿr me pra, wa ha ahte ahtwÿ cakrô, wa ha nee ahte ijàhhuc nare. Ampo na? Quĕ ha ihtÿj Inxÿ icahĕ na apu mǎ. ³³ Ne ame akrihkrit cupate, wa mam ite me amǎ ijÿjarĕn xà itajê to ijÿjarĕn. Mǎr ca ikam me amji hōnco, ne me acaxwǎm pĕ me acarĭcti ne. Ne pjĕ ita kam, me cupĕ Pahpǎm na mehk-wÿ nare atajê kam, ca ha ame amji pupun xà kĕanre to ame amji pupu. Cakrô, ca ha nee ame cumǎ me apec nare, ne me cumǎ amji to ihtÿaj ne. Ampo na? He wa ramǎ me hō pahhi mea mǎ ite me tohjĕ, ne me hirô pĕ ixǎm — hajÿr.

Pĕ Jeju Hÿm Cati mǎ amji cajrĕn

17 Jeju te me imǎ hÿjarĕn to hajÿr jirô pĕ mǎ ri kǎj mǎ, cōjkwa wÿr irĭt, ne cute Hÿm mǎ:

— Ÿhÿ Inxÿ, hamre ramǎ ityc xàa kam hàhhuc. Inxÿ, ipĕ akra catia to icati na, cute me ijahkre pej xà na me to, quĕ mehcunea me ijahkre pej, mǎr wa hanea ne acatia to acati na, cute me gahkre pej xà na me to, quĕ mehcunea gahkre pej. Cwÿrjapĕ ca ha hacpÿa mǎ ityc jirô pĕ ito itĭr ne amji wÿr ijaprô. ² Ne pĕ ca imǎ garkwa hyr to hane he: "Pjĕ wÿr ate acator, ne ate amji to me hō Pahhiti na, ne mehcunea to ahimpej xà caxuw, ramǎ ite amǎ acarôt jōr. Ne wa ha amǎ me hàhtôa ne cugô, ate me to gō tekjĕ xà na, quĕ ha ato amji mǎ mehhimpej, mǎr quĕ pahcahĕ na amji to me ipijapar rohnÿtti mǎ" hane. ³ He apyxit peaj ne quĕt apĕ Pahpǎm, ne nee aràn xà na jÿm pĕ Pahpǎm nare. Ne ipĕ por ate Jeju Crixto kujahĕc ata. Ne me pahkwÿ te me pajahkre pej, cwÿrjapĕ quĕ ha me pahcahĕ na amji to me ipijapar rohnÿtti mǎ. ⁴ Ite ramǎ acatia to acati na pjĕ ita kam, cute me gahkre pej xà na me ton. Ne ate imǎ ijapĕn xà jōr ata, ramǎ ite hipĕj xàa kam. ⁵ Ne pĕ wa ramǎ ate pjĕ ton xwÿjrea na mam acahĕ na ipa, pĕ amǎ icatia to icati. Na wa ha ita caxuw ma awÿr amji jaxà, ca ha amji cuna mǎ hacpÿa mǎ ito icatia to icati.

Pĕ Jeju Hÿm Cati mǎ ihkôt me ipa catĕjĕ cajrĕn

⁶ — Ÿhÿ, pĕ ca imǎ me cupĕ me akwÿ atajê gô, ite me cumǎ ate amji kam gapac xà to hahkre, mǎ cute me gahkre pej prǎmte. ⁷ Na ri ihtÿj cute me garkwa kam hapac. Ne ihtÿj ita caxuw arÿam iwÿr me cumǎ ampo cunea imprar na hahkre pej. ⁸ Na wa ite, ate me cumǎ icakôc xà na gÿjahkre xà atajĕa to, wa ite me cumǎ icakôc, mǎ ihtÿj cute mempar, ne ahna me amji caxàr. Ne ihtÿj amji mǎ ate ajpĕn me hÿrmǎ ipyxit peaj ne ikujahĕc na me ato hane. Ampo na? He nee mǎ ita pĕ ahĕj xi xà nare, ne ampeaj kam ri.

⁹ — Ne wa itÿj amǎ mehcajrĕn, ne nee mehkôt amǎ mehcunea pĕ me pahkwÿ nare atajê cajrĕn nare, ne por ate me imǎ hōr atajê pit, wa amǎ mehcajrĕn. Am-

po na? Me cupê gō tekjêa, na wa apu mehcajrên. ¹⁰ Ne mehcunea pê itekjê atajê pê atekjê, ne mehcunea pê atekjê atajê pê itekjêa. Cwÿrjapê ri pahkôt me ipa catêjê atajê kôt, cute ramã icarôt tÿjti, ne icatia to icati na me ipupun. ¹¹ Ne wa ha ma hacpÿ mã awÿr amji jaxà, quê ha ahte pjê kam cormã me ahtwÿ ne ame ipa. Inxũ, ampeaj kam apeaj to apej. Cwÿrjapê ca ha ca atÿj acarôat to me pahkwÿ jamã. Ampo na? He ampeaj kam acarôt tÿj, na pê ca imã icarôt tÿjti ita gō. Cwÿrjapê ri ajkam pahpyxit peaj. Mār quê me pahkwÿ itajê pê me pahpyràac, ne me ajpên hōnco tu ne, cute pahcuxà ajkam me pyxit peaj prāmte. ¹² Pê wa pjê kam cormã ame cahê na imōr reria mã, itÿj, por ate imã acarôt jōr ata to ajco me hamār to me hÿtār to ipa. Mã nee ijÿhkra pê mehnō cator, ne ipictor nare. Ne por ramã gō kãhhōc te jÿm pyxit peaj ne, ne cupê Juta Carijot ata ipictor na harên ata ri, amjia kôt ahnaa cute amji to ipictor.

¹³ — Ne wa hacpÿ mã ite awÿr amji jaxàr xwÿjrea na, cormã pjê kam ame cahê na imōr reria mã me cumã garkwa cunea to hahkre to ipa, mār quê me hahkre pej, ne me cumã amji kÿnti ne. Pom wa ahnaa mã imã amji kÿn na amji cajpê ita na, quê icuxà me amji cajpê. ¹⁴ Wa ite ramã me cumã garkwa to hahkre, ne me cumã hōr. Mã me cupê ipyràac, ne nee me cupê pjê ita tekjê nare, cwÿrjapê ri me cupê pjê tekjê atajê ma amehcaca, ne ame curê. ¹⁵ Ne wa ha me cumã ana ahwÿ, ca nee cormã ne pjê ita pê amji wÿr me haprōr nare, ne ma cama me ahna me pahcurê xwÿn jamã, ne me cupê me hÿtā, mār quê nee ihkôt me amji kam hapac nare. ¹⁶ Ne cute me amji kam hapac xà pê ite amji kam ijapac xàa pyràc, na ri nee me cupê pjê tekjê atajê te amji kam hapac xà pyràc nare. ¹⁷ Ne garkwa cakōc xà itajê nee ihhêj xi jarên nare, ne ihtÿj cute catyt kam me ipa xà caxuw me hapackre, mār quê ihtÿj me awpa, ne catyt kam me ipa. Na quê ha me cupê atekjê. ¹⁸ Ne pom pê ca pjê wÿr ikujate ita na, wa ha me to, ne pjê cunea kôt ame cucrà, quê ha ame cumã pajarkwa pejti ita to hahkre to me ipa. ¹⁹ Ne wa ite ijàpên xà caxuw amã amji jōr ita na quê ha me amã amji gō, ne ihtÿj me amã me hàpên to me ipa.

Pê Jeju Hÿm Cati mã mehkwy cunea cajrên

²⁰ — Ýhÿ Inxũ, wa ha nee me pahkwÿ crêre itajê caxuw pit mã ana ijàhwÿr nare. Ne hanea ne cute cormã jÿ caxuw mehkôt me ikam hapac ne ito amji mã mehhimpej atajê mã, wa ha ana ahwÿ. ²¹ Ne imã cute me amji kam hapac xà pyxit peaj na mehhōncoti na me to prām. Pom ahnaa mã pamã pahte amji kam pajapac xà pyxit peaj he, ita to cute me amji kam me hapac na ri, imã me to prām. Ita na quê ha me cupê me pahkwÿ nare atajê cute amji kam me hapac xà pyxit peaj na me hōmpu, ne ihtÿj ate ikujahêc na me gahkre pej. ²² Ne pom ate ito icati ita na, wa ite me to cati, na ri cute amji kam me hapac xà pyxit peaj na me amji hōnco tu, ne me pyxit peaj te hajÿar, pom cu ajkam pahhōnco, ne pahpyxit peaj he. ²³ Ne ampo na mã wa ame cumã ana ijàhwÿr to hane? Nee mã ampo na

nare. He mehcunea mã cute amji kam me hapac xà pyxit peaj to prām to, wa ame cumã ana ahwÿ, mār quê mehcunea me hōmpu ne ate ikujahêc na me gahkre pej. Ne pom amã ikÿnti ita na, quê ha amã mehkÿnti na cumã me gahkre pej.

²⁴ — Ýhÿ Inxũ, por ate imã me hōr atajê me pahcahê na amji to me ipijapar na, imã to prām. Ne ca ha me kam mare mã ate ito icati, mã cute me ipupun, ne me ijahkre pej. Na ca ha atÿj ito hane. Ampo na? Pê ca ramã mam pjê ton xwÿjrea na amã ikÿnti, na ca ha ito hane.

²⁵ — Inxũ, he ca quêt catyt kam akrÿ ita na, ne ita ri pjê kam mehcunea pê gahkre kêatre. Ne pa nare, ihtÿj quêt imã catyt kam akrÿ ita na gahkre pej. Ne por ate imã me hōr atajê te hajÿar ne ihtÿj ate ikujahêc na me cumã gahkre pej. ²⁶ He wa ite me cumã garên, mã cute me gahkre pej. Ne wa ha me cumã garên to ixãm ita na, mār quê me cumã ajpên kÿn to hanea, pom quê amã ikÿn he. Ne ite amji kam ijapac xà pyxit peaj ata to pit mã me amji kam hapac to me ipa, mār wa ajpên kam me ipyxit peaj — hajÿr.

Pê krãhtare te Jeju pro

18 Ne Jeju te Hÿm mã ihcakōc to hajÿr jirō pê mã ri ma me ipê ihkôt me ipa catêjê to mō, Kÿhti jō caprÿm jÿkjê wÿr. Mã curi pÿxō jō pjê ata, wa cumã me ixàr.

² Pê Juta pê Jeju kên mã mên catê ata ramã pjê ata jahkre pej. Ampo na? Pê Jeju ramã curi me ito ipa to hàhtōa na pê. ³ Mã ma me iwÿr Juta ata krãhtare kwÿ to mō, mã hanea ne mehkôt Pahpãm jÿrkwa jamār catêjê kwÿ me mō. Ne pê Pÿxō jō pjê ata wÿr me mō atajê pê, me cumã Pahpãm mã mehcajrên catêjê jō pahhi kwÿ me, Parixêw catêjê kwÿ me, me ajpên pa, na pê me harkwa kôt me iwÿr me hàprê xà me, ihpōc xà me, cuhy pàr kwÿ me, me to mō.

⁴ Pê ramã Jeju ampo te to hajÿr xà atajê cunea jahkre pej. Cwÿrjapê ri me cuna mã mō, ne cute mehcukij to:

— Jÿm mã ca ame hapê? — hajÿr. ⁵ Mã me cumã:

— Naxare jō krÿ pÿn Jeju cator ata wa ame hapê — hane. Mã hanea ne Juta pê Jeju kên mã mên catê ata me cahê na xa. Mã Jeju me cumã:

— He pa wa! — hane. ⁶ Mã Jeju te me cumã amji jarên to: “He pa wa” hajÿr, me ajkaam mã hÿpate Juta kôt me ipa catêjê cunea, hacpÿ mã pjê kam me hō to ame ipihur.

⁷ Mã hipêr Jeju te mehcukij to:

— Jÿm mã ca ame hapê? — hajÿr. Mã me cumã:

— Naxare jō krÿ pÿn Jeju cator ata wa ame hapê — hane. Mã me cumã amji jarên to:

⁸ — Wa ite ramã me amã amji jarên, he pa wa. Ne ca ha ate ame pamãn japên na, ca ha nee ame ikwÿ caxun nare, quêt taa ame pra — hane.

⁹ Ampo na ri cute ita ton? Nee mã ampo na nare. He pê ramã taa me ahna Hÿm mã amji jarên to: “Ijō Inxũ Cati, ate imã me hōr itajê, ite nee amji pê mehnō to ipictor xà nare” hane.

Pê Petrô jûm ita japac jakep

10 Mă Ximăw Petrô te wapo xwahhihti caxâr, ne to hûmre nõ japyr te Marco ita jaxôp, ne awpôc rûm to hapac jakep. Ne pê hûmre ata pê Pahpăm mã mehcajrën catêjê jô pahhi mã hâpên catê. 11 Mă Jeju te Petrô mã harkwa to:

— Ajô wapo xwahhihti ita xi, nee ca apu to me cupê ipytâr prâm nare. He ite amji pupun xâ kêanre xâ ita caxuw ri Inxû te ajpên iwyr mehkujahêc. Xâ wa ha ajkî nee cumă ixâr nare? Wa ha itȳj cumă axâ — hajyr.

Jeju Anati cuna mã xa

12 Mă krăhtare me, to ihhimpej catê me, Pahpăm jûrkwa jamâr catêjê jô pahhi kw̄y me, cute me Jeju pro, ne hûntȳj na mehcajpre. 13 Ne pê Cajpa pê caku ata kam, me cupê Pahpăm mã cute mehcajrën catêjê jô pahhi. Ne ma Cajpa ata jûprequêt pê Anati ata jûrkwa wyr me to mō. 14 Ne Cajpa pê pahhi ata pê ramă me hapackre to hane he: “Quê ha jûm xûmre pyxit peaj ne ty, cu ha nee me pahcunea me pahtyc nare” hane.

Pê Petrô cute nee Jeju pupun nare na, amji jarê

15 Wa ma Ximăw Petrô me, Jeju kôt me mō. Pê ramă Pahpăm mã cute mehcajrën catêjê jô pahhiti ata ipupun pejtu. Cwyrjapê wa ma Jeju kôt ixâr, pahhi jûrkwa jarkwa mã carâ intête kw̄yc ata wyr. Mă cormă curia, pō pê Petrô xa. 16 Wa ite harkwa jamâr catê cahj nõ ata mã icakôc, ikw̄y nõ Petrô te ikôt hâr xâ caxuw. Mă ihtȳj cute hâr na hamâr, mã hâr. 17 Mă cahjre te hõmpun ne cumă harkwa to:

— Xâ apê, por cute me jûm pro ata kôt apa catêjê nõ amă ca? — hajyr. Mă cumă:

— Quê! — hane.

18 Ne ampeaj kam kry, cwyrjapê ri pahhi mã me hâpên catêjê me, krăhtare te me cuhôn, ne mehkră ne ahna me xa, ne ame amji cro. Mă hanea ne me cahê na Petrô xa ne amji cro.

Pê Jeju cute Pahpăm mã mehcajrën catêjê jô pahhiti cuna mã xa

19 Mă Pahpăm mã mehcajrën catêjê jô pahhiti te Jeju cukij ne cumă:

— Jûmjê pê mã akôt me ipa catêjê? Ne ampo to mã ca amehcunea mã hahkre to apa? — hajyr.

20-21 Mă Jeju te cumă amji jarën to:

— He wa ijôtpê mehcunea kam mare mã icakôc to ipa. Ne ramă cute Pahpăm to me amji kam hapac xâ jûrkwa me, cute me cuprôn xâ jûrkwa atajê kam, ite me cumă ampo to hahkre to amji pyrâc tu. Ne rÿ jû caxuw ite ampo to ipimxur pëa mã apu harën to imör nare, nõ na mã ca ajte apu icukij xâ ita to icukij? Ne cute me ipar catêjê ca mehcukij, wa ite ampo jarën xâ atajê na, cute me ipar to kêanre nare. Na ca ha mehcukij — hajyr.

22 Jeju te ihcakôc to hajyr. Mă cahi na krăhtare xa ata te cakwîn, ne cumă harkwa to:

— Xâ ajkî Pahpăm mã mehcajrën catêjê jô pahhi mã me pahcakôc xâ te hajyr? — hajyr. Mă Jeju cumă:

23 — Wa ihhêaj to ampo jarën xâ kaj na harê, ca ha mër imă harê, wa hahkre pej. Nâmri wa ha ite ampeaj kam ijûjarën na, ca ha nee icakwîn nare. Ne mër ampo na mã ate icakwîn? — hane.

24 Jirô pê mã ri Anati pê amji jahkre kêatre, mã cute Jeju cajprea na Cajpa, pê cute Pahpăm mã mehcajrën catêjê jô pahhi ata mã ihkujahêc.

Pê hipêr Petrô cute nee Jeju pupun nare na amji jarê

25 Mă curia cormă cuhy na Petrô xa, ne amji cro. Mă cute mehcukij to:

— Xâ apê cute me jûm pro ata kôt me apa catêjê nõ mã ca? — hajyr. Mă me cumă amji jarën to:

— Quê, he nee ipê mehnõ nare — hane.

26 Mă pahhi mã hâpên catêjê nõ pê, por Petrô te jûm japac jakep ata jûkjê nõ ata, te Petrô jarën to:

— Mâr wa ite Pîxô jô pjê kam ihkôt apupun ta? — hajyr. 27 Mă hipêr Petrô cumă:

— Quê — hane, me ajkaam mã hõxăhxăc kâr.

Pê Jeju Roman catêjê jô pahhi pê Pirat cuna mã xa

28 Jirô pê mã ri Roman catêjê nõ pê krî jô pahhi jûrkwati ata wyr Jeju to me mō, ramă apê intuwti kam. Mă nee ikre ata mã Juta catêjê nõ xâr nare. Ampo na? Cute me amji to me amji kam hapac xâa na pê me hane. Quê ha ramă amji kîn ata na ahtêp, quê ha nee Juta catêjê me, mehcahkrit catêjê atajê pê Juta catêjê nare atajê jûrkwa mã amencjêj nare. Ampo na? Cute amji kîn ata japy ame amji to kêan cupate. Na pê nee ikre ata mã Juta catêjê nõ hâr nare, cute ihtȳj me Hakren xâ jô atajê kur prâmte. 29 Mă Pirat pê Roman catêjê nõ pê krî jô pahhi ata cator, pō mã, cute mehcajpar prâmte. Ne cute mehcajpar ne me cumă:

— Hûmre ita jarën kêan jû to mã, ca ha ame imă harê? — hajyr.

30 Mă me cumă harën to:

— Quê ihkên nare na mã, wa ha nee mehpro ne awyr me to imör nare — hane. 31 Mă Pirat me cumă:

— Ca ha caa quêt, ate me amji kam me gapac xâa kôt, me ate me amji ton xâa kôt, mehcukij ne ihkên mã me amê — hane. Mă Juta catêjê me cumă:

— Pom hûmre ita te ihkên xâ ton xâ ita ihtȳj ihcuran na awjahkre. Cakrô wa nee amjia kôt ite mehcuran xâ nare, ne apêa ri pahhi, cwyrjapê ca ha caa amji kampa, ne ihcuran na me imê, wa ha cormă mehcura — hane.

32 Ne pê ramă Jeju kÿj pê, pî na ajêt ne ihtyc to mör na amji jarêa na pê, Juta catêjê cakôc xâ ata ramă cute amji jarën xâ ata na to ipipê to mō.

33 Mă hacpÿa mã Pirat xâr, hûrkwa mã, ne cute Jeju mã hâkjêr ne ihcukij to:

— Xâ apê Juta catêjê jô Pahhi? — hajyr.

34 Mă Jeju cumă:

— Xâ amjia kôt ate icukij xâ ita to hajyr? Nare jûmjê te amă ijarën xâ kôt mã ca ate icukij ita to hajyr? — hane.

35 Mā Pirat cumā:

— Côt mā ca atýj ipê Juta catêjê nõ na apu icāmji? He me akwya kwý me, me hõ pahhi catêjê te ri imã me gõr. Ne mër ampo to mā ate jũ mǎn? — hane. 36 Mā Jeju cumā:

— He ihmpej xà ita pê nee pjê ita tekjê nare, ne quêt cõjkwa kam ri ihmpej xà. Wa ha ipê pjê ita kam pahhi xà na mā, quê ha ramã ikõt me ipa catêjê ihtýj itête me ajpu, Juta catêjê mā cute me ijõr to hajýr cupate. Ne nee pjê ita kam ipê pahhi xà nare — hane.

37 Mā Pirat cumā:

— Xà mër apê pahhi? — hane. Mā Jeju cumā:

— Pom ca atea ita na ijarên ita? Ampeaj kam ri ipê Pahhi, ne ite catyt kam amji kam ijapac xà jarên to ipa xà caxuw, wa pjê ita wýr icator, ne caxuwaw pê wa ipým, ne pjê ita wýr ajpên mō. Ne por quê ha jũm ampeaj kam ite catyt kam amji kam ijapac xà ata na ito amji mā ihmpej ata, quê ha ihtýj ikõat amji to — hane.

38 Mā Pirat cumā:

— Ne mër ampo pê mā "...ampeaj kam..." me "...catyt kam..." ita? — hane.

Pê Pirat Parapa mā hikra

Jirô pê mā ri hipêr Juta catêjê wýr cator, cute me cumã ihcakõc prãmte, ne me cumã:

— Wa nee ite hũmre ita curan xà caxuw kam ampo kên nõ mā icator nare. 39 Ne me Hakren xà jõ amji kǐn ita cunea kam wa hǎn ne itýj me amã me hacjên catêjê pyxit ne hapõj. Xà wa ha ajkǐ Juta catêjê jõ Pahhi ita mā hikra? — hajýr.

40 Mā mehcunea ame caràr to:

— Quê, nee ca cumã hikran nare, Parapa mā, ca ha hikra — hane. Ne por Parapa ata pê ri hàprêa kam me cupê ampo to põj catê.

Pê krãhtare Jeju cahhy ne ahna xwý

19 Mā Pirat te krãhtare kwý mā pryti kà kam wakýre to Jeju cahhyr kēanre na harkwa. 2 Mā krãhtare te me to hapactu na me ajpên par, ne me amji mā:

— Hacme, ne ame to pajapactu — hajýr. Ne cute hõmjĩ to me cumã pahhi krãhkã, ne ihkrã mā me haxàr. Ne cute me hõ pahhi kà intepti ata mā me haxàr, ne ahna me hãm, mā xa. 3 Mā hýrmã me pra ne ahna me ahtêp ne me ahna xwý to:

— Hàpà Juta catêjê jõ pahhi, ampeaj kam apej, ne ampeaj kam atýj! — hane. Ne ajco me hũhkra krã to mehcahhy.

4 Mā hipêr me hàhtõti atajê wýr Pirat cator, ne me cumã:

— Me ikampa! Wa ha ajpên Jeju ita to mō, ne me acuna mā hãm. Ne imãa ihhêj ne nee cute ampo kên ton nare, ite ihcuran xà caxuw. Ne mër ampo na wa ha ajte ihcura? — hane. 5 Mā Jeju cator, ne ihkrã na hõmjĩ te me hõ pahhi krãhkã ata ajêt, mā ihkã intepti kam xa. Mā Pirat te me cumã harên to:

— Nãmhã hũmre ita xa he! Me hõmpu, imãa ramã ihhêj ne cute amji pupun xà kēanre na amji pupun — hajýr.

6 Mā Pahpãm mā mehcajrên catêjê jõ pahhi kwý me, cute me Pahpãm jũrkwa jamãr catêjê me, cute me Jeju pupun, ne me caràr kam me to ihtêm, ne me caràr to:

— Pĩ kam me axõ! Pĩ kam me axõ quê ty! — hane. Mā Pirat me cumã:

— Wa nee ite kam ampo kên mā icator nare ita kam, wa nee ihcuran nare. Quê ha me amã ihcuran prãm na, ca ha me caa, ate amji kam me gapac xàa to me to mō, ne pĩ kam me axõ ne mehcura — hane.

7 Mā Juta catêjê me cumã:

— Me icaca xà jõ kãhhõc kam, cute harên to: "Quê ha jũm te cupê Pahpãm kra na amji jarên na, quê ha ihtýj mehcura" hajýr. Cwýrjapê ca ha atýj ite mehcuran xà na me imê, wa ha mehcura — hane.

8 Mā Pirat te, Jeju te Pahpãm kra na amji jarên na, me harên par, ne ampeaj kam cumã hũpa. 9 Mā ma hacpý mā hũrkwa mā hàr, ne cute Jeju cukij to:

— Jũ pǐn mā ca ajte acator? — hajýr. Mā nee Jeju te cumã jũ mǎn nare. 10 Mā Pirat te cumã harkwa to:

— Xà amã imã acakõc prãm nare? He xà amã itýj ite acuran xà me, amã hikran xà na, apê ijahkre kēatre? — hajýr.

11 Mā Jeju cumã:

— Quê ha kýj rũm cõjkwa kam Inxũ pǐn ate ito hajýr xà ita caxuw amã acarõt cator nare na mā, ca ha nee ito jũ mǎn nare. Ne por jũmjê te amã ijõr atajê te ri girõa pê ito kēanre — hane.

12 Mā Pirat te ihcakõc xà ata na kam hapac, cwýrjapê ri ihtýj cumã Jeju mā hikran prãm cakrõ, mā Juta catêjê ame cumã caràr to:

— Ca ha ate cumã hikran na, ca ha nee ramã apê pjê cunea jõ pahhiti pê Xexa ata jõ ikwý nõ nare! Ne por jũm amã cupê pahhi na amji jarê ata pê ri gõ pahhiti, ne cupê Xexa curê xwýn! — hane.

13 Mā Pirat te ita kam hapac, ne põ mā Jeju to cator. Por põ pê kên te ihcahty, mā Juta catêjê te me harkwa na me cumã hapý to Capata ata wýr Jeju to cator, mā xa. Mā Pirat te ihkrĩ xà kam mehkên catêjê cukij xà ata kam hýr, cute Jeju kên mā mên xà caxuw. 14 Ne pê amcro ata kam, cute me Hakren xà jõ amji kǐn kam me to ihtêm xwýjrea na, ramã pyt ajmãr me pahkrã jimoac kam hýr kam pê me to hane. Mā Pirat te Juta catêjê mā hũjarên to:

— Ihnãm hã, me gõ Pahhi xa he! — hajýr.

15 Mā cute me caràr to:

— Quê ha ty! Pĩ kam me axõ, quê ty! — hajýr ita na. Mā Pirat me cumã:

— Xà me amã pĩ na me gõ Pahhi ita xõr, mā kam ihtyc na to prãm? — hane. Mā Pahpãm mā mehcajrên catêjê jõ pahhi kwý te me cumã harkwa to:

— Me imã Roman jõ krĩ kam, pjê cunea jõ pahhiti pê Xexa pê me ijõ pahhiti ata pyxit peaj. Na ri nee iràn xà na me imã me ijõ pahhi nõ hamreare — hajýr.

¹⁶ Mā hamre Pirat te pī na cute me Jeju xôr xà caxuw me cumā hōr, mā ma me to mō. Ne cute me Jeju mā pīhti catia te amji kam ihcaca ata jōr.

Pê krāhtare pī na Jeju xō

¹⁷ Ne ma kēn nō ata wūr me to mō. Ne Juta catêjê jarkwa na kēn ata japrÿ te Corcota, ne ihkôt harēn xà te "Mehkrāhhi jō kēn". Mā ma cute hō pīhti ata pÿn ne cupjê.

¹⁸ Mā curi me to cator, ne cute pī na me hir, ne ahna hūhkra me ihpar kam wakÿre cuhhêc, ne ahna me hām, mā kÿaj pê kam ajêt. Ne hanea ne cute ihkôt me hūmre to me ipijakrut, ne hajÿar ne ajtea me hō pīa kam me haxôr, ne ahna me hūxwÿr. Mā Jeju mehçote na ajêt, mā cute me hūjê ne me to ajêt.

Pê pī na ihkàhhôc ajêt ata Jeju jarê

¹⁹ Mā Pirat te Jeju na ihkàhhôc jipêj, ne cute ihkrā cwÿrpê pī na inxôr na hūjahkre. Ne pê krīxàre incré jarkwa na ihhôc atajê pê Juta catêjê jarkwa me, Roman catêjê jarkwa me, Crec catêjê jarkwa. Ne ihkàhhôc ata hūjarēn to:

— Naxare jō krī pīn hūmre pê Jeju cator, ita pê ri Juta catêjê jō Pahhi — hane. ²⁰ Pom curi cute pī na me Jeju xôr ata, krī na pire mā, na ri ihtÿj Juta catêjê jàhtôa ne cute mehkàhhôc ata cahyt. ²¹ Mā Pahpām mā mehca-jrēn catêjê jō pahhi catêjê te Pirat mā ihkàhhôc ata to mehhimpej to:

— Pom ate ahna ihhôc to: "Cupê Juta Catêjê Jō Pahhitī" hajÿr to ita ca ha antuw, ne "Cutea amji jarēn to, 'Ipê Juta Catêjê Jō Pahhitī'" hajÿr na, ca ha ihhôc — hajÿr. Mā Pirat me cumā:

²² — Pom wa ite ahna ihhôc ita, quē ha hàhhuc rohnÿtti mā — hane.

Pê krāhtare amji mā Jeju kà to ajçrà

²³ Mā krāhtare atajê te pī na me Jeju cakrô inxôr, mā ihcakrô ajêt. Jirô pê mā ri cute me cwat itajê te ah-pÿanre na ihkà to me amji tÿj. Ne hanea ne cute me ihkà te ihpar kōn na iwryç tu ata pyr. ²⁴ Ne cute me ajpēn par to:

— Cu ha nee ame ihkà impejti pijapÿn xà nare ita cokjêr nare, ne cama kēn to ihkôt me amji pê hūhkà. Ne me pahnō te amji pê to hūhkàr na, cu ha me pahnō amji mā ihcunea na cupy — hajÿr. Hō, pê ramā Pahpām jō kàhhôc ita jarēan xà na pê hane, pê harēn to:

"Cute ikà to me amji tÿj, ne ihkôt kēn to ame amji pê hūhkà" hane.

Ne ampeaj kam pê cute harēn xà ata. Na ri krāhtare te hahkre pej nare kam ihtÿj ton.

Pê Jeju Jowāw te inxi to amji pytār na cumā awjahkre

²⁵ Mā pī na Jeju ajêt ata krac ri cuna mā wa Jeju menxi me, ihtōj xa, mā hanea ne me cahi na Marij Matarkwÿj me, Marij nō pê Cropa me hīxi ata, hanea

ne xa. ²⁶ Mā Jeju te ipupun, ne icahê na inxi pupun, ne cumā:

— Inxê, por ijaxà kam acahê na akra xa ata — hajÿr. ²⁷ Ne imā:

— Jowāw, por ana acahê na xa ata — hane. Cwÿrjapê wa ite ahna amji caxàr, mā ijūrkwā kam hōtpê icahê na ihkrī.

Jeju tyc xà

²⁸ Jirô pê mā ri Jeju te ramā pjê kam hàpēn xà cunea jipêj na amji jahkre pej, na ri cute harkwa to:

— Ampeaj kam imā kôr — hajÿr. Ne pê ramā Pahpām jō kàhhôc harkwa jarēan xà na ri cute ihcakôc xà ita to hajÿr.

²⁹ Mā curia ampo cacô xwa xÿre na kyre pê hī ahwÿ ata xa, mā cute ampo pīhhê nō na, me ampo rerecti ita xôr, ne me to inco, ne Jeju jarkwa mā me haxàr. ³⁰ Mā cute to ihkôm ne harkwa to:

— Hamre, ramā ite ijàpēn xà cunea jipêj, mā hamre! — hajÿr. Ne pea imput pec to mō ne ihtyc.

Pê krāhtare Jeju jipê kam caxwÿ

³¹ Mā Juta catêjê te Pirat na me hàhwÿr, quē me hūmre incré ne pī na me harij atajê te kēhkê, mār quē cyt ne amehtyc pa, quē pī pê me to irôrôc pa. Ampo na? Ramā mehkôt xà jō amcroa kam hàhhuc to mō, na ri ma apu pī kam me jūmjê tyc ne ame harij na ame to ihcaca. Ampo na? Por ajpēn iràrà mō ata na ri ramā cute me amji kīn catia kam me to ihtēm xà. Na ri Pirat te mehte kēhkēn na hō krāhtare mā harkwa kujahêc.

³² Mā krāhtare te, por pī kam ame harij atajê te kēhkēn. Ne mam cute, por cute me ipijakrut to me Jeju jūjê atajê nō te kwīn, ne ihkôt cute me ita te kwīn.

³³ Jirô pê mā ri ma Jeju wÿr me mō, ne ahna me hàhtêp ne cute me hōmpun, mā ramā ihtyc tu ne ajêt. Cwÿrjapê ri nee cute mehte kwīn nare. ³⁴ Mā krāhtare nō te hō kruwxwa to Jeju jipê kam caxwÿr, ne cumā caxàr, mā ihkôt mare mā caprô me cō ajxwÿ.

³⁵ He wa ite ito ita to hōmpun, na wa ite ihkàhhôc ita kam me amā harēn, mār ca hanea ne me kampa, ne catyt kam Jeju to amji mā me ahimpej. He wa nee ame amā ihêj xi jarēn nare. ³⁶ Pê Pahpām jō kàhhôc Jeju jarēn to:

— Quē ha nee ahi nō impàt nare — hane. ³⁷ Ne pê hanea ne kam harēn to:

— Quē ha me, por kruwxwa to cute me jūm caxwÿr ata pupu — hane, ata na ri cute hajÿr.

Cute me Jeju jarêt xà

³⁸ Ne pê Joje pê Krīhkàhti jō krī catêjê nō ata mā, Juta catêjê jō pahhi kwÿ cupa, na pê aracri cupê Jeju kôt ipa catê. Mā cator ne cute Jeju jī na Pirat wÿr. Mā Pirat te cumā hahkre. Mā ma Joje tē. Mā ma ihkôt, por pê caxwa ri Nicotem mō ne Jeju pupu ata tē, ne cute pī pê me Jeju jī caxàr. ³⁹ Ne Nicotem ata ampo pī pàrkà cuxwati ata me, ampo pīhhô pê ràm cuxwa pyràcti ata pÿ, ne to kwÿ ata pê hūttī trīnta quir. ⁴⁰ Ne me hūmre

pijakrut atajê te me Jeju jĩ na hãhwÿr, ne ma me to kwÿ, ne cute ampo kà ata me, ihnõ cuxwa pê rãm cuxwa pyrãcti ata to me Jeju cunea cukên, ne cupêhkà jakati impejti to mehcupu. Hõhõ, pê Juta catêjê cute me amji jarêt xà caxuw ajco me amji to hane.

⁴¹ Ne por pê curi pĩ na me Jeju xõ ata cahê na, pĩxõ jõ pjê kam, cute me amji jarêt xà caxuw kên kre tuwti nõ ata, mã rÿ nee jũm te kam amji jarêt nare. ⁴² Ne pê Juta catêjê mã amcro te amji mã incjêj xà pê, ajco pytre kam ajpên mã acjêj. Ne caxwa pê, pê ajco ramã amcro intuw amji mã acjêj. Ne ma apu amji kĩn kam mehkõt xà kam mehtyc to me hãpên tète me ajpên mã. Na pê me hũjarêan kam pĩxõ jõ pjê kam kên kre nõ ata kam, me Jeju jĩ xi.

Pê hacpÿa mã Jeju tĩr

20 Mã mehkõt xà jõ amcro jirõ pê, tãmĩc na, iràràtia na cormã ahkũmti kam, ma Marij Matarkwÿj kre wÿr tẽ. Ne cute, por kên to cute me Jeju kre jarkwa jihê ata pupun, mã ajte hihê mên na xa. ² Mã cute hõmpun ne ma Petrõ me, iwÿr ipicahur. Ne me iwÿr cator ne cute me imã hũjarên to:

— Cute kre pĩn me pajõ Pahhi jĩ caxàr ne jũ ri me hir! — hane.

³⁻⁴ Wa ma Petrõ me ajwar kên kre wÿr me ipicahur, waite irer ne mam kre wÿr icator. ⁵ Ne kên kre jarkwa mã inõr, ne tee apu Jeju jĩ japê, ne nee ite hõmpun nare. Ne ite cupêhkà pit pupun, ne nee hÿrmã ixàr nare. ⁶ Mã hapu na ikõt Petrõ tẽ ne cator, ne ma kre mã hàr. Ne cute cupêhkà pit pupun, nõr xà kam. ⁷ Ne hanea ne, por pê cupêhkà ihkrã jarij ata, curia hakàn pê ajtea ihkrã pejti ne nõ. ⁸ Wa hanea ne ihkõt ixàr ne ite cupêhkà pit pupun, ne ite hacpÿa mã Jeju tĩr na amji mã to hajÿr pyrentu. ⁹ Ne nee ajte cormã me Pahpãm jõ kãhhõc kam cute harên xà to: “Quê ha ihtÿj hacpÿa mã Jeju ihtĩr” hajÿr ata na ihkõt me hakop to impej nare. ¹⁰ Ne ma hacpÿ mã ikre wÿr ite me amji jaxàr.

Pê Jeju Marij Matarkwÿj mã amji to ajpẽ

¹¹⁻¹² Mã Marij Matarkwÿj curia xa ne põ pê apu amrã. Mã aracri ramã cõjkwa pĩn Pahpãm mã memprar catêjê pijakrut ne Jeju nõr xà kam me jÿ. Mã Marij Matarkwÿj te Jeju japên prãmte kre mã nõr, ne cute Pahpãm mã memprar catêjê pupun. Mã ihkrã nõr xà kam ita jÿ, mã ita ihpar nõr xà kam jÿ, mehkà jakati kam, cute me hũjê ne me to jÿ. ¹³ Ne cute me Marij cukij to:

— Ampo na mã ca apu amrã? — hajÿr. Mã me cumã:

— Jũ kam cute me ijõ Pahhi jĩ caxàr ne me to tẽ, ne jũ ri mõrmõ cute me hir, ipê hir xà na hahkre kêatre! — hane.

¹⁴ Ne cute me cumã ita jarên jirõ pê mã ri ipipkjêr ne cute Jeju pupun, mã xa, mã nee cute cupê Jeju na hahkre pej nare. ¹⁵ Mã cute ihcukij to:

— Ampo na mã ca apu amrã? Ne jũm mã ca apu hapê? — hajÿr. Mã ihtÿj apu to pĩxõ jõ pjê jamãr catêjê nõ, ne cumã:

— Ca ha ate mãn caxàr ne jũ ri hir na, ca ha imã harê, wa ha capa ne hacpÿa mã kên kre wÿr to mõ — hane.

¹⁶ Mã Jeju cumã:

— Marij — hane. Mã hÿrmã ipipkjêr, ne cute Juta catêjê jarkwa na cumã:

— Rapõn! — hane, ne Rapõn ita jũjarên xà te “Ikrã tũmti!”

¹⁷ Mã Jeju cumã:

— Nee ca icupên nare, nãmri wa cormã nee Inxũ wÿr ijãpir nare. Ne cama atêm pyrentu ne me ikjêjê mã ijarên to: “Wa ha ma Inxũ pê me Apãm, pê ijõ Pahhiti pê me gõ Pahhiti wÿr tẽ” — hane.

¹⁸ Mã ma Marij ihtêm pyrentu, ne cute me imã hũjarên to:

— Wa ite me pajõ Pahhi pupun — hajÿr. Ne cute me imã Jeju te cumã harkwa hyr xà atajê jarên par.

Pê Jeju ihkõt me ipa catêjê mã amji to ajpẽ

¹⁹ Mã amcro ata na, me ipê Jeju kõt me ipa catêjê te ramã caxwa ryre kam me cuprõn, ne ite amji na me to harkwa jihê, Juta catêjê kwÿ cupate. Mã ihprõt pê, krãa, me iwÿr Jeju cator ne me icote na xa, ne me imã:

— Hàpà, mãr me apeaj? Nee ca icupate ame akrihkrit nare — hane.

²⁰ Jirõ pê mã ri cute me imã hũhkra me hĩpê caxwÿr xwakre jahkre, wa ite me hõmpun, ne ampeaj kam hũrên me ijakry. ²¹ Mã hipêr Jeju me imã:

— Inxũ mã, me amã ampo cupa nare na me ato prãm. Ampo na? Pom ahnaa mã Inxũ te ajpên ikujahêc ita na, wa ha me ato, ne pjê cunea kõt ame acrà ne ame akujate — hane.

²² Jirõ pê mã ri cute me icunea jakôr, ne me imã harkwa to:

— Imã me ate me Inxũ Carõ Pejti incwÿr na me ato prãm. ²³ Na ca ha me cumã acakõc ne ijapÿa na me cumã acakõc. Ne ita caxuw, ca ha ate jũm te Inxũ Cati to kên ata mã: “Ca ate Pahpãm to kên ata, cute to tojnõ ne hicu” hajÿr na, quê ha Inxũ Cati acuxà ihtÿj cute to kên ata to tojnõ ne hicu. Nãmri ca ha ate jũm mã: “Pahpãm te nee ate to kên xà ata to tojnõ ne hicu nare” hajÿr na, quê ha Inxũ Cati acuxà, garkwa kõt nee to tojnõ ne hicu nare — hajÿr, ne curia hamre, ne ma tẽ.

Pê Jeju Tome mã amji to ajpẽ

²⁴ Ne me iwÿr Jeju cator xà ata kam, ne pê nee me ijõ ikwÿ nõ japÿr te Tome pê, por ajkrut ne ihpÿm ata, ame icahê na mõr nare, ne jũ ri apu mõ. ²⁵ Na wa ite me cumã ijũjarên to:

— Wa ite me pajõ Pahhi pupun! — hajÿr. Mã me imã:

— Wa ha nee ate me imã gũjarên xà ita kam ijapac ne amji mã to hajÿr nare. Ne xa hũhkra caxwÿr xwakre pupu, ne kam ijũhkrãhhi xi, ne hĩpê caxwÿr xà kõt ijũ

jaxà ne ihcupê, ne cormã ita na amji mã to hane — hane.

²⁶ Mã me ina amcro te xet, wa hacpÿa mã ite me cuprôn, mã ita caxuw curia hanea ne me icahê na Tome apu mõ. Wa ite me to harkwa cunea jihê partu cakrô, mã krãa, Jeju me ijipôc ri cator ne xa, ne me imã:

— Hàpà, mār me apeaj? Nee ca icupate ame akrihkrit nare — hane.

²⁷ Ne Tome mã:

— Tome, mēr ijūhkra pupu ne caxwÿr xà xwakre mã gūhkrahhi jaxà ne to ihcupê. Ne ijipê caxwÿr xà xwakre mã gū jaxà ne ihcupê ne ijahkre pej. Nãmhã ne gãprār xi ita mã hikra, ne ito ca amji mã ahimpej! — hane.

²⁸ Mã Tome cumã:

— Apê ijō Pahhiti pê Pahpãm — hane.

²⁹ Mã Jeju cumã:

— Ca ate ato jã to ipupun, cwÿrjapê mã ca cormã ate ito amji mã ahimpej. Por jūmjê me ipupun nare kam ihtÿj ito amji mã mehhimpej atajê ri ampeaj kam me hakry! — hane, jirô pê mã ri hamre ne ma tē.

Pê ihkàhhôc ita Jeju to pahte amji mã me pahhimpej na me pamã awjahkre

³⁰ Ÿhÿ, he me ikam mare mã Jeju te Hūm carôt kôt hàpên xà pihho catia jãhtôa ne ton atajê, wa nee ite me amã ihkàhhôc ita kam nōr nare. ³¹ Ne pom ca ame cahyt itajê, wa ite ihkàhhôc ita kam me amã nōr partu, mār ca ate me Jeju Crixto pê Pahpãm kra, mã cute me pahpytār catê na me pamã to hūjahkre ata to, ate amji mã me ahimpej prãmte, wa ite ahna me amã ihhōc. Ampo na? He ca ha ate Jeju to amji mã me ahimpej na, ca ha atÿj cukwa kam Pahpãm cahê na amji to me api-japar rohnÿtti mã.

Pê Jeju Hīpôjajo intohkà na ihkôt me ipa catêjê mã amji to ajpê

21 Jirô pê mã ri Jeju te me ipê ihkôt me ipa catêjê mã hipêr amji to ipipê, Hīpôjajo jō pjê pê Tiperij jō krī ata cahê na. Hō, pê hane.

² Ite me xet itajê wa ame ipa he: Wa itō pê Tijac me ipê Xeptew kra me, Ximãw Petrô me, Tome pê ajkrut ne ihpÿm ata me, Têtêc jō krī pīn Natanew cator ata me, me ikwÿa kwÿ pijakrut atajê me. ³ Mã Ximãw Petrô te me imã:

— Wa ha ma mõ ne tep pro xà to ihnō pro — hajÿr. Wa me cumã:

— Wa ha hanea ne me akôt me to ihnō pro — hane. Ne ma me icunea me mõ, ne pàr kre mã me ixàr. Ne caxwa ri ihpro xà to ite me hapêan to apê, ne nee ite me to ihnō pro nare.

⁴ Mã ramã apê to mõ, mã ramã xãmte aracri Jeju cô tohkà na xa. Wa nee ite me cupê Jeju na hahkre pej nare. ⁵ Mã me imã caràr to:

— Hàpà me hūmre itajê? Ampo ca ate me to ihpro? — hane. Wa me cumã:

— Hamreare, wa tee ite me to hapêan to apê, ne nee ite me to ihnō pro nare — hane.

⁶ Mã Jeju me imã:

— Mēr cô kam awpôc rūm, pàr kre jīkjê rūm me gō tep pro xà ita to me awcapê, ca ha atÿj me to ihkwÿ pro — hane.

Wa ite cô kam me ijō kryhti to me ijūcapêr, ne ite me to ihkjên, ne nee hacpÿ ne pàr kre wÿr me to ijàpir nare. Ampo na? Ampeaj kam, tep itajê cati ne hàhtô, na ri hūttī.

⁷ Wa ite Petrô mã ijarkwa to:

— He me pajō Pahhiti pê Jeju ri xa! — hajÿr. Mã Ximãw Petrô ihcakrô apu kwÿ ne cute Jeju jarên par, ne hitô kãhti ata mã amji jaxàr, ne ma mrōr ne ihpa na kwÿ ne ma Jeju wÿr cô tohkà na cator. ⁸ Wa ma hapu na me ikwÿ me pàr kre to ajpên me tep na, ihpro xà kjên to me mõ, por hÿrmã hūwry na me pajara capô te xīncwēnta ata wÿr, ne hÿrmã me to icator. ⁹ Ne pō mã pàr kre pê me ijapôj pê, ite me cuhy prà kam tep kwÿ krī na me hōmpun. Ne hanea ne ite me pãw pupun, mã hikwa.

¹⁰ Mã Jeju me imã:

— Ajpên me imã, pom curmã ate me to tep pro itajê kwÿ to tē — hane.

¹¹ Mã ma Ximãw Petrô pàr kre mã hàr, ne cute hō na tep pro xà mã hê, ne ajêt ata mã hê pôn, ne ma pjê wÿr to hàpir. Mã kam tep cati pit jãhtô na cute xêj ne ihkôt xīncwēnta ne ihkôt incrê ne to hipu tu, ne nee ajte cute tep pro xà ata jipôn nare. ¹² Mã Jeju me imã:

— Ajpên me mõ ne me apà — hane. Wa ramã ite cupê me ijō Pahhiti na me hahkre pej. Ne hūpate, nee me inō te cupê jūm ata na ihcukij nare. ¹³ Mã Jeju te me imã pãw me tep ata kryj, ne ahpÿanre na me imã hōr par.

¹⁴ Hō, pê Jeju hacpÿ mã ihtīr jirô pê me imã amji to ipipê to incrê to hane.

Pê Jeju Petrô mã ihkīn na ihcukij

¹⁵ Wa me ijapàn jirô pê mã ri Jeju te amji na Ximãw Petrô cukij to incrê ne cumã:

— Ÿhÿ Ximãw Petrô pê Jowãw kra ita, xà ajkī me akwÿ jirôa pê amã ikīn? — hajÿr. Mã Ximãw cumã:

— Ÿhÿ ijō Pahhi, imã akīn na ramã atea ijahkre pej — hane. Mã Jeju cumã:

— Ÿhÿ, ca ha me cupê ijahkre kêatre, mã nee cute me ipupun nare atajê mã ijarê, ne me cumã ijarkwa gō. Ampo na? He me cupê carà cahàcre hōhti kra pê hamār catê nare ata pyràac, ne amjia kôt ikaj na ame ipa — hane.

¹⁶ Ne cute ihcukij to ipijakrut ita kam ri hipêr cumã: — Ximãw xà ajkī ampeaj kam amã ikīn? — hajÿr. Mã Petrô cumã:

— Ÿhÿ ijō Pahhi, imã akīn na ramã atea ijahkre pej — hane. Mã Jeju cumã:

— Ca ha me ikwÿ pê carà cahàcre pyràc pê hamār catê nare atajê to amji pytà ne me hamã — hane.

¹⁷ Ne hipêr Jeju te ihcukij to:

— Ximāw, xà ajkĩ ampeaj kam amã ikĩn? — hajÿr. Mã Petrô mã amji kĩn nare, mã apu ihpec. Ampo na? Nee mã ampo na nare, Jeju te cumã ihkĩn na ihcukij to in-crê, na ri cumã amji kĩn nare, mã cumã:

— Ijõ Pahhi, amã ampo cunea jahkre pej, na ri atÿj amã ite akĩn na ijahkre pej! — hane. Mã Jeju cumã:

— Ca ha me ikwÿ pê carà cahàcre pyrác pê hamãr catê nare atajê to amji pytà ne me hamã.

Jeju Petrô mã, por ampo te to jũ mãn xà ata jarê

18 — Ýhÿ, wa ha amã awjarê, pê ca atuwre na, ajco akà to amji cümpej, ne ma jũ ri amã amõr xà na ih-prãmti ata wÿr ajco pra. Ne ampeaj kam wa ha ita caxuw amã awjarê. Ca ha awej, quê ha jũmjê gara cajpre, ne jũ ri amã amõr prãm nare, ne hÿrmã gitõtti ata wÿr me ato mõ — hane.

19 Pê Jeju hũjarên xà ata to ramã Petrô mã, jũ caxuw cute mehcuran xà ata to hahkre. Ne quê ha Jeju cwÿr-japê Petrô tyc xà ata kôt, quê ha mehcunea me Pah-pãm cati na me hahkre pej. Ne cute Petrô mã:

— Ita caxuw ca ha ito pit mã amji mã ahimpej, ne ikõat apa! — hajÿr.

Pê Jeju nee ampo te Jowãw to jũ mãn xà na harên nare

20 Mã hacpÿ mã Petrô pipkjêr ne amji jõ kôt cute ipupun. Ne pê ramã Petrô mã Jeju mã ikĩnti na ijahkre pej. Ampo na? He pê wa me Hakren xà jõ amji kĩn na me ijàpàn xà na cahê na jÿ ne ihcukij to: “Jũm mã quê

ha ajte akên mã amê?” hane cwÿrjapê. ²¹ Mã Petrô te ipupun, ne ina Jeju cukij to:

— Pahhi, ne mër hũmre ita, jũ mã quê ha ajte? — hajÿr.

²² Mã Jeju cumã:

— Quê imã ihtĩr ita na ipa, wa ahnaa hacpÿ ne ite amji jaxàr na to prãm na mã, quê ihtÿj ipa, ca ha nee ahna ihho nare. Ne ca, ca ha ito pit mã amji mã ahimpej to apa — hane.

²³ Mã Jeju kôt me ipa catêjê te amji mã me ijarên cràn, Jeju te xwahna ityc xà nare na ijarên ata na. Ne nee cute harên to hajÿr nare. Ne nee ito Petrô mã:

— Quê ha nee Jowãw ihtyc nare — hajÿr nare. Ne ca- ma cute ijarên to hajÿr he:

— Quê imã ihtĩr ita na ipa, wa ahnaa hacpÿ ne ite amji jaxàr na to prãm na mã, quê ihtÿj ihtĩr ita na ipa, ca ha nee ahna ihho nare — hajÿr.

Pê Jeju jàpên xà atajê, ampeaj kam hàhtô

²⁴ He ipê Jowãw, pê wa ito ita jãa to ampo itajê pupu, ne impar xàa na wa ite ahna pit mã me amã ihhóc par. Ne ramã ate me ipupun pejtu, ihêj xi nare na, na ri ampeaj kam cute hajÿr. ²⁵ Ne cormã Jeju te ampo jàhtôa ne ton atajê, wa nee ite ihkàhhóc ita kam ahna ihhóc nare. Quê jũm ahna ihhóc na mã, quê ha nee pjê cunea kam ihkàhhóc itajê nõ hàhtô na cahuc nare. Hamre.

ME HÀPÊN XÀ

Ýhỹ, pè Ruc jũm japry pè Tejopir ita wỳr ihkàhhôc ita kujate. Ne cupè Pawrô pè Jeju jarkwa na memprar catêjê nõ ata kôt me ipa catê. Ne jũ kam ipa to hàhtôti atajê kam, ihtỳj ajco ihkôt ipa. Ne hõ kàhhôc ita kam, hacpỹa mã cõjkwa wỳr Jeju jàpir na harẽ. Ne hanea ne Jeju na mehkwy wỳr Pahpãm Carõ Pejti wrỳc, ne cute me cumã amji jõr, ne ma me to ipicamẽn to mõi na harẽn. Ne hanea ne Petrô me Pawrô te pjê cunea kam Juta catêjê me, mehcahkrit pè Juta catêjê nare mã, Jeju pè me pahpytâr catê na to hũjarẽn na harẽn. Ne hõ kàhhôc japry pè (Me Hápên Xà).

Pè Ruc me cumã amji jarẽ

Ruc 1.1-4; 24.36-49

1 Ýhỹ, Tejopir, ipè Ruc, ne pa wa ha amã ihhõc. Ne wa ramã ite mam amã ijõ kàhhôc ita kujahêc. Pom pè Jeju ampo to, ne me cumã to hahkre itajê na wa ite ihhõc, ne amã ihkujahêc. ² Ne pè mam Jeju cato pjê ita kam, ne ajco hápên xà ton to ipa, pè ma Pahpãm cõjkwa wỳr to api, na wa ite amã ahna ihhõc, ne amã ihkujahêc. Ne hãpir xà xwỳjrea na cute ihkôt me ipa catêjê mãn, Pahpãm Carõ Pejti jarkwa kôt, mãr què harkwa na cumã memprar catêjê na me ipa. ³ Ne pè Jeju ihtyc jirô pè hacpỹa mã ihtĩr, ne ihtĩar na cute mehcunea mã amji to ipipè to amcro to cwarẽnta. Mã ihkôt me ipa catêjê te me hõmpun, ne Pahpãm himpej xà ata to me cumã ihcakôc. ⁴ Ne amcro ata na, hacpỹa mã Jeju tĩr jirô pè mã, ihkôt me ipa catêjê me, mehkřĩ ne ame apà. Mã cute me cumãn to:

— Ita ri, Krĩpinkrên kam me ahtwỳ, ne ita ri Inxũ Cati te me amã ampo to hũjahkre, wa ite me amã harẽn atajê jikaj, mãr què me amã cugõ, què ame ato ihtỳj. ⁵ Ne hõtpè Jowãw te cô kam me acumrãr, ne què ha me ana ahtũm nare, què ha Pahpãm amji Carõ Pejti carôt kam me acumrã. Ne me amã carôt gõ, ca ha Carõ Pejti carôt kam me atỳjti ne — hajỹr.

⁶ Mã ihkôt me ipa catêjê te cormã ahna me cuprõn tu ne mehcukij, ne me cumã:

— Xà ita kam, què ha Pahpãm pjê ita kam, Juta catêjê to ihhimpej kam tẽ? — hane.

⁷ Mã Jeju me cumã:

— Nee ate me hahkre pej xà nare. Ne Inxũ Cati mã ri cutea amji mã amcro hyr xà ata jahkre pej. ⁸ Ne què ha Pahpãm me amã Carõ Pejti carôt gõ, ca ha me acwa ne me to apa, què ha taa me ato ihhimpej, ne me ato atỳjti ne. Ne ita caxuw ca ha me apè ijarẽn catêjê. Na ca ha ita caxuw Krĩpinkrên me, Juta jõ pjê me, Krĩrĩtpej jõ pjê me, pjê cunea kam amũ pjê jũwry catia kam me ijarẽn to me apa — hane.

⁹ Ne pè Jeju ita jarẽn jirô pè mã me kam mare mã ma cõjkwa wỳr hãpir to mõi. Mã hamre, ahcakrã te cutor, mã nee hipèr cute me hõmpun nare. ¹⁰ Ne cama me xa ne Jeju jàpir xà na, cõjkwa wỳr, kàj mã me ahna ahcakrã pupu. Mã ihprõt pè me hũmre pijakrut ne

mehkà jakati kam me xa, me cahê na, ne cute me cumã harkwa to:

¹¹ — Hĩpõjajo jõ pjê catêjê, ampo na mã ca me acuh-hê ne cõjkwa wỳr ame rĩt? Por Jeju ame acahê na mõi ata, ma cõjkwa wỳr tẽ, ne què ha ihtỳj jũ caxuw amji jaxà, ne hãpir xà ita na, què ha amji jaxà ne wrỳ — hajỹr.

Cute me Matij capi xà

Ruc 24.52-53

¹² Mã ma Jeju jarkwa na memprar catêjê te Pĩxô jõ kẽn pĩn hacpỹa mã hũ na pire mã, Krĩpinkrên xa ata wỳr, me amji jaxà. ¹³⁻¹⁹ Ne krĩ kam me cator, ne ma kỳj pè me hàhhuc xà ata wỳr me mõi, ne cute me cuprõn ne kam me hàhhuc. Curi Petrô me, Jowãw me, Tijac me, Antre me, Pirip me, Tome me, Partômew me, Matew me, Tijac pè Arpew kra me, Ximãw mã hõ pjê kĩnti ita me, Juta pè Tijac kra me, Jeju menxi me, mehkjêjê me, pyjê kwỳ me cute me cuprõn. Ne curia mehkřĩ, ne hõtpè Pahpãm mã mehcakôc. Ne pè Juta Carijot xwỳ, Jeju pro jahpan xà na ihpore py ata to pjê japrô. Ne pjê ita kam pè ihpòm, ne apu amji kèhkẽ, ne ihcahti na hĩn apu hapõj, ne ty. Pè Krĩpinkrên kam, mehkřĩ atajê cunea me ita pa, ne me hahkre pej. Cwỳr-japê pè me pjê ita mã hapry to, Purcaprô jõ pjê.

Ne me ahna amcro jãhtô nare, mã Jeju na mehkwy jãhtô na cute me xěj ne ihkôt cute winti ne me cuprõn. Mã Petrô xãm ne cute me cumã harkwa to:

— Me ikjêjê, wa ha me amã Juta xwỳ ata jarẽ. Juta ata pè amji kôt jũmjê to mõi, cute me Jeju pro, ne mehcuran prãmte. Ne pè cupè me pahkwỳ nõ, ne ihtỳj ajco me pahcape na me pajàpên xà ita to apè.

²⁰ — Pè Tawi xwỳ rỳ pèa mã Pahpãm Carõ Pejti jarkwa kôt Juta na ihhõc, pè Pahpãm ramã ita to amji kampa. Ampo na? He ita na pè cumã to prãm. Pè cute to prãm xà ata na ihkên mã axà, ne ty. Pè Tawi xwỳ Juta na ihhõc to hane he:

“Què ha hũrkwa jicu, què ha nee jũm kam ihkřĩ nare” hane.

Ne ihhõ nõ kam hanea ne ahna ihhõc to hane he:

“Quê ha ihtÿj jÿm haxà kam axà, ne hâpên xà ita to apê” hane.

21-22 Cwÿrjapê cu ha me jÿm xÿmre capi, quê jÿm axà, ne haxà kam hacpÿa mã Jeju tÿr na harên to ipa. Pê cu me pahnô cumã kaat kam Jowãw te cô kam mehcumrâr na hõmpu, mã ahnaa ihtyc, ne hacpÿa mã hâpir na me pahnô te hõmpun ata, cu ha me capi, quê Jeju mã imprar catê na axà — hane.

²³ Mã cute me hÿmre pijakrut mã me cator, ita japry te Joje Parxap, ne hapry krut te Catytkam, ne hanea ne ihnô ita japry te Matij. ²⁴⁻²⁵ Mã cute me ahna Pahpãm mã mehcakôc, ne me cumã:

— Me ijô Inxÿ Cati, ca ha ca me imã me icaca xà cunea pupu. Ne me imã to hahkre, me ipijakrut itajê nõ ca ha amji mã capi, ne to me imã hahkre, quê jÿm me ikôt apê, ne jÿm akra jarkwa na imprar catê na ipa. Nãmri Juta te ampo kêanre ton, ne me gâpên xà ita pê ihpÿm, ne ihtyc, ne ma ihkrÿ xà kêanre ata wÿr tẽ — hajÿr. ²⁶ Ita jirô pê mã ri, cute amji to me hÿr, ne cute me ipijakrut itajê nõ capi. Ne hamre, mehkwy te me hÿmre nõ ita pyxit ne me capi, ata japry te Matij, mã cute Juta xwy jaxà kam Jeju jarkwa na cumã memprar catêjê mã me haxâr.

Pahpãm Carô Pej cator xà

Me Hâpên Xà 4.31; 8.15; 10.44; 19.6

² Ramã me Hõ Kêhkên xà jô amji kÿn jô amcroa kam hàhhuc, mã Jeju na mehkwy te me cuprôn xà ata kam me cuprôn. ² Mã ihprôt pê côjkwa pÿn, krã, ampo jâhkrihkrit pê kôcti jâhkrihkrit pyrâacti ata cator. Ne hàhkrihkrit ata te ikre kam me jÿ atajê cunea mã amji jôr. ³ Mã cute me ihpôc pê cuhy pôc te cajôhjôtre pyrâcre ata pupun. Mã apu ihcahkÿm ne cute ahpÿanre na mehtât par. ⁴ Mã Pahpãm Carô Pejti carôt te mehcunea to hipu. Ne cute ahpÿanre na me cumã mehcakôc xà jôr par. Na ri cute mehcakôc xà cunea to mehcakôc kam me to ihtêm.

⁵ Mã curi Krÿpinkrên kam Juta catêjê jâhtôa ne me hàhhuc atajê, hõtpê Pahpãm to me amji kampa. Ne pê pjê cunea rÿm hÿwry catia rÿm ajco me hapôj, amji kÿn ata wÿr. ⁶ Ne cute me ampo jâhkrihkriti ata par, ne hÿrmã me cuprôn. Ne mehcunea te amji mã me ipikrar. Ampo na? He pê ihtÿj mehcunea me amji cakôac kampa, na pê me cupê hahkre kêatre. ⁷ Mã me hàhtôti itajê cunea te amji mã me ipikrar, ne mehkra pictor tu, ne ajpên mã me harên to:

— Pom me hÿmre itajê pê Hÿpôjajo jô pjê catêjê na ri amehcakôc. ⁸ Jÿ mã mã cute me, ne me pahcakôac to amehcakôc? ⁹ Pom cu Partij jô pjê catêjê me, Metij jô pjê catêjê pÿn me pahcator, ne me pahkwÿ Erãw jô pjê pÿn me pahcator, ne pom cu Cõpihpo jô pjê ata pÿn me pahcator, ne Juta jô pjê pÿn me pahcator ita, ne Cawrôpejti jô pjê pÿn me pahcator, ne me pahkwÿ Axij jô pjê pÿn me pahcator ita? Pom cu ita pÿn me pahcator ita, ne hanea ne Ponto jô pjê pÿn me pahcator. ¹⁰ Ne hanea ne Amcrâti jô pjê pÿn me pahcator, ne Panpir jô pjê pÿn me pahcator ita, ne hanea ne Ejit jô pjê pÿn me

pahcator. Ne Pjêhpôc jô pjê pê, por Xiren jô krÿ cahi na xa ata pÿn me pahcator, ne hanea ne me pahkwÿ pyxitre Roman jô krÿ pÿn ame pajapôj. ¹¹ Ne hanea ne Kênpojre jô pjê pÿn me cator, ne hanea ne Põcapryhti jô pjê pÿn me cator. Ne me pahkwÿ pê Juta catêjê impeaj, mã hanea ne curmã me pahkwÿ itajê te Juta catêjê na me amji ton. Ne me pahcunea, ahpÿanre na me pajarkwa to me pahcakôc cakrô, mã ajte ihtÿj me pajarkwaa na cute me pamã Pahpãm jâpên xà itajê jarên na mempar — hane.

¹² Mã mehcunea te me ampo ita jahkre pej nare kam amji mã me ipikrar, ne nee kam cute ampo to me amji kam hapac nare, ne tee ame ajpên cukij, ne me ajpên mã:

— Ampo mã ajte? — hajÿr. ¹³ Jirô pê mã ri mehkwy ame hÿn ne me cumã:

— Mõrmô me hÿmre itajê amehkôm ne ame ajpã, na ri amehcakôc pihhoti ita to hane — hane.

Petrô jÿjarên xà

Me Hâpên Xà 3.12-26

¹⁴ Mã Petrô pê cute me tôxi atajê kwÿ nõa, ne me cape na xa, ne kÿj cati pêa mã, cute me hàhtôa mã hÿjarên kam ihtêm, ne me cumã:

— Me ikwy pê Juta catêjê me, pom ca me acunea ita ri Krÿpinkrên kam me akrÿ itajê! Me ipar peaj ne! Wa ha me amã awjarê! ¹⁵ Ampo na? He ca atÿj me hÿmre itajê pipân na amehcãmjÿ. Hãpã, nee me ipipân nare. Me hõmpu he. Pom cormã pyt jâpir pejti ita? Quê ajte irârâtia na ame ajpã? ¹⁶ Pom ca me ipupu, ajteare mã me icakôc xà, ne cupê rÿ pêa mã Pahpãm jarkwa na ihcakôc catê ita japry te Jôwer ata pê ahna ihhõc to hane he:

¹⁷ “ÿhÿ, Pahpãm te amji jarên to hajÿr he:

‘Me hõmpu he, wa ha ihmat ri, hÿcu xàa kam, ramã ampo cunea jamre xàa kam wa ha hane he:

Wa ha ma me hÿrmã Icarô Pejti kujate, quê ha pjê cunea kam mehcunea mã amji gô, quê ha me cucwa.

Quê ha me akra xÿmre me, me akra cahãj me, Icarô Pejti jarkwa kôt me ijarên to me ipa.

Ne wa ha mentuwjê mã, me irât kam, icaca xà to ajpê.

Ne mehwej te hajÿr, wa ha me ipimtir kam me cumã icaca xà to hahkre.

¹⁸ Ne wa ha imã me hâpên catêjê atajê mã Icarô Pejti kujate.

Quê ha me hÿmre me, pyjê atajê ijarkwaa kôt ijarkwa to amehcakôc.

¹⁹ Wa ha hanea ne kÿj rÿm, côjkwa pÿn, pjê kam, rÿ jÿ caxuw jÿm te ampo pihhoti pupun nare ata to ajpê, quê ha hane he:

Quê ha me caprô catia ne kam cuhy, ne kam ihkÿm cati.

²⁰ Ne quê ha pyt kam awcapâtkô, ne quê ha putwry intepti ne, ne cupê me caprô pyrâac.

Hõ, ata quê ha pjê wÿr ipê me gô Pahhiti te amji jaxâr xà wÿr ihkên to hane.

Ne amcro ata kam quê ha Pahhiti carôt catia to ajpê, quê ha mehcunea me hõmpu ne me hahkre pej.

²¹ Ne quê ha cute me iwÿr na, wa ha me kampa, ne mehkên pê mentête amtà, ne me to ikra' " hane.

Hõhõ, Pahpãm cakôc xà itajê na, pê Jôwer xwÿ ihhõc, hõ kàhhõc kam.

Pê Petrô me cumã Jeju jarê

²² — Na ca me ikampa, me ikwÿ pê Ixaher catêjê, pom pê Jeju Naxare jô krí kam ipa ata, wa ame amã harê. Pahpãm te me pamã Jeju kujahêc, mã Jeju te Hũm Cati carôt kôt ampo pej pihho jàhtôa ne ton. Por rÿ jũ caxuw jũm te ampo pupun nare atajê pê ajco to. Ne ampo na ri hãn ne ampo itajê to? Nee mã ampo na hãn ne ampo itajê ton nare. He pahte me Pahpãm te ihkujahêc na me hahkre pej prãmte, pê hãn ne ajco ampo itajê to. ²³ Ca ate ahnaa mehcuran. Pê Pahpãm rÿ pëa mã ramã ita to amji kampa, ne ahna amji ton. Ne ahnaa cute me amã ihkra jôr. Ca ate Roman catêjê mã me Jeju jôr, mã cute pĩ na menxôr, ne mehcuran.

²⁴ — Ne jũ wÿr quê ty ne ihtyc tu, cwÿrjapê ri Pahpãm te hacpÿa mã to ihtĩr. ²⁵ Ýhÿ, pê rÿ pëa mã me panquëtĩ pê Tawi hacpÿ mã Jeju tĩr xà na hõ kàhhõc kam ahna ihhõc. Ne pê Jeju cakôc xà na ihhõc to hane he:

"Ýhÿ Inxũ, apê ijõ Pahhiti, na wa ijõtpê akôat ipa.

Ne ca amcro cunea kam itehcajpa, na ri imã ampo cupa nare. ²⁶ Ne ampeaj kam ijakry, ne icakôc xà kam ijakry pit.

Na wa ha cormã amcro nõ na ty, ne itÿj gikaj.

Wa ijõtpê ato amji japackre.

Ne jũ wÿr ca ha ijarêc xà ata kam ijicu, ne imã hikra, cwÿrjapê ri ijakry.

Ne jũ wÿr ca ha me carõ kwÿ jipôc ri icarõ to tojnõ, ne cumã hikra. ²⁷⁻²⁸ Ampo na?

Quê ha ramã ikà cacu xàa kam, ca ha hacpÿa mã ito ihtĩr.

Ne atea ca, catyt kam ipa to imã hahkre.

Cwÿrjapê wa itÿj ijakry, ne ipej pëa mã ipa.

Ne ijakryti to wa amã icakôc to ipa.

Na ca ha hacpÿa mã ito ihtĩr.

Ne ma kàj mã, cõjkwa wÿr amji wÿr ijaprô.

Wa ha cormã apupu, ne ampeaj kam apyrên ijakry" hane.

Hõ, pê pahhiti pê Tawi xwÿ jô kàhhõc kam Pahpãm kra to hũjarên to hane.

²⁹ — Ýhÿ, me ikjêjê, wa me amã me panquëtĩ xwÿ kôt harên to impejti to prãm. Pê me pajõ pahhi pê Tawi xwÿ ty, pê me harêc, ne ihkre cormã me pahcote na ihkrĩ. ³⁰ Ne pê cupê Pahpãm jarkwa to ihcakôc catê, cwÿrjapê pê cumã Pahpãm te jũ caxuw mehkra tàmwxwÿ tàmwxwÿ nõ to pahhi na awjahkre ata na hahkre pej. Ne cupê mam Tawi pê pahhi ata pyrâac ne cupê pahhi. ³¹ Ne pê Tawi ramã Pahpãm te jũ caxuw hacpÿa mã pahhi na to hũjahkre ata to ihtĩr na hahkre

pej. Ne nee pê Tawi taa amji to hũjarên to hajÿr nare, ne quêt ihtàmwxwÿ tàmwxwÿ nõ na pê Jeju to awjarê. Ne pê harên to hane he:

"Jũ wÿr ca ha me carõ kwÿ jipôc ri icarõ to tojnõ.

Ampo na?

Quê ha ramã ikà cacu xàa kam ca ha hacpÿa mã ito ihtĩr" hane.

Pê Petrô me cumã Jeju hacpÿa mã ihtĩr na harê

³² — Mër hõhõ, Pahpãm te hacpÿa mã Jeju taa to ihtĩr, na ramã me icunea te me hõmpun. ³³ Mã ma Pahpãm te cõjkwa wÿr to hàpir, mã Pahpãm jĩkjê rũm, awpôc rũm jÿ. Ne cute Hũm te Carõ Pejti to cumã hũjahkre ata pyr, ne me imã ihkujahêc. Ne por ampo cunea pihho, ca me hõmpu, ne me kampa itajê pê Pahpãm Carõ Pejti jàpên xà. ³⁴⁻³⁵ Ne pê Tawi xwÿ nee cõjkwa wÿr hàpir nare, ne Jeju pê quêt api. Por pê ramã Tawi harên to:

"Pahpãm pê Pahhiti te ijõ Pahhiti mã:

'Ca ha ijĩkjê rũm, awpôc rũm jÿ, wa ha xa apar krac ri acurê xwÿn catêjê jaxà, ca ha cormã me hõ pahhi na jÿ" hane.

³⁶ — Pom me apê Juta catêjê, itajê wa me amã awjarê, ca ha me hahkre pej peaj ne. Mår pê ca pĩ kam me Jeju cura ata to ri Pahpãm te mehcunea jô pahhiti. Ampo na? He toa pê ramã rÿ pëa mã Pahpãm awjahkre — hane. Hõ, Petrô te me hàhtôa mã harên to hajÿr.

³⁷ Mã cute me ita par ne amehpec, ne me cumã amji kĩn nare, ne cute me Petrô me, Jeju jarkwa na memprar catêjê kwÿ cukij, jũ mã quê ha me, ne mehkên pê me cato, ne me cumã:

— Me ikjêjê, jũ mã wa ha ajte me, ne me ikên ita pê me icato? — hane.

³⁸ Mã Petrô me cumã:

— Ýhÿ, ca ha me hane he. Ca ha me akên jicu, wa ha Jeju jarkwa kôt cô kam me acumrã, quê ha mehcunea Pahpãm te, ate ame Jeju to kên atajê to tojnõ ne hicu tu na me gahkre pej. Hõhõ, ca ha me hane, ne me Pahpãm Carõ Pejti incwa, ne pê ramã Pahpãm to awjahkre. ³⁹ Ne me ca me, me akra me, por cormã mehcunea ampÿa mã ame ipa atajê mã, pê Pahpãm to awjahkre. Pê hanea ne cute cormã me hator atajê mã Carõ Pejti ita to awjahkre — hane.

⁴⁰ Mã hipêr Petrô me hapackre, ne me cumã ahcawpa ne me cumã:

— Cute me hapackre xà kên kam me ipictor itajê pê me gapôj, ne me amji pytà — hane. Hõ, me hapackre xà ita to ri cute me hapackre, ne cormã me hapackre xà kwÿ jàhtôa to cute me hapackre.

⁴¹ Mã me hàhtôa ne cute me Petrô jarkwa par, ne cute mehkên ton jicu, mã cute cô kam mehcumrãr. Mã amcro ata na, me hàhtôa ne Jeju na mehkwy mã me hàr. Ne atajê pê me hàhtô na me mir crê ne me axà.

⁴² Na pê Jeju jarkwa na cumã memprar catêjê te tõi

atajê cunea mã Pahpãm te amji kam hapac xà to hahkre to me ipa. Ne pê ajco mehcunea ajpên na mehhônco tu, ne ajpên kam me apà, ne ihtÿj ajco Pahpãm mã mehcakôc.

Mam Jeju na mehwÿ te amji kam hapac xà

Me Hápên Xà 4.32-35

⁴³ Ne pê Jeju jarkwa na cumã memprar catêjê ajco Pahpãm carôat kôt me hápên xà catia pihhoti impejti ton to me ipa. Ita cwÿrjapê pê mehcunea mã me hÿpa, ne mehcunea mã mempej pit. ⁴⁴ Na pê mehwÿ cunea mehkôat me ajrô, ne me cumã ajpên kíñ. Cwÿrjapê pê me cumã ampo atajê, ihtÿj me cupê hamreare atajê me ajco me ajpên mã me hàhcukrêj to me ajcokjê. ⁴⁵ Ne pê ajco me cumã ampo atajê to ihpore na apha, ne me cupê ampo jamreare atajê caxuw amji mã meh-pore to ajcrà. ⁴⁶ Ne mehcunea, amcro cunea kam ajco Pahpãm to me amji kam hapac xà jÿrkwa kam me cuprô. Jirô pê mã pê ihtÿj ajco ajpên jÿrkwa kôt ame apà, ne ihtÿj ajpên pyrên me hakry, ne nee jÿm amji to cati prãm nare. ⁴⁷ Na pê Pahpãm to me hàmnân ne cumã impejti na me harê. Ne pê mehcunea Jeju na mehwÿ impejti na me to amji kampa. Pê amcro cunea kam Pahpãm me capi, ne me to cuprô, ne ma Jeju na mehwÿ mã me hacjê, na pê ma me to ipicamên to mō.

Hÿmre te xwÿ ita caprãr xà

Jowãw 14.12-14; Me Hápên Xà 14.8-10

3 Ýhÿ, pê amcro ata na, pyt pejti kam, Petrô me Jowãw ma Pahpãm to me amji kam hapac xà jÿrkwa wÿr me mō. Ne amcro ata na, pê pyt pejti kam Pahpãm mã mehcakôc prãmte, ajco me curi cuprôn to me ipa. ² Pê amcro cunea kam hÿmre nõ ihkjê te xwÿa na ihpÿm ata, harkwa japyr te Impejti ata jarkwa mã ajco ihkrÿ, cute mencjêj mã cute me ahna hàhwÿr prãmte. ³ Ne cute Petrô me Jowãw xàr na me hōmpun, ne me ahna hàhwÿr. ⁴ Mã cute me hōmpun, mã Petrô cumã:

— Me ipupu — hane.

⁵ Mã hÿmre ata te me hōmpun, ne cute me cumã ampo jör, mã cute ipyr prãmte, ahna me hikaj.

⁶ Mã Petrô cumã:

— Ipê ihpore hamreare, ne wa ha itÿj amã ampo gō. Ne ite amã ampo jör xà ita pê Jeju mã ri quêt carôt cati, incwÿrjapê quê ha ihtÿj ato impej. Pê Pahpãm Jeju to awjahkre, pê Naxare jō krÿ pín cato ata jarkwa na wa ha amã: “To xa ne mō” — hane.

⁷ Ne Petrô te awpôc rÿm hÿ na ipyr, ne ihtehcajpar. Mã hamre, ihpar kôn pej pyrentu, mã ihtÿj intoj ne hãm, ne apu mör pyrentu. ⁸ Jirô pê mã ri ma mehkôt Pahpãm to me amji kam me hapac xà jÿrkwa mã hàr, ne apu intoj to mō, ne apu Pahpãm to hàmnân to mō. ⁹ Mã me hàhtôa ne cute me harkwa mã hÿmre te ihkrÿ ne hàhwÿr catê ata pupun, mã ikre kam apu intoj to mō, ne apu Pahpãm pej na harên to mō. ¹⁰ Me kam mare mã impej, cwÿrjapê ri cute me hōmpun xà ata te

ame to hápêt, ne amji mã me to ipikrar. Ne me amji mã:

— Rÿ jÿ caxuw me pahnō te ampo te hajÿr nõ pupun nare — hane.

Ikre kam Petrô jÿjarên xà

Me Hápên Xà 2.14-36; Ruc 24.46-47

¹¹ Mã hÿmre te xwÿre ita ramã caprãr ne impej, ne ma cute Petrô me Jowãw pynãr, mã hamre, mehcunea te ita to amji mã me ipikrar ne amehprôt. Ne ma Pahpãm to amji kam me hapac xà jÿrkwa jarkwa mã, Xarômãw jō amkrã ata wÿr mehprôt. ¹² Mã Petrô te amji wÿr mehprôt na me hōmpun, ne me cumã:

— Pÿhàpà, me ikwÿ pê Ixaher catêjê, ampo na mã came iwÿr ame aprôt to hane? Ne ampo na mã ca amji mã ame apikrar to ame hane, ne kypê me ipupun nare? Côt ca atÿj me itea, me icarôat kôt me hÿmre ita caprãr na ame icãmji? Xà mōrmō me ipej cwÿrjapê wa ite me hÿmre ita caprãr? Hãpà, nee mã me icarôt to ite me hÿmre ita caprãr nare. ¹³ Jeju pê Pahpãm kra impeaj ata te ri caprãr. Ne cupê me panquêtjê Aprãw xwÿ me, Ixác xwÿ me, Jaco xwÿ Pãm Cati, ne cutea ri ihkra Jeju to cati, na ri impeaj to impej. Ne ca ate ahnaa amji pê mehcaca, ne me gō pahhi pê Pirat mã me hōr, cute ihcuran xà caxuw. Mã tee apu cumã hikran prãm. Ca ma ihkÿnte ame cumã hikran caca. ¹⁴ Ne ate me jÿm kēanre pê mehcuran catê ata me Jeju pejti ata to me gãhpan, ne ate mehcuran catê ata mã hikran na Pirat na me gãhwÿr. Mã cute me amã cumã hikran. ¹⁵ Ca ate me Jeju pê me pamã pahte amji kam me pajapac xà jör catê ata curan. Mã Pahpãm te hacpÿa mã to ihtÿr, wa ite ihtÿr na me hōmpun. ¹⁶ Jeju te ri hÿmre ita caprãr. Wa me ajwar ite, cute caprãr na me hahkre pej. Na ri ita caxuw me akam mare mã, me acunaa mã hÿmre ita pej.

¹⁷ — Me ikjêjê, he imã, ate me gō pahhi me Jeju curan na me gahkre pej. Ne me apê cupê Pahpãm kra na hahkre kēatre, na ca ate me to hajÿr. ¹⁸ Pê rÿ pêa mã ramã Pahpãm jarkwa na ihhóc catêjê Jeju tyc xà na mehhóc. Ne cute me ahna ihhóc xà ata kôt ri ihkên mã hàr. Ne pê ihkàj xà incuire nare ata na, pê rÿ pêa mã ahna mehhóc, na ca ate ahnaa me to hajÿr. ¹⁹ Na ca ha me akên itajê mã me hikra, ne ate amji kam me gapac xà to me antuw, ne Pahpãm wÿr me apkjê, ne Pahpãm jÿkjê rÿm me ahtwÿ, quê ha ate me to kên atajê to tojnō ne hucu, ne me ana amji capa. ²⁰ Ca ha ame gakry, ne atÿj me apej pêa mã me amji to me ajpa. Ne quê ha Pahpãm amcro nõ na hipêr me pahwÿr Jeju kujate. ²¹ Quê ha nee cormã ne amji jaxãr pyrentu nare, ne quêt cōjkwa kam ahtwÿ. Quê ha jÿ caxuw Pahpãm ampo cunea to impej, ne to ipintuw jō amcro kam ahtwÿ, quê ha cormã amji jaxà. Ne rÿ pêa mã pê Pahpãm jarkwa na mehhóc catêjê impejti atajê, ramã ita to mehcakôc, ne ahna mehhóc. ²² Pê ramã me panquêtiti pê Mojxe xwÿ ita to ihcakôc, ne me cumã:

“ÿhÿ, quê ha amcro nõ na me pajõ Pahhiti pê Pahpãm me pamã me pahnõa kujate to hanea, pom pê mam ikujate he.

Quê ha pahnõ pyxit ata me pamã Pahpãm jarkwa to ihcakõc, ne harên to apu mõ, ca ha mempar to impeaj ne.

²³ Nãmri ca ha ate nee me jũm ata par, ne harkwa kõt me apa nare na, quê ha Pahpãm ihtÿj ahna me apupu, ne mehkwy intête me anõ jũpar nare ata cator pyrentu, quê ha acto” hane.

²⁴ Ita to pê Mojxe me panquêtjê mã ihcakõc.

— ÿhÿ, he nee pê Mojxe pyxit peaj ne ihcakõc to hajÿr nare. Pê Pahpãm jarkwa na mehhõc catêjê cunea mehcakõc to hajÿr pit. Ne mam haprÿ to Xamer xwy kõt me hapõj itajê, pê hanea ne ajco mehcakõc xà ita to mehcakõc to me ipa. Pom cu amcro ita kam me harkwa to hãpên xà pupu, itajêa to pê mehcakõc, ne ahna mehhõc. ²⁵ Pê Pahpãm ramã Jeju to awjahkre na pê harkwa na mehhõc catêjê, harkwa kõt me pamã Jeju to awjahkre. ÿhÿ, pê rÿ pëa mã Pahpãm me panquêtiti Aprãw xwy mã ihcakõc ne cumã:

“ÿhÿ, quê ha amcro nõ na me atãmxwy tãmxwy me ikampa, wa ha mehkõt pjê cunea kam me to impejti ne” hane.

²⁶ Ne pê Jeju hõtpê Pahpãm kampa, pê cute to hũjahkre xà ata na capi, ne ma me amã ihkujate, cute me ato impej, ca me acunea te me akên mã hikran, ne Pahpãm wÿr ate me amji jaxàr prãmte — hane. Ata to ri Petrõ te mehkwy mã hũjarên.

Pê Petrõ me Jowãw prohti cuna mã xa

Ruc 21.12-13

4 ¹⁻⁴ ÿhÿ, Petrõ me Jowãw cormã Jeju to me cumã ihcakõc, ne me cumã:

— ÿhÿ, Jeju tyc mã Pahpãm te hacpÿa mã to ihtÿr — hane. Mã me hàhtõa ne amehcuhhê ne me kampa atajê te amji mã me to hajÿr pyrentu, ne ihtÿj me Petrõ jũjarên xà atajê kampa. Na ri me hàhtõa ne Jeju to amji mã mehhimpej, ne ramã me hũmre te mir te xÿc ne mehkwy mã me hãr. Mã me hõ pahhi catêjê kwÿ japõj, ne cute me Petrõ me Jowãw cakõc xà na mempar. Ne cute mempar catêjê itajê pê Xato xwy kõt me ipa catêjê kwÿ me, cute Pahpãm mã mehcajrên catêjê kwÿ me, me Pahpãm jũrkwa jamãr catêjê jõ pahhi. Ne ame Petrõ me Jowãw kam mencryac to mencryc. Na ri cute mehpro, ne me haxàr. Mã ramã me ahna pytre, mã ri curia cute me hacjên xà kam me ahna apê. Ampo na? Pahhi catêjê cunea te irarà na me hacjên atajê cakõc xà kam me hapac prãmte. Ne pê cute amji mã me Jeju to mehhimpej, ne mempar atajê pê me hàhtõ na me xÿc mir.

⁵ Mã apê na irarà na, prohti kam mehkwy jakrã jõ pahhi catêjê me, Mojxe xwy te me hapackre xà to me cumã hahkre catêjê cunea te Krÿpinkrên kam amji to me cuprõn, cute me Petrõ me Jowãw cakõc xà na mempar prãmte. Mã Juta catêjê jõ pahhi me, cute me

cumã Mojxe xwy jõ kãhhõc to hahkre catêjê me, ⁶ me Pahpãm mã mehcajrên catêjê jõ pahhi japrÿ te Anati ata me, mehkjêjê me, Cajpa me, Jowãw me, Arexãne me, prohti kam mehcunea te me cuprõn, cute me Petrõ me Jowãw cakõc xà na impar prãmte. ⁷ Mã pahhi te me ahna harkwa hydr. Mã cute me haprõr ne me cuna mã me hãm. Mã pahhi te mehcukij kam ihtêm, ne me cumã:

— ÿhÿ, ita caxuw ca ha me imã me amji jarê. Jũm jarkwa kõt mã ate me hũmre te xwy ita caprãr? Jũm te mã me amã me acarõt jõr ne ahna me amên, ca ate me caprãr? — hane.

⁸ Mã Pahpãm Carõ Pejti te Petrõ mã amji jõr, ne inca ca xà mã hãr, ne cute to ihtÿj, cute me cumã ihcakõc xà caxuw. Na ri Petrõ te prohti kam me cupê pahhi catêjê mã ihcakõc to hajÿr he, ne me cumã:

Pê Petrõ me cupê pahhi catêjê mã Jeju jarê

⁹ — ÿhÿ, menxũjê me, me to ahimpej catêjê, mõrmõ ca amji mã me ito: “Cutea ri me hũmre ita to impej ne caprãr” hane, incwÿrjapê mã ca ame icukij xà ita to me icukij? Ne ajte me imã: “Jũm carõt to mã ate me cute xwy ita caprãr?” hane. ¹⁰ Mër hõhõ, me ikam gapac to mempeaj ne. Ne wa ite, me cupê Juta catêjê mea mã, ate me hũmre ita jahkre pej prãmte, wa me amã harên to, Jeju te ri caprãr. Por pê Pahpãm Jeju to awjahkre, pê cato ne Naxare jõ krÿ kam apu ipa ata te ri caprãr. Ne taa mã ca ate pÿ kam mehcuran. Ne taa mã ri Pahpãm te hacpÿa mã to ihtÿr, ne cutea ri hũmre te xwy ata caprãr. Ne harkwa kõt wa icakõc, cwÿrjapê ri cute caprãr.

¹¹ — Pê Pahpãm jõ kãhhõc ramã harên to hane he:

“Ihhêj rũm me apê, por ikre pyxwÿr catêjê kêanre atajê pyrãac.

Ne me apê hahkre kêatre.

Na ca ame ikre mã hãm xà impejti ata caca, ne ate me mên.

Mã me akwÿ pê jũmjê itajê te me ikre mã hãm xà impejti ita pÿn,

ne me cumã hãm, mã impeaj to impej, ne ihkwÿ jirõa pê impej ne ihtÿj” hane.

— Ne Jeju pê ikre mã hãm xà impejti ata pyrãac. Ca ma ame curê ne ate me mên. ¹² Ne Jeju ita ri pyxit peaj, ne me pahkên pê me pahpytà. Ne jũm mã ri pjê ita kam me pahkên pê me pahpytàr jahkre pej? Hamreare, jũm mã hahkre pej nare. Na ri Pahpãm te caxuw Jeju pyxit peaj ne hãm. Na ri pyxit peaj ne cumã me pahkên pê me pahpytàr jahkre pej — hane. Ita to ri Petrõ te ihcakõc, ne me cumã harên.

Pê me cupê pahhi catêjê Petrõ me Jowãw mã me amji cawpa

¹³ Mã cute me Petrõ par, ne me hõmpun, mã me ipi-jakrut ne me xa, mã me ajpên mã:

— Pÿhãpà, xà ajte nee me cumã me pahcupa nare, na mã ame pamã mehcakõc xà ita to hajÿr to ajwar

ame mō? Pom me pahcati pit ita! Ne me pamã hahkre pej pit ita! Ne cormã me pahkĩnte mencreire ita cakrō, mã ajte nee amji mã me pahcupa nare. Ampo na? Hōt-pê Jeju me ajwar amcro atajê nõ na apu ipa na ri, nee cumã me pahcupa nare — hane. ¹⁴ Ne hanea ne hũmre te xwỳ caprãr ata, hanea ne mehcunea cuna mã Petrô me Jowãw cahê na impeaj xa. Na pê me cupê pahhi catêjê nee Petrô me Jowãw na mehcaokc kên nare. ¹⁵ Ne ma cama cute me Petrô me Jowãw cator, pō mã, cute me cuprôn xà pê. Ne me ajpên mã:

¹⁶ — Pỳhàpà, jũ mã cu ha me ipijakrut itajê to me? Nãmri ramã mehcunea te Krĩpinkrên kam harkwa to cute me hũmre te xwỳ caprãr na me hahkre peju ita kam. Jũ wỳr cu ita to me amxu, ne jũ wỳr cu mentête mehcaokc xà ita capa. ¹⁷ Hamre, cu ha cama me cumã amji cawpa, quê nee hipêr amji mã me Jeju jarên nare. Mãr quê nee krĩ kôt harên ipicràn nare — hane.

¹⁸ Ne ma cute me Petrô me Jowãw to me hàr, ne amji jipôc ri, amji kuc ri me hãm. Ne me cumã:

— Hã, ca ha nee hipêr me cumã Jeju jarên nare, ne ca ha ma me tẽ — hane. ¹⁹ Mã Petrô me Jowãw, me hõ pahhi catêjê mã:

— Pỳhàpà, xà ajkĩ me acakôc xà ita pej? Wa ha pijamã me garkwa kôt amji to, ne nee Pahpãm jarkwa kôt amji ton ne ihkôt me ipa nare? Quê ha pijamã Pahpãm mã ita na impej? Hãpà, quê ha cupê ita na ihkaj na. ²⁰ Pê wa Jeju me ajco ame ipa, ne ihkôt me ampo jàhtôa kampa, ne ito jĩa to me ampo jàhtôa ne me hõmpu. Ita kam jũ wỳr wa me ita jicu, ne me to tojnõ, ne me to icakôc jicu nare — hane.

²¹ Mã me hàhtôa atajê ame Pahpãm to ajpên mã me amnã, ne ajpên mã:

— Ampeaj kam Pahpãm cati ne carôt tỳj, cute ihtỳj hũmre te xwỳ ita caprãr — hane. Cwỳrjapê ri me cupê pahhi catêjê, me hàhtôtĩ atajê cupate, cute me Petrô me Jowãw mã me amji cawpa, ne ihtỳj jũ na me ton to prãm, ne ma cute mehkujahêc. ²² Ýhỹ, pê me hũmre te xwỳ caprãr ata pê ramã ahna caku cwarênta. Pê mehcunea Petrô me Jowãw te Pahpãm carôt kôt, cute me hũmre te xwỳ ata caprãr na me hahkre pej.

Pê Jeju kôt me ipa catêjê Jeju mã mehcaokc

²³ Ne cute me Petrô me Jowãw mã hikran, mã ma me tẽ, hacpỹ mã mehkwy wỳr. Ne cute mehkwy cunea mã, pahhi me prohti kam, cute me ahna ihcakôc xà kên to, cute me ahna mehcaokc xà atajê cunea na, me amji jarên. ²⁴ Mã cute me Petrô me Jowãw par. Ne mehcunea te me cuprôn, ne Pahpãm mã amehcaokc ne me cumã:

— Hàpà, me ijõ Pahhiti. Ýhỹ, apê me icunea ton catê. Pê ca cõjkwa to, ne pjê to, ne cõ to, ne kam ampo tĩar na amji to ajpa atajê cunea to. ²⁵ Ýhỹ, pê rỳ pêa mã me iquêtti pê amã hàpên catê pê Tawi xwỳ ihhõc, ne Acarõ Pejti jarkwa kôt ihhõc to hane he:

“Ampo na mã amji caprỳ to krĩxàre kôt ame cõjkwa kam Pahhiti pê Pahpãm kam mencryc ne ame hapu prãmte ame cuprõ?”

Ne jũ wỳr quê ame amji mã hamã. ²⁶ Ne ampo na mã me cupê Ixaher catêjê nare atajê jõ pahhi kwỳ, hãn ne Pahhiti te me cumã hõ pahhi pyxwỳr ata me cuna mã me cuprõ, ne ahna ame ajpên pa?” hane.

— Ita na pê Tawi xwỳ, Acarõ Pejti jarkwa kôt ihhõc.

²⁷ — Ne cute ame Jeju na me ajpên par ne kam amencryc prãmte ri, krĩ ita kam me cuprõ. Ne ita na ri pahhi Heroti me, pahhi Ponti Pirat me, mehcahkrit pê Juta catêjê nare atajê me, me cupê Juta catêjê me, mehcunea te me cuprôn, krĩ ita kam. Ne mãr pê ca me imã Acãmter pejti capi ne to awjahkre, ne hãm ata kam hanea ne apu mencryc. ²⁸ Pom pê ca ramã rỳ pêa mã to amji kampa ata na ri mehkêan kam, cute me cuprôn. ²⁹ Měr he, me hõmpu he! Cormã me pahkam mencryc. Ne cormã imã me amji cawpa. Ne ita caxuw, ca ha hipêr me ipê me amã me ijàpên catêjê mã acarôt gõ, wa me cumã garkwa to icakôc, ne me icakôc kam pra, ne kypê me cumã me icakôc nare. ³⁰ Ne ca ha me cumã acarôt pẽ, wa akra Jeju jarkwa kôt me hà catêjê caprã. Ne akra jarkwa kôt me icakôc to me ipa, ne ampo to mempej, ne me to ijàpên xà impejti ton to me ipa, quê me hõmpu, ne me acarôt jahkre pej — hane.

³¹ Ita na ri Jeju na mehkwy Pahpãm mã me amji cãjrên. Ne cute Pahpãm mã mehcaokc jicu, me ajkaam cute me cuprôn xà jàpêt. Mã Pahpãm Carõ Pejti te mehcunea mã amji jõr ne me to hipu tu. Na pê nee me cumã me hũpa nare, ne mehtỳj pit. Mã nee mehcaokc xà na me hàhtat nare.

Pê ampo cunea to ame amji tekjê pit

Me Hàpên Xà 2.42-47

³²⁻³³ Ne Jeju jarkwa na memprar catêjê hõtpê mehcunea mã Pahpãm Carõ Pejti carôt tỳjti jarkwa kôt hacpỹa mã Jeju tĩr na me harê. Mã Pahpãm hõtpê me to kênre nare. Ne me hàhtôa cakrõ, cute amji kam me hapac xà itajê pit, ne pyxit peaj, ne cute me amji kam hapac xà pipên pit. Mã nee ame amji pê hõxỳ nare.

³⁴⁻³⁵ Ne pê hõtpê me cumã ampo to ajcrà. Ne pê ajco me cupê ihpore hamre, pê ajco mehkwy mã, ikre me pur me ampo atajê to ajco ihpore na me apha, ne mehpare incwa, ne Jeju jarkwa na memprar catêjê mã me cugõ. Pê me cupê hamreare atajê mã me to ajcrà. Na pê Jeju na mehkwy kam jũm pê ampo hamreare nare.

³⁶⁻³⁷ Ýhỹ, mehcote na hũmre apu mō ata japrỳ te Joje. Ne cupê Rewi xwỳ tàmwxwỳ tàmwxwỳ nõ. Ne cupê Xipre jõ pjê catêjê nõ, ne kaam ihpỳm. Mã cute me cumã haprỳ krut jõr, ne me cumã “Parnap Jũcanãr”. Ampo na? Hõtpê apu mehkôt ipa ne apu mehkwy mã hũcanãr ton to ipa, na pê haprỳ hane. Mã cute hanea ne pur to ihpore na hàhpan, ne ma Jeju jarkwa na memprar catêjê mã hõr, cute me cupê hamreare atajê mã apu to ipicràn xà caxuw.

Anana me Xapirkwỳj

Carati 6.7

5 Mă hũmre nũ ita japrỳ te Anana, ne hĩxi japrỳ te Xapirkwỳj, te hanea ne pur to ihpore na me hãhpan. **2** Ne aracri cute me ihpore jĩkjê juwahi, ne Jeju mă memprar catêjê mă me hĩkjê pit jõr. Ne cute mehcunea jõr na me amji jarẽn. Pê ihtỳj Xapirkwỳj mă impjẽn te me cumã ihpore jĩkjê pit jõr na hahkre pej.

3 Mă Petrõ te Anana cukij to:

— Pỳhàpà, ampo na mă ate cama me pahcurê xwỳn jamãr, mă cute amã amji kam hapac xà ita to hahkre? Ne ampo na mă ate Pahpãm Carõ Pejti mă ahêj? Ampo na mă aracri ate pur jõ pore jĩkjê juwahi? **4** He ate pur to ihpore na gãhpan xwỳjrea na, pur atekjêa ri, ne hanea ne, pom ate ihpore me pur to gãhpan ita atekjêa ri. Ca rỳ mă hĩkjê pit jarẽ, quê ha ahna amã ihkẽnre nare. Ne ampo na mă ate ita to hajỳr? He nee ate jũm mă ahêj nare, Pahpãm mă ca ate ahêj — hajỳr.

5 Mă Anana te ita par pê ihpỳm ne ihtyc pyrentu. Mă cute me ita jahkre pej catêjê atajê cunea mă ampeaj kam ita cupa. **6** Mă mentuwjê kwỳ te mehtyc cupu, ne ma põ mă me to kwỳ, ne cute me harêt.

7 Mă ahna ahtũm ryre mă curi ihkõt hĩxi cator, ne nee cormã cute ampo te impjẽn to jũ mãn xà ata na hahkre pej nare. **8** Mă Petrõ te ihcukij ne cumã:

— Hã, imã awjarẽ, xà ampeaj kam mă ihpore ita na pit mă ate apjẽn me pur to gãhpan? — hajỳr. Mă cumã:

— Ỳhỹ — hane.

9 Mă Petrõ cumã:

— Ampo na mă ate apjẽn me amji caxuw Pahpãm Carõ Pejti inxỳj? Xà ate mehcajpêr prãmte mă ca ate me to hajỳr? Pom mentuwjê te me apjẽn jarêt ne ramã hacpỳ ne ame ipa ita, quê ha hanea ne ihkõt me ato kwỳ ne me garêt — hane.

10 Me ajkaam mă Petrõ cuna mă ihpỳm ne ihtyc. Mă mentuwjê cator, ne cute me hõmpun, ne ma me to kwỳ ne cute impjẽn cahêa na me harêt. **11** Mă Jeju na mehkwy cunea te me ita par, ne me cumã hũpaa to hũpa.

Pê me hãpên xà pihho catia to

Me Hãpên Xà 19.11-12

12 Ỳhỹ, Jeju jarkwa to memprar catêjê te Pahpãm carõt kõt me hãpên xà pihho catia ton. Ne cute me hàhtõa jipõc ri me hãpên xà impej jãhtõa ne me ton. Mă mehkwy cunea te me cuprõn, Xarõmãw jõ amkrã kam. **13** Mă me hàhtõa ne me cupê Jeju na mehkwy nare atajê mă ampeaj kam me hũpa, na ri nee Jeju na mehkwy mă jũm xàr nare. Ne mehcunea amji mă me Jeju na mehkwy cupa to hũpa to me ipa. **14** Quê ha jũm te amji kam hapac xà to ipintuw prãm na, quê ha ihtỳj jũm me hỹrmã axà. Ne por me hũmre me, pyjê jãhtõa ne ampeaj kam me Pahpãm kampa atajê ri, Pahpãm wỳr me ipipkjêr xà, na ri ma Jeju na mehkwy me ipicamẽn to me mõ. **15** Ne por Jeju jarkwa na memprar catêjê atajê, Pahpãm carõat kõt me hãpên xà pih-

ho catia ton to me ipa. Cwỳrjapê quê ha me hà japỳ, ne krĩ cape na me cunõ, quê me hikwa, quê Petrõ apu mõ ne mencwỳrpê mõ, quê ha carõ pykrã me hà atajê pro, quê ha mempej pyrentu, ne amehcuhhê. **16** Mă me hàhtõa ne Krĩpinkrên wỳr me hà catêjê me, me kam me pahcurê xwỳn carõ kên catêjê atajê to me mõ, mă cute mehcunea caprãr.

Pê ame Jeju na mehkwy curê

Ruc 21.12-15; Jowãw 15.26-27; Me Hãpên Xà 4.1-22

17 Mă cute Pahpãm mă mehcajrẽn catêjê jõ pahhi me, Xato xwỳ kõt me ipa catêjê kwỳ me, ma ame Jeju jarkwa na memprar catêjê jũ na me amji to prãm ne ma ame curê. Ne mehkwy kwỳ cunea mă Jeju jarkwa na memprar catêjê kĩn, cwỳrjapê ri me curê xwỳn itajê kwỳ ame hũ na mehkĩn ne ame curê. Na ri cute ame to kẽnre xà na me ajpẽn par. **18** Ne cute mehkujahêc, mă mehwỳr me pra, ne cute me Jeju jarkwa na memprar catêjê pijakrut pê Petrõ me Jowãw atajê pro, ne me haxàr. **19** Mă caxwa ata kam, cõjkwa pĩn, Pahpãm mă memprar catêjê nõ cator, me hacjên xà kam, ne cute me cumã harkwa jihê mẽn, ne põ mă ajwar me cator, ne me cumã:

20 — Hã, cute Pahpãm to me amji kam hapac xà jũrkwa wỳr me tẽ, ne me cumã Jeju te amji kam hapac xà intuw pejti ita na harẽn pa — hane.

21 Mă me hũpar pyrentu, ne apẽ mă, irarãtia na, ma Pahpãm to me amji kam hapac xà jũrkwa mă me hàr, ne cute me cumã hũjarẽn kam mehtêm. Mă Pahpãm mă mehcajrẽn catêjê jõ pahhi te me ajpẽn par prãmte me cuprõn, ne prohti kam me hõ pahhi kwỳ na me hàhwỳr, cute me cuprõn xà ri. Ne cute me cuprõn jirõ pê mă ma me hacjên xà wỳr, cute me Petrõ me Jowãw japrõr na me harkwa kujahêc. **22** Mă me hacjên xà jamãr catêjê curi me cator, ne nee cute me hõmpun nare. Ne ma cute me amji jaxàr, cute me cuprõn xà wỳr, ne me cator ne cute me cumã me harẽn to:

23 — Ỳhỹ, wa ma me hacjên xà ri me mõ, mă me hacjên xà jihê pejti xa, wa ite me hõmpun, mă me hũjamãr catêjê harkwa mă amehcuhhê, ne me awjamã. Wa ite me hihê mẽn, ne nee ite caxwãm pê, kam me jũm pupun nare — hajỳr.

24 Mă Pahpãm mă mehcajrẽn catêjê jõ pahhi kwỳ me, me hõ pahhi me, me hũjamãr catêjê jõ pahhi atajê me, me hũpar, ne mehkã pictor tu, ne me cupê me hahkre kêatre. **25** Me ajkaam mă jũm ata cator ne me cumã:

— Me ikampa, por ca ate me hũmre jacjên atajêa ri ma ramã me hàhtõa mă Pahpãm jarẽ, Pahpãm to me amji kam hapac xà jũrkwa kam — hane.

26 Mă me hamãr catêjê jõ pahhi me, mehkwy ma me pra ne hỹrmã me cator, ne cute me haprõr. Ne me cumã ampeaj ne me to mõ. Ne nee ame to kên nare, me hàhtõtĩ te kên to me hamãr catêjê kwỳ jipej cupate. **27** Ne cuprõn xà wỳr me to cator, ne cute me hãm, cute me ajpẽn par catêjê cuna mă. Mă me hõ pahhi me cumã:

28 — Pÿhàpà, wa ite Jeju japry jarën tète me amã, nõ na mã ca ramã ame harën to me apa! He ramã Krîpinkrên cunea kôt ate me harën cràn! Ne cormã hipy ate Jeju curan na, amji mã me icuhtom tu — hane.

29 Mã Petrô me, Jeju jarkwa na cumã memprar catêjê atajê kwÿ me, me hõ pahhi catêjê kwÿ mã:

— Cu pahtÿj me Pahpãm kampa, ne me hÿmre cu nee mempar nare. 30 Ne Pahpãm pê me panquêtjê Pãm Cati, ne cutea ri hacpÿa mã Jeju to ihtÿr, na wa ame amã harë. Ca me ate pÿ na me Jeju xôr, ne mehcuran, mã Pahpãm te hacpÿa mã to ihtÿr. 31 Ne cute me pajô Pahhiti catia na hãm, mã cupê me pahkên to pøj catê. Ne cute amji jÿkjê rÿm Jeju jÿr, awpôc rÿm. Ampo na ri Pahpãm te to hajÿr? Ma ame pahkên na ihcaca na ri pahte me pahkên mã hikran, mã cute me pahkên to tojnõ to prãm to ri cute to hajÿr. 32 Ne wa ite me hacpÿa mã me Jeju tÿr na me hõmpun. Ne ite Jeju tÿr na me hahkre peaj na wa mehcunea mã ame harën to me ipa. Mã hanea ne Pahpãm Carô Pejti ame cumã harë. Mã hõtpê Pahpãm, cute mempar catêjê mã Carô Pejti gõ — hajÿr. Hõ, ita na ri Petrô te me cumã harën.

Me hõ pahhi catêjê ame kam mencryc

33 Mã Juta catêjê jõ pahhi catêjê te me ita par, ne ame kam mencryc to amencryc. Ne me cumã Jeju jarkwa na memprar catêjê ihcuran prãm pit. 34 Mã hÿmre nõ japry te Camar ita me cumã ihcakôc prãmte hãm ne xa. Ne cupê Parixêw catêjê nõa, ne cupê Mojxe xwÿ jõ kàhhôc to me cumã hahkre catê. Ne mehcunea mã ihkÿn, ne me cumã hÿpa. Mã ma cute Jeju jarkwa na memprar catêjê to me hamãr catêjê kujahêc, quê põ mã me to cato, ne põ pê me to hikaj. Mã ma põ mã me to cator. Mã Camar te pahhi catêjê mã ihcakôc kam ihtêm, ne me cumã:

35 — Me ikwÿ pê Ixaher catêjê, me hÿmre itajê to impeaj ne, nee ca ame to kên nare. 36 Xà ca nee me Tewta xwÿ ata to amji japackre nare? Pê tee apu amji to cati prãm to mõi. Ne ihkôt me ipa catêjê to cwatxênta ne amji mã me to cuprõ, ne ame to ipa. Pê jÿm Tewta ata cura, pê pea ihkôt me ipa catêjê cunea ame ajcrã. Pê me ipijapu xà hamre. 37 Jirô pê mã pê Hÿpôjajo jõ pjê pÿn Juta ata cato, pahhi mã me hakrã cahyt xà jõ putwrya kam. Ne hanea ne cute pahhi jÿhhÿr prãmte amji mã me hàhtôa ne me to cuprõ. Pê hanea ne me Juta ata cura, pê ihkôt me ipa catêjê ma ame ajcrã.

38 Na cu Jeju kôt me ipa catêjê to ame tojnõ, ne nee jÿ mã ame hÿmre itajê ton nare, ne me cumã hikra, quê ha me pra. Quê ha me hâpên xà ita pê me hÿmre itajê jâpên xà na, ca ha me to tojnõ quê ha taa me ipictor to me hanea, pom pê mehkwy he. 39 Nãmri quê ha me Pahpãm jâpên xà na, jÿ wÿr ca me to cô ne me to hamre. Me to impeaj ne, ca ha ate Pahpãm jâpên xà to amehkên na, ca ha atÿj me Pahpãm cujtê, ne jÿ wÿr ca ha me ampo pupu — hajÿr. Ne Camar te pahhi mã ihcakôc to hajÿr, mã cute me kam hapac, ne me ajpên mã:

— Cu ha nee mehcuran nare — hajÿr.

Pê pahhi catêjê Jeju mã memprar catêjê cahÿ

40 Mã cute me Jeju jarkwa na memprar catêjê na me hãhwÿr, mã me hãr. Mã pahhi catêjê kwÿ te amehcahÿr na me cumã harkwa. Ne hanea ne cute me cumã harkwa ÿr, quê nee hipêr jÿ caxuw Jeju to amehcakôc to me ipa nare. Ne ma cute mehkujahêc, mã ma me mõi.

41 Ne me cator, ne ame hakry, ne me ajpên mã:

— Cute Jeju cwÿrjapê me pahcahÿr ita na ri impej. Ampo na? He cute me pahcahÿr xà ita pê Jeju ihhêr rÿm cahÿr xà jõ amcro ata pyrãac. Ne ihcahÿr cumam mãa ri ita kam ame pahcahÿr, ne ahnaa ri me pamã impej. Wa Jeju jarkwa na ame cumã awjarë, na ri ame pahcahÿr. Ne mõrmõi ihtÿj Jeju me papipêan na ame pahcãmÿj, ne ame pahcahÿr. Ne ahna ri me pajakry — hane. 42 Ne amcro cunea kam me cumã Jeju to mehcakôc to me ipa, Pahpãm to me amji kam hapac xà jÿrkwa kam. Ne hanea ne me hÿrkwa kam me Jeju jarën to me ipa. Ne ihtÿj hipêr cute mehcunea mã Jeju cwÿrjapê Pahpãm te me ahna amji caxàr to hahkre to me ipa kam me to incrã.

Mehtehcajpar catêjê te xet

1 Timot 3.8-9

6 Ne amcro nõ na hipêr Jeju na mehkwy picamên. Mã mehkwy pê Crec jarkwa to mehcakôc catêjê me, Ixaher jarkwa to mehcakôc catêjê me, cute me ajpên mãn kam mehtêm. Ampo na? Xwahna amcro cunea kam Crec jarkwa to mehcakôc catêjê cahãj impijapit wej mã cute me hõ jõr xà ata to me hapac kêt to me mõi, na ri. 2 Mã Jeju jarkwa na memprar catêjê te tôxi atajê te me amji kwÿ cunea to me cuprõn, ne cute me cumã amji jarën, ne me cumã:

— ÿhÿ Pahpãm jarkwa to ite me ijâpên jicu, ne me pajô to pit mã me amji japackre, ita na me ipê ihkaj na. 3 Cwÿrjapê, ca me ikjêjê me amji capi, ne Pahpãm Carô Pejti carôt te me hÿmre to xet ne me amji jõr atajê to me caprã. Ampeaj kam cute me amji kam hapac xà impejti, ne cute me amji jahkre pej catêjê kwÿ cu ha me cumã me hõ jõr catêjê na me hÿxwÿ. 4 Ne me pa, wa ha hõtpê me Pahpãm mã mehcajrën, ne mehcunea mã harkwa to hahkre me to wa ha me ijâpên to ipa, ne nee wa ha iràn xà na ampo to amji japackre nare — hajÿr.

5 Mã mehcunea te mehkôt me amji ton, ne cute me hÿmre te xet capi ne me hÿxwÿr. Ne jÿm pyxit ata pê Tewãw, ne cute Jeju to amji mã ihhimpej to tÿj, mã Pahpãm Carô Pejti carôt te to hipu. Mã mehcahhur atajê pê Pirip me, Procor me, Nicanõr me, Timãw me, Parmena me, Nicoraw pê Antijoc catêjê nõ, ne nee cupê Juta catêjê nõ nare, mã cute amji to Juta catêjê.

6 Mã cute Jeju jarkwa na memprar catêjê cuna mã, cute me xet itajê xãm. Mã cute me Pahpãm mã mehcajrën, ne mehkrã na me hÿ xir. 7 Ne cute me ajpên par jirô pê mã ri, ihtÿj hõtpê Pahpãm jarkwa picràn. Mã Jeju na mehkwy hõtpê me ajcamë, Krîpinkrên cunea kôt. Mã me Pahpãm mã cute mehcajrën catêjê

jàhtôa ne hanea ne cute me Jeju te amji kam hapac xà kam hapac, ne ihkôat me amji ton, ne mehkwy mã me hàr.

Tewāw jaxàr xà

Ruc 21.14-15

⁸ Pê Pahpām mã Tewāw ihkīan to ihkīn. Ne pê Tewāw mã Carō Pejti carôt gō, pê Tewāw ajco carôat kôt mehcunea jipôc ri hâpên xà pihho impej catia ton to ipa. ⁹ Pê ajco Juta catêjê kwý kwý ame Tewāw na mehcakôc kêanre to me ipa. Pê mehkwy itajê ajco me cuprô atajê japyr te “Amjia kôt ame ipa catêjê na mehkwy”. Ne mehkwy itajê pê Xiren jô krī me, Mehte-hajpar jô krī me, Quiriti jô pjê me, Axij jô pjê rûm me cato. Ne me hûmre itajê pê ampeaj kam me harkwa to Tewāw me ajco me ajpên mãn to me ipa. ¹⁰ Mã Pahpām te me caxuw Tewāw mã cute amji jahkre pej catia ne hõr, mã Carō Pejti kôt cute me cumã ihcakôc xà ata na nee cute mehcupên nare.

¹¹ Mã cute, jûmjê atajê te Tewāw cuna mã amehcakôc kêen prãmte, me cumã hàmjôr. Mã cute mehcunea mã Tewāw to ihhêj to hajyr he:

— Wa ite me hûmre ita te ame panquetti Mojxe xwý me, Pahpām cuna mã ihcakôc kêanre to mör na mempar — hajyr.

¹² Mã mehcunea te, cute me Tewāw to mehhêj xi xà ita par atajê te ri amji mã me ipikrar, ne mehkôat kam mencryc. Ne prohti kam me to ihhimpej catêjê me, Mojxe xwý jô kâhhôc to me cumã hahkre catêjê me, mehcunea mehkôt kam mencryc. Ne cute me amji kam me hapac xàa to, cute me to cuprôn, ne me to mō, ne me Tewāw pro, ne ma me to mō, prohti kam mehwýr. Ne cute me hapackre xà jûrkwa kam, me cupê pro kam me cuna mã me Tewāw xãm. ¹³ Ne cute me hûmre kwý japyr, cute me Tewāw to ihhêj xi xà caxuw. Mã Tewāw to cute mehhêj xi to me hajyr:

— Ýhý, hûmre ita nee ihcakôc xà kêen itajê to ihcakôc jicu nare, ne cama apu Pahpām to me amji kam hapac xà jûrkwa me, Mojxe xwý jô kâhhôc na ihcakôc kêanre to ipa. ¹⁴ Ne hanea ne cute, pom pê Naxare jô krī rûm Jeju cato ita, cute harên quê ha xwahna Pahpām to me amji kam hapac xà jûrkwa hu, ne hanea ne Mojxe te amji kam hapac xà to antuw ita na ri harên, wa ite mempar — hane.

¹⁵ Mã mehcunea ne me jý, cute me ajpên par xà jûrkwa kam, ne me Tewāw kuc pupu. Mã ihkuc pê ihhêj rûm côjkwa pîn Pahpām mã imprar catê kuc pyrâac, ne ihprâti.

Tewāw te me cuna mã amji xãm xà

Ruc 20.9-19; Me Hâpên Xà 17.24

7 Mã prohti kam me hõ pahhi pê Pahpām mã mehcajrên catêjê jô pahhiti ata te Tewāw cukij ne cumã:

— Hàpà, me imã harê. Xà ajkí ampeaj kam me ato awjarê? — hajyr.

Pê Tewāw me cumã Aprāw xwý jarê

² Mã Tewāw me cumã:

— Ýhý, wa ha me amã icakôc, ca me ikampa. Me ikjêjê, menxûjê, me ikampa. Pê rý pêa mã Pahpām pejti catihti ata me panquetti Aprāw xwý mã amji to ajpê. Ne pê cormã Cõpihpo na pjê ata kam ihkrī, ne nee cormã Pjênçrâti jô krī kam ihkrī nare. ³ Pê Pahpām cumã ihcakôc ne cumã: “Ýhý, ca ha me akwý jicu, ne krī ita pê acato ne ma jû kam tẽ. Wa ha amã pjê nõ jahkre ca ha kam akrī” hane.

⁴ — Pê Aprāw Pahpām par pyrentu, ne Cartêj jô pjê mã hikra ne ma cato. Ne ma Pjênçrâti jô krī wýr mō, ne curia ihkrī. Pê hûm ty. Pê cormã Pahpām Aprāw kujate, me pajô pjê wýr, pê cato. ⁵ Pê nee cormã Pahpām Aprāw mã pjê kwý jahkre nare. Ne nee cormã cumã ihkwý incirre ne hõr nare. Pê cormã ne Aprāw mã ihkra nõ hamreare. Pê ahnaa Pahpām cumã pjê to awjahkre, ne to ihcakôc ne cumã: “Ýhý, wa ha jû caxuw amã pjê ita gō. Quê ha me akra nõ tàmxwý atajê hanea ne pjê ita to me hõ tekjê” hane. Hõhõ, ita to pê Pahpām Aprāw mã awjahkre, cormã ihkra nare kam, ne cumã: ⁶ “Ýhý, wa ha me atàmxwý tàmxwý mã pjê ita gō, quê ha me to hõ pjê, ne quê ha cormã ite me cumã pjê jõr xwýjrea na, quê ha jû caxuw jûa kam pjê nõ wýr me mō, ne curia mehkri. Ne nee hanea ne me to hõ pjê nare. Jûm jô pjê kam quê ha mehkri, ne ampeaj kam me apêa to me apê. Ne me hõ na pit mã me cumã me hâpên catêjê na me ipa. Quê ha cormã pjê ata jô pahhi ame to kêanre ne. Quê ha me to kêen ita to caku to hàhtô to cwatxenta. ⁷ Jahpan xà na wa ha apu pjê ata jô pahhi na mehkwy cunea to kêen. Jirô pê mã, quê ha me atàmxwý tàmxwý me pjê ata jicu, ne ma hacpý ne rín wýr me amji jaxà. Ne ita ri quê ha mehkri ne me awpa, ne me ikampa” hane. Ita to pê Pahpām Aprāw xwý mã ihcakôc, ne cumã to awjahkre.

⁸ — Ne hipêr cumã ihcakôc ne cumã amji ton to hane: “Ýhý, cu ajpên pa. Ca ha me atàmxwý tàmxwý me, me gûpar to impeaj to me apa, ne ampeaj kam me ikampa, wa ha me ato ikra kêenre nare. Ne quê ha ita na amã impej, ca ha apy kà kwý incirre ne hitep. Ne quê akra pým, ne hûmre, ca ha hanea ne impy kà kwý incirre ne hitep. Mãr quê mehcunea me apupu, ne me cumã me apê me ikraa to me ikra na me gahkre pej” hane. Ita na pê Pahpām Aprāw xwý mã amji to, ne ahna me ajpên pa. Na pê Aprāw ihkra Ixac xwý kà incirre ne hitep, cormã incirre ne ahna amcro te ôjtô kam. Pê hanea ne Ixac kra pê Jaco xwý mã kà kwý incirre ne hitep. Pê hanea ne Jaco ihkra te tõi atajê cunea kà kryjre ne hitep pa.

Pê Tewāw me cumã Joje xwý jarê

⁹ — Ne pyxit ata pê ri Joje xwý, pê cupê Jaco xwý kra. Ne pê mehkjêjê kà itajê ma ame ihtõ pê Joje te amji to hapu na kjê ata jû na me amji to prãm, na pê ihpore na ampo kra mã me to ahpa. Pê ma ampo kra Joje japyr, ne to mō, ampýa mã hõ pjê pê Ejit jô pjê ata wýr.

Ne curia pê ma irô mã jũm ita mã ihpore na to ahpa, pê ajco me hõ na pit mã, me cumã hàpèn catê na ipa. Ne pê Pahpãm ihkõt mõi, ne cume ipa. ¹⁰ Ne pê Pahpãm Ejit jõ pjê kam ampo kên cunea pê Joje capa. Ne cumã amji jahkre pej catia ne cugõ. Ne cumã amji kam hapac xà impej pit gõ. Jirô pê mã, pê Ejit catêjê jõ pahhi japry te Paro xwý ata Joje pupu, ne cumã ihkĩn, pê amji cahê na Joje xãm, cute ihtehcajpar prãmte. Pê Paro Ejit catêjê kam pahhi na Joje xãm, ne hanea ne amji jũrkwa jamãr catê na hãm.

¹¹ — Hamre, pê caku te xet itajê jirô pê mã, me cupê me hõ hamre, Ejit jõ pjê kam, ne hanea ne me panquêtjê jõ pjê pĩn Joje cator xà japry te Cana jõ pjê ata kam, me cupê me hõ hamre. Pê prãm na ame ipa.

¹² Na pê me panquêtjê ihtyj ame hõ na me hàhcukjêr to me ipa. Pê me panquêtiti Jaco japry nõ pê Ixaher ata Ejit jõ pjê kam, cormã me cumã me hõ na me harên pa, na pê ma curi mehkra kujate, pê ma curi me mõi.

¹³ Ne pê me mõi to ajkrut kam, pê Joje cormã me cumã cupê mehkjê na amji jarê. Pê Paro me hõmpu ne me cupê Joje kjêjê na me hahkre pej. ¹⁴ Ne pê ma Joje hũm me, mehkjêjê cahur wýr mehkjêjê kujate, Cana jõ pjê pĩn cute me haprõr prãmte. Pê me mõi ne me cato, ne me hũm japrõ, ne ma hacpy mã Ejit jõ pjê wýr me to mõi, ne me to cato. ¹⁵ Pê me hàhtõ na mehcunea me xetênta ne ihkõt xĩc, ne curi me cato, ne mehkĩrĩ. Ne curia mehkĩrĩ, pê me panquêtiti Jaco pê Ixaher ihwej ne ty. Jirô pê mã, pê mehkra cunea me, me tãmwxwý mea mã Ejit jõ pjê kam mehhi. ¹⁶ Pê me panquêtiti ty pê ma ihmat ri, me hõ pjê wýr, mehtãmwxwý me to kwý. Ne Krĩjikre jõ krĩ kam me to cato, ne curia me harêt. Pom pê rý pëa mã, Aprãw Emõi kra jũhkra kam kên kre jũhkà ata kam. Ne ma me amji jaxà, hacpy mã Ejit jõ pjê wýr.

¹⁷ — Pê me pahkwý pê Jaco tãmwxwý tãmwxwý pê Ixaher catêjê caku ata na ramã me ajcamê, ne me hàhtõa to me hàhtõ. Pê ramã Pahpãm Aprãw mã Cana jõ pjê jahkre xà ata na caku hàhtêp to mõi. Por pê ampeaj kam cumã to awjahkrea to awjahkre ata wýr. ¹⁸ Ne pê Ejit jõ pjê jõ pahhi tuw nõ hõ pjê ata jamãr na cupy. Ne nee pê Joje pupun nare, ne nee to amji japackre nare, pê rý pëa mã ramã Joje ty na pê. ¹⁹ Ne pê Paro ma apu Joje na mehkwy caca, ne me cumã ihhêj ne me to kên crire nare. Pê me cumã mehkra pypym atajê na harkwa, quê mehkra kryjre itajê cunea to cõ kam me awcapê, quê mehhi.

Pê Tewãw me cumã Mojxe xwý jarê

²⁰ — Pê amcro ata na Mojxe ihpym, ne impejti. Pê hũm me inxi ikrea kam me to ajrõ, pê ramã ahna putwry incrê. ²¹ Jirô pê mã ri cute me mehkra curan catêjê cupate me to mõi, ne põ pê me cuxi, pê nõ. Pê ma hacpy mã me mõi, pê Ejit jõ pjê jõ pahhi tuw pê Paro kra cahãj ita cato, ne mõi, ne Mojxe pupu, ne cupy ne ma to mõi, ne to ihkra. ²² Pê Mojxe, curia Ejit catêjê jipõc ri ihkà. Pê Ejit catêjê Mojxe mã cute me amji jahkre pej cunea to hahkre. Pê Mojxe amji jahkre pej, ne ihcakõc pej, ne hàpèn pej cati.

²³ — Hamre, pê ramã ahna caku cwarênta ne ihkãhtu. Ne pê mehkjêjê me, mehkwy pê Ixaher catêjê pupun prãm. ²⁴ Ne pê ma hacpy mã mehkwy wýr amji jaxà. Ne me hõmpu, pê Ejit catêjê nõ apu Ixaher catêjê nõ to kêanre. ²⁵ Pê Mojxe me hõmpu ne amji mã: “Hamre, ita caxuw wa ha Ejit catêjê nõ ita cura. Ita caxuw quê ha me ikwý me ijapên xà pupu, ne me Pahpãm te ikujahêc me ijahkre pej, ite Ejit catêjê te ame to kên pê me caxàr xà na” hane. Na pê ma me hýrmã tẽ, ne Ejit catêjê nõ ita cura. Ne pê Mojxe me hamãr catê na amji to. ²⁶ Pê apê pê Mojxe ma hipêr Ixaher catêjê wýr mõi. Pê ramã mehkwy nõ me ajkrut ne ame ajpu. Pê Mojxe me hõmpu, ne ahna cupê ihkaj na. Pê ma me hýrmã cato, cute ajpên kam me to impej prãmte. Ne me cumã: “Pýhàpà, ajwar me apê Ixaher catêjê, ne ca ajpên to me akjê. Ne ampo na mã ca ame ajpu?” hane.

²⁷ — Pê apu mehkwy nõ to kên to mõi ata ma apu Mojxe curê, ne cumã: “Nee jũm te me ijõ pahhi na axãm nare. Ca ame ijapackre to mõi, ne ita ri ate me icukij xà hamreare. ²⁸ Xà ca ha pijamã ihnõ kam ate Ejit catêjê nõ curan ata cuxà icura?” hane. ²⁹ Pê Mojxe kampa, ne cumã hũpa pê ma acto, Mitij jõ pjê ata wýr. Ne curi cato, ne curia ihkrĩ. Ne curia hikwa tuw, pê cumã ihkra xũmre ajkrut ne cato. Ne curia pê amji to ajpa, Mitij jõ pjê kam.

³⁰ — Ne pê pjê ata kam amji to caku to cwarênta. Ne ajco apu ipa, por põti kam me hamreare ata ri, kenti catia japry te Ihcuhhyt jõ kên ata kam. Hamre, pê Pahpãm cõjkwa pĩn cumã memprar catê nõ na amji jahkre, ne cumã amji to ajpê. ³¹ Pê Mojxe hýrmã cato, ne xa, ne cuhy põc pupu, pê aprêj põr ata, ne nee caxàr nare. Pê cuhy caxwãm pê Pahpãm mã imprar catê nõ pupu. Pê higêc ta, pê hýrmã ahtêp, cute hõmpun pej prãmte. ³² Mã Pahpãm te cumã ihcakõc ne cumã: “Hàpà, pa wa, ne ipê me aquêtjê Pãm cati. Ne ipê Aprãw me, Ixac me, Jaco Pãm cati” hajyr. Hamre, pê Mojxe kampa ne hũpate apu ihterttet, ne nee hipêr hõmpun nare.

³³ — Hamre, pê Pahpãm cumã: “Hamre, ita caxuw ca ate ipeaj to ipej na, ijahkre pej. Cwýrjapê ca ha apar kà capa, ne apar cakrõ icuna mã xa. Wa ha ate ito impejti na gahkre pej. ³⁴ Ne ramã ite me ikra pê Ixaher catêjê pupun. Mã Ejit jõ pjê kam ame ipa. Mã Ejit catêjê ame to kêanre, wa ite mencwýr par, ne me hýrmã iwryc. Na wa ha Ejit jõ pjê intête, mehkên ita pê me capa. Ne caa, ca ha ita caxuw ma me hýrmã tẽ, Ejit wýr” hane.

³⁵ — Ne pom pê Pahpãm me cumã Mojxe xãm ata pê ma Ixaher catêjê ame curê. Ne pê amcro ata na me Mojxe mã: “Pê nee jũm me ijõ pahhi na axãm nare, ate me ijapackre xà na. Ne nee ita ri ate me icukij xà nare” hane. Pê ahna Pahpãm me hõ pahhi na me cumã Mojxe xãm, pê cupê me hõ pahhi, ne cupê mehkên pê me to hapõj catê. Ita na pê cõjkwa pĩn Pahpãm mã imprar catê harkwa kõt Mojxe xãm. Ne hamre, pê Mojxe Pahpãm jarkwa kõt hacpy mã Ejit jõ pjê wýr cato. ³⁶ Ne cupê me to cato. Ne pê carõt kõt rý jũ caxuw jũm te ampo pihho pupun nare atajê ton to hàhtõa to hàhtõ. Ne pê harkwa to Ejit jõ pjê kam hàpèn xà to, ne

hanea ne còxwa japry te Còxwatepti ata kam to. Jirô pê mã pê pjê capryhti ata kam, curia me amji to caku to cwarènta, ne curia cormã ame ipa.

37 — Pê Mojxe me panquêtjê mã ita jarê, ne me cumã: “ÿhÿ, quê ha jũ caxuw Pahpãm me amã jũm te harkwa na me amã ihcakôc catê ata kujate. Quê ha me anô capi, ne me anô xãm, hàpên xà ita caxuw. Ahnaa mã pê ixãm he” hane. 38 Na pê Mojxe ajco Ixaher catêjê pê me panquêtjê to ipa, pjê capryhti ata kam. Ne còjkwa pĩn Pahpãm mã imprar catê me ajco ipa, por pê kènti japry te Ihcuhhyt jô kèn kam xa, ne Mojxe mã ihcakôc ata me. Na pê Mojxe Pahpãm jarkwa pejti incwa, cute me cumã harèn xà caxuw. Ne me cumã harê, ne ma me pamã ahna ihhòc.

Pê Tewãw me cumã menquêtjê kèanre na harê

39 — Na pê ma ame Mojxe curê, ne ma amempar ca. Ne ma hacpÿ mã Ejit jô pjê wÿr me amji jaxàr prãm. 40 Hamre, pê Pahpãm mã Mojxe ihcakôc prãmte me cupê cato. Pê ma ihtô kà japry te Arãw wÿr me pra. Ne me cumã: “ÿhÿ, jũ kam Mojxe pictor. Mã cute Ejit jô pjê pĩn me pajaprôr ne me pahto mō, taa ri jũ kam ipictor. Arãw, me imã wakÿre te pahpãm cahàc krekà nõ to. Quê ha wakÿre te pahpãm cahàc krekà ita me ito ipa. Ne taa me pajamã” hane.

41 — Pê amji cunea mã me wakÿre to me pryti krahti pê me hō pahpãm cahàc krekà ata to, ne me to cati prãmte, cumã mehckôc pejti. Ne ajco me cumã pryre ihcura, cute mehkin prãmte. Ne wakÿre te pryti kra pê pahpãm cahàc krekà ata pyrèn me hakryte ajco me cumã me hàkrun xà ita to. 42 Pê ma Pahpãm ame curê, ne me to tojnō, mãr quê ha me taa amji mã mehken ton to me ipa. Na pê amjia kôt amji mã caxêre to me hō pahpãm cahàc. Na pê Pahpãm jarkwa na ihcakôc catê ita na me ahna ihhòc. Ne hō kàhhòac kam pê ihhòc to hane he:

“Pÿhàpà, me apê Ixaher catêjê.

Rÿ pèa mã ca pjê capry catihti ita kam ame apa, ne ramã ame apa xà ita kam me ana caku te cwarènta.

43 Xà ite pryre kĩn prãmte ca amehcura?

Hãpà. Hamreare, ca cormã atÿj me to ihcupan to me apa.

Ne ca cormã me akrãa kam ca me to amji kampa.

Hōhō, ita cwÿrjapê pê ca amjia kôt amji mã me wakÿre to me apãm cahàc krekà itajê to me hàhtôa to me hàhtô.

Ne pê ca hanea ne me apãm cahàc japry te Moroc ata mã me pryre itajê cura, cute ihcajpuaw prãmte.

Ne pê ca me apãm cahàc krekà ita cjên xà kam ajco me acjê, ne ma me to apa.

Ne pê ca hanea ne me apãm cahàc krekà japry te Renpa pê caxêre pyracti nõ ata pê ca me to.

Hōhō, me akèn xà itajê to, pê ca ajco me hajÿr to me apa.

Ita cwÿrjapê wa ha me ana me acurê xwÿn mẽ, ne me ato mehkujate, Papirôn jô krĩ jĩkjê wÿr ampÿa mã ata wÿr, quê ha ma me to mō” hane.

— Ita na pê Pahpãm jarkwa na ihhòc catê harkwa kôt ihhòc.

44 — Ne cormã ita jamreare kam, pê Pahpãm Mojxe mã, pê ampo kà to, cute me to amji kam hapac xà jũrkwaw to. Pê Mojxe Pahpãm jarkwa ata na, ahnaa to. Pê me panquêtjê ajco ampo kà te Pahpãm jũrkwaw to ame hy, pjê capryhti ata kam. 45 Ne hamre, ramã me ahna caku jàhtôa kam pjê ata mã me hàr xàa wÿr pê Mojxe xwÿ ihhi. Ne hamre, pê Jojuw xwÿ hàxà na axà, ne ma me panquêtjê to hy, pjê ata wÿr. Por pê Pahpãm me cumã pjê jôr xà na to awjahkre ata wÿr. Ne pê ramã Pahpãm pjê ata kam mehkrĩ catêjê cunea japôj pa. Ne kam Ixaher catêjê jÿr, pê me hàxà kam me xa. Pê ahnaa me hō pahhi Tawi jô amcro kam ahtwÿ. Pê cormã ampo kà te Pahpãm jũrkwaw ata me cumã ahtwÿ ne ihcuhhê.

Pê Tewãw me cumã Tawi xwÿ jarê

46 — ÿhÿ, pê Pahpãm pê Jaco jô Pahpãm mã Tawi kĩnti. Pê Tawi, cute cumã ikre nõ impejti xãm prãmte ahna ahwÿ. 47 Ne pê Tawi kra japry te Xarômãw ata pê ikre pyxwÿr catê, na pê cumã ikre xãm.

48 — Quê ha pijamã me pajô Inxũ pê Pahpãm ne mehcuea jirôa pê cati ata, cute me hũhkra na me ikre xãm, ata kam ihkrĩ? Quê! Hamreare! Wÿr quê kam ihkrĩ! Me Pahpãm ata còjkwa kam ihkrĩ. Pê ramã harkwa na ihcakôc catê ita na ihhòc. Pê harkwa na ihhòc to hane he:

49 “Ipê me gō Pahhiti pê Pahpãm.

Ne còjkwa kam ikrĩ xà, ne pjê kam ri ipar pyxwÿr xà.

Ne còjkwa pĩn wa me ato ihmpej.

Xà ikre ita kam ikrĩ xà na mã ate me imã ton?

Jũ wÿr ca me imã to, wa kam ikrĩ ne kôt.

Hamreare! Wa nee ahna prãm nare.

50 He pa pê wa ampo itajê cunea to” hane.

51 — Hamre, he ramã me apê me panquêtjê pyràac, ne me akèanre! Ca nee me Pahpãm jarkwa par nare. Ne hanea ne ma apu amji tête me Pahpãm Carō Pejti curê. Ne nee mehckôc par nare. 52 Ne amjia kôt ate me amji kam me gapac xàa to ame amji kam gapac to me apa. Pê Pahpãm jarkwa na mehckôc catêjê me panquêtjê mã amcro nõ na Pahpãm kra impejti cator na to awjarê, pê ca nee mempar nare. Ne atÿj me Pahpãm jarkwa na mehçôc catêjê atajê jipej. Ne pê jũm to awjahkre ata na, ihtÿj me pahwÿr iwÿr. Ne Pahpãm kra pê cato, pê ca mehcura. Ahnaa mã pê Pahpãm ajpèn harkwa na cumã ihhòc catêjê kujate, pê me panquêtjê me hipej he, ata na ca ate me Pahpãm kra ton, ne ate mehcuran. 53 Ne còjkwa pĩn Pahpãm mã imprar catêjê pê me amã harkwa ita jarê, pê ca nee ajte me gũpar nare — hane.

Tewãw tyc xà

Ruc 21.16-19; 23.46; Me Hàpên Xà 22.3-4; 22.20

54 Mã hamre, prohti kam te me Tewãw jũjarèn xà ita par. Ne ame kam incryac to amencryc, ne kam men-

cryc xà to ame wa gyj. ⁵⁵ Mă Pahpām Carō Pejti te Tewāw carôt to hipu tu, mă cōjkwa wÿr irīt, ne cute Pahpām jàhcujro pejti pupun, ne hanea ne cute Jeju pupun, mă Pahpām jĭkjê rŭm xa, awpôc rŭm. ⁵⁶ Mă Tewāw te me cumă harên to:

— Měr he. Wa itÿj cōjkwa catac pupu, ne itÿj me Ahàkà pê Jeju pupu he, mă Hŭm Cati jĭkjê rŭm xa, awpôc rŭm — hajÿr.

⁵⁷ Me ajkaam mă cute me hapac jihê par, ne kÿj cati pēa mă ame caràr, ne Tewāw wÿr mehprôt ne cute mehpro. ⁵⁸ Ne cute krĭ pē me to cator, me ajkaam kēn to kam me hŭcapēr kam mehtēm, cute me to curan prāmte. Mă mehhej xi catêjê te me hō hitô kà caxàr, ne me jŭm tuwre japyr te Xawrô ata mă me hōr, me hahkà na, cute me cumă hamār prāmte.

⁵⁹ Ne cute kēn to Tewāw curan prāmte kam me to awcapê, mă Jeju mă akij ne cumă amji jarên to:

— Jeju, icarō japyrô — hane. ⁶⁰ Jirô pē ihkôn krā na hÿr, ne kÿj cati pēa mă caràr ne Pahpām mă:

— Cute ame ito kēn itajê kam acryc nare — hane. Hō, cute ita to ihcakôc to hajÿr ne ihtyc. Mă ampeaj kam cama Xawrô mă Tewāw curan na impej.

Pê Xawrô Jeju na mehwÿ to kên

Me Hâpên Xà 22.4; 26.9-11

8 Mă amcro ata na, Krĭpinkrên kam, cute me Jeju na mehwÿ to mehkên kam mehtēm ne ame to kēanre. Ne cute amehkwÿ incràn, Krĭpinkrên pē. Mă mehwÿ curia Juta jō pjê kam ame ipa, ne ma mehwÿ Krĭrĭtpej jō pjê mă ame incjêj, mă Jeju mă memprar catêjê pit jàhhuc. ² Mă me hŭmre te Pahpām to me amji kam hapac catêjê atajê te me Tewāw to me hapac xàhte me amrã, ne cute me harêt.

³ Mă Xawrô te Jeju na mehwÿ to hamre prāmte, hân ne ihtÿj hōtpê ame ahna hàhcukjêr to ipa, ne ikrea mă incjêj to ipa, ne me hŭmre pro, ne pyjê pro, ne me hacjên xà mă me hacjê.

Pê Krĭrĭtpej kam me hŭjarên pejti

Jowāw 12.24; Me Hâpên Xà 1.8

⁴ Mă ame ipicràn atajê pê Jeju na mehwÿ, ne mehcunea mă, pjê cunea kôt ame Jeju jarên to me ipa. ⁵ Mă ma Pirip Krĭrĭtpej wÿr iwrÿc, ne curia mehrĭ atajê mă apu Jeju jarên to mō. ⁶ Mă me hàhtôa ne cute me Pirip jŭjarên xà impar to impejti, ne harkwa to cute hàpên xà ton ata na me hōmpun. ⁷ Mă Pirip te me kam ampo carō kên atajê jàhtôa ne mentête hapôj, mă ma me caràr to pra. Mă cute me xwÿ me, me cukrã xà pec catêjê jàhtôa ne hanea ne caprãr. ⁸ Mă mehcunea jakry pit, Krĭrĭtpej kam.

⁹ Pê curia hŭmre japyr te Ximāw ata ihkrĭ, ne ampeaj kam hŭxy xi, ne amcro jàhtôa kam ajco me to hy. Ne ihtÿj ajco amji to cati prām. Na pê Krĭrĭtpej catêjê cunea Ximāw cati na amehcãmĭj, ne ampeaj kam amji mă me to hane. ¹⁰ Ne ampeaj kam ajco me kampa. Mehkà me, ahkrare me, mehcunea ajco me kampa. Ne ajco me ajpên mă:

— Ÿhÿ, ihhêj ne hŭmre ita kam Pahpām carôt, ne ampeaj kam cati, ne ihhêj ne Pahpām pĭn ri cator — hane.

¹¹ Ampo na? Rÿ pēa mă ri Ximāw ata mehwÿ to hy na ri, ihtÿj me kampa. ¹² Mă hanea ne cute me Pirip jŭjarên xà impar, Jeju pē me pahkritxwÿ na harên xà impejti ata na. Mă Pirip te cute Pahpām himpej xà mă mencjêj na me amji jarên prāmte, harkwa na me hŭmre me, pyjê me, cō kam mehcumrār, mă cute me Jeju te amji kam hapac xà pynār. ¹³ Mă hanea ne, Ximāw te Pirip jŭjarên xà impar, ne ihtÿj Jeju na mehwÿ mă hàr prām. Mă Pirip te cō kam ihcumrār, mă cute hŭnār ne hŭ na pire mă apu ihkôt ipa, ne hân ne Pirip te harkwa to hàpên xà impejti ton to ipa atajê to amji mă ipikrar catia to ipa.

¹⁴ Mă Jeju jarkwa na cumă memprar catêjê, Krĭpinkrên kam ame ipa atajê, te me Krĭrĭtpej catêjê te hanea ne Pahpām jarkwa par pejti na, cute me harên par. Mă ihtÿj Jeju na mehwÿ mă me acjêj. Mă ma cute me Petrô me Jowāw kujahêc, Krĭrĭtpej wÿr. ¹⁵ Mă curi me cator, ne Pahpām na me ahwÿ, quê Krĭrĭtpej catêjê te Jeju to amji mă mehhimpej atajê mă Carō Pejti gō. ¹⁶ Ampo na? Nee Pahpām Carō Pejti ata cormă mehwÿr iwrÿc, ne cute me cumă amji jōr nare. Mă ihtÿj Pirip te Jeju jarkwa na cō kam mehcumrār. ¹⁷ Cwÿrjapê ri Petrô me Jowāw te me ahna hŭ xir, ne me ahna Pahpām wÿr, mă Pahpām te me cumă Carō Pejti jōr.

¹⁸ Mă Ximāw jŭxy xi ata te Petrô me Jowāw te jŭmjê atajê na hŭ xir, mă mehkôt Pahpām te jŭmjê atajê mă Carō Pejti jōr na me hōmpun. Ne ma me hÿrmã tē, ne ihpore to ame kampa, ne me cumă:

¹⁹ — Petrô me Jowāw, wa hanea ne me acarôt ita na prām. Wa ha me amã ihporea gō, ca ha me imã Pahpām carôt gō, mār wa me acuxà jŭm na ijŭ xi, quê amji mă Pahpām Carō Pejti py — hane.

²⁰ Mă Petrô te cumă harkwa to:

— Akên xà wÿr, ca gō pore ita to tē! Mōrmō ca amji mă: “Wa ha itÿj ihpore to Pahpām carôt japyrô” hane.

²¹ He nee ate me ijâpên xà jĭkjê to amji pytâr xà hamreare. Ne Pahpām mă ate amji kam gapac xà hêj xi xà ita nee impej nare. ²² Nãmhã, ne ate amji kam gapac xà kên ita jicu, ne Pahpām na ca ahwÿ, quê atête akên ita camē, ne akên ita to tojnō ne amã to impej. ²³ He ramã ate akên ita to amji krãhtu, na ca ajte me ijŭ na apu ita kĭn, ramã ite me gahkre pej — hane.

²⁴ Mă Ximāw te me cumă:

— He nãmri! Ca ma imã Pahpām wÿ, quê nee ate me imã ampo kên jarên xà itajê nō to, ito kên nare — hajÿr.

²⁵ Mă Petrô me Jowāw te me cumă Pahpām jarkwa jarên par, ne ma Krĭpinkrên wÿr cute me amji jaxàr. Ne pry kôt, Krĭrĭtpej jō pjê kam ihtÿj me Pahpām jarên pejti atajê jarên cràn to me mō.

Pirip me Cupêtycre

Ixaj 53.7-8

²⁶ Mă cōjkwa pĭn Pahpām mă imprar catê Pirip wÿr iwrÿc ne cumă:

— To xa, ne ma Krípinkrên me Kríhtỳj jō pry kôt tē, por curi pōti kam me hamreare, ata wỳr — hane.

27-28 Mā Pirip xām ne ma ihtēm pyrentu. Ne pea curi cator. Mā cupētycre nō ita te Krípinkrên kam Pahpām to amji kam hapac jirō pē, ma hacpỹa mā hō pjē japyr te Cupētycre jō pjē ata wỳr amji jaxàr. Ne pē hũmre ata pē pahhikwỳj catia japyr te Cantikwỳj ata tehcajpar catē, ne ajco cumā hō pore jamā. Ne cawrō jō kujti kam jỹ, ne apu ihkàhhōc ata cahyt. Ne ihkàhhōc ata pē Pahpām jarkwa to ihcakōc catē japyr te Ixaj xwỳ, ata jō kàhhōc, pē jỹ ne apu cahyt. 29 Mā Pirip te hōmpun, mā Pahpām Carō Pejti cumā:

— Tē ne cawrō jō kujti wỳr acato — hane.

30-33 Mā Pirip ma hỹrmā ipicahur ne ahna cator. Ne cute cupētycre ata Ixaj xwỳ pē Pahpām jarkwa to ihcakōc catē jō kàhhōc to jỹ ne apu cahyt na kam hapac. Pē Pahpām jũm capi ne to awjahkre ata na ri ihkàhhōc ata cahyt, ne cahyt to:

“Yhỹ, jũm ata pē pryre capônỹre pyràac, ne cupē carà cahàcre hōhti pyràac.

Mā ma ihcuran xà wỳr me to mō, mā capônỹre mō.

Me to mō ne ame cupē ihhō ata jakep, mā aracri xa, jĩkỳj na ri jũm ita pē carà cahàcre hōhti pyràac, ne nee ihcakōc nare, ne aracri xa.

Mā cute me jũm ata to incuire, ne me kam mare mā cute me cuprār tu, mā cute ihpahàm catia ne ipyr, ne apu ihpahàm.

Ne nee cute me jũm ata to impej nare, ne cute ame to kēanre.

Ne nee cormā ihkra nare kam, cute mehcuran, mā pjē kam cute amji to ipijapar xà ata jamre” hane.

Mā Pirip cumā:

— Hàpà, xà ca atỳj, pom ca apu ihkàhhōc cahyt ita kampa? — hane. Mā cumā:

— Quē, hamreare, wa itỳj cahyt ne nee impar nare. Ipē jũm te imā ihkôt harēn xà nare ita kam, jũ mā wa ha ne hahkre pej? Ca ha pijamā imā to hahkre? Gapacta ne api ne icahē na jỹ, ne imā to hahkre — hane. Mā Pirip jàpir ne cahē na hỹr, mā cumā:

34 — Imā to hahkre, xà amji naa mā pē ihhōc? Nare xà ajteare mā jũm na pē ihhōc? — hane. 35 Mā Pirip te cumā Jeju jarēn kam ihtēm, ne cumā:

— Yhỹ, pom jũm ita nee mā jũm nare, Jeju jarēn mā he, ne curmā wa ite me hōmpun — hane.

36 Ne ma ajwar me mō, mā ihtỳj Pirip cumā to hahkre to mō, ne pea cō jarare na me iwryc. Mā cupētycre ita Pirip mǎ:

— Cō he, hōmpu. Ne imā Jeju na mehkwy mā ixàr prām. Ca pijamā caxuw icumrǎ? — hane.

37 Mā Pirip cumā:

— Ca ha ampeaj kam Jeju to amji mā ahimpej, ne mehkwy mā axàr prām, wa ha itỳj caxuw acumrǎ — hane. Mā cumā:

— Yhỹ, wa ha itỳj amji mā to ihmpej, ne ampeaj kam ri cupē Crixto pē Pahpām kraa to ihkra, na wa itỳj ahna mehkwy mā ixàr prām — hane.

38 Mā kujti to hàhhuc, ne ajwar cō mā me iwryc, mā pea Pirip te cō kam cupētycre ata cumrār.

39 Ne cō pē me hàpir, mā Pahpām Carō Pejti te ma Pirip japyr ne to tē. Mā cupētycre te nee hipēr hōmpun nare, ne ampeaj kam Jeju pyrēn hakry, mā ma hō pjē wỳr tē. 40 Mā ihprōt pē Pirip Axoti jō krí kam cator. Ne ma Xexa jō krí wỳr tē, ne pry kôt krí ihcuhhē atajē cunea mā Jeju jarēn to mō.

Xawrō pintuw xà

Me Hàpên Xà 22.6-11; 26.12-18

9 Ata jō amcro kam ri Xawrō cormā Jeju na mehkwy curan prām to ipa. Mā Tamatcō jō krí kam hanea ne Jeju na mehkwy jàhtōa ne mehkri. 2 Cwỳr-japē ri Xawrō ma Pahpām mā mehcajrēn catējē jō pahhi wỳr tē, ne cute ahna hàhwỳr, quē cumā cute Jeju na mehkwy pro xà na ihkàhhōc to, quē mehpro pa. Mā hō pahhi te Tamatcō jō krí kam Juta catējē te me cuprōn xà kam me hō pahhi catējē atajē mā ihhōc, quē me cahyt, ne me Xawrō tehcajpa. Ne me cupē Jeju na mehkwy xũmre me, pyjē me, mehpro ne me huwapre, ne ajpēn Krípinkrên wỳr me to pra. Hōhō, pē me caxuw mehcajrēn catējē jō pahhi mā ihhōc to hane, ne me cumā cugō.

3 Mā Xawrō na mehkwy ramā Tamatcō jō pry kôt, krí ata na me hàhtēp tu, mā krā, cōjkwa pĩn ampo pràti ata te ahna ipixēr. 4 Mā Xawrō pjē kam ihpỳm, ne cute cōjkwa pĩn jũm ata par, mā cute cumā harkwa to hajỹr: — Xawrō, Xawrō, ampo na mā ca apu ito kēn to apa? — hajỹr.

5 Mā cumā:

— Me anō mā ca? — hane. Mā cumā amji jarēn to:

— Ipē Jeju, mār ca ate apu ito kēn ata! 6 To xa ne krí mā axà, quē ha jũm amā ate ampo ton xà ata to awjarē — hane.

7 Mā Xawrō na mehkwy xũmre atajē cunea te amji mā me ipikrar, ne me ipērket ne me ipērketre. Ne ihtỳj cute me hōkre par, ne nee cute me jũm pupun nare. 8 Mā pjē pē Xawrō xām, ne into catac, ne nee irít nare. Mā cute me hũhkra na ipyr, ne ma Tamatcō jō krí wỳr me to mō. 9 Mā irít nare na amcro incrē, ne cama jỹ ne apu Jeju to amji kampa, ne nee hàpàn nare, ne nee ihkōm nare, ne cama jỹ ne apu ajkampa.

10 Mā Tamatcō jō krí ata kam Jeju na mehkwy nō ita ihkrí, ne haprỳ te Anana. Ne iríat kam cute Jeju pupun, mā cumā akij ne cumā:

— Anana — hane. Mā cumā:

— Ampo? Ita ri wa xa — hane. Mā cumā:

11 — Apu amji mā ahcuprō ne ma Juta jũrkwa wỳr pry cuhtacti ata kôt tē. Curia ri, por pē Kríjara kam Xawrō ihpỳm ata jỹ, ne apu imā ihcakōc. 12 Ne cute iríat kam amji na apē Anana pupun, mā hỹrmā hàr ne cute into na cumā hũ xir, mā hacpỹa mā irít. Na ca ha caa tē, ne Xawrō na gũ xi ne caprǎ — hane.

13 Mā Anana cumā:

— Ijō Pahhiti, ramā mehcuea te me imā hũmre ita te Krípinkrên kam ampo cunea to kēn ata na me harēn, ne cute ame akwỳ to kēanre. 14 Ne cute mehca-

jrèn catêjê jô pahhi kwỳ jô kàhhôc pyr, ne ajpèn to tẽ, Tamatcô jô krí wỳr, cute me akwỳ te, ate mehtehcajpar xà na me awỳr atajê jacjèn prãmte — hane.

¹⁵ Mã Pahhiti pê Jeju te Anana măn, ne cumã:

— Wa ite amji mã hũmre ata te ijarkwa na imprar catê na capi ne ahna hãm, măr quê ijarkwa na mehcahcrit me, me cupê pahhi cati me, Juta catêjê mã ihcakôc. ¹⁶ He wa ha pa Xawrô mã ijapên xà to hahkre, quê ha imã apê. Ne icwỳrjapê cupê cute amji na ihkên xà cunea pupun catê — hajỳr.

¹⁷ Mã ma Anana mō ne ikre mã hār, ne cute Xawrô na hũhkra xir ne cumã:

— Itō Xawrô, pom ate pry kôt Pahhiti pê Jeju pupun ita te ri ajpên awỳr ikujahêc, ca hacpýa mã rít, quê hanea ne Pahpãm Carô Pejti carôt ato hipu — hane.

¹⁸ Mã ampo pê tep kà pyrãcti ita into pĩn cumã ihpým, mã hacpýa mã irít pyrentu. Hamre, ita jirô pê mã ri Xawrô xãm, mã Anana te cō kam ihcumrār. ¹⁹ Mã hãpàn jirô pê, hacpýa mã ihtỳj taa to ihtỳj. Ne cute amji to amcro jãhtōa Jeju na mehkwy kam, Tamatcô jô krí kam.

Pê Xawrô Tamatcô jô krí kam apu mō

²⁰ Xawrô te Jeju na mehkwy na amji ton, ne Juta catêjê te me cuprôn xà kam, ihcakôc kam ihtêm pyrentu, ne cute me cumã:

— Jeju pê Pahpãm kraa to ihkra — hajỳr.

²¹ Mã mehcunea te me Xawrô par, ne amji mã me ipikrar, ne me ajpên cukij to:

— Pýhàpà, măr hũmre ita pê Krípinkrên kam Jeju na mehkwy curan catê ta? Pom hãn ne Jeju na mehkwy pro ne mehcajpre, ne ma hō pahhi cati wỳr me to ipa prãm ita? Taa mã ri cator — hajỳr.

²² Mã Xawrô amcro cunea kam me cumã carôt tỳaj kam hũjarên to ihcuhhê tu. Ne cute hũjarên to:

— Ýhỹ, por pê rỳ pëa mã Pahpãm Crixto cator xà na to awjahkre ataa ri cator, ne cupêa ri Jeju — hajỳr. Ne cute Juta catêjê pê Jeju na mehkwy nare atajê mã caxwãm catia mã Jeju jarên. Mã nee jũm te cumã jũ măn nare, ne aracri mehkri.

²³ Mã ahna amcro jãhtōa jirô pê Juta catêjê te amji na me cuprôn, ne Xawrô curan na me ajpên par. ²⁴ Mã Xawrô te amcro me caxwa cunea kam, krí cati jô kwỳc jarkwa mã me hikaj ne mehcuran prãm na, cute me hahkre pej. ²⁵ Mã caxwa ata kam, Jeju na mehkwy kwỳ te kàhà catia kam Pawrô jỳr, ne ma krí pê, kên te kwỳc catia ata pê me to iwrỳc.

Pê Xawrô Krípinkrên kam apu mō

Carati 1.15-24

²⁶ Mã Xawrô ma Krípinkrên wỳr tẽ, cute curi Jeju na mehkwy mã hār prãmte. Mã Jeju na mehkwy ma ame hũpa. Ne nee mempar nare, ne nee cupê Jeju na mehkwy na, cute amji mã me to hajỳr nare. ²⁷ Mã Parnap te Xawrô tehcajpar, ne ma to mō, ne cute me to cuprôn, ne Jeju jarkwa na memprar catêjê mã Xawrô jarên, cute me hahkre pej prãmte. Ne cute me cumã Xawrô te pry kôt Pahhiti pê Jeju pupun, mã cute cumã

ihcakôc na harên. Ne hanea ne Parnap te Xawrô Tamatcô jô krí kam Juta catêjê mã, Jeju jarkwa to ihcakôc tỳaj na me cumã harên.

²⁸ Jirô pê mã ri Xawrô te Krípinkrên kam me hũnār, ne ma mehkôt mō, krí cunea kôt, ne caxwãm catia mã apu Jeju jarên to mō. ²⁹ Mã Xawrô me, Juta catêjê kwỳ pê Crec jarkwa to mehcahcrit catêjê me, me ajpên mã me Jeju jarên xà atajê to me ajpên mã me harên to me mō. Ne ihtỳj me Xawrô curan to prãm. ³⁰ Mã Jeju kam ajpên to mehkjêjê te ahna mempar, ne ma Xexa jô krí wỳr me Xawrô japrôr. Ne ma Kríjara jô krí wỳr mehkujahêc.

³¹ Mã Jeju na mehkwy, Juta jô pjê me, Hĩpôjajo jô pjê kam, me ipinkrên, ne hanea ne Krírítpej jô pjê kam, mehcunea pinkrênti. Mã nee jũm te ame to kên nare. Ne pê ajco me ajcamê, ne me hàhtô, pê Pahpãm Carô Pejti me to ihtỳj, na pê mehcunea ajco me Pahhiti pê Jeju kampa, ne amji mã me hũpa.

Pê Petrô Rita jô krí me Krímpejre jô krí kam apu mō

Me Hãpên Xà 3.1-10

³² Mã Petrô ihtỳj pjê cunea kam apu mō, ne amcro nõ na ma Rita jô krí wỳr tẽ, cute curi Jeju na mehkwy amehkrí atajê pupun prãmte. ³³ Ne cute hũmre haprý te Enêj ata cukrã xà peacre, ne nee ipa nare ata cajpar. Pê ramã Enêj ata hikwa xà ata kam ahna caku ôjtô.

³⁴ Mã Petrô te cumã harkwa to:

— Enêj, quê ha Jeju acaprã, ca ha axãm pyrentu, ne gikwa xà to ahcuprô — hajỳr. Mã Enêj xãm pyrentu.

³⁵ Mã Rita jô krí ata me, pō japrý te Xaron jô pjê kam mehkri atajê te me ampo ton xà ata pupun, ne ma Jeju na mehkwy wỳr me ipipkjêr, ne cumã me hār.

³⁶ Mã Krímpejre kam Jeju na mehkwy nõ cahãj ihkrí ata japrý te Tapita Caràhkwyj, ne Crec jarkwa na haprý te Torca, ne amcro cunea kam hōtpê me cumã ampo pej pit ton to ipa, ne me cupê hamreare atajê tehcajpar to ipa. ³⁷ Ne amcro ata na Caràhkwyj xà, ne ihtyc. Mã cute mehcuhhôn ne mehcũmpej, ne ma kýt pê ikre caxwỳn kam me hir. ³⁸ Mã Jeju na mehkwy te me Petrô te Rita jô krí kam apu mōr na me harên par. Pê Krímpejre me ajpên na pire mã krí ata xa, na ri cute Petrô japrôr to hýrmã me hũmre to ipijakrut ne mehkujahêc. Mã me tẽ, ne hýrmã me cator, ne me cumã:

— Ýhỹ Petrô, ate amji kam gapac xàa to Krímpejre wỳr atêm pyrentu — hane.

³⁹ Mã apu Petrô jãhcuprôn, ne ma me pra. Ne curi me cator, mã cute me haprôr ne ma kýt pê, ikre caxwỳn wỳr me to mō. Mã me cahãj wej pijapit atajê cunea Petrô na me ipixêr, ne ame amrãhti. Ne me Caràhkwyj te apu ihtĩr ne mōr reria mã, hitô kà ton atajê jahkre, ne mehkà kwỳ jahkre, ne ame amrã.

⁴⁰ Mã Petrô te ikre caxwỳn pê mehcunea cator, ne ihkôn krã na hỹr, ne cute Pahpãm mã ihcakôc, ne Caràhkwyj tyc wỳr ipipkjêr ne cumã:

— Caràhkwyj, to xa — hajỳr. Mã into catac, ne cute Petrô pupun ne hỹr. ⁴¹ Mã Petrô te Caràhkwyj jũ na ipyr ne hãm na ihtehcajpar, mã hãm. Mã cute Jeju na mehkwy cunea me, me cahãj wej pijapit atajê mea mã

ahna hàhwýr, ne cute me hùhkra mã cahãj tíar na haxàr.

⁴² Mã me harên pejti ita Krímpejre cunea kôt ipicràn, mã me hàhtôa ne ihtýj me Jeju to amji mã mehhimpej.
⁴³ Mã Petrô curia ampo kà cajror catê japrý te Ximãw ata jùrkwa kam hàhhuc, ne curia cute cahê na amji to amcro jàhtôa.

Petrô me Coner

Ruc 7.1-10

10 Ýhý, pê Xexa jô krí kam, Krírítpej jô pjê kam, hùmre ihkrí ata japrý te Coner. Ne cupê krãhtare catêjê to ihhimpej catê. Pê Prytikra jô pjê pê Roman catêjê jô pjê rùm cato. Ne cupê mehcahkrit atajê nõ, ne nee cupê Juta catêjê nõ nare. ² Ne pê ihtýj ajco mehkra mea mã, Pahpãm to me amji kampa, ne me cumã Pahpãm kîn. Ne ajco me Juta catêjê pê hamreare atajê tehcajpar to catia to ipa, ne ajco Pahpãm mã mehcahôc. ³ Ne amcro nõ na, pyt pejti kam, Coner te iríat kam Pahpãm mã imprar catêjê nõ pupun, mã côjkwa pîn cator ne hýrmã hàhtêp ne cumã:

— Coner — hane.

⁴ Mã cute Pahpãm mã imprar catê nõ ata cupa kam hõmpun, ne ihcukij to:

— Ampo, Pahhi? — hajýr. Mã cumã:

— Ýhý, Pahpãm mã ate amji kam gapac xà jahkre pej, ne ate me cupê hamreare atajê mã ampo pejti ton na, cute ato amji japackre. Cwýrjapê ri apyrên Pahpãm jakry. ⁵ Ne hamre, ita caxuw me jùm xùmre kujate, Krímpejre wýr, quê hùmre japrý te Ximãw Petrô ata japrô. ⁶ Por ampo kà cajror catê japrý te hanea ne Ximãw ata jùrkwa kam ri hàhhuc, côxwa cahê na — hane.

⁷ Ne ma Pahpãm mã imprar catê tẽ. Mã Coner te me hàpên catêjê to ipijakrut, ne hanea ne krãhtare nõ pyxit ne me cumã hàkjêr. Ne krãhtare ita pê Coner tehcajpar catê, ne ihtýj Pahpãm to amji kam hapac to ipa.

⁸ Ne Coner te me cumã hùjarên xà caxuw, cute ampo pupun atajê cunea jarên. Ne ma cute Krímpejre wýr mencre itajê kujahêc, mã ma me pra.

⁹ Mã Krímpejre kam, amcro nõ na, ramã Petrô krã cajpuw pyt jý, mã ikre jimoc na, cute Pahpãm mã ihcakôc prãmte hàpir, ne Pahpãm mã ihcakôc. Mã ramã Coner te Petrô wýr mehkujahêc atajê Krímpejre na me hàhtêp. ¹⁰⁻¹¹ Mã ramã Petrô mã prãm, mã ihtýj ampo krêr prãm. Mã cormã ame hõ toan kam, mã Petrô te iríat kam côjkwa kre pupun. Mã cupê cupêhkàhti, ne catia to cati, ne hõxwahhi te cwat na hê, mã kýj rùm, côjkwa pîn ahpãr mã ajpên mõ. ¹² Ne cupêhkà ita caxwãm pê cute ampo pryre cunea pupun. Mã kam ampo pryre cunea, ne kam ampo kên pjê kam cajõhjõt to ipa ita, ne kam ampo pryjara. ¹³ Mã Pahpãm Petrô mã:

— Petrô, to xa ne ampo cura, ne krê — hane.

¹⁴ Mã cumã:

— Pýhàpà, ijô Pahhiti! Jũ wýr wa amji mã hamã ne ampo kên ita nõ krê. Wa rý jũ caxuw ite ampo kên krêr nare ita kam — hane. ¹⁵ Mã Pahpãm hipêr cumã:

— Wa jamã ne ampo pej na harê, ca nee hipêr ihkên na harên nare — hane.

¹⁶ Hamre, cute cumã ihcakôc to incrê. Jirô pê mã ri cute cupêhkàhti ita to hacpýa mã côjkwa wýr amji jaxàr.

¹⁷ Mã Petrô cama apu iríat kam, côjkwa kam cute ampo pupun xà atajê to amji japackre to mõ, ne amji mã:

— Pýhàpà, ampo to mã Pahpãm apu imã hahkre? — hane. Mã pyt jýr xà ata kam, Coner te me hùmre kujahêc atajê harkwa mã me hàhhuc. Ne cute me Ximãw pê pryre kà cajror catê ata jùrkwa na me hàhcukjêr.

¹⁸ Mã cute me cumã harên, mã ma hùrkwa ri me cator, ne cute ikrea kam, me jùm ita mã hàkjêr, ne me jùm ata cukij to:

— Xà ajkí ita ri mã hùmre japrý te Ximãw Petrô ata jàhhuc ne apu mõ? — hane.

¹⁹ Mã Petrô cormã apu cute ampo pupun xà ata to amji japackre to mõ. Mã Pahpãm Carô Pejti cumã:

— Awpa! Ita ri me hùmre incrê, ne ame ana hàhcukjêr to me ipa. ²⁰ Apu ahcuprô ne wrý, ne mehkôt mõ. Nee ca apu gũpar nõ nare, ne nee ame hũpa nare. Ampo na? Itea wa awýr mehkujahêc — hane.

²¹ Mã Petrô wrýc, ne me hùmre atajê mã:

— Xà ina ca ame ahcukij? Ampo wýr mã ca ita ri me mõ? — hane.

²² Mã me cumã:

— Ýhý, pahhi Coner te ri awýr me ikujahêc. Ne Coner ita peaj, ne cupê Pahpãm to amji kam hapac catê impeaj, mã Juta catêjê cunea me kampa. Mã Pahpãm mã imprar catê côjkwa pîn cator, ne apu cumã ana awjahkre, quê ana ahwý, ca hùrkwa ri acato, quê akampa, ate cumã ampo jarên xà atajê na — hane.

²³ Mã Petrô te me hùmre atajê mã me hàr na hùjahkre, mã me hàr, ne caxwa ata kam cahê na me hàhhuc. Mã me ahna apê, mã ame hàhcuprôn, ne ma me mõ. Mã Jeju na mehkwy kwý, Krímpejre kam mehkri atajê, hanea ne mehkôt me mõ. ²⁴ Me mõ ne me ahna apê nõ ma Xexa jô krí kam me cator. Mã ramã Coner te mehkjêjê me, me hõ ikwý nõ peaj catêjê me, me hator, mã ramã cute me cuprôn ne me Petrô jikaj. ²⁵ Mã ramã Petrô to me mõ, mã hàr, mã Coner mõ ne cute ihcajpar, ne cuna mã ihkôn krã na hýr. ²⁶ Mã Petrô te hacpýa mã hãm ne cumã:

— To xa, nee mã ipê Pahpãm nare. Ampo na? Hanea ne ipê me axùmre nõa wa — hajýr.

²⁷ Mã Petrô apu Coner mã ihcakôc jirô pê mã, ma ikre mã me hàr. Mã me hàhtôa te me cuprôn tu curi.

²⁸ Mã mehcunea mã awjarê, ne me cumã:

— Ramã me amã Juta catêjê te amji kam hapac xà jahkre pej. Ne jũ wýr quê mehcahkrit itajê me, me cuprô ne me ajcacwa. Ne Pahpãm te quêt imã mehcunea to hahkre to hajýr he, wa nee amji kînte hipêr jùm kên me, ihtùm na, to amji kam ijapac nare. Ita to ri Pahpãm te curmã imã hahkre. ²⁹ Na ca ate me ina gãhwýr, wa ajpên ite amji kam ijapac xà impejti na

prām to wa mō. Na wa itỳj amji jahkre pej to prām, ampo na mã ca ate me ina gàhwỳr? — hane.

Pê Coner Petrô mã amji jarě

³⁰ Mã Coner te Petrô mã ihcakôc, ne cumã:

— Ramã ina amcro incrê, wa ita ri ijürkwa kam jỹ, ne pyt pejti kam apu Pahpãm mã icakôc. Mã ihprôt pê hũmre ita te ihkà jakati ihpràti ita to ihkà, ne icuna mã cator, ne cute imã hũjarěn to:

³¹ — “Coner, Pahpãm te acakôc xà impar, ne cute ato amji japackre, ca ate me cupê hamreare atajê mã cute ampo na ihprãm ata jör na. ³² Ne me jũm kujate, Krĩm-pejre wỳr, quê me jũm xũmre japyr te Ximãw Petrô ata japrô. Ne Ximãw nõ apê ampo kà cajror catê jürkwa kam ri hàhhuc, cõxwa cape na” hane. ³³ Na wa ite ana ijàhwỳr pyrentu. Mã ate to hamãrti mã, ne ajpên tẽ ne acator, ne ahnaa ri impeaj to impej. Ne hamre, ramã mehcunea te me cuprõn, Pahpãm cuna mã. Ne Pahpãm te amã harěn ne amã to hahkre atajê par prãmte, wa ramã ite me cuprõn. Na ca ha ate impar xà ata jarě, wa me akampa — hajỹr.

Pê Petrô me cumã hũjarěn capô

Roman 2.7-11; 1 Timot 2.1-6

³⁴ Mã Petrô me cumã:

— Ýhỹ, he ita caxuw Pahpãm mã mehcunea pipěn pit na imã hahkre pej. Pahpãm te ramã cumã mehcunea kĩn pipěn pit to imã hahkre, na ri imã hahkre pej.

³⁵ Ampeaj kam, quê ha pjê cunea kam jũmjê mã Pahpãm kĩn, ne me cumã kam hapac prãm, quê ha Pahpãm jũmjê atajê pupu, ne ihtỳj jũmjê atajê na amji capa. ³⁶ Ne ramã cute me ikwỳ pê Juta catêjê me, me pahcunea mã Jeju kujahêc, me pahcarĩcti prãmte.

³⁷ Ne ramã ate me Jeju jarěn pejti ita par, ne me hahkre pej, por pê Jowãw ajco Jeju pê me pahcunea jö Pahhiti na me cumã harěn to ipa, ne cõ kam ajco mehcumrã. Ne pê Jeju Naxare jö krĩ pĩn cato, ne ajco mehcunea mã ihcakôc to ipa, Hĩpõjajo jö pjê me, Juta jö pjê kam. ³⁸ Ýhỹ, pê Pahpãm Jeju mã Carõ Pejti me carõt tỳjti gõ. Pê Carõ Pejti jarkwa kôt ajco hàpên xà impejti ton to apu ipa. Ne ajco Pahpãm jarkwa kôt mentête me curê xwỳn carõ kên to põj to ipa. Atajê na ramã me amã hahkre pej.

³⁹ — Mã me ikwỳ te Krĩpinkrên me ipu na krĩ kwỳ atajê cunea kam, cute ampo ton xà atajê cunea na me hõmpun. ⁴⁰ Mã cute pĩ na me inxõr, mã kam ajêt, ne ihtyc. Mã cute me harêt, mã ahna amcro incrê, mã Pahpãm te hacpỹa mã to ihtĩr, ne ma me iwỳr ihku-jahêc. ⁴¹ Wa me pa pit te me hõmpun, mã nee mehcunea te me hõmpun nare. Mã cute hacpỹa mã ihtĩr jirô pê me pa pit mã amji to ipipê, ne me icape na hàpàn ne ihkõm, wa ite me hõmpun. ⁴²⁻⁴³ Ne ampo na ri Jeju me iwỳr cator? Pahpãm te mam me icapi, ne me ito caprãr, ite mehcunea mã Jeju pê me pahkritxwỳ na harěn to ipa xà caxuw. Ne hanea ne cute Jeju to me pahcukij ne me pahto ipicokjêr catê na hãm na, me cumã harěn xà na amji na me icapi. Pê rỳ pẽa mã Pah-

pãm jarkwa na mehhôc catêjê ajco Jeju jarěn to ame ipa, ne me harěn to:

“Ýhỹ, quê ha ihtỳj amcro nõ na jũm me awỳr cato.

Ca me akên jicu, ne hỹrmã me apkjê, ne me kampa, mår quê ate me to kên atajê to tojnõ ne hicu, ne me ana amji capa” hane.

— Ita na pê Pahpãm jarkwa na mehcakôc catêjê rỳ pẽa mã mam Jeju to mehcakôc. Ne Pahpãm te Jeju to me pahcukij catê. Ne taa mã quê ha amcro nõ na me pahpupu ne cormã me pahcunea tĩr itajê me, ramã me pahcukij itajê mea mã me pahcukij. Me pahtĩar kam, pahte me ampo kên ton, ne pahte me ampo pej ton ata na, me pahcunea cukij, cute me pajahkre pej prãmte. Ne ite me amã ita jarěn xà caxuw ri Pahpãm te me ipyxwỳr — hane.

Pê mehcakrit hanea ne me Pahpãm Carõ Pejti incwa

⁴⁴⁻⁴⁶ Mã Petrô cormã apu ihcakôc, ne apu ita jarě, mã Pahpãm Carõ Pejti me hipôc ri hàr. Ne cute, por me Petrô kam hapac atajê cunea mã amji jör. Mã mehcunea te me to ihcakôc kam ihtêm. Ne Pahpãm cati ne impej na me harě. Ne me harkwa pihho cunea to mehcakôc. Mã cute me Krĩmpejre pĩn, Juta catêjê kwỳ pê Jeju na mehkwy te Petrô pynãr atajê to amji mã me ipikrar. Ne me ajpên mã:

— Pỳhàpà, xãmte Pahpãm te hanea ne mehcakrit itajê mã Carõ Pejti jör? — hane. Mã Petrô te mehcunea mã harěn to:

⁴⁷ — Hanea ne mehcakrit itajê te ihtỳj me Pahpãm Carõ Pejti incwỳr to hajỹar xà, pom pê cu me cumam me cucwa he. Xà quê ha ajkĩ jũm cõ kam me cumrãr tẽte mehcaphêrta? Hãpà! — hajỹr. ⁴⁸ Ne cute cõ kam, Jeju jarkwa kôt, mehcumrãr na me cumã harkwa hydr. Mã harkwa kôt cute mehcumrãr. Jirô pê mã cute me, Petrô te hipêr me cahê na amji to amcro nõ kujahêc prãmte, me ahna hàhwỳr. Mã curia me cahê na hàhhuc.

Pê Petrô ampo na amji jarě

Me Hàpên Xà 10.1-48

11 Mã Juta jö pjê kam Jeju jarkwa na memprar catêjê atajê te Coner me, mehkra pê mehcakrit atajê te hajỹar ne Pahpãm jĩkjê rũm me hàhhuc ne mehkwy mã mehcunea xàr na cute me harěn par. ² Mã Krĩpinkrên kam Petrô cator. Mã Jeju na mehkwy te me Mojxe xwỳ kam me hapac prãm atajê te me Petrô cukij, ne me cumãn to:

³ — Pỳhàpà, ca mehcakrit itajê kam gàhhuc ne me cape na gàpàn, ita na ihkaj na! Rỳ pẽa mã pê Pahpãm Mojxe xwỳ to ihhimpej, ne me pamã awjarê, cu nee mehcakrit atajê cape na ame papa nare — hane.

⁴ Mã Petrô te cumã kat kam ampo cunea ton atajê na, me cumã amji jarěn to impejti partu, ne me cumã:

⁵ — Ýhỹ, wa Krĩmpejre kam apu ipa, ne Pahpãm mã icakôc, ne irĩat kam ite ampo pupun. Ne ampo ita pê cupêhkàhti pyrãac, ne cõjkwa pĩn iwỳr iwryc. Ne

höxwahhi te cwat itajê na hê, wa ite ihcunea kam apêhti na hõmpun. ⁶ Ne kam irít, ne ite kam ampo pryre cunea pupun. Hõmpri tàmre me, ampo kên pjê kam cajõhjõt to ipa ita me, pryrejara me, ite ihcunea pupun. Pom pê hanea ne Pahpãm mam ampo pryre kur tète me pamã atajê, wa ite hõmpun. ⁷ Ne ite cõjka wa rûm jûm jõkre par, mã imã: “Petrô, to xa ne atýj ampo cura ne krê” hane.

⁸ — Wa cumã: “Pahhiti, jû wýr wa amji mã hamã ne me iquêtjê te me imã ampo kên cawpa xà itajê nõ krê. Wa rý jû caxuw ite ampo kên krêr nare ita kam” hane.

⁹ — Mã hipêr cõjkwa pîn imã: “Wa jamã ne ampo pej na harê, ca nee hipêr ihkên na harên nare” hane. ¹⁰ Ne cute imã harên to incrê, mã cupêhkà te hacpýa mã amji jaxàr, cõjkwa wýr.

¹¹ — Me ajkaam mã Xexa jõ krí pîn, cute iwýr me hũmre to incrê ne mehkujahêc atajê me cator. ¹² Mã Pahpãm Carõ Pejti te, ite pa nare to imã ihcakõc, ne ikujahêc, wa ma mehkõt Xexa jõ krí wýr mõi. Ne cute me xêj itajê pê Jeju na mehkwy Krímpejre kam, ne hanea ne ma me ikõt me mõi. Wa me icunea curi me icator, ne Coner jürkwa mã me ixàr.

¹³ — Mã Coner te me imã cõjkwa pîn Pahpãm mã imprar catê te hũrkwa kam cumã amji pêr, ne cumã hũjarên na me imã harên. Cute cumã hũjarên to: “Hàpà, Krímpejre wýr jûm kujate, quê tẽ ne hũmre japyrê te Ximãw Petrô atajaprõ. ¹⁴ Quê cato, ne me acunea te Pahpãm to kên jahpan xà na, me akên catia mã me axàr xà ata pê, cute me apytàr xà to me amã hahkre” hajýr. Hõ, Coner te me imã hũjarên to hajýr.

¹⁵ — Na wa ite me cumã Jeju jarên kam itêm. Ne cor mã ite icakõc kam itêm, mã por pê mam Pahpãm Carõ Pejti me pahwýr wry, ata na ri me pahcuxà me hýrmã iwryc. ¹⁶ Na wa ite, pom pê Pahhiti Jeju me pamã hũjarên to: “Ýhý, pê Jowãw pê cô kam me acumrãr catê. Ne Pahpãm quê ha jû caxuw me amã Carõ Pejti kujate, quê ha taa amji carõat kam me acumrã” hane ata to, ite amji japackre pyrentu. ¹⁷ Pom pê mam Pahpãm me pamã Carõ Pejti gõi, ata cuxà hanea ne cute mehcahkrit mã Carõ Pejti jõr. Ne Pahpãm te me cumã hõr ita kam, jû wýr wa Pahpãm cuna mã ikên to amji kampa — hane.

¹⁸ Hõ, Petrô te me cumã hũjarên to hajýr, mã mehcunea te me kam hapac, ne me cumãñ jicu, ne ramã ajtea mã me, ne ampeaj kam cute Pahpãm pej na me harên kam to ihtêm. Ne cute me hũjarên to hajýr he:

— Tahnaa mã, Pahpãm te hanea ne mehcahkrit to impeaj to impej. Na quê ha mehkên ton jicu, ne Pahpãm mã me amji jarê, quê ha cute me to kên atajê cunea jicu ne to tojnõ. Na quê ha hanea ne Pahpãm cahê na ame ipa rohnýtta mã — hajýr.

Jeju na mehkwy Antijoc jõ krí kam

Me Hápên Xà 4.36-37

¹⁹ Ýhý, Tewãw curan xà jirõ pê mã cute me Jeju na mehkwy to kên kam mehtêm. Mã Jeju na mehkwy ma amehcahkũm ne ame ipicràn. Ne ma Kuhkũmtyc jõ pjê

wýr me pra, mã itajê ma Xipre jõ pjê wýr me pra, mã itajê ma Antijoc jõ krí wýr me pra. Ne cute me cupê Jutta catêjê mã pit mã me Pahpãm jarkwa jarên, ne nee mehcahkrit atajê mã harên nare. ²⁰ Mã pom pê Xipre jõ pjê me, Xiren jõ krí pîn me cato atajê kwý kwý, ma Antijoc jõ krí wýr me pra ne me cator. Ne cute ajtea mã hanea ne mehcahkrit mã Pahpãm jarkwa jarên, ne me cumã Jeju pê me pahkritxwý jarên xà impejti jarên.

²¹ Ne mehkwy atajê pê Pahpãm Carõ Pejti me cumã amji gõi, mã carõat kõt ame ipa. Cwýrjapê ri me hàhtõa ne cute mempar, ne hýrmã me ipipkjêr.

²² Mã ma me harên picràn, ne ma Krípinkrên kam cator, Jeju na mehkwy te cuprõn xà kam, na ri ma cute me hýrmã, Antijoc jõ krí wýr Parnap kujahêc. ²³ Mã Parnap curi cator, ne cute Pahpãm te me to impejti, ne cute Pahpãm te me ahna amji caxàr, mã ampeaj kam me haky na me hõmpun. Ne cute ita kam me to incrà tu to mehcunea japackre, mãr quê me Pahpãm kampa, ne cute me amji kam me hapac xà cunea to me Pahpãm caca xà pynã. ²⁴ Ýhý, pê Parnap ita pê hũmre impejti, ne pê Pahpãm Carõ Pejti cumã amji gõi ne amji jõrtu, na pê hãn ne Jeju to amji mã ihmipej to týj. Ne incwýrjapêa ri me hàhtõa ne Pahpãm wýr me ipipkjêr.

²⁵ Jirõ pê mã ri, ma Parnap Kríjara wýr mõi, ne kam apu Xawrõ japê, ne cute ihcajar, ne ma Antijoc jõ krí wýr me tẽ. ²⁶ Ne caku pyxit ata na cute me cuprõn, cuprõn xà kam, ne cute me hàhtõa mã Pahpãm jarkwa to hahkre. Ne Antijoc jõ krí ata kam, pê mam Jeju kõt me ipa catêjê japyrê to ajco me “Jeju na mehkwy” hane.

²⁷ Mã amcro ata na Pahpãm jarkwa to mehcahkõc catêjê kwý Krípinkrên pîn me mõi, ne Antijoc jõ krí wýr me cator. ²⁸ Ne pyxit ata pê hapry Agap, ne cator ne xa ne Pahpãm Carõ Pejti jarkwa kõt me cumã awjarê, ne me cumã:

— Ýhý, quê ha pjê cunea kam prãm — hane. Ne por Crawti pê Roman catêjê jõ pahhiti jõ caku ata kam pê ita hane.

²⁹ Mã Jeju na mehkwy te Jutta jõ pjê kam Jeju na mehkwy tehcajpar na me ajpên par. ³⁰ Ne ahpýanre na, me pyxit ne cute me ihpore jõr par, ne mempeaj kam me cugõ. Ne cute me ihpore ata to Parnap me Xawrõ kujahêc, cute me Jeju na mehkwy to mehhimpej catêjê mã hõr xà caxuw.

Hipêr ihkên xà

12 Ýhý, pê amcro ata na pjê jõ pahhi ata hapry Heroti, ne cute Jeju na mehkwy na harkwa hyr, cute ame to kêanre prãmte. ² Ne Heroti te Jowãw tõi pê Tijac na harkwa hyr, quê mehpro ne mehcura, wapo xwahhihti to. Mã cute mehcuran. ³ Mã Jutta catêjê mã cute mehcuran ita na kîn. Cwýrjapê ri Heroti te hajýr ne hipêr Petrô pro, ne me huwapre ne me haxàr na harkwa hyr, Jutta catêjê pijacri xà jõ amji kîn jõ amcro ata kam. ⁴ Ne cute krãhtare pê me hamãr catêjê te tejixêj jũhkra mã haxàr, ne me cumã:

— Me hamãr peaj ne, quê nee jũ kam ihtêm nare, nãmri amji kîn jirõ pê wa ha me cuna mã hãm, ne ihcukij, ne ihcura — hajýr. ⁵ Mã Petrô nõ, mã hamãr

catêjê ihtÿj me hamã. Mã Jeju na mehkwy ihtÿj Petrô na Pahpãm na me ahwÿ, quê nee me Petrô curan nare.

Pê Petrô me hacjên xà pê cato

⁶ Ne amcro ata na pahhi Heroti te Petrô cukij, ne mehcuran xà jô caxwa ata kam pê me hamãr catêjê cote na nõ ne gôr. Pê wakÿre ajkrut ne ihcajpre, ne cormã harkwa mã hamãr catêjê ahna mehcuhhê. ⁷ Mã ihprôt pê caxwa ata kam, Pahpãm mã imprar catêjê nõ ata còjkwa pîn me hacjên xà wÿr iwryc, ne cute cumã amji to ipipê. Mã hàhcujro kam apêhti pyrentu. Mã cute Petrô jikre kam ihtat, ne ihcujrôn ne cumã:

— Hã, axãm pyrentu — hane. Mã wakÿre te ihcajpre itajê cunea apu ipijaxwÿr. Mã cormã ihtÿj hamãr catêjê ame hikwa ne ame gôr.

⁸ Mã Pahpãm mã imprar catê cumã:

— Atu na hê xà to apre, ne gô par kà mã amji jaxà ne ahna to huwapre — hane. Mã cute ahna to huwapre par mã cumã:

— Gô hitô kà mã amji jaxà ne ajpên ikôt mō — hajÿr.

⁹ Ne ma mam Pahpãm mã imprar catê cator, ne cumã mō, mã hapu na Petrô ihkôt mō. Ne nee cator xà ata na cute amji jahkre pej nare kam, ihtÿj ipimtir na apu amji cãmjĩ. ¹⁰ Ne ma ihkôt mō, ne cute me hamãr catêjê cuhhê xà jakren, ne hirô pê ihnô ita jakren, ne ma wakÿti te harkwa catia ata wÿr me mō. Mã amjia kôt cute me cumã amji jihê mên, mã ma me cator. Ne ma krĩ cape kôt me mō, mã ihprôt pê ma Pahpãm mã imprar catê tẽ. ¹¹ Mã cormã Petrô te amji cajpêr ne amji mã:

— Pÿhàpà, xãmte ampeaj kam ri Pahpãm mã imprar catê te Heroti me, Juta catêjê jô pahhi kwÿ jũhkra pê icaxàr! Nee mã ijôt kam nare, ne nee mã ipimtir kam nare — hane.

¹² Ne cormã cute to amji japackre, ne ma Marij jũrkwa wÿr tẽ, por Jowãw Macô menxi ata jũrkwa wÿr. Ne hÿrmã cator, mã cormã cute me cuprôn ne mehkrĩ, ne ma hõtpê Pahpãm mã me Petrô cajrên. ¹³ Mã pea Petrô te me cumã harkwa cahhyr kam ihtêm. Mã cupÿre japÿr te Rotihkwÿj te impar, ne ma hÿrmã tẽ ne cute ihcukij, ne cumã:

— Me anô mã ca? — hajÿr. Mã cumã:

— Pa — hane. ¹⁴ Mã cute impar pyrentu ne hakry mã ma ipicahur, ne nee cute cumã hihê mên nare, ne ma tẽ ne ame cumã harê, ne me cumã:

— Ma xà, pō pê Petrô harkwa mã xa — hane.

¹⁵ Mã me cumã:

— Hamreare, ca apu ato kam waj — hane. Mã me cumã:

— Quê, wa nee apu ito kam waj nare, ne nee wa apu ipimtir nare, ampeaj kam wa me amã harê. Ma xà, pō pê xa he! — hane. Mã me ajpên mã:

— Hamre, Petrô carō mōrmō xa — hane. ¹⁶ Mã cormã Petrô apu harkwa cahhy, mã cute me cumã harkwa jihê mên, ne me hõmpun, ne me amji mã ipikrar.

¹⁷ Mã cute hũhkra to mehcuhhêc ne me cumã:

— Me kêt, ne me ankrê, wa me amã amji jarê — hajÿr. Mã me kêt, mã ame cumã Pahpãm mã imprar catê kujahêc, mã cute me hacjên xà pîn to cator na, ame cumã amji jarê. Ne amji jarên kôt me cumã:

— Ca ha me anô tẽ, ne Jeju na mehkwy to ihhimpej catê, pê Tijac ata me, me ikjêjê mã ijarê — hane. Ne ma jũ kam tẽ.

¹⁸ Mã apê, mã me hamãr catêjê te Petrô japê me amji caprãr, ne me cupê amji jahkre kêatre. ¹⁹ Mã Heroti te Petrô na hàhcukjêr to mehkujahêc. Mã nee cute me Petrô mã cator nare, mã Heroti te Petrô na me hamãr catêjê cukij, mã nee jũm te cumã harên nare. Na ri cute me tejixêj itajê cunea na harkwa hyr, quê me hipej, mã cute me hipej tu. Jirô pê mã ri, Heroti Juta jô pjê pê cator, ne ma Xexa jô krĩ kam hàhhuc, ne jũ mã curi cute amji to amcro ton.

Pjê jô pahhi pê Heroti tyc xà

1 Petrô 1.24-25

²⁰ Ỡhÿ, ampeaj kam ri, Heroti mã Kên jô krĩ me Tep-pro jô krĩ kam mehkrĩ catêjê kam incryc. Ampo na? He mehkwy japyre mã me cumã ihpore jôr prãm to me ipa, cwÿrjapê ri ame kam incryc. Na ri krĩ jô pahhi catêjê atajê te amji to cuprôn, ne ma Praxô pê Heroti jarkwa kôt mehcuinea to ihhimpej catê ata wÿr me mō. Ne hÿrmã me cator, ne ame ajpên mã ihcakôc, cute hacpÿa mã ajpên to me hō kwÿ nõ prãmte. Ne ampo na ri cute me ajpên to hajÿr? Nee mã ampo na nare. Pê Heroti pê pahhi ata jô pjêa pîn ajco me cumã me hō to hapôj, cwÿrjapê pê me ajpên to hane. ²¹ Mã Heroti te me cumã ihcakôc xà na me cumã amcro hyr, mã ramã amcro hyr xà ata kam hàhhuc. Mã cute hō pahhi kà impejti ata mã amji jacjên ne to amji cũmpej, ne pahhi krĩ xà catia ata kam hÿr, ne cute me cumã ampo kwÿ to ihcakôc to irya. ²² Mã cute mempar pejti atajê te ihcakôc ata jahpan xà na me cumã caràr ne me cumã:

— Pÿhàpà, nee mã me hũmre nõ ihcakôc nare! Me pahpãm nõ mã ca ajte acakôc! — hane. Mã Heroti te ita par, ne cumã amji jarên xà ita na ihkĩn.

²³ Mã cute cupê Pahpãm na me harên ata na, ihtÿj me to tojnô, na ri ihtÿj cupê Pahpãm na me harê. Cwÿrjapê ri còjkwa pîn Pahpãm mã imprar catê te to kên pyrentu. Mã cutô te ihkrêr mã ihtyc.

²⁴ Pê ajco Pahpãm jarkwa ma ihkà to mō, ne ipicràn to mō.

²⁵ Mã Parnap me, Xawrô te me hàpên xà krã curan, ne mehkjêjê mã ihpore jôr, ne ma Krĩpinkrên pîn hacpÿa mã Antijoc jô krĩ wÿr cute me amji jaxàr. Ne cute me Jowãw Macô japrôr ne ma me to mō.

Pê Parnap me Xawrô hàpên kam me tẽ

Me Hàpên Xà 9.15-16; Roman 1.1

13 Ỡhÿ, Antijoc jô krĩ kam Jeju na mehkwy kam, hõtpê Pahpãm jarkwa to mehcakôc catêjê me, me cumã ampo to hahkre catêjê te xĩc atajê japÿr te hajÿr he: Parnap me, Ximãw japÿr krut te Tycre me, Ruxô pê Xiren catêjê nõ ata me, Manem, por pê me hō

pahhi Heroti cape na amji to ajpa ata me, Xawrô. Atajê pê ri me cumã ampo to hahkre catêjê. ² Mă amcro nõ na, Pahpãm pê Pahhiti to ame amji kampa, ne ame cumã ihcakôc xà caxuw ame ajcri, ne nee ame hâpàn nare. Mă Pahpãm Carô Pejti te me cumã:

— Me imã Parnap me Xawrô ta. Ampo na? Wa ramã ite me hâpên xà nõ caxuw amji mã me capi — hajÿr.

³ Mă cormã me ipijacri xà ata kam, cute Pahpãm mã me Parnap me Xawrô na mehcaôc, jirô pê mã ri cute me ahna hũ xir, ne mehcajrën jirô pê, ma cute mehku-jahêc.

Pê Xawrô me Parnap Xipre jô pjê kam ame mō

Me Hâpên Xà 8.9-24

⁴ Mă Pahpãm Carô Pejti te Parnap me Xawrô kujahêc, mã ma Xeruxij jô krí wÿr me tẽ, ne curia ri cute me pâr kre pro, ne ma me tẽ, Xipre jô pjê pê cô jipôc ri pjê ata wÿr, ne me cator. ⁵ Ne krí japyr te Cõjarô jô krí mã me cator, ne cute Pahpãm jarkwa to mehcaôc kam mehtêm, Juta catêjê te cuprôn xà kam. Pê hanea ne Jowãw Macô apu mehkôt mō, cute mehtehcajpar, ne me Jeju pê me pahkritxwÿ jarën xà impejti incràn prãmte.

⁶ Ne ma cô jipôc ri pjê ata wÿr me irêr, ne hanea ne ma krí japyr te Papo ata mã me cator. Mă Papo jô krí ata kam hũmre jũxy xi japyr te Parjeju ata ihkrí. Ne Crec jarkwa na caj ata japyr pê Erima. Ne cupê Juta catêjê nõa ne ihkêanre, ne ajco ihkrí ne mehcuea mã ihhêj. Pê ajco me cumã ihhêj to:

— Ipê me amã Pahpãm jarkwa to icakôc catê — hane. ⁷ Ne cupê pjê ata jô pahhi jô ikwÿ nõ. Mă pjê jô pahhi ata japyr te Xerjô, ne cupê hũmre krã kreti. Ne cute Parnap me Xawrô na hãhwÿr, cute Pahpãm jarkwa na hũpar prãmte.

⁸ Mă hũxy xi ata ma apu Jeju jarkwa na memprar catêjê caca. Ne ihtÿj cumã pahhi ata te Jeju jarën xà ata caca na to prãm. Mãr quê nee pjê jô pahhi ata to amji me ihhimpej nare. ⁹ Pê Xawrô japyr nõ pê Pawrô, ne kam Pahpãm Carô Pejti te hipu tu, mã cute Erima ata pupun tÿjti, ¹⁰ ne cumã:

— Apê me pahcure xwÿn pê Xatanaj kra. Ne apê ampo pejti to kên catê, ne akêan to akên, ne ampeaj kam ahêj xi. Ampo na? Apê ampo pejti kêhkên catê, na ca gõtpe Pahpãm caca xà impejti to kên to apa. ¹¹ Na quê ha ita caxuw ato hy. Ca ha ato tũm pyrentu, ne ato tũm ita na jũ mã ana amcro, ca ha cormã hipêr pyt pupu — hane. Mă hũxy xi ita te amji cajpêr pyrentu, mã ramã into kam awcapàtkô to mō, mã cute amji jacjên kam ihtêm, ne ame hapê hâpên to mō, jũm te hũhkra na ipyr ne apu to mōr prãmte.

¹² Mă pjê jô pahhi te ita pupun, ne ihtÿj ampeaj kam caxwãm catia mã Pahpãm jarkwa par, ne amji mã to ihhimpej. Ne amji mã ipikrar, ne jÿ ne amji mã:

— Ampeaj kam Jeju jũjarën xà pihho ne impejti pit, na wa ha itÿj ita caxuw Jeju to amji mã ihhimpej — hane.

Pê Pawrô Pixitij jô pjê kam apu mō

Me Hâpên Xà 15.38

¹³ Mă Pawrô me, me mōr catêjê me, pâr kre mã me hâr, ne ma Papo pÿn, krí nõ japyr te Pjêjôti ita me, Panpir jô pjê wÿr me tẽ, ne me cator. Mă Jowãw Macô te mehhyr ne ma hacpÿ mã amji jaxâr, Krípinkrên wÿr.

¹⁴ Mă ma ihtÿj mehtêm kam cute me to incrà tu, Pjêjôti jô krí pÿn, ne ma Antijoc jô krí wÿr, Pixitij jô pjê wÿr me cator. Ne jũ mã amcro mã, mehkôt xà pê xap jô amcro na, ma Juta catêjê te cuprôn xà wÿr me mō, ne me hâr, ne me hÿr. ¹⁵ Mă mam jũm ita te menquêt-ti Mojxe jô kãhhôc cahyt, ne ihkôt cute me Pahpãm jarkwa na mehcaôc catêjê jô kãhhôc cahyt. Jirô pê mã ri, cute me cuprôn xà jô pahhi kwÿ te me hũjarën na me mên, ne me cumã:

— Hã, me ikwÿ, xà hõtpê me amã ampo pejti jarën xà? Gapacta ne me imã harê, wa me awpa ne me ijakry — hajÿr.

Pê Pawrô ame cumã Jeju jarë

¹⁶ Mă Pawrô xãm ne cute hũhkra to mehcuhhêc, ne ihcakôc kam to ihtêm ne me cumã:

— Ýhÿ, me apê Ixaher catêjê pê Juta catêjê me, me apê mehcahkrit atajê me, pjê nõ rũm me acator atajê me, me amã Pahpãm kÿn catêjê atajê, me ikampa.

¹⁷ Ýhÿ, pê Pahpãm amji mã me papê Ixaher catêjê capi. Ne hanea ne amji mã me panquêtjê me, me pampupxwÿjê capi, ne me to ipicamên to mō. Pê Ejit jô pjê kam mehkri, pê me to ipicamên to mō catia to cati. Jirô pê mã pê ihtÿj Pahpãm carôat kôt Ejit jô pjê pÿn me to cuto. Ne ma me to mō, pjê impejti japyr te Cana jô pjê ata wÿr. Pê nee pry kôt me Pahpãm par nare, ne ame to kên. ¹⁸ Pê Pahpãm pōti kam hamreare ata kam me cumã hũcanãr to caku to cwarênta. ¹⁹ Jirô pê mã pê Pahpãm Canã jô pjê kam kríxàre te xet atajê to ac-to, ne me hipej tu. Hamre, pê me panquêtjê mã pjê ata jahkre. Ne cute me cumã hahkre jirô pê mã ri me ahna caku te cwatxênta ne ihkôt xÿncwênta mã cormã cute me cumã hõr.

²⁰ — Pê Pahpãm ajco me cumã me to ihhimpej catêjê pyxwÿr to mō, ne ahnaa Xamer pê mam Pahpãm jarkwa to ihcakôc catê ata jô amcro kam to ahtwÿ.

²¹ Pê me hõ pahhi cati na me Pahpãm wÿ. Pê Pahpãm Xawrô xwÿ pê Quiti kra, pê Pênjamí tàmxwÿ tàmxwÿ nõ to me cumã me hõ pahhi cati na hãm, pê ihhimpej to caku to cwarênta. ²² Jirô pê mã pê Xawrô nee Pahpãm par kam to incrà nare, cwÿrjapê pê pahhi tète me camê, ne haxà kam Tawi xãm, me hõ pahhi cati na. Pê ampeaj kam Pahpãm mã Tawi kÿn. Na pê ramã harën to hane he: “Ýhÿ, Tawi pê Jexê kra ata, ito pit mã amji kam hapac to ipa. Ne ite ampo na prãm atajê to pit mã hâpên to ipa” hane.

²³ — Pê rÿ pëa mã ramã Pahpãm jũm te me pahkên pê me pahpytâr catê ata to awjahkre. Ne Jeju pê Tawi tàmxwÿ tàmxwÿ nõa ata to pê me pamã awjahkre.

²⁴ Ne pê Jeju cator xwÿjrea na mam Jowãw cato. Ne ame hapackre to mō. Ne Juta catêjê mã harê, ne me

cumã: “Me akên itajê jicu. Ne me apej to pit mã me amji kampa, wa ha cô kam me acumrã” hane. ²⁵ Ne ramã cute hàpên xà jipêj xàa kam, pê me cumã harên to hane he: “Ýhÿ, me ipupu, he nee ipê jũm to cute me hũjahkre ata nare. Quê ha cormã ikôt hapu na jũm ata cato. Ne cupê me pahkên pê me pahpytâr catê, ne impej to impej. Ne taa mã ri quêt ijirôa pê cati. Ne cumã amji jahkre pej catia to cati. Ne ijirôa pê cumã hahkre pej catia to cati, ne ihkĩnte icrire, ne ikêanre. Na ri hàpên xà impejti itajê kam ipahàm pit” hane.

²⁶ — Ne me papê Aprãw tãmxwÿ tãmxwÿ me, me cupê mehcahkrit te ihtÿj catyt kam Pahpãm kôt me ipa atajê mã ri, hanea ne harkwa hyr xà ita. Ne Pahpãm te me pahwÿr harkwa kujahêc, mãr cu me kampa ne me pahcunea me pahkên pê me pahcato. ²⁷ Ne Krĩpinkrên kam ame ipa atajê me, me cupê pahhi catêjê me, me cupê Jeju pê me pahkên pê me pahpytâr catê na hahkre kêatre. Ne hõtpê hãn ne me ikôt xà jõ amcro kam me cuprô, ne mehkrĩ ne mekhãhhôc cahyt. Ne pê Pahpãm jarkwa na mehcahôc catêjê ramã Jeju na mehhôc. Cakrô, mã me cahyt catêjê atajê pê impar pej jahkre kêatre, ne me cupê Jeju pê Pahpãm kra na hahkre kêatre. Mã Jeju curan xà jõ amcro kam, mam ihkãhhôc te to hũjarên xà atajêa na cute me ton. ²⁸ Pê nee Jeju ihkên xà nõ ton nare. Pê ahnaa me pro ne pahhi Pirat mã me cugõ. Ne pê hũ na ame amji to prãm, na pê ame kam incryc. Ne cute mehcuran prãmte me ahna me Pirat wÿ. ²⁹ Ne cute me Jeju curan ita na, pê Pahpãm jarkwa na mehcahôc catêjê rÿ pêa mã ramã mehhôc. Mã ihcuran xà jirô pê cute mehtyc caxàr, pĩ pê, ne ma hĩ to me mõi. Ne cute kên kre caxwãm pê me hir. ³⁰ Mã Pahpãm te hacpÿa mã hipêr Jeju to ihtĩr. ³¹ Mã Jeju kôt me ipa catêjê Hĩpôjajo jõ pjê rũm, ihkôt Krĩpinkrên wÿr me mõi atajê wÿr hapôj jãhtôa, amcro jãhtôa kam. Mã cute me hõmpun atajê ri ihtÿj ame harên to me ipa.

³² — Jirô pê mã wa ite me amã ijũjarên xà pejti ita jarên prãmte, ita caxuw ita ri ame ipa. ³³ Pê rÿ pêa mã Pahpãm ramã me panquêtjê mã, hacpÿa mã cute Jeju to ihtĩr to ihcakôc. Na ri cormã cute me pamã ita ton. Na pê Tawi xwÿ Pahpãm jarkwa kôt ihhôc, pê Pahpãm Jeju mã hane he, ne cumã:

“Ýhÿ, apê ikraa to ikra” hane.

³⁴ — Pê Ixaj xwÿ hanea ne Pahpãm jarkwa na, Jeju jĩ cormã ihcacu nare kam, hacpÿa mã to ihtĩr xà na harê, ne harên to:

“Wa ha itÿj acũmpej, ne amã ampo pej cunea gõ. Pom pê wa Tawi mã to awjahkre atajê, wa ha amã cugõ” hane.

³⁵ — Na pê Tawi xwÿ hanea ne Jeju na Pahpãm mã harkwa to hane he:

“Jũ wÿr ca ha amã hàpên catê impejti to tojnõ, quê ha ty ne hĩ ihcacu” hane.

³⁶ Mã hõ amcro ata na Tawi te Pahpãm te ahna mên xà ata cunea ton. Ne pê ty, pê menquêtjê capea na me harêt, pê hĩ ihcacu. ³⁷ Ne pê Jeju ajtea mã. Ampo na? Pê Pahpãm hipêr to ihtĩr, na pê hĩ nee ihcacu nare. Ne ihkĩnte Tawi jĩ pê ihtÿj ihcacu.

³⁸⁻³⁹ Ne ita caxuw ca ha me ipar peaj ne. He Jeju pê ri me pahkên pê me pahpytâr catê. Ne por pê me panquêtĩ Mojxe me pamã incaca xà kujate ata, hõtpê impej. Ne jũ wÿr quê Pahpãm te me pahkên ton jicu na to. Ne cu ha me pahnõ me pahkên mã hikra, ne Jeju wÿr apkjê, ne to amji mã me pahhimpej, quê ha ihtÿj quêt me pahte to kên ata to tojnõ ne hicu. ⁴⁰ Ne me amji mã hamãa ne, ne me awpa, cõt mã ihhêaj to jũ caxuw me akam ampo kên catia cato, nãmri pê ramã Pahpãm jarkwa na mehcahôc catêjê ita na mehhôc, pê mehhôc to hane he:

⁴¹ “Hã, me hàwxũn xi catêjê atajê me, por ca Pahpãm jarkwa to ame acakôc kêanre atajê, ca ha atÿj jũ caxuw me amji mã ajkra ne me ahi.

Ampo na?

He wa ha apu gõ amcro kam ampo pej catia ne to ata, quê ha jũm cati na me amã harê, ca ha nee mempar ne amji mã me to hajÿr nare.

Na ca ha atÿj me ahi” — hane.

Ne cute me cumã hũjarên jicu.

Pe me hàhtôa ne Pawrô jarkwa kôt Pahpãm wÿr me apkjê

⁴² Ne ma Pawrô me Parnap me cator, cuprôn xà pê, mã cute me cumãn, quê hacpÿa ne me mõi, xap nõ na, ne hipêr me hũjarên xà atajêa to me awjarê. ⁴³ Ne cute me cuprôn jirô pê, Juta catêjê jãhtôa me, hanea ne mehcahkrit catêjê te amji to me Juta catêjê, ne ma cute me Pawrô me Parnap pynãr. Mã Pawrô me Parnap me cumã ihcakôc, ne cute amji to mehtÿj na me cumã awjahkre, quê Pahpãm jarkwa kôt kam me to incrà.

⁴⁴ Ne xap na, krĩ kôt mehcunea te me cuprôn, cute me Pahpãm jarkwa par prãmte. ⁴⁵ Mã Juta catêjê atajê kwÿ te me hàhtôa pupun, ne Pawrô na mehkwy jũ na ame amji to prãm. Mã Pawrô jarkwa ata na cute mehcahôc kam mehtêm, ne me hũn kam mehtêm.

⁴⁶ Mã Pawrô me Parnap te me cumã ihcakôc to tÿaj kam, me cumã hũjarên to:

— Quêt me ca, pê mam Pahpãm me apê Juta catêjê mã harkwa ta. Ca ajte ma apu mehcaca, ne ahê ne ma ame Pahpãm te me akên pê me ato hapôj na mehca-ca. Ne ahê ne ma ame Pahpãm te amji kam hapac xà intuw pejti ita caca. Na wa ha ita caxuw me gicu, ne mehcahkrit atajê mã, wa ha awjarê. Pê Pahpãm me imã harkwa hyr to:

⁴⁷ “Wa ate me mehcahkrit atajê mã, pjê cunea kam gãhcujro xà na, ite me apyxwÿr.

Mãr quê mehcunea ipê mehkên pê me hũtâr catê na me ijahkre pej” — hane.

⁴⁸ Mă mehcahkrit atajê te me ita par, ne ame hakry ne me amji mă Pahpăm jarkwa cupa, ne me amji mă: — Ampeaj kam Pahpăm jûjarên xà impej — hajÿr. Ne cute amji to me Jeju na mehkwy. Pê me Pahpăm cute amji mă me to ihhimpej xà caxuw amji mă me capi atajê cunea te me amji kam hapac xà intuw mă me hâr.

⁴⁹ Mă Pahhiti pê Jeju jarkwa pjê ata cunea kam ihc-ahkũm. ⁵⁰ Mă Juta catêjê cormă Pawrô kwÿ jũ na ame kam mencryc, cwÿrjapê ri cute me krî jô pahhi catêjê me, pyjê cati mă Pahpăm kîn atajê rēc. Mă hanea ne Juta catêjê kôat pyjê atajê ma ame Pawrô me Parnap curê. Ne ma cute mehkujahêc, pjê nõ wÿr. ⁵¹ Mă Pawrô me Parnap te mehpar tète pro jacrô capîr, cute me hõmpun prãmte. Ampo na? Nee cute mempar nare na ri, ne me cumă:

— Hă, gapacta ne me hane, ne ca ihnõ na me, ca ha gõtpe amcro nõ na, jũ caxuw me akên mă axà ne me hõmpu, wa ha nee me atehcajpar nare. Ampo na? Ramã ite me amã harên — hane. Ne ma krî japyr te Ampokrekà jô krî ata wÿr me mõ. ⁵² Mă ampeaj kam Jeju na mehkwy jakry, mă Pahpăm Carõ Pejti te me cumă me carôt to hipu tu.

Pê Pawrô me Parnap Ampokrekà jô krî kam ame mõ

14 Ne Ampokrekà jô krî kam cute me hajÿar. Pawrô me, Parnap Juta catêjê te me cuprõn xà mă me hâr, ne cute me cumă Pahpăm jarkwa jarên. Mă me cupê Juta catêjê jàhtõa me, mehcahkrit atajê me, cute ihtÿj mempar, ne me hũpar xà ata kôt cute me hũnâr. ² Mă me cupê Juta catêjê kwÿa te mempar nare atajê te Jeju jarkwa na memprar catêjê kam mencryc prãmte, cute mehcahkrit atajê rēc. ³ Mă Jeju jarkwa na memprar catêjê amcro jàhtõa kam me hàhhuc, Ampokrekà jô krî kam, ne cute me hũcanãar kam Jeju pê Pahhiti to me hũjarên. Mă Pahpăm te me cumă carôt jõr, cute me to hâpên xà pejti pihhoti ton xà caxuw. Mă mehcahôac to me ampo pejti ton to me ipa. Mă me hàhtõa ne cute me hâpên xà ata pupun, ne me hahkre pej pyrentu, me hũjarên to me awjarê ata kôt, nãmri ampeaj kam ri Jeju pê Pahhiti. ⁴ Ne krî kam mehkri atajê te mencwÿrjapê amji to me ipicapõn. Ne mehkwy Jeju jarkwa na cumă memprar catêjê rũm me hàhhuc, ne mehcahhur Juta catêjê rũm me hàhhuc.

⁵ Mă mehcahkrit kwÿ me, me cupê Juta catêjê kwÿ me, me hõ pahhi kwÿ mea mă, cute me Jeju jarkwa na memprar catêjê to amehkên, ne cute kên to me hipej prãmte, cute ahna me ajpên par. ⁶ Mă Pawrô me Parnap te ramã me hahkre pej, cwÿrjapê ri ma me cator, ne ma Ritij jô krî me, Terpe jô krî wÿr me tẽ. Ne ma Ropcahàc jô pjê kam, krî atajê wÿr me tẽ. ⁷ Ne krî ajpên na pire mă apu ihcuhhê atajê kôt cute me cumă Jeju pê me pahkritwÿ jarên xà impejti jarên.

Pê Ritij jô krî me Terpe jô krî kam ame mõ

Me Hâpên Xà 3.1-10

⁸ Ne Ritij jô krî ata kam, pê hũmre par me ihpar kõn te xwÿ ita ihkrî. Pê xwÿ ita na ihpÿm, na pê jũ caxuw hãm ne apu mõr nare. ⁹ Ne hũmre ita te Pawrô cakõc xà na impar, mă cute hõmpun, ne ramã cute ihtÿj Jeju to amji mă ihhimpej na hahkre pej, ne ihtÿj hanea ne Pahpăm te caprãr na cute amji mă to hajÿr na hahkre pej pyrentu. ¹⁰ Cwÿrjapê ri Pawrô te hõmpun tÿjti, ne kÿj cati pëa mă cumă:

— To xa! Ne axãm pej! — hajÿr. Mă hũmre ita toj ne hãm, ne cute mõr na ipyr pyrentu, ne ma mõ.

¹¹ Mă mehcuea te me Pawrô carôt kôt hâpên xà pihhoti ton ita pupun, ne me harkwa to ajpên mă me caràr kam mehtêm:

— Me pajõ pahpăm pê Jupiter me Mecurij te mehãa na amji ton, ne cõjkwa pîn me cator! Por cu hõtpê me kampa atajê te ri mehãa na me amji ton, ne cõjkwa pîn me cator! — hajÿr. Pê ihtÿj ame caxêti japyr te Jupiter me Mecurij ata pê Pahpăm na amehcãmÿi ne ahna ihkaj na. Ampo na? Nee me cupê Pahpăm nare, me cupê me hũmre pit.

¹² Mă cute me Parnap mă haprÿ to Jupiter, ne hanea ne me Pawrô mă haprÿ to Mecurij. Ampo na? Pawrô pê ihcakõc catê na ri. ¹³ Ne pahpăm cahàc pê Jupiter to me amji kam hapac xà jũrkwa ata ihcuhhê, krî cati jô kwÿc jarkwa mă. Cwÿrjapê ri Jupiter jũrkwa jamãr catê ata, pryti me pîrã te ihkrãhkà to mõ, krî cati jô kwÿc jarkwa wÿr. Mă mehkwy te me cumă pryti curan, cute me Jupiter mă to caxàr prãmte. Mă cute mencaca xà na me amji toan xà na pahpăm cahàc te amehkîn prãmte, pê ajco ame ita to.

¹⁴ Mă Jeju jarkwa na memprar catêjê te ihtÿj me cupêa Pahpăm na amehcãmÿi na cute me hahkre pej, ne me cumă ahna ihkîn nare, mă ma ita na amehcaca. Cwÿrjapê ri cute amehkà cokjêr, ne ma me ipicahur ne me cumă me hâr, ne me cumă caràr to mõ, ne me cumă:

¹⁵ — Ampo na mă ca ame hane? He hanea ne ipê me apyràac, ne ipê mehãa wa. Wa ita ri ame amã Jeju jarên xà impejti jarê. Ca ampo kên itajê mă me hikra. Ampo na? He ampo itajê nee ampo caxuw impej nare. Na ca ha hacpÿa mă Pahpăm tïar wÿr me amji jaxà. Taa mă pê quêt cõjkwa me pjê to. Ne taa mă pê cõxwa to, ne kam ampo cunea to. ¹⁶ He pê mam amcro ata na, Pahpăm mehcuea to tojnõ, pê amjia kôt, mencaca xà kôt ame ipa. ¹⁷ Ne hõtpê Pahpăm me pamã ampo pejti gõ, pahte impej na me hahkre pej prãmte. Ne taa mă ri hõtpê cõjkwa pîn ta kujate, ampo tuw to ipicamên xà caxuw. Ne taa mă ri ampo tuw jô amcro kam to, ne amcro ata na me pamã me pajõ intuw gõ, ne hanea ne taa me pamã me pajakry gõ — hane.

¹⁸ Ne cormã me cumã ihcakõc kwÿa kam, mă cute ajmãr me cumă me pryti curan ne me to caxàr.

¹⁹ Jirõ pê mă ri Juta catêjê kwÿ cator, Antijoc jô krî me, Ampokrekà jô krî pîn. Mă me hàhtõa ne me cumă hâr, ne mehcuea te me Pawrô me Parnap kam me

hàhtôa to me hàhtô atajê incryc na me ton. Mă ame kam mencryc ne cute kên to me Pawrô cujpât, ne ihtÿj ihtyc na amehcămjî, ne krî pê me to cator prămte me cupjê. ²⁰ Mă Jeju na mehwÿ te me ahna cuprôn, ne me ahna me ipixêr, mă hacpÿa mă hăm ne ma hipêr krî ata mă hâr. Ne apê mă ma Pawrô me Parnap, Terpe jô krî wÿr me mō.

Pê Antijoc jô krî wÿr me amji jaxà

¹ Timot 3.10-11

²¹ Ne cute Terpe jô krî kam me Jeju pê me pahkritxwÿ jarên xà impejti to me harên, cwÿrjapê ri me hàhtôa te amji to me Jeju na mehwÿ. Jirô pê mă ri cute me amji jaxâr, Ritij jô krî me, Ampokrekà jô krî me, Antijoc jô krî me, Pixitij jô pjê wÿr. ²² Ne cute Jeju na mehwÿ te me hÿcanâr to me hapackre, mâr quê Jeju te amji kam hapac xà na me amji to ihtÿj tu, ne me cumă harên to:

— Cu ha pahtÿj me ampo kên jakren partu, ne cormă Pahpăm himpej xà ata ri me axà — hane. ²³ Ne krî jàhtôa kam Jeju na mehwÿ mehkri. Na ri Jeju jarkwa na membrar catêjê ma hân ne krî atajê wÿr me pra, ne me cumă mehwÿ to mehhimpej catêjê pyxwÿr to me ipa. Ne ahpÿanre na Jeju na mehwÿ kam hân ne me capi, ne me to mehhimpej catêjê na me hÿxwÿ. Ne cute me ipijacria kam Pahpăm mă mehcakôc ne cumă me hō pahhi catêjê cajrên to:

— Ýhÿ me ijô Inxû, me hÿmre itajê ihtÿj me akam hapac to kênre nare, na ca ha mehtehcajpa, mâr quê me akwÿ jamâr to impeaj ne — hane.

²⁴ Ne Pawrô me Parnap te hacpÿ mă amji prya kôt me amji jaxâr, ne krî atajêa kôt me hapôj to mō, ne mehwÿ mă cute to mehhimpej catêjê pyxwÿr to mō ita kam Pixitij jô pjê na me irêr, ne ma Panpir jô pjê mă me cator. ²⁵⁻²⁶ Ne ma Pjêjôti jô krî mă me cator, ne cute me cumă Jeju pê me pahkritxwÿ jarên xà impejti to harên. Jirô pê mă ri ma Ataraj jô krî wÿr me pra, ne cô cape na krî ata mă me cator. Ne curia pâr kre mă me hâr, ne ma hacpÿ mă Antijoc jô krî wÿr me tē, ne me cator, cute me hàpên xà jipêj jirô pê mă.

²⁷ Mă Jeju na mehwÿ te me amji to cuprôn. Mă Pawrô me Parnap te, Pahpăm te me cumă carôt jôr, mă cute me to hàpên xà pejti pihho ton na, mehwÿ mă amji jarên. Ne hanea ne cute Pahpăm te me cumă pry jihê mên, mâr quê hanea ne mehcakrit atajê me Jeju to amji mă mehhimpej na, me cumă amji jarên. Ne cute me hàhtôa te Jeju na mehwÿ na amji ton na me cumă harên. ²⁸ Ne curi cute me ahna amji to me amcro jàhtôa.

Pê Krîpinkrên kam me cuprôn

Carati 2.1-5; 5.1-6

15 Ýhÿ, Juta jô pjê rÿm, jÿmjê xÿmre itajê cator, ne ma Antijoc jô krî kam me cator. Ne apu Jeju na mehwÿ mă ampo to hahkre to me ipa, ne nee me cumă ampo pej to hahkre nare. Ne cute me cumă to hahkre to hajÿr he:

— Ca ha me acahkrit atajê acunea atÿj me, pom pê Mojxe xwÿ me pamă ton to hahkre itajê to, ne atÿj me apy kà kryjre ne me hirê. Nămri ca ha ate me to hajÿr nare na, quê ha Pahpăm nee me akên pê me apytâr nare — hajÿr.

² Mă Pawrô me Parnap te mehcakôc xà atajê na mempar to hajÿr. Ne me cupê ahna ihkêanre. Na ri Pawrô te me cumă harên, ne me cumă:

— Hăpà! Nee cute ahna hajÿr nare — hane. Ne amji capÿy to ame cumă mehcakôc. Mă ma ame Pawrô me Parnap par caca. Mă Jeju na mehwÿ te me ita to amji kam hapac, ne ma jÿmjê atajê to, cute me Pawrô me Parnap kujahêc, Krîpinkrên wÿr. Ne curia quê ha Jeju jarkwa na membrar catêjê me, mehwÿ to mehhimpej catêjê atajê jÿmjê atajê na me awcapi, ne me hahkre pej to jÿ mă me, ne hacpÿa ne Antijoc jô krî wÿr me cumă harên kujate.

³ Ne Pawrô na mehwÿ ma Antijoc jô krî pîn me cator, ne cute me Kuhkÿmtyc jô pjê jakren, ne me Krîrîrtepej jô pjê jakren, ne ma Krîpinkrên wÿr me mōr kam mençrà tu. Ne cute pry na Jeju na mehwÿ cunea mă, me cupê mehcakrit atajê te hanea ne amji to me Jeju na mehwÿ mă harên. Mă Jeju na mehwÿ cunea me hÿpar xà ata kôt ame hakry. ⁴ Ne Krîpinkrên mă me cator, mă Jeju na mehwÿ me, Jeju jarkwa na membrar catêjê me, mehwÿ to mehhimpej catêjê cunea ame hakry. Ampo na? Cute me hōmpun na ri ame hakry. Mă Pawrô me, Parnap te Pahpăm te hàpên xà catia na mehtehcajpar kênre nare na me cumă me amji jarên.

⁵ Mă Jeju na mehwÿ kwÿ pê Parixêw catêjê kwÿ atajê te me Pawrô me Parnap cakôc xà impar, ne me hăm ne me xa, ne me cumă mehcakôc, ne me cumă:

— Ýhÿ, mehcakrit atajê, por nee me cupê Juta catêjê nare atajê, quê ha Jeju to amji mă mehhimpej ne amji to ahna mehwÿ, ca me cumă, quê mempy kà kryjre ne me hitep. Ne hanea ne, hōtpê me Mojxe xwÿ jô kàhhôc kam mencaca xà kampa, ne ihkôat me ipa — hane.

⁶ Mă mehwÿ to mehhimpej catêjê cunea me, Jeju jarkwa na membrar catêjê me, cute ita na me ajpên par prămte me cuprôn. ⁷ Ne cute amji mă mehcakôc to me irya to me iry, jirô pê mă ri Petrô xăm ne me cumă:

— Ýhÿ, me iquêtjê, ca me ipupu ne me ikampa, ne ramă me ate me gipôac ri Pahpăm te amji mă icapi, ne hàpên xà ita na imên na ate me ijahkre pej. Wa mehcakrit atajê mă Jeju te amji kam hapac xà tuw pejti jarên to ipa. Mâr quê xwÿ mă me Pahpăm pa, ne Jeju to amji mă mehhimpej. ⁸⁻⁹ Ne Pahpăm mă ramă me pahcunea te amji kam me pajapac xà jahkre pej, ne cumă me papê Juta catêjê caca xà cunea jahkre pej. Ne Pahpăm mă hanea ne mehcakrit atajê kîn. Ne cute me pamă Carô Pejti jôr xà ata na ri hanea ne cute me cumă hōr. Ne nee mă ajteare mă me nare, me Pahpăm mă me papipên pit. Mă hanea ne cute me Pahpăm to amji mă mehhimpej, na ri cute me to kên atajê to tojnō ne hîcu ne me ahna amji caxâr.

10 — Ne mër ampo na mã ca ajtea mã ihnõ ita na ame ton to prãm? Xà ca atỳj amji na me Pahpãm mën, quê me akam incryc to prãm to mã ca ame ita to hane? He pê cu nee me panquêtjê me, me pahcunea Mojxe xwỳ caca xà tỳjti jahkre kêatre ita cunea kôt ajco me papa nare. Nõ na mã ca ajte curmã cute amji to me Jeju na mehkwy itajê mã ate ahna me garkwa? He ame hajyr nare. Nãmri nee Mojxe te me pajapackre xà kôt pahte me amji ton xà ata kôt ri Pahpãm te me pahna amji caxàr nare. 11 He Jeju to pahte amji mã me pahhimpej xà kôt ri quêt Pahpãm te me pahna amji caxàr. Ahnaa mã me hâr tuw catêjê pê mehcahkrit atajê to cute, ne mehkên pê me hûtàr he — hajyr.

12 Mã mehcunea te me Petrô kam hapac, ne me ipinkrên. Mã Pawrô me Parnap te, Pahpãm te me cumã carôt jôr na me cumã me amji jarên, ne ihcakôac to hâpên xà to mehcahkrit atajê jipôc ri hâpên to ipa. Na cute mehcunea mã amji jarên par. 13 Mã ihkôt Tijac cakôc, ne me cumã:

— Ỡhỹ, me ikjêjê, me ikampa. 14 Ximãw Petrô te curmã me pamã mam Pahpãm te amji mã mehcahkrit atajê capi na harên par. Ampo na? He Pahpãm mã mehcunea kîn. Mã cute amji mã mehcahkrit atajê kwỳ capi. 15 Ne pê rỳ pêa mã Pahpãm jarkwa na mehhôc catêjê ramã ita na mehhôc. Ne pê mehhôc to hane he:

16 “Ỡhỹ, pê rỳ pêa mã Tawi pê Ixaher catêjê jô pahhi. Ne ihtyc jirô pê, pê hõ parxare ajcrà ne ahpỳnre na ame pra.

Ne hõ parxare itajê pê ikre pyràac.

Ne ame ipijaxwỳr ne ame ipicràn.

Pê ramã Pahpãm me to hũjarên to:

‘Wa ha amcro nõ na hacpỹa ne amji jaxà, ne pahhi pê Tawi jũrkwa pijaxwỳr ita to hacpỹa mã impej ne hãm.

Ne itỳj hipêr me cumã me hõ Pahhiti nõ xãm.

17 Mãr quê mehcahkrit atajê hãn ne me iwỳ, ne ijĩkjê rũm me ahtwỳ, wa ha itỳj me to ikra’ hane.

18 Ata pê mam Pahpãm rỳ pêa mã ramã harẽ”.

19 — Cwỳrjapê ri imã ite amji kam ijapac xà te hajyr he. Cu nee mehcahkrit atajê te mehkên jicu tête amehcahpêrkàr nare, quê ha Pahpãm jĩkjê rũm me hãhhuc prãm, cu ha nee intête amehcahpêrkàr prãmte me cumã Mojxe te me hapackre xà na me irên nare. 20 Ne imãa, wa ha me cumã ampo te cwat peaj na ihhôc, ne ihkujate. Mãr quê nee ame pahpãm cahàc krekà jô atajê kur nare. Ne nee ame ampo jôkre kam caxwỳr mã caprô pijaxwỳr nare atajê jĩ kur nare. Ne nee ame ampo caprô kur nare. Ne mehprôa me, mempjêa me, ame amji pupu, ne nee amji pê amehprô caxun nare. Hõhõ, ampo itajê wa ha me cumã harẽ. 21 Ampo na? He rỳ pêa mã pê me Mojxe jô kãhhôc cahyt na me cupy, ne ame cahyt, ne cormã krĩ cunea kôt me cahyt. Ne mehkôt xà jô amcro kam, cute me cuprôn xà kam, hãn ne ame hõ kãhhôc ita cahyt. Ne Juta catêjê mã cute ampo cawpa xà itajê ri, amji jirôa pê ihkêanre, ne ampeaj kam hũ na me pahpahàm cati. Na cu ha mehcahkrit atajê te curmã me pahkwỳ na me amji ton, ne

me pamã hâr atajê mã ampo te cwat itajê pit jarẽ ne ihcawpa — hane.

Pê mehcahkrit mã ihkãhhôc to

Carati 5.1

22 Mã Jeju jarkwa na memprar catêjê me, mehkwy to mehhimpej catêjê me, Jeju na mehkwy cunea me, cute me jũmjê itajê capi, cute Antijoc jô krĩ wỳr Pawrô me Parnap kôt mehkujahêc prãmte. Ne cute me Juta Parxap capi, ne hanea ne mehnõ japrỳ te Xira ita capi. Mã me hũmre atajê pê mempejti, mã Jeju na mehkwy cunea mã me hũpa. 23 Mã Jeju na mehkwy te me ampo cawpa xà atajê na me cumã ihkãhhôc ita ton, ne ihkãhhôc ata me ajkaam mehkujahêc. Ne ihkãhhôc ata te hajyr he:

“Ỡhỹ, me ipê Jeju jarkwa na memprar catêjê me, me ipê mehkwy to ihmimpej catêjê me, me ipê me akjêjê me, wa ite me amã ihhôc.

Hàpà, Jeju kam me ikjêjê pê mehcahkrit atajê, por ca Antijoc jô krĩ kam me amji to me ajpa atajê me, Xiri jô pjê me, Quiriti jô pjê kam me apa atajê.

24 He me pahkwỳa kwỳ ri amjia kôt me awỳr me pra, ne ihtỳj ihhêj ne harkwa to ame acahpêrkàr to me ipa, ne cute me Mojxe xwỳ te me hapackre xà na me amên na, ihtỳj imã me hahkre pej.

Ne nee wa ite me cumã mencaca xà ita ton na ijũjahkre nare, mã amjia kôt cute mencaca xà ita ton.

25 Na wa ite me cuprôn, ne me ajpên par, mã me icunea mã ahna ihkaj na.

Na wa ite me awỳr me jũm kujahêc prãmte me pahkwỳa kam me jũmjê itajê capi, ne wa ha ma me awỳr mehkujate, me ikjêjê pê Parnap me Pawrô me.

Ne Pawrô me Parnap ita pê me ikwỳ impeaj.

26 Ne Pahpãm jàpên xàa kam mehkên me, mehtyc xà jipôac ri me ipa.

27 Na wa ha me awỳr Juta me Xira kujate, quê ha taa me amã, pom wa ampo na ite me amã ihhôc itajê kôt harên pa.

28 Ne ite Pahpãm Carõ Pejti me, me ajpên par.

Na wa ha nee me amã me ijarkwa hyr catihti nare.

Ne nee wa ha Mojxe xwỳ te me hapackre xà cunea na me amên nare.

Wa ha me amã me icaca xà kênre ata na prãm, ca ha me ton to me apa.

Ne ampo cawpa xà te cwat itajê to pit mã wa ha me amã icakôc.

Na ca ha me hane he.

29 Ca ha nee ame pahpãm cahàc krekà jô atajê kur nare, ne nee ame ampo jôkre kam caxwỳr, mã caprô pijaxwỳr nare atajê jĩ kur nare, ne nee ame ampo caprô kur nare.

Ne me aprôa me, me apjêa me, ca ha ame amji pupu, ne nee amji pê ame aprô caxun nare.

Ne Juta catêjê mã ampo cawpa xà itajê amji jirôa pê ihkêanre, ne ampeaj kam hũ na me pahpahàm cati.

Na ca ha ate me akên itajê ton nare na, ca ha me apej mã me apỳm. Hamre, ita pit” hane.

³⁰ Ne ma cute mehkwy to mehhimpej catêjê pê Juta me Xira ata kujahêc, mã ma me pra, Pawrô me Parnap kôt, Antijoc jô krí wÿr, ne curi me cator. Ne cute me Jeju na mehkwy to cuprôn, ne me cumã ihkàhhôc jôr.

³¹ Mã cute me cahyt, ne mempar, ne ame hakry, ne nee amehpec nare. Ampo na? Ihkàhhôc ita kam me harkwa pejti na ri. ³² Ne Juta me Xira pê ri Pahpãm jarkwa to mehcahôc catêjê, ne cute mehkjêjê pê Jeju na mehkwy mã hũcanãr jôr prãm to, cute me cumã mehcahôc to irya to iry. ³³⁻³⁴ Jirô pê mã ri jũ mã cute me cahê na amji to me amcro ton. Mã Antijoc jô krí kam Jeju na mehkwy mehkri atajê me cumã:

— Ýhÿ, tahnaa ri impej. Ne gapacta ne hacpÿ mã me pra, hamre, ita pit — hane. Mã curia Xira mã me cahê na amji kíñ mã hàhhuc, mã Juta pyxit peaj ne cute amji jaxàr ne ma hacpÿ mã tẽ.

³⁵ Mã Pawrô me Parnap te me cahê na, jũ mã amji to amcro ton, Antijoc jô krí kam. Ne ihtÿj ajwar Jeju na mehkwy mea mã, amehcunea mã Jeju jarkwa to hahkre ne ame cumã harẽ.

³⁶ Mã amcro nõ na Pawrô te Parnap mã:

— Hacu, ne krí cunea kôt, me pahkjêjê pê Jeju na mehkwy pupu, por ramã pahte me cumã pajô Pahhiti jarkwa to me pahcahôc atajê kôt, mormõ ajkí mehcunea impeaj — hajÿr.

³⁷ Mã Parnap ihtÿj amji kôt Jowãw Macô to mör prãm. ³⁸ Mã ma Pawrô apu mehkôt mör na ihcaca. Ampo na? Pê nee Panpir jô pjê kam Macô mehkôt mör kam to incrà, ne cute kam Jeju jarên xà na mehtehcajpar nare na ri. ³⁹ Na pê Pawrô me Parnap incwÿrjapê ame ajpên mã, ne ma me ajcapô. Mã Parnap te Jowãw Macô japrôr ne to mör, ne pàr kre mã me hàr, cô jipôc ri pjê japry te Xipre ata wÿr. ⁴⁰ Jirô pê mã ri Pawrô te hanea ne amji mã Xira ita capi, mã Jeju na mehkwy te Pahpãm mã Pawrô me Xira cajrên mã ma me mör.

⁴¹ Ne ma cute me Xiri jô pjê jakren, ne me Quiriti jô pjê jakren, ne ma Jeju na mehkwy mã me hakry me, me carôt ton to me mör.

Pê Timot Pawrô me Xira pynã

Pirip 2.19-22; 1 Timot 1.1-2, 5

16 Mã Pawrô me Xira Terpe jô krí me, Ritij jô krí mã me cator. Mã Ritij jô krí kam Jeju na mehkwy nõ japry te Timot ita ihkrí. Ne cupê Juta catêjê cahãj nõ kra, ne hũm pê ri Crec jô pjê catêjê nõ, ne cupê mehcahkrit, ne nee cupê Juta catêjê nõ nare. ² Pê Ritij jô krí me, Ampokrekà jô krí kam me cupê Jeju na mehkwy amehkrí atajê cunea pê ajco Timot to mehcahôc to impejti. ³ Mã Pawrô te mempar ne ma amji kôt to mör prãm. Mã krí ata kam Juta catêjê mehkri atajê cunea te ramã meTimot me hũm pê Crec catêjê nõ na me hahkre pej. Pê nee cumã impy kà kwÿ hyr nare na me Timot kôt me harên to kãanre cupate, Pawrô te Juta catêjê caca xà kôt, cupê impy kà kwÿ hyr, ne ma haprôr ne to mör. ⁴ Mã krí atajê cunea kôt me hapôj to mör, ne Jeju na mehkwy mã me hũjarên to me mör, por pê harkwa na memprar catêjê me, mehkwy to mehhimpej catêjê Krípinkrên kam me ajpên pa, ne ah-

na mehhôc ne ahna me hapackre ata na, mãr quê me kampa, ne me hane. ⁵ Ita na pê Jeju na mehkwy ajco me Jeju te amji kam hapac xà kampa ne mehtÿj, ne ame hakry. Ne ajco amcro cunea kam me ipicamên to me ipa.

Trôwat jô krí kam Pawrô pimtir xà

Roman 15.18-21

⁶ Ne cute me Amcràti jô pjê me, Carati jô pjê jakren, ne ma Axij jô pjê wÿr mehtêm prãm, mã ma Pahpãm Carô Pejti ame huwahi, quê nee Axij jô pjê kam me Pahpãm jarkwa jarên nare. ⁷ Ramã Píhpoti jô pjê na me hàhtêp, ne ma Pitin jô pjê wÿr me mör prãm, mã ma Pahpãm Carô Pejti ame huwahi, quê hanea ne nee hÿrmã me mör nare. ⁸ Mã cute me Píhpoti jô pjê jakren, ne ma cô cahê na Trôwat jô krí xa ata wÿr me cator. ⁹ Mã caxwa ata kam, Pawrô te ipimtir kam, Maxeton jô pjê jô xũmre nõ pupun, mã xa ne ahna hàhwÿr to:

— Ajpên Maxeton jô pjê wÿr mör, ne me itehcajpa — hane. ¹⁰ Hõhõ, cute hũtir xà ata kôt Pahpãm te me ahna hàhwÿr na cute me hahkre pej pyrentu, na ri ma Maxeton jô pjê wÿr me mör pyrentu to prãm. Ýhÿ, ipê Ruc wa ita ri Trôwat jô krí kam ite Pawrô me ajpên cajpar, ne ma me icunea me imör xà ita na me mör, ite me Maxeton jô pjê kam mehkri catêjê mã Jeju pê me pahkritxwÿ jarên xà impejti itajê jarên prãmte.

Pirip jô krí kam Ritij pintuw xà

Pirip 1.1

¹¹ Ne ma Trôwat jô krí pín pàr kre mã me ixàr, ne ma me icatãatre na cô jipôc ri ahkrã jacot crã japry te Traxij jô pjê ata mã me icator. Ne amcro nõ na wa maKríhtuw mã me icator. ¹² Ne ma Pirip jô krí wÿr me mör, por mam ihkrãa ri xa ata wÿr, Maxeton jô pjê kam, ne Pirip jô krí ata pê ri Roman catêjê jô krí. Ne curia ite amji to me amcro kwÿ kujahêc.

¹³ Ne mehkôt xà jô amcro na, wa ma krí pê me icator ne cô wÿr me cupê Juta catêjê te cuprôn xà japên to me mör. Ne curi me icator, ne me ijÿr, ne ite me pyjê te cuprôn atajê mã me icakôc kam me itêm. ¹⁴ Mã pyjê nõ pyxit te me ipar ata japry te Ritij. Ne pê cupê Tijat jô krí catêjê nõ, ne cupê cupêhkã impejti to ihpore na hàhpan catê. Ne ampeaj kam cumã Pahpãm kíñ, mã Pahpãm te Pawrô jũjarên xà ata par na itehcajpar. Mã cute impar, mã hũrkwa kam mehkri atajê cunea te amji to me Jeju na mehkwy. Cwÿrjapê ri Pawrô te cô kam mehcumrãr. ¹⁵ Jirô pê mã ri Ritij te hũrkwa wÿr me ijator, ne me imã:

— Mër hõhõ, ca ate amji mã me ito, ipê Pahpãm par catê na me ito hajÿr, cwÿrjapê ca ha ajpên me mör, ne ijũrkwa kam me ahtwÿ — hajÿr. Ne kypê me ijator nare. Cwÿrjapê wa hũrkwa kam me ijãhhuc.

Pê Pirip jô krí kam me hacjên xà kam me nõ

¹⁶ Pê krí ata kam jũm cahãj ita ihkrí. Ne cahãj ita jĩ cunea kam me pahcurê xwÿn carô kên hipu tu. Pê am-

po carō kên ajco cumā ampo te cormā jū mǎn xà nare atajê jarê. Pê cahãjre ata ajco ihpore na me cumā to awjarê. Ne nee amji kôt apu ipa nare. Ne cute to hõ tekjê atajê mã apê, pê hàpên xà atajê jahpan xà na, me hũmre atajê ajco amji mã mehporc incwa. Ne amcro nõ na wa ma Pahpãm mã mehcaokc xà jũrkwa ata wýr me mō. ¹⁷ Mã cahãj ata te me ipynãr ne me ikôt caràr to mō. Ne cute caràr to hajýr he:

— Pom me hũmre itajê pê Pahpãm me hirõa pê cati ata mã me hàpên catêjê! Ne ihtýj me amã ate me akên catia pê me amji pytãr xà ata jarê — hane.

¹⁸ Ne cahãj cuprýhti ata te me ijarên to hajýr to amcro jãhtõ. Mã Pawrõ pê ita na ihkaj na. Mã cahãj cuprýhti ata wýr ipipkjêr ne cute kam ampo carõ kên ata mã:

— Hã, wa ha Jeju jarkwa kôt amã, ca cahãj ita pê aca-to — hajýr. Mã hamre, ampo carõ kên ita cupê cator pyrentu. Mã impej ne aracri hýr pyrentu.

¹⁹ Mã me to hõ tekjê catêjê te me cahãj ata pê me carõ kên cator na me hõmpun, ne nee hipêr iriat kam, cute ampo to hũjarên nare na me hahkre pej, na quê ha nee hipêr hũjarên xà kôt mehporc nõ pyr nare. Cwýrjapê ri ame Pawrõ me Xira kam mencryc. Ne cute mehpro, ne ma cà pê me to impej catêjê me, me cupê krí jõ pahhi catêjê wýr me cupjê. ²⁰ Ne me to mō, Roman catêjê pê mehcurij catêjê wýr, ne cute me cuna mã me hãm. Ne me cumã Pawrõ me Xira jarên, ne me cumã:

— Ýhý, me hũmre itajê pê Juta catêjê kwý, ne cama me pajõ kría kam ame pahcahpêrkàr to me ipa. Ne ajtea mã me pamã mehcaokc xà to hahkre to me ipa, ne amji kôat me pahon to me ipa. ²¹ Ne me papê Roman catêjê, mã nee mencaca xà ita na prãm nare — hane.

²² Mã me hàhtõa te me kam ihtêm prãmte me cuprõn, mã krí ata kam, cute mehcurij catêjê te Pawrõ me Xira pê apu ihkà cokjêr, ne cute mehcahhyr na me mên. ²³ Mã pĩhê to amehcahhyr to amehcahhy, mã mehjàj xà cati. Jirõ pê mã ri cute me hacjên xà mã me haxàr, ne cormã me ahna me hamãr catê mã harkwa hyr, quê me hamãr to impeaj ne. ²⁴ Mã me hamãr catê te me hõ pahhi jarkwa kôt me hacjên xà caxwãm pê, pĩ cote na mehpar jacjên, ne ahna me to ipijapýn, ne me ahna wakýre te hihê xà to hihê, ne ma tẽ.

Pê Pawrõ me Xira mehjàj xà cakrõ ihtýj me Pahpãm mã cre

²⁵ Mã Pawrõ me Xira curia mehjàj xàa na, awcapãtkõ kam me nõ ne me Pahpãm mã mehcaokc, ne cute Pahpãm na increr xà to me cumã increr. Mã me hacjên xà kam me hikwa atajê ahna mehkrí ne ame kampa. ²⁶ Mã ihprõt pê, pjê te hàhcujrõn kam ihtêm, mã me hacjên xà hanea ne ihtertet. Mã harkwa jihê xà ita cunea te apu amji jihê rên. Ne hanea ne wakýre te ame huwapre atajê cunea apu impãt, ne me cupê ipijaxwýr. ²⁷ Mã me hacjên xà jamãr catê pimprar, ne cute harkwa jihê mên na hõmpun. Ne ihtýj ame hacjên catêjê cunea japõj na amehcãmjĩ. Ne cute hõ pahhi cu-

pate amji caxuw hõ wapo xwahhihti caxàr, cute to amji curan prãmte. ²⁸ Mã Pawrõ te kýj cati pëa mã cumã caràr to:

— Apu amji to hajýr nare! Wa nee me ijapõj nare! Ne ita ri cormã ame icunea me ikrí! — hajýr.

²⁹ Mã me hacjên xà jamãr catê te hàhcujro xà na hàhwýr ne hũjarêan kam hàr, ne apu ihtertet ne Pawrõ me Xira cuna mã ihkõn krã na hýr. ³⁰ Jirõ pê mã, ma põ mã me to mō, ne cute mehcurij to:

— Pýhàpà, jũ mã wa ha, ne ajte ikên catia ita jahpa? — hajýr.

³¹ Mã me cumã:

— Ca ha Jeju pê Pahhiti ata to amji mã me ahimpej, quê ha me akra mea mã me akên ita pê me apytà — hane.

³² Ne cute me cumã Pahpãm jarkwa jarên, ne hanea ne, por me hacjên xà jamãr catê jũrkwa kam mehkrí atajê mã, cute me Pahpãm jarkwa jarên. ³³ Mã caxwa ata kam me hacjên xà jamãr catê me to mō, ne cute me cumã mehcahhyr xà xwa kre cuhhõn, ne me cumã ihcahê. Mã Pawrõ me Xira te mehkra mea mã cõ kam mehcuriãr, cute Jeju na mehkwý mã me hàr na me amji jarên prãmte. Hamre, mã me hacjên xà jamãr catê ata me, mehkra cunea te amji to me Jeju na mehkwý, na ri cõ kam cute mehcuriãr pyrentu. ³⁴ Ne ma cute Pawrõ me Xira japrõr ne me to mō, hũrkwa wýr. Ne cute me cumã hõ jõr, ne mehkra mea mã ampeaj kam me hakry. Ampo na? Ita caxuw ihtýj Jeju to amji mã mehhimpej na ri.

³⁵ Mã apê, mã Roman catêjê pê mehcurij catêjê atajê te me hýrmã me cumã me hàpên catêjê kujahêc, ne me cumã harkwa to:

— Me hũmre atajê mã me hikra — hajýr. ³⁶ Mã me hacjên xà jamãr catê te Pawrõ mã hũjarên ne cumã:

— Roman catêjê te me amã hikran na me hũjahkre. Cwýrjapê ca ha me acato ne gapacta ne me mō — hajýr.

³⁷ Mã Pawrõ pahhi kwý mã me hàpên catêjê atajê mã:

— Wa nee ite me ampo kên ton nare, ne hanea ne, me ipê Roman catêjê cakrõ, mã ahnaa ajte me kam mare mã ame icahhy, ne me hacjên xà kam cute me ito hũcapêr, nõ na mã ajte ita caxuw aracri me apimxuar pê me ikujahêc prãm? Ita na ihkaj na. Quê ha xaa mehcurij catêjê atajêa ajpên me mō, ne me taa me ikujate, wa ha cormã ma me mō — hane.

³⁸ Mã pahhi mã hàpên catêjê atajê te mehcurij catêjê mã ita jarên. Mã cute Pawrõ me Xira pê Roman catêjê na me harên par, ne me hahkre pej, cwýrjapê ri ampeaj kam me cumã me hũpa. Ampo na? He Roman catêjê te amji kam hapac xà na, quê nee me jũm cukij nare kam, amehcahhyr nare. ³⁹ Mã ma me hýrmã me pra, ne cute mehkwýr, quê cute mehcahhyr xà ata to me amji japackre nare, ne nee me kam mencryc nare. Ne cute me hacjên xà pê ajwar me cator. Ne krí pê me cator xà na me ahna hàhwýr. ⁴⁰ Mã Pawrõ me Xira me hacjên xà pê me cator, ne ma Ritij jũrkwa wýr me mō.

Ne curia ri cute Jeju na mehkwy mã hakry carôt týjti ton, ne ma me mǒ.

Pê Texarôn jǒ krí kam ame ipa

1 Texarôn 1.1; 2.13-14; Ruc 23.1-2; Jowăw 19.12

17 Ne cute Krípuhnacô jǒ krí jakren, ne ma me mǒ, ne hanea ne cute me Apôr jǒ krí jakren, ne ma Texarôn jǒ krí kam, Juta catêjê te cuprôn xà jǔrkwa ata wýr me cator. ² Mã xap na, mehkôt xà jǒ amcro kam, ma Pawrô te, cute me amji pyrác xà ata na, cute me cuprôn xà wýr tǐ. Ne mehkôt xà jǒ amcro incrê atajê cunea kam, Pawrô cute me cuprôn xà wýr pra. Ne cute me ajpên mã me Pahpãm jarkwa jarên to hapjêa to hapjê. ³ Mã Pawrô te me cumã Jeju to hahkre, ne me cumã harên to:

— Ýhý, rý pèa mã pê Pahpãm me panquêtjê mã, por cu me jǔm jikaj ata, to awjahkre. Na quê ha jǔ caxuw Crixto ita cato, ne pahte me Pahpãm to kên atajê cunea to tojnǒ. Ne cute me pahtehcajpar xà caxuw quê ha ihtýj amji pupun xà kêanre to amji pupu, ne ihtýj ty, ne hacpýa mã ihtír. Hǒhǒ, mǎr wa ite me amã Jeju jarê ita pê ri quêt, por cu me jǔm jikaj ata — hajýr.

⁴ Mã mehkwy te ihtýj me Pawrô me Xira kam hapac, ne Jeju to amji mã mehhimpej, ne ahna mehkwy mã me hâr. Mã mehcahkrit pê Crec jǒ pjê catêjê atajê mã Pahpãm kín catêjê jãhtôa ne me cumã me hâr. Mã hanea ne krí kam pyjê jãmtâr cati atajê jãhtôa ne me cumã me hâr. Mã Jeju na mehkwy quêt ihtýj me ipi-camên to me mǒ.

⁵ Cwýrjapê ri me hũ na ame amji to prãm, na ri Juta catêjê ame pra, ne krí cape na cute mehkên catêjê me, cute me xuwaca catêjê jãhtôa ne me haprôr, por me cumã me hãpên prãm nare atajê mea mã. Mã jǔmjê itajê te krí kam ajpên caxuw me cumã mehkêanre ton xà caxuw me Pawrô me Xira pro. Ne me cuna mã me hãm jirô pê mã cute mehkên mã me mên prãnte cute mehpro. Me hãprêa kam Jaxăw jǔrkwa mã me hâr, ne ame Pawrô me Xira japê. ⁶ Ne nee cute me cumã cator nare, ne cute ma me Jaxăw me, Jeju na mehkwy kwý to me irô ne amehpro, ne ma krí jǒ pahhi catêjê wýr me to carâr to me mǒ, ne me cumã:

— Me hũmre itajê te krí cunea kôt ajpên me ampo kêanre catia ton. Ne hamre, ramã ita ri me cator! ⁷ Mã Jaxăw te me cumã hǔrkwa jahkre, mã kam me hãhhuc. Ne ma ame Xexa pê Roman catêjê jǒ pahhiti te amji kam hapac xà caca, ne ajtea mã me imã pahhi nõ japry te Jeju ita jarê — hane.

⁸ Mã me hãhtôa te me ita par, ne ame kam mencryac to amencryc, na ri nee jǔm te ihcakôc xà na amji par nare, ne ihtýj amehcakôc kêanre to me ipa. ⁹ Mã krí to mehhimpej catêjê te Jaxăw me, Jeju na mehkwy kwý jãmjôr na me ton, mã me hãmjôr jirô pê mã ri cormã cute me cumã hikran.

Pê Amcoti jǒ krí kam ame ipa

1 Texarôn 2.15-16

¹⁰ Mã caxwa pê mã, ma Jeju na mehkwy te me Pawrô me Xira kujahêc, Amcoti jǒ krí wýr. Mã curi me cator,

ne ma Juta catêjê te me cuprôn xà wýr me mǒ. ¹¹ Mã Amcoti jǒ krí kam mehkří catêjê atajê Texarôn jǒ krí catêjê jirôa pê ampeaj kam me cumã hũpar kôt hakop jahkre pej, ne me cumã ihkín, ne me cumã hũpar prãm. Mã amcro cunea kam Pawrô te me cumã ampo to hahkre xà ata jahkre pej pej to prãm to, cormã Pahpãm jarkwa kam kôt me hapê ne me cahyt. ¹² Mã me hũpar xà ata kôt me cupê Juta catêjê me, me cupê Crec jǒ pjê catêjê me, me cupê pyjê jãmtâr cati pê Crec catêjê atajê me, me hãhtôa ne cute Jeju to amji mã mehhimpej.

¹³ Mã Texarôn jǒ krí kam, Juta catêjê te Amcoti jǒ krí kam Pawrô te Pahpãm jarkwa to ihcakôc na me harên par, ne ma mehkôt me pra, cute me irêc, mã cute mehkên ton prãnte. ¹⁴ Mã Jeju na mehkwy te me Pawrô kujahêc pyrentu, cõxwa tohkà wýr. Mã ma mehkwy te me Pawrô pynâr, ne me cumã Atên jǒ krí wýr pry jarên to mǒ, ne me to cator. Mã Xira me Timot cormã curia Amcoti jǒ krí kam me hãhhuc. ¹⁵ Mã Pawrô Atên jǒ krí kam cator, ne hãhhuc. Ne hacpýa mã cute me hũnâr catêjê atajê kujahêc, Amcoti jǒ krí wýr, ne me to ihhimpej, quê me Xira me Timot mã awjarê, quê hapu na ihkôt me mǒ, Atên jǒ krí wýr, ne me cuprô.

Pê Atên jǒ krí kam Pawrô mǒ

Roman 1.18-20

¹⁶ Mã Pawrô Atên jǒ krí kam apu mǒ, ne ame hikaj to mǒ. Ne cute kên te pahpãm cahàc krekà jãhtôa ne hõmpun, krí ata kam. Ne cupê ahna ihkaj na, na ri ih-peacre. ¹⁷ Cwýrjapê ri Pawrô, Juta catêjê te me cuprôn xà kam, cute ajpên mã mehcakôc, ne hanea ne mehcahkrit mã Pahpãm kín atajê mã ihcakôc. Ne hõtpê amcro cunea kam cà pê mehkří atajê me, me ajpên mã me awjarê. ¹⁸ Mã me cumã ihkãhhôc to hahkre catêjê pê Epicurij catêjê kwý me, Xicô catêjê kwý me, hanea ne cute Pawrô me, me ajpên mã me hũjarên. Ne mehkwy me, me ajpên cukij to:

— Ampo mã Pawrô pê ihcakôc catê te amji jahkre kêatre ata ame pamã harên prãm? — hane. Mã mehkwy me ajpên mã:

— Pýpýn, he ihhêj ne ajtea mã apu pahpãm jǔjê itajê to me pamã ihcakôc — hane. Mã Pawrô te hacpýa mã mehtyc tír na me cumã harên, cwýrjapê ri ajpên mã me harên to hane. ¹⁹ Ne ma cute me cuprôn xà japry te Caxêti jǒ awjarô ata wýr, cute me Pawrô japrôr ne me to mǒ, ne me cumã:

²⁰ — Wa itýj me, por ca ate ajtea mã ampo tuw jarên pihhoti ata jarên atajê kam me ijapac to prãm, ne ampeaj kam me imã impar prãm. Wa rý jǔ caxuw ite me ampo ita jarên par to hajýr nare, na wa me hahkre pej to prãm — hajýr.

²¹ Pê Atên jǒ krí kam mehkří catêjê me, pǒ rǔm mehcahkrit ajpên me acjêj ne mehkří atajê mã, ajco me xwahna tuw atajê impar to prãm, pê mehkří ne me kampa.

22 Mă Pawrô me cuna mă hăm, ne xa, Caxêti jô awjarô kam, ne cute me cumă to hahkre kam ihtêm, ne me cumă:

— Ýhÿ, me apê Atên jô krí catêjê, me ikampa! He ihhêj ne ca atÿj ame pahpãm cahàc to amji mã me ahimpej to me apa. Ca ihhêj ne kên to ate me pahpãm cahàc krekà ton itajê to, ihhêj ne ampeaj kam amji mã me ahimpej. 23 Ne wa ita ri me gô krí kam apu ipa, ne ite, me ate kên te pahpãm cahàc krekà mã me ikre pyxwÿr, ne kam me hÿxwÿr, ne kam me to amji kam gapac na, ite me hàhtôa ne me gômpon. Ne hanea ne ite ikre pyxit kam pahpãm cahàc pyxwÿr xà nõ capry ata pupun. Mă jÿm te kam ihhòc to hajÿr he: "Ita pahpãm cahàc krekà pyxwÿr xà, ne nee cu rÿ me pahnô te Pahpãm ita jahkre pej nare" hajÿr. Ne cormă me apê jÿm pê Pahpãm ata jahkre kêatre na wa ha me amă harê, ca me ikampa.

24 — Ýhÿ, he Pahpãm ita pê me pajô Pahpãm peaj ata, ca rÿ nee ate me hòmpon nare. Ne cupê me Pah-ton catê. Ne taa mã pê pjê to, ne pjê kam ampo cunea to. Ne cupê pjê ita kam me hirôa pê Pahhiti cati, ne hanea ne còjkwa kam cupê Pahhiti cati. Ne nee, por jÿm te cumă ikre ton ata kam ihkrí nare. 25 Ne nee jÿm te cumă ampo ton ata na cumă prăm nare. Ampo na? He taa mã ri me pamă me pancaca xà gô, ne me pamă me pahte amji kam me pajapac xà gô, ne me pamă ampo cunea impejti gô. Ne jÿ wÿr cu me pahnô cumă ampo to ne cugô.

26-27 — Ýhÿ, pê mam me panquêtti pyxit ne to, ne me panquêtti kôt pê me pah-ton to mō. Ne pê pjê ita kam me pahcunea to, cupê me, kríxàre me, me pa me. Ne pê me pahpÿpÿm xà xwÿjrea na, pê ramă mam me pajô amcro me pahte amji to me papijapar xà to amji kampa, ne kam me pahkrí xà caxuw me pamă pjê to. Ampo na? Cu pahte me to amji japackre, ne ahna me pajàhcukjêr, ne xwÿ mã jÿ caxuw amcro nõ na ahna me pahcator to prámte. He nee Pahpãm me papê ampÿare mã ipa nare, ihtÿj pjê cunea kam me pahcahê na ipa. 28 Na pê jÿm ata ramă harên to hane he: "Pahpãm cãmtà rÿm cu pahtÿj ame papa, ne amji to me ajpa, ne pahtÿj me amji kampa" hane. Ýhÿ, hanea ne me anô pê Atên catêjê nõa te ihkàhhòc kam ihhòc to hajÿr he: "Pahte me hajÿar ne me papê Pahpãm kra" hane.

29 — Hewhÿ, me pahcunea pê Pahpãm kra. Na cu nee pahte amji kam me pajapac xàa kôt, Pahpãm to ame amji mã ampo to pahpãm nare. Ne nee cu kên to ame pahpãm cahàc krekà ton nare. Ne nee wakÿre prà jakare me, wakÿre prà tepti ata to ame pahpãm cahàc krekà ton nare. Ne nee cu amjia mã ame ton nare.

30 Pê rÿ pêa mã mam pjê cunea kam, mehcunea ramă me ton to me amji pyrác tu, na pê ajco me toan to me to. Pê nee Pahpãm to me amji japackre, ne me hahkre pej nare, cwÿrjapê pê nee Pahpãm cute me ampo to hajÿr xà ata jahpan xà na ame to kên nare. Ne hamre, ita caxuw Pahpãm te pjê cunea kam ampo itajê intête me pahcunea măn, cu nee hipêr ame ampo itajê nõ ton to me hajÿr nare. 31 Ýhÿ, he ramă cute me pahcukij ne me pahto ipicokjêr xà jô amcro hyr, quê ha amcro

ata na me pahpupu, ne me pahcukij, ne ajpên pê mempej me, mehkên to ajcokjê. Ne Pahpãm te ramă me pahcukij catê na Jeju xãm, cute cumă ampeaj kam me pajarên to impejti prámte. Ne mehcunea te Jeju pê me pahcukij catê na hahkre pej prámte ri ihtyc jirô pê mã, hacpÿa mã cute to ihtÿr — hajÿr.

32 Mă Pawrô te ihtyc jirô pê hacpÿa mã ihtÿr na me cumă harên, mã cute mempar, ne nee cute amji mã me to hajÿr nare. Cwÿrjapê ri mehkwy ame cumă, ne ame hÿn, mã mehkwy me cumă:

— Wa amcro nõ na gÿjarên xà ita na hipêr me apar prãm — hane.

33 Mă Pawrô ma mō. 34 Mă me hÿmre kwÿ te me kam hapac kênre nare, ne cute Jeju na mehkwy na me amji ton, ne ahna me cuprôn. Ne me kam hÿmre japry te Tijoniti pê Caxêti jô awjarô kam prohti ata me, cahãj ata pê hapry Tamar ata me, mehkwy jÿjê atajê te ahna me cuprôn.

Pê Pawrô Corinti jô krí kam apu mō

Roman 16.3-4

18 Jirô pê mã ri, ma Pawrô mō, Atên jô krí pÿn, Corinti jô krí wÿr. 2 Ne curia pê Juta catêjê nõ japry te Aquira ata cajpa. Ne pê cupê Ponto jô pjê catêjê kwÿ nõ. Ne curmă Prytikra jô pjê pÿn hÿxi japry te Prixirakwÿj ata me, me cato. Ne ampo na pê ajpên me mō? Pê pjê jô pahhi japry Crawti ata ma Roman jô krí pê, ajpên Juta catêjê kujate. 3 Cwÿrjapê pê Pawrô ma me hòmpon prámte me hÿrmă mō, ne me cahê na hàhhuc ne ame apê. Ampo na? Hàpên xà me Pawrô jàpên xà pipëan na pê, ne cupêhkà tÿjti ata to ame ikre to. Ne me hàpên xà ata to ri hōtpê amehpore incwa. 4 Ne mehkôt xà jô amcro cunea kam, cute me cuprôn xà kam, Juta catêjê me, Crec jô pjê catêjê mã ihcakôc, cute me kam hapac ne amji to me Jeju na mehkwy prámte.

5 Jirô pê mã ri Xira me Timot cator, Maxeton jô pjê pÿn, mã Pawrô te cupêhkàhti to hàpên jicu, ne ma Juta catêjê mã Pahpãm jarkwa jarên to mō, pê ajco hãn ne me cumă:

— Jeju pê Crixô to, pê quêt Pahpãm me pamă awjahkre — hane. 6 Mă Pawrô cuna mã mehcunea amehcakôc ne ame hÿn. Cwÿrjapê ri cute me cumă hikran prámte ihkà caxàr, ne me kam mare mã intête pjê jacrô capÿr. Ne me cumă:

— Hamre, wa ha nee hipêr me ato ihmpej nare, ca ha caa jÿ mã me, ne me akên mã me axà. Ne Pahpãm pê me gÿjawry to me apa xà ata kam, wa ha nee me acahê na ixàr nare. Ne nee quê ha Pahpãm ita na amji mã icuhtom nare, quê ha amji mã me anôa cuhtom. Ita caxuw wa ha nee hipêr me gamãr nare. Ne ita caxuw mehcakrit itajê wÿr wa ha tẽ, ne me cumă Pahpãm jarkwa pejti itajê jarê — hane.

7 Hô, cute me hajÿr. Cwÿrjapê ri cute me hÿcu, ne ma mō, ne Crec catêjê jô xÿmre nõ japry te Tico Catytkam ata nee cupê Juta catêjê nare, ne hōtpê cumă Pahpãm kÿn ata cahê na ihkrí. Ne pê Tico jÿrkwa ata Juta catêjê te cuprôn xà cahi na xa. 8 Mă Cripô pê me cuprôn xà jô

pahhi, ne cute Pahpām par, mā mehkra cunea te hanea ne mempar, ne Jeju to amji mā mehhimpej, ne mehkwy mā me hār. Mā me hàhtōa ne cute Corinti jō krī kam me Pahpām jarkwa par, ne cute amji to me Jeju na mehkwy, mā cute cō kam mehcumrār.

⁹ Mā caxwa nō mā Pawrō te irīat kam Pahpām pupun, mā cumā:

— Apu acakōc xà ita na, nee amji mā pa nare, ne nee ca acakōc to hīcu nare. ¹⁰ Ampo na? Wa ita ri acahē na apu mō ita kam, jū wūr quē jūm ato kēn. Ampeaj kam krī ita kam imā me hàhtō, quē ha cormā me ipynā ne me ikampa — hajūr.

¹¹ Na ri Pawrō te curi me cumā Pahpām jarkwa to hahkrea to caku pyxit, ne ihkōt to ihnō cahti na hajūr.

¹² Mā Crec jō pjē ata kam, hūmre nō japyr te Caro te amji to Roman catêjê jō pahhi. Mā amcro atajêa nō kam, Juta catêjê te me amji to cuprōn, ne me Pawrō pro, ne ma mehcukij xà wūr me to mō. ¹³ Ne cute me pahhi pê Caro mā harēn to hajūr he:

— Ýhý, hūmre ita te, ite me hūnār prānte, ame imā hūjarēn to hajūr to mō. Ne cute ajteare mā Pahpām to amji kam me hapac xà ita to me imā hahkre ita na me ipē ihkaj na. Ne me icaca xà kaj na cute amji kam hapac xà ita — hane.

¹⁴ Mā Pawrō te amji pytār prānte ajmār pahhi Caro mā harēn, mā cute Juta catêjê mā:

— Me apē Juta catêjê me ikampa. Quē ha hūmre ita te ampeaj kam ampo to kēn na, wa ha itýj me akampa ne me atehcajpa. Ne hamreare, imā nee cute ampo kēn catia ton nare. Ne ihhê ne me acaca xà me, jūmjê japyr itajê me, ajpēn krac ri ate me acakōc xà pit mā ita. ¹⁵ Cwýrjapê wa ha nee me atehcajpar nare, ca ha me caa amji to ame ahimpej ne me amji to imej. Ne pa, wa ha nee ita caxuw amji to me acukij catê nare — hajūr.

¹⁶ Ne cute mehcunea cator, mā ma ame hapōj.

¹⁷ Mā cute ame hūmre japyr to Xoten pê Juta catêjê te cuprōn xà jō pahhi cahhyr, mehcukij catê kam mare mā. Mā nee Caro te Xoten ita to amji kam hapac nare.

Pê hipêr Antijoc jō krī wūr, me amji jaxà

¹⁸ Mā Pawrō te Jeju na mehkwy cahē na amji to caku pyxit ne ihkōt hīkjê, Corinti jō krī kam. Jirō pê mā ri, Prixirakwýj me, Aquira me, cute me pār kre pro, ne ma Xiri jō pjē wūr me pra. Ne Ampohy jō krī kam, cormā pār kre mā me hār nare kam, pê Pawrō Pahpām mā amji to, ne cute cumā amji to ipipē xà caxuw to ihkrā mē. ¹⁹ Mā Epet jō krī mā cator, mā cute Prixirakwýj me Aquira rer. Ne ma cute me cuprōn xà wūr hār, ne cute Juta catêjê me ajpēn mā me hūjarēn kam ihtēm. ²⁰ Mā cute me cahē na amji to amcro jàhtōa to prānte me hator. Mā ma Pawrō apu ahna ihcaca, ampo na, ma Krīpinkrēn wūr ihkrār na ri. ²¹ Ne mōr xà wūr cute me cumā:

— Quē ha Pahpām mā ite amji jaxār na ito prām na, wa ha itýj amji jaxà — hane. Ne ma Pawrō te pār kre kam amji kujahêc, Epet jō krī pīn. ²² Ne ma Xexa jō krī mā cator, ne ma Krīpinkrēn wūr mōr puro. Ne

Krīpinkrēn kam cute Jeju na mehkwy mā ihcakōc, ne me cumā amji jarēn, ne ma Antijoc jō krī wūr mō. ²³ Ne cute amji to amcro kwý jakren, jirō pê mā ri mō, ne cute Carati jō pjē jakren, ne Amcrāti jō pjē jakren, ne ihtýj Jeju na mehkwy cunea to ihtýj to mō.

Pê Apôr Epet jō krī me Corinti jō krī kam apu mō Epet 1.1-2

²⁴ Pê cormā Pawrō apu mōar kam, pê Juta catêjê nō japyr te Apôr pê Mehtehcajpar jō krī kam ihpým ata, ma Epet jō krī wūr tē ne cator. Ne pê ampeaj kam ihcakōc pej, ne ampeaj kam cumā Pahpām jarkwa jahkre pej. ²⁵ Ne hanea ne ampeaj kam cumā Pahpām te me cumā to hahkre xà ata jahkre pej, na ri me cumā Jeju jarēn xà cuhtacti jarē. Ne cumā amji kīan kam me cumā harē. Ne nee amjia kōt me cumā Pahpām jarēn to ipa nare, ne pê cumā Jowāw jūjarēn xà pit hahkre pej, pê toa ajco me cumā hūjarēn to ipa. Por pê Jowāw Jeju cator xwýjrea na cato, ne cō cacrō to hikaj xà mehcumrā ata, ne cukwa kam, pê me cumā Jowāw te amji kam hapac xà ata pyxit peaj ne hahkre pej, pê ajco me cumā harē. ²⁶ Ne cumā amji kīan kam, Juta catêjê te cuprōn xà kam me cumā harē. Mā Prixirakwýj me Aquira te Apôr jūjarēn xà ata par, ne me Apôr te Jowāw cukwa kam hūpar xà atajê pit jarēn na me hahkre pej pyrentu. Ne ahna me ajpēn par, ne me haprōr ne ikre kam me cumā Jeju jarēn to imejti partu.

²⁷ Mā Apôr te amji kam hapac ne ma Crec jō pjē wūr ihkrār. Mā Jeju na mehkwy te mehtehcajpar prānte, me cumā ihkàhhōc ton, Crec jō pjē kam Jeju na mehkwy mā. Ne cute kam me cumā Apôr pej na harēn, ne cute me ahna hàhwýr, mār quē ahna me amji caxār to imej ne. Mā ma curi cator ne cute, por ramā ame Jeju to amji mā mehhimpej atajê, tehcajpar catia to mō. ²⁸ Ne cute Pahpām jarkwa kōt Juta catêjê mā ihcakōc, ne Jeju pê ri quēt Pahpām kra, ne cupē Crixto, ne toa pê Pahpām me cumā awjahkre, ne mehcunea kam mare mā ame cumā harēn to mō. Ne cute hūjarēn xà ata kōt Juta catêjê hi kwīn.

Pê Pawrō Epet jō krī kam apu mō Ruc 3.15-16

19 Mā cormā Apôr Corinti jō krī me, Crec jō pjē kam apu mōar kam, mā ma Pawrō Epet jō krī wūr tē, ne cator. Ne curia cute Jeju na mehkwy kwý cajpar, ² ne mehcukij to:

— Ca ate me Jeju kam gapac ne mehkwy na ate me amji ton, cwýrjapê mōrmō ca ajkī ramā Pahpām Carō Pejti te me amā amji jōr? — hajūr. Mā me cumā:

— Wa nee ite me Pahpām Carō Pejti ita na hahkre pej nare, xānte ihtýj Carō — hane.

³ Mā me cumā:

— Ne mēr jūm te me acumrār xà mā kōt pê me acumrā? — hane. Mā me cumā:

— Jowāw te mehcumrār xà ata kōt pê me icumrā — hane.

⁴ Mā Pawrō me cumā:

— Pom Jowāw te me acumrār xà atajê pê, por mehkên mã me hikra atajê me, por cormã ame Jeju jikaj to ipa atajê. Pê Jowāw ajco Juta catêjê mã awjarê, mār quê hapu na ihkôt me jûm ata kampa. Ne jûm ata pê ri Jeju, ne hamre ita caxuw wa ha Jeju jarkwa kôt me acumrã — hane.

⁵ Mã cute me ita kam hapac jirô pê mã ri, Pawrô te Pahhiti pê Jeju jarkwa kôt, cô kam mehcumrār. ⁶ Ne cute mehcunea na hũhkra xir, ne me cumã Pahpãm na hàhwyr. Mã Pahpãm Carô Pejti te mehcunea mã amji jôr. Mã ajtea mã cute mehcakôc kam mehtêm, ne hanea ne cute me Pahpãm jarkwa jarên kam mehtêm. ⁷ Ne me hũmre te tõi atajê to pê hane.

⁸ Putwry încrê kam hãn ne Pawrô hõtpê ma Juta catêjê te cuprôn xà wyr ipa, ne nee amji na hàhtat nare, ne me hàhtôa mã ihtyj kam Pahpãm himpej xà mã mencjêj na ihcakôc, pê me kampa, ne ajco ajpên mã me harê. ⁹ Mã ma mehwý ahna me aprã, ne ma amji mã ame to hajyr caca. Ne cormã mehcunea kam mare mã, cute me Jeju te amji kam hapac xà na mehcakôc to kêanre. Mã cute me hajyr ita kam, Pawrô me cupê cator, ne ma amji kôt Jeju na mehwý to mō. Jirô pê cute ajpên mã me pajô Pahhiti Jeju pê me pahkritxwý na me harên na ipyr ne ame harê. Ne hũmre japyr te Tiran ita jô kàhhôc to hahkre xà jũrkwa kam, pê ajco ame cumã harê. ¹⁰ Ne cute me cumã to hahkre ita to caku to ipijakrut. Mã hõtpê Axij jô pjê ata kam mehcunea pê Juta catêjê me, mehcakrit atajê te Pahpãm jarkwa par.

Xewa kra xũmre

Me Hàpên Xà 5.12-16; 1 Texarôn 1.9-10

¹¹ Pê Pahpãm ajco Pawrô tehcajpar to catia to ipa, ne ajco cumã cute amji jahkre pej gō, mār quê carôt kôt hàpên xà catia pihhoti to. ¹² Na pê Pawrô cama ihcakôc ne ihcakôc xà ata to me hà catêjê caprã, ne me to impej. Ne hõ cupêhkà to, hàhpro xà pê hanea, ne ihtyj ajco me caprã. Na quê ha jûm xà ata cama ihtat, quê ha ramã impej pyrentu, ne kam ampo carô kên atajê, quê ha hanea ne jûm ihtat, quê ha ramã impej pyrentu.

¹³⁻¹⁴ Cwyrjapê ri Juta catêjê kwý te ita na me Pawrô pupun, ne ihtyj Pawrô cuxà me ton to ipa. Ne por me hũmre te xet atajê pê ri Pahpãm mã mehcajrên catêjê jô pahhi japyr te Xewa kra atajê, pê nee me cupê Jeju na mehwý nare cakrô, ihtyj Pawrô jĩkjê na Pahhiti pê Jeju japyr na mehwý pê me pahcurê xwýn carô kên japôj to me ipa to. Ne ihtyj Jeju japyr na me hapôj to prãm. Cwyrjapê ri ampo carô kên mã mehcakôc to me hane he:

— Por ahnaa Pawrô me cumã Jeju japyr jarê ata na, wa ha hanea ne amã, ca cupê acato — hane. ¹⁵ Mã hũmre kam me pahcurê xwýn carô ita te me cumã:

— Wa ramã ite Jeju pupun, ne Pawrô pupun. Ne jũmjê mã ca me? — hajyr.

¹⁶ Ne cutea mehcahhyr kam ihtêm. Ne mehcahhya to mehcahhy, ne cute ame haxôp, ne ame cupê mehkà cokjêr, mã ma ikre ata pê me cator.

¹⁷ Mã Epet jô krí kam mehcunea pê Juta catêjê me, mehcakrit mehkri atajê te me ita jarên par, ne me hahkre pej. Na ri me cumã Jeju japyr cupa xà kam mã rý hàhhuc. Ne mam me cumã hũpa ata jirôa pê me cumã Jeju japyr cupa. ¹⁸ Mã me hàhtôa te mempar atajê te amji to me Jeju na mekwý prãmte me hỹrmã me mō, ne cute ame ampo kên ton atajê na me cumã amji jarên, me hàhtôa kam mare mã. ¹⁹ Mã me hũxy xi catêjê jàhtôa te me cuprôn, ne Jeju na mekwý mã me hàr prãmte, cute me hõ kàhhôc kôt me hàhcaprãr xà atajê incwyr ne me to mō. Ne cute me kam mare mã, me hõ kàhhôc atajê to me caxàr par. Ne cute mehkàh-hôc te caxàr atajê jô pore cahyt, mã hõ pore catia to cati, ne ihhêj rûm cupê caku te xíc jàpên xà jãmcwyr xà jô pore. ²⁰ Hõ, Jeju jarên xà impejti itajê pê hane, ne ajco ajcamê ne ma ihcakûm to mō.

Pê Epet jô krí kam me ajpên par nare

Roman 1.13-15; 15.22-29

²¹ Ampo itajê cunea jirô pê mã ri Pawrô te amji jaxàr xà na amji kam hapac, ne cumã catyatre na Maxeton jô pjê me Crec jô pjê jakren to ihtêm prãm. Ne ma hanea ne Krĩpinkrên wyr ihtêm prãm, na ri cute me cumã amji jarên to:

— Ite Krĩpinkrên pupun jirô pê, wa ha ma Roman jô krí wyr imôr to prãm — hajyr.

²² Cwyrjapê ri cute mehtehcajpar catêjê pijakrut pê Timot me Eraxô kujahêc, Maxeton jô pjê wyr. Mã cormã Pawrô Axij jô pjê kam apu ipa.

²³ Mã amcro ata na Epet jô krí kam me hàhtôa ne cute mehkên xà ton, mã hõtpê quêt Jeju na mekwý picamên, cwyrjapê ri ame kam incryc. Ne Epet jô krí catêjê kam ihtyj me cumã pahpãm cahàc krekà japyr te Tijãnkwyj ata to amji kam me hapac to me ipa. Pê cumã me ikre to, ne kam me hũ xwý ne ajco kam me Tijãnkwyj ata to me amji kampa. ²⁴ Ne wakýre prà jakare to me hàpên catêjê atajê nõ japyr pê Temetti, pê ajco wakýre prà jakare to Tijãnkwyj jũrkwa carô krekà to. Ne pê hàpên xà ita kôt ajco ampeaj kam mehpora incwa, na pê cumã ihporea to ihpore. ²⁵ Mã cute ajkam me hàpên catêjê pê mekwý atajê na hàhwyr, ne cute me cumã:

— Me ijô ikwý nõ, he me pajàpên xà ita pĩn ri me pajô pore hapôj. ²⁶ Xà ca nee ate me Pawrô te ampo ton ata na me hõmpun ne mempar nare? He ihtyj Pawrô me cumã awjarê, ne me cumã: “Pom ampo to ame pahpãm cahàc krekà to itajê pê Pahpãm nare” hane. Mã me hàhtôa te me hũjarên xà ita par, na ri ihtyj amji kôt ita ri krí kam me hàhtôa ne me to hanea ne Axij jô pjê cunea kam apu amji kôt me to. ²⁷ Ne ita na me papê ihkêanre. Quê ha cute ahnaa apu mōr na, quê ha me pajàpên xà hamre. Quê ha nee jûm hipêr me papê me pajàpên xà itajê nõ japyr nare. Ne nee mã ita pit nare. Quê ha hanea ne mehcunea me pahpãm cahàc krekà pê Tijãnkwyj ata jũrkwa catihti ata jicu, ne me to hapac kêt, por mehcunea Axij jô pjê me, pjê cunea kam mehcunea ame to amji kam hapac to me ipa ata-

jê. Quê ha Jeju kînteTijãnkwyj ata to me hapac kêt, ne hürkwa to me hapac kêt, ne me hîcu — hane.

²⁸ Mã me hàhtôti atajê te me ita par, ne Jeju na mehkwy kam amencryac to mencryc. Ne cute me carâr kam mehtêm, ne me Tijãnkwyj jarên to:

— Epet jô krî kam Tijãnkwyj catia to cati — hane.

²⁹ Mã me carâar kam me hûjarên xà ita krî kam apu ihcahkûm tu. Mã me hàhtôa te me ita par, ne cute me Cajo me Aritarcô pê Maxeton jô pjê catêjê pijakrut ne Pawrô kôt ame mô atajê pro, ne ma me cupjê, cute me cuprôn xà cati wÿr. ³⁰ Mã Pawrô me hàhtôti atajê mã ihcakôc prãm, mã ma Jeju na mehkwy ame huwahi.

³¹ Mã hanea ne pjê ata kam Pawrô jô ikwy nõ kwÿ pê krî jô pahhi atajê kwÿ te me cumã harkwa kujahêc, quê nee cute me cuprôn xà wÿr môr nare, mã Pawrô jûpar.

³² Ne nee me hàhtôti atajê me cute me ajpên par nare. Ne mehkwy ampo kwÿ jarên to ame carâr, ne mehkwy hanea ne ampo kwÿ jarên to ame carâr. Na ri me hàhtôa pê me hahkre kêatre, mã nee cute ampo cwÿrjapê ame carâr to ame ipa ata na me hahkre pej nare. ³³ Mã Juta catêjê te me Arexãnre jator, cute me cumã ihcakôc prãmte. Ne cute me cuna mã me hãm. Mã mehkwy amji mã me Arexãnre te to ihcupan na me harê. Mã Arexãnre te hühkra to hàpêr, ne tee me cuna mã apu amji na hàprâr to hahkre. ³⁴ Mã cute me Arexãnre pê Juta catêjê nõ na me hahkre pej, ne mehcunea te me carâr kam ihtêm. Ne cute me carâar to me or to ipijakrut. Ne me carâr to hane he:

— Epet jô krî kam Tijãnkwyj catia to cati! — hane.

Pê krî jô pahhi catêjê nõ ame hàhtôa atajê cahkûm

³⁵ Mã krî mã hàhhôc catê te hõtpê hûjarên to mehhi kwîn, ne me cumã:

— Epet jô krî jô xûmre, me ikampa. Ne me acunea pê me pajô krî kam Tijãnkwyj jürkwa jamâr catê, ne pê kënti impejti côjkwa pîn ihpÿm, ca me hamã atajê me hahkre pej. ³⁶ He nee jûm te ajtea mã harên xà nõ to harên nare. Ne amji mã me aprîa ne, nee ca ampo kam me amji kam me gapac nare kam me ton nare. Xa ampo ita to me amji kampa, jirô pê mã ca ha cormã me to. ³⁷ Ampo caxuw mã ate me hûmre itajê japrôr? Xà ajkî cute me Tijãnkwyj jürkwa pê ampo to hàhkîj, nare, môrmô cute me pajô pahpãm cahàc krekà xûn na mã ate me haprôr? Hãpà, nee cute me ampo itajê nõ to jû mãn nare. ³⁸ Quê Temetti me, mehkwy mã, jûm na mehcakôc xà na mã, quê ha ma cute mehcukij catêjê wÿr me pra, ne me cumã me amcro nõ ta. He itajêa caxuw ri pahhi, ne cute mehcukij catêjê amehkrî. Na quê ha me taa me cumã jûm na mehcakôc. ³⁹ Ne hipêr ita jirô pê me ampo na prãm, ne xa cute me amã amcro hyr xà ata jikaj, quê ha kam ahtwÿ, ca ha mehcunea jipôc ri me cumã harê, quê ha me hahkre pej, ne jû na me amã to. Hõhõ, quêt pahte me amji kam me pajapac xà te hajÿr he. ⁴⁰ Ne me pahkêanre. Ampo na? Quê ihhêaj to jûm me pajô pahhiti mã pahte me hajÿr xà ita na me pajarê, quê ame pahkam incryc. Ne me pahcukij, jû mã cu me cumã amji jarên to? —

hajÿr. ⁴¹ Ne cute me cumã hûjarên jirô pê mã cute me cuprôn xà jicu ne ma amehcahkûm.

Pê Pawrô Maxeton jô pjê me Crec jô pjê kam apu mô

20 Ne mehkên jàhkrihkrit jamre jirô pê, Pawrô te Jeju na mehkwy na hàhwÿr, mã cute me cuprôn. Mã cute me cumã hûcanâr xà to ihtÿj, ne me cumã ihtêm xà na amji jarên. Ne ma Maxeton jô pjê wÿr mô. ² Ne curi cator ne apu ipa, ne cute Jeju na mehkwy jàhtôa mã hûcanâr xà to ihtÿj, ne cute me hapackre to irya to iry. ³ Jirô pê ma Crec jô pjê mã cator, ne curi cute amji to putwÿr to incrê. Ne ramã cute Xiri jô pjê wÿr môr xà caxuw apu amji mã hàhcuprôn, ne cute amji na me cupê Juta catêjê te me to amji kam hapac xà kêanre, ne ihtÿj amehcuran prãm na me hahkre pej. Mã cute amji kam hapac, mã nee hipêr Xiri jô pjê na cumã ihtêm prãm nare. Ne ita caxuw ri cumã Maxeton jô pjê pua na ihtêm to prãm. ⁴ Mã hõtpê jûmjê ihkôt me mô atajê japrÿ Xôpat, pê Piro kra, pê Amcoti jô krî kam ihpÿm me, Aritarcô me Xecun, pê Texarôn jô krî kam mehpÿm me, Cajo pê Terpe jô krî kam ihpÿm me, Timot me Tiquicô me Tropimo, pê Axij jô pjê kam amehpÿpÿm. Atajê cunea pê hõtpê Pawrô kôt ajco ame ipa. ⁵ Ne ma mam me pra, ne Trôwat jô krî kam me cator, ne curia ame hikaj to ame ipa. ⁶ Ne me Hakren xà jô amji kîn jirô pê mã, wa hanea ne ma me tẽ, Pirip jô krî pîn mehkôt. Ne curia ite amji to me amcro to xïc jirô pê mã, wa ite me amji cajpar, Trôwat jô krî kam, ne me icunea te curi amji to me amcro to xet.

Pê Trôwat jô krî kam Pawrô apu mô

Jowãw 5.21; Me Hàpên Xà 9.36-43

⁷ Ne xap na, mehkôt xà jô amcro kam, Jeju na mehkwy te caxwa ri me cuprôn, me hàpàn xà caxuw cute ame ajpên kîn to prãm to. Mã Pawrô iràràtia na ihtêm prãm, cwÿrjapê ri cute caxwa kat hãm me cumã hûjarên kam ihtêm. Mã ramã ahna awcapàtkô picapôn mã cormã me cumã awjarê. ⁸ Kÿj pê ikre caxwÿn nõ kam, cute me cuprôn xà ata kam, pê ampeaj kam ihpôc xà jàhtô ne mehcujro. ⁹ Mã hûmre japrÿ te Ewti ita kÿj pê, harkwa na pô mã me irît xà ata na jÿ ne kampa, ita kam hõt xwa mã hõt, ne ihpÿm, ikre kre crê ata pîn. Mã hÿrmã me iwÿyc ne cute me harî, mã ramã ihtyc tu. ¹⁰ Mã Pawrô wrÿc, ne cute hûmre ita pÿn, ne me cumã:

— Ame amji mã apikrar nare. Cormã ihtîar ne quê ha ihtÿj ipa — hajÿr.

¹¹ Jirô pê mã ri Pawrô jàpir, mã mehcunea jàpàn ne ame harte. Mã hacpÿ ma mã Pawrô te me cumã hûjarên kam ihtêm, ne me cumã hûjarêan to apê, ne ma tẽ. ¹² Mã hûmre ata hacpÿa mã ihtîr mã ma me to mô, hürkwa wÿr. Ne ampeaj kam hûrên me cumã amji kîn, ne me hakry.

Mehakepxà jô krî wÿr mehtêm xà

¹³ Ne pâr kreti kam Axô jô krî wÿr ite me imôr kam me icrà, ne por cõxwa cahê na krî xa ata kam me ica-

tor. Ne curia wa me Pawrô jikaj, quê ha pjê kam ajpên mō, ne cormã Axô jō krī mā cato. ¹⁴ Ne wa ite Axô jō krī kam me ajpên cajpar, ne ma pâr kre mā me ixâr ne me mō, ne Mehakepxà jō krī mā me icator. ¹⁵ Ne me Mehakepxà jō krī to me tojnō, ne ma me tē, ne apê nõa na wa cormã cô jipôc ri amcrà japyr te Quito ata jō pjê cahê na me mō. Ne amcro pyxit jirô pê mā, wa ramã Awjarôti jō pjê mā me icator, ne hipêr me ina amcro pyxit, wa ma ramã Krîtêpti mā me icator. ¹⁶ Mã Pawrô ma apu Epet jō krī kam hàhhuc caca, ne ma hanea ne apu Axij jō pjê kam amji to amcro jàhtô caca. Ampo na? Krîpinkrên mã cator prãmte hàpôr pit. Mâr quê xwý mã Me Hõ Kêhkên jō amji kîn jō amcro xwýjrea na cato.

Pê Pawrô Epet catêjê mã ihtêm tu xà na amji jarê

Jowãw 21.15-17; 1 Timot 4.6-8; 1 Petrô 5.1-4

¹⁷ Ne ma Krîtêpti kam me icator, mã Pawrô te Epet jō krī kam Jeju na mehkwy to mehhimpej catêjê mã ihhōc, ne ihkujahêc, mâr quê ajpên Krîtêpti wýr me mō, ne Pawrô mã mehcajôc to prãmte cute me hýrmã ihhōc ne ihkujahêc. ¹⁸ Mã me cator, mã Pawrô te me cumã amji jarên ne me cumã:

— Ýhý, pê wa mam ramã Axij jō pjê kam me awýr icator xà ata kam, pê ca ramã amji jipôc ri me ipupu, ne ramã ate me ite amji kam ijapac xà pupun pejtu. ¹⁹ Wa itýj me pajô Pahhiti pê Jeju mã apu ijâpên to ipa, amcro atajê kam, ne cormã cumã ijâpên to ipa. Ne nee hanea ne ajco amji to icati prãm nare, ne pê ma ajco ame Jeju caca na pê wa me hũ na apu amrã. Pê me ikwý pê Juta catêjê ame ito kêanre, pê wa amji cajpêr xà xàhti ata to ajco amji cajpê cakrô, pê wa itýj me cumã awcanã, ne nee pê wa me pajô Pahhiti pê Jeju jâpên xà mã hikran nare. ²⁰ Ne ajco me akôt ipa, ne me amã Jeju jarkwa to hahkre to ipa. Ne nee pê wa ame akam ipec xà nare. Pê wa itýj me amã awcanã ne ite me atehcajpar xà caxuw, pê wa amã Jeju jarkwa jarêan to harê, pahte me cuprôn xà me, me gûrkwa kam, pê wa me amã Jeju jarkwa to hahkre to ipa. ²¹ Ne ajco mehcunea pê Juta catêjê mã harên to ipa, ne hanea ne me apê mehcahkrit atajê mã harê. Ne pê wa mehcunea mã me huphê na awjahkre, mâr quê mehkên mã hikra, ne Pahpãm wýr me apkjê, ne me pajô Pahhiti pê Jeju to amji mã mehhimpej.

²² — Ne hamre, ita caxuw ri Pahpãm Carô Pejti te Krîpinkrên wýr ijator. Na wa ha ma curi mō. Ne ampeaj kam ri ipê curi ampo te ikên xà ata jahkre kêat to hahkre kêt, ampo mōrmō quê ha ajte curi jũ mã ito.

²³ Ne ihnō ata pyxit ri imã hahkre pej, quê ha me ipro, ne me hacjên xà kam me ijaxà, ne ame ito jamã, ata na ri Pahpãm Carô Pejti te ramã imã hũjarên, krī cunea kôt. ²⁴ Na wa nee ityc xà ita to amji japackre nare, quê ha me icuran prãm, ne taa me icura. Hõ, ijâpên xà impejti na cute imên xà ata wa quêt ite hipêj to amji kam pa. Ne me pajô Pahhiti pê Jeju te ijâpên xà na imên ata te hajýr he. Wa ha mehcunea mã Jeju pê me pahkritxwý na harên pejti jarê, mâr quê hacpýa mã

mehcunea Jeju kôt Pahpãm wýr me apkjê, ne cute me amji jaxâr xà ata na ri Pahpãm mã me ahna prãm.

²⁵ — Ne pê wa ajco me amã Pahpãm pê me pahcunea to ihhimpej catê cati na harê. Ne wa ha ma ita caxuw mō, ne ramã ite hipêr ate me ipupun nare na me gahkre pej. ²⁶ Cwýrjapê wa ampeaj kam me amã awjarê. Na ca ha me anō Jeju te amji kam hapac xà mã hikra ne hicu, quê ha Pahpãm nee ita na amji mã icuhtom nare, ne amji mã me anõa cuhtom. ²⁷ Ampo na? Pê wa ajco hōtpê amji na ijâhtât nare kam me amã Pahpãm te amji kam hapac xà jarê, cwýrjapê quê ha nee ita na amji mã icuhtom nare.

²⁸ — Ne me apê Jeju na mehkwy to mehhimpej catêjê, ca ha ita caxuw me amji jamâr peaj to me apa, ne nee jũ caxuw Jeju mã me hikran nare. Ne hanea ne Jeju na mehkwy jamâr peaj to me apa, ne caxuw ri Pahpãm Carô Pejti te me apyxwýr. Pê Pahpãm kra mehkwy tehcajpar prãmte ty, ne caprô cunea ajxwý, mã ahnaa cute me pahto amji kra. Cwýrjapê ca ha hamâr to impeaj ne. ²⁹ Ampo na? He, imãa quê ha ihtýj jũmjê itêm jakân pê ate me Jeju mã hikran prãmte me awýr cato, ne me amã ihhêj, ne imã me gahkre pej. Ne atajê pê quê ha ampo jâprê pyrãac, na quê ha nee me acaprî nare. Quê ha cute me acunea jipej prãmte ihtýj ame ato kêanre to mō. ³⁰ Quê ha me akwýa nõ hanea ne apu to ihcupan to mō. Ne me apê mehkwyã nõ mã apu ihhêj to mō, cute amji kôat me apê Jeju na mehkwy ton to prãmte. ³¹ Cwýrjapê ca ha me guphê, ne ma ita kôt me hakop. Hõ, ita cupate wa ite me akam amji to ipijapar to caku to incrê. Na wa icwýar kam, caxwa me amcro cunea kam ite me acunea mã Jeju jarkwa to hahkre.

³² — Ita caxuw, wa ha Pahpãm mã me apê mehkwy atajê cajrên, mâr quê me ato impeaj ne, me ate cute amji kam hapac xà pynâr pejti to prãm to. He Pahpãm ri me amã ampo pej cunea gõ, ne hanea ne me apicamên na me ato, ca me ajcamê. ³³ Na pê wa ita ri ame akam ipa, ne nee me gõ pore me, ampo pê me atekjê atajê na prãm nare. ³⁴ Ne ramã ate me ijahkre pej, pê wa ijũhkra to apê, ne ijũhkra to ijâpên xà ita to me ikwý caxuw amji mã ihpore incwýr na amji to, pê wa me amã pahte me cupê ampo jamreare atajê tehcajpar to hahkre. ³⁵ Ata to pê me pajô Pahhiti pê Jeju me pamã hahkre to hane. Na wa ma harkwa to me amji japackre, ata to pê ihcakôc to hane he: “Ýhý, quê jũm amã ampo gõ, ne ampeaj kam hũrên gakry, ne quêt jũm mã ate ampo jõr xà ata kôt ca ha hirôa pê ampeaj kam gakrya to gakry” — hajýr.

³⁶ Ne cute ihcakôc jicu, mã Jeju na mehkwy mehkôn krã na me hýr, ne Pahpãm mã mehcajôc. ³⁷ Mã mehkwy me Pawrô japy, ne ame cumã amji jarê, ne mehcunea ame amrã. ³⁸ Ne mehcunea mã amji kîn nare. Ampo na? Cute me Pawrô te jũ caxuw hipêr me hõmpun nare na me cumã amji jarên, mã cute mempar na ri. Ne ma me ikôt pâr kre wýr me mō. Wa ma Pawrô me ite me irer ne pâr kre mã me ixâr.

Pê Pawrô ma Krîpinkrên wÿr tē

21 Wa ite me cumã amji jarēn, ne ma pàr kre kam me tē, ne me icatyatre na harã mã, cõ jipõc ri pjê japrÿ te Cot kam me icator. Ne amcro nõ na, wa ma cõxwa tohkà na Pîrã jõ krî kam me ijàhhuc, ne ma hipêr me tē, ne ma Patara jõ krî mã me icator. 2 Ne curia wa ite me, pom wa pàr kre kam me mõ ata jicu, ne ite me pàr kre nõ cajpar, ne cumã me ixàr, ne ma Pàrkõ jõ krî wÿr me tē. 3 Ne ite me cõ jipõc ri Xipre jõ pjê ata pupun, ne ma harã mã me tē, Xiri jõ pjê wÿr. Ne curi me icator, Kēn jõ krî kam, ne curi cute me ampo to irõrõc jahkà na me irõrõc.

4 Ne hõtpê curi ite me Jeju na mehkwy kwÿ cajpar, krî ata kam, ne curia ite me cahê na amji to me amcro to xet. Mã Pahpãm Carõ Pejti te me cumã Pawrô jarēn, mã cute me cumã hÿjarēn, mãr quê nee Krîpinkrên wÿr mõr nare. 5 Mã curi cute ame ipa xà na, amji mã me amcro hyr xà ata me cupê hamre, mã ma pàr kre wÿr me pra. Mã ma cute me ipynãr, ne ikõt krî pê me cator, mehkra me, mehprõ mea mã. Wa me icunea me ikõn krã na me ijÿr, cõxwa tohkà na, ne Pahpãm mã me icakõc. 6 Jirõ pê mã wa ite me cumã amji jarēn, ne ma pàr kre mã me ixàr. Mã ma hacpÿ mã ikre wÿr cute me amji jaxàr ne me mõ.

7 Wa ma Kēn jõ krî pîn me tē, ne ma Potorma jõ krî mã me icator, ne apu Jeju na mehkwy mã me icakõc, ne curia ite me ahna amji to me amcro pyxit. 8 Ne amcro nõ na wa ma me tē, ne Xexa jõ krî wÿr me icator. Ne ma Pahpãm wÿr me to ipipkjêr catê japrÿ te Pirip jÿrkwa mã me ixàr, ne curia hÿrkwa kam cahê na me ijàhhuc. Ne cupê, por pê Krîpinkrên kam Jeju na mehkwy te xet pê me capi atajê nõ. 9 Ne ihkra cahãj te cwat ne cormã nee mempjê nare, ne hõtpê Pahpãm jarkwa to mehcahõc.

10 Na wa amcro jàhtõa kam cahê na me ijàhhuc, ne ame ipa. Mã hÿmre japrÿ te Agap ita Juta jõ pjê pîn cator. Ne cupê Pahpãm jarkwa to ihcahõc catê. 11 Ne ma mõ ne Pawrô cape na xa, ne cute cupê ihtu na hê xà pyr, ne cutea to amji jÿhkra me ihpar cajpre, ne Pawrô mã:

— Ýhÿ, Pahpãm Carõ Pejti jarkwa kõt wa ha amã awjarê. Quê ha ihtÿj Juta catêjê Krîpinkrên kam, atu na hê xà ita to ipa catê ata me guwapre to hanea he, ne ajkî mehcahcrit atajê jÿhkra mã me gaxà — hane.

12 Wa ite me Jeju na mehkwy me, ita kam ijapac, ne ma Krîpinkrên tēte ame Pawrô juwahi. 13 Mã Pawrô me imã:

— Ampo na mã ca ame acwÿr to hane, ne imã amji kîn nare ita na ame ijuwahi? He wa nee icajpre xà ita pit caxuw apu imõr nare. He wa hanea ne Krîpinkrên kam, Jeju cwÿrjapê ityc xàa caxuw apu mõ — hane.

14 Wa tee ame huwahi, ne ite me to tojnõ ne me cumã:

— Pahpãm te ampo to amji mã ato jÿ mãn prãm ata to, quê ha ihtÿj ato jÿ mã — hajÿr.

15 Ne ite me amji to amcro kwÿ kujahêc jirõ pê mã, wa ame ijàhcuprõn, ne ma Krîpinkrên wÿr me mõ.

16 Mã Jeju na mehkwy kwÿ Xexa jõ krî kam amehkrî atajê te me ijaprõr, ne ma Krîpinkrên wÿr me ito mõ, Mexõ jÿrkwa wÿr. Mã cute me ijaprõr, wa curia cahê na me ijàhhuc. Ne hÿmre ata pê cõ jipõc ri, Xipre jõ pjê ata kam ihpÿm. Ne rÿ pēa mã pê cupê Jeju na mehkwy. 17 Mã Krîpinkrên kam Jeju na mehkwy te me Pawrô pupun, ne ampeaj kam me hakry.

Pê Pawrô Tijac wÿr mõ ne hõmpu

18 Ne apē mã Pawrô ma me ikõt mõ, ne cute Tijac cajpar. Mã ramã Jeju na mehkwy to mehhimpej catêjê cunea te cuprõn, cute me cuprõn xà kam. 19 Mã Pawrô te ahpÿanre na, Pahpãm te ihcahõc xà kõt mehcahcrit pê Juta catêjê nare atajê mã ampo pejti ton na, me cumã amji jarēn par.

20-25 Mã cute mempar jirõ pê, mehcunea te amji mã me Pahpãm pejti na to me hàmnãn, ne me Pawrô mã:
— Ýhÿ, wa ite ramã me ihkàhhõc pyxit ne me hipêj, ne ma ramã ite mehkujahêc, mehcahcrit atajê wÿr. Mãr quê Jeju na mehkwy mã me axà, ne me ihkàhhõc ata cahyt, ne me awpa. Ne ihkàhhõc ata kam wa ite me cumã ijarkwa kujahêc, mãr quê nee ame pahpãm cahàc krekà carõ jõ hÿ atajê kur nare. Ne nee ame, por me hõkre kam caxwÿr nare atajê jÿ caprõ na mehkur nare, ame ampo caprõ atajê kur nare. Ne quê mehprõa me, mempjêa me, ame amji to inxy, ne nee quê ame ajpēn pê mehprõ caxun nare xà na, wa ite me cumã ihhõc ne me cumã ihkujahêc, ihkàhhõc ata kam. Ýhÿ, Pawrô, ita caxuw wa ha me amã me pahkjêjê kwÿ jarê. Ita ri Krîpinkrên kam, me cupê Juta catêjê jàhtõa ne cute amji to me Jeju na mehkwy. Atajê cunea ame Mojxe xwÿ te amji kam hapac xà to me amji kampa, ne ramã ate me hahkre pej ne me hõmpun. Ne xwahna, cute ihmat ri, mehkri atajê mã Juta catêjê te ampo te ihcupan xà to pit mã hahkre to apa na, me ato ihhêj xi na me harēn par. Ca xwahna me cumã to hahkre to hane he, quê hapacta ne me Mojxe xwÿ te amji kam hapac xà ata mã hikra, ne hanea ne xwahna me Juta catêjê te amji kam hapac xà atajê mã hikra, ne ma apu cute mehkra xÿmre mã impy kà kryjre ne hitep tēte me cumã. Mã ahna akam me cupê ihkaj na. Na quê ha ita ri acator na me gahkre pej, ne ihtÿj me amãn kam to ihtēm pyrentu. Ita na ri me ato prãm. Jÿ mã cu ha ajte me to? Cu ha pahte mehhej xi xà ita to me hamre prãm to, cu ha me to hane he. Ita ri me pajipõc ri, me pahkam me hÿmre te cwat atajê, pê Pahpãm mã ampo to awjahkre. Ne ihtÿj caxuw ame ipijacri to ipa. Ne ramã me cumã amcro te xet peaj ne nõ. Ne cute amji mã me amcro hyr ata jirõ pê, quê ha Mojxe xwÿ incaca xà kõt ame amji cÿmpej. Ne caa, ca ha atÿj hanea ne mehkõt mõ, quê hanea ne me hipõac ri me acÿmpej, ca ha caa cute me acÿmpej catêjê mã amji cunea jahpan xà na amgõ. Hamre, quê ha mehcunea me panquêtjê jarkwa kõt apa na me apupu. Na quê ha Axij jõ pjê pîn Juta catêjê kwÿ japõj atajê te ame ato ihhêj na, ihtÿj me cumã hahkre pej — hane. Hõ, Jeju na mehkwy to ihmimpej catêjê kwÿ te Pawrô mã me hÿjarēn to hajÿr. Mã cute mempar.

²⁶ Ne apê, mã ma cute me hũmre to cwat ne me to tẽ, mã hanea ne me ipijacri xà ita mã me hâr, ne cute Pahpãm mã me amji cuhhôn. Jirô pê mã ri ma Pahpãm to me amji kam hapac xà jũrkwa caxwãm pê me hâr. Cute amji mã me ipijacri xà jô amcro pupun prãmte. Ne cute Pahpãm mã mehcajrên catêjê pê mehçũmpej catêjê mã hàmjör xà na amcro hyr, ne me hũrkwa wýr me amji jaxàr.

Pê me Pawrô pro

Me Hápên Xà 24.12

²⁷ Mã ramã amcro hyr xà na hàhtêp. Mã Juta catêjê kwý Axij jô pjê rũm me cator, ne cute me Pawrô pupun, Pahpãm to me amji kam hapac xà jũrkwa kam. Ne cute mehçunea curi ame ipa atajê ręc, cute me Pawrô pro prãmte. ²⁸ Ne cute me caràr kam me to ihtẽm, ne me caràr to:

— Me ikwý! Ajpên me pra! He hũmre ita pjê cunea kam, me papê Juta catêjê te amji kam hapac xà kaj na me cumã ampo to hahkre to ipa! Na ca ha me itehcajpa! Ne hanea ne ame panquetti Mojxe te amji kam hapac xà na ihcakôc kêanre to ipa, ne apu Pahpãm to me amji kam hapac xà jũrkwa na ihcakôc kêanre to ipa. Jirô pê mã ri ma Pahpãm to me amji kam pajapac xà jũrkwa to cute amehkên prãmte, ma mehcahkrit atajê to mō. Ne jũ wýr quẽ mehcahkrit atajê ikre pejti ata mã me acjêj — hajýr.

²⁹ Ýhý, pê me ita jarẽn to me hane. Ampo na? Pê me Pawrô kwý nõ japyr te Tropimo, pê Epet jô krí kam ihpým, ne ihcahkrit, ne nee cupê Juta catêjê nõ nare, ne Krípinkrên kam Pawrô me apu mō. Pê me hõmpu, ne ihtýj cute Pahpãm to me amji kam hapac xà jũrkwa mã me to hâr na ame Pawrô cãmjĩ. ³⁰ Mã xwahna ata krí cunea kôt ipicràn, mã ajpên amehprõt, ne cute me Pawrô pro, ne ma pō mã Pahpãm to me amji kam hapac xà jũrkwa pê me cupjê. Mã Pahpãm to me amji kam hapac xà jũrkwa jamãr catêjê te cator jakàn pê, me to harkwa jihê pyrentu. ³¹ Mã ramã me hàhtôa te me Pawrô curan kam mehtẽm. Mã krí jamãr catêjê pê Roman catêjê jô krãhtare jô pahhi te krí cunea kam, cute me amji ręc na me harẽn par. ³² Ne cute krãhtare to cuprõn pyrentu, ne ma me hàhtôti atajê wýr mehprõt. Mã me hàhtôa te krãhtare atajê pupun, ne pea cute me Pawrô cahhyr jicu. ³³ Mã me hõ pahhi Pawrô wýr cator, ne cute hýrmã hàhtêp ne ihpro, ne wakýre pijakrut to me huwapre na harkwa hyr, mã cute me to ihcajpre. Jirô pê cute mehçukij, ne me cumã:

— Pýhàpà, jũm xũmre mã ajte? Ampo to ri cute ihkên? — hajýr.

³⁴ Mã mehçunea te me caràr kam mehtẽm, ne ajtea mã mehkwý jũjarẽn xà, ne ajtea mã mehkwý ame ampo na me harẽ. Mã me hõ pahhi te mempar, ne cupê cute ampo to kên xà ata na hahkre kêatre. Ne cute krãhtare mã harkwa hyr, quẽ me Pawrô jarĩ ne ma kẽn te ikre týjti ata wýr me to mō. ³⁵ Mã cute me harĩ ne ma me hàpir xà na me to hàpir to mō, ne me to hàhtêp, ne cute me harĩ ne me to kwý, cute me curẽ

catêjê cupate. ³⁶ Mã me hõ kôt me caràr to me mō, ne me cumã:

— Mehcura! Mehcura! — hane.

Pê Pawrô amji pytã

³⁷ Mã ma kẽn te ikre týjti ata kam cute me Pawrô xir. Mã Pawrô te Crec jarkwa to me hõ pahhi mã ihcakôc ne cumã:

— Xà wa itýj pahhi amã icakôc? — hajýr. Mã pahhi te amji mã ipikrar, ne cumã:

— Pýhàpà, xà ca ajte atýj Crec jarkwa to acakôc?

³⁸ Wa xwahna itýj amji mã ato apê Ejit catêjê nõ. Por pê pjê jô pahhi to apu ihkên prãm, ne me hàprê catêjê to cwat mir ne me to cuprõ, ne ma pō mã me to mō ata na wa apu acãmjĩ — hajýr.

³⁹ Mã Pawrô pahhi mã:

— Hamreare, ipê Pawrô, ne ipê Juta catêjê nõa wa, ne Kríjara jô krí kam pê wa ipým, krí catia to cati ata kam, Quiriti jô pjê kam. Ne wa ha awý, ca ito tojnõ wa me hàhtôti itajê mã icakôc — hane.

⁴⁰ Mã pahhi te ihtýj cumã harkwa hyr to:

— Gapacta ne me cumã acakôc — hajýr. Mã me hàpir xà kam Pawrô jàhhuc, ne xa, ne cute mehçunea kêt prãmte me cumã hũhkra pẽr. Mã hamre, mehçunea pinkrên. Mã cute Juta jarkwaa to ihcakôc kam ihtẽm, ne me cumã:

22 — Ýhý, me ikwý me, me iquêtjê me, me ikjêjê me, menxũjê, me ikampa. Wa ha me acunaa mã ite amji pytãr xà ita to me amã amji jarẽ — hajýr.

² Mã cute harkwaa to me cumã ihcakôc na mempar, ne me ipinkrên, ne me ipinkrên tu. Mã Pawrô me cumã:

³ — Ýhý, ipê Juta catêjê nõa wa, ne pê wa Kríjara jô krí kam ipým, Quiriti jô pjê kam, ne wa ita ri Krípinkrên kam amji to ajpa, ne Camar pê ri imã ampo to hahkre catê. Ne cute ampo to imã hahkre xà ata pê wa cupê cupy, ne me panquetti te amji kam hapac xà ata pê hàhtôa to hàhtô, ne cati, pê to hahkre ne cupy. Ne pê wa Pahpãm mã amji gõa to cumã amji gõ, to hanea, pom quẽ ate me cumã amji jör he. Pê wa nee cormã ne Jeju pê Pahpãm kra na hahkre pej nare. ⁴ Na pê wa ajco Jeju na mehkwý pro to ipa, ite mehçuran prãmte, ne pê wa ajco me hũmre pro, ne pyjê pro, ne cute me amji jacjên xà kam ajco me to awcapê. ⁵ Ne quẽ Juta catêjê jô pahhi cunea pê prohti kam ihtýj ita na me ijarẽ, ne ampeaj kam pê wa ajco me to hajýr to ipa. Na pê wa Tamatcô jô krí kam me cupê prohti kam me caxuw ihkãhhôc py, cute me hõmpun ne me cahyt, ne ite Jeju na mehkwý pro na cute me itehcajpar to prãm to. Ne wa ma curi to mō, ite me jũmjê atajê ihpro ne wakýre to me huwapre, ne ajpên hacpý ne Krípinkrên wýr me to imõr, ne ame to kêanre prãmte.

Pawrô ipintuw na cute amji jarẽn xà

Me Hápên Xà 8.3; 9.1-19; 26.1-23

⁶ — Ne pê wa ma mam mō, ne ramã Tamatcô jô krí na ahtêp, pê ramã pytãr ikrã jimoac kam jý, pê wa ihprõt pê kýj rũm, cõjkwa rũm ampo prãti catia nõ ata pupu,

pê iwÿr mō. ⁷ Hamre, pê wa pjê kam ipÿm, ne ihcakôc kampa, pê imã ihcakôc ne imã: “Xawrô, Xawrô! Ampo na mã ca apu ito kên?” hane.

⁸ — Hamre, pê wa ihcukij ne cumã: “Pahhi, me anō mã ca?” hane. Mã imã: “Ipê Jeju, mār wa Naxare jō krī pīn icator, ca apu ito kēanre ata wa” hane.

⁹ — Pê hanea ne, por pê wa hūmre me mō atajê, hàhcujro pupu, ne nee, por pê imã ihcakôc xà ata na hōkre par pej nare. ¹⁰ Hamre, wa ite hipêr ihcukij ne cumã: “Ampo to wa ha pahhi ajte?” hane. Mã imã: “To xa ne ma Tamatcô jō krī wÿr tē, curia quê ha jūm amã awjarê, he ate imã ite amji mã ampo na prãmti ata ton na ato prãm” hane. ¹¹ Ne pê hàhcujro prãti ata ito to kên, pê ito tūm pyrentu. Pê me hūmre ikôt me mō atajê, ma Tamatcô jō krī wÿr me ijaprô ne me ito mō, ne me ito cato.

¹² — Pê curi hūmre nō japrÿ te Anana ata pê Pahpãm to amji kam hapac catê, ne hōtpê Mojxe xwÿ jō kàhōc caca xà kampa. Na pê Juta catêjê Tamatcô jō krī kam mehkrī atajê ihtÿj ajco me Anana kampa. ¹³ Ne pê ajpên mō, ne iwÿr cato, ne imã harkwa to: “Ikjê Xawrô, hacpÿa ma rīt!” hane. Hamre, pê wa irīt pyrentu, ne hōmpu.

¹⁴ — Pê imã hūjarên to: “Me panquëtti jō Pahpãm te ri amji mã acapi, ne quê ha amã hàpên xà to hahkre. Ca ha Pahpãm kra pê catÿt kam ipa catê ata pupu, quê ha taa amã ihcakôc, ca ha kampa. ¹⁵ Ampo na? Quê ha ato Pahpãm kra mã imprar catê. Ca ha mehcuea mã, ate ampo pupun ne impar atajê na, amji jarê. ¹⁶ Ne mēr, ampo mã ca jÿ ne apu hikaj? To xa, ne ito tojnō, wa cô kam acumrã, ca amji tehcajpar xà na Jeju na ahwÿ, quê ha Pahpãm ate amji kam gapac xà kên me gápên xà kên itajê to tojnō ne hucu” hane. Hō, pê imã hūjarên to hane, pê wa harkwa kôt to.

Pê Pawrô hàpên xà na amji jarê

Me Hàpên Xà 16.35-39

¹⁷ — Na pê wa Krīpinkrên wÿr amji jaxà, ne Pahpãm to me amji kam hapac xà jūrkwã kam Pahpãm mã icakôc, ne irīat kam hōmpu. ¹⁸ Pê imã: “Acator pyrentu, Krīpinkrên pê. Ampo na? Jū wÿr quê ita ri jūm akampa, ate ito gūjarên xà ata na” hane.

¹⁹ — Pê wa ma apu ijitôt, ne ma Krīpinkrên pê apu icator prãm nō, na pê wa cumã icakôc ne cumã: “Jō Pahhiti, he mehcuea mã ramã ita ri ijàpên xà kēanre atajê na ijahkre pejtu. Pê wa ajco hōtpê cute me akam hapac catêjê te me cuprôn xà jūrkwã wÿr ipa, ne mehpro ne mehcahhy. ²⁰ Ne pê Tewãw hanea ne hōtpê me cumã ato ihcakôc. Cwÿrjapê pê me Tewãw curan na imã impeaj to impej. Ne pê ramã me Tewãw curan xàa kam, pa pê wa itÿj mehthecajpa ne me cumã mehkã jamã, ata na ramã me cumã ijahkre pejtu” hane.

²¹ — Pê Pahpãm pê Pahhiti imã: “Wa ha ma ihmat ri akujate, ca ha mehcahkrit atajê wÿr tē” hane — hane.

²² Ýhÿ, cute me Pawrô te me cumã mehcahkrit atajê jarên, mã cute mempar pê kÿj cati pêa mã me caràr kam mehtēm, ne me caràr to:

— Mehcura! Ne me to pjê caprã, quê hamre! — hajÿr.

²³ Ne me caràr kam cute me to ihtēm, ne mehkã krÿ ne kàj mã me to awcapê, ne me pjê jacrô cakrÿ, ne kàj mã me to awcapê. ²⁴ Mã krãhtare jō pahhi ata te mehkwy mã harkwa hyr, quê kên te ikre tÿjti ata kam me Pawrô jaxà, ne mehcahhy, quê ampo cwÿrjapê ame caràr ata to me cumã awjarê, ampo na mã ajte ame caràr to hane. ²⁵ Mã Pawrô cahhyr xà caxuw, cor mã ame huwapre kwÿa kam, mã Roman catêjê nōa pê pahhi tehcajpar catê ata mō ne cape na xa, mã cute ihcukij, ne cumã:

— Mōrmō ajkī ate ampo na me Roman catêjê nō cukij nare kam mehcahhyr xà ita na me amã impej? — hajÿr.

²⁶ Mã pahhi tehcajpar catê ata te ita par, ne amji mã ipikrar, ne ma me hō pahhi wÿr tē ne cumã:

— Co he, ca ha gápên xà ita to impeaj ne! Nãmri hūmre ita pê Roman catêjê nōa ri — hajÿr.

²⁷ Mã ma pahhi Pawrô wÿr tē ne cute ihcukij, ne cumã:

— Imã amji jarê, xà ajkī ampeaj kam apê Roman catêjê nō? — hajÿr. Mã Pawrô cumã:

— Ampeaj kam ri ipê mehnōa wa — hane.

²⁸ Mã pahhi cumã:

— Ite hajÿr ne ipê Roman catêjê kwÿ nōa wa cakrô, pê wa nee curi me kam ipÿm nare, ne ajtea mã pjê nō kam ipÿm. Ne ite amji to Roman catêjê kwÿ prãm to pê wa amji jahpan xà na ihpore catia ne cugō — hane. Mã Pawrô cumã:

— Ýhÿ, quêt inxū pê Roman catêjê nōa, cwÿrjapê ri ihkôat ipê Roman catêjê nō — hane.

²⁹ Mã ihcahhyr catêjê atajê te apu ihcahhyr xàa kam, mã cute cupê Roman catêjê nō na amji jarên, mã cute mempar, ne amji mã me ipikrar, ne me cumã hikran, ne me cupê cator pyrentu. Mã pahhi te Pawrô pê Roman catêjê nōa na hahkre pej, ne apu hūpa. Ampo na? Cute Roman catêjê incaca xà kaj na me huwapre na harkwa hyr, na ri apu hūpa.

Pê Pawrô prohti kam me cuna mã xa

³⁰ Mã pahhi cormã hūpar pej, ne amji jahkre pej prãm, ampo na mã ajte Juta catêjê ame Pawrô na ihcakôc kên. Cwÿrjapê ri cute mehcajrên jō pahhi catêjê me, prohti kam me cati atajê cunea me cuprôn na me cumã hūjahkre. Jirô pê mã ri cute me wakÿre te Pawrô cajpre ata pôn, ne ma me hÿrmã me to mō, ne me to cator, ne me cuna mã cute me hãm na me cumã harkwa hyr. Mã cute harkwa kôt me ton.

23 Mã Pawrô prohti kam me hōmpun tÿjti ne me cumã:

— Me ikjêjê! Pê wa icapēnti na caxwãm catia mã Pahpãm cuna mã amji to ajpa, ne ahnaa cormã ita kam to xa he — hane.

² Mã Anana pê Pahpãm mã mehcajrên catêjê jō pahhi catihti ata te me cahê na mehcuhhê catêjê atajê mã Pawrô jarkwa kam me cakwīn na harkwa hyr. Mã cute harkwa kam me cakwīn. ³ Mã Pawrô Anana mã:

— Pÿhàpà, ihhêj ne pō rūm apejti, ne acaxwãm pê akēanre! Quê ha Pahpãm hanea ne acakwī, ate icak-

wĩn ita jahpan xà na. Ne me panquêtjê incaca xà kôt mehcukij catê ita na ca akrĩ. Měr hõhõ, ampo na mã ate icahhyr na garkwa hyr? Ca me panquêtjê incaca xà ihkaj na apu ito hane — hane.

⁴ Mã me hũmre me Pawrô na mehcuhê atajê me cumã:

— He ca apu Pahpãm mã mehcajrên catêjê jô pahhiti xũn, ne ahna ihkaj na — hane.

⁵ Mã Pawrô me cumã:

— Me ikjêjê, wa nee ite cupê pahhiti ita na hahkre pej nare. Wa hahkre pej na mã, wa nee cumã icakôc xà ita to hajyr nare. Ampo na? Pahpãm jarkwa na cute mehhôc catêjê jô kàhhôc kam pê mehhôc to me hane he: “Nee ame akwý jô pahhiti na acakôc kên nare” — hane.

⁶ Ne Pawrô te prohkam me hakrã pijakrut na me hahkre pej, mã mehwý pê Xato xwý kôt me ipa catêjê, ne mehwý pê Parixêw catêjê. Mã cute me to ipicapôn prãmte kýj cati pëa mã hũjarên, ne me cumã:

— Me ikjêjê, inxũ pê Parixêw catêjê nõa, na ri ipê Parixêw catêjê nõa wa. Ne pa wa ita ri, cute me amji cukij xà kam xa, mã ame icukij. Ampo na? Wa itýj mehtyc itajê te hacpýa mã mehtír na amji mã me to hajyr to ipa, na wa ita ri xa — hajyr.

⁷ Hõ, cute me cumã ita jarên to hajyr. Mã Parixêw catêjê me Xato xwý kôt me ipa catêjê te me ajpên mãn kam mehtêm, mã prohkam cute me hapackre catêjê atajê picapôn. ⁸ Ne ampo na mã ame ajpên mã? Nee mã ampo na amê ajpên mãn nare. He me cupê Xato xwý kôt me ipa catêjê ma apu hacpý mã mehtyc tır na me harên par caca, ne hanea ne ma apu côjkwa pĩn Pahpãm jarkwa to memprar catêjê na me aprã, ne hamreare na me harê, ne me carõ jamreare na amji mã me harê. Mã Parixêw catêjê ampo itajê cunea na amji mã me to hajyr to me ipa. ⁹ Na ri kypê ajpên mã ame caràr to me ipa nare. Mã Parixêw catêjê kwý me, Mojxe xwý te me hapackre xà me cumã to hahkre catêjê atajê me, me hãm, ne hanea ne me caràar kam, cute me harên to:

— Wa nee ite me hũmre ita kam ihkên xà nõ pupun nare. Quê ihhêaj to ampeaj kam côjkwa pĩn Pahpãm mã imprar catêjê nõ cumã ihcakôc, nare, quê me carõ nõ cumã ihcakôc, cu ha ahnaa mã me — hajyr.

¹⁰ Ne ihtýj me ipijapu to me mõi, ne ampeaj kam me ipijapu xà ita catia to cati, na ri krãhtare jô pahhi mã cute ihhêaj to amji pê ame Pawrô jirên na hũpa. Cwýr-japê ri cute krãhtare wrýc na me cumã hũjahkre, quê me wrý ne me Pawrô capa, ne ma kên te ikre týtji ata wýr me to amji jaxà. Mã krãhtare wrýc ne cute me cupê Pawrô caxàr, ne ma hacpý mã me to mõi.

¹¹ Mã caxwa ata kam Jeju pê me pajõ Pahhiti te Pawrô mã amji to ipipê ne cumã:

— Apu pa nare, awcanã. Ca ate ita ri Krĩpinkrên kam ijarên, ne ca ha atýj hanea ne Roman jô krĩ kam ijarê — hajyr.

Pê Pawrô curan na me amji pa

¹² Mã apê, mã Juta catêjê kwý te me amji to cuprõn, ne ampeaj kam me ipijacri týtaj kam, me hàpàn nare, ne amehkõm nare kam, cute me Pawrô curan na me amji ton. ¹³ Ne por pê me hũmre me ajpên pa atajê pê me hàhtõ na me cwarênta jirõa pê. ¹⁴ Ne ma Pahpãm mã mehcajrên catêjê jô pahhi kwý me, mehwý jakrã jô pahhi catêjê wýr me mõi, ne me cumã:

— Ýhý, wa ite me ijàpàn nare kam me Pawrô curan na ampeaj kam me amji ton, ne wa ha xa mehcura, ne cormã me ampo krê, ne me ikõi. ¹⁵ Na ca ha ita caxuw prohti kam catêjê me, krãhtare jô pahhi mã me awjarê, quê ajpên ita ri me Pawrô to mõi. Ca ha me hõ pahhi mã ahêj, ne cumã: “Wa hipêr me Pawrô jũjarên par prãm, ca ha ajpên me ite cuprõn xà wýr to mõi” hane. Quê ajpên to mõi, wa ha ramã pry jahkà kôt me hikaj, ne cator xwýjrea na pry kôt mehcura — hane.

¹⁶ Mã Pawrô tàmxwýre ata aracri xa, ne cute me ajpên par xà ata na mempar, ne ma kên te ikre týtji ata wýr tẽ, ne inquêtti wýr hàr, ne cute cumã hũpar xà ata jarên par. ¹⁷ Mã Pawrô te krãhtare nõ na hàhwýr, ne cumã:

— Ijaparire ita japrô ne to mõi, gõ pahhi wýr. Quê ha ihtýj cumã ampo ata jarê — hajyr.

¹⁸ Mã krãhtare te haparire japrôr ne ma hõ pahhi wýr to mõi, ne hýrmã to hàr, ne hõ pahhi mã:

— Ýhý, por cute me Pawrô jaxàr mã xa ata te ina hàhwýr, wa ite awýr haparire ita japrôr ne to mõi, quê amã ampo ita jarê — hajyr.

¹⁹ Mã me hõ pahhi te intuwre ita jũhkra na ipyr, ne ma me cupê to hũjawry, ne cute ihcukij to:

— Ampo ca apu imã harên prãm? — hajyr.

²⁰ Mã cumã:

— Ýhý, wa nee apu amã ampo jarên prãm nare, quê ha Juta catêjê Pawrô curan prãmte me amã ihhêj, ne hipêr me hũpar prãmte cute me cuprõn xà ri quêtti na me ana ahwý. ²¹ Ca ha nee me kam gapac nare. Ampo na? He ame amã ihhêj. Ne me hũmre te me ajpên par atajê jãhtõ te cwarênta jirõa pê, quê ha quêtti mã me amxu ne prya kôt mehcura. Ne mehcunea ne me hàpàn nare, ne mehkõm nare kam, xa me quêtti curan, ne cormã ame hàpàn ne amehkõm na cute me amji ton, ne cama ramã amji caxuw me akampa — hane.

²² Mã krãhtare jô pahhi te cumã:

— Nee jũm mã ate imã ampo jarên ita jarên nare — hane. Ne ma cute intuwre ita kujahêc, mã tẽ.

Pê pahhi Peri wýr me Pawrô kujate

Me Hàpên Xà 21.27-39; 22.24-30

²³ Mã krãhtare jô pahhi te krãhtare to ipijakrut ne cumã hàkjêr ne me cumã:

— Wapohti na me krãhtare to me xêj to ajkrut ne me haprõ, ne hanea ne cawrõ kam krãhtare to me xetênta ne me haprõ, ne hanea ne kruwxwa na krãhtare to me xêj to ajkrut ne me haprõ, quê me ahcuprõ, ne Xexa jô krĩ wýr me pra, caxwa ryre kam. ²⁴ Ne hanea ne me

Pawrô mã cawrô nõ mã me acato, quê kam jÿ, ca me huwahi to impeaj ne, ne ma pahhiti pê Peri wÿr me to mõ, Xexa jô krí kam — hajÿr.

²⁵ Jirô pê mã ri pahhi ata te ihkàhhôc pyr, ne cute kam ihhôc to hajÿr he:

²⁶ — Ýhÿ, Peri pê pahhi catihti ita, xà apeaj? Ipê Crawti Rixij, ne itea wa amã ihhôc, ne amã ihkujahêc.

²⁷ — Juta catêjê te me hÿmre ita pro ne ajmãr mehcuran. Wa ite me cupê Roman catêjê nõ na hahkre pej, ne ite ijô krãhtare to me cupê hÿtãr. ²⁸ Ne wa ite ampo na cute ame to kên to hajÿr na hahkre peaj to prãmte haprôr, cute me hapackre catêjê wÿr. Ne me cupê Juta catêjê pê prohkam, ite me cuna mã hÿmre ita xãm. ²⁹ Ne ite nee ihtyc xà caxuw, nare, cute me haxàr xà caxuw, cute ampo kên ton nare na, hahkre pej. Ne menquêtjê caca xà kôt cute ampo kên ton na ame harê. ³⁰ Ne wa ramã ite Juta catêjê kwÿ te me Pawrô curan na me amji ton na me hahkre pej, ne ite to amji kam ijapac, ne ite amã ihkujahêc. Ne ite me cumã, quê acunaa mã me Pawrô kên na harê. Hamre, ita na pit mã wa ite amã ihhôc, apej pëa mã mõ. Ipê Crawti Rixij — hajÿr.

³¹ Mã krãhtare catêjê te hõ pahhi par, ne cute me Pawrô japrôr, ne ma caxwa ri me to mõ, Antipatrij jô krí wÿr. ³² Ne apê, mã krãhtare catêjê te me cwatxënta atajê mehpar kam ame ipa atajê te hacpÿa mã kên te ikre tÿjti ata wÿr me amji jaxàr ne me mõ. Mã cawrô kam krãhtare me pra atajê ma Pawrô to me mõ, Xexa jô krí wÿr, ne me to cator. ³³ Ne cute Peri pê pahhiti mã me ihkàhhôc pyr ata jôr, ne hanea ne hÿhkra mã me Pawrô jaxàr. ³⁴ Mã pahhiti te ihkàhhôc cahyt ne Pawrô cukij ne cumã:

— Hã, pjê jÿ kra mã ca? — hajÿr. Mã cumã:

— Ipê Quiriti jô pjê kra — hane. ³⁵ Mã cumã:

— Quê ha xa cute me akôt harên kên catêjê me cato, wa ha cormã kampa — hane. Jirô pê mã cute krãhtare catêjê mã harkwa hyr, quê Heroti xwÿ jÿrkwa mã me Pawrô jaxà, ne me huwahi tu. Mã cupê pjê jô pahhiti ata jÿrkwa kam, cute me haxàr.

Pê Juta catêjê Pawrô pro rë

Ruc 21.12-13; Me Hâpên Xà 25.7

24 Ne amcro te xíc jirô pê mã ri, ma Anana pê Pahpãm mã mehcajrên catêjê jô pahhi ita me, prohti kam mehkwy kwÿ me, ma Xexa jô krí wÿr me mõ, ne cute mencaca xà jahkre pej catêjê me, mã hanea ne cute me hÿjarên catê japrÿ te Tertur ata japrôr, ne ma me to cator. Ne Peri pê pahhiti wÿr me hàr. Ne cute Pawrô to mehcajêc kên kam mehtêm. ² Ne cute me Tertur na hàhwÿr, ne Peri cuna mã me hãm, mã Tertur te Pawrô kôt harên kên kam ihtêm, ne pahhi mã harên to:

— Ýhÿ, pahhiti! Apeaj to apej, ne ate amji jahkre peaj to amji jahkre pej. Cwÿrjapê wa me ipej pëa mã me amji to ajpa, rÿ pëa mã wa me ipej pëa mã amji to me ajpa. Ne ramã ate ampo jãhtôa ne to impej to mõ, me pajô pjê ita kam. ³ Ne ate me imã ampo jãhtôa ne hõr, pjê cunea kam, amcro me caku cunea kam, ne tahnaa

ri me imã impej. ⁴ Ne wa ha nee apê ijãmtãr to iryti nare, ne wa awÿ, ca ipar to hatujre ne.

⁵ — Wa ite me hÿmre ita jahkre pej, mã ihhêj rÿm cupê hà pyrãac ne ipa, mã ampo kên cunea hapôj to ipa. Ne Juta catêjê kam xwahna to, ne pjê cunea kam to, ne krí cunea kôt xwahna ton to ipa, ne ihkên ton to ipa. Ne cupê Naxare jô krí catêjê kwÿ jô pahhi, ne ihtÿj ame pajô pjê jô pahhi to kên prãm to ipa. ⁶ Ne tee apu Pahpãm to me amji kam hapac xà jÿrkwa to kên prãm, ne ampeaj kam ihtÿm prãm. Na wa tee me to jÿ na to prãm, me icaca xàa na. ⁷ Mã krãhtare catêjê jô pahhi pê Ritij ita te me ijÿhkra kam, hàprëa kam, Pawrô caxàr. ⁸ Ne cutea ri awÿr me ikujahêc, wa me acunaa mã ame Pawrô na me icakôc kên. Na ca ha hÿmre ita cukij ne hÿa kampa, ne pom wa me ampo jarê itajê, quê ha taa harê — hajÿr.

⁹ Mã Juta catêjê mehcuhhê ne me Tertur jÿjarên xà kampa, ne me taa xwÿjê me harên to:

— Ampeaj kam ri ampo kên ton to ipa — hane.

Pê Pawrô harkwa to amji pytà, Peri cuna mã

Ruc 21.14-19

¹⁰ Mã me hõ pahhiti pê Peri te Pawrô te hÿjarên xà na cumã ihkrã to hàhhêc. Mã Pawrô te hÿjarên kam ihtêm ne me cumã:

— Ýhÿ, wa ite ramã, apê Juta catêjê kam mehcukij catê na caku jãhtôa na, gahkre pej. Cwÿrjapê wa acunaa mã icakôc, ne amji jarê ne amji pytà, pyrên wa apu ijakry.

¹¹ — Ýhÿ, wa curmã Krípinkrên mã icator. Ne cormã icator na amcro te tõi peaj. Ne atÿj mehcukij, quê ha taa me amã awjarê. Wa Pahpãm to ite amji kam ijapac prãmte, wa Krípinkrên kam icator. ¹² Ne nee Juta catêjê nõ te ite ampo to jÿ mãn to imõr na ipupun nare, ne nee wa apu jÿm caxun to imõr nare, ne wa nee Pahpãm to amji kam me hapac xà jÿrkwa kam, ite jÿmjê rëc nare, cute me cuprôn xà kam. Ne hanea ne krí ata kam, nee krí cape na ite jÿmjê rëc nare. ¹³ Ne nee mehnô te ampo kên na ipupun nare, ne nee ijÿjarên xà nõ na, jÿm te ipar nare ita kam, jÿ mã quê me ijarên to?

¹⁴ — Ne ampo pyxitre ata na ri ampeaj kam me ijarê. Wa itÿj Jeju te amji kam hapac xàa kôt, me panquêtjê jô Pahpãm pynãr to ipa. Ne Juta catêjê pê cama ita na ihkaj na. Ne imãa ite amji kam ijapac xà te hajÿr he, na wa itÿj ihcunea kampa, ne itÿj Mojxe xwÿ jô kãhhôc kampa, ne Pahpãm jarkwa to mehcajêc catêjê jô kãhhôc kampa. ¹⁵ Ne wa ha itÿj Pahpãm jikaj, quê ha jÿ caxuw ihtÿj hacpÿa mã mehtyc atajê to ihtÿr. Mempejti atajê me, mehkên atajê me, cute hacpÿa mã me to ihtÿr na, wa itÿj amji mã to hane. ¹⁶ Na wa apu ikên ton nare, ne caxwãm catia mã icapënti na ipa, Pahpãm me, mehcunea cuna mã.

¹⁷ — Ne hamre, pê wa Krípinkrên pê icato, ne ma pjê cunea kôt apu ipa, ne curia amji to caku kwÿ kujate. Ne curmã wa ite hacpÿa mã me ikwÿ wÿr amji jaxàr, Krípinkrên wÿr. Ite me cumã ihpore nõ jôr prãmte. Ne hanea ne ite Pahpãm mã ampo to ijÿjahkre ata jôr

prām. ¹⁸ Ne ite Juta catêjê caca xàa kôt me amji cūm-pej jirô pê, Pahpām to amji kam me hapac xà jūrkwā mā ixār, ite me Pahpām mā ampo jōr prāmte. Me icrê wa me mō ne me icuhhê, ne nee wa ame ikên ton to me ipa nare, ne ata kam ri Juta catêjê kwý Axij jō pjê pīn me cator, cute me ipupun. ¹⁹ Ne quê rý mā ajpên cute me ipupun catêjê atajêa me mō, ne cute ikam me ampo kên pupun xà atajêa na, me taa acuna mā me ijarê, nare, quê, pom prohkam mehkwy ita ri me xa atajêa me amā me ijarê. ²⁰ Ne pê wa me cunaa mā ixām xà ata kam, pê wa nee me kam mare mā ampo kên ton nare. ²¹ Ne ampo pyxít peaj ata pê wa to, ne kýj cati pêa mā me cumā icakôc, ne me cumā: “Ýhý, wa itýj hacpýa mā Pahpām te mehtyc atajê to tīr na amji mā to hane, ata cwýrjapê mā ca ame icukij” hane — hajýr. Hōhō, Pawrô te pahhi pê Peri mā amji jarên to hajýr.

²² Mā pahhi pê Peri te ramā Jeju na mehkwy te amji kam hapac xà jahkre pej. Ne cute me cumā amcro nõ hyr, ne me cumā:

— Hamre, ita kam ita pit, quê ha xa krāhtare jō pahhi pê Ritij ata cato, wa ha cormā me acaca xà ita na jū na me ato — hajýr.

²³ Ne cute krāhtare pê Pawrô jamār catê ata mā harkwa hyr, ne cumā:

— Ýhý, ita ri kên te ikre týtji ata wýr Pawrô japrô, ne hamār to impeaj ne, quê nee jū kam ihtēm nare. Ne kyre pê huwapre, ne ikre kam apu ipa na to tojnō, quêt taa apu ipa. Ne quê ihhêaj to me hō ikwý nõ mā mehtehcajpar prām na, ca ha atýj me to tojnō, quê taa mehtehcajpa — hane. Ne cute kên te ikre týtji ata kam me Pawrô xir, mā curia hàhhuc ne apu mō.

Pê Pawrô Peri me Truxirkwýj cuna mā xa

²⁴ Mā amcro kwý te me hakren jirô pê mā ri Peri me hīxi japrý te Truxirkwýj cator, ne cupê Juta catêjê cahāj nõa. Ne cute me Pawrô par prāmte me ahna hàhwýr. Mā Pawrô te cumā Jeju to cute amji mā mehhimpej xà jarên to hajýr:

²⁵ — Cu ha me pahcunea catyt kam me papa, ne ma ampo kên tète me amji jiprôn to me papa. Quê ha amcro nõ na Pahpām me pahcukij ne me pahkrā kên catêjê me, me pahkrā pej catêjê me, me pahto ajcokjê. Ne apu mehkrā kên to kên, ne mehkrā pej to impej — hajýr. Hō, Pawrô te me cumā hūjarên to hajýr. Mā Peri te ita par, ne cumā hūpaa to hūpa, mā cumā:

— Gapacta ne mō. Wa ha jū caxuw ana prām, ne hipêr gaprô — hane.

²⁶ Ne ihcaprý na ihpore na Peri Pawrô jikaj. Cwýrjapê ri cute Pawrô na hàhwýr to amcro jàhtôa ne apu cumā ihcakôc.

²⁷ Mā Pawrô te curia amji to caku pijakrut kujahêc. Jirô pê mā ri pahhi pê Peri ata cator. Mā haxà kam pahhiti tuw nõ japrý te Porxij Pexô ata xàr cakrô, nee Peri ata te Pawrô cator na to tojnō nare. Ampo na? Cute amji to Juta catêjê cajpuaw prāmte.

Pê Pawrô mā Roman jō pjê catêjê jō pahhiti cuna mā amji xām prām

²⁵ Mā pahhiti tuw pê Pexô ita xàr, ne ahna amcro incrê jirô pê mā ri, ma Xexa jō krí pê cator ne Krípinkrên wýr mō. ² Mā mehkwy jakrā jō pahhi kwý me, Pahpām mā mehcajrên catêjê kwý me, cuna mā me hýr, ne cute Pawrô kôt me harên kên kam mehtēm. ³ Pê ramā Krípinkrên jō pry kôt Pawrô curan na me ajpên pa. Cwýrjapê ri cute me Pexô na me hàhwýr, quê me cumā Krípinkrên wýr Pawrô kujate. ⁴ Mā Pexô te me cumā:

— Ma Xexa jō krí kam Pawrô me hacjên xà kam nõ. Ne quê ha ina ahtüm nare wa ha hýrmā amji jaxà.

⁵ Quê ha cute ampo kên ton na, quê ha me gō pahhi ipynā, ne curia me icunaa mā ihkôt me harên to kên — hajýr. ⁶ Mā Pexô te curi me cahê na amji to amcro to ôjtô, nare, cute amji to amcro to tej, ne ma hacpýa mā cute amji jaxàr, Xexa jō krí wýr. Ne apê mā mehcukij xà mā hàr ne hýr, ne cute Pawrô japrô na me mên. ⁷ Mā Pawrô cator, mā Juta catêjê Krípinkrên pīn me mō atajê te me Pawrô krā, ne cute me cumān kên týtj kam me to ihtēm. Ne me cumā curê catêjê ame to xwahna to me ipa, ne jū wýr quê jūm ihkên nõ na harê.

⁸ Mā Pawrô te harkwa to amji pytār, ne me cumā:

— Wa nee ite me panquêtti pê Mojxe xwý caca xà cuna mā ampo kên ton nare, ne nee Pahpām to me amji kam hapac xà jūrkwā cuna mā ampo kên ton nare, ne hanea ne nee Xexa pê Roman catêjê jō pahhiti caca xà cuna mā ampo kên ton nare — hane.

⁹ Mā pahhi Pexô te Juta catêjê mā hakry ton prāmte, cute Pawrô cukij, ne cumā:

— Xà nee amā Krípinkrên wýr amōr prām nare, quê amā amōr prām, wa curia acukij? — hajýr.

¹⁰⁻¹¹ Mā Pawrô cumā:

— Apê Roman catêjê jō pahhiti mā gápên catê, ne Roman catêjê te amji kam hapac xà kôt mā ca apu icukij. Ne wa ihhêaj to ite ampo to kên pàràpên, gapacta ne atýj jū na me ito. Ne hamre, wa ramā ate icuran xà caxuw apu ijàhcuprôn, ikên jahpan xà na ijàmjōr xà caxuw. Quê ha me cupê Juta catêjê te ame ito ihhêj na, quê ha nee jūm me cumā ijōr nare. Ne nee ite Juta catêjê to kên nare na, ramā atea ijahkre pej pejtu. Cwýrjapê wa itýj Roman catêjê jō pahhiti cuna mā ixām, ne cumā icakôc prām, mār quê taa icukij — hane.

¹² Mā Pexô te harkwa kôt cute me hapackre catêjê me, me ajpên par, ne Pawrô mā:

— Ca Xexa pê Roman catêjê jō pahhiti wýr akràr, na wa ha itýj hýrmā akujate — hajýr.

Pê Pawrô Acrip me Perenikwýj cuna mā xa

¹³ Mā amcro kwý jàhtôa jirô pê, pahhiti nõ japrý te Acrip pê Heroti xwý kra, me hīxi japrý te Perenikwýj Xexa jō krí mā cator. Ne cute pahhi tuw pê Pexô pupun, ne ajpên pyrên me hakryti to prām to ri hýrmā

me cator. ¹⁴ Mă amcro nõ jirô pê, Pexô te Acrip pê pahhiti mă Pawrô jarên ne cumă:

— Ýhÿ, ita ri pahhi pê Peri te me hacjên xà mă hÿmre nõ ita jaxàr, mă hikwa. ¹⁵ Wa mō ne Krîpinkrên mă ica-tor, mă mehkwy jakră jō pahhi me, Pahpăm mă mehcajrên catêjê jō pahhi kwÿ me, icuna mă ame imă hÿmre ita kôt harên to kêanre, ne ite ihcukij ne ihcu-ran na, cute me ina hàhwÿr.

¹⁶ — Wa ite me cumă amji jarên to: “Wa Roman catêjê incaca xàa na apu ipa. Ne me icaca xà ata kôt, quê ha xa icuna mă cute ame ajpên na mehcajê kêanre catêjê me ajpên cuna mă me xa. Quê ha mam cute me cumă catêjê atajê pê cute amji pytàr xà na ihcakôc. Wa nee ita cumam cute me cumă xi catêjê atajê mă, cute jÿm curan xà caxuw hōr nare” hane.

¹⁷ — Mă ita ri mehcunea cator, wa nee ite hipêr me to amcro nõ mên nare, ne apê wa ma ramă mehcukij xà mă ixàr, ne ite hÿmre ata japrôr na me mên, ne itÿj apu ihkên cati na ihcămjÿ. ¹⁸ Mă me curê xwÿn catêjê cator, ne nee ite ampo na ihcămjÿ xà atajê nõ na cute me harên nare. ¹⁹ Ne mencaca xàa kôt, cute me ampo pyxit peaj kênre ata na me harên. Ne hanea ne cute me cumă mehcajê kên, por pê jÿm xÿmre japyr to ame Jeju, pê ramă ty ata, mă Pawrô ampeaj kam amji mă hÿmre ita tÿar na ipa na harê. ²⁰ Wa nee ite hahkre pej nare ita kam, jÿ mă wa ha to ne hahkre pej. Cwÿr-japê wa ite Pawrô cukij, quê ihhêaj to Krîpinkrên wÿr cumă mōr prăm quê mō, quê ha curia mehcukij. ²¹ Mă Pawrô te pjê jō pahhiti pê Xexa Aguxô pê Roman catêjê jō pahhiti wÿr amji kràr, ne cute huwapre ita na hãm na iwÿr, ne ahnaa Roman catêjê jō pahhiti wÿr cato, quê ha taa jÿ mă to. Ita na wa ite ahna krăhtare te hamăr catê mên, quê me hamă, wa ha ahnaa Xexa pê pahhiti mă ihkujate — hane.

²² Mă Acrip cumă:

— Wa itÿj ijōtpê pa hÿmre ita par prăm — hane. Mă pahhi Pexô cumă:

— Apê na ca ha kampa — hane.

²³ Ne apê, mă pahhi Acrip me Perenikwÿj cator, cute me cuprôn xà kam. Mă me hàhtôa ne ahna cute me cuprôn, ne me cumă ampeaj ne me to mō, mă ihkă im-pejti kam mō. Mă krÿ kam me cati catêjê jàhtôa me, krăhtare catêjê jō pahhi catihti atajê me, ramă cute hikaj xà cute me cuprôn. Mă Pexô te Pawrô na hàhwÿr mă cator. ²⁴ Mă Pexô te ahna me cumă:

— Ýhÿ, pahhiti pê Acrip me, pom ca ita ri me acunea me xa itajê, me hÿmre ita pupu he! Krîpinkrên kam me cupê Juta catêjê cunea me, hanea ne ita ri amehkrÿ atajê te hÿmre ita na icuna mă amehcajê kêanre. Ne hōtpê ame caràar kam, ihtÿj me hÿmre ita curan na me awjahkre. ²⁵ Ne imăa cute nee ampo kên cati ton nare ita kam, ampo na quê ty? Ne hanea ne cutea Xexa pê Roman catêjê jō pahhiti wÿr amji kràr, cwÿr-japê wa ite hÿrmă ihkujahêc na amji ton. ²⁶ Ne ipê cormă hahkre kêatre ita kam, ampo na wa ha ajte Xexa pê pahhiti mă ihhōc? Cwÿrjapê wa ite me acuna mă hãm, ate mehcukij xà caxuw. Ne mam cati mă ca ha, caa, pahhiti Acrip ihcukij. ²⁷ Wa ha kampa, ne cormă

hahkre pej, ne ahna ihhōc. Ne jÿ wÿr wa ite cute ampo kên ton na hahkre pej nare kam ahna ihhōc, ne cumă ihkujate, ahna ipê ihkaj na — hajÿr.

Pê Pawrô harkwa to amji pytà, Acrip cuna mă

Me Hápên Xà 8.3; 9.1-19; 22.1-21

26 Mă pahhi pê Acrip te Pawrô mă ihcakôc ne cumă:

— Gapacta ne imă amji kôt harê — hane. Mă Pawrô te hÿhkra pêr ne cute ihcakôc xà to amji pytàr kam ihtêm ne cumă:

² — Ýhÿ pahhi pê Acrip, ita kam ite acuna mă amji pytàr xà ita pyrên ampeaj kam imă amji kÿn. Por Juta catêjê te ina ihcakôc kên ata pê, wa ha itÿj amji pytà. ³ Ne icuxà apê Juta catêjê nõ, ne ramă ate amji kam me pajapac xà cunea pupun pejtu, ne hanea ne ramă ate, cute me amji kam hapac xà pihho catêjê te amji kam me hapac xà jahkre pej pejtu. Mă ihtÿj cute ina mehcajê kên. Na wa awÿ, ca catyt kam jÿ ne ikampa.

⁴ — Ýhÿ, ramă Juta catêjê cunea te, me ite amji kam ijapac xà pupun pejtu. Ne me cumă ijahkre pej, pê wa icirire na ijō pjêa kam amji to ajpa, ne hanea ne Krîpinkrên kam amji to ajpa. ⁵ Ne mam Parixêw catêjê kwÿ mă axà. Ne pom Parixêw catêjê kwÿ ata pê mehkwy atajê cunea jirôa pê Juta catêjê caca xà na me hÿnâr tu. Ne Juta catêjê mă ita na ijahkre pej, ne quê ha me cumă amă ijarên prăm, quê ha ihtÿj amă me ijarê. ⁶ Ne wa itÿj, por pê Pahpăm me panquêtti mă jÿm to awjahkre ata to me cumă ijÿjarên to ipa, ne incwÿrjapê mă ame icukij, ne ina mehcajê kêanre. ⁷ Ne wa itÿj Juta catêjê cunea me, me ikwÿ cunea me, ikre ry cunea, Pahpăm te me pamă jÿm to hÿjahkre ata jikaj. Ne wa hōtpê, amcro me caxwa cunea kam, Pahpăm to me amji kampa, ne me jÿm ata jikaj. Ne wa Jeju to Pahpăm me pamă awjahkre ata na me hikaj, ne incwÿr-japê mă ame ina ihcakôc kên. Mă Pahpăm te Jeju pê ihkra na to ipipê prămte, hacpÿa mă to ihtÿr. ⁸ Xà quê ajkÿ nee Pahpăm hacpÿy mă jÿm to ihtÿr nare? Hăpă, quê ihtÿj jÿm to ihtÿr.

⁹ — Ýhÿ, pê mam cormă ipê Jeju jahkre kêatre kam, pê wa itÿj cuna mă ajco ikên ton to prăm to amji kampa. Na pê wa itÿj ajco Jeju na mehkwy to kên to amji kampa. ¹⁰ Ita na pê wa Krîpinkrên kam amji to. Pê wa me pajō pahhi catêjê jarkwa kôt ajco Jeju na mehkwy jàhtôa ne me hacjê. Ne mehcuran xà kam, pê wa hanea ne me cuna mă icakôc. ¹¹ Amcro atajê cunea kam pê wa ajco me to kên to hajÿr to ipa. Cute me cuprôn xà cunea kam, cute me Jeju mă hikran prămte, pê wa ajco me to hajÿr to ipa. Cwÿrjapê pê wa ajco me cumă quêt, ne ajco me to kên. Ne ampeaj kam hãn me kam icryc, pê wa ma ajco krÿ kôt ipa, ne me to kên kryjre nare.

Pê Pawrô hipêr cute amji to ipintuw xà to ihcakôc

¹² — Cwÿrjapê pê wa ma me hō pahhi jarkwa py ne to mō, Tamatcô jō krÿ wÿr. ¹³ He ampeaj kam pahhi, wa apu amă amji jarê, pê ramă pyt ikră cajpuw hÿr kam, pê wa cōjkwa pÿn, pyt jirôa pê ampo pràti ata

pupu, pry cahti ri. Pê ampo pràti ita ipu na ajxê tu, ne hanea ne me ikwý pu na ajxê tu. ¹⁴ Na pê wa me icunea pjê kam me ipýpým, wa ite còjkwa pîn me jüm kampa, pê me imã Juta catêjê jarkwa to ihcakôc to: “Xawrô, Xawrô, ampo na mã ca apu ito kên to hane? He ca, caa apu amji jaxôp to prãm, ne ampeaj kam gâprâr xi. Na ca, caa apu amji jaxôp to apa. Ne ihhêj rüm apê pryti jâprê, mã amnã, ne wakÿti xwahhi to amji caxwý ata pyrâac” hane.

¹⁵ — Pê wa kampa, ne ihcukij to: “Me anô mã ca?” hane. Pê imã: “Ipê Jeju, por ca apu ito kên ata. ¹⁶ Amji tÿaj ne to xa. Wa ramã ite amji mã ato imã gâpên catê xà na, amji mã acapi, ne amã amji to ipipê. Ne ita caxuw ca ha, pom ate ita kam ampo pupun ita to me akwý mã awjarê, wa ha cormã amã ampo jarê ne amã to hahkre, ca ha me cumã harê. ¹⁷ Wa ha itÿj Juta catêjê pê apytã, ne mehcahkrit atajê wÿr akujate, ne hanea ne me cupê apytã. ¹⁸ Ca ha mento jahkjê, quê awcapãtkô pê me cato, ne me apê pupu, ne hanea ne me pahcurê xwÿn carôt pê me cato, ne Pahpãm pê Inxũ Cati wÿr me apkjê. Ahnaa mã quê ha jüm ikampa, ne ampeaj kam ito amji mã ihhimpej, wa ha itÿj ihkên pê hÿtã, ne mam cute Pahpãm to kên atajê to tojnô ne to ijapac kêt, ne ma Inxũ Cati na mehkwy mã haxà” hane.

Pê Pawrô hàpên xà to ihcakôc

¹⁹ — Pahhi Acrip, he pê wa iríat kam còjkwa pîn kampa na, wa itÿj kampa. ²⁰ Pê wa mam Pahpãm jarkwa jarê Tamatcô jô krí kam, ne hirô pê Krípinkrên kam harê. Ne Juta jô pjê kam, mehcahkrit me, me ipicacwÿr kam ajco me cumã harê, pê mehkên jicu, ne Pahpãm wÿr me amji jaxà, ne me kam mare mã cute me ampo kên ton atajê jicu tu. Ampo na? Mãr quê nee hipêr cute me ampo kên ton nare na cumã me amji jarê, ne quêt ampo pej to pit mã me to me ipa.

²¹ — Hôhõ, ampo itajê cwÿrjapê pê cuprôn xà kam, Juta catêjê me ipro, ne ame icuran prãm. ²² Ne amcro ata kam, pê Pahpãm itehcajpar kam tẽ, ne me cupê ipytã, ne cormã itehcajpar to ipa ita na. Cwÿrjapê wa mehcunea mã Pahpãm jarkwa jarê, me cati me, me cupê ampo jamreare atajê mã. Wa nee Pahpãm jarkwa to mehcahôc catêjê me, me panquetti Mojxe te amji kam hapac xà jirôa pê me cumã ijÿjarên nare. Pê jümjê atajê hanea ne icuxà Pahpãm te me pamã jüm to hÿjahkre ata to ajco me awjarê. Ne hôtpê imã ijÿjarên xà te hajÿr. ²³ Pê Pahpãm me pahtehcajpar xà caxuw me pamã jüm pê Crixto to awjahkre, ata pê ihtÿj amji pupun xà kèanre to amji pupu, ne ty ne hacpÿa mã ihtÿr. Cwÿrjapê cu ha me pahcunea hacpÿa mã ame pahÿr. Por Jeju pê Crixto hacpÿa mã ihtÿr xà ata kôt, quê ha hacpÿa mã Juta catêjê me, mehcahkrit atajê cunea tÿr na me to awjarê. Ne me to hÿjarên xà ata pê, quê ha me cumã hàhcujro xà pyrâac, ne ihtÿj mehcujo xà ata kôt amehtyc xà jahpa — hane.

²⁴ Mã Pawrô te amji pytar to hajÿr, mã ihprôt pê Pexô te cumã caràr to:

— Pawrô, mormô ca apu ato kam waj! Ca ate ampo jãhtôa to hahkre ita kam, ca apu ato kam waj! — hajÿr.

²⁵ Mã Pawrô cumã:

— Hamreare, pahhiti, wa nee apu ito kam waj nare, ne ikrã impeaj kam wa catyt kam ame amã awjarê.

²⁶ Ýhÿ, pahhi Acrip wa itÿj acunaa mã icakôc. Ampo na? Ca ramã ate ampo itajê jahkre pej pejtu. He mehcunea jipôc ri ampo itajê te hajÿr, ne nee mã pjê pimxur nô kam cute hajÿr nare. ²⁷ Pahhi Acrip, xà ca ampeaj kam Pahpãm jarkwa na ihhóc catêjê kampa? Wa itÿj ate me kam gapac na ite gahkre pej — hane.

²⁸ Mã pahhi Acrip Pawrô mã:

— Mormô ca atÿj gÿjarên xà jatujre ita kôt ite amji to Jeju na mehkwy na apu icãmji? Hãpà! — hane.

²⁹ Mã Pawrô cumã:

— Wa ha amã Pahpãm wÿ, ca ha atÿj ijÿjarên jatujre ita kôt, nare, ijÿjarên xà cati ata kôt, me apê ipyrâac ne Pahpãm pynã, ne Jeju to amji mã ahimpej. Ne imã me apê ipyrâac na me ato prãm, ne nee me ana wakÿre hamreare ne. Ne nee wa ha Pahpãm mã apyxit pej cajrên nare, wa ha cumã me acunea te me ikam gapac atajê cajrên — hane. Mã hÿjarên xà ita jirô pê, me hãm, ne põ mã mehcunea cator. Pahhi pê Acrip me, pahhi pê Pexô me, Perenikwÿj me, mehcunea mehkôt me ipa atajê me, me cator.

³⁰⁻³¹ Ne me cator xà kam ihtÿj amji mã me harên to:

— Hÿmre ita te nee ihtyc xà me haxàr xà caxuw ampo kên ton nare — hane.

³² Mã Acrip Pexô mã:

— Quê ha Xexa pê Roman catêjê jô pahhiti wÿr amji to hÿjahkre nare na mã, quê ha ramã põa pê ihtÿj apu mō — hane. Ne amehcahkÿm, mã ma hacpÿ mã Pawrô jaxàr catêjê me to mō, ne cute me haxàr.

Pê Pawrô Roman jô krí wÿr tẽ

Me Hàpên Xà 23.11; 25.12

27 Ne jÿ mã me ahna amcro te, mã ma cute me Pawrô kujahêc, Prytikra jô pjê me, Roman jô krí wÿr. Wa ma, ipê Ruc, ihkôt mō, mã cute Jujo pê krãhtare catêjê jô pahhi nô mã Pawrô me, me hacjên catêjê kwÿ jôr. Ne krãhtare catêjê kwÿ atajê pê Roman catêjê jô pahhiti tekjê. ² Pê ramã Atramit jô krí jô pàr kre Axij jô pjê wÿr amji kujahêc xàa kam, na pê wa ma kam me tẽ. Mã Aritarcô pê Maxeton jô pjê catêjê nô, ne Texarôn jô krí kam ihpÿm ata, pê hanea ne me ikôt mō.

³ Ne apê wa Teppro jô krí mã me icator. Pê Jujo ajco Pawrô to impejti, ne ihtÿj to tojnô pê ma ajco ipa, ne me hõ ikwÿ nô catêjê pupu, mãr quê me Pawrô mã, cute ampo na prãm atajê gõ. ⁴ Jirô pê mã, wa me Teppro jô krí pîn me mō, ne ma cò jipôc ri Xipre jô pjê na kÿj rüm me ipijarõ. Ampo na? Pê kôc me icunaa mã me icajpêr kam tẽ. ⁵ Na pê wa còxwa cote na, por Quiriti jô pjê me, Panpir jô pjê jô còxwa ata na me rê. Ne mã Mira jô krí mã me icator, Rixij jô pjê kam. ⁶ Pê curia krãhtare catêjê jô pahhi, Mehtehcajpar jô krí pîn pàr kreti ata mã me cato, ne pê ma Prytikra jô pjê wÿr ihtêm xà carõ. Mã ahnaa kypê hÿrmã me ijator nare, wa ma cumã me ixàr.

⁷ Ne pàr kreti ata kam, wa amji mã me iprĩa ne me mō, ne me imōr xà ita na wa ite amji to me amcro kwỳ kujahêc, ne cuna mã nee me imōr xà ita pej nare, wa ahnaa Xito jō krĩ cahê na me icator. Mã nee kôc te me ito tojnō, wa ite me imōr xà to me amji mã me ihmpej xà ata wỳr me imōr nare, na wa ma cō jipôc ri Kênpo-jre jō pjê ata jarã mã me mō. Ne ite me pjê incràti te cajôt ita jakren, haprỳ pê Xarmô jō pjê. ⁸ Ne hanea ne pê wa me pjê cahê na me imōr xà to me mō ata nee impej nare, wa ahnaa krĩ nō japrỳ te Incjênpej ita na me icator, por Raxa jō krĩ na pire mã xa ata wỳr.

⁹ Ne curia wa amcro jàhtôa kam me ijàhhuc. Mã hamre, me imōr xà ita kên kam hàhhuc, ne ramã Juta catêjê pijacri xà jō amcro hamre, pê hōtpê putwry ata na kôc pahtỳjti ajco hapôj, ne jũ wỳr quê jũm putwry atajê nō na cōxwa kam pàr kre to mō. Cwỳrjapê ri Pawrô te krãhtare catêjê mã hũjarên, ne me cumã:

¹⁰ — Ýhỹ, me hũmre, me ikampa, wa ite ramã me pamōr xà ata jahkre pej, quê ha ita caxuw ihtỳj kôc pahtỳjti ata ame pahto kên. Cu ha me pajàhcukrêj jàhtôa ne me to acto, quê ha pàr kre mrō, cōxwa kam, quê ha me pahkwỳ mehhi — hane.

¹¹ Mã krãhtare jō pahhi catêjê te nee me Pawrô par nare. Ne quê ihtỳj cute me pàr kre to me ipa catêjê me, me pàr kre jō pahhi me amji par. ¹² Mã por pjê ata kam me hàhhuc xà ata, nee me cumã impej nare. Mã ma apu curi amji to me kôc pahtỳjti ata jō putwry jakren caca. Cwỳrjapê ri hirôa pê me hàhtô atajê ma me hàhhuc xà ata pê me cator, ne Pàrkô jō krĩ wỳr me mōr to hahkre to prãm. Ne krĩ jō pjê pê Kênpo-jre ata kam me hàhhuc xà ata pê impejti. Ampo na? Pê ihtỳj cō pihpo ata na me hapôj xà ajkrut, kýj rũm ita ne harã mã ita. Na pê curi impeaj to impej, na pê curia amji to me kôc pahtỳjti ata jō putwry jakren prãm.

Cōxwa kam kôcti

Me Hápên Xà 23.11

¹³ Mã pyt cjêj xà jĩkjê rũm, awke rũm kôc te hãpêr kam ihtêm. Mã cute me hõmpun, ne ma me mōr xà na, cute me amji par xà ata kam me to incrà. Ne cute me pàr kre juwahi xà to hãpir, ne ihprĩ na me to mō, cōxwa tohkà na, Kênpo-jre jō pjê cahê na. ¹⁴ Mã ihprôt pê amcrà rũm, pjê rũm, kôc pahtỳjti cator, ne cute hãpêr kam ihtêm, ne cute cōxwa cati mã me ijaxàr. ¹⁵ Ne cute pàr kre camên kam ihtêm, na quê nee me to mōr xà ata cajpuw me to mōr nare. Cwỳrjapê ri cute me to hãpên catêjê te me to hãpên jicu, quêt taa kôc jũ kam me ito mō. ¹⁶ Wa ahnaa cō jipôc ri Cawta jō pjê ata jarã mã me mō. Mã amcrà ata tète ma kôc me to pra. Ne curia wa ite pàr kre krare to me ijàpir, pê ampeaj kam ite pàr kreti kam me pàr kre krare pyxwỳr xà ata hãpên xà tỳaj to ihtỳj. ¹⁷ Mã cōxwa kam me hãpên catêjê te me pàr kre krare jarĩ, ne cute pàr cuxê nō tỳaj ita to pàr kreti na me huwapre. Ne mehcunea ame Pjêhpôc jō pjê cahê na cōxwa jũrurure ata cupa. Quê ihhêaj to curia pjênxôm kam kên nō ihcahhêc cupate. Mã cute ame cupêhkà to irôrôc, ne cute me hicu, quêt taa kôc jũ kam me to mō. Ne kôc pahtỳjti ata cormã

apê. ¹⁸ Ne apê, mã cute me pàr kre jàhcukrêj to hũcapêr kam mehtêm, cōxwa kam. ¹⁹ Ne amcro incrê kam cōxwa kam me hãpên catêjê te me hũhkra to me pàr kre jō pàrcuxê me, cupêhkàhti me, cute cōxwa kam ampo itajê cunea to me hũcapêr par.

²⁰ Ne amcro jàhtôa kam, ne cute me pyt pupun nare, ne nee me caxêre pupun nare. Mã cormã kôc hãpêr tỳaj. Wa itỳj me icunea tyc na me amji cãmjĩ.

²¹ Ne me ijàpàn nare na ramã amcro jàhtôa, cwỳrjapê ri me hipôc ri Pawrô xãm ne me cumã:

— Me hũmre itajê, ca rỳ mã me ikampa, icakôc xà ata na, cu curia me ahtwỳ Kênpo-jre jō pjê kam, cu ha me ahtwỳ na mã, cu ha nee ame hajỳr to me pahcuhk-wỳr nare, ne nee ame ampo cunea to me papictor to hajỳr nare. ²² Ita caxuw wa ha me ana ahwỳ, ca me awcanã. Ne nee ca ha me anō atyc nare. Quê ha cama pàr kre to me acto. ²³ Ampo na mã wa apu ita jarê? Nee mã ampo na nare. Wa Pahpãm mã apê, mã caxwa te me pajakren ata kam, cōjkwa pĩn Pahpãm jarkwa to imprar catê te imã amji to ipipê. ²⁴ Ne cute imã hũjarên, ne imã: “Pawrô, apu pa nare, ca ha atỳj Xexa pê Roman catêjê jō pahhiti wỳr acato. Pahpãm mã akĩnti, na quê ha pàr kre kam me mō atajê cunea tehcajpa, ne me to ihtyc xà jahpa” hane. ²⁵ Cwỳrjapê ca me awcanã, wa itỳj Pahpãm to amji mã ihmpej, ne ampeaj kam wa harê, quê ha ihtỳj cute imã hũjarên xà ita to. ²⁶ Jirô pê mã quê ha ihtỳj me pahcamê, cō jipôc ri, pjê nō ata wỳr — hane.

²⁷ Ne ramã me ina amcro te cwatôxi kam ri cormã kôc pahtỳjti ata me ito kên to mō, cōxwa japrỳ te Pjê-cajpuw jō cōxwa kam. Mã caxwa awryc mã ipicapôn, mã pàr kre to hãpên catêjê te me amji cajpêr, ramã pjê na me ijàhtêp to me imōr na. ²⁸ Cwỳrjapê ri cute me pàrcuxê nō to me ampo pytĩ na hê ne ma me mên, cute me cōxwa tu to me ipipên, ne me hõmpun prãmte. Ne cute me to ipipên, mã pàrcuxê na me hara capô te wintixet, cõhtu na. Ne ipipên xà ita jirô pê hipêr cute me to ipipên, mã pàrcuxê na me hara capô te winti ne ihkôt pyxit. ²⁹ Mã ampeaj kam me cumã kên nō te pàr kre cahhêc na hũpa. Cwỳrjapê ri cute me huwahi xà to cwat, ne cōxwa kam me mên, pàr kre jō kam, ne cute me Pahpãm wỳr kam mehtêm ne me cuwỳ, quê apê pyrentu to prãmte. ³⁰ Mã ma pàr kre to me hãpên catêjê aracri me hapôj prãm, pàr kre pê. Ne cute pàr kreti krã ri me pàr kre krare mã hikran, cōxwa kam, amji cumam, ne ihhêj ne me pàr kre juwahi xà mên prãm, ihkrã rũm, ne ma cama aracri pàr kre pê me cator, ne ma jũ kam memprar to prãm. Ne ramã cute me pàr kre krã rũm pàr kre krare ata mên, cōxwa kam. ³¹ Mã Pawrô te krãhtare catêjê me, me hõ pahhi mãn, ne me cumã:

— Hamre, quê ha pàr kre to me hãpên catêjê itajê pàr kreti kam nee me hàhhuc nare, ca ha nee me anō amji pytàn nare — hajỳr.

³² Mã krãhtare catêjê jũpar, ne cute me pàr kre krare ata mã hê jakep, mã caprỳ ma tẽ.

³³ Mã awcahti xà wỳr Pawrô te mehcunea wỳr, cute me ampo krêr prãmte, ne me cumã:

— Ramã ate me amcro te cwatôxi ita jikaj xà, nee ate me ampo krêr nare. ³⁴ Wa me awÿ, ca me ampo krê. Ca ha atÿj me acunea me apà, ate me gũcanãr xà caxuw. Ca ha nee me anõ apictor nare, ne nee me anõ kí pyxitre nõ ipictor nare — hane.

³⁵ Cute ita jarên jirô pê, cute pãw pyr ne hipôn, ne mehcunea kam mare mã to Pahpãm mã ihcakôc, hũrên hakry na, ne me hàpàn kam ihtêm. ³⁶ Mã mehcunea jũcanãr, ne hõtpê mehtÿj mã me hàpàn. ³⁷ Pê pàr kre kam mehcunea me hàhtô na me xěj pi-jakrut, ne ihkôt xetênta xěj. ³⁸ Mã mehcunea jàpàn jirô pê, cute cô kam me arÿjhy cahàc cunea jaxwÿr, pàr kre ihcajcoc prãmte.

Pê mehcunea mempeaj na pjê wÿr me cato

³⁹ Mã apê, mã pàr kre to me hàpên catêjê te me pjê nõ pupun, ne me cupê pjê ata jahkre kêatre. Mã cute me cô kãkãn nõ pupun, por curi pjê kam kên jamreare ata ri. Ne cute xwÿ mã pàr kre te mõi, ne pjê impejti ata kam hàhhuc na me to amji kam hapac. ⁴⁰ Ne cute me pàr kre juwahi xà mã me hê jitep, ne cute me cumã hikran, côxwa kam. Ne cute mehcrÿn xà mã hê pôn par, por me to ihkrã maj xà ata me. Ne cute me cupêhkàhti jarÿ ihkrã rÿm, xwÿ mã amÿ amcrà wÿr mõi prãmte. ⁴¹ Mã hamreare, pjênxôam to pjênxôm, mã cumã pàr kre krã xà, ne curia hàhhuc. Mã hõ rÿm côxwa te carôt to apu ihkêhkên.

⁴² Mã krãhtare catêjê te me ajpên par, cute me hacjên catêjê cunea jipej na, quê nee mehnõ cô tohkà na pjê wÿr cator, ne ipimxur ne ma ihtêm nare. ⁴³ Mã me hõ pahhi ma apu Pawrô curan to xuwaca, ne nee cute ihcuran na me to tojnõ nare. Ne quêt cute me cumã harkwa hyr, quê mehpa na me irêr pejre atajê côxwa kam mehpyÿm, ne ma mehpa na me pra, amcrà ata wÿr. ⁴⁴ Jirô pê quê ha mehkwy hanea ne pÿ po na me huwahi, nare, quê ha pàr kre jô pÿ kwÿc na me huwahi ne ahnaa ame rê, ne mehtyc xà jahpa. Ita na wa me icunea te me amji pytâr, ne pjê mã ame ijarôj, me ipeaj na.

Pê Pen jô pjê kam ame mõi

28 Ne ramã amcrà mã me ipej pèa mã me icator, ne ite me cô jipôc ri pjê ata japyrÿ jahkre pej, mã haprÿ te Pen jô pjê. ² Mã curi mehkry catêjê te hõtpê me ito impejti. Mã ta wrÿ ne krya to kry, mã cute me cuhy catia ton. ³ Mã Pawrô te pÿ kwÿc to cuprôn, ne aracri ihkôt cagã pahtÿjti kêanre ata pyr ne cuhy kam haxwÿr, mã cagã cuhy cacro te intoj, ne cute hũhkra na inxar, ne kam ajêt ne apê. ⁴ Mã mehkry catêjê te me cagã pahtÿjti ata pupun, mã hũhkra kam ajêt, mã cute ajpên mã me harên to:

— Ihhêj ne hũmre ita pê mehcuran catê. Ne ramã côxwa pê cator, ne cute ihkên ton ita jahpan xà na, quê ha ita caxuw ihtÿj ty — hajÿr.

⁵ Mã Pawrô te cagã cuhy kam to hàpêr, mã cuhy kam ihpÿm, mã nee Pawrô te cagã ata xà nõ cajpêr nare.

⁶ Mã cute inxar xà kam mehtu jikaj, ne hanea ne mõi

pejti kam ihtyc xà na me hikaj. Ne tee me hamã, ne tee me hikaj, mã ihkên xà jirô pê ihpÿm, mã me hõmpu, mã nee cumã hà nare. Mã hacpÿa mã cute me amji kam hapac xà to me ipintuw, ne me amji mã:

— Pÿhàpà, jÿm ita pê pahpãm nõa — hane.

⁷ Mã hãm xà ata cape na, cô jipôc ri pjê jô pahhi japyrÿ te Puprijô ata jô pur. Mã cute me ito kêre nare, wa curia amcro incrê kam ame ipa. ⁸ Mã hũm mã kry, ne kam hahôc mã nõ, mã Pawrô xàr ikre caxwÿn mã, ne cute Pahpãm mã ihcajrên, ne ahna hũhkra xir, ne caprãr. ⁹ Jirô pê mã ri, cô jipôc ri pjê ata kam me hà atajê cunea me cator, mã cute mehcunea caprãr.

¹⁰ Mã cute me imã ampo jàhtôa ne me hõr. Ne me imõi xà wÿr ri, cute me imã, por wa me ampo cunea na me prãm atajê jôr, me to imõi xà caxuw.

Pen jô pjê pÿn Roman jô krÿ wÿr mehtêm xà

Roman 1.10-12; 15.30-32

¹¹ Wa ite amji to me putwrÿ incrê kujahêc jirô pê mã, wa pjê ata kam Mehtehcajpar jô krÿ jô pàr kreti jàhhuc ne xa, kaam me imõi xà caxuw, haprÿ te Caxô me Poruc. Pê pàr kre ita ramã amji to kôc pahtÿjti jô putwrÿ ata kujate, pjê ata kam. ¹² Wa kam me mõi ne Xiracuxa jô krÿ kam me icator, ne curia ite amji to me amcro to incrê. ¹³ Ne hipêr ma me têt, ne Krÿpãtre mã me icator. Mã apê, mã kôc te hàpêr kam ihtêm, côxwa cati rÿm, wa ite me imõi to amcro to me ipijakrut, ne Cõhkrãcator jô krÿ mã me icator. ¹⁴ Ne krÿ ata kam wa ite me Jeju na mehkwy kwÿ cajpar, mã cute me ijator, wa me ijàhhuc, ne curia ite me cape na amji to me amcro to xet ne mehkujahêc. Ne amcro te xet ata na wa ma me mõi, Roman jô krÿ wÿr. ¹⁵ Mã Roman jô krÿ kam Jeju na mehkwy te me icator na me ijarên par, ne ajpên me icajpar to me mõi. Ne cute me icajpar, por krÿ kam me hàhhuc xà japyrÿ te Incrê ata me Apij jô krÿ kam. Mã Pawrô te me hõmpun, ne cute Pahpãm mã me hũrên hakryti na amji jarên, ne cute me to amji mã hũcanãr to ihtÿj.

Pê Pawrô Roman jô krÿ kam hikwa

Me Hàpên Xà 17.5-6

¹⁶ Wa Roman jô krÿ kam me icator, mã cute me Pawrô to tojnõ, mã ihtÿj amjia kôt ihkrÿ, krãhtare catêjê nõ cape na.

¹⁷ Ne amcro incrê jirô pê mã ri, Pawrô te Juta catêjê jô pahhi na hàhwÿr, Roman jô krÿ kam, quê ha me ajpên cajpa, ne me cuprô. Mã cute me cuprôn, mã Pawrô te me cumã:

— Ýhÿ, me ikjêjê, wa nee ite ampo kên ton nare, me pahkwÿ cuna mã, ne hanea nee ite me pancaca xà cuna mã ampo kên ton nare, por pê me panquêtiti me pamã incaca xà gô ata cuna mã ite nee ampo ton nare. Cakrô mã ihtÿj Juta catêjê te Krÿpinkrên kam me ijarên, ne cute Roman catêjê mã me ijôr. ¹⁸ Cute me icukij, ne me imã hikran prãmte. Ampo na? Nee cute me ikên nõ na me ijarên par nare na ri, mã ihtÿj ajte me icuran prãm. ¹⁹ Ne ma ame imã hikran caca. Cwÿrjapê wa ite mehkwy, quê Xexa pê Roman catêjê jô pahhiti wÿr me

ito mõ ne curia me icukij. Ne nee mã wa me pahkwỳ to ite icakôc kên prãm to icator nare. ²⁰ Pê Pahpãm me papê Juta catêjê mã, jũm pê Crixto to awjahkre ata, cu me pahcunea me hikaj ata cwỳrjapê mã, wa wakỳre itajê te ijuwaprea na xa he. Na wa ite me ana ijàhwỳr, ca me cuprõ, wa ite me apupun, cupahte amji mã me pahcakôc prãmte — hajỳr.

²¹ Mã me Pawrõ mã:

— Wa ite nee me Juta jõ pjê pĩn ihkàhhôc nõ pyr nare, ite me gahkre pej xà caxuw. Ne hanea ne, nee me pahkjêjê nõ ajpên akôt ana ihcakôc xà kên nõ to mõi nare. ²² Na wa itỳj ampeaj kam, ate amji kam me gapac xà na me apar, ne me gahkre pej to prãm. Wa ite me apê Jeju na mehkwy na xwahna par, pjê cunea kam, krĩ cunea kôt, ne krĩ cunea kam me akwỳ na mehcakôc kêanre — hane.

²³ Mã cute Pawrõ na me ajpên par, ne me amji mã amcro hyr. Ne amcro hyr xà ata na mehkwy jàhtõa ne ma me mõ, por curi Pawrõ apu mõ ata ri. Cute me Pahpãm himpej xà te amji kam hapac xà cunea jarên par prãmte. Mã cute harëan to pyt. Pê por quê ha jũ caxuw pjê Jeju to ihhimpej xà jõ amcro kam hàhhuc xà ata to pê me cumã hũjarên partu. Ne cute Mojxe xwỳ jõ kàhhôc jarên, ne cute Pahpãm jarkwa na mehhôc catêjê jõ kàhhôc jarên, ne tee apu Jeju pê, por pê Pahpãm jũm to awjahkre ata pro mên prãm. ²⁴ Mã me pyxitre hõtpê Jeju to amji mã mehhimpej, mã mehkĩnte mehkwy ma amji mã ame to hajỳr caca. ²⁵ Ne ma mehcunea cator, ne ame ajpên mã, ne ma amehcakhũm. Ne me cator xà wỳr, mã Pawrõ te me cumã:

— Pê ramã Pahpãm jarkwa na mehcakôc catêjê nõ japrỳ te Ixaj ata Pahpãm Carõ Pejti jarkwa kôt me

aquêtjê mã harê. Ne toa me amã hũjarê. ²⁶ Ne pê me cumã harên to hane he:

“Mõ, ne atajê mã ita jarê, ne me cumã:
‘Ca ha ampeaj kam me kampa, ne nee mempar nare, ne ampeaj kam me rĩt, ne nee me hõmpun nare’
hane.

²⁷ Nãmri ajte atajê krã tỳaj to ihtỳj, ne cute me hapac jihê, ne ame hõt ne amehcuhhê. Quê ha me to hajỳr nare na mã, quê ha ihtỳj mentoa to me hõmpu, ne ihtỳj me hapac to me kampa, ne ihtỳj mehkřã kam me kampa, ne ihtỳj iwỳr me amji jaxà, mãr wa me caprã” hane.

Hõ, pê Pahpãm me cumã hane.

²⁸⁻²⁹ — Na wa ha me amã harê, ca me hahkre pej pyrentu. Ampo na? Pahpãm te mehcakrit atajê wỳr amji jarên xà impejti ita kujahêc. Na quê ha ihtỳj quêt me kampa. Por Jeju pê mehkên pê me hũtär catê na harên xà ata na, quê ha ihtỳj quêt me kampa — hane. Ne Pawrõ te me cumã ita jarên jirõ pê mã ma ajpên to me cator.

³⁰ Mã caku pijakrut kam curia Pawrõ ihkrĩ. Cute jũm mã hũrkwa na ihpore jõr, ne kam ihkrĩ. Mã hõtpê mehkwy me ipa ne me hõmpu, na ri hõtpê ahna Pawrõ jakry. ³¹ Na pê ajco Pahpãm himpej xà te amji kam hapac xà jarê, ne hanea ne me cumã Pahhiti pê Jeju pê me pahkritxwỳ jarên to ipa. Na pê ihtỳj ihcakôc, ne nee amji mã ampo cupa nare, pê nee ajco ampo ihcaphêrkär nare. Hamre.

ROMAN

Pê Pawrô pê Jeju jarkwa na memprar catêjê nõ, ne hanea ne cupê cupêhkà te ikre cahyr catê, ne hâpên xà ata to pê ajco amji to ajpa. Ne pê Jeju na mehkwy jakrã Roman jõ krí kam mehkří atajê wýr, pom cu me hõ kàhhôc cahyt ita kujate. Na pê hõ kàhhôc ita japry pê (Roman).

Ne hõ kàhhôc ita kam cute me pamã harên to hajýr he. Pahpãm mã me pahcunea kêanre, me panquêt xwy pê Atãw cukwa kam. Na pê me pahcunea me pahtyc xà wýr me pamprar xà. Ne pê Jeju amji to me pahkritxwy, ne me pajaxà kam ty. Ne ihtyc xà ata to, cu ha ampeaj kam amji mã me pahhimpej, quê ha ihtýj Pahpãm me pahna amji capa. Ne hanea ne Jeju kam me pahhônco xà ita me, hanea ne Pahpãm Carõ Pejti te me pamã, pahte amji kam me pajapac xà intuw impejti jõr xà ita kôt, quê ha Pahpãm me pahna amji capa.

Pê Pawrô me cumã amji jarê

Me Hâpên Xà 13.32-33; 22.14-15, 21

1 ¹⁻⁷ Hàpà Roman jõ krí kam, me apê me ikwy pê, Jeju kam, pahte ajpên to me pahkjêjê atajê. Pê Pahpãm mã me akín, na pê me ato hõ tekjê. Ipê Pawrô pê Jeju Crixto mã ijâpên catê, ne hanea ne ipê harkwa na cumã iprar catê. Ne itea wa me amã ihkàhhôc ita kam ihhóc ne ihkujahêc. Ne wa ijõtpê Pahpãm me Pajõ Pahhiti pê Jeju Crixto mã me acajrên to hane he:

— Ýhý, me ijõ Inxũ Cati, ca ha Roman jõ krí kam, me akwy mehkří atajê caprí, ne me caxwýn caxwãm pê me cumã me acarícti gõ, mãr quê nee ame amji mã ampo cupa nare — hane. Ne Pahpãm pê mehcunea mã, ite Jeju pê me pahkritxwy, ne cupê me pahkên pê me pahpytâr catê na harên xà impejti itajê caxuw icapi ne ixãm. Ne pê rý pëa mã, Pahpãm ramã me pamã Jeju to hũjarên xà impejti ita to awjarê, ne to awjahkre. Pê harkwa na cute mehcahôc catêjê Pahpãm jarkwa jõ kàhhôc kam, Jeju pê me pajõ Pahhiti pê Pahpãm kra jũjarên xà impejti ata na mehhóc. Ne Jeju pê me paxũmrea pyrác na, me pamã hahkre pej. Ampo na? Cupê Tawi xwy pê pahhi támxwy támxwy nõ na, me pamã hahkre pej. Ne hanea ne me pamã, cupê Pahpãm kraa to Pahpãm kra, ne curũam cator, ne nee cute jũ caxuw ampo kên ton nare, ne impej pit na, me pamã hahkre pej. Ne hanea ne carôat týjti te ihtyc jirô pê hacpýa mã to ihtír xà ata kôt, me pamã cupê Pahpãm kraa to ihkra na hahkre pej. Quê Jeju hamreare na mã, wa nee ipê harkwa na cumã iprar catê nare. Ne ihcãmtãa rũm, pê Pahpãm ito cumã harkwa na iprar catê, ne imã harkwa hyr to hane he:

— Ýhý, Pawrô, ca ha pjê cunea kam, kríxàre cunea mã, ijarên to apa, ne ito amji mã mehhimpej na me to, quê ito amji mã mehhimpej, ne me ikampa — hane. Pê wa harkwa kôt to, pê ca hanea ne me awpa, na pê Pahpãm Jeju Crixto tekjêa na amji mã me acapi. Na ri me apê mehkwyã.

Pê Pawrô mã ihtýj me cumã Pahpãm jarkwa jarên prãm

Roman 15.22-29; Me Hâpên Xà 28.15

8 Ýhý, pê wa hõtpê ajco Pahpãm mã me acunea pyrên ijakryti na amji jarê. Ampo na? He pjê cunea kam Jeju Crixto cãmtãa rũm ate amji mã me Pahpãm to hajýr, ne ate amji mã me to ahimpej na, cumã me gahkre pej. ⁹⁻¹⁰ Ne wa ijí me ite amji kam ijapac xà cunea to Pahpãm mã apê, na wa mehcunea mã ihkra pê Jeju pê me pahpytâr catê na harên xà impejti atajê jarên to ipa. Ne Pahpãm mã, ite me acajrên to ipa na ijahkre pej, na quê ihtýj ahna ijarê. Ne wa hõtpê hãn ne cumã amji cajrên to hane he:

— Me ijõ Inxũ Cati, ate amji kam gapac xàa na Roman jõ krí kam me akwy mehkří atajê wýr itêm, ne ite me hõmpun na ito — hane.

11 Ne ampo na wa apu cumã amji cajrên to hane? Nee mã ampo na nare. He imã me apupun prãm to me apupun prãm. Ne me amã Pahpãm Carõ Pejti te mehkwy to impej xà caxuw, me cumã cute amji kam hapac xà te amji jahkre pejti nõ jõr xà ata nõ gõ, mãr quê Carõ Pejti carôat kôt me acaxwãm pê me ato impej, ne me ato ihtýj. Mãr ca xwy kam amji mã me to ahimpej to me apa nare. **12** Ne pom jũ caxuw pahte me ajpên pupun xà ata caxuw, cu ha me pahcunea me ajpên pupun kam tẽ. Ne me ajpên pupun xà ata kam, cu ha pahte Jeju to amji mã me pahhimpej xà ata na me ajpên tehcajpar to me mõ.

13 Ýhý, Jeju kam me ikjêjê, wa rý pëa mã me awýr hãn ne amji krâr to ipa na, ate me ijahkre pej na, me ato prãm. Mã hãn ne hõtpê ampo, ma me atête icahpêrkâr to ipa. Ne wa ramã ite kríxàre kwý pê mehcahkrit, ne nee me cupê Juta catêjê nare atajê kôt, me cumã, por ite me amã Pahpãm jarên to ijũjarên atajêa to, wa hãn ne me cumã ijũjarên to ipa. Ne nee ijũjarên xà atajê kôt hamre nare. He ihtýj ite me cumã ijũjarên xà itajê kôt Pahpãm wýr me apkjê. Na wa itýj cormã me cuxà me awýr icator, ne me amã, por me acahê na me cupê Jeju jahkre kêatre, mã nee amji mã me to ihimpej nare atajê mã harên prãm.

¹⁴ Ne mër ampo na mã wa ame ato hane? Nee mã wa ampo na ame ato hajÿr nare. He ipê pjê cunea kam mehcunea mã Pahpãm jarên catê, na quê ha jũm pê krĩ cati kam mehkĩ catêjê nõ, nare, cupê ahkêt kam ihkrĩ catêjê nõ, nare, cupê mehkĩ kre te amji jahkre pej catêjê nõ, nare, cupê ampo jahkre kêatre catêjê nõ cakrô, wa ha itÿj cumã Pahpãm jarên xà impejti itajê jarê. ¹⁵ Na wa itÿj me awÿr itêm, ne Roman jô krĩ kam me akrĩ catêjê mã, Jeju pê me pahkritxwÿ ne me pajaxà kam ihtyc, ne hacpÿa mã ihtĩr na harên xà impejti itajê jarên to ipa to prãm.

Nee Pahpãm jarkwa jũ na Pawrô pahàm nare

Roman 3.21-24

¹⁶ Ne nee wa Jeju pê me pahkritxwÿ na me amã harên ita na amji jũ na ipahàm nare. Ampo na? He Pahpãm carôt tÿj na ri cupê, cute amji mã me to ihhimpej catêjê cunea kên pê me hũtâr catê. Na ri cupê mam me cupê Juta catêjê pytâr catê, ne hanea ne cupê mehcahkrit, pê Juta catêjê nare atajê pytâr catê. ¹⁷ Pê rÿ pêa mã Pahpãm jarkwa na ihkãhhôc kam, mehhôc ata kam, hũjarên to hane he:

“Quê ha jũm ito amji mã ihhimpej, wa ha, cupê jũ caxuw icuna mã, cute ampo kên ton catê nare ata to amji kam ijapac. Na wa ha itÿj ahna amji capa, quê ha icahê na ihtĩr na ipa rohnÿtti mã” hane.

Hõhõ, Jeju jũjarên xà impejti ita te ri me pamã ita jarên.

Mehcunea mã Pahpãm ipa na, hahkre pej

Me Hãpên Xà 14.17; 17.22-29; Ipipê Xà 9.20-21

¹⁸ Ne ramã Pahpãm te me pamã pjê ita kam mehkĩr kêanre kam incryc xà ata jarên, cu pahte me hahkre pej. Ne pom mehkĩr kêanre itajê te amji kam me hapac xà cunea tũmti, ne ihkêanre. Ne nee ampo pejti, hêj xi nare to me amji kam hapac to me ipa prãm nare. Ne atajê ri Pahpãm te ame to kên xà na, ramã me pamã hahkre pej. Ampo na? Mehkên xà itajê, ma cute me Pahpãm jahkre pej xà ata to me cupê amxu. ¹⁹ Ne pê ramã hanea ne Pahpãm me cumã amji to ajpê, cute me kam hapac, ne me hahkre pej prãmte. Mã nee xãmte cute mempar, ne amji mã me to ihhimpej nare. ²⁰ Ne pê ramã jũm te Pahpãm pupun xà nare ata, pjê me cõjkwa ita ton pêa mã, kam ampo itajê cunea to. Ne hãpên xà atajêa kôt, quê ha cupê Pahpãm to Pahpãm, ne ihtÿj na me hahkre pej. Ne hanea ne cutea ri carôt tÿjti to hãpên xà itajê ton na me hahkre pej. Cwÿrjapê quê ha nee jũm, cute ampo pupun xà itajê na hãprãr to amji jarên to:

— Wa nee ite xãmte Pahpãm te ihkrĩ na hahkre pej nare — hajÿr nare.

Nee mehcunea mã Pahpãm to amji mã mehhimpej prãm nare

²¹ Ne cute me Pahpãm jahkre pej cakrô, nee amji mã me to cati prãmte me harên to:

— Ampeaj kam ri apê Pahpãm to Pahpãm — hajÿr nare. Ne cute me hãpên xà pejti ton atajê pyrên me hakryti na cumã me amji jarên xà kaj na, ajte ampo kên to pit mã me amji kam hapac to me ipa. Ne cute me amji kam hapac xà kôt hamreare atajêa to pit mã me amji kam hapac to me ipa. Ne mehkĩr kam ampo kên to cute me amji kam hapac xà itajê pê ihhêj rũm awcapãtkôti kam amõr xà na, ate amji pupun xà nare ata pyrãac, na quê ha nee me cumã me cute amji kam hapac xà impej hamreare ne. ²² Ne me cupê amji jahkre kêatre, na ri ihtÿj mehkĩr kreti na ame amji to mehhêj to me ipa.

²³ Ne nee ajte cute me Pahpãm tĩr rohnÿtti mã ata to amji mã me hãmnãn to ipa nare, ne ihcunea na me harên pejti to ipa xà kaj na, ihtÿj me hõ pahpãm cahàc pê, ampo cunea krekà atajê to amji mã me hãmnãn to me ipa. Atajê pê me hũmre krekà me, pryjara krekà me, ampo pry krekà me, cagã krekà carĩcti, cakôc nare atajê, ne mempar nare cakrô, mã ajte me harên to impejti to me ipa, ne toa amji mã mehhimpej.

²⁴ Ampo na? He me hũmre itajê te amji jahkre kêatre, na ri ihtÿj me ampo kên ton to me ipa, cwÿrjapê ri Pahpãm te mehkên itajê mea mã me hicu, ne me cumã harkwa to:

“Hamre, ca ha amjia kôt, ate amji kam me gapac xà kên itajê ton to ame apa, wa ha nee hipêr me ato ihimpej nare” hajÿr.

Na ri ramã me hũmre ame ajpên to kêanre, mã hanea ne pyjê ame ajpên to kêanre, cute me ampo kên kam me pahpahãmti atajê ton to ame ipa incwÿrjapê. ²⁵ Ne cute me Pahpãm hêj xi nare ata jicu, ne ma me hõ Pahpãm cahàc krekà kêanre hêj xiti ata wÿr me hãr. Ne nee ajte me amji mã Pahpãm te pjê ton, ne kam ampo ton catê ata kĩn nare. Ne hanea ne, nee me cumã harkwa to:

— Apeaj to apej, ne apê me ijõ Inxũ Cati pê me ijõ Pahpãm — hajÿr nare. Ne ajte cute pjê kam me ampo ton atajê mã me harkwa to:

— Apê me ijõ inxũ cati pê me ijõ pahpãm, na wa ato pit mã, me amji japackre, ne atoa me amji mã me ihimpej to me ipa — hajÿr. Ne pjê kam pahte ampo itajê mã me pahcakôc to hajÿr xà na ihkaj na, ne ihkêanre, ne quêt Pahpãm mã ri me pahcakôc xà te hajÿr na impejti.

Mehcunea te amji kam hapac xà kên pit

Ipipê Xà 22.11

²⁶ Mã mehcunea mãnea mã mehkên xà kêanre kam me pahpahãmti atajê ton to me ipa, kam ajte cute me to incrã tu. Cwÿrjapê ri Pahpãm te me kam incryc xà to me cumã harkwa to:

“Gapacta ne, ate me ampo kên ton to prãm atajê cunea ton to me apa” hajÿr.

Cwÿrjapê ri pyjê me, me hũmre te me ajpên caxun jicu, ne pyjêa me ajpên caxu. Ne Pahpãm mã cute me

ajpën to hajÿr xà ita na ihkaj na. ²⁷ Mă me hũmre te me hajÿar ne cute mehprõ caxun jicu, ne me hũmrea me ajpën caxun prăam kam ame ipa. Ne ihtÿj ajpën caxuw me ampo kên itajê ton to me ipa, na quê ha Pahpăm me ahna mehkên xà ata to ihtÿj tu, quê ha ame to kēanre ne.

²⁸ Pê Pahpăm me cumă amji to ajpē cacrô, mă nee mempar, ne me hahkre pej prăm nare. Cwÿrjapê ri Pahpăm te me hucu, mă cute mehkên ton xà atajêa me to ihhimpej to ipa. Cwÿrjapê ri jũ caxuw cute me ton jicu nare. Mă tee intête me hapackre, mă nee me hũpar nare. ²⁹ Ne cute me ampo kên ton xà itajêa te ramă me to hipu tu, na ri ihtÿj me ajpën caxun prăam kam ame ipa. Ne mehkwy pê, ampo cunea to amji mă ihtũm prăm to me ipa. Ne jũ wÿr quê mehkên ton tēte me amji jiprõ, ne ihtÿj ajpën jũ na me cumă ampo kîn. Mă ihtÿj me ajpën curan to me ipa. Ne ihtÿj me harkwa to me ajpën cujtên to me ipa, ne ihtÿj ame ajpën mă ihhêj to me ipa. Ne mehkwy te jũ mă me ton nare kam, cama me cupê ame ampo to ipictor to me ipa. Ne ihtÿj mehhêj xi to me xwahna to me ipa. ³⁰ Ne ihtÿj ajpën na mehcakõc kēanre to me ipa. Ne ma ame Pahpăm curê, ne nee me hõ pahhi kam mare mă, ahna mehcakõc kên na me hàtāt nare, ne me cumă amji to cati prăm to pit mă, mehcakõc to:

— Pa ri me acunea jirõa pê icati — hane. Ne ahpÿanre na cumă, cute ampo kên ton xà jàhtõa ton to, to ipipē to me ipa, ne nee me hũmjê me, menxyrxwÿ impar nare. ³¹ Ne me cupê ampo pejti ton jahkre kêatre, na ri ihtÿj me ampo kên pit ton to me ipa. Ne nee cute mehcakõc xà to mehcakõc atajê na, me amji par nare. Ne ihtÿj mehkwy to me hàprê to me ipa, ne nee me cumă jũm caprĩ xà nare. ³² Ne ramă cute me hajÿr catêjê caxuw Pahpăm te me to ihhimpej xà ton, mă cute ahna mehhõc ne me hahkre pej, ata jarēn xà te:

“Por ampo kên ton to me ipa atajê ri mehtyc xà, ne nee Pahpăm cahê na ame ipa xà nare.

Ampo na?

Quê ha ihtÿj mehkên mă me cumê” hajÿr.

Na me cumă hahkre pej cacrô, mă ihtÿj cormă me ampo itajê ton to me ipa, ne mehkwy me, me ajpën mă:

— Ate me ampo kên ton itajê kôt, imă me apeaj to me apej — hajÿr to me ipa.

Cute me to kên jahpan xà na Pahpăm mă me hàmjõr xà

2 Ÿhÿ me ikwÿ, ca ihhêaj to mehkên itajê na me harēn pa, ne nee me amji mă harēn to:

— Jũmjê itajê kēanre, ne pa nare, nee quêt ikên nare — hajÿr nare. Ampo na? Ca ihhêaj to hanea ne me akên itajêa ton to me apa. Cwÿrjapê ca atÿj ate me amji jarēn xà ata to me caa, me amji curê capa. ² Ne me pamă, quêt catyt kam Pahpăm te ipa na hahkre pej. Na quê ha catyt kam mempej catêjê me, mehkên

catêjê to ajcapõ, ne mempej catêjê impej mă me cumê, ne mehkên catêjê mă:

— Ramă ite me amă ampo kên jarēn, ne me amă ihcawpa, ca mǎnea mă ate me ton, na wa ha me akên mă me amê — hane.

³ Ne me ca, ca ha ate catyt kam me apa nare na, nee ca ha me jũmjê kên jarēn pa, ne me harēn to:

— Jũmjê itajê catyt kam me ipa nare, ne mehkēanre, cwÿrjapê quê ha Pahpăm mehkên mă me cumê — hajÿr nare! Ampo na? He ate me hajÿar ne me akēanre ita kam, ca ha nee Pahpăm te ato kên xà ita pê jũ kam atēm nare. ⁴ Ne ca ihhêaj to me anõ garkwa to:

— Pahpăm pej ne hàhcaprĩ, cwÿrjapê quê ha nee ite ikên ton itajê jahpan xà na ikên mă imēn nare — hajÿr nare! Ampo na? He Pahpăm jàhcaprĩ na ri incaca xà amji mă ampeaj ne hapõj to ipa. Na quê nee akên mă amēn pyrentu nare, ne ihtÿj hipêr amji mă ampi ne akõpĩr to mõ, ca ihhêaj to akên ton jicu, quê ha nee akên mă amēn nare.

Quê ha Pahpăm me pajapên xà jahpan xà na me pamă amgõ

⁵⁻⁶ Ne quê ha jũ caxuw Pahpăm te me pahcukij, ne me pahto ipicokjêr xà jõ amcro cato, quê ha incryac kam, ahpÿanre na mehkên catêjê kên mă me curê, mehkên jahpan xà na. Na ca ha me anõ te akră kēanre, mă Pahpăm jàhcaprĩhti te me amă me akên itajê cawpa cacrô, ca ha mǎnea mă akên ton to apa na, ca ha me ca ramă amji caxuw Pahpăm mă mencryc to apicamēn to me mõ. Ne ahpÿanre na pjê kam, cute ampo ton to me ipa xà na Pahpăm te me hõmpun, ne me hahkre pej xà atajêa kôt, quê ha me cumă hàmjõr to mõ. ⁷ Ne por catyt kam, cute amji kam me hapac xà impejti to me ipa kam me to incră atajê ri, Pahpăm mă me amji cajrēn to me hane he:

— Me ijõ Inxũ, ca ha ca me ito me icati, ne ipejti na me ijarē. Ne nee jũmjê te me ito icati, ne ipejti na me ijarēn na imă me to prăm nare. Wa cama acahê na me ikrĩ rohnÿtti na me amji to prăm — hane. Atajê mă quê ha Pahpăm mehtĩr rohnÿtti mă na me to, mǎr quê cahê na me ipa rohnÿtti mă.

⁸ Ne mehkwy te nee me hajÿr nare, ne mehkên to pit mă me amji kampa. Ne cute ampo ton to me amji cajuaw xà atajê to pit mă me to me ipa. Ne ma ame catyt kam ampo pejti atajê caca, ne ampo cupan xà kên atajê to pit mă me amji jahõt to me ipa. Ne cute me hajÿr catêjê, quê ha Pahpăm me kam incryac kam, me ahna cute mehkên ton atajêa to ihtÿj tu. ⁹ Ne por pjê cunea kam me ampo kên ton to me ipa atajê, quê ha me amji pupun xà kēanre to me amji pupu. Quê ha xa mam me cupê Juta catêjê me amji pupun xà kēanre to me amji pupu, jirõ pê quê ha cormă mehcakrit atajê hanea ne me amji pupun xà kēanre to me amji pupu.

¹⁰ Ne quêt catyt kam, cute me amji kam hapac xà impejti to me hàpên to me ipa atajê, quê ha Pahpăm me cumă ampo pej pit gõ, ne me cumă harkwa to:

— Wa ha me acati na me ato, ca ha mehcunea kam mare mã me acatia to me acati, quê ha me apupu, ne mehcunea me apejti na me gahkre pej. Ne wa ha me amã icarĩcti gã, quê ha nee hipêr me amã ampo hũpa nare — hane. Quê ha mam me cupê Juta catêjê to hane, ne hapu na mehcahkrit to hanea.

Pahpãm mã pjê cunea kam ampo krĩxàre cunea pipẽn pit

¹¹ Ne Pahpãm pjê cunea kam, mehcunea to amji kam hapac xà to ajpẽn pit. ¹² Ne mehcahkrit pê Pahpãm te me to ihhimpej xà jahkre kêatre. Ampo na? Nee me cumã Mojxe xwỳ jõ kàhhôc hamreare. Cakrô, hõtpê me caxwãm pê cute amji to me ihhimpej xà kôt, hajÿar ne, nee ihkôat me ipa nare. Na quê ha ihtÿj Pahpãm, cute mehkên ton jahpan xà na, mehkên mã me cumẽ. Ne pê rỳ pêa mã me cupê Juta catêjê, Pahpãm te me to ihhimpej xà jahkre pej cakrô, nee me to amji japackre nare, ne ihtÿj mehkên xà cunea ton to me ipa. Jahpan xà na quê ha Pahpãm me cumã harkwa to:

— Me amã, ite me ato ihimpej xà cunea na, ijahkre pej cakrô, ca nee me ito amji japackre nare, cwÿrjapê wa ha Mojxe xwỳ jõ kàhhôc kam, ite me ato ihhimpej xà atajê kôt, me akam icryc xà kêanre to me ato apê — hane. ¹³ Ne nee mã catyt kam jũmjê atajê te me Mojxe xwỳ te me to ihhimpej xà cunea jahkre pej xà atajê kôt, Pahpãm te jũmjê atajê na amji caxàr nare. Ne quê ha xa me hahkre pej, ne ihkôat cute amji kam me hapac xà to me hàpên to me ipa na, quê ha Pahpãm cormã jũmjê atajê na amji capa.

¹⁴ Quê ha mehcahkrit te Mojxe xwỳ jõ kàhhôc cukwa kam me Pahpãm te me to ihhimpej xà jahkre pej nare cakrô, ne amjia kôt me caxwãm pê, me hĩa kam cute amji kam me hapac xà imejti ton to me mõi na, quê ha ihhêj ne ramã me kam, me caxwãm pê Pahpãm te me to ihhimpej xà ata kôt ame ipa. ¹⁵ Ne quê ha catyt kam, cute amji kam me hapac xà imejti ton to me ipa atajê, quê ha ramã caxwãm pê Pahpãm te me to ihhimpej xà na me harê. Ne quê ha hanea ne ampo pej to, ne ihtÿj ahna amji jarên to:

— Wa ite ampo pejti ton — hane. Ne hanea ne jũm te cute ampo kên ton na hõmpun nare kam, me taa ahna amji jahkre pej, ne ihtÿj amji mã:

— Mã ajte, ite ampo kêanre ita ton — hane. Hajÿr xà ita ihtÿj caxwãm pê cumã Pahpãm jarkwa na harê.

¹⁶ Hõhõ, pom wa ite me amã ijũjarên xà to ijũjarên xà ita kôt, quê ha jũ caxuw me pajõ Pahhiti pê Jeju Crixto, Hũm jarkwa kôt me pahcunea cukij, ne me pah-to ajcokjê. Ne cumã me pahcaxwãm pê pahte amji kam me pajapac xà cunea jahkre pej, cwÿrjapê ri hãn ne catyt kam me pahto ajcokjê.

Cu ha nee jũmjê jirôa pê me pampejti na, amji to me pajàmnan nare

Roman 3.19-20

¹⁷ Ne wa ha ita caxuw Pahpãm na mehkwy kam me apê Juta catêjê mã, wa ha ita na ihhõc. Pom ca me apê Juta catêjê me amji to me gàmnan to:

— Me ipê Juta catêjê, cwÿrjapê ri Pahpãm mã jũmjê atajê jirôa pê me ikĩn. Ne pê Pahpãm me imã Mojxe xwỳ jõ kàhhôc kam, cute me ito ihhimpej xà cunea gã, ne wa ite me Pahpãm te me ito ihhimpej xà pupun, na ri me imã amji jahkre pej. Ne me ite Pahpãm te me ito ihhimpej xà cunea to amji mã me hajÿr to ipa, cwÿrjapê quê ha ito imejti ne — hane. ¹⁸ Ne me amã Pahpãm te ampo ton xà na amji mã me ato prãm xà ata na hahkre pej. Ne ramã ate me hõ kàhhôc to hahkre, ne me amã catyt kam, ate me ampo pej pit ton xà na, amji mã me capi na, me amã amji jahkre pej. ¹⁹ Na ca atÿj me amji jarên to:

— He me ipê hàhcujro xà pyrãac, na wa itÿj aw-capatkô pĩn, jũmjê imejti xà ata wÿr me hajo to me mõi. Ampo na? He jũmjê itajê pê mento tũm pyrãac, ne nee catyt kam cumã Pahpãm te me to ihhimpej xà imejti ata jahkre pej nare, na wa itÿj amji kôt me to mõi. ²⁰ Ne me ipê, mehkà te amji jahkre kêt catêjê atajê mã, amji jahkre pej japôj catêjê. Ne hanea ne me ipê ahkrare mã ampo to hahkre catêjê, mãr quê catyt kam me ipa — hane. Ne ca ame amji caprÿ jarên to me apa. Ca hanea ne me amji jarên to:

— Ampeaj kam ri ramã me imã Pahpãm te me ito ihhimpej xà cunea jahkre pej partu, ne ite me ampo cunea jarên xà atajê pê ampeaj kam, ne nee ihhêj xi nare — hane.

²¹ He pom me apê me cumã ampo to hahkre catêjê ita? Ne mër ampo na mã ca ajte nee me amji mã ampo to hahkre nare? Ne ca me hapackre to:

— Nee ame gàhkĩj nare — hajÿr cakrô, mõi na ca atÿj me cuxà me ahkĩ. ²² Ne me hũmre japackre to:

— Ca ha nee me aprõ kaj na, ahti na, jũm cahãj caxun nare — hane. Ne hanea ne pyjê japackre to:

— Ca ha nee me apjê kaj na, ahti na, jũm xũmre caxun nare — hajÿr cakrô, mõi na ca atÿj ate me cuxà ahti na jũm caxun. Ne cama apu pahpãm cahàc krekà caca cakrô, mõi na ca atÿj hũrkwa mã me acjêj, ne kam ampo to me cupê ahkĩ. ²³ Ne ca me amji jarên to:

— Pê rỳ pêa mã Pahpãm me imã cute me ito ihhimpej xà gã — hajÿr cakrô, mõi na ca atÿj me cuxà, ate harkwa jirô pê me apÿm, ne me cumã ihpahàm catia ton to me apa. ²⁴ Ne pê Pahpãm jõ kàhhôc ramã me ato hũjarên to hane he:

“Me apê Juta catêjê pê Pahpãm na mehkwy.

Ne me amã cute amji kam hapac xà jahkre pej cakrô, ca nee ihkôt me hakop, ne me ton nare.

Cwÿrjapê ri mehcahkrit atajê ihtÿj me akôt Pahpãm japrÿ to mehcahcõc kêanre to me ipa” hane.

²⁵ Ýhỹ, ipê Pawrô, ne ipê hanea ne Juta catêjê kwya nõ wa. Cwýrjapê ri imã pahte amji kam me pajapac xà cunea jahkre pej. Ne pê rý pëa mã Pahpãm me pan-quêtjê mã harkwa to:

“Me apê itekjêa na, cute me gahkre pej xà na, ca ha amji mã me apy kà kwý kryjre ne me hakep, me akra xũmre mea mã” hane.

Cu ha me Pahpãm te me pahto ihhimpej xà cunea kôt me papa, ne hanea ne amji mã me pampy kà kwý jakep, ne ahnaa cu ha me Pahpãm cajpuaw, ne cumã me papê Juta catêjê impej pit, ne me papê mehkwyã. Nãmri cu ha pahte cama me amji kà kwý jakep, ne nee amji mã me Pahpãm te me pahto ihhimpej xà kôt me papa nare na, jũ wýr cu ha Pahpãm cajpuaw. Ampo na? Pahpãm mã pahte cama me amji kà kwý jakep, ne nee cute amji kam hapac xà kôt me papa nare ita kôt, cumã hamreare. ²⁶ Quê ha jũm pê Juta catêjê nare, ne nee amji pê ihkà kwý jakep nare cakrô, ihtýj Pahpãm te me to ihhimpej xà kampa, ne ihkôt ipa na, quê ha Pahpãm mã cupê ramã cute amji mã mehkà kwý jakep atajê nõa, ne cupê hõ tekjêa. ²⁷ Cwýrjapê quê ha mehcahkrit atajê me ana ihcakôc to me hane he:

— Por Juta catêjê atajê mã ihkàhhôc kam Pahpãm te me to ihhimpej xà cunea jahkre pej, ne mempy kà jakep cakrô, mã ajte nee kam me hapac, ne ihkôat me ipa nare — hane. He me cupê Juta catêjê nare, pê nee mempy kà kwý jakep nare cakrô, ihtýj Pahpãm te me to ihhimpej xà kôt me ipa, ata na ri me Pahpãm cajpuaw.

²⁸⁻²⁹ Ne mër hõhõ, me pahkà kwý jakep ata me, pahte amji kam me pajapac xà to me pahte amji pyrãc xà atajê kôt, Pahpãm mã hamreare. Ne quêt, por Pahpãm Carõ Pejti kôt, Pahpãm te me pahto ihhimpej xà kôt me papa na ri cumã impej, ne cumã me papê mam, mehkwyã pê Juta catêjê impeaj. Ne quê ha pjê kam me hũmre me pahkà jakep nare na me pahpupu, ne nee amji mã, me papê Pahpãm kôt me ipa catêjê na me pahto hajýr nare. Ne Pahpãm nare, quêt cumã me papê mehkwyã, na quê ha taa me pahto ihcakôc to impejti ne.

Jũ wýr quê Pahpãm me pahnõ mã ihhêj

Roman 9.4-5

3 Ýhỹ me ikwý, ca ihhêaj to Juta catêjê to ite me amã icakôc xà ita kampa, ne nee ca me anõ amji mã garkwa to:

— Mër jũ na xà caxuw mã me cupê Juta catêjê? Ne me haprý pê Juta, ne jũ na xà na mã amji mã mehkà jakep? Imã ihhêj ne Pahpãm te mam me to ihhimpej xà itajê kôt hamreare — hajýr nare. ² Ampo na? Por cute mencaca xà to me amji pyrãc xà itajê cunea impej pit. He Pahpãm pê ramã rý pëa mã amji mã me capi, ne me cumã haprý ita gõ, ne me cumã cute amji kam hapac xà cunea pê harkwa ita gõ. Ne ihkôt me cumã:

“Ca ha ite me amã ijarkwa jirên xà itajê cunea to, ma me amji jahôt to me apa, ne ma me to amji kampa, ne ihkôat me apa” hane.

³ Mã mehkwyã kwya te ihhêj ne, nee mempar nare. Ne mehkwyã nee me harkwa to mehcahôc xà na me amji par nare ita kam, xà ajkí Pahpãm te hajýr me caxuw, ne ampo na ihcakôc xà to, ne nee amji jarkwa na amji par nare? ⁴ Hãpà! He Pahpãm catyt kam ihkrí, ne ihhêj xi nare, ne ihtýj mehcunea hêj xi xà jipôc ri harkwa na amji kampa. Ne pê ramã rý pëa mã Pahpãm jõ kàhhôc kam, cute me to hũjarên to hajýr he:

“Quê ha jũm te, Pahpãm te apu ihhêj xi na harên na, quê ha ramã mehcunea mã apu ihhêj to ipa na me hahkre pej.

Quê ha cute catyt kam me Pahpãm to ihcakôc na, quê ha ramã mehcunea catyt kam, cute to ihcakôc na me hahkre pej” hajýr.

Ihcunea na Pahpãm pejti, na ri ma amji tète amehkên catêjê curê

⁵ Mã mehkã kên catêjê kwý me to hũjarên xà impejti kaj na me to hũjarên to:

— Wa itýj Pahpãm kĩnte ampo kên jikôtti cunea ton to ipa, mãr quê ahna me ipupu, ne cormã me Pahpãm caca xà me, itekjê to me ajpên, ne me hõmpu, ne amji mã me ijarên to: “Jũmjê itajê kêanre, ne Pahpãm ri quêt impeaj to impej” hane. Ita kam, jũ mã quê, ne ajte Pahpãm ite me ikên xà ton ita kôt me ito týt tu? He me icaca xà kêanre ita kôt, ramã mehcunea te me Pahpãm pejti na me hahkre pej. Ne ite me hajýr xà ita kam, ihhêj ne nee Pahpãm catyt kam me ito impejti nare — hane. ⁶ Ne por jũm apu hũjarên to hajýr to mõ ata kêanre. Ampo na? He Pahpãm ri quêt catyt kam ipa. Ne quê catyt kam ipa nare ita kam, jũ mã quê, ne ajte pjê ita kam ajpên pê mehkên me, mempej to caprãr pa?

⁷ Mã mehkã kên catêjê kwý hanea ne me hũjarên to:

— Wa itýj Pahpãm kĩnte ame ihêj xia jarên to me ipa, mã me ikampa, ne me Pahpãm cakôc xà me, me icakôc xà to me ajpên, ne me amji mã me harên to: “Pahpãm cakôc xà ri quêt impej” hane ita kam, jũ mã quê, ne ajte Pahpãm me ikên mã me imê? He me icakôc xà hêj xi xà ita kam, ramã mehcunea te me Pahpãm pejti, hêj xi nare na me hahkre pej — hane. ⁸ Ne mehcahôc xà to cute me hajýr xà na impej nare. Mã mehkã kên kwya mehcahôc xà to:

— Hã, cu ha pahte amji kam me pajapac xà to me kêanre to me papa, mãr quê ihkêanre ata kôt, me Pahpãm jãhcaprĩhti na me hahkre pej — hane. Ne Pahpãm mã mehcahôc xà te hajýr na ihkaj na. Ne hanea ne ramã mehkwyã kwý nõ te ito ihcakôc to hajýr. Ne ihtýj ame ito ihhêj to me ipa. Ne cute ame ito ihhêj jahpan xà na, quê ha Pahpãm ame to kêanre ne. Ne mehcahôc xà kêanre te hajýr catêjê ri, ihtýj mehkên mã me hàr xà.

Nee pjê ita kam jûm pê catyt kam ipa catê nare

Carati 3.11-22

⁹ He xà ajkî mehcahkrit atajê jirôa pê, me cupê Juta catêjê mã me cute amji kam hapac xà impej? Hãpà! He Pahpãm mã mehcunea pipên pit. Ampo na? He mehcunea ihtÿj ajpên jîkjê na mehkên ton to me ipa. Ne ramã mehcunea te ajpên jîkjê na, cute mehkên ton to me amji pyrác tu, ita kam, jû mã quê me, ne mehkên ton to me ipa jicu, ne me to hapactu? ¹⁰ Ne pê ramã ihkàhhôc kam Pahpãm jarkwa me to hûjarên to hane he:

“Pahpãm mã, nee jûm te ampo pejti ton nare.

¹¹ Ne nee jûm Pahpãm na hàhcukjêr, ne catyt kam cumã ipa jahkre pej nare.

¹² Ne ramã mehcunea Pahpãm pê me ipipkjêr, ne ihkaj na ampÿa mã ame ipa, ne me ipictor.

Na ri nee jûm catàt kam, ampo pejti ton to ipa nare.

¹³ Ne me harkwa pê ihhêj rûm kre kam, cute me harêt xà.

Ne mehcahôc xà atajê kro, ne ihkêanre, ne ihtÿj ihpîn mehhêj xi xà kêanre hapôj.

Ne mehcahôc xà itajê jàhcurê pê ihhêj rûm patti xwa cacô jàhcurê, ne ihtÿj mehcura. ¹⁴ Ne ihtÿj mehcunea incrôn xà kêanre to mencrôn to me ipa.

¹⁵ Ne ihtÿj me hûjarêan kam me jûm jaxôp, ne mehcuran pyrentu to prãm.

¹⁶ Ne por jû ri me ipa xà ata ri, hãn ne me hakàn pê ampo kêanre ahtwÿ.

Mã me hakàn pê me cumã amji kîn nare na amehkrî.

¹⁷ Ne nee me cumã ajpên to impejti to mehkrî jahkre pej nare.

Mã cama ame ajpên mã, ne ihtÿj me ajpu.

¹⁸ Ne nee amji mã me Pahpãm cupa nare” hane.

¹⁹ Hôhõ, pê Pahpãm Mojxe xwÿ mã Juta catêjê caxuw cute me to ihhimpej xà jôr to hane. Ne pê Pahpãm te me to ihhimpej xà ita, nee me cupê Juta catêjê caxuw pit mã nare, ne me pahcunea caxuw pê Pahpãm Mojxe mã cugõ. Na cu ha catyt kam pahte me cahyt ne mempar na, cu ha pahte me ampo to kên xà atajê na me amji jahkre pej pyrentu. Cwÿrjapê cu nee me pah-nõ Pahpãm mã me pajarkwa to:

— He wa nee me ite ampo pejti ton xà itajê na me amji jahkre pej nare. Ne nee hanea ne ite me ampo kêanre itajê jahkre pej nare kam me ton — hajÿr nare. Cwÿrjapê quê ha Pahpãm amcro nõ na mehcunea mã harên to:

— He me amã ite me ato ihimpej xà cunea jahkre pej cakrô, ca nee ate mempar nare, cwÿrjapê wa ha hahpan xà na me ato tÿj tu ne — hane.

²⁰ Ne nee rÿ jû caxuw jûm te, Pahpãm te me to ihhimpej xà kam hapac, ne catyt kam ihkôt ipa nare. Cwÿrjapê jû wÿr cu Pahpãm te me to ihhimpej xàa kôt me papa kam me to pancrà. Ampo na? He cu me pajôtpê ampo to mehcupa. Ne jû wÿr quê ha jû caxuw Pahpãm me pamã:

— Ca ijarkwa cunea kôt me apa, cwÿrjapê ri ihcunea na imã me apej pit, na wa ha itÿj ana amji capa — hajÿr nare. Ne por ihkàhhôc kam Pahpãm jarkwa ata, cute cumã me paxÿmre kên na me pajarên xà caxuw ri.

Jeju te ri Hÿm te me pahna amji caxàr na ton

Me Hàpên Xà 17.30-31; Roman 1.17; Pirip 3.7-9; Carati 2.15-21

²¹ Ne ita kam, mormõ ca ha me anõ amji mã:

— Pÿhàpà, jû mã wa ha ajte me, ne Pahpãm cuna mã me ipej, quê me ina amji capa? — hane. He Pahpãm te ita caxuw ajteare mã me pamã, cute amji kam hapac xà intuw ita to hahkre, ne nee Mojxe xwÿ jõ kàhhôc kam Pahpãm te mam me to ihhimpej xà kôt me papa xà nare. Ne pê rÿ pêa mã ramã Pahpãm jarkwa jõ kàh-hôc kam, cute harkwa na mehcahôc catêjê te me ita jarên. ²² Ne Jeju Crixto pê ri curmã Pahpãm te amji kam hapac xà intuwti ata. Na quê ha jûm krã kêanre, ne ihkên ton jicu, ne Jejua to amji mã ihhimpej to ipa, quê ha Pahpãm cumã:

— Ate ikra to ihcunea na amji mã ahimpej, mã cute me ato amji kritxwÿ, cwÿrjapê ri imã ihcunea na me apej pit. Cwÿrjapê wa ha me ana amji capa, ne nee ate ito kên xà atajê to amji japackre, ne hahpan xà na akên mã amên nare — hane. Ne Pahpãm te, mehcunea te Jeju Crixto to me amji kritxwÿ atajê cunea na, amji caxàr, atajê pê me cupê Juta catêjê me, mehcahkrit atajê. Ne cumã me ipipên pit, ne nee cumã jûm pê ajteare mã nare. Pahpãm mã mehcunea te, cute amji kam hapac xà to pit mã, amji mã mehhimpej na me to prãm.

²³ Ne mehcunea hõtpê mehkên ton to me ipa ita kam, quê ha nee me Pahpãm te me cumã cute amji kam hapac xà impejti to hûjahkre xà ata wÿr me cator, ne kam me hàhhuc nare. ²⁴ Mã quêt Pahpãm jàh-caprîa na amjia kôt cute me pahte ame to kên itajê to tojnõ, ne hicu, ne me pahna amji caxàr, na cu hacpÿa mã me ajpên to ikwÿ nõ. Ne ampo na ri cute me pahto hajÿr? Nee mã ampo na nare, Jeju Crixto te amji to me pahkritxwÿ, na ri cute Hÿm te me pahna amji caxàr na ton, mã cute me pahna amji caxàr, mã pea me pahkên catia pê me pahto cator.

Pahpãm te me pahkritxwÿ na me pamã Jeju xãm

²⁵ Mã Pahpãm te catyt kam ipa na me pahte me hahkre pej prãmte ri, cute pjê ita wÿr me pahwÿr ihkra pê Jeju kujahêc, mã iwÿrc. Ne cute amji to me pahkritxwÿ, ne me pahkên xà mã me paxàr xà atajê cunea mã cute amji jôr, ne pî kam ihtyc. Ne pahte Jeju to me amji kwÿ xà ata pê ri, Pahpãm te ame pahto kên xà ata pê, me pahpytâr xà. Na quê ha jûm te Jeju pê ihkritxwÿa to ihkritxwÿ na amji mã to hajÿr na, quê ha nee ihkên xà kêanre ata mã hàr nare. Ne Pahpãm te, me cumã catyt kam ihkrî, ne impejti na amji jarên prãmte ri, cute me pahkritxwÿ na me pamã Jeju xãm. He pê mam Pahpãm nee cormã ne, cute ame to kên catêjê kam incryc tÿj to imprar pyrentu nare. Ne cama ahna me hamã, mår quê ihhêaj to xwÿ mã amjia kôt

amehkên ton jicu, ne hÿrmã me apkjê. ²⁶ Ne ita caxuw Jeju cator xà ata me ajkaam, mã Pahpãm mã ihkôt mehcunea te mehkên jicu pyrentu na me to prãm, mãr quê me ahna amji capa. He Jeju te amji to me pahkritxwÿ. Ne me pajahpan xà na ihtyc xà ata kôt, cu ha pahte cume mã mã me pahkên jicu, ne to amji mã me pahhimpej. Na quê ha Pahpãm pejti, ne catyt kam ihkrí ata, me pahna amji capa. Ita na quê ha pjê kam, mehcunea me Pahpãm te catyt kam ipa, ne catyt kam me pahto impejti na me hahkre pej.

²⁷ Cwÿrjapê cu ha nee me pahnõ amji to pajàmñã to:

— Ampo na ri Pahpãm te ina amji caxàr? He wa ite, cute ampo cunea na, cute me pamên atajê ton par, na ri cute ina amji caxàr — hajÿr nare. Ampo na? He me pahte ampeaj kam Jeju pê me pahkritxwÿ na amji mã me to hajÿr xà ata kôt, quê ha Pahpãm me pahna amji capa. Ne jÿ wÿr cu me pahnõ pahcakôc xà to hane. ²⁸ He cu nee me pahnõ Pahpãm te me to ihhimpej xà cunea ton nare. Ampo na? He cu tee ramã ame ton to me hahkre ita kam, jÿ wÿr quê Pahpãm me pahna amji capa. Ne quêt Jeju to amji mã me pahhimpej, mã cute amji to me pahkritxwÿ ata kôt ri, Pahpãm te me pahna amji caxàr.

²⁹ Mã ihtÿj Juta catêjê kwÿ kwÿa me hÿjarên to:

— Nee me Pahpãm pê mehcahkrit atajê Pãm Cati nare — hane. Ne cama amehhêj to me ipa. He Pahpãm pê hanea ne, mehcahkrit Pãm Cati, ne cupê me pahcunea Pãm Cati. ³⁰ He Pahpãm pyxit peaj, ne cute amji kam hapac xà pyxit peaj. Ne hanea ne, Jeju pyxit peaj to mehcunea te amji mã me hajÿr xà ata kôt, quê ha ihtÿj mehcunea na amji capa, ne amji wÿr me cupê Juta catêjê me, mehcahkrit atajê mea mã me to cuprõ. ³¹ Na quê nee jÿm ihcakôc to:

— Mër hõhõ, wa ha nee hipêr ihkàhhôc kam Pahpãm te me to ihhimpej xà ata kôt ipa nare. Ampo na? He ramã Jeju te ite ampo ton xà itajê cunea ton par, ijaxà kam — hajÿr nare. He cu ramã Jeju to amji mã me pahhimpej, cwÿrjapê cu ha pahtÿj mehkàhhôc kam Pahpãm te me to ihhimpej itajê, amji mã me hÿpahti to me kam pajapac pejti to me papa.

Pê Aprãw Pahpãm to amji mã ihhimpej, na pê ahna amji capa

Carati 3.6-18

⁴ Ne ita caxuw wa ha me amã me iquêt xwÿ pê Aprãw xwÿ kôt harê. Ne pê Pahpãm mã, cuna mã hÿmre ita pejti, ne catyt kam ajco ihkrí. Ne jÿ mã mõrmõ pê ajte ne Pahpãm cuna mã impej ita hane? He xà pê ajkí Pahpãm ampo cunea na cumã harkwa atajê ton cwÿrjapê mã, pê ahna amji capa? Hãpà! ² Quê hane na mã, quê ha ramã taa amji to hãmñã to:

— He wa amjia kôt ite ampo itajê cunea ton par, cwÿrjapê ri Pahpãm mã ipejti na, quê ha ihtÿj ina amji capa — hane. ³ He quê nee amji to hãmñã to hajÿr nare. Ata na pê Pahpãm jarkwa jõ kàhhôc kam ramã harê he:

“Pê nee Aprãw amjia kôt, hãpên xà to atajê kôt Pahpãm ahna amji caxàr nare.

Ne pê kypê Pahpãm to amji mã ihhimpej nare, na pê cumã impej, pê ahna amji capa” hane.

⁴ Ne por jÿm apê ata ri, ihtÿj hãm cwÿr xà. Ne jÿ wÿr quê hõ pahhi amjia kôt cama cumã ampo gõ. Ne por cute hãm cwÿr xà ton ata, hõ tekjêa ri, ne nee mã amjia kôt hõ pahhi te cumã hõr nare. ⁵ Ne Pahpãm te nee hajÿr nare, ne quêt amjia kôt, cute amji kam hapac xàa na, ihtÿj cumã me pajàpên nare catêjê mã ampo gõ. Na cu ha Pahpãm mã me amji jarên to hane he:

— He wa tee ramã apu ate me ito ahimpej xà ita cunea kôt me ipa to me hahkre ita kam, jÿ wÿr wa ha me to. Cwÿrjapê wa ha cama Jeju to amji mã me ihimpej, quê ha taa amji to me ikritxwÿ, ne taa me ijaxà kam ate me ito ahimpej xà itajê cunea ton to amã ipa — hane. Quê ha Pahpãm me pahto hÿjarên to hane he:

— Ate ikra to amji mã me ahimpej to hajÿr, cwÿrjapê ri imã me apej. Ne me apê catyt kam me apa catêjê, na wa ha itÿj me ana amji capa, ne nee ate me ito kên jahpan xà na, me akên mã me amên nare — hane.

⁶ Ne pê ramã pahhi xwÿ pê Tawi ata jÿmjê jakryti na, Pahpãm jarkwa kôt, hõ kàhhôc kam, me ahna ihhôt to hane he:

⁷ “Jÿ mã cu ha me, ne ame pajakry?

He pahte Pahpãm jarkwa jirõ pê me pahpÿm, ne ihkaj na me pahkên xà ton, mã cute hicu, ne to tojnõ, ne ihhur, ata pyrên ri ame pajakry.

⁸ Por Pahhiti te pahte me ampo kên ton atajê kôt me pahkôt harên kèanre nare, ata pyrên ri ame pajakry” hane.

⁹ He xà ajkí me hakryti xà ita me cupê Juta catêjê te amji mã mempy kà jakep catêjê atajê mã pit mã? Hãpà! He hanea ne mehcahkrit atajê te amji mã me amji kà jakep nare atajê mã, ihtÿj me hakry xà ita. He wa ramã ite me amã Pahpãm jõ kàhhôc kam, cute Aprãw xwÿ to ihcakôc to hajÿr na, harên he:

“Pê nee Aprãw amjia kôt hãpên xà to atajê kôt, Pahpãm ahna amji caxàr nare.

Ne pê kypê Pahpãm to amji mã ihhimpej nare, na pê cumã impej, pê ahna amji capa” hane.

¹⁰ Mër hõhõ, xà pê ajkí Aprãw xwÿ amji mã impy kà kwÿ jakep jakàn pê mã, pê harên to hane? Hãpà! He pê amji mã ihkà kwÿ jakep xwÿjrea na, pê Pahpãm cumã harkwa to hane. ¹¹ Aprãw te amji mã ihkà kwÿ jakep xwÿjrea na, pê ramã Pahpãm ahna amji capa. Ampo na? He cute amji mã Pahpãm to hajÿr cwÿrjapê. Na ri cute amji kà kwÿ jakep xà ata te ramã Pahpãm mã Aprãw xwÿ pejti na harên. Na pê Pahpãm cumã harkwa to:

“Ca ate kypê ito amji mã ahimpej nare,

cwýrjapê ri imã apê ihhêj rûm rý jû caxuw jûm te ampo to ihcupan nare ata pyrâac.

Na wa ha itýj ana amji capa” hane.

Ne pê ramã Pahpãm Aprãw te amji mã ihkã jakep xwýjrea na, harên to hane. Cwýrjapê ri Aprãw pê, por nee cute amji mã mehkã jakep nare, ne ihtýj amji mã me Pahpãm to ihhimpej atajê cunea xakat. Mã Pahpãm te atajê cunea na amji caxàr. ¹² Ne hanea ne Aprãw pê, cute amji mã cuxã mehkã kwý jakep, ne Pahpãm to amji mã mehhimpej atajê cunea xakat. Ne xã ajkí cute amji mã ihkã jakep cwýrjapê mã cupê me hakat? Hãpà! He Pahpãm to amji mã ihhimpej cwýrjapê ri cupê, por mehcunea Pahpãm to amji mã mehhimpej atajê xakat.

Jeju to amji mã pahhimpej xã ita kôt, cu ha me amcwa

¹³ Pê Pahpãm Aprãw mã pjê to hũjahkre to hane he:

— Ýhý Aprãw, he pê ca nee ite me ato ihimpej xã cunea kôt apa nare cakrô, ca atýj ate ito amji mã ahimpej, cwýrjapê wa ite ana amji caxàr. Na wa ha amã pjê ita cunea gô, mãr ca me atãmxwý mea mã me to ahimpej — hane. Pê Aprãw kampa ne amji mã:

— Pýhàpà, pom cormã ikra nare ita, mã ajte ramã me itãmxwý to Pahpãm te imã hũjarên. Wa itýj cute imã hũjarên xã itajê na to amji mã hane — hane.

¹⁴ He pê nee Pahpãm Aprãw mã harkwa to:

— Ca ha xaa ite amã ihimpej xã itajê cunea to, ne ihkôt apa, wa ha cormã hahpan xã na, amã pjê ita cunea gô — hajýr nare. Ne pê quêt Pahpãm cumã:

— Wa ha amjia kôt amã pjê ita gô. Ca ate, ite amã apê pjê ita jô pahhi na ato ijũjahkre xã ata na to, amji mã ahimpej, cwýrjapê wa ha amã cugô — hane. Ne Pahpãm me pahto amji kam hapac to hanea, pom quê pê Aprãw to amji kampa he. Ne quê ha me pamã ampo to awjahkre, cu ha cute ampo to hũjahkre xã ata na amji mã me to pahhimpej. Cwýrjapê quê ha me pamã cugô. He pahte me Pahpãm te me pamã harkwa jirên xã ton ata kôt pit mã, me pamã cute to hũjahkre xã ata jôr nare. Quê hane na mã, cu mepar nare ita kam, jũ wýr cu ha me cupê cupy. ¹⁵ Ne quê ha jûm mã Mojxe xwý jô kãhhôc kam Pahpãm te me to ihhimpej xã jahkre pej cakrô, nee me ton nare, quê ha ihtýj Pahpãm ahna kypê kam incryc nare. Quê Pahpãm jô kãhhôc kam, cute me to ihhimpej xã ita hamreare na mã, quê nee jûm hahkre pej, ne kam hapac nare ita kam, quê ha nee me cumã harkwa to:

— Ca ate ijarkwa jirô pê apým na ri me akam icryc — hajýr nare.

Aprãw pê mehcunea te Pahpãm to amji mã mehhimpej catêjê atajê xakat

¹⁶ Mër hõhõ, cu ha Aprãw xwý cuxã, me pahte Pahpãm to amji mã me pahhimpej na, quê ha me pamã ampo pej cunea jôr xã ata caxuw, pê Aprãw mã cugô. Ne me pahte Mojxe xwý jô kãhhôc kam Pahpãm te me pahto ihhimpej xã atajê cunea kôt me papa nare cakrô, quê ha Pahpãm hàncapria kam ihtýj me pamã

ampo pej cunea gô. Ne mër ampo na mã quê ha me pamã ampo pej itajê gô? Nee mã ampo na nare. He me papê Aprãw tãmxwýa, ne me papê hũràac. Ampo na? He cu pahtýj, cuxã Pahpãm to amji mã me pahhimpej. Na ri Aprãw pê me pahcunea te Pahpãm to amji mã me pahhimpej catêjê xakat, ne me papê mehtãmxwýa pyrãc. ¹⁷ Ne pê ramã Pahpãm, hõ kãhhôc kam cormã Aprãw ihkra nare kam to hũjarên to hane he:

“Imãa, ramã apê me hàhtôa pãm” hane.

Pê kampa ne ihtýj amji mã me to hane, ne amji mã:

“He cormã ikra nare cakrô, mã ahna Pahpãm te imã me itãmxwý jãhtôa to hũjahkre, na quê ha ihtýj imã cugô.

Ampo na? He ihtýj Pahpãm hacpyã mã mehtyc to ihtír.

Ne hanea ne ihtýj harkwa kôt ampo amji to ita kam, quê ihtýj cormã jûm kra nare ata mã ihtýj ihtãmxwý gô.

Na wa itýj amji mã to hane” hane.

¹⁸⁻¹⁹ Ne por pê Pahpãm Aprãw mã ihtãmxwý jãhtôa ne to awjahkre ata caxuw, pê ramã ahna caku xěj, ne ramã ihweaj to ihwej. Ne amji mãa ramã cupê jûm tyc, ne cupê ihkra nare ata pyrãac, ne hanea ne hĩxi pê Xarakwýj ata pê ihkre crã, ne ramã ihwejtú cakrô, mã ihtýj Aprãw Pahpãm te cumã ampo cunea to hũjahkre ata na hikaj. Ne cute ampeaj kam amji mã Pahpãm to ihhimpej, cwýrjapê ri cupê mehcunea te Pahpãm to amji mã mehhimpej catêjê xakat. Na ri cute Aprãw cuxã Pahpãm to amji mã mehhimpej atajê pê ramã mehtãmxwýa pyrãc. Ne Pahpãm te cumã to hũjahkre xã ata, na ihtýj cute cumã ton. ²⁰ Ne nee Aprãw xwý te jũ caxuw Pahpãm to amji mã ihhimpej jicu nare, ne nee cute ampo to cumã hũjahkre xã atajê na to amji kam hapac to ipicokjêr to ipa to:

— Pýpýn, mõrmõ quê ha Pahpãm imã ikra nõ gô, nare, quê ha nee imã ihnõ jôr nare — hajýr nare. Cwýrjapê ri Pahpãm te cute amji mã to ihhimpej xã caxuw cumã carôt jôr, na ri Aprãw te Pahpãm pejtí na harên to:

²¹ — Ampeaj kam apej, ne ate imã ampo to gũjahkre xã atajê jôr xã caxuw, ampeaj kam acarôt týj, cwýrjapê wa itýj ate imã hõr na amji mã ato hane — hane.

²² Pê Pahpãm mã, Aprãw te ihhêj ne nee ampo to ihcupan nare, ne catyt kam ipa, na pê hacpyã mã to amji kwý, ne ahna amji capa. Ampo na? He Aprãw te Pahpãm te ampo to cumã hũjahkre xã atajê na, ampeaj kam to amji mã ihhimpej na pê. Ne pê Pahpãm jô kãhhôc kam ramã ita na ihhôc to hane he:

“Ite Aprãw mã ampo to ijũjahkre, mã ihtýj ijarkwa ita to amji mã ihhimpej. Cwýrjapê ri imã cupê jûm te nee ampo to ihcupan nare ata, ne catyt kam ipa.

Na wa ite hacpyã mã to amji kwý, ne ahna amji caxàr” hane.

23-24 He Pahpām te hō kàhhôc kam Aprāw xwỳ to hũjarēn xà ata, nee mā Aprāw pit caxuw nare, ne me pahcunea caxuw pê harkwa ita to. Ne por Pahpām carôt tỳti te hacpỹa mā Jeju to ihtĩr ata, pahcunea te to amji mā me pahhimpej catêjê caxuw ri. He pahte Pahpām to amji mā me pahhimpej, cwỳrjapê ri cumã me papê catyt kam me papa catêjê. ²⁵ Jeju te amji to me pahkritxwỳ, ne me pajaxà kam ihtyc xà mā amji jôr, me pahkên jahpan xà na. Mã Pahpām te hacpỹa mā to ihtĩr, mār quê me pahna amji capa, ne me pamã:

— Ate ikra tĩr pê me akritxwỳ ata to amji mā me ahimpej, cwỳrjapê ri imã me apê catyt kam me apa catêjê pit, na wa ha me ana amji capa — hajỹr.

Pahte amji pupun kêanre to me amji pupun xà kam me pajakry

Tijac 1.2-4

⁵ Me pajô Pahhiti pê Jeju Crixto te amji to me pahkritxwỳ, ne me pajaxà kam ihtyc. Na cu ita kam, amcro ita kam, pahtỹj cute amji kam hapac xà ita na amji mā me to me pahhimpej. Cwỳrjapê ri Pahpām te me pahna amji caxàr, ne hacpỹa mā hipêr me pahto amji kwỳ. ² Ne Jeju to pahte amji mā me pahhimpej xà ata kôt ri, cutea Pahpām te amji kam hapac xà impejti ita na me panxôr. Cwỳrjapê cu mänea mā, amji mā me to me pahhimpej ita na. Na quê ha jũ caxuw, amcro nõ na, Pahpām carôt jàhcujro ata to, me pahcunea to impejti ne. Ne me pampejti ata kam, quê ha mehcunea me papê Pahpām pyrãc, ne me pampejti na me pahpupu. Na wa me ijakry mea mā me amcro ita jikaj to me ipa.

³ Ne wa ha hanea ne me pahte me amji pupun xà kêanre xà kam, me ijakry pej pëa mā me ipa. Ampo na? He wa me pahte amji pupun xà kêanre xà ata pĩn, hacpỹ ne me pahwỳr ampo cunea na pahte me pajũcanãar kam amji mā me pahprĩa ne, me papa xà ata cator na, me imã hahkre pej. ⁴ Ne quê ha Pahpām me pahte amji pupun xà kêanre ita kam, me pahte me pajũcanãar kam, amji mā pahprĩa na me pahpupu, ne me pamã harkwa to:

— Pom ate amji kam me gapac xà na, ite me apupun ita na ri imã me apej pit — hane. Cu ha me kampa, ne impar xà ita kôt, cu ha cormã cute me pamã ampo pejtĩ to hũjahkre xà ata na me hikaj. ⁵ He xà cu ha ajkĩ ihcaprỹ na, cormã Pahpām te me pamã ampo to hũjahkre xà ata na me hikaj? Hãpà. He quê ha ihtỹj me pahwỳr cato. Ampo na? Nee mā ampo na nare. He Pahpām mā me pahkĩan to me pahkĩn. Cwỳrjapê ri cute me pamã Carõ Pejti kujahêc, mār quê Carõ Pejti ita cumã me pahcaxwãm pê me pahkĩnti na, to awjarê.

Pê me pancwỳrjapê Jeju ihtyc mā amji gô

⁶ He ampeaj kam Pahpām mā me pahkĩn, na pê cormã me pahkêanre xà ata kam, pê Jeju me pancwỳrjapê ty. Pê cu tee me pampejti na ame amji to hahkre to me papa xà ata kam ri, Jeju Crixto te amji to me pahkritxwỳ, ne me pahcunea kên jahpan xà na, me pa-

jaxà kam ihtyc. Ne pê ramã Pahpām mā, cute ihkra tyc na amji mā amcro hyr xà ata hahkre pej, na pê ahnaa hane. ⁷ Ca ha pijamã jũm te mehkwy jahpan xà na ihtyc prãm ata na me acato? Quê! Ca ha ame hapêê ne ihhêaj to cormã jũm mā me acato. Ne ca atỹj ihhêaj to me jũm te ihnõ impejti cwỳrjapê ihtyc prãm ata mā me acato. Hamreare, jũ wỳr ca me jũm te ihnõ kêanre jahpan xà na, haxà kam ihtyc ihprãm ata na me acato.

⁸ He me pahcunea kêanre cakrô, mã Pahpām mā me pahkĩan to me pahkĩn, na ri cute ihcãmter pê Jeju Crixto kujahêc, mã me pahcunea jaxà kam ihtyc.

⁹ Ne ita caxuw pĩ kam Jeju tyc xà ata kôt ri hacpỹa mã Pahpām te me pahna amji caxàr. Cwỳrjapê cu ha me pa, me amji mã:

— He Jeju cukwa kam, quê ha Pahpām nee cute ame pahkam incryc xà ata to ame pahkam incryc nare. Ne me pahcukij, ne me pahto ipicokjêr xà jô amcro kam, cu ha quêt pahtỹj ame papa — hane. ¹⁰ He pê mam me papê Pahpām curê xwỳn. Cakrô mã ihcãmter tyc xà ita kôt, cute hacpỹa mã me pahto amji kwỳ nõ. Ne hamre, ita caxuw me papê Pahpām jô ikwỳ nõ ita kam, cu ha me papê, pom Jeju tyc, ne hacpỹa mã ihtĩr ata na cu ha me, ne me ty, ne hacpỹa mã me pahtĩr, ne Pahpãm cahê na me pahtĩr rohnỹtti mã na me papa.

¹¹ Jipy me pajô Pahhiti pê Jeju Crixto te hacpỹa mã me pahto Hũm jô ikwỳ nõ ita kam, cu ha me pajakrya to me pajakry.

Pê Atãw me pahcunea me pahkên mã me pamê

¹² Ne ca ihhêaj to me anõa amji cukij to:

— Jũ rũm mã ajte me pahkên xà ita cator? — hane.

He nee jũ rũm cator nare, ne me pahcunea quêtĩ pê Atãw xwỳ ata pê Pahpãm jarkwa jirô pê ihpỹm, ne cute pĩxô intête cumãn ata krêr. Cwỳrjapê ri mehkên ata pjê cunea kam ipicràn. Na cu me papê hũràac, ne me pahcunea kêanre, cwỳrjapê cu ha me pahcunea me pahtyc pa. ¹³ Ne Pahpãm te Mojxe xwỳ mã cute me to ihhimpej xà cunea jarēn. Mã cute ahna ihhêc xà ata cumam ri ramã mehcunea kêanre, ne ihtỹj cute me ampo kên jahkre pej nare kam, me ton to me ipa. Mã Pahpãm te, cormã me cumã cute me to ihhimpej xà jôr nare ita kam, jũ mã quê me cumãn to:

“Ate me ijarkwa jirô pê apỹm, na ri me acunea kêanre” hane.

Pê Crixto quêt me pahcunea me pampej mã me pajaxà

¹⁴⁻¹⁵ Ne Pahpãm te pĩxô intête Atãw mãn, mã cute ihkrêr, ne ramã me pahcunea kên mã me pamên, ne me pamã to hahkre. Ne me pahnõ te ihkôt pĩxô ata krêr nare cakrô, cu pahtỹj me pahte me pahtyc kam me pahtēm, ne me pahtyc to mõi. Ne me pahtyc to me pamõr itaa kam, mã ahnaa Mojxe xwỳ jô amcro kam hànhuc. Ne Atãw pê me pahcunea mã me pahkên to hahkre jakàn pê mã ri Jeju Crixto cator, pjê wỳr. Pê cupê Atãw pyrãac cakrô, cute nee me pamã ampo kên to hahkre nare, ne quêt me pamã ampo pej to pit mã

hahkre, ne cute me pampej mã me pamên xà wÿr ri cator. Ne Atãw xwÿ te amji kam hapac xà kên ata kôt ri me hàhtôa ne mehtyc, ne mehtyctu. Ne Jeju Crixto te amji kam hapac xà pejti kôt ri, quêt nee jÿm tyc nare. Ne Pahpãm te amji kam hapac xà pejti ata ri Atãw tekjê jirôa pê cati. Na quê ha me hàhtôa ne mehtyc xà pê me hÿtà. Ne nee cute me hÿtâr jahpan xà na hàh-wÿr nare, ne cama me hÿtâr to ipa.

¹⁶ Ne Atãw te ihkên xà ton ata kôt ri mehcunea te mehkên xà jàhtôa ne me ton. Mã Pahpãm me cumã:

— Imã me akêanre, na wa ha itÿj me acurê mã me amê — hane. Ne quêt Jeju te amjia kôt amji to me pahkritxwÿ, ne me pajahpan xà na ihtyc xà ata kôt ri, Pahpãm mã me pahcunea impej pit. Mã Pahpãm me pamã:

— Imã me apeaj, na wa ha me apej mã me amê — hane. Hô, pê amjia kôt, cama me pamã pahte me hajÿr xà ita gô.

Cu ha me Jeju kôt me ampo kên cunea tohjê

¹⁷ He ampeaj kam ri me hÿmre pyxit peaj te ihkên xà ton ata jahpan xà na me hàhtôa ne mehtyc. Ne ita caxuw mam hÿmre ata jirôa pê, hÿmre nõ pyxit peaj pê Jeju ata te ri, quêt ampo pej pit ton ata kôt ri me pah-wÿr ampo pej pit japôj. Ne Pahpãm te me pahcunea mã cute amji kam hapac xà intuw jôr, cu pahte ahna me amji to pôi xà caxuw. Na cu ha me Jeju Crixto kôt me ampo kên cunea tohjê, ne pahtÿj catyt kam me papa.

¹⁸ Ne pom Atãw pyxit peaj te ihkên pyxit peaj ton xà ata to ri, cute me pahcunea curê mã me pamên. Ita na ri hanea ne Jeju pyxit peaj te ampo pejti pê catyt kam ata ton, ne cute to me pahtyc pê me pahcunea pytâr, mãr cu me Pahpãm cahê na me pahtÿr rohnÿtti mã. Ne hanea ne me pamã cute amji kam hapac xà intuw jôr, mãr cu catyt kam ame papa, ne nee ame pahkên ton to prãm to ame papa nare. ¹⁹ Ne pom hÿmre pyxit peaj pê Atãw xwÿ, nee cute Pahpãm jarkwa par nare, ne hirô pê ihpÿm, ne cute me pahte me pahkên ton to me pamã hahkre. Ita na ri Jeju pyxit peaj te Pahpãm jarkwa kam hapac, ne hacpÿa mã Pahpãm wÿr cute me pahto amji jaxâr, mã ihtÿj Hÿm te me pahna amji caxâr.

²⁰ Ne pê Pahpãm Mojxe xwÿ mã, cute me to ihhimpej xà jarê, pê ahna ihkàhhôc to, mãr quê me cahyt, ne cute me ampo kên ton xà atajê na me amji jahkre pej. Ne ampeaj kam ri ampo kên jàhtôa to hàhtô, ne cati. Ne Pahpãm peaj to impej, ne hàhcaprÿ catia ita, ma cumã ipicamên to mō, ne cati. Ne cute to kên itajê jakren tu, ne hirôa pê cati. ²¹ Na ri me pahkên xà pahtÿjti atajê cama me pahtyc xà mã me pagô, mã me pahcura ita kam, jÿ kam cu me pahnô cupê tē. Mã Pahpãm jàhcjârên, ne hàhcaprÿa na ri catyt kam hãn ne me pamã cute amji kam hapac xà intuwti jôr to ipa, mãr quê ihkôat me pahna amji capa. Ne me pajô Pahhiti pê Jeju Crixto ata kôt, cu ha hacpÿa mã me pahtÿr rohnÿtti mã na, cahê na ame papa.

Ihhêj ne ramã mam pahte amji kam me pajapac xà kên tÿm ata tyc

Carati 2.19-20; 5.24; Epet 4.17-24; 1 Petrô 4.1-6

⁶ Pahpãm jàhcprÿa na mã, cu pahte cuna mã me pahkên ton cakrô, mã ihtÿj cormã me pamã ampo pej pit ton to ipa. Na ri ramã mehcunea te me pahna Pahpãm jàhcprÿ na me hōmpun ita kam, xà cu ha ajkÿ mãnea mã me pahkên ton kam me to pancrà, mãr quê Pahpãm te me pahcaprÿ na hipêr me hōmpu?

² Hãpà! Xà ca ha jÿm tyc mã acakôc, quê ha ajkÿ ihtÿj akampa? Quê! He jÿ wÿr quê akampa. Ne ramã me papê jÿm tyc pyrâac. Ampo na? He quê ha me pahcurê xwÿn pê Xatanaj te akên mã amên to prãmte awÿr tē, ne amã akên ton na awjahkre, ca ha apê mehtyc pyrâc, ne nee kam gapac, ne cumã acakôc, ne ihkôt amji kam gapac, ne ampo kên ata ton nare. Ata pê ihhêj ne ramã me pahtyc, na quê nee hipêr jÿm me pahte ampo kên ton na me pahton nare. Cwÿrjapê cu nee hipêr amjia kôt me ampo kên ton nare.

Cô kam cute me pahcumrâr xà ata pê me pajapac xà kên jarêt xà pyrâc

³⁻⁵ He ramã me amã, ate me hajÿr xà na, me amji jahkre pej tu. Pê cu me pahkên ton jicu, ne Pahpãm wÿr me apkjê, ne me Jeju Crixto pê me pahkritxwÿ na ahna me amji capa, ne pea mehcunea mã to ajpê to harên to me papa, ita na pê cu me to prãm. Cwÿrjapê ri jÿm te mehcunea kam mare mã cô kam me pahcumrâr. Ne me pahna cô pijapÿn ata te ramã me pantête, pahte amji kam me pajapac xà kên tÿm cunea juwahi na harên. Ne huwahi xà ata pê ihhêj rÿm me pahte me pahkên jarêt xà ata, ne cupê cute me Jeju Crixto jÿ jarêt xà ata pyrâac. Ne me pahte me pahkên jarêt xà ita pê Jeju Crixto me ajpên kam me pahpyxit peaj. Na ri cô pê me pajapôj xà ata pê ihhêj rÿm cute me Jeju Crixto jarêt, mã hacpÿa mã ihtÿr, ne cator pyrâac. Ne pahte amji kam me pajapac xà to me papintuw, ne catyt kam me papa xà ita te ri ihcunea na me pajarên xà. Ne ramã Jeju Crixto kam me pahte me ajpên hōnco, mã ihtÿj pahte me pahkên ton xà nare na me pahtehcajpa, ne ihtÿj catyt kam me pahtehcajpar to ipa. Pê Pahpãm carôt tÿjti impejti to hacpÿa mã ihkra pê Jeju Crixto to ihtÿr, na quê ha me pahtyc jirô pê mã, hacpÿa mã me pahto ihtÿr.

Xatanaj nee hipêr me pahto ihhimpej nare

⁶ Ne mam pahte amji kam me pajapac xà tÿm kên xakat pê Xatanaj pê me pajô pahhi, na ri ihtÿj me pah-to ihhimpej, cu cumã me apê. Ne Jeju te pÿ kam ihtyc xà ata me ajkaam, pahte amji kam me pajapac xà tÿm kên ata to hamre, mãr quê Xatanaj nee hipêr me pah-to ihhimpej nare. Cwÿrjapê quê ha nee hipêr cupê me pajô pahhi nare, cu ha me pa xwÿjê nee hipêr cumã me pajapên to mehprãm nare. ⁷ Ca ha ate atyc na, ca ha nee hipêr akên xà nõ ton nare. Ampo na? Jÿ wÿr quê jÿm ty, ne hipêr ampo kên to. Ne me pajaxà kam

Jeju tyc ita kam, jũ wÿr quê jũm pê me pajõ pahhi, ne hipêr me pahno te ampo kên ton na me pahto.

⁸ Ne ramã ihhêj ne Jeju Crixto kôt ame pahtyc ita kam ramã hacpÿa mã ihkôt ame pahtÿr na pahte amji mã me to hajÿr. ⁹ Ne Pahpãm te hacpÿa mã Jeju Crixto to ihtÿr ita kam, jũ caxuw hipêr ihtyc xà te to ihhimpej xà nare na, me pamã hahkre pej. ¹⁰ Ne me pahte me pahkên ton jahpan xà na ri ihtyc. Ne ihtyc pyxit peaj, na quê ha nee hipêr jũ caxuw ihtyc nare. Ne ita caxuw Jeju ihtÿr na apu ipa, ne cama me pamã Hũm carôt tÿjti to ajpê, ne harkwa kôt ipa.

Cu ha nee hipêr me ampo kên ton to me papa nare

¹¹ Cwÿrjapê ca ha me amji jarên to hajÿr to me apa he:

— Ramã Jeju Crixto tyc, mã cute me harêt, ata kôt ri ramã cute pahte amji kam me pajapac xà tũm kên cunea jarêt. Cwÿrjapê cu ha nee hipêr pahte amji kam me pajapac xà kên ita kôt ame papa to prãm nare. Ne quêt Jeju Crixto kam me pahte ajpên hõnco, ne ajpên kam me pahpyxit peaj, ne cume mãã mã pahte Pahpãm cajpuaw xà caxuw ame pahtÿr na ame papa — hane.

¹² Cwÿrjapê ca ha nee hipêr ate amji kam me gapac xà tũm ita to me amji mã me ahimpej nare, ne me ate amji mã ampo na prãm xà kênre ata kôt ame apa nare. ¹³ Ne ca ha nee me anõ akên ton xà nõ mã acukrã xà nõ jahkre, quê ton nare. Ne Pahpãm mã, ca ha quêt me amji jõr to me apa. Ne Pahpãm te me atyc xà pê me apytàr, ne me amã me ate amji kam me gapac xà tuw jõr ata kam, ca ha atÿj cumã me amji jõr to me apa. Ne quê ha me ate catyt kam ampo pejti ton to me apa xà na, me atehcajpar to ipa. ¹⁴ Ne Pahpãm mã, ramã me apê catyt kam me apa catêjê, mã cute me ana amji caxàr. He xà ajkÿ me amã Pahpãm te me ato ihhimpej xà jõr atajê cunea kôt hakop jahkre pej na mã, cute me ana amji caxàr? Hãpà! He amjia kôt, me akên xà kam, Pahpãm mã me acaprÿ, mã cute me ana amji caxàr. Cwÿrjapê ca ha nee hipêr amji na ate amji kam me gapac xà tũm kên jamãr, quê me ato ihhimpej nare.

Cu ha ampo pej ton to pit mã amji mã me pahhimpej to me papa

Jowãw 8.34

¹⁵ Ne ca ihhêaj to me anõ amji jarên to:

— He nee mã pahte me Pahpãm te me pahto ihhimpej xà cunea kôt me hakop jahkre pej cwÿrjapê mã, cute amji wÿr me pahto ipipkjêr, ne me pahna amji caxàr nare, ne ihtÿj amjia kôt cute me pahna amji caxàr. Cwÿrjapê wa itÿj Pahpãm jarkwa jirô pê ipÿm prãm, ne itÿj hirô pê ipÿm — hane. Co he! Acakôc xà ita to hajÿr nare! ¹⁶ Ampo na? He ca ha me anõ gõ pahhi mã amji gõ, hamre quê ha taa ato ihhimpej na, me amã hahkre pej pejtu. Ita kôpit na, ca ha me anõ te akên mã amji jõr na, quê ha ihtÿj taa ato ihhimpej to ipa. Na quê ha gápên xà ata jahpan xà na gãmchwÿr xà ata pê atyc xà. Nare, ca ha me anõ te Pahpãm mã amji

jõr na, quê ha ihtÿj taa ato ihhimpej to ipa. Na quê ha cumã gápên jahpan xà na ana amji capa, ne amji kôat ato, ca ha me atyc xà jirô pê, hacpÿa mã atÿj me atÿr.

¹⁷ Na ca ha Pahpãm te me ato impejti xà ita pyrên me gakryti na cumã me amji jarê. Ne pê mam me ate amji kam me gapac xà tũm kênre ata, pê ajco me ato ihhimpej to ipa. Ne ita caxuw nee cute hajÿr nare, ne quêt Pahpãm te me amã ampo to hahkre atajê to, ca ha me gÿ cunea kam, me amã amji kÿan kam, amji mã me to ahimpej to me apa. ¹⁸ Quê ha pahhi kênre te me pajápên xà kam me pamã quêt ata te ihtyc, quê ha cute me harêt na, cu ha nee hipêr cumã me pajápên to prãm nare. Ita jÿkjê na mã Pahpãm te pahte amji kam me pajapac xà kên tũm ata to hamre, na quê ha hipêr me pahto ihhimpej nare. Cwÿrjapê cu ha pahtÿj ame papa, ne Pahpãm mã me apê.

Cu ha Pahpãm mã me amji jõr to me papa

¹⁹ He pê ca mam me akên xà atajê me, ahti na ate me axy kên to me apa xà tũmti atajê mã, ajco me amji jõr to me apa, ne amji mã me to ahimpej to me apa. Ne ita caxuw, ca ha catyt kam, ampo pej tetetti to pit mã me gápên to me apa xà caxuw, ca ha Pahpãm mã me amji jõr to me apa. ²⁰ Pê ca mam ajco me akên to pit mã, amji mã me ahimpej to me apa, ne nee Pahpãm mã ampo na prãmte atajê ton to me apa nare. ²¹ Ne mÿr ampo pej mã, ca ate amji kam me gapac xà kam me pahpahãmti ata jahpan xà na ate me ipÿr? Hamreare! Ne pom ate amji kam me gapac xà ita pê ri me atyc xà. ²² Ne ramã Pahpãm te, ate me akên ton jicu xà caxuw me amã carôt jõr. Na ca ha ita caxuw cumã pit mã me gápên to me apa. Cwÿrjapê ca ate Pahpãm mã ramã me amji jõr, ne me amji jõrtu, ne cutea ri catyt kam me apa na me aton, ne cupêa ri me gõ Pahhiti. Ne quê ha hacpÿa mã me ato me atÿr, ca ha me atÿr rohnÿtti mã na, cahê na ame apa.

²³ Mÿr hõhõ, me pahkên mã me pajápên to me papa, mã cute me pamã hãmjõr xà ata pê me pahtyc xà. Ne Pahpãm nare, quêt cama cute me pamã pahtyc nare xà jõr ata pê ri hacpÿa mã cute me pahto me pahtÿr xà, cu ha cahê na ame papa rohnÿtti mã. Na cu ha me pajõ Pahhiti pê Jeju Crixto kam me amji hõnco, quê ha ihtÿj me pamã jũ caxuw me pahtyc xà nare gõ.

Jeju te pahte amji kam me pajapac xà kên ata pê me

pahpytãr

Roman 10.4

7 Ýhÿ, Jeju kam me ikjêjê, he ca atÿj me acunea te, pom ite me amã cormã ampo jarên xà itajê kam me gapac to kênre nare. Ampo na? He me akwÿa kwÿ pê Juta catêjê, na ri me amã Pahpãm te Mojxe xwÿ mã, cute me ato ihhimpej xà juwahi ata cunea jahkre pej. Ýhÿ, quê ha cormã jũm ihtÿr na ipa, quê ha ihtÿj Mojxe xwÿ jõ kãhhôc kam, cute me hapackre xà ita jũm ata to ihhimpej to ipa. Ne jũ caxuw ty, quê ha nee hipêr Mojxe te me hapackre xà ita to ihhimpej to ipa nare.

² Mër hõhõ, quê ha pyjê nõ mã cormã impjê ihtĩar na ipa, quê ha nee amji mã iràn xà na impjê nõ ton nare. Nãmri quê ha cute ihtyc na, quê ha ihtyj me pancaca xà to pahte me amji pyrác xà ita to ihhimpej to ipa jicu, ne ihtyj jũm me hikwa na to tojnõ, quê ha cume hikwa. ³ Nãmri quê ha cormã impjê ihtĩar na ipa na, quê ha hĩxi te iràn xà na impjê nõ me hikwa na, quê ha me pancaca xà to pahte me amji pyrác xà ata kõt cupê cahãj xyre ata, ne ihkêanre ne. Nãmri quê ha impjê cupê ty, quê ha hakàn pê impjê nõ me hikwa na, quê ha nee me pancaca xà kõt cupê jũm cahãj xyre ata pyrác nare.

Cu ha ita caxuw Jeju pit mã me pajàpên to me papa

⁴ Ne me ikjêjê, ate me hajĩar. Ampo na? He Jeju Crix-tô kam ate me ajpên hõnco ata kam, ihhêj ne ramã ihkõt me atyc. Na quê ha nee Mojxe te me ato ihhimpej xà ata hipêr me ato ihhimpej nare. Ne hacpã mã Jeju Crix-tô ihtĩar na ri cupê me gõ Pahhiti. Na ca ha atyj cute me amã harkwa to ihcakõc xà itajê cunea na me kampa, ne me cumã apê. Ne por jũm cahãj pê impjê ihtyc, mã hipêr hikwa tuw ata, quê ha nee hipêr impjê tyc ata kam hapac nare. Ne por impjên tuw me hikwa ata, quê ha amji caxuw kam hapac to ipa. Ita na ri me pahte amji kam me pajapac xà te hajĩar. Na cu ha mam pahte amji kam me pajapac xà wej tũmti ita jicu, quê ha nee hipêr me pahto ihhimpej nare, ne Jeju quê ha quêt me pahto ihhimpej to ipa. ⁵ Ne pê cormã me pahte amji kam me pajapac xà tũm ata me pahto ihhimpej reria mã, pê cu amjia kõt ajco pahte me amji mã ampo kên ton to prãm atajê ton to pit mã me papa. Ne pê Mojxe xwỳ jõ kàhhõc kam, cute me hapackre xà ajco ampo kên itajê ton tète me pamãn cakrõ, pê cu pahtyj ajco mãnea mã me ton to me papa. Cwỳrjapê ri me pahte ampo kên kĩnti xà ata te me pahtyc xà mã me pajõr. ⁶ Ne hamre, ita caxuw cumam Mojxe xwỳ jõ kàhhõc kam me pancaca xà ata cunea pê me pahcator. Ampo na? He ihhêj ne ramã ame pahtyc. Ne ita caxuw cu ha me Pahpãm tĩar Carõ Pejti ata kampa, ne ihkõat me papa, ne nee hipêr me pancaca xà tũm jõ kàhhõc kam ihhõc ata to me amji japackre nare, ne pahtyj apa.

⁷ Ne mõrmõ ca ha me anõ amji mã:

— He por Mojxe xwỳ jõ kàhhõc kam, Pahpãm te me pahto ihhimpej xà wej ata pej nare — hajĩar na. Co he! Ca ha nee garkwa ita to acakõc to hajĩar nare. Ampo na? He cute me pahto ihhimpej xà ata te ri, me pahte ampo to mehcupan xà atajê pupun na iton, cu pahte me hõmpun, ne me hahkre pej. Ne cute me pahto ihhimpej xà ata te hũjarên to hajĩar he:

— Ca ha nee amji jũ na ame ampo kĩn nare — hajĩar. Quê hũjarên to hajĩar nare na mã, wa ha hahkre pej nare kam, pa ramã amji mã:

— Wa ityj me hũ na imã ampo kĩn, ata te nee ito ikên nare, ne cormã ipeaj — hane. ⁸ Me ajkaam wa ijũpar pyrentu, ne tee ame amji jũ na ampo kĩn ita jicu to ame hahkre, ne jũ wỳr wa me hicu. Ampo na? Ite amji kam ijapac xà tũm ita, ma ite me hũ na ampo kĩn ita na

ito, ita kam jũ wỳr wa me hicu. Ne Mojxe xwỳ jõ kàhhõc te ri imã ikên ita to ipipê, wa ite hahkre pej. Quê ha Pahpãm nee me pamã Mojxe te me pajapackre xà jõr nare na mã, quê ha pahte amji kam me pajapac xà kên tũm ata nee me pahkên na me pahton nare.

Mojxe jõ kàhhõc ata ampỳare mã Pahpãm pê ame papa na me pajarê

Roman 3.20; Caratĩ 3.23-24

⁹⁻¹⁰ He pê wa icrire naa mã nee Mojxe jõ kàhhõc kam Pahpãm te me pahto ihhimpej xà itajê impar, ne hahkre pej nare. He pê wa ajco ampo kên pit ton to ipa, ne nee kam imã amji kĩn nõ nare. Ne wa ite Mojxe jõ kàhhõc kam, cute me pahto ihhimpej xà itajê kam ijapac, ata caxuw wa ite ampo kên ton to ipa ita na amji pupun, ne ahna amji jahkre pej. Ne ihhêj rũm ipê mehtyc, ne imã amji kĩn nare. Ne cu ha catyt kam cute me pahto ihhimpej itajê kõt me hakop, ne ihkõat me papa na mã, cu ha ramã me pamã amji kĩn. Ne me pamã amji kĩn xà kaj na, pom pahte amji kam me pajapac xà ata cama ajte me pahtyc xà wỳr me pajagã.

¹¹ He wa mam ityj, pom Mojxe jõ kàhhõc te ampo kên ton tète imãn atajê cunea ton to ipa. Mã ite amji kam ijapac xà tũm kên ata pê imã ihhêj, ne imã:

— Gapacta ne ampo itajê cunea ton to apa, he nee akên nare, ne apeaj — hajĩar cakrõ, pê cute ipej na ijarên xà ata kaj na, ite ikên itajê ton to ipa itajê ityc xà mã igõ. Na wa ihhêj ne ramã ityc. ¹² Cwỳrjapê cu me pahte Mojxe xwỳ jõ kàhhõc tetetti, impejti ne ihcuhtacti na me hahkre pej, Pahpãm te ahna me pahto ihhimpej xà na.

¹³ He xà ajkĩ Pahpãm te me pahto ihhimpej xà impejti ita mã me pamã amji kĩn nare na me pahto, ne me pahtyc xà wỳr me pajagã? Hãpà. He pahte amji kam me pajapac xà tũm kêanre atajêa te, Pahpãm te me pahto ihhimpej xà impejti atajê kõt, me pamã amji kĩn nare na me pahto, ne me pahtyc xà wỳr me pajagã. Pê wa mam ikên xà ton to ipa atajê te cama ikên mã irên to mõr na hahkre pej. Na pê wa amji mã:

— Wa ite Pahpãm te intête me cumãn xà kam ijapac, ne ite ampo kêanre itajê ton na amji jahkre pej. Ne ita caxuw ite mam ite amji kam ijapac xà tũm ita kêanre na hahkre pej, ne hõmpun — hane.

Pê cu mam cormã amji mã me ampo kên capi

¹⁴ Ne Pahpãm Carõ Pejti pĩn ri Mojxe jõ kàhhõc kam, cute me pahto ihhimpej xà atajê cator. Ne Carõ Pejti ita te ri catyt kam harkwa kõt me papa xà caxuw, me pamã carõt jõr. Ne pa nare. Ihkĩnte ipê hũmre, ne icarõt peacre, na wa ite amji kam ijapac xà tũm kêanre itajê kõt ampo kên cunea ton to ipa. ¹⁵ He wa nee ajte pa icaca xà te ajpên jĩkjêhti ita na amji jahkre pej nare, ne hãn ne ikrã acto tu. He xà wa ha ite ityj imã ampo ton prãmti atajê to? Hãpà! Wa nee ton nare. Ne ajte imã ampo ton prãm nare, ne imã ihkĩn nare atajê, wa ityj to. ¹⁶ Ne nee wa ajte ampo pejti ton to amji kam ijapac to ipa nare, ne tee intête amji mãn to:

— Wa ha nee hipêr ampo kên ata ton nare — hajÿr cakrô, itÿj to, me ajkaam mã Pahpãm te me pahto ihhimpej xà, ikêanre na ijarê. Ne ampeaj kam ri cute ijarên na imã hahkre pej. ¹⁷ Wa nee ikên xà ton xà itajê intête amji jiprôn nare na, ramã imã amji jahkre pej. Ne icaxwãm pê icaca xà kêanre itajê xakat ri hãn ne, ite ampo kêanre ton xà itajê na imã awjahkre, wa hãn ne to.

¹⁸ He ite amji kam ijapac xà tÿmti ita kam, nee imã ampo pejti ton xà hamreare. Ampo na? He wa tee apu ampo pejti ton na amji to prãm cakrô, wa nee ajte amji mã hamãr ne ton nare. ¹⁹ He ampo pejti atajê ri imã ton prãm cakrô, wa nee ajte ton nare. Ne ampo kêanre itajê ri imã ton prãm nare cakrô, wa itÿj to. ²⁰ He wa nee amjia kôt ampo kên ton nare, ne ite amji kam ijapac xà tÿmti ata ri, ite ampo kên ton na imã awjahkre, wa ajte nee intête amji jiprôn nare ne itÿj to.

²¹ Hôhõ, pê wa mam hane he, pê wa ajco ite ampo pejti ton xà caxuw amji mã capi cakrô, nee ajte ton nare, ne cama amji mã ampo kên pit capi. ²² He ite amji kam ijapac xà impejti kam ri, Pahpãm te me pah-to ihhimpej xà kam ijapac pejti xà atajê pyrên ri, icaxwãm pê ijakry. ²³ Cakrô pê wa nee ajte kam ijapac ne ihkôat ipa nare, ne ajco ampo kên pit ton to ipa. Cwÿrjapê ri ite amji kam ijapac xà ita tuw pejti me, ite amji kam ijapac xà tÿm kêanre ita ihhê ne ihtÿj apu ajpu. Ne ite ampo kên ton to ipa ita pê ihhê rÿm, me hacjên xà pê icator xà nare ata. ²⁴⁻²⁵ Ne wa icaxwãm pê itÿj Pahpãm te amji kam hapac xà kôt ampo pej pit ton to prãm cakrô, mã ite amji ton xà itajê kôt hamreare. Pê wa ajco ampo kêanre atajê ton to ipa intête, nee ajte amji jiprôn nare. Ne pê imã amji kÿn nare, pê wa pa amji mã:

— Jÿm mã quê ha ajte ite ampo kên ton xà itajê te, ityc mã ijôr xà ata pê ipytà? — hane. Nee mã jÿm nare. He me pajô Pahhiti pê Jeju Crixto te ri ampo kên cati ita cunea pê ipytà!

Quê ha Pahpãm Carô Pejti me pahÿr ita na me pahto ipa

Carati 5.16-26

⁸ ¹⁻² Hamre, ita caxuw quê ha, por Jeju Crixto kam me ajpên hõnco to me ipa atajê, quê ha nee Pahpãm jÿm curê mã mên nare. Ampo na? He Pahpãm Carô Pejti ita te ri Jeju Crixto kam pahte me ajpên hõnco na me pah-ton, ne me pamã pahte amji kam me pajapac xà intuw pejti ita jôr. Me ajkaam, cute mam me pahte amji kam me pajapac xà kên tÿmti ata te, me pahto ihhimpej xà pê me pahto cator. Na cu ha nee Pahpãm kaj na, ampÿa mã cupê ame papa, ne ihkên catia ata mã me pancjê nare.

Quê ha nee hipêr pahte ampo kên ton xà atajê me pahto ihhimpej nare

³⁻⁴ Ne pê Pahpãm Mojxe xwÿ mã cute me to ihhimpej xà gõ atajê cunea impej pit. Cu nee mempar nare. Ampo na? Jÿ wÿr cu apu amji mã me hamã, ne me kampa. Cwÿrjapê ri Pahpãm te me pahna amji ton to:

— Tee ame ite me to ihhimpej xà ton to me hahkre ita kam, quê ha nee curê mã cute me mên xà ata pê me amji pytâr nare. Cwÿrjapê wa ha meh-wÿr ikra kujate, quê ha meh-kritxwÿ na amji to, ne taa meh-kên xà ita pê me hÿtà — hajÿr. Ne ma cute me pahwÿr Jeju kujahêc, mã cute me hÿmrea na amji ton, ne ita ri pjê kam apu ipa. Ne ihtÿj Hÿm te, Mojxe xwÿ mã cute me to ihhimpej xà atajê na, me pajaxà kam amji mã impar kên to ipa nare. Jicu xà kam, nee ampo cwÿrjapê ihtyc prãm nare kam, cupê me pahkrixwÿ te hajÿr romã mã, cama cute amji na me hamãr, mã cute me pajaxà kam mehcuran, mã ihtyc. Ata to ri cute me pahkên xà catia ata pê me pahpytâr. Ne cute me pamã carôt jôr na, cu pahte amji kam me pajapac xà kên tÿm ata kôt me papa jicu, ne pahte amji kam me pajapac xà tuw pejti, Pahpãm Carô Pejti pÿn ajpên cator ata kôt, cu me papa.

⁵ Ne por mam cute amji kam hapac xà tÿm me to ihhimpej to ipa atajêa kôt me ipa. Ne Pahpãm Carô Pejti quêt me to ihhimpej to ipa atajê ri, ihkôat me ipa. ⁶ Ne quê ha jÿm te, cute amji kam hapac xà tÿm ata kôt ipa na, quê ha ihtÿj jÿ caxuw ty, ne ihtyc tu. Ne quê ha quêt jÿm te Pahpãm Carô Pejti kôt ipa na, quê ha nee cumã ampo cupa nare, ne ihtÿj ihcarÿcti kam, ihtÿr na ipa rohnÿtti mã. ⁷ Ne por jÿm cute amji kam hapac xà tÿam kôt ipa ata pê Pahpãm curê xwÿn. Ampo na? He hÿpar nare, na ri nee Pahpãm te to ihhimpej xà ata kam hapac nare. Ita kam tee apu ihkôt amji ton to hahkre, ne jÿ wÿr quê apu amji mã hamã ne to. ⁸ Ne por amjia kôt cute amji kam me hapac xà tÿam kôt me ipa atajê ri, nee me Pahpãm cajpuaw nare.

Pahpãm Carô Pejti ri, me pahcaxwÿn me, me pajÿ tÿr rohnÿtti mã na to

Carati 4.1-7

⁹ Quê ha Pahpãm Carô Pejti te nee me akam ihkrÿ nare na, ca ha nee me apê hõ tekjê nare. Na ca ha nee mam, ate amji kam me gapac xà tÿm ata kôt me apa nare, ne quêt Carô Pejti jarkwa kôt me apa, mãr quê me akam ihkrÿ. ¹⁰ Ne quê ha Jeju Crixto, Carô Pejti kôt, me akam ihkrÿ cakrô, quê ha ihtÿj jÿ caxuw me gÿ apu ty, me ate Pahpãm te me ato ihhimpej xà atajê jirô pê me apÿÿm cwÿrjapê. Ne me acaxwÿn nare, quê ha ihtÿj ihtÿr rohnÿtti mã. Ampo na? He ihtÿj Pahpãm te me ana amji caxàr. ¹¹ Pê Pahpãm Carô Pejti hacpÿa mã Jeju Crixto to ihtÿr, ata ri me akam ihkrÿ. Ne taa mã quê ha hacpÿa mã, me amã me gÿ to ihtÿr.

¹² Ita kam me ikjêjê, cu ha nee me pahte amji kam me pajapac xà tÿam ata kôt me papa nare. ¹³ Nãmri ca ha me ate amji kam me gapac xà tÿam kôt ame apa na, ca ha ramã me atyc xà wÿr ame pra. Ne ca ha me ate Pahpãm Carô Pejti carôt kôt me akên ton jicu na, ca ha Pahpãm cahê na me atÿr rohnÿtti mã na, me apa. Ne nee jÿ caxuw me akên catia pê, cuhy cati ata wÿr me aprar, ne kam me apÿÿm nare.

Pahpām Carō Pejti ri, ihkra na me pahto

14 Ne por Pahpām Carō Pejti amji kôt me to ipa atajê cunea pê mehkraa to mehkra. 15 Mēr ampo na mā Pahpām te me amā Carō Pejti jōr? Xà ajkí ate cama me cumā gápên xà caxuw, nare, ajkí cute me gigéc rên xà caxuw mā? Hâpà. He cute me ato ihkra xà caxuw ri, cute me amā Carō Pejti ita jōr. Na ca ha atỳj Carō Pejti carôt kôt cumā:

— Inxū — hane. 16 Pahpām Carō Pejti me, me pahcaxwỳn ajkam ihhônco, ne me pamā:

— Me apê Apām Cati kraa to ihkra — hane.

Cu ha jū caxuw, Jeju me, me ajpēan, ne me pampejti ne

1 Petrô 1.3-9

17 Ne pom hân ne me hūmjê tyc jakàn pê, mehkra te me hàhcukrêj cwỳr xà, ita kôpit na mā, cu ha Jeju Crix-tô mea mā, Hūm te cumā ampo jōr xà to hūjahkre atajê cwa. Cu ha Jeju Crix-tô me, me pahcunea te cute amji pupun xà kēanre atajê na ihkôt me amji pupun na, cu ha hanea ne jū caxuw, Jeju kôt me pahcarôt tỳjti, capēnti, impejti kam ame papa. 18 Ne wa pjê ita kam, pahte me amji pupun xà kēanre kēnre atajê to amji kampa, ne hanea ne ampo pejti to me pajàm cwỳr xà atajê me to ajpēn mā hapyre mā. Ne pahte ampo pejti to me pajàm cwỳr xà ata ri, pahte me amji pupun xà kēanre atajê jirôa pê catia to cati. Ne pahte me ampo pejti to me pajàm cwỳr xà ata kam, cu ha nee hipêr ampo kên itajê to me amji japackre nare. 19 Ne pê Pahpām pjê kam ampo cunea to, itajê pê me hūmre me, pryre me, ampo jara me, tep me, ampo cunea. Quê ha ampo itajê cunea ihtỳj jū caxuw, Pahpām te me pahto ipipê xà ata kam, me papê ihkra na cute me pahpupun na, me pajikaj.

Quê ha jū caxuw Pahpām ampo cunea to impej

20 Ne mēr ampo na mā ame amcro ata jikaj? Nee mā ampo na ame amcro ata jikaj nare. He pê mam Atāw xwỳ Pahpām cuna mā ihkên xà to, na ri ihkôt ampo cunea kên mā hàr. Ne nee mā amjia kôt ihkên mā hàr nare. Ampo na? Pê Pahpām ramā cute ita ton xà to amji kampa. 21 Ne quê ha ihtỳj jū caxuw amcro ata na, Pahpām te ampo cunea ton atajê hacpỹa mā impej pa. Ne cute me pahto ihkra ita kam, quê ha hacpỹa mā me pahto impej pa. Me ajkaam, quê ha hanea ne cute ampo cunea ton itajê impej partu, quê ha nee hipêr ihcacu, ne ihkên nare. 22 Ne me pamā, pjê kam ampo cunea kàj xà, mā amrā na, hahkre pej. Ata pê ihhêj rŭm pyjê mā mehkra xà, mā me ihcajpê ita na mā ampo cunea kàj xà.

Cu cormā Pahpām te me pamā me pajĩ to ipintuw xà ata jikaj

23 Ne pê Pahpām mam me pamā Carō Pejti jōr cakrô, mā cormā me pahkàj xà, cu me amrā, pahte amji to me papintuw xà jikaj xà cahhur to, pahte me

hikaj xà ita kam. 24-25 Ne cu me pahte amji mā me Pahpām to hajỳr, ne amji mā me pahpría kam me hikaj, ne me amji mā:

— Wa nee cormā ite me, por wa me hikaj ata pupun nare cakrô, wa itỳj Pahpām te ampo cunea to impej, ne imā ijĩ to ipintuw na amji mā me to hane. Cwỳrjapê, wa ha itỳj me hikaj — hane.

Carō Pejti Pahpām mā me pahcakôc na me pahtehcaj-

pa

Epet 1.3-5

26 Ne jū caxuw, pahte me hikaj to hicu prām xà ata kam, quê ha Pahpām Carō Pejti pahte me hikaj jicu nare na me pahtehcajpa. He me papê Pahpām mā amji cajrên jahkre kēatre, cwỳrjapê quê ha Carō Pejti ihtỳj ihcakôc nare kam ihcarĩcti kam, aracri Pahpām mā me pahcajrên. 27 He Pahpām te me pahcaxwām pê me pahte amji kam me pajapac xà pupun pejtu. Ne hanea ne cumā Carō Pejti te amji kam hapac xà jahkre pej. Quê ha Carō Pejti Pahpām te me pamā ampo jōr to prām xà ata na, quê ha me pamā ahwỳ.

28 Me pamā, mehcunea mā Pahpām kĩnti, mā cute amji kam hapac xà mā me hacjên xà caxuw ri, amji mā me capi atajê wỳr ampo kên te imprar, ne ame to jū măn xà atajê pĩn impejti te amji to ipixô, ne me hỹrmā imprar na, me pamā hahkre pej.

Jeju pê me Pahnàkà cati

29 Ne Pahpām te amji mā me pahcapi, ne taa amji mā:

— Pom itajê quê ha me cupê ikra pê mehtô kà pê Jeju pyràac, na quê ha me to “Ihàkà” — hane. 30 Ne pê Pahpām ramā me pahto amji kam hapac xà to amji kampa ata to ri, me pahto amji kampa. Ne hanea ne cute amji mā me pahcapi. Ne hanea ne cute catyt kam me papa catêjê na amji caxàr, ne quê ha hanea ne me pamā me pahcarôt tỳjti, impejti, capēnti gô, cu ha me papê hūràac ne kam me papa.

Quê ha nee me pahcurê xwỳn ame pahto jū măn nare

Roman 5.1

31 Ne pom Pahpām te me pamā ampo pejti cunea jōr itajê kôt ri, ramā me pamā Pahpām pê me pajamār catê na hahkre pej. He ramā Pahpām me pahcahê na ipa ita kam, xà quê ha ajkí ihtỳj ampo me pahtohjê? Hâpà! 32 Ne hanea ne me pajaxà kam, ihkra tyc xà caxuw, cute hōr to xuwca nare, ne ihtỳj ihtyc mā hōr ata kam, xà quê ha ajkí nee me pamā ihkôt ampo pejti itajê nõ jōr nare? Hâpà, quê ha ihtỳj me pamā cugô!

Jū wỳr quê pahte ampo kên ton itajê, cupê cumā me pahkĩnti ita cahpêta

33 Ne Pahpām te ri ramā me pahto hūjarên to:

— He imāa, pom itajê pê catyt kam me ipa catêjê, na wa ha me ahna amji capa — hajỳr xà ata kam, jŭm quê ampo kên na me pajarê? 34 He me pajô Pahniti pê Jeju Crix-tô ramā me pajaxà kam ihtyc, ne ihtyc xà ata jipy,

ramã hacpÿa mã ihtír, ne ma Pahpãm jíkÿê rûm awpôc rûm, me to ihhimpej xà krí xà kam jÿ, ne cumã me pahcajrën to ihkrí. Ata kam, jÿ mã quê ha ajte jÿmjê me papê ampo kên ton catêjê na me pamã hacjê? Quê, hamreare!

Jÿ wÿr quê ampo kên Pahpãm pê cumã me pahkínti ita cahpêrta

³⁵ Me pajö Pahhiti pê Crixto mã me pahkín to me pahkín.

Ne ampo quê cumã me pahkínti ita tète ihcahpêrta, quê hucu?

Hamreare, wÿr quê ampo ihcahpêrta!

Cu ha me amji pupun xà kêanre to me amji pupu, quê ha cormã cumã me pahkín ita na.

Ne quê ihhêaj to ampo te me pahto jÿ mãn xà ata kam, quê ha cormã cumã me pahkín ita na.

Me papê Pahpãm tekjê cwÿrjapê ri Pahpãm curê xwÿn te ame pahto kêanre ata kam, quê ha cormã cumã me pahkín ita na.

Quê ha ampeaj kam me pamã prãm cakrô, quê ha cormã cumã me pahkín ita na.

Quê ha me papê hamreare cakrô, quê ha cormã cumã me pahkín ita na.

Quê ha jÿmjê ame pahcuran prãm to ame ipa cakrô, quê ha cormã cumã me pahkín ita na.

Ne jÿm me pahcuran cakrô, quê ha cormã cumã me pahkín.

³⁶ Ne pê ramã rÿ pëa mã Tawi xwÿ Pahpãm jö kàh-hôc kam me pahto hÿjarën to:

“Me ijö Inxü Cati, he acurê xwÿn acwÿrjapê amcro cunea kam me icuran to prãm.

Ne me ito ihhêj rûm carà cahàcre hôhti curan xà caxuw, ne ihtÿj me icuran prãm” hane.

³⁷ Ne xà cu ha ajkí ampo kên itajê cunea cupate me pajö Pahhiti mã me pahkínti xà ata to, amji mã me pahhimpej jicu? Hãpà, nee cu amji mã me to pahhimpej jicu nare! He taa mã quê ha quêt me pahte ampo cunea tohjê na me pahto!

Ampo quê Pahpãm pê cumã me pahkínti ita cahpêrta

³⁸ Ne nee ampo te Pahpãm mã me pahkínti xà ita cahpêrhyr xà nare na, me pamã hahkre pej.

Cu ha me pampeaj na me papa, nare, cu ha me ty, quê ha cormã Pahpãm mã me pahkín.

Quê ha ampo carö me, cupê jaröti me, me hõ pahhi kwÿ atajê nee me Pahpãm mã me pahkínti ita tète mehcahpêrhyr nare.

Ne pom amcro ita kam ampo cator ata me, nare, quê ha jÿa caxuw, cormã ampo cato ata, quê ha nee Pahpãm mã me pahkínti ita tète ihcahpêrhyr nare.

³⁹ Quê nee còjkwa me pjê krac ri jÿa rûm, ampo cator itajê nõ Pahpãm mã me pahkínti ita tète ihcahpêrhyr nare.

He nee ampo te Pahpãm mã me pahkínti xà ata tète ihcahpêrhyr xà hamreare.

Cu Jeju Crixto pê me pajö Pahhiti kam pahte me ajpën hõnco cwÿrjapê, quê ha Pahpãm mã me pahkín rohnÿtti mã.

Pê Pahpãm Juta catêjê mã ampo pej jàhtöa ne cugö
Roman 3.1-2

⁹ Ita caxuw wa ha me amã, me ikwÿ pê Juta catêjê pê Ixaher catêjê to, ite amji cajpêr xà na amji jarê. Wa Jeju Crixto kam ite amji hõnco ita kam, wa nee Pahpãm Carö Pejti kôt ame amã ihêj nare, ne quêt ampeaj kam me amã harê. Ne hanea ne icaxwãm pê imã, wa ampeaj kam ame amã amji jarën na, imã amji jahkre pej. ² He me ikwÿ pê Juta catêjê pê me ikwÿa kwÿ, ne nee Jeju to amji mã mehhimpej prãm nare ita kam ri, me hÿ na ipeacre, ne imã amji kíñ nare. ³ Ita kam wa itÿj, pa mencwÿrjapê Pahpãm te icurê mã imën ne ito kêanre na, amji to prãm. Ne hanea ne Jeju Crixto kam ite amji hõnco xà ita pê icapa, ne ampÿa mã Pahpãm pê ixãm, quê ijaxà kam me hàhhuc, ne mempej mã me hàr na, imã me to prãm cakrô, mã nee Pahpãm te me to hajÿr nare.

⁴ Ýhÿ, por me ikwÿ pê Juta catêjê atajê ajteare mã me, ne quêt me ipihho te hajÿr he. Pê ramã Pahpãm me to hõ tekjê xà caxuw amji mã me capi, ne me to amji kra, ne me cumãa Caröt jàhcujrohti impejti ata to ajpê. Pê hanea quêt Pahpãm ajco Ixaher catêjê mãa amji jarê, pê me kampa, ne me ajpën pa, ne hanea ne me cumã ihhimpej xà gö. Ne pê hanea ne Pahpãm me cumã, cute me to amji kam hapac xà to impejti xà to hahkre, ne quêt me cumãa ampo pej jàhtöa to awjahkre. ⁵ Ne menquêtjê xakat pê ihtÿj Pahpãm kôt me ipa, atajê pê Aprãw xwÿ me, Ixac xwÿ me, Jaco xwÿ pê Ixaher catêjê xakat. Na ri me ikwÿ pê Juta catêjê pê mehtãmwxwÿa to mehtãmwxwÿ. Jiröa pê ri Jeju Crixto pê Pahpãm kra te mehía na amji ton, ne cupê mehwÿa nõ. Na cu ha me cumã, Pahpãm pê ri pjê cunea to ihhimpej catê na to pajàmnãn to me papa. Ampeaj kam!

Pê Pahpãm harkwa to ihcakôc ata na ihtÿj cute amji par

Roman 2.25-29

⁶ Mër hõhõ, Pahpãm te Juta catêjê to kêanre nare, ne me to hõ tekjê. Mã cute me cumã me to Inxü Cati na amji to hÿjahkre xà ata na, nee ajte mehcunea mã ihkín, mã ihkôt me ipa nare. Ne hõtpê mencre ne ihkôt me ipa. Ita kam, xà ajkí Pahpãm te nee me cumã amji ton xà ata na amji par nare? Hãpà! He ihtÿj cute harkwa to ihcakôc xà ata na, cute amji par. Ne mër ampo na mã nee mehcunea pê Pahpãm tekjê nare? Nee mã ampo na nare. He Pahpãm te nee amji mã mehcunea capi nare, ne hõtpê me pyxitre ne amji mã me capi. ⁷ Ne nee mã Aprãw tãmwxwÿ kwÿ cunea pê Pahpãm tekjê nare. Ne mehwÿa kwÿ pê hõtpê Pahpãm tekjê. Ampo na? He pê Pahpãm Aprãw xwÿ mã:

“He pê akra pê Ixac tàmxwý tàmxwý kwý pê itekjêa to itekjê.

Ne mehkĩnte akra nõ pê Ixamar tàmxwý tàmxwý kwý pê, nee itekjê nare” hane.

⁸ Cwýrjapê ri Pahpãm te amji mã Aprãw tàmxwý tàmxwý kwý capi na, cute amji to hũjahkre xà ata na. Cute amji mã me capi atajê pê ri hõ tekjêa to hõ tekjê. Ne cute amji mã mehkwy capi nare, ne amji to hũjahkre nare atajê pê ri, nee me hõ tekjê nare. ⁹ Ne pê Pahpãm Aprãw xwý mã ihkra xũmre to hũjahkre to hane he:

“Wa ha jũ caxuw hacpý ne me awýr amji jaxà, quê ha Xarakwýj pê gĩxi mã ihkra xũmre nõ ihpým” hane.

¹⁰ Hanea na pê Xara mã ihkra xũmre pê Ixac ita ihpým, ne ihkà. Ne apu ipa, ne Repecakwýj me hikwa tuw, ne kam ihkra xũmre cumã ajkrut hiahpuro ne ihpým. Ne mam ita japrý te Exaw, ne hapu na ita japrý te ri Jaco pê Ixaher catêjê quêtiti, ne cupê me Juta catêjê xakat. ¹¹⁻¹² Pê Pahpãm Repecakwýj mã:

“Pom hapu na akra xũmre pým ita pê quê ha mam ita jõ pahhi” hane.

Ne pê cormã ihtua kam ajwar me harij, ne nee cormã me ampo kên me, impej nõ ton, pê ahna me hõmpun nare cokrô, mã Pahpãm te amjia kôt, amji mã ihnõ ita capi, ne ma apu ihnõ ita caca. ¹³ Ne pê ramã Pahpãm, hõ kàhhôc kam, me ahna amji jarên to hane he:

“Jaco ri imã ihkĩn, ne Exaw ri imã kĩn nare” hane.

Hõ, pê cormã ajwar mehpým nare kam, pê Pahpãm me ahna amji jarên to hane, ne pyxit ne amji mã capi.

Quê ha Pahpãm mã jũm caprĩ to prãm na, quê ha ihtýj caprĩ
Roman 3.5-8

¹⁴ Ne cu ihhêaj to me pahnõ amji mã me pajarkwa to:

— He Pahpãm te amjia kôt amji mã jũm capi, ne ma apu ihnõ ita caca ita kam, imã Pahpãm ita nee catyt kam ipa nare — hajýr nare. He Pahpãm pejti, ne quêt catyt kam ipa. ¹⁵ Na pê rý pêa mã Mojxe xwý mã amji jarên to hane he:

“Quê ha imã jũm caprĩ to prãm na, wa ha itýj caprĩ.

Nãmri quê ha imã jũm caprĩ prãm nare na, wa ha nee jũm caprĩ nare” hane.

¹⁶ Pahpãm te ihtýj mehkwy na amji caxàr, ne ma amehkwý caca. He xà ajkĩ me hãpên xà to me hãpên to ipa atajê kôt mã, Pahpãm te me ahna amji caxàr? Nare, xà ajkĩ hũmre ata mã, Pahpãm te ahna amji caxàr na to prãm na mã, cute ahna amji caxàr? Hãpà! He Pahpãm te amjia kôt, hàhcaprĩa kam, me ahna amji

caxàr. ¹⁷ Ne pê Pahpãm, hõ kàhhôc kam ramã ita na amji jarên to hane he:

“Ýhý Paro, itea wa Ejit jõ pjê jõ pahhi na axãm.

Ne ite gũpar nare me, akrã týtiti na aton.

Ampo na?

He akôt ite mehcunea mã icarôt to ipipê xà caxuw, wa ite pahhi na axãm.

Ne akôat quê ha mehcunea, pjê cunea kam me ijahkre pej” hane.

¹⁸ Hajýr xà ita kôt, cu ha me Pahpãm te amjia kôt jũm caprĩ, ne ahna amji caxàr na me hahkre pej. Ne hanea ne amjia kôt, cute jũm caca xà to amji tète cumã ihkrã to ihtýj na, me pamã hahkre pej.

¹⁹ Ne ca ihhêaj to me anõ ita na icukij to:

— Ne mër ampo na mã quê ha Pahpãm jũm mã hũpar nare to, quê ha hũpar nare xà ata kam, jũ mã quê ha ajte Pahpãm te ahna mên, mã cute ton ata jahpan xà na, ihkên mã cumê? Imãa Pahpãm te jũm to hajýr xà ita na ihkaj na. Jũ wýr quê ha ajte jũm, Pahpãm te amji mã ampo na prãm, ne ahna mên xà ata kaj na ihnõ to — hane. ²⁰ Co he! He nee ate Pahpãm na me amji cukij xà hamreare! Quê ha pjê te pot ata ihcakôc na mã, xà quê ha ajkĩ ihtýj jũm te ton catê ata mã harkwa to:

— Ampo na mã ate iton to hajýr? — hane. He cute amji na cute ton catê cukij xà hamreare. ²¹ Ne por jũm xũmre pot to ata te ihtýj pjê ata kam, amjia kôt to ipi-jakrut ne hipêj xà. Ne ajteare mã ampo pej pit caxuw, ita to impejti ne. Ne ajteare mã cute ampo kên pit caxuw ton ata te, nee cute ton catê na, ihcakôc xà hamreare.

Pê Pahpãm rý pêa mã amji mã me pahcapi

²² Ata pyrãc pej na mã, Pahpãm te me pahton xà kam, cute me pahto amji kam hapac xà te hajýr, pom quê pjê te pot to cute amji kam hapac xà he. Ita na mã mehkwy to amji kam hapac to impejti, ne mehkwy to amji kam hapac xà to kêanre. Ne Pahpãm mã mehcunea mã carôt týtiti to ipipê to prãm, mãr quê mehcunea Pahpãm te ma apu ampo kên caca atajê na, me hahkre pej. Cwýrjapê ri hàhcaprĩa kam, cute mehkên ton prãmte ton atajê na me hamãr to ipa, ne jũa caxuw mehkên mã me curê. ²³ Ne hanea ne Pahpãm mã mehcunea mã hàhcaprĩhti na amji to ipipê to prãm. Cwýrjapê ri cute rý pêa mã amji mã me pahcapi, ne me pamã carôt týtiti jàhcujro impejti ata jõr, me papê hũràac to prãm to, na ri ramã cute me pahto impej. Na quê ha mehcunea me pahpupu, ne me Pahpãm pejti na me hahkre pej.

Pahpãm mã mehcakrit me, me cupê Juta catêjê atajê caprĩ

²⁴ Pahpãm te me pahto hõ tekjêa prãmte ri, me cupê Juta catêjê kam cute amji mã me pahkwý capi, ne hanea ne mehcakrit atajê kam, amji mã mehkwy

capi. ²⁵ Pê Pahpām ramā Hôxêj xwỳ pê harkwa na ihcakôc catê ata jô kàhhôc kam, amji jarên to hane he:

“He por pê mam me cupê me ikwỳ nare atajê, wa ha ita caxuw me cumã:

‘Me ikwỳ’ hane.

Ne pê mam imã mehkĩn nare atajê, wa ha ita caxuw me cumã:

‘Imã me akĩnti itajê’ hane. ²⁶ Ne por pê wa pjê ita kam me cumã:

‘Nee me apê me ikwỳ nare’ hane, atajê mã, wa ha ita caxuw:

‘Me apê, ipê me Apãm tĩr rohnýtĩ mã ata kra’ ” hane.

Hôhõ, pê Hôxêj xwỳ Pahpām jarkwa na, hõ kàhhôc kam, mehcahkrit atajê na ihhõc to hane.

²⁷ Pê hanea ne Ixaj xwỳ Pahpām jarkwa na Ixaher catêjê na ihhõc to hane he:

“Ixaher catêjê jàhtô pê ihhêj rũm cõxwa jõ pjênxõm jàhtô cakrõ, wa ha me pyxitre ne mehkên pê me hũtà.

²⁸ Wa ha ipê me gõ Pahhiti, ne pjê cunea kam me hàhtõa te mehkên ton jahpan xà na, me to ihtỳj tu ne.

Ne wa ha me mõr pejti kam, ita cwỳrjapê mehcunea to hajỳr hiahpuro” hane.

²⁹ Ne pê Ixaj xwỳ hõ kàhhôc kam, hanea ne ihhõc to hane he:

“Quê ha me hirõa pê me pajõ Pahhiti carõt tỳjti ata, nee me pamã ihtàm xwỳ nõ juwahi nare na mã, cu ha rỳ pëa mã me papê Krĩhpõc jõ krĩ me, Krĩhcum-rãrti pyrãac, ne ramã me pajamre tu ne” hane.

Hôhõ, Ixaj xwỳ te harên xà ita kõt, cu ha Pahpām te amjia kõt jũm capi, ne ma apu ihnõ caca ata na me pamã hahkre pej.

Juta catêjê pyxitre te hõtpê Jeju to amji mã ihhimpej
Roman 10.1-4

³⁰ He ca ihhêaj to me anõ me harkwa itajê na icukij to:

— Ampo to mã Pahpām jarkwa na mehcahôc catêjê itajê ame pamã hahkre to prãm? — hane. Ýhỹ, cute hajỳr he. Mehcahkrit atajê, nee Pahpām wỳr me mõr na amji to me hahkre nare cakrõ, mã ihtỳj Pahpām te amji mã me capi. Ampo na? He cute Jeju to amji mã mehhimpej xà ata kõt ri, Pahpām te me ahna amji caxàr. ³¹ Ne Juta catêjê nare. He Mojxe xwỳ te me to ihhimpej xà kõt, ihtỳj Pahpām wỳr me ipa na amji to me hahkre cakrõ, quê nee jũm hỹrmã mõr nare.

³² Ampo na? He Mojxe xwỳ te me to ihhimpej xà kõt ri Pahpām wỳr mehkàr, ne nee Jeju to cute amji mã mehhimpej xà kõt, hỹrmã mehkàr nare, cwỳrjapê ri nee hỹrmã jũm cator xà nare. Ampo na? He me cumã Jeju pê Pahpām wỳr pry kõt kenti nõ ata pyrãac, na ri pry ita kõt me pra, mã mehtõtõc, mã me ajhu. Pom cu pry kõt me pra ne amji mã me parĩt nare, mã kenti me

parê, ita jĩkjê na mã Juta catêjê ma apu Jeju curê. Ampo na? He nee amji mã me to mehhimpej prãm nare. ³³ Pê Ixaj xwỳ jõ kàhhôc kam, Pahpām ita na amji jarên to hane he:

“Wa ha Xijãw jõ hàpkãjti cahê na Krĩpinkrên kam me ikwỳ mehkřĩ atajê wỳr, jũm kujate.

Quê ha cupê pry kam kenti catia pyrãc ne jỹ, ne pry kõt me pra atajê jàhtõa ne mehtõtõc, quê ha me ajhu.

Hôhõ, quê ha cute me to hajỳr xà ita kam, quê ha me cupê Ixaher catêjê jàhtõa mã ihkĩn nare ne, quê ha ma amehcaca.

Ne quê ha mehkwy te amji mã me to ihhimpej catêjê atajê, quê ha ihtỳj mempej mã mehpỳm, ne ampeaj kam hũrên me hakry” hane.

Pê Pawrõ ajco Pahpām mã mehkwy pê Juta catêjê ca-jrê

Roman 1.16-17; Carati 3.24-27

10 Ýhỹ, Jeju kam me ikjêjê. Imã me ikwỳ pê Juta catêjê kĩn to kĩn. Imã Pahpām te, pom cormã kam me hapac nare atajê mea mã, mehkên pê me hũtàr na me to prãm. Ne wa ijõtpê Pahpām mã mehcajrên to hane he:

— Inxũ Cati, ca ha amji wỳr Juta catêjê pipkjêr na me to, quê me apkê — hane.

² He ampeaj kam wa me amã harê. Cute amji to me Pahpām cajpuaw prãm to, ihtỳj me cumã amji jõr to prãm, ne cama me cupê, cute me cumã amji jõr xà ata cunea jahkre kêatre, mã ihkaj na ame to. ³ Ne me cumã Pahpām te amji mãa, me cute amji kam hapac xà jikõtti tũmti to ihcuhtac, ne to imej, ne me ahna amji caxàr na, me cupê hahkre kêatre. Ne tee amjia kõt ahte ame amji cuhtac, ne ame amji to imej to me hahkre. Ne ma ame Pahpām te Jeju kõt amji caxuw me to ihcuhtacti, ne me to imejti xà ata na me to ihcaca.

⁴ He ihtỳj Mojxe xwỳ jõ kàhhôc ata kõt, tee ame amji kên tũmti, jikõtti atajê to ihcuhtac, ne me to imej to hahkre. Ne Pahpām te ramã Mojxe xwỳ jõ kàhhôc ata jaxà kam Jeju Crixto xãm. Na quê ha cute amji mã me to ihhimpej catêjê atajê catyt kam, Jeju kõt cute amji kam me hapac xà cuhtacti to me ipa, mãr quê Pahpām hõ tekjêa na me ahna amji capa.

Pahte Pahpām caca xà intuw ita mã me paxàr xà jahkre kêt nare

⁵ Pê ramã Mojxe xwỳ ampo itajê na Pahpām te amji jarên xà na ihhõc to hane he:

“Quê ha jũm te, ite me cumã ijarkwa jirên xà itajê cunea to amji kam hapac to ipa, ne nee jũ caxuw ihnõ to hapac kêt nare na, wa ha itỳj ahna amji capa, quê ha icahê na ihkrĩ rohnýtĩ mã” hane.

⁶ Ne jũ wỳr quê jũm ita to, quê nee jũm ton nare. He pê mam Mojxe xwỳ, ma kenti na api, pê kên po kam Pahpām cumã harkwa jirên xà atajê cunea na ihhõc,

pê cupy ne to wrÿ, ne me cumã cugõ. Ne pê cute amji mã Pahpãm jarkwa to iwrÿc xà ita, cumã ihtÿaj to ihtÿj. Ne ita kam nare. Xà quê ha ajkĩ Mojxe xwÿ cuxà, jũm ma Jeju Crixto kõt cõjkwa wÿr api, ne amji mã to wrÿ, cupê me pahkritxwÿ xà ita caxuw? Hãpà! He ramã amjia kõt me pahwÿr iwrÿc, ne cator. ⁷ Ne hanea ne, nee pjê krac ri mehtyc cahê na Jeju Crixto wÿr jũm wrÿc, ne cute to ihtÿr xà hamreare. Ampo na? He pê ramã Pahpãm to ihtÿr ita kam, quêt nee me pamã pahte me cumã me pahcator xà ita tÿj nare. Ne pê Mojxe xwÿ hanea ne Ixaher catêjê mã:

⁸ “He ramã me pahcaxwãm pê me pamã Pahpãm jarkwa na,
me amã hahkre pej” hane.

Ne cu ramã Jeju pê me pahkritxwÿ te me pahpytâr catê na, me to amji kampa, ne amji mã me harê. Ne harên xà ita to wa hãn ne me cumã harên to ipa he:

⁹ — Ca ha me anõ te garkwa to gÿjarên to: “Jeju pê mehcunea jõ Pahhiti” hajÿr, ne acaxwãm pê, ate amji kam gapac xà kam, Pahpãm te hacpÿa mã to ihtÿr na amji mã to hajÿr na, quê ha ihtÿj ampo kên kêanre ata pê apytã, ne ana amji capa — hane. ¹⁰ Ampo na? He cu me pahcaxwãm pê Jeju pê Pahhiti to amji mã me pahhimpej na, quê ha ihtÿj Hũm me pahna amji capa. Ne cu ha me pajarkwa to me Jeju jarên na, quê ha ihtÿj Hũm Cati pahkên pê me pahpytã. ¹¹ Ne pê ramã Ixaj xwÿ Pahpãm jarkwa na, hõ kàhhõc kam, Jeju na ihhõc to hane he:

“Ne por mehcunea Pahpãm te me pamã jũm kujahêc ata to amji mã me hajÿr atajê,
quê ha nee mehkên pê cute me hÿtâr nare na, amji na amehcãmjĩ nare.
Ampo na?
Quê ha ihtÿj me hÿrmã cato ne me hÿtã” hane.

¹² Ne cute harên xà ita ri, pjê cunea kam, mehcunea caxuw impej. Ampo na? He Juta catêjê me, mehcahkrit atajê pê nee ajteare mã, me cupê ajpên pê ajropê nare. Ne Pahpãm mã me ipipên pit. Ne cupêa ri mehcunea jõ Pahhiti, ne ihtÿj mehcunea te amji tehcajpar xà caxuw, ahna me hàhwÿr catêjê tehcajpar to kryjre nare, ne me to impejti. ¹³ Ne pê ramã Jõwer xwÿ Pahpãm jarkwa na, hõ kàhhõc kam, ihhõc to hane he:

“Por ihkên pê cute me amji pytâr xà na me Pahhiti na ahwÿ atajê,
quê ha ihtÿj me amji pytã” hane.

Cute me cumã Jeju jarên nare ita kam, jũ wÿr quê amji mã me to hane

¹⁴ Ne jũ mã quê ha cormã amji mã me Jeju to hajÿr nare ita kam, cute ihkên pê me amji pytâr xà na ahna me hàhwÿr to?

Jũ wÿr quê me to.

Ne cormã nee cute me harên par nare ita kam, jũ mã quê ha me, ne amji mã me to hane?

Jũ wÿr quê me to.

Ne cormã nee cute me cumã harên, mã cute me kam hapac nare ita kam, jũ mã quê ha me, ne kam me hapac to?

Jũ wÿr quê me kampa.

¹⁵ Ne cormã nee cute me cumã harên catê na, me jũm kujahêc nare ita kam, jũ mã quê ha jũm me cumã harên to?

Jũ wÿr quê me cumã harê.

Pê ramã Ixaj xwÿ Pahpãm jõ kàhhõc kam, me cumã harên catêjê to hÿjarên to hane he:

“Me pamã hÿjarên pejti to me cator xà ita pyrên ri ame pajakry” hane.

¹⁶ Mã Juta catêjê mã me hÿjarên catêjê cator, ne me cumã Jeju pê me pahkritxwÿ jarên xà impejti to me hÿjarên, mã cute mempar. Ne nee mehcunea te me harên par xà ata kõt, amji mã me to hajÿr nare. Ne pê hanea ne Ixaj xwÿ ahna ihhõc to hane he:

“Pahhiti! He ihhêj ne nee jũm te ijÿjarên xà ita to amji mã hajÿr nare” hane.

¹⁷ Hõhõ, cu ha me pahte me Jeju Crixto pê Pahpãm kra, ne amji to me pahkritxwÿ ita na, jũmjê mã harê, quê ihhêaj to me pahkampa, ne por amji mã me ahna prãm catêjê atajê, quê ha ihtÿj to amji mã mehhimpej.

Juta catêjê mã Jeju jarên par prãm nõ tũam

¹⁸ He xà ajkĩ me cupê Juta catêjê te me Pahpãm kra jarên kam me hapac nare na mã, nee cute amji mã me to hajÿr nare? Hãpà! Ihtÿj cute me kam hapac, ne cama nee kõt me amji ton nare. Pê Tawi xwÿ ramã ita to, Pahpãm jarkwa na, hõ kàhhõc kam hÿjarên to hane he:

“Me hÿjarên catêjê atajê cakõc xà ata, pjê cunea kam cute me kam hapac xà.

Ne ma pjê jicu xà mã me harkwa ata cator” hane.

¹⁹ Xà ajkĩ Juta catêjê te nee me Jeju jarkwa jahkre pej nare cwÿrjapê mã, nee cute amji mã me to hajÿr nare? Hãpà. He cute kam me hapac, ne me hahkre pej, ne me cumã impar prãm nõ tũam na ri, nee cute amji mã me to hajÿr nare. Ne quêt mehcahkrit itajê, ihtÿj amji mã me to hajÿr to me ipa. Ne pê ramã Mojxe xwÿ, Pahpãm jarkwa na, hõ kàhhõc kam, me ahna ihhõc to hane he:

“ÿhÿ, ipê me Apãm Cati, ne wa ha itÿj jũmjê cahkrit me, krÿxàre krã te amji jahkre kêatre atajê tehcajpa.

Ne wa ha mehtehcajpar xà ata kõt, ca ha ame hÿ na mempej mã me hàr ata kÿn, ne me kam me acryc na me ato” hane.

²⁰ Ne pê Ixaj xwÿ amji na hàhtãt nare kam me ahna, Pahpãm jarkwa na, ihhõc to hane he:

“Por pê nee ame ijapên nare atajê pê me imã cato. Ne pê nee ame ina hàhcukjêr nare atajê mã, pê wa amji to ajpê” hane.

²¹ He pê hanea ne Ixaj xwý Juta catêjê na ihhóc to hane he:

“Ne pê amcro cunea kam, Pahpãm tee ajco me cupê Ixaher catêjê jũpar nare, ne ma amehcaca atajê mã ihhêj ne, hũ to apê, ne me cumã hũhkra pê, cute amji wýr me to ipipkjêr prãmtê” hane.

Nee mã Ixaher catêjê cunea ame Jeju curê nare

11 Xà ajkĩ Pahpãm ma amehkwý pê Ixaher catêjê atajê cunea caca? Hãpà! He pom ipê Ixaher catêjê nõa ita? Ne hanea ne me cuxà, ipê Aprãw xwý tàmxwý nõa ita? Ne me iquétti pê Pênjamĩ cukwa kam ri, nee Pahpãm te amji pê icaca xà nare ita? ² Pahpãm nee apu cute mam pjê te amji ton pê mã, amji mã mehkwy capi atajê caca nare. He me amã, Pahpãm jõ kãhhóc kam, Erij xwý pê me cumã Pahpãm jarkwa to ihcakóc catê ata te ahna ihcakóc xà ata jahkre pej. Ne Erij xwý te Pahpãm cunaa mã, cumã Ixaher catêjê kôt harên to kêanre to hajýr he:

³ “Ijõ Pahhiti, ramã cute me cumã garkwa to mehcahoc catêjê jipej.

Ne hanea ne, ma ame ato amji japackre caca, na ri curi cute me amã ampo to caxàr xà atajê to, cute me hamre tu.

Wa ipyxit peaj ne ijãhhuc, mã ita caxuw ihtýj me cuxà, ame icuran to prãm” hane.

⁴ Mã Pahpãm Erij mã:

“Amã ri, ca ahte apu apa, ne imã cute hajýr nare. Ampo na?

He cormã imã pjê ita kam, me hũmre te mir te xet wa ite amji mã me capi, ne me huwahi, mã ame ipa itajê,

ma ame hũm cahàc krekà pê Pahar ata caca, ne nee amji mã ame hũpa nare, ne quêt ikòat ame ipa” hane.

⁵ He ita caxuw Pahpãm te amji kam hapac xàa na, amjia kôt, hàhcaprĩa kam me cupê Ixaher catêjê kwýa kwý capi, ne amji mã me huwahi. ⁶ He xà ajkĩ cute me hàpên xà impejti ton cwýrjapê mã, Pahpãm te amji mã me capi? Hãpà. He amjia kôt, hàhcaprĩa kam, cute me capi. Quê ha Pahpãm te me hàpên xà atajê kôt amji mã me capi na, quê ha nee cute amji kam hapac xàa na hàhcaprĩa kam amji mã me capi nare.

⁷ Pê Ixaher catêjê amjia kôt, cute me amji kam me hapac xàa na, Pahpãm wýr me ipipkjêr to prãm, cute me ahna amji caxàr prãmtê, ne nee hýrmã me cator nare. Mã Pahpãm te amji mã mencre ne me capi atajê ri, hýrmã me cator, mã cute me ahna amji caxàr. Mã ihhêj ne mehcahur cunea japactu, ne nee Pahpãm te me cumã hàkjêr xà ata na, me kam hapac

nare. ⁸ Pê Mojxe xwý me, Ixaj xwý, ajwar ahpýanre na me hõ kãhhóc kam, me ahna mehhóc to hane he:

“Pahpãm te me cupê mehkrã kam, me cute amji kam hapac xà cunea to ihcunĩ ita na, mã nee ita kam ihhêj ne me Pahpãm kam hapac, ne me hõmpun nare” hane.

⁹ Pê hanea ne Tawi xwý me ahna ihhóc to hane he:

“Pom hãn ne ampo pry mã mehhêj ne mehpro, ne me curê, mã ajhu ita jĩkjê na ri

Pahpãm te, me hõ amji kĩn ata kam mehkên mã me mên na, imã me to prãm.

¹⁰ Ne imã ate me cupê mehkrã cunea to ihcunĩ na me to prãm,

mãr quê nee ampo kam hapac nare.

Ne imã mehkên xà te me hirõ pê ihpýpým tu na, me to prãm” hane.

Quê ha nee cute me to ihcupan xà itajê me cumã irohnýtti mã nare

Me Hàpên Xà 13.46; 28.23-28; Epet 2.11-22

¹¹ He xà ajkĩ Juta catêjê te ampo to ihcupan xà itajê me cumã irohnýtti mã? Hãpà. Quê ha ihtýj jũ caxuw hacpýa mã Pahpãm wýr me apkjê. Mã Pahpãm te mehcahkrit atajê wýr amji to irõ, ne mam atajê jicu. Ne mam atajê te to ihcupan xà kôt, mehcahkrit atajê te ampo pej pit na, me amji caxàr. Ata kôt quê ha me cupê Juta catêjê atajê, me hõmpu, ne ame hũ na mempej mã me hàr xà ata kĩn, ne ihhêaj to hacpýa ne Pahpãm wýr me apkjê, ne me amji jaxà. ¹² He Juta catêjê te to ihcupan xà atajê jahpan xà na ri, mehcahkrit atajê te Pahpãm pĩn, ampo pej pit hapõj atajê incwýr. Ne quê ha jũ caxuw Juta catêjê te hacpýa mã Pahpãm wýr ipipkjêr, ne me amji jaxàr na, quê ha me hirõa pê Pahpãm pĩn amji mã me ampo pej catia ne me to amcwa.

Juta catêjê pê pĩxõ pàr pyrãac

¹³ Ita caxuw wa ha me apê mehcahkrit atajê mã amji jarê. Ipê me amã Jeju jarkwa na iprar catê. Ne ite amji kam ijapac xàa na, imã ijapên xà ita peaj to impej, na wa xwý kam to ijapên nare. ¹⁴ Ne wa Pahpãm wýr me ato ipipkjêr to imõr xà ita kam, quê ihhêaj to me ikwý kwýa nõ, ame gũ na me apej mã me acjêj xà ita kĩn, ne hacpýa mã Pahpãm wýr amji jaxà, mãr quê ahna amji capa. ¹⁵ Ne Pahpãm te mehkwy kwý pê Juta catêjê atajê jicu, ne me apê mehcahkrit atajê wýr ipipkjêr, ne me ana amji caxàr, na ca hacpýa mã ajpên to me gõ ikwý nõ. Na quê ha jũ caxuw me cupê Juta catêjê hacpýa mã Pahpãm wýr me amji jaxà, ne ampeaj kam me hakry to hanea, pom quê ihhêj rũm me cupê me hũkjê ty, ne hacpýa mã me kôt ne mehtĩr, mã hũrên ame hakry ata to, quê ha ame hakry.

Me papê pĩxõ pàr jarê pyrãc

¹⁶ Ita caxuw wa ha me amã ampo itajê kôt harên to incri. Quê ha me anõ mã gõ pur kam ampo pĩxõ pàr

na, xà ca ha ajkí harê to pit mã gõ tekjê? Hãpà, ca ha hanea ne ipàr kam ihpa itajê cunea to gõ tekjê. Měr hõhõ, he mam me cupê Juta catêjê atajê pê pîxõ pàr jarê ata pyrâac, ne me cupê Pahpãm tekjê, ne mehtàmwxwý itajê pê pîxõ pàr pa atajê pyrâac, na ri hanea ne me cupê Pahpãm tekjê.

17 Ne me apê mehcahkrit atajê pê, ihhêj rúm ahkêt kam pîxõ pàr te ihcuhhê, ne cupê jùm te to hõ tekjê nare ata pyrâac. Ne por pur kam jùm pîxõ pàr to hõ tekjê ata, quê ha hõ pîxõ pàr ata pa kên nõ Jakep, ne cumê. Ne ma cute mör ne ahkêt kam ihnõ xa ata pa Jakep, ne pur kam cute hõ pîxõ pàr pa Jakep ata wýr to amji jaxàr, ne cute hakep, ne mên ata jaxà kam to caxwýr. Mã cute ahna impýn, ne ihkat kam mam harê ata kôt ri, ihtýj ipicamên to mō. Ita jîkjê na mã, Pahpãm te me apê mehcahkrit to hajýar, ne cute Juta catêjê kêanre atajê jicu, ne me ana ipyr ne me haxà kam amji wýr me gacjên. Ca menquêtjê pê pîxõ pàr jarê pyrâcti ata kam, atýj me apicamên to me mō.

18 Cwýrjapê ca ha nee me cupê Juta catêjê pê pî pàr pa, mã cute me hakep ne me irên atajê na ame acakõc kên nare. Ampo na? He cute me hakep xà ata kôt, nee ate amji to me acati prãnte, cute me hakep nare. Ampo na? He me apê pîxõ pàr pa ata pyrâac, ne jũ wýr quê pîxõ pàr pa nõ harê to ihmipej, ne harê ri quêt ipàr pa cunea to ihmipej. Cwýrjapê ca nee jũmjê jaxà kam me gàhhuc ata to amji to ame acati prãm nare.

Pahte Jeju to amji mã me pahhimpej, na ri me haxàr xà kam me paxàr xà

19 Na ca ihhêaj to me anõ imã garkwa to:

— Juta catêjê itajê jaxà kam me ixãm prãnte ri, Pahpãm te me hîcu, ne pō mã me cator, wa me haxà kam me ijãhhuc ita kam, mōrmō ma ramã Pahpãm amehcaca — hane. 20 Ne Jeju to cute amji mã mehhimpej nare cwýrjapê ri, cute pō mã me cator, ca me haxà kam me axàr. Ampo na? He ate Jeju to amji mã me ahimpej, na ri me haxà kam me axàr xà ata to, ca me amji japackrea ne. Cwýrjapê ca ha nee cute me ato hajýr xà ata pyrên amji to ame acati prãm to me apa nare, ne quêt cama amji mã me hũpahti to me apa.

21 Ne por jùm te pîxõ pàr to hõ tekjê ata te ipàr tète kam ihpa kên Jakep, ne cute mên ata pyrâc pej na mã, Pahpãm te Juta catêjê kêanre atajê jicu. Na ca ha me guphêa ne. Ampo na? He nee me apê mam Pahpãm na mehkwy pê Juta catêjê atajê nare, ne me apê mehcahkrit. Na ca ha me apê me hũràac, ne me akên xà kêanre nõ to, quê ha ihtýj me gicu.

22 Ita na cu ha Pahpãm jãhcaprĩhti na me hõmpu, ne hanea ne cu ha, cute ampo kên cwýrjapê me to kêanre xà na, me hahkre pej. Ne ate Jeju to amji mã me ahimpej catêjê mã ri, ihcunea na Pahpãm pej. Ne ma ame Jeju caca, ne mehkãrã kêanre atajê mã ri, hanea ne Pahpãm kêanre. Quê ha cute me acaprĩ kam to incrà ita na, ca ha me apej ita na ame apa. Nãmri quê ha cute me acaprĩ jicu na, quê ha hanea ne, me gicu ne me akên mã me arê.

23 Ne quê ha hanea ne Juta catêjê te Jeju caca jicu, ne hacpýa mã cumã me amji jör na, quê ha ihtýj mehkwy mã me haxà. Ampo na? He quê ihtýj Pahpãm ita to hane. 24 Me apê mehcahkrit atajê pê ahkêt kam pîxõ pàr pa, mã cute hakep, ne pur kam ihnõ ata kam hãm ata pyrâac. Ne me cupê Juta catêjê atajê pê ri, por cute me pîxõ pàr pa Jakep, ne me ihnõ mã to hãm xà caprãr ata pyrâac. Na quê ha to hõ tekjê ata mã hacpýa mã ihkwý kam hãm to prãm na, quê ha ihtýj hacpýa mã ihkwý kam hãm. Ampo na? He pî pa ata pê ri quêt ihpaa to ihpa. Na ri hacpý mã cute kam hãm xà na cumã ihcature. Ata pyrâc pej na, quê ihtýj Pahpãm hacpýa mã Juta catêjê kwý mã mehkwy jaxà. Ampo na? He me cupê mehkwy to mehkwy, na quê ihtýj hacpýa ne mehkwy mã me haxà.

Quê ha jũ caxuw Juta catêjê cute me amji kam hapac xà to antuw

Ruc 21.24; Jowãw 10.16; Carati 3.22

25 Ýhý me ikjêjê, ca ihhêaj to me anõ te, hahkre kêt kam amji krã kreti na, ate amji cãmjĩ cupate, wa ha me amã Pahpãm te imã ampo to hahkre xà ata jarê, ca ha me hahkre pej to impeaj ne. He pê mam, nee jùm ampo itajê nõ jahkre pej nare. He quê ha me cupê Juta catêjê, Pahpãm cuna mã mehkãrã týjti ita na me to hãmtu nare. Ampo na? He quê ha Pahpãm mehcahkrit atajê te hýrmã me ipipkjêr atajê cahyt, ne me to hàhtõ xà ata mã hahê, ne me hîcu. Ne hacpýa mã me cupê Juta catêjê wýr apkjê, ne me ahna cupy. 26 Ata to, quê ha mehkên pê, me cupê Juta catêjê cunea pytà. Ne pê Ixaj xwý ramã Pahpãm jarkwa na, hõ kãhhõc kam, me ahna ihhõc to hane he:

“Quê ha jũ caxuw Xijãw jõ kên cahê na Krĩpinkrên pĩn me pahkên pê me pahpytãr catê ata cato, ne Jaco pê Juta pãm ata tãmwxwý catêjê intête, cute amji kam me hapac xà kên to pøj partu.

27 Quê ha Pahpãm me cumã amji jarên to hane he: ‘Pê wa rý pëa mã me amã ite me akên to pøj xà ata na, me amã amji jarëa na, wa ramã me atête to pøj to mō he’ ” hane.

28 Ne ita caxuw, cormã me cupê Juta catêjê ma ame Jeju pê mehkên pê me hũtãr catê na me harên par caca xà ata to ri, cute amji to me Pahpãm curê xwýn. Na ri me apê mehcahkrit atajê te Jeju to amji mã me ahimpej atajê pê Pahpãm na mehkwy. Ne pê rý pëa mã Pahpãm ramã amji mã menquêtjê capi, ne me cumã amji to ata na, cormã to amji japackre. Cwýrjapê ri cormã cumã mehtãmwxwý catêjê atajê kwý kĩn rohnýtti mã. 29 Quê ha Pahpãm te amji mã jùm capi, ne cute to impejti na amji ton na, quê ha nee jũ caxuw jùm ita to hapac kêt nare, ne ihtýj to amji japackre rohnýtti mã. Ne nee cute ahna amji ton xà ata kaj na, ihnõ na to ipintuw nare.

30 He pê ramã rý pëa mã, me apê mehcahkrit atajê inquêtjê ajco me Pahpãm jarkwa kam hapac nare to me ipa. Na pê ajco nee me caprĩ nare. Ne ita kam nare.

Ihtÿj cute me cupê Juta catêjê jÿpar nare atajê jaxà kam me acaprí, ne me ato amji kwÿ. ³¹ Ne quê ha ihtÿj jÿ caxuw Pahpãm me cupê Juta catêjê jÿpar nare atajê caprí to hanea, pom quê cute me acaprí he. He Pahpãm te me caprí prãmte ri, ihhêj ne amehkên ton to me ipa. ³² He me pahcunea jÿpar nare kam ri, Pahpãm te me pahcunea pro, ne ihhêj rÿm me pahto me hacjên catêjê pyràac. Ne mër ampo na mã cute me pahto hajÿr? Nee mã ampo na nare. He cute me pahcunea caprí prãm to ri, cute me pahto hajÿr.

Pahpãm te amji jahkre pejti ita rya to iry

³³ Ýhÿ, ampeaj kam Pahpãm mã hàhcaprí ita catia to cati! Ne cumã cute amji jahkre pejti ita rya to iry! Ne me hirôa pê ihkrã kre cati! Ne quê cute ampo to ihmimpej xà na to ihmimpej na, quê nee jÿm ihkôt hahkre pej nare. He hÿ na cute ton xà ata jahkre kêatre. Quê ha hôtpe cumã hahkre peaj xà na ihtÿj to. Ne jÿm mã quê ha ajte, cute amji mã Pahpãm te amji kam hapac xà to, cute amji mã ihmimpej xà atajê nõ kôt hakop ne hahkre pej? Hamreare, he caxuw jÿm jamreare. ³⁴ Pê ramã Ixaj xwÿ hõ kàhhôc kam, ita to hÿjarên to hane he:

“Jÿm mã quê ha ajte me pajô Pahhiti mã ihkrã kam, cute amji kam hapac xà ita jahkre pej?

Hamreare!

He nee jÿm te me pajô Pahhiti jahkre pej xà caxuw hamreare” hane.

³⁵ Ne pê me iquêtjê nõ japrÿ te Jo ita, hõ kàhhôc kam Pahpãm na ihhôt to hane he:

“Xà ramã ajkí Pahpãm te jÿm to new xà caxuw, cute cumã ampo jôr?

Hãpà!

He ampo itajê cunea Pahpãm tekjê pit ita kam, jÿ mã quê ne jÿm cumã ampo gô, quê to new? Hamreare!” hane.

³⁶ Hõ, he pê Pahpãm amji mãa, ampo itajê cunea ton partu. Ne nee ihkaj na, iràn xà na, jÿm te amjia kôt ampo itajê nõ ton nare. Mã nee hanea ne ampo te, amjia kôt amji ton nare. Ne Pahpãm ri ampo cunea to ihmimpej. Na cu ha amcro cunea kam me pahcunea Pahpãm cati na amji mã me to, me pajÿjarên to me papa! Ampeaj kam!

Pahpãm ihtÿj me pamã me pahte amji kam me pajapac xà to ipintuw partu

Pirip 4.8-9; 1 Texarôn 4.1-3

12 Ýhÿ me ikjêjê, pom ramã Pahpãm te ampo jàhtôa na me pahcaprí hyre nare ita? Cwÿrjapê wa ate me cumã amji jôr xà caxuw me ana ahwÿ. Ate amji to me Pahpãm cajpuaw xà na, ca ha cumã me amji gô, ne cumã pit mã ate me gápên to me apa na, ca ha atÿj amji mã me to cati to me mō. ² Ne nee ca ha amji na pjê ita kam, Pahpãm curê xwÿn catêjê te

mehkên ton catêjê jamãr, quê amji kôt me aton nare. Ne quêt cama amji na Pahpãm jamã, quê amã ate amji kam gapac xà to ipintuw partu. Quê ha me ato hane, ca ha me Pahpãm te ampo pej cunea, kam ampo kên jamreare, ne ihcajpuaw atajê jahkre pej.

³ Pahpãm te amjia kôt ito, ite me amã harkwa jarên catê ne ahna ixãm. Cwÿrjapê wa ha itÿj me gapackre, ne me ato ihmimpej to ipa, ca ha me ikampa. Ne nee ca amji peaj to apej na, amji to ame gãmra nare. He Pahpãm te ri ate amji mã to ahimpej xà ita na cute aton. Na ca me akwÿ, xwÿ kam amji mã me to ahimpej nare, ne me akwÿ kwÿ, cormã kyre pê amji mã me to ahimpej. Ca ha ate kyre pê Pahpãm to amji mã ahimpej na, ca ha nee ahna amji jarên to:

— Wa ramã xwÿ kam Pahpãm to amji mã ihmimpej to ipa nare — hajÿr nare.

Me papê Jeju jã pyrãc

⁴ Ne me pajÿ pyxit peaj ne kam, ahpÿanre na, me pahcukrã xà itajê mã hàpên xà. ⁵ Ita jíkjê na mã Jeju Crixto kam pahte me ajpên hõnco catêjê, ajpên kam me pahpyxit peaj. Ne ahpÿanre na me pamã me pajapên xà ita pê me pajÿ kam ahpÿanre na me pahcukrã xà atajê pyrãc.

Pahpãm te ahpÿanre na me pamã me pajapên xà jôr

⁶ Mã Pahpãm te amjia kôt ahpÿanre na me pamã pahte amji kam me pajapac xà te amji jahkre pej jôr partu, ahpÿanre na me pahte cumã me pajapên xà ton xà caxuw. Na quê ha Pahpãm te harkwa to ihcakôc catêjê na me pahkwÿa kwÿ pyxwÿr na, cu ha pahtÿj cute to ihmimpej xà ata na mehcunea mã harkwa to me pahcakôc to me papa.

⁷ Ne quê ha cute me pahte mehtehcajpar catêjê na me pahkwÿa kwÿ pyxwÿr na, cu ha pahtÿj mehtehcajpar to me papa. Ne quê ha cute ampo to me cumã hahkre catêjê na me pahkwÿa kwÿ pyxwÿr na, cu ha pahtÿj me cumã ampo to hahkre to me papa.

⁸ Ne quê ha cute, me pahte cumã me hÿcanãr ton xà caxuw me pahkwÿa kwÿ pyxwÿr na, cu ha pahtÿj me cumã me apô ne me cumã hÿcanãr ton to me papa. Ne quê ha Pahpãm te, me pahte me cumã me hàhcukrêj to me papicokjêr catêjê na me pahkwÿa kwÿ pyxwÿr na, cu ha me pajàhcajren jôxÿ nare kam, me pahtÿj me cumã me to me papicokjêr to me papa. Ne quê ha Pahpãm te me to pahhimpej catêjê na me pahkwÿa kwÿ pyxwÿr na, cu ha pahtÿj me pahkrã kreti kam me pajuphêa rÿm me to me pahhimpej to me papa. Ne quê ha Pahpãm te me pahte me caprí catêjê na me pahkwÿa kwÿ pyxwÿr na, cu ha pahtÿj me pamã amji kÿan kam ame caprí, ne mehtehcajpar to me papa.

Cu ha caxwãm catia mã me ajpên kÿn to me papa

Epet 4.25-5.2; 1 Petrô 3.8-12

⁹ Ca ha nee apu amji krãhky na me akwÿ kÿn nare, ne quêt caxwãm catia mã amehkÿn to me apa. Ne ma apu

amji pê mehkên caca, ne quêt impejti ca me hûnâr to me apa. ¹⁰ Por ca Jeju kam ajpên to me akjêjê atajê, ca ha me apeaj kam, me ajpên kîn to me apa. Ne amji mã me akjêjê to me catia to me apa, ne ajpên cupahti to prãmti to me apa. ¹¹ Ne nee ca me gâpên xà kam ame xuwcaca to ame apa nare, ne quêt ampeaj kam me gâpên prãam kam me pajõ Pahhiti mã me gâpên to me apa. ¹² Ne me gakrya kam, Pahpãm pîn me amã ampo pejti cator xà ata jikaj to me apa. Ne atÿj ampo te me ato jũ mãn xà atajê mã me gũcanâr to me apa. Ne nee jũ caxuw Pahpãm mã me acakõc jicu nare, ne nee me cumã amji cajrên jicu nare. ¹³ Ne quê Jeju kam ajpên to me akjêjê pê ampo jamreare ata me amã, ca ha atÿj me cumã to ajcokjê. Ne atÿj me gũrkwa kam jũa rûm me akjêjê me ipa atajê jamã, quê me acahê na ame ipa.

¹⁴ Quê ha cute me ato kên prãmte, ame acapõr to me ipa atajê mã, ca Pahpãm na ahwÿ, quê me to impej, ne quê nee gahpan xà na ame to kên nare. ¹⁵ Ne me cumã amji kînti atajê cahê na me amã amji kînti ne. Ne ame amrã atajê cahê na atÿj ame amrã.

¹⁶ Ne me acunea hãn ne me acaca xà na, me acapënti to me apa, ne nee ame ajpên rên nare. Ne amji mã mehcunea cupa to me apipënti to me apa. Ne nee apu amji to me acati prãm to me apa nare. Ne ca ha atÿj me amã ihcunea na me akwÿ pê mehkryjre atajê kînti ne. Ne nee ca me hirõa pê amji krã kreti na amji to gãmnan to me apa nare.

Cu ha nee amji jahpan xà na jũm to kên nare

¹⁷ Ne quê jũm ato kên, ca nee amji jahpan xà na to kên nare. Ne mehcunea mã ampo pejti atajê to pit mã gâpên to me apa. ¹⁸ Ne quê jũm apu amãn kêanre, ca ha nee amji jahpan xà na cumãn, ne apu cume apijapu nare. ¹⁹ Me ikjêjê, quê jũm ame ato kên, ca nee Pahpãm pê gãmõtâr, ne amji jahpan xà na ame kam acryc nare. Mãr quê Pahpãm me gahpan xà na ame kam incryc. Ampo na? He ramã Pahpãm te hõ kãhhõc kam me ahna amji jarën to:

“He pa wa ha cute ame ato kên atajê jahpan xà na amcwa,
ne ijãmcwÿr xà ita pê ite ame to kêanre xà” hane.

²⁰ Ne Pahpãm mã cute mehhõc catêjê te ramã hõ kãhhõc kam, harkwa na ihhõc to:

“Quê acurê xwÿn mã prãm, ca ha atÿj cumã harte, nare, quê cumã kôr, ca ha atÿj ihkõm.

Ampo na?

Ca ha ate to hajÿr na, quê ha cama apu akam ihpahàm, ne cute apu ato kên xà ata jũ na ihpeacre ne, ne nee hipêr amji to cupê acurê xwÿn to prãm nare”

hajÿr xà ata kôt, ca ha to.

²¹ Na quê ha jũm te apu ato kên na, ca ha nee amji jahpan xà na apu kam acryc nare, ne cama to impejti ne. Hõ, ca ha ate ita to me hajÿr na, quê ha nee hipêr

cupê acurê xwÿn nare, ne cama cupê gõ ikwÿ nõ rohnÿtti mã.

Cu ha pahtÿj amji caxuw me pajõ pahhi kwÿ kampa

Tito 3.1; 1 Petrõ 2.13-17

13 Ne ca ha me acunea me cupê pahhi catêjê kam me gapac to me apa. Ampo na? Nee mã ampo na nare. He Pahpãm te ri pahhi na, pahhi catêjê itajê pyxwÿr, cute me ato ihhimpej xà caxuw. Jũ wÿr quê Pahpãm te pahhi na jũm xãm prãm nare kam, quê amjia kôt cupê pahhi. ² Cwÿrjapê quê ha jũm te hõ pahhi par nare, ne ma apu ihcaca na, quê ha ma ramã apu Pahpãm te pahhi xãm ata par caca, ne ma apu Pahpãm caca na, quê ha ihtÿj jũ caxuw amji kên mã amji mẽ.

³ He xà ajkĩ catÿt kam me ipa catêjê mã me hõ pahhi cupa? Hãpà! Ne por mehkên ton to me ipa atajê mã ri ihtÿj me hõ pahhi cupa. Nãmri quê ha amã gõ pahhi cupa nare to prãm na, ca ha nee apu akên ton to apa nare, ne quêt catÿt kam apejti na apa. Quê ha ramã pahhi me apupu, ne me garên pejti to me ipa. ⁴ He me apejti to prãm to ri, Pahpãm jarkwa kôt pahhi ata hãpên xà ata to apê. Nãmri ca ate akên ton to apa na, ca ha atÿj amji mã pahhi ata te ato kên xà ata cupa to apa. Ampo na? He pahhi ata te ihtÿj akên jahpan xà na me ato kêanre xà. He Pahpãm mã ri pahhi ata apê, cwÿrjapê quê ha ihpïan ajpên cumã cute akên mã amën xà caxuw harkwa cato. ⁵ Cwÿrjapê ca ha atÿj pahhi catêjê cunea kampa. He xà ajkĩ Pahpãm te me pahkam incryc, ne ame pahto kên xà ata cupate pit mã, cu ame pahhi catêjê kampa? Hãpà. He ramã pahte mempar xà na me amji jahkre pej.

Cu ha nee ampo to jũm to new nare

⁶ Cwÿrjapê ca ha hanea ne pahhi catêjê atajê te Pahpãm krac ri cumã hãpên to me ipa ata jahpan xà na, atÿj hãn ne me cumã gãmjõr to me apa. ⁷ Nãmri ca ha me anõ te cormã cumã gãmjõr nare na, ca ha atÿj cumã amgõ. Nare, ca ha ate cumã me gâpên xà na, ca ha atÿj cumã apê. Ne amji mã me hũpahti to me apa, ne amji mã me harên pejti to me apa. ⁸ Ne ca ha ate jũm to new na, ca ha atÿj cumã amgõ, mãr ca nee ate to new ata na apa nare. Ne ampo ita pyxit peaj, ca ha atÿj me ton to me apa he. Ca ha atÿj me amã ajpên kînti ne. Ne ate ajpên to mempejti to apa xà ata pê ri ihhêr rûm ate me ajpên to new. Ca ha ate me ajpên kînti to me apa na, ca ha ramã me Pahpãm te me amã harkwa jirên atajê cunea kam me gapac to me apa.

Cu ha pahtÿj me ajpên kîn to me papa

⁹ Ata pê ramã rÿ pëa mã Pahpãm me pamã harên to:

“Ne por ramã me amã me aprõ, ne me amã me apjê atajê,
ca ha nee ahti na me iràn xà na, jũm me ajpên caxun nare.

Ne nee jũm curan nare.

Ne nee ajpën pê ame gâhkîj nare.
Ne nee ajpën jû na ame ampo kîn to me apa nare” hane.

Ne Pahpãm te me pamã harkwa jirên itajê cunea pipën pit. Ne ihnõ ita pê ri ihhêj rûm ihcunea pyrâc, ata te hajÿr he:

“Ca ha me amã me akwÿ kîn hanea, pom quê amã amji kîn he” hane.

Cu ha pahte ihkôat me ton to me papa na, cu ha ramã ihkôt ihkwÿ cunea ton to me papa. ¹⁰ Quê ha jûm mã mehkwy kîn na, quê ha nee jû caxuw ame to kên nare. Hõhõ, cu ha ame pahkwÿ kîn to me papa xà ata pê, ramã pahte me Pahpãm te me pamã harkwa jirên xà ata cunea kam me pajapac to me papa xà.

Cu ha Jeju te amji kam hapac xà impejti to me amji tÿj
Epet 5.14-21

¹¹ Ne ampo na mã cu ha ame amji to hane? Nee mã ampo na nare. He me pahkwÿa kwÿ, nee hacpÿ ne Jeju te amji jaxâr, ne ampo kên cunea pê me pahto cator xà ita to, me amji japackre nare, ata pê ihhêj rûm ihtÿj cute ame hikwa ne ame hõt pyrâc. He me pahpytâr xà jõ amcro ramã ajpên hàhtêp to mõ, cwÿrjapê cu ha me pahte me amji kam me pajapac xà cujrõ, quê apu ampra. He maam pahte Jeju to amji mã me hajÿr xà jõ amcro ata japyre mã ri, ramã cute me pahpytâr xà jõ amcro ajpên hàhtêp to mõ, ne ramã hàhtêp. ¹² Ne caxwa jõ awcapàtkõ kam, jû wÿr ca apu amji mã hamã ne apu mõ. Ne apê kam, ca ha atÿj amji wÿr ampo te ato kên xà ata pupu, ne cupê amji pytà. Ita jÿkjê na, quê ha akam Jeju te amji kam hapac xà tuw pejti hamreare, ca ha nee akên catia nõ pê amji pytâr nare. Ne quê ha Jeju me awÿr cato, ne ihtÿj me akên xà catia pê me apytà. Ne mehkêanre catêjê ri hõtpê caxwa ri ame ampo kêanre ton to me ipa, quê ha apê, quê ha me ton to hîcu. Ne nee me apê cute me hajÿr catêjê atajê pyrâc nare, na ca ha me akên ton jîcu, ne catyt kam me apa rohnÿtti mã. Ne pom krãhtare ipijapu xà caxuw hàprê xà to amji tÿj, ita jÿkjê na, ca ha Jeju te amji kam hapac xà tuw pejti to me amji tÿj, ne ihkôat catyt kam me apa. Mãr ca ate to ihcupan xà pê me akên catia ata pê me to amji pytà. ¹³ Ne catyt kam me pahpahãmti to me papa to me hanea, pom quê amcro jãhcujro kam mehpahãmti to me ipa he. Ne nee ajpën kam mare mã amji to ame axy to me apa nare. Ne nee côxÿhti to ame amji to apipãn to me apa nare. Ne nee ame cahãj xyre atajê caxun nare, ne nee ame to apahãm nõ to me apa nare. Ne nee ame apijapu to me apa nare. Ne nee amji jû na ame ampo kîn nare. ¹⁴ Ne nee ca ha mam ampo kêanre atajê to me amji cajpuaw to prãm to, ame amji kam gapac to me apa nare. Ne quêt me pajõ Pahhiti pê Jeju Crixto te amji kam hapac xà tuw pejti ita to, cu ha ampo kên cunea pê me amji pytà.

Cu ha pahtÿj ihcunea na ajpën na me amji to pøj to me papa

14 Ýhÿ, he ca ha, por kyre pê cormã Jeju to amji mã mehhimpej atajê, ca ha atÿj me akwÿ kam, ahna me amji capa. Ne nee ame acaca xà na, ah-pÿanre na ame hÿn, ne ame ahna xwÿ nare, ne quêt hipêr Jeju kôt me ipicamên na, ca mehtehcajpa. ² Ampo na? He ramã me akwÿ xwÿ kam Jeju to amji mã mehhimpej nare, na quê ha ihtÿj me hõ itajê cunea ku. Ne nee me akwÿ kwÿ te me hajÿr nare, ne cormã kyre pê Jeju to amji mã mehhimpej. Na ri ihtÿj me amji mã me hõ to me hàpàn xà atajê cunea cawpa to:

— Jû wÿr wa ijõ ita krê, kôt mã ikam tẽ, nare, quê me ikra kam tẽ — hane. ³ Ne por ca atÿj me gõ cunea ku atajê, nee ca ame akwÿ te ihcaca catêjê mã kên nare, ne aracri me hõmpu. Ne por ca nee ame hõ ata kur nare atajê, ca ha nee kam ate me cumãn xà ata to me curê mã me irên nare. Ampo na? He ramã Pahpãm te me ahna amji caxâr. ⁴ Ne cupêa ri me hõ Pahhiti, ne nee me apê me hõ pahhi nare. Ne taa mã quê ha mehkwy na ihcakôc to kêanre to prãm, ne me to ihcakôc to kêanre, nare, quê ha me to ihcakôc to impejti ne. Me hõ Pahhiti quê ha cute me hàpên to hamãr na me to, quê ha me to hamã, quê ha ihtÿj mempej.

⁵ Ne me gakrã kam me akwÿ, ma ame amji mã me amcro kên na me aprã. Ne mehkwy ihtÿj me amcro kên me, impej picacwÿr na me harê. Ne ita caxuw ca ha ahpÿanre na, ate me amji kam gapac xà jahkre pejti xà atajêa kôt me apa. ⁶ Ne me gakrã kam, me akwÿ te Pahpãm to amji japackre xà caxuw, ramã amji mã me amcro capi. Ne me gakrã kwÿ kam, me akwÿ te Pahpãm to amji japackre xà caxuw, ihtÿj me hõ cunea ku, ne hÿrên me hakryti na, cumã me amji jarê. Ne me gakrã kam me akwÿ te Pahpãm to amji japackre xà caxuw, nee me hõ cunea kur nare, ne ihtÿj me ajcri. Ne me ipijacri xà ata kôt ri Pahpãm te me to impejti na me amji jarê.

Cu me pahte Pahpãm cajpuaw prãmte ame papa

⁷⁻⁸ He nee cu amji mãa, me pahnõ apu papa nare. Ne me pahte me Pahpãm cajpuaw prãmte, cu ame papa. Ne nee cu amji mãa me pahnõ pahtyc nare. Ne me pahte me Pahpãm cajpuaw prãmte, cu ame ty. Ne me pahÿar kam cupê me pajõ Pahhiti, ne hanea ne me pahtyc xà jirõ pê, cupêa ri me pajõ Pahhiti. ⁹ Ampo na? He me pajõ Pahhiti pê Crixto tyc, ne hacpÿa mã ihtÿr, mãr quê cupê mehtyc me, mehtÿr jõ Pahhiti. ¹⁰ Ita kam, jû mã ca ha ajte, ne me akjêjê kwÿ te amji kam hapac xà pê ajteare mã ita kôt, ca ame cupê cute to ihcupan catê na me cumã hacjê? Ne me ca, me ca xwÿjê? Jû mã ca ajte ame, ne me akjêjêa kwÿ to mehkryjre to prãm to ame apa? Hãpà! Ahna cute hajÿr nare! Ampo na? He cu ha jû caxuw me pahcunea Pahpãm cuna mã me pahcuhhê, quê ha taa me pahcukij xà kêanre ata to me pahcukij, ne me pahkwÿ cukij xà impejti xà ata to me pahcukij, ne ma ajpën pê me pah-

to ajcokjê. ¹¹ He pê ramã me Pahpãm hõ kàhhôc kam me pahna amji jarên to:

“He ipê itîr rohnýtti mã ata catê wa,
na ca ha jũ caxuw me acunea me akryjre na ate me imã amji jarên prãmte,
icuna mã me akôn krã na me jỹ, ne me imã: ‘Quêt apê Pahpãm to apê Pahpãm’ ” hane.

¹² Hajỹr xà ita kam, jũ mã cu ha me? Cu ha ahpÿanre na Pahpãm mã pahte amji to me pahhimpej xà atajê me, me pajàpên xà cunea na me amji jarên partu.

Cu ha nee me pahkjêjê nõ Pahpãm pê ipictor na hamãr nare

¹³ Cwÿrjapê cu ha ajpên pê me pajõ me, pahte amji kam me pajapac xà na me pahcakôc jicu. Ne jũ to ca ha quêt me? Ca ha me ate amji kam gapac xà cunea to catyt kam me apa. Ne nee ca me ate amji kam gapac xà kên ton to me apa xà ata to, me akjêjê te cormã kyre pê Jeju to amji mã mehhimpej atajê te mehkên ton na me ton, quêt mehkên mã mencjêj nare. ¹⁴ Pajõ Pahhiti Jeju kam me pahte amji hõnco xà ita kam, ramã pahte me pajõ te me pahto kên xà nare na, hahkre pej pejtju. Nãmri quêt ha jũm te amji mã hõ kânre na harên, ne hanea ne Pahpãm mã ihkânre na harên na, quêt ha ihtÿj hõ ata cumã ihkânre ne. Ne cute Pahpãm mã hõ ata kên na harên jipy ihkrêr na, quêt ha Pahpãm mã jũm te hajỹr ata kânre ne.

¹⁵ Quêt ha me akjêjê nõ te cormã kyre pê Jeju Crixto to amji mã ihhimpej ata te gõ ata kur na gõmpun, ne amã ihcawpa to:

— Ca ate gõ ita krêr na ihkaj na — hajỹr na, ca ha nee gõ ata krêr nare. Nãmri ca ha ate gũpar nare, ne mãnea mã ihkrêr na, quêt ha nee amã akjê ata kîn nare. Quêt ihhêaj to akjê ata akôt hũpa kam cukrê, ita na Pahpãm pê me akam ihkaj na. Ne hanea ne Jeju te akjê ata kritxwÿ na amji ton, ne haxà kam ihtyc na, ca to amji japackre. Ne nee gápàn xà ata cwÿrjapê apê akjê ata Pahpãm pê ipictor na hamãr nare. ¹⁶ Quêt jũm mã ate ampo ton xà itajê na akam ihkaj na, ca ha hicu, ne nee hipêr ton nare, mãr quêt nee ampo pejti ita kên na harên nare. ¹⁷ Ampo na? He Pahpãm himpej xà nee me pajõ me, me pahkôm xà to amji kam hapac to ipa nare. Ne quêt Pahpãm Carõ Pejti kôt, catyt kam me papa me, me pahcarĩcti kam, me pamã amji kinti to ri amji kam hapac to ipa. ¹⁸ Ne jũm te Jeju Crixto mã hàpên xà to hàpên to impejti to ipa to hajỹr te ri Pahpãm cajpuaw. Mã hanea ne mehkwy jũm ata jarên pejti to me ipa.

Me pamã, nee me pajõ cawpa xà hamreare

¹⁹ Cwÿrjapê cu ha ajpên kam me pahcapên pej pëa mã me papa na, cume amji to prãm. Ne hanea ne pahte me ajpên tehcajpar to me papa na, me pahte-hcajpar xà ata to, cu ha me. ²⁰ Me papê Jeju tekjê catêjê mã, nee me hõ cawpa xà nare. Na cu ha pahtÿj me pajõ cunea ku. Quêt nee me pajõ nõ me pahnõ to

kên, ne jũm to kên nare. Nãmri quêt ha jũm te hõ ata kuar kam amji mã cute mehcawpa xà ata cupa na, quêt ha Pahpãm mã jũm ata pê ampo to kên catê. Cwÿrjapê ca ha nee cumã, Jeju wÿr jũmjê incjêj ne cormã kyre pê amji mã me to ihhimpej atajê mã, me akôt me cumã me hõ cunea to hahkre nare. Quêt ihhêaj to cute ampo krêr xà ata kam ihcawpa xà ata to amji japackre, ne cumã hũpa na, quêt ha ihtÿj ihkên mã axà. ²¹ Na quêt ha me pajàpàn xà me, me pahkôm xà me, ampo kwÿ te Pahpãm pê me pahkjêjê kwÿ to kên, ne cupê me to hũjawry na, cu ha mehcunea jicu, ne nee hipêr mehcaxun nare.

²² Quêt ha amã gõ cunea kur xà caxuw impej na hahkre pej na, ca ha ate ihkur xwÿjrea na Pahpãm mã ahna amji cajrên to hane he:

— Ca ate, ite ampo itajê cunea kur xà na imã ton, cwÿrjapê wa ha itÿj cukrê, ne nee ihcawpa xà nõ na to amji japackre, ne apu hũpa nare — hane. Ne nee me akwÿ kwÿ mã ate ihkrêr xà ita na amji jarên nare. Ne aracri amji mã:

— Wa Pahpãm mã ampo pejti itajê pit ton to ipa, mãr quêt nee ihkôt ikên mã imên nare, ata pyrên ri ijakry — hane. ²³ Nãmri quêt ha jũm ata te ampo ata krêr xà ata kam, amji mã ihcawpa to:

— Pÿpÿn, mõrmõ ajkĩ ite ijõ krêr xà ita na Pahpãm mã ipej, nare, mõrmõ ajkĩ ipej nare — hajỹr jipy, cute ihkrêr na, quêt ha ramã amji kên mã amji mē. Hõ, quêt ha jũm te Pahpãm jarkwa kôt cute ihkrêr na amji jahkre pej nare kam ihkrêr na, quêt ha ahna Pahpãm pê kam ihkaj na. Hõ, cu ha amjia kôt, me pahte Pahpãm jarkwa jahkre pej nare kam, ampo ton na, quêt ha Pahpãm pê ahna me pahkam ihkaj na.

Cu ha nee pahte amji to amji cajpuw prãm to pit mã me papa nare
Pirip 2.3-5

15 Ne pom cu ramã xwÿ kam Jeju to amji mã me pahhimpej nare itajê, cu ha, pom cormã kyre pê amji mã me to ihhimpej itajê tehcajpa, mãr quêt hanea ne me pahcuxà, xwÿ kam amji mã me to ihhimpej nare. Ne cu ha nee pahte amji to amji cajpuaw prãmte ame papa nare. ² Ne quêt ita to cu ha me he. Cu ha pahtÿj me pahkjêjê impejti xà wÿr me mör na mehtehtcajpa, quêt me mō, mãr quêt Jeju to amji mã mehhimpej xà to me ajcamê. ³ Ne mēr ampo na mã cu ha me ita to? Nee mã ampo na nare. Pê me pajõ Pahhiti pê Jeju Crixto nee cute amji to amji cajpuaw prãm to, pjê kam apu ipa nare. Ne ihtÿj cute amji pupun xà ata caxuw apu mō. Pê ramã Pahpãm jõ kàhhôc to hũjarên to hane he:

“Inxũ, por cute me acrôn xà kânre to me acrôn atajê te me ato tojnõ, ne ma iwÿr me ipipkjêr, ne ame icrôn xà kânre to ame icrô” hane.

Pahpām jarkwa jō kàhhôc pê me pamã ampo to hahkre catê

⁴ He pê nee Pahpām ihcapry na mam hō kàhhôc tũm ata kam harkwa na, ihhōc na me mēn nare. Ne cute me pahcunea mã ampo jãhtôa to hahkre xà caxuw, pê harkwa kôt hō kàhhôc ata kam mehhôc. Ne Pahpām jarkwa ihtyj ampo kên mã me pajūcanār na me pahto, ne hanea ne me pajakryti na me pahto. Na cu ha pahtyj me, por jũ caxuw Pahpām cahê na ame papa xà ata na, me hikaj. Ampo na? He jũ caxuw cute me pahto catia, mã me papê hũràac xà na me pamã hahkre pej.

⁵ Wa ijōtpê Pahpām mã me acajrēn to hane he:
— Ÿhỹ me ijō Inxũ Cati pê Pahpām, he ca ihcunea caxuw me imã me ijūcanār xà pê me ijō katcrã gō, wa ityj me awcanã. Ne ma akra pê Jeju Crixto kam me akwỹ itajê te ajpēn hōnco na me to, mãr quē ihkōat cute amji kam hapac xà pyxit peaj to amji kam me hapac to me ipa. ⁶ Ne me harkwa pyxit peaj to me garēn pejti to me ipa, ne me amã: “Apê me ijō Inxũ Cati pê Pahpām, ne apê me ijō Pahhiti pê Jeju Crixto Pãm, ne ihcunea na ampeaj kam apej” — hane.

Quê ha mehcahkrit atajê, hanea ne me cupê Jeju na mehkwy mã axà

⁷ Ne me pajō Pahhiti pê Jeju Crixto te me ana amji caxār xà ita na, ca ha me akwỹ na me amji to pōj to me apa. Hō, ate me to hajyr xà ata to, ca ha me amji mã Pahpām to cati. ⁸ He pê rỹ pēa mã Pahpām ramã me cupê Juta catêjê quētjê mã cute Jeju Crixto kujahêc na amji to awjahkre, mãr quē cato ne cupê mehtehcajpar catê. Mã Jeju cator xà ata te, Pahpām te ampeaj kam to hũjahkre xà na amji par na harēn. ⁹ Ne hanea ne cator xà te, mehcahkrit atajê te Pahpām jãhcaprĩhti na harēn na me ton. Ne pê Tawi xwỹ ramã hō kàhhôc kam, ita na me to hũjarēn to hane he:

“Ÿhỹ, wa ha mehcahkrit atajê jipôc ri gapry na icrer to impejti ne,
ne wa ha ityj me cumã ato ijãmnãn to ipa” hane.

¹⁰ Ne hō kàhhôc kwỹ kam hanea ne to hũjarēn to hane he:

“Me apê mehcahkrit me, me apê Ixaher catêjê pê Pahpãm na mehkwy atajê mea mã,
Pahpãm pyrēn me gakry!” hane.

¹¹ Ne hanea ne to hũjarēn to hane he:

“Ne por me apê mehcahkrit cunea pê Ixaher catêjê nare atajê,
ca ha atyj me pajō Pahhiti to amji mã me gãmnan to me apa” hane.

¹² Ne hanea ne Pahpãm jarkwa to ihcakôc catê pê Ixaj xwỹ jō kàhhôc kam, pê to hũjarēn to hanea he:

“Quê ha jũ caxuw menquētti pê Jexê tãmxwỹ tãmxwỹ nõ cato.

Ne cupê mehcahkrit atajê jō Pahhiti.

Quê ha ihtyj cupê me hō Pahhiti na amji mã me to ihmpej to me ipa” hane.

Pê Pawrô pjê cunea kam, mehcunea mã Pahpãm jarkwa jarēn to ipa

Epet 3.1-9; 1 Petrô 1.12-13

¹³ Ne Pahpãm ri pahte me hikaj, mã me pajūcanār na me pahto, cu me hikaj. Ata kôt imã, cute me amã amji kĩnti me, me acarĩcti jōr na, to prãm, mãr ca nee amji mã ampo cupa nare. Ne hanea ne imã Pahpãm Carō Pejti carôt kôt me gũcanār, ne me hikaj xà ata te me amã ipicamēn to mōr na, me ato prãm.

¹⁴ Ÿhỹ me ikjêjê, he me apejti, ne me akrã kreti to atyj me ajpēn japackre to me apa na, imã me gahkre pej. ¹⁵ Cakrô wa amji mã ijãhkyaj kam, hirãa pê ite me amã ampo itajê na ihhōc, mãr ca me cahyt, ne me to amji japackre. Ne mēr ampo na wa ite amji mã ijãhkyaj kam me amã ihhōc? Nee mã ampo na nare. ¹⁶ He Pahpãm te ito icati, ne mehcahkrit atajê jipôc ri, cute ihcãmter Jeju Crixto mã ipê cumã ijãpēn catê na ixãm. Por pê Pahpãm mã mehcajrēn catêjê ajco cute amji to me Pahpãm cajpuaw prãmte me cumã ampo gō, ata jĩkjê na, wa ityj ite amji to Pahpãm cajpuaw prãmte, hỹrmã mehcahkrit atajê to ipipkjêr to ipa, mãr quē Pahpãm me cumã Carō Pejti gō.

¹⁷ Ne Jeju Crixto kam ite amji hōnco xà ita kôt ri, imãa Pahpãm mã ijãpēn xà cunea impej pit. ¹⁸ He xà itea ijãpēn xà impejti ita na, amji to ijãmnãn xà caxuw mã, wa apu amji jarēn to ipa? Hãpã. He Jeju Crixto te ri ite mehcahkrit te Pahpãm jarkwa kam hapac na itehcajpar, mã cute mempar. Mã cutea, ite me cumã ijũjarēn xà na iton, ne caxuw imã ite amji jahkre pejti jōr. ¹⁹ Ne cute imã Carō Pejti carôt jōr, mãr wa carôt ata kôt me cumã ampo pihho pejti to, quē me hōmpu, ne me Pahpãm to me amji japackre. Ne ita kam wa ma Krĩpinkrēn pĩn, Iririj jō pjê wyr imōr xà ata kam, wa ityj mehcunea mã Jeju Crixto pê me pahkritxwỹ na harēn xà impejti atajê cunea na harēn to mō. ²⁰ Wa ijōtpê, por nee rỹ jũ ri jũm te me cumã Jeju Crixto pê me pahpytār catê na harēn nare ata wyr, wa ikrār. Ne nee wa ramã jũ ri jũm te me cumã harēn ata wyr ikrār nare. ²¹ Ne pê ramã Pahpãm jō kàhhôc kam Ixaj xwỹ ita to hũjarēn to hane he:

“He por rỹ jũ caxuw jũm te me cumã Pahpãm kra jarēn nare atajê,

quê ha ita caxuw me kampa, ne me hōmpu.

Ne por rỹ jũ caxuw cute me Pahpãm kra jarēn par nare atajê,

quê ha me kampa, ne me hahkre pej” hane.

Pê Pawrô Jeju na mehkwȳ pupun prãmte me hÿrmã
ihkràr

Roman 1.8-15

22 He wa tee me awÿr ikràr, ne me apupun to prãm. Mã ma ijãpên xà icahpêrkàr to ipa ita kam, jÿ wÿr wa apu amji mã hamã. 23-24 Ne rÿ pëa mã, wa caku jãhtôa kam me awÿr ikràr, ne me apupun to prãm, ne hamre, ramã ita caxuw ite pjê itajê kam ijãpên xà jipêj partu. Cwÿrjapê wa ha ma Cra jô pjê wÿr imôr xà ita kam, wa ha me anaa mō, ne me apupun to ramã ite amji kam ijapac. Ne wa ha me awÿr icator xà kam, quê ha ampeaj kam me pamã amji kÿn. Wa ame acahê na imôr xà ata kam, ca ha ampo to me itehcajpa, ite to Cra jô pjê wÿr imôr xà cahhur krã curan xà ata caxuw. 25 Ne wa ha xa me awÿr imôr xà ita kam, mam Krÿpinkrên kam Jeju na mehkwȳ atajê tehcajpar prãmte, me hÿrmã icato. 26 Ampo na? He Maxeton jô pjê me, Crec jô pjê kam Jeju na mehkwȳ pê mehcahkrit atajê te, Krÿpinkrên kam me cupê hamreare atajê tehcajpar prãmte, amjia kôt me imã ihpore to cuprôn, mâr wa curi to icato, ne Jeju na mehkwȳ pê Juta catêjê pê hamreare atajê mã to ajcrã. 27 Me cutea ri me ita to me hajÿr to me amji kam hapac. Na ri ihhêj rÿm ramã mehcahkrit itajê te, me cupê Juta catêjê to new, na quê ha ihtÿj me amgō. Ampo na? He pê mam me cupê Juta catêjê itajê, mehcahkrit atajê wÿr, ihtÿj me Pahpãm jarkwa kujahêc to me ipa. Mã me harkwa kôt Pahpãm wÿr me ipipkjêr, ne mempej mã me hâr, ata jahpan xà na ri, hacpÿa ne cute me cumã ampo itajê kujahêc. 28 Ne ite curi to icator, ne me cumã me hÿhkra kam me hō pore ata cunea to icahkÿm jirō pê mã, wa ha Cra jô pjê wÿr imôr xà ata jô pry kôt me awÿr mō. 29 Ne me awÿr icator xà ata kam, quê ha Jeju Crixto cukwa kam ampeaj kam me pamã ampo pej cunea hàhtō, na ramã imã hahkre pej.

30 Me ikjêjê, cu me pajō Pahhiti pê Jeju Crixto to amji mã me pahhimpej, ne Carō Pejti ata kôt ri me pamã ajpên kÿn ata kôt, wa me ana ahwÿ, mâr ca icuxã xwÿ kam Pahpãm mã me icajrên nare. 31 Ne cumã me icajrên to hane he:

— Me ijō Inxÿ Cati, ca ha Juta jô pjê kam amji mã me ato ihhimpej nare atajê pê Pawrô pytã. Ne hanea ne cute me akwÿ mã ihpore jōr xà ata kam, quê nee ihpore ata to me amji na ampo kên cãmjÿ, ne amehcaca nare, ne quêt ihtÿj me hakrya kam, ihpore ata na me amji capa — hane.

32 Hō, ca ha Pahpãm mã me icajrên to hane, ne quê ha Pahpãm mã ito hajÿr to prãm na, wa ha icator xà ata kam, quê ha me pamã amji kÿn jakryti ne. Ne pahte me ajpên pupun xà ata kam, quê ha Pahpãm ajpên pyrên me pajakryti na me pahto. 33 Ne imã Pahpãm pê me pamã me pahcarÿcti jōr catê ata te me acahê na ipa rohnÿtti mã na, me ato prãm. Hamre.

Pê Pawrô me cumã amji jarên kujate

Me Hàpên Xà 18.1-3

16 Ýhÿ, ita caxuw, wa ha me amã hàpà, ne me amã me pahkjê cahãj pê Pepkwÿj kujate, ne me amã ihkôt harê. He cupê Ampohy jô krÿ kam Jeju na mehkwȳ tehcajpar catêjê nō. 2 Na ca ha ahna me amji caxàr to hanea, pom quê ate Jeju na me amji caxàr he. Hōhō, Jeju na mehkwȳ to pahte amji kam me pajapac to hajÿr xà pit. Ramã cute me hàhtôa tehcajpar, ne hanea ne itehcajpar, na ca ha atÿj ampo to mehtehcajpa.

3 Ne hanea ne Prixirakwÿj me Aquira pê mam ajco icahê na Jeju Crixto mã me apê atajê mã ite me amji jarên kujahêc. 4 Ne pê Jeju jãpên xà kam, cute me itehcajpar xà ata kam, cute amji to mehtyc xà jãhtôa jakren. Cwÿrjapê wa me cumã me hÿrên ijakryti na amji jarê, ne nee wa ite ahte ijakryti na me cumã amji jarên nare. Ne hanea ne me cupê Jeju na mehkwȳ pê mehcahkrit atajê te me cumã hakryti na amji jarên.

5 Ne wa hanea ne Jeju Crixto na mehkwȳ te me hÿrkwa kam me cuprôn catêjê mã, ite amji jarên kujahêc. Ne wa hanea ne ite imã ikwÿ nō kÿnti pê Epet te Axij jô pjê kam, cupê mam Jeju to amji mã ihhimpej catê ata mã, ite amji jarên kujahêc.

6 Ne hanea ne Marij te ramã me amã hàpên crire nare ata mã, ite amji jarên kujahêc.

7 Ne hanea ne Anrôn me Juna pê me ipyrãac, ne me cupê Juta catêjê pê mam icahê na me hacjên xà kam mehcuhhê atajê mã, ite me amji jarên kujahêc. Ne me cupê Jeju jarkwa na memprar catêjê na, ramã ite me hōmpun pejtu, ne pê mam ramã icumam Jeju to amji mã mehhimpej to me ipa.

8 Ne hanea ne, por me pajō Pahhiti pê Jeju kam, cupê ijō ikwÿ nō pê Amprij ata mã, ite amji jarên kujahêc.

9 Ne hanea ne Rupan pê me icahê na Jeju Crixto mã hàpên catê ata me, me imã ikwÿ nō kÿnti pê Xaqui mã, ite amji jarên kujahêc.

10 Ne wa hanea ne Aperti te mehcuinea kam mare mã Jeju Crixto to amji mã ihhimpej, ne cumã hàpên catia ata me, Arixō me, mehkjêjê mã, ite amji jarên kujahêc.

11 Ne wa hanea ne Herotãw pê ipyrãac, ne cupê Juta catêjê nō me, Narqui me, mehkjêjê pê Jeju na mehkwȳ atajê mã, ite amji jarên kujahêc.

12 Ne wa hanea ne Tripenkwȳj me, Triponkwÿj pê me pajō Pahhiti mã hàpên catêjê atajê me, Penxikwȳj pê imã me ijō ikwÿ nō cahãj kÿnti te Pahpãm mã hàpên catia ata mã, ite amji jarên kujahêc.

13 Ne hanea ne wa Rupo pê me pajō Pahhiti mã hàpên catê catia ata me, inxi te ihhêj rÿm ito ihkraa, ne ito impejti ata mã, ite amji jarên kujahêc.

14 Ne hanea ne, wa Axin me, Precon me, Mecurij me, Patropa me, Herma me, me pahkjêjê cunea apu ihkôt me ipa atajê mã, ite amji jarên kujahêc.

¹⁵ Ne hanea ne wa Piror me, Jurijkwÿj me, Nerew me, ihtōj me, Orimpa me, Jeju na mehkwy cunea cahê na ame ipa atajê mã, ite amji jarên kujahêc.

¹⁶ Ne me amã ajpên kĭan kam me ajpên mã me hàpà. Ne ita ri me cupê Jeju Crixto na mehkwy cunea te me amã amji jarên kujahêc.

Quê ha cute me pahto ipicapôn prãm atajê to amji na me pajuphêa ne

1 Jowãw 3.10; 4.1-6; Epet 5.6-7

¹⁷ Me ikjêjê wa ha cormã me gapackre to incrire ne, ihkãhhôc ita jicu xà kam. Ýhÿ, ca ha ma amji na, cute me Jeju to, ate amji mã me ahimpej têtê me acah-pêrkâr, ne ite me amã ampo to hahkre atajê têtê me girên ne me ato ipicapôn prãm catêjê to, amji na me guphêa ne. Ne ampÿa mã ame cupê me apa. ¹⁸ Ampo na? He cute me hajÿr catêjê, me pajō Pahhiti pê Crixto pê ampÿa mã ame ipa, ne nee me cumã hàpên nare, ne amji cajpuaw cute ampo na mehprãmti xà ton to me ipa. Ne me harkwa cakôc xà hêj xi xà picre to, cute me amji jahkre kêatre catêjê mã mehhêj to me ipa.

¹⁹ Ne me ca nare, ca quêt atÿj me gũcanãar kam Jeju to amji mã me ahimpej to me apa. Cwÿrjapê ri me apÿrên me ijakry pit. Ne imã me ate, me ampo pejti ton na ate amji jahkre pejti na, imã me ato prãm, ne me apê ampo kên ton jahkre kêatre na imã me ato prãm.

Pahpãm kôt me papa xà ita kôt, cu ha Xatanaj tohjê

²⁰ Ne Pahpãm pê me pamã me pahcarĭcti jōr catê xakat, ne quê ha me amã me acarĭcti gō, mãr ca nee ame pahcurê xwÿn pê Xatanaj ata cupa nare. Ampo na? He quê ha me pahcurê xwÿn ata curan pej to hàhtũm nare to hanea, pom ca me apar kãhtÿjti to me cagã krã gã he. Ne imã me pajō Pahhiti pê Jeju Crixto te ihcunea na me ato impej na to prãm.

Pê Pawrô cahê na mehkwy krĭ atajê me cumã amji jarên kujate

²¹ Ne Timot pê icahê na hàpên catê ita te hanea ne me amã amji jarên kujahêc. Ne hanea ne Ruxô me,

Jaxãw me, Xôpat pê me ipÿràac, ne hanea ne cupê Jeju na mehkwy kam Juta catêjê kwÿa kwÿ atajê te me amã amji jarên kujahêc.

²² Ne ipê Tertur pê Pawrô kôt ihkãhhôc ton catê te hanea ne me amã amji jarên kujahêc, Jeju jarkwa na.

²³ Ne wa Cajo jũrkwa kam ikrĭ, mã hũrkwa kam Jeju na mehkwy me cuprô atajê te hajÿar, ne me amã amji jarên kujahêc. Ne Eraxô pê krĭ jō pahhi mã ihpore jamãr catê me, Jeju kam me pahkjê pê Cwattro te me amã amji jarên kujahêc.

²⁴ Ne imã me pajō Pahhiti pê Jeju Crixto te ihcunea na me ato impejti na me ato prãm. Ýhÿ, he ampeaj kam.

Cu ha hōtpê Pahpãm to me pajãmnãn to me papa

Epet 3.20-21; Juta 24-25

²⁵⁻²⁶ Imã me acunea mã, Pahpãm jãhcaprĭ mã me pahtehcajpar na, me ate me hahkre pej na, me ato prãm. Ampo na? Nee mã ampo na nare. He pê rÿ pëa mã Pahpãm Jeju Crixto pê me pahkritxwÿ na, to amji kampa. Mã rÿ jũ caxuw jũm te, Pahpãm te Jeju Crixto to me pahkritxwÿ na hahkre pej nare, ne me cupê ip-imxur tu. Ne pê ramã rÿ pëa mã Pahpãm jarkwa na, cute mehhôc catêjê ita na mehhôc, ne cute me ahna ihhôc xà ata, pê nee hirã pê hũjarên nare, ne harên xà incwÿrpê harê. Ne ita caxuw Pahpãm tĭr rohnÿtti mã ata te nee to ipimxur nare, ne hirãa pê to ipipê xà caxuw, ahna harkwa hyr, mãr quê pjê kam, mehcunea me hahkre pej, ne amji mã me to ihhimpej, ne ihkôat me ipa. Ne Jeju pê me pahkritxwÿ ita to, pê wa Pahpãm jarkwa kôt, me amã icakôc. Ne Jeju to ate amji mã me ahimpej xà ita kam, quê ha Pahpãm ihtÿj me atehcajpa, mãr ca jũ caxuw me hicu nare.

²⁷ Ne Jeju Crixto cukwa kam, quê ha pjê kam mehcunea me Pahpãm pyxit peaj, ne ihkrã krea to ihkrã kre na me hahkre pej, na cu ha me cumã:

— Quêt apÿxit peaj ne ampeaj kam akrã kre rohnÿtti mã. Ýhÿ, he ampeaj kam — hane. Hamre, ijō kãhhôc ita pit.

1 CORINTI

Ŷhỹ, pê Pawrô pê Jeju jarkwa na memprar catêjê nõ, ne hanea ne cupê cupêhkà te ikre cahyr catê, ne hàpên xà ata to pê ajco amji to ajpa. Ne pê Jeju na mehkwy jakrã Corinti jõ krĩ kam mehkri atajê wyr, pom cu me hõ kàh-hôc pijakrut cahyt ita kujate. Na pê mam hõ kàhhôc ita japyr pê (1 Corinti).

Ne mam hõ kàhhôc ita kam cute ampo cunea to me hapackre, mãr quê nee mehkwy jirôa pê me cati to me amji kam hapac to me ipa nare. Mãr quê nee amji na, cute me amji kam hapac xà kên tũmti nõ te mehkwy cunea pãc, ne amehtũm na hamãr nare. Ne hanea ne, pahte me cuprôn xà kam, me pamã pahte Pahpãm na amji to me pahhimpej xà to hahkre. Ne hanea ne Pahpãm te me pahcunea mã Carõ Pejti jõr na me pamã harẽ. He nee ite Corinti wyr Pawrô te hõ kàhhôc pijakrut kujahêc atajê cunea to ipintuw nare, ne ihkwý jatujre atajê ri ite to ipintuw.

Pê Pawrô me cumã amji jarẽ

1 Corinti 1.1-13
Me Hàpên Xà 18.1-17

1 ¹⁻² Hàpà me ikwý pê Pahpãm na mehkwy, ca Corinti jõ krĩ kam me akrĩ atajê. Ipê Pawrô. Pê Jeju Crixto pê Pahpãm kra amji mã harkwa na cumã iprar catê na ixãm. Na wa ite me amã ihhôc, ne ihku-jahêc. Ne Jeju kam me pahkê pê Xoten ita icahê na ihkrĩ. Ne Jeju Crixto cukwa kam ri me apê Pahpãm na mehkwy, na ca ajtea mã me, ne ampeaj kam me apej. Pê Pahpãm ihkra kam ate me ajpên hõnco xà ata kôt, pê me ato amji kwý xà na, me ana ahwý. Ne ihkàhhôc ita hanea ne, pjê cunea kam me cumã Jeju Crixto pê me pajõ Pahhiti kam me hapac to me ipa atajê cunea mã wa ite ihhôc. Ne Jeju pê me pajõ Pahhiti, ne hanea ne cupê me hõ Pahhiti, na wa ite ahna me amã ihhôc.

³ Ne wa ijõtpê Pahpãm pê me pajõ Inxũ Cati me, me pajõ Pahhiti pê Jeju Crixto mã, me acajrên to hane he:
— Ŷhỹ, ca ha Corinti jõ krĩ kam me akwý mehkri atajê caprĩ, ne me caxwýn caxwãm pê me cumã me acarĩcti gõ, mãr quê nee ame amji mã ampo cupa nare — hane.

Cu ha Jeju cukwa kam, ampo pej cunea cwa

1 Texarôn 5.23-24

⁴ Pahpãm te Jeju Crixto cukwa kam hàhcajrëan kam me ato impej xà ata pyrên, wa ijõtpê hũrên ijakryti na cumã amji jarên to ipa. ⁵ Ne Jeju Crixto kam ate me ajpên hõnco xà ita kam ri, me akrã kre te amji jahkre pejti me, Pahpãm jarkwa kôt me gũjarên xà impejti to, ihcunea na me gakrãj. ⁶ Ne ate me Jeju te amji kam hapac xà intuw pejti jarên xà ita na me amji caxàr, ne ihkôat atýj me apa. ⁷ Cwýrjapê, ca ate me pajõ Pahhiti pê Jeju Crixto te amji jaxàr xà na me hikaj xà ita kam, Pahpãm Carõ Pejti te ihtýj me amã ampo pejti jõr xà atajê, ne nee me apê hamre nare. ⁸ Ne Jeju to ate amji mã me ahimpej xà ata kam ame apec cupate ri, ihtýj me atehcajpar to ipa, mãr ca nee ahna ame apec nare.

Mãr quê me pajõ Pahhiti pê Jeju Crixto te amji jaxàr xà ata kam, nee ampo na amji mã me acuhtom nare.

⁹ Ŷhỹ, cu pahtýj Pahpãm to amji mã me pahhimpej xà ata na, amji mã me to hane. Ne cute hanea ne ihkra pê Jeju Crixto kam pahte me ajpên hõnco tu xà caxuw, cute me pahna hàhwýr, ne nee cute harkwa ata to ipintuw, ne to hapac kêt nare.

Pê Corinti jõ krĩ kam Jeju na mehkwy picapôn pa

Roman 15.5-6; Epet 4.1-6; Pirip 2.1-4

¹⁰⁻¹¹ Ŷhỹ Jeju kam me ikjêjê, he Crowkwýj na mehkwy nõ te ri imã me akwý kwýa cwýrjapê ate me garkwa to me ajpên mãn na me garên, wa ite me garên par. Na wa ha me pajõ Pahhiti pê Jeju Crixto japyr na me ana ahwý, ca nee hipêr ame ajpên mãn to me apa nare, ne nee hipêr ajpên to me apicapôn nare. Ne quêt catyt kam cama me ajpên par peaj ne, ne ajpên kam me ahõnco, ne ate amji kam me gapac xà pyxit peaj kôt me apa. ¹² Ampo na? He ca ihhêj ne me gakrã cunea kam me amji jarên to me hane he:

— Me ipê Pawrô kôt me ipa catêjê — hane. Ne me gakrã kwý me amji jarên to:

— Me ipê Apôr kôt me ipa catêjê — hane. Ne me gakrã kwý me amji jarên to:

— Me ipê Petrô kôt me ipa catêjê — hane. Ne me gakrã kwý me amji jarên to:

— Me ipê Crixto kôt me ipa catêjê — hane.

¹³ Pýhàpà! Xà ajkĩ Crixto picapôn? Hãpà! He xà ajkĩ pa wa me acwýrjapê pĩ kam ityc? Hãpà! Xà ajkĩ Jeju japyr kaj na jũm te ijapyr na cô kam me anõ cumrãr? Hãpà! He xà me gõ pahhi cwýrjapê ate amji to me apicapôn ita jũ na, nee me apahàm nare? Ampeaj kam ate amji to me apicapôn ita na, me gũ na ipahàm. Na wa ha me awý, ca hacpýa mã me cuprô, ne me ajpên hõnco tu na me apa.

Cu ha catyt kam Jeju to me amji japackre

1 Corinti 11.17-34

Ruc 22.19-20

¹⁷ Ne ihnõ, ca cormã ihkaj na ame to, na wa nee ate me to impejti na me garën nare. He ca Jeju to ate amji kam me gapac prãmtë, ate amji to me cuprõn xà ata kam, ajte nee catyt kam ihkõt me apa nare, ne cama me ajpën to kën to me apa. ¹⁸ Ne mam ramã jüm te imã me garën to:

— Corinti jõ krí kam Jeju na mehkwy atajë ihtyj Jeju to amji kam me hapac prãmtë me cuprõ, ne cama amji to me ajcokjê, ne ajpën cuna mã mehcuhhë — hane. Wa ite jüm jüjarën xà ita kam ijapac ne amji mã:

— Ampeaj kam mõrmõ cute me hajyr — hajyr. ¹⁹ Ne ampo na mõrmõ ca ame amji to ajcokjê? Mõrmõ me gakra kwý pê catyt kam me ipa catêjê na, cute amji to me ipipë xà caxuw, hãn ne me amji to caprã. ²⁰ Ca hãn me pajõ Pahhiti to ate me amji japackre xà caxuw me cuprõ, ne me gápàn xà ata kam, nee Jeju to ame amji japackre nare, ne amji too pit mã ame amji japackre.

²¹ Ampo na? He ca nee me akwy jikaj nare. Ne me atüm prãm catêjê me akwy jirõa pê me apà, ne me akwy prãm na ame apa. Ne me akwy me ikõa to me ikõ, ne me ajpã, ne me akwy mã kôr cakrõ, nee mehkõm nare. ²² Pýhàpà! Pom me acunea mã me gürkwa ita? Quê me amã prãm, ca kaam me apà, ne ame ikõ. Mër ampo na mã ca ame Pahpãm na mehkwy caca, ne me cupë hamreare atajë mã amehpahàm to? He ate me hajyr xà ita kam, jü wýr wa ha me apejti to me amã icakõc. Na wa ha quët catyt kam me amã me pajõ Pahhiti to amji japackre xà jõ kur to hahkre.

Jeju to pahte me amji japackre xà

²³⁻²⁴ Pê me pajõ Pahhiti, ite me amã ita to hahkre xà to imã hahkre, pê wa ramã me amã to hahkre to hane he. Pê me Jeju kën mã me mën xà ata jõ caxware kam, pê pãw py, ne hürën hakryti na, Hüm mã amji jarën jirõ pê, ihkryj ne ihkõt me ipa catêjê cunea mã hõr pa. Ne me cumã:

— Pãw ita pê me gahpan xà na cute me ijí to kën ata pyrãac, na ca ha ita caxuw ate mehkur xà ata kam, atyj me ito amji japackre — hane. ²⁵ Ne pê me hãpàn jirõ pê, hanea ne ihkõm xà ata py, ne to hanea ne me cumã:

— Ampo cacõ ita ri, Pahpãm me, me pahte me ajpën par xà intuwti na harë. Na ri ampo cacõ ita pê icaprõa te me acwýrjapë ipijaxwýr pyrãc, na ca ha ita caxuw ate me ampo cacõ to me akõm xà ata kam, ca ha atyj me ito amji japackre — hane. ²⁶ Mër hõhõ, ate Jeju to me amji japackre prãmtë, ca ha me pãw ita ku, ne me ampo cacõ ita to ikõ. Ne me hãpàn xà me, mehkõm xà ata quê ha mehcunea mã, me pancwýrjapë me pajõ Pahhiti pê Jeju tyc na harën ita na, quê ha ahnaa hacpý ne amji jaxà.

²⁷ Cwýrjapë quê ha jümjê te, me pajõ Pahhiti to me amji japackre xà jõ to cute me cuprõn ata kur na, meh-pahàm nare kam, mehkur ne amehkõm na, quê ha me

pajõ Pahhiti te mencwýrjapë ihtyc xà catia to, ihtyc ata to mencri, ne me to hõkrenõ, ne amehtüm. ²⁸⁻²⁹ Ýhý, quê ha jümjê te me hãpàn xà ata kam, nee mencwýrjapë Jeju tyc xà ata to me amji kam hapac nare kam, cama ame hãpàn, ne amehkõm na, quê ha me taa me amji curë mã me amji mē, ne quê ha Pahpãm ihkën mã me cumë. Cupate, ca ha xa ate amji kam gapac xà to, ate amji pyrãc xà ata to amji kampa, ne ahna amji kõpí, jirõ pê, ca ha cormã pãw ata krë, ne cormã ihkõt ampo cacõ ata to ame ikõ.

³⁰ Ca nee ihhëj ne ame ita ton nare cwýrjapë ri me akwy jãhtõa ne me kàj xà, ne me akwy jãhtõa ne meh-peacre, ne me akwy kwý tyc. ³¹ Nãmri cu ha pahte amji kam me pajapac xà na ampeaj kam me amji kõpír na, quê ha nee me Pahpãm me pahcurë mã me pamën nare. ³² Ne Pahpãm pê Pahhiti te me pahcurë mã me pamën xà ata to me pajapackre, ne to me pahcuhtac, mår cu nee mehkãr kën te mehkën mã mencjêj xà ata mã, mehkõt me paxàr nare.

³³ Na ca ha me ikjêjê, ate me pajõ Pahhiti to me amji japackre xà caxuw me cuprõn na, ca ha xaa me ajpën jikaj, ne me cuprõ, ne cormã me apà. ³⁴ Ne quê ampeaj kam me anõ mã prãm, ca ha gürkwa ri apà, mår ca nee ate me cuprõn xà ata kam, ate me to amji kam gapac xà kaj na, gápàn nare. Ca ha ate me to hajyr na, quê ha ihtyj Pahpãm me acurë mã me amë. Hamre, wa ite me amã ita pit jarën, ne ihkwý, wa ha xa curi ica-to, ne cormã me amã harë, ca ha me hahkre pej.

Pê Pawrõ Pahpãm Carõ Pejti to me cumã hahkre

1 Corinti 12.1-31

Roman 12.6-8; 1 Petrõ 4.10-11; 1 Jowãw 4.1-2

12 Ýhý Jeju kam me ikjêjê, imã me apë Pahpãm Carõ Pejti te me amã ampo jõr xà ata jahkre kêatre na me ato prãm nare. Na wa ha ita caxuw me amã to hahkre, ne ihcunea na ihkõt me amã harë. ² Xà cormã mam me apë Pahpãm jahkre kêatre ata to mã, ca ame amji japackre? Por pê pahpãm cahàc krekà tír nare, kam ampo hamreare ata to me amji mã ahëj, pê ihtyj ajco me ato ihhimpej to ipa, na pê ca ajco atyj ihkõt me apa, ata to amji japackre.

³ Ne ita kam nee cute hajyr nare. Quët Pahpãm Carõ Pejti tír ata, ihtyj me ato ihhimpej to ipa, ne taa mã ri me pamã Jeju pê me pajõ Pahhiti na harë. Cwýrjapë quê ha jüm te harën to:

— Jeju ita kêanre — hajyr na, quê ha ramã Xatanaj carõ kën ata, ihcakõc xà ata na to ihhimpej, quê ha to ihcakõc. Ne nee quê Pahpãm Carõ Pejti jüm ata jüm to ihhimpej to hajyr nare. Ne quê ha jüm te Jeju jarën to:

— Jeju pê Pahhiti — hajyr na, quê ha ramã Pahpãm Carõ Pejti ata to ihhimpej, quê ha harkwa kõt harën to hane. He nee quê ampo carõ kën ata hýjarën xà te hajyr na jüm to ihhimpej nare.

Pahpãm Carõ Pejti ajteare mã me pamã cute amji jahkre pej xà gõ

⁴ He Pahpãm Carõ pyxit peaj cakrõ, ihtyj me pamã ahpýanre na ajteare mã, me pahte amji kam me pa-

japac xà te amji jahkre pej xà atajê jôr to ipa. ⁵ Me pajô Pahhiti pyxit peaj cokrô, cu ahpÿanre na ajteare mã, cumã me pajapên xà pihho jàhtôa to me apê. ⁶ Ne Pahpãm pyxit peaj cokrô, mã ahpÿanre na cute me pamã ajteare mã, me pahte amji kam me pajapac xà te amji jahkre pej jôr par, mãr cu ahpÿanre na, ajteare mã cumã to me apê.

⁷ Ne Pahpãm te me pahcunea to impej prãmte ahpÿanre na, ajteare mã, hirãa pê me pahcunea mã Carô Pejti te amji jahkre pej xà atajê jôr par. ⁸ Pahpãm Carô Pejti hãn ne mehkwÿ mã ahpÿanre na, me hàpên xà pihho jôr to ipa. Ne taa, mehkwÿ kwÿ mã, ihcakôc xà te amji jahkre pej krã kreti jôr to ipa. Ne taa, mehkwÿ kwÿ mã, ihcakôc xà to cute me hapackre xà jôr to ipa.

⁹ Ne taa, mehkwÿ kwÿ mã, cute amji mã me Jeju to ihhimpej xà tÿjti jôr to ipa. Ne taa, mehkwÿ kwÿ mã cute me hà catêjê caprãr xà caxuw me cumã carôt jôr to ipa.

¹⁰ Ne taa, mehkwÿ kwÿ mã, cute amjia kôt me hàpên xà pihhoti ton xà nare atajê ton xà caxuw me cumã carôt jôr to ipa. Ne taa, mehkwÿ kwÿ mã, cute me Pahpãm jarkwa to mehcakôc xà caxuw me cumã amji jahkre pej jôr to ipa. Ne taa, mehkwÿ kwÿ mã, cute me Pahpãm Carô te amji kam hapac xà pejti me, ajteare mã jùm te amji kam hapac xà kêanre jahkre pej xà jôr to ipa. Ne taa, mehkwÿ kwÿ mã, ajteare mã cute mehcakôc xà pihho to mehcakôc xà jôr to ipa. Ne taa, mehkwÿ kwÿ mã, cute mehcakôc xà pihho to mehcakôc xà ata kôt harên to capô xà jôr to ipa.

¹¹ Ne por Pahpãm Carô pyxit peaj ata ri, ampo itajê cunea to. Ne taa, ahpÿanre na cute me cumã amji kam hapac xà jôr to prãmte atajê jôr to ipa.

Jeju na mehkwÿ pê hÿ kam cukrã xà pyrãac

Roman 12.3-8; Epet 1.22-23; 4.11-16

¹² Me pajÿ pyxit peaj, ne ampeaj kam, kam me pahcukrã xà jàhtô, ne me pahcukrã xà ita te amji to cuprôn, ne amji to me pajÿ pyxit peaj. Ita jÿkjê na mã, me pajàhtôa cokrô me papê Jeju na mehkwÿ pê hÿ kam cukrã xà atajê pyrãac. ¹³ Pê mam me pahkwÿ kwÿ pê Juta catêjê, ne me pahkwÿ kwÿ pê krìxàre cahkrit, ne me pahkwÿ kwÿ pê amjia kôt amji mã me hàpên catêjê, ne me pahkwÿ kwÿ pê cama jùm mã me hàpên catêjê. Ne ahpÿanre na ajpên caxuw ajco me papa cokrô, pê Pahpãm Carô pyxit peaj, ne me pahto cuprô, ne me pahto Jeju na mehkwÿ. Ne me papê Jeju jÿ pyxit peaj ata pyrãac. Ne hanea ne pê Pahpãm Carô Pejti me pahcunea mã amji gô.

Me pahcukrã xà itajê ajpên pê ajteare mã cokrô, me pamã ihcunea na prãm

¹⁴ Ne me pajÿ pyxit peaj kam, ahpÿanre na me pahcukrã xà, hàpên xà caxuw, me pahkam ihcuhhê. Ne nee mã me pahkam me pahcukrã xà nõ pyxit nare. ¹⁵ Quê ihhêaj to me pajÿ par amji jarên to:

— Nee ipê gÿhkra nare, na ri nee ipê gÿ kam acukrã xà nare — hajÿr cokrô, quê ha cormã cupê me pajÿ

kam me pahcukrã xà ata na. ¹⁶ Ne quê ihhêaj to me pajapac amji jarên to:

— Ipê gapac ne nee ipê ato nare, na ri nee ipê gÿ kam acukrã xà nare — hajÿr cokrô, quê ha ihtÿj cupê pajÿ kam pahcukrã xà ata na. ¹⁷ Ne quê me pajÿ cunea pê me panto pit, jÿ mã cu ha me, ne ame awpa? Nare quê me pajÿ cunea pê me pajapac pit, jÿ mã cu ha me, ne me ampo pã? ¹⁸ Mër hõhõ, pê Pahpãm me pajÿ kam ahpÿanre na, cute me pajÿ kam me pahcukrã xà pyxwÿr prãmte ata na pê kam hÿxwÿ. ¹⁹ Quê ha me pahkam pahcukrã xà nõ pyxit na mã, quê ha nee cupê me pajÿ nare. ²⁰ Ne nee cute hajÿr nare, ne me pajÿ pyxit peaj kam, ampeaj kam me pahcukrã xà jàhtô.

²¹ Cwÿrjapê quê nee me panto me pajÿhkra mã harkwa to:

— Imãa icaxuw akôt hamreare, nare, nee imã ana ihprãm nare — hajÿr nare. Nare, quê nee me pahkrã me pahpar mã harkwa to:

— Nee imã ana ihprãm nare — hajÿr nare. ²² Ne me pahcukrã xà kwÿ peacre cokrô, mã ihtÿj cumã ihkwÿ na ihprãm. ²³ Ne nee me pahcukrã xà kwÿ kwÿ impejti nare cokrô, cu ha pahtÿj me hamãr to impeaj ne. Ne me pahcukrã xà kwÿ kwÿ to, nee jÿmjê mã me papipê xà nare, ne to papipê na me pahpahàm, na cu ha ihpro ne ame to papa. ²⁴⁻²⁵ Ne me pahcukrã xà impejti kam me pahpahàm nare atajê ri, nee ihpro xà nare, cu ha pahtÿj pö pê ame to papa. Ne Pahpãm mã me pahcukrã xà atajê pyxit peaj, na quê nee apu ajpên japu nare, ne quêt cumã ihcunea te ajpên jamãr na to prãm. Cwÿrjapê ri cute me pajÿ kam me pahcukrã xà itajê cunea pyxwÿr, ne to cuprôn. Ne ihkwÿ impej nare atajê ri, Pahpãm te ihkwÿ jirôa pê to impej. ²⁶ Ne quê ha me pahcukrã xà nõ pyxit ne hà, quê ha ihcahur cunea ihkàj xà ata cajpê, ne hÿ na ihpeacre ne. Ne quê ha ihnõ pyxit ne impej mã ihpÿm, quê ha ihkôt ihcahur cunea impej mã ihpÿm, ne hÿ na hakry.

Pê Pahpãm, cute mehkwÿ to impej xà caxuw mehkwÿ pyxwÿ

²⁷ Jÿkjê na mã me papê Jeju Crixto na mehkwÿ atajê cunea pê hÿ pyrãac, ne ahpÿanre na me papê cukrã xà. ²⁸ Pê Pahpãm ahpÿanre na cute mehkwÿ jamãr ne to impej xà caxuw, mehkwÿ to ôjtô ne me hÿxwÿ.

Ne mam cati mã itajê pê ihkra pê Jeju jarkwa na memprar catêjê.

Ne ihcote na itajê pê, Pahpãm jarkwa to cute me cumã mehcakôc catêjê.

Ne ihkôt itajê pê, Jeju te amji kam hapac xà to me cumã hahkre catêjê.

Ne ihkôt itajê pê, Pahpãm carôt kôt cute amjia kôt me hàpên xà pihhoti ton xà nare atajê ton catêjê.

Ne ihkôt itajê pê, Pahpãm carôt kôt cute me hà caprãr catêjê.

Ne ihkôt itajê pê, mehkwÿ tehcajpar catêjê.

Ne mehkôt itajê pê, mehkwÿ to mehhimpej catêjê.

Ne hanea ne mehkwÿ pê mehcakôc xà pihho to mehcakôc catêjê.

²⁹ Xà ajkí mehcunea pê Jeju jarkwa na memprar catêjê? Hãpà! Nare mormõ, mehcunea pê Pahpãm jarkwa to me hapackre catêjê? Hãpà. Nare, mormõ, mehcunea pê Jeju te amji kam hapac xà to me cumã hahkre catêjê? Hãpà. Xà mehcunea Pahpãm carôt kôt amji kôt me hãpên xà pihhoti ton xà nare atajê ton to me ipa? Hãpà. ³⁰ Nare, mehcunea Pahpãm carôt kôt me hà caprâr to me ipa? Nare, xà mehcunea Pahpãm carôt kôt me harkwa pihho to mehcakôc to me ipa? Nare, xà mehcunea mehcakôc xà pihhoti atajê kôt harên to me capô to me ipa? Hãpà. He ahpyanre na cute me hãpên xà ton xà pit. ³¹ Ne ihtýj me amã, Pahpãm te mam cati mã me amã me gãpên xà impejti jôr atajê juwahi to prãm. Ne hãpên xà ata pê Pahpãm jarkwa pejti to cute me hapackre xà. Ne ampo itajê cunea jirôa pê cute amji kam hapac xà impej ata, wa ha cormã me amã harên to hane he.

Me pamã ajpên kinti xà ata ri ampo cunea jirô pê cati ne impej

1 Corinti 13.1-13

Jowãw 13.31-35; Carati 5.13-15; Coroxo 3.12-14

13 Imã pjê me cõjkwa kam mehkri atajê jarkwa cunea to icakôc jahkre pej cakrô, imã mehcunea kîn nare ita kam, quê ha ite me harkwa to icakôc xà ata pê ihhêj rûm wakýti kràkràc jõkre, ne ihkôt hamreare ne.

² Wa Pahpãm jarkwa to me hapackre to ipa, ne hanea ne imã ampo cunea jahkre pej, ne hanea ne imã ampo pimxur, ne hahkre kêatre atajê cunea jahkre pej, ne hanea ne ite Pahpãm to amji mã ihmpej xà ata kôt itýj jũ kam kënti nõ catia to antuw jahkre pej cakrô, imã mehcunea kîn nare ita kam ri, nee Pahpãm mã ipê jũm nare, ne cupê ampo cunea na ijamreare.

³ Wa ite ijãhcukrêj cunea to ipicràn par, ne hanea ne cama ite, Jeju to amji mã ihmpej cwýrjapê, cute me ijĩ tíar to caxàr na me hamã, mã cute me to caxàr cakrô, imã mehcunea kîn nare ita kam, quê ha imãa ihcunea na ihkôt hamreare ne.

⁴ Wa ha imã mehcunea kîn na mã, wa ha amji mã me to ijãhtũm ryti to ipa. Ne hanea ne me kam ijãhcajrënti to ipa, ne nee hanea ne me hũ na amji to prãm to ipa nare. Ne nee hanea ne amji to ijãmnãn to ipa nare. Ne nee amji to icati prãm to ipa nare. ⁵ Ne nee hanea ne apu amji mã quêt to ipa nare.

Ne nee hanea ne, amji to pit mã apu amji kam ijapac to ipa nare.

Ne nee hanea ne ampo cunea kôt ame kam icryc pyrentu nare.

Ne nee hanea ne jũm te apu ito kên ata to amji japackre nare. ⁶ Ýhý, wa ha imã me ikwý kîn na mã, wa ha nee cute me ampo kên ton xà ata pyrên ijakry nare.

Ne quêt cute me ampo pej ton xà ata pyrên ijakryti to ipa. ⁷ Quê ha imã me ikwý kîn na mã, wa ha mentête ijãmtâr to ipa ita na.

Ne wa hanea ne Pahpãm to amji mã ihmpej to ipa ita na.

Ne hanea ne Pahpãm to ite amji mã hajýr ita kam, itýj me ikwý to amji mã hajýr to ipa ita na.

Ne wa hanea ne ampo cunea kam, ihcunea na ijũ-canãr to ipa ita na.

⁸ Ne me pamã me pahkwý kinti xà ita, jũ caxuw me papê hamre xà nare.

Ne ihkinte, cu ha pahtýj jũ caxuw Pahpãm jarkwa to pahte me hapackre xà ita to me tojnõ.

Ne hanea ne, cu ha pahtýj jũ caxuw me pahcakôc xà pihho to me pahcakôc to me tojnõ.

Ne pahte me ampo jahkre pej atajê, cu ha pahtýj me to pajapac kêt partu. ⁹⁻¹⁰ Ýhý, cu ha mam me pahno ampo jĩkjê crire ne cupy, ata to ma amji jamãr to papa, ne jũ caxuw ihcunea na cupy, ne ihkôt ihcunea na ita to pit mã amji kam me pajapac to me papa, ne nee hipêr hĩkjê incire ata to me amji japackre nare.

Jĩkjê na mã, amcro itajêa kam me pamã ampo cunea jĩkjê kryjre ne hahkre pej.

Ne hanea ne Pahpãm jarkwa to me hapackre xà jĩkjê incire to, cu ame hapackre to me papa.

Ne cu ha jũ caxuw ampo itajê cunea jahkre pej.

¹¹ Ne pê wa cormã ipê ahkrare ria mã, itýj ahkrare cakôc xà ata to icakôc, ne ahkrare te amji mã to ihhimpej xà ata to amji mã ihmpej.

Ne ikã, ne ite ahkrare te amji kam hapac xà atajê cunea rer, ne hancu.

Jĩkjê na mã, cu amcro itajêa kam, me papê ahkrare pyrãac, pjê ita kam.

Ne jũ caxuw Pahpãm wýr me pajãpir xà ata pê ramã me pahkã pyrãac,

na cu ha nee hipêr pjê kam ampo itajê to me amji japackre prãm nare. ¹² Ne cu ha hanea ne irĩt xà nõ wejti cakênti kam,

te ame amji pupun pej prãm,

ita jĩkjê na mã, cormã nee me pahte me Pahpãm pupun pej nare cakrô,

cu ha pahtýj jũ caxuw Pahpãm kuc ri me hõmpu, ne me ajpên pupu.

Ne cormã ita kam, me pamã Pahpãm jahkre pej crire, ne cu ha pahtýj jũ caxuw ihcunea na me Pahpãm jahkre pej to hanea,

pom quê ihcunea na cumã me pajahkre pej he.

¹³ Ne cu cormã me Pahpãm jikaj ita kam, cu ha pahtýj amji mã me to pahhimpej to me papa rohnýtti mã.

Ne hanea ne pahte amji mã me to hajýr ita kam, cu ha pahtýj me hikaj to me papa rohnýtti mã.

Ne hanea ne me pamã mehcunea kîn rohnýtti mã.

Ne pahte amji mã me pahkwý kîn ita ri,

quêt ihkwý itajê jirôa pê cati ne impej.

Hacpÿa mã Jeju Crixto tîr xà to me hapackre xà

1 Corinti 15.1-58

Me Hapên Xà 2.24-36

15 Ýhÿ Jeju kam me ikjêê itajê, wa ha mam ite me amã Jeju pê me pahpytâr catê jarên ata to, ate me amji japackre prãmte, wa ha hipêr me amã harên to capô. Pê wa me amã harê, pê ca ahna me amji capa, ne atÿj Jeju to amji mã me ahimpej kam me to acrà tu. ² Ne pê wa me amã harên pejti to harê, pê ca amji mã me to hajÿr xà ata kôt ri, Jeju te me apytâr. Na ca ha ite me amã harên ita to amji mã me hajÿr tÿaj kam me to acrà tu ne. Nãmri ca ha ate amji mã me to hajÿr xà ita jicu na, ca ha Jeju to ate amji mã me ahimpej xà ata kôt hamreare ne.

³⁻⁴ Pê wa Jeju na ijÿpar xà ata ri ihkwý jirôa pê cati ne impejti, ata pê wa me amã harên to hane he:

“Pê Jeju Crixto me pahkên cwÿrjapê ty,
pê me harêt,
pê ahna amcro incrê jirô pê,
hacpÿa mã ihtîr” hane.

Ne pê ramã Pahpãm jarkwa na ihkàhhôc kam ahna mehhôc ata na ri cute hajÿr. ⁵ Ne hacpÿa mã ihtîr jirô pê, pê Petrô mã amji to ajpê. Ne hanea ne hapu na, ihkôt me ipa catêê te tôxi atajê mã amji to ajpê. ⁶ Jirô pê mã pê, Jeju kam me pahkjêê jàhtô te quijênta jirôa pê me cumã amji to ajpê. Ne pê me hõmpu atajê kwý ramã amehtyc, ne cormã me hàhtôa ne mehtîar na ame ipa. ⁷ Jirô pê mã, pê hanea ne Tijac mã amji to ajpê, ne ihkôt harkwa na memprar catêê cunea mã amji to ajpê.

⁸ Ne me hîcu xàa kam hanea ne cute imã amji to ipipê, ne hapua na ite hõmpun xà ita pê ihhê rÿm, ahkrare te ihpÿpÿm xà kaj na ihpÿpÿm ata pyrâac. ⁹ Wa hapu na icator ita kam, wa mam Jeju jarkwa na memprar catêê atajê cunea japyre mã, ne icrire. Ne imãa ipê Jeju jarkwa na imprar catêê nõ caxuw ipej nare. Ampo na? He pê wa ajco ite Pahpãm na mehkwy to kèanre to prãm to, ajco itÿj me hahêr to ipa. ¹⁰ Cakrô mã nee ite Pahpãm to kên ita jahpan xà na, cute icaca nare, ne ihtÿj quêt cute, ite cumã harkwa na iprar catê na amji mã icapi, ne Pahpãm te ito impej xà ita kôt hamre nare, na wa itÿj cumã ijàpên to ipa. Ne Pahpãm te, ite cumã ijàpên xà na itehcajpar xà ita kam, wa harkwa na cumã memprar catêê cunea jirôa pê cumã ijàpên to catia to ipa. ¹¹ Wa ha ite mãn me amã Jeju jarên na, nare, me cute mãn me amã harên na, quê ha nee ahna jÿ mãn nare. Ampo na? He me ijÿjarên xà itajê pipên pit. Ne ate ahna me ipar xà atajê to, ca atÿj amji mã me hajÿr to me apa.

Hacpÿa mã me pahcunea tîr xà to me hapackre xà

¹² Wa hirãa pê me amã hacpÿa mã Jeju Crixto tîr na harên to me ipa ita kam, jÿ mã ca ha ajte me anõ amji mã mehtyc jarên to:

— Nee hacpÿ mã mehtyc tîr xà nare — hane. ¹³ Quê ampeaj kam cute hajÿr na, quê nee hanea ne hacpÿ mã Jeju Crixto tîr xà hamreare. ¹⁴ Ne nee hacpÿa mã Jeju Crixto tîr nare ita kam, quê ha ite me amã ita na harên xà ita kôt hamreare ne, ne hanea ne ate amji mã me to hajÿr xà ita kôt hamreare ne. ¹⁵ Ne cormã ihnõ te hajÿar he. Quê nee hacpÿa mã mehtyc tîr xà nare na mã, quê nee Pahpãm hacpÿa mã Jeju Crixto to ihtîr nare ita kam, wa cama ite me amã Pahpãm te Jeju to ihtîr jarên xà ita to ame amã ihêj. Ne hacpÿa mã ihtîr ita kam, jÿ mã wa me, ne ame amã ihêj?

¹⁶⁻¹⁷ Quê ha hacpÿa mã mehtyc tîr xà hamreare na mã, quê ha nee hanea ne Jeju hacpÿ mã ihtîr nare. Ne quê nee Jeju Crixto hacpÿa mã ihtîr nare na mã, quê ha hanea ne ate amji mã me to ahimpej xà ata kôt hamreare ne, na ca ha cormã me akên mã me axà, ne kam me apictor xà itajêa kam ame apa. ¹⁸ Ne me pahkwý te Jeju Crixto to amji mã mehhimpeaj kam amehtyc atajê, quê ha ihtÿj hanea ne Pahpãm kaj na me acto. ¹⁹ Ne quê ha Jeju Crixto pjê ita kam pit mã me pajamã, ne nee me pahtyc xà jirô pê, pahte me amji pupun xà kèanre atajê jahpan xà na, me pamã ampo jôr nare na mã, cu ha nee ame amji mã hamãr nare, ne mehcunea jirôa pê me pahkên mã me axà.

Cu ha me pahcunea, Jeju cukwa kam, hacpÿa mã me pahÿr

Me Hapên Xà 26.23; Ipipê Xà 20.1-15

²⁰ Ne nee cute hajÿr nare ita kam, quêt ampeaj kam mam ihtîr cakônî to hacpÿa mã ihtîr, ata na quê ha hanea ne, ihkôat hacpÿa mã mehtyc atajê pê hÿràc peaj, ne mehcunea hacpÿa mã mehtîr. ²¹⁻²² Ne pê hÿmre pyxit peaj pê me panquétti pê Atãw to kên ata cukwa kam ri, me pahcunea tyc xà. Jÿkjê na mã, hÿmre pyxit peaj pê Jeju Crixto ata cukwa kam, cu ha quêt me pahcunea hacpÿ mã me pahÿr. ²³ Quê ha mam hacpÿa mã Jeju Crixto ihtîr, ne ihkôt quê ha hacpÿ ne cõjkwa pîn amji jaxà ne wrÿ, me ajkaam, quê ha me cupê me hõ tekjê catêê atajê hacpÿa mã mehtîr. ²⁴ Ne curia quê ha ampo cunea jicu xà kam ahtwÿ. Quê ha Jeju Crixto, Hÿm curê xwÿn pê Xatanaj na mehkwy jô pahhi catêê carôt tÿjti atajê, cunea tohjê. Mãr quê nee hipêr pjê kam mehkri catêê to ihmimpej nare, ne quêt cute Hÿm kam hapac na me to, quê ha me kampa.

²⁵ Ne quê ha Jeju Crixto me to ihmimpej to ipa ita kam, quê ha ahnaa Hÿm curê xwÿn catêê cunea ihkra par krac ri me nõr na me to, quê ha me nõ. Quê ha cute me tohjê na me hahkre pej xà na, me hipy ihpar xãm. ²⁶ Ne quê ha me pahtyc xà pê me pahcurê xwÿn ata, quê ha hapua na hîcu xàa kam me to hamre. ²⁷ Pê Tawi xwÿ Pahpãm jarkwa kôt hõ kàhhôc kam ihhôc to:

“Ýhÿ, Inxÿ Cati,
ate ampo cunea to me ihmimpej xà na me ixãm,
ne ate ampo cunea ton itajê to me ihmimpej,
ne hirô pê me icuhhê na me iton” hane.

Ne Pahpām te ihkra curê xwÿn catêjê cunea to ih-himpej prām to, cumā to ihcakôc to hajÿr. Ne nee ihkra te Hÿm Cati to ihhimpej xà na cute to cumā ihcakôc to hajÿr nare. ²⁸ Ne quê ha xa Pahpām, ihkra pê Jeju krac ri mehcunea xà na me to, ne cute me to ihhimpej na me to, jirô pê quê ha ihkra Hÿm krac ri axà, mār quê Hÿm ihcunea to ihhimpej.

²⁹ Ne wa ha hipêr me amā hacpÿa mā mehtyc tÿr xà kôt harên kam to icrà tu ne. Ihhêj ne ramā jÿmjê te mehtyc catêjê mā, cō kam me amji cumrār. Ne ampo caxuw mā cute me hajÿr? Pom quê ha xwahna nee hacpÿ mā mehtyc mehtÿr nare ita? ³⁰ Quê ha nee hacpÿa mā mehtÿr xà nare na mā, wa ha nee ampo kên te ito kên xà itajê cunea mā icjêj to ipa prām nare.

³¹ Pÿhàpà, me ikjêjê! He wa amcro cunea kam ityc xà na pire mā ipa, cu me pajō Pahhiti pê Jeju Crixto kam me pahhônco xà ita kam, wa me apyrên ijakryte, me amā amji jarên to hane. ³² Wa ita ri Epet jō krÿ kam me icurê xwÿn catêjê me, me ijarkwa to kypê me ajpên cujtên nare. Mā me cupê ampo jàprêhti ata pyrâc, ne cute me ikam ihtêm, ne ajmār me icuran. Ne hacpÿa mā mehtyc tÿr xà nare ita kam, mēr ampo na mā wa ajte ampo kên itajê cunea mā icjêj to ipa? Ne quê nee hacpÿ mā mehtyc tÿr xà nare na mā, cu ha pajapacta ne mehrā kên te me amji jarên xà kôt me amji kam-pa, ne me amji mā:

— Apê na ame pahtyc xà ita kam, hacme, ne ame ampo to ikō, ne ame apà, ne cormā ita kam ame amji kÿn cri — hane.

³³ Co he! Me guphêa ne, mār quê nee jÿm me amā ihhêj nare! Ampo na? He cu ha mehrā kên kôt me papa, ne me pahna ahtÿm nare, quê ha hanea ne me pahkrā kênre ne. ³⁴ He nee me akwÿ kwÿ mā Pahpām carôt jahkre pej nare ita kam, xà nee ahna amji jÿ na me apahàm nare? Na ca ha ate amji kam me gapac xà kên kôt me apa xà atajê jicu, ne hacpÿa mā hipêr catyt kam ate amji kam me gapac xà impejti kam me apa.

Hacpÿa mā me pahÿr jirô pê me pajō tuw kôt harên xà
Ruc 20.34-36; Roman 8.10-11; Pìrip 3.20-21

³⁵ Ca ihhêaj to me akwÿ kwÿ mehtyc te hacpÿa mā mehtÿr na me ajpên cukij to:

— Quê ha jÿm ty, ne ramā hÿ ihcacu, jÿ mā quê ha Pahpām ramā hÿ jamre ata to, ne hacpÿa mā to ihtÿr? Ne hÿ jÿ to quê ha hacpÿa mā cumā ihtÿr, quê ha apu to ipa? — hane.

³⁶ Pÿhàpà! He apê amji jahkre kêatre! Pom ca ha ampo hy kre, quê ha xa ty, jirô pê cormā kam huprāj cato ita? ³⁷ Ne ca ha arÿjhy kre, nare, ampo hy kre, ne ihhy pit kre, ne nee ihcakôa na ihkre nare. ³⁸ Ne Pahpām te, ihtÿj ahpÿanre na ampo hy kre ata kam ihcakô na, cute ton to amji mā ihprāmte xà ata na to. Mēr hōhō, pom ca ha ihhy pit kre, quê ha kam ihcakô cato ata, nee ihhy ata me ipipên nare, ne ajteare mā, ne hirôa pê impej. Hōhō, ita jÿkjê na, quê ha jÿm ty, quê ha me hÿ jarêt, quê ha hacpÿa mā ihtÿr, ne hÿ to cato ata, quê ha ajteare mā, ne mam ita jirôa pê impej.

³⁹ Ne pom ampo cunea tÿr itajê jÿ, ajpên pê ajteare mā. He ajteare mā me pajō, ne ajteare mā pryre jÿ, ne ajteare mā pryara jÿ, ne ajteare mā tep jÿ.

⁴⁰ Ne cōjkwa kam, ajteare mā me hÿ na me ipa. Ne pjê kam cute hajÿr ne ajteare mā me hÿ na me ipa. Ne pjê kam ampo pejti itajê, me cōjkwa kam ampo pej itajê, ajwar impej cakrô, nee impej na ajpên na ipimrâc nare. ⁴¹ Ne ajteare mā pyt jàhcujro impejti ata, ne ajteare mā putwÿr jàhcujro impejti ata, ne ajteare mā ahpÿanre na caxêre jàhcujro impejti atajê. ⁴² Jÿkjê na mā Pahpām te hacpÿa mā mehtyc to ihtÿr xà ata te hajÿr he. Ne cute mehtyc jarêt xà ata kam, quê ha ramā hÿ hamre to mō. Ne hacpÿa mā ihtÿr xà ata kam, quê ha quêt hÿ ata ajteare mā, ne nee jÿ caxuw hamre nare. ⁴³ Ne quê ha mehtyc jarêt xà ata kam, quê ha ramā ihkên ne ihpeacre, na quê ha nee hipêr jÿm ahna prām nare. Ne hacpÿa mā ihtÿr xà ata, quê ha quêt impeaj to impej, ne ihtÿj. ⁴⁴ Ne cute me harêt xà ata kam, quê ha me hÿ pit jarêt. Ne hacpÿa mā ihtÿr xà ata kam, quê ha quêt Pahpām Carō Pejti kôt hÿ tuw to ihtÿr ata to ipa. Ne pjê ita kam, me pajō itajê pê pjê tekjê atajê to pit mā me papa. Ne hacpÿa mā me pahÿr jirô pê, cu ha cōjkwa kam, Pahpām Carō Pejti kôt me pajō pê cōjkwa tekjê atajê to ame papa.

⁴⁵ Pê Mojxe xwÿ jō kàhhôc kam, ramā Pahpām jarkwa kôt mam Atāw cator ata jarên to hane he:

“Pahpām te pjê te mehÿ pê Atāw ton, ne hÿ jakre jakôr, mā hÿa na cute amji ton” hane.

Ne cōjkwa pÿn Atāw nōa pê Jeju cator ata ri quêt ajteare mā, ne ihtÿj Carōa kôt me pahto ihtÿr. ⁴⁶⁻⁴⁷ Pê mam Atāw ata pê pjêa tekjê, na pê Pahpām pjêa to, to. Ne quêt hapu na Atāw nōa pê Jeju pê cōjkwa tekjê ata, cōjkwa pÿn Pahpām Carōa kôt wrÿ, ata ri mam ita jirôa pê impej, ne cati. ⁴⁸ Ne pjê kam mam Atāw te amji kam hapac xà kôt me ipa catêjê atajê pê ri, pjê tekjê, ne me cupê hÿràac. Ne quêt hapu na cōjkwa pÿn Atāw nōa pê Jeju te amji kam hapac xà kôt me ipa catêjê atajê pê ri, cōjkwa tekjê, ne me cupê hÿràac. Cwÿrjapê quê ha me hÿ pê Jeju hacpÿa mā ihtÿr ata jÿa pyrâc. ⁴⁹ Ne pjê te mam me panquêtiti Atāw jÿ ata japua na ri, me pajō ita pê hÿa pyrâc, na cu cormā ame to papa. Ita jÿkjê na, cu ha ame pahtyc jirô pê hacpÿa mā ame pahÿr, ne me pajō pê cōjkwa pÿn Jeju jÿa pyrâc, na cu ha pahtÿj jÿ caxuw ame to papa.

Cōjkwa kam me pahkrÿ xà caxuw me pamā me pajō tuw na prām

1 Texarôn 4.13-18

⁵⁰ Ÿhÿ, Jeju kam me ikjêjê, jÿ wÿr quê pjê kam me pajō kam caprô ramā ihcacu to mō itajê, cōjkwa wÿr Pahpām himpej xà wÿr api. Ne jÿ wÿr quê me pajō itajê ihtÿr na ipa rohnÿtti mā.

⁵¹ Cormā nee ate me ampo jahkre pej nare ata jarên na, me ikampa. He cu ha nee me pahcunea me pahtyc nare cakrô, cu ha pahtÿj caxuw ame pajō to antuw to hane he. ⁵² Quê ha cōjkwa pÿn hōhhi cakôr jicu xà ata

jökre kampa, me ajkaam, hũjarêan kam, cyt ne, me amji to antuw pyrentu. Ýhỹ, ampeaj kam, quê ha mehtyc hacpỹ mã mehtĩr me ajkaam, cu ha me pahcunea nee jũ caxuw me pajĩ tyc xà nare ata wỳr me amji to antuw, mehtyc ne hacpỹa mã mehtĩr atajê mea mã. ⁵³ Ne me pajĩ ty, ne ihcacu xà wỳr pra itajê, ihtỳ cute amji to ipintuw xà pit, mār quê nee jũ caxuw hipêr ihtyc nare. Nāmri quê ha nee cute amji to ipintuw nare na, quê ha nee Pahpām cahê na ihkrĩ nare. ⁵⁴⁻⁵⁵ Pê ramã Pahpām jarkwa to mehcaok catêjê pê Ixaj xwỳ me, Hôxêj xwỳ, harkwa kôt hõ kàhhôc kam hacpỹa mã me pahto pahĩr, ne amji to me papintuw xà na ajwar mehhôc to:

“Me pahte me pahtyc xà pê me pahcurê xwỳn tohjê, ne me to hamre partu.

He me pahtyc xà pê pacti pêrhy xà, ne ihtỳ me pahcãmxe.

Ne hacpỹa mã me pahĩr xà ata pê pacti curan xà pyràac.

Na cu me pahĩr rohnỳtti mã xà ita kam, nee hipêr jũ caxuw me pamã me pahtyc xà cupa nare” hane.

⁵⁶ Cu ha Mojxe xwỳ jõ kàhhôc kam Pahpām jarkwa jirô pê me pahpỳm xà ata pê pahte me Pahpām to kên, cwỳrjapê ri ihtỳ me pahtyc xà. ⁵⁷ Ne jũm kôt mã pahte me pahtyc xà ita tohjê? He nee mã jũm kôt nare, me pajõ Pahhiti pê Jeju Crixto kôt, cu pahte me tohjê. Na cu ha Hũm pê Pahpām te me pamã ihkra pê Jeju kujahêc ata pyrên me pajakryti na cumã me amji jarê.

⁵⁸ Ýhỹ, imã me ikjêjê kĩnti itajê, he ampo itajê cunea cwỳrjapê, ca ha atỳ me pajõ Pahhiti to amji mã me ahimpej kam me to acrà tu ne, ne nee jũ caxuw kam me apec nare. Ca me pajõ Pahhiti mã apê ita kam, quê ha nee me gápên xà ita kôt apê hamre nare na, ramã me amã hahkre pej. Cwỳrjapê ca ha atỳ cumã gápên xà ita to pit mã hupkre cahkô to me apa.

2 CORINTI

Ýhý, pê Pawrô pê Jeju jarkwa na memprar catêjê nõ. Ne pê Jeju na mehwý jakrã Corinti jô krí kam mehkří atajê wýr, pom cu me hõ kàhhôc cahyt ita kujate. Na pê hapu na hõ kàhhôc ita japry pê (2 Corinti). Ne hõ kàhhôc itajê kam, cute ampo cunea to me hapackre, mār quê nee me cumã mehtyc xà cupa to me ipa nare. Ne hanea ne cute me pamã me pajĩ tuw jarěn. He nee ite Corinti wýr Pawrô te hõ kàhhôc kujahêc atajê cunea to ipintuw nare, ne ihkwý jatujre atajê ri ite to ipintuw.

Pê Pawrô Pahpãm mã hàpên na amji kôt harě

2 Corinti 4.1-18

Me Hàpên Xà 19.23-40; Roman 1.11-12

4 Pê Pahpãm hàncaprĩa kam, me ipê harkwa na me iprar catêjê na me ipyxwý ita kam, wa ha nee intête me amji hi kwĩn, ne ame ipec, ne me cumã ijàpên jicu nare. ² Ne wa quêt ampo kên pimxur cunea kam me pahpahàmti atajê cunea, wa ma ame ton ca-ca, ne nee ame cumã me ihêj to me ipa nare. Ne nee wa Pahpãm te harěn xà kaj na me amã ihcupan xà nõ jarěn to me ipa nare. Ne wa quêt catyt kam me amã hirãa pê Pahpãm jarkwa jarěn xà to capô to me ipa. Ne wa Pahpãm kam mare mã, me cumã harkwa jarěn to me ipa, mār quê mehcunea, wa nee ame ihêj xi nare na, me ijahkre pej. ³ Nãmri quê ha jũm te nee ite me ijũjarěn xà ita par jahkre pej nare na, quê ha nee incwýrjapê amji mã me icuhtom nare. Ne ampo na mã nee me kam hapac jahkre pej nare? Jũ wýr quê ramã me ipictor to me mõi ita kam me kam hapac pej. ⁴ Ne quê jũm ato caxwý, ca ha nee arít nare. Ita jĩkjê na mã Xatanaj pê pjê ita kam, cute amji kam me hapac xà kên jô pahhi ita te, me cupê cute amji kam me hapac xà to kên, mār quê nee Jeju Crixto pê Pahpãm kra pê ampo kên catia pê me hũtâr catê ata na me hahkre pej nare. Jeju pê Hũam pyrãc, na quê ha nee Pahpãm to amji mã mehhimpej nare ita kam, quê ha nee Jeju Crixto kôt me Pahpãm jahkre pej nare. ⁵ Ne nee wa me pa, amji to me amã me icakôc nare, ne quêt Jeju Crixto pê me pajõ Pahhiti to, wa me amã me ijũjarěn to me ipa. Ne Jeju cwýrjapê ri me ipê me amã me ijàpên catêjê pit. Cwýrjapê wa ame amã me amji jarěn to me ipa.

⁶ Ne pê Pahpãm pjê ton xà ata kam, awcapãtkô cunea to hamre prãmte, harěn to: "Amcro" hane. Hamre pê amcro pyrentu, pahte me ampo cunea pupun, ne me hahkre pej xà caxuw ahcujro pyrentu. Ita jĩkjê na mã, ihhêj ne Pahpãm te me pamã pahte amji kam me pajapac xà cujro, cu ihkôt me ampo cunea kampa, ne me hahkre pej. Ne Jeju Crixto tea ri me pamã Pahpãm to ipipê, na cu ha ihkôat me Pahpãm carôt jãhcujro jahkre pej.

Põ rũm me pajĩ peacre cakrô, mã kam Pahpãm Carõ Pejti carôt týj ihkrĩ

⁷ Ne pjê te pot na kyre pê hĩ jãhwýr, ne ihcacure, ne ihkre kam, ampo pejti na hĩ jãhwýrti te hipu, ita na mã me ite. Ne me ijĩ peacre, ne ihcacure cakrô, mã ihtýj me amã ampo pej pit jarěn to ipa. Na quê ha mehcunea, ite Pahpãm jarkwa kôt mehcunea mã harěn xà pejti jarěn ita na me ipupu. Ne Pahpãm te ri imã caxuw ampo cunea jirô pê carôt týjti ita jôr na me hahkre pej.

⁸⁻⁹ Wa ampo cunea kam me amji pupun to kênre cakrô, mã nee cute me itohjê nare. Ne ampo kwý kam amji jahkre kêatre cakrô, wa nee amjia kôt ite me hicu nare. Ne me icurê xwýn ame icapôr cakrô, mã nee Pahpãm te me imã hikran nare. Ne hãn ne ihtýj me ito kên cakrô, wa nee me ijamre nare.

¹⁰⁻¹¹ Ne Jeju te me pancwýrjapê mehcuran xà mã amji jôr, mã cute mehcuran. Jĩkjê na, wa itýj me amã Jeju te amji kam hapac xà pejti jarěn xà mã amji jôr to ipa. Ne ite me amã harěn xà ata kôt, ca ha me atĩr rohnýtti mã na me apa xà ata, ihtýj mehcunea mã Jeju te hacpýa mã ihtĩr na harěn. Ne wa Jeju cwýrjapê amji to me ikên cunea japên to me ipa. ¹² Ne ite amji to me ikên japên to me ipa xà ita kôt, ca ha me atĩr rohnýtti mã na me apa.

¹³ Pê pahhi xwý pê Tawi ata, ita na Pahpãm jarkwa kôt hõ kàhhôc kam ihhôc to hane he:

"Imãa, Pahpãm jũjarěn xà ita pê nee ihhêj xi nare, na wa itýj amji mã to ihmpej, ne me amã harěn to me ipa" hane.

Na wa itýj cuxà Pahpãm to amji mã me ihmpej to me ipa, ne itýj cuxà me amã Pahpãm jũjarěn xà jarěn to me ipa. ¹⁴ Ne ampo na mã wa Pahpãm to amji mã me ihmpej? Wa ite, cute hacpýa mã me pajõ Pahhiti pê Jeju to ihtĩr na me hahkre pej, na quê ha ihtýj cuxà

me ito itîr, ne hanea ne me ato me atîr. Na cu ha pahtÿj jÿ caxuw me pahcunea cuxà hÿrmã me api, ne cahê na ame papa rohnÿtti mã. ¹⁵ Ne me acwÿrjapêa ri, ite me amji pupun xà kêanre itajê jàhtôa to hàhtô. Ne me imã pjê cunea kam, me hàhtôa ne Pahpãm wÿr me ipipkjêr na me to prãm, mãr quê Pahpãm mehcunea caprî, ne mehkên pê me hÿtà. Mãr quê me hàhtôa to me hàhtô, ne Pahpãm te ampo kêr pê me hÿtàr pyrên me hakry na, cumã me amji jarên catia to me ipa.

Cu ha pahtÿj Pahpãm to amji mã me pahhimpej kam me to pancrà

¹⁶ Ne amcro cunea kam, me pahkà amji to hamre to mÿr cakrô, mã me pahcaxwãm pê pahte amji kam me pajapac xà ihtÿj amji to intuw to mÿ. Na cu ha nee Pahpãm mã me pajàpên tète me amji hi kwîn, ne me hicu nare. ¹⁷ Ne pahte amji pupun xà to kêanre kêre, kêr pejti te cyt ne imprar atajê jahpan xà na, quê ha Pahpãm amji cahê na me papa na me pahto, ne ampo kêr ita jirôa pê me pahto impej catia to cati to ihcuhê rohnÿtti mã. ¹⁸ Ne por cu pjê kam me panto to me ampo pupu atajê, quê ha ihtÿj jÿ caxuw hamre. Ne quêt cÿjkwa kam pahte me ampo pupun nare atajê, quê ha hàhhuc rohnÿtti mã. Cwÿrjapê cu ha nee ita ri, pjê kam, pahte me ampo pupun itajê to ame pajàptô nare. Ne quêt cÿjkwa kam, cormã nee pahte me hÿmpun nare atajê to, cu ha pahtÿj me amji japackre to me papa.

Nee pahte me pajÿ tuw pupun nare cakrô, ramã to me pajapac xà

2 Corinti 5.1-21
2 Petrô 1.13-14

5 Quê ha jÿm ikre pejti catia nõ ton xwÿjrea na, ramã amji mã ikre cahàc nõ xãm ne kam ihkrî. Ne cute ramã ikre catia ata jipêj jirô pê, quê ha ikre cahàc ata hu, ne ma cute intuw jipêj ata mã axà, ne kam ihkrî. Jÿkjê na mã me pajÿ pê me pahcaxwÿn carô krekà te hajÿar. Ne ramã pahte me Pahpãm te cÿjkwa kam me pahcaxwÿn carô mã, hÿ tuw jipêj na me hahkre pej. Ne quê ha jÿ caxuw me pajÿ pê ikre cahàc pyràcti ita ty, quê ha caxwÿn carô ata ihtÿj cÿjkwa kam me pajÿ tuw pê ikre cati pyràcti ata kam ihkrî. Ne Pahpãm te ri me pamã me pajÿ tuw pê ikre pejti pyràcti ata ton, na quê ha nee jÿ caxuw hamre nare. ²⁻³ Ne pom quê ha jÿm ikre cahàc pê ihkrî xà kêanre kam ihkrî, ne ihtÿj ikre pejti ata mã hàr ne kam ihkrî pyrentu to prãm, ita na mã me pajÿ te, ne ihtÿj me pajÿ ita rer pyrentu to prãm. Ne ma cÿjkwa kam me pajÿ tuw te jÿ caxuw hamre xà nare ata mã hàr, ne kam ihkrî to prãm to, me to pajapac xà te me pahcagãgã.

⁴ Ne pom cu pjê kam me pajÿ to ame papa xà ita kam, cu pahtÿj ame pahcagãgã to me papa. Ampo na? He nee mã me pahte me pajÿ tÿm ata caca xà to nare. Ne quêt intuw ata mã hàr ne kam apu ipa to prãm to, cu ame pahcagãgã. Ne cu ha me pajÿ tuw te jÿ caxuw hamre xà nare ata kam ame papa, ne nee hipêr me

pajÿ tÿm, ramã hamre to mÿ ata to me amji japackre nare. ⁵ Ne pê Pahpãm ramã mam ita to amji kampa. Ne cute ampeaj kam, ihtÿj jÿ caxuw me pahto ipintuw na me pajarên xà caxuw, ramã cute me pamã Carô Pejti jÿr, na quê ha ihtÿj to.

Pahte me pajÿ tuw to me amji pytàr na ramã me pamã hahkre pej

⁶⁻⁸ Ita pyrên me pajakry to, cu pahtÿj me pajÿcanãr na amji mã me pahcarôt. Ne cormã pjê ita kam, ame papa xà ita kam, nee pahte me pantoa to me Pahpãm pupun nare cakrô, cu pahtÿj amji mã me to pahhimpej to me papa. Ne pahte amji mã me to pahhimpej xà ata kôt ri, me pamã hahkre pej. Ne cu cormã me pajÿ ita kam ame papa xà ita kam, cormã nee Pahhiti cahê na me pajÿ tuw ita kam ame papa xà nare na, pahte me amji jahkre pej. Ne pahtÿj me pamã, pahte me pajÿ tÿm ita pê me pajapôj, ne ma Pahhiti cahê na me pajÿ tuw ita mã me pancjêj na me pamã to prãm.

Cu pahtÿj amji to me Pahpãm cajpuaw to prãm

⁹ Ne ampo pyxit peaj ata na ri me pamã ihprãam to prãm. Cu ha pahtÿj pjê kam, cormã me pajÿ tÿm kam ame papa xà ata kam, amji to me Pahpãm cajpuaw to prãm, nare, cÿjkwa kam me pajÿ tuw kam me papa xà ata kam, cu ha amji to me Pahpãm cajpuaw. ¹⁰ Ne mÿr ampo na mã cu pahte me ita ton xà? He cu ha jÿ caxuw me pahcunea me pajô Pahhiti pê Crixto cuna mã me pahcuhê, mãr quê catyt kam me pahcunea cukij, ne me ajpên pê me pahto haprà. Ne taa, cormã pjê kam me pajÿ tÿm to me papa, ne pahte me pajàpên xà ton atajê jahpan xà na, ahpyanre na me pamã amgô pa. Ne me pahkwÿ te ampo pejti ton atajê to, quê ha impej, ne me pahkwÿ te me ampo kêr ton atajê to, quê ha apu ihkêanre ne.

Jeju mã me pahkÿn xà ata, ihtÿj me pahto ihhimpej

Roman 6.4-6; Epet 4.22-24; Coroxo 3.9-10

¹¹ Cwÿrjapê wa itÿj kypê amji mã me pajô Pahhiti cupa to me ipa nare. Na wa itÿj Pahpãm wÿr me hàhtôa to me ipipkjêr to prãm. Pahpãm mã ihcunea na me ijahkre pej, cwÿrjapê wa nee me ipej mã me ipÿm prãmte, hÿrmã ame to ipipkjêr to me ipa nare na, cumã me ijahkre pej, ne hanea ne ahna me amã me ijahkre pej. ¹²⁻¹³ He jÿmjê itajê ri pÿ rÿm pit mã amji to me cati prãm, na ri pÿ rÿm pit mã ampo atajê na amji to me hàmnãn to me ipa. Ne ihhêj ne ihtÿj jÿmjê itajê te pÿ rÿm mento to me ipupun, ne nee me icaxwãm pê, cute me ite amji kam me ijapac xà na me ijahkre pej nare kam, amã me ijarên to kêanre to:

— He Pawrô na mehkwy itajê te me amji jahkre kêatre, ne ihhêj ne ame kam waj — hajÿr. Ne mehkwy me ijarên to:

— Cute me pamã ihhêj xi xà ita caxuw, cute amji jahkre kitre nare — hane. Ne wa ha ite me ikam waj cakrô, wa itÿj cormã me amji to Pahpãm cajpuaw to ipa. Ne nee wa ame ikam waj nare, wa me ikrã impeaj

kam me ato impej to me ipa. Wa ite ramã me amã, me icaxwãm pê ite me amji kam ijapac xà na me amji jarën. Mår ca atỳj me cumã me ikõt harë, ne nee ame ijũ na apahãm nare. Ne nee mã ite amji to me icati to prãm to, ite me amã ite amji kam me ijapac xà ita na me amji jarën nare. ¹⁴ Ne Jeju Crixto mã me ikinti ata ri me ito ihhimpej to ipa, cwýrjapê wa itỳj me atehcajpa. Ne por pê Jeju pê me pajõ Pahhiti pyxit peaj ne ty, ata cukwa kam ri ihhêj ne me pahcunea te amji kam pajapac xà tũm kên atajê tyc, ne hamre par. ¹⁵ Ne pê me pahcunea cwýrjapê ty, ne me pancwýrjapêa pê hacpýa mã ihtír, mår cu pjê kam ame papa atajê, nee hipêr amji to me amji cajpuaw to prãm to ame papa nare. Ne quêt ihcajpuaw to prãm to, cu cumã ame papa.

Jeju me pamã cute amji kam hapac xà tuw pejti gõ

¹⁶ Ita kam ri pahte amji kam me pajapac xà ita ajteare mã, ne impej. Cwýrjapê, cu ha nee pjê kam, cute me amji kam hapac xà tũm ata kõt, jũmjê to amji kam me pajapac nare. He pê wa mam Jeju to me amji kam ijapac xà to hanea. Ne ita kam, wa nee hipêr me to hajýr nare. ¹⁷ Ne quê ha jũm Jeju Crixto to amji mã ihhimpej, ne kam amji hõnco ata pê quê ha jũm tuwti ata. Ne ramã mam cute amji kam hapac xà tũm kên ata cupê hamre partu. Na quê ha quêt cute amji kam hapac xà tuw pejti ata kam apu ipa. ¹⁸ Ne ampo pej itajê cunea Jeju kõt, Pahpãm pĩn, me pahwýr pra. Ne pê mam me papê Pahpãm curê xwýn. Ne Jeju cukwa kam ri cute hacpýa mã, me pahto amji jõ ikwý nõ. Ne cute hýrmã mehwý to ipipkjêr xà ata pê ri me pajapên xà, pê ahna me paxãm, mãr quê me pahcuxà hanea ne me to amji jõ ikwý nõ. ¹⁹ Na wa itỳj mehcunea mã Pahpãm jarën to:

— Pahpãm mã me ato hõ ikwý nõ na me ato prãm. Na ri cute Jeju Crixto cukwa kam, ate ame to kên xà atajê cunea to hapac kêt, ne to tojnõ — hane. Ne Pahpãm te, ite mehcunea mã me ita jarën na, me imã hũjahkre.

Cu Jeju me ajpên kam me pahhõnco, na ri Pahpãm te me pahna amji caxàr

²⁰ Cwýrjapê pê Jeju harkwa na me iprar catêjê na me ipyxwý. Na wa me cumã me icakõc xà ata kam, ihhêj rũm Pahpãm ri me cumã ihcakõc, ne me ahna hàhwýr to:

— Me icurê xwýn itajê, cama amji na me ijamã, wa amji wýr me ato apkjê, ne me ato ikwý nõ, cu ajpên to me ikwý nõ, ne ajpên kam me pahhõnco — hane.

²¹ Pê nee Jeju Crixto jũ caxuw ampo kên ton nare. Ne nee kam ampo kên nõ incire hamreare cakrõ, mã Pahpãm te me pancwýrjapê to amji kam hapac to ihhêj rũm, cute mehkên ton catêjê nõ. Ne cu Jeju me ajpên kam me pahhõnco xà ata kõt ri, Pahpãm te me pahna amji caxàr, mãr cu ajpêan kam ame papa, quê ha ahna ihcajpuaw.

Cu pahtỳj Pahpãm te me pahto impejti xà ata na me amji to pøj

2 Corinti 6.1-18

⁶ Me ipê Pahpãm cahê na cumã me ijapên catêjê ita kam, wa ha me awý, mãr ca atỳj Pahpãm te hàhcaprĩa kam me ato impejti xà ata na me amji caxàr to impeaj ne. ² Ne pê ramã Ixaj xwý pê Pahpãm jarkwa na ihcakõc catê ata, ita na Pahpãm jarkwa kõt ihhõc to hane he:

“Wa, ate amji tehcajpar xà na me iwýr xà ata na, me akam ijapac prãm kam ikrĩ. Ne me apytàr xà jõ amcro ata kam, ite itỳj me apytàr” hane.

Mër hõhõ, me ikampa. He ita kam ri pahte me amji pytàr xà na, me Pahpãm na me pajàhwýr xà. He ita kam ri ramã pahte me amji pytàr xà jõ amcroa kam hàhhuc.

Pê Pawrõ cupê catyt kam Pahpãm mã hàpên catê na amji jarê

³ Wa ite amji kõt me jũm te catyt kam ipa intête mehcahpêrkàr cupate, wa catyt kam me ipa, mãr quê nee jũm, ite me ijapên xà ton to me ipa ata na, ihcakõc kên nare. ⁴ He wa itỳj quêt me ipê Pahpãm mã me ijapên catêjê itajê na me amã amji to me ipipê to me ipa. Gapacta ne me ikam me ato xa ne me ipupu he:

Wa itỳj ampo kên me, ite amji pupun kêanre me, ampo te amji wýr me ikrã jacjên itajê mã, itỳj me ijũcanãr to me ipa.

⁵ He hõtpê me icahhy, ne me ijacjê, ne me hàhtõa ne ihtỳj me ito kên prãmte me ikrã, ne ajpên wýr me icapõr to me ipa cakrõ, wa itỳj catyt kam me Pahpãm mã apê.

Ne wa itỳj me ijapên to tỳaj to me ipa.

Ne wa hanea ne itỳj me ijikwa ne me ijõt xà kaj na, Pahpãm mã mehcajren to me ipa.

Ne hanea ne prãm na ame ipa cakrõ, wa itỳj catyt kam Pahpãm mã ijapên to me ipa mã, me ijũcanãr to me ipa.

⁶ Ne wa ampo kên ton xà ata pê ampýa mã me ipa, ne Pahpãm te amji kam hapac xà ri quêt me imã hahkre pej to prãm.

Ne wa itỳj cute me ito kên catêjê atajê kam me icryc, mã me ijũcanãr to mentête amji jiprõn to me ipa. Ne quêt ijàhcaprĩa kam, catyt kam me to amji kam ijapac to me ipa.

Ne hanea ne ihtỳj Pahpãm Carõ Pejti te me imã amji jõr, wa ihkõat me ipa.

Ne hanea ne ihtỳj me imã mehcunea kĩn, wa mehkĩan kam me ipa.

⁷ Ne wa hanea ne itỳj me cumã Pahpãm jarkwa hêj xi nare ata jarën to me ipa.

Ne hanea ne itỳj Pahpãm carõat kõt, me ijapên xà pi-hhoti catia ton to me ipa.

Ne wa catyt kam Pahpām te amji kam hapac xà pejti kôt me ipa xà ita to me icurê xwÿn catêjê kam pra ne toa me cupê amji pytà, ne me tohjê.

⁸ Ne ite me amā, ite amji kam me ijapac xà na amji jarēn xà itajê, ihtÿj me ipê Pahpām jarkwa na cumā me iprar catêjê impeaj na me ijarê.

Mā mehkwy kwÿ ihtÿj me ito me icati, mā mehkwy me ito ijökrenō, ne me imā ipahàm to.

Mā mehkwy me ito mehçakôc to impejti, mā mehkwy me ito mehçakôc kêanre.

He me ito hajÿr çakrô, wa nee itajê nõ na me to amji kam me ijapac nare.

Ne me cumāa, me papê me pahhêj xi catêjê çakrô, wa itÿj catyt kam ihêj xi xà nare to icakôc to me ipa.

⁹ Ne me cumāa, nee me ipê jÿmjê catihti atajê nare çakrô,

mā me hàhtôa mā pjê cunea kam me ijahkre pej.

Ne me cumāa, wa ijôtpê amji to me ityc xà japên to me ipa çakrô,

wa itÿj me amji to me ipijapar to me ipa.

Ne ihtÿj me icahhyr to me ipa çakrô,

nee cute amji mā me hamār ne me iipej nare.

¹⁰ Ne me imā amji kÿn nare çakrô,

hōtpê Pahpām pyrên me ijakry.

Ne me ipê ampo hamreare çakrô,

wa itÿj ite, Pahpām te amji kam hapac xà to, me hàhtôa ne me to hakràj.

Ne me ipê ampo pê pjê ita tekjê jamreare çakrô, mā hōtpê me imā ampo pê çôjkwa tekjê atajê cunea.

Pê Pawrô hirã pê, ihcunea na, me cumā amji jarēn pa

¹¹ Corinti jō krÿ kam me ikjêjê itajê, wa ite nee ampo na me apê amji to ipimxur nare, ne quêt hirāa pê me amā ihcunea na me amji jarēn par. Ne itÿj imā me akÿnti ata to ite me amā ipipê. ¹² Ne imā me akÿan to me akÿn çakrô, mā nee ihhêj ne me amā me ikÿn nare. ¹³ Ne Jeju kôt ihhêj rÿm me apê me ikra pyràac. Ne imā me akÿnti ita jahpan xà na, hanea ne hipêr amā me ikÿn.

Cu ha nee me cupê Jeju na mehkwy nare atajê caca xà mā me paxàr nare

Epet 5.3-14; Tijac 4.4-5; 1 Petrô 4.1-6

¹⁴ Ne me apê Jeju to ate amji mā me ahimpej catêjê atajê, ca ha nee amji mā me Jeju to mehhimpej nare atajê me, me gâpên xà na ame ajpên par, ne ajwar, ajpên cahê na me gâpên nare. Ampo na? Quê ha pijamā jÿm krã impejti ne catyt kam ipa atajê me, jÿm krã kên ne amjia kôt ipa atajê me, ajpên cahê na me hàpên to me ipa? Hãpà! Jÿ wÿr quê ame amji mā hamā ne ajpên cahê na me hàpên to me ipa. He xà quê ajkÿ ihtÿj amcro me awcapàtkô ajcawwa? Hãpà! ¹⁵ He xà ajkÿ ihtÿj Jeju Cixtô me Xatanaj mā ajpên çajrēn? Hãpà! Me cupê ajpên curê xwÿn. Mēr hōhō, por jÿmjê amji mā Jeju to mehhimpej to me ipa atajê, quê nee Jeju to amji mā mehhimpej nare atajê me, ajpên kam me ihhônco nare, ne ajpên kaj na me ajpên kampa. ¹⁶ Quê ha pijamā jÿm Pahpām tÿr rohnÿtti mā ata jÿrkwa wÿr pahpām çahàc krekà tÿr nare ata to hÿrmā mō, ne kam hām? Hãpà! Jÿ wÿr quê Pahpām me, pahpām çahàc krekà ata apu amji mā hamā, ne ajpên kôt amji kam-pa. Mēr hōhō, Pahpām Carô Pejti me pajÿ çaxwām pê ihkrÿ ita kam, ihhêj rÿm me papê Pahpām tÿr rohnÿtti mā ata jÿrkwa pyràac. He pê Pahpām jarkwa to mehçakôc catêjê atajê me hàhtôa, ne ramā Pahpām jarkwa na, hō kàhhôc kam, ahna mehhôc to hane he:

“Wa ha itÿj me cahê na ikrÿ, ne mehcotea na apu ipa, ne pa amji to me hō Pahpām, quê ha me cupê me ikwÿ.

¹⁷ Na ca ha mehkra kên catêjê te Pahpām to amji mā mehhimpej nare atajê pê me acato,

ne ajtea me cupê ampÿa mā ame apa.

Ne nee ca ha mehkôt cute me ampo kên ton xà atajê nõ ton nare.

Ca ha me to hane, wa ha itÿj me ana amji çaxàr to impeaj ne.

¹⁸ Na wa ha me Apām Cati na amji to, ne me apê me ikra na me ato” hane.

Hōhō, pê Pahhiti mehcunea jirôa pê carôt tÿjti ata, me ana amji jarēn to hane.

CARATI

Ýhỹ, pê Pawrô pê Jeju jarkwa na memprar catêjê nõ, ne ma Carati jõ pjê kam Jeju na mehkwy mehkřĩ atajê mã, pom cu me hõ kàhhôc cahyt ita kujate. Na pê hõ kàhhôc japřy ita pê (Carati). Ne ihkàhhôc ita kam, cute me cumã ihhêj xi catêjê cawpa to hajřr he: “Nee hipêr me cute me Juta catêjê te amji kam me hapac xà wej tũm ata kôt me ipa xà nare. Jũ wřr quê Pahpãm pahte me pajapên xà impejti ton itajê kôt, me pahna amji capa. Ne jũ wřr quê me panquêtjê me, jũm caca xà kôt me papa xà ita kôt, Pahpãm me pahna amji capa. Ne Jeju to quêt amji mã me pahhimpej, ne kam me pahhônco, mã cute me pamã pahte amji kam me pajapac xà intuwti jõr xà ita kôt, quê ha Pahpãm me pahna amji capa” hajřr.

Pawrô te amji kôt harên xà

Me Hâpên Xà 16.6; 18.23

1 ¹⁻² Hàpà me ikwý pê Jeju na mehkwy, ca Carati jõ pjê kam ame akrĩ atajê. Ipê Pawrô, ne ipê Jeju jarkwa na iprar catê. Ne itea wa ijarkwa hyr, mã ijarkwa kôt cute me amã ihkàhhôc ita ton. Ne Jeju jarkwa na iprar xà ita caxuw nee jũmjê xũmre te me icapi nare, ne nee jũmjê xũmre kôt Pahpãm te icapi nare. Ne quêt Jeju Crixto me, Hũm pê Pahpãm te hacpã mã to ihtĩr ata me ri ajwar ijapên xà ita caxuw icapi. Ne ita ri Jeju kam ajpên to me pahte amji to me pahkjêjê kwý, icahê na mehkřĩ itajê te me amã amji jarên kujahêc.

³ Imã Pahpãm pê me pajõ Inxũ me, me pajõ Pahliti pê Jeju Crixto te me ato impejti na me ato prãm. Ne cute me acapřĩ, ne me acaxwãm pê me acaxwřn kam me amã me acarĩcti, impejti jõr to ipa na, imã me ato prãm. ⁴ He Pahpãm mã me pahcunea pê mehkên ton catêjê, cwřrjapê ri ihtỹj me pahkên mã me paxàr xà. Ne pê Jeju ihtyc mã amji gõ. Cute me pahkên mã me paxàr xà ata pê me pahto cator xà caxuw cumã amji gõ, mã me pancwřrjapê ihtyc. Mãr quê pjê kam, cute me amji kam hapac xà kên ita pê me pahto cato. Hõ, ita na pê me Pahpãm pê me pajõ Inxũ Cati ihkra pê Jeju Crixto to prãm. ⁵ Cwřrjapê ri imã amcro cunea kam me pahte Pahpãm mã me:

— Mehcunea jirõa pê quêt acatihti, ne apejti rohnỹtti mã — hajřr to prãm. Ampeaj kam!

Cu ha cute me pamã ihhêj catêjê par nare

Roman 16.17; Coroxo 2.8; 2 Petrô 2.1-3

⁶ Põhàpà! Mã ajte xãmte ramã me ate, pê Jeju hàc-capřia kam amji kôt Pahpãm wřr pry ata kôt me ana ahwý, ca ihkôt me amõr cahtiri, ramã ate me cumã hikran! Pê Pahpãm Jeju te amji kam hapac xà na ihkôt me amõr prãmte me ana ahwý, ca ihkôt me amõr cahtiri ihhêj ne ramã ate me cumã hikran! Ne ajte ita caxuw Pahpãm wřr ajteare mã, me amã jũm te amji kam hapac xà nõ ita kôt ame apa. ⁷ He xà ajkĩ ampeaj kam me Pahpãm wřr pry jàhtô? Hãpà! He Jeju te amji kam hapac xà ita pê ri pry pyxit peaj ata, Pahpãm wřr. Wa ite curi jũmjê itajê te Jeju te amji kam hapac xà têtê

ame girên to me ipa na me garên par. Ne cute me amã ampo to hahkre xà atajê kôt ri, me akrã cunĩ pit. Ne ihtỹj Jeju te amji kam hapac xà pejti ata to me amã ihhêj to me ipa. ⁸ He imã jũm te Jeju ràn xà na ajteare mã me amã ampo kên to hahkre catê atajê to, Pahpãm te Xatanaj jõ cuhy catia ata kam, mehkên mã me mên rohnỹtti mã na, me to prãm. Wa ha me ite mãn Jeju ràn xà na ajteare mã me amã ampo to hahkre na, wa ha itỹj Pahpãm te me ito kên na, imã amji to prãm. Ne quê cõjkwa pĩn Pahpãm mã memprar catê nõ wřr, ne Jeju ràn xà na, ajteare mã, me amã ampo to hahkre na, quê ha ihtỹj imã Pahpãm te cuhy catia ata kam ihkên mã mên na, imã to prãm.

⁹ He pê wa mam me amã ampo to hahkre, pê ca ahna me amji capa ata ràn xà na, xà wa ha ajkĩ hipêr ajteare mã ihkaj na me amã ampo to hahkre? Hãpà, wa ha hipêr me amã ite to hahkre xà atajê to pit mã hahkre. Ne quê ihhêaj to jũm ita, Jeju ràn xà na, ajteare mã me amã ampo to hahkre ata ri, imã Pahpãm te cuhy catia kam ihkên mã mên rohnỹtti mã na, imã me to prãm.

¹⁰ Ne por ame amã ihhêj to ipa, ca kam me akrã cunĩhti atajê ri, ito me amã ihhêj to hane he:

— Por Pawrô me amã ampo to hahkre atajê kôt hamreare. Ne ate mehkĩn prãmte ri ame amã ihcakõc to ipa — hane. Wa nee me ate me ikĩn prãmte ame amã icakõc nare, ne quêt Pahpãm te ikĩn prãmte, wa ame amã icakõc. Wa pjê ita kam ite amji to mehcajpuaw prãm na mã, wa ha nee cumã ijapên xà, pê Jeju mã iprar catê ita, mã ixàr nare.

Pê Jejua harkwa na imprar catê na Pawrô xãm

Me Hâpên Xà 26.9-20

¹¹⁻¹² He por atajê te hanea ne, pom ite me amã ampo to hahkre xà itajê, nee Pahpãm pĩn cator nare na me harê. Cwřrjapê Jeju kam me ikjêjê, wa ha ita cunea na me amã amji jarên to capô partu ne. He wa nee ite ikrãa kam ita to amji kam ijapac, ne ame amã harên nare. He nee jũm xũmre te me caxuw imã hõr nare, ne nee jũmjê te me caxuw imã ita to hahkre nare. Ne Jeju Crixto te ri imã itajê cunea jahkre pej na iton, ne imã ipër.

¹³ He pê ca ramã me ijarên pa, pê wa ajco mam Juta catêjê te amji kam hapac xà kôt ipa xà ata kam, pê wa ajco Pahpãm na mehwý jahkre kêt kam, ijãprêa kam ipa. Ne cute me amji pupun xà kêanre na me ton to ipa. Ne ajco ite me to hamre prãmtê ihcunea na me ton to ipa. ¹⁴ Ne pê wa amcro atajê kam, ajco me ikwý pê Juta catêjê te amji kam hapac xà kam, me ikwý pê ajkam me icati jirôa pê catyt kam, me iquêt xwý pê Mojxe te me hapackre xà kôt ipa. Ne pê wa ajco me iquêtjê caca xàa kôt, caxwãm catia mã, catyt kam ipa na ajco amji to ahcukij.

¹⁵ He pê wa cormã ipým nare kam, pê ramã Pahpãm hàhcaprĩa kam amjia kôt amji mã icapi, ne ina ahwý, cumã ijãpên prãmtê. ¹⁶ Wa ite mehcahkrit pê, por me cupê Juta catêjê nare atajê mã, Jeju jarên, ne ipêr prãmtê, pê Pahpãm imã ikra jahkre ne imã cupê. Ata caxuw pê wa nee jüm xümre wýr ipicahur nare, cute imã Jeju te amji kam hapac xà to hapackre prãmtê. ¹⁷ Pê wa nee hanea ne Krĩpinkrên wýr itêm, ne mam, icumam me cupê Jeju jarkwa na memprar catêjê atajê nõ cukij nare, cute imã Jeju te amji kam hapac xà to hahkre prãmtê. Ne ma cama Põcaprýhti jô pöti kam me hamreare ata wýr itêm pyrentu. Pê curia Jeju imã cute amji kam hapac xà to hahkre, jirô pê mã wa ma, Tamatcô jô krĩ wýr ite amji jaxår.

¹⁸ Ne pê wa Krĩpinkrên wýr itêm nare to amji to caku to incrê, jirô pê, pê wa cormã Petrô pupun. Ne cumã icakôc prãmtê Krĩpinkrên wýr tẽ, ne icato, ne curia cahê na amji to putwry jĩkjê to hamre. ¹⁹ Pê wa nee Jeju jarkwa na memprar catêjê nõ pupun nare, ne ite Tijac pê Jeju tõ te amji to hapu na kjê ata me, Petrô pit pupun. ²⁰ He ampeaj kam wa Pahpãm kam mare mã, me amã awjarẽ, pom wa ampo cunea to awjarẽ itajê, nee mã ihêj xi nare, ne ampeaj kam pê Jeju imã to hahkre. ²¹ Pê wa Petrô pupun jirô pê, ma Xiri jô pjê me, Xirixij jô pjê kam amehkrĩ atajê kwý kôt apu mõ.

Pê Jeju Pawrô te amji kam hapac xà cunea to antuw

²² Ne pê amcro atajê kam, nee Juta jô pjê kam Jeju Crixto na mehwý atajê me ijahkre pej, ne mento jĩa to me ipupun nare. ²³ Ne pê cama ajco me cumã me ijarên to hane he:

— Por pê Pawrô ajco Jeju to amji mã me pahhimpej têtê me pahcahpêrkà ata ri, ita caxuw ihtýj mehcuea mã, cute amji mã Jeju to mehhimpej na me ton to ipa — hajýr na cute me ijarên par. ²⁴ Ne cute me ijarên par xà ita kôt ri, ihtýj Pahpãm to amji mã me hàmnãn to me ipa.

Pê mam Jeju jarkwa na memprar catêjê atajê Pawrô pejti na harê

Me Hàpên Xà 15.1-11

² ¹⁻² Ne ina caku te cwatôxi jirô pê mã, Pahpãm te hacpýa mã Krĩpinkrên wýr itêm to imã hũjarên, wa ite impar, ne ma amji jaxår. Ne ma amji kôt Parnap me Tito pê Crec catêjê nõ ata me, me pra, ne curi me icator. Ne ite Jeju na mehwý jô pahhi catêjê pit me, me cuprôn, wa ite me cumã mehcahkrit pê Juta catêjê

nare atajê, mã Jeju jarên xà atajê cunea na, amji jarên. Ne ampo na wa ite cumã catyt kam amji jarên to hajýr? Ihtýj ame ite amji kam ijapac xà ita kôt hamreare na mehcamjĩ cupate, wa ite me cumã harên par. ³⁻⁵ Mã cute me, ite me cumã harên xà ita na me ipar, ne ahna me cumã impejti. Mã ikôt mehwý cator atajê te me cupê Jeju na mehwýa na me cumã amji jarên. Ne hamreare, imãa cama ame cumã mehhêj. Ne ampo na ri curi me cator? He cama cute ame ikôpĩr prãmtê, mõrmõ wa ajkĩ Juta catêjê te amji kam me hapac xà me, Mojxe xwý te me hapackre xàa kôt, ajkĩ me mõ. Mã cute ahna me ipupun prãmtê, curi me cator. Ne cute me ikôt mõr catê pê Tito pupun, mã nee cupê Juta catêjê nõ nare, na pê nee me ipê Juta catêjê caca xà kôt amji mã impy kà kwý jakep nare. Cwýrjapê ri me imã:

— Ampo na mã ca me pancaca xà to pahte me amji pyrác xà kôt, nee ate me Tito mã impy kà kwý jakep nare? Me imãa, me cupê Jeju na mehwý cunea te hanea ne ihtýj me panquêtjê te amji kam hapac xà to, cute me amji pyrác xà atajê cunea kôt me ipa xà — hajýr. Wa nee ite me kam ijapac nare, ne cama, ma ame amji pê cute amji kam me hapac xà ita cunea curê. Ampo na? He wa nee me iquêtjê caca xà itajê me, Jeju te amji kam hapac xà impejti ita to me ipicacwýr prãm nare. Ampo na? He Pahpãm te amji kam hapac xà impejti ita kôt ri, me apa na imã me ato prãm. Xà Jeju na mehwý jô pahhi catêjê atajê te ajkĩ Tito mã impy kà kwý jakep na, me imã hũjahkre? Hãpà! Nee cute ahna me imã hũjahkre nare!

⁶ Mã Tijac me, Petrô me, Jowãw pê Jeju na mehwý jô pahhi catêjê na cute me imã harên atajê te nee, ite ampo to ihcupan xà nõ mã cator nare. Na ri nee cute me, ite amji kam ijapac xà ita jirô pê, me imã ampo jarên, ne to mehhimpej nare. Ne me cupê Jeju na mehwý mã ihtýj amji mã me hũmre itajê cupa to me ipa, ne me ajpên mã:

— Pê me hũmre itajê mento jĩa to me Jeju pupu, cwýrjapê ri me hũmre cunea jirô pê me cati — hajýr. Wa nee ampo ita to amji kam ijapac prãm nare. Ampo na? He Pahpãm mã me pahcunea jahkre pej pejtu, ne cumã me pahcunea pipên pit. ⁷ Ne me cupê pahhi catêjê atajê mã ijahkre pej, Pahpãm te ite mehcahkrit mã, Jeju te amji kam hapac xà jarên catê na, cute ixãm na me ijahkre pej, ahna mã cute Petrô, pê me cupê Juta catêjê mã Jeju kôt harên catê na hãm he.

⁸ Pê Pahpãm mehcahkrit mã, ite Jeju jarên xà caxuw, imã ikrà kre te amji jahkre pej xà gõ. Ne hanea ne me cupê Juta catêjê mã Petrô te Jeju jarên xà caxuw cumã ihkrã kre te amji jahkre pej xà gõ. ⁹ Ne wa ite Jeju na mehwý jamãr catêjê atajê me, Pahpãm te me imã ijãpên xà jör ata na me ajpên par pej jirô pê mã ri, cute ahna Parnap me ijahkre pej, ne mehwý kam mare mã, cute me imã:

— He cu me pahcunea Pahpãm mã hàpên xà pyxit peaj ita to pit mã me apê. Ne me atekjê pê, mehcahkrit jô pjê kam me ipa atajê mã, ate me Jeju jarên xà. Ne me pa, wa ha me cupê Juta catêjê jô pjê kam ame

ipa atajê mã Jeju jarê. ¹⁰ Ne cormã ampo ata pyxit peaj ri, ate ton xà. Nee mã ampo nare, he ita ri Krĩpinkrên kam Jeju na mehkwý pê, me pahkwý kwý mehkrĩ itajê pê ampo hamreare, na ca ha ihmat ri pjê nõa kam, me pahkwý mehkrĩ atajê mã me harê, mãr quê me harên pa, ne ajpên me cumã ampo kujate — hajÿr. Wa ite me kam ijapac, ne me cumã:

— Imã ri quêt ita ton to prãam to prãm rohnÿtti mã — hane. Ne ite me ajpên par jirô pê mã, wa ma hacpÿ mã Antijoc jô krĩ wÿr me pra.

Pê Pawrô Petrô te to ihcupan xà jarê

Roman 3.21-23; 6.1-14

¹¹⁻¹² Ne jũ mã me ina amcro te, mã ma Petrô Antijoc jô krĩ kam me iwÿr tẽ, ne curi cute to ihcupan to hajÿr he. Pê ajco Petrô Antijoc jô krĩ kam, mehcahkrit pê Jeju na mehkwý cahê na ihkrĩ, ne ajco apà, me cupê Juta catêjê te amji kam hapac xà kaj na. Ne Pahpãm mã, nee ita na ihkaj na nare. Ampo na? He Pahpãm mã me pahcunea pipên pit. Mã Tijac cormã Krĩpinkrên kam ihkrĩ, ne cute Petrô wÿr jũmjê itajê kujahêc, cute me hõmpun prãmte. Mã curi me cator, mã Petrô te me hõmpun, ne taa amji mã:

— Wa ha mehcahkrit itajê cahê na ijàpàn kam to icrà, quê ha me hũmre itajê me ipupu, ne me amji jaxà, ne me ijarê, quê ha ahna me kam ipahàm — hajÿr. Na ri cute mehcahkrit atajê cahê na hàpàn jicu, ne me cupê ampÿa mã hÿr, ne ahte jÿ ne apà. ¹³ Mã hanea ne Antijoc catêjê kwý pê Jeju na mehkwý pê Juta catêjê te me hajÿr, ne cute me amji to caprãr, ne Petrô kôat, nee hipêr Jeju kam ajpên to mehkjêjê, ne mehcahkrit atajê cahê na ame hàpàn nare. Mã hanea ne Parnap te hajÿr, ne cute amji kam me hapac xà kên ata kôt, mehcahkrit atajê mã hikran.

¹⁴ Wa ite, cute me Pahpãm jô pry pejti ata cupan na, me hõmpun pyrentu, ne me kam mare mã, Petrô kuc ri, cute to ihcupan ita tẽte cumãn to:

— Pÿhàpà! He apê Juta catêjê nõa cacrô, ca nee ajte catyt kam ihcunea na Juta catêjê caca xà kôt apa nare! Mër ampo na mã ca Juta catêjê caca xà kôt mehcahkrit itajê ton to me apa to prãm? Nee ate me hajÿr xà hamreare! — hajÿr.

Pê Pawrô Juta catêjê mã ahna ihkôt harê

¹⁵ Ne curi me cupê Juta catêjê pê Jeju na mehkwý, me jÿ atajê mã, ite ihcunea na ihkôt harên to hajÿr he:

— He me pahpÿpÿm xà kôt ri, me papê Juta catêjê imepaj, ne nee me papê ampo kra cahkrit pê Pahpãm te to ihhimpej xà jahkre kêatre atajê kwý pyrãc nare.

¹⁶⁻¹⁷ He me pamã Pahpãm te, nee Mojxe xwÿ te me hapackre xà kôt me ipa atajê na, cute amji caxàr nare na, me hahkre pej. Ne quêt Jeju Crixto to amji mã mehhimpej xà ata kôt ri, Pahpãm me ahna amji to pøj. He me papê Juta catêjê me, mehcahkrit atajê me, me Pahpãm mã me pahcunea pê, me to ihcupan catêjê. Nãmri quê ha mehcahkrit atajê te amji mã Jeju to ihhimpej na, quê ha Pahpãm mã jũmjê atajê imejti ita na. Ne me papê Juta catêjê te me hajÿr. Na cu ha ha-

pac xàa kôt, me ajpên to me papicokjêr jicu, ne me Pahpãm te amji kam hapac xà pejti ita kôt pit mã me papa. Quê ha jũm ahna me pahpupu, ne me pamã: “Pÿhàpà, me imãa, ca ihhêj ne ate me Jeju Crixto te amji kam hapac xà ita cryc, me papê Juta catêjê te amji kam hapac xà jicu, ne ate me hũnãr, ne hamre ate me to ihcupan. Cwÿrjapê ri Jeju Crixto te, me ate me to kên na me aton” hajÿr. Me ikjêjê, he mehcahòc xà ita kêanre. Xà quê ha pijamã Jeju Hũm pê Pahpãm te amji kam hapac xà kaj na, me pamã ampo kên to hahkre? Hãpà! ¹⁸ Ita ri, imãa ihcupan he. Ca ha me pancaca xà kôt hamreare ata mã me hikra, ne imej wÿr me apkjê, ne ana ahtũm, ca ha hacpÿa mã, mam me acaca xà kôt hamreare ata wÿr me apkjê, ita na ri ihkaj na.

Cu ha nee jũ caxuw Jeju te amji kam hapac xà pejti jicu nare

¹⁹⁻²⁰ — Jũ wÿr cu ha me pahnõ Mojxe xwÿ jô kàhhòc kam, menquêtjê japackre xà cunea kôt, catyt kam me papa. Cwÿrjapê ri Pahpãm mã me pahcunea kêanre, ne ihhêj ne me papê jũmjê te ihkên ton jahpan xà na ihtyc to prãm atajê pyrãac. Cu ha ihcunea na catyt kam me papa na mã, quê ha nee me pancwÿrjapê Jeju ihtyc prãm nare. Na pê Jeju amjia kôt me pancwÿrjapê ihtyc mã amji gõ ne ty, na cu ha pahtÿj ihtyc xà ata kôt amji mã to me pahhimpej. Ne amji mã ihtyc xà ata to me pahhimpej xà ata pê ihhêj rũm cahê na me pahtyc. Cwÿrjapê cu ha nee hipêr, pahte amji to mehcajpuw prãm to ame papa nare. Na pê Pahpãm kra mã me pahkín, pê me pancwÿrjapê ty, ne cute me pamã amji jõr, ne me pahcaxwãm pê ihkrĩ, ne catyt kam ihkôt me papa xà caxuw, cute me pamã carôt jõr. ²¹ Ita kam, xà wa ha ajkĩ Jeju te amji kam hapac xà jicu, ne hacpÿa mã me iquêtjê te amji kam hapac xà wÿr apkjê ne hũnã? Hãpà! Wÿr wa ha hicu!

— Pê Pahpãm Mojxe xwÿ mã hõ kàhhòc kam Juta catêjê mã, cute me hapackre xà gõ ata, nee Pahpãm te ihkôt me pahna amji caxàr xà caxuw imej nare. Quê ha caxuw imej na mã, quê ha nee Jeju ihtyc prãm nare. Ne ampo caxuw ri imej? He cute me pahkên na me pajarên, cu pahte me hahkre pej, ne Jeju wÿr me papipkjêr xà caxuw ri imej. Ne Jeju pê Pahpãm kra ata kôt ri, me pahna amji to pøj — hane. Hõ, pê wa me cumã harên to hane.

Quê ha Pahpãm nee me pajapên xà imejti kôt me pahna amji to pøj nare

Carati 5.16-23; Tito 3.4-7

3 Pÿhàpà, ca Carati jô pjê kam me akrĩ itajê, ca ihhêj ne ame ato kam waj. Ampo na? He ihhêj ne me apê amji jahkre kêatre. He ihhêj ne jũm te me ato hy. Mãr pê wa hirãa pê me amã:

— Me pancwÿrjapêa ri pĩ kam Jeju tyc — hane na harê ta? Nõ na mã ca, Pahpãm te me ana amji caxàr prãmte hacpÿa mã menquêtjê caca xà wÿr ate me amji jaxàr? ² Xà pê ca Mojxe xwÿ caca xà kôt me apa xà ata kam, xà pê hõtpê ajco Pahpãm Carõ Pejti me amã amji gõ? Hãpà, nee pê me amã amji jõr nare. Ne quêt me

ate amji mã, Jeju jarën par ita kam, amji mã me to hajÿr, ne amji mã me to ahimpej xà kôt ri, Pahpãm Carõ Pejti te me amã amji jôr.

³ Pÿhàpà, ihhêj ne me apê mehkra nare catêjê pyrãc. He pê ca Jeju to amji mã me ahimpej kam me to atêm xà ata kam, pê Pahpãm me amã amji Carõ Pejti gô, mâr ca, carôat kôt, ihkôt me apa. Hô, pê ca amji mã me to ahimpej kam to atêm to hane. Nô na mã ca ita caxuw ihhêj ne Mojxe xwÿ caca xà wejti ata kôt, ate me to ihkrã curan to prãm to mã, ca hÿrmã me apipkjêr? Ne me carôat kôt mehkôt ame apa prãm. ⁴ He xà ajkî ihcaprÿ na Pahpãm Carõ Pejti te ramã me ate amji kam me gapac xà tuw pejti ato ipijapar to iryti to hajÿr? Hãpà, imã nee cute ahna hajÿr nare! ⁵ Pê Pahpãm amji Carõ Pejti kôt, ihcunea na, me amã ate amji jahkre pejti gô. Ne cute me akam hãpên xà catia ton atajê to, cute amji carôt to ipipê, mâr quê mehcunea me hõmpu, ne me akwÿ kam carôt ata jahkre pej. He xà ca ajkî, Mojxe caca xà wejti kam, ate me atêm xà ata kôt mã, ame ato hane? Hãpà! Ne mër ampo na mã cute me ato hajÿr? Nee mã ampo na nare, he me ate me Jeju jarën par xà ata to amji mã me ahimpej na ri, cute me ato hajÿr.

Pê Aprãw Pahpãm to amji mã ihhimpej, na pê ahna amji capa
Roman 4.1-25

⁶ Ca me iquêtxwÿ pê Aprãw to me amji japackre! He xà pê ajkî catyt kam ipa, ne nee jÿ caxuw ampo kên ton nare cwÿrjapê pê Pahpãm ahna amji capa? Hãpà. He pê Pahpãm Aprãw mã:

— Ate amji mã ito ahimpej, cwÿrjapê ri imã apê catyt kam apa catê — hane. ⁷ Cwÿrjapê ri mehcunea amji mã me Pahpãm to ihhimpej atajê pê Aprãw tãmxwÿa pyrãc.

⁸ Pê rÿ pêa mã Pahpãm amji mã:

— Wa ha itÿj jÿ caxuw pjê kam mehcahkrit mehkri atajê te amji mã ito mehhimpej xà ata kôt, me ahna amji capa — hane. Cwÿrjapê pê Aprãw xwÿ mã:

— Acwÿrjapê wa ha pjê cunea kam mehkri atajê cunea to impejti ne — hane. ⁹ Mã Aprãw te Pahpãm to amji mã hajÿr, cwÿrjapê ri cute ahna amji caxàr ne to impejti. Cwÿrjapê quê ha Aprãw cuxà mehcunea te Pahpãm to amji mã hajÿr na, quê ha ihtÿj Pahpãm me ahna amji to pøj, ne me to impejti ne.

Jÿ wÿr cu me panquêtjê caca xà kôt me papa kôt Pahpãm cajpuaw

¹⁰ Quê ha me pahnõ amji mã:

— Wa ha Mojxe xwÿ te me hapackre xà cunea na ihkôt amji kampa, quê ha Pahpãm ihtÿj ina amji capa — hajÿr na, quê ha taa, amji curê capa. Ampo na? He jÿ wÿr cu me pahnõ Mojxe te me hapackre xà cunea kôt hakop, ne nee ihnõ to gapac kêt nare. He pê ramã Pahpãm hõ kãhhôc kam amji mã Mojxe caca xà kôt me ipa catêjê crôn to hane he:

“Quê ha jÿm te, amcro cunea kam ite Mojxe mã ijarkwa jirên mã cute ahna ihhõc ata kam hapac nare na, wa ha itÿj apu kam icruc, ne apu cucrô. Quê ha cama pyxit peaj ne to hapac kêt cakrô, wa ha itÿj hahpan xà na apu to kên” hane.

¹¹ Pê ramã rÿ pêa mã Pahpãm jarkwa to ihcakôc catê japrÿ te Hapakuc ita Pahpãm jarkwa kôt hõ kãhhôc kam, ita na ihhõc to hane he:

“Quê ha jÿm ito amji mã ihhimpej na, wa ha to amji kam ijapac to, cupê jÿ caxuw jÿm te icuna mã ampo kên ton nare catê ata rohnÿtti mã.

Na wa ha itÿj ahna amji capa, quê ha icahê na icarôt kôt ihtÿar na ipa rohnÿtti mã” hane.

Ne cute harên xà ita kôt, cu ramã pahte me amji jahkre pej. He jÿ wÿr quê ha Pahpãm pahte Mojxe xwÿ te me hapackre xà kôt me papa xà ita kôt, me pahna amji capa. ¹² He Mojxe te me pajapackre xà ata, nee me pahte Pahpãm to pahte amji mã me pahhimpej na me pahton nare, ne ajte me pajapên xà na, pahte amji to me hajÿr na pit mã me pahto. Ampo na? Pê ramã Mojxe ampo itajê na Pahpãm te cumã amji jarën xà na, hõ kãhhôc kam ahna ihhõc to hane he:

“Quê ha jÿm te ite me cumã ijarkwa jirên xà itajê cunea to amji kam hapac to ipa, ne nee jÿ caxuw ihnõ to hapac kêt nare na, wa ha itÿj ahna amji capa, quê ha icahê na ihkri rohnÿtti mã” hane.

¹³ Nãmri quê ha me pahnõ te Mojxe te me hapackre xà ita jirô pê ihpÿm na, quê ha taa amji curê capa, quê ha Pahpãm ihkên mã cumê. Ne jÿ wÿr cu me pahnõ Mojxe te me hapackre xà atajê cunea kôt me papa. Cwÿrjapê cu ha me pahcunea Pahpãm mã me amji curê capa. Na ri Jeju te ita na me pajahkre pej, ne me pajaxà kam pÿ kam ihtyc. Ne ihtyc xà ata te ri me pahcurê pê me pahcaxàr. Ne Pahpãm jô kãhhôc kam, ramã cute ita na harên to hajÿr he:

“Ne por quê ha jÿm pÿ kam ajêt ne ty, ata to, pê Pahpãm ramã amji mã incrôn hiahpuro, ne toa cute curê mã mën” hane.

¹⁴ Ne mër ampo na pê Jeju pÿ kam ty? He nee mã ampo na nare, por pê Pahpãm Aprãw mã ampo catia to awjahkre ata, quê ha Jeju Crixto tyc xà ata kôt, hanea ne me apê mehcahkrit mã hõr xà. Mâr cu, me pahcunea, Pahpãm te me pamã Carõ Pejti to hÿjahkre ata cwa. Ne Jeju Crixto to pahte amji mã me pahhimpej cwÿrjapê, quê ha me pamã cugô.

**Pê Pahpãm ampo to hũjahkre ata, ampo cunea jirôa
pê irohnÿtti mã**

Roman 3.19-20; 5.20-21; 11.32

¹⁵ Jeju kam me ikjêjê, wa ha hirãa pê me amã ampo ita kôt harê, mãr ca me kam gapac to impeaj ne. Cu ha me pahno ajkrut ne ampo na ajpên pa, ne to amji mã awjahkre, ne ahna amji xãm jirô pê, quê ha nee jũm hipêr ampo ata to ipicamên ne to ipintuw nare. ¹⁶ Pê Pahpãm Aprãw xwÿ mã ihtãmxwÿ to awjahkre. Ne pê Pahpãm hõ kãhhôc kam, nee ita to hũjarên to: “Mehtãmxwÿ” hajÿr nare, pê nee me hàhtôa to hũjahkre nare, ne quêt Pahpãm hõ kãhhôc kam ita jarên to: “Ihtãmxwÿ” hane. Ampo na? He Aprãw xwÿ tãmxwÿ pyxit peaj pê Jeju Crixto ata to, pê awjahkre. Ne me papê Jeju kam pahte me ajpên hõnco catêjê mã ri, hanea ne cute to hũjahkre xà ata. ¹⁷ Ne ampo na mã wa ame amã ijũjarên to hane? Nee mã ampo na nare! Pê Pahpãm rÿ pëa mã Aprãw me, ihtãmxwÿ mã, ampo catia to awjahkre ata na, ramã caku jãhtô te cwatxênta ne ihkôt cute trînta jirô pê, pê Pahpãm Mojxe mã ajteare mã cute amji kam hapac xà gõ. Ne curmã Mojxe te me hapackre xà tuwti ita, quê nee rÿ pëa mã Pahpãm te Aprãw me amji ton na, me ajpên par xà ata to hamre nare.

¹⁸ He me amã ihhêj catêjê atajê ri me amã ihhêj to hane he:

— Cu ha nee Mojxe xwÿ caca xà ata kôt me papa nare na, quê ha nee Pahpãm me pamã cute ampo to hũjahkre xà ata jôr nare — hane. Ne cute harên xà ata hêj xia to hêj xi. Ampo na? Quê ha ita pê ampeaj kam mã, quê ha ihtÿj Mojxe te me hapackre xà ita, Pahpãm te amji kam hapac xà to, cute me pamã hũjahkre xà ita to hamre. Ne nee ita te hajÿr nare, ne cute Aprãw xwÿ mã to hũjahkre xà ata kôt, amjia kôt to impejti.

**Pê Mojxe jô kãhhôc ita, pahte me to ihcupan xà to me
pamã ajpê**

¹⁹⁻²⁰ Pê Pahpãm Aprãw me pit mã ajpên pa. Ne nee pê Pahpãm hÿrmã jũm kujahêc, pê cumã hũjarên nare. Pê Pahpãm Aprãw kuc ri cumã awjarê, ne cume ajpên pa. Ne Mojxe nare, pê nee Pahpãm to hajÿr nare. Pê cõjkwa kam cumã memprar catêjê mã, cute amji kam hapac xà ita gõ, pê ma Mojxe mã cugõ, pê ma Mojxe to me cupê Juta catêjê japackre. Ca ihhêaj to me anõ amji mã:

— Ampo caxuw mã Mojxe te me pajapackre xà ita pej? — hane. Ýhÿ, wa ha me amã harê. He mehcunea te Pahpãm te amji kam hapac xà jirô pê mehpÿpÿm na, cute me hahkre pej xà caxuw ri, cute me hapackre xà ita. Ne cute me hapackre xà ata to me amji japackre ita na, mã ahnaa Aprãw tãmxwÿ pê Jeju Crixto ata cator. Ne nee cute me Mojxe te me hapackre xà ata to pit mã, cute hipêr me amji kam hapac xà nare.

**Mojxe caca xà ita nee Pahpãm cahê na me papa na me
pahnton nare**

²¹ Ca ihhêaj to me anõ ita kampa, ne amji mã:

— Pÿhàpà, he ihhêj ne Mojxe te me hapackre xà ita, Pahpãm te Aprãw me ajpên par xà ata kaj na — hane. Co he! Nee ca amji mã harên to hajÿr nare. Ampo na? He Mojxe te me hapackre xà ita hõtpê impej cacrô, quê nee Pahpãm cahê na me pahtr rohnÿtti mã na me pahnton nare. Quê ha cute mãn me Pahpãm te me pahna amji caxàr na ton na, cu ha nee hipêr ihnõ na mehprãm nare. ²² He ramã Pahpãm te, me pahcunea te hõ kãhhôc kam pjê cunea kam, me pahcunea te me harkwa jirô pê me pahpÿm na, me pajarên. Ne me pahte amji kam me pajapac xà kêanre itajê pê ihhêj rÿm me pajõ pahhi, mã me pahcunea to ihhimpej. Ne ma me pahte ampo pej ton tète me pajiprõ. Ne cute me pajiprõn xà ita pê ihhêj rÿm cute me pahcajpre. Ne ampo kên ton na ri ihtÿj me pajamã. Cu ha quêt Jeju Crixto to amji mã me pahhimpej, quê ha me pamã me pahcajpre ata pô, cu ha pahtÿj Pahpãm te me pamã ampo pejti to hũjahkre ata cwa.

**Pê Mojxe te me pajapackre xà ita ri, Jeju cator jikaj xà
me pajamã**

Roman 10.4

²³ Ne mam Mojxe te me hapackre xà ata pê ihhêj rÿm krãhtarea, ne ma cute ampo kên ton tète me hiprõn to hãm ita kam, mã ahnaa Jeju cator, mã cute hũhkra mã me haxàr, mãr quê Jeju to amji mã mehhimpej. ²⁴ Ne pê ihhêj ne me cupê me ahkrarea, na pê Mojxe te me hapackre xà ata, cute me ampo kên ton tète, ma mehcahpêrkàr to ipa ita na, mã ahnaa Jeju cator. Mã cute to amji mã mehhimpej, mã Hũm pê Pahpãm te me ahna amji caxàr. ²⁵ Ne hamre, cu ramã Jeju to amji mã me pahhimpej ita kam, quê nee Mojxe te me hapackre xà ata me pahto ihhimpej nare.

**He Jeju kam pahte me ajpên hõnco, na ri me papê
Pahpãm kra**

²⁶ Ca Jeju Crixto to me ate amji mã me ahimpej, ne kam me ajpên hõnco, na ri Pahpãm te me acunea to amji kra. ²⁷ Ne me pahcunea te cõ to me amji cumrãr, me Jeju kam pahte me ajpên hõnco atajê pê ramã hũràac, ne cuxà cute amji kam hapac xàa kôt me papa. ²⁸ He Jeju kam ate me ajpên hõnco ita kam, ajpên kam me pahpyxit peaj. Cwÿrjapê ri Pahpãm mã, me ipê Juta catêjê me, me apê mehcahkrit me, me pahcunea pipëan. Ne me hõ pahhi catêjê jarkwa kôt cama me hàpên catêjê me, amjia kôt me hàpên catêjê me, me apipëan. Ne hanea ne me hũmre me, pyjê me, me apipëan, ne nee jũm pê ajteare mã nare. ²⁹ He me apê Jeju tekjê ita kam ri, Jeju kôt me acunea pê Aprãw tãmxwÿa. Cwÿrjapê ca atÿj, por pê Pahpãm Aprãw mã ampo to awjahkre ata, ca ha atÿj me acwa.

**Mojxe te me hapackre xà nee hipêr me pahto ihhimpej
nare**

Roman 8.14-17

4¹⁻² Ita caxuw, wa ha hipêr me amã ite ihkôt harên xà ata kôt harê. Xà quê ajkí jũm, ihkra incrire, ne nee cormã mehcapõn catê himpej xà kam ihkà nare, ne cormã amji jahkre kêatre ata mã, pijamã hàhcukrêj atajê cunea gõ, quê to hõ tekjê? Hãpà! Quê ha cama cumã:

— Apê ikraa to ikra, ne cama cormã acrire, ne ate amji jahkre kêatre. Na ca ha ma me acapõn catê krac ri axà, ne atýj ijapên xà na itehcajpar to apa, ne ihhêj rùm apê cama imã gápên catê. Ne jũ caxuw akà, ne amji jahkre pej, wa ha hacpý ne me acapõn catê pê gaprô, ne cormã amã ijahcukrêj gõ, mãr ca caa, amjia kôt hamãr to apa — hane.

³ He pê mam me papê hũmre kra ata pyrãac, ne pahte me amji kam me pajapac xà to pahte me amji pyrãc xà pê me pahcapõn catê te amji kam hapac xà ata krac ri ame papa, pê ajco taa, me pahto ihhimpej. Na pê cute me pamã ampo cawpa xà atajê hàhtôa to hàhtô, ne pê hanea ne ampo carõ te amji kam hapac xà atajê, ajco me pahto ihhimpej. Ampo na? He cu cormã nee me pahte catyt kam, Pahpãm jarkwa jahkre pej nare. ⁴ Mã Pahpãm te, me pahto cumã ihkra xũmre ata pyrãac, ne cute me pahcapõn catê ata pê me pahcaxàr, cute ahna amji mã amcro hyr xà ata na. Cwýrjapê pê, intête me pahcaxàr xà caxuw me pahwýr ihkra pê Jeju kujate, pê me hũmrea na amji to, ne Marij mã ihpým, ne Mojxe te me hapackre xà himpej xà krac ri ipa. ⁵ Mãr quê Mojxe te me hapackre xà nee me pah-to ihhimpej nare. Ne Jejua kôt, cu ha quêt Pahpãm krac ri me axà, ne ihkôt me papê Pahpãm kra, ne pah-týj amjia kôt ihkrac ri ame papa.

⁶ Mã Pahpãm te me pamã ihkra Carõ Pejti kujahêc, mã cute me pamã amji jõr. Mã Carõ Pejti ata me pah-caxwãm pê me pamã:

— Apê Pahpãm kraa to ihkra — hane. Ne hanea ne me pahcaxwýn caxwãm pê Carõ Pejti ita pahte Pahpãm cukij na me pahto, cu me cumã:

— Inxũ — hane. ⁷ Ne hamre, ita caxuw, nee me papê cama me hõ pahhi jarkwa kôt me hàpên catêjê nare, ne me papê Pahpãm kra. Ne me papê mehkra ita kam ri, ihtýj me pamã, cumã cute ampo pejti to hũjahkre atajê cunea gõ.

**Cu ha nee hipêr me panquêtjê te me to ihhimpej xà
kôt me papa nare**

Coroxo 2.16-19

⁸ Pê rý pêa mã, cormã nee ate me Pahpãm jahkre pej nare kam, pê ca ajco me aquêtjê te amji kam hapac xà pit to amji mã me ahimpej to me apa. Ne ajco me amã me carõ me, cupê jarôti me, ampo cawpa xà kên me, ampo cunea kwý cupaa to hũpa. Ne ajco atýj Pahpãm kaj na ampo to ame pahpãm. Mã pahpãm cahac atajê mã nee carôt nare. ⁹ Ne ita caxuw, nee cute hajýr nare. Ne me amã Pahpãm jahkre pej, ne

hanea ne Pahpãm mã me gahkre pej. Ne mër ampo na mã ca ajte hacpýa mã me aquêtjê te amji kam hapac xà kôt hamreare ata wýr ate me amji jaxàr? Ne ampo na mã ca ajte hipêr atýj ampo cawpa xà me, ampo carõ kên atajê to ame amji kampa, ne ame to amji japackre? Mã taa hacpý mã me ato ihhimpej, na ca ame amji mã to hane? ¹⁰ Ne atýj amcro kên cawpa xà jàhtôa to amji mã me ahimpej to me apa. Ne atýj me Juta catêjê jõ amji kín jàhtôa kôt me amji ton to me apa. Ampo na mã ca ame amji to hajýr to prãm? ¹¹ Côt mã ca me Pahpãm pê catyt kam ata te amji kam hapac xà jicu? Ca ha ate me hajýr na, wa ha itýj amji caxwãm pê ita na me ato po mã quê, ne imã amji kín nare, ne ipeacre ne. He xà pê wa ihcaprý na ajco me amã Jeju jarê, ne to hahkre xà catihtu to hahkre to ipa ata, xà ajkí ihkôt hamreare?

Pê mam ajco me Pawrô tehcajpar to catia

¹² Jeju kam me ikjêjê, pê ca mam ajco me ito impej ne nee rý jũ caxuw ate ito kên nare atajê, wa ha me apê ipyrãac xà na me awý. He pê mam ipê me apyrãac, ne me acuxà ampo cawpa xà atajê cunea kôt ipa. Ne ita caxuw ite ampo itajê cunea jicu, ne Jeju te amji kam hapac xà to pit mã amji kampa. Na ca ha ita caxuw me apê ipyrãac, ne me ampo itajê cunea jicu.

¹³ Xà ca atýj cormã ite mam me amã Jeju jarên xà ata to me amji japackre? He pê wa ixà, ne me acahê na ahtwý, ne jũ mã amji to amcro to ata kam, pê wa me amã Jeju te amji kam hapac xà pejti to hahkre. ¹⁴ Pê ca nee ixà kêanre ata kam me ina acprêc nare, ne me ito, ihhêj rùm, kýj rùm Pahpãm mã memprar catêjê nõ, nare, me ito me pajõ Pahhiti pê Jeju Crixto pyrãac, ne atýj ina me amji capa. ¹⁵ Ne pê ca atýj ajco, tee me atoa to pôj, ne me imã hõr prãm, ate me itehcajpar prãmte. Ne pê caxuw me amã ikín, ne ampeaj kam ipyrên me gakry. Ne mër jõ ri mã ita caxuw me gakryti ita? He ihhêj ne nee ita caxuw me gakry nare. ¹⁶ He pê wa nee jũ caxuw ame amã ihêj xi jarên nare, ne cormã me amã catyt kam to hahkre to ipa cacrô, ca caa ihhêj ne ipê me acurê xwýn na, ame ito amji kampa.

**Pê mehhêj xi catêjê Pawrô te amji kam hapac xà intête
me ta**

¹⁷ Mehhêj xi catêjê atajê hãn ne me amã ihhêj to:
— Ampeaj kam me imã akín, na wa itýj me gamã, ne me ato impejti to prãm — hane. Ne cama ame amã ihhêj, ne ite amji kam ijapac xà ita tète cute me ahyr, ca mehkoat amji kam me gapac prãmte ri ame amã ihhêj. ¹⁸ Pê wa curi ame acahê na imõr xà ata kam, pê wa me ate catyt kam me apa na me atehcajpa. Ne pom amcro itajê kam, wa nee curi apu imõr nare ita kam, quê ha ihtýj ijaxà kam jũm te me atehcajpar xà ata na imã impej. Ne cute me atehcajpar catêjê atajê, nee mempej nare. Ne cute me ato impejti xà ita to ame amã ihhêj, ne ite amji kam ijapac xà ita tète, cute me acaxàr to prãm to ri, ihhêj ne ame amã ihhêj.

¹⁹ Me apê imã ikra kīnti atajê pyràac. Wa ihhêj ne ipê me anã mã me axà, mã tee ame axà te cute amji cupên ata pyràac. Ampo na? He ca ha me apê Jeju pyràac, ne me apejti to prãm to, wa ha amji pupun to kêanre to ipa kam to icrà, ca ha ahnaa ihcunea na, catyt kam Jeju kôt me apa, quê ha cormã ikàj xà ata hamre. ²⁰ Jamã ne wa krãa me akuc ri jÿ, ne ajteare mã me amã icakôc xà nõ to icakôc. Wa itÿj me ato po mã quê, ne me ato pit mã amji kampa ita kam, ramã ikrà pictor tu ita kam, jũ mã wa ha ajte me ato.

Pê Mojxe cama jũm jarkwa kôt me pajàpên catêjê na me pahto

²¹ Por ca Mojxe jũjarên xà kôt me amji kam gapac to prãm atajê, me ikampa. Wa ha pa me amã Mojxe jũjarên xà ita kôt pahte amji kam me pajapac xà atajê jarê. ²² Pê Mojxe me iquêtxwÿ Aprãw jarên kôt me imã harê, pê Aprãw mã ihkra xũmre ajkrut. Ne pyxit ne cupê Ixamar, ne hīxi mã hàpên catê cahāj pê Hacakwÿj kam ihpÿm. Ne ihnõ ita pê Ixac, ne inxi pê Xarakwÿj pê Aprãw me hīxia kam ihpÿm. Ne pê Xarakwÿj pê nee cama jũm mã hàpên catê nare, ne ihtÿj apu ipa. ²³ Mã ihkīnte Hacakwÿj ita pê Aprãw me hīxi mã hàpên catê ata, pê Aprãw amjia kôt kam ihkra, pê mam cumã ihpÿm. Ne quêt Ixac to Pahpãm te hũjahkre xàa na pê, inxia kam ihpÿm. ²⁴⁻²⁵ Ne pyjê pijakrut itajê jarên xà kôt, wa ha me amã ita kam me pahte amji kam pajapac xà kôt harê. Ne pyjê pijakrut atajê, nee me ipipēnti nare, ne ajpēn pê ajteare mã me. Ne Pahpãm me, cute me ajpēn par xà te hajÿar, ne nee ipipēnti nare, ne ajpēn pê ajteare mã me. Hacakwÿj pê Ihcuhyt jō kēnti pyràac. Por pê Pōcaprÿhti jō pjê kam, Pahpãm Mojxe mã Juta catêjê caxuw, Ihcuhyt jō kēnti kam, cumã cute me hapackre xà jōr ata, mãr quê catyt kam ihkôt me ipa xà ata pê Hacakwÿj ata pyràac. Ne cama ame cumã me hàpên xà ata kôt Pahpãm te me ahna amji caxàr na to prãm catêjê caxuw ri harkwa ita. Ne ahnaa ita kam, Juta catêjê Krīpinkrên kam mehkrī atajê pê Hacakwÿj kra pyràac, ne cama me harkwa ita kôt pit mã ame hàpên to me ipa. Ne Pahpãm te me ahna amji caxàr prãmte, ihtÿj me hàhcawpa xà cunea kôt me ipa.

Pê Jeju pahtÿj ame papa na me pahto

²⁶ Ne quêt cōjkwa kam Krīpinkrên tuw ata pê Aprãw me hīxi ihtÿj apu ipa ata pyràac, ne cupê me pahnã pê Xarakwÿj ata pyràac. Ne me pahte Jeju to amji mã me pahhimpej atajê pê Xarakwÿj kra atajê pyràac. Ampo na? Ihhêj ne Pahpãm Carō Pejti kôt hipêr me pahpÿpÿm, na ri cupê me pahnã. ²⁷ Ne pê ramã Ixaj xwÿ Pahpãm jarkwa kôt, hõ kàhhôc kam ita na ihhôc to hane he:

“Por cormã nee jũm mã ihkra pÿm nare ata, gapacta ne gakryte acaràr, ne amã amji kīnti ne.
He quê ha ihtÿj, por me cumã mempjê atajê jirôa pê, quê ha jũ caxuw amã me akra hàhtô” hane.

²⁸ Měr hõhõ, me apê Jeju kam me ikjêjê atajê, he me apê Ixac pyràac, ne Pahpãm te me ato hũjahkre xàa kôt ri me apê Pahpãm kra. Me papê, por pê Pahpãm Aprãw mã ihtàmwxwÿ to awjahkre ata mã cu me. ²⁹ Ne caxuaw, pom amjia kôt me ajhu ita na pê Ixamar ihpÿm ata pê cama me cumã hàpên catê kra cacrô, ajco ihtÿj Ixac to Pahpãm jũjahkre, mã Pahpãm Carō Pejti kôt ihpÿm ata jahê. Mã cute amji pupun to kêanre xà caxuw pê ajco apu hahê. Ita jÿkjê na mã ita kam cute hajÿar he, ne menquêtjê te me hapackre xà kôt me ipa catêjê atajê, cama me papê Jeju kôt me papa catêjê jahê, cute me pahto kên prãmte. ³⁰ Ne pê Mojxe xwÿ ramã ita na Pahpãm jarkwa na hõ kàhhôc kam ihhôc to hane he:

“Ca ha ma jũ kam cama me hàpên catê ita kujate, ihkra mea mã.

Ampo na?

He wa ha nee cama me cumã hàpên catê kra pê Ixamar ata mã,

ite Ixac pê gīxia kra mã ampo to ijũjahkre atajê nõ jōr nare” hane.

³¹ Hõhõ me ikjêjê, he nee me papê, por cama hàpên catê ata kra pyràc nare. Ne quêt me papê Xarakwÿj pê Aprãw me hīxia kra ata pyràac.

5 Jeju Crixto te mam me panquêtjê himpej xà atajê pê me pahcaxàr, mãr cu pahtÿj ame papa.

Cwÿrjapê ca ha nee hipêr jũm himpej xà mã axàr, ne ihkrac ri apu apa nare.

Quê ha Pahpãm nee me pajàpên xà impejti kôt me pahna amji caxàr nare

Jowãw 8.32, 36

² Ÿhÿ, ipê Pawrô pê Jeju Crixto jarkwa na imprar catê, ne pa wa ha me amã awjarê, cwÿrjapê ca ha ikam me gapac to impeaj ne he. Ihhêj ne ramã Juta catêjê kwÿ me awÿr cator, ne cute me amã:

— Ca ha Mojxe te me hapackre xà kôt, cama amji na me ijamã, wa me amã me apy kà kwÿ jakep. Ampo na? Ca ha ate ita to hajÿr nare na, quê ha nee Pahpãm ana amji caxàr nare — hajÿr na. Ca ha nee kam me gapac, ne amji na me hamãr, quê me amã apy kà kwÿ jakep nare. Ampo na? Ca ha ate amji na me hamãr na, ca ha nee Jeju to pit mã amji mã me ahimpej nare. Quê ha me amã me pajō Pahhiti tyc xà ita kôt hamreare ne.

Pê Pahpãm amjia kôt me pahna amji capa

³ He wa ha hipêr me amã ita cawpa he. Ca ha me anõ te amji na me hamãr, quê ha cute me amã apy kà kwÿ jakep na, hamre, ramã ate Mojxe te me hapackre xà pyxit ne ihkôt amji ton, na ca ha atÿj ate ahpÿanre na ihcunea kam gapac to prãm xà. ⁴ Ca ha Pahpãm te me ana amji caxàr prãmte, ate me Mojxe te me hapackre xà ata pynãr na, ca ha ramã me Jeju Crixto mã hikra. He me atea ca me Pahpãm te hàhcaprīa kam, amjia kôt cute me apytàr jicu na me ton, mã cute me

gicu. ⁵ He nee me ite me hajÿr nare. He quêt me imã quê ha Pahpãm amjia kôt me ina amji caxàr na me imã hahkre pej. Ne quêt Pahpãm Carô Pejti carôt ri, Jeju to ite amji mã me ihmpej tÿj na me itehcajpa. ⁶ Cu ha Jeju Crixto na me ajpên hõnco ita kam, nee Pahpãm me, me papê ajpên pê ajteare mã nare, ne cumã me papipên pit. Ne me pahkà jakep me, me pahkà jakep nare itajê me, me Pahpãm mã me papipên pit. Ne cumã Jeju to me pahte amji mã me pahhimpej xà ata kôt ri me pamã ajpên kÿn, ata na ri cumã impej.

⁷ Pÿhàpà! He curmã ca Pahpãm kôt me aprôt kên nare ta? Ne ampo na mã ate amji na me jùm ita jamãr, mã cute me ato pry hyr, ca ate me pry hyr? ⁸ He nee Pahpãm te hõ pry ita tète me amên nare, ne ihtÿj quêt amji wÿr me amã akij. ⁹ He cu ha me pahnõ cuhkõn cahàc to cuprõ, ne hakõt, quê ha ihkrÿ ne hipõc ri ihnõ kam cõ, ne ihcacu, ne amji kôt ihkwÿ cunea to kên. ÿhÿ, ita jÿkjê na mã jùm te, Jeju te amji kam hapac xà kaj na, me amã ampo kên kryjre to hahkre xà atajê to me acunea to kên. ¹⁰ Ne jùm ata te me amã ampo kên to hahkre cakrõ, wa itÿj, nee ate mempar nare na, amji mã me ato hane. Ne imãa, ca ha me anõ te kam gapac, ne ihkôt amji ton na, ca ha hacpÿa mã ate amji jaxàr, ne hipêr Jeju te amji kam hapac xà impejti ata pynãr na, wa itÿj me ato amji mã hane. Ne por ame amã ampo kên to hahkre to ipa ata, quê ha Pahpãm ihtÿj cute me ato kên xà ata cwÿrjapê to ihtÿj tu ne.

Pê Pawrô nee jùm te impy kà kwÿ jakep to cumã hahkre nare

¹¹ ÿhÿ me ikjêjê, wa ha me amã amji jarê. He cute me amã ito ihhêj xi catêjê me amã hane he:
— Pawrô cormã mehcunea te mempy kà kwÿ jakep to me cumã hahkre — hane. Wa ha ite me cumã to hahkre to hajÿr na, quê ha nee Juta catêjê jõ pahhi kwÿ itajê ame ito kên nare. Ne mër ampo na mã ame ito kên? Nee mã ampo na nare. He wa mehcunea mã Jeju te pÿ kam me pancwÿrjapê ihtyc xà ata kôt Pahpãm te me pahna amji caxàr na harê, na ri ame ikam incryc. ¹² Ne por ame akrã to acto atajê, quê hapacta ne ihtÿj amji mã mehhy me incre cunea jakep hiahpuro, wa ha nee intête mehcahpêrkàr nare.

Cu ha ajpên to mempeaj ne

Jowãw 13.31-35

¹³ Jeju kam me ikjêjê, pê Pahpãm amji wÿr me pamã akij, mãr quê nee pjê kam jùm cute amji kam hapac xà to pahte amji kam me pajapac xà to ihmpej nare. Co he! Ca ha nee me anõ ate amji kam gapac xà tùm kên ata kôt apa prãmte, amji mã:

— Taa mã, jùm nee ito ihmpej nare ita kam, wa ha itÿj ite amji to amji cajpuaw prãmte, ite ampo ton prãm ata cunea to — hajÿr nare. Ne quêt amã me akwÿ kÿan kam, cute ampo na mehprãmti xà atajê to ca ha me. ¹⁴ Ne por Mojxe te me hapackre xà atajê, ca ha ihcunea to cuprõ, ne to pyxit peaj to hane he:

“Quê ha amã mehcunea kÿn hanea,

pom quê amãa amji kÿn he” hane.

Cu ha pahte me ajpên to hajÿr na, cu ha ramã Mojxe te me pajapackre xà atajê cunea kôt me ajpên to. ¹⁵ Nãmri ca ha me apê ampo kên pyrãc, ne cama ame ajpên curê, ne ajpên kam me atêm na, ca ha me caa me ajpên jipej. Cupate ca ha atÿj ate amji kam gapac xà na me amji kôpÿr to me apa.

Pahte mam amji kam me pajapac xà kên atajê pê Carô Pejti curê xwÿn

Roman 7.7-25; 8.1-11

¹⁶ ÿhÿ me ikjêjê, ca ha Pahpãm Carô Pejti te amji kam hapac xà tuw pejti ata kôt me apa na, ca ha nee hipêr ate amji kam me gapac xà tùm kên ata kôt me apa nare. Ne nee ate amji to amji cajpuaw prãmte, ate ampo ton prãm ata cunea ton to me apa nare. ¹⁷ Mam pahte amji kam me pajapac xà tùm kên ata me, Pahpãm Carô Pejti te amji kam hapac xà tuw pejti ita me, cupê ihhêj rùm ajpên curê xwÿn. Na ri ihtÿj ajpên cahpêrkàr to ipa. Na cu nee me pahte amji kam me pajapac xà pejti to me papa to prãm ata kôt me papa nare. ¹⁸ Cu ha pahte Pahpãm Carô Pejti to amji mã me pahhimpej na, cu ha nee hipêr me hàhcawpa xà me, me to ihmpej xà atajê to apu amji kam me pajapac nare. Ampo na? Nee hipêr cute me hàhcawpa xà ata me pahto ihmpej nare.

Mam pahte amji kam me pajapac xà tùm kên atajê te hajÿr

¹⁹ He me pahcunea mã hirãa pê mam pahte amji kam me pajapac xà tùm kênre te ampo kên cunea na me pah-ton na, pahte me amji jahkre pej. Itajê te hajÿr he:

Me pahnõ te me pahprõ kaj na ahti na me pyjê nõ caxun me, hanea ne pyjê nõ te impjên kaj na, ahti na jùm xùm-re caxun.

He ihhêj rùm me pahkwÿ pê rop pyrãac, ne pahte amji kam me pajapac xà kam me panxyre kam me pahpahãmti ton to ame papa.

²⁰ Ne hanea ne Pahpãm kaj na, pahnõ te amji mã me pahpãm cahàc krekà cupa me, pahte me pahkwÿ to hy to amji kam me pajapac to me papa me,

pahte me ajpên curê me, pahte me pajarkwa to ajpên mãn kên me, pahte me pajõxy to me papa me, pahte ajpên kam me pancryc me, amji to pit mã amji kam me pajapac to me papa me, pahte ajpên cuna mã ame amji jakrã me,

²¹ pahte ajpên jÿ na ampo kÿn me, pahkõm ne me papipãn me, amji kÿn kam, me kam mare mã me pahkõm catia me,

me ampo kwÿ jàhtõa pê itajê pyrãcti atajê me.

ÿhÿ, he mam pahte amji kam me pajapac xà tùm kên itajê, ihtÿj pahte ampo kên itajê cunea ton na me pah-

to, cu ton to me papa. Ne pom ite mam ramã me amã ampo cawpa atajê, wa ha hipêr me amã ihcawpa. He cute me ampo kêanre itajê ton catêjê, quê ha nee jũ caxuw Pahpãm himpej xà krac ri hàr, ne catyt kam, cumã amji kinti jakryti kam ipa nare.

Pahpãm Carõ Pejti te amji kam hapac xà tuw pejti atajê te hajÿr

22-23 Ne quêt Pahpãm Carõ Pejti te amji kam hapac xà ajteare mã. Quê ha me Pahpãm Carõ Pejti te me pamã amji jõr na, cu ha me pahte ampo pej pit ton xà itajê te hajÿr he:

me pamã ajpên kinti me,
me pajakryti me,
ajpên mã me pampejti ne me pahcarĩcti na me pahkrĩ me,
ampõ te me pahto kêr mã me pajũcanãr me,
ajpên mã me pahcaprĩ me,
pahte me ajpên to impejti me,
cute amji mã me pahto hajÿr me,
ajpên mã me ampejti me,
ampõ kêr têtê pahte me amji jiprõn to me papa me,
cute amji mã ampo na prãm atajê na amji jamãr peaj me.

ÿhÿ, Pahpãm Carõ Pejti ihtÿj pahte ampo pejti ton xà itajê cunea na me pahto, cu me ton to me papa. Na ri nee jũm xũmre te me hapackre xà te ampo pejti ita têtê me pajiprõn xà hamreare. 24 Ne me papê Jeju Crixto tekjê atajê te, ramã ihhêj ne mam me pahte amji kam me pajapac xà tũm kêr atajê cunea jipej, mãr cu nee hipêr ihkõt ame papa nare. Na cu ha nee hipêr me pamã ampo kêr ton prãmte atajê na me amji jamãr, ne me ton nare.

Cu ha Carõ Pejti te amji kam hapac xà tuw pejti ata kõt me papa

25 Ne me Pahpãm Carõ Pejti ata pê me pajõ Pahhiti, cu carõat kõt me papa. Mã taa, me pahto ihhimpej, ne pahte ampo pejti ton na me pahto, cu ha me ton to me papa. 26 Na cu ha nee ajpên jirõa pê amji to me pahcati prãm nare. Cu ha pahte me hajÿr na, cu ha cama me ajpên cyt kam tẽ, ne cama ajpên jũ na amji to prãm kam me tẽ.

6 ÿhÿ, me ikjêjê, quê me akwÿ nõ ihhêaj to ampo kêr to, ca ahna me hõmpu, ne me apê Pahpãm Carõ Pejti to ate amji mã me ahimpej catêjê atajê, mehthecajpa, quê ampo kêr ton jicu, ne ihcuhtac, ne catyt kam ampo pejti ton to ipa. Ne ate me hapackre xà ata kam, ca ha amji mã me aprĩ akam, me hapackre. Ne hanea ne ma amji to me guphê, cõt ca hanea ne mehkõt ampo kêr ton kam tẽ. 2 Ne ca ha atÿj me ate amji kam gapac xà kam ampo te me ato kêanre atajê to ate ajpên mã mehcajoc na me ajpên tehcajpar to me apa. Cu ha pahte ajpên to me hajÿr to me papa na, cu ha ramã me Crixto te me pamã harkwa jirên xà atajê kõt me amji kampa. 3 Quê ha jũm te amji to ihcakõt to:

— Wa me hirõa pê icati, ne ipej — hane, ne nee cati ne impej nare xà ata kam ri, taa ramã apu amji to amji mã ihhêj to ipa. 4 Na cu ha ahpÿanre na, pahte amji kam me pajapac xà na me amji kõpĩr to me papa. Na cu ha me pahnõ te pajapên xà impejti ton na, cu ha pahtÿj hũrên me pajakrya, ne cu ha nee amji mã:

— Wa ite itajê jirõa pê ijapên xà impejti ton — hajÿr nare. Ne quêt cama amji mã:

— Wa ite ijapên xà impejti ton — hane. 5 Na cu ha ahpÿanre na, me pajũrkwa caxuw me amji kampa, ne pahtÿj me amji japên xà to me pajapên to me papa. 6 Ne cute me amã Pahpãm jarkwa to hahkre catê ata, ca ha ma me hamã, ne ma cumã, amã ampo atajê to ajcokjê.

Jũ wÿr cu ha me pahnõ Pahpãm mã pahhêj

7 Ca ha nee me anõ amji mã ahêj nare! Jũ wÿr quê jũm Pahpãm mã ihhêj. Xà cu me pahnõ pajõ pur kam, pãnkryt xÿ pit kre, quê pijamã kam hàn nÿre nõ cato? Hãpà! Quê ha hÿ pit hapõj. Ita jĩkjê na, cu ha pahte amji kam me pajapac xà kêr to pit mã amji kampa, cu ha nee hahpan xà na ampo pejti pyr nare, ne hahpan xà na ampo kêr pit cwa. Jũ wÿr cu pahte ampo kêr ton xà ata kõt, me Pahpãm mã me pahhêj, cute me pamã ampo pejti jõr prãmte. Cu pahte ita to amji kam me pajapac na, cu ha me paa, ramã, amji mã me pahhêj. 8 Cu ha mam pahte amji kam me pajapac xà tũm kêr ata pit kõt me papa na, cu ha ramã Pahpãm kaj na ampÿa mã ame papa, ne me ty, ne me acto rohnÿtti mã. Ne cu ha quêt Pahpãm Carõ Pejti te amji kam hapac xà tuw pejti ata kõt me papa na, cu ha quêt Pahpãm cahê na me pahkrĩ rohnÿtti mã.

Cu ha nee me ampo pejti ton jicu nare

9 Cu ha nee me ampo pejti ton to mehkĩn hi nare, ne pahtÿj pahte ampo pejti ton xà ata kam me awcanã. Ne hahpan xà na, quê ha Pahpãm me pamã ampo pejti gõ. 10 Ne atÿj ate mehcunea mã ampo pejti ton na, ca amji to ahcukij. Ne Jeju kam me pahkjêjê to, ca ha me hirõa pê impej.

Pawrõ me pancwÿrjapê Jeju tyc xà ita to pit mã apu ihcakõt

11 Ita caxuw, wa ha ijũhkra to me amã ihhõc, ca me hõmpu. Mã ihhõc cati pit he, mãr ca me ijahkre pej, nãmri pa wa me amã ihhõc.

12 Ne por me amã ihhêj catêjê atajê ri, cama amji to ame hàmnãn to me ipa. Ne Jeju te amji kam hapac xà kaj na me amã harên to:

— Ca ha apy kà kwÿ crire ne hakep xà ata kõt, quê ha Pahpãm ihtÿj ana amji capa — hane. Me pajõ Pahhiti curê xwÿn te ame to kêr cupate ri, nee me amã:

— Pĩ kam me pancwÿrjapê Jeju tyc xà kõt, quê ha Pahpãm me pahna amji capa — hajÿr nare. 13 Ne cute mempy kà jakep xà ata to me amji kam hapac to me ipa cakrõ, nee me Mojxe xwÿ te me hapackre xà cunea kõt me ipa nare. Ne mẽr ampo na mã ame amã apy kà

jakep prām? Nee mā ampo na nare. Cumã cute me hũnār catêjê jàhtôa na, cute amji to me hãmñãn prãmte ri ame hane. ¹⁴ Ne pa nare, wa quêt me pancwÿrjapê me pajõ Pahhiti Jeju Crixto tyc xà ata to, wa mehcunea mã, ijàmñãn to ipa. Ne por Jeju te amji kam hapac xà curê xwÿn te amji kam hapac xà itajê, nee icajpuaw nare. Na ri me imãa, cute amji kam me hapac xà itajê pê ampo tyc kro pyràac. Ne hanea ne ite Jeju kôt amji kam ijapac xà ita, nee me hũmre atajê cajpuw nare. Na ri me cumã ite amji kam ijapac xà ita pê ampo tyc kro pyràc, ne ihkêanre. ¹⁵ Ne Pahpãm mã, jũm te amji kà jakep ata me, cute amji kà jakep nare atajê pipên pit, na ri me ipijakrut itajê na, nee Pahpãm te amji caxàr nare. Cu ha Pahpãm te amji kam hapac xà kôt me papa na, quê ha me pahcunea to antuw, ne me pahto intuw. Cu ha me papê curmã ampo tuwti ata, quê ha cormã me pahna amji capa.

Pê Pawrô Pahpãm mã mehkwy cajrën pej

¹⁶ Ne wa itÿj Pahpãm mã me acajrën to hane he:

— ÿhÿ me Ijõ Inxũ, wa cute, ite me hapackre na me ipar atajê mã, wa ha ana ahwÿ, ca me caxwÿn caxwãm pê me cumã acarĩcti gõ, mãr quê nee cumã ampo hũpa nare. Ne ca ha me akwÿ cunea caprĩ, ne me to impej — hane.

¹⁷ Hamre, he nee hipêr imã, ramã ite me amã ampo jarën itajê jarën prãm nare. Wa ramã ite ita cwÿrjapê amji pupun to kêanre, ne pom ijĩ kam apu icaxõti itajê, ramã ipê Jeju mã ijapên catê na ijarê. He nee ipy kà jakep xà caxõ ata, ipê Pahpãm tekjê na ijarën nare. Ne quêt ite mehcunea mã Jeju jarën cwÿrjapê jũm te icah-hyr jaxà kam caxõ, ita ri quêt ipê Pahpãm tekjê na ijarê. Na ri nee hipêr jũm te, ite amji pupun xà kêanre na iton xà hamreare. ¹⁸ Ne imã me pajõ Pahhiti pê Jeju Crixto te amjia kôt, me apê me ikjêjê itajê cunea to, cute impej na to prãm. Taa mã, hamre.

EPET

Ýhÿ, pê Roman jô krí kam, me hacjên xà kam Pawrô ihkrí, ne Jeju na mehkwy mã ajco hõ kàhhôc kujate. Na pê Epet jô krí kam, Jeju na mehkwy jakrã mehkří atajê mã hõ kàhhôc ita kujate. Na pê hõ kàhhôc ita japry pê (Epet).

Ne hõ kàhhôc ita kam ri cute Jeju kôt me ipa catêjê pê Jeju jãa pyrác na, me cumã harên ne to hahkre. Ne pom cu amjia kôt me amji jĩ jamãr to me papa, ita kôpit na mã, ihtÿj Jeju me papê mehkwy pê hĩa pyrác ata jamãr to ipa. Ne pom me pahkrã me pajĩ to ihhimpej to ipa ita na mã, Jeju me papê mehkwy to ihhimpej to ipa, pjê ita kam.

Pawrô te amji jarên xà

Me Hápên Xà 18.19-21; 19.1-40

1 Hàpà me ikwy pê Jeju na mehkwy, ipê Pawrô, ne ipê Jeju Crixto jarkwa na iprar catê. Ampo na? He Pahpãm pê ita caxuw icapi. Na wa Epet jô krí kam, me apê Pahpãm na mehkwy atajê mã, apu ihhôn. Ne ca atÿj Jeju Crixto to ate amji mã me ahimpej, ne ajpên kam me ahônco kam me to acrà ita na.

2 Ne imã me pajô Inxũ Cati pê Pahpãm me, me pajô Pahhiti pê Jeju Crixto te me ato impejti na me ato prãm, mãr ca nee ame ampo kên cupa nare, ne ihcãmtà rûm me acaxwÿn me, me gĩ cunea cuhkrit pej pëa mã me apa.

Pê Pahpãm ramã cute pjê ton xwÿjrea na amji mã me pahcapi

Roman 8.28-30; 1 Petrô 1.2

3 Cu ha Pahpãm pê me pajô Pahhiti pê Jeju Crixto Pãm pyrên me pajakryti na cumã me amji jarê. Ampo na? Cu cõjkwã kam me pajô Pahhiti pê Jeju Crixto kam me pahhônco tu ita kam, ramã cute ampo pejti cunea to me pahto impejti. **4** Pê pjê ton xwÿjrea na, ramã Pahpãm Jeju kam pahte me ajpên hônco, ne me papê hõ tekjêa xà caxuw, amji mã me pahcapi. Mãr cu kam pahte amji kam me pajapac xà impej pit, ne Pahpãm kam mare mã me pahkam, ampo kên hamreare ne. **5** Ne Pahpãm mã me pahkín cwÿrjapê pê mam, rÿ pëa mã, ramã ihcãmter pê Jeju Crixto kôt me pahto amji kra xà caxuw amji mã me pahcapi, ne ahna amji to. Ita na ri cumã me pahto prãm to prãm na pê to hane. **6** Pahpãm kínte, ampo caxuw me pampej nare cakrô, mã amjia kôt cumã me pahkín. Mã hàhcjãrënti kam cumã ikra kínti ata kôt, me pahto impejti pyrên me pajakryti na, cu ha cumã me amji jarê.

7-8 Ne pê mam me papê ihhêj rûm pahte me Pahpãm to new catêjê. Ne pahte me to kên xà ita kam ri, cute me hacjên xà kam me pajacjên, cu kam me pahkrí. Pê Jeju pê me pahkritxwÿa, ne me pajaxà kam ty ne caprô jaxwÿ. Ne cute caprô jaxwÿr xà ata to pê me pahkên jahpan xà na Pahpãm mã amgõ, mã cute me pahkên ita to tojnõ, cu pahtÿj ame papa. Hõ, pahte

me Pahpãm to kên itajê cunea ri, cute to tojnõ, ne hicu to hajÿr. He ampeaj kam Pahpãm jãhcjãrën cati, mã ihtÿj amjia kôt cama me pahto impejti to ipa, ihkrã kre te amji jahkre pejti kôt. **9** Ne pê mam nee jũm Pahpãm te amji kam hapac xà jahkre pej xà hamreare. Ne cur mã ri Pahpãm te ihkra pê Jeju Crixto kôt me pamã amji to ipipê to prãm to ri, cute ihkujahêc. **10** Ne cute amji kam hapac xà pimxur jahkre kêatre ata te hajÿr he. Quê ha Pahpãm ihtÿj jũ caxuw cute amji mã amcro hyr xà ata na, cute pjê me cõjkwã kam ampo cunea ton itajê cunea to cuprõ, ne Jeju mã cugõ, mãr quê cupê hõ pahhi, ne to ihhimpej to ipa rohnÿtti mã.

11 Ne hamre, Pahpãm te mam ramã amji kam hapac xà ton atajêa ton partu, cute amji mã ihkín xà ata na. Ne Jeju kam pahte me ajpên hônco xà ita kam ri, cute amji mã me pahcapi, ne me pahto amji kwÿa. Ne pê ramã ita to amji kam hapac hiahpuro, ne cumã ahna to prãm, na ri cute ton. **12** He me ipê Juta catêjê, pê wa mam amji mã me iprãa kam, Jeju Crixto pê me itehcãjpar catê na me hikaj kam me tẽ. Cwÿrjapê wa Pahpãm mã me amji jarên to hane he:

— Me ijô Inxũ Cati, he ampeaj kam ate me ito kênre nare, na ri me imã acati pê ihhêj rûm ampo jãhcjãrohti ata pyrãac, ne ampeaj kam apej! — hane.

13 Ne pê hanea ne ite me amã Jeju pê me pahkên pê me pahpytãr catê na harên to prãm to, pê Pahpãm amji mã me icapi. Ne ite me amã harên xà ata, ampeaj kam ri. Na pê ca me ikampa, ne ite me amã harên xà to amji mã me ahimpej kam tẽ. Ne pê Pahpãm me pahcunea mã Carô Pejti to awjahkre ata, pê me amã amji gõ. Ne cute me amã amji jõr xà ata, ihtÿj me apê hõ tekjê na me garê. **14** Ne pê Pahpãm Carô Pejti ramã me papê hõ tekjê mã ampo jõr na amji ton hiahpuro ata, quê ha ihtÿj me pamã cugõ, ne ampeaj kam cu ha pahtÿj me pahkên pê me pahcato. Cwÿrjapê cu ha me pahcunea Pahpãm to me amnã ne cumã me hane he:

— Ampeaj kam acati! — hane.

Pawrô te me hūrên hakryti na, Pahpām mā amji jarēn xà

Roman 12.3-8; Epet 4.11-16; Coroxo 1.9-12

15-16 Ýhỹ, me ikwỳ, pê wa me ate me pajō Pahhiti Jeju to amji mā me ahimpej na me garēn pa. Ne hanea ne me amā me akwỳ cunea pê Pahpām tekjê atajê kîn na me garēn pa. Ne ite me garēn par xà ata caxuw, wa nee me apyrên, ite cumā ijakryti na, amji jarēn jicu nare. Ne wa ijōtpê Pahpām mā me acajrēn to ipa to hane he:

17 — Ýhỹ Pahpām, apê me ijō Pahhiti pê Jeju Crixto Pām pê ijō Inxū Pejti ata, wa ha awỳ, ca ha Epet jō krī kam me ikwỳ mā Acarō Pejti te amji kam hapac xà pejti gō, mār quē cute amji jahkre pejti, krā kreti kôt me hirōa pê, cute me gahkre pej na me to. ¹⁸ Ca ha hirāa pê me cumā ampo pejti incrê itajê to hahkre, mār quē me gahkre pej pejtu ne. Ne mam, ate amji mā me capi, mār quē amji mā mehprīa kam jū caxuw cōjkwa kam acahê na amji to me ipijapar rohnýtti mā. Ne hanea ne me cupê atekjêa, na ca ha cōjkwa kam amā gâhcukrêj jãhtô catia ita kam, gōtpê amji mā me to imej to catia to apa.

¹⁹ — Ne hicu xà ita kam ca hanea ne acarôt týtji catihti to, me ite amji mā me ato ihimpej atajê tehcajpar to imeaj ne. Hō, ampo to ate me cumā hahkre xà itajê to, ate me cumā hahkre xà ita na, wa ana ahwỳ — hane.

²⁰ Ýhỹ me ikwỳ, he por Pahpām carôt te me pahtehcajpar ata te ri hacpýa mā Jeju Crixto to ihtír. Ne carôt ita to ri cute cōjkwa kam amji cahê na, awpôc rûm hýr xà ata kam hýr. ²¹ Ne cute to ampo cunea jō Pahhiti, me paxûmre me, me pajō pahhi catêjê me, me carô cunea me, ampo carô pej me, me pahcurê xwýnti carô kên me, me hō pahhi catêjê me, cupê jarôti me, ampo cunea carôt týtji mea mā. Ne pom me hō pahhi itajê cunea jirôa pê carôt týtj ita na apu ipa. Pjê ita me, cor-mā hapua na pjê ata kam, cupê pahhi ita na apu ipa rohnýtti mā.

Me papê Jeju na mekwỳ pê hĩa pyrâc

²² He ampeaj kam ri Pahpām te ampo cunea jō Pahhiti na, ihcãmter pê Jeju xãm. Ne hanea ne cute me pahkwỳ krā na hãm, mār quē taa me pahto ihhimpej. ²³ Ne ihkrã kre te amji jahkre pejti ita kôt ri me papê hĩ, mā cupê me pahkrã. Na ri me pajĩ kam me pahcukrã xà cunea, ne nee ihnō jamre nare. Na cu ha pjê cunea kam cumā me pajapên to me papa.

Pê Pahpām amjia kôt me pahkên pê me pahto cato

Roman 3.19-24; 5.6-11; Tito 2.11-3.7

2 Ýhỹ me ikwỳ, pê ca mam me acunea ajco me akên ton to me apa, ne ajco Pahpām jarkwa jirô pê me apýpým to me apa, cwýrjapê ri cumā me apê mehtyc pyrâac. ² Ne caku atajê kam pê ca pjê kam, cute amji kam me hapac xà atajê to pit mā me amji pyrâc. Ne ate Xatanaj pê me pahcurê xwýn carô kên

atajê jō pahhi te, Pahpām jarkwa jirô pê mehpýpým xi atajê to, pê ca ajco amji mā me ahimpej to me apa. ³ Ne pê mam me pahcunea pê me hūrâac, ne ajco amjia kôt pahte amji kam me pajapac xà kên atajêa kôt, me papa. Ne me pajĩ me, me pahkrã te amji mā ampo na ihprãmti atajê pit ton to me papa. Ne ihkôt me papa xà ita kam, cu me papê mehkên catêjê atajê pyrâac, ne ma ramã me cuxà Pahpām te pahte me amji pupun xà kêanre na me pahton xà ata wýr me pra.

⁴⁻⁵ Ne me pajūpar nare ita kam, ihhêj rûm ramã Pahpām mā me pahtyc par. Ne Pahpām mā me pahkîn catia, ne ampeaj kam cumā me pahcaprí. Cwýrjapê ri cute Crixto kôt ihhêj ne hacpýa mā me pahto ihtír. Xà mōrmō ajkĩ me pampej cwýrjapê mā, cute me pahkên catia pê me pahto cator? Hãpà! He hàhcajrēan to hàhcajrēn na ri amjia kôt, cute me pahkên catia ita pê me pahto cator, ne me pahto imej. ⁶ Pahpām te Jeju Crixto kam me pahhônco na me pahton. Cwýrjapê ri ihhêj rûm hacpýa mā ramã cute me pahto ihtír, ne ma cōjkwa wýr me pahto hàpir, ne Jeju cahê na me pajýr, ne cahê na cute ampo cunea to me pahhimpej na me pahton. ⁷ Ne mēr ampo na mā cute me pahto hajýr? He nee mā ampo na nare! He pjê cunea kam ame ipa itajê, quē ha ita caxuw Pahpām me cumā hàhcajrēnti, ne ma me pahcaprí na me hahkre pej. Ne cute me pamã Jeju kôt me pahto imej na, me hahkre pej na cumā me pahto prãm, rohnýtti mā.

⁸ Xà cu Pahpām mā ampo pej pit ton to ame papa na mā, cute me pahkên catia pê me pahto cator? Hãpà! He Pahpām te amjia kôt, me pahtehcajpar prãmte, me pamã ihkra pê Jeju jör, mār cu to amji mā me pahhimpej, quē ha amjia kôt cama me pahpytà. ⁹ Ita cwýrjapê quē ha nee jū caxuw jūm amji to hàmnãn to:

— Ite amji kam ijapac xà imejti, ne ijapên xà imejti ita jahpan xà na ri, Pahpām te ikên pê ito cator — hajýr nare. Jū wýr quē ha jū caxuw jūm amji pej na amji to hàmnãn to hane. ¹⁰ Ne mēr ampo cwýrjapê mā pê Pahpām me pamã pahte amji kam me pajapac xà tuw pejti ita gō, ne pjê kam me pahto ajpa? Nee mā ampo cwýrjapê nare. He ramã Pahpām te Jeju Crixto kam me pahhônco na me pahton, pahte jūmjê to me pajapên to imejti to prãmti to me papa xà caxuw. Por rý pêa mā cute me pamã hàpên xà pejti to me pajapên na, me pahto amji kam hapac ata to, cu ha me apê. Cwýrjapê cu ha pahtýj ajpên to imejti to me prãm.

Juta catêjê me, mehcahkrit atajê me ajpên hônco xà

Carati 3.28; Coroxo 1.21-23; 1 Petrô 2.4-8

¹¹ Wa me ipê Juta catêjê hãn ne me ajhu, ne itýj amji mā me ipy kà kryjre ne me hakep. Ne hakep xà ata pê ri Pahpām tekjê na cute me ijarēn xà. Ne me apê mehcahkrit pê Juta catêjê nare atajê na, ca amji to me amji japackre. Ne pê wa mam ajco me ato amji kam ijapac to:

— Itajê mā mehkà Jakep nare, na ri nee me cupê Pahpām tekjê nare — hane. ¹² Ata caxuw pê ca caku atajê kam Jeju Crixto pê ampýa mā ame apa. Ne pê

Pahpām rỳ jũ caxuw me amã ampo to hũjahkre nare na mã, ca nee rỳ me icuxà Pahpām me, me ajpën kam gapac nare. Na pê me apê Pahpām tekjê nare, ne me apê Pahpām jahkre kêatre ita kam, ca nee amji wỳr ihpĩn ampo pejti cator xà ata jikaj nare. ¹³ Ne ita caxuw quêt nee hipêr ate me hajỳr nare, ne Pahpām pê ampỳa mã ame apa xà nare. Ampo na? Nee mã ampo na nare. Pê Jeju Crixto me gaxà kam ty ne caprô ajxwỳ, ne ihtyc xà ata kôt, ca ate kam me ajpën hõnco. Cwỳrjapê ri Pahpām te amji wỳr me ato hàhtêp.

Quê ha Pahpām me cupê Juta catêjê me, mehcahkrit na amji capa

¹⁴⁻¹⁶ Mã Jeju te mehcuran catêjê mã amji jõr, mã cute mehcuran, mã me pajaxà kam ihtyc. Ne ihtyc xà ata te ihcunea na ajpën na me pajaxôr to hajỳr he. Cu ha nee hipêr ajpën kam me pancryc nare, ne quêt catyt kam ajpën mã me pahcakôc to me papa. Quê ha hanea ne, nee hipêr me iquêtjê pê Mojxe xwỳ caca xà ata, me pahto ihhimpej nare. Ne nee hipêr me acahkrit nare, ne nee hipêr me papijakrut nare, ne quêt ajpën kam me papê Pahpām na mehkwy pyxit peaj, ne ajpën kam me pantuwti, ne me pahpyxit peaj. Ne hacpỳa ne Pahpām wỳr me pahcunea te amji jaxàr. ¹⁷ Ne cute me apê mehcahkrit atajê, ca ampỳa mã Pahpām pê ame apa atajê me, me ipê Juta catêjê, pê wa hũ na pire mã ame ipa atajê to hacpỳa ne Pahpām wỳr me amji jaxàr. He pê nee jũm ajpën na me pajaxôr na harên nare. Pê Jeju ajpën na me pajaxô. ¹⁸ Ne pom Jeju te me papijakrut mã ampo ton itajêa kôt, cu ha pahtỳj Pahpām Carô Pejti pyxit peaj ata kôt, ihwỳr me axà, ne cumã me pahcakôc.

¹⁹ Cwỳrjapê ri ita caxuw, nee hipêr me pahno te amji to ihcahkrit xà hamreare. Ne quêt me icuxà me apê Pahpām kraa to kra, ne me apê mehkwy, ne ajpën kam me papê mehkwy ita na, ne me pahpyxit peaj.

Me papê Pahpām na mehkwy pê hũrkwa pyrâac

²⁰⁻²¹ Por mam Krĩpinkrên kam, Pahpām to amji kam hapac xà jũrkwa ata kam pê Pahpām ihkrĩ. Ne cute me Pahpām jahkre pej prãmte, pê ajco ma kën me pĩ te ikre ata wỳr me pra. Ita kôpit na mã, me papê mehkwy pê Pahpām jũrkwa pyrâac. Ne ita caxuw me pahkam Pahpām ihkrĩ, ne me pahkôat ri me cumã Pahpām jahkre pej. Ne me papê Pahpām jũrkwa mã hikwa xà me, hiwryhhi me, pô me hõrti pyrâac. Ne pê mam Jeju jarkwa na memprar catêjê me, Pahpām jarkwa to me cumã mehcahkrit catêjê atajê pê ihhêj rũm, harã na ikre mã hũxwỳr xà me, cumã hũxwỳr xà cati pyrâac. Ne Jeju Crixto pê ri ikre mã hãm xà catia ata pyrâac, mã tahna ihhê cunea te cuprõn tu. Ata jĩkjê na mã me papê Pahpām jũrkwa, mã me pahkam ihkrĩ. ²² Ne ate me hajỳr ne atỳj Jeju to ate amji mã me ahimpej xà atajêa kôt ri ihhêj rũm me apê Pahpām jũrkwa, na ri Pahpām ihtỳj Carô Pejti ata kôt me akam ihkrĩ.

Me cupê mehcahkrit mã ri Pawrô pê Pahpām jarkwa na imprar catê

Roman 15.14-21; Coroxo 1.24-29

³ Ata kôt wa itỳj Pahpām mã me acajrên to ipa. Ýhỹ, ipê Pawrô, ne pa wa me hacjên xà kam ikrĩ. Ampo na? Wa Jeju Crixto jarkwa kôt me apê mehcahkrit atajê mã Jeju pê me pahkritxwỳ jarên xà impejti itajê to harê, ne me amã to hahkre. ²⁻³ Ne pê Pahpām hàhcaprĩa kam icapi, ne ijĩa to me acaxuw ihhimpej to hane he:

— Mõ, ne mehcahkrit catêjê mã ijarê. Ne nee mã ampo na, ca ha me cumã ijarên nare. He wa hacpỳa mã cute me ajpën hõnco, ne ajpën mã me caprĩ na ri, imã me to prãm. Cwỳrjapê pê wa pjê ita wỳr me cumã ikra pê Jeju ata kujate. Ata ca ha me cumã harê — hane. Ne pê ca ramã ita na me ijarên pa. Na wa ite curmã ihkãh-hôc ita kam hipêr ahna me amã amji jarên, ne ahna me amã ihhêc, mār ca me cahyt ne ahna me ijahkre pej.

⁴⁻⁵ Pê mam nee jũm Jeju Crixto na Pahpām te amji kam hapac xà ata jahkre pej nare. Ne ita caxuw Pahpām Carô Pejti te Pahpām jarkwa to mehcahkrit catêjê me, me ipê Jeju jarkwa na memprar catêjê mã to ajpê, ne me imã to hahkre. ⁶ Ýhỹ, ita caxuw ca ha Jeju tyc xà ata kôt, me icuxà me apê me pajô Pahhiti pê Jeju Crixto jĩ pyrâac. Ne me ca, me apê mehcahkrit atajê me, me pa, me ipê Juta catêjê me, ajpën kam me pahpyxit peaj. Ne por pê Pahpām ramã mehkwy mã ampo pej cunea to awjahkre atajê, ca ha atỳj hanea ne me cuxà me acwa.

⁷ Pê Pahpām carôt tỳjti ata hàhcaprĩa kam, me amã ipê harkwa na iprar catê na ixãm ne ikujate, mār wa me amã harên xà impejti to harê. ⁸⁻⁹ Ne wa pa, me cupê Pahpām tekjê atajê japyre mã icrire na amji to hajỳr cacrô, pê Pahpām ihtỳj imã ijãpên xà impejti ita gô. Ite me apê mehcahkrit atajê mã Jeju Crixto te amji kam hapac xà tuw pejti jarên xà kôt harên to capô partu xà caxuw, pê imã ijãpên xà ita gô. Por Jeju te amji kam hapac xà impejti jakràjti ata, wa me amã harên to ipa. Mār ca me acunea Pahpām te mam pjê ton xwỳjrea na, me amã amji kam hapac xà to ipipê nare ata jahkre pej. Ne Pahpām ita pê, por pê Pahpām ampo cunea to ata. ¹⁰ Ne ita caxuw cumã, mehacunea te Pahpām te amji kam hapac xà jahkre pej na, me to prãm. Ne quêt ha, por ampo carô carôt tỳjti atajê me, pjê me côjkwa kam me hõ pahhi catêjê atajê cunea, quêt ha me papê Pahpām na mehkwy pupun xà ata kôt, me Pahpām te ihcunea na amji jahkre pej catia na me hahkre pej. ¹¹ Pê mam, pjê ton xwỳjrea na, Pahpām ramã Jeju Crixto pê me pajô Pahhiti te me pahto imej na to amji kampa. ¹² Cu pahtỳj Jeju to amji mã me pahhimpej, ne ahna me ajpën hõnco. Cwỳrjapê cu ha nee Pahpām mã me pahcakôc na me pajãhtat nare kam, cumã me pahcakôc. Ne cu ha pahtỳj cute me pahkam hapac na me hahkre pej. ¹³ Ýhỹ, he me acwỳrjapêa wa me hacjên xà ita kam amji pupun cacrô, ca ha nee ate me ipupun xà ata kôt me amã amji kĩn nare

nare. Ne quêt ite me ato impejti xà caxuw ri, ite amji pupun kêanre xà ita.

Pawrô te Pahpãm mã mehcajrën xà

14 Ampo itajê cunea cwýrjapê wa me pajô Inxũ Cati cuna mã ikôn krâ na ijýr, ne ijôtpê cumã me acajrën.

15 Ampeaj kam Pahpãm pê me pajô Inxũ Cati. Ne cupê pjê cunea me, cõjkwa kam ampo kra me, ikre ry cunea me, por amji mã me to ihhimpej atajê cunea Pãm Cati. 16-17 Wa hõtpê cumã me acajrën to hane he:

— Me ijô Inxũ Cati, ampeaj kam acarôt tÿaj to ihtÿj, ne gâhcajrën cati. Na ca ha Acarô Pejti kôt, cute me amji kam hapac xà caxwãm pê me cumã acarôt tÿjti ata gõ, por ate amji kam gapac xà pejti carôt tÿjti ata kôt. Mâr quê kypê Jeju Crixto to amji mã mehhimpej nare. Ne ajpën kam mehônco ata pê ihhêj rûm me caxwãm pê cute apu ihkrî. Ne pom ampo pâr pjê impejti kam harê to ihcuhhê, ne ihtÿj ipicamën to ipa, ita kôpit na, ca ha me cumã mehcunea mã ajpën kinti ita to apicamën to mõ. Ne ampeaj kam akra Jeju mã me ikîn catia, ne nee cumã jûm kîn nare nare.

18 — Ne akra pê Jeju mã me ikîn ita pê ihhêj rûm kënti kâa nõ ata pyrâac, ne cupê ihhêj rûm cõxwa tua pyrâac ne catia, ne ihhêj rûm cupê põti pyrâac, ne nee hîcu xà hamreare. Ne ampo pejti catihti itajê jîkjê na mã, akra mã me ikîn te hajýr. Na ca ha me caxwãm pê me cumã to hahkre, mâr quê mehcunea mã akra mã mehkinti ita te, amji kam hapac xà itajê jahkre pej pa.

19 — Jũ wýr quê me ixûmre nõ akra Jeju mã me ikinti xà catia to cati ata na hahkre pej, cwýrjapê ca ha cute Jeju Crixto mã ikinti itajahkre pej na me akwý tehcajpa, quê me kam hapac kam tẽ, ne me hahkre pej. Mâr ca me cumã amji gõ, quê me cupê apyrâac to mõ, ne mempejti ne.

20 — Ýhÿ me ijô Inxũ Cati, me ikam acarôt tÿjti ita kam, ca atÿj me imã, pom ite ampo na me awýr, ne me to amji kam ijapac xà atajê jirôa pê ate me imã hõr na, imã me gahkre pej. 21 Ne me imã me icunea pê Jeju Crixto na mekwý, ne wa ahna me ajpën hõnco. Ne wa acatihti me acarôt tÿjti me, gâhcajrënti na apyrën me ijakryti na, me amã amji jarën to prãm, rohnÿtti mã. Ne tahnaa, hamre — hane. Hõ, wa ita na ijôtpê Pahpãm mã me acajrën.

Me papê mekwý pyxit peaj, na cu ha ajpën to mempej

Pirip 2.1-4; Coroxo 3.12-17

4 Ýhÿ me ikwý, pê Pahpãm me ato impej ne amji mã me acapi, mâr ca cute amji kam hapac xàa kôt me apa. Ne ita cwýrjapê wa me awý, he Pahpãm jâpên xà incwýrjapê wa ipê me hacjên xà kam ikrî catê. Ne pa wa me awý, mâr ca me apê Pahpãm tekjê atajê, cute amji kam hapac xàa to amji kam me gapac to me apa. 2 Ne nee me hirôa pê amji to me acati to me apa prãm nare. Ne ampo na amji mã apría kam, gũcanâr to me apa. Ne amji mã me akwý cupa. Ne nee ampo na ame amji to ihtÿj tu to me apa nare. Quê jûm ampo to kên, ca ha nee kam me acryc nare. Ne quêt me amã

ihkîan kam, me gakryti kam cumã me gũcanâr to me apa. 3 Pahpãm Carô Pejti te me acunea mã ajpën kinti ton, ne ajpën kam me apejti na me aton. Cwýrjapê ca ha ajpën mã me awcanã, mâr ca atÿj ajpën kam me ahõnco to me apa kam me to acrà.

4 Xà ajkî Pahpãm Carô Pejti te amji kam hapac xà jâhtô? Hãpà! He Pahpãm Carô Pejti pyxit peaj. Cwýrjapê ri ajpën kam me pahcunea pyxit peaj. Ne ihhêj rûm me papê Jeju jî pyxit peaj ata pyrâac. Ne hanea ne pjê ita kam Pahpãm te me pahcunea to ihhimpej xà pyxit peaj ata mã, cu ramã me hikaj xà caxuw ri Pahpãm te me pahcapi. 5 Ne hanea ne me pamã me pajô Pahhiti pyxit peaj. Ne pahte Jeju to amji mã me pahhimpej xà ata pyxit peaj. He ampo pyxit peaj ita caxuw ri cõ to me pahcumrâr xà. 6 Ne hanea ne Pahpãm pê, por pjê cunea kam amji mã me to ihhimpej atajê cunea jô Inxũ Cati pyxit peaj, ne mehcunea to ihhimpej. Mã ihtÿj hãpên xà atajê kam ihkôat me apê, ne me Pahpãm ita ri me pahcunea kam ihkrî, cwýrjapê cu ha pahte amji kam me pajapac xà pyxit peaj to, amji kam me pajapac to me papa kam me to pancrà.

Pê Pahpãm ahpÿanre na me pamã pahte to amji japackre xà gõ

Roman 12.3-8; 1 Petrô 4.10-11

7-8 Xà Pahpãm te me pahcunea mã pahte me hahkre pej xà pyxit peaj jõr? Hãpà! He cumã me pajâpên xà caxuw ri, cute ahpÿanre na me pamã pahte amji kam me pajapac xà te to amji japackre xà jõr, Jeju Crixto te amji mã ahna prãm ata na. Ne pê Pahpãm jô kãhhõc kam, ramã rÿ pêa mã jûm Jeju na ihhõc to:

“Quê ha me curê xwýn jâhtôa ne tohjê, ne ma hacpÿ mã cõjkwa wýr api.

Ne pjê kam mekwý ame ipa atajê mã cute ampo jõr xà atajê gõ” hane.

9 Hũjarën xà ita kôt, cu ha pahtÿj cõjkwa wýr Jeju jâpir na me hahkre pej ne me to amji japackre. He pê nee Jeju põ rûm, pjê ita wýr pit mã iwryc nare, ne hanea ne pjê krac ri mehtyc carô krî xà ata wýr wrÿ.

10 Ne taa hanea ne hacpÿa mã cõjkwa wýr api ne hakren tu, cute ampo cunea to ihhimpej xà caxuw.

11 Ne Jeju te ri ahpÿanre na, me pamã pahte amji kam me pajapac xà te amji jahkre pej jõr par. Ne cute me pahkwý capi, mâr quê me cupê harkwa na memprar catêjê, ne mekwý pê harkwa to me cumã ihcakõc catêjê, ne mekwý pê Pahpãm te me pahkên pê me pahpytâr xà ata wýr me to ipipkjêr catêjê, ne mekwý pê Jeju na mekwýa jamâr catêjê, ne mekwý pê mekwýa mã ampo to hahkre catêjê. Ne Pahpãm te mekwý atajê mã ahpÿanre na cute me amji kam hapac xà te amji jahkre pej atajê jõr, me hãpên xà itajê caxuw.

Cu ha pahte amji kam me pajapac xà to me amji jĩ tỳj to me mõi

¹² Ne mër ampo caxuw mã cute me pamã mehkwy itajê jör? He nee mã ampo caxuw nare. He Pahpãm mã me pajapên xà ata pê ihwyr me to me papipkjêr xà caxuw ri, cute me pamã mehkwy itajê jör. Ne me pajapên xà ita kôt ri me papê mehkwy, cu pahtỳj me papicamën to me mõi. Ne me pamör xà ita pê ihhêj rüm Jeju Crixto jĩ picamën to mõi pyrãac. ¹³ Ne cu ha me pahcunea me papicamën to me pamör ita kam me to pancrà, ne Jeju Crixto to pit mã amji mã me pahhimpej to ajpên kam me pahhõnco tỳaj to me papa. Mã cu Jeju cuxà, pahte amji kam me pajapac xà itajêa to me amji kà to me amji jĩ tỳj to me mõi.

¹⁴ Ne cu ha nee hipêr me papê ahkrare pyrãc, ne jũm te me pamã ihhêj xi xà ata kôt, Jeju to amji pê me pajapac kêt to me pamör nare. Nãmri quê ha me pahnõi te hajyr na, quê ha cupê ihhêj rüm kôc te amji wyr pjê kam pĩhõ incrà to imprar ata pyrãac, na quê ha ihtỳj mehhêj xi catêjê te aracri mehkên mã me irên prãm atajê kampa, ne ihtỳj jũ ri me ipa xà ata kam ihkôt me ipa. ¹⁵ Ne Pahpãm mã cute me hajyr catêjê kôt, me pahto prãm nare. Ne quêt cumã me pamã ajpên kĩnti kam me pahcakôc xà kam, me pahhêj xi nare na, cumã me pahto prãm. Cu ha pahte me hajyr to me pamör na, cu ha me papê me pahkrã pê Crixto ata pyrãac ne me ajpêan. ¹⁶ Ne Crixto pê me pahkrã, cu ha kam me pahhõnco, cwyrjapê quê me papê hĩa pyrãc. Ne ahpÿanre na me papê hĩ kam cukrã xà atajê pyrãac, mã taa pyxit peaj me pahcunea to ihhimpej. Ita kôpit na cu ha me pahcunea Crixto te amji kam hapac xàa kôt me ajpên kĩnti, kam me ajpên tehcajpar to me papa. He pahte me pahkwỳ to me hajyr to me papa xà ata pê Jeju Crixto jĩ te ipicamën to mõi pyrãac.

Cu ha quêt me pahte amji kam me pajapac xà tuw pejti ita kôt me papa

Coroxo 3.5-11

¹⁷⁻¹⁸ Cwyrjapê wa ha Pahhiti jarkwa na me amã awjarê, ca ha atỳj catyt kam me ikampa. Por nee Pahpãm to amji mã mehhimpej nare atajê te amji kam hapac xà atajê wa ha me amã ihcawpa, mãr ca nee hipêr cute me amji kam hapac xà kên atajê kôt me apa nare. He cute amji kam me hapac xà itajê kôt hamreare. Ne ihhêj rüm me cupê awcapàtkôti kam ame ipa, ne nee me ampo pupun nare atajê pyrãac. Ne nee me caxwãm pê me Pahpãm pupun ne me hahkre pej nare. Ne cute me hajyr xà ita kam ri ma ame Pahpãm te amji kam hapac xà tuw pejti ita caca, ne cute mempar cupate me hapac jihê, na ri me cupê hahkre kêatre. ¹⁹ Ne nee ajte amji jũ na mehpahàm nare, mã mãnea mã mehkã kên kam, cute mehkên ton xà itajê kam me amji cajpêr nare na me to. Mã mehcunea ampo kên xen xà pahàm nare atajê mã, me amji jör to me ipa, ne ihtỳj me ton to me ipa kam me to incrà tu.

²⁰⁻²¹ He nee Jeju Crixto te amji kam hapac xà te hajyr nare. Ne pê ramã jũm me amã Jeju te amji kam hapac

xà to hahkre, ne me amã harê. Na ca ramã ate mempar ne me hahkre pej, ne kam me amji hõnco, cwyrjapê ca ate amji mã me cute amji kam hapac xà incwyr. ²² Ne mam me amã ampo kên ton to me ipa xà ata pit na me amã prãm. Cwyrjapê ri ate amji kam me gapac xà tũm kêanre ata ihtỳj me amã ihhêj, na ca hãn ne atỳj ihkôat me akên mã me acjêj. Cwyrjapê ca ha mam ate amji kam me gapac xà tũm ata mã me hikra, ne nee hipêr me ahna prãm, ne me to amji japackre nare. ²³ Na ca ha me ate amji kam me gapac xà wej ita me, intuw to me apha, ne ate amji kam me gapac xà intuw ata, ca ha amji mã me huwahi to me apa. ²⁴ Ne pom cu hãn ne me pahkà tũm to pøj, ne intuw mã me amji jacjê, ne mehtũm jicu ne me curê, jĩkjê na, ca ha ate amji kam me gapac xà kên tũm ita to me tojnõi, ne me hucu, ne intuw ita ca ha amji mã me acwa, ne me huwahi, ne me to apa. Ne Pahpãm ri me amã cute amji kam hapac xà pejti jör to ipa. Mãr ca me apê me hũràac, ne me ate amji kam me gapac xà impejti ne, ne nee ihhêj xi nare, ne ampo cunea kam catyt kam, Pahpãm cuna mã me apejti na me apa.

Cu ha me ajpên to me pampej to me papa

²⁵ Cwyrjapê ca ha nee hipêr ajpên mã amji to ame ahêj nare. Ne ahpÿanre na quêt catyt kam ajpên mã me acakôc to me apa. Ampo na? He me papê Jeju jĩ kam cukrã xà atajê pyrãac, na ri ajpên kam me pahpyxit peaj. ²⁶⁻²⁷ Ne ca ha me anõi te ame akwỳ nõ kam acryc na, ca ha nee kam acryc kam acrà nare, ne pyt xàr xwỳjrea na, hacpÿa mã ajpên mã me acaprĩ. Nãmri ca ha ate nee kam acryc jicu nare, ne mãnea mã kam acryc na, quê ha apê me pahcurê xwỳnti pê Xatanaj te amji kam hapac xà kôt apa catê, na ca ha atỳj Pahpãm to kên to apa. ²⁸ Na ca ha mam ajco me gàhkĩj to me apa atajê, ca ha me gàhkĩj jicu, ne me gápên kam me atêm pyrentu, mãr ca me akrã kreti te amji jahkre pejti kam, me amji to ajpa, ne me akwỳ pê hamreare atajê tehcajpa.

²⁹ Ne nee ame acakôc xà kên kam amji kĩn nare atajê to me acakôc to me apa nare. Ne me acakôc xà impejti kam amji kĩnti to ca me akwỳ mã me acakôc, ne ma me to impej to me apa. Ne cute me Pahpãm kam hapac na mehtehcajpar xà atajê to, ca me acakôc to me apa, mãr quê me akampa atajê, ma me ipicamën to me mõi. ³⁰ Nãmri ca ha ate me hajyr nare na, ca ha ca-ma Pahpãm Carõ Pejti mã amji kĩn nare, ne ihpeacre na me to. Ne me akam Pahpãm Carõ Pejti te ihkrĩ xà ita pê ihhêj rüm, cute me akam amji japry na ihhõc. Cute me apê hõ tekjê na me ato apipê xà caxuw. Ne ihkôat ca ha atỳj jũ caxuw cute me akên pê me apytãr na me amji jahkre pej.

Cu ha ajpên mã me pahcaprĩ to me papa

³¹ Ne ampo kên itajê ca ha me hucu he. Ca ha jũm me ajpên kam acryc ne ma ame ajpên mã acaprĩ caca ata, ca ha amji pê ihcaca ne hucu, ne atỳj hacpÿa mã ajpên mã me acaprĩ. Ne me gàhcurê me, me gápêrê

jicu, ne quêt me amã ajpën kînti, ca me ajpën caprî to me apa. Ne nee ajpën mã me gâkjêr nare. Ne nee ame hûn kên to me apa nare. Ne nee ame ajpën curê to me apa nare. ³² Ne quêt cama ajpën mã me acaprî, ne ajpën mã me apejti ne. Ne Crixto kam me ahônco, ita cwÿrjapê ri Pahpãm te ramã ate me to kên xà atajê to tojnô ne me hicu. Na ca ha cuxà ate me ajpën to kên atajê to tojnô ne me hicu.

Cu ha ampo kên cunea jicu ne quêt catyt kam me papa
Coroxo 3.16-17; 1 Jowãw 1.5-10

5 Me apê Pahpãm kra, ne cumã me akînti, cwÿrjapê quê ha me apê hûràac na amji kôt me ato prãm. ² Crixto mã me akînti na ri, me acwÿrjapê ihtyc xà mã cute amji jôr. Mã Pahpãm te cumã me akînti ita na hõmpun, ne ampeaj kam hanea ne ahna Pahpãm mã Jeju kîn. Ne cumã Jeju tyc xà ita pê ihhêj rûm ampo cacô cuxwati impejti te ihcajpuaw ata pyrãac. Na ca ha Jeju cuxà me amã ajpën kînti to amji mã me ahimpej to me apa.

³ Ne ramã me apê Pahpãm na mehkwy, cwÿrjapê ri nee me ate ampo kên crê itajê caxun xà nare he. Mam ca ha nee ahti na ame cupê mehprô caxun nare, quê nee pyjê xwÿjê ahti na ame cupê mepjê caxun nare. Ne hanea ne nee menxyre impijapit to ame apahãm nõ to me apa nare. Ne ihcote na, ca ha hanea ne nee gâhcukrêj to pit mã amji mã cuprôn to me apa to me amji japackre nare. Ampo na? He jûm te hajÿr to ipa xà ata, nee Pahpãm to amji japackre nare, ne hàhcukrêj itajê pê ri ihhêj rûm me hõ pahpãm, ne ampeaj kam cumã ihkîn, mã to pit mã amji kam hapac to me ipa. Ca ha nee me anô te ampo kên itajê nõ caxun to kênre xà hamreare ita kam, jû wÿr quê jûm ahna me anô jarê.

⁴ Ne hicu xà kam, ca ha nee ame acakôc xà kam, me pahpahãmti atajê to me acakôc to me apa nare. Ne nee me acakôc xà kôt hamreare atajê to me acakôc to me apa nare. Ne nee ca ha me garkwa xÿ xà tûmti kênre atajê to me acakôc nare. Ne quêt Pahpãm te me amã ampo pejti cunea jôr itajê pyrên me gakryti na, cumã me amji jarê.

⁵ Xà quê ha pijamã cute ampo kên crê itajê ton to me ipa catêjê nõ, Pahpãm me Crixto himpej xà krac ri me axà? Hãpà! He jûm xâr xà hamreare na ramã me pamã hahkre pej. Ampo na? He Pahpãm mã me cupê ihhêj rûm pahpãm cahàc krekà to amji mã mehhimpej catêjê pyrãac, ne mehkênre. ⁶ Nãmri quê ha jûm te awÿr ihtêm, ne pom wa ite ampo kên tète me amãn atajê nõ to amã ihhêj prãmte, hÿrmã gator na, ca nee me harkwa kôt hamreare atajê kam gapac, ne ihkôt amji ton nare. He ampo kên itajê cwÿrjapê ri Pahpãm me kam incryc. Ne quê ha ihtÿj jû caxuw, por jûmjê te nee me kam hapac nare atajê kam incryc, ne ame to kênre ne, ne ihtÿj mehkên mã me curê. ⁷ Cwÿrjapê ca ha nee cute me hajÿrjê to me amji japackre, ne me to amji kwÿ nare.

Cu ha pahte amji kam me pajapac xà tuw kôt me ampo cunea jahkre pej

⁸ Ýhÿ, he pê ca mam ihhêj rûm me apê mehtyc pyrãac, ne me akam awcapãtkô pit. Mã pyt ahcujro, cu pahÿtÿj me rît ne me ampo pupu, ita jÿkjê na mã Pahhiti jarkwa ihtÿj me amã ampo pej to pit mã hahkre to mõ. Ne ate Pahpãm na mehkwy na me amji ton xà ata caxuw, ca ha atÿj ita caxuw ampo pej cunea pupu. Cwÿrjapê ca ha ate ampo pej pupun xà atajêa kôt me amji ton to me apa, ne me to.

⁹ Ýhÿ, ca ha ate me Pahpãm jarkwa pê hàhcujro xà pyrãc ata kam me hajÿr to me apa na, ca ha me apê jûmjê pejti atajê, ne catyt kam ame apa, ne me acakôc xà hêj xi nare pê catyt kam, ampeaj kam atajê to pit mã, me acakôc to me apa. ¹⁰ Ne ca ha ate me hajÿr to me apa na amji to me gâhcukjêr to me apa na, ca ha me Pahpãm cajpuaw. ¹¹ Ne por cute amji kam me hapac xà kênre kam, Pahpãm jarkwa pê hàhcujro xà pyrãcti ata kaj na, awcapãtkô kam me ipa atajê jãpên xà cunea kôt hamreare. Cwÿrjapê ca ha nee mehkôt me apa na amji to prãm nare. Ne quêt mehcunea kam mare mã, ca ha ate amji kam me gapac xà pejti jãhcujrohti to me apa. Mãr quê ahna me apupu, ne cute me apupun xà ita kôat me amji kên itajê pupu, ne ahna me amji jahkre pej.

¹² Ýhÿ, ampeaj kam ri cute amji kam me hapac xà atajê kênre, cwÿrjapê cu ha nee cute me ampo kên to ipimxur, ne aracri ame ton atajê na, nee me pahcakôc xà nare. Ampo na? He kypê ahna me kam me pahpahãm nare. ¹³ Quê ha hàhcujro xà to ampo cujro, quê ha hirã pê hõmpun xà. Ne por hàhcujro xà te ampo jakati prãti cujro ata, ihtÿj ma harwÿr ita kôt ahcujro. Ita kôpit na quê ha mehkã kên catêjê atajê, ate amji kam me gapac xà impejti na me apupu, ne me akôat quê ha ramã cute me amji kam hapac xà kênre na me amji jahkre pej. Ne me akôat quê ha hanea ne cute amji kam me hapac xà impejti to me ipa. ¹⁴ Ne pê Pahpãm ramã me pamã ita to ihcakôc to hane he:

“Por ate amji kam me gapac xà kênre ata kôt, ihhêj rûm ramã me atyc atajê, me ampra!

Ne me atyc ita pê me to xa, quê ha Crixto me amã ate amji kam me gapac xà cujro, ne hacpÿa mã me ato tÿr!” hane.

Cu ha me pahkrã kreti kam me amji to ajpa

¹⁵ Cwÿrjapê ca ha ate amji to ame apijapar xà itajê na me amji kôt hakop to mempeaj ne. Ne nee ca ha me apê cute me amji jahkre kêatre atajê pyrãc nare, ne quêt me akrã kreti te amji jahkre pejti kam me amji to ajpa. ¹⁶ Ne amcro atajêa kam, quê ha mehkên catêjê me hàhtô. Cwÿrjapê ca ha atÿj amcro cunea kam Pahpãm mã me apê, ne nee jû caxuw amcro nõ to me apictor nare. ¹⁷ Ne nee ca ha me apê cute me amji jahkre kêatre atajê pyrãc nare, ne quêt me pajô

Pahhiti mã ampo na me pahto prãm atajê to pit mã, ca ha me gápên to me apa na amji to me ahcukij.

Cu ha Pahpãm Carõ Pejti ata kôt me pajõ Pahhiti mã me cre

¹⁸ Ca ha côxyhti to amji mã me ahimpej jicu, ne nee hipêr me to akôm quê me ato ipipãn nare. Ampo na mã wa me amã ihcawpa? He quê ha ihtÿj ate amji kam me gapac xà cunea kam ato kên. Na ca ha quêt Pahpãm Carõ Pejti to amji mã me ahimpej to me apa. ¹⁹ Ne ca ha me acakôac kam ajpên mã me Pahpãm na increr xà cunea to me acrer to me apa. Ne hanea ne mam Pahpãm te amji kam hapac xà na me ahna increr xà ata to me cumã cre. Ne cute ampo ton xà itajê na curmã me cumã increr xà ata to me cumã cre, ne me amã amji kïan kam me cumã cre, ne catihti pyrên me gakryti to me cumã cre. ²⁰ Jeju Crixto kam me ahônco, cwÿrjapê ca ha ampo pej me, ampo te me ato jũ mãn xà atajê mea mã hÿrên me gakryti na, me pajõ Inxũ Cati pê Pahpãm mã me amji jarê. ²¹ Ne pom ca amji mã Crixto cupa, ne amji caxuw me kampa ita cuxà, ca ha atÿj ajpên kam me gapac to me apa.

Pê Pawrô mehprõ catêjê japackre

Coroxo 3.18-19; 1 Petrô 3.1-7

²² Ne pyjê pê mempjê prõ itajê, pom ca amji mã me Pahpãm kampa ita na, ca ha amji caxuw me apjê kampa. ²³ Ne ampo na mã wa ame amã ita to hahkre to hane? Nee mã ampo na nare. He Crixto pê mehkwy krã pyrãac, ne mehkwy pê hÿ pyrãac. Ne cupêa ri me to ihhimpej catê, ne cupê mehkwy kên catia pê me hÿtâr catê. Jÿkjê na mã, me apê mehprõ impjê catêjê, ca ha atÿj me aprõ to me ahimpej. ²⁴ Cwÿrjapê ca ha me apê me apjê prõ catêjê, ampo cunea na amji caxuw me apjê kam me gapac to me hanea, pom quê Crixto na mehkwy amji caxuw me kampa he.

Pê Pawrô mempjê catêjê japackre

Coroxo 3.18-19; 1 Petrô 3.1-7

²⁵ Mempjê catêjê, quê ha me amã me aprõ kïn hanea, pom quê Crixto mã mehkwy kïn, mã me hahpan xà na ihtyc he. ²⁶⁻²⁷ Ampo na pê Jeju me papê mehkwy mã ty? Nee mã pê ampo na ihtyc nare. He pê ihcunea na me papê mehkwy atajê kên pê me pahto impej partu to prãm to pê ty, mãr quê nee me pahkam ampo kên crire nõ hamreare ne. Ne me pamã me pahte amji kam pajapac xà to impej ne ihcuhhõ, mãr quê ihtetetti ne. Ampo na? He ramã me papê Jeju jÿ pyrãac. Ne harkwa ita pê ihhêj rÿm cô te ampo tÿm cuhhõn pyrãc, ne toa ri ihtÿj me pahte amji kam me pajapac xà cuhhõ ne to impej. Ampo na? He cumã Hÿm mã cute me pahto ipipê xà ata kam me pampejti kam, ampo kên tÿm nare na me pahto prãm. He me papê hÿ pyrãac na ri. ²⁸ Ne me hÿmre mã quê ha mehprõ kïn hanea, pom quê cumã amji jÿa kïn he. Quê ha jÿm mã ihprõ kïn ne to impej na, quê ha cumã ihkïn ita pê ihhêj rÿm, amji jÿa kïn ne to impej. ²⁹⁻³⁰ He xà quê

ha ajkÿ jÿm mã amji jÿa kïn nare ne cumã amji curê? Quê! He ihtÿj cumã harte, ne ma hamã. Ita na mã Jeju Crixto me papê mehkwy to, ne me papê hÿ kam cukrã xà pyrãac. ³¹ Pê Pahpãm mam me panquêtjê mã harkwa ta ne me cumã:

“Quê ha me hÿmre mehprõ,
ne me hÿmjê me, menxyrxwÿ jicu,
ne hÿxi me ajcaxê ne ajpên kam me pyxit peaj” hane.

³² Ne pom Pahpãm te me pamã me pahprõ me, me pajikwa tuw xà to hÿjarên xà ita, pê mam nee me hahkre pej nare. Ne ita caxuw cupê Crixto me, mehkwy pyrãc, ne ajpên kam me pyxit peaj na, ramã pahte me hahkre pej. ³³ Ne hanea ne me pamã to hahkre to hane he. Quê ha me hÿmre mã mehprõ kïn hanea, pom quê me cumã amji jÿa kïn he. Ne mehprõ xwÿjê, quê ha ihtÿj amji mã mempjê cupahti to me ipa.

Cu ha me pahpãmjê me, me panxyrxwÿ kampa

Coroxo 3.20-21

⁶ Ne me apê mehkra xwÿjê, ca ha atÿj amji mã me apãmjê me, me axyrxwÿ kampa, ne amji mã me hÿpahti to me apa, me pajõ Pahhiti jarkwa kôt. Hõ, quêt catyt kam me apa xà itajê te hajÿr he. ²⁻³ Ne pê Pahpãm mam ramã me panquêtjê kra mã harkwa ta, ne me cumã ahna hÿjahkre to hane he:

“Ca ha atÿj amji mã, me apãmjê me, me axyrxwÿ kampa,
mãr ca apej pêa mã me apa,
ne amji to me apijapar to irya ne, pjê ita kam” hane.

⁴ Ne me apê me hÿmjê me inxyrxwÿ xwÿjê, ca ha nee ame akra mã ame quêt nare, ne nee ame cumã mencryc ton nare. Ne quêt me pajõ Pahhiti jarkwa kôt me cumã aprÿa, ne catyt kam me cumã cute amji to me ipijapar xà to hahkre. Ne Pahpãm krã kreti te amji jahkre pejti te me hapackre xà atajê to, ca me hapackre.

Cu ha me pajõ pahhi catêjê kampa

Coroxo 3.22-4.1; 1 Timot 6.1-2; Tito 2.9-10; 1 Petrô 2.18-25

⁵ Ne cama me cumã me gápên to me apa catêjê xwÿjê, ca ha atÿj amji caxuw me gõ pahhi kampa, ne amji mã me hÿpahti to me apa to hanea, pom ca me amã amji kïnti kam, amji caxuw me Crixto kampa ne me hÿpa he. Hõhõ, cu ha me hane. ⁶⁻⁷ Ne nee cute me gápên xà impejti na me garên prãmte ahêj, ne cama mento kam mare mã, me gápên xà to mempejti to me apa nare. Ne quêt me cumã me gápên prãm kam me gápên to me apa to hanea, pom ca Crixto pit mã me apê he. Ita na ca ha me hÿmre mã me apê. ⁸ Ne me amã me gõ pahhi catêjê me, me gõ pahhi nare catêjê me, Pahpãm te ahpyanre na ate me gápên xà impej ton atajê jahpan xà na, me amã hãmjör na, ca me to amji japackre.

⁹ Ne me apê hõ pahhi catêjê xwÿjê, ca ha me amã me hãpên catêjê to mempeaj ne, ne me hãpên xà na me cumã quêt jicu. Ne cama cõjkwa kam me gõ Pahhiti mã ajwar me gãpên na, ca amji to me amji japackre. Ne me pahcunea pipên pit, ne cumã me pajãpên xà atajê kôt, quê ha me pahto ajpëan, ne catyt kam ah-pÿanre na me pahcunea mã hãmjör xà atajê to amgõ.

Pê Pahpãm Xatanaj me, me papijapu xà caxuw me pamã hàprê xà gõ

1 Texarõn 5.8-11; 1 Petrõ 5.8-11

¹⁰ Ýhÿ, Jeju kam apê me ikjêjê, wa ite me amã ihhõc jicu xà ita kam, wa ha ate mehkên me, me apijapu xà to me amã hahkre. He me papê ihhêj rûm krãhtare kwÿ pijapu xà caxuw, cute apu amji mã hàhcuprõn pyrãac. Cwÿrjapê ca ha atÿj me pajõ Pahhiti carõt tÿjti kam me ahõnco, mãr quê taa me amã me acarõt to ihtÿj. Ne carõt tÿj ata kôt ca ha me apijapu xà caxuw apu amji mã me ahcuprõ, mãr quê me pahcurê xwÿn pê me apytà.

¹¹⁻¹² Ne mër me pahcurê xwÿn jÿjê me, cu ha me ajpu? He nee mã jÿmjê nare, he ampo carõ kên pahtÿjti atajê me, me hõ pahhi pê Xatanaj me ri me papijapu xà. Ne nee mã mehÿ nare, me cupê ampo carõ kên jõ pahhi catêjê pê cupê jarõti me, cu ha me ajpu. Ne pjê cunea kam ampo kên to mehhimpej, ne mehpahtÿjti, ne me hÿpahti, ne ihcunea na cute me amji kam hapac xà kêanre. Ne mencwÿrjapêa ri ihhêj ne ramã pjê kam awcapãtkõ, ne ihtÿj me cumã me pa-pictor na me pahto prãm. ¹³ Cwÿrjapê ca ha me apê krãhtare kwÿ atajê te hàprê xà to amji tÿj, ne to me amji jamã pyrãac. Ne Pahpãm te hàprê xà to me apytàr xà caxuw, ca ha me apijapu xà te me apytàr xà cunea to me amji tÿj. Mãr quê me acurê xwÿn me akam tẽ, ca atÿj me apijapu kam tẽ, ne me ajpu, ne me tohjê, ne me to hamre. Jirõ pê ca ha nee me hÿpate me gõ to me atêm nare, ne atÿj me acuhhê rohnÿtti mã.

Me papê krãhtare te hàprê xà to amji tÿj atajê pyrãc

¹⁴⁻¹⁵ Por krãhtare hãn ne wakÿti te hitõ krekà te hÿtàr xà to amji tÿj ata kôpit na, ca ha Pahpãm te me amã ate amji kam gapac xà pejti jör ata kôt, ca ha catyt kam me apa. Ne ate amji kam me gapac xà impejti ata pê ri me apytàr xà. Ne por krãhtare hãn ne ihtu na hê xà tÿjti to ihtu na hê ata kôpit na, ca ha ate amji kam me gapac xà impejti, hêj xi nare to me apa. Ne por krãhtare hãn ne hõ par kà tÿjti mã amji jacjê, ne ma ramã me to imprar xàa caxuw to ihcuhhê ita kôpit na, ca ha jÿ kam atêm xà caxuw, ramã apu amji mã me gãhcuprõn hiahpuro. Mãr ca mehcunea mã, Jeju te hacpÿa mã Hÿm wÿr me to ipipkjêr mã me cumã ajpên kÿn na harê.

¹⁶ Ne por krãhtare hãn ne kruw põc pÿr xà caxuw, wakÿti te hÿ tète hãmtàr xà to amji tÿj ata kôpit na, ca

ha Jeju to amji mã me ahimpej xà ata to me Xatanaj pê cupê jarõti jõ pahhi pê amji tète me amtã. Ampo na? He catyt kam me papa tète cute me pahhi kwÿn, cu ame pahpec, mã cute me pahkam ihtêm prãmte ri ihtÿj me pahcyt to ipa.

¹⁷ Ne por krãhtare hãn ne ihkrã cahhêc cupate wakÿti te ihkrãhkà tÿjti to amji tÿj ata kôpit na, ca ha Xatanaj te akrã kam me amã ate me ampo kên ton to me apa to hahkre cupate, ca ha atÿj Pahpãm te ramã ampo kên itajê pê me pahpytàr na me to amji japackre. Ne por krãhtare hãn ne hÿhkra to wapohiti xwahhihti cwa ata kôpit na, ca ha amji mã me Pahpãm Carõ Pejti te me amã Pahpãm jarkwa jör atajê juwahi to impeaj ne.

Cu ha pahtÿj me awcanã, ne ma Pahpãm mã mehkwy cajrën

¹⁸ Ne ate ampo itajê cunea to me amji tÿj to me apa xà ita kam, ca ha Pahpãm mã me acakõc xà na, amji caxuw me Carõ Pejti na ahwÿ, mãr quê me atehcajpa, ca cumã me acakõc. Ne nee ame apec ne ahna me amji jicu nare, ne atÿj me awcanã, ne ma Pahpãm mã mehkwy cajrën. ¹⁹ Ne hanea ne Pahpãm mã me ica-jrën to hane he:

— Me ijõ Inxÿ Cati, ca ha Pawrõ mã cute ampo jarën xà atajê to hahkre, quê me cumã hÿjarën xà kam hãn ne nee amji na hàhtàt nare, mãr quê mehcunea, hirãa pê, por pê mam nee ajco me Jeju jarën pejti kam hapac nare atajê kampa, ne me hahkre pej — hane.

²⁰ He wa me hacjên xà kam ikrÿ cakrõ, cormã ipê Jeju jarkwa na iprar catê, na wa itÿj ita ri mehcunea mã Jeju pê me pahkritxwÿ jarën xà impejti to harê. Na ca ha atÿj ita na Pahpãm mã me icajrën, mãr wa ite me cumã icakõc to jÿ mãn xà ata kam, nee amji na ijãhtàt nare, ne catyt kam me cumã awjarê.

Pê Pawrõ hicu xà kam hipêr amji jarê

Coroxo 4.7-8

²¹⁻²² Ne wa ha ma me awÿr me pahtõ kÿnti pê Tiquicõ pê Pahpãm mã hãpên catê impejti ata kujate, ijõ kãhhõc ita to. Quê ha curi cato ne taa me amã ihcunea na ijarën pa. Ne cute me amã ijarën xà ita caxuw wa ite me awÿr ijõ kãhhõc ita to ihkujahêc, mãr ca me ijarën pa, ne me amã amji kÿn, ne me gakry.

²³ Ne wa ijõtpê Pahpãm mã me acajrën to hane he:
— Ýhÿ me ijõ Inxÿ Cati pê Pahpãm me, me ijõ Pahhiti pê Jeju Crixto, ca ha ampo kên jipõc ri me ikjêjê ame ipa atajê mã mehcarÿcti to, mãr quê nee ame amji mã ampo cupa nare. Ne hanea ne me cumã ajpên kÿnti to, quê me ajpên kÿn to me ipa. Ne hanea ne cute amji mã me ato ihhimpej xà na me to, quê amji mã me ato ihhimpej. ²⁴ Ne hanea ne hõtpê me cumã me ijõ Pahhiti pê Jeju Crixto kÿn rohnÿtti mã atajê mã, ampo pej cunea to — hane. Hamre, ita pit.

PIRIP

Ýhý, pê Pawrô pê Jeju jarkwa na memprar catêjê nõ, ne Roman jô krí kam me hacjên xà kam ihkrí, ne pê Pirip jô krí kam, Jeju na mehkwy mehkří atajê mã hõ kàhhôc ita kujate. Na pê hõ kàhhôc ita japry pê (Pirip). Ne pom cu me hõ kàhhôc cahyt ita kam, Pawrô te me cumã amji jarên to hajýr he. Me hacjên xà kam cute amji pupun kêanre cacrô, cormã cumã amji kîn. Mã Pirip jô krí kam Jeju na mehkwy te me Pawrô tehcajpar prãmte me cumã ihpore kujahêc, mã cute ipyr, ata pyrên ri hakryti na amji jarê. Ne me hacjên xà kam ihkrí cacrô, ihtýj me hàhtôa mã Jeju pê me pahpytâr catê na harê. Ne hanea ne ihtýj Jeju te amji kam hapac xà tuw pejti kôt kypê ipa nare na me cumã harê.

Pawrô te amji jarên xà
Me Hàpên Xà 16.12-40; 20.6

1 Hàpà me ikwý, pom me apê Jeju na mehkwy, ca Pirip jô krí kam ame akrí atajê. Ipê Pawrô, ne ipê Jeju Crixto mã ijâpên catê. Ne itea wa Timot me, pom ca ramã Jeju na ate me ajpên hõnco tu atajê mã ihkàh-hôc ita ton. Ne pom ihkàhhôc ita te hajýar ne me akwy to mehhimpej catêjê pupun catêjê atajê me, me akwy tehcajpar catêjê mã, wa ite mehkujahêc. ² Imã Pahpãm pê me pajô Inxũ Cati me, me pajô Pahhiti pê Jeju Crixto te me ato impejti na me ato prãm. Ne cute me acaprí, ne me acaxwãm pê me acaxwýn kam, me amã me acarícti impejti jôr to ipa na, imã me ato prãm. ³ Ne wa hãn ne me ato amji japackre, ne me ana Pahpãm mã icakôc, ne cumã me ate amji kam me gapac xà pyrên ijakryti na amji jarê. ⁴ Ne wa hãn ne me acajrên kam pra, ne imã amji kîan kam me acajrên.

Cute me Pawrô tehcajpar pyrên hakry

⁵ Ampo na mã me apyrên ijakry? Nee mã ampo na nare! He pê ca mam me icahê na, Jeju to me gũjarên pejti to me harên na me itehcajpa, ne ahnaa cormã me to xa. ⁶ Ne imãa, quê ha Pahpãm me amã me ate amji kam me gapac xà to ipintuw to mör ita na, ne ahnaa to xa ita kam, quê ha ahnaa jũ caxuw Jeju Crixto te hacpý ne amji jaxàr xà jô amcro kam ahtwý, quê ha me pahto impej pa, to wa pa apu amji kampa.

⁷ Imã me akínti incwýrjapê, wa itýj amcro cunea kam me ato amji japackre. Ne jũ na ri ampeaj kam imã impej? Nee mã jũ na nare. Ca götpê hãn ne icahê na me gápên to me apa, ate me itehcajpar prãmte. Na wa Pahpãm jarkwa kôt mehcunea mã Jeju pê me pahkritxwý jarên xà impejti to harên to ipa, mãr quê me kampa ne me hũnã. Ne quê ha jũm te apu Jeju te amji kam hapac xà cuna mã ihcakôc kên to mör na, wa ha itýj intête cumã awjarê ne cupê hũtã. Na ca ramã me hacjên xà kam, ijýr xà ata kam, me itehcajpar to me apa. ⁸ Imã me akîan to me akín te hajýar, pom quê Jeju Crixto mã me pahkîan to me pahkín he. Ne Pah-

pãm mã ri ijahkre pej, por wa ampeaj kam ite me ato ijapac xàhti na amji jarên ata na.

Pê Pawrô Pahpãm mã mehcajren

⁹⁻¹⁰ Ne wa ijôtpê Pahpãm mã me acajrên to hane he: — Me ijô Inxũ, Pirip jô krí catêjê mã ajpên kînti to, quê me cumã ajpên kînti ita, ma me cumã ipicamên to mō. Ne me cumã mehkrã kre te amji jahkre pejti gō, mãr quê amji mã me ampo pej pit capi to me ipa ata to, ma me cumã apicamên to mō — hane. Ita to wa ijôtpê Pahpãm mã me acajrên to amji kam ijapac to ipa. Hõ, ita na quê ha jũ caxuw Jeju te amji jaxàr xà jô amcro kam ahtwý, ca ha me akên pê me apejti ne, ne me apahãm pê me acato, quê nee jũmjê me ato ihcakôc kên nare. ¹¹ Quê ha Jeju Crixto me acaxwãm pê me amã me acaxwýn to ihtýj. Ca ha Jeju cuxà amji kam me gapac xà impejti to me apa, quê ha mehcunea ahna me gömpu, ne me amji mã:

— Pýhápà! Ampeaj kam ri Pahpãm me cumã ampo to hahkre, ne mehtehcajpa, mã ita caxuw mehkênre nare, ne catyt kam me amji to ajpa. Ne Pahpãm ita ri catia to cati ne impej — hane.

Pawrô me hacjên xà kam ihkrí ita na, nee cute cumã jũ mãn nare

Me Hàpên Xà 28.30-31; Epet 6.19-20

¹² Jeju kam ajpên to me ikjêjê atajê, nee apu ijũ na me akrihkrit nare, ne nee ampo na amji mã me ito pō mã quê nare. Cute me ito kên catêjê te me ito kên crire nare, me hacjên xà itajê kôt. Cacrô wa itýj mehcunea mã Jeju jarên pejti jarên to ixãm ita na. Mã ramã me hàhtôa te me hahkre pej to mō. ¹³ Ne Roman jô pjê jô pahhiti jũrkwa kam cute me hamãr catêjê me, kam mehkrí catêjê me, mehcunea te ramã me ijahkre pejtu. Ampo cwýrjapê? Nee mã ampo cwýrjapê nare. He ipê Jeju mã ijâpên catê, na ri ma ame icurê, ne cute me ijaxàr, cwýrjapê wa me hacjên xà ita kam ikrí, mã mehcunea te me ijahkre pej. ¹⁴ Ne Jeju kam me pahkjêjê kwý jàhtôa ne me hacjên xà ita kam me ipupu, ne xwý kam Jeju to amji mã mehhimpej to me ipa nare. Hõ, ita cãmtà rũm ri nee me cumã jũm

cupa nare, mã ihtÿj Jeju to mehcahôc kam pra, ne nee amji na me ampo cãmji nare.

15-18 Ne me pahkjêjê kwÿa kwÿ mã ikîn nare cakrô, mã ihtÿj icuxà me Jeju to hÿjarên to me ipa. Ampo na? Nee mã ampo na nare. Pom jÿmjê itajê te ito ipipëan prãm to ri, ihtÿj hãn ne Jeju to me hÿjarên to me ipa. He ijÿ na me cumã amji to prãm, na ri ame hane. Ne ampeaj kam me ipijapu xi, ne cama me hacjên xà ita kam imã ite amji pupun xà kêanre to me ipicamên to prãm. Ne ampeaj kam cama ita jÿ na imã amji kÿan to amji kÿn. Ampo na? Ihtÿj Jeju Crixto to me hÿjarên to me ipa na ri. Ne mehkwy nare, quêt me cumã ikîn, cwÿrjapê ri ihtÿj Jeju to me hÿjarên to me ipa. Ampo na? Por wa ite me cumã Pahpãm jarkwa cràn ata, nee mã ihhêj xi nare. Ne ampeaj kam ite me cumã ihêj xi jarên nare na, cute me ijahkre pej. Ne Pahpãm te ri ijapên xà ita caxuw ixãm.

19 Ne ampeaj kam me gÿ na ijakry. Ampo na? Wa itÿj me ate Pahpãm mã ina me acakôc na, amji mã me ato hane. Na wa apu ijakry, ne itÿj jÿ caxuw, Jeju Carô Pejti kôt, ite me hacjên xà ita pê icator na, amji to hane.

Pawrô nee hÿ na Jeju pahàmti xà atajê nõ ton prãm nare

20 Pê Pahpãm imã, ite amji kam ijapac xà ita mã cato, ne imã ijapên xà ita gô, wa ikrÿ ne to pit mã apê. Ne imã jÿ caxuw ijapên xà ita kam ipec prãm nare, ne cama kam itÿjti, ne imã ijÿcanãr to prãm pit. Ne ite amji kam ijapac xà ita kam, imã ijÿcanãr tÿjti to prãm, pom ahnaa mã wa ita kam ton to mõi, ita na wa ton to imõi to prãm. Ne imã itÿar kam, amji mã Jeju japyrÿ to ipicamên to prãm, ne hanea ne ityc xàa kam, imã amji mã to ipicamên to prãm.

21 Ne imãa itÿar na ipa ita na impej. Ampo na? Wa hãn ne hõtpe itÿj Jeju to amji mã ihmpej to ipa. Ne ityc na ri itÿr jirôa pê imã impej. Ampo na? Wa ha jÿ caxuw ty, ne ma Jeju wÿr api, ne curia cahê na ikrÿ rohnÿtti mã. 22 Nãmri wa ha ite itÿr ita na ipa na, wa ha itÿj cormã ijapên xà impejti ita kwÿ to ijapên cri. Ne itÿj hipêr Jeju wÿr mehkwy to apkjê. Ne jÿ wa ha ajte amji mã capi? 23 Nãmri imã pry pijakrut na wa ha amji mã ihnõi capi. Ne imã, ite amji kam ijapac xà ita jicu ne ityc, ne ma Jeju wÿr ijapir, ne cahê na ikrÿ na, imã amji to prãm. He ita na ri imã impeaj to impej. 24 Ne ite me atehcajpar to prãm to ri, cormã ita ri imã ipa to prãm.

25 Cwÿrjapê wa itÿj cormã pjê kam me acahê na ipa na ite amji jahkre pej. Ite me atehcajpar, ca ate me apicamên to me amõi, ne Pahpãm to amji mã me ahimpej kam me gakryti na, ca me amji to mehprãm. 26 Wa ha cormã me awÿr amji jaxà, ca ha me ipupu, ne ampeaj kam me gakry. Ca ha ate me Jeju Crixto japyrÿ to apicamên to prãmte me to gÿjarên to:

— Ampeaj kam Jeju cati ne carôt tÿj ne impej, cwÿrjapê ri hacpÿa ne cute me pamã Pawrô kujahêc — hane.

Cu ha pahtÿj me pahte amji pupun xà kêanre ata kam awcanã

Juta 3

27 Nare, wa ha nee me awÿr icator nare cakrô, wa itÿj me garên par to prãm. Ne pom ite me amã harên itajê cunea jirôa pê impej catia ata na ri, imã me ato prãm he. Ca ha me acunea catyt kam, me apejti kam, me Jeju pê me pahkritxwÿ jarên pejti itajê to pit mã, amji to me apijapar to me apa. Ne imã me acuhtom pej pëa mã, ate me gápên xà pê Jeju jarên pejti to, ate me amji cujtên to me apa na imã me garên par prãm. 28 Ne nee ca amji mã me acurê xwÿn te Jeju cuna mã mehcahôc xiti itajê cupa nare, ne cama me cuna mã amji to mehtÿaj ne. Quê ha amji na me acajpê, ne amji mã me garên to:

— Co he! Quê ha me cumã me pahcupa nare ita kam ame hane, ne ihtÿj me pajirô pê xa — hane. Ampo na? Quê ha ihtÿj Pahpãm ate me hirô pê axãm xà caxuw me amã me acarôt gô, ca ha atÿj me mentête hahê ne hirô pê xa, quê ha me hamre. 29 Ne Pahpãm te, ate Jeju Crixto mã me gápên xà na, me apyxwÿr. Cwÿrjapê ca ha me kampa, ne ma amji mã me to ahimpej to me apa kam, me to acrà tu ne. Ne hanea ne icuxà cumã me amji pupun xà kêanre to me amji pupun to me apa.

30 Pê ca ramã me pahcurê xwÿn pê, ite Jeju te amji kam hapac xà pytâr na, me ipupu. Pê wa ite amji pupun xà kêanre ita me ajco amji cujtên to ipa, pê ca ahna me ijarên pa he. Na ca ha ita kam icahê na ate me hÿtâr prãmte, cu ha pahtÿj me amji cujtên to me papa rohnÿtti mã. Na ca ha hanea ne, icuxà ikôt me amji pupun xà kêanre to me amji pupun to me apa.

Me pahte amji kam me pajapac xà pyxit peaj kôt, cu ha me amji kampa

Roman 15.5-6; Epet 4.1-6

2 Imã me acunea te cuprôn ne amji na me ahônco tu na, me ato prãm. Ca ramã Jeju Crixto to amji mã me ahimpej, cwÿrjapê ri ampo cunea caxuw me amã me acarôt tÿj. He ramã Jeju mã me akîn na ri cumã me acaprÿ. He ramã Pahpãm Carô Pejti te amji mã me ato cuprôn, ne ate amji kam me gapac xà to me amã pyxit peaj. Cwÿrjapê ri me acaxwãm pê me amã ajpên kÿn, na ca atÿj me ajpên caprÿ to me apa.

2 Pom wa ramã me apyrên ijakryti na amji cajpê ita na, wa ha hipêr me ana ahwÿ, ca me imã ijakryti ita to ajcamê. Ne imã me ate amji kam me gapac xà pyxit peaj to, ate amji kam me gapac na me ato prãm. Ne mam me amã ajpên kÿn ita jirôa pê, quê me amã ajpên kÿn, ne quê me acaxwÿn cunea ajpên kam pyxit peaj. 3 Ne nee ca me gápên xà to me amji cajpuaw prãmte ame gápên nare, ne nee amji pejti na me amji jarên nare, ne nee amji to me acati to me apa prãm nare. Ne quêt cama me amji mã:

— Mõrmõi ijirôa pê mehcunea cati — hane. 4 Ne nee apyxit peaj ne ate amji kam me gapac xà ata to amji mã me ahimpej to me apa nare, ne quêt atÿj me akwÿ

te amji kam hapac xà to me hanea, ne me amji mã me ahimpej to me apa.

Pê Jeju me hirôa pê cati cakrô, nee amji to cati prãm nare

Jowãw 13.12-17; Epet 1.20-23; Ipipë Xà 5.1-14

⁵ Ne quê ate amji kam me gapac xà pê, Jeju Crixto te amji kam hapac xàa. Ne Jeju jarên xà ita ca ha me kampa, ne ihkôat me ton to me mǎ.

⁶⁻⁷ Ne Jeju me Pahpãm pipëan, ne catia to cati cakrô, pê nee cumã amji jarên to: "Wa papipëan rohnýtti mã na amji to prãm" hajÿr nare.

Ne quêt cama cumã amji cuprãr tu, ne cõjkwa jicu, ne pjê wÿr wrÿ, ne me paxũmrea na amji to, ne cama amji to me pamã hãpên catê.

⁸ Ne nee amji to cati prãm nare, ne quêt pjê kam Hũm jarkwa kôt apu ipa, ita kam ahnaa pĩ kam ihtyc.

⁹ Cwÿrjapê pê Pahpãm hipêr to ajcamê, ne to catia to cati, ne mehcunea jõ Pahhiti na hãm.

¹⁰ Ne cute Jeju japyr to me cati prãm to, quê ha cõjkwa kam me ipa catêjê me, pjê kam me ipa catêjê me, pjê krac ri cute me harêt catêjê me, Jeju cuna mã mehkõn krã na me jÿ, mehcunea kam mare mã, ne me harên to hane he:

¹¹ "Jeju Crixto pê ri quêt mehcunea jirô pê Pahhiti cati" hane.

Ita na quê ha mehcunea Pahpãm pê Jeju Pãm peaj na me hahkre pej, ne mehkwy mã harê.

Pê Pahpãm ri me pamã me pahcarôt to ihtÿj

¹²⁻¹³ Pê ca atÿj, imã me ijõ ikwÿ nõ kĩnti catêjê atajê, ajco me ikampa, ne wa ha ita caxuw ite ame acahê na imõr nare cakrô, ca ha atÿj ampÿa mã amji mã me ikam gapac to me prãm. Ne Pahpãm mã catyt kam me apa, ne ajpên na me ahõnco tu na, cumã me ato prãm. Cwÿrjapê ri me acaxwãm pê me ato ihhimpej, ne ate mempar prãmte na me atehcajpa, ne ate ihkôt me amji ton na me atehcajpa. Ne me gĩkjê kam me ato ihhimpej, ca me gĩkjê kam, hanea ne me kampa ne amji mã me hũpa, me gãpên xà me, me ate amji kam me gapac xà kam. Hõhõ, ca ha me hane, ne me gĩ cunea kam me apejti ne.

Cu ha catyt kam me papa, mãr quê me pahkôt hanea ne catyt kam me ipa

¹⁴ Ca ha ate amji kam me gapac xà cunea kam, nee ajpên mã me gãhcahhõn nare, ne nee ajpên krac ri me acakõc nare. ¹⁵ Ca ha ate me hajÿr na, ca ha ampo kên

cunea na me gamreare ne, ne nee me ate amji kam me gapac xà tũm nare, ne quêt ihtetetti ne. Ne me apê Pahpãm kra impejti cwÿrjapê ca ha me hane. Ca atÿj mehkên me, cute me amji kam hapac xà kêanre tũm, kam awcapàtkôti atajê jipõc ri ame akrĩ. Ne atÿj me cumã Pahpãm te amji kam hapac xà kôt harên to me akrĩ. Mãr quê hanea ne me acuxà, ate amji kam me gapac xà itajê mã me acjêj. Ca me gãpên xà ita kam, me apê ihhêj rũm cõjkwa kam awcapàtkôti kam caxêre prã tetetti atajê pyrãac, ne me aprãti ne. ¹⁶ Wa ha me apyrên ijakryti ne, por jũ caxuw Jeju Crixto te amji jaxàr xà jõ amcro ata kam. Ampo na? Nee mã ampo na nare. Curi quê ha mehcunea me ijahkre pej, por pê wa ramã me amã ijãpên xà tÿaj to, ata na, ne nee me apê kôt hamreare nare na.

Pawrô mã hakryti ita to, me hakryti na me to prãm

¹⁷ Pê ca ramã Pahpãm mã me gãpên to catia to cati, ne kam me amji pupun xà kêanre to me amji pupu. Ne me apê gãhcukrêj crêre cakrô, ca atÿj me imã ampo gõ, ate Pahpãm mã ijãpên xà ita tehcajpar prãmte. Ne ate itehcajpar prãm ita pê ihhêj rũm ate Pahpãm mã me ampo jõr. Ne Pahpãm to ate amji to me ahimpej prãmte, ca ame itajê to hane. Ne ate me ampo itajê ton xà kam, ajco ampeaj kam me gakry. Wa ha hanea ne ipê me apyrãac, ne itÿj amji pupun xà kêanre to amji pupun to ipa, Pahpãm jãpên xà ita cwÿrjapê. Ne quê ha ihtÿj jũ caxuw amcro nõ na me icura, wa ha ipê me apyrãac ne Pahpãm mã icaprô gõ ne ty. Ne wa ha ipê me apyrãac ne ampeaj kam ita pyrên ijakry to hanea, pom quê ca mam ame gakry ita na he. ¹⁸ Quê ha jũ caxuw me ito hane, wa ha ijakrya ne nõ. Ca ha me ca xwÿjê icuxà atÿj me gakrya to me gakry.

Quê ha Pawrô Timot te me hõmpun prãmte, ihtÿj me hÿrmã ihkujate

¹⁹ Quê ha ihhêaj to me pajõ Pahhiti pê Jeju mã me amã Timot kujahêc pyrentu to prãm na, wa ha me amã ihkujahêc pyrentu. Quê me apupu ne me gahkre pej, ne hacpÿ ne amji jaxà ne imã me garê, mãr wa me garên pejti impar xà kôt, ma amji mã icarôt to ihtÿj.

²⁰ Ne Timot pê ipyrãac ne pyxit peaj, ne ihtÿj me ato amji kam hapac to ipa. Ne ihtÿj me ate Jeju kôt amji to me apicamên na cumã me ato prãm. ²¹ Ne ihkĩnte mehkwy cunea te nee me hajÿr nare, ne cute me amji kam hapac xà to pit mã me amji kam hapac to me ipa, ne nee Jeju Crixto te amji kam hapac xà to me amji kam hapac nare. ²² Ne nee Timot te hajÿr nare, ne ihhêj rũm cupê ikraa, ne ihtÿj icahê na mehcunea mã Jeju jarên pejti jarên to ipa na, ramã mehcunea te me hahkre pej. ²³ Wa ha ita ri cute ame ito amji kam hapac xà na me hahkre pej jirô pê mã, wa ha amũ me awÿr ihkujahêc pyrentu. ²⁴ Ne wa hanea ne itÿj me awÿr ikràr. Na wa itÿj me pajõ Pahhiti pê Jeju te me awÿr itêm na ijamãr na, amji mã to hane.

Quê ha Pawrô ma hacpÿ mã me cumã Epaprôti kujate

²⁵ Ne pê ca me imã me pahtô pê Epaprôti kujate, cute ite amji mã ampo na prãmti xà itajê na itehcajpar prãmte. Ne ramã cute icahê na hàpên xà ita me, ajpên kujtên crire nare. Na wa itÿj hacpÿ mã me amã ihkujahêc prãm. ²⁶ Ne ampeaj kam ri ramã Epaprôti mã me apupun prãam to me apupun prãm. Ne ihtÿj hà na ate me hahkre pej na amji mã me ato hane. Ne hà ita na, ate amji mã me to pô mã quê na, amji mã me ato hane. ²⁷ Ne ampeaj kam pê hà to hà, ne ajmãr ty. Pê Pahpãm mã caprĩ pê caprã, pê hacpÿ mã impej. Ne hanea ne Pahpãm mã ramã ite me to ijapac xàhti ita na icaprĩ, na wa nee hipêr kam icwÿr nare to prãm. ²⁸ Cwÿrjapê wa itÿj hacpÿ mã me amã ihkujahêc to prãm, ate me hĩa pupun ne hacpÿ mã me amã amji kĩn prãmte. Wa ha pa xwÿjê imã amji kĩn nôti ita jũa kam ipê tẽ. ²⁹ Na ca ha Epaprôti pê Jeju kam me pahto ihkjê ita to me gakrya kam me amji pytà. Ca ha atÿj amji mã me hũmre atajê cupa. ³⁰ Ne cute Jeju Crixto jàpên xà kam amji mã ihtyc cupa nare, cwÿrjapê ri ihkên mã hàr, ne ajmãr ihtyc. Ampo na? Ca ampÿa mã ipê ame apa, ne jũ wÿr ca me itehcajpa, mã me gaxà kam cute itehcajpar. Na ca ha atÿj amji mã me hũmre ata cupa, ne catia na amji mã me to hane.

Pê Pawrô amji caprÿ to Pahpãm te ahna amji caxàr prãmte ampo cunea to

Pirip 2.18; 4.4

³ Ne ijàhhôc ita jicu xà kam, me ikjêjê, imã me ate Jeju kam me gakryti na me ato prãm. Xãmte, cormã imã me amã ihnô ata jarên xà. Ne pê wa ramã amã harêan xà na, wa ha hipêr amã ahna ihhêc. Ne hipêr ite ahna me amã ihhêc xà ita te me amã jũ mãn nare, ne nee hanea ne imã cute ahna jũ mãn nare.

² Co he! Ma amji na me hũmre kên pê rop na hamreare pyrác atajê to me guphê! Nãmri ihtÿj me apê me akà kwÿ Jakep to prãm to, me amã hũjarên to hane he:

— Gapacta ne Jeju to amji mã me ahimpej, ne hanea ne me ipê Juta catêjê quêtjê te amji to me icaca xàa kôt me apy kà kwÿ to kryjre ne me hakep. Hô, me aca ca xà pijakrut itajê to, ca ha me, quê ha Pahpãm ihtÿj me amã amji capa ne me apytà — hane. ³ Ne ame amã ihhêj xia jarê. Ampo na? He cu ha me amji kà kwÿ Jakep ita nee me pahto Pahpãm kra impej nare. Ne quêt Pahpãm Carô Pejti ri me pamã Pahpãm to hahkre, mãr cu me hahkre pej ne amji mã me hũpa, ne me pamã ihkĩnti ne, quê ha taa me pahto amji kra, cu ha Jeju kam me amji hõnco ne ampeaj kam me pajakry. Ne pom xwahna Juta catêjê jô amji kĩn me, cute me amji kam hapac xà itajê kôt mã Pahpãm mã me pahkĩn. Hãpà! Nee mã ampo itajê kôt Pahpãm mã me pahkĩn nare. Ne quêt ita na ri Pahpãm mã me pahkĩn, mã me pahpytà he. Pom pê Jeju me pajaxà kam ty, cu toa amji to me pahhimpej xà ata to, quê ha Pahpãm quêt me pahkên pê me pahpytà. ⁴ Ne pê wa Pahpãm te ipytàr prãmte, amji caprÿ to, me hirôa pê ampo itajê ton partu.

⁵ Ne pê xwahna cormã icrire na, ina amcro te ôjtô kam, pê me ipy kà kwÿ Jakep, Juta catêjê te amji to incaca xà ata kôt. Ne me ipãmjê pê Juta catêjê impeaj kra, ne me cupê me iquêtjê nõ, pê Pênjamĩ xwÿ tàmwxwÿ tàmwxwÿ nõ ata kra. Ipê Juta catêjê impeaj nõ wa. Ne pê wa Juta catêjê te amji kam hapac xà cunea kôt amji ton pa. Ne me ikwÿ pê Parixêw catêjê atajê pê catyt kam ajco me ipa. ⁶ Na pê wa ajco me hàpên xà ita to ijàpên catia to ipa. Ne Pahpãm te ikĩn prãmte itÿj ajco Jeju na mehkwy to pên to ipa. Mã xãmte Pahpãm pê ita na ihkaj na, ikam. Hô, pê wa ajco Juta catêjê te amji kam hapac xà cunea ton to hajÿr to ipa, Pahpãm mã ikĩn prãmte. Pê Juta catêjê cunea mã ihhêj ne ipeaj to ipej. Ne pê wa pa hanea ne ajco amji pejti na amji to hane. Ne pê xãmte Pahpãm mã nee ita na ikĩn nare, ne ahna cupê ihkaj na.

Pawrô ita caxuw Jeju Crixto te amji kam hapac xàa kôt ipa to prãm

⁷⁻⁸ Na wa quêt ita caxuw Jeju to amji mã ihmpej to ipa. Ne mam ampo pejti itajê to ite amji mã ihmpej to ipa xà atajê ri, nee hipêr imã ampo caxuw impej nare ne ihkêanre. Ne Jeju Crixto pê ijô Pahhiti ata, wa quêt ite hõmpun ne hahkre pej ne ampeaj kam quêt imã ihkĩn, ne mam ampo itajê ri imã ihkĩn nare. Na ri imã cupê ahhi, ne imã ihkĩn nare, wa ite pô mã ihcunea to ijücapêr, ne nee hipêr ihnô to amji japackre nare, ite Jeju kam amji hõnco tu to prãm to. ⁹ Na ri Pahpãm te ito impej, wa ipejti, cwÿrjapê ri cumã ipejti. Ampo na? Wa nee ita caxuw cumã ipejti prãm to Juta catêjê te amji kam hapac xà atajê to amji jahôt prãm nare. Ne quêt Jeju Crixto to, wa ha amji mã ihmpej to ipa, ne ma to amji jahôt to ipa. ¹⁰⁻¹¹ Na wa ita caxuw Jeju Crixto pit pupun pejti to prãm, ne carôat kôt amji to ipi-japar to prãm. He Pahpãm mã carôt ata to ri cute hacpÿ mã Jeju to ihtĩr. Na wa ha itÿj hanea ne cuxà, cute amji pupun xà kêanre ata to amji pupun to prãm, ne cuxà ityc to prãm, mãr wa ipê hũràac ne hacpÿ mã itĩr.

Pawrô nee cormã catyt kam Crixto te amji kam hapac xà cunea kôt ipa nare

¹² He wa nee pa amji jarên to ihmpej to:

— He ramã ite amji kam ijapac xà cunea na ipeaj to ipej, ne nee jũ kam ijô nuwre nõ kam, ikên kênre nõ hamreare — hajÿr nare. Ne cama quêt amji jarên to hane he:

— Wa ramã Jeju Crixto kôt ipa ita to, ite amji jĩ tÿj tu, ne cormã ipej ita kôt ipicamên to imôr to prãm — hane. Ne cormã ipejti wÿr icator xà ita pê ihhêj rùm ijàhcukren xà, wa hÿrmã amji mã icarôt to ijühcajhê to mõi, ite hicy xà mã icator to prãm to, ne nee cormã hÿrmã icator nare. He pê ramã Jeju Crixto amji mã ito prãmti xà ata caxuw ipro. ¹³ Cwÿrjapê wa ha nee hipêr mam icaca xà itajê nõ to amji japackre nare, ne quêt icumam itajê to pit mã, wa ha amji japackre. ¹⁴ Ne icatàatre na, pry jicu xàa kam ipicahur catê te amji mã

hàmchwyr xà ata pyr prämte, hÿrmã ihtëam to të. Ita jÿkjê na wa apêa to apê, ite amji mã Pahpãm te imã hãmjör xà ata pyr prämte. Mã Pahpãm imã hãpör to mō, ite Jeju Crixto kôt ipej pëa mã, cahê na ikri rohnÿtti mã xà caxuw.

¹⁵ Hōhō, ite amji kam ijapac xà ita to wa amji kam ijapac to ipa. Ne pom Jeju kôt ramã me pahte me papa to me amji jÿ tÿj tu itajê cunea te amji kam hapac xà ita ri me pamã. Ne ca ihhêaj to me anō te amji kam gapac xà ita to hajÿr nare na, quê ha Pahpãm me anō mã to hahkre, ca ha hahkre pej pej. ¹⁶ Ne me pahcunea te hajÿr pit, cu ha me hajÿr to me pamōr mã mã, ma me pamōr ita kam me to pancrà tu. Pom pê catyt kam ramã ampeaj kam me pamã to hahkre xà ata na.

¹⁷ Me ikjêjê, pom wa me akam mare mã ampo ton to mō ita na, ca me ipynãr kam me to acrà tu ne. Ne ma hanea ne amji caxuw mam ikôt me ipa catêjê atajê te amji kam me hapac xà atajê na mehkōpÿr to me apa, ne me gâhkōpÿr xà atajêa kôt me amji ton to me apa.

Me hàhtōa pê Crixto curê xwÿn kêanre

Carati 6.12-13

¹⁸ He pê wa ramã me amã awjarëa, na wa ha hipêr icwÿar kam me amã harê. Ne mehkwy te amji kam me hapac xà kêanre, ne me cupê Jeju curê xwÿn, na ri me to hÿjarën to:

— Por pê pÿ kam Jeju ty ata, ampo na hamreare, ne nee jÿ na xà caxuw impej nare — hane. ¹⁹ Atajê quê ha amjia kôt amji to me hamre to mō, ne me hamre. Ampo na? Nee mã ampo na nare. Cute me hajÿr xà atajê, quê ha me to hamre. He me hãpàn pê ri ihhêj rÿm me hō Pahpãm. Ne mehcunea mã cute ampo ton xà kam mehpahãmti atajê ton to me ipa. Ne cormã mehcunea mã, cute ampo kam mehpahãmti ton xà ata pyrên me amji jakryti na me amji jarën to ipa, ne nee ajte amji jÿ na amehpahãm nare. Ne pjê kam ampo itajê to pit mã amji kam me hapac to me ipa, ne nee Pahpãm to ajte amji kam me hapac to me ipa nare.

Me papê cōjkwa te amji kam hapac xà catêjê

²⁰ Ne me pa, cu ha nee ame hajÿr nare. Ampo na? Cōjkwa kam quêt me pahkrÿ xà, to cu ha me amji japackre to me papa. Ne cu pahtÿj, cute me pahkên pê me pahpytär catê pê me pajō Pahhiti pê Jeju Crixto te curüam ajpên ihtëm na me hikaj. ²¹ Quê ha Jeju jÿ caxuw me pajÿ peacre, ne ihtyc atajê to antuw. Quê ha me pajÿ pê Jeju jÿa pyrãc, ne ampeaj kam impej ne ihtÿj. Na cu ha jÿ caxuw me pahnō pahtyc nare. Ampo na? He mehcunea jirōa pê Jeju carôt tÿj, na ri pyxit peaj ne mehcunea to ihmipej.

Cu ha pahtÿj me pahcunea Jeju na me pahhōnco kam me to pancrà

Coroxo 3.15

⁴ Imã me ikjêjê kÿnti atajê, ampeaj kam me ato ijapac xà! Pê wa ajco me amã Jeju jarkwa jarën

pejti to ipa, pê ca me awpa ne ihkōat me amji ton to me apa, na ri me apê me imã ijakryti ton catêjê. Na wa itÿj me pajapên xà itajê kôt mehcunea mã me apejti na me ato ijàmnãn to ipa. Ne imã me gÿcanãar kam me ate Jeju na me ajpên hōnco tu kam me to acrà tu na, me ato prãm.

² Yhÿ me ikjêjê cahãj pê Ewotikwÿj me, Xintikwÿj ata, he ca ihhêj ne atÿj ajpên krac ri ame acakōc to me apa, na wa ha me awÿr xà ita to me awÿ he:

— Nee ca me ajpên mãn to me acuhhê tu nare. Ampo na? Me apê Pahpãm kra impeaj. Ne mër ampo na mã ca ajte ame ajpên mã? Hipêr me hajÿr nare — hane. ³ Ne ca, ikwÿ nō Xixic, he apê ijō ikwÿ nō peaj, na wa ha awÿ, mãr ca ajpên caxuw pyjê atajê japackre, ne hacpÿ mã ajpên na me axō. Pê wa pyjê atajê me, Cremënti me, por icahê na me hãpên catêjê atajê me, pê wa ajkaam me apê, ite me Jeju pê me pahkritxwÿ jarën xà impejti incràn xà caxuw, pê wa me to ijàpên catia. Atajê japÿr ramã Pahpãm jō kãhhōc kam hikwa, cute cahê na amji to me ipijapar rohnÿtti mã xà caxuw.

⁴ Ne imã me acunea te Jeju kam me ajpên hōnco tu kam me gakryti na me ato prãm. Na wa me amã:

— Me gakrya ne — hane!

Quê ha Pahpãm me pamã amji carÿcti gō

⁵ Ca ha ajpên pê me akrã to arêr nare, ne quêt mehcunea kam mare mã me gâhcjãrënti, jãhcaprÿhti to me apa. Ampo na? Quê ha ahtÿm nare, quê ha me pajō Pahhiti amji jaxà. ⁶ Ne nee ate amji mã ampo na prãmte xà ata na apu amji to pō mã quê to apa nare, ne quêt cama amji na Pahpãm wÿ. Quê amã ampo itajê gō, ca nee hahpan xà na cumã gakryti na amji jarën to gapac kêt nare. ⁷ Ca ha ate me ite me amã ampo jarën xà itajê cunea ton na, quê ha Pahpãm me amã amji carÿcti jör to hanea, pom quê ihcarÿcti he, ne me amã ampej partu, Jeju kam ate me ajpên hōnco tu ita kam. Quê ha jÿmjê me apupu ne me amji mã:

— Jÿ mã mã ajte cute me, ne mehkên xà atajipōc ri mehcãrÿcti? — hane. Hōhō, quê ha cute me ana Pahpãm caca xà jahkre pej nare kam, me ato ihcakōc to hane.

Cu ha ampo pej to pit mã amji kam me pajapac to pa

pa

Roman 12.1-2

⁸ Ne ite me amã ihhōc xà ita jicu xà kam wa ha cormã me amã ampo to ihmipej. He mōrmō ca amji kam me gapac xà na me amji cukij to:

— Ampo to mã wa ha ajte amji kam ijapac to ipa? — hane. He, ampo te ôjtō itajê to, wa ha me amã hahkre he:

Mam ita pê ri ampo pejti, kam ampo kên nare ata to, ca ha me amji kampa.

Ne ihkôt ita ri he, jÿm jãpên xà impejti na pajãhtätti xà ata to, ca ha me amji kampa.

Ne ihcote na ita ri he, ampeaj kam ampo to mehhêj xi xà nare ata to, ca ha me amji kampa.

Ne ihkôt jūm caca xà impejti tūm nare ata to, ca ha me amji kampa.

Ne hapu na ita ri he, por Pahpām mā ampo cunea impejti atajê to, ca ha me amji kampa.

Ne ihkôt ita ri he, por ampo na nee jūm cakôc xà kên nare ata to, ca ha me amji kampa.

Ne hapua na ita pê ri, por ampo me pahcajpuaw ata to, ca ha me amji kampa.

Ne ihcahur ita pê ri, ampo to me pahcakôc xà impejti ata to, ca ha me amji kampa.

Hõ, ampo itajê to ri ate amji kam me gapac xà he.

⁹ Na pê ca me ijarkwa ita pa, ne me ite amji kam ijapac xà ita pupu, ne me hahkre pej, ne ihkôat ca ha catyt kam me apa. Hõ, Pahpām te me pamã me pahcarĩcti jör xà ata quê ha me amã cugõ, ne ihtyj me acahê na ipa rohnýtty mã.

Pawrô te amji kam hapac xà kam hakrya to hakry

¹⁰ Pajõ Pahhiti cãmtà rūm ri, ite amji kam ijapac xà kam ijakrya to ijakry. Ampo na? He pê ca rý pëa mã ajco gõ pore to me ijamã. Jirô pê mã ca nee hipêr ate gõ pore to me ijamãr nare. Ne corpej mã ca ate hacpÿa mã me gõ pore to me ijamãr kam me atēm. Ne atyj ate me ito amji kam gapac na imã me gahkre pej, ne jū wÿr ca ha cama me amji mã hamã. ¹¹ Wa nee, jūm te imã hikran na, to amji kam ijapac nare, ne nee ipê ampo hamreare na amji to icakôc nare. Ampo na? Wa ite ramã ita ton to amji pyrãc tu, ampo cunea kam. ¹² Ampo na? He pê wa ramã amji na ite amji kam ijapac xà itajê cunea pãjpãj partu. Ne imã ite amji kam ijapac xà na ipê ampo hamreare na, imã amji kîn nare nare, ne hanea ne imã ampo catia na ite jū mãn nare. He pê wa amji na ijaquêc xà pãjpãj itajê kam, wa ihcunea to amji tekjê. ¹³ Ne pom ite amji kam ijapac xà itajê cunea kam, wa Jeju carôat kôt ijūcanãr to ipa.

¹⁴ Ne ate ite amji pupun xà kēanre itajê na me itehcajpar ata na ri, imã ihkênre nare. ¹⁵ Ne pê wa mam ite me amã Jeju jarên pejti jarên xà ata jõ amcro cakônĩ na, pê ca me, me gõ pore to ajco me itehcajpa. Pê wa me gõ pjê pê amji to icator xà ata kam, pê ca cormã ampÿa mã ajco me itehcajpa. He me gakrã ata pyxit peaj te me itehcajpar na, ihtyj me amãa amji jahkre

pej. Ne ate me itehcajpar xà ata na, pê hanea ne Pahpãm ajco me atehcajpa.

¹⁶ Taa mã xãmte cormã ihnõ he. Pê wa Texarõn jõ krĩ kam apu ipa, pê ca ajco atyj ite ampo na prãm xà ata to me itehcajpar to me apa. ¹⁷ Nee mã hipêr ate me Timot me imã ampo jör xà na, wa me amã ita jarên nare, ne hipêr Pahpãm pê ate amji mã me ampo cwÿr, na ri quêt imã me ato prãm. ¹⁸ Mã ita ri Epaprôti cator ne cute me imã, ate me imã ampo jör atajê jör. Ne pom ihkãhhôc ita pê ate imã ampo jör xà atajê jõ kãh-hôc.

Pawrô mehkwÿ pyrên hakrya

Ne ampeaj kam ca ate imã ampo na ijãhwÿr xà itajê jirôa pê hõr. Na ri ampeaj kam imã amji kîn ne ijakry. Ne Pahpãm mã ate me imã ampo jör xà itajê impej te hajÿar, pom quê cumã ampo kūm cuxwati pãr prãm he. Ne me pahte me cupê ampo jamreare atajê mã ampo jör xà atajê pê ihhêj rūm Pahpãm mã pahte me hõr xà, ne ampeaj kam cumã ita na ihkîn. ¹⁹ Ne imã me pajõ Inxū Cati pê Pahpãm ihtyj me amã ampo na ate mehprãmte atajê jör na, me ato prãm. Ne nee quê ha amã ihkênre ne hõr nare, ne amã catia ne cugõ. Ne quêt Pahpãm catia to cati, ne hanea ne Jeju Crixto mã hàhcukrêj to hakràaj to hakràj, na ca ha ampo na me wÿ, quê ha nee amã ihkênre ne hõr nare, ne amã hàhcukrêj to me hakràj to ipipëan xà atajê gõ.

²⁰ Ne imã mehcunea te me pajõ Inxū pê Pahpãm catia to cati na, cute me hahkre pej ne amji mã me harên na imã me to prãm, rohnýtty mã. He ampeaj kam!

Pê Pawrô me cumã amji jarên kujate

²¹ Hàpà, me apê Jeju Crixto tekjê, wa me ato amji kjê atajê. Ne pom ita ri me pahkjêjê icahê na ame ipa itajê te hajÿar ne me amã amji jarên kujahêc. ²² Ne por Pahpãm tekjê na me ipa atajê cunea te me amã amji jarên kujahêc. Mã hanea ne ita ri Roman catêjê jõ pahhiti jürkwa kam mehkrĩ atajê te me amã amji jarên kujahêc.

²³ Ne imã me pajõ Pahhiti pê Jeju Crixto te me amã ampejti na me ato prãm. Hamre, ita pit.

COROXO

Ÿhÿ, Pawrô pê Jeju jarkwa na memprar catêjê nõ, ne Roman jô krí kam, me hacjên xà kam ihkrí, ne pê Coroxo jô krí kam Jeju na mehkwy jakrà mehkri atajê mã hõ kàhhôc ita kujate. Na pê hõ kàhhôc ita japry pê (Coroxo). Ne pom cu me hõ kàhhôc cahyt ita kam, Pawrô te me cumã mehhêj xi catêjê cawpa to hajÿr he. Mehhêj xi catêjê te Jeju pê jũm xũmre pejti na me cumã harên, ne cupê Pahpãm kra nare na me cumã to ihhêj. Ne ampeaj kam ri cupê Pahpãm kraa to Pahpãm kra, na quê ha nee iràn xà na amji na me jũm to tojnõ, quê me cumã cute amji kam hapac xà to ihhimpej nare.

Pawrô te amji jarên xà

1 ¹⁻² Hàpà, me ikwy pê Jeju na mehkwy, ca Coroxo jô krí kam me akrí atajê. Ne Jeju Crixto kam me apê me ikjêjê impejti atajê. Ne me apê me ate catyt kam, Pahpãm jarkwa kôt me apa na me amji to ihtÿj tu atajê. Ipê Pawrô pê Pahpãm jarkwa kôt Jeju te amji mã ito cumã harkwa na imprar catê ata, ne itea wa me amã ihkàhhôc ita kujahêc, me pahkjê Timot me. Ne me imã me pajô Inxũ Cati pê Pahpãm me, me pajô Pahhiti pê Jeju Crixto te me ato impejti na me ato prãm, mãr ca me acaxwÿn me, me ate amji kam me gapac xà cunea kam me amã ampo cupa nare, ne me acarÿcti kam me apa.

Pawrô te me cute Jeju to amji mã mehhimpej na me harên par

¹ Texarõn 1.2-5

³⁻⁴ Ne wa ite ita ri Roman jô krí kam mehkri itajê te amji mã me garên to hajÿr na mempar he:

— Coroxo catêjê ihtÿj Jeju Crixto to me amji kampa, ne ihtÿj amji mã me to ihhimpej to me ipa, ne hanea ne me cumã Pahpãm na mehkwy cunea kîn — hajÿr. Cwÿrjapê wa Pahpãm pê me pajô Pahhiti pê Crixto Pãm mã me icakôc, ne ijôtpê cumã me apyrên ijakryti na me amji jarê. ⁵ Ne pê ca me gaxà kam Jeju tyc xà jahpan xà na, jũ caxuw cõjkwa kam Pahpãm te amji cahê na me ato ipijapar pejti ata na, ca me harên pa, ne me gakryti kam me amã amji kîan kam me hikaj to me apa. Ampo na? He ampeaj kam quê ha me ato hane. Cwÿrjapê ca atÿj Jeju to amji mã me ahimpej ne me amã mehkwy cunea kîn na, ca ha atÿj amji mã mehkinti to me apa. ⁶ Ne Jeju tyc xà jahpan xà na, Pahpãm cahê na cõjkwa kam pahte amji to me papijapar xà impejti ata jarên, ramã pjê cunea kam apu ihc-ahkũm. Ne pjê cunea kam me hàhtôa ne me cupê me apyràac, ne ihtÿj amji mã me hũpar xà itajê kam me hapac to me ipa. Ne Pahpãm jarkwa kôt me amji ton to me ipa. Cwÿrjapê ri ajteare mã me amji kampa, ne catyt kam mehkwy to me amji kwÿ to mempejti to me ipa. Hõhõ, pom ca Pahpãm te amji kam hapac xà to me amji kampa ita to ri, me amji kam hapac to me ipa.

⁷ Ne pê ramã ijarkwa kôt me pahkjê Epapra me amã Pahpãm te me akinti na harê. Ne me imã Epapra te hũjarên catê ata kîn hyre nare, ne cupê me ipyràac ne Jeju mã, me icahê na, me amã hàpên to kênre nare.

⁸ Ne cute amji jaxàr ne me imã me ate Pahpãm Carõ Pejti kôt, ate amji mã mehcunea kinti na me garên.

Pawrô hõtpê Pahpãm mã mehcajrên

Epet 1.15-23; 3.14-21; 1 Texarõn 5.23-24

⁹ Wa ite mempar, cwÿrjapê wa nee Pahpãm mã, ite me acajrên jicu nare, ne hõtpê cumã me acajrên to: — Ÿhÿ me ijô Inxũ Cati, ca ha Coroxo jô krí kam me akwy atajê mã Acarõ Pejti te amji jahkre pejti gõ, mãr quê ate ampo cunea na ihprãmte atajê ton to me cumã hahkre. Ne me cumã mehkri kreti gõ, mãr quê me ampo cunea kampa, ne me hahkre pej — hane.

¹⁰ Hõ, ate amji kam me gapac xà atajê to, ca ha me amji kam gapac to me apa, ne gõtpê Pahpãm mã ampo kinti atajê to pit mã me cumã to me apa. Ne atÿj me gâpên xà impej pit to me gâpên to me apa kam me to acrà tu ne. Ne ma Pahpãm jahkre pejti to amji mã me apicamên to me amõr ita to, wa Pahpãm mã icakôc, ne cumã me acajrên. ¹¹ Ne wa hanea ne Pahpãm mã acajrên to:

— Ÿhÿ, ca ha me cumã acarôt tÿjti, catihtu ata to me cumã hũcanâr xà to ihtÿj, mãr quê ampo kên cunea mã me hakrya kam me awcanã — hane.

¹²⁻¹³ Ne ramã Pahpãm te ame acũmpej, kÿj pê cõjkwa kam ihhimpej xà kam, cute me amã ampo pejti to hàmjõr xà atajê caxuw. Cwÿrjapê ca ha atÿj Pahpãm mã me ampo itajê pyrên me gakryti na me amji jarê. Ÿhÿ, Pahpãm pê ri hàhcujro pràti himpej xà ata jô Pahhiti, na ri ihtÿj ampo cunea pupu ne cumã hahkre pej. Cwÿrjapê ri ihtÿj me pamã to ipipê to ipa, pahte me hahkre pej prãmte. Ne me pahcurê xwÿn pê ri ihkinte awcapàtkô jô pahhi, na ri nee me pamã ampo to ipipê nare, pahte me hahkre pej cupate. Mã Pahpãm te awcapàtkô jô pahhi ata pê me pahcunea caxàr, ne amji wÿr me pahto cator, ne cute cumã ihkra kinti ata himpej xà kam me paxãm. ¹⁴ Mã ihkra pê Jeju te ihtyc xà mã amji jõr xà ata te Pahpãm cuna mã me pahte to kên xà atajê cunea to tojnõ, ne to hamre tu. Cwÿrjapê cu nee awcapàtkôti kam ampo kên ton xà ata to hipêr

amji na me hajÿr nare, ne pahtÿj Jeju krac ri ame papa. Ne ampeaj kam Jeju Crixto pej na, wa ha hipêr me amã harên to hane he.

Jeju me hàpên xà kôt harên xà

¹⁵ Jũ wÿr quê jũm pjê ita kam Pahpãm jĩ na hõmpu. Ne Jeju pê ihkra, ne cume ipipêan cacrô, pê pjê kam apu ipa reria mã, pê cu pahtÿj hĩ na ajco me hõmpu. Ne pê pjê te amji ton xwÿjrea na ramã ipa. Ne pjê me cõjkwa kam ampo itajê cunea jirôa pê cati. ¹⁶ Ne pê Jeju, Hũm jarkwa kôt, cõjkwa kam ampo cunea me, pjê kam ampo cunea to. Ne hanea ne, pom cu pahtÿj me ampo pupu itajê to, ne hanea ne, pom cu nee me ampo pupun nare itajê to. Ne hanea ne me carõ carôt tÿjti atajê to. Ne ahpÿanre na me carõ kwÿ mã carôt ton partu, cute me pahhi carôt tÿjti ata mã hàpên xà caxuw. Ne amji mãa pê ampo itajê to. ¹⁷ Ýhÿ, pê mam ajco Jeju ipa, pjê jamre reria mã. Ne Hũm pê Pahpãm jarkwa kôt amji mãa, ampo itajê cunea ton partu, ne taa hamã, ne ma hõmpu, ihkên mã hàr ne hamre cuate.

¹⁸ Ne me papê Jeju na mehkwy itajê cunea pê Jeju jĩ, mã cupê me pahkrã, cute me pahto ihhimpej ne me pajamãr xà caxuw. Ne cupê me papê mehkwy te amji kam hapac xà xakat. Ne pê ramã mam ajco ipa, ne pyxit peaj ne cupê ampo cunea xakat. Ne ty, ne hacpÿa mã pyxit peaj ne ihtÿr cakõnĩ ata to ihtÿr, mãr quê ampo cunea jirô pê cati. ¹⁹ Ne pê Pahpãm amji mã harkwa to:

— Wa ha ikra ita me ajpêan — hane. Cwÿrjapê ri cume ipipêan, ne me carôt pipêan.

Quê ha Jeju Pahpãm me, me hũmre te hacpÿa mã ajpên kĩn na me to

²⁰ Ne pê pjê kam mehcunea me, cõjkwa kam me hàhtõti atajê kwÿ me, ma ame Pahpãm par caca, ne cama cuna mã mexa tÿj pyrentu. Cwÿrjapê pê Pahpãm ame kam incryc. Ne cu cormã pjê kam me pahkwÿ ame hajÿr to me papa, cwÿrjapê ri cormã me pahkam Pahpãm cryc ita na. Ne cute hacpÿa mã ajpên mã me caprĩ prãm to ri, cute pjê wÿr ihkra pê Jeju kujahêc, quê pjê kam me pahkên jahpan xà na, me pajaxà kam, pĩ kam ty. Ne ihtyc xà ita to hacpÿa mã Pahpãm te amji wÿr ampo itajê cunea to cuprõn na ton, na quê ha to cuprõ.

²¹ Ýhÿ Coroxo jõ krĩ kam me apê me ikwy atajê, pê ca mam Pahpãm pê ampÿa mã ame apa, ne ate Pahpãm cuna mã me ampo kên ton xà atajê, me ate ampo kên to me amji kam me gapac xà atajê to pê me apê curê xwÿn. ²² Mã Pahpãm te ihkra pê Jeju tyc xà ata kôt, hacpÿa mã me amã caprĩ, ne me ato amji kwÿ nõ. Na ri cuna mã me ate amji kam me gapac xà tetetti, ne me apejti kam me apa ita na ri, cumã me ana prãm.

²³ Hõhõ, Pahpãm te me pamã ampo pejti itajê cunea ton to hajÿr. Na cu ha pahtÿj cute me pamã harkwa jirên atajê kôt me papa kam me to pancrà tu ne. Ne nee ca cõjkwa kam Pahpãm cahê na ate amji to me

apijapar rohnÿtti mã xà ata na, amji to me gapac kêt nare. Ne pom ite me amã Jeju pê me pahkritxwÿ jarên pejti na ihhõc itajê to, wa ramã pjê cunea kam ite me cumã icakõc par. Ne ijàpên xà ita ri imã.

Me cupê mehcahkrit atajê wÿr, Pawrô pê Pahpãm mã imprar catê

Epet 3.1-13

²⁴ Ne ijàpên xà ita pê me amã ijũjarên xà impejti itajê, wa kam amji pupun xà kêanre to amji pupun to ipa cacrô, wa itÿj ijakry. Ne mÿr ampo na mã, wa ite amji pupun xà kêanre itajê kam apu ijakry? Nee mã ampo na nare. He quêt Pahpãm te amji kam hapac xàa kôt, wa ite mehkwy to impej xà caxuw, wa me cumã ijàpên xà itajê kam amji pupun xà kêanre to ipa. Ne Jeju na mehkwy itajê pê Jeju jĩ pyrãac. Na wa ihhêj rũm ipê Jeju pyrãac ne cuxà, itÿj mehkwy itajê mã hàpên xà ita kam, amji pupun xà kêanre to amji pupun to ipa. ²⁵ Ne pê Pahpãm amji mã ito mehkwy mã hàpên catê na, ite me to impejti to prãm to. Cwÿrjapê pê imã:

— Mõ, ne pjê cunea kam, mehcunea mã ijarê, nãmri wa hacpÿa mã cute me ajpên mã caprĩ na me to prãm! Cwÿrjapê wa ite pjê wÿr me cumã ikra pê Jeju ata kujahêc — hane. Na wa ite me acunea mã harkwa itajê jarên partu. ²⁶ Ne pom Pahpãm te imã hũjarên xà to hũjarên ita, pê rÿ jũ caxuw jũm mã harên nare. Ne curmã ri cute mehkwy mã to ipipê, ne ihtÿj me cumã to hũjarên to ipa. ²⁷ Ne wa ha catyt kam me amã ampo atajê kôt harên partu ne. Pom pê mam me ijũjarên xà pejti me papê amxu tu ita te ri hajÿr he, pê Jeju me pamã amji gõ ne me pahkam ihkrĩ. Cwÿrjapê ri me pahcaxwãm pê me papê Pahpãm pyrãac. Na cu ha jũ caxuw ame pahcati ne ame pampej to hanea, pom quê Pahpãm he.

²⁸ Cwÿrjapê wa pjê cunea kam ikrã kreti te amji jahkre pejti kôt mehcunea mã Jeju Crixto jarên to ipa. Ne me cumã ampo kên itajê cawpa to ipa, quê mehkên jicu, ne catyt kam me Pahpãm wÿr me apkjê. Hõ, wa me to hajÿr to ipa, mãr quê jũ caxuw cute catyt kam me ipa to amji pyrãc to hajÿr romã mã, Jeju kam me amji hõnco ita na Pahpãm cahê na mehkri. ²⁹ Cwÿrjapê wa ijàpên xà tÿjti ita to me cumã ijàpên to ipa, ita cõmrĩa mã ri Jeju te imã carôt catia ne hõr.

Pawrô mã cute Pahpãm te amji kam hapac xà jahkre pej na me to prãm

Epet 3.14-19

² Ýhÿ me ikjêjê, wa itÿj me amã ijàpên xà ita na amji kôt harên to prãm. Nãmri wa itÿj me amã apê, ne hanea Ratixa jõ krĩ kam me pahkwÿ pê Jeju na mehkwy mã apê, ne hanea ne me pahkwÿ te cormã nee me ipupun nare atajê mã apê. ² Ne wa itÿj me acunea mã ijàpên to prãm. Ampo na? Ate me ajpên kĩnti kam me to acrà tu, ne kam me to ahõnco tu to prãm to. Mãr ca nee ame amji mã ampo cupa nare, ne cama cuna mã quêt amji to amehtÿaj to prãm. Ne imã me ate me Jeju Crixto jahkre pejti na me ato prãm. Ne pê mam Pahpãm nee me pamã Jeju to ipipê to hajÿr,

pê cu me hahkre pej to hajÿr nare. Ne ita caxuw ri quêt Pahpãm mã mehcuea te Jeju Crixto jahkre pej na me to prãm. Cwÿrjapê wa itÿj me amã ijapên to ipa. Ampo na? Ate ihcunea na me hahkre pej partu to prãm to. Mår ca ate me hahkre pej itajêa kôt ampeaj kam amji mã me to ahimpej. ³ Ne Jeju pê ri me pamã ampo cunea to hahkre pej xà xakat. Ne ihkôat ri Pahpãm me pamã me pahkrã kreti gô. Ne imã me akrã kreti to me gakràj na me ato prãm. Cwÿrjapê ri ampo to ite me amã hahkre xà itajê pê ijapên xà.

⁴ Ampo na mã wa ame amã ijÿjarên xà ita to awjarê? Nee mã ampo na nare. He ihhêj ne ramã jÿmjê te ame amã ihhêj xi catêjê atajê ame ipa, cute me amã ihhêj prãmte. Ca ha nee ame kam gapac nare. Ampo na? He me cupê ampo jahkre kêatre. Ne me cumãa ihhêj ne ampeaj kam ampo jahkre pej, ne cama ame amã ihhêj. ⁵ Wa ita ri me apê ampÿa mã, me hacjên xà kam ikrÿ, na wa ha nee ijÿ ita to curi ame acahê na imôr nare. Cakrô, quê ha ite amji kam ijapac xà me, icaca xà ihtÿj me acahê na apu mō. Ne wa ite me ate Jeju kam me amji hōnco na me gahkre pej. Ne toa ate amji mã me ahimpej na me amji to ihtÿj tu na, ite me gahkre pej. Ne hanea ne ramã ite, me ate amji mã me gâhcuprôn partu na me gahkre pej. Na wa me apÿrên apu ijakry.

⁶⁻⁷ Pom ca ramã Jeju Crixto pê me gô Pahhiti to amji mã me ahimpej ita? Na ca ha ita caxuw kam me ahōnco ita na ame to apa, quê ha taa xwÿjê pê me ate amji kam me gapac xà xakat. Na ca ha ihkôat amji mã me gÿpar to me apicamên to me mō. Ne ca ha hanea ne Jeju to ate amji mã me ahimpej ita na, me amji to ihtÿj tu ne, por pê ramã Epaprôti me amã Jeju kôt harên xà atajê kôt. Na ca ha hanea ne Pahpãm mã me amji jarên to me hane he:

— Ÿhÿ, me ijō Inxÿ, he akra ita kôt wa amji mã me ampo pejtÿ itajê cunea incwa, na ri hÿrên ampeaj kam me ijakry — hane.

Cu ha nee jÿm te amjia kôt me pamã ampo to hahkre atajê par nare

⁸ Co he, quê ihhêaj to jÿm me awÿr cato, ne amji kôt me apa na me ato prãm ne me amã:

— Imã ampo cunea jahkre pej, na ca ha me ipynã ne ijarkwa kôt me apa — hajÿr na, ca ha nee mempar ne me cumã amji jōr nare. Ampo na? Nee mã ampo na nare. Cute me amã menquêtjêa te amji kam hapac xà kôt hamreare atajê to hahkre prãmte ri ame amã ihhêj. Ne cute me amã ampo to hahkre xà itajê Jeju Crixto pÿn me acaxuw cumã hapōj nare, ne amjia kôt ihkrã pÿn cumã hapōj.

⁹ Ne Jeju Crixto pê ri pō rÿm me hÿmrea pyrãc, ne caxwãm pê, cupê Pahpãm to Pahpãm. ¹⁰ Ne Jeju kam me pahcunea te me ajpên hōnco tu itajê mã, nee iràn xà na, ampo na prãm nare. Ampo na? He Jeju ata ri me cupê pahhi catêjê cunea jirō pê cati, me hÿmre jō pahhi me, cōjkwa kam pahhi catêjê me, ampo carō pê me pahcurê xwÿn catêjê jō pahhi atajê jirōa pê cati, ne carôt tÿj.

Pahte amji kam me pajapac xà pintuw xà

¹¹ Ne pê Juta catêjê te Pahpãm kôt me ipa catêjê na me amji jarên xà na, ajco me amji py kà jakep. Ita jÿkjê na mã, me apê mehcahkrit pê Juta catêjê nare cakrô, mã ihtÿj Jeju te me apê me acaca xà kên cunea cahpêrhyr. Na ca ha Jeju te amji kam hapac xà intuwti to amji kam me gapac to me apa. Ne me acaca xà kên atajê cunea jicu. ¹² Pom pê Jeju ty, pê me harêt, pê hacpÿa mã ihtÿr ne kre pê cato ita jÿkjê na, cu ha Jeju kôt me papa xà na, pahte me amji jarên xà caxuw, cō kam me amji cumrã, ne hacpÿ ne me pahkrã hapōj, ne ramã cō caxwãm pê, pahte amji kam me pajapac xà tÿm kên atajê cunea juwahi. Ne Jeju te Pahpãm carôt catihti ata to amji mã ihhimpej to hajÿr, cwÿrjapê pê hacpÿa mã to ihtÿr. Jÿkjê na cume pahte carôt catihti ata to amji mã me pahhimpej to hajÿr cwÿrjapê, pê cō kam pahte me amji cumrãr xà ata hacpÿa mã me pah-to ihtÿr. Na pê cu mam ajco pahte amji kam me pajapac xàa kôt me papa. Na cu ita kam hipêr ita na me prãm nare, ne quêt Jeju na ri me pamã prãm.

¹³ He pê ihhêj ne ramã mam Pahpãm mã me acaxwÿn te amji kam hapac xà itajê ihtyc partu. Ampo na? Pê ca ate amji kam me gapac xà kên to pit mã me amji kampa na pê. Ne me apê mehcahkrit, na pê me apê Pahpãm jahkre kêatre. Mã hacpÿa mã Pahpãm te ihkra Jeju Crixto kôt me amã me acaxwÿn carō cunea to ihtÿr. Ÿhÿ, he Pahpãm cuna mã me pahte ampo kên ton xà atajê ri cute ihcunea jicu, ne to tojnō. ¹⁴ He pê cumam, pahte me pahkên cunea to, me Pahpãm to new catia to cati. Na pê ma hō kãhhôc kam ajco amji mã ahna ihhêc to ipa. Ne pahte me to new catihti atajê jahpan xà na, cu ha ame ty ne nee amehtëp nare, ne cupê ampÿa mã ame papa. Mã quêt Jeju te amji to me pahkritxwÿ, ne me pahkên jahpan xà na pÿ kam ihtyc. Cwÿrjapê ri hahpan xà na Pahpãm te hō kãhhôc kam pahte me to new atajê cunea hur, ne to hamre, ne to hapac kêt. ¹⁵ Ne pÿ kam Jeju tyc xà ata te ri pahhi catêjê jirōa pê to cati. Ne cute me cupê me pahhi catêjê cunea carôt to ihpec. Na ri cupêa pjê kam mehcuea jō pahhi atajê me, kÿj pê cōjkwa kam pahhi catêjê atajê me, me pahcurê xwÿn pê ampo carō kên jō pahhi atajê jirōa pê cati. Ne Jeju te, catihti na mehcuea mã amji to ipipê xà na, amji kôt cute me to-hjê atajê cunea to mō. Mår quê mehcuea me hōmpu, ne me hirōa pê cati na, me hahkre pej.

Menquêtjê te amji kam me hapac xà pê me harkwa cakrô

Carati 4.8-11

¹⁶ Na quê ha jÿm te me amã Pahpãm to hahkre to kêanre to prãm to me amã:

— Ca ha ate amji to me Pahpãm cajpuaw to prãm na, ca ha ite me amã ampo jarên xà atajêa na me to. Ne nee ame hÿ kur nare, ne me ajcri. Ne nee ame akôm xà kêanre atajê to ame akôm nare, ne me pahkôt xà jō amcro kam, ca nee ampo to ame gâpên nare. Ne catyt kam me amji kÿn ton to me apa, putwÿrÿ pintuw jō amji

kĩn mea mã. Hõ, ca ha ijarkwa kõt ate itajê to me hajÿr na, ca ha me Pahpãm cajuaw. Nãmri ca ha ate ijarkwa kaj na me itajê to hajÿr nare na, quê ha ma Pahpãm ame acurê — hajÿr na, ca ha nee ihkõt amji kam me gapac nare. ¹⁷ Ampo na? Nee mã ampo na nare. Pê cormã Jeju cator nõ reia mã, mam cute me amji kam me hapac xà itajê to xwÿ kam me amji kam hapac nare. Ampo na? He pê ramã cute me amji kam hapac xà atajê ajco Jeju to ihcakõc na pê. Mã Jeju cator, mã cute mehcunea jicu. Na ri me pamã Jeju pit na prãm.

Cu ha pjê ita kam, cute amji kam me hapac xà kõt ame papa nare

¹⁸ Ne quê ihhêaj to jũm te me akên mã me amên prãmte me amã ihhêj to:

— Pahpãm te ipyxit peaj mã amji to ipipê, wa ite hõmpun, cwÿrjapê ca ha atÿj me ikampa. Nãmri ca ha ate me ipar nare na, ca ha atÿj me akên mã me axà — hajÿr na, ca ha nee me kam gapac nare. Nare, quê ihhêaj to jũm me amã:

— He me girõa pê Pahpãm cati, cwÿrjapê ca ha me cumã acakõc, quê ha ma ame akam hapac caca. Cwÿrjapê ca ha cõjkwa kam cumã me hàpên catêjê mã me acakõc, quê ha ihtÿj quêt me akampa ne me taa, cumã me acajrên — hajÿr na, ca nee me kam gapac nare. Ampo na? He ihhêj ne jũmjê atajê te amji jahkre peaj to amji jahkre pej, ne amehhêj. Me cupê amji jahkre kêatre. Ne me caxwãm pê ihhêj ne me cumã amji catia to me cati cakrõ, mã ihhêj ne me akam mare mã mehkryjre na me amji jarê. Ne nee me cupê Jeju na mehkwy nare. ¹⁹ Ne me papê Jeju na mehkwy pê hĩ cati pyrãac. Mã cupê me pahkrã. Pom hãn ne me pajĩ cuxêc ihhi to cuprõ, mã ajkam ihcuhhê, ne to carõt tÿjti, ita na ri me papê Jeju na mehkwy te me, ne kam me ajpên hõnco tu. Mã ma me pamã me pahcarõt to ipicamên to mõi, cu me pahkà to mõi, Pahpãm te amji mã me pahto prãm xà ata na.

Cu nee amjia kõt Pahpãm cuna mã me amji to impejti nare

Carati 3.1-5; 5.1-9

²⁰ Ne por me pajõ Pahhiti pê Jeju Crixto tyc xà ata te me pahte amji kam pajapac xà tũm kêanre atajê cunea to hamre. Cwÿrjapê cu pahte amji kam me pajapac xà intuw pejti ita to pahtÿj ame papa. Na quê ha nee ampo carõ kên jõ pahhi catêjê atajê hipêr me pahcaxun nare. Nõ na mã ca ajte cormã ame akên xà itajê ton to me apa? Ne ajte cormã ampo carõ kên te amji kam hapac xà itajê to amji mã me ahimpej to me apa?

²¹⁻²² Ne ihhêj ne cormã cute me amã ampo cawpa ihhêj xi xà to hajÿr catêjê ame ipa he:

— Nee ca ampo ita pyr nare, ne nee ca garkwa mã gõ nõ ita mên ne capi nare, ne nee ihnõ ita cupên nare — hane. Ca ajte atÿj cormã ampo atajê na ame kampa? Por ramã ampo cunea hamre to mõi, ne ihkõt hamreare xà ata na? Ne cute me amji kam hapac xà itajê pê me hũmrea te amji kam me hapac xà, na ri amjia kõt cute me ton to me hahkre. ²³ Na ri ihhêj ne cute

me amji jahkre peaj to me amji jahkre pej. Ne Pahpãm mã nee cute me amji jahkre pej nare, ne me cupê amji jahkre kêatre. Ne aricri ajte cute amji mã me Pahpãm kìn xà ata. Mã ihkaj na ajte cõjkwa kam cumã me hàpên catêjê ri amehkìn. Ne me cumã me caxwãm pê ihhêj ne amji catia to cati cakrõ, mã me akam mare mã mehkryjre na me amji jarê. Na ri hanea ne hõtpê me ipijacri xà atajê to, me amji jĩ to hapêj to kêanre to me ipa, cute Pahpãm cuna mã amji to me kryjre to prãm to. Ne me Pahpãm mã, amji cuna mã ampo itajê na prãm nare. Ampo na? Ampo itajê nee me pahkên tète me pahcahpêrkàr na me pahtehcajpar nare.

Cu ha cõjkwa te amji kam hapac xà intuwti atajê kõt me papa

Roman 6.4-11

³ Pê Pahpãm hacpÿa mã Jeju to ihtĩr, ne ihkõt me amã me ate amji kam me gapac xà to antuw, ne cume mã mã me amã me acaxwÿn carõ tuw gõ. Cwÿrjapê ca ha, por Jeju Crixto cõjkwa kam Hũm cahê na Pahhiti krĩ xà kam, awpõc rũm jÿ ata to pit mã, amji mã me ahimpej to me apa. ² Ca ha kÿj rũm, cõjkwa pĩn Pahpãm te amji kam hapac xà intuw hapõj atajê to pit mã me amji kam gapac to me apa, ne nee pjê te amji kam hapac xà tũm ata to pit mã me amji kam gapac to me apa nare. ³ Ne pom ca pjê ita kam me cupê Pahpãm na mehkwy nare atajê kõt, me ampo kên ton to me apa nare ita pê, me cumã ihhêj rũm, ramã me atyc. Ampo na? Ca nee mehkõt me ampo kên itajê ton to me apa nare na ri. Ne Pahpãm mã me apê Jeju Crixto pyrãac, na ca ha jũ caxuw amcro nõ kam, cahê na apu apa rohnÿtti mã, ne cormã me apê amji jahkre kêatre. ⁴ Ne Jeju Crixto quê ha amã ate amji kam gapac xà to ate apintuw xà gõ, ne hacpÿa mã ato intuw, ca ha atuw ita na apu apa rohnÿtti mã. Ne quê ha jũ caxuw, amcro nõ na, hacpÿ ne amji jaxà, ne mehcunea mã catia to cati, ne impejti na amji to ajpê. Ata caxuw ca ha cume mã mã me amji to ajpê, quê ha mehcunea me acati, ne me apejti na me apupu.

Cu ha me pjê te amji kam hapac xà tũm atajê jicu

Epet 4.17-5.2

⁵ Cutêp ca ha nee ate me ampo kên ton xà na amji to me ahimpej nare. Ampo na? Quê ha ramã jũm te ihtyc na, quê ha ankrê, ne nee hipêr ampo kên ton nare. Ata pyrãc pej ne, ca ha ate me ampo kên ton cupate, me apinkrên to me hanea, pom quê me ty ne me ankrê he. Ne pom ampo te hajÿr xà itajê ri nee ate me ton xà nare he:

Ca ha nee ahti na jũm pê ihprõ caxun nare, quê ha pyjê xwÿjê nee ahti na me cupê mempêjê caxun nare. Ne nee ate me cuprÿ catêjê na gũjaxõr prãmte, ame caxun to me cumã xwÿ to apa nare.

Ne nee ame ampo xen xà kên atajê xen to me apa nare.

Ne nee ate ampo to amji jakren tu to prãm to catia ne ahna prãm nare.

Ampo na? He Pahpām mā, ampo itajê kîn nare te hajyr, pom quê cumā pahpām cahàc krekà atajê kîn nare he. ⁶ Co he! He cute me Pahpām par nare, ne me ampo itajê ton catêjê kam incryc, mā hân ne ihtyj mehkên mā me curê. ⁷ He mam pê ca ajco ampo itajêa to amji kam me gapac to me apa. Ampo na? Pê amcro atajê na ampo atajêa ajco me ato ihhimpej.

⁸ Na ca ha ita caxuw nee me akwÿ kam acryc to apa nare.

Ne nee apu gâprê to apa nare.

Ne nee ame ajpên curê to me apa nare.

Ne nee ame hûn kêanre to me apa nare.

Ne nee Pahpām mā ampo kên kîn nare atajê to, me gapactua kam, ame acakôc to me apa nare.

⁹ Ne nee ajpên mā amji to ame ahêj xi to apa nare.

Ampo na? He ca ramā ate amji kam me gapac xà tûm atajê cunea jicu, ne me ate amji kam me gapac xà intuwti to, ca ate me apa kam me to atêm.

Cu ha pahte amji kam me pajapac xà tuwti kam me pa-pa

¹⁰ Ne Pahpām pê me Pahton catê ata te ri me amā, me ate amji kam me gapac xà tuwti ita jôr, ne ma to ipintuw to môr ita na, ita kam ca ha me ate amji kam me gapac xà pê cute amji kam hapac xàa pyrâc. Na quê ha ihtyj jû caxuw me amā amji to ajpê, ca ha me hõmpu ne me hahkre pej. ¹¹ Na quê ha ita caxuw pahte amji kam me pajapac xà cunea ajpên pit, ne nee ihnõ ajpên hyr nare. Me ipê Juta catêjê me, me apê mehcahkrit me, mehĩ me, cupê me, ampo kra me, amjia kôt amji mā me hâpên catêjê me, ne cama me hõ pahhi mā me hâpên catêjê me, quê ha nee me pah-nõ to ajpên hyr nare. Ne cu ha me pahcunea te Jeju Crixto to amji mā me pahhimpej na, cu ha ma Pahpām cahê na amji to me papijapar rohnÿtti mā. Ne pahte amji kam me pajapac xà pipên pit, ita pê Jeju te amji kam hapac xàa. Cwÿrjapê cu pyxit peaj ne ahna me prâm.

¹² Ne me apê Pahpām na mehkwy. Pê amji mā me akîn ne amji mā me acapi, ne amji mā me acûmpej, cwÿrjapê ri cumā me apeaj to me apej. Na ri catyt kam me apa xà itajê te hajyr he:

Ca ha ame akwÿ caprĩ, ne ihcunea na me cumā apejti ne,

ne nee me hirôa pê amji to me acati to prâm to apa nare.

Ne quêt gâhcaprĩa kam ate amji kam gapac xà rericre to me cumā apa.

¹³ Ne atyj ajpên mā me gûcanâr to me apa.

Quê ihhêaj to jûmjê apu ato kên, ca ha nee amji jahpan xà na me to kên prâm nare,

ne quêt cama me to tojnõ ne me hicu.

Ne me pajõ Pahhiti te ramā me acunea te to kên atajê jicu, ne to tojnõ, ne me akam incryc jicu, ita na ca ha cuxà ajpên kam me acryc jicu.

Cu ha ajpên kam me pahcarĩcti ne

¹⁴ Ne pom ite me ato ihimpej xà ita ri ihkwÿ jirôa pê cati he: Ca ha me acunea mā ajpên kĩnti ne, mâr ca me acunea Jeju kam me ajpên hõnco tu ne. ¹⁵ Ne atyj, Jeju te me ato ihhimpej xà na, amji na me hamā, quê me acaxwÿn mā acjêj ne me akam ihkrĩ, ne me amā ate amji kam me gapac xà kam me acarĩcti gõ. Ita na ca ha me acunea ajpên kam me acarĩcti ne. Ne ihhêj rûm me apê me anõ pyxit peaj pyrâc, ne ajpên kam me apyxit peaj, ne ajpên kam me acarĩcti ne, ne nee ame apijapu nare, ne nee ame ajpên mân nare. Ne cama Pahpām pyrên me gakryti na cumā me amji jarê. Hõhõ, ate amji to me apijapar to hajyr xà caxuw ri, Pahpām te me ana hàhwÿr.

Cu ha Pahpām mā me cre

¹⁶ Ne pom Jeju Crixto te me amā ampo to hahkre xà ita ri hakràaj to hakràj ne cati, cwÿrjapê ca ha ma me akrã kam me to amji jahôt to me apa. Ampo na? He taa mā quê ha quêt me amā amji jahkre pejti gõ. Ca ha ma ate me amji jahkre pejti xà atajê to, me akwÿ mā hahkre, ne me hapackre to me apa. Ne hanea ne mam Pahpām te amji kam hapac xà na me ahna increr xà ata to me cumā cre, ne cute ampo ton xà itajê na curmā me cumā increr xà ata to me cumā cre. Ne kam me amā amji kĩnti to me cumā cre, ne catihti pyrên me gakryti to me cumā cre. Ne cumā me acrer xà atajê to, ca ha me akwÿ japackre, ne me cumā to hahkre.

Cu ha Jeju te amji kam hapac xàa na me pahcakôc

¹⁷ Ne pom ca me acakôc xà me, me gâpên xà ton to me apa atajê to, ca ha Jeju cakôc xà me, hâpên xà me ajpêan to me apa, ne nee ihkaj na ton to apa nare. Ne ma Pahpām pê me pajõ Inxũ Cati te me amā ihkra pê me pajõ Pahhiti pê Jeju kujahêc, mā cupê me pahkên pê me pahpytâr catê, ita pyrên, ca ma Hûm mā me amji jakryti na me amji jarê.

Cu ha cute me hapackre xà itajê kôat me amji to

Epet 5.22-6.9

¹⁸ Ýhÿ, pyjê pê me apjê prõ atajê, ca ha atyj amji caxuw me apjê kampa, ne harkwa kôt me apa. Nãmri ahnaa ri Pahpām pê Pahhiti te amji mā me ato prâm.

¹⁹ Ne me apê me aprõ impjê atajê, ca ha atyj amji mā me aprõ kĩnti ne. Ne nee ame cumā me gâkjêr nare, quê ampo na ame apê ihkrã to irêr na, ca me cumā aprĩa ne me cumā to ahimpej.

²⁰ Ne me apê mehkra xwÿjê, ca ha atyj me amji mā me apãmjê me, me axyrxwÿ kampa, ne amji mā me hûpahti to me apa. Ampo na? Ate me ita ton na ri Pahpām mā me ato prâm.

²¹ Ne me apê me hûmjê xwÿjê, ca ha nee me akra mā amehpec xà ton, quê ame cumā amji kîn nare nare.

²² Ne me ca, me apê cama me cumā me gâpên catêjê, ca ha atyj amji caxuw me gõ pahhi kampa. Ne

me cumã gâpên xà cunea to impejti to me apa. Ne nee me gâpên xà pejti na cute me garên prãmte ahêj ne, mento kam mare mã me gâpên xà to mempejti to me apa nare. Ne quêt me cumã gâpên prãam kam me gâpên to me apa. Ampo na? Ca ha ate ampeaj kam amji mã Pahpãm pê Pahhiti cupa na, ca ha catyt kam me cumã gâpên to me apa. ²³ Ne pom ca gâpên xà cunea to gâpên to apa atajê to, ca ha me gâpên prãam kam gâpên to me apa, to hanea, pom quê, ca Pahpãm mã pit mã me gâpên prãm to, to me apa he. ²⁴ Ne Jeju Crixto pê ri quêt me gô Pahhiti, na ca ha atyj me cumã apê, quê ha taa me amã amgô, por cute mehkwy pê mehkwy mã hãmjôr xà impejti xir ata to. ²⁵ Ne por me hâpên xà kêanre ton to me ipa atajê jahpan xà na, quê ha ihtyj Pahpãm me cumã amgô, quê ha mehkên mã me axà. Ampo na? Nee mã ampo na nare. He Pahpãm quê ha ahpãnre na me pahte me pajâpên xà ton atajê jahpan xà na, catyt kam me pamã hãmjôr pa.

4 Ne hanea ne me apê me hõ pahhi catêjê, ca ha catyt kam amã me hâpên catêjê to amji kam me gapac to mempejti to me apa, ne nee ame cumã ahêj nare. Ne hanea ne me amã cõjka kam, kÿj pê Pahhiti te ihkrĩ na, ca me to amji japackre peaj ne.

Cu ha Pahpãm mã me pahcakôc kam to me pancrà tu ne

Ruc 18.1-8; 1 Petrô 3.13-17

² Ne ca ha me acunea hãn ne Pahpãm mã me acakôc kam pra, ne kam me to acrà tu ne. Ne to pit mã me amji kampa, ne nee iràn xà na ampo to ame amji japackre nare. Ne ate me cumã acakôc xà cunea kam hûren gakryti na, me cumã amji jarê. ³ Ne hanea ne cumã me icajrên to hane he:

— Ýhÿ me ijô Inxũ, ca ha Pawrô me Timot te me hàhtôa mã akra Jeju jarên xà wÿr me cumã pry jahkjê. Por rÿ jũ caxuw cute me Jeju Crixto jarên kam hapac nare ata to, quê me cumã awjarê, quê me kampa — hane. Pê wa ajco ijũjarên to hajÿr to ipa, cwÿrjapê pê me hacjên xà mã me ijaxà, pê wa kam ikrĩ. ⁴ Cwÿrjapê ri ate ina me Pahpãm mã me acakôc na imã me ato prãm, mãr wa catyt kam hirãa pê me cumã ihcunea kôt harên to impej partu ne. Ampo na? He ite ijâpên xà ita ton xàa caxuw ri Pahpãm te imã hõr.

Cu ha amcro cunea kam me cumã Jeju to me pahcakôc

⁵ Ne me cupê Jeju na mehkwy nare atajê to catyt kam amji kam me gapac to impejti to me apa, me akrã kre te amji jahkre pejti ata kôt. Na ca ha jũ ri ate me cumã Jeju jarên xà caxuw jũmjê cajpar na, ca ha nee me ahna gâhtat nare, ne atyj me cumã Jeju jarê. ⁶ Ne quê ha jũmjê te Pahpãm na acukij na, ca ha me cumã cute me acakôc xà par prãmte atajê to, ca ha me cumã harê. Mãr ca me cumã ampi ne akrã kreti te amji jahkre pejti ita kôt, me cumã harên to amji rericre ne.

Quê ha Pawrô me cumã Tiquicô me Oneti kujate

Epet 6.21-22

⁷ Ne wa ha ma me awÿr me pahkjê impejti kĩnti pê Tiquicô ita kujate. Por cupê me icahê na catyt kam Pahhiti mã hâpên catê impejti ata, ne ihtyj hãn ne amji jarkwa na amji par to ipa. Ne taa mã quê ha me amã, ipej pêa mã ame ipa na me ijarê. ⁸ Ca ha me ijarên pa, ne ampeaj kam ate me ijarên par xà ita pyrên me gakry. ⁹ Ne quê ha ihkôt amũ me akwy nõa pê Oneti, pê me pahtô kĩnti te amji jarkwa par catê ata mō. Ne quê ha ihtyj me amã ita ri ampo cunea te hajÿr xà atajê jarên pa.

Pê Pawrô me cumã amji jarên kujate

Coroxo 2.1

¹⁰ Ne pom me hacjên xà kam Aritarcô icahê na ihkrĩ ita te me amã amji jarên kujahêc, ihkâhhôc ita kam. Ne hanea ne Macô pê Parnap quêtta kra ita te me amã amji jarên kujahêc. Ne quê ha curi hacpÿ mã Macô me awÿr cato, ca nee ite mam ahna me ato ihimpej xà ata kaj na ame to kêen nare, ne atyj quêt ahna me amji cãpa.

¹¹ Mã hanea ne Jojuw japry krut pê Catytkam ita te me amã amji jarên kujahêc. Ne me hũmre incrê peaj itajê ri ita ri icahê na Pahpãm himpej xà mã me apê. Ne me cupê Juta catêjê na mehkwy, pê hanea ne Jeju na mehkwy mã me axà. Mã mehràn xà na, nee hipêr Juta catêjê nõ te icahê na hâpên xà nare. Ne ramã cute me itehcajpar crire nare, ne cute me hàhtôa ne Pahpãm wÿr me to ipipkjêr, mã ihkrac ri me hàr, ne me cupê Pahpãm na mehkwy. Na ri me kam ijakryti.

¹² Ne Epapra pê me akwy nõa, ne cupê Jeju Crixto mã hâpên catê ata te hanea ne me amã amji jarên kujahêc. Ne hãn ne hõtpê xwy kam me amã Pahpãm na hàhwÿr to hajÿr to ipa nare he:

— Ýhÿ, me ijô Inxũ Cati, ca ha Coroxo jô krĩ kam me akwy mehkri atajê mã me carôt to ihtyj, mãr quê ampo te me to kêen xà ata jipôc ri, nee ato amji mã mehhimpej jicu nare. Ne quêt ato pit mã amji mã mehhimpej to me ipa to me amji jĩ tÿj. Ne ma ate amji mã cute me ampo ton xà na me to prãmte atajê ton na mehtehcajpa quê me to — hane. Hõhõ, hãn ne Epapra Pahpãm mã me acajrên to hajÿr to ipa.

¹³ Ne Epapra te me amã hâpên xà tÿjti catia ton, wa ite ahna hõmpun itajê na, wa ha me amã harê he. He ihtyj me amã Pahpãm jarkwa to hahkre to ipa, ne cumã me acajrên to ipa. Ne pom me amã hâpên xà to ita to ri hanea ne Ratixa jô krĩ me Krĩmpejre kam Pahpãm na mehkwy mehkri atajê mã apê.

¹⁴ Ne hanea ne Ruc pê me pahcahhê catê kĩnti ita me Tema te me amã amji jarên kujahêc.

¹⁵ Ne wa ite Ratixa jô krĩ kam me pahkjêjê kwÿ mã me ijô hàpà kujahêc. Ne hanea ne Nempakwÿj me hũrkwa kam Jeju na mehkwy te me cuprôn atajê mã, ite mehkujahêc.

¹⁶ Ne imã ate akrãhhia kam, cute me cuprôn atajê mã ate ihkâhhôc ita cahyt na, ato prãm. Ne hanea ne

Ratixa jǒ krĩ kam ate cahyt xà ata to jũm te cahyt na me amẽ, quẽ jũm cahyt. Ne por pê wa ramã mam Ratixa jǒ krĩ kam Jeju na mehwỳ wỳr ijǒ kàhhôc kujate ata, ca ha apy ne cahyt to hanea, pom quẽ ate ita cahyt he.

¹⁷ Ne hanea ne Arquipo mã gũjarẽn to hane he:

— Por Pahpãm te amã gápên xà jǒr ata, ca ha to ihkrã curan partu ne — hane.

¹⁸ Ne pom ihkàhhôc cahhur ita, wa ite ijũkra ita to me amã ihhôc. Ipê Pawrô, ne pa wa ha me amã ihkàhhôc ita kujate. Ne nee me hacjên xà kam ikrĩ ita na, me Pahpãm mã icajrẽn to me gapac kêt nare. Ne imã Pahpãm te me acunea to impejti na me ato prãm. Hamre.

1 TEXARŌN

Ýhÿ, pê Pawrô pê Jeju jarkwa na membrar catêjê nõ. Ne pê Texarŏn jŏ krĩ kam Jeju na mehkwy jakrã mehkri atajê wÿr, pom cu me hŏ kãhhŏc pijakrut cahyt itajê kujate. Na pê mam hŏ kãhhŏc ita japry pê (1 Texarŏn). Ne Pawrô te Jeju to amji mã mehhimpej to me ipa, cwÿrjapê ri me cupê Pahpãm tekjê nare atajê ame to kêanre, mã cute me amji pupun xà kêanre to me amji pupun. Ne hŏ kãhhŏc ita kam, Pawrô te me cumã catyt kam Pahpãm kŏt cute me hũcanãar kam me ipa kam me to incrà na hãpŏr. Ne cute me cumã hacpy ne Jeju te amji jaxàr, ne cute me pahcunea to cŏjkwa wÿr hãpir na harẽn.

Pê Pawrô me cumã amji jarẽ

Me Hãpên Xà 17.1-9; 17.13-15

1 Hàpà, me ikjêjê, pom ca Texarŏn jŏ krĩ kam me akrĩ atajê, Pahpãm me, me pajŏ Pahhiti pê Jeju Crixto tekjê na ame apa atajê. Ipê Pawrô, mã icahê na Xira me Timot ame ipa. Wa ha me ikjêjê itajê me, me amã ihhŏc ne me amã ihkujate. Wa Pahpãm mã me acunea cajrẽn to ipa, ne me acunea caxuw Pahpãm me, me pajŏ Pahhiti pê Jeju na ijãhwÿr to ipa, quê me amã me apejti jŏr to ipa, ca me acarĩcre kam me apa.

Pê Texarŏn jŏ krĩ kam Jeju na mehkwy ihtÿj ihkŏt me amji to

2 Me apê Pahpãm kŏt me apa catêjê impeaj. Ampo na? He cutea ri me amã acarŏt jŏr, catyt kam me apa xà caxuw. Wa ita pyrẽn ame ijakry ne ijŏtpê me Pahpãm mã me garẽ, me apyrẽn me ijakryti na. **3** Wa Jeju to me ate amji mã me ahimpej na me ato amji japackre, ne ampo pejti to pit mã me apipẽ to me apa, ne me gãhcaprĩa kam me gãpẽn to catia to me apa, ne Jeju mã me amji jŏr to me apa. Ca hŏtpê Jeju pê me pajŏ Pahhiti te amji kam hapac xà ata na, me gũcanãar kam me hikaj to me apa. Wa ahna me atoa amji japackre, ne Pahpãm pê me pajŏ Inxũ Cati mã me acarjẽn to ipa.

4 Me ikjêjê, me imã, Pahpãm te amji mã me acapi, ne cumã me akĩnti na, me gahkre pej. **5** Wa ite me amã Jeju pê me pahkritxwÿ jarẽn xà impejti jarẽn, ne nee wa me ijarkwa cakrŏ to pit mã me amã ijũjarẽn nare. He wa hanea ne Pahpãm Carŏ Pejti carŏt tÿjti pejti kŏt me ato me ihmpej to ipa, ne pom wa me amã ijũjarẽn xà to ijũjarẽn to ipa itajê ampeaj kam ri. Wa ite me hahkre peaj xà na me amã harẽ. Por pê wa ajco me acahê na apu ipa reria mã, me acaxuw ampo pej to pit mã amji kam ijapac to ipa, pê ca ajco ahna me ipupu. Ne ramã ate ampo itajê na me ijahkre pejtu. **6** Ne ate me Jeju jarkwa pyr ne ihkŏat me amji ton, ne hanea ne ate ikŏat me amji ton, ne hanea ne me pajŏ Pahhiti kŏt me amji ton. Ne icuxà ate me amji pupun xà kên kwÿ to ame amji pupun. Ampo na? Por me cupê Jeju na mehkwy nare atajê hŏtpê ame ato kêanre cakrŏ, ca ate

Pahpãm jarkwa kŏt me amji ton. Cwÿrjapê ri Pahpãm Carŏ Pejti te me amã gakryti jŏr.

7 Cwÿrjapê ri me pahkjêjê cunea te ahna me apupun. Por ame Maxeton jŏ pjê kam, me Crec jŏ pjê kam me pahkjêjê amehkri atajê cunea te ramã me gahkre pej. Ne ahna impejti, ne quê ha ita na me gahkre pej, ne me acuxà me ita to hane. **8** Ca ate me pajŏ Pahhiti to amji mã me ahimpej. Ne mër ampo na mã me ato me hũjarẽn xà itajê pjê cunea kam apu ihcãhkũm? Me acwÿrjapêa ri apu ihcãhkũm. Mã gŏ pjê pê Maxeton jŏ pjê ata kam, cute me ato me hũjarẽn par, ne hanea ne Crec jŏ pjê kam ate Pahpãm to amji mã me ahimpej ata na, me ato me hũjarẽn par. Cwÿrjapê ri hanea ne me acuxà, cute Pahpãm to amji mã me ihmpej. Ne hipêr ite me amji to me amã icakŏc xà nare. Ampo na? Ramã mehcunea amji mã me ato mehcaŏc to me ipa. **9** Ne krĩ cunea kŏt amji mã me garẽn to me ipa. Ampo na? Ca ate ampeaj kam pahpãm cahãc krekà tète me amji jũhhyr, ne quêt Pahpãm tĩar kŏt amji kam me gapac. Ne ampeaj kam ri Pahpãm ihtĩar na ipa, ne taa pyxit peaj ne me pahto ihmpej. Na ca ha cumã me gãpẽn to me apa. **10** Ne pê Pahpãm ihkra Jeju to hacpy mã ihtĩr, ne me ca, ca atÿj hacpy ne cŏjkwa pĩn cute amji jaxàr xà na ame hikaj. Ampo na? Taa mã quê ha Hũm te mehkên catêjê wÿr mehkên xà kujahêc xà ata pê me pahpytã. Quê ha Pahpãm ma amji tète apu mehkên catêjê curê, ne nee quêt amji tète ame pahcurê nare.

Pê Pawrô me cumã to hahkre to impeaj ne

2 Pê wa me awÿr icator xà ata kŏt hamre nare. Pê wa me awÿr me icato, ne Jeju pê me pahkritxwÿ jarẽn xà impejti to me amã harẽ. Pê ca atÿj Jeju to amji mã me ahimpej, ne me acunea te ramã me hahkre pej. **2** Pê wa me awÿr icator xwÿjrea na, Pirip jŏ krĩ kam me ito kên crire nare, pê wa me amji pupun xà kêanre to me amji pupun crire nare. Pê ame ixũn xà kêanre to ame ixũn cakrŏ, pê Pahpãm me imã icarŏt to ihtÿj, pê wa Jeju jarẽn pejti to me amã harẽ. **3** Pê wa nee me amã ihê xi to ijũjarẽn nare, ampeaj kam pê wa me amã awjarẽ. Ne nee wa me amã ihê xi to prãm to me awÿr me icator nare. **4** Pê Pahpãm me ikujate, wa Jeju

jarĕn pejti to me amã harĕn to me ipa. Cwÿrjapê pê wa nee jŭm te hakry xà na ame ijŭjarĕn nare, ne quĕt Pahpãm te me pahkam hakryti prãmtē, pê wa me icato. Ne ame amã ijŭjarĕn to me ipa, por Pahpãm me pahpupu ne me pahcajpĕr to ipa ata. ⁵ Nee wa ihĕj ne amji cwÿrpê ame ato ikwÿ nõ nare. Ne nee ate me imã ampo jŏr xà na, wa me amã ijŭjarĕn to apu iprar nare. Pahpãm me, me ate ita na me ijahkre pejtu. ⁶ Wa nee jŭ caxuw me anŏ te me ipejti na me ijarĕn na me prãm nare. Ne me ipê Jeju jarkwa na me iprar catĕjê cakrŏ, wa nee jŭ caxuw jŭm te amji mã me icupa na, imã me to prãm nare.

Pê Jeju Texarŏn jŏ krĭ wÿr Pawrŏ kujate

Ne nee jŭm te me awÿr me ikujahĕc nare, ne Jeju pê quĕt amji mã me icapi, ne me awÿr me ikujate cakrŏ, wa nee me amã icakŏc tÿaj to me ipa nare. ⁷ Ne me amã icakŏc pejti to ipa, pom hãn ne menxyrxwÿ mehkra mã ihcakŏc tÿj nare, ita to pê wa ajco me amã icakŏc to ipa, ne pê wa ajco me amã icakŏc tÿj nare to ipa. ⁸ Ne imã me akĭan to me akĭn. Cwÿrjapê wa itÿj me amã Pahpãm pĭn Jeju jarĕn pejti hapŏj itajê jarĕn prãm. Ne cormã ita jipy cumã me akĭn ita kam, wa itÿj me acwÿrjapê me ityc prãm, ne imã me akĭn ne me gapĕti incwÿrjapê. ⁹ Me ikjĕjê, por pê wa me ijãpĕn xà to atajê na me ito amji japackrea ne. Pê wa hanea ne ijãpĕn xà itajê kam amji pupun xà kĕanre to amji pupu. Pê wa amcro me caxwa kam me gŏt cwÿar ajco me ijãpĕn to me icuhhĕ, ate me imã me gãmjŏr nare prãm to. Hŏ, pê wa ajco me ato hajÿr to ipa, ne me amã Jeju pê me pahkritxwÿ jarĕn xà impejti to harĕn to ipa.

¹⁰ Pê wa ampeaj kam catyt kam ajco me ipa, ne nee pê wa me ampo kĕn crire nõ ton nare. Ne nee pê wa ampo to ajco me amã me apahãm ton to ipa nare. Pê ca ramã ita na me ipupu, ne me ijahkre pej, pê Pahpãm hanea ne ramã ahna me ipupu ne me ijahkre pej. ¹¹ Ne ramã ate amji na me ijahkre pej, wa me ato ijãpĕn to ihhĕj rŭm me hŭmjĕ te mehkra to hãpĕn ita na, wa me ato apê. ¹² Ne wa ita na itÿj me arãn to me ipa, ne ahna me amã hakam to me ipa. He wa nee ampo caxuw ame gapackre nare, mãr ca ampeaj kam me awpa ne catyt kam me apa. Quĕ Pahpãm me apyrĕn hakryti to ipa xà caxuw, wa ame gapac caxun to me ipa. Nãmri Pahpãm te ihtÿj me ana hàhwÿr, ca mehk-wÿ mã axà, quĕ ato impejti to ipa. Ne quĕ ha jŭ caxuw amcro nõ na, mehcunea Pahpãm himpej xà kam me ajÿr na me apupu, hŏ amcro jãhcujrohti ata kam. Ita caxuw ri Pahpãm te me ana hàhwÿr.

¹³ Cwÿrjapê wa hŏtpê me ana Pahpãm mã icakŏc, ne cumã me apyrĕn me ijakryti na me amji jarĕ. Ne Pahpãm te ito ihhimpej xàa kŏt pê wa ajco me ato ihimpej, pê ca ihhimpej xàa kŏt me amji to. Ne me gŭpar pyrentu, nãmri me icakŏc xà ita pê nee me hŭmre nõ pĭn cator nare. Pahpãm pĭn pê hapŏj, pê ca ramã me hahkre pejtu. Cwÿrjapê pê ca me gŭpar pyrentu, ne Pahpãm jarkwa kŏt ame amji ton to me apa. Mã harkwa ita me atĕte hãmtãr to ipa.

Pê mam Pawrŏ ramã amji pupun xà kĕanre to me amji pupun to ipa

¹⁴ Me ikjĕjê, pê ca, me akwÿa kam ramã me amji pupun xà to kĕn crire nare. Ne por pê ca me amji pupun xà kĕn atajê kwÿa to, pê wa ramã me amji pupu, Juta catĕjê jŏ pjĕ kam Jeju na mehk-wÿ pê mam me amã me amji pupu. ¹⁵ Ne Juta catĕjê pê Pahpãm na mehk-wÿ nare atajê, pê me pajŏ Pahhiti pê Jeju cura, ne hanea ajco me Pahpãm jarkwa to mehcakŏc catĕjê cura. Ne pê hanea ne me ito hanea, ne ma amji tĕte ame icurĕ. Ne nee Pahpãm mã me hakry jŏr to me ipa nare, ne ihtÿj mehcunea curĕ to me ipa. ¹⁶ Ne Juta catĕjê mã, pê ite mehcakrit atajê mã Pahpãm jarkwa jarĕn ita na, ihkaj na. Wa ite Jeju te mehcakrit pê Juta catĕjê nare atajê pytãr xà to, me cumã ijŭjarĕn na, me cupĕ ihkaj na. Mã cama mentĕte me ijuwahi to prãm. Ne pom me ijuwahi to prãm itajĕa ri cormã nee cute mehkĕn ton to me hicu nare. Ne ampo kĕn to pit mã me amji japackre to me ipa. Cwÿrjapê quĕ ha Pahpãm uu ne me kam incryc jicu nare.

Pê Pawrŏ hipĕr Texarŏn catĕjê pupun prãm

Me Hãpĕn Xà 17.10-13

¹⁷ Ÿhÿ, me ikjĕjê, pê wa ma me apê me pra, ne me ijŭ to pit mã me hawry, ne pahte amji kam me pajapac xà, nee ajpĕn pê hŭwry nare. Ne ampeaj kam me ato ijapac xà, cwÿrjapê ri hipĕr imã me apupun prãm crire nare. ¹⁸ Ne me ikjĕjê kwÿ me, wa me awÿr me ikrãr. Ne pa, ipê Pawrŏ, wa me hirŏa pê me awÿr ikrãr cakrŏ, mã me pahcurĕ xwÿn te jŭ mã me iton, ne me ijuwahi, wa nee me awÿr me iprar nare. ¹⁹ Na wa me apyrĕn ame ijakry catia, ne me acwÿrjapĕa ri me ijãpĕn xà itajê kŏt hamre nare. Ite me ana ijãpĕn xà ita cunea tohĕj, ne ijŏtpê mehcunea mã me ato me ijŭjarĕn pejti to me ipa. Ne por quĕ ha amcro nõ kam, Jeju te amji jaxãr xà ata kam, cu ha me pahcunea cuna mã me ahtwÿ ne me pahcuuhĕ. Ne ampeaj kam, quĕ ha me akam me ijakry, amcro ata kam. ²⁰ Ÿhÿ, ampeaj kam ri me apyrĕn me ijakrya to me ijakry. Wa hãn ne itÿj me ato mehcunea mã me icakŏc to me ipa.

³ Jicu xà kam, wa nee hipĕr ahte ame ipa xà ita mã me ijŭcanãr nare. Cwÿrjapê wa Atĕn jŏ krĭ kam me ijãhhuç. ² Ne ite me awÿr me pahtŏ Timot kujahĕc. Ne me pahtŏ Timot ita me Pahpãm jarkwa na apê, ne me icahĕ na Jeju jarĕn pejti to harĕn to ipa. Wa me ite me awÿr mehkujahĕc, cute me arãn ne me atehcajpar, mãr ca ampeaj kam Jeju to amji mã me ahimpej to me apa xà na. ³ Mãr quĕ me akwÿ nõ ame acurĕ, ca jŭmjĕ itajĕ cupate nee Jeju kŏt amji ton to hicu nare. Ne ate me ampo kĕn itajĕ mã me gŭcanãr xà caxuw, pê Pahpãm amji mã me girĕ. Ne ramã ita na me ate me amji jahkre pejtu. ⁴ Pê wa cormã me akam ame ipa reria mã, me amã ampo kĕn itajĕ na me pahte amji pupun ita, pê wa me amã harĕn hiahpuro, ate me hahkre pej prãmtē. ⁵ Na wa ite me awÿr Timot kujahĕc, ite me garĕn par prãmtē. Ampo na? Jŭ wÿr wa me gahkre pej nare kam, hipĕr me awcanã. Mãr ca

ampeaj kam Jeju to amji mā me ahimpej, ne ihkôt me amji ton to me apa, wa me garên pa, ne me ijakry. Nāmri imā me ana pa, quē ihhêaj to me pahcurê xwÿn jū na me ato, ca Xatanaj kôt me amji kampa, ne Jeju to amji mā me ahimpej jicu. Nāmri ca ha ate me ita to ha-jÿr na, quē ha me ijâpên xà itajê kôt hamreare ne.

Pê mehkwy te Jeju to amji mā mehhimpej pyrên Pawrô hakry

⁶ Ne ma ramā Timot me awÿr tē, ne ramā cute amji jaxâr ne cute imā me garên pejti to me garên. Ca ampeaj kam Jeju to amji mā me ahimpej to me apa, ne me ajpên to impejti to prām to me apa. Ne atÿj me ito me amji japackre to me apa, ne me amā me ipupun prāmte hajÿar, pom quē imā me apupun prām he. ⁷ Wa ita ri me amji pupun xà kêanre to me amji pupun to me ipa, ne kam amji jahkre kêatre to ame ipa cakrô, mā Timot te, ca atÿj ame apa na, imā me garên. Wa me ijūpar, ne me apyrên ite me ijakry to me amji rân. ⁸ Ca Jeju to amji mā me ahimpej to me apa, cwÿrjapê wa ite me ijakry to me amji rân. Ca Jeju kôt me atÿaj kam me amji ton to me apa, cwÿrjapê wa me ijakrya kam me amji to me ipijapar to me ipa. ⁹ Ne wa Pahpām kam mare mā me apyrên me ijakry cati, ne me ana me Pahpām mā me icakôc cati. ¹⁰ Ne wa caxwa me amcro kam, Pahpām na me ahwÿa to me ahwÿ, me ina cuhkônre cunea to, quē me ana me ijamā, wa me itoa to me apupu. Quē ihhêaj to ate Pahpām to amji mā me ahimpej xà ata kam, me apê ampo hamre na, wa ha cormā me amā to hahkre.

¹¹ Wa Pahpām me, me pajō Pahhiti pê Jeju na me ijâhwÿr to me hajÿr he, quē me imā me awÿr pry ita to impej, ne ihkôt me ikujate me awÿr. ¹² Wa hanea ne ahna me ijâhwÿr, quē hân ne hōtpê me amā ajpên kîn-ti ita to ipicamên to ipa. Ne hanea ne me amā me akwÿ cunea kînti ita to ipicamên to ipa. Ne ate me ajpên kîn ita, quē ha ipicamên to mō, ne me ite me akîn ita me ajpêan. ¹³ Na quē ha me amā me ana cuhkônre to ihtÿj. Cwÿrjapê ca ha me apej pit, Pahpām pê me pajō Inxū Cati cuna mā, ne nee ame apahâm nare. Quē ha me pajō Pahhiti Jeju, por ihkôt me ipa catêjê atajê to ajpên mō, ca ha me cuna mā apejti to xa.

Pê Texarôn catêjê pyrên Pahpām hakry

Roman 13.11-14; Epet 5.3-14

⁴ Ÿhÿ me ikjêjê, wa ha hipêr me amā ampo jarê, ne me amā to hahkre. Ne wa ramā ite me amā to hahkre, ca me ate me hahkre pej, ne ramā Pahpām kôt me apa to me ate me amji pyrâc. Cwÿrjapê ri me apyrên Pahpām jakry. Ne wa cormā me pajō Pahhiti pê Jeju japrÿ na me ana ahwÿ ne me gapackre, mâr ca hipêr ihkôt me apicamên to me mō. ² Ne ramā me pajō Pahhiti pê Jeju jarkwa kôt ite me amā ampo kwÿ to hahkre, ca ramā ate me ampo itajê jahkre pej, ne me hōmpun.

³ Ne ampo itajê na ri Pahpām mā me ana prām he: Ca Pahpām jarkwa kôt catyt kam me apa. Ne nee ahti na ame pyjê to me axy nare.

Ne amji na me apahâmti to me apa.

⁴ Ne hanea ne Pahpām mā me ate catyt kam me aprô to me amji prô impejti na cumā me ato prām.

⁵ Ne nee me apê krîxâre kwÿ pê Pahpām jahkre kêatre atajê pyrâc, ne cama me aprô to ame apahâm nô prām nare, ne me to amji prôa ne.

⁶ Ne pahte mehprô cahkrit to me caxun ita na ihkaj na. Ampo na? Ca ha ramā nee amji mā impjên ata cupa nare.

Wa ha hipêr ampeaj kam me amā harê, pom ramā ite me amā harên ita, quē ha Pahpām ihtÿj cute ame ampo itajê ton jahpan xà na me to kêanre ne.

⁷ Pê nee Pahpām ampo itajê caxuw me pahna hàhwÿr nare. Catyt kam, harkwa kôt, pahte me papa xà caxuw pê quêt me pahna ahwÿ. ⁸ Quē ha jūm apu ite ampo to hahkre xà itajê caca na, quē ha nee me paxūmre nô jarkwa caca nare, ne Pahpām jarkwa quē ha apu ihcaca. Por Pahpām te me pamā Carô Pejti jôr ata quē ha apu ihcaca.

⁹ Wa nee hipêr ate me ajpên kîn na me amā ihhôt prām nare. Nāmri pê ramā Pahpām me ate me ajpên kwÿ kîn to me amā hahkre. ¹⁰ Ne me ate me ajpên kîn-ti ita to, ca ramā Maxeton jō pjê kam ame akjêjê kîn to me apa. Ne wa ha cormā me ana ahwÿ, ca hipêr me ajpên kînti ita to me amji mā me ajcamê.

¹¹ Ne gōtpê me acarîcti kam me apa na, ca me ahcukij. Ne hanea ne me ate amji kam me gapac xà atajê to pit mā me amji mā me ahimpej to me apa. Ne me gâpên xâa to me amji to ajpa to me apa. ¹² Ca ha ate me itajê cunea ton to me apa na, quē ha me cupê Pahpām na mehkwy nare catêjê ihtÿj amji mā me acupa to me ipa. Ca ha nee ate ampo na me prām xà atajê kôt ame jūm na prām nare.

Quē ha Jeju cōjkwa wÿr me pahto api

¹³ Ÿhÿ me ikjêjê, me imā me ate mehtyc atajê jahkre pej pejti na me ato prām. Por me cupê Pahpām na mehkwy nare catêjê pê mehkwy ty, mā me cumā amji kîn nare atajê cuxâ, ca nee me amā amji kîn nare nare. Ampo na? He me pahkînte nee me cumā hacpÿa mā mehtÿr na me hahkre pej nare na ri. ¹⁴ Xà Jeju tyc ne nee hacpÿ mā ihtÿr nare? Hâpâ, ihtÿj ihtyc ne hacpÿa mā ihtÿr! Mêr hōhō, quē ha Pahpām Jeju kôt me ipa catêjê to hanea, pom quē Jeju he, ne hacpÿa mā me to ihtÿr.

¹⁵ Wa itÿj me pajō Pahhiti pê Jeju jarkwa kôt me amā awjarê. Quē ha amcro nô na, Jeju cōjkwa wÿr me pajaprôr prāmte pjê wÿr, ahcakrâ kam, amji jaxâ. Ne mam mehtyc itajê na ahwÿ, quē ha me api. Jirô pê cu ha cormā me pahtrî itajê mehkôt me api.

¹⁶ Ÿhÿ, quē ha hane he. Quē ha me pajō Pahhiti pê Jeju ajpên cōjkwa pîn wrÿ ne ihkrâhhia kam me pamā carâr. Quē ha hanea ne cōjkwa pîn Pahpām mā memprar catêjê jō pahhi carâr, quē ha pea Pahpām jō wakÿre te hōhhi harkwa cato. Quē ha mam Jeju na mehkwy tyc atajê kâj mā me mō. ¹⁷ Ne me pa, pom cu cormā me pahtrî na ame papa atajê, cu ha kÿj pê me cuprô mehtyc me, me pahte me pajō Pahhiti pê Jeju

cajpar prāmte, kÿj pê. Hōhō, ita na cu ha me pajōtpê Jeju cahê na ame papa rohnÿtti mã. ¹⁸ Cwÿrjapê ca ha ma me ijarkwa ita to me amji jahôt to me apa. Ne ma me akwÿ mã to amji kÿn ton to me apa.

Cu ha Jeju te amji jaxàr xà caxuw me amji cÿmpej

² Petrô 3.8-13

5 Ÿhÿ me ikjêjê, wa nee me amã amcro me caxwa nõ hyr xà na ihhòc to prãm nare. Por quê ha jÿ caxuw ampo hane ata na. ² Ampo na? Quê ha me pajō Pahhiti pê Jeju te amji jaxàr xà ita pê ihhêj rÿm caxwa ri me hàhkÿj xi catêjê imprar xà. Quê ha nee jÿm ihtêm xà ita na hahkre pej nare. ³ Quê ha ramã me pajō Pahhiti ihtêm xàa kam, quê ha mehkÿwÿ me ajpën mã:

— Cu ha me pampeaj kam me pahcarÿcti kam ame papa, quê ha nee me pahna ampo jamãr nare — hane. Hō, quê ha me ajpën mã me harkwa to me hajÿr cakrô, quê ha ihprôt pê Pahpãm te amji mã amcro hyr xà ata kam ahtwÿ. Quê ha ihprôt pê ampo kên jãhtôa ne me hÿrmã cato. Quê ha mehkàj xà hane, pom quê hãn ne pyjê mã ihkra hà he.

⁴ Ampo na? He me cupê amji jahkre kêatre, cwÿrjapê ri me cupê awcapàtkô catêjê. Ne me ca, Jeju kam me ikjêjê, nee me apê awcapàtkô catêjê nare. Cwÿrjapê quê ha Jeju te amji jaxàr xà jō amcro cato, ca ha nee ame amji mã me apikrar nare. Ampo na? He ramã ate amji mã me gãhcuprôn. ⁵ Pom ramã me apê amcro jō amcro tekjê ita? Ne nee me papê awcapàtkô jō awcapàtkô tekjê nare. ⁶ Cwÿrjapê cu ha me hane, ne nee ame pajōt nare, ne me parÿat na pahte amji kam me pajapac xà impejti kam ame papa to me pahcuhhê, ne xwÿ kam me amji jamãr nare. ⁷ Ne awcapàtkô kam ri hãn ne ame gôr. Ne caxwa ri cōxÿhti to ame amji pec catêjê ri caxwari cōxÿhti to amehkôm to me ipa.

Cu ha me pahtÿj me amji jamãr pejti ne

⁸ Ne me pa, quêt me papê amcro jō amcro tekjê, cwÿrjapê cu xwÿ kam me amji jamãr nare to me hane he. Pom quê hãn ne krãhtare hō hitô kà tÿjti ita me hō krãhkà tÿjti ita to hōtpê amji jÿ pytà ita pyràc pej ne, cu ha me amji kam me pajapac xà pytàr to me papa. Ne me pahte Jeju to amji mã me pahhimpej xà ata me, me pamã ajpën kÿnti itajê pê ihhêj rÿm wakÿre te hitô kà tÿjti me hō krãhkà itajê pyràac. Ne Jeju te me pahkên pê me pahpytàr xà ita pê ihhêj rÿm krãhtare jō ihkrãhkà tÿjti ata pyràac. Hōhō, me ate amji kam me gapac xà itajê to, ca ha me amji kampa, ne me to amji pytà, ne ahna me ato xar to me apa. ⁹ Pê Pahpãm amji tète ame pahcurê xà caxuw amji mã me pahcapi nare. Ne quêt me pajō Pahhiti pê Jeju Crixto te me pahpytàr xà caxuw, pê Pahpãm amji mã me pahcapi. ¹⁰ Ne me pahte Jeju Crixto cape na ame papa xà caxuw, pê me pantête amji to amtà, ne me pancwÿrjapê ty. He nee ihnô na me pamã hÿpa xà nare. He xà mōrmô ajkÿ me pahtyc, nare, cu me pahÿar na ame papa, Jeju cator xà kam, cu ha me pahcunea cahê na ame papa rohnÿtti mã. ¹¹ Cwÿrjapê ca me ajpën tehcajpar to me apa, ne me amã amji kÿn na me amji ràn to me apa. Ne ma ah-

na me amji mã hakam. Pom ahna mã ramã me to ita na, ca ha kam me to acrà.

Me hapackre xà cahhur

Epet 4.1-6; 1 Timot 5.17-19

¹² Ÿhÿ me ikjêjê, wa ha me ana ahwÿ, ca ha me akam ame hàpên to me ipa atajê to amji mã me ahimpeaj ne. Nãmri me pajō Pahhiti Jeju te ri amji mã me capi, mãr quê amji kôt me ato ipa, ne me amã ampo to hahkre to ipa. ¹³ Ne jÿmjê atajê to catyt kam amji mã me ahimpej to me apa, ne amji mã mehkÿnti to me apa, ne catyt kam ame ajpën kÿn to me apa.

¹⁴ Ne wa ha cormã ihnôa to me amã icakôc. Ca ha ampeaj kam cute me xuwcacati atajê japackre. Ne hanea ne me cute amji mã hàhtàt to me ipa atajê na, ca ha mehràn, ne me cumã hakam to me apa. Ne por cute Jeju kôt kyre pê me amji ton, ne amjÿ kam ihkôt me ipa atajê na, me hamãr nare, ne atÿj ahna mehtehcajpar to me apa. Ne mehcunea to gãhtàt to me apa. ¹⁵ Ne ma ajpën na me to guphê, quê nee jÿm ajpën mã ihkên to hàmjôr nare, mehkên xà atajê nõ jahpan xà na. Ne ajteare mã ita to ca ha me to hane he. Ca ha gōtpê ajpën mã me apejti ne, ne hanea ne me cupê me akwÿ nare atajê to mempeaj ne.

Cu ha me pahtÿj Pahpãm mã me pahcakôc to me papa

¹⁶ Ne gōtpê me gakrya ne, ne jÿ caxuw me gakry to me hÿcu ne me amã amji kÿn nare nare. ¹⁷ Ne gōtpê Pahpãm mã me acakôc jÿcu nare. ¹⁸ Por cute me amã ampo cunea jôr atajê jahpan xà na, ca hãn ne hōtpê me cumã acakôc, ne impejti na me harê, ne catihti na me harê, ne hÿrên me gakryti na me amji jarê. Ne por quê ha cormã ihhêaj to ampo kên me awÿr cato ata cupate, ca nee me Pahpãm to amji mã me ahimpej jÿcu nare. Ampo na? Cormã Pahpãm mã me akÿn, cwÿrjapê ca gōtpê Pahpãm pejti to me cumã acakôc ne me cumã harê. Hōhō, ata na ri Pahpãm mã me ana prãm. Pom ate Jeju to amji mã me ahimpej atajê na ri Pahpãm mã me ato prãm.

¹⁹ Nee apu amji tète Pahpãm Carô Pejti te me akam hàpên atajê cahpêrkàr to me apa nare. ²⁰ Quê Pahpãm Carô Pejti jÿm jÿjarên na cumê, quê awjarê, ca ha nee me jÿm ata jÿjarên tète me hiprôn nare, nãmri nee harkwa ita kôt hamreare nare. ²¹ Ne atÿj Pahpãm Carô Pejti jarkwa kôt me amji mã gÿjarên ita kam me to acrà. Ne amji to me ate me ampo kam gapac itajê cajpê, ne ampo pejti atajê, ca me kampa, ne amji mã me huwahi. ²² Ne ampo kên atajê cunea pê amji to me awpjê.

²³ Ita na wa Pahpãm mã me acajrên to ipa, por Pahpãm te me pamã me pahcarÿcti jôr ata to, wa me amã ahna ahwÿ, quê me ato impeaj to ipa, ca me ate amji kam me gapac xà tÿm nare ne, ne me acarô jamã, ne me acaxwÿn jamã, ne me akrekà jamã, mãr quê me amã ihtetetti ne. Ne nee jÿ kam ihtÿm kênre nare. Ampo na? Quê ha me pajō Pahhiti pê Jeju Crixto amji jaxà ne me atetetti na me ana prãm. ²⁴ Ne Pahpãm te ri ita na me papa na, me pamên, ne taa mã quê ha me

pahtehcajpa, cu ha ita na kam me to pancrà. Nāmri Pahpām ita harkwa cakrô to ihcakôc nare. Ne ramã cute me pahtehcajpar na amji ton.

²⁵ Ỡhỹ me ikjêjê, ca ha hanea ne Pahpām mã icajrên to me apa. ²⁶ Ca ha me pahkjêjê cunea mã ite mehkĩn-ti to ite me cumã hàpà na, ca ha me cumã ijarê. ²⁷ Ne

ite ampeaj kam me pajô Pahhiti jarkwa kôt me amãn, ca me pahkjêjê cunea mã ijô kàhhôc ita cahyt.

²⁸ Ỡhỹ, wa hãn ne ijôtpê me pajô Pahhiti pê Jeju na ahwỳ, quê me amã apejti caxuw impejti cunea gô. Hamre, ita pit.

2 TEXARŌN

Ÿhŷ, p  Pawr  p  Jeju jarkwa na memprar cat j  n . Ne p  Texar n j  kr  kam Jeju na mehkwy jakr  mehkri ataj  w r, pom cu me h  k hh c pijakrut cahyt itaj  kujate. Na p  hapu na h  k hh c ita japyr p  (2 Texar n). Ne Pawr  te Jeju to amji m  mehhimpej to me ipa, cw rjap  ri me cup  Pahp m tekj  nare ataj  ame to k anre, m  cute me amji pupun x  k anre to me amji pupun. Ne h  k hh c ita kam, Pawr  te me cum  cute amji m  Jeju to mehhimpej jicu nare na me cum  har n. Ne hanea ne cute me cum  pj  jamre x  caxuw, j  caxuw hacpy ne Jeju wr c na me cum  har n.

P  Pawr  hip r me cum  amji jar 

1 Ÿhŷ, Jeju kam me ikj j , pom ca Texar n j  kr  kam me apa itaj , ip  Pawr , wa ite me paht  Xira me, me paht  Timot me, me aw r mehh c. Por me ap  me paj  Inx  Cati p  Pahp m me, me paj  Pahhiti p  Jeju tekj  na, ca me apa ataj  w r ite mehh c.

² Ne wa it j me paj  Inx  Cati p  Pahp m me, me paj  Pahhiti p  Jeju m  me ana icak c to ipa, qu  me ato impej to ipa, ne me am  me acaxw m p  me acar cti j r to ipa.

P  mehkwy pyr n Pawr  hakry

¹ Petr  4.12-19

³ Me ikj j , me acw rjap a ri me ijakry hyre nare. Cw rjap  ri me im  ij tp  h n ne Pahp m m  me acajr n to me ipa na to pr m ita na. Ampo na? Ca ampeaj kam Jeju to amji m  me ahimpej to me apa. Ne hanea ne ca ame ajp n k nti to me apa ita, h tp  ihcunea na me am  ipicam n to ipa, cw rjap  ri me apyr n me ijakrya to me ijakry. ⁴ Me im a, ca catyt kam me amji to apijapar to me apa. Na wa ij tp  Jeju na mehkwy kw  m  me ak t har n to ipa. Ne por me Pahp m par nare ataj  kam, ca me amji pupun x  k anre to ame apa, m  ajteare m , mehkwy ame acur  to me ipa cakr , ca corm  amji to me g can r to me apa, ne Jeju to amji m  me ahimpej to me apa. H , ate amji kam me gapac x  impejti to ate amji to me apijapar x  itaj  na, wa Jeju na mehkwy kw  m  me ak t har .

⁵ Ne pom ca me kam me amji pupun x  k n itaj a to p  ram  Pahp m ihcak c, ne ahna harkwa ta. Ampo na? Pom me ate amji pupun x  k n itaj a, qu  ha Pahp m krac ri himpej x  m  me acj j x  caxuw me ac mpej. ⁶ Ne qu  ha Pahp m catyt kam ipa ata kam, nee to ihn  cupan nare, ne cute ame ato k n itaj  jahpan x  na hanea ne ame to k anre ne. ⁷ Ne me am a qu  ha me ak t x  g . Ne hanea ne me im  cug , pom hanea ne ite me amji pupun x  k anre ita jahpan x  na.

Jeju te amji jax r x 

Qu  ha xa me paj  Pahhiti p  Jeju pu na cuhy p c pix rti ata to ahpar m  m , c jkwa kam Pahp m m  memprar cat j  car t t jti ataj  me. ⁸ Qu  ha ajp n m  ne cato, ne me cup  Pahp m jahkre k atre ataj  k n m  ame cur . Por nee me Pahhiti p  Jeju p  me pahkritxw  jar n x  impejti ataj  kam hapac nare cat j  to hanea ne apu mehk n m  me cur . ⁹ Ne mehk anre itaj  qu  ha me paj  Pahhiti car t t jti ita p  amp a m  amehcuhh . Na qu  ha j  caxuw Pahp m te ame to k n x  ata p  me cator nare. ¹⁰ Por Jeju te amji jax r x  j  amcro ata na qu  ha itaj  cunea apu hane. Ne amcro ata na, qu  ha Jeju na mehkwy me cupr  ne Jeju m  impejti to mehcak c. Ne por mehcunea Jeju to amji m  mehhimpej, ne kam me hapac to me ipa ataj , qu  ha Jeju pejti ne catia na me h mpu. Ne ate me haj r, ca ha at j cah  na me acuhh . Ampo na? Ite me am  Jeju jar n pejti jar n, ca ate mempar cw rjap .

¹¹ Pahp m te amji tekj a na me ana h hw r. Ita cw rjap  wa h tp  Pahp m m  me acajr n to ipa, m r qu  me atehcajpa, ca ate me amji to apijapar x  n  kam me gakryti ataj  n  to, ca ha me amji to ajpa. Me am  catyt kam amji to me apijapar pr m, cw rjap  wa hanea ne ahna ahw , m r qu  car t to me atehcajpa, ca catyt kam amji to me apijapar to me apa ita na. Ca Jeju to amji m  me ahimpej kam, me g p n to me apa, ne ahna me ahw , ate g p n x  itaj  cunea to me ajp n r n to me am r x  caxuw, hicu x  w r. ¹² Ita na qu  ha mehcunea apyr n ame paj  Pahhiti p  Jeju japyr to mehcak c pejti to me ipa. Ampo na? Cute me akam h p n x  cunea impejti na me h mpun cw rjap . Ne qu  ha mehcunea me ap  h  tekj  na me gahkre pej. Ne Pahp m me, me paj  Pahhiti p  Jeju m  me ak nti, cw rjap  ri h n ne h tp  me ato impej to me ipa.

Qu  ha j m k n h j xi cati cato

¹ Jow w 2.18-19

2 Ÿhŷ me ikj j , ita caxuw wa ha me am  hacpy ne Jeju cator, ne cute me pahto cupr n x  to,

hipêr ihmpej. ² Ne ihhêj ne jūmjê jàhtôa ne Jeju te amji jaxàr xà to amehhêj xi to me ipa. Ne ramã xwah-na amcro ita cator na, ame harê. Ne wa me awý, ca nee ame kam gapac nare. Nãmri quê ha mehkwy me irĩat kam, cute me ampo pupun na me amji jarê, nare, quê ha mehkwy Pahpãm te me cumã ihcakôc na me amji jarê, nare, quê ha mehkwy ite me cumã ihkàhhôc ton na me ijarê, ca ha nee me jūmjê itajê nõ kam gapac nare. Ne nee ate amempar xà ata to amji pê me gapac kêt to me apa nare, ne nee ame to amji jigêc rên to me apa nare, quê nee jūm me anõ mã ihhêj nare.

³ Quê ha Jeju jô amcro cator xwýjrea na ampo ajkrut ne cato. Ita quê ha mam cato he. Quê ha me hàhtôa ne ame Pahpãm curê, ne cunaa mã amehcaca to amehcuhhê. Ne ihkôt cato ita, quê ha cupê me hirôa pê jūm kêanre ata. Por me hirôa pê jūm kêanre ita quê ha jū caxuw, amcro nõ na, ma ihkên catia pê ihkākānti kam cuhy ata kam ihpým. ⁴ Quê ha amji to cati prãmtte, ma apu Pahpãm caca, ne ma apu pahpãm cahac krekà caca, mehcunea te amehkĩn ne mempar prãmtte. Quê ha mehcunea jipy apu mõ, ne hanea ne ma Pahpãm to me amji kam hapac xà jūrkwã mã axà ne jý, ne me cumã cupêa Pahpãm na amji jarê.

⁵ He pê wa me acahê na ipa reria mã itýj me amã ampo itajê cunea jarên to ipa. Xà ca nee ampo itajê to ame amji japackre to ame apa nare? ⁶ Quê ha jūm kêanre ita jô amcroa kam ahtwý, quê ha ihtýj amji to ajpê. Ne por wýjrea na ramã jūm ipa ata, quê ha nee cute amji kam hapac xà ita na hamãr nare. Ne ramã ate me jūm ata jahkre pej. ⁷ Mã ramã cute amji kam hapac xà kêanre ita apu ihcakhūm to mõ. Ne ramã me to kên to mõ. Ne por ihkêanre ata, quê ha xa jūm ihkên tète ma hiprõ ata ma tẽ, jakàn pê quê ha ihtýj ihkên itajê cunea ton to ipa. ⁸ Ne por me hirôa pê jūm kêanre ita quê ha ihtýj amji to ajpê, hõ amcro ata na. Ne por Pahhiti pê Jeju te amji jaxàr xà ata kam, quê ha Jeju ihtýj hapkôc to ihcura. Ýhý, quê ha Jeju hàhcujro pràti ita to cato, me ajkaam, quê ha jūm kên ita hamre, Jeju jàhcujro cupate. ⁹ Quê ha jū caxuw me hirôa pê jūm kên ita cator xà jô amcro kam ahtwý, quê ha me pahcurê xwýn pê Xatanaj cumã carôt tjyti gõ, quê ha to amji to hipu, ne cato, cute mehcunea mã ihhêj prãmtte. Quê ha incaca xà to cute amji kam hapac xà cunea to me cumã to ipa. Quê ha mehcunea, cute amji kam hapac xà cati na me hahkre pej. ¹⁰ Quê ha ampo pihho kên cunea ton to ipa, cute ihkôt me amji ton catêjê mã ihhêj xi xà na. Ne por cute ihkôt me amji ton catêjê atajê, quê ha me hamre. Ampo na? Nee cute me Pahpãm jūjarên xà ata na me amji caxàr nare, ne ma amehcaca, na quê ha me hamre. Quê ha cama tãh-na me amji capa na mã, quê ha ihtýj mehkên pê me amji pytà. Ne nee cute ahna me amji caxàr nare, cwýr-japê quê ha me hamre.

¹¹⁻¹² Hõhõ, ita na quê ha Pahpãm cama me hamã, quê ha me taa amji mã mehhêj. Hõ, cute me Pahpãm par nare atajê caxuw ri cute amji kam hapac xà ita cumã. Ne por cute mehhêj xi kĩn catêjê atajê, quê ha

Pahpãm mehkên mã me cumê, quê ha mehkên mã me axà ne me hamre.

Pê Pahpãm me pahpytãr xà caxuw amji mã me pah-capi

Roman 8.28-30; 1 Texarôn 2.13; 5.23-24

¹³ Ýhý me ikjêjê, wa itýj Pahpãm mã me acajrên, ne cumã me apejti na me garên to prãm. Ampo na? He me pajô Pahhiti mã me akĩn cwýrjapê. Pê Pahpãm mam ramã amji mã me acapi, me akên pê cute me ato cator xà caxuw, ne hanea ne Pahpãm Carõ Pejti te Pahpãm mã me acũmpej xà caxuw. Ne hanea ne ate Pahpãm jarkwa kôt me amji ton xà caxuw, Pahpãm te amji mã me acapi. Pahpãm te atajê cunea na amji mã me aton, cute me ato ihkwya xà caxuw. ¹⁴ Itajê cunea caxuw pê Pahpãm me ana ahwý. Pom pê wa me amã Jeju jarên pejti to harê ata caxuw, pê Pahpãm me ana ahwý. Ne hanea ne cumã me ate me pajô Pahhiti pê Jeju Crixto cator xà jô amcro jàhcujro pràti ata kam, cumã ame apa na me ato prãm. ¹⁵ Cwýrjapê, ca me ikjêjê, me amji pyxwý, ne ahna me amji pyxwýr tu. Ne pê wa me amã ijūjarên xà to awjarê atajê, ca ha amji mã me nõr to impeaj ne. Ne ma me to amji japackrea ne. Ne hanea ne me ijô kàhhôc ita to me amji japackrea ne.

¹⁶ Ýhý, me pajô Pahhiti pê Jeju Crixto me Pahpãm pê me pajô Inxũ Cati mã me pahkĩnti, mã hõtpê me pahto impejti to prãm. Cwýrjapê ri me pamã me pahcarôt gõ, cu nee ame ampo kên cupa nare, mã ma Jeju jikaj na me pahtehcajpa, cu pahkýj cormã me hikaj. ¹⁷ Cwýr-japê wa Pahhiti pê Jeju na me ahwý, ne cumã me caa pit cajrên, ne hanea ne me Pahpãm pê me pajô Inxũ Cati mã me acajrên, quê me ana cuhkônre kam me amã hakam, ne me ato ihtýj, ca me ampo pej pit jarê, ne me to.

Pahpãm mã me Pawrô cajrên xà

Coroxo 4.2-4

³ Ne ijô kàhhôc ita jicu xà kam, wa ha me ikjêjê me awý, ca Pahpãm mã me icajrên. Ne ahna me ahwý, mãr quê Pahhiti jarkwa ita ihcakhūm to awjarêa ne ihcakhūm. Ne quê ha me hàhtôa mã harkwa ita impeaj to impej, ahna mã me amã impejti he. ² Ne hanea ne Pahpãm mã me icajrên, quê mehkên atajê kaj na me ito ipa. Ca ramã me ate me hahkre pej, mã nee mehcunea Pahpãm jarkwa kam me hapac nare, ne nee amji mã me to ihmpej nare.

³ Mã me pajô Pahhiti ihtýj amji jarkwa na amji kam-pa. Quê ha me ato ihtýj, ne me pahcurê xwýn pê ma me gamã, ne ma me apytã. ⁴ Me pajô Pahhiti te ramã me imã me garên, cwýrjapê wa ite ampo cunea to me amãn atajê na, wa itýj ate kam me to acrà na amji mã me ato hane.

⁵ Ne wa itýj cõjkwa kam Pahhiti na ahwý, quê me acaxwãam pê, me ana cuhkônre cunea to ate me hahkre pej na me ato, ca me hahkre pej. Pahpãm mã me akĩnti, ne Jeju Crixto ri me amã me acarôt gõ, ate

ihkôt me gũcanār xà caxuw. Ita na wa me amã Pahpãm na ahwỳ.

Me pahcunea jàpên xà pit

Epet 4.28; 1 Texarŏn 4.9-12

⁶ Ỡhỹ me ikjêjê, wa me pajõ Pahhiti pê Jeju Crixto jarkwa na me amã ijarkwa jirên to mỗ. Ca ha me caa me pahkjêjê te me xuwcacati atajê pê me amji to gũjawry to me apa. Por ma apu ite me ampo to hahkre xà caca atajê pê ca ampỳa mã ame apa. ⁷ Wa ite me amã ampo ton xà atajê na, ca me ipynã. Ne ramã ate me ton xà ita na me hahkre pej. Pê wa me akam ame ipa, ne nee ame xuwcaya to me ipa nare. ⁸ Pê wa nee ampo na jũm mã me ijàmjôr nare kam, cupê me ipyr nare. Pê wa quêt cama me apêa to me apê, ne wa me ijàpên xà to hãn ne me amji tycrĩ. Pê wa ajco caxwa me amcro kam, nee me ijàpên jicu nare, pê wa amji na jũm pê me ampo to hamre cupate. Ne nee ite ampo na me ijàhwỳr to prãm nõ to nare. ⁹ Pê Jeju me imã ite itỳj me jũmjê jũhkra kam me ampo cwỳr xà na awjahkre. Pê wa pa, ma apu ita na mehcaca. Ampo na? Ca me ate ahna me ipupun, ne ikôat me amji ton prãmte. ¹⁰ Pê wa curi ame acahê na me ipa reria mã, ramã me amã itajê te amji kam hapac xà ata jarê:

— He quê ha jũm mã hàpên prãm nare ne cumã xuwcaya na, quê ha nee hàpàn nare — hane.

¹¹ Ỡhỹ, ampeaj kam ri ite me amã ijũjarên xà ita, wa ite me amã ihkujahêc. Ampo na? He wa ite me acahê

na jũmjê jàpên nare, ne cama ame ipa ne me hàpàn to ame ipa na, me harên par. Cwỳrjapê wa ame amã awjarê. Ajte nee me hàpên nare, ne cama ajte ame ate amji kam me gapac xà caxun to me ipa. ¹² Ne me pajõ Pahhiti pê Jeju Crixto japrỳa na wa ha jũmjê itajê mã ijarkwa tỳaj kujate, quê catyt kam ame ipa, ne me apê, ne amji mã me harte. Ne nee ame ate amji kam me gapac xà caxun to me ipa nare.

¹³ Ne me ca me ikjêjê, me gápên ita na, ne nee me gápên kam ame apec nare. ¹⁴ Ne quê ihhêaj to jũm ma apu ite me amã ijarkwa kujahêc ita par caca na, ca ha me hahkre pej ne me cupê amji krã, ne me cupê hawry, quê ha ihtỳj amehpahàm. ¹⁵ Ne nee pom ca ame acurê xwỳn to ita na ame ton nare, ne catyt kam me to amji kjê, ne me hapackre.

¹⁶ Hamre, ijõ kàhhôc cahhur mã he. Wa ha me pajõ Pahhiti wỳ, quê ha hõtpê me amã ihcarĩcti gõ, ampo itajê cunea caxuw. Ne wa ha hanea ne Pahhiti na ahwỳ, quê hõtpê me acahê na apu ipa.

Pê Pawrô me cumã amji jarê

¹⁷ Ỡhỹ, ipê Pawrô, wa ite ijũhkra ita to ihkàhhôc ita jatuj xà mã to mên. Wa ijõtpê hãn ne ijõ kàhhôc kam hãn ne ijaprỳ nõr to hane, ca me ijahkre pej, nãmri ihkàhhôc ita itekjêa ri.

¹⁸ Ỡhỹ, wa ha Pahpãm wỳ, quê ha me pajõ Pahhiti pê Jeju Crixto me acunea mã ampo pejtĩ jõr to ipa. Hamre.

1 TIMOT

Ÿhÿ, pê Pawrô pê Jeju jarkwa na memprar catêjê nõ, ne ajco pjê cunea kam apu ipa. Ne mehcunea mã Jeju pê me pahkritxwÿ na ajco harên to ipa. Pê Juta catêjê ma ame Jeju jÛjarên xà ita par caca. Cwÿrjapê pê me Pawrô pro, ne Roman catêjê mã cugõ, ne pê me hacjên xà kam me haxà. Mã Pawrô cator jirô pê hipêr mehcunea mã Jeju pê me pahkritxwÿ jarên xà impejti jarên to mõ, na ri hipêr Roman catêjê te Pawrô pro ne me haxàr, me hacjên xà kam. Mã hõtpê cute mehkwy mã ihkàhhôc ita ton ne ma ihkujahêc.

Ne pê hÛmre nõ japry pê Timot ita Pawrô kôt Jeju pynâr ita na, cormã intuwre. Ne cupê Pawrô tehcajpar catê, ne ajco ihkôt apu ipa. Jirô pê mã pê Pawrô Epet jõ krí kam Jeju na mehkwy mehkri atajê to ihhimpej catê na Timot xãm. Ne pom cu me hõ kàhhôc pijakrut cahyt itajê kam, pê Pawrô Timot mã, por mehkwy mã ampo kên to hahkre atajê cahpêrhyr na awjahkre. Na pê mam hõ kàhhôc ita japry pê (1 Timot).

Ne hanea ne cumã cute mehkwy jamâr catêjê impeaj pyxwÿr, mã cute me hamâr to impejti na hÛjahkre. Ne nee Timot te jÛ caxuw Pahpãm mã hàpên jicu nare na cumã hÛjahkre.

Pê Pawrô Timot mã amji jarê

Me Hàpên Xà 16.1-5

1 Ÿhÿ, ipê Pawrô, por Jeju te ihkujahêc ata, pa wa. Pahpãm pê me pahkên pê me pahto hapôj catê, ne ihcãmter pê Jeju Crixto te hacpÿa ne amji jaxàr xà ata, cu pahtÿj me hikaj ata jarkwa kôt wa apu ipa.

2 Ÿhÿ Timot, apê ihhêj rÛm ikra. Ampo na? Ca ikôtat Jeju to amji mã ahimpej to apa, cwÿrjapê wa ha amã ihhêc. Ne ahpÿanre na ampo itajê cunea na amã ihhêc partu. Ne wa apu Pahpãm me, me pajõ Pahhiti pê Jeju Crixto mã me acajrên, ne me cumã:

— Me to amji pytà ne me hamã, ne me capri, ne me caxwãm pê me cumã acaricre gõ — hane.

Pê Pawrô Timot mã me hapackre kên xà cawpa

Roman 16.17; Tito 1.5-6

3 Ÿhÿ, imã Epet jõ krí kam gâhhuc na ato prãm, ita to pê wa ramã Maxeton jõ pjê wÿr itêm xà xwÿjrea na amã icakôc. Ne Epet jõ krí kam mehkwy te hãn ne ampo to me cumã hahkre xà cupan xà itajê to pit mã ame cumã hahkre to me ipa. Ne caa, ca ha atÿj ita tète me cumã, quê me ita ton jicu. **4** Na ca ha me cumã gÛjarên to hane he:

— Ca rÿ pêa mã ame aquêtjê te amji kam hapac xà itajê me, me hapry na ihhêc japjêhti atajê to pit mã ame hahkre prãm to me apa. Nee ca ame ita ton nare. Nãmri ca hãn ne ame ita to, ne tee incwÿrjapê ame apijapu to prãm. Ne Pahpãm mã ihkôt me papa na me pahto prãm, ne pom ate me ampo to hahkre xà itajê, nee Pahpãm kôt me papa na me pahtehcajpar nare. Ne quêt Pahpãm me harkwa to, cu ha amji mã me pahhimpej, ne pahtÿj hÿrmã ame pajapôj — hane.

5 Ne wa apu amã ihimpej xà itajê cunea to hahkre, mãr quê Jeju na mehkwy pê me pahkwÿ cunea mã cute me ajpên kîn xà to ajcamê. Cu ha me pamã ampo kên na prãm nare na, cu ha pahtÿj ame ajpên kinti ne. Cu ha ame amji kampa, ne pahte ramã ame ampo ton

itajê kôt me amji kôt hakop, ne nee amji jÛ na me pahpahàm nare na, cu ha pahtÿj ame ajpên kinti ne. Cu ha ampeaj kam Pahpãm to ame amji mã me pahhimpej na, cu ha pahtÿj ame ajpên kinti ne.

6 Ne mehkwy te ramã me Pahpãm jarkwa cupan, ne ihcapry na me harkwa cakrô to ame ajpên mã mehhimpej. **7** Ne ihtÿj cumã cute amji to me cumã Pahpãm jarkwa to hahkre catê na me amji ton to me prãm, por pê Pahpãm Mojxe xwÿ mã harkwa to hahkre ata to. Ne cama ampo to amehcakôc atajê jahkre pej nare kam ame to ihcakôc, ne nee hãn ne me harkwa na me amji par nare. Ne ihhêj ne ampeaj kam me harkwa atajê na me cumã amji jahkre pej, ne nee ahna me cumã amji jahkre pej nare.

8 Pê Pahpãm Mojxe xwÿ mã ihhimpej xà impejti kên nare ata gõ, na pahte ramã me hahkre pej. **9-10** Xà ajkí catyt kam me ipa catêjê caxuw pê ihhimpej xà ita to ihhimpej? Hãpà. Por cute me pry rên xiti atajê caxuw pê ihhimpej xà itajê to he. Ihtÿj amjia kôt ame ipa catêjê me, me hÛpar nare catêjê me, Pahpãm to me amji kam hapac nare catêjê me, mehkra kèanre catêjê me, Pahpãm to me amji prâr catêjê me, nee cute me Pahpãm Carõ Pejti impar nare catêjê me, cute me hÛmxwÿa curan catêjê me, mehkwy curan catêjê me, ahti na mehpahàm nõ catêjê me, me hÛmrea te me ajpên caxun catêjê me, pyjêa te ajpên to inxy catêjê me, ahti na cute mehkwy to ihpore na me hàhpan prãm catêjê me, mehhêj xi catêjê me, mehcukij catê cuna mã mehkwy to mehhêj xi catêjê me, Pahpãm jarkwa to hahkre xà cuna mã mehcakôc kên catêjê. Ne mehcunea te me hajÿr xà catêjê itajê caxuw pê Pahpãm Mojxe xwÿ mã ihhimpej xà ita to. **11** Ne Pahpãm catihti, ne impejti ata te ri amji mã icapi, ite me amã ihkra Jeju pê me pahkritxwÿ jarên xà impejti to harên to ipa xà caxuw.

Pê Pahpām Pawrô caprī pyrên hakry

Me Hapên Xà 26.9-18

¹² Cute icapi ne amji mã ipej na ito hajÿr, ne amji mã cumã hapên catê na iton. Me pajō Pahhiti pê Jeju Crix-tō te hapên xà ita caxuw imã icarôt ton, ne imã hōr, wa carôat kôt ijapên to ipa. Cwÿrjapê ri itajê pyrên ijakryti, wa ijōtpê ijakryti to cumã amji jarên to ipa. ¹³ Pê wa mam ajco Jeju to icakôc kêanre to ipa, ne itÿj ahna mehkwy jahêr to ipa, ne ajco ame to kêanre to ipa. Cakrô mã Pahpām te icaprī. Ampo na? Pê wa cormã nee Pahpām jahkre pej nare, ne nee to amji mã ihmpej to ipa nare. Cwÿrjapê pê wa amji jahkre kêt kam apu to kêanre to hajÿr to ipa. ¹⁴ Mã me pajō Pahhiti te ito kêanre nare, ne amji wÿr ito ipipkjêr, wa hÿrmã ipipkjêr, ne toa amji mã ihmpej to ipa. Mã cute imã ihkinti na iton, cwÿrjapê wa me pahkwÿ cunea me, Jeju mã me ajpên kinti to me amji hōnco to me ipa.

¹⁵ Ýhÿ, pê ajpên pjê ita wÿr Jeju wrÿ, cute mehkrã kên pytâr xà caxuw. Hōhō, ijūjarên xà ita ri quêt ampeaj kam. Gapacta ne ana cuhkônre cunea to harên xà ita na amji capa, ne to amji jahôt to apa. Ne papê wa me girôa pê ikrà kên cati. ¹⁶ Cwÿrjapê ri Pahpām te icaprī, quê mehcunea me ipupu ne amji mã me ito:

— Pÿhàpà, ihhê ne ihtÿj xãmte Pahpām te Pawrô kêanre ita to impej, wa ha hanea ne cuxà Pahpām wÿr apkjê, quê ha ito impej. Mār wa Pahpām cahê na itÿar na ipa, rohnÿtti mã — hane. Hōhō, cute amji mã me ito ihcakôc to hajÿr prãmte ri, Pahpām te icaprī. ¹⁷ Ne imã mehcunea te Pahpām pupun pejti na me to prãm. Pahpām pê me pahcunea jō Pahhiti, na pê nee jūm ton nare, mã ihtÿar na hãn ne ihkrī. Quê nee jūm hōmpun nare. He ampeaj kam ri pyxit peaj, ne pjê ita cunea kam cupê Pahpām. Ne imã mehcunea te quêt Pahpām catihti na me hahkre pej, ne amji mã ahna mehpahãmti na imã me to prãm, rohnÿtti mã. Hamre.

¹⁸ Ýhÿ ikra Timot, ikam gapac peaj ne. Pê ramã Pahpām jarkwa to mehcakôc catêjê me gápên xà ita jarên to:

— Pahpām te amji mã acapi, ca ha apê me cumã gū-jarên pejti jarên catê — hane. Ne gápên xà ita pê krãhtare pijapu xà pyrãac, ne ma harkwa ita to amji japackre to apa, ne gō Pahhiti mã gápên xà to impejti to apa. ¹⁹ Ca ha nee Jeju to amji mã ahimpej jicu nare. Por ca ramã ate ampo pejti ton xà jahkre pej ata, ca ha nee ton jicu nare. Ne nee ajte mehkwy te me hajÿr nare, ne me cumã ampo pejti itajê jahkre pej cakrô, mã ihkaj na ihtÿj ame ampo kêanre ton to me ipa. Ne ihtÿj hãn ne Jeju kôt me amji ton jicu, ne nee ihkôt me hakop ne me hahkre pej nare. ²⁰ Ne me hūmre pijakrut itajê pê ihtÿj ampo kên itajê to ame he: Himên me Arexãnre. Cwÿrjapê pê wa me pahcurê xwÿn pê Xatanaj jūhkra mã me haxà. Pê taa ame to kên ne me hapackre, mār quê nee jū caxuw hipêr Pahpām cuna mã amehcakôc kên to me hajÿr nare.

Timot te catyt kam mehkwy to ihmimpej xà

Me Hapên Xà 10.34-35; Epet 6.18

² Ita caxuw wa ha ate me cuprôn xà kam, ate me acaca xà ton xà ata to me amã hahkre. Mam cati mã, quê ha me pahkwÿ cunea Pahpām mã mehcakôc, ne cumã me ajpên cajrên, ne ahna me ahwÿ, ne Pahpām catihti ne impejti na amji mã me harê. Ne Pahpām te me cumã ampo cunea jōr atajê pyrên, quê ha me hakrya kam me cumã amji jarê. ² Ca ha mehkwy mã garkwa ta, quê ha mehcunea Pahpām mã pjê jō pahhi catêjê cajrên, ne krī to mehhimpej catêjê cajrên, ne cumã ampo cunea to ihmimpej catêjê cajrên. Ampo na? Cu ha ame ita to, ne caxwãm catia mã, catyt kam me pahkrī, ne amji to me ajpa, ne nee me ajpên mã nare, ne nee ame papijapu nare. ³ Ita to pahte me, na ri ihkênre nare. Ampo na? Pahpām pê me pahpytâr catê ata mã pahte me ita ton xà itajê na prãm, ne ahna cumã impejti. ⁴ Pê mehcunea Pahpām pê ampÿa mã ajco ame ipa, mehkên ata wÿr. Ne Pahpām ri mehkên pê mehcunea to hapôj, ne ampeaj kam cute me harkwa pejti ita cunea jahkre pej na, cumã me to prãm.

⁵ Cwÿrjapê pê me pahwÿr ihcãmter Jeju Crix-tō kujate, cute Hūm me ajpên na me pajaxôr catê na. Ne taa mã quê ha pyxit peaj ne Pahpām wÿr me paxūmre to cuprô. Ne iràn xà na, jū wÿr quê jūm Pahpām wÿr me pahto apkjê. ⁶ Pê Jeju hapên xà ita to hapên to amji pytà, ne taa amji caprôa to me pajahpan xà na amgō. Ita kôt quê ha mehcunea me hōmpu ne me hahkre pej, nãmri quê ha Pahpām hō amcroa kam mehcunea kên pê me to hapôj. ⁷ Cwÿrjapê ri Pahpām te ito hūjarên catê, ne ikujahêc, wa mehcakrit pê, por me cupê Juta catêjê nare atajê mã harên pejti itajê to awjarê, ne me cumã to hahkre. Ne me cumã:

— Ca ha Jeju wÿr amji to me apkjê, ne toa amji mã me ahimpej, ne me apej mã ame apÿpÿm — hane. Nãmri ijūjarên xà ita ampeaj kam ri, wa nee ame amã ihmêj nare.

Me hūmre te ihtÿj Pahpām mã mehcakôc xà

Epet 5.22; 1 Petrô 3.1-7

⁸ Ne imã pjê cunea kam me hūmre te Pahpām mã mehcakôc na me to prãm. Ne Pahpām mã mehcakôc catêjê atajê, quê ha catyt kam Pahpām kôt me ipa. Ne nee ame ajpên curê nare, ne nee me ajpên mã nare kam, Pahpām mã mehcakôc.

⁹ Ita caxuw wa ha Jeju na mehkwy cahãj catêjê to icakôc, ne me hapackre to amã hahkre, jū mã quê ha ame, ne ame amji cūmpej, ne amehkrī. Ýhÿ, ca ha me hapackre to hane he:

— Nee ca amji mã me garkwa to: “Me hūmre cunea te me ikîn prãmte, wa ha ijahÿ xà itajê cunea mã amji jacjê, cute kam me ikîn, ne ikôt memprar xà caxuw” hajÿr nare — hane. ¹⁰ Nãmri quê ha quêt caxwãm catia mã cute amehkwÿ mã ampo pejti ton to ipa, ne Jeju na mehkwy na me amji jarên na, quê ha catyt kam me ipa, ne mehkwy tehcajpar to me ipa.

¹¹ Ne me cumã Pahpãm jarkwa to hahkre catêjê, quê ha cute me cuprôn xà kam me cumã to hahkre, quê aracri pyjê itajê mehkrí ne ame awpa. ¹² Quê nee pyjê nõ me hũmre nõ mã ampo to hahkre nare. Ne nee cupê me hũmre jô pahhi nare. Ne cama amji caxuw ame hũmre kôpĩ, ne nee amehcakôc nare. ¹³ Ampo na mã wa pyjê na amã ihimpej xà itajê to ihimpej? Nee mã ampo na nare. Pê mam Pahpãm Atãw xwý xũmre ata to, ne hapu na Ewa xwý cahãj ata to. ¹⁴ Pê nee Xatanaj Atãw xwý mã ihhêj nare, ne Ewa xwý mã pê ihhêj. Ne taa mã pê nee Pahpãm te amji kam hapac xà impar nare. ¹⁵ Cwýrjapê quê ha pyjê cunea mã mehkra hà to hà. Nãmri quê ha pyjê itajê nõ te Jeju to amji mã ihhimpej, ne cumã mehkwy kĩn, ne mehtehcajpar rohnýtĩ mã, ne nee ahti na ame hũmre na amji mã prãm nare, ne quêt caxwãm catia mã Pahpãm kôt ame ipa na, quê ha ihtýj ihkên xà catia pê me amji pytà.

Timot te mehkwy to mehhimpej catêjê pyxwýr xà
Tito 1.5-9

3 Ita caxuw, wa ha ate me cuprôn xà jô pahhi to me amã icakôc, ne me amã to hahkre. Quê ha jũm te Jeju na mehkwy to ihhimpej catê na amji to prãm na, quê ha hãpên xà impejti na amji to prãm. Ýhý, ite me gapackre xà ita ampeaj kam ri. ² Por Jeju na mehkwy to ihhimpej catêjê pupun catêjê atajê, quê ha me cupê hũmre impejti ne, quê nee jũm ampo kên nõ na me harên to kên nare. Ne me cumã hĩxi pyxít peaj, ne hĩxi me ajpên na ajkrut peaj. Ne caxwãm catia mã mehpahãmti ne, ne nee ame amji mã hamãr nare nare, ne nee amji to me cati prãm nare. Ne quêt ihcunea na me hãhcajrënti ne, me hũrkwa to, ne me cumã ampo pejti cunea to me cumã hahkre jahkre pej. ³ Quê ha nee cupê côxyhti to ihkôm catê nare, ne nee apu hàprê nare, ne quêt hàhcaprĩa kam, aracri ame to ihhimpej to ipa. Ne nee ihpore to amji to hakràj catia to ipa prãm nare. ⁴ Ne ihtýj cumã hũrkwa kam amji to ihhimpej jahkre pej, ne amji caxuw mehkra japackre, quê amji mã ampo cunea na, catyt kam me hũpahti to me ipa. Cwýrjapê quê ha ihtýj cupê Jeju na mehkwy to ihhimpej catê na, me jũm ata capi. ⁵ Nãmri quê ha jũm ata pê hũrkwa kam amji to ihhimpej jahkre kêatre na, jũ wýr quê ha apu amji mã hamã, ne amji to mehkwy to ihhimpej catê.

⁶ Ne mehkwy to ihhimpej catê ata, quê nee cupê curmã Pahpãm kôt ipa catê nare. Nãmri quê ha curmã jũm ata te Pahpãm kôt ipa catê na amji ton, mã cute me to ihhimpej catê na me hãm na, quê ihhêaj to cama apu amji to cati prãm. Ne cute amji to amji jahkre pejti to prãm to ipa to hanea, pom pê mam me pahcurê xwýn, ne amji curê mã amji mẽ, ita kôpit na, quê ha jũm ihtýj amji curê mã amji mẽ. ⁷ Na quê ha me cupê Jeju na mehkwy nare atajê kam mare mã, catyt kam ipa, quê ihtýj me to amji mã ihcakôc to impejti ne. Quê ha cute hajýr na, quê ha nee Xatanaj pê me pahcurê xwýn ata cupê Jeju na mehkwy to ihhimpej têtê ihcahpêrkàr nare.

Timot te hanea ne mehkwy jamãr catêjê pyxwýr xà

⁸ Ýhý Timot, ita caxuw wa ha me pahkwý tehcajpar catêjê te amji kam hapac xà to amã hahkre. Jeju na mehkwy tehcajpar catêjê, quê ha caxwãm catia mã, catyt kam ame ipa, ne mehcakôc xà hêj xi nare to mehcakôc to me ipa to me prãm. Ne nee apu ampo cacô xyhti catia ne to ihkôm nare, ne nee ihpore to pit mã apu amji mã mehhimpej to me ipa nare. ⁹ Ne cute Jeju to amji mã mehhimpej ita na, quê amji to mehtýj tu. ¹⁰ Quê ha mam me hãpên xà ita na me capi, quê ha cute hãpên xà ita to me hamãr na, quê ha me hõmpu, ne toa mehkwy tehcajpar catêjê.

¹¹ Mehprõ xwýjê, quê hanea catyt kam, caxwãm catia mã ame ipa. Quê nee mehkrí ne ame harkwa te wô nare, ne quêt catyt kam, caxwãm catia mã, me amji kam hapac to me ipa, ne ihtýj ampo cunea na me amji jarkwa par to me ipa.

¹² Ne Jeju na mehkwy tehcajpar catêjê mã quê ha mehprõ pyxít peaj, ne ahpyãre na amji mã mehkra to me ipijapar to mempeaj ne. ¹³ Quê ha cute me hãpên xà to impejti na, quê ha mehkwy cunea amji mã me hũpa to ipa. Cwýrjapê quê ha ihtýj Jeju to cute amji mã mehhimpej na, me amji jarên to me ipa.

Pê Pawrô hipêr Timot mã Jeju kôt harên pejti
Epet 2.19-22

¹⁴ Ýhý Timot, wa awýr ikràr, ite apupun prãmte, ne jũ wýr wa ha awýr tẽ, amcro itajê nõ na, cwýrjapê wa ite amã ihhóc, ne amji cumam amã ihkujahêc. ¹⁵ Nãmri wa ha cormã ita ri apu ikên, quê ha mam ihkàhhóc ita me awýr cato, ne me pahkwý te cuprôn xà kam me pahte me amji ton xà ata to me amã hahkre, jũ mã cu ha amji to me pahhimpej xà to. Ne me pahte cuprôn xà ita pê cama pahte me cuprôn xà nare, ne cupê Pahpãm te cuprôn xà. Ampo na? Pahpãm ihtýj me pahcunea kam amji to ajpa. Cwýrjapê ri ihhêj rũm me papê, pom hãn ne ikre jicjêc ikre cajpar to ihcuhhê ita pyrãac, na cu Pahpãm mã cute amji kam hapac xà cunea mã me pajũcanãr to me pahcuhhê, ne ma mehcajpa.

¹⁶ Ýhý, pom Jeju jarên xà ita peaj to impej. Ne taa mã ri catyt kam me papa na me pahtehcajpa. Pê cu mam nee me pahnõ hahkre pej nare, ne ita caxuw ri me pahcunea mã hahkre pej. Na cu ha ampo itajê cunea na amji mã Jeju to me hane he:

Cupê Pahpãm cakrô, pê ajte me pajã na amji to ajpê. Mã Pahpãm Carõ Pejti te hõmpun, ne catyt kam ipa na harên.

Mã côjkwa kam Pahpãm mã memprar catêjê te hõmpun.

Mã pjê cunea kam harên xà ita picràn.

Mã pjê cunea kam mehkwy te mempar, ne ihkôat me amji ton, ne ma me hũnãr.

Mã hacpýa mã Pahpãm te to hàpir, côjkwa wýr.

Hõhõ, pahte Jeju to amji mã me pahhimpej xà ita ampeaj kam ri.

Pê Pawrô Timot mã cute me ampo kên to hahkre catêjê cawpa

Coroxo 2.16-19; 1 Timot 3.1-9; 2 Petrô 2.1-3; Juta 3-16

4 Ne ampo itajê cwÿrjapê wa ha hipêr cute ampo kên to me amã hahkre catêjê na me amã ihhõc. Ýhÿ, ramã Pahpãm Carõ Pejti te hirãa pê me harên, quê ha ihtÿj jũ caxuw Jeju na mehkwy kwÿ, Jeju te amji mã mehhimpej jicu. Mã me pahcurê xwÿn Xatanaj pÿn, cupê jarõti pê ampo carõ kên, pê Xatanaj mã hàpên catêjê atajê me hapõj. Mã Jeju na mehkwy kwÿa te ampo carõ kên itajê kwÿa to amji mã mehhimpej to me ipa. Ne ampo carõ kên itajêa kôt me cumã ihhêj xi xà kên atajê cunea to hahkre. ² Ne pom cute me ampo to hahkre catêjê itajê pê ihhêj rÿm ampeaj kam ampo to hahkre catêjê, ne nee mã ampeaj kam nare, mehhej xi to pit mã ame cumã hahkre to me ipa. Ne ramã me cupê mencaca xà cunea ihkêanre, mã nee me hahkre pej nare kam, ihtÿj impej na amji mã me to hane. ³ Ne me hÿmre itajê te me cumã ampo to hahkre xà itajê te hajÿr he:

— Ca ha nee pyjê nõ me gikwa nare, ne ahte apu apa, ita na ri Pahpãm mã impej — hane. Ne hanea ne xwahna, por ampo kur xà impejti atajê, quê ha nee amehkur nare. Ne cama ame cumã ihhêj, ne pom Pahpãm te ampo cunea kur xà ton itajê, nee ihkên nare, ne impej pit, Pahpãm kôt me ipa catêjê mã. Ampo na? Pahpãm mã me pahkÿnti, mã me pamã ampo pej pit gõ, ita na ramã me pahte me hahkre pejtu. Ne me gápàn xà wÿr, ca ha xa mam me gõ pyrên me gakryti na Pahpãm mã me amji jarê. ⁴ Ne pom pê Pahpãm ampo cunea to itajê impej pit, cwÿrjapê cu nee ame papijacri xà atajê cupa nare. Ne gapacta ne ampo itajê cunea na me amji tohpõj, ne Pahpãm mã me harên to hane he:

— Ýhÿ me ijõ Inxũ Cati, ate me imã ampo pejti jõr, itajê pyrên ampeaj kam me ijakry — hane. ⁵ Hõhõ, ca ha Pahpãm jarkwa to Pahpãm mã me acakõc to me hane, quê ha me apijacri xà mã, ampo cawpa xà itajê cunea hamre tu. Ampo na? Pahpãm mã ampo itajê cunea impej pit.

Quê ha Timot pê Jeju mã hàpên catê impejti

1 Timot 1.6-16; Tito 2.1-8

⁶ Ca ha atÿj ite gapackre xà ita to, Jeju kam me pahte ajpên to me pahkjêjê atajê mã hahkre. Ca ha ate ita to hajÿr na, ca ha apê Jeju mã gápên catê impejti ne. Hõhõ, ca ha hane, ne Pahpãm jarkwa kôt amji ton to apa, ne me cumã harkwa to hahkre to apa, ne atÿj acaxwÿn to amji mã ihtÿj to apa. Ampo na? Ampeaj kam ri Pahpãm jarkwa ita, nee mã ihhêj xi nare. ⁷ Ne ihkÿnte me aquêjtê jÿjarên hêj xi xà to me apijacri catêjê mã ampo cawpa xà, itajê kôt hamreare. Na ca ha nee ihkõat me amji ton to me apa nare. Ne quêt Pahpãm jarkwa pejti atajê to, ca ha me hahkre to me apa, ne catyt kam ihkõat me amji ton to me apa. ⁸ Cu

ha me pajapên xà pytã to me pajapên to me papa, ne pahtÿj pajã cunea kam ame pahcarõhrôt. Ne ampeaj kam ame pajã hi tÿj. Jÿkjê na cu ha Pahpãm mã pajapên to me papa, ne amji caxwãm pê amji mã me pahcaxwÿn to ihtÿj to me hanea, pom quê me pajã kam pahcarõhrôt hi tÿjti he. Ne me pahcaxwÿn tÿjti ita ri me pajã hi tÿjti ita jirõa pê impej. Ampo na? Quê ha ihtÿj me pajã me pahhi tÿjti ita jũ caxuw hamre, ne me pahcaxwÿn quê ha quêt jũ caxuw hamre nare.

⁹ Ita caxuw wa ha ampeaj kam ite me amã ampo to hahkre xà ata to me amã hahkre. Ca nee me anõ ihcaca nare, ne atÿj ana cuhkõnre cunea to ahna amji cãpa, ne toa amji mã me ahimpej to me apa. ¹⁰ Pahpãm ihtÿar ihkrã ata pê ri me pahkên pê me pahto hapõj catê. Ne toa, cu amji mã ame pahhimpej, ne ma amji to me hikaj to me papa. Cu pahte mempar, cwÿrjapê cu pahtÿj hàpên xà cati jãhtõa itajê to me pajapên to me amji cujtên to me papa.

¹¹ Cwÿrjapê ca ha ijarkwa itajêa to me cumã hahkre to me apa, quê toa amji mã mehhimpej to me ipa.

¹² Quê ha me pahkjêjê nõ atuwre na ato ihcakõc, ca nee jÿm ata kam gapac nare. Ne cormã atuwre cakrõ, ca catyt kam apu apa, ne catyt kam acakõc to apa, ne amã mehcunea kÿn, ca me caprã to apa, ne Jejua to amji mã ahimpej na apahãmti to apa. Quê ha me pahkjêjê kwÿ catyt kam ate apa na me apupu, ne hanea ne acuxà catyt kam me ipa. ¹³ Cwÿrjapê ca ha atÿj me cumã Pahpãm jarkwa pejti ita cahyt, ne me cumã Jeju pê me pahkritxwÿ jarên xà impejti jarên to apa. Ne me cumã Pahpãm te amji kam hapac xà cunea capõ partu to apa, wa ha ahnaa me awÿr icato.

¹⁴ Pê ca cormã gápên nare kam, pê Jeju na mehkwy to mehhimpej catêjê me akrã na me hÿxi, ne Carõ Pejti jarkwa kôt me garên to hane he:

— Ita caxuw, ca ha Jeju na mehkwy jarkwa me, Jeju jarkwa kôt, me cumã Pahpãm jarkwa jarên pejti itajê to hahkre to apa — hane. Pê Pahpãm amã acarõt tÿjti atajê jõr partu. Cwÿrjapê ca ha jũ caxuw ita to gapac kêt nare.

¹⁵ Hõ, gápên xà ita mã, ca ha amji jõr to apa, ne ma apicamên to mõi, mehcunea kam mare mã. ¹⁶ Ca ha atÿj catyt kam apa na amji jamãr to apa, ne me cumã ampo to hahkre na amji jamãr pejti to apa. Ca ha hane, quê ha Pahpãm ihtÿj cute me akam hapac catêjê me, me akên pê ato hapõj to ipa.

Jeju na mehkwy te ajpên to mempejti xà

2 Timot 2.24-25

5 Ýhÿ, wa ha pahte me ajpên to mempejti xà jarê. Quê me pahkjêjê ame ampo kên ton to me ipa, ca me cumã, quê catyt kam ame ipa. Ne mehwej catêjê, ca ha me cumã kên nare. Ampo na? Ramã quêt acumam ihwejtũ. Ca ha cama cumã acakõc, ne hapackre to hane, pom quê ca me apãmjê mã me acakõc to me apa he. Ne pom ca hapu na me akjêjêa japackre ata na, ca ha akõt mentuwre atajê japackre to hane. ² Ne nee pyjê wej itajê mã kên to apa nare to hane, pom ca me axyrxwÿ na me apahãm, ne nee me

cumã nare he. Ne atÿj me cuprÿ na apahãmti to hane, pom ca me akjêjê na apahãmti he.

Pyjê wej pê mempjê tyc, pê hamreare atajê tehcajpar
xà
Tijac 1.27

³ Ne hanea ne me pahkwÿa cahãj wej, pê mempjê tyc atajê, ca ha me ahna apahãm jãhtôti to me apa.
⁴ Quê ha me pahkwÿ nõ pê impjê ty ita cumã ihkra, ne cumã ihtãmxwÿ, quê ha nee mehkwy cunea mehtehcajpar nare, ne quêt mehtãmxwÿ me, mehkra itajêa quê ha mehtehcajpa, ne me cumã hõ gõ. Ampo na? Pê mam mehkra itajê me, mehtãmxwÿ itajê kryjre na ihtÿj ajco me cumã hõ gõ, ne me to ajpa, jahpan xà na quê ha ihtÿj me to ajpa, ne me cumã me hõ gõ. Hõhõ, ita na ri Pahpãm mã impej, ne ahna cumã prãm. ⁵ Nãmri quê ha jùm cahãj ata caxuw hamreare, ne nee hũkjê nare, quê ha amji tehcajpar xà na ihtÿj amcro me, caxwa cunea kam ihkrÿ ne Pahpãm wÿ. ⁶ Ne por pyjê pê me pahkwÿa cahãj pijapit, ihtÿj hãn ne mehkwy kÿnte ame hapactu to me ipa, ne amji na me ampo cwÿr to me ipa atajê, quê ha nee me pahkjêjê kwÿ me hõ to ame hamãr to me ipa nare. Ampo na? Pom pyjê te hajÿr catêjê itajê, ramã me caxwãm pê ihhêj ne amehtyc. ⁷ Cwÿrjapê ca ha Timot, pom ite me hapackre xà ita to, ca ha me hapackre, ne me cumã to hahkre to apa. Quê ha me akam hapac, ne catyt kam me ipa na, quê ha nee jùm me ahna ihcakôc kên nare. ⁸ Ne por quê ha jùmjê amji to hũkjê atajê, nee me amji to mempej nare na, ne nee hũrkwa kam ame hamãr to impej nare na, quê ha ramã Jeju to amji mã mehhimpej jicu, ne amji to me cupê Pahpãm kôt ipa catêjê nare atajê pyrãac, ne me hirõa pê ihkêanre ne.

Mehkwÿ te pyjê wej pê mempjê tyc tehcajpar xà

⁹ Ne por mempijapit pê me hũkjê nare atajê, ca ha me haprÿ nõ, por amji tehcajpar xà na me prãm atajê, mãr quê mehkwy mehtehcajpa. Por pê mempjê to pyxita ita kam mempijapit, ne ramã me ahna caku te xêjxênta jirõa pê atajê, ca ha me haprÿ nõ. ¹⁰ Quê ha jùm mehcunea mã impejti na, quê ha ramã me hõmpu, ne me hahkre pej, ne amji mã me harên to ipa. Quê ha jùm ita mehkra nõ ata to ipijapar to impejti, ne cute krÿxàre kwÿ mã hõt xà na hũrkwa jahkre to ipa na, ca ha me haprÿ nõ. Ne hanea ne, por me pahkjêjê kwÿ mã hàpên to ipa, ne hanea ne me cupê hamreare atajê tehcajpa, ne me hà catêjê tehcajpar to ipa, ne ampo to hàpên xà impejti atajê cunea mã cute amji jõr to ipa atajê, ca ha atÿj me haprÿ nõ.

¹¹⁻¹² Ne por cormã mempijapit tuw atajê kwÿ te Jeju na me amã amji to ihhimpej ne, me amã:

— Wa ha hirãa pê Jeju me, me ca mã amji to ihimpej, nãmri wa ha itÿj me pahkwÿ tehcajpar to ipa, ne nee hipêr jùm me ijkwa nare — hajÿr. Ca ha me haprÿ nõr cakrô, quê ha ihtÿj cormã jùm impjê to prãm. Ne cama cute amji to ihhimpej xà ata to hapac kêt, quê ha Pahpãm mã ita na ihkÿn nare, ne ahna cupê ihkaj na. Cwÿrjapê ca ha mentuw japrÿ nõr nare. Ampo na? Quê me

ahna ahtÿm nare, quê ha ihtÿj hipêr me hikwa tuw prãm. ¹³ Ne me cupê mempjê tyc tuwre catêjê kwÿ te hajÿr he, quê ha itajê ma krÿ cape na ame ipa, ne ampeaj kam me cumã xuwcaca, ne me xwahna xi, ne nee amji na me hũcapi nare, ne cama mehkwy na amehcakôc kêanre to me ipa. ¹⁴ Cwÿrjapê ri hacpÿa mã imã hipêr pyjê pijapit tuw itajê jikwa tuw, ne mehkra me, me hũrkwa to mehhimpej na, me to prãm. Hõhõ, quê ha ita to ame hane, quê ha nee me pahcurê xwÿn catêjê ame pahna ihcakôc kên nare. ¹⁵ Ne ihhêj ne ramã mempijapit kwÿ te me Pahpãm jõ pry cupan, ne me pahcurê xwÿn pê Xatanaj jõ pry pynãr.

¹⁶ Quê ha jùm cahãj jũrkwa kam jùm impijapit, quê ha taa ihtehcajpa, ne ma hamã. Quê ha nee ipu na, ahti na, Jeju na mehkwy mehtehcajpar nare. Jũ na quê ha Jeju na mehkwy ihtÿj mehtehcajpa? Quê ha quêt me hũkjê hamreare, ne me caxuw hamreare, ita ri quê ha mehkwy kwÿa ihtÿj mehtehcajpa, ne me hamã. Hõhõ, ite amã mempijapit to icakôc to hahkre xà ita to, wa ite amã hahkre.

Pê Pawrô Timot mã mehkwy to mehhimpej catêjê to hahkre

Me Hàpên Xà 14.23; 1 Petrô 5.1-4

¹⁷⁻¹⁸ Ne ita caxuw wa ha me cupê me pahkwÿ to mehhimpej catêjê to amã icakôc, ne me to amã hahkre. Pê ramã Pahpãm jarkwa na, ihkãhhôc kam ihhôt ata me pamã hũjarên to hane he:

“Quê ha jùm te amã hàpên na, ca ha atÿj cumã gãmjõr to impejti ne.

Ne quê hanea ne pryti xũmti jàpên catêjê nõ amã apê, ca ha nee harkwa na hê nare, hàpàn tète, quê ha taa ihtÿj apà, hàpên xà kam” hane.

Pyrac pej ne quê ha me pahkwÿ jõ pahhi atajê me hàpên xà to impejti na, quê ha mehkwy me cumã hàmjõr to impejti ne. Quê ha Pahpãm jarkwa to me cumã hahkre catêjê me cumã ihcakôc to impejti, ne catyt kam, cute me cumã ampo to hahkre to me ipa na, quê ha ihtÿj mehkwy me cumã hàmjõr to catia ne.

¹⁹ Ne ihnõ xwÿjê, quê jùm pyxita pej ne Jeju na mehkwy to mehhimpej catêjê nõ to amã ihcakôc kêanre na, ca ha nee impar nare. Nãmri quê ha mencre ne ajpëan kôt me amã to mehhimpej catêjê nõ jarên to kêanre na, ca ha cormã atÿj me kampa. ²⁰ Ca ha me acunea te ramã mehkwy to mehhimpej catêjê nõ te amji mã hamãr nare, ne cute ampo kên ton na ate me hahkre pej na, gapacta ne kam mare mã me cumã, quê ha mehcunea me hõmpu, quê ha ihtÿj me amji mã pa, ne ton jicu.

²¹ Ýhÿ Timot, wa ha Pahpãm me, ihkra Jeju me, cõjkwa kam me cumã imprar catêjê kam mare mã, amã ijarkwa ita ta, ca ha ijarkwa ita pa, ne ma to amji japackre. Ne ihkôat me cumã ampo itajê cunea to hahkre to apipenti to apa. Ne nee ca amji mã gõ kwÿ nõ to impejti prãmte, nee cumã ite amã ampo to hahkre xà itajê nõ to kyre pê hahkre to ihcajcucre

nare. Ne nee jũm mã amji jirõa pê ampo itajê nõ to hahkre nare, ne me cumã ampo itajê to hahkre to apipenti to apa.

²² Quê curmã jũm amji to Jeju na mehwý, ca ha nee cormã ne pahhi na me hãm nare. Ca cormã ne pahhi na me hãm, quê ihhêaj to cormã hãpên xà peacre, ne ihtýj ampo kêanre to, quê ha me gãpên xà ita kôt hamreare ne. Ne nee cute mehkên ton catêjê kôt me akên mã acjêj nare, ne quêt ihcunea na, apejti, ne apahãm jãhtõti to apa.

²³⁻²⁵ Ne mehwý hãn ne me kam mare mã ampo kêanre to, mã Pahpãm te me pahcukij xà xwýjrea na mehcunea mã hahkre pej. Ne mehwý aracri me ampo kên to, mã nee me hahkre pej nare, ne Pahpãm mã ramã me hahkre pej. Ne Pahpãm te me pahcukij xà kam, cu ha me pahcunea me hõmpu, ne me hahkre pej. Ne hanea ne ita xwýjê na cute hajýar he, mehwý ihtýj hãn ne me ampo pej pit to, mehwý kam mare mã. Ne mehwý hanea ne aracri me ampo pej pit to, mã nee mehwý me hahkre pej nare. Mã ihtýj Pahpãm me hõmpu, ne me hahkre pej. Taa mã, xãmte cormã ihnõ, ca gõtpe gitõ kre me atu xàa na apu apa, cwýrjapê ca ha cõ to pit mã akõm nare, ne hanea ne pìxõ cacõ xyre kryjre ne to akõm to apa.

Pê Pawrõ Timot mã cama me cumã hãpên catêjê to hahkre

Epet 6.5-9; Coroxo 3.22-4.1; Tito 2.9-10; 1 Petrõ 2.18-25

⁶ Ita caxuw wa ha me hãm cwýr nare, ne cama me hãpên catêjê atajê pê Jeju na mehwý to me amã awjarê. Ýhý, me hãpên catêjê cunea te ihtýj amji mã me hõ pahhi cupa xà, mãr quê nee jũm me pahte amji kam me pajapac xà to hahkre xà atajê na, Pahpãm na ihcakõc kên nare. ² Quê cama me cumã me hãpên catêjê jõ pahhi pê Jeju na mehwý na, quê nee cumã hãpên catêjê ata amji mã harkwa to:

— Ipê ijõ pahhi kjê, cwýrjapê wa ha nee cumã ijãpên cati nare — hane. Quê amji mã hajýr nare, ne cama quêt harkwa to:

— Ijõ pahhi pê imã ikjê kinti ata ri ijãpên xà jahpan xà na hãm cwýr to ipa, cwýrjapê wa ha cumã apêa to apê — hane.

Pê hipêr Pawrõ cumã, cute me cumã ampo kên to hahkre catêjê cawpa

Ruc 12.13-21; Tijac 5.1-6

³⁻⁴ Ca ha ampo itajê to me cumã hahkre, ne ahna me to ahimpej to apa. He Pahpãm me pamã catyt kam me papa to hahkre. Quê jũm me Pahpãm himpej xà me, me pajõ Pahhiti pê Jeju jarkwa kaj na, cute me cumã ampo to hahkre na, ca ha ramã me hahkre pej pyren-tu, amji to cati prãmte ri apu hajýr to ipa, ne cupê amji jahkre kêatre. Ne me hũmre itajê hãn ne me ajpên mãn prãmte, Pahpãm jarkwa kryjre cwýrjapê me ajpên mãn kam pra, ne tee ame ipijapu to prãm. Mã ahna me cuprõ, ne mehkã, ne me to ihcuhhê atajê hanea ne me ipijapu to prãm. Ne mehwý me hũ na me amji to prãm, ne mehwý ajpên kam ame hũn kêanre, ne

mehkwý mehcakõc xà incrãre, kôt hamreare atajê to uu ne ajpên krac ri mehcakõc jicu nare. ⁵ Ne pom ame ita ton to ipa itajê, hãn ne mehkã acto tu, mã nee ame amji kam hapac nare, ne me cumã mehhêj xi to pit mã amehcakõc jahkre pej. Ne cute me amji kam hapac xà kêanre cupan itajê to ri ame amji kampa he:

— Wa itýj jũ na amji ton to prãm, ijakràj prãmte. Wa ha Jeju na mehwý mã axà, ne Pahpãm mã apê, ne cumã ijãpên ita kam wa ha amji to ijakràj — hane.

⁶ Cu ha me pahte catyt kam me papa na, quê ha tee me papê me pajãhcukrêj crêre cakrõ, cu ha me hõmpu, ne me amji mã:

— Mã hã, wa ha tahnaa mã me — hane. Hõhõ, pahte me pajãhcukrêj to amji kam me pajapac xà ita na ri Pahpãm mã me pahto prãm. Ne ramã me pajakràaj to me pajakràj. ⁷ Ne me pahpýpým xà kam, ampo to pê cu pjê wýr ame pahpýpým? Hamreare, nee pê cu ampo to ame pahpýpým nare. Ne me pajũ kam ame pahpýpým. Na cu ha me ty, ne ampo to cu ha ame pra, pjê ita pín, cõjkwa wýr? Hamreare, cu ha me pajũ kam hacpý mã ame pra. ⁸ Mêr hõhõ, quê ha me pamã me pajõ, ne me pahkà, cu ha pahtýj hũrên ame pajakry, ne me amji mã:

— Mã hã, cu ha ahnaa mã me — hane. ⁹ Ne por me pajõ me, me pahkà jirõa pê amji to me hakràj prãm catêjê itajê pê ihhêj rũm ahtorore pê amji jahkre kêatre ata pyrãac. Mã arýjhy xen te kwýc mã acjêj, mã mehpro, mã hãn ne mehcurea ata pyrãac, ne ihpore na mehprãmte ita to ihtýj mehkên mã me amji rên prãm to me ipa. ¹⁰ Me pahte ihpore kinti atajê pê ampo kên cunea xakat. Ne me pahkwýa kwý te me ita par pej nare kam ri, cute me Jeju jõ pry rên, ne to amji mã mehhimpej jicu, ne pea me hĩ caxwãm pê cute ame caxwýn itajê jaxõp, ampo kên itajê to. Cwýrjapê ca ha Timot, ma ampo itajê cunea pê amji to gapõj to apa.

Timot te ampo cunea mã hũcanãr xà

1 Timot 2.1-7

¹¹ Ýhý Timot, apê Pahpãm jõ me hũmre nõa, cwýrjapê ca ha quêt mehcunea to amji kam gapac xà to apipenti to apa, ne quêt Pahpãm te amji ton xàa kôt, catyt kam amji ton to apa. Ne quêt Jeju to amji mã ahimpej to apa, ne quêt mehcunea to impej, ne amã mehkinti ne. Ne quêt gãpên xà ita kam, ca ha to acrà ne cumã gãcanãr to apa, ne nee me hirõa pê amji ton to apa to prãm nare. ¹² Ne cama Jeju te amji kam hapac xà kôt to amji cujtên kam to acrà tu, ita na ca ha gõtpe cahi na akrí, rohnýtta mã. Hõhõ, pom ite amã ampo to hahkre par itajê kôt, quê ha jũ caxuw acaxwýn ihtyc nare, ne quêt Pahpãm cahê na atĩr rohnýtta mã. Pê ca me hàhtõ kam mare mã amji jarên to hane he:

— Wa Jeju to amji mã ihimpej, ne ihkõat ipa, ne cumã ijãpên to ipa — hane. Pê amcro ata na Pahpãm ana ahwý, ca Jeju cape na apa rohnýtta mã xà caxuw.

¹³ Ýhý Timot, wa ha amã ijarkwa ta, Pahpãm me Jeju kam mare mã. Pê Pahpãm ampo cunea mã amji to ipijapar xà caxuw, cumã cute amji kam hapac xà gõ. Pê

Jeju krî jô pahhi pê Pirat cuna mã cupê Pahpãm kra na amji jarên to impejti. Wa ha Pahpãm me Jeju kam mare mã, amã ijarkwa ne amã:

¹⁴ — Por ite amã ampo cunea to hahkre atajê, ca ha ampeaj kam kampa, ne catyt kam apa ita na, quê ha ahnaa hacpÿ ne me pajô Pahhiti pê Jeju Crixto te amji jaxàr xà jô amcro kam ahtwÿ — hane. ¹⁵ Quê ha Pahpãm hacpÿa ne pjê ita wÿr Jeju kujate. Ne Pahpãm pyx-it peaj, ne cupê mehcunea jô Pahhiti, mã mehcunea impejti na me cumã harê, ne cupê pahhi catêjê cunea jô Pahhiti, ne cupê mehhimpej catêjê cunea to Ihhimpej catê cati. ¹⁶ Ne pyxit peaj, quê ha nee jû caxuw ihtyc nare. Ne pyxit peaj ne impeaj to impej. Ne impej ita pê ihhêj rûm pyt cuna mã irît xà prà. Ne jû wÿr quê jûm hõmpun mã awcanã. Ita pyrác pej ne, jû wÿr quê me paxûmre kêanre nõ awcanã, ne Pahpãm pejti ata na ahtêp ne hõmpu. Rÿ jû caxuw jûm te hõmpun nare, ne jû wÿr cu me pahnõ hõmpu. Quê ha pjê cunea kam mehcunea amji mã me hûpa. Ampo na? He pyxit peaj, ne cupê me pahcunea to ihhimpej catê, rohnÿtti mã.

Pê Pawrô Timot mã cute me hakràj catêjê to hahkre

Ruc 16.9

¹⁷ Ne wa ha cormã hipêr amã me hakràj cati atajê to icakôc crire ne. Ne por pjê ita kam me hakràj cati atajê, ca ha me cumã, quê ha nee ame amji to cati prãm nare, ne nee me hõ pore to pit mã ame amji to ipijapar

to prãm to me ipa nare, ne quêt Pahpãm to quê amji mã mehhimpej to prãm to me ipa. Ampo na? Quê ha ihtÿj jû caxuw hõ pore ata hamre, ne Pahpãm quê ha quêt jû caxuw hamre nare. Ne Pahpãm mã me pahkîn, na ri me pamã ampo cunea jôr to catia to ipa, mã hûrên me pajakryti. ¹⁸ Ne me hakràjti atajê mã garkwa ta, quê mehwÿ to impeaj ne, ne pom cute mehwÿ to impejti ita to, quê ha hakràj cati. Ne me to hàhcajrênti to ipa, ne ihtÿj mehwÿ mã me hàhcukrêj jôr to me ipa. ¹⁹ Quê ha cute ita to ame hajÿr na, quê ha kÿj pê, Pahpãm cahê na, amji mã me hàhcukrêj itajêa to cuprô. Hõhõ, quê ha me hane, ne Pahpãm cahê na amji to me ipijapar rohnÿtti mã.

Pê Pawrô Timot mã amji jarê

²⁰⁻²¹ Ýhÿ Timot, pom ite amã ampo jarên itajê, ca ha amji mã nõr to impeaj to apa, ne ma to amji japackre ne ihkôat apa. Ne me akwÿ kwÿa hãn ne Pahpãm mã ampo kîn nare atajê to pit mã amehcakôc to me ipa, ne me amji jarên to mehhej xi to:

— Me imã ri quêt ampo itajê cunea jahkre pej — hane. Cwÿrjapê ri ramã cute me Pahpãm jô pry cupan ne mehhyr, ne Jeju te amji mã mehhimpej jicu. Ne ca, ca ha cute me hajÿr catêjê pê ampÿa mã apu apa. Ne hamre, imã Pahpãm jarkwa kôt me apeaj na me apa na me ato prãm. Hamre.

2 TIMOT

Ýhý, pê Pawrô pê Jeju jarkwa na memprar catêjê nõ Timot mã, pom cu me hõ kàhhôc pijakrut cahyt itajê kujate. Na pê hapu na hõ kàhhôc ita japry pê (2 Timot).

Ne Timot pê intuw, ne ajco Pawrô kôt apu ipa. Jirô pê mã pê Pawrô Epet jõ krí kam Jeju na mehwý mehkří atajê to ihhimpej catê na Timot xãm. Ne Pawrô Roman jõ krí kam me hacjên xà kam ihkrí, ne ramã cute mehcuran na hàhtêp na, cumã amji jahkre pej. Ne pom cu hapu na me hõ kàhhôc cahyt ita kam, pê Pawrô Timot mã cute Pahpãm cwýrjapê mehcuran xà ata cupa nare na, amji jarê. Ne hanea ne cute cumã, jũ caxuw jũmjê te me cupê Jeju na mehwý na cumã amji jarên, ne ajteare mã cute me amji kam hapac xà atajê cawpa.

Pê Pawrô Timot mã amji jarê

1 ¹⁻² Ikra Timot, ipê Pawrô, wa ha hipêr amã ih-
hõc. Ca ikôt Jeju kôt apa ita kam, wa ato amji kra,
ne imã akínti. Pê Pahpãm Jeju Crixto mã iprar catê na
ito. Na wa ipê cumã iprar catê. Ne pê imã harkwa ta,
na wa pjê cunea kam, mehcunea mã icakôc ne me
cumã awjarê. He cu ha Jeju na me amji hõnco tu, quê
ha me pamã pahte amji kam me pajapac xà tuw pejti
atajê gõ. Imã Pahpãm pê me pajõ Inxũ me, me pajõ
Pahhiti pê Jeju Crixto te me ato impejti na, me ato
prãm. Ne cute me acaprí na, imã me ato prãm, ne amã
acaxwãm pê, cute acaxwýn kam acarícti impejti jõr to
ipa na, me ato prãm.

Pê Pawrô amji caxuw Timot japackre

Me Hápên Xà 16.1-2

3 Wa Pahpãm mã apu ijápên to ipa, ne cute ampo
cunea na ito ihhimpej atajê cunea wa ton to ipa, me
quêtjê cuxà, ne nee amji pê ihhimpej xà nõ to ijapac
kêt, ne ihcaca nare. Ne wa hãn ne amcro me, caxwa
kam Pahpãm mã icakôc, ne nee amji pê ato ijapac kêt
nare Timot, ne itýj cumã acajrên, ne cumã apyrên
ijakryti na amji jarên to ipa. **4** Ne me papicapôn xà ata
kam, wa cormã acwýr ata na ato amji japackre. Na wa
hipêr apupun prãm, ite apyrên amji jakryti prãmte.
5 Na wa itýj ate Jeju to amji mã ahimpej to apa na, ato
amji japackre to ipa to hanea, pom quê atocatyjre pê
Rojtikwýj, me anã pê Ewnixêkwýj Jeju to amji mã
mehhimpej he. **6** Na pê wa akrã na ijũ xi, ne acajrên ne
apê Pahpãm mã gápên catê na, cumã agõ. Pê Pahpãm
amã Carõ Pejti carôt gõ, ate nee amji mã ampo cupa
nare xà na. Ne akam carôt ita to amji japackrea ne.
7 Quê ha Pahpãm me pamã Carõ Pejti gõ, cu ha nee
ame amji mã pahto me papa nare. Ne quêt ampo crê
itajê na quê ha me pahtehcajpa he. Quê ha carôat kôt
ame papa na, me pahtehcajpa. Ne me pahcunea te
ajpên kinti na, me pahtehcajpa, ne hanea ne pahte me
ampo kên to amji kam pajapac tète, me amji jiprôn na,
me pahtehcajpa.

Pê Pawrô mã Timot te ihkôat amji ton na to prãm

¹ Timot 4.6-16; Títo 2.1-8

8 Cwýrjapê ca ha nee me cumã me pajõ Pahhiti to
gũjarên na apahàm nare. Ne hanea ne, nee Jeju cwýr-
japê cute me ijaxàr ita na, apu ikam apahàm nare. Ne
quêt icahê na gũjarên pejti xà itajê na, ca amji pupun
xà kèanre to apa. He ramã me Pahpãm te ita caxuw
amã carôt jõr. **9** Ne pê me pahkên pê me pahto hapõj,
ne me pahto amji kwýa. Xà pê cu ajkí me ampo pejti to
na mã, pê me pahto hane? Hãpà. Pê cute amji kam ha-
pac xà to hajýr prãmte, pê me pahto impejti ita to
hane. Ne pê mam, rý pèa mã, Pahpãm pjê ton xwýjrea
na amji jarên to:

— Wa ha mehkritxwý na me cumã ikra Jeju kujate,
quê ha mehtyc jahpan xà na ty. Wa ha hõmpu ne ihkôt
me to impejti ne, quê ha nee jũ caxuw ihkên cati mã
mencjêj nare — hane. **10** Ne pê amji jarên xà ata na,
me pamã me pahtyc jahpan xà na, Jeju tyc xà wýr ihku-
jate. Pê ty, ne hacpýa mã ihtír. Cwýrjapê quê ha Jeju to
amji mã mehhimpej to me ipa atajê me ty, ne me cupê
hũràac, ne hacpýa mã mehtír rohnýtta mã. Hõhõ, me
pajũjarên xà impejti itajêa, cu ha me cumã harên to
me papa.

11 Ne Pahpãm pê icapi, ite ijũjarên xà impejti itajê
jarên, ne Jeju na mehwý mã to hahkre prãmte, pê
icapi ne ikujate. **12** Cwýrjapê wa ampo itajêa na amji
pupun xà kèanre to amji pupu. Ne nee apu ipahàm
nare, ne nee apu amji mã pa nare. Ampo na? Pahpãm
pê imã ijápên xà ita gõ, ne cute imã ijamãr xà caxuw
carôt týjti jõr. Ne quê ha hápên xà ita ijamãr itaa na,
quê ha ahnaa hacpý ne Jeju amji jaxà, hõ amcro ata
na.

13 Ne pom ampeaj kam ite amã ampo to hahkre ita-
jê, ca ha amji mã hahkre pej, ne me cumã to hahkre to
apa. Ne ihkôat amji ton to apa xà caxuw, wa ite amã to
hahkre partu, he ampeaj kam ri quêt ite amã ampo to
hahkre xà to ihimpej atajê. Ne Jeju to ca ha amji mã
me ahimpej na amji to ihtýaj to apa kam to acrà tu ne.
Ne ca ha hanea ne Jeju na mehwý kwý me, kam ajpên
kinti to me ahõnco tu ne. **14** Ca ha atýj amji mã me ite
amã ampo pejti to hahkre xà itajê cunea nõr to me

apa na, quê ha acaxwãm pê Pahpãm Carõ Pejti ate ton xà ata na atehcajpa.

Pê Pawrô Timot mã Onetipo pejti na harê

2 Timot 4.9

15 Ne ramã ate Axij jõ pjê kam mehcunea te me ijicu, ne ma ame icaca na me ijahkre pej, mã hanea ne Pijer me Hermojên te ijicu. 16 Imã Pahpãm te Onetipo me, mehkra to impejti na me to prãm, ne cute me caprĩ na imã me to prãm. Ampo na? Ramã cute imã ijakry catia jõr, ne nee cute me ijaxàr ita jũ na amehpahàm nare. 17 Ne Roman jõ krĩ mã cator, pê ma apu ijapên to mõi, ne ina cator. 18 Ne amã Epet jõ krĩ kam cute itehcajpar catia na hahkre pej. Ne imã Pahpãm te, Jeju to amji jaxàr xà kam, cute Onetipo caprĩ na to prãm.

Quê ha Timot pê Jeju cahê na ipijapu catê impejti

1 Timot 6.11-16

2 Ýhỹ ikra, ca ha Jeju carõt to amji to ihtýj. 2 Ne pom me hàhtõa kam mare mã ite amã icakõc xà to hahkre itajê, ca ha hanea ne jũmjê mã to hahkre. Ne por jũmjê atajê quê ha catyt kam me ipa, ne me hũpar pejti to me ipa na, quê ha ihtýj ma amũ irõ mã, jũmjê mã ampo itajêa to hahkre.

3 Me papê Jeju cahê na me papijapu catêjê, cwýrjapê ca ha icuxà ajũcanãar kam apa. 4 Ne me ipijapu xà kam krãhtare pê me hàprê catêjê ihtýj amji caxuw me hõ pahhi kam hapac to me ipa. Cwýrjapê ri nee me ipijapu xà te amji kam hapac xà ata ràn xà na, ihkwý to amji kam hapac nare. 5 He me hàhcukren catêjê te hajýr, quê ha me hacrer catê me hacrer, quê ha ajkaam amentoj, ne jũm te imprar týj ne mam cator na, quê ha ihtýj amcwa. Hõhõ, cu ha me papê me hàhcukren catêjê pyrãac, ne Pahpãm jarkwa kõt, catyt kam me cumã pajapên to mempejti na, cu ha pahtýj me amcwa. 6 Ne pur kam hàpên catê te me hajýr, quê ha pur kam apê, quê ha cumã hõ intuw, quê ha mam quêt hõ intuw ata nõ krê, ne Jeju mã me gápên xà itajê pê itajê pyrãac. 7 Ne ite amã ampo jarên itajê to amji kampa ne ihkõt hakoap ne, quê ha ihtýj Pahpãm ate impar jahkre pej na atehcajpa, ca ha hahkre pej.

8 Ne Jeju pê pahhi Tawi xwý tàmxwý, ne hacpýa mã ihtír na, harên xà impejti itajê to wa mehcunea mã ijũjarên to ipa. 9 Cwýrjapê ri ihhêj rũm ipê mehkên catêjê pyrãac, mã wakýti te ijara juwapre. Ne Pahpãm jarkwa nare, jũ wýr quê jũm ihcajpre. 10 Na wa itýj Pahpãm na mehkwy mã, ite amji pupun xà kêanre itajê mã ijũcanãar to ipa. Hõ, wa itýj apu hajýr to ipa, mãr quê xwý mã Pahpãm wýr me apkjê, quê Jeju mehkên pê me to hapõj pa, mãr quê mempejti na Pahpãm cahê na, cõjk-wa kam ame ipa rohnýtti mã. Hõhõ, pê ramã rý pèa mã Pahpãm amji mã me pahto hajýr to prãm.

11 Ita caxuw wa ha caxwãm catia mã, ite ampo to me amã hahkre xà impejti atajê to me amã hahkre he:

Cu ha amjia kõt me papa jicu me mãa mã, pahtýj Jeju cwýrjapê me pahtyc to prãm na, cu ha pahtýj cahi na ame papa.

12 Cu ha ame amji pupun xà kêanre ita kam ame pajũcanãar kam me to pancrà na, cu ha pahtýj cahê na amji to ame pahhi. Nãmri cu ha pahte amehcaca, ne me hicu na, quê ha hanea ne ame pahcaca, ne me pajicu.

13 Nãmri cu ha pahte me amji jarkwa par nare na, quê ha ihtýj quêt Jeju amji jarkwa pa. Ampo na? Jũ wýr quê taa amji mã ihhêj.

Pê Pawrô Timot mã amji krac ri mehcakõc kên catêjê

cawpa

1 Petrõ 3.15-16

14 Ne me akwýa te ampo to hahkre xà impejti itajê to ma me amji japackrea ne ajco, ne ma me to. Ne ahna me to ihtýaj ne, quê nee ihcaprý na mehcakõc xà kryjre incwýrjapê ame ajpên mãn nare. Nãmri mehkwy kam mare mã cute me ajpên mãn ita na ihkaj na, quê ame hane, quê ame kampa, ne hanea ne mehkêanre ne. 15 Ne me hàpên catê nõ impejti ata, quê ha hàpên xà to impejti to ipa, mãr quê jũm hàpên xà ata pupu, quê nee hàpên xà ita jũ na ihpahàm nare. Ne pom ca ramã gápên xà to apê ita to ca ha apê, ne Pahpãm na mehkwy mã ampo to hahkre to impejti to apa. Mãr quê Pahpãm jũ caxuw acukij, ca nee gápên xà nõ impejti ata jũ na apu apahàm nare.

16 Ne mehkwy pê Pahpãm na mehkwy nare atajê ri ajteare mã me amji kampa, ne amjia kõt me harkwa kõt hamreare atajê to ame hahkre to me ipa. Ne Pahpãm ma apu mehcakõc xà kõt hamreare atajê caca. Ampo na? Cute Pahpãm jõ pry tète mehkwy to pry rên prãmte ri amehcakõc xà itajê to. 17 Ne me hũmre te me hapackre xà ita pê ihhêj rũm cagã te mehcãmjar, mã kam ihu, ne hĩ cacu, ne ihpýpým to ipa ata pyrãac. Ne me hũmre atajêa ri kam Pahpãm te amji kam hapac xà cacrõ, mã ihtýj ame to kêanre to me ipa. Atajê pê ri ampo kên to pit mã hahkre catêjê he: Himên me Piret. 18 Ne ma ame Pahpãm jarkwa cajrer pejti, cuh-tacti ata caca, ne cute mehcupan, ne mehkwy mã mehhêj xi xà to:

— Pom Pahpãm te hacpýa mã me pahto ihtír na amji ton xà ata te ma ramã me pajakren — hajýr. Cwýrjapê ri Jeju na mehkwy jãhtõa ne cute me hũhhyr, mã kyre pê ajpên kam Jeju kõt ame amji ton to me ipa. 19 Ne quêt Pahpãm na mehkwy te Jeju to amji mã mehhim-pej týjti itajê pê ihhêj rũm ikre jicjêc týjti ata pyrãac. Mã Pahpãm pê ikre ton catê pyrãac, ne cute ikre mã hũxwýr, mã cumã apu ihcuhhê. Ne jũ wýr quê jũm hũhta. Ne por pĩ týjti ata kam ihhêj ne ihhõc ata jũjarên xà te hajýr he: “Pahpãm mã ihtýj amji kwýa jahkre pej” ne: “Quê ha mehkwy te Pahpãm na mehkwy na amji jarên na, quê ha ihtýj mehkên cunea mã hikra, ne me hicu” hane.

20 Me hakràj catêjê jũrkwa kam ampeaj kam me cumã me hàwmrõ xà me, me hàpàn xà pyxwýr xà jãhtõ. Ne ihkwý na kyre pê hĩ ahwý, ne ihkwý impejti atajê na ri ampeaj kam hĩ ahwý. Ne por impejti atajê ri quêt, cute me to amji mã amcro jirên xà atajêa na kam me apà, ita jĩkjê na ri me papê ampo itajê pyrãac.

21 Cu ha me pahte ame pahkên jicu, ne ampo te ame pahtûm atajê jûrê, ne ame pahtetetti ne, me pajâpên xà caxuw. Quê ha ihtÿj Pahpâm me pamã hapên xà impejti nõ gô, cu ha me cumã apê.

22 Ýhÿ Timot, cormã atuwre cakrô, ca ha nee apê mentuwre te amji kam hapac xà, kôt hakop nare atajê pyrãc nare. Nãmri mentuwre itajê quê ha pjê kam me ampo pejti pupu, ne nee ihkôt me hakop nare kam, ma ihkôt me pra. Ne caa, ca ha hajÿr nare, ca ha nee apu ita ton to apa nare, ne quêt catyt kam apa, ne Pahpâm to amji mã ahimpej to apa. Ne nee me akwÿa me ame ajpên mãn nare, ne nee ame apijapu nare, ne catyt kam cama ame ajpên kínti to me apa. Ampo na? Nãmri me akwÿ cunea te amji kam hapac xà cunea tetet pit, ne quêt Pahpâm te me atehcajpar na, ca me ahcukij.

23 Ne pom ajpên krac ri me harkwa cakrô to amehcakôc atajê pê, ca amji to guphêa ne. Nãmri ramã ate, cute me hajÿr to mör mã mã, ma ame ipijapu na me hahkre pej. 24 Ne Pahpâm mã me pajâpên catêjê itajê nee ame papijapu xà nare. Cu ha quêt cama me amji mã pahprãa ne me pajâhcaprãa kam me cumã ampi ne, ampo to me cumã hahkre to me papa.

25-26 Quê ihhêaj to jûm ame pahkam incryc, cu ha me cumã ampi ne me cumã pahcaprã, ne hacpÿa mã mehcuhtac. Ne por me pampar nare atajê pê ihhêj rûm, ramã me pahcurê xwÿn pê Xatanaj jô kwÿc mã amencjêj. Mã Xatanaj ita me to ihhimpej, mã harkwa kôt amji to mehhimpej to ame ipa. Cu ha me cumã ampi ne me to hahkre to me papa, ne me ahna Pahpãm wÿ, quê ihhêaj to mehtehcajpa, quê ha xwÿ mã hacpÿa mã Pahpãm wÿr me apkjê, ne me amji krã kre, ne Xatanaj jô kwÿc ata pê ame hapôj.

Pê Pawrô Timot mã amcro cahhur atajê cawpa

Coroxo 2.16-19; 1 Timot 4.1-5; 2 Petrô 2.1-3; Juta 3-16

3 Ýhÿ Timot, wa ha ita caxuw amã Jeju te amji jaxâr xà jô amcro cahhur kôt harê. Ne amcro cahhur ata kam, quê ha ampo cunea apu amji mã hamãr nare. 2 Quê ha amcro atajê ihkêanre, ne ampeaj kam hûpa. Ampo na? Quê ha mehcunea amehkêanre, ne amji to pit mã ame amji kam hapac to me ipa, ne me hàhcukrêj me, ihpore to pit mã amji mã me cuprôn to me ipa prãm. Ne mehkwy amji jirôa pê amji to me cati to prãm, ne amji to me hàprâr to me ipa. Ne mehkwyã kwÿ to ihhêj rûm mehkryjre ta, ne ampo cunea na me cumã hÿjahkre to me ipa. Ne mehcunea me amji xûn kêanre to ame ipa, ne nee me hÿmxwÿ impar nare, ne nee cute me cumã ampo pejti jôr atajê pyrên, me cumã me hakryti na me amji jarên to me ipa nare, ne nee amji mã me Pahpãm cupa nare.

3 Ne nee me cumã mehkwy kínti nare, ne nee me hàhcaprã nare, ne cama mehkwy to ihhêj xi xà to kêanre to me ipa, cute mehkên mã me irên prãmte. Ne amji mã mehkêanre ne, ne me amji mã hamãr nare ne. Ne me cupê ampo pejti to kên catêjê, ne nee me cumã ampo pejti kínti nare, ne me hàprêa to me hàprê. 4 Ne me hõ ikwÿ nõ catêjêa jarên to mehkêanre to me ipa, cute

mehkên mã me irên prãmte. Ne hãn ne ampo kên kam mehkra acto tu, mã nee kam me amji cajpêr nare, ne mehkên itajê to ihtÿj amji to ame catia to me prãm. Ne cute Pahpâm kaj na amji kam me hapac xà na amji mã me ampo ton to prãm, itajê to pit mã ame ipa. 5 Ne mehkwy mã me cupê ihhêj rûm ampeaj kam Pahpãm carôat kôt, catyt kam Jeju kôt me ipa catêjê, ne nee mã cama ampeaj kam nare, ne amehhêaj to ame ipa. Ne pom cute me hajÿr catêjê itajê pê, ma amji to guphê to apa.

6 Nãmri hãn ne ikre cunea kôt mencjêj to me ipa, ne pyjê mã mehhêj xi xà kêanre atajê to mehhêj to me ipa. Mã hãn ne pyjê itajê te me hahkre pej nõ kam, mehkôat ame ampo kêanre atajê ton to me ipa. Ne ramã me caxwãm pê cute mehkêanre na me amji jahkre pej, na ri amehpeacre. 7 Ne pom cute me cumã ampo to hahkre catêjê itajê cuxà, cute ame ampo itajê jahkre pej prãmte, tee ampeaj kam me kampa cakrô, ne nee jûm te ihkôt hakop, ne kam hapac, ne hahkre pej pej nare. 8 Ahnaa mã pê Janaj xwÿ me Jãmprê xwÿ he, ne Mojxe xwÿ cuna mã amji kam me hapac xà to kêanre he. Ita kôpit na mã, me hÿmre hêj xi itajê te Pahpãm jarkwa hêj xi nare ata cuna mã me amji kam me hapac xà kêanre to me amji kam hapac he. Ne mehkra kêanre, ne cute Jeju kôt me amji kam hapac jicu. 9 Ne pom me hÿmre itajê quê ha nee ame ipa ry nare. Ampo na? Quê ha mehcunea, cute me Janaj me Jãmprê cuxà, cute me amji jahkre kêatre ata na me hõmpu.

Pê Pawrô Pahpâm jarkwa na Timot japackre

Me Hâpên Xà 13.50-14.7

10 Ne ca nare, he ca ramã ite amã ampo to hahkre xàa kôt ate amji ton. Ne ca ramã ite amji kam ijapac xà cunea na ate ipupun, ne ahna ijahkre pej. Ne ramã ate ampo caxuw ipa na ijahkre pej. Nãmri wa ramã Jeju to amji mã ihimpej to ipa, ne ampo cunea na, amji mã me ato ijâhtatti to ipa, ne amehkínti to ipa, ne ijÿ-canãar kam ampo itajê kam to icrà to ipa. Mã mehkwy te ame ito kêanre prãmte, cama ame icapôr to me ipa. 11 Na wa amji pupun xà kêanre to amji pupun to ipa. Ca ramã ate ijarên par, ne ahna ipupun xà atajê na amã ijahkre pejtu. Ne ate Antijoc jô krí me, Ampokrekà jô krí me, Ritij jô krí kam, por ampo cunea te ito kêanre ata na ate ijahkre pejtu. Pê ajco Pahpâm pê Pahhiti ampo itajê cunea pê ito hapôj to ipa. 12 Ne por Jeju kôt me amji ton to me ipa prãm atajê cunea, quê ha icuxà, ampo itajê na me amji pupu. 13 Ne me hÿmre krã kêanre, mehkwy mã ihhêj to ipa atajê kwÿa to ri, cute me cumã ihhêj jahpan xà na, mehkwyã kwÿ te hanea ne me cumã ihhêj.

14 Ne ca Timot, pom ate ampo to hahkre ne hahkre pej, ne catyt kam ihkôat apa atajê kam, ca ha quêt to acrà tu. 15 Ne pê ca gôkre nõre naa mã, Pahpâm jarkwa to cute me amã hahkre catêjê jahkre pej, atajê cukwa kam ri amã Pahpâm jarkwa jahkre pej. Ne pom Pahpâm jarkwa jô kâhhôc ita, quê ha ihtÿj ampo cunea na atehcajpa. Ca ha gÿpar krã kreti to awpa, ne Jeju

Crixtô to amji mã ahimpej to apa, ne akên cati pê acato.

Cu ha Pahpãm jarkwa to me pajàpên xà caxuw me pahcũmpej

¹⁶ Ne pê ramã mam Pahpãm na mehwÿ, Pahpãm Carõ Pejti jarkwaa kôt, ihkàhhôc ata kam mehhôc. Ne ampo pejti itajê cunea caxuw ri impej he. Ihtÿj ampo pej cunea to me cumã hahkre xà caxuw impej. Ne cute me ampo kên ton, mã intête cute me cumãn xà caxuw impej. Ne me cute amji kam me hapac xà jikutti, mã cute hacpÿa mã mehcuhac xà caxuw impej. Ne caxwãm catia mã, catyt kam me ipa xà to me cumã hahkre xà caxuw hanea ne impej. ¹⁷ Hõhõ, quê ha jũm mã Pahpãm kôt ipa, ne cumã hàpên catê na cumã amji ton to prãm na, quê ha ihkàhhôc ita cahyt, ne ampo par jahkre pej to mõi, ne ramã hàpên xà impejti cunea caxuw amji mã hàhcuprõn to mõi.

Timot te mehcunea mã Pahpãm jarkwa jarën xà
Coroxo 4.5-6

4 Ýhÿ Timot, wa ha gapackre ne Pahpãm me, Jeju Crixtô kam mare mã amã ijarkwa ta. Pom Jeju te mehcukij ne me ajpên pê me to ipicokjêr xà jõ amcro kam, quê ha amji na mehtyc to cuprõ, ne mehtÿr to cuprõ, ne cute ahpÿanre na, cute ame amji kam hapac xà ton atajê kôt, mehcukij xà caxuw. Mã Jeju te ahna me hahkre pej atajê na, quê ha mehcukij. Ne cute mehcukij jirõ pê, quê ha amji to pjê cunea jõ Pahhiti. ² Cwÿrjapê wa ha amã ijarkwa ta, ca ha mehcunea mã Pahpãm jarkwa to acakôc to apa kam apec xà nare kam, kam xuwaca nare kam, me cumã to acakôc to apa. Ne hanea ne apec xà kam, xuwaca kam, me cumã Pahpãm jarkwa to acakôc to apa. Ne gũjarën xà ita na me cumã awjahkrea ne, ne ma mehkên tète mehcahpêrkàr to apa. Ne me cumã ampo itajê to hahkre na, amji mã me to gàhtàtti to apa, ne ma ajpên kam me hakryti na me cumã gũjahkre to apa. ³ Nãmri quê ha cormã me hũmre jũpar nare atajê jõ amcro kam ahtwÿ, quê ha nee me gũjarën pejti pê ampeaj kam atajê kam me hapac nare. Ne amjia kôt cute amji mã me amji kam hapac xà kinti atajê kôt, quê ha ame ipa. Ne amji mã, cute me ampo to hahkre catêjê jàhtôa ne me to cuprõ. Ne me cumã:

— Ite amji mã me ampo par na prãmte atajê to, ca ha me imã hahkre — hane. ⁴ Ne pom me hũmre itajê, quê ha me Pahpãm jarkwa pejti kam me hapac jicu, ne ajte menquêtjê jũjarën hêj xi xà kam, quê ha quêt me hapac to me ipa.

⁵ Ne ca Timot, ca ha itajê cunea pê amji to guphê to apa, ne ma ahna amji jamãr peaj ne. Ne ate amji pupun xà kên itajê mã awcanãa ne, ne cama amji to apê Pahpãm wÿr me to ipipkjêr catê na, amji to impeaj ne. Pom apê Pahpãm mã me gápên catêjê nõ ita? Na ca ha cumã gápên xà itajê cunea to impeaj to apa.

⁶ Pê wa mam Pahpãm mã ramã amji gõi, ne cumã amji to awjahkre, ite cumã ijàpên itaa kam ityc xà jõ amcro mã hahêr, na pê wa cumã amji to awjahkre. Ne

ramã ipê pjê krãn to mõi, ite amji to ijũjahkre xà ata wÿr. ⁷ He wa ramã ite ampo kên itajê cunea me amji cujtên to kênre nare. Ne hanea ne ijàhcukren kênre nare, ne wa hanea ne ite amji mã ite Jeju to amji mã ihimpej xà ita juwahi to kênre nare. ⁸ Ne pom ijàpên xà itajê jahpan xà na, ramã Pahpãm cahê na imã ijàm-cwÿr xà impejti ata nõ. Ne mehcukij ne me to ipicokjêr xà jõ amcro kam, quê ha Pahhiti pê krã kreti te catyt kam me pahcukij catê ata, quê ha imã ijàm-cwÿr xà ita gõi. Ne ijàm-cwÿr xà ita pê ihhêj rũm pjê kam pahhi krãhkà. Quê ha Pahpãm ikrã na ihkrãhkà ata pupu ne imã:

— Ate amji kam gapac xà cunea na apeaj to apej — hane. Hõhõ, quê ha Pahpãm ito hane, ne nee wa ha ahte hajÿr nare, ne por Jeju jikaj kam, me cumã amji kian kam me hikaj to ipa atajê, quê ha me hanea ne icuxà ame amcwa.

Pê Pawrô Timot mã amji jarë

⁹ Na ca ha atÿj ajpên iwÿr atëm pyrentu ne ipupu, nãmri wa ahte ikrĩ. ¹⁰ Pê Tema amji mã pjê ita te amji kam hapac xà kïn, ne incryc imã hikra ne ma tẽ, Texarõn jõ krĩ wÿr. Mã Crexën ma Carati jõ pjê wÿr hàpên xà wÿr tẽ, ne hanea ne Tito ma Tarmati jõ pjê wÿr hàpên xà wÿr tẽ. ¹¹⁻¹² Ne pê wa ma Epet jõ krĩ wÿr Tiqicô kujate. Mã Ruc pyxit peaj ne icahê na ihkrĩ. Ca ha tẽ ne Macô japrõ ne ajpên to tẽ, nãmri taa mã quê ha ihtÿj ijàpên xà ita na itehcajpa. ¹³ Ne ajpên me amõr xà wÿr, ajpên me imã ite Trôwat jõ krĩ kam, Carpo jũrkwa kam, ikàhti juwahi ata pÿ, ne hanea ne ajpên imã ihkàhhôc kwÿ jàhhuc atajê incwa, ne nee ca ha, por wa cormã kam ihhêc to prãm ata to me gapac kêt nare.

¹⁴⁻¹⁵ Ne ma amji na me wakÿti to hàpên catê japrÿ te Arexãre ata to me guphêa ne. Nãmri pahte amji kam me pajapac xà ita na, ampeaj kam cama me pahkam hàprê, na pê ramã ito kên crire nare. Ne imã cute ito kên jahpan xà na, Pahpãm te cumã hàmjõr na to prãm.

¹⁶ Ne pê Roman catêjê jõ pahhiti icukij prãmte, amji cuna mã ixãm, pê wa ahte me cuna mã xa, ite amji na ijaprãr prãmte. Pê ajte me pahkwÿ itajê cunea me ire, ne ma ipê amehcahkũm. Ne pom cute me ito hajÿr xà ita na, quê nee ijahpan xà na jũ caxuw Pahpãm jũ mã me ton nare. ¹⁷ Pê Pahpãm icahê na xa, ne ma imã carôt gõi, pê wa carôat kôt mehcahkrit atajê mã Jeju jarën pejti itajê cunea jarën toxa, ne pea ite amji to ityc xà jahpan. ¹⁸ Ne quêt me Pahpãm pê Pahhiti te hajÿr romã mã, quê ha ampo itajê cunea pê ipytã, ne ma côjkwa wÿr ijaprõ, wa ha curia ihhimpej xà ata krac ri ikrĩ. Ýhÿ, cu ha hõtpê Pahpãm mã me pajũjarën to hajÿr to me papa he:

— Hirã pê, mehcunea jirõa pê acati — hane. Quê ha mehcunea me pahkampa, ne me harkwa to:

— Ampeaj kam! — hane.

Pê Pawrô me, mehwỳ Timot mã me amji jarẽ

¹⁹ Ne Prixirakwỳj mã ijarẽ, Aquira mea mã, ne hanea ne Onetipo me, mehkra mea mã, me cumã ijarẽ. ²⁰ Ne Eraxô mat ri Corinti jõ krĩ kam hãhhuc, ne ite amji jakàn pê Tropimo juwahi, Krĩtẽpti kam, pê hà incwỳr-japê pê wa huwahi. ²¹ Ajpên me amji jahkre, ne pah-hàjê pỳm xwỳjrea na iwỳr me acator to me hahkre. Ne

hanea ne me pahkjêjê kwỳ itajê te ri me amã amji jarẽn kujahêc he: Ewpuro me, Prutên me, Rino me, Cawtikwỳj me, mehwỳ cahhur itajê cunea te me amã amji jarẽn kujahêc. ²² Na wa ijõtpe ite Pahpãm mã me acajrẽn to hajỳr he:

— Me ijõ Inxũ, ca ha Timot mã acarôt gõ, quẽ nee apu acarôt ita kam amji na ampo cãmjĩ nare. Ne Timot na mehwỳ cunea to impeaj ne — hajỳr. Hamre.

TITO

Ýhÿ, p  Pawr  p  Jeju jarkwa na memprar cat j  n , ne Tito m  h  k hh c kujate. Na p  h  k hh c ita japr  p  (Tito). Ne p  Tito ajco Pawr  k t apu ipa. Jir  p  m  p  Pawr  K npojre j  pj  kam Jeju na mehkwy mehkri ataj  to ihhimpej cat  na h m. Ne pom cu me h  k hh c cahyt ita kam, p  Pawr  Tito m , j  caxuw j mj  te me cup  Jeju na mehkwy na cum  amji jar n, ne ajteare m  cute amji kam me hapac x  ton ataj  cawpa. Ne hanea ne cute cum , cute me h mre impejti p  catyt kam ataj  to, Jeju na mehkwy jam r cat  n  x m na h jahkre. M r qu  me cum  Jeju na mehkwy te ajp n kam mehcaricti kam, amji to me ipijapar to hahkre na, cum  h jahkre.

P  Pawr  Tito m  amji jar 

Carati 2.1-3

1 ¹⁻² H p  Tito, ip  Pawr , ne ip  Pahp m m  ij p n cat , ne hanea ne ip  Jeju Crixto jarkwa na iprar cat , ne pa wa ha am  ihk hh c ita to. P  Pahp m icapi, ne mehkwy w r ikujate. Pom p  ram  mam amji m  mehkwy capi ataj , wa ite mehtehcajpar, m  cute me h n r to iht yaj pr mte, p  me h rm  ikujate. Ne hanea ne cute Jeju to amji m  mehhimpej kam me to incr  tu to pr m to p  mehw r ikujate. Ne hanea ne caxw m catia m , catyt kam me papa pr mte, me cum  Pahp m te amji kam hapac x  to hahkre. He nee Pahp m apu ihh j nare, ne r  p a m , p  corm  pj  ton nare kam, me pam  cute amji cah  na me pahto ipijapar rohn tti m  x  na amji to, cu paht j me hikaj. ³ P  r  p a m  ram  me pam  amji to. Ne ram  cute me pam  amji ton x a kam h hhuc, na ri iht j ita caxuw apu cah  na me panc j  x  to me pam  hahkre. Ne pom cute me pam  ampo to hahkre x  ita p  im  cug , ne ite mehcunea m  to icahk m x  na harkwa ta. Ne Pahp m te me pahk n k anre catihti ata p  me pahto hap j ata jarkwa k t, wa mehcunea m  har n x  impejti itaj  jar n to ipa.

⁴ Ýhÿ Tito, itea wa am  ihk hh c ita ton. Ampo na? Cu ajwar Jeju to amji m  pahhimpej ita kam, wa it j ato amji kra. Ne Pahp m p  me paj  Inx  Cati, ne ihc mter Jeju Crixto te ri me pahk n k anre p  me pahto hap j, na wa ij tp  me cum  acajr n to ipa, ne me cum :

— Tito to impeaj ne, ne capri, ne caxw m p  me cum  me acaricti j r to me apa — hane.

Tito te mehkwy to mehhimpej cat j  pyxw r x 

1 Timot 3.1-13

⁵ Cw rjap  p  wa c  jip c ri, K npojre j  pj  ata kam guwahi, ne am  ijarkwa hyr to:

— Tito, corm  nee j m te kri cunea k t Jeju na mehkwy m  me to ihhimpej cat j  pyxw r nare. Cw rjap  ca ha ahpyanre na me akwy cunea m , me to ihhimpej cat j  ton partu — haj r. ⁶ Cw rjap  wa ha ato ihimpej. Ca nee Jeju na mehkwy to ihhimpej cat  na, at j

j m x m nare. Ne qu t cute me haj r cat j  n , ca ha h m he. Qu  ha h mre n  p  catyt kam ipa cat , qu  nee j m ihk t har n n  to k n nare, ata p  qu  ha me to ihhimpej cat . Ne cum  h xi pyxit peaj, ne ajp n na me ajkrut peaj. Qu  ha mehkra xw j  p  catyt kam Jeju na mehkwy. M r qu  nee j m, me h par nare, kr  k anre na, amehkra to ihcak c nare.

⁷ Ne Jeju na mehkwy to mehhimpej cat j  pupun cat j  ataj , qu  ha Pahp m j p n x a to me h p n to me ipa. Cw rjap  qu  ha mehkwy n  te, cute ampo to k n n  na har n na, qu  ha nee cup  mehkwy to ihhimpej cat  nare. Ne me cum , cute amji kam me hapac x  impejti cajcucre to me amji jar c jahkre pej. Ne hanea ne me cum  cute amji kam hapac x  pytiti to amji jar c jahkre pej. Ne por qu  ha me cup  mehkwy to ihhimpej cat j  ataj , qu  ha nee amji to ame cati pr m nare, ne nee amencryc xi nare, ne nee c x hti to ame amji to ipip n to me ipa nare, ne nee ame h pr  nare, ne nee iht j ahti na h p n x  k anre ataj  to amji to me hakr j pr m nare. ⁸ Ne qu t ihcunea na, me h rkwa to me h hcajr nti ne, ne me cum  ampo pej pit kin. Ne caxw m catia m  amji to mehhimpej to mempej, ne ampo k n cunea t te me amji jipr n to me ipa. Ne mehcunea to me amji kam hapac to me ipip nti to me ipa. Ne catyt kam me Pahp m jarkwa k t ame ipa. H h , qu  ha Jeju na mehkwy to mehhimpej cat j  pupun cat j  ataj  cute amji kam me hapac x  to me hane. ⁹ Ne iht j me caxw m p  amji m  me Jeju jar n pejti itaj  to me ipijar  to impejti to me ipa. Ampo na? Pom har n x  ita, nee m  ihh j xi nare, ampeaj kam ri. Ne iht j h jar n x  ita to me cum  me hakryti to iht j to ipa. Ne hanea ne h jar n x  ita, cute cuna m  ame ampo to ihcupan cat j  m  har n to ipa.

Tito te K npojre cat j  m n x 

¹⁰ Ýhÿ, Tito, ca ha ma amji to guph  to apa, n mri ampeaj kam cute me Mojxe xw j j  k hh c to me cum  hahkre to mehk anre to me ipa cat j  j ht . Ne xwahna cum  me ate Juta cat j  k t me Mojxe xw j j  k hh c cunea k t me amji ton na, me cum  me ato pr m. Na ri h tp  me am  h jar n to hane he:

— Gapacta ne Jeju to amji mã me ahimpej to me apa, ne hanea ne hĩkjê na, Mojxe te me hapackre xà cunea kôt me amji ton to me apa — hane. Ne amehhêj xia jarên to me ipa. Ne ame to ihhimpej catêjê pejti atajê cunea cuna mã, mehkên to pit mã ame amji kampa. ¹¹ Cwÿrjapê ri imã ate cute me hajÿrjê mãn na ato prãm. Na ca ha me cumãn prãm, ne me cumã garkwa to hane he:

— Me kêt! Ne aracri ame apa! Ca cama apu krĩ kam ikre jãhtôa kam mehkri atajê cunea te me Pahpãm jarkwa pejti ata kôt me ipa xà kaj na mehcapêrkàr to me apa. Ne ate ampo to me cumã hahkre xà kêanre itajê to, nee ate me cumã hahkre xà nare. Ne ate amji mã mehporê incwÿr prãmte, ca ame hajÿr to me apa. Xà nee ajte ita na me apahàm nare? — Hõ, ca ha me cumã hane. ¹² Ne Kênpojre jõ pjê ata kam mehkwyã nõ te Pahpãm jarkwa to ihcakôc catê ata te amji jarên to:

— Me ipê Kênpojre catêjê hõtpê me ihêj xia to me ihêj xi, ne ihêj rûm me ipê ampo kên jãprêa to hàprê atajê, ne ampeaj kam ite me xuwca, ne cama ampeaj kam me ijàpàn cati — hane. ¹³ Ne pom cute ampo na me amji jarên xà ita, ampeaj kam ri. Cwÿrjapê ca ha ma cute amji kam me hapac xà ita tète me cahpêrkàr to ihtÿaj to apa, quê catyt kam caxwãm catia mã Jeju to amji mã mehimpej to me ipa. ¹⁴ Nee ca ha hipêr mam Juta catêjê quêtjê jÿjarên xà to mehcakôc catêjê me, mehkraã kam, cute me caxuw amji mã mehcakôc xà to mehimpej atajê to me amji japackre nare. Ampo na? Atajê te ri ramã Pahpãm jarkwa pejti caca ne me hicu. Nãmri mehcakôc xà itajê nee Pahpãm pĩn me caxuw me cumã hapôj nare. Ne por Juta catêjê te Jeju kôt me amji ton jicu atajê krã pĩn ri me caxuw itajê japôj.

¹⁵ Ne Pahpãm te ri me pahcaxwãm pê ame pahcũmpej, mã me pampej. Cwÿrjapê cu ampo pejti na pit mã me prãm. Ne por me Pahpãm par nare, ne ampeaj kam me caxwãm pê, mehtũmti atajê mã ri, ampo kên itajê cunea na prãm. Ne me cumã ampo pejti itajê ihkêanre, ne ampo kên ri me cumã imej. ¹⁶ Ne ihtÿj Pahpãm kôt me ipa catêjê na me amji jarê. Mã nee me hàpên xà itajê Pahpãm kôt me ipa catêjê na me harên nare. Ne me hũpar nare, mã ihtÿj ame hàhcure to ame ipa. Na ri nee ampo caxuw mempej nare.

Tito te catyt kam mehkwy to ihhimpej xà

¹ Timot 1.6-14; 4.6-16

2 Ne quêt ca nare, ca ha catyt kam ampeaj kam me cumã ate ampo to hahkre xà atajê to hahkre. **2** Ne mehkà atajê mã gÿjarên to hane he:

— Ame amji mã quêt nare, ne me amji mã ampejti ne. Ne catyt kam, caxwãm catia mã me apa. Ne ampo kên cunea tète me amji jiprôn to me apa. Ne Jeju to amji mã me ahimpej tÿaj to me apa. Ne amji mã me akwÿ kĩnti to me apa. Ne me gũcanãar kam me apa — hane.

³ Ne hanea ne pyjê kà atajê mã gÿjarên to hane he:

— Ca ha Jeju mã me amji gõ, ne catyt kam, ate amji kam me gapac xà imejti to amji mã me apijapar to me apa ata na. Ne nee mehkwy to ame akwÿ mã ihkôt harên kên to me apa nare. Ne nee côxÿnti to akôm to amji mã ahimpej to me apa nare. Ne ampo pejti to, ca ha quêt me hahkre to me apa. ⁴ Mã quê amji cuxà mehkwy cahãj tuwre atajê mã awjarê, quê ha cute catyt kam ame ipa na, quê ha ramã amji mã mempjê me, mehkra kĩn to me hahkre. ⁵ Ne amji mã me ampejti ne, ne ampo kên cunea tète me amji jiprôn, ne catyt kam me ipa, ne nee apu mehkwy pê mempjê caxun to me ipa nare. Mã quê catyt kam me hũrkwa jãpên xà to amji mã me hàpên pejti to me ipa, ne ihtÿj amji caxuw mempjê kam me hapac to me ipa. Ne me hàhcãj rên jãhcãpĩrĩhti ne. Quê ha cute amji to me hàpên to hajÿr to me ipa na, quê ha nee jũm Pahpãm te me pamã ita to hahkre xà ita cuna mã ihcakôc kên nare — hane. Hõhõ, ca ha pyjê kà mã ahimpej xà to hahkre to hane, mãr quê mentuw kwÿ mã to hahkre.

⁶ Ne mentuwjê to hanea ne me hapackre. Mãr quê caxwãm catia mã, catyt kam amji to mehimpej, ne ampo kên cunea tète me amji jiprôn to me ipa. ⁷ Ne ate hajÿar, ca ha catyt kam apa ne ampo pejti ton to apa, mãr quê amji mã me apupun xà kôt, hanea ne catyt kam me ipa. Na ca ha me cumã ampo to hahkre kam pra, ne acryac kam, catyt kam me cumã ampo to hahkre. Ne ampo pejti to hahkre to, ca hirãa pê me cumã amji pro rên to apa, ne nee ca ampo kên ton, ne amji cwÿrpê ahêj nare. Ne quêt caxwãm catia mã ampo pejti to me cumã hahkre to apa. ⁸ Ne garkwa pej to pit mã me cumã acakôc to apa, mãr quê nee jũm apar caca, ne amã ahêj xi na hacjên nare. Ne imã ate amji kam gapac xà imejti itajê na pit mã me ato prãm, mãr quê nee me pahcurê xwÿn nõ apu akôt harên to kên nare. Ne cama me pahkam ihpahàmte ne.

⁹ Ita caxuw ri imã ate cama me cumã hàpên to me ipa catêjê japackre to hajÿr na, imã ato prãm he:

— Amji caxuw me gõ pahhi kampa, ne catyt kam me cumã gápên pejti to me apa, mãr quê me gápên xà imejti atajê kôt, amji mã me akĩn to imejti to me ipa. Quê me gápên xà na me arê, ca nee xuwca te me cumã ampo jarên nare, ne aracri cute ampo na me arên atajê to me. ¹⁰ Ne nee ame gõ pahhi pê me gãhkĩj nare. Ne quêt ita to ca ha me he, catyt kam me apejti na me apa. Ne me amji jarkwa par pejti to me apa. Quê ha mehcunea amji mã me Pahpãm te me pahkên kêanre ata pê me pahto hapôj ata cupa, ne hanea ne amji mã cute ampo to hahkre xà itajê cupa — hane. Hõhõ, ca ha cama me cumã hàpên catêjê japackre to hane.

Pê Pahpãm me pamã amji to ajpê

Epet 2.8-10; 1 Texarôn 1.9-10

¹¹ Pê Pahpãm me pahto imejti prãmte, me pamã cute amji kam hapac xà itajê na amji to ajpê, ne amji pro mẽ. Mãr quê mehcunea me hõmpu, ne me hahkre pej, nãmri cupêa ri me pahkên pê me pahto hapôj catê, ne ihtÿj cute amji kam hapac xà ita to me pah-

cunea kampa, pjê cunea kam. ¹² Ne ihtÿj pahte mam amji kam me pajapac xà kêanre atajê jicu to me pamã hahkre. Por pahte amji kam me pajapac xà te Pahpãm pê ampÿa mã me pahto ipa atajê mã he:

— Ca ha nee amji to acati prãm nare, ne nee ahti na pyjê caxun nare, ne nee amji to gакràà cati prãm nare — hane. Mãr cu quêt ampo kên cunea tête me amji jiprôn to me papa. Ne catyt kam, caxwãm catia mã ame papa. Ne Pahpãm mã me amji jôr to me papa.

¹³ Ne quê ha amcro nõ na, jũ caxuw, Jeju Crixto pê Pahpãm kra pê me Pahpãm catia ata, ihtÿj pjê ita wÿr amji jaxà, na cu ha pahtÿj hõ amcro kam me pajakryti ata na me hikaj. Quê ha mehçunea, cute me pahkên kêanre pê me pahto hapôj na me hõmpu, ne me hahkre pej. ¹⁴ Nãmri taa mã pê me pahcunea kritxwÿ na amji to, ne me pahcunea jahpan xà na caprô jaxwÿ, ne ampo itajê cunea mã amji gô, ne amji mã huwahi ita to pê me pahcunea kên pê me pahto hapôj pa. Me pahte ampo pej to pit mã ame amji kam pajapac to me papa prãmte ri, cute me pamã amji kam hapac xà to ihtetetti. Ne me pahto amji kwÿa to prãmte, pê me pantête me pahkên itajê mã amji gô.

¹⁵ Ýhÿ, Tito, ca ha atÿj ampo itajê cunea to me cumã hahkre. Ne Pahpãm jarkwa kôt, ampo na mehpeacre atajê tehcajpa, ne hacpÿa mã me to ihtÿj. Nãmri quê ha jũm ampo to kên na, ca ha kam atêm pyrentu, Pahpãm jarkwa kôt, ne intête ihcahpêta. Ne nee amji na jũm te, ate Pahpãm jarkwa kôt ampo to hahkre nare na, cute garên na hamãr nare.

Cu ha catyt kam me pajô pahhi atajê kampa

Roman 13.1-10; Epet 2.1-10; Tito 1.10-16

3 Ýhÿ Tito, ca ramã ate me pahkwÿ mã gũjarên xà itajê to gũjarên, ne hipêr to me hapackre, ne me cumã:

— Por me gô pahhi atajê me, me ato ihhimpej catêjê atajê, ca ha amji caxuw me kampa, ne mehhimpej xà krac ri me apa. Quê ampo pejti ton na me amã aw-jahkre, ca ha me gũjarêan kam, hãn ne me ampo to.

² Ne atÿj jũmjê kôt ame harên kên to me apa nare, ne nee ame gãprê nare, ne cama me amji to impejti ne. Ne amji mã me aprã kam, me gãhcaprã kam me cumã acakôc to me apa, ne amji to me akryjre prãm to me apa, ne nee me hirôa pê amji to me acati prãm to me apa nare — hane.

³ Pê mam me papê Jeju na mehkwy itajê me, me papê amji jahkre kêatre, na pê cu nee ajco me pajûpar nare, ne me pajô pry kaj na ajco ame papa. Ne me pahcurê xwÿn caca xà kôt pit mã ame papa, ne ihkôat amji to me pahhimpej to me papa. Ne ampo kên kîn itajê mã pit mã me amji jôr to me papa, por me pamã ihkinti atajê mã. Ne pahtÿj ajco ame ajpên curê to me papa, ne ajpên jũ na ame amji to prãm to ame papa. Ne ampo itajê ton to pit mã, ajco me amji pyrác to ame papa. Pê ajco mehkwy, ahna ame pahkam incryc, pê cu hanea ne amji jahpan xà na ajco kam ame pan-cryc.

⁴ Pê Pahpãm amji mã me pahkinti ita na me pamã amji to ajpê he. Na pê amji mã me pahto impejti prãmte, me pahkên kêanre pê me pahto hapôj. ⁵ Ne me pahkên pê me pahto hapôj partu. Xà pê cu ajkĩ me ampo pejti to na mã, pê ihkôt me pahto hane? Hãpà! He pê cumã me pahcaprĩ, na pê me pahto hane. Ne Pahpãm Carô Pejti kôt me pahcaxwãm pê, me pahtetetti ita pê ihhêj rúm curmã ame pahpÿpÿm, ne cormã pahte amji kam me pajapac xà na amencwÿr. ⁶ Pahpãm jãhcajrêan to hãhcajrên, na pê me pamã Jeju Crixto te me pahkên pê me pahto hapôj xà caxuw ihkujate. Pê me pahtyc xà jahpan xà na ty, ne me Pahpãm wÿr me pamã pry jahkjê, pê cormã Pahpãm me pamã Carô Pejti gô. ⁷ Cwÿrjapê cu Pahpãm kam mare mã, cuna mã, catyt kam ame papa ita na, ne ahna jũ caxuw cahê na pahte amji to me papijapar rohnÿtti mã xà ata mã ame acjêj.

⁸ Ne ijũjarên xà itajê ri quêt ampeaj kam. Tito, pom ite amã ampo to hahkre itajêa to, ca ha ate ampeaj kam me cumã hahkre na, imã ato prãm. Ne cute me apar atajê, quê ha me taa ahpÿanre na me amji jarên to:

— Wa Jeju to amji mã ihimpej to ipa, mã Pahpãm te icaprĩ, ne ito kênre nare, ne imã Carô Pejti jôr, cwÿrjapê wa ha cumã amji gô, ne cumã ijãpên pejti to catia to ipa — hane. Cu ha me pahte me ita to hajÿr na, quê ha ahna me pahcunea mã ihkênre nare.

Pê Pawrô Tito mã amji krac ri mehçakôc kên catêjê cawpa

⁹ Ne pom cute me hajÿr xà atajê pê, ca ha ampÿa mã me apa he. Cute amji krac ri ihcaprÿ na amehçakôc catêjê kêanre atajê me, mam menquêtjê japrÿ to pit mã cute ame hahkre prãm catêjê me, cute Juta catêjê incaca xà cwÿrjapê tee ame ipijapu prãm catêjê atajê pê, ca ha ampÿa mã apu apa. Ampo na? He ampo itajê kôt hamreare. ¹⁰ Ne por cute me ato ipicokjêr prãm to ipa atajê, ca ha me hapackre. Quê ha me hũpar nare, ne hipêr me ato ipicokjêr prãm, ca ha me hapackre to ajkrut. Quê ha hũpar nare, ne cute to incrê xà ita kam, ca ha me cumã hikra, ne nee hipêr me to amji japackre nare. ¹¹ Ne por cute me ita ton catêjê, ca ha ramã me hõmpu, ne me hahkre pej, ramã me caxwãm pê amehkênre na, na quê ha ihtÿj ame amji kên mã me amji rê.

Pê Pawrô Tito mã amji jarê

¹² Ne wa ite Metohjêxà jô krĩ kam amji to pahhàjê kujahêc na amji kam ijapac. Na wa ha ma me awÿr Artima me, Tiquicô pijakrut itajê nõ kujate. Quê ha curi me awÿr cato, ne me amã ijarê, ca ha jũ na me amji to, ne ma Metohjêxà jô krĩ wÿr atêm pyrentu. Ne curia cu ha ajpên cajpa. ¹³ Me pahkwÿ nõ Xena pê Roman catêjê caca xà to cute me amji pyrác xà ata jahkre pej catê ata, me Apôr, quê ha amũ me anaa me tẽ. Atajê ca ha mehtêm xà ata na mehtehcajpa, mãr quê nee me cupê ampo hamre nare. ¹⁴ Ne imã me pahkwÿ te

ampon pejtiti ton to me amji pyràc na imã me ato prãm.
Ne cute ame ampon na prãm to me ipa atajê na mehte-
hcajpa. Hõhõ, ca ha me ate amji kam me gapac xà ita
ton na, quê ha nee me apê cute me amji kam hapac xà
kõt hamreare atajê nare.

¹⁵ Ne pom icahe na mehcunea me ipa itajê te me
amã amji jarên kujahêc, ne me pahkjêjê pê Jeju na
mehkwý mã me ikĩnti atajê na ite me to amji japackre
na me cumã ijarê. Nãmri Pahpãm te me ato impejti na
imã me ato prãm.

PIREMŌ

Pê Roman catêjê me hõ krîa kam Pawrô jaxà, pê curia Jeju cwÿrjapê ajco ihkrî. Ne pê Pawrô Jeju na mehkwy nõ japry te Piremõ ita mã, pom cu me hõ kàhhôc cahyt ita kujate. Na pê hõ kàhhôc ita japry pê (Piremõ). Ne pê hũmre nõ japry te Oneti ita, Piremõ ita mã cama apu hâpên to ipa, ne cormã to new catia kam ma aracri cupê tẽ. Pê cormã nee Jeju to amji mã ihhimpej to ipa nare kam, pê Oneti ata hane. Ne ihtÿj ajco apu ampo kêanre ton to ipa. Mã Roman catêjê te, cute ampo kêen ton atajê na me hõmpun, ne mehpro ne me haxàr, mã ihkrî. Ne curia ri cute Pawrô cajpar.

Mã Pawrô te Oneti mã Jeju jarên, mã cute ihtÿj amji mã to ihhimpej to ipa. Jirô pê mã ri ma ita caxuw Oneti hacpÿa mã hõ pahhi Piremõ wÿr ihkràr. Mã Oneti jõ pahhi ata pê cormã hõ pahhi rohnÿtti mã. Ne Oneti mã hõ pahhi pê Piremõ ata cupa. Ampo na? Pê nee cumã amji jarên nare, ne cormã to new catia kam, aracri cupê tẽ, cwÿrjapê ri cumã hũpa. Mã Pawrô te ramã Piremõ pupun pejtu, na ri cute cumã ihkàhhôc ita ton, mã cute hacpÿa mã Oneti na amji caxàr prãmtẽ.

Pê Pawrô Piremõ mã amji jarê

1 Hàpà Piremõ, apê me ijõ ikwÿ nõ, ne apê me ikwÿ nõ, me ijâpên xà kam. Ýhÿ, ipê Pawrô, ne pa wa ha amã ihhõc. Pê Roman catêjê me ijaxà, wa me hacjên xà kam ikrî, Roman jõ krîa kam, Jeju Crixto cwÿrjapê, ne me pahtõ Timot me, wa apu amã ihhõc. **2** Ne wa ha hanea ne gũrkwa kam, cute me cuprôn atajê mã mehhõc. Ne ihkàhhôc ita, ca ha hanea ne me pahkjê cahãj pê Apijkwyj me Arquipo pê icahê na cute amji pupun kêanre catê ata mã, ca ha me cahyt. **3** Imã Pahpãm pê me pajõ Inxũ Cati me, me pajõ Pahhiti pê Jeju Crixto te me ato impejti, ne me amã ihcarĩcti jõr na me ato prãm.

Piremõ te amji kam hapac xà

4 Na wa ijõtpê ampeaj kam, me ate Pahpãm kôt amji ton ita na, cumã me acajrên to ipa. Ne wa ato amji japackre, ne apyrên ijakryti na, Pahpãm mã amji jarê. **5** Ne amã Pahpãm na mehkwy cunea kĩnti, na ca atÿj me pajõ Pahhiti pê Jeju to amji mã ahimpej to apa. Wa ite ramã cute amji mã ita na me garên na, garên par. **6** Cu ha me pahcunea Jeju te amji kam hapac xà kam me ajpên hõnco tu ne. Ne ca xwÿjê, ca hanea ne, ate me icahê na amji hõnco tu. Cwÿrjapê ri, Jeju pîn ampo pejti hapôj atajê, cu hãn ne pahtÿj amji mã me cucwa. Ne ampo itajê jãhtôa to hàhtô, wÿr cu me pahnõ hàhtô na hahkre pej, cu nee me pahnõ hahkre pej nare. Na wa ha ijõtpê Pahpãm na ahwÿ, mãr cu me Pahpãm te me pamã ampo pejti jõr xà atajê na me hahkre pej. **7** Ýhÿ, ikjê impejti ata, apyrên ijakryti, ne apyrên imã amji kĩnti. Ampo na? Amã Pahpãm na mehkwy cunea kĩa to mehkĩn, ca ramã ate me hĩ cunea kam, me cumã me hakry ton crire nare.

Pê Pawrô Oneti mã Piremõ na ahwÿ

Roman 15.7; Epet 4.32

8 Cwÿrjapê cu Jeju kam ajpên to pahkjê ita kam, nee imã ate ampo ton xà ata na, ijarkwa hyr to ihtÿaj to prãm nare. **9** Ne imã akĩnti ita, imã ana ijàhwÿr na pit mã awjahkre, na wa ha cama ana ahwÿ. Ipê Pawrô, wa Jeju jaxà kam ijàhhuc ne apu ipa, ne incwÿrjapêa wa me hacjên xà kam ijÿr cakrô, wa ha cama ana ahwÿ, ne nee amã ijarkwa hyr to ihtÿaj nare. **10** Ne ite Jeju Crixto kam Oneti, por cupê amã hâpên catê ata to amji kra ata mã wa ite ana ijàhwÿr xà ita to ana ijàhwÿr. Ampo na? Wa cormã me hacjên xà kam ikrî, ne ahnaa ite Pahpãm wÿr Oneti pipkjêr na itehcajpar, na wa ite amji to Oneti pãm. **11** Pê mam Oneti amã ampo na hamreare, ne ita caxuw ihtÿj ampo cunea caxuw amã ipa ne impej, ne hanea ne imã ampo cunea caxuw impej.

12 Ne ampeaj kam imã ihkĩn cakrô, wa ha hacpÿa mã amã ihkujate, ne wa ha itÿj hakàn pê to ijapac xà. Cakrô wa ha itÿj awcanã. **13** Ne wa ma amji na to ipi-jarõ prãm. Ampo na? Pom cute Jeju jũjarên pejti cwÿrjapê me ijaxàr, wa kam ikrî ita kam, cute gaxà kam, itehcajpar prãmtẽ. **14** Wa nee ate itehcajpar na ato ihtÿj prãm nare. Imã ate amjia kôt imã hõr na ato prãm. Ca ha caa imã Oneti te itehcajpar hahkre, wa ha cormã amji na huwahi.

15 Mõrmõ Pahpãm te apê Oneti tẽm na hamãr, na ri ma apê tẽ. Ne quê ha taa ita caxuw ihtÿj awÿr to amji jaxà, quê ha ana ahtwÿ. **16** Nãmri mam pê cupê cama amã hâpên catê, ne ita caxuw ri, nee cute amji kam hapac xà pê mam cute amji kam hapac xà ata nare. Ne quêt ita caxuw cute Jeju to Ihà, na ri cupê me pahkjê. Ne imã ihkĩa to ihkĩn. Ne quê ha ijirôa pê amã ihkĩn, pê mam cupê amã hâpên catê pit, ne ita caxuw cupê akjê pê amã hâpên catê, cwÿrjapê quê ha amã ihkĩn.

17 Hõ, ca ha ate ito amji kwÿ na, ca ha Oneti na amji caxàr to hanea, pom ca hãn ne ina amji to pøj he.

18 Quê ha cute apê ampo to ipictor na, nare, quê ha cute ato new na, wa ha pa amã amgõ. 19 Ne pom ijũhkraa to ite amã ijãhhôc to incire ita te hajÿr he: "Ipê Pawrô, wa ha pa amã amgõ" hane.

Pê wa ramã Pahpãm wÿr amõr na, atehcajpar crire nare, ata pê ate ito new catia pyrãc. Cakrô, wa ha nee ate imã Oneti jõr na ato ihtÿj nare. 20 Ýhÿ Jeju kam jõh-hêwre, ca ha imã ite amji kam ijapac xà ita ton to hane, wa ha apyrên ijakrya to ijakry, quê ha me pajõ Pahhiti pê Jeju Crixto akõt ito impejti ne.

21 Ne wa cormã jÿ ne ihhõc kwÿa kam, ite ramã ato amji japackre, ca ha atÿj ite ampo na awÿr xà ita to imã, nare, ca ha ite ahna amên xà ita jirõa pê to imã. 22 Ne wa ha hanea ne ana ahwÿ, ca ha imã ikre

caxwÿn nõ caprã, he wa itÿj me ate Pahpãm na me gãhwÿr xà ita kõt cute ijamãr, wa hipêr me awÿr itêm na amji mã to hane.

Pê Pawrô me, mehkwy Piremõ mã amji jarë

23 Ne pom Epapra icahê na me hacjên xà kam Jeju Crixto cwÿrjapê ihkrí itajê te hanea ne me amã amji jarên kujahêc. 24 Ne pom me ikwÿ itajê te ri me amã amji jarên kujahêc he: Macô me, Aritarcô me, Tema me Ruc.

25 Ne imã me pajõ Pahhiti pê Jeju Crixto te me acunea to impejti na me ato prãm. Hamre.

IXAHER CATÊJÊ

Ýhÿ, cute ihkàhhôc ita hôc catê te nee kam amji japyr xir nare, ne ihhê ne Pawrô te mORMô ihhôc. Ne Ixaher catêjê te Jeju to amji mã mehhimpej atajê cunea mã ri cute ihhôc ne ihkujahêc. Na ri ihkàhhôc ita japyr te (Ixaher).

Pê ihhê ne Ixaher na mehkwy nare atajê hacpyã mã Jeju na mehkwy to, mam menquêtjê te amji kam me hapac xà tÿm ata wÿr ipipkjêr prãm. Cwÿrjapê ri ihkàhhôc ita nee cute Jeju to amji mã mehhimpej jicu nare na me cumã apô. Ne Jeju te amji kam hapac xà tuwti ita ri, mam Ixaher catêjê te amji kam hapac xà tÿm ata jirôa pê impej. Ne ite nee Ixaher catêjê wÿr ihkàhhôc tẽ ita cunea to ipintuw nare, ne ihkwÿ jatujre atajê ri ite to ipintuw.

Pahte Pahpãm to amji mã me pahhimpej xà kôt harên xà

Ixaher 11.1-40
2 Petrô 3.5-7

11 Ýhÿ me ikwÿ pê Juta catêjê pê Ixaher catêjê, wa ha me amã me ate Pahpãm to amji mã me ahimpej to hahkre, ne to capô, mãr ca me hahkre pej pejtu ne. Quê ha Pahpãm te me pamã ampo to hÿjahkre xà ata, cormã nee me pahwÿr cator xà nare cakrô, cu ha pahtÿj ampeaj kam, cormã me pamã hÿr na amji mã me to hane, ne pahtÿj me hikaj. Cu ha pahte Pahpãm to amji mã me pahhimpej na, quê ha ihtÿj me pamã ampo pupun xà nare ata te ihkrÿ na hahkre peaj to hahkre pej. Nãmri cu ha pahte Pahpãm to amji mã me pahhimpej nare na, cu ha nee me hahkre pej nare.

²⁻³ Ne cu Pahpãm to amji mã me pahhimpej, cwÿrjapê ri me pamã Pahpãm jarkwa kôt pjê me cÿjkwa kam ampo cunea te amji ton na hahkre pej. Na ri me pamã, pahte nee me ampo pupun xà nare ata te ri ampo itajê cunea ton na hahkre pej. Ne pê me panquêtjê ihtÿj Pahpãm to amji mã mehhimpej, cwÿrjapê ri Pahpãm te me to ihcakôc to impejti, ne me ahna amji caxàr.

Pê Ixaher catêjê quêtjê itajê ihtÿj Pahpãm to amji mã mehhimpej

⁴ Pê ajco Aper xwÿ Pahpãm to amji mã hane, cwÿrjapê ri Pahpãm mã cute Cãn xwÿ jirôa pê ampo jÿr xà ata peaj to impej. Mã Pahpãm te, cute cumã ampo jÿr xà ita na cupê catyt kam ipa catê na harên to impeaj to impej. Na pê ihtÿj ihkôt Aper xwÿ na amji capa. Ne pê ramã Aper xwÿ ty cakrô, mã cormã cute Pahpãm to amji mã ihhimpej xà ata, ihkôat me pamã to hahkre.

⁵ Pê Enoc hanea ne Pahpãm to amji mã hane, na pê ihcajpuaw pê Pahpãm ahna amji jarê, na pê nee pjê ita kam ihtyc nare, pê Pahpãm amji mã ihtÿr na to api, pê nee hipêr jÿ caxuw jÿm cumã cator ne hÿmpun nare.

⁶ Jÿ wÿr cu Pahpãm to me pahte amji mã hajÿr nare xà ata kam ihcajpuaw. Quê ha jÿm te Pahpãm wÿr hàhtêp

na amji to hàhcukjêr na, quê ha ihtÿj Pahpãm te ihkrÿ na amji mã to hane. Ne quê ha hanea ne caxwãm catia mã Pahpãm kôt me ipa prãmte ahna ahcukij, quê ha ihtÿj cute ahna hàhcukjêr ata jahpan xà na, cute ahna amji caxàr na amji mã to hane.

⁷ Pê Nowe xwÿ hanea ne ajco Pahpãm to amji mã ihhimpej, na pê ihtÿj cumã, por rÿ nee jÿm te ta catia pupun nare ata cawpa. Pê cute cumã ihcawpa xà ata kôt, amji mã pàr kreti to, mãr quê kaam mehkra me, amji to mehtyc xà jahpa. Mã ihkÿnte cute nee Pahpãm to amji mã mehhimpej nare atajê te amji curê mã me amji mên, ne mehcunea jamre. Mã Pahpãm te Nowe xwÿ te amji mã to hajÿr xà ata kôt ahna amji caxàr, ne cumã:

— Ate ikam gapac pejti, na ri apê catyt kam apa catê — hajÿr.

Aprãw pê cute Pahpãm to amji mã mehhimpej catêjê xakat

⁸ Pê Aprãw xwÿ hanea ne ajco Pahpãm to amji mã ihhimpej to ipa, pê Pahpãm cumã jÿ ri cute pjê to hÿ tekjê xà ata to, hÿjahkre xà ata na, amji mã to hane. Ne ma harkwa kôt, nee jÿ ri cute hÿ pjê ata jahkre pej nare kam, ihwÿr mÿ. ⁹ Pê Pahpãm Aprãw mã pjê to hÿjahkre xà ata kôt, ihkôat ihwÿr mÿ ne curi cato, ne kam ihkrÿ. Ne hanea ne ihkra pê Ixac me, ihtàmxwÿ japyr te Jaco ata me, kam mehkri. Ne pê hanea ne Pahpãm Aprãw tàmwxwÿ tàmwxwÿ mã, menquêtjê kôt pjê ata to awjahkre. Ne pê me cupê mehcahkriat, ne ajco pryre kà te ikre ata kam mehkri. ¹⁰ Ampo na? Nee mã ampo na nare. Pahpãm te me cumã amji ton xà ataa na, cute me cumã jÿ caxuw krÿ jamre nare ata xãm na, cormã me hikaj.

¹¹ Pê Aprãw ramã ihweaj to ihwej, ne hÿxi pê Xarakwÿj ihkre crà cakrô, pê Pahpãm ahnaa cumã ihkra to awjahkre. Mã cute cumã ihkra to hÿjahkre xà ata na amji mã to ihhimpej, ne ihtÿj hikaj, mã cumã ihkra pê Ixac pÿm. ¹² Hÿ, pê hÿmre pyxit peaj ne ajmãr ty, ata kôt ri mehtàmxwÿ jàhtôa to hàhtô, ne me cupê caxêre jàhtô pyrãac, nare, me cupê cÿxwa tohkà na pjênxôm carôt jàhtô pyrãac.

¹³ Ne ite me amã me panquêtjê jarĕn xà kôt harĕn itajê ri, Pahpãm to amji mã mehhimpej to me ipa ita kam amehtyc. Ne nee cute me Pahpãm te me cumã ampo to hũjahkre xà atajê cwyr nare kam amehtyc. Ne cute cormã me ampo cunea to Pahpãm te me cumã hũjahkre ata jarĕn par, ne nee cormã me hõmpun pej nare kam, ihhêj ne ramã cute me hõmpun, na ri ame hakry, ne ihtyj ahna me amji jarĕn to me hane he:

— He nee me ipê pjê ita tekjê nare, ne me ipê mehchakrit, na wa pjê nõa pĩn icator, ne ma ihnõ ita wyr mõ — hane.

¹⁴ Ne cute me amji jarĕn xà ita kôt, cu ramã pahte me hõ pjêa japĕn na me hahkre pej. ¹⁵ Quê rý mã pjê pĩn me cator ata wyr hacpỹa mã me amji jaxà, ne nee hipêr hacpỹ mã cute me amji jaxàr xà to ame amji kam hapac nare. ¹⁶ Ne quêt ame cõjkwa jõ pjê impejti ata pit japĕn to me ipa. Ne atajê pê Pahpãm kra impeaj, na ri nee me hũ na ihpahàm nare. Na ri ramã cute me cumã cõjkwa kam mehkrĩ xà ata ton.

¹⁷⁻¹⁸ Pê Pahpãm Aprãw mã ihkra pê Ixac to hũjahkre to hane he:

— Ixac pê akra ita cucwa kam, quê ha amã me atãmxwý hàhtõa to hàhtõ — hane. Pê Pahpãm Aprãw mã hajyr cakrõ, cute ihkra pê Ixac na capi prãmte ihcuran na cumã harkwa. Mã Pahpãm jarkwa kôt ramã cute ihkra curan ne to caxàr xàa kam, cute amji mã harkwa to:

¹⁹ — Wa ha ihcura, quê ha ihtyj Pahpãm hacpỹa mã ikra to ihtĩr — hajyr. Mã Pahpãm te cute ihkra curan tĕte huwahi xà ata pê ihhêj rũm ramã hacpỹa mã ihtĩr.

²⁰ Pê Ixac xwý hanea ne ajco Pahpãm to amji mã ihhimpej to ipa, na pê Pahpãm mã mehkra pê Jaco me Exaw tãmxwý te amji to me ipijapar xà na mehcajrĕn, ne me cumã:

— Quê ha Pahpãm ihtyj jũ caxuw ato impej cati, me atãmxwý mea mã — hajyr.

²¹ Pê Jaco hanea ne ajco Pahpãm to amji mã ihhimpej to ipa, na ri ramã ihtyc xàa kam, cute Pahpãm mã mehtãmxwý pê Joje xwý kra pijakrut atajê cajrĕn, ne ihtyj cormã hàwkõ ata na cute amji cajpar ne xa ne Pahpãm pejti na harĕn, ne to amji kampa.

²² Pê hanea ne Joje ajco Pahpãm to amji mã ihhimpej to ipa, ne ihtyc xà wyr, mehkjêjê pê Ixaher catĕjê te Ejit jõ pjê pê me cator na me cumã harĕ. Ne cute me cumã harkwa hyr, mãr quê jũ caxuw hacpỹ mã me amji jaxàr xà wyr mehhi to mõ, ne ma Pahpãm te me cumã pjê to hũjahkre xà ata ri me harĕt.

²³ Pê Mojxe xwý pãm me inxi hanea ne ajco Pahpãm to amji mã mehhimpej to me ipa. Na pê Mojxe cumã ihpým, pê Paro xwý pê pahhi me ahkrare curan na me cumã harkwa ata kaj na, me to amxu. Ne pê ihkra ata impeaj to impej, pê me hõmpu, na pê nee amji mã me pahhi ata cupa nare, ne cama me to ipimxur to putwry incrĕ.

Pê Mojxe Ixaher catĕjê mã cute mehkritxwý curan na to hahkre

²⁴ Pê Mojxe hanea ne ajco Pahpãm to amji mã ihhimpej to ipa, ne ihkà, ne ma apu cute me, cupê Paro kra cahãj ata kra na me harĕn na ihcaca. ²⁵ Na pê cute ampo kĕn cunea to amji cajpuaw to ipa xà to hatujre xà ata kam pê hucu, ne quêt ma mehkwy mã hàr na amji to. Ne me cumã axà ne me cahê na amji pupun xà kĕanre to amji pupun to ipa. ²⁶ Ne pê amji mã:

— He quê ha ihtyj jũ caxuw Pahpãm ite amji pupun xà ita jahpan xà na hirõa pê imã amgõ. Na wa ha Ejit jõ pjê jãhcukrĕj pejti itajê cunea to amji pê ijapac kĕt. Ne Pahpãm te me pamã cute ampo kĕn cunea pê me pahpytãr catĕ to hũjahkre ata cwyrjapê, wa ha cute ame icurĕ catĕjê kam amji pupun to kĕanre ne — hane.

²⁷ Pê Mojxe ajco amji mã Pahpãm to ihhimpej to ipa, na pê nee cumã pahhi pê Paro ata te kam incryc xà ata cupa nare, na pê ihtyj Ejit jõ pjê pê mehkwy to cato, ne ma me to mõ. Ne me to mõr xà ata kam, ihtyj ihhêj ne, por me Pahpãm pupun xà nare ata pupun to me mõ. Na pê kypê me cumã hũcanãr nare. ²⁸ Ne pê Pahpãm to amji mã ihhimpej, na pê me Hakren xà jõ amji kĩn to Pahpãm jarkwa kôt mehkwy mã ihhimpej, ne to hahkre. Ne amji kĩn ata kam, pê ikre cunea kôt cute ame carà cahãcre kra pê mehkritxwý caprõ jaxwyr na me cumã harkwa ta. Mãr quê ame haxwý, quê Pahpãm pĩn ajpĕn me ahkrare cakõnĩ curan catĕ ata tĕ, ne mehkritxwý caprõ pupu, ne nee mehkwy pê Ixaher catĕjê nõ pê ihkra curan nare.

²⁹ Ne pê Ixaher catĕjê hanea ne Pahpãm to amji mã mehhimpej, na pê ma Cõxwatepti cajpuw amcrãre ata na me rĕ. Pê Ejit catĕjê me cuxà ahna me irĕr prãm cakrõ, pê cama cõ me hipej.

³⁰ Pê Ixaher catĕjê Pahpãm to amji mã mehhimpej, na pê Cana jõ pjê mã me hàr xà ata kam, ihtyj Pahpãm jarkwa kôt Krĩcuxwati ata pu na me ipijarõa to me amcro to xet, me ajkaam pê krĩ tĕte kwyc ata cunea apu ajxwý, ne pê kam mehkrĩ catĕjê atajê cunea jipej tu.

³¹ Pê Rapekwýj xwý pê mempijapit xyre ata, ihtyj Pahpãm to amji mã ihhimpej, na pê Ixaher catĕjê te krĩ pupun catĕjê atajê na amji capa, pê nee cute me Pahpãm par nare atajê kôt me cahãj ata curan nare.

Pê menquêtjê kwý te Pahpãm to amji mã me hajyr atajê, ihtyj me ampo cwa

³² Hamre ramã ite me amã ijũjarĕn xà ita jamre. Ampo na? He ampeaj kam cute mam Pahpãm to amji mã mehhimpej catĕjê jãhtõ, na wa rý mã me amã Gitõ me, Parac me, Xãnxã me, Jeta me, Tawi me, Xamer me, Pahpãm jarkwa to mehcajõc catĕjê kwý jarĕ. ³³ Ne itajê pê hanea ne ajco Pahpãm to amji mã mehhimpej to me ipa, na pê krĩxàre kwý jõ pjê kôt ajco me ajpu ne me hipej, ne amji mã me hõ pjê atajê cunea pytã, ne me to hõ tekjê. Ne pê catyt kam, mehkra kĕn me, mempej catĕjê atajê to ajpĕn pê me ajcokjê. Ne pê ihtyj Pahpãm te me cumã ampo to hũjahkre atajê in-

cwa, ne ihtÿj amji tète me rop cahàcti jökre hôhti ata jarkwa to me ajpÿ.

³⁴ Ne pê hanea ne mehkwy, cuhy kam cute me irën xà ata kam, ihtÿj cuhy pôc kam ame ipa, ne nee jÿm caxàr nare. Ne pê hanea ne mehkwy, wapo xwahhihti to cute mehcuran xà ata pê me amji pytà, na pê nee me jÿm curan nare. Ne pê mehkwy peacre atajê, carôt tÿj mã me axà. Pê mehkwy mã me hàprê xà caxuw ampeaj kam me carôt tÿj cati, ne pê ihtÿj krìxàre jô kràhtare jàhtôa ne ajco me tohjê. ³⁵ Ne pê pyjê kwÿ te ramã mehkjêjê tyc atajê tÿar na hacpÿ mã amji mã me huwahi.

Catyt kam Pahpãm kôt ame ipa atajê, ihtÿj me amji pupun xà to kêanre

Ne pê mehkwy hanea ne Pahpãm to amji mã mehhimpej cacrô, ihtÿj cute amji pupun xà kêanre to me amji pupu. Ne ma me amji mã hikran caca, ne ihtÿj Pahpãm cwÿrjapê amji na me curê xwÿn jamã, mã me cumã mehkàj xà ton to me ipa ita to mehcura. Ne pê ajco mehkàj xà na me amji pupun xà ata kam me amji mã:

— Quê ha ihtÿj Pahpãm ite incwÿrjapê amji pupun xà kêanre to amji pupun xà ata jahpan xà na, hacpÿa mã cute ito itÿr xà ata kam, hirôa pê imã amgô — hane.

³⁶ Ne pê mehkwy na cute me xwÿ xà kêanre xà atajê to me cumã ihpahàm catia to, ne mehcahyr xà kêanre to mehcahy. Ne wakÿre te mehcajpre xà to mehkwy cajpre, ne me hacjên xà kam me hacjê. ³⁷ Ne pê kên to mehkwy capê ne to mehcura. Ne pÿ cokjêr xà to mehkwy tÿar kam mehcokjê. Ne pê wapo xwahhihti to mehkwy cura. Ne pê mehkwy pê hamreare, pê me curê xwÿn cama ame hahêr to mehcapôr to me ipa, ne ame to kêanre, pê ajmãr mehcachrô ame ipa, ne prykà to pit mã me amji pro to me ipa. ³⁸ Ne kên me pôtì kam me hamreare ata kam me acto ne ihtÿj kên kre me, pjê kre kam ajco amehkrÿ. Ne Pahpãm mã pjê kam mehcunea mehkkrÿ atajê jirôa pê quêt mempeaj to mempej.

³⁹ Ne atajê cunea, pê ihtÿj Pahpãm to amji mã mehhimpej to me ipa, na pê Pahpãm mã mempej pit, pê me ahna amji capa cacrô, pê nee cormã cute me, por Pahpãm te me cumã ampo to hÿjahkre ata cwÿr nare. ⁴⁰ Ampo na? Pahpãm mã cormã cute me ampo cwÿr xà ata jôr xà nare, quê ha cormã me to me pajikaj, mãr cu ajkaam, Pahpãm te ihcunea na me pahto impej prãmte me pamã hàmjôr xà impejti catia ata to me pamã amgô.

Cu ha menquêtjê cuxà, me pahte amji pupun xà kêanre ata mã me awcanã

Ixaher 12.1-29

Pirip 3.12-16

12 Ne mam me panquêtjê amji mã me Pahpãm to mehhimpej to me ipa catêjê atajê jàhtôa pi-carô, cormã ihtÿj me pahkôpÿr to me ipa. Ne cute Pahpãm to amji mã mehhimpej xà atajê ihhêj ne ihtÿj me pamã hàpôr to me ipa. Pom hãn ne me ipicahur curê,

ne me hàhcukrêj me, ampo cunea pytÿti me, ampo te mehcahpêrkàr xi atajê cunea jicu, ne mehcachrô me ajcahu, ita jÿkjê na, cu ha amji pê me ampo kên cunea me, ampo kên te me pahcupu xi atajê cunea jicu, mãr quê nee ampo me pahcahpêrhÿr nare kam, catyt kam Jeju to amji mã me pahhimpej kam me to pancrà. ² Ne pom me ipicahur catêjê amji cumam memprar xà mã catyt kam me irÿt to me pra, ita jÿkjê na, cu ha Jeju to pit mã amji mã me pahhimpej to me papa. Ampo na? He taa mã pê mam Pahpãm jô pry kam me paxãm. Ne taa mã pê pahte amji mã me to pahhimpej na me pah-to. Ne taa mã quê ha ampo cunea jicu xà kam me pahtehcajpa, mãr cu nee pahte amji mã me to pahhimpej xà ata jicu nare. Ne pê Jeju pjê ita kam ajco apu ipa, ne nee pÿ kam ihtyc xà ita tète amji hi kwÿn nare. Ne ihtÿj cumã jÿ caxuw hakryti na amji jahkre pej, na pê ihtÿj ihtyc xà kêanre kam ihpahàmti ita mã awcanã. Na ri amcro ita kam ihtÿj Pahpãm cahê na, awpôc rÿm Pahhiti krÿ xà pê me hàmtàr cati krÿ xà ata kam jÿ.

³ He Jeju te amji pupun xà kêanre to amji pupun, pê mehkkrã kên hàhtôa ne ma ame curê cacrô, pê ihtÿj awcanã na, to ca me amji japackre, mãr ca cuxà, nee ampo kên cunea mã gÿcanãr tète me amji hi kwÿn, ne Pahpãm kôt me apa jicu nare. ⁴ He nee cormã mehkkrã kên te amji kam hapac xà kêanre pê, ate me amji pytàr xà ita kam, nee rÿ me anô caprô pijaxwÿr nare. Ne nee jÿm te cormã me anô curan nare. ⁵⁻⁶ He pê ramã Xarômãw xwÿ, cute me amã acarôt to ihtÿj xà caxuw, Pahpãm jarkwa na hÿ kàhhôc kam me amã ita na ih-hôc, ca ramã ihhêj ne ate me to gapac kêt! He pê me pajapackre to:

“Ikra, quê ha Pahhiti pê Pahpãm mã jÿm kÿn, quê ha ihtÿj jÿm ata japackre xà to ihcãmxê, mãr quê catyt kam ihkôt ipa.

Ne quê ha Pahpãm jÿm to ihkra xà na ahna amji capa, ne ihtÿj cute ampo kên ton tète cumã, ne cumã ihkàj xà to, mãr quê catyt kam ihkôt ipa. Na quê ha jÿ caxuw Pahhiti akàj xà nô to acãmxê, ca ha atÿj cute acãmxêr xà ata na ihkôpÿ, ne ihkôt hakop.

Ne quê ha ampo tète amã, ca ha cute amãn xà ata kam, ihkôt apa intète amji hi kwÿn nare” hane.

⁷ Na quê ha ate me amji pupun xà kêanre me akam ajhu, ca ha atÿj me cumã awcanã. He ate me amji pupun xà kêanre itajê pê, pom hãn ne me hÿmxwÿ mehkra japackre he. Ne ate me amji pupun xà kêanre itajê, ihtÿj ramã me apê Pahpãm kra na me garê. He xà ajkÿ cute mehkra japackre xà caxuw me hÿmjê me hamreare? Hãpà. Cute me hapackre xà caxuw ihtÿj me cumã me hÿmjê me, menquêtjê. ⁸ Ne pom krô na mehkra, mã nee me hÿmjê me hapackre, ne mehcãmxêr nare, mã amjia kôt me amji to ajpa, ita jÿkjê na, quê ha Pahpãm nee jÿ caxuw acãmxêr nare na, ca ha nee apê ihkra impej nare.

⁹ He pê me pajökrenöre na ihtÿj me pahcũmxwÿ ajco me pajapackre, ne me pahcãmxe, na pê cu pahtÿj ajco amji mã me hũpa. Cwÿrjapê cu ha ita caxuw me hirõa pê amji mã me cõjkwa kam me pajõ Inxũ Cati cupa. Ne cute me pahkàj xà to me pahcãmxe, na cu ha pahtÿj me kampa, ne me awcanã, mãr cu cahê na me pahkrí rohnÿtti mã. ¹⁰ Pê me pahcũmxwÿ, me pantuwre na, caku crêre kam, jũ na cute amji mã me pahto prãm xà ata na ajco me pajapackre, ne me pahcãmxe. Ne Pahpãm te nee quêt hajÿr nare. Ne cute me pahto impejti xà caxuw ri me pahcãmxe, mãr cu me papê hũraac, ne me pampeaj to me pampej. ¹¹ He pê me pahcũmxwÿ me pahcahhyr xà ata kam, pê nee me pamã ahna ihkĩn nare cakrõ, cu pahtÿj cute me pahcahhyr xà atajê kõt catyt kam ame papa, ne me pampej pëa mã me amji to ajpa.

Cu ha pahtÿj Pahpãm kõt me papa rohnÿtti mã to prãm

Carati 5.16-21

¹² Cwÿrjapê, quê ha ate me amji pupun xà kêanre me awÿr hapõj, ca ha nee Pahpãm kõt me apa tète me amji hihkêhkên nare, ne cama quêt caxuw amji mã me acarõt to mehtÿj. ¹³ Na ca ha atÿj gõtpe catyt kam Pahpãm te amji kam hapac xà kõt apa, mãr quê ihtÿj jũm akõt mõ ata, nee akõt amji cahpêrhyr, ne Pahpãm kõt ipa tète amji hi kwĩn, ne hicu nare.

¹⁴ Ne catyt kam mehcunea me, me apijapu to me apa na me amji to prãm nare na, ca amji to me ahcukij. Ne catyt kam ate amji kam me gapac xà impejti to me apa na, ca me caa amji to me hahkre. Nãmri quê ha jũm te ihcunea na catyt kam, cute amji kam hapac xà impejti to ipa nare na, quê ha nee jũ caxuw Pahpãm pê Pahhiti pupun nare. ¹⁵ Ne ca ha ma me ajpên jamã, mãr ca nee me anõ Pahpãm jahcapríhti ata cwÿr jicu nare. Ne nee ca me akwÿ kam, jũm te amji kam hapac xà kên to ipa na hamãr nare. Ampo na? Por jũm te amji kam hapac xà kên ita pê ihhêj rũm pjêpjêcrejĩ pyrãac. Ne por mehcunea pjêpjêcrejĩ na me pra atajê, quê ha mehcunea caxwÿ, quê ha me kàj xà partu. Jíkjê na, quê ha mehcunea jũm te amji kam hapac xà kên ata têt, ne ramã ihkên mã hàr pyrentu. ¹⁶ Ne nee ca me akwÿ kam, jũm te amji kam hapac xà xyre kam pahpahàmti ton to ipa na hamãr nare. Ne nee ca jũm pê Exaw xwÿ te amji mã Pahpãm te amji kam hapac xà cupa nare pyrãc ata na hamãr nare. He pê Pahpãm Exaw xwÿ mã ampo pej cunea gõ, pê to hõ tekjê. Ne ampo atajê to hõ na crat pyxit peaj na to ahpa. ¹⁷ Jirõ pê hapu na ihkrã kre mã ihpÿm, ne tee hacpÿ ne apu Pahpãm te cumã ampo pejti jõr ata pyr to hahkre, ne tee incwÿyar kam hacpÿ ne ahna ahwÿ cakrõ, nee hacpÿ ne cute ipyr xà nare na, ramã me amã hahkre pej.

Pê Ixaher catêjê Pahpãm wÿr me hàhtêt xà ata ihtÿjaj to ihtÿj

18-21 Pê Ixaher catêjê, põtĩ kam me hamreare ata kam, Pahpãm wÿr me ahtêt, ne ma kên japrÿ te Ihcuhyt ata na me cato. Ne mento jĩa to me cuhy catia

pupu, ne mehcajpê. Ne cute me awcapàtkõtĩ catia pupun. Ne cute me kõtĩ catia pahtÿjti ata cajpêr. Ne cute me hapac jĩa to me cõjkwa pĩn hõhhi jõkre krãhhi ihtÿjti ata kam hapac, ne hanea ne cute me Pahpãm te ihcakõc na me kam hapac. Ne hanea ne cute me Pahpãm jõkre kam hapac, ne ampeaj kam me cumã hũpa. Na ri cute mehwyÿr, quê nee hipêr ihcakõc quê mempar nare. Ne Ihcuhyt ata kam pê Pahpãm me cumã ihcakõc, cwÿrjapê ri ihtÿj cute amji mã me hũpa xà. Cwÿrjapê pê Pahpãm me cumã kên ata cawpa to:

— Nee me anõ te kenti ita cupên xà hamreare, ne nee hanea ne ampo pry te ihcupên xà hamreare. Quê ha ampo pry ihcupê, ca ha me caa, me kên kwÿ cwa ne to me capê, ne to mehcura — hane. Mã hũpate, cute nee me cumã harkwa hyr xà ita na me amji caxàr, ne kam me hapac prãm nare. Mã Mojxe te ampo itajê cunea pupun, ne cute ahna amji jarên to:

— Wa itÿj ampo itajê cupate apu itertet — hane. Hõ, pê Ixaher catêjê Pahpãm na me ahtêt xà ata kam, pê me to hane. Ne nee quêt ate me hajÿr nare.

Pahpãm wÿr me pajàhtêt xà quêt ihcajcucre, ne nee ihtÿj nare

²² Ne ca Pahpãm na me gàhtêt xà ata kam, ca ihhêj ne cõjkwa kam Xijãw jõ kên pupun xà nare ata na me gàhtêt. Ne por cõjkwa kam Krĩpinkrên pê Pahpãm tĩr rohnÿtti mã ata jõ krĩ na, ca me gàhtêt. Ne cõjkwa kam krĩ ata kam, ampeaj kam Pahpãm mã me hàpên catêjê jàhtõa to me hàhtõ, ne me hakrya kam curi me cuprõ. ²³ Ne hanea ne Pahpãm na mehkwy ihkõt me ipa atajê, ramã Pahpãm te cahê na me ipa xà caxuw cõjkwa kam, hõ kàhhõc kam me haprÿ nõr atajê na me gàhtêt. Ne hanea ne Pahpãm pê catyt kam, me pahcukij ne ajpên pê me to ipicokjêr catê ata na me gàhtêt. Ne ca hanea ne, por pê ihcunea na catyt kam ajco me ipa, ne ramã amehtyc atajê na, me gàhtêt. ²⁴ Ne hanea ne Jeju te Pahpãm me, me pahte ajpên par to intuwti ata na me gàhtêt. Ne Jeju caprõ te ihhêj rũm me pahkên cuhhõn, ne me pahpytãr. Ne pê Aper xwÿ caprõ, ihtõ te ihcuran jahpan xà na, Pahpãm na cute to kên prãmte ahwÿ. Ne nee Jeju caprõ te hajÿr nare. Ne quêt cute mehcunea caprĩ xà caxuw, Pahpãm na hàhwÿr.

Cu ha nee me pahte Pahpãm par nare na, quê ha ihtÿj me pahto kên

²⁵ Cwÿrjapê ca ha nee amji pê Pahpãm jarkwa curê nare, ne quêt kam me gapac to impeaj ne. Pê Pahpãm mam pjê wÿr wrÿ, ne me aquêtjê mã amji cawpa. Pê nee me kam hapac nare, ne cama mehkêanre ton to ajco me ipa, na pê nee jũm Pahpãm te me to kên xà ata pê amji pytãr ne hàhhuc nare. Japu na ri ihtÿj cõjkwa pĩn Pahpãm me pamã amji cawpa. Cu nee mempar nare ita kam, cu ha pijamã me pahnõ Pahpãm te me pahto kên xà ata pê amji pytã? Quê! Cu ha pahtÿj me cuxà, me hirõa pê me pahkên mã me acjêj. ²⁶ Ne amcro ata kam pê Pahpãm ihcakõc, pê pjê ahcujrõ. Ne ita

kam ri quêt cute me pamã amji to hÿjahkre to hajÿr he:

— Wa ha nee hipêr ita caxuw pjêê to pit mã ijãhcu-jrôn nare, ne jÿ caxuw cõjkwa mea mã to ahcujrõ — hane. ²⁷ Ne pom icakõc xà pê "...hipêr ita caxuw..." ita kõt harên xà te, quê ha Pahpãm cute ampo cunea ton itajê to ahcujrõ, ne ihcunea to hamre tu, mãr quê ampo cunea jãhcujrõn te ampo to hamre xà nare atajê, ihtÿj ahtwÿ ne ihcuhhê.

²⁸⁻²⁹ Ne quê ha Pahpãm ihhimpej xà krac ri me pamã, me pahkrí xà jãhcujrõn te to hamre xà nare ata gõ, cu ha kam me pahkrí rohnÿtti mã. Na cu ha pahtÿj hÿrên me pajakryti na cumã me amji jarê. Pahpãm pê cuhy catia te ampo cunea to hamre xà ata pyrãac, cwÿrjapê cu ha pahtÿj hÿpahti kam, catyt kam cumã cati, ne impejti na me harê.

Cu pahtÿj me ajpên kíñ kam me to pancrà to prãm

Ixaher 13.1-25

¹ Jowãw 3.17-18

13 Ca Jeju kam ajpên to me akjêjê ita kam, ca ha atÿj me amã ajpên kíñ kam me to acrà tu ne.

² Ne ca ha atÿj mehcahkrit na me amji to põj kam me to acrà tu ne. Ca ha ate me ita to hajÿr na, ca ha me apê mam me aquêtjê pyrãac, ne pê mehkwy, kýj rÿm me Pahpãm mã me hàpên catêjê na me hahkre pej nare kam, ihtÿj me hÿrkwa kam me ahna amji to põj.

³ Ne ca ha me hacjên catêjê to ma me amji japackre, ne mehtehcajpar to hanea, pom ca ihhêj ne me cahê na me acuhhê he. Ca ha cute me amji pupun to kêanre atajê jamãr to me apa to hanea, pom ca me caa ate me amji pupun xà kêanre to me amji pupun he.

⁴ Ne ate me gikwa tuw xà na ate me ajpên par xà atajê, ca ha atÿj amji mã me hÿpahti to me apa. Na ca ha me apê mempê me, me apê mehprõ, ca ha ate mam me ajpên par xà ata na, ma me amji jarkwa to me amji japackre to me apa. Ne nee jÿ caxuw ahti na, me aprõ me, me apjê kaj na ate jÿm me ajpên caxun to amji kam me gapac xà hamreare. Ampo na? He quê ha ihtÿj Pahpãm, por jÿm ahti na jÿm caxun to ipa ata, to kêanre ne. Ne hanea ne, por jÿm te amji kam hapac xà xyre kam me pahpahàmti ton to ipa ata, quê ha hanea ne apu to kêanre ne.

Cu ramã me pamã ampo atajê pyrên ri me pajakryti to prãm

⁵ Ne nee hanea ne, ame ihpore pit kíñ to me apa ata kam, me gõ pore incwÿr xà to pit mã me amji kam gapac to me apa nare. Ne pom ramã me amã ampo atajê pyrên, ca ha atÿj me gakrya na ame apa. He pê Mojxe xwÿ jõ kãhhõc kam, Pahpãm ramã me ana ita na amji jarên to:

"Wa ha nee jÿ caxuw me arer nare, ne nee jÿ caxuw me amã hikran nare" hane.

⁶ Pahpãm te me ana amji jarên xà ita cwÿrjapê, cu ha pahtÿj Tawi xwÿ jõ kãhhõc kam, cute amji jarên xà ata kõt, me amji jarên to:

"Pahhiti pê Pahpãm pê itehcajpar catê ita kam, jÿ wÿr quê ha jÿm amji mã hamã ne ito kên, na wa ha nee apu amji mã pa nare" hane.

⁷ Ne mam cute me ato ihhimpej catêjê te me amã Pahpãm jarkwa to hahkre na, ca me to amji japackre. Ne cute amji kam me hapac xà me, mehtyc xà na me to amji kampa, ne mehkõat Jeju to amji mã me ahimpej to me apa. ⁸ Ne nee jÿ caxuw Jeju Crixto pintuw xà nare. Ne amcro itajê kam, cupê mam Jeju ataa, ne quê ha cormã cupê Jeju ata rohnÿtti mã. ⁹ Ca ha nee ite me amã Jeju te amji kam hapac xà pejti to hahkre xà ata kaj na, jÿmjê te me amã ajteare mã ampo pihho to hahkre xà ata kõt, amji kam me gapac nare. He Pahpãm ri hàhcaprãa kam, me pamã pahte amji kam me pajapac xà to ihtÿj ne to impej. Ne jÿ wÿr quê me panquêtjê te amji kam hapac xà te me pamã me pajõ cawpa xà ata, me pamã me pahte amji kam pajapac xà to impej. Ampo na? Por cute amji mã me hõ cawpa xà ata me, me ipijacri xà atajê cunea kõt hamreare.

Jeju ihtÿj me pamã pahte amji kam me pajapac xà to ihtÿj

¹⁰ Ne por Krípinkrên kam Pahpãm mã mehcajrên catêjê Pahpãm jÿrkwa kam cumã me ampo pry to caxàr to me ipa atajê, ihtÿj cute ampo pry to me ipijapar xà ata to me Pahpãm kam hapac atajê kwÿ ku, mã me hí to pit mã ihtÿj, ne nee me cumã caxwãm pê cute amji kam me hapac xà to ihtÿj nare. Ne me pa nare, he ihtÿj quêt Jeju me pamã pahte amji kam me pajapac xà to ihtÿj. Mã nee Pahpãm jÿrkwa kam cumã me hàpên catêjê atajê te ahna me pahho xà hamreare.

¹¹ Ne Pahpãm mã mehcajrên catêjê jõ pahhiti caku cunea jõ amcro pyxit kam, cute me Pahpãm to kên jahpan xà na, me ampo pry cura atajê caprõ to Pahpãm jÿrkwa caxwÿn pejti ata mã acjêj, ne Pahpãm mã cupê. Ne por cute me ampo pry curan atajê jÿ to ma krí pê me hapõj, ne curia me to capa. ¹² Cwÿrjapê ri cute me ampo pry curan kôpit na, krí kaj na Jeju tyc, mãr quê caprõ to me pamã me pahkên cuhhõ. ¹³ Hÿ cu me papê hÿràac, ne cuxà krí ita kam cute me amji kam hapac xà tÿm itajê mã me hikra, ne Jeju kõt põ mã me pahcato. Quê ha me pahpahàmti na me pahto, cu ha nee ame pahpahàm nare. Ampo na? Pê Jeju to me hanea, ne me pahcumam me cumã ihpahàm catia to. ¹⁴ Ne me pamã pjê kam krí itajê nõ jãhhuc rohnÿtti mã xà hamreare, na cu ha pahtÿj cõjkwa pín Pahpãm te me pamã krí kam me pahkrí rohnÿtti mã xà jõr xà ata japê.

¹⁵ He Jeju Crixto kõt ri, Pahpãm na me pajãhtêp xà, ne nee cumã ampo pryre to me ipijapar ata jõr xà kõt ahna me pajãhtêp xà nare. Cwÿrjapê cu ha me Pahpãm mã cupê me pajõ Pahhiti cati ne impejti na hÿrên me pajakryti na, cumã me amji jarên to me pahcuhhê

tu. He pahte me to hajÿr xà ita pê pahte cumã ampo jÿr pyrãac, na quê ha ihtÿj me pahpyrên hakryti ne. ¹⁶ Ne hanea ne gÿtpê atÿj me ajpên tehcajpar to me ajpên to impejti to me apa. Ampo na? He ita te hajÿar ne cupê ate Pahpãm mã ampo jÿr xà. Na quê ha hanea ne ihtÿj hÿrên hakry.

Cu pahtÿj me pahto ihhimpej catêjê Pahpãm mã mehcajrên to prãm

¹⁷ Na ca ha atÿj me akwÿ kam me ato ihhimpej catêjê krac ri me acjêj, ne me kampa, ne catyt kam ihkôt me apa. Ampo na? He ihtÿj cumã jÿ caxuw cute Pahpãm mã me ana amji jarên na cumã hahkre pej, na ri ihtÿj me gamãr to me ipa. Ca ha ate me kam gapac na, quê ha ampeaj kam cute me gamãr xà ita pyrên hakry, nãmri ca ha ate me kam gapac nare na, quê ha cumã amji kÿn nare kam, me gamãr to ipa. He ate me hajÿr xà ita te nee me atehcajpar xà hamreare.

¹⁸ Ca ha atÿj Pahpãm mã me icajrên kam to acrà tu ne. He ihtÿj jÿmjê ampo kên na me icãmjÿ cakrô, wa Pahpãm kam mare mã catyt kam me ipa na, me imã amji jahkre pej. Ne me imã ihcunea na catyt kam me ipa kam me to icrà tu na me amji to prãm. ¹⁹ Ne wa ha kypê me awÿr nare, mãr ca Pahpãm mã me icajrên, wa me awÿr amji jaxàr to amji to ijãhtÿm nare, ne amji jaxà.

Pê Pawrô Pahpãm mã mehcajrên

²⁰⁻²¹ Jeju pê me pajÿ Pahhiti, ne me pancwÿrjapê ihtyc xà ata kôt ri, cupê carà cahàcre hôhti jamãr catê

catia pyrãc, ne cupê me pajamãr catê catia. He Jeju pê me pahkritxwÿ caprô pijaxwÿr xà ata te ihtÿj Pahpãm te me pahkên pê me pahpytãr rohnÿtti mã na harên. Pê Pahpãm hacpÿa mã Jeju to ihtÿr. Pahpãm te me pahcarÿcti kam ame papa na me pahton, mãr cu nee ame amji mã ampo cupa nare ata mã, wa me acajrên to hane he:

— Me ijÿ Inxÿ Cati, Juta catêjê pê hanea ne Jeju na mehkwy atajê tehcajpar to impeaj ne, mãr quê ate ampo cunea na amji mã to prãmti xà te acajpuaw xà ata to pit mã, me to me ipa. Ne hanea ne akra Jeju Crixto kôt me imã ite amji kam me ijapac xà to impeaj ne, mãr wa ihcunea na me acajpuaw. Ne me imã mehcunea te akra to acatia to cati na to prãm rohnÿtti mã. Ampeaj kam! — hane.

Ihkàhhôc jicu xà kam cute amji jarên xà

²² Ýhÿ Jeju kam me ikjêjê, wa ite me amã ihkàhhôc jatujre ita hôc, mãr ca ite me gapackre xà itajê kam me amã amji kÿan kam, me kam gapac to impeaj ne. ²³ He xà ramã me amã, cute me hacjên xà pê me pahkjê pê Timot cator na, me amã hahkre pej? He ramã cute me cator. Na quê ha iwÿr cute uua ne ita ri cator na, wa ha me ajwar me awÿr me mÿ ne me apupu. ²⁴ Ne wa ha cute me ato ihhimpej catêjê me, me cupê Pahpãm na mehkwy cunea mã me ijÿ hàpà kujate. Ne ita ri, me pahkjêjê kwÿ pê Prytikra jÿ pjê catêjê te me acunea mã me hÿ hàpà kujahêc. ²⁵ Ne imã Pahpãm te hàhcaprÿa kam me acunea to impej na to prãm.

TIJAC

Ÿhÿ, pê Tijac pê Krĩpinkrên jŃ krĩ kam Jeju na mehkwy jakrã mehkřĩ atajê to ihhimpej catê. Ne cupê Jeju tŃ te amji to hapu na kjê impeaj, ne cupê Jeju jarkwa na memprar catêjê nŃ. Ne pê pjê cunea kam, Juta catêjê te Jeju to amji mã mehhimpej atajê mã hŃ kãhhŃc ita kujate. Na pê mam hŃ kãhhŃc ita japřy pê (Tijac). Ne pom cu me hŃ kãhhŃc cahyt ita kam, pê me pamã ampo pejti to hahkre to hane he. Cu ha pahte Jeju to ampeaj kam amji mã me pahhimpej na, cu ha catyt kam Jeju te amji kam hapac xà impejti intuwti ata kŃt ame pa-pa.

Pê Tijac me cumã amji jarê

Me Hãpên Xà 12.17; Carati 1.19

1 Hàpà me ikwÿ! Pom me apê Jeju na mehkwy, ne me apê Ixaher catêjê jakrã te tŃxi, ca pjê cunea kam ame apicràn ne ame akrĩ atajê, itea wa me amã ihhŃc. Ipê Tijac, ne ipê Pahpãm me, me pajŃ Pahhiti pê Jeju Crixto mã ijãpên catê.

Cu ha pahtÿj pahte me amji pupun xà kãanre mã me pajũcanãr to me papa

Ruc 6.20-23; Roman 5.3-5; 1 PetrŃ 4.12-19

2 Ÿhÿ, Jeju kŃt pahte ajpên to me pahkjêjê atajê, ca ha hãn ne, ampo te me ato jũ mãn xà kãanre na me amji pupu, ne atÿj hũrên me gakry. **3** Ampo na? Pahpãm te me acapi xà caxuw ri hãn ne me amã me akên xà itajê kujate, cute me gahkre peaj prãmte, mŃrmŃ ca ajkĩ ampeaj kam ihkŃt amji kam me gapac to me apa rohnÿtti mã. Ne pom ate me akên xà na me amji pupun ita kam, ca ha me gãcanãr kam me to gãhtàt to me amji pyrãc to me apa. Ne ramã ate ita na me amji jahkre pej pejtu. **4** Na ca ha ate me gãcanãr kam me to acrà na, ca ha ma me to amji kà to me mŃ. Ne ca ha toa me amji jĩ tÿj na, quê ha me acaxwãm pê ate me amji kam me gapac xà kam me apê ampo hamre nare, ne ihtÿj me amã ampo cunea Jeju kŃt ate me to apa xà caxuw.

5 Quê ha jũm pê cute amji jahkre pej krã kreti nare, quê ha amji na Pahpãm wÿ, quê ha ihtÿj cumã cute amji jahkre pej krã kreti gŃ. Ampo na? Pahpãm jãhcajřean to hãhcajřen, ne hãhcajřean kam hãn ne me pahcunea tehcajpa, Jeju kŃt me papa xà ita na. **6** Na ca ha me Pahpãm wÿr xà wÿr, amji kam me gapac to me hane he, ne amji mã me garkwa to:

— Wa ha Pahpãm na ahwÿ, quê ha ihtÿj imã ijũpar krã kreti gŃ. He wa itÿj cute imã hŃr na amji mã to hane. Ampo na? Pê ramã taa, ite ahna ijãhwÿr ita na, amji na imã awjahkre — hane. Ne nee ca amji mã me garkwa to:

— MŃrmŃ quê ha Pahpãm imã ijũpar krã kreti gŃ, nare, quê ha imã hŃr nare, pÿpÿn — hajÿr nare. Nãmri cute me hajÿr catêjê pê ri ihhêj rũm kŃc te amji wÿr cŃxwa krã jacjên pyrãac, nare, me cupê ihhêj rũm kŃc

te apu pĩhhŃ incrà to pjê kam imprar, mã cute apu amji jacjên pyrãac. Ne cute amji kam me hapac xà pintuw xi hyre nare. **7-8** Ne cute me hajÿr catêjê mã, quê ha nee Pahpãm ampo jŃr nare. Ampo na? Mencaca xà te amji jřkjê incire nare. Na quê ha cute me amji kam hapac xà pijakrut jarên to hane he. Quê ha ihcunea te me cumã impejti na, quê ha me amji mã:

— Quê ha Pahpãm itehcajpar ita na — hane. Nare, quê ha ihcunea me cupê ihkaj na, quê ha me amji mã:

— Ihhêj ne nee Pahpãm mã itehcajpar prãm nare — hane. Na ca ha nee me cuxà ahna me amji mã harên to hajÿr nare.

Me pajakřaj me, me pajakřaj nare pyrên me pajakry

1 PetrŃ 1.24-25

9 Quê ha Pahpãm te me pahkjêjê nŃ pê hamreare ata to ihkà, ne to ihtÿj ne to hakřaj na, quê ha ihtÿj hakry. **10-11** Ne hanea ne me pahkjêjê nŃ jakřajti ata te hajÿr, quê ha Pahpãm te cupê hakřaj ata to incri na, quê ha ihtÿj hanea ne hakry. Ne pom me hakřajti itajê pê ihhêj rũm hŃjahkrate rã. Quê ha irã, quê ha amcro tÿj cato ne ahna cŃ to, to incrà, quê ha pea ihpÿm. HŃhŃ, ita na quê ha me hakřaj atajê me hane he, ne cute amji kam me hapac xà atajê cunea jipŃc ri me hamre.

Me pahcajpeř xà pyrên me pajakry

Tijac 3.14-16

12 Nãmri quê ha me pahcunea te me pahkên xà ita kam me to pancrà, ne me pajũcanãr, ne me hakren, ne cormã amji mã me Pahpãm to me hajÿr na, quê ha ampeaj kam me pajakry. Ampo na? Me Pahpãm quê ha me pahkên itajê jahpan xà na, ihtÿj me pamã me pahtĩr xà caxuw me pajahĩ xà gŃ, cu ha cahê na me pahkrĩ rohnÿtti mã. Ahnaa mã memprar tÿjti catêjê me he. Ne mehkwy jirŃa pê me ajcahu, ne amji mã me hê pejti incwa he. Jřkjê na mã cute hajÿr. Ata to pê Pahpãm cute mehkĩnti atajê mã awjahkre.

13 Nãmri, ca ha me anŃ te amji kam gapac xà to ihcupan na amji cajpeř na, ca ha nee amji mã garkwa to:

— Pahpãm te ri imã ite amji kam ijapac xà kên ita ton — hajÿr nare. Ampo na? He nee Pahpãm caca xà te ha-

jÿr nare. Jÿ wÿr quê jÿm Pahpãm mã ihkên ton na awjahkre, quê harkwa kôt to. Ne hanea ne jÿ wÿr quê Pahpãm jÿm mã ihkên ton xà na awjahkre, quê to. 14-15 Nãmri quê ha jÿm te amji mã ihkên ton to ipa to prãm na, quê ha amjia kôt ton to ipa, cute amji kam hapac xàa to. Jirô pê mã, quê ha ihtÿj ihkên mã axà, ne cute ihkên ton atajê jahpan xà na cumã amgõ, ne Pahpãm mã hikra ne ty.

¹⁶ Ne me ca nare, me ikjêjê impejti kïnti atajê, nee ca ampo itajê nõ to, me anõa amji mã ahêj to:

— Pahpãm te ri, ite to ihcupan xà ita na imën — hajÿr nare. ¹⁷ Ampo na? Quêt ampo pejti cunea kam ihkên nare atajê cunea, cõjkwa kam Pahpãm pïn me pahwÿr hapõj. Ne Pahpãm te cõjkwa kam hàhcujro xà ton ata ri, me pahwÿr ampo pejti itajê cunea kujate. Ne pyt ihtÿj me pamã amcro to, ahna carãre kam. Ne ahna ahtÿm nare, quê ha ahcakrà ihpro, quê hipêr me pamã amcro ton nare. Ne nee Pahpãm te hajÿr nare, ne quêt me pahto impejti ita na, ne nee jÿ cacuw cute me pahcaxuw amji kam hapac xà kên te ihcupan xà nõ ton nare. ¹⁸ Ne cute me pamã harkwa kam ihhêj xi nare ita kujahêc. Cu me kampa, cwÿrjapê ri cute me pahto amji kra. Cu ihhêj ne hipêr ame pahpÿpÿm, na ri me papê Pahpãm kra cakõnï.

Cu ha me Pahpãm kampa, ne harkwa kôt me ton to me papa

Roman 12.17-21; Epet 4.25-5.2; 1 Jowãw 2.3-6

¹⁹ Ýhÿ, Jeju kam me ikjêjê impejti kïnti atajê, ca ha me acunea atÿj me gÿpar prãmte to me apa, ne me acakõc xà me, me acryc na me apahãm jãhtõti to me apa, ne ampo itajê cunea to me amji japackre. ²⁰ Ampo na? Ca hãn ne me acryc kam pra, ne nee Pahpãm mã me ampo pejti ton nare. ²¹ Cwÿrjapê, ca ha me ate amji kam me gapac xà pahãm nare, inxyre to ate me amji pyrãc atajê cunea jicu. Ne hanea ne ate amji kam me gapac xà kên to me apa xà itajê cunea jicu. Ne quêt amji to me acati prãm nare kam, Pahpãm jarkwa na me amji to põj. Ampo na? Nee mã ampo na nare. He Pahpãm jarkwa pê ampo hy kryjre kre jiprãj atajê pyrãac ne ihtÿj ajcamê. Jïkjê na, ca ha Pahpãm jarkwa kôt me apa, ne nee me ampo kên itajê ton nare na, ca ha atÿj me apicamën to me mõ.

²² Nãmri ca ha ate amji mã me garkwa to:

— Wa ha itÿj Pahpãm jarkwa catia ne kampa, quê ha ite impar xà atajêa kôt ihtÿj ito impej — hajÿr, ne nee ate ihkôt me amji ton nare na, ca ha caa ramã amji mã ahêj. ²³⁻²⁴ Ne por me Pahpãm jõ kãhhôc kampa, ne cama harkwa to me hapac kêt, ne nee me ton nare atajê pê ihhêj rÿm me hÿmre te irït xà kam amji kuc na ampo ata kôt me amji pupun, ne memprar kwaa kam me to hapac kêt atajê pyrãac. Ne nee cute jÿ na xà ata na amji to me amji japackre kam incrà nare. ²⁵ Ne Pahpãm te amji kam hapac xà, hãn ne nee me pahte ampo pejti ton tète me pajiprõn nare, ne quêt cama ampo pejti ton na me pahtehcajpa. Ne por me hÿmre me Pahpãm jarkwa cahyt, ne nee amji pê me to hapac kêt

nare, ne ihkôt me ipa atajê, quê ha Pahpãm ihtÿj cute me hàpên xà ton atajê cunea kam me to impejti ne.

²⁶ Nãmri quê ha jÿm te amji mã harkwa to:

— Ipê Pahpãm jarkwa kôt, ihkôt ipa catê — hajÿr, ne nee cute ihcakõc kên tète amji jiprõn nare, quê ha nee cupê Pahpãm kôt ipa catê nare, ne cama apu ahna amji to ihhêj to ipa.

²⁷ Ne quêt Pahpãm pê me pajõ Inxÿ Cati mã ihkôt ipa catê te catyt kam ipa ata jãpên xà te hajÿr he. Quê ha mempijapit me, me huwatï pê ampo jamreare, mã tee ame amji to hàhhuc to me ipa atajê, quê ha ihtÿj mehtehcajpar to ipa. Ne me cumã Pahpãm kïn nare catêjê te amji kam me hapac xà to amji tÿm nare. Hõhõ, cute me ampo pijakrut ton xà itajê na ri, Pahpãm mã nee cute me ampo to ihcupan xà nare, ne mempeaj to mempej.

Cu ha pahtÿj amji mã me cupê hamreare atajê cupa

Roman 2.11; Coroxo 3.25

² Ýhÿ me ikjêjê, pom ca me pajõ Pahhiti pê Jeju Crixto pê hirã pê impej ata to amji mã me ahimpej to me apa atajê, he me pahte mehcunea jirõa pê me pajõ Pahhiti cati na me pamã hahkre pej. Cwÿrjapê ca ha nee jÿmjê nõ to mehkwy jirõa pê impej nare, ne quêt mehcunea to amji kam me gapac to apipenti to me apa. ²⁻³ Quê ha jÿm jakràjti, kà impejti me õr te hÿhhi na hê xà ata, ate me acuprõn xà wÿr mõ, ca ha me hõmpu ne me hahkre pej pyrentu, ne me cumã garkwa to:

— Ajpên mõ, ne ita ri ca gÿr xà impejti ita kam jÿ — hane. Ne hanea ne jÿm pê hamreare ata pupu ne me cumã:

— Curia ca xa, nare, ca to jÿ, pjê kam ipar cahê na — hajÿr na, he mõrmõ ca ramã ate me jÿm to hajÿr, na wa me amã ihkôt harê. ⁴ Ampo na? He ca me caa, ajte ajpên to amji kam me gapac xà kèanre itajê ton to me apa. Ne amji to me apicokjêr to me apa. Ne ahna Pahpãm pê me akam ihkaj na.

Cu ha nee me cupê hamreare atajê jirô pê, me hakràjti atajê to impej nare

⁵ Me ikjêjê impejti kïnti itajê, me ikampa. Pahpãm te amji mã me cupê hamreare atajê capi, mehkwy jirõa pê cute amji mã me to ihhimpej catia to prãmte. Ne pê ramã Pahpãm cute amji mã mehkïnti atajê te ihhimpej xà mã mencjêj na, me to awjahkre. ⁶ Ne me ca nare! Ca ajte Pahpãm kïnte me cupê hamreare atajê to amehkèanre, ne ma ame curê, cute jÿ mã ame aton nare kam. Ne ca me hakràjti atajê to pit mã mempej. He me hakràjti itajêa ri ihtÿj hãn ne me amã mehhêj to me ipa, ne me gÿhkra jãpên xà jahpan xà na me hakràj cati to me ipa. Ne mehhêj xi to ampo cunea na me ato ihtÿj tu to me ipa. Ne ma me acukij xà wÿr me ato ipa, cute me akên mã me arën prãmte, ne hipêr mehhêj xia kam me apê me gõ pore incwa. Xà ajkï me cupê hamreare atajê mã me ato hajÿr to me ipa? Hãpà! He me hakràj catêjê ri ihtÿj me ato hajÿr to me ipa. ⁷ Ne

me hakràj itajêa ri Jeju na mehkwy me, me pajô Pahhiti pê Jeju japry to mehcahôc kêanre to me ipa.

⁸ Ne Pahpãm pê me pajô Pahhiti jô kàhhôc ihtyj me pamã ihhimpej xà ata to hahkre to hane he:

“Pom amãa amji kinti ita na,
quê ha amã me akwy cunea kinti ne” hane.

Ca ha ate me harkwa ita par xàa kôt me apa na ri, me amã ihkênre nare.

⁹ Nãmri ca ha ate pô rûm me hûmre itajê pupun xà kôt, me to impejti na, ca ha me ca ramã me akên mã me amji rên to me mô. Ate Pahpãm te amji kam hapac xà jirô pê me apym, cwyrjapê ri ramã me akên mã me arên to mô. ¹⁰ Ne por quê ha jûm amji pê Pahpãm te to ihhimpej xà nõ pyxit ne ihcaca ata, quê ha taa ramã ihkên mã hâr to mô. Quê ha Pahpãm jûm ata mã harkwa to:

— Ca ha ate ijarkwa nõ pyxit ne ihcaca na, ca ha ramã ihcunea caca.

¹¹ — Ampo na? Wa ite amã ijûjarên to: “Nee ahti na axy nare” hajyr, ne hanea ne amã: “Ca ha nee jûm curan nare” hajyr. Ca ha ate ahti na axy nare cakrô, ate jûm curan na, ca nee ate ipar nare, na ca ha ihcunea na akên mã axà — hane.

¹² Ne Pahpãm jarkwa ihtyj catyt kam pahte me papa na me pahtecajpa, na cu catyt kam me papa. Ne nee ame pahcakôc kên to me papa nare. Nãmri quê ha ihtyj me Pahpãm jû caxuw pahte amji kam me pajapac xà atajêa na me pahcukij to mô. ¹³ Ne me pahcukij ne me pahto ipicokjêr xàa kam, quê ha Pahpãm cute mehkwy capry nare atajê, hanea ne nee me capry nare. Ne por mehkwy capry, ne me to impejti atajê, quê ha Pahpãm ihtyj me capry, ne me to impejti ne.

Cu ha nee me pajarkwa cràre to me pahcakôc nare

Ruc 3.8-14; Me Hàpên Xà 26.19-20

¹⁴ Me ikjêjê, ca ha me anô te amji jarên to:

— Wa ityj Jeju to amji mã ihhimpej to ipa — hajyr, ne nee Jeju mã gápên to apa nare ita kam, xà quê ha ajki ihtyj Pahpãm jûm te hajyr ata kên pê hûtà? Hãpà! He Pahpãm mã ca nee ihkra pê Jeju ata to amji mã ahimpej nare. ¹⁵⁻¹⁶ Ne ihnô xwyjê, quê ihhêaj to me pahkjêjê nõ mã prãm, ne cumã ihkà na prãm, ne awyr cato, ca ha cumã ampo jôr nare ne cama cumã:

— Imã Pahpãm te amã ampo pejti jôr, ne ato impejti na, ato prãm. Ne imã jûm te amã akà me gô jôr, mã ate gápàn na, ato prãm — hajyr, ne nee ihtecajpar nare na, jû mã quê ha curi? Jû wyr quê ha apu amji mã hamã. ¹⁷ Hô, quê ha jûm te ihcapry na Jeju to amji mã ihhimpej to ipa na amji jarên, ne nee ihkôat amji kam hapac to ipa nare na, quê ha nee jûm ata apu amji mã hamãr nare.

¹⁸ Nãmri ca ha me anô te imã:

— Ca atyj Jeju to amji mã ahimpej, ne cumã gápên to apa, ne pa nare, wa cama Jeju to amji mã ihhimpej to ipa, ne nee cumã ijápên nare — hajyr na, wa ha amã amji jarê ne amã:

— Wa ityj Jeju to amji mã ihhimpej to ipa xà ita jikjê na, ityj hanea ne cumã ijápên to ipa. Ne ijápên xà itajêa ri ihtyj ikôt ipa na ijarê — hane. Ne ca, ca nee Jeju mã hàpên xà to gápên nare, mã ahna me apupun nare ita kam, jû mã quê ha me, ne ate Jeju to amji mã ahimpej na me gahkre pej? Jû wyr quê ha ita na ahna me gahkre pej!

¹⁹ Mõrmô ca hãn ne atyj amji mã Pahpãm jarên to:

— Wa ityj Pahpãm pyxit peaj ne ihtyar na ihkry na, amji mã to hane — hajyr na, quê ha gûjarên xà ata nee Pahpãm kôt apa na garên nare. Ampo na? He ihtyj hanea ne me pahcurê xwýn carô kên atajê me, cupê jarôti atajê amji mã Pahpãm kry na to hane, ne ihtyj hûpa me cumã ihkàhhy kry cakrô, nee me cupê Pahpãm kôt me ipa catêjê nare.

Pê Aprãw Pahpãm to amji mã ihhimpej, na pê ahna amji capa

²⁰ Ne ate me amji jahkre kêatre, na wa ha ityj me amã to hahkre. Nãmri ihcapry na pahte Jeju to amji mã me pahhimpej na me amji jarên, ne me pahte cumã hàpên xà ton nare ata na ihkaj na. Ne ihcapry na me pahte amji jarên xà ata kôt hamreare. ²¹ Na wa ha ampo itajê na me amã me panquêt xwyAprãw to icato, ne me amã to hahkre. Pê Aprãw Pahpãm to amji mã ihhimpej na, Pahpãm mã impejti. Ne mër jû mã pê ajte ne Pahpãm cuna mã impejti? He pê nee jû mãn nare. Ne ihtyj, Pahpãm jarkwa kôt, ajmãr ihkra pê Ixac cura, kên jakôt na. Pê Pahpãm hõmpu, ne ihtyj cute to amji mã ihhimpej na hahkre pej, na pê ahna amji capa.

²² Ne pom cute ajmãr ihkra curan, mã cute ahna hõmpun ita, ihtyj amji caxuw Pahpãm kam hapac pejti na harê, ne ihtyj hanea ne amji mã to ihhimpej na harê.

²³ Cwyrjapê ri Pahpãm jô kàhhôc kam Aprãw jarên to:

“Aprãw te Pahpãm kam hapac,
ne toa amji mã ihhimpej to ipa,
cwyrjapê ri Pahpãm cajpuaw,
mã cute ihtyj ahna amji caxàr,
ne cumã, ‘Apê ikwy nõ’ ” hajyr.

²⁴ Ne mër hõhõ, ita na me gûcapi to impeaj ne he. Nee mã cu Pahpãm to pahte amji kam me pajapac xà atajê pit, Pahpãm cuna mã me pampejti na me pajaxôr nare. Ne quêt cu hãn ne hanea ne Pahpãm mã me pajápên xà ton to me papa atajê ri, Pahpãm cuna mã me pampejti na me pajaxô.

²⁵ Ahnaa mã pê cahãj pijapit xyre pê Rapekwýj xwy ata he, ne Juta catêjê pijakrut pê Kricuxwati pupun catêjê atajê to ne me hûpate mehtêm na mehtecajpa, ne hûrkwa jimoc ri kyj pê me to amxu, ne me to wry, ne ma jû kam me cute me hahêr catêjê atajê pê mehkujate he. Mã Pahpãm te Rapekwýj jápên xà itajê na hõmpun, ne ihtyj cute to amji mã ihhimpej na hahkre pej, ne ahna amji caxàr.

²⁶ Ne pom Pahpãm to amji mã me pahhimpej xà jarên me, cumã pajápên nare ita pê ampo kôt hamreare ata pyrãac. Ne ihhêj rûm cupê ramã mehtyc mã

carõ hamreare pyrãc, ne nee ampo caxuw impej nare, ne ampo na hamreare.

Cu ha me pajarkwa cakõc xà kôpĩ

Epet 4.29

3 Ýhỹ me ikjêjê, ca ihhêj ne me gãhtõa ne Jeju na mehkwy kam, me cumã ampo to hahkre catêjê na me amji to prãm. Co he, nãmri pahte me ampo to hahkre catêjê atajê, cu ha pahtyj me pajarkwa to me pahkwý to me pahhimpej to me mõ. Cwýrjapê quê ha Pahpãm me pahkwý jirõa pê, caxwãm catia mã me pahcukij, ne ma me pahpupu. Ne me pahcukij ne me pahto ipicokjêr xà jõ amcro kam, quê ha Pahpãm cute mempejti ton jahpan xà na me cumã mempejti gõ, ne cute mehkên ton jahpan xà na quê ha me cumã mehkêanre gõ. Cwýrjapê, ca ha nee me gãhtõa ne me apê me cumã ampo to hahkre catêjê nare, nãmri ca ha me anõ pyxit te caxwãm catia mã, amji kam gapac to catyt kam apa na, ca ha atyj apê me cumã ampo to hahkre catê.

2 Mër ampo na mã wa ame amã ijũjarên xà ita to hane? Nee mã wa ampo na ame amã ijũjarên nare. He cu me pahcunea hãn ne ihcunea na pahkên xà ton to me papa. Ampo to cu hãn ne me pahkên xà catia ton to me papa? Me pajarkwa to! Nãmri quê ha jũm te harkwa to ihcakõc kên ton to ipa nare na, quê ha ampeaj kam ihcunea na impej. Ne quê ha ihtyj harkwa himpej xà to amji to ihhimpej to impejti to ipa.

3 Na ca ha me anõ cawrõti nõ catia jarkwa mã wakýre incire nõ jaxà, ne atyj jũ ri to atêm xà ata wýr to tẽ. Ca harkwa cakrõ na to tẽ, ne nee ate to atêm xà ata ri to atêm nare. Ampo na? Quê ha ihtyj jũ kam ato tẽ, ate to atêm xà ata kaj na. **4** Ahnaa mã hanea ne cõxwa kam pãr kreti he. Quê ha tee cõxwa kam kõc pahtyjti ihcajpêr to mõr cakrõ, quê ha hõ kam, pĩ po te ihcakrýn xà incire ata ihtyj to ihhimpej to mõ, por jũ ri cute to mõr catê te to mõr xà ata wýr.

5 Jĩkjê na mã me pajarkwa te hajýar. Ne incire cakrõ, ihtyj amji to hàprãr to catia to ipa. Ne mër jũ mã ca ha krytxwa jakrat kryjre ata to amji kam gapac to? He ihkryjre cakrõ, ihtyj põ kam cuhy catia to ne to pôr.

6 Jĩkjê na mã me pajarkwa te hajýar. Ne me pajarkwa pê ampo kên cunea xakat. Ne me pajãa kam ihcuhhê cakrõ, ihtyj me pajĩ cunea mã ihkên crãn to ipa. Ne me pajarkwa cakõc xà kêanre atajê hãn ne ampo kên jãhtõa ne to. Ne cupê ihhêj rũm me pahcurê xwýn jõ cuhy ata pyrãac, ne ampo jãhtõa ne ahna hapý ne to kên to ipa.

7-8 Ne cu hãn ne ampo pryre me, pryjara me, tep me, ihkênta kwý me, ampo kên kwý jãhtõa ne me to capõ nõ cakrõ, jũ wýr cu ha me pajarkwa ita to me capõnyre ne, quê ihcarĩcre ne. Ne me pajarkwa ita cakõc xà kêanre ita pê ihhêj rũm cagã xwa cacõ te me pahcuran xà, ne ihtyj me hàhtõa pê cute me amji kam hapac xà to kêanre to ipa. Ne jũ wýr quê jũm to ihhimpej quê kêt.

9 Ne me pajarkwa ita to cu me pajõ Pahhiti pê Pahpãm pê me pajõ Inxũ Cati mã me pahcakõc to mem-

pejti to me papa. Ne toa me Pahpãm te amji kôat mehĩ ton atajê xũn kêanre to me papa. **10** Ne me pajarkwa ata pĩn ri ihcakõc xà impejti inxõti atajê hapõj, ne hanea ne hàwxũn xà kêanre xyhti atajê hapõj. Ýhỹ me ikjêjê, me akam quê nee itajê nõ hajýr nare. **11** Xà quê ha ajkĩ cõ jatuj xà nõ pĩn ihtyj cõ inxõ me cõxwa ajcacwa ne ajpjê? Hãpà, jũ wýr quê apu amji mã hamã. **12** Ýhỹ me ikjêjê, xà quê ha ajkĩ ihtyj prĩn kam crowrà xõ nõ cato? Nare, quê ajkĩ ihtyj ahkrýt kam pypypre nõ cato? Quê! Jũ wýr quê apu amji mã hamã. Ne jũ wýr quê jũm amji mã hamã ne cõxwa xwati nõ kam cõ inxõ jaxà. Mër hõhõ, garkwa cakõc xà to ahimpej pêa to apa, quê nee ihcakõc xà pĩn hàwxũn xà kêanre atajê hapõj nare, ne quêt ihcakõc xà impejti to pit mã ihcakõc to ipa.

Pê Pahpãm me pamã me pahkrã kre gõ

13 Xà ajkĩ me akam hõtpê jũm jũpar krã kreti te amji jahkre pejti nõ ipa? Quê ihhêaj to jũm te ipa na, quê nee cute amji to cati prãmte apu amji to hàmnãn to ipa nare. Ne por quêt hàpên xà impejti, cuhtacti atajê, quê ha ihtyj hũpar krã kreti na harên to, to ipipê to ipa. **14** Ne ihhêj ne me akwý kwý ihtyj ajpên jũ na ame amji to prãm to me ipa, ne amjia kõt amji to cati to prãm, ne ihtyj jũm te cuna mã amji kam me hapac xà to kên ata to me amji kam hapac to me ipa cakrõ, mã ihtyj mempej krã kreti na me amji to ihhêj to me ipa. **15** Nee Pahpãm cute amji kam me hapac xà te hajýrjê na prãm nare. Ampo na? Pom cute amji kam me hapac xà itajê nee cõjkwa kam Pahpãm pĩn hapõj nare, ne pjê kam ame ipa atajê pĩn ri hapõj, ne hanea ne me pahpĩn hapõj. Ne me pahcurê xwýn carõ kên ata pĩn hapõj. **16** Ne por jũ ri ajpên jũ na ame amji to prãm atajê me, amjia kõt amji to me ipicamên prãm catêjê amehkrĩ atajê ri mehkêanre, ne nee me ajpên par nare, ne ampo kên ton to pit mã, me amji kam hapac to me ipa.

17 Quê ha jũm xũmre te cõjkwa kam Pahpãm pĩn krã kreti te amji jahkre pejti ita pyr na, quê ha hane he. Quê ha mam cati mã cute amji kam hapac xà cunea kam impejti ne, ne nee apu ampo kên kryjre kwý ton to ipa nare. Ne quê ha mehcunea caprĩ to ipa, ne ma ajpên tète me hiprõn to ipa, ne amji mã mehkwy cupahti to ipa, ne me ahna ihpahãmti to ipa. Ne cute me ajpên par xà kam, hãn ne nee mehkwy cakõc xà na, mempar prãm nõ nare, ne ihtyj me kampa, ne mehkõt hakop, ne me caprĩ ne mehtehcajpa. Quê ha ihhimpej xà ata krac ri me hàpên xà cunea impej pit. Quê ha mehcunea to ipipenti to ipa. Ne nee hũjarên kam apu amji to ipimxur nare, ne hirãa pê hãn ne hũjarên jicu xà mã to hahêr tu. **18** Ne por jũm xũmre pê ajpên kam me to impej catê ata pê ihtyj mehkwy cunea mã catyt kam me ipa na, me ton catê. Ne ihhêj rũm cupê ampo hy kre catê mã amji mã ampo hy ata kre, mã cumã in- tep, mã cuku ne mehkwy jãhtõa mã to harte ata pyrãac.

Cu ha nee ampo kôt me papijapu nare

Jowãw 16.24

4 Ýhÿ me ikjêjê, ca ihhêj ne hôtpe me ajpên cujtên to me apa. Ampo na? Nee mã ampo na nare. He amjia kôt ate amji mã me acaca xà na prãmti atajê, ihtÿj ramã me acaxwãm pê hanea ne me acujtê. Ne ramã ate me ampo kên ton xà nare na me amji jahkre pej cakrô, ca atÿj ajte me ampo kên ton to me prãm. ² Ne ca atÿj ampo pej itajê na me amji to prãam kam ame apa cakrô, ca ha nee ame amji mã hamãr ne amencwÿr nare. Ne hanea ne ca hãn ne atÿj me hàhcukrêaj kôt mehcuran prãm. Ne cormã me amã ampo kwÿ cunea na amji to prãam to amji to prãm cakrô, jũ wÿr ca ha me cumã acato ne amji mã me apy. Cwÿrjapê ca atÿj ame ajpên mã, ne ame ajpu. Ne ampo na ri me apê ampo pej atajê cunea jamreare? Nee mã ampo na nare, ca nee ahna me Pahpãm wÿr nare na ri. ³ Ne mër ampo na mã ca hãn ne ahna me Pahpãm wÿ, ne nee mencwÿr nare? He ca ahna me gahwÿr to kêanre, ne cama hãn ne ampo me acajpuaw atajê na pit mã amji mã me ahwÿ. Ne Pahpãm pê ahna ihkaj na.

⁴ Ne por me cumã Pahpãm kîn nare atajê, ca nee amehkôt me apa nare. Nãmri ca ha ate mehkôt ame apa na, ca ha ramã amji to apê Pahpãm curê xwÿn. Ca ha ate mehkôt hajÿr na, ca ha nee hipêr Pahpãm cahê na ame apa xà nare, ne ramã me hicu. Ne pom me amã ampo kînti kôt me apa xà itajê pê ihhêj rûm me hûmre me pyjê te apu amji mã hikran, ne ma ramã ahti na amji to amenxy to ame hikwa to mehcuhwÿr pyràc. ⁵ Ne pê Pahpãm jô kàhhôc kam ramã me pahto hÿjarên to:

“Me pahte hajÿr tũam,
na cu pahtÿj ajpên jũ na ame amji to prãm to ame pa-
pa” hane.

Ne nee ihcaprÿ na me pahto hÿjarên to hajÿr nare.

⁶ Ne Pahpãm te ita tète me pahhyr xà caxuw, ihtÿj cumã carôt tÿj. He quê ha ihtÿj pahte amji mã me ampo na prãmti ita jicu na, me pahtehcajpa. Ne pê ramã Pahpãm jô kàhhôc kam ihhêc ata me to hÿjarên to hane he:

“Nee Pahpãm mã cute amji to me cati prãm catêjê kîn nare,
ne ampeaj kam cama me kam incryc.
Ne por cute amji to me cati prãm nare atajê ri Pah-
pãm mã mehkîn,
ne cumã mehtehcajpar prãm” hane.

⁷ Cwÿrjapê ca ha me amã Pahpãm kîn catêjê atÿj me cumã amji gô, quê ha taa me ato ihhimpej. Ca ha me ca xwÿjê ma ame pahcurê xwÿn pê Xatanaj te amji kam hapac xà caca, ne nee Xatanaj to amji mã me ahimpej nare, ne ma amji tète ame curê, quê ha me akampa ne ma pra. ⁸ Nãmri ca ha ate Pahpãm wÿr me apipkjêr ne mehtëp to me amôr na, quê ha hanea ne

Pahpãm ihtÿj me awÿr apkjê ne me ana ahtëp. Ne ate me ampo kên ton atajê, ca ha me ton jicu. Ne por ate me ampo kên to amji kam me gapac atajê, ca ha me to amji kam me gapac jicu, ne ampo pejti, tetetti to ca ha me amji kampa. ⁹ Ne por ate ramã me ampo kên ton atajê, ca ha me to amji kampa, ne kam me amã amji kîn nare ne, ca ha tee hapu na ihcaca xà te atÿj me amrã. Ne nee hipêr ame apicxar nare, ne ca ha cama ame amrã. Ne me amã amji kînti atajê, quê ha me amã amji kîn nare na amji to, ne me amã amji kîn nare ne. ¹⁰ Ne Pahpãm kînte me pahkryjre na, ca amji to me amji japackre. Ne nee Pahpãm mã amji to me gãprãr nare, ne cama cute me ato cati xà na amji na me hamã, quê me ato ajcamê, ne me ato cati.

Cu ha nee me pahkwÿ na me pahcakôc kên nare

Ruc 6.37-38; Roman 2.1-3

¹¹ Me ikjêjê, ca ihhêj ne me akwÿ te amji kam hapac xà na me hõmpu, ne ahna me gahcukjêr to me apa, ne ate mehkên mã me irên prãmte, me ahna acakôc kêanre to me apa. Ne Pahpãm pê ate me akwÿa na acakôc to hajÿr na ihkaj na. Ampo na? Ca ha ate Jeju kam me akjêjê atajê na me acakôc kêanre to me apa na, ca ha ramã Pahpãm te amji kam hapac xàa na me acakôc kên to me apa. Ne Pahpãm te amji kam hapac xà na, nee me pahcakôc kên xà hamreare, ne cama pahte amji mã mempar, ne amji mã me hÿpahti to me papa xà. ¹² Ne jũm ata pyxit peaj mã hãn ne me pamã harkwa himpej xà jirê, ne pyxit peaj ne cupê me pahcukij ne me pahto ipicokjêr catê, ne cupê Pahpãm. Quê ha ihcunea na me pahcukij, cute me pajahkre pej prãmte. Ne taa mã quê ha pyxit peaj ne ihtÿj incaca xàa na me pahpytà. Ne hanea ne incaca xàa na ihtÿj ame pahto kêanre ne, ne me pahto acto. Ne me pahcurê xwÿn jô cuhy kam cute me parên xà ata kam, he jũ mã cu ha ajte me, ne me apê me akwÿa cukij catê? Jũ wÿr ca ha apu amji mã hamã ne me apê mehcuwjêr catê, ne mehcuwjêr ne me pahcurê xwÿn jô cuhy kam me arê.

Cu ha nee amjia kôt ampo na me amji prãr nare

Ruc 12.13-21

¹³ Ýhÿ me ikjêjê, he ramã ihhêj ne me akwÿ te amji mã me hàpên xà capô hiahpuro. Pahpãm to ate me amji kam me gapac nare kam, ate ahna me amji jahkre pej hiahpuro, ne ate ahna me amji jarên to me hajÿr he:

— Ýhÿ, apê na wa ha ma krÿ nõ wÿr tẽ, ne curia apu apê, ne amji mã ihpore catia ne cupy, ne kaam to ipixô to mô. Quê ha ina caku pyxit, wa ha hacpya ne amji jaxà ne ijakràaj to ijakràj. Hõhõ, ijàpên xà ita to wa ha hane — hajÿr. An! He wa ha cormã me amã cute hajÿr xà itajê to jahkre! ¹⁴ Xà ajkÿ me amã ajpên apê mô ita kam, ate amji kam me gapac xà jahkre pej? Hãpà! Pahpãm mã ri quêt ajpên me apÿpÿm pêa mã me ate amji kam me gapac xà itajê cunea jahkre pej. Ne cumã me pancaca xà ita pê ihhêj rûm ahcakÿm te irarà na apu hapôj ne ahcakÿmti, ne ahna amcro, mã apu hamre.

Ita na ri Pahpām mā me acaca xà te hajÿr, ne cumā hatujre. ¹⁵ Cwÿrjapê ca ha me gâpên xà to amji mā me ahimpej xà ata kam Pahpām to me amji japackrea ne, ne me ca me amji mā me garkwa to:

— Quê ha Pahpām mā ijâpên xà ita na ito prām na, wa ha itÿj itÿar na ijâpên xà ita to ijâpên to ipa — hane.

¹⁶ Hô, ca ha me amji kampa, ne me amji jarên to hane, quê ha ahna me amā ihkênre nare. Ne pom ca amji to me acati prām ita na, Pahpām pê ihkaj na me akam. Ampo na? Ca cama ame amji to me gâmnân to me apa. ¹⁷ Ne ramā me amā ampo pej pit ton jahkre pej cakrô, ca ajte nee me ton nare. Co he, nāmri Pahpām mā ate me ampo pej ton nare ita na cupê me akam ihkaj na. Cwÿrjapê ca ha me ton nare, ne atÿj me akên mā me axà.

Cu ha nee me hakràjti atajê jû na ame amji to prām nare

Ruc 12.13-21; 1 Timot 6.9-10

⁵ Ne me gô krÿ kam me hakràj catêjê kwÿ amehkrÿ atajê mā, nee Pahpām pynār prām nare, na ri nee me cupê Jeju na mehkwy nare cakrô, ca ajte atÿj hÿ na ame amji to prām. Co he, ame hajÿr nare! Nāmri wa ha itÿj me cumā icakôc to hane he:

— Pom me gakràjti atajê, me ikampa, ne me ikam gapac to impeaj ne. Nāmri ca ha atÿj me akên mā me axà, ne kam me amji pupun xà kêanre to me amji pupu, cwÿrjapê ca ha me acwÿr kam me atêm pyrentu. ² Nāmri me gakràj ita ramā me apê ipictor to mō, ne me akà impejti itajê ramā rôrôtre me apê ihkur to mō. ³ Ne me gô pore carôt ramā cupê hamre to mō. Ne wakÿre prâti pê ôr me wakÿre prà jakare to me gakràj atajê, ramā cama hikwa, mā carôt jamre to mō. Por ca ate awej xà caxuw amji mā gakràj itajê cunea to cuprôn, ne hakôt mā ihkrÿ ata, ramā hamre to mō. Ne nee me gakràjti itajê mā me atehcajpar prām nare, mā cama Pahpām mā me garên kêanre to me garê. Ne me gakràj ita pê ihhêj rÿm cuhy pyrâac, ne ihtÿj ampo cunea na hapÿ ne to capa. Jÿkjê na, quê ha ihtÿj gakràj ita ato hamre.

⁴ — Ne ampo na mā quê ha ato hane? Nee mā ampo na nare. He ate gô pur kam me hâpên catêjê atajê mā gâmjôr to impej nare kam, me cumā ahêj. Ne ate hanea ne me cupê me hô pore cahhur juwahi, ne to cuprôn atajê ihtÿj Pahpām mā carâr ne cumā me garê. Ne pom me gô pur kam me amā me gô cunea to cuprô atajê, ihtÿj me ana ihcakôc kêanre. Ne ihcakôc xà atajê ma Pahpām wÿr ramā hàpir. Mā Pahpām, mehcunea jirôa pê carôt tÿjti ata te kam hapac.

⁵ — Ne ita ri, pjê kam me amā ampo pejti atajê to ca ame gicot, ne me acajpuaw, na ca ame gakry. Co, nāmri me apê pryti pyrâc, ne ampeaj kam ramā me gicot, me acuran xà caxuw! ⁶ Ampo na? Nee mā ampo na nare. He ca ate jû mā cute ame aton nare, ne nee cute me apê amji pytâr nare atajê kên mā ame irên, ne amehcuran, cwÿrjapê quê ha Pahpām ame ato kêanre ne — hane.

Cu ha Pahpām mā mehcakôc kam Jeju cator xà jikaj

2 Petrô 3.1-13

⁷ Ýhÿ me ikjêjê, ca ha amji mā me aprÿa ne me pahwÿr me pajô Pahhiti cator xà ata na me hikaj. Nāmri taa mā quê ha cormā me pamā ajtea mā me pajakràj xà ata gô, quê ha quêt nee jÿ caxuw me papê hamre nare. Xà ca ajkÿ nee pur kam, cute me ampo hy kre catêjê atajê pupun nare? Quê ha pur kam hâpên jipêj, ne amji mā ihprÿa kam cormā ta me hâprâhti ata jikaj. ⁸ Ita cuxà ca ha me hane, ne me amā amji kÿan kam, amji mā me aprÿa ne cormā me gÿcanâr kam me hikaj. Ampo na? He ramā hacpÿ ne me pajô Pahhiti pê Jeju cator xà ata na hàntêp to mō.

⁹ Ýhÿ me ikjêjê, nee ca me akwÿa kwÿ mā, me gâhc-ahhôn to me apa nare. Nāmri ca ha ate me amji kwÿa kôt harên to me hajÿr na, quê ha Pahpām pê me pahcukij catê me akampa, ne hahpan xà na ame ato kêanre ne. Ne ramā cute me pahcukij xàa kam hàhhuc to mō. Quê ha cute mempejti ton jahpan xà na, me cumā mempejti gô, ne cute mehkên ton jahpan xà na, quê ha me cumā mehkêanre gô.

¹⁰ Ne ita to ca ha quêt me amji japackre. He pê Pahpām jarkwa to me cumā ihcakôc catêjê me amji pupun xà kêanre, ne ihtÿj amji mā mehprÿa ne ajco me hÿcanâr to me ipa. Atajê te amji kam me hapac xà ca ha me hÿnâ, ne me to amji japackre ne ihkôat me apa.

¹¹ Quê ha jÿm te amji pupun xà kêanre ata kam hÿcanâr, ne nee amji tète Pahpām jiprôn nare na, quê ha ihtÿj ampo kên itajê cunea jicu xàa kam ampeaj kam hakry to hanea, pom quê Jo xwÿ he. Pê amji pupun xà kêanre to ajco amji pupun to ipa, ne hÿcu xàa kam Pahpām te to hàhpan to kênre nare. Ampo na? Pahpām mā ampeaj kam me pahkÿn, na ri ihtÿj cumā me pahcaprÿ.

Cu ha nee ihcaprÿ na Pahpām japrÿ to me pahcakôc nare

¹² Ýhÿ me ikjêjê, he cormā ampo itajê to hahkre xà kwÿ jirôa pê impej ata cator xà. He ihhêj ne me pahkwÿa kwÿ hân ne mencaca xà na me amji ton xà atajê kam, hân ne ihkaj na côi kwâ kam Pahpām japrÿ to mehcakôc ne hân ne me:

— Ýhÿ, wa ha itÿj to, nāmri wa ha ite ton nare na, quê ha hapacta ne Pahpām incwÿrjapê ito kên — hane, nare, ca ha me anô amji jarên to:

— Quê, wa ha nee ton nare, nāmri wa ha ite ton na, quê ha hapacta ne Pahpām ita cwÿrjapê ito kên — hane. Ne ate me amji jarên xà ita na ihkaj na, Pahpām pê. Ampo na? Ca ihcaprÿ na haprÿ to ame acakôc, ita na cupê ihkaj na. Na ca ha quêt ahpÿanre na catyt kam me amji jarên to hane he:

— Ýhÿ, wa ha to — hane, ne atÿj ate ahna me amji ton xà ata na me to. Nare, ca ha me amji jarên to:

— Quê, wa ha nee ton nare — hane, ne atÿj ate ahna me amji ton xà ata na nee me ton nare. Ca ha ate me amji jarên to hajÿr na, quê ha nee Pahpām me acurê mā me amên nare.

Cu ha ampo cunea na Pahpām to amji japackre

¹³ Quê ha me anō te amji pupun xà kêanre kam ipa na, quê ha ihtyj Pahpām mā ahna amji cajrēn to prām. Ne quê ha jūm te hakryti na, quê ha taa cumā amji kīan kam Pahpām mā hakryti jō increr to increr to prām.

¹⁴ Ne quê ha jūm te hà na, quê ha taa me pahkwỳ to mehhimpej catêjê kwỳ na amji mā ahwỳ, quê ha me hōmpu, ne me kam ampo cacô te me caprār xà ata kwỳ jaxwỳ, ne me to impê, Jeju jarkwa himpej xàa kôt, ne me cumā ihcajrēn. ¹⁵ Ca ha me to hanea ne Pahpām caca xàa kôt me to ne cumā mehcajrēn, quê ha Pahpām me akampa ne jūm ata caprā. Ne cute ihkên ton xà ata to cumā impej, ne to tojnō, quê ha impej.

¹⁶ Cwyrjapê cu ha pahtyj pahte me pahkên ton xà atajê ajpēn mā me harē, ne Pahpām mā me ajpēn cajrēn, mār quê pahte me ajpēn cajrēn xà ata kôt, ihtyj me pahcaprā. Ne quê ha me pahnō te catyt kam ipa, ne Pahpām mā ihcakôc xwỳjrea na amji kam hapac to

impejti, ne cormā cumā ihcakôc, quê ha ihtyj Pahpām kampa, ne cumā ahna to.

¹⁷ Ahnaa mā pê Erij xwỳ he. Ne cupê me pahkwỳa xūmre nō, ne cupê Pahpām jarkwa to me cumā ihcakôc catê. Ne Pahpām mā ihcakôc xà caxuw amji kam hapac to impejti, ne cumā ta wrỳc nare na to ihcakôc, cute mehkên ton atajê jahpan xà na, pê kampa, ne ta nō to iwryc nare to caku to incrê ne ihkôt to hīkjê.

¹⁸ Jirô pê mā pê hipêr cumā ihcakôc, pê kampa ne ta to wrỳ, pê hacpỹa mā pjê cunea kam ampo xô cunea huprāj cato. Hōhō, ca ha me hane.

¹⁹ Me ikjêjê, quê ha me pahnō te Pahpām jō pry hyr ne cupê gūjawry na, ca ha me anō hacpỹa mā Pahpām jō pry pynār xà caxuw to amji jaxà, ne pry kam amē.

²⁰ Ampo na? Quê ha jūm te, por cute ihkên ton catê nō ata to hō pry kêanre ata pê amji jaxàr na, quê ha jūm kên ata te ihkên mā hàr, ne ihtyc xà ata japy to amji jaxà, ne cute ihkên ton ata jicu na, quê ha Pahpām ihkên ata to tojnō, ne to hapac kêt. Ýhỹ, ite me amā ihhōc xà ita pit. Hamre.

1 PETRÔ

Ÿhÿ, pê Petrô pê Jeju jarkwa na memprar catêjê nõ. Ne pê mam cupê tep pro catê. Pê Jeju cupê ihkôt ipa catê na ahna ahwÿ. Ne cõjkwa wÿr Jeju jàpir jirô pê mã ri, cupê Krîpinkrên kam Jeju na mehkwy mehkřĩ atajê to ih-himpej catêjê nõ.

Ne pom cu me hõ kàhhõc pijakrut cahyt ita, pjê cunea kam Jeju na mehkwy te me amji pupun to kêanre atajê mã pê ihhõc ne kujate. Na pê hõ kàhhõc ita japřÿ pê (1 Petrô). Ne pahte me amji pupun xà kêanre ita te me pamã pahte amji kam me pajapac xà to impej, ne to me pamã hahkre.

Pê Petrô me cumã amji jarẽ

Jowãw 1.40-42; Me Hãpên Xà 1.15; 10.1-48

1 Hàpà me ikwÿ pê Pahpãm na mehkwy! Ipê Petrô, pê Jeju Crixto jarkwa na iprar catê. Por jũm te me gõ pjê intête ame acràn, ca jũ ri ame akrĩ atajê mã, wa ite apu ihkàhhõc itajê ton. Ne wa ha ma Ponto jõ pjê me, Carati jõ pjê me, Cawrõpejti jõ pjê me, Axij jõ pjê me, Pitin jõ pjê wÿr, me awÿr apu ihkujuhêc pa.

Pê Pahpãm me pahcapi

Ruc 12.32-34; Roman 8.18-25

2 Pê Pahpãm pê me pajõ Inxũ Cati ramã cute amji mã me pahcapi xà na amji kampa. Na pê amji mã me pahcapi, ne me pamã Carõ Pejti gõ, mãr cu me papê mehkwy impej pit, ne catyt kam, Pahpãm kôt me papa. Ne mër ampo na mã cute me pahto hajÿr? Nee mã ampo na nare, mãr cu xwÿ mã ampeaj kam, amji mã me ihkra pê Jeju Crixto kam me pajapac pejti ne. Ne me pajaxà kam ihtyc xà ata pê ri ihhêj rũm cute caprõ to me pahkên pê me pahcuhhõn, ne me pahto impej. Ne me pahto impej xà caxuw ri, cute amji mã me pahcapi. Ne wa ijõtpê Pahpãm mã me acajrên to hane he:

— Ÿhÿ, Inxũ Cati, ca ha me pahkwÿ atajê mã, ate amji kam gapac xàa na, me to impejti to apa. Ne me caxwãm pê me cumã acarĩcti gõ, mãr ca, cute nee me amji mã ampo cupa nare ata to, me cumã apicamên to mõ, mãr quê nee ame hũpa nare — hane.

Pê Pahpãm ramã me pamã ampo pej jàhtõa ne to ahcuprõ

3-4 Cu ha Pahpãm pê me pajõ Pahhiti pê Jeju Crixto Pãm mã, hũrên me pajakryti na me amji jarẽ. Ne ampeaj kam ri cute me papê mehkwy to impeaj to impejti xà ita te hajÿr he. Cute me pahcapřĩ to catia, na ri cute me pamã pahte amji kam me pajapac xà tuwti pejti jõr, na ri me papê mehkra. Ne hanea ne cute hacpÿa mã ihcãmter pê Jeju Crixto to ihtĩr xà ata kôt ri, cute me pamã pahte amji kam me pajapac xà tuw jõr, mãr cu cahê na me pahkrĩ rohnÿtti mã. Ne ramã Pahpãm te cõjkwa kam, me pamã ampo pejti te me pahto impejti

xà ata jàhtõa ne nõr. Ne ihtÿj ma me pamã hamã, mãr quê nee jũ caxuw me papê carõt hamre, ne ihkên ne ihcacu, ne ipictor nare. Ne cu ha pahtÿj cute me pahto hajÿr xà ata to, amji mã me to hajÿr kam me hikaj.

5 Ne pahte me Jeju to amji mã pahhimpej xà ita kôt ri, cute me pamã ampo pejti itajê cunea jõr itajê pê, me pahtekjêa ri. Cwÿrjapê quê ha Pahpãm me pajamãr ita na, quê ha ahnaa jũ caxuw, pjê jamre xà ata kam, amji carõat kôt amji mã me pajuwahi.

Pahpãm te me pahcajpër prãmte ame pahto kên

6 Ampo pej itajê pyrên, ca ha me gakrya ne. Ne amcro itajêa kam, ca cormã ate me amji pupun xà kêanre to me amji pupun to me apa na, hõtpê me ana amcro wênre, na ri me amã amji kĩn nare. **7** Ne mër ampo na mã ampo kên itajê ame ato hane? Nee mã ampo na nare. Cute me acapi, ne ahna me acajpër prãmte ri ame ato hane. Na wa ha ita caxuw me amã kên prà tepti japřÿ te ôr ata te amji kam hapac xà kôt harẽ. He hũhhi na hê xà ton xà caxuw, quê ha xa cute ton catê ata, cute wakÿre prà tepti pê ôr ata capi prãmte, cuhy kam cuxi. Quê ha ajgã, ne ihhorhot, quê ha hõmpu, xà ajkĩ ampeaj kam ri cupê ôar to ôr. Nãmri quê ha cupê wakÿre prà tepti nare na, quê ha ihcunea capa. Nãmri quê ha cupê wakÿre prà teptia na, quê ha ihhorhot, ne kam ampo kên itajê pit capa, ne ihcahur ahtwÿ ata pê, quê ha wakÿre prà tepti pê ôar to ôr, ne ampeaj kam impej, ne ahna hĩ ahwÿ. Ita jĩkjê na mã, me apê wakÿre prà tepti ita pyrãac, ne ate me amji pupun xà kêanre itajê pê ihhêj rũm, cute cuhy kam me wakÿre prà tepti nõr pyrãac, cute me apupun, ne me gahkre pej xà na. Ne quê ihhêaj to cormã me ate amji kam me gapac xà kam ampo kêanre na, quê ha me ate amji pupun xà itajêa kôt, me apê me akên itajê to põj partu ne. Ne wakÿre prà tepti itajê ampeaj kam ahna hĩ jàhwÿr cakrõ, quê ha ihtÿj hamre to mõ, ne ihtÿj jũ caxuw hamre. Ne Jeju to quêt ate amji mã me ahimpej xà ata ri, kên prà ata jirõa pê impej, ne nee jũ caxuw me apê hamre xà nare. Na quê ha amcro nõ na, Pahpãm Jeju Crixto to ajpẽ, quê ha mehcunea ampeaj kam cupê ampo cunea jõ Pahhiti na hahkre pej. Ne amcro ata kam, quê ha Pahpãm me amã:

— Ca ate me amji pupun xà to kêanre itajê kôt ri, ita caxuw ampeaj kam me apej — hajÿr xà ata kôt, quê ha mehcunea ihtÿj amji mã me acupa, ne me apejti jähcu-jrohti na me apupu.

Pahte me amji pupun xà kêanre xà ita kam, cu ha pahtÿj ame pajakry

⁸ Cormã nee ate me Jeju pupun nare cakrô, ca ha atÿj me amã ihkinti kam me apa. Ne nee cormã ita kam, ate me hõmpun nare cakrô, ca ha atÿj amji mã me to ahimpej to me apa. Ne hÿrên ca ha me amã amji kïan to amji kïn catia to cati, ne nee me amã me gakryti ita kôt harên xà hamreare, ne cupê cõjkwa kam amehkrï atajê jakryti pyrãac. ⁹ Ne mër ampo na mã me amã amji kïn? He nee mã ampo na me amã amji kïn nare! He Jeju ihtÿj ampo kên catia ata pê me acaxwÿn pytâr to ipa, ne hÿrên ca ame gakry. Ca Jeju to amji mã me ahimpej to me apa xà ata kôt ri, cute me apytâr, na ca ha atÿj jÿ caxuw Pahpãm cahê na me apa rohnÿtti mã.

Pê mam harkwa to mehçakôc catêjê nee ihcunea na me hahkre pej nare

¹⁰⁻¹¹ Pê ramã rÿ pëa mã Pahpãm jarkwa to mehçakôc catêjê me cumã amjia kôt, me pahkên pê me pahcunea pytâr catê ata kujahêc na, me cumã harê. Pê Crixto Carô Pejti me caxwãm pê me cumã acjêj, ne ajco me cumã cator xà ata jarê. Ne hanea ne me cumã, por quê ha Crixto cute amji pupun xà kêanre to amji pupun xà ata jakàn pê, quê ha Hÿm hacpÿa mã to ihtÿr, ne hipêr to cati, ne to imej na, me caxwãm pê me cumã harê. Mã cute me hahkre pej prãmte, amji mã mehprïa, ne ihtÿj me to hahkre to me mō. Ne ihtÿj me ahna hàhcukjêr to me mō, jÿ caxuw mã quê ha cato, ne jÿ mã quê ha cator xà ita. ¹² Ne pê Pahpãm cute me cumã harkwa to mehçakôc catêjê mã, ampo itajê to hahkre xà ata kam, hanea ne cute me to pit mã, imejti xà caxuw, me cumã harên nare. Ne pom ca ita kam ame kampa atajê to, cute imejti xà caxuw ria me cumã harê. Ne cõjkwa pïn, Pahpãm Carô Pejti carôat kôt Jeju pê me pahpytâr catê na, me hÿjarên pejti jarên to membrar catêjê te, ramã ampo itajê cunea to me amã hÿjarên. He cõjkwa kam Pahpãm mã membrar catêjê te me hajÿar, ne tee ame hahkre pej to prãm.

Pê ajteare mã Pahpãm, ne imej, na cu ha cuxà me pampej pit

2 Petrô 3.10-13; 1 Jowãw 3.1-6

¹³ Cwÿrjapê ca ha me akrã kam, ate Pahpãm jarkwa kam me gapac xà caxuw me amji to gähcuprõn hiah-puro, ne me guphêa rÿm ate amji kam me gapac xà to amji kam gapac to me apa. Ne Pahpãm te Jeju Crixto to ipipê xà me, cute me ato imejti xà ita na, ca ha atÿj me hikaj to me acrà rohnÿtti mã. ¹⁴ Ca ha atÿj Pahpãm kam me gapac to me apa to hane, pom quê me ahkrare me hÿmxwÿ kampa he. Ne nee ca mam ate

me amji jahkre kêt kam, ate amji kam me gapac xà kêanre to, ate amji kam gapac to me apa xà ata to, hacpÿ mã me amji kam gapac, ne ihkôt me apa nare. ¹⁵ Mã Pahpãm pejti pê catyt kam ipa catê ata te me ato ihkra xà na, me ana hàhwÿr. Cwÿrjapê ca ha Pahpãm cuxà me apê ampo cunea kam, catyt kam me apa catêjê, ne nee ampo kên crire nõ to, me amji kam gapac nare. ¹⁶ Ampo na? He pê ramã Mojxe xwÿ Pahpãm jarkwa na, hõ kàhhôc kam mehkwy na ihhôt to hane he:

“He ipê me amã catyt kam ipa catê, ne wa ajteare mã, ne ipejti. Cwÿrjapê ca ha hanea ne, icuxà me apê ajteare mã, ne catyt kam me apa, ne me apejti ne” hane.

¹⁷ Ca ha me Pahpãm mã acakôc, ne mehçukij to: — Me ijō Inxū Cati — hane. Ne cormã cõjkwa kaj na ame apa xà ata kam, ca ha atÿj amji mã me Apãm ita cupahti ne. Ampo na? He quê ha ihtÿj jÿ caxuw me pahcunea cukij, ne me pahte me ampo cunea to me pajàpên xà atajê jahpan xà na, me pamã amgō. Ne catyt kam me pajàpên xà kôt me pamã amgō. Ne pahte me pajàpên xà imejti ton catêjê, cu ha imejti to me amcwa. Ne pahte me pajàpên xà kêanre to me pajàpên catêjê, cu ha ihkêanre to me amcwa.

Jeju te caprô to me pahna hãmjör

¹⁸ Pê mam me panquêtjê te amji kam me hapac xà kôt hamreare atajê kôt pit mã ajco ame papa. Ata jahpan xà na ri ihhêj ne Jeju jãmjör. Ne cute amji kam me pajapac xà kêanre ata pê me pahto cator. He xà ajkï hãmjör xà ita pê ihpore, nare, cupê wakÿre prà tepti pê ôr na hÿ jähwÿrti ata? Nare cupê wakÿre prà jakati na hÿ jähwÿrti, mã hanea ne ramã cama hamre to mō ata pyrãac? ¹⁹ Hãpà, nee cupê ampo itajê nõ nare. Cute me pahna ampo cunea jirôa pê caprô na hÿ jähwÿrti ata jaxwÿr, ne toa ri cute ihhêj ne me pajÿhkâr. Pê mam me panquêtjê amji jaxà kam me carà cahàcre hôhti kra capënti atajê to me amji kritxwÿ, ne mehken atajê jahpan xà na mehcura. Ata pyrãc pej na mã Jeju Crixto te amji kam hapac xà capënti, ne cupê carà cahàcre hôhti kra nõ capënti ata pyrãac, ne cute me pahna caprô na hÿ jähwÿrti ata jaxwÿr, ne cute caprô jaxwÿr xà ata pê ri me pahkritxwÿ pyrãac. ²⁰ Pê Pahpãm cute pjê ton xwÿjrea na, ramã me pahkritxwÿ na Jeju capi ne hãm. Ne curmã ri amcro itajê nõ kam, cute me amã ihkra te ihcunea na me ato imej partu xà caxuw ri, me amã to ipipê. ²¹ Pê Pahpãm hacpÿa mã to ihtÿr, ne ma cõjkwa wÿr to api, ne to cati, ne ampo cunea jipy hãm, ne to imej. Ne Jejua kôt ri, ate amji mã me Pahpãm to me hajÿr xà ata to, kypê amji mã me ahimpej to me apa nare. Na ca ha atÿj jÿ caxuw cute me ato imejti xà ita na, me hikaj.

Pê Pahpâm jarkwa pahte amji kam me pajapac xà cuh-hõ

Ruc 8.11-15; 2 Timot 3.14-17; 1 Jowãw 3.14-17

22 Ne ca ramã ita caxuw Pahpâm jarkwa pejti, hêj xi nare kam me gapac pejti to me apa. Ne ramã ihkôt hanea ne ate amji kam me gapac xà cunea to ihtetetti ne me to impej. Ne ca ramã Jeju kôt ate me ajpên to me akjêjê atajê me, ca ramã ame ajpên kînti to me apa. Cwÿrjapê, ca ha me amã ajpên kînti ita na, me amã ajpên kîn prãam kam ame ajpên kîn. 23 Ne por pê cu me pahcunea me panxyrxwÿ pîn ame pajapôj atajê, quê ha ihtÿj ame ty, na cu ha hanea ne pahtÿj ame ty. Ne Pahpâm nare. Quê ha Pahpâm harkwa tîar rohnÿtti mã ata kôt, jûm mã cute amji kam hapac xà tuw jôr na, quê ha cupê hacpÿa mã ihpÿm ata pyrãac, ne nee jû caxuw caxwÿn ihtyc nare. Quê ha cupê Pahpâm tîr rohnÿtti mã ata kra, ne nee cupê me panxyrxwÿ tyc atajê pyrãc, ne ihtyc nare. 24 Ne pê ramã Ixaj xwÿ Pahpâm jarkwa na, hõ kàhhôc kam, me ahna ihhôc to hane he:

“He pjê kam ame pahcunea ame papa itajê pê ihhêj rûm ahtu pyrãac,
ne pahte amji kam me pajapac xà itajê pê pîrã pyrãac.
Ne quê ha jû caxuw ihtÿj ahtu ata incrà,
quê ha hanea ne pîrã ata incrà, ne ihpÿm.
Ata jîkjê na mã me pahcunea te me hajÿr pit,
na cu ha pahtÿj ame ty ne me pajamre,
quê ha pahte amji kam me pajapac xà cunea hamre tu ne.

25 Ne me pajô Pahhiti jarkwa te nee hajÿr nare,
ne quêt hikwa rohnÿtti mã,
ne nee jû caxuw ihkên,
ne ihkôt hamre xà nare” hane.

Ne harkwa hikwa rohnÿtti mã ata to pê Jeju pê me pahpytâr catê jarkwa na memprar catêjê me amã harê.

Cu ha Pahpâm te amji kam hapac xà na me ahcukij

Epet 2.19-22

2 Cwÿrjapê, cu ha nee hipêr Pahpâm jarkwa pejti ata jirô pê ame pahpÿpÿm, ne ame ampo kên ton to me papa nare. Ne cu ha nee me pahhêj xi jarên nare. Ne cu ha aracri me cupê to me papimxur pej pêa mã, hipêr me ampo kên ton nare. Ne cu ha nee me hû na ame amji to prãm nare, ne nee ame hûn to me papa nare. 2 Ne curmã me ahkrare kwÿ pÿpÿm atajê mã ihtÿj menxyrxwÿ kà xen, mã me cacô to pijahô, ne mehkà cacô ata to ihtÿj me ipicamên to me mô. Ita jîkjê na mã, me ate me hajÿar. Na ca Pahpâm mã ihhêj ne curmã ame apÿpÿm, ne cormã kyre pê amji mã me to ahimpej to me apa. Ne Pahpâm jarkwa ata pê ihhêj rûm mehkà cacô pyrãcti, na quê ha me amã hàan to hàn. Ne harkwa kôt me apa xà ata pê ihhêj rûm mehkà cacô to ate ame pijahôr xà, na quê ha ihtÿj me ato ipi-camên to mô. Na ca ha atÿj jû caxuw ampo cunea na

Jeju kôt me apa. 3 Pê Tawi xwÿ ramã Pahpâm jarkwa kôt, hõ kàhhôc kam, ate me hajÿrjê na ihhôc to hane he:

“Ate ramã me pajô Pahhiti te me ato impejti xà ita ca-jpêr,
ne me hahkre pej” hane.

Jeju me, me papê mehkwy pê Pahpâm jürkwa pyrãac

4 Ne ikre pyxwÿr catêjê pej, hãn ne ikre caxuw, me hicjêcti pej pit capi, ne hanea ne me ihhê kwÿ cunea impej pit capi. Nare, quê ha me cumã kên to ikre xãm prãm na, quê ha me cumã kên cuhtac nõ impejti xi, hõxwahhi kam, ne ikre cahhur caxuw quê ha hanea ne kên pej pit capi ne to cuprô. Jîkjê na mã Pahpâm pê cute me ikre pyxwÿr catêjê atajê pyrãac, ne mehkwy caxuw cute me acapi, ne Jeju na me ato cuprôn. Ita na mã me cupê ikre pyxwÿr catêjê te amji jahkre kêatre atajê, ma apu amji pê pî jicjêc pejti ata caca, ne cute me mên. Jîkjê na mã me cupê Ixaher catêjê jô pahhi kwÿ, ma ame amji pê Jeju caca. Mã quêt Pahpâm te cupê mehkwy jô Pahhiti pê ihcunea na hàmkrà jãmtâr cati ata capi.

5 Ne hanea ne ikre pyxwÿr catêjê pej te amji mã pî pej me, kên pej pit capi, ata jîkjê na mã Pahpâm te, cute me ato amji kwÿ xà caxuw me acapi. Cwÿrjapê ca ha cama amji na me hamã, quê ha me ato amji kwÿ peaj, ne mâr quê me akôt me hàhtôa ne me Pahpâm jahkre pej. Na ca ha me apê, por mam Pahpâm te amji kam hapac xà jürkwa na kên kwÿ ata pyrãac. Ne me apê, por mam me cupê Pahpâm mã mehcajrên catêjê atajê pyrãac, ne cute ihcajpuaw prãmte atÿj Pahpâm mã ihcunea na catyt kam me apa, ne cumã me apê. Mâr ca Jeju Crixto kôt, Pahpâm mã me ampo pej pit ton to me apa, quê ha ihtÿj Pahpâm, ate me cumã ampo pej pit ton xà atajê na, amji capa. 6 Ne quê ha ikre pyxwÿr catêjê itajê kên to pit mã me ikre nõ xãm, ne cute me cumã pî jicjêc nõ xãm xà kaj na, hõxwahhi kam, me cumã kên nõ tÿjti cuhtacti ata nõ xi. Ita na pê Ixaj xwÿ ata, ramã hõ kàhhôc kam, Pahpâm jarkwa na, me ahna ihhôc to hane he:

“Wa ite amji mã kên nõ tÿjti cuhtacti na hî jãhwÿrti ita capi,
ne wa ha Xijãw jô kêncahê na,
Krîpinkrên kam me ikwÿ mehkkrî atajê kam,
me hipôc ri cuxi.
Ne por kên ata quê ha cupê mam ikre caxuw kên ata,
ne ampeaj kam ihkwÿ jirôa pê impej ne ihcuhtac.
Ne quê ha mehkwy te amji mã me to ihhimpej na,
quê ha ihtÿj mempej mã mehpÿm,
ne ampeaj kam hÿrên me hakry,
ne nee jû caxuw hû na amehpahàm nare” hane.

7 Ca ate Jeju to amji mã me ahimpej atajê mã ri, cupê mam kên pejti, cuhtacti na hî jãhwÿrti ata pyrãac. Ne nee Jeju to amji mã mehhimpej nare atajê mã ri, cupê kên kôt hamreare ata pyrãac. Ne pê ramã jûm ita Pah-

pãm jarkwa na, hõ kàhhôc kam ahna ihhôc to hane he:

“Pom ikre to me hàpên catêjê,
ma ame ikre mã hãm xà caxuw kên pejti caca ita te
ihkwý jirôa pê amji to cati,
ne ihcuhtacti ne ihtýj” hane.

⁸ Pê Ixaj xwý Pahpãm jarkwa na, hõ kàhhôc kam, Jeju na ihhôc to hane he:

“Quê ha pry kam cupê kënti nõ pyrâac ne jý,
ne pry kôt me pra atajê jàhtôa ne mehtôtôc,
quê ha me ajhu” hane.

Hõhõ, cute me to hajýr xà ita kam, quê ha me hàhtôa mã Jeju kîn nare, quê ha ma amehcaca. Ne cupê me hýtàr catê na me harên xà ata to, quê ha nee me amji mã hajýr nare, na quê ha ma ame harên par caca. Ne por quê ha ma ame harên par caca atajê te ramã amji kên mã me amji mên. Ne pê ramã Pahpãm cute me to amji kam me hapac xà ita na, me to amji kampa.

⁹ Ne nee pahte me hajýr nare. He pê Pahpãm amji mã me pahcapi, me papê me pajô Pahhiti pê Pahpãm mã pahte mehkwy cajrên catêjê na. Ne me papê mehkwy pê hõ tekjêa ne me pampejti. Mã Pahpãm te ihhêj ne awcapàtkôti kam ampo kên ata pê, hàhcujrohti ata wýr me pahna hàhwýr, mãr cu pahtýj me ampo pejti pupu, ne me to. Ne me pahte mehcunea mã Pahpãm te ampo pejti catia ton atajê jarên xà caxuw ri, cute me pahna hàhwýr. ¹⁰ He pê mam, nee me apê Pahpãm na mehkwy pê me hõ tekjê nare, ne ita caxuw ri me apê hõ tekjêa. Ne mam nee me amã Pahpãm jàhcaprí ita na hahkre pej nare, ne ita caxuw ri ihtýj me acaprí.

Cu ha ampo pej pit ton to me papa

Roman 13.1-7; Tito 3.1

¹¹ Ýhý, imã me akínti atajê, por me acahkrit, ca me gõ pjê kaj na, ampýa mã ame hõ pjê kam ame akrí atajê. He me pahcunea te me hajýr pit. Ampo na? Còjkwa kam ri quêt me pahcunea krí xà. Cwýrjapê wa Jeju kam me pahte ajpên to me pahkjêjê itajê, wa ha me awý, ca nee pjê ita kam ame pahkrí rohnýtti mã na, ame to amji kam me gapac nare. Cwýrjapê wa ha me ana ijàhwýr to hane he:

— Ca ha nee ate amji kam me gapac xà tùm kên atajê kôt ame apa nare — hane. Ampo na? Ca ha atýj me pají te ampo kêanre ton na prãmti xà ata ton to ame apa. He ihtýj pahte me amji kam me pajapac xà tùm kên ita, ihtýj me pahcaxwýn me, me ajpên kujtê. ¹² Na ca ha mehcakrit pê Jeju to amji mã me hajýr nare atajê cahê na ame apa xà ata kam, ca ha catyt kam ame apa. Ampo na? Quê ha ate ampo pej pit ton to me apa na me apupun cakrô, ihtýj me akôt harên xà kêanre to ame akôt harê, ne amji caxwãm pê ame ato ihhêj na, me amji jahkre pej. Ne quê ha jũ caxuw me Pahpãm te amji jaxàr xà ata jô amcro kam ahtwý, quê ha cato, quê ha hanea ne, por cute me akôt harên xà kêanre

atajê, ihtýj amji kên na me amji jahkre pej, ne me Pahpãm pejti na cumã me harê.

Cu ha pjê jô pahhi catêjê kampa

¹³ Ca ha nee me pajô Pahhiti mã ihpahàm cator nare. Pê ihtýj amji mã Hùm cupa to ipa, na ca ha atýj amji mã me cupê pahhi catêjê cupa. Ne ca ha Roman jô krí kam, amji mã me krí cunea jô pahhiti pê Xexa ata cupa, por cupê ita ri pjê kam pahhi catia ata. ¹⁴ Ne ca ha hanea ne por harkwa kôt, krí cunea kôt me cupê pahhi atajê, ca ha amji mã me hũpa. Ampo na? He cutea ri krí cunea kôt, cute ame ampo kêanre ton atajê jahpan xà na, ame to kên xà caxuw me cumã harkwa. Ne hanea ne cutea ri, cute catyt kam ame ampo pejti ton catêjê na mehcakôc to impejti na harkwa.

¹⁵ Ne mër ampo na mã ca ha catyt kam ame apa to hane? He Pahpãm mã, cute me amji jahkre kêatre catêjê te ihtýj ame ana mehcakôc kêanre to me ipa ata tète, cumã mehcaphêrhyr prãm. Na ca ha catyt kam me apa. ¹⁶ Pahpãm te ramã ate amji kam me gapac xà kên itajê cunea pê me ato cator, na ca ha atýj catyt kam ame apa, ne ame ampo pej pit ton to me apa. Ne nee ca ha me anõ amji mã:

— Jeju te, ite nee ampo kên ton nare xà caxuw imã carôt jôr. Cwýrjapê wa nee hipêr ampo kên ton to ipa to prãm nare — hajýr cakrô, mãnea mã ampo kên ton kam to acrà nare. Cwýrjapê ca ha nee hipêr ampo kên atajê to ame amji mã me ahimpej, quê me ato ihhimpej nare, ne Pahpãm to, ca ha quêt amji mã me ahimpej. Mãr quê cupêa me gõ Pahhiti. ¹⁷ Ca ha amji mã mehcunea cupa to me apa, ne hanea ne amji mã me Xexa pê pjê jô pahhi ata cupa. Ne quê ha amã Jeju kam, ate me ajpên to me akjêjê atajê kîn. Ne me hirôa pê amji mã me Pahpãm cupahti to me apa.

Cu ha amji mã me pahcaprí, ne pahtýj ampo kên cunea mã awcanã

Epet 6.5-8; Coroxo 3.22-25; 1 Timot 6.1-2; Tito 2.9-10

¹⁸ Ne me amã me gõ pahhi, ca cama me cumã me apê atajê, ca ha atýj me kampa, ne amji mã me hũpa to me apa. Ne nee ca amji mã me gõ pahhi te me ato impejti, ne me gamãr to me ipa atajê pit cupa nare, ne hanea ne cute ame ato amji kam hapac xà to kêanre atajê, ca ha atýj hanea ne me kampa, ne amji mã me hũpa. ¹⁹ Ca ha me gõ pahhi to impejti cakrô, quê ampo na ame ato kêanre, ca ha nee amji jahpan xà na me acakôc nare. Ca ha amji pupun xà kêanre to amji pupun cakrô, nee amji jahpan xà na cumã garkwa nõ to me acakôc kên nare, ne atýj me cumã awcanã. Ampo na? He Pahpãm kôt ca ate to hajýr, cwýrjapê quê ha me apyrên Pahpãm hakry, ne taa ihtýj me ato impej.

²⁰ Ca ha ate ampo to kên to apa na, quê ha hahpan xà na, ate amji pupun xà kêanre nõ akam ihpým ne acahhy, ca ha aracri jý ne cumã awcanã, quê ha ahna ajkí Pahpãm mã apejti ne, ne cumã acaprí? Hãpà, atea ca amji caxuw ita ton, na ca ha atýj cumã awcanã, ne aracri jý. Ca ha ate ampo pejti ton to apa cakrô, quê ha

hahpan xà na ate amji pupun xà kêanre nõ awÿr cato, ca ha cumã awcanã, quê ha Pahpãm apupu, ne ihtÿj apyrên hakry ne ato impej. ²¹ Me pampejti ton to me papa jahpan xà na, me pahte me amji pupun xà kêanre mã me pajũcanãr xà. Ne caxuaw ri, Pahpãm te me pahna hãhwÿr. Ahnaa mã pê Jeju me pamã to hahkre xà caxuw me pahcumam, cute me pancwÿr-japê amji pupun he. Na cu ha ihkôat me hane.

²² Pê Ixaj xwÿ Pahpãm jarkwa na, hõ kãhhôc kam, ahna ihhôt to hane he:

“Ne nee jũ caxuw me pajõ Pahhiti te ampo kên ton nare,
ne nee ihcakôc xà nõ to ihhêj xi nare” hane.

²³ Pê ame cumã kêanre cakrô, pê nee amji jahpan xà na, jũm mã harkwa nõ kên to ihcakôc nare. Pê ame to kêanre, ne me cumã ihkãj xà ton cakrô, pê nee me to kên ata jahpan xà na, me cumã amji cawpa nare, ne aracri ihcuhhê. Ne cute cama ihcunea na Hũm mã amji jôr, mãr quê taa, jũ caxuw, catyt kam, ampo itajê cunea to impej. Ne quê ha jũ caxuw mempej catêjê to impej, ne mehkêanre catêjê kên mã me curê.

Pê Jeju kã caxõ xà ata me pahcunea to impej

²⁴ Ne Jeju te amjia kôt, cute mehcuran xà ita mã amji jôr, mã cute pĩ kam mehcuran. Ne me ate amji kam me gapac xà kêanre itajê mea mã, ihhêj ne ramã cute pĩ ata na menxôr, mã ihtyc, ne hamre. Na ri nee hipêr me ate amji kam me gapac xà kêanre atajê kôt ame apa xà nare. Ne quê Pahpãm te amji kam hapac xà impejti ata kôt ri ame apa xà. Ne cute ame Jeju kã to caxõ xà ata te ri me amã ate amji kam me gapac xà mã ampej. ²⁵ He carã cahàcre hôhti pry cupa, mã hamãr catêjê ame hapêê, ne hacpÿa mã me to cuprõ, ne ma me hamã, ita jĩkjê na mã, mam me acaxwÿn pictor, ne Pahpãm pê ampÿa mã apu ipa. Ne Jeju Crixto te hacpÿa ne amji wÿr me acaxwÿn to cuprõn, ne ita caxuw ma me gamã, ne ihtÿj ampo kên pê me apytã.

Quê ha pyjê ihtÿj amji mã mempjê cupa

Epet 5.22-25; Coroxo 3.18-19; 1 Timot 2.9-15

3 ¹⁻² Ita caxuw, wa ha me apê pyjê mã mempjê atajê japackre. Quê ihhêj to me akwÿ mã me apjê kwÿ te Pahpãm jarkwa kam me hapac nare atajê, ca ha atÿj Pahpãm wÿr me to apipkjêr to hane he. Ca ha me cumã, cute amji mã me hũpar xà caxuw me cumã acakôc nare kam, ate amji kôat catyt kam Pahpãm to, cute amji mã mehhimpej na me to, quê amji mã me to ihhimpej. Ca ha me apjê kampa, ne catyt kam ame apa, mãr quê me apjê catyt kam me apa na me apupu, ne ate amji mã me hũpahti na me gahkre pej, ne me akôat Pahpãm wÿr me apkjê, ne amji mã me to ihhimpej to me ipa.

³ Ne nee ca ha me apejti to prãm to, põ rũm pit mã ame amji cũmpej, ne aracri me acaxwãm pê me ate amji kam me gapac xà kêanre, ne impej nare, ita na ihkaj na. Na ca ha nee cama ame amji cũmpejti to

prãm nare, ne nee cama ame akĩ to impejti to prãm to ame to apihho, quê impejti nare. Ne nee ca me gacrô xà peaj to pit mã ame amji jakrô prãm nare, ne nee cama me apejti to prãm to cupêhkã peaj to pit mã me amji kã prãm nare. He Pahpãm mã ampo itajê te me ato impejti itajê kôt hamreare. Ampo na? Quê ha ihtÿj jũ caxuw ampo itajê mea mã, me gĩ ty, ne hamre tu, ne acto. ⁴ Ne quêt me acaxwÿn nare, quê ha nee jũ caxuw ihtyc ne ipictor nare. Na ca ha me acaxwãm pê me acaxwÿn cũmpej. Ne ate amji kam me gapac xà itajê, quê ha nee ampo kam apu incãcãc nare, ne quêt amji mã ihprãa kam, ihcarĩcti kam, catyt kam ipa xà ita ri, quêt Pahpãm mã catia to cati, ne impej. ⁵ He mam me apupxwÿjê te Pahpãm to amji mã mehhimpej, ne ihtÿj curũm me ampo pej jikaj atajê pê ajco me amji cũmpej to me hane he. Pê ajco ihtÿj amji caxuw mempjê kam me hapac to me ipa. Ne Pahpãm mã cute me hajÿr to ipa xà ita pê ri ihhêj rũm me hakrô xà.

⁶ Ahnaa mã pê Xarakwÿj xwÿ hanea ne, ajco ihtÿj amji mã impjê pê Aprãw xwÿ ata kam hapac to ipa, ne ajco cumã: “Ijõ pahhi” hane. Ca ha ampo pej pit ton to me apa, ne nee me amã ampo cupa nare na, ca ha me apê Xarakwÿj xwÿ pyrãac, ne me apê me tãmxwÿa.

Quê ha mempjê mã ihtÿj mehprõ kĩn

Roman 12.9-21; 1 Texarõn 5.14-15

⁷ Ne me apê mempjê, ca me aprõ me, me apa atajê mã, wa ha ita caxuw icakôc. He me gapyre mã me aprõ carôt peacre na, ca me to amji japackre, ne amji mã me hũpa, ne me hamãr peaj to me apa. Ampo na? He quê ha Pahpãm ajwar amji cahê na me apa na me ato, ca ha cahê na me aĩar na me apa rohnÿtti mã. Hõ, ca ha me to hajÿr to me apa, mãr ca Pahpãm mã me acakôc, quê ihtÿj me akampa, ne nee me apar caca nare.

Cu ha pahtÿj pahte ampo pejti ton na amji to me ahcukij

⁸ Hamre, ita caxuw wa ha me acunea japackre. Quê ha me amã ate amji kam me gapac xà pyxit peaj. Ne quê ha me amã ajpên kĩnti hanea, pom quê mehkjêjê mã ajpên kĩn he. Ne hanea ne me amã ajpên caprĩhti ne, ne ajpên to me acati to me apa, ne nee me anõ pyxit peaj ne amji to acati prãm nare. ⁹ Ne quê jũmjê ame ato kên, ca ha nee amji jahpan xà na ame to kên nare. Ne hanea ne quê jũmjê ame axũn, ca ha nee amji jahpan xà na ame hũn nare. Ne cama amji jahpan xà na, jũmjê atajê to mempejti ne. Me pahte mehcunea to impejti, mã me hahpan xà na Pahpãm te me pahto impejti xà caxuw ri, cute me pahna hãhwÿr.

¹⁰ Pê Tawi xwÿ ramã Pahpãm jarkwa kôt, hõ kãhhôt kam, ita na ihhôt to hane he:

“Quê ha me amã amji kĩnti me,
me gakryti na me apa to prãm na,
ca ha me hane he:
Ca ha nee jũmjê to ame acakôc kên nare.
Ne nee ame ahêj xi to ame acakôc nare.

11 Ne ma ame amji tète ampo kên cunea curê,
ne me akên ton jicu,
ne me ampo pej pit ton to me apa.
Ne ca ha hanea ne ajpên mã me apejti na me akrĩ na,
ca ha amji to me ahcukij.
Ne quê jũmjê apu ajpên curê,
ca ha hacp̃ya mã ajpên mã me caprĩ na me to.
12 Ampo na?
He me pajõ Pahhiti mã cute me ampo kên ton itajê
na mehkĩn nare,
mã ma ame curê.
Ne mempejti catêjê ri quêt,
me hamãr to impejti, ne ihtỳj me cumã,
cute mehcajrên xà atajê na me kampa" hane.

**Jũm te pahte amji pupun xà kêanre na me pahton xà
pyrên me pajakry**
2 Timot 2.24-26

13 Ne quê me amã ampo pejti ton to prãmtẽ, kam
me akrã acto tu, ca me ton to me apa xà ata kam, quê
ha pijamã Pahpãm kam jũm te ame ato hamre na
hamã? Hãpà! 14 Ca ha ate me ampo pejti ton na, quê
ha jũmjê te hahpan xà na, ate me amji pupun xà
kêanre na me aton na, ca ha atỳj me gakrya ne. Ne
nee ame jũm cupa to me apa nare. Ne nee acaxwỳn
caxwãm pẽ ame akrihkrit nare. 15 Jeju pẽ me pajõ Pah-
hiti na me to amji japackrea ne, ne me gĩ cunea to amji
mã me hũpahti to me apa. Ne ca ha ma ate Jeju to
amji mã me hajỳr to me apa na, quê ha jũmjê ahna me
apupu, ne ate ihkõt me cumã harên prãmtẽ, ahna me
acukij na, ca ha ramã me cumã harên prãam kam, me
cumã harên xàa kam me cumã harên to apa. Ne amji
mã aprĩa kam, amji mã me hũpahti kam, me cumã
harê.

16 Ne ca ha gõtpe catyt kam, ampo pejti ton to me
apa, mār quê me acaxwãm pẽ ate amji kam me gapac
xà kam, me amã ate me ampo kên ton nare na, me
amã amji jahkre pej. Quê ha mehkwy kwỳ te, me ate
catyt kam Jeju kõt me apa na me apupun na, quê ha
ihtỳj ame akam mencryc. Ne mehhêj xi xà to, cute ame
ato ihkryjre prãm to, ame amãn kêanre ne. Cakrô ca
ha me kam mare mã catyt kam me apa kam me to
acrà, quê ha me cumã acaxwãm pẽ me apejti na me
gahkre pej, ne amji kam amehpahàm to me ipa. 17 Ne
ca ha ate me ampo kêanre ton to me apa na, quê ha
hahpan xà na, me ate amji pupun xà kêanre na me
aton na, quê ha Pahpãm me amã:

— Hamre, atea ramã me amji kên mã me amji mên,
ita na me akam ipê ihkaj na — hane. Ne ca ha ate ame
ampo pejti ton to me apa cakrô, quê ha Pahpãm te
jũmjê atajê te me amã ate amji pupun xà kêanre ton
na me hamãr na, mã cute ame ato kên na, quê ha Pah-
pãm me amã harkwa to:

— Ate me ampo to kên nare kam, cute me ato kên.
Ca atỳj cumã me gũcanãr to me apa, ne nee hahpan
xà na ame kam acryc nare, ita na ri imã me apejti —
hane.

**Pê Jeju pẽ me pahkritxwỳ ata hanea ne amji pupun xà
kêanre to amji pupu**

18 He Jeju te me acuxà, amji pupun xà kêanre to amji
pupun na, ca me to amji japackre. Ne cute amji to me
pahcunea kritxwỳ hiahpuro na, ca me to amji japackre.
Ne hanea ne cute ma Pahpãm wỳr me pahto ipipkjêr
prãmtẽ, me pahkên xà itajê jahpan xà na ihtyc pyxit
peaj ata na, ca me to amji japackre. Ne cupê hũmre
impejti na, ca me to amji japackre. Ne cute me
pahkritxwỳ na amji ton, ne cute me papê mehkên ton
catêjê mã amji jõr. Mã cute ame hĩ to kêanre, ne cama
cute amji na me hamãr, mã cute mehcuran na, ca me
to amji japackre. Mã Pahpãm Carõ Pejti te hipêr quêt
cumã hĩ tuw jõr, na quê ha nee jũ caxuw hipêr ihtyc
nare, ne quêt ihtĩr rohnỳtti mã na apu ipa. 19 Ne pẽ Je-
ju jĩ ty, ne nõr kwỳa kam, ma carõ mehtyc carõ jacjên
xà wỳr axà, ne me carõ atajê mã, cupê ampo cunea jõ
Pahhiti na amji jarê. 20 Ne me carõ itajê pẽ, por me
panquêtĩ Nowe xwỳ jõ amcroa kam, pẽ ajco cormã
pàr kre to hàpên to mõr xà ata kam, nee cute me Pah-
pãm jarkwa par nare atajê carõ. Pẽ Pahpãm amji mã
ihprĩa, ne cute jũa caxuw mehkên ton jicu, ne hỹrmã
me ipipkjêr na me hikaj to ipa, mã nee cute mehkên
ton jicu nare. Mã me ahnaa Nowe xwỳ te pàr kreti
jipêj, mã kam cute me ôjtô peaj te mehtyc xà pẽ me
amji pytar.

21 Ne cô te mehkên jipej xà pẽ Nowe cator ita pẽ, ih-
hêj rũm cô te me pahcumrãr xà ata pyrãac. Ne me
pahcumrãr xà ita pẽ nee pahte me to amji rã pit jũrên
xà nare. Ne ihkõt harên xà te, me pahte amji kam me
pajapac xà cunea pintuw, ne ihtetetti ata cwỳrjapê, cu
carôt tỳjti te hacp̃ya mã Jeju to ihtĩr ata kõt, catyt kam
me apa. 22 Ne pẽ hacp̃ya mã Jeju cõjkwa wỳr api, ne
Pahpãm cahê na, awpôc rũm, pahhi jãmtàr jãmkrà ca-
tia krĩ xà kam jỹ. Ne jỹ ne cõjkwa kam Pahpãm mã
memprar catêjê cunea me, me cupê me hõ pahhi
catêjê me, me carõ carôt tỳjti pẽ ajteare mã atajê
cunea to ihhimpej.

**Cu ha me pahte amji kam me pajapac xà tũm ata to
me pajapac kêt**

Roman 6.1-14; Epet 4.17-24; Coroxo 3.1-11

4 Pê Jeju hĩ to amji pupun xà kêanre to amji pupu.
Ca ha cuxà ate me amji pupun xà kêanre cunea
caxuw ame apa. Ampo na? Quê ha jũm te hĩ to amji
pupun xà kêanre to amji pupun na, quê ha nee hipêr
cumã cute ampo kên ton xà nõ hamreare, ne nee
hipêr ihnõ ton nare. 2 Cwỳrjapê, ca ha amji to me Pah-
pãm cajpuaw xà na, pjê ita kam, harkwa kõt, catyt kam
ame apa. Ne nee hipêr ate me amji to me amji ca-
jpuaw to prãm to, ame ampo kên ton to me apa nare.
3 Ne pẽ ca mam, ramã me cupê Pahpãm na mehkwy
nare atajê kõt, me cumã cute amji kam me hapac xà
kĩnti atajê ton to ajco me apa. Ne ramã ate mehkõt me
ton to me iryyti.

Ne pê ca amcro atajê kam, ajco me amã me apahàm nõ xà kêanre kam, me pahpahàmti atajê ton to prãam kam, ajco me ton to me apa.

Ne ajco cõxyhti to me amji to me apipãn to me apa. Ne me gõ amji kîn atajê kam, ahti na ajpën pê me aprõ caxun to me apa.

Ne me ajpën kam mare mã, cõxyhti to me akõm to me catia to me apa.

Ne ajco cõjkwa kam me Pahpãm kaj na, me apãm cahàc krekà atajê kîn to ame apa.

⁴ Ne ita caxuw, ca nee hipêr me cupê Pahpãm na mehkwy nare, ne mehkra nare atajê kõt, ampo kên atajê cunea kõt ame apa prãm nare. Ita kam ri hãn ne me amã:

— Pÿhàpà, xãmte ca nee hipêr me ikõt me amji ton to prãm nare — hane. Jirõ pê mã ri, cute mehkwy mã me axũn xà kêanre to, me akõt harên. ⁵ Ne quê ha ihtÿj jũ caxuw, mehkêanre itajê na Pahpãm mã me amji kõt harê. Ne quê ha Pahpãm pê mehcukij ne ajpën pê me to haprãr catê ata ihtÿj mempejti xà wÿr mempej to haprã, ne mehkên xà wÿr mehkên to haprã. Ne ramã cute mehtyc me, mehtÿr itajê jipõc ri ajpën pê mempej to haprãr xàa kam ri ramã jÿ. ⁶ Cwÿrjapê ri, por ramã mehkên tyc atajê te Jeju pê me pahpytãr catê na, me harên par. Mãr quê xwÿ mã mehkên mã hikra, ne catyt kam me ipa. Mãr quê Pahpãm hacpÿa mã mehtÿr na me to, quê mehtÿr, ne cahê na me ipa rohnÿtti mã.

Cu ha pahte amji jahkre pej krã kreti to me Pahpãm mã me apê

Roman 12.6-8

⁷ Quê ha ahtũm nare, quê ha ampo cunea jamre xà kam ahtwÿ. Cwÿrjapê ca ha me guphêa rũm, caxwãm catia mã, catyt kam me apa, mãr ca catyt kam Pahpãm mã me acakõc. ⁸ Mãr quê ha ampo itajê cunea jirõa pê, me amã ajpën kîn catia to cati, mãr ca cute ame ato kên atajê to me cumã tojnõ, ne me hicu. ⁹ Ne me apê ikre jõ pahhi atajê, quê jũa rũm me akwÿ gũrkwa kam me ana cuprõ, ca atÿj me ahna amji to põi, ne me cumã harte, ne me acahê na mehkri, ca me hamã, ne nee amehkõt harên nare.

¹⁰ Ne pê Pahpãm ahpÿanre na, ajteare mã, me pamã pahte amji jahkre pej krã kreti jõr pa, ne ahna me pahpyxwÿr pa. Cwÿrjapê ca ha, cute me amã, ate amji kam me gapac xà jõr xà atajê jamãr peaj, ne ate me to me akwÿ to impejti xà caxuw, ca ha me to apa. ¹¹ Quê ha Pahpãm te, jũm te me cumã harkwa jarên xà caxuw, cumã amji jahkre pej krã kreti jõr na, quê ha ihtÿj me cumã Pahpãm jarkwa jarên to ipa. Quê ha Pahpãm te, cute mehteacajpar xà caxuw cumã amji jahkre pej krã kreti jõr na, quê ha ihtÿj Pahpãm carõat to mehteacajpar to ipa. Hõ, ca ha me hajÿr to me apa, mãr quê mehcunea me apupu atajê, me Pahpãm jarên pejti jarên to:

— Inxũ Cati, apê me ijõ Pahhiti pê Jeju Crixto Pãm peaj — hane. Quê ha mehcunea me Jeju carõt cati tÿjti rohnÿtti mã na me hahkre pej. Ampeaj kam!

Cu ha pahtÿj Pahpãm te pahte me amji pupun xà na me pahton na me awcanã

Ruc 6.20-23; Jowãw 16.1-4; 2 Texarõn 1.3-12; Tijac 1.2-4

¹² Imã me ikwÿ nõ kinti atajê, me apê wakÿre prã tepti pê ôr ata pyrãac na, ca amji to me amji japackre. Ne pom hãn ne me wakÿre prã tepti pupun pej prãmte, cuhy kam me cunõ, ita na mã me ate. Ita jÿkjê na mã, Pahpãm ma ate me amji pupun xà kêanre kam me apa na me gamã, cute me amã ihkîn na me ato ipipê prãmte. Ýhÿ, Pahpãm mehkra cunea to hajÿr to ipa. Cwÿrjapê, ca ha nee me ajpën mã:

— Pom me papê Pahpãm tekjê ita? Mã cu ajte pahtÿj me amji pupun xà kêanre to me amji pupun to me papa? — hajÿr nare. ¹³ Ca ha me amji pupun xà kêanre to me apa ata pyrên me gakrya ne. Ampo na? He ca Jeju me, ate me amji pupun xà kên atajê to ate me apipëan. Cwÿrjapê, ca ha jũ caxuw Jeju carõt jãhcujrohti impejti te amji to ipipê xà ata jõ amcro kam, ca ha me amã amji kïan ne. ¹⁴ Ne me apê Jeju tekjê, na ri ame axũn to me ipa. Cwÿrjapê ca ha me amã amji kïan ne. Ampo na? He ate amji kam me gapac xà itajê, ihtÿj me akam Pahpãm Carõ Pejti carõt tÿjti te ihkrÿ na, me garê.

Cu ha nee jũ caxuw ampo kên ton to me papa nare

¹⁵ Ca ha nee jũ caxuw jũm curan nare, ne nee ampo to me gãhkij nare, ne nee me gõ pjê jõ pahhi jarkwa jirõ pê me apÿpÿm nare, ne nee ate me ampo kên ton catêjê te amji kam me hapac xà mã, atÿj ame acjêj to me apa nare. Ampo na? He imã ampo itajê cunea jahpan xà na, me ate me amji kên mã me amji rên, ne kam me pahpahàmti nõ to ate me amji pupun na, imã me ato prãm nare. ¹⁶ Ne quê ha jũm me apê Jeju tekjê ita cwÿrjapê, ate me amji pupun xà kêanre na me ato, ca ha nee amji jũ na ame apahàm nare, ne ampeaj kam cama me apê Jeju tekjê pyrên me gakryti na, Pahpãm mã me amji jarê. ¹⁷ Ne ramã Pahpãm te mehcukij ne ajpën pê me to haprãr xàa kam ri jÿ, ne toa ri jÿ. Ne cute ramã mam me papê me hõ tekjê kam to ihtêm, ne pahte ame to ihcupan jahpan xà na, ame pahto kên pa. Jirõ pê mã, quê ha, cute Jeju pê me pahkên pê me pahpytãr catê na, harên pejti atajê to amji mã me hajÿr nare atajê, quê ha me pajirõa pê mehkên catia mã me irên kam tẽ. ¹⁸ Ne pê ramã Xarõmãw xwÿ Pahpãm jõ kãhhõc kam, ita na ihhõc to hane he:

“Mempejti catêjê te mehkên cati pê me amji pytãr xà wÿr,

quê ha xa me amji pupun xà kêanre to me amji pupun cri.

Jirõ pê mã quê ha mehkêanre catêjê ma amji tète ame Pahpãm curê,

na quê ha ihtÿj me amji pupun xà kêanre to me amji pupun to me ipa rohnÿtti mã” hane.

¹⁹ Mër hõhõ, me pahkwÿ kwÿ te me amji pupun xà kêanre to me amji pupun xà ita na ri, me Pahpãm te

me to tojnô. Cakrô quê ha ihtÿj me Pahton Catê, cute me pahkên pê me pahpytâr to ihcakôc xà ata na, amji to amji japackre. Na cu ha pahtÿj itajê cunea na amji mã me to hane, ne ampo pejti ton kam me to pancrà tu ne.

Cu ha me pahtÿj Jeju na mehwÿ jamãr peaj ne

5 Ipê Petrô, ne ite hajÿar ne ipê Jeju na mehwÿ to mehhimpej catêjê nô. Ne pê wa ito jãa to Jeju te amji pupun xà kêanre na hõmpu, pê ikam mare mã ty. Na wa itÿj mehcunea mã ihtyc xà ita na harên to ipa. Ne quê ha jÿ caxuw amcro nô na, Pahpãm te mehcunea mã Jeju catia to cati na to ipipê xà ata kam, quê ha cume ajkaam me ito ajpê. Na wa ha ita caxuw me apê me gõ krí kam me hapackre catêjê na ahwÿ, ne me gapackre.

² He me apê carà cahàcre hòhti jamãr catêjê pyrãac. Mã Pahpãm te me amã mehwÿ pê me hõ tekjê atajê jôr, ne apê me hamãr catêjê na me apyxwÿr, cwÿrjapê ca ha me hamãr prãam kam me hamã. Hõ, ate me to hajÿr xà ita na ri, Pahpãm mã me ato prãm. Ca ha nee me amã me hamãr prãm nare kam, ame hamãr nare, ne quêt amã me hamãr prãam kam me hamã. Ne nee ate me ihpore nô pyr prãmte, ame hamãr nare. ³ Ne nee ca ate me to ahimpej xà ata kam gãprêa kam ame to ahimpej nare. Ne quêt cute akôt me ipa to prãmti xà caxuw, ca ha catyt kam, ate amji kam me gapac xà impejti to me apa. ⁴ Ne Jeju pê carà cahàcre jamãr catêjê cunea jô pahhi pyrãac, na ca ha atÿj cumã me apê. Ne quê ha jÿ caxuw amji jaxà, ne ihtÿj ate me gãpên xà ton atajê jahpan xà na, me amã amgõ. Ne cute me amã hàmjôr xà ata pê pahhi krãhkà impejti. Ne pahhi krãhkà impejti ata pê jÿ caxuw hahí xà jamre xà nare ata, quê ha me amã cugõ. Quê ha mehcunea me apê Pahpãm mã me hàpên catêjê impej na me gõmpu ne ate me gãpên xà jipêj na me gahkre pej.

Cu ha nee me pahkwÿ jirôa pê amji to me pahcati to prãm nare

Ruc 18.9-14; Tijac 4.7; 1 Petrô 1.6-9

⁵ Ne ita caxuw wa ha hanea ne me gÿ tÿj tuwti itajê japackre. Ca ha atÿj amji caxuw mehwej te me hapackre catêjê atajê kampa. Ne ca ha me acunea pê Pahpãm na mehwÿ atajê, me amji to me acati prãm nare kam, atÿj me ajpên tehcajpar to me apa. Ne pê ramã Xarômãw xwÿ Pahpãm jarkwa kôt, hõ kãhhôc kam ita na, ihhóc to hane he:

“He Pahpãm ihtÿj, por cute amji to me cati prãmti atajê cuna mã ahtwÿ, ne intête me hiprô.

Ne por amji to me cati prãm nare atajê ri, ihtÿj quêt cute mehtehcajpar xà” hane.

⁶ Na ca ha Pahpãm carôt pahtÿjti ata krac ri, amji to ame acati prãm nare to ame apa. Mã quê ihtÿj jÿ cax-

uw, hõ amcro kam hàhhuc xà ata kam, ato acati ne ato acarôt tÿjti ne.

Pahpãm ihtÿj me pajamãr to ipa

⁷ Ne nee ca ate ampo to amji kam me gapac xà ata to ame amji mã me akrihkrit krÿn nare. Ampo na? He Pahpãm ri, ma ate me amji kam me gapac xà itajê mea mã, me gamãr to ipa.

Me pahcurê xwÿn pê Xatanaj ata pê roptycti pyrãac

⁸ He me pahcurê xwÿn pê Xatanaj pê roptyctia, ne cute jÿm krër prãmte, ihtÿj apu carôrô to ipa ata pyrãac. Ita jÿkjê na mã ihtÿj Xatanaj me papu na apu ipa, cute Jeju to pahte amji mã me pahhimpej xà ata to me papê hamre prãmte. Cwÿrjapê ca ha me guphêa rÿm, caxwãm catia mã, catyt kam me apa. ⁹ Ne Jeju kam me pahkjêjê atajê te me acuxà pjê cunea kam, ame amji pupun xà kêanre to ame amji pupun na, ca me to amji japackre. Ne nee ca Jeju to ate amji mã me ahimpej xà ita jicu nare. Ne nee ca ame Xatanaj te ame ato kên kryjre atajê cupa nare. Ne cama quêt cuna mã me ahtwÿ, ne cute me ato hajÿr tète me hiprô.

Cu ha pahte me amji pupun xà kêanre ita nee me pah-to irytyi nare

¹⁰ Pahpãm mã me pahkín, ne cumã me pahcaprí, mã cute Jeju Crixtó kam pahte me ajpên hõnco tu xà caxuw, cute me pahna hàhwÿr. Mã cu me pahcunea ajpên kam, impej catihti ata kam, ame papa rohnÿtti mã. Ne ate me amji pupun xà kêanre ita, quê ha nee me ato hãm rÿtyi nare. Ne quê ha Pahpãm me gÿ-canãr xà caxuw, me amã carôt gõ, ne me ato impej, ne ihtÿj me ate amji kam me gapac xà impejti kam me apa na, me atehcajpar to ipa. Mã ca nee jÿ caxuw Jeju to amji mã me ahimpej jicu nare. ¹¹ Pahpãm mã mehcunea jirôa pê carôt pahtÿjti rohnÿtti mã. Ampeaj kam!

Cu ha Pahpãm mã me pahkínti ita na amji mã me to hajÿr rohnÿtti mã

¹² Ýhÿ me ikjêjê, wa ite me amã ihkãhhôc crire ita ton xà na, Xira te itehcajpar. Ne cupê me pahkjê, ne pahtÿj pahte amji mã me to hajÿr xà ata mã he. Wa ite me amã Pahpãm mã me pahkínti na harên xà ita to, me amã me acarôt to ihtÿj prãmte, wa ite me amã ah-na ihhóc. Na ca ha atÿj me Pahpãm mã me pahkínti ita na amji mã me to hajÿr rohnÿtti mã. ¹³ Ne pê Pahpãm amji mã Jeju na mehwÿ capi, mã ita ri Papirôn jô krí kam ame ipa itajê te me amã amji jarên kujahêc. Ne hanea ne Macô, pê ikra cahãhhàc ita te me amã amji jarên kujahêc. ¹⁴ Ne ca ha me amã ajpên kínti kam, ame ajpên japÿ. Ne imã me apê Jeju tekjê catêjê cunea te me acaxwãm pê me acarícti kam, me amã ampo cupa nare na, me ato prãm.

2 PETRÔ

Ýhÿ, pê Petrô pê Jeju jarkwa na memprar catêjê nõ. Ne pê mam cupê tep pro catê. Pê Jeju cupê ihkôt ipa catê na ahna ahwÿ. Ne Jeju te cõjkwa wÿr hàpir jirô pê mã ri, cupê Krĩpinkrên kam Jeju na mehkwÿ mehkří atajê to ihhimpej catêjê nõ. Ne ramã cute mehcuran xà na hàhtêp na cute hahkre pej. Ne pom cu hapu na me hõ kàh-hôc cahyt ita, pjê cunea kam Jeju na mehkwÿ wÿr, cute ihkujahêc. Na ri hapu na hõ kàhhôc ita japrÿ te (2 Petrô). Ne kam me pamã jũ caxuw jũmjê te me cupê Jeju na mehkwÿ na amji jarên, ne nee cute Jeju te amji kam hapac xà intuwti impejti kôt me ipa nare atajê mã ihcawpa. Ne hanea ne Jeju te amji kam hapac xà tuwti ita kôt me papa kam me to pancrà na, me pamã apô.

Petrô te amji jarên xà

1 Hàpà me ikwÿ! Ipê Ximãw Petrô pê Jeju Crixto mã ijàpên catê, ne ipê cumã harkwa na iprar catê nõa wa. Wa ite Jeju jarkwa na memprar catêjê kwÿ me, me amã ihhóc. Ne Jeju pê me pahpytâr catê me, Hũm catyt kam me ipa. Cwÿrjapê ri cukwa kam cute me ato, ate amji mã me to ahimpej catêjê. Na ri ita caxuw me apê ipyràc. **2** Ne imã, me ate ihcunea na, Pahpãm me, me pajõ Pahhiti pê Jeju jahkre pej pejti na, me ato prãm. Mår quê amjia kôt me ato impej, ne me acaxwãm pê me amã ihcarĩcti gõ, mår ca nee amji mã me ampo cupa nare, ne ihcunea na me ate amji kam me gapac xà tuwti capênti to me apa xà ata to, me amã ipicamên to mõ.

Pahpãm me pamã ampo pej jàhtõa ne cugõ

Pirip 2.12-13; 1 Texarõn 1.2-4; 2 Petrô 3.18

3 Ne ramã me pamã Jeju jahkre pej pejtu, na ri cute Hũm carõat kôt me pamã me pahcarõt jõr, pahte ihkõat catyt kam ame papa xà caxuw. Ne hanea ne Jeju kam me ajpên hõnco xà ita kôt cute impejti ita kam ajpên kam ame papa, ne me papê hũràac xà caxuw, cute me pahcapi. **4** Ampeaj kam Pahpãm pej, ne hàh-caprĩ cati, na ri cute ahpyanre na me pamã ampo pej cunea jõr na amji to hũjahkre. Ne hanea ne cute me pamã, cute amji kam hapac xà tuwti, impejti ita jõr na, amji to hũjahkre. Ne cute me pamã amji kam hapac xà tuwti to hũjahkre ata ri, cute ita kam me pamã hõr, mår cu me papê hũràac, ne me cupê Pahpãm curê xwÿn catêjê atajê te amji kam hapac xà kên kro, ne ihcacure xen atajê pê me to amji pytà, ne cupê me pahcato, ne quêt pahýtj catyt kam ame papa.

Cu pahýtj mãnea mã me hahkre pej to prãm

5 Pahpãm te ramã ate Jeju to amji mã me ahimpej na me aton, na ca atÿj ramã amji mã me to ahimpej to me apa.

Na ca ha ita caxuw me caa, ate amji kam me gapac xà impejti kôt, catyt kam me apa.

Na me caa amji mã me ahihcuxêc to me apa.

Ne hanea ne ma, ate me Pahpãm jahkre pej xà ita to me caa, amji mã me apicamên to me mõ.

6 Ne hanea ne, ate me ampo kên ton xà atajê cunea intête me amji jiprõn to me apa.

Ne ca ha hanea ne ate me amji pupun xà kêanre to me amji pupun xà atajê kam me awcanãa ne, ne nee jũ caxuw me Jeju jicu nare.

Ne hanea ne ihcunea na Pahpãm mã me amji gõ, mår ca ihkõat catyt kam me apa.

7 Ne hanea ne, Jeju kam ajpên to me akjêjê atajê me, me ajpên to me akwÿ impeaj ne.

Ne ca ha hanea ne Pahpãm cuxà, amã mehcuea kĩnti ne.

8 Na ca ha atÿj ate me to hajÿr to apicamên to me apa, mår quê ate amji mã Jeju to me ahimpej xà atajê kôt hamre nare. Na ca ha quêt me pajõ Pahhiti pê Jeju Crixto kôt catyt kam ame apa xà atajê kôt, ihtÿj me amã ampo. **9** Ne me akwÿ kwÿ, nee cute amji kam me hapac xà itajê to me hajÿr to me ipa nare. Atajê mã ri, nee Pahpãm to amji japackre nare. Por cute mehkên atajê cunea to impej, ne to tojnõ, ne me cumã cute amji kam hapac xà intuwti jõr na, nee me to amji japackre nare. Ne me cupê mento tũm pyrãac, na ri nee me cumã amji jahkre pej, mã me amji pupun nare.

Cu ha ihcunea na, catyt kam Pahpãm kôt me papa na, amji to me ahcukij

10 Jeju kam ajpên to me pahkjêjê itajê, he amji mãa ri Pahpãm te me pamã hàkjêr, ne me pahcapi, cwÿrjapê ca ha catyt kam, ihcunea na, Pahpãm kôt me apa na, amji to me ahcukij. Ca ha ate ita to me hajÿr na, ca ha nee jũ caxuw Pahpãm jõ pry kaj na, jũ kam cupê me pry hyr nare. **11** Na quê ha ihtÿj me amã, me pajõ Pahhiti pê Jeju Crixto pê me pahpytâr catê ata himpej xà krac ri, me amã me acjêj xà. Na ca ha me axà, ne cahê na me akrĩ rohnÿtti mã.

12 Ne ate ramã me Pahpãm te amji kam hapac xà impejti jahkre pej. Ne ca atÿj amji mã me huwahi to tÿj na, imã me gahkre pej cakrõ, wa ha itÿj hõtpê ate hipêr me to amji japackre na me ato, ca me to amji

japackre. ¹³ Imăa, wa cormă itîr na ipa ita kam, wa ha itÿj ate me to amji japackre na me ato ita na imă impejti, na ca ha me to amji japackre. ¹⁴ He ramă me pajõ Pahhiti pê Jeju Crixto te imă ityc xà jarën, na quê ha ahtüm nare, wa ha ty. ¹⁵ Cwÿrjapê ca ityc xà jirô pê, nee me to gapac kêt nare, ne me to amji japackre kam me to acrà tu. Ne ita caxuw ite me amă to hahkre xà ihtÿaj to ihtÿj cacrô, wa itÿj ihcunea na me amă to hahkre to mō.

Pê Petrô into jïa to Jeju jàhcujro catia pupu

1 Timot 3.16; 2 Timot 3.16-17

¹⁶ He pê wa me amă me pajõ Pahhiti pê Jeju Crixto te amji carôt tÿjti to, cute amji jaxàr na, me amă harën xà ata, pê wa nee amjia kôt, ikrăa kam to amji japackre, ne me amă harën nare. Ne nee pê jüm amjia kôt imă Jeju jarën hêj xi xà nõ to hÿjarën nare. Ipê Petrô, ne pa pê wa me ikwÿ me, me icunea me ito jïa to me hirôa pê Jeju catia to cati na me hõmpu to hane he. ¹⁷⁻¹⁸ Pê wa Jeju me, kën pejti na Pahpăm wrÿc xà ata na ame ipa, pê wa me Pahpăm carôt jàhcujrohti te Jeju jï cunea kam hàhcujro na me hõmpu. Ne hanea ne ite carôt jàhcujrohti pîn Hüm pê Pahpăm te me imă Jeju to hÿjarën to:

— Hümre ita pê imă ikra kînti ata, ne ampeaj kam hÿrën ijakry — hajÿr na me kampa.

Mam Pahpăm jarkwa to mehcakôc catêjê nee amehhêj xi nare

¹⁹ Ne cõjkwa pîn impar xà ata kôt, wa cormă ite me, por pê mam me cupê Pahpăm jarkwa to mehcakôc catêjê atajê te ampeaj kam me hÿjarën na me to amji japackre, ne me hahkre pej. Ne cormă ite me hÿjarën xà ita to amji mã me hajÿr to hipêr me ipicamën. Na ca ha cute me Pahpăm jarkwa to mehcakôc catêjê kam me gapac na, quê ha ihtÿj me Pahpăm me ato impejti ne. Ne pom awcapàtkô kam hàhcujro xà ahcujro, cu ihkôt me ampo pupu, ita jïkjê na mã, Pahpăm jarkwa to mehcakôc catêjê te me hajÿar, ne ihtÿj me pahte Pahpăm pupun na me pahto, cu me hõmpu, ne me hahkre pej. Ne pom hăn ne caxêti hapôj mã apê to ipa, cu me ampo cunea pupu, ne me hahkre pej, ita jïkjê na mã, hacpÿ ne Jeju te amji jaxàr xà ata te hajÿar. Ne quê ha Jeju cator xà ata pê caxêtia pyrác, ne ihtÿj me pahte me Pahpăm pupun pejti na me pahto, cu ha me hõmpu, ne me hahkre pej pejtu ne.

²⁰⁻²¹ Ne mam Pahpăm jarkwa to mehcakôc catêjê atajê, pê nee amjia kôt mehhoç nare. Ne Pahpăm Carô Pejti te me cumă harkwa to hÿjarën xà atajê na pê mehhoç pa. Ita kam, xà cu ha ajkî mehkhâhhoç ata cahyt, ne amjia kôt me kampa, ne me hahkre pej pej pyrentu? Hăpà! He Pahpăm Carô Pejti ata quê ha me pahte me harkwa ata kôt me hakop, ne me hahkre pej na me pahto, cu ha me hahkre pej, na cu ha me to amji japackrea ne.

Cute amji kam me hapac xà kên xyre cawpa xà

Coroxo 2.16-19; 1 Timot 3.1-9; 4.1-5; Juta 3-16

² Pê mam Ixaher catêjê wÿr, me hÿmre te amji jarkwa kôt me cumă mehcakôc catêjê kêanre atajê me cato. Ne me cupê Pahpăm jarkwa to mehcakôc catêjêa na me cumă me amji jarë. Ne cama ame cumă mehhej, ne ajco mehkraa kam ame cumă ampo kên atajê to pit mã hahkre to me ipa. Ita jïkjê na, quê ha me akam ita hanea, ne ihtÿj aracri me awÿr, cute me amă ampo to hahkre catêjê kêanre atajê nõ cato, ne ame amă ihhêj, ne cute ampo to me hahkre xà kêanre atajê to pit mã, me amă hahkre to me ipa. Cute, ate Jeju to amji mã me ahimpej xà ata to me apê hamre prām atajê te, me pajõ Pahhiti pê mehken pê me hÿtar catê ata te me hahpan xà na caprô to hãmjör ata jicu, ne ahna me harcô mën. Cwÿrjapê ri me cutea me amji kên mã me amji mën. Na quê ha ahtüm nare quê ha ihtÿj jü caxuw Pahpăm me to hamre hiahpuro.

² Ne cute me cumă ampo kên to hahkre xà atajêa kôt, quê ha me hàhtôa ne mehkoat, cute amji kam me hapac xà kam menxyre kêanre atajê to me amji kam hapac to me ipa. Quê ha me cupê Pahpăm na mehkwy nare atajê ahna me hõmpu, ne me amji mã:

— Cute amji kam me hapac xà ata kêanre, mormō me hõ Pahpăm ita kêanre, na mã ihkôat cute amji kam me hapac xà ita kêanre — hane. ³ Ne cute me amă ampo to hahkre catêjê itajê te, me apê me gō pore catia ne incwÿr prāmte ri, ame amă mehhej xia jarën to me ipa. Ne xà quê ha ajkî ihtÿj cute mehken ton xà itajê pê me amji pytà? Hăpà! He Pahpăm te ajpën pê me to haprâr catê ata me kōpîr to ipa, ne rÿ pëa mã cute mehken mã me mën xàa kam ramă jÿ. Ne cumă cute me hajÿrjê to hamre xà na ramă me hahkre pej.

Cu ha Pahpăm tekjê na me amji jarë ne mãnea mã pahkên ton nare

⁴ Ne mam cõjkwa kam, Pahpăm mã memprar catêjê kwÿ te harkwa jirô pê mehpyım, ne mehkeanre ton atajê ri nee Pahpăm te, ihtÿj ame ipa na me hamâr nare na, ramă me amă hahkre pej. Ne pê mehcunea pro, ne mehcajpre, ne kre jatôhhy nare kam awcapàtkôti ata kam me to hÿcapêr pa. Ne quê ha curi mehcuhhê ita na, quê ha ahnaa Pahpăm te mehcukij, ne mehken mã me irën xà ata jō amcro kam ahtwÿ. Quê ha mehken itajêa kôt, ajpën pê me to haprã, ne mehken itajê mã ame curê.

⁵ Ne pê hanea ne mam, rÿ pëa mã me panquêtjê nõ pê Nowe xwÿ jō amcro kam, Pahpăm nee mehken catêjê cunea te me amji pytâr na me hamâr nare. Ne cute cõhti ata to mehcunea jipej tu. Ne cute Nowe xwÿ me, hÿxi me, mehkra incrê me, mehprô crê atajê pit pytâr. Pê tee catyt kam cute ame ipa to ame cumă hahkre to ipa cacrô, pê nee mempar nare na, ca me to amji japackrea ne. ⁶ Ne Pahpăm te cuhy to Krîhcumrârți me, Krîhpôc jō krî kam mehken catêjê atajê cunea to caxàr, ne me to hamre na, ca me to amji japackre. Ne cute me to hamre xà ita pê, cute mehken catêjê

cunea mă amji cawpa xà ata na, ca me to amji japack-rea ne.

⁷ Ne Ro xwỳ pê Aprăw xwỳ tàmwxwỳ ata, pê ma apu hõ krí ata kam mehkří atajê te amji kam me hapac xà kam menxyre kêanre atajê cunea caca, ne me hũ na cumã amji kîn nare. Na pê Pahpãm cuhy to cute krí to caxàr xà ata pê hũtã. ⁸ Ne pê Ro pê hũmre impejti ata amcro cunea kam, cute mehkên ton xà atajê cunea pupu, ne kampa, na pê amcro cunea kam, caxwỳn pejti ata cunea kam, me hũ na ihpeacre. ⁹ Ne Pahpãm te ampo to me panquêtjê to hamre xà ita, ihtỳj me pamã cute me pahto amji kam hapac xà to hahkre. Ne ihtỳj cumã, por catyt kam me ipa atajê kên pê me hũtãr jahkre pej. Ne hanea ne cumã mehkênre atajê te mehkên ton jahpan xà na, cute mehcukij, ne mehkên mã me irên xà jõ amcro ata caxuw cute me hamãr, ne me huwahi jahkre pej.

Mehhêj xi catêjê mã nee jũm cupa nare

¹⁰ Ne quê ha Pahpãm, cute amji kam me hapac xà kêanre kam menxyre atajê to, mehkwy jirõa pê apu ihkêanre ne. Ne quê ha hanea ne nee amji mã me pajõ Pahhiti cupa nare atajê to me hirõa pê apu ihkêanre ne. Ne me akwỳ kam, cute me amã ampo kêanre to hahkre catêjê atajê, ampeaj kam amjia kôt me ipa to prãm na, me hàhtat nare kam me ipa. Ne nee amji mã me cõjkwa kam Pahpãm mã memprar catêjê jõ pahhi kwỳ te to ihcupan atajê cupa nare, ne ihtỳj hãn ne me hũn kêanre to me ipa. ¹¹ Ne cõjkwa kam Pahpãm mã memprar catêjê kwya pê, nee ahti na ihtỳj ame hũn to me ipa atajê pyrãc nare, ne quêt me hũmre atajê jirõa pê me carõt tỳj cacrõ, mã nee Pahpãm mã memprar catêjê te to ihcupan atajê xũn, ne mehkõt harên kêanre to ame ipa nare. ¹² Ne me amã ampo kêanre to hahkre catêjê atajê te amji kam me hapac xà atajê na me hahkre pej nare kam ame hũn to me ipa. Ne ihhêj rũm me cupê ampo pê cute amji kam hapac xà hamreare atajê pyrãc. Mã jũmjê te ame hahêr, ne amehcuran xà caxuw, hãn ne me ajhu. Na quê ha me hipej tu, quê ha me hamre tu.

Mehhêj xi catêjê ihtỳj me pahte amji kam me pajapac xà impejti to hamre

¹³ Ne cute me jũm te amji pupun xà kêanre na me ton, mã cute ahna amji pupun ata jahpan xà na, quê ha Pahpãm me to hũràc, ne cute me amji pupun xà kêanre na me to, quê ha ahna me amji pupu. Ne hãn ne amcro cunea kam, hirãa pê me kam mare mã, cute amji kam me hapac xà kêanre kam menxyre atajê kôt apu memprar to pyt. Ne ca ha hãn ne amji mã me amji kîn to, ne me akrí, ne ame apà. Quê ha ihtỳj me acahê na mehkří ne me apà, ne me cupê Pahpãm na mehk-wya na me amã amji jarê, ne cama ame amã mehhêj. Me cupê me amã me apahàm catia ton catêjê, na ca ha atỳj me kam, me apahàm catia to cati.

¹⁴ Ne quê ha ahti na me jũm cahãj pupun xà ri, ramã ihtỳj cahê na me hikwa, ne amehcaxun na me

amji to prãm pyrentu. Ne nee ajte cute mehkên ton xà itajê kam amehtycrí xà nare. Ne ampeaj kam me cumã, pom kyre pê Pahpãm to amji mã mehhimpej atajê to, mehkên mã me hàr xà ata wỳr me to ipa to prãm. Ne mehcunea jirõa pê me cumã, amji mã cute me ampo cunea to mehtũm prãm to ramã cute me amji pyrãc tu. Atajê, quê ha Pahpãm mehkên jahpan xà na ame to ihtỳj tu ne. ¹⁵ Cute Pahpãm jõ pry cupan, na ri ihhêj ne ipictor, ne ma Pahpãm pê ampya mã apu ipa. Ne cupê Parãw xwỳ pê Pejor xwỳ kra ata pyrãc. Parãw ata pê me cumã Pahpãm jarkwa to ihcakõc catê cacrõ, pê ajte cute amji mã ihpore nõ pyr prãmte, ramã ampo te ihcupan xà to me cumã hahkre to mõ. ¹⁶ Mã cawrõ cahàcre te mehĩ cakõc xà to cumã ihcakõc, ne ihtỳj cute ihkên ton ata têtê cumãn, ne pea hõ pahhi kam waj te amji kam hapac xà ata têtê ihhyr.

Mehkrã kêanre itajê ihtỳj Xatanaj jõ cuhy wỳr imprar xà

¹⁷ Ne ihhêj ne me hũmre itajê pê ampo pejti ton catêjê, ne hamreare, rỳ jũ caxuw ajte cute me ampo pejti ton nare. Na ri me cupê ihhêj rũm cõhkre kam cõ nare ata pyrãc, ne hanea ne me cupê ihhêj rũm ahcakrã to ipa, mã kõc ma to pra, mã nee jũ ri hàhhuc nare ata pyrãc. Cwỳrjapê ri ramã Pahpãm te ita jahpan xà na, cute ma kre jatõhhy nare kam awcapãtkõti ata wỳr mehkujahêc na me to amji kam hapac hiahpuro. ¹⁸ Ne nee me cumãa, cute me amji kam hapac xà atajê na amji jahkre pej nare kam, ihtỳj mehcunea mã amji to me hàmnãn to ame ipa. Ne cute amji kam me hapac xà kam menxyre kêanre atajê to, por curmã mehkên ton catêjê atajê pê cormã me hapõj ne Pahpãm wỳr me ipipkjêr, ne cormã kyre pê Jeju to amji mã mehhimpej atajê mã ihhêj, ne intête me to hawry.

¹⁹ Ne hãn ne me amã hũjarên to me ipa to hane he:

— He nee jũm te ampo itajê na, me ato ihhimpej catê hamreare. Cwỳrjapê ca ha gapacta ne atỳj me ampo itajê cunea ton to me apa — hajỳr cacrõ, quê ha cute amji kam me hapac xà kêanre to ame ipa to, cute me amji pyrãc xà atajêa pê quê ha ihhêj rũm me hõ pahhi, na quê ha taa me to ihhimpej. Na quê ha nee me amji mã hamãr, ne mehkên ton jicu nare. Ýhỹ, por cu ha ampo to amji mã me pahhimpej ata pê quê ha me pajõ pahhi, na quê ha taa me pahto ihhimpej.

Cu ha me pampej mã me acjêj, ne kam me papa rohnýtta mã

²⁰ Ne mehkwy te ame ampo kêanre ton to me ipa, ne ramã mehkên cati wỳr mempraar kam, cute me pajõ Pahhiti pê Jeju Crixto pê me pahkritxwỳ na me harên par. Ne hỹrmã me ipipkjêr, ne toa amji mã mehhimpej xà ata kôt ri, pjê ita kam, cute amji kam me hapac xà kêanre atajê pê me cator. Jirõ pê mã ri, cute ajte me Jeju te amji kam hapac xà impejti ita jicu, ne ahna me harcõ mên, ne hacpõya mã cute amji kam me hapac xà kêanre ata wỳr me ipipkjêr, ne toa amji mã mehhimpej to me ipa. Ne cute amji kam me hapac

xà ita pê ri me hõ pahhi. Ne me cupê ihhê rûm kryhti te apu ampo tep pro xà ata pyrâac, ne nee amji mã hamâr, ne me ampo kên ton jicu nare. Ne hamre, ita caxuw cute mam me amji pupun xà ata jirôa pê ihkêanre ita mã me hâr.

²¹ Quê ha jûm te ramã Jeju jahkre pej, ne ihkôat ramã ipa cakrô, cute hîcu, ne hipêr ampo kên ton to ipa na amji mã to ihhimpej na, quê ha jûm te Jeju jahkre pej nare kam, to kên xà ata jirôa pê Pahpãm apu to kêanre ne. Ne por wa ame ato icakôc itajê, quê rý mã nee me Jeju te amji kam hapac xà impejti ata na me hahkre pej nare. Ampo na? Cute Jeju te amji kam hapac xà pyr ata jicu xàa kam, quê ha mam cute me amji pupun xà atajê jirôa pê, cute me amji pupun xà ata me cumã ihkêanre ne. ²² Ne cute me hajýr catêjê pê, pê mã nãm, pom rop hãn ne hõjahir, ne ahna ahtûm nare, mã hacpýa mã hõjahir ku, ita na mã cute me hajýr. Ne pê mã nãm crô te hajýr, quê ha cô ata kam xwa, ne amji cuhhõ, ne ahna ahtûm nare, quê ha hacpýa ne amji jaxà, ne carêc ata kam xwa. Ita jîkjê na mã mehkên catêjê te me hajýr, ne mempej mã me acjêj, ne kam ame ipa ry nare, ne hacpýa mã mehkên mã me acjêj.

Quê ha ihtýj jû caxuw Pahpãm ampo cunea to hamre
Ruc 13.6-8; Tijac 5.7-11; Ipipê Xà 19.11-16

3 Imã ikwý nõ kînti itajê, pom ihkànhôc ita pê hapu na ite me amã ihhêc ita. Ne pom ite me amã ihkujahêc to ipijakrut ita kam, wa ite hipêr ate amji kam me gapac xà impejti, tetetti to ate amji kam me gapac na me aton, mãr ca nee me to gapac kêt nare. ² Ne wa ite me amã Pahpãm jarkwa rer atajê to, ate me amji japackre na me aton. Ne mam rý pêa mã Pahpãm jarkwa to mehcaôc catêjê atajê, pê catyt kam ajco me ipa, ne mempejti. Ne imã, por me harkwa cunea na ihhêc atajê to, ate me amji japackre na, imã me ato prãm. Ne hanea ne me pajô Pahhiti pê me pahpytâr catêj te me amã harkwa na me iprar catêjê na me iton atajê nõa mã cute me amã harkwa jirên atajê to, ca me amji japackrea ne.

³ Ne imã me ate ampo cunea jamre xà kam, me awýr mehkêanre japôj xà ata na, ate me hahkre pej na, me ato prãm. Ne quê ha, cute amji kam me hapac xà kêanre to amji mã mehhimpej to me ipa atajê, quê ha amjia kôt ame ipa. Ne ame ana xwý to me ipa to:

⁴ — Por Jeju te amji jaxàr xà na me amã amji to hûjahkre ata, jô ri mã cator xà ita? Nee jû caxuw cator xà nare. Ne ramã ame pahcûmxwý cunea tyc par. Mã mam ramã pjê te amji ton pêa mã, ampo cunea cormã hãm ita na, ne nee rý jû caxuw ampo te amji to ipintuw nare — hane.

⁵⁻⁶ Ne pom me ana xwý to ame ipa itajê, cama ame amã mehhej to ame ipa. Ampo na? He pjê te amji ton pêa mã, ramã kam ampo jàhtôa te amji to ipintuw. Pê mam Pahpãm pjê me cõjkwa te amji ton na cumã harkwa, pê ihtýj amji to. Ne cute cô me pjê to ajpên pê ipicapôn jirô pê mã ri, Nowe xwý jô amcro kam, hacpýa mã cute cô ita to pjê cunea pro, ne to

mehcunea jipej tu. Ne pom ame ana xwý itajê mã, nee ita jahkre pej prãm nare. ⁷ Pê pjê me, cõjkwa te amji ton na cumã harkwa, ne hanea ne jû caxuw cutea amji to caxàr na cumã harkwa hyr hiahpuro. Ne nee ita caxuw cama me to hamre pyrentu to prãm nare. Quê ha xa Pahpãm te mehcunea cukij xà jô amcro cato, quê ha amehcukij, ne ajpên pê me to haprâr xà ata na pit mã ramã me hikaj. Ne quê ha amcro ata cato, quê ha Pahpãm mehkên catêjê cunea kên mã me curê.

Pahpãm mã me pahnõ pictor na to prãm nare, na ri cormã me pajikaj

⁸ Imã me ijô ikwý nõ kînti itajê, me pajô Pahhiti mãa, caku te mir pê amcro pyxit peaj. Ne cumã amcro pyxit peaj pê caku te mir. Na ca ha atýj me to amji japackre. ⁹ Ne mehkwy me to amji kam hapac xà to kêanre ne me amji mã: — Me pajô Pahhiti te ampo na amji ton atajê, quê ha jûa caxuw cormã to. Nare, quê ha nee cute ampo na amji ton xà atajê nõ ton nare — hane. Ne ampo na mã hacpýa ne cute pjê ita wýr amji jaxàr xà ita to kuu apu ihkên? Nee mã ampo na nare, Pahpãm mã mehnõ pictor na to prãm nare, ne cumã mehcunea te hýrmã me ipipkjêr na me to prãm, na ri cormã me hikaj.

Quê ha jû caxuw pjê me cõjkwa kam ampo cunea to caxàr partu

¹⁰ He nee amã me hàhkij xi te me awýr imprar, ne me apê ampo to hàhkij xà na hahkre pej nare. Ita jîkjê na mã hacpý ne me pajô Pahhiti cator xà te hajýr, na ca ha nee amji wýr cator xà na me hahkre pej nare. Ne cator xà jô amcro ata kam, quê ha hàhkrihkrit krãhhi týjti me ajkaam, quê ha jû kam cõjkwa tẽ. Ne jû kam ihtêm xà ata kam, quê ha ramã pyt capa, ne putwry capa, ne caxêre cunea capa, ne ampo cunea caxàr tu. Ne hanea ne pjê kam ampo itajê cunea to caxàr tu.

Jeju te amji jaxàr xà caxuw amji mã me pajàhcuprôn hiahpuro

¹¹ Ne me amã ampo itajê cunea jamre na hahkre pej ita kam, jû mã ca ha ajte me? Ca ha atýj Pahpãm mã me amji jôr to me apa, ne catyt kam me apa. ¹² Ne Jeju te amji jaxàr xà jô amcro ata pê Pahpãm jô amcro cattia. Na ca ha cator xà ata na me hikaj. Ne ca ha ampo pej cunea to me gápên to me apa, mãr quê cyt ne me awýr cato. Ne cator xà ata jô amcro kam, quê ha cuhy cõjkwa to hamre. Quê ha pjê cacroa to cacro, ne ihhorhot ne ajgã. ¹³ Cu ha Pahpãm te me pamã pjê intuw me cõjkwa tuw ton na, me pamã amji to hûjahkre xà ata na, cu ha me hikaj. Ne pjê me cõjkwa tuw atajê kam, quê ha mehcunea, ihcunea na catyt kam Pahpãm jarkwa kôt me ipa rohnýtti mã. ¹⁴ Cwýrjapê ca ha imã me ijô ikwý nõ kînti itajê, ate me amcro ita jikaj xà ata kam, ca ha ramã ate amji kam me gapac xà tetetti, impejti kam ampo kên jamreare ata to amji mã me gàhcuprôn hiahpuro na, imã me ato prãm. Mãr quê

cato, ne ahnaa me pahcunea pupu, ne ihkôt me pahna amji capa, ne nee ame pahcurê nare.

Pê jŭmjê Pawrô jŭjarêñ xà kaj na me to pry ta

2 Timot 3.1-17; 1 Jowãw 3.2-3

¹⁵ Ne Pahpãm te apu kuu ihkên xà ita pyrên ca ame gakry. Ampo na? Ca cormã apu ihkên ita kam, ihhêaj to cormã me anõ hÿrmã apkjê, quê ha akên pê apytà. He Pahpãm te ramã me pamã me pahtõ kînti pê Pawrô ata mã amji jahkre pej catia ne hõr. Mã cute amji jahkre pejti ata kôt ampo itajê na me amã ihhêc. ¹⁶ Ne cute hõ kàhhêc cunea kam ihhêc atajê kam, cute ramã me pamã Jeju te amji jaxàr xà ita kôt harên to amji pyrác tu. Ne hõtpê hõ kàhhêc kwÿ kam, me papê ampo kwÿ kam me pajapac jahkre kêatre atajê na hãn ne me pamã ihhêc. Ne cute me amji jahkre kêatre atajê me, cormã kyre pê Jeju kôt me ipa atajê, ampo itajê kôt harên xà kaj na ame harê. Ne Pahpãm jarkwa jõ kàhhêc kwÿa kôt me harên xà ihmajti atajê to pit mã me harê. Ne cute me harên xà atajê to me taa me amji kên mã me amji rê.

Cu ha Jeju te amji kam hapac xà tuwti kam amji to aj-camê

¹⁷ Ne me ca nare, me ijõ ikwÿ nõ kînti itajê. Ramã quêt me amã jŭmjê atajê te amji kam me hapac xà te ihcupan na, me amã hahkre pej. Cwÿrjapê ca ha amji to me guphêa ne. Ampo na? Ca ihhêaj to hanea ne mehkôt me Pahpãm jõ pry ta, ne ihkaj na ame apa. Ne nee hipêr catyt kam Pahpãm te amji kam hapac xà kôt me apa nare. ¹⁸ He pê me pajõ Pahhiti pê Jeju Crixto pê me pahpytâr catê, me pamã cute amji kam hapac xà tuwti gõ ita, ca ha cute me akam ipicamên na cama me hamã, quê ajcamê. Mår ca mam ate amji kam me gapac xà atajê jirôa pê catyt kam apa. Ne ita caxuw, cu ha hõtpê Jeju to amji mã me cati to me hane he:

— Quêt apyxit peaj ne acati, ne ampeaj kam apej rohnÿtti mã. Ne wa mehcunea te, pjê cunea kam, quêt acatihti me apejti na, me gahkre pej na me to prãm — hane. Taa mã, ampeaj kam!

1 JOWĂW

Ŷhŷ, pê Jowăw pê Jeju jarkwa na memprar catêjê nõ. Ne pê mam cupê tep pro catê, pê Jeju ihkôt ipa catê na ahna ahwŷ. Pê caku crê kam Jeju kôt ipa, ne cute amji kam hapac xà cunea na hõmpu. Ne ramă ihwejtu kam ri cute pjê cunea kam Jeju na mehkwy mã ihkàhhôc ita hôc, ne ihkujahêc. Na ri hõ kàhhôc ita japyr te (1 Jowăw). Ne pom cu me mam ihkàhhôc cahyt ita kam ri cute me pamă, pahte me ampo kên ton, ne ahna amji to me papimxur nare, ne hirăa pê Pahpăm mã pahte ahna me amji jarên to me pamă hahkre. Ne hanea ne jũ mã me pahte me, ne me papê Pahpăm tekjê na pahte me amji jahkre pej to me pamă hahkre. Ne hanea ne cute me pahkwŷ me, me pamă ajpên kînti to me pamă hahkre.

Jowăw te Jeju pupun na amji jarên xà

Jowăw 1.1-4

1 Hàpà me ikwŷ pê Jeju na mehkwy, ipê Jowăw pê mam Jeju kôt me ipa catêjê atajê nõ. Ne pa wa ha me amă ihhôc ne ihkujate. Ŷhŷ, wa ha me amă ramă rŷ pêa mã pjê ton xwŷjrea na jũm ipa ata jarê, ne ahna ihhôc. Ne jũm ita pê me pamă pahte amji kam me pajapac xà jôr catê. Ne cupê Pahpăm te amji kam hapac xà xakat. Ne cupê me pamă Pahpăm to ipipê catê. Cwŷrjapê ri haprŷ pê "Pahpăm Jĩa Jarkwa". Ne por jũm ata pê jũm nare, he cupê Jeju Crixto. Pê hũmrea na amji to, ne pjê wŷr wrŷ, pê wa ihkôt me ipa catêjê me, me ijapac jĩa to me kampa, ne me ito jĩa to ajco me hõmpu, ne mehkôpĩ, ne itŷj me ijũhkra to ajco mehcupê.

2 Ŷhŷ, Jeju mam Pahpăm cahê na ihkrĩ, ne cupê Pahpăm Jĩa Jarkwa, ne cupê me pamă cõjkwa pĩn Pahpăm te amji kam hapac xà to ipipê catê, ne pê wa cute me cumă to ipipê na hõmpua na, wa me amă harên to mõi. Ne taa mã ri Pahpăm cahê na pahte amji to me papijapar rohnŷtti mã na me pahto. **3** Ne ampo na mã wa me amă Jeju jarên to ipa to hane? Nee mã ampo na nare. Imă me ate Jeju me Pahpăm pê Hũm me, me ajpên to ikwŷ nõ na me ato prămte hajŷar, pom pê wa ipê hõ ikwŷ nõ he. Ita na cu ha me pahcunea Jeju me ajpên kam me pahhõnco ita na me papa. **4** Ate me ijõ kàhhôc ita cahyt ne mempar, cu ajpên kam me pajakrya to me pajakry prăm to, wa ite me amă ihhôc ne ihkujahêc.

Cu ha catyt kam Pahpăm jarkwa kôt me papa na, cu ha me pahhõnco tu

Epet 5.3-21; 1 Timot 2.5-6

5 Pê Jeju me imă, ite me amă Pahpăm jarên xà ita to pê hahkre he:

— Amcro jàhcujrohti ita ihtŷj jũ ri me pamõr xà ata to me pamă hahkre, ne awcapàtkô kam, cu nee jũ kam me pamõr xà ata na me amji jahkre pej nare. Ita kôpit na mã Pahpăm pê amcro jàhcujrohti ata pyrăac, ne ihtŷj me pahte amji kam me pajapac xà impejti to me pamă hahkre — hane. **6** Cwŷrjapê cu ha me pahnõ te

nee Pahpăm kôt papa nare, ne pahtŷj ampo kên ton to me papa na, cu ha ihhêj ne awcapàtkô kam me pahkrĩ. Cu ha awcapàtkô kam me pahkrĩ cacrô, cu ha me amji jarên to:

— Ipê Pahpăm jõ ikwŷ nõ, na wa cume ajpên kam ihõnco ita na ipa — hajŷr na, cu ha ame pahhêj xia jarê, ne nee me papê catyt kam me papa catêjê nare. **7** Ne nee pahte me hajŷr xà nare, cu ha quêt Pahpăm cuxà, catyt kam me papa, ne harkwa kôt me pahcunea ajpên to me ikwŷ nõ. Hõ, cu ha me pahcunea me hane, ne pahte me hajŷr xà ita pê ihhêj rũm amcro jàhcujrohti kam me papa xà ata pyrăac, ne ma amji mã me papa xà pupu ne ihkôat, catyt kam me papa. Pê Pahpăm kra pê Jeju me pajaxà kam ty, ne caprô jaxwŷ, ne caprô ata pê ihhêj rũm cõ te ampo tũmti cuhhõn pyrăac. Ne cute me pahkên atajê cunea cuhhõn par ne to hapac kêt. Cwŷrjapê ri pahte amji kam me pajapac xà cunea tetet pit.

Cu ha Pahpăm mã pahte me ampo kên ton atajê cunea na me amji jarê

8 Quê ha me pahnõ te amji jarên to:

— Nee ite amji kam ijapac xà kên nõ hamreare — hajŷr na, quê ha ramă taa apu amji to ihhêj to mõi, ne nee caxwăm pê cumă Jeju te amji kam hapac xà jahkre pej nare. **9** Ne quêt ajteare mã ita to, cu ha me he. Cu ha Pahpăm mã me pahte ampo kên ton atajê cunea na me amji jarê. Ne pahte amji jarên xà ata kam, quê ha Pahpăm pahte me pahkên ton atajê to tojnõ ne hici, ne pahte amji kam me pajapac xà kên cunea pê ihhêj ne me pahcuhhõn pa. Ne cupêa ri catyt kam ipa catê, ne pê ramă me pamă ahna amji jarên xà ata, quê ha to. **10** Ne pê ramă Pahpăm rŷ pêa mã me pahto hũjarên to hane he:

— Pjê kam mehcunea mehkŷrĩ itajê ihtŷj hõtpê mehkên ton to me ipa — hane. Cwŷrjapê quê ha me pahnõ te amji jarên to:

— Wa ite nee jũ caxuw ampo kên ton nare — hajŷr na, quê ha ramă Pahpăm mã ihhêj xi na hacjê, ne nee Pahpăm jarkwa to amji jahôt to ipa nare.

Jeju Crixto pê me pahkritxwÿ

2 Me apê imã me ikra kinti atajê pyrãac. Ampo na? He ca ikôt Jeju to amji mã me ahimpej, na wa ite me amã ihkãhhôc ita ton, mãr ca me cahyt ne me kampa, ne nee me ampo kên ton to me apa nare. Nãmri quê ha me pahnõ te ihkên xà nõ ton na, quê ha Jeju pê catyt kam ipa catê ata taa to amji pytà, ne taa Hũm mã harê. Ne cumã amji jarên to:

— Jũm ata te ihkên ton xà ita jahpan xà na ihkên mã mẽn nare. Ampo na? He pê wa ramã pa amji to ihkritxwÿ, ne hahpan xà na ty — hane. Jeju peaj to impej, na ri ihtÿj me pahto hane. ² Jeju tyc xà ata kôt ri Pahpãm ihtÿj pahte me pahkên ton itajê jicu, ne to tojnõ ne to hapac kêt. Ne nee mã pahte me pahkên ton xà jahpan xà na pit mã Jeju tyc nare, ne pjê cunea kam, mehcuea te mehkên ton atajê cunea kritxwÿ na ri cute amji ton ne ihtyc.

³ Cu ha pahte me Pahpãm te me pamã harkwa jirên itajê kam catyt kam me pajapac na, cu ha pahtÿj me pamã pahte Pahpãm jahkre pej na me amji jahkre pej, ne ihkôt me papa xà impej na, me pamã amji jahkre pej. ⁴ Nãmri quê ha jũm te amji jarên to:

— Wa ramã ite Pahpãm pupun pejtu, ne imã hahkre pej, na wa itÿj ihkôt ipa — hajÿr, ne nee por cute cumã harkwa jirên xà atajê kam hapac nare na, quê ha taa ramã apu amji to ihhêj to mõi, ne apu ahna amji caprÿ jarê. ⁵ Ne quêt jũm te Pahpãm kam hapac pejti to ipa ata mã ri caxwãm catia mã Pahpãm kîn, ne ihtÿj cumã Pahpãm me cute ajpên kam ihhônco na amji jahkre pej. ⁶ Nãmri quê ha jũm te amji jarên to:

— Wa Pahpãm me ajpên kam ihônco tu — hajÿr ata, quê ha harkwa to amji japackrea ne, ne ihtÿj Jeju pê Pahpãm kra te amji kam hapac xà kôt ipa na amji to ihtÿj tu ne. Ne ihtÿj cumã Pahpãm me ajpên kam ihhônco tu na amji jahkre pej.

Cu ha me pamã ajpên kinti to me papa to me prãm

Jowãw 13.34-35; 1 Jowãw 3.14-18

⁷ Imã me ijõ ikwÿ nõ kinti itajê, xà ajkĩ cormã wa Pahpãm te me amã harkwa jirên xà itajê na me amã ihhônco? Hãpà! He rÿ pëa mã ramã pahte me ajpên kinti xà ita na cute me pamã harkwa jirên xà ata na me gũpar.

⁸ Na wa ha Jeju te amji kam hapac xà kôt hipêr me amã harên to intuw. Ne pahte me ajpên kîn kam me pahtêm xwÿjrea na, pê mam ramã Jeju amji mã me pahkîn. Ne pom Jeju te amji mã me pahkîn ata pê ihhêj rũm pyt krã cator pêê mã hàhcujro. Ita kôpit na, pahte me ajpên kîn to me papa xà ita pê ihhêj rũm ramã pyt jàpir tu jàhcujro. Na ri pahte ajpên kinti to me papa xà ita pê ihhêj rũm, nee me pahkam awcapàtkõ nare.

⁹ Nãmri quê ha jũm amji jarên to:

— Pahpãm te ihhêj ne imã ite amji kam ijapac xà cujro, cwÿrjapê ri imã ampo pej cunea ton jahkre pej — hane, ne ma apu Jeju kam ajpên to mehkjêjê atajê nõ caca, ne nee me to impej nare na, quê ha ihhêj ne cormã awcapàtkõ kam apu ipa ita na. ¹⁰ Ne por jũm mã Jeju kam cute ajpên to ihkjê kinti, mã ihkîn mea mã ipa

ata pê ihhêj rũm amcro jàhcujro kam ipa xà, cwÿrjapê quê ha nee catyt kam ipa jicu nare. ¹¹ Ne por jũm mã ihkjê kîn nare, mã ma apu ihcaca ata pê ri ihhêj rũm awcapàtkõ jàmkrã kam mõi xà ata pyrãac. Ne cupê ihhêj rũm mento tũam, ne nee hãn ne catyt kam Pahpãm te amji kam hapac xà kôt ipa nare.

Cu ha pjê kam amji kam me hapac xà kaj na me papa to me prãm

¹²⁻¹⁴ Ihhêj rũm me apê me ikra pyrãac, na wa ite me amã ihhônco. Ampo na? He me amã Pahpãm pê me Apãm jahkre pej. Na ri ikra pê Jeju tyc xà ata kôt, cute me akên itajê to tojnõ ne hucu. Ne por ca ramã Jeju kôt ate me apa to me amji kàhtu atajê mã, wa ite hanea ne ihhônco. Ampo na. Me amã, por pê ramã Pahpãm pjê ton xwÿjrea na jũm ipa ata jahkre pej. Ne pom ca curmã Jeju kôt ate me apa kam me atêm atajê mã hanea ne ite ihhônco. Ampo na? He ampeaj kam me atÿj, ne me acaxwãm pê ihtÿj Pahpãm jarkwa amji to ajpa. Na ca ate amji kam me gapac xà impej to, ate me pahcurê xwÿn pê Xatanaj jirõ pê me axãm, ne me tohêj.

¹⁵⁻¹⁶ Ne wa ha me amã pjê ita kam, Pahpãm curê xwÿn te amji kam hapac xà me ampo cunea hapôj itajê cawpa. Pom pjê kam ampo kên itajê nee cõjkwa pîn, Pahpãm pîn hapôj nare, ne pjê ita pîn ri hapôj. Ne por Pahpãm curê xwÿn catêjê atajê te amji kam hapac xà incré itajê mã he:

Cute me Pahpãm mã ampo kîn nare atajê xen.

Ne cute me cumã ampo kên xen atajê to, cute me amji cajpuaw prãmte, ampeaj kam me cumã hãn.

Ne hanea ne quê ha ampo te mehcajpuaw ata pupu, ne me ahna prãm pyrentu.

Ne hanea ne me cumã hàhcukrêj jàhtõti atajê kôt ihtÿj amji to me cati prãm to me ipa.

Atajê mã ri Pahpãm kîn nare. Na ca ha nee me apê jũmjê atajê pyrãc, ne amji mã ampo itajê na pit mã prãm to me apa nare. Ne Pahpãm ca quêt amehkîn. Nãmri ca ha ate me amã ampo itajê pit kîn na, quê ha nee me amã Pahpãm kîn nare.

¹⁷ Ne mër ampo na mã wa me amã ampo itajê cawpa to hane? Nee mã ampo na nare. He quê ha jũ caxuw pjê te amji kam hapac xà itajê cunea me, Pahpãm curê xwÿn te ampo xen xà itajê cunea ihkên mã axà ne hamre tu. Ne por quêt me cumã Pahpãm kîn, mã Pahpãm mã ampo kinti to pit mã amji kam me hapac to me ipa atajê, quê ha quêt me ahtwÿ, ne amji to me ipijapar rohnÿtti mã, Pahpãm cahê na.

Cu ha nee Crixto curê xwÿnti hêj xi xà kam me pajapac to me prãm nare

1 Jowãw 4.1-6; 2 Jowãw 7-11

¹⁸ Me ikra, he ramã ampo cunea jamre xà na hàhtêp. Ne ramã ate me Jeju Crixto curê xwÿnti ata jarên par. Ne por jũm ata pê ihhêj ne põi rũm Jeju Crixto te amji kam hapac xà kôt ipa catê, ne caxwãm pê aracri cupê Jeju curê xwÿn. Ne ramã Jeju curê xwÿn catêjê jàhtõa ne me hapôj, cwÿrjapê ri ramã me pamã ampo cunea jamre xà na hàhtêp to mõi na hahkre pej. ¹⁹ Ne pê

mam me pahcurê xwÿn itajê pê me pahkwÿa, ne ihtÿj me pahcahê na ipa. Ne hamre, ramã ma me papê cator, ne nee mã ampo na me papê cator nare. Pê pahte amji kam me pajapac xà kaj na amji kampa. Quê ha cama me cupê me pahkwÿ na mã, quê ha ita ri me pahcahê na ame ipa. Pê me papê me hapôj xà ata kôt me pahcunea te me cupê me pahkwÿ nare na me hahkre pej.

²⁰ Pê Jeju Crixto me amã Pahpãm Carô Pejti gô, pê ca ahna me amji capa, cwÿrjapê ri me acunea mã Pahpãm te amji kam hapac xà impejti, hêj xi nare ata jahkre pej. ²¹ Xà ajkî ate me Pahpãm te amji kam hapac xà impejti jahkre pej nare na mã, wa ite ahna me amã ihhêc? Hãpà. He ramã me ate, cute amji kam hapac xà impejti kam ihhêj xi nare na, ate me hahkre pej.

²² Wa ha me amã mehhej xi catêjê jarê. Quê ha jÿm te me amã hÿjarên to:

— He nee Jeju pê, por pê Pahpãm me pamã pahpytâr catê na Crixto to awjahkre ata nare — hajÿr na, ca ha mehhej xi na me hahkre pej pyrentu. Ne ihtÿj Jeju me Hÿm pê Pahpãm to mehhej to me ipa, ne ma ame curê. Cwÿrjapê ri jÿm ata pê Crixto curê xwÿnti.

²³ Ne por jÿm Jeju pê Pahpãm cãmter ita to ihhêj xi ata, hanea ne ihtÿj Pahpãm pê Hÿm to ihhêj xi, ne ma apu curê. Ne quêt jÿm te ihcãmter na amji caxâr ata te ramã hanea ne Hÿm na amji caxâr.

²⁴ Pê ca Pahpãm wÿr me apkjê, ne me kampa ata kam, pê ca me Pahpãm te amji kam hapac xà cunea jahkre pej. Ne ate me hahkre pej atajêa kôt, ca ha catyt kam me apa kam me to acrà. Ita na ca ha ihcãmter me Hÿm kam me ajpên hõnco ita na, ne me atÿr rohnÿtti mã, Pahpãm cahê na. ²⁵ Hõ, ampo ita to pê ihcãmter me pamã awjahkre.

²⁶ Ne pom ame amã ihhêj xi prãm to me ipa itajê na, wa ite me amã ihhêc. ²⁷ Ne ramã Crixto te me amã Carô Pejti jôr. Mã me akam Carô Pejti ita kam, ca ha nee me jÿm te me amã ampo to hahkre xà ata na me prãm nare. Ampo na? Carô Pejti ata ri ihtÿj me amã Pahpãm te amji kam hapac xà cunea to hahkre to ipa. Ne cute ampo to hahkre xà atajê nee mã ihhêj xi nare, ne quêt ampeaj kam ri. Cwÿrjapê ca ha Carô Pejti te me amã ampo to hahkre xà atajê na kam me gapac to impeaj ne, ne ma ihkôt me hakop. Ne Crixto me ajpên kam me ahõnco kam me to acrà.

²⁸ Ýhÿ, imã me ikra kÿnti itajê. Quê ha ihtÿj jÿ caxuw me pajô Pahhiti pê Jeju Crixto hacpÿ ne me pahwÿr amji jaxà. Cwÿrjapê ca ha Crixto me ajpên kam me ahõnco kam me to acrà ita na. Mã ca nee kam ame apahàm, ne ame amji mã hÿpa nare, ne atÿj cuna mã me xa.

²⁹ Ne ramã me amã Crixto pê Pahpãm kra te catyt kam ampo pej pit ton to ipa na hahkre pej. Na cu ha pahte catyt kam ampo pej pit ton to me papa na, cu ha hanea ne me papê Pahpãm kra na ramã me pamã amji jahkre pej.

Cu ha pahtÿj jÿ caxuw Jeju Crixto me, me ajpëan

Jowãw 1.12-13; 1 Petrô 1.13-21; 2 Petrô 3.11-14

³ Pÿhàpà, he Pahpãm mã me pahkÿan to me pahkÿn! Ne ihtÿj cute me pahto amji kra. Mã pjê kam me cupê Pahpãm tekjê nare, ne ma ame curê atajê pê me papê ihkra na me pajahkre kêatre. Ampo na? He nee me Pahpãm jahkre pej nare na ri. ² Imã me ijô ikwÿ nõ kÿnti itajê, ramã me papê Pahpãm kra. Ne cormã jÿ caxuw me papê ihkra to ihkra xà ata na, cormã pahte me amji jahkre pej pej nare. Ne ita ri me pamã hahkre pej he: Quê ha hacpÿ ne Jeju me pahwÿr amji jaxà, ne me pamã amji to ajpê, cu ha ajteare mã, ihnô na me hõmpu. Ne pahte me hõmpun xà ata caxuw, cu ha me amji to intuw, ne Jeju me, me ajpëan. ³ Ne pahte amji to me papintuw xà impejti ita jikaj xà ata kam, cu ha hahkà na amji tète pahte amji kam me pajapac xà kên cunea japôj to me mō. Ne pahte amji kam me pajapac xà tetetti impejti to me amji kampa to me hanea, pom quê Jeju te amji kam hapac xà tÿm nare ne ihtetetti he.

⁴ Ne quê ha jÿm te, cute amji kam hapac xà kam ampo kên to ihtÿm na, quê ha taa ramã Pahpãm jarkwa jirô pê ihpÿm, ne ihkaj na amji kampa. ⁵ Ne ramã me amã Jeju te jÿ caxuw ampo kên ton nare na hahkre pej. Ne taa mã pê me pahwÿr wÿrÿ, cute me pahcunea tète me pahkên jÿrên prãmte. ⁶ Na cu ha pahte Jeju kam me ajpên hõnco na, cu ha nee me pahkên ton kam me to pancrà nare. Nãmri quê ha jÿm te Jeju jahkre pej nare, ne hõmpun pej nare kam, mãnea mã ihkên ton kam to incrà na, quê ha nee Jeju to amji mã ihhimpej, ne me ajpên kam ihhõnco nare.

⁷ Imã me ikra kÿnti itajê, nee ca amji na me jÿm jamâr quê me amã ihhêj nare. Ne por jÿm catyt kam Pahpãm cuna mã impejti to ipa ata pê ri Jeju pyràac, ne catyt kam ipa. ⁸ Nãmri quê ha jÿm te mãnea mã ihkên ton to ipa na, quê ha Pahpãm cuna mã ihkêanre ne, ne cupê me pahcurê xwÿnti pê Xatanaj tekjê. Ampo na? Pê Pahpãm pjê ton pèa mã, pê Xatanaj ihkên ton kam tē. Cwÿrjapê ri cute Xatanaj jàpên xà cunea to hamre xà caxuw me Pahpãm kra cato.

⁹ Ne por me cupê Pahpãm kra atajê, nee mehken ton kam me to incrà nare. Ampo na? Me caxwãm pê Pahpãm te amji kam hapac xà hàpên to ipa na ri. Ne Pahpãm pê me Hÿam to me Hÿm ita kam, jÿ mã quê ne ajte mehken ton kam me to incrà? Jÿ wÿr quê jÿm hane! ¹⁰ Mër me Pahpãm kra, me Xatanaj kra te amji kam hapac xà to me ajpên ne me hõmpu. Por jÿm nee catyt kam ipa nare ata me, cumã ihkjê kÿn nare ata hirã pê nee cupê Pahpãm kra nare, ne cupê Xatanaj kra.

Cu ha me pamã ajpên kÿnti to me papa to me prãm

Ruc 10.25-37; Jowãw 13.31-35

¹¹ Imã me ijô ikwÿ nõ kÿnti itajê, por pê wa mam me amã Pahpãm jarkwa jarê ata, wa ha hipêr me amã harên to mō:

— Cu ha me pamã ajpên kÿnti ne — hane. ¹² Cu ha nee me papê me panquêt xwÿ pê Cãn kèanre pê

Xatanaj tekjê, ne ihtôa cura ata pyrâc nare. Ne mër ampo na mã pê ihtô te amji to hapure ita cura? Pê ajco hapure catyt kam impejti ton to ipa, ne Cãn pê ihkînte ajco ihkêanre ton to ipa, ne ma apu ihtôre te impejti ton ita na to ihcaca, na pê ihcura.

¹³ Ýhÿ me ikjêjê, he me cupê pjê ita tekjê catêjê te ihkên ton to hajÿr tûam. Ne quê ha cute me hajÿr catêjê ma ame acurê, ca nee me amji mã:

— Pÿhàpà, ampo na mã ame icurê? — hajÿr nare.

¹⁴ Ne por me cumã mehkîn nare atajê pê ri ihhêj rûm mehtyc pyrâc, ne nee me ampo pej ton nare, ne ma ramã ihkên kam, cute me amji pupun xà kêanre ata wÿr me pra. Ne me pa nare. Ihtÿj quêt me pamã Jeju kam me cupê me pahkjêjê kîn. Cwÿrjapê cu ramã me papê ihhêj rûm pahte me pahtyc xà jahpan, ne ma me pampej mã, amji kînti ata wÿr me pamprar pyrâac.

¹⁵ Quê ha jûm te ma apu ihkjê curê na, quê ha ramã Pahpãm mã cupê mehcuran catê pyrâc. Ne ramã me pamã, jûm pê mehcuran catê ata te nee Pahpãm cahê na ihkrî nare na, hahkre pej.

¹⁶ Jû mã cu ha ajte me, ne me pamã ajpên kîn ita na me ajpên jahkre pej? Me Jeju pupu he. Ampeaj kam cumã me pahkîn, cwÿrjapê ri me pajaxà kam ihtyc. Ata pê ri me pamã ajpên kînti xà. Na cu ha me pamã me pahkjêjê kîn hanea, cu ha pahtÿj mencwÿrjapê me pahtyc na me amji to ihtÿj tu to me papa. ¹⁷⁻¹⁸ Ne nee cu ha me pajarkwa to pit mã ame pahkjêjê kîn, ne me to impej nare. Ne me hâpên xà na cu ha me tehcajpa, ne me to impejti ne, ne ampeaj kam me pamã mehkîn. Ne quê me anô mã ampo, ca me akjêjê nõ pupu quê apu ampo na prãm to mõ, ca ha hõmpu ne atÿj gâhcukrêj to ihtehcajpa. Nãmri ca ha ate nee me akjêjê caprî nare, ne nee mehtehcajpar nare ita kam, jû mã ca ha ajte ne amji jarên to:

— Imã Pahpãm kîn — hane?

Cu ha ajpên kînti to me papa na, cu ha pahcaxwÿn carîcti kam me papa

¹⁹ Me pamã me pahkjêjê caprî xà ita ihtÿj me papê Pahpãm hêj xi nare ata tekjê na me pajarê. Cwÿrjapê cu ha Pahpãm cuna mã me paxãm xà jô amcro ata kam, cu ha nee me pahkên na me amji cãmji nare, ne quêt me pahcaxwãm pê me pahcarîcti ne. ²⁰ Nãmri cu ha me pahcaxwãm pê me pahcarîc nare na, cu ha cama me amji cukij to:

— Xà ajkî ipê Pahpãm tekjê? Nare mormô nee ipê hõ tekjê nare — hajÿr na, cu ha cormã me Pahpãm mã ampo cunea jahkre pej ata to me amji japackre. Ne hanea ne cumã me pajirôa pê me pamã pahte amji kam me pajapac xà pupun na me hahkre pej. Ne ita jirô pê cu ha cormã cumã me pahcaprî ata na me to amji japackre.

²¹ Imã me ijô ikwÿ nõ kînti itajê, cu ha pahte me ajpên kîn na, cu ha nee me pahcaxwãm pê amji mã ame Pahpãm cupa, ne nee ame pahpahàm nare. ²² Ne por cu ampo cunea na me cwÿ atajê, quê ha ihtÿj me pamã cugô. Ampo na? Cu pahtÿj cute me pamã harkwa jirên itajê na me kampa, ne cute amji mã ampo kîn-

ti itajê to pit mã me hupkre cahkô to me papa. ²³ Pê Pahpãm mehcunea mã harkwa hyr to hane he:

— Ikra pê Jeju Crixto to ca amji mã me ahimpej, ne hanea ne me amãa ajpên kînti ne — hane. Ne pê hanea ne me imã harkwa hyr to hanea he. ²⁴ Quê ha jûm te Pahpãm te cumã harkwa jirên itajê na kam hapac to ipa na, quê ha cume ajpên hõnco tu ne, ne ajpên kam mehkrî. Ne pê Pahpãm me pamã Carô Pejti gô, cwÿrjapê ri me pamã ita jahkre pej.

Cu ha nee Jeju curê xwÿnti atajê kam me pajapac to me prãm nare

¹ Texarôn 5.21-22; ¹ Jowãw 2.18-26; ² Jowãw 7-11

4 Imã me ijô ikwÿ nõ kînti itajê, quê ha me hàhtôa ne me amã amji jarên to:

— Pahpãm Carô Pejti te imã amji jôr, wa harkwa kôt harên to ipa — hane. Ca ha nee me kam gapac nare. Ampo na? He ramã me hàhtôa ne pjê kam amehc-ahkûm, ne Pahpãm jarên xà kaj na ame harên to me ipa. Cwÿrjapê ca ha ma me jûm te me amã amji jarên to hajÿr ata kôpî, ne ihkôt me hakop, hâpên xà atajê na. ² Cu ha me kampa, quê ha cute catyt kam me amã Pahpãm jarên to:

— Pê Jeju me paxûmrea na amji to, ne me pahwÿr wrÿ, ne cupê, por pê Crixto to me pahkritxwÿ na, Pahpãm me pamã awjahkre ata — hajÿr na, ca ha me kampa. Ne me amã ampeaj kam cupê me amã Pahpãm jarkwa to ihcakôc catê, ne kam Pahpãm Carô Pejti na me hahkre pej pyrentu. ³ Nãmri quê ha cute Jeju jarên to hajÿr nare na, ca ha ramã kam Pahpãm Carô Pejti nare na me hahkre pej, ne kam Jeju Crixto curê xwÿnti carô kên na me hahkre pej pyrentu. He pê cu ramã ampo carô kên ita te pjê wÿr ajpên môr na me harên pa, ne hamre, ramã cator ne ihtÿj apu mõ.

⁴ Jeju kam me apê me ikra kînti atajê, me apê Pahpãm tekjê, na ca ramã cute me Pahpãm jarên kaj na ame harên catêjê atajê jirô pê me axãm, ne me tohê. Ampo na? He me akam Pahpãm Carô Pejti ihkrî ita ri, pom pjê kam me kam ampo carô kên atajê jirôa pê ihtÿj. ⁵ Ne me cumã pjê kam ampo itajê jarê, mã ihtÿj me cupê pjê ita tekjê pê Pahpãm curê xwÿn catêjê me kampa. Ampo na? He pjê ita te amji kam hapac xà ri me cumã harê, mã pjê ita kam me ipa catêjê pê Pahpãm curê xwÿn atajê ihtÿj ahna me kampa. ⁶ Ne me pa nare, he quêt me papê côjkwa pîn Pahpãm tekjê, ne cu me Pahpãm te amji kam hapac xà to pit mã me hupkre cahkô to me papa. Quê ha jûm mã Pahpãm jahkre pej na, quê ha ihtÿj me pahkampa. Nãmri quê ha cumã Pahpãm jahkre pej nare na, quê ha nee me pahkam hapac nare. Ita na cu ha me Pahpãm Carô Pejti te amji kam hapac xà impejti hêj xi nare ata me, ampo carô kên te amji kam hapac xà kên te to ihcupan xà na me hahkre pej.

Cu ha Pahpãm cuxà me pamã ajpên kînti na to prãm

Jowãw 3.16-21; Roman 5.5-9

⁷ Imã me ijô ikwÿ nõ kînti itajê, cu ha me pamã ajpên kîn, cu ha me ajpên to impejti ne. Ampo na? Pahpãm

te amji kam hapac xà ita te hajýr pit, ne taa mã ri me pamã ajpën kînti ita na me pahtehcajpar to ipa. Por jûm mã mehcunea kîn, mã me to impej ata pê ri Pahpãm kra, ne ihtýj cumã Pahpãm te amji kam hapac xà na hahkre pej ne hahkre pejtu. ⁸ Ne por jûm mã mehkîn nare ata pê Pahpãm jahkre kêatre. Ampo na? Pahpãm jähcaprĩa to hähcaprĩ, ne cupê cumã mehkînti xà cunea xakat. ⁹ Ne Pahpãm mã me pahkînti na cute me pamã amji to ipipê xà caxuw, me pamã pjê wýr cumã ihkra pyxit peaj ata kujate, mãr cu me cute amji kam hapac xà intuwti impejti ita cwa, ne kam me pahfír rohnýtiti mã. ¹⁰ Me pamã Pahpãm kîn, ne me pajirõa pê cumã me pahkîn. Cwýrjapê pê me pamã ihkra pê me pahkritxwý ata kujate, mãr quê pahte me to kên ata jahpan xà na ty, quê Pahpãm pahte me to kên xà atajê jicu.

¹¹ Imã me ijõ ikwý nõ kînti atajê, he ramã Pahpãm mã me pahkînti ita kam, cu ha pahtýj me pamã ajpën kînti ne. ¹² Rý jû caxuw jûm te Pahpãm pupun nare cakrõ, cu pahtýj kam pahte me amji hõnco. Mã me pahcaxwãm pê ihkrĩ, ne cumã me pahkînti na ri cute amji kõat me pahon, mã me pamã ajpën kînti. ¹³ Ne cute me pamã Carõ Pejti jõr na, ca me to amji japackre. Cwýrjapê ri pahte Pahpãm kam me ajpën hõnco tu na me pamã amji jahkre pej. ¹⁴ Pahpãm pê me pajõ Inxũ Cati, na cu hõtpê mehcunea mã me harën to me papa to me hane he:

— Pê Pahpãm pjê wýr ihkra kujate. Pê wa hõmpu ata te mehcunea caprĩ ne mehkên catihtiti ata pê me hütär xà caxuw pê pjê wýr ihkujate — hane. ¹⁵ Nãmri quê ha jûm te Jeju Crixto pê Pahpãm kra na harën na, quê ha Pahpãm jûm ata mã amji gõ, ne kam ihkrĩ, quê ha hanea ne Pahpãm mã amji gõ, ne kam ihkrĩ, ne ajpën kam mehhõnco tu ne. ¹⁶ Ne me pamã Pahpãm te me pahkînti na hahkre pej, na cu toa amji mã me pahhimpej to me papa. He Pahpãm pê me pamã ajpën kîn ton catê xakat. Ne por me cumã ajpën kían kam mehkĩrĩ atajê ri, Pahpãm kam cute me ajpën hõnco tu. ¹⁷ Ne quê ha ihtýj jû caxuw Pahpãm te me pahcukij xà ata kam ihtýj me pahto ajcokjê. Cu ha Jeju te cormã pjê kam ipa reria mã me cumã mehkînti ata cuxà, me pamã mehkînti na, cu ha nee amji mã ame hũpa, ne kam ame pahpahàm nare. ¹⁸ Quê ha jûm te mehcunea caprĩ ne mehkîn to ipa na, quê ha nee jû caxuw amji na ampo cãmji nare. Ampo na? He Pahpãm mã ampeaj kam me pahkîn, na cu ha nee amji mã ame ampo cupa nare. Nãmri quê ha jûm mã mehcunea kîn nare na, quê ha ihtýj amji na Pahpãm cãmji pyrentu, ne cumã hũpa. Ne cumã ampo cupahti ata quê ha ihkên ata mã cumê.

¹⁹ Pahpãm mã mam me pahkînti, cwýrjapê ri me pamã ihkîn. ²⁰ Nãmri quê ha jûm te amji jarën to:

— Imã Pahpãm kîn — hajýr, ne cumã Jeju kam ihkjê kîn nare, mã ma apu curê, ata ri ihhêj xia to ihhêj xi. Ne jû mã quê Pahpãm pupun nare kam cumã ihkîn, ne ihkjê pupun cakrõ, ma apu curê ne apu ihcaca? Jû wýr quê cute hajýr ita kam apu amji mã hamã. ²¹ Pê Crixto me pamã ita na harkwa jirên to hane he:

— Por jûm mã Pahpãm kîn ata mã, quê ha ihtýj hanea ne ikam cupê ihkjê ata kîn — hane.

Cu ha me pamã Pahpãm kîn na, cu ha me harkwa kampa

Roman 8.35-37; Ipipê Xà 3.5

⁵ Por quê ha jûm Jeju Crixto pê Pahpãm kra, pê Hũm me pamã cupê me pahpytär catê na to awjahkre ata to jûm amji mã ihhimpej, ata pê ri Pahpãm kra impeaj. Cu ha me pamã jûm xũmre ata kîn na, quê ha hanea ne me pamã ihkra ata kîn. ² Jíkê na mã, quê ha me pamã Pahpãm kîn, cu ha cute me pamã harkwa jirên xà atajêa na, kam me pajapac na, quê ha hanea ne ihtýj me pamã me cupê Pahpãm kra na mehkwy atajê kîn. ³ Xà quê pijamã me pamã Pahpãm kînti ita kam, cu nee ajte cute me pamã harkwa jirên xà itajê kam me pajapac nare? Hãpà, cu ha pahtýj amji mã me kampa! He xà cute me pamã harkwa jirên itajê ajkĩ ampeaj kam me pamã ihtýj? Hãpà. ⁴⁻⁵ He pom me papê Pahpãm kra ita, ne cutea ri me pamã ampo cunea kam, pahte Pahpãm kam me pajapac xà caxuw carõt jõr. Ne pahte Jeju pê Pahpãm kra to amji mã me pahhimpej, cwýrjapê cu ha pahtýj, Pahpãm te me pamã carõt jõr ata kõt, pjê ita kam Pahpãm curê xwýn atajê te me amji kam me hapac xà kên cunea tohjê.

Cu ha Jeju Crixto cãmtà rũm Pahpãm cahê na me papa rohnýtiti mã

⁶⁻⁷ Ne jû mã cu ha me, ne me Pahpãm te Jeju to mehcunea pytär catê na hãm xà ata na me hahkre pej? He cõjkwã kam menchrê ne cute me pamã harën. Atajê pê, Jeju Pãm pê Pahpãm ata te cõ kam ihcumrär xà ata kam ri, Jeju pê ihkra na harê. Ne pê hanea ne Jeju pê Hũm Jĩa Jarkwãmã iwryc ne ihtyc, ne cute caprõ jaxwýr ata te ri, cupê Pahpãm kra na harën. Ne pê hanea ne Pahpãm Carõ Pejti hêj xi nare ata cupê Pahpãm kra na harê. Ne menchrê atajê pê Pahpãm to Pahpãm, ne ajpën kam me pyxit peaj.

⁸ Ne hanea ne cormã ita kam pjê kam menchrê ne me pamã Jeju pê Pahpãm kra na harën to me ipa ita na. Atajê pê Pahpãm Carõ Pejti hêj xi nare ata, mã catyt kam me pamã Jeju jarê. Ne hanea ne cõ kam me pahcumrär xà ata ihtýj me pamã harê. Ne hanea ne me pamã Jeju tyc na pahte me to amji japackre xà ata, ihtýj me pamã harê. Ne harën crê itajê pipën pit, ne ajpën kam pyxit peaj.

⁹⁻¹⁰ Ne quê ha jûm te me pamã ampo jarën na, cu ha pahtýj me kampa. Ne quê ha Pahpãm te me pamã Jeju pê ihkra na harën na, cu ha pahtýj pahte me hũmre jũjarën kam me pajapac jirõa pê me Pahpãm kampa. Ne por quê ha jûm Jeju pê Pahpãm kra na amji mã to ihhimpej ata, quê ha ramã amji caxwãm pê amji mã:

— Ampeaj kam ri Jeju pê Pahpãm kra to Pahpãm kra — hane. Nãmri quê ha jûm te Pahpãm to amji mã ihhimpej nare ata, quê ha ihtýj Pahpãm te apu ihhêj xi na harê. Ampo na? He nee Pahpãm te Jeju pê ihkra jarën xà ata to amji mã ihhimpej nare na ri. ¹¹ Pê Pahpãm me pamã ihkra jarën to hane he:

— Ikra tyc xà ita cwÿrjapê, wa ha me amã cute amji kam hapac xà tuw pejti gõ, ca ha ihkôat me apa, ne me atyc xà jirô pê mã icahê na me akrí rohnÿtti mã — hane. ¹² Hõ, por jũm te Pahpãm kra to amji mã ihhimpej ata te ri, cute amji kam hapac xà tuw pejti pyr. Na quê ha ihtyc jirô pê, Pahpãm cahê na apu ipa rohnÿtti mã. Nãmri jũm te nee ihkra to amji mã ihhimpej nare ata te nee amji mã Jeju te amji kam hapac xà tuw pejti ata pyr xà hamreare. Na quê ha ihtyc jirô pê, Pahpãm pê ampÿa mã apu ipa rohnÿtti mã. ¹³ Ne me ca nare. Ca atÿj Jeju to amji mã me ahimpej, na ri ate me amji mã cute amji kam hapac xà tuw pejti ita pyr. Na ca ha me atyc jirô pê, atÿj Pahpãm cahê na me akrí rohnÿtti mã na ate me hahkre pej pejtu, na wa ite me amã ihhõc.

Cu ha Pahpãm mã me pahcakõc, quê ha ihtÿj me pahkampa

¹⁴ Cwÿrjapê cu ha nee Pahpãm cuna mã hũpa kam, ahna me pajàhtat kam, cumã me pahcakõc nare, ne pahtÿj pahte ampo na me prãm xà ata na, cumã me amji cajrën. Ne ramã me pamã Pahpãm te me pahkam hapac, ne me pahtehcajpar na hahkre pej. ¹⁵ Quê ha ihtÿj me pahkampa, ne me pamã pahte ahna me pajàhwÿr xà atajêa jõr na, ramã me pamã hahkre pej.

¹⁶⁻¹⁷ Quê ha jũm te Jeju to amji mã ihhimpej cakrô, ihtÿj cormã ampo kên ton na, me anõ te hõmpun na, ca ha atÿj Pahpãm mã ihcajrën. Mã quê Pahpãm akampa ne jũm ata tehcajpa, quê nee hipêr ihkên itajê nõ ton nare, ne quêt cute amji kam hapac xà tuw pejti na ipa. Pê Pahpãm pahte cuna mã me to kên xà atajê

cunea pê me pahcator na me pamã harkwa to. Mã pahte hirô pê me pahpÿm xà ata na ri ihkaj na, ne ihkêanre. Ne ampo kên pyxit ata ri ihkwÿ jirôa pê ihkêanre. Na quê ha jũm te ihkên catia ata ton to hajÿr to ipa na, quê ha ihtÿj jũ caxuw hahpan xà na ty. Cwÿrjapê ca ha jũm te ihkên xà catia ata ton to hajÿr na, ate hõmpun na, wa ha nee ate mehcajren xà na, me amã ijũjahkre nare.

Pahpãm me pahte ampo kên ton nare na me pahtehcajpa
Jowãw 17.3-6

¹⁸ Me papê Pahpãm kra impeaj, na cu nee me pahnõ ampo kên ton to me papa kam to pancrà nare. Ampo na? Jeju pê Pahpãm kra, ne ihtÿj me pahcurê xwÿnti pê me pahpytà, ne me pahto kên cupate me pajamãr to ipa na, ramã pahte me hahkre pej. ¹⁹ Me pahcurê xwÿnti ita pjê cunea kam mehcuea to ihhimpej cakrô, mã ihtÿj cormã me pamã papê Pahpãm tekjê na, ramã me pamã amji jahkre pej. ²⁰ Pê Jeju pê Pahpãm kra cato, ne me pamã pahte amji jahkre pej krã kreti gõ, mãr cu me Pahpãm pê Pahpãm to Pahpãm na me hahkre pej. Ne Jeju pê ihkra, ne cupêa ri pahte amji kam me pajapac xà tuw pejti xakat na me pamã hahkre pej. Ne taa mã ri Hũm cahê na me pahkrí rohnÿtti mã na me pahto. Ne por Hũm pê Pahpãm to Pahpãm ata me, cu ha ajpën kam me pahhõnco ita na.

²¹ Imã me ikra kinti atajê, ca ha nee jũ caxuw Pahpãm ràn xà na pahpãm cahac krekà nõ to amji mã me ahimpej nare. Hõ, ijõ kàhhõc ita pit. Hamre.

2 JOWĂW

Ÿhÿ, pê Jowăw pê Jeju jarkwa na memprar catêjê nõ. Ne cute por pyjê nõ te hÿrkwa kam me cumă ampo kên to hahkre catêjê na amji caxàr ata mã, pom cu me hapu na hõ kàhhôc cahyt ita kujahêc. Na ri hõ kàhhôc ita japyr te (2 Jowăw). Ne kam cute cumă mehhêj xi catêjê cawpa, măr quê nee me kam hapac nare.

Jowăw te amji jarên xà

1 Hàpà me ikwÿ to mehhimpej catêjê! Ÿhÿ, imă me apê me akwÿ to mehhimpej catêjê kÿnti atajê. Ampo na? He ihhêj rÿm me apê menxyrxwÿa pyrăc, ne me akwÿ itajê pê me akra pyrăac. Pahpăm te ri me hamăr caxuw me acapi. Ÿhÿ, ipê Jowăw pê Jeju na mehkwy to ihhimpej catê, itea wa me amă ihkàhhôc ita kujahêc. Ampeaj kam imă me akÿn, ne ita ri Pahpăm te amji kam hapac xàa kôt, catyt kam me ipa itajê cunea mã hanea ne me akÿn. **2** Ampo na ri imă me akÿn? Nee mã ampo na nare, wa Jeju to amji mã me ihmpej to me ipa, cwÿrjapê ri cute me imă me akÿnti ton, na ri ampeaj kam imă me akÿn. Ne nee quêt Jeju pê ihhêj xi catê nare, ne quêt cupê ampeaj kam catyt kam ipa catê, ne ihtÿj hăn ne me pahcunea kam ihkrÿ, ne me pahcahê na apu ipa rohnÿtti mã.

3 Ne wa ijôtpê Pahpăm mã me pahcunea cajrên to ipa to hane he:

— Ijô Inxÿ Cati, wa ha akra pê me ijô Pahhiti pê Jeju Crixto me ajwar me ana ahwÿ. Ca me icaprÿ, ne me ijamăr to impeaj ne. Ne me imă me icaxwÿn kam, ite amji mã me ampo cupa xà nare gô, măr wa nee amji mã ame ampo cupa nare, ne me icarÿcti kam ame ipa, ampo kên jipôc ri. Ne hanea ne catyt kam me imă ite amji kam ijapac xà impejti to, ne me imă ajpên kÿnti to, wa me imă ajpên kÿnti ne — hane.

4 Wa ite me akôt me ipa catêjê kwÿ pê, ihhêj rÿm me ikra te catyt kam Pahpăm jarkwa kôt me ipa atajê kwÿ cajpar, ne ampeaj kam me hÿrên ijakry. Ampo na? He catyt kam me papa ita na ri Pahpăm te me pahcunea mã harkwa hyr, ne ahna me pamên.

Cu ha me pamă ajpên kÿnti ne

Jowăw 13.34-35; 1 Jowăw 2.7-11

5 Ne ita caxuw wa ha ite me gapackre xà ita na me amă ihhôc to hane he:

— Cu ha me pahcunea ajpên kÿnti kam ame papa — hajÿr. Ne pom ite me gapackre xà ita pê nee curmă ite me gapackre xà ata nare, ne cupê mam, por pê ca Jeju to amji mã me ahimpej xà ata. **6** Cu ha pahte catyt kam

ame ajpên kÿnti to me papa na, cu ha ramă, por pê Pahpăm me pamă harkwa hyr xà ata na pahtÿj me kampa, ne ihkôat ramă me amji ton to me papa.

Mehhêj xi catêjê nee Jeju te me hÿmre na amji ton na me harên nare

Roman 16.17-18; 1 Timot 5.22; 1 Jowăw 2.18-26

7 Ne ramă pjê kam mehhêj xi catêjê jàhtôa ne amehcahkÿm atajê ri hăn ne me Jeju jarên to me hane he: — Nee Jeju ita pê Pahpăm nare — hane. Atajê pê ri Jeju Crixto curê xwÿn, na ri ihtÿj me pamă mehhêj to prăm. **8** Ca ha nee mempar nare. Côt ca me kampa, ne me Pahpăm mã ate me gâpên xà ton itajê jahpan xà na, cute me amă hàmjôr xà atajê kwÿ to ame acto.

9 Ne por jÿm te Jeju te me hapackre xà impar nare, ne hirô pê ihpÿm ata, nee Pahpăm jahkre pej nare. Ne por jÿmjê te Jeju te me hapackre xàa kôt me ipa atajê, ihtÿj me Pahpăm jahkre pej, ne me Jeju pê ihkra na me hahkre pej.

Cu ha nee mehhêj xi catêjê na me amji to pôj nare

10 Quê ha jÿm me awÿr cato, ne nee catyt kam me amă Jeju te me hapackre xà ata to hahkre nare na, ca ha nee ahna me amji caxàr nare, ne nee me gÿrkwa mã me to axàr nare. Ne nee me cumă garkwa to:

— Apej pëa mã apa — hajÿr nare. **11** Nămri ca ha ate me jÿm ata mã hajÿr na, ca ha apê mehkwy nõa, ne me hàpên xà kên atajêa kwÿ to me gâpên to me apa.

Pê Jowăw me cumă amji jarên kujate

3 Jowăw 13-15

12 Ne cormă ampeaj kam imă me amă ampo jarên xà jàhtô, ne cama imă me amă ahna ihhôc prăm nare. Ne wa ha itÿj jÿ caxuw amÿ me awÿr icato, ne me akuc ri me amă harê, cu ha ajpên pyrên me pajakrya to me pajakry.

13 Ne pom ita ri me pahkjêjê ame ipa itajê te me amă amji jarên kujahêc, ihkàhhôc ita kam. Itajê pê ihhêj rÿm atôaj kra, pê Pahpăm amji mã me capi. Hamre, ita pit.

3 JOWĀW

Ÿhỹ, pê Jowāw pê Jeju jarkwa na memprar catêjê nõ, ne hõ ikwỳ nõ pê Cajo ata mã, pom cu ihkàhhõc crê cahyt itajê kujate. Na pê hõ kàhhõc ita japyrỳ pê (3 Jowāw). Ne kam cumã Cajo te Jeju jarěn catêjê tehcajpar pyrên hakryti na cumã amji jarě. Ne hanea ne cute cumã mehkwy to ihhimpej catê ata te amji kam hapac xà kêan kam ipa ata cawpa.

Jowāw te amji jarěn xà

Pirip 4.1; 1 Texarõn 2.19-20

1 Ÿhỹ ikwỳ nõ Cajo, ampeaj kam imã akĩn. Ipê Jowāw pê Pahpām na mehkwy to mehhimpej catê, itea wa amã ihkàhhõc ita kujahêc.

2 Wa ijõtpê Pahpām mã acajrěn to ipa to hane he: — Ÿhỹ, ijõ Inxũ Cati, ca ha ikwỳ nõ pejti ita tehcajpa, quê ha impej pêa mã apu ipa to hanea, pom quê ramã caxwỳn kam cumã Acarõ Pejti to ipa he — hane.

3 Ne ita ri me arũm me pahkjêjê nõ cator, ne cute me imã me apejti na me apa na, me garěn. Wa ite me garěn pejti to me garěn par, na ri ampeaj kam me apyrên ijakry. Ne cute imã me garěn to hajỹr he:

— Cajo ihtỳj hõtpê Pahpām te amji kam hapac xàa kõt, catyt kam ipa — hajỹr. **4** Wa hãn ne me ikwỳ to ihimpej ne me hamã itajê jarěn par xà impejti itajê to me harěn pa, ne ampeaj kam hãn ne ijakry.

Pê cute mehkjêjê tehcajpar pyrên Jowāw jakry

5 Ÿhỹ imã ikwỳ nõ kĩnti ita, quê hãn ne jũa rũm me pahkjêjê kwỳ me awyr hapõj, ca ate cormã me hõmpun nare cakrõ, atỳj me to kênre nare. Ata na ri impeaj to impej. **6** Na ri ita ri me pahkjêjê kwỳ cator, ne cute ita ri me cupê Pahpām na mehkwy mã me garěn to kênre nare, ate mehkĩnti ne me to impejti ita na. Na wa ite amji kam ijapac xàa na amã ijarkwa. Quê ha me pahkjêjê te me apê amji to me hapõj xà ata kam, ca ha nee me hũre kam amehkujahêc nare. Ne ate amji to Pahpām cajpuaw xà na, ca ha atỳj me cumã ampo gõ, quê ha ma me to pra. **7-8** Ampo na? Nee mã amjia kõt ame ipa nare, ne Pahpām jarkwa kõt hãn ne ame ipa, cute mehcunea mã Jeju jarěn pejti to harěn prãnte. Ne ma me pra, ne nee me cupê Jeju na mehkwy nare atajê pê ame ampo cwyr prãm nare. Cwyrjapê ri me papê mehkwy te me cumã ampo jõr na ri, me cumã ihprãm. Na ri pahte mehtehcajpar catêjê atajê, cu ha pahtỳj, cute me hãpên xà ton xà itajê kwỳ to me apê.

Nee Jeju na mehkwy jõ pahhi kên mã Jowāw par prãm nare

1 Jowāw 3.6

9 Ne wa ite ramã me gõ krĩ kam, Jeju na mehkwy wỳr ate mehtehcajpar xà ita na, me ato ihimpej prãm to,

ite me amã ijõ kàhhõc crire ata kujahêc. Nõ na mã me anõ japyrỳ pê Tijot ata ma apu ipar caca, ne ajte cama ihtỳj cumã amji to me gõ pahhi na amji to prãm, ne ramã cute amji to pahhi. **10** Cwyrjapê wa ha jũ caxuw curi icato, ne itỳj mehcunea kuc ri ihcukij ne cumã awjarê. Ampo na? Ihtỳj ampo na apu ito ihcakõc kêanre to ipa, ne ihtỳj ampo na me cumã ito ihhêj to ipa. Ne hanea ne, por me pahkjêjê kwỳ me hỹrmã me hapõj atajê na, nee amji to põj nare, ne ma ame curê. Ne quê ha mehkwy kam jũmjê me ahna amji capa ne me huwahi to prãm, quê ha Tijot ata nee me ahna me hamãr nare. Quê ha mãnea mã ma cute me jũm juwahi na, quê ha ihtỳj mehkwy pê amji têtê me hapõj pa.

Cu ha me hũmre impej pit kõt me papa

11 Na ca ha imã ikwỳ nõ kĩnti ita, ampo pej pit kõt amji to, ne nee ampo kên kõt amji ton nare. Ne por me ampo pejti ton to me ipa atajê pê ri Pahpām kra, ne por me ampo kêanre ton to me ipa atajê pê ri Pahpām jahkre kêatre, ne nee me cupê Pahpām kra nare.

12 Ne mehcunea me akwỳ nõ pê Temetti ata to me hũjarěn pejti to me ipa. Ne cute amji kam hapac xà pejti atajê, ihtỳj ihkõt harěn xà impejti to harê. Ne wa ite hajỹr ne amji mã me harěn to:

— Hũmre ita peaj to impej — hajỹr. Ne ramã ate, ite ihêj xi jarěn nare na, ijahkre pej.

Pê Jowāw Cajo mã amji jarěn kujate

2 Jowāw 12-13

13 Ne ampeaj kam cormã ite amã ampo jarěn xà jãhtõ, ne cama ahna imã amã ihhõc prãm nare. **14** Na wa ha jũ caxuw awyr tẽ, ne ijarkwa to akuc ri amã harê.

15 Na wa Pahpām mã acajrěn to hane he: — Ijõ Inxũ Cati, ca ha Cajo mã acarĩcti gõ, quê nee apu amji mã ampo cupa nare — hane. Ne ita ri me cupê gõ ikwỳ nõ catêjê cunea te amã amji jarěn kujahêc. Na ri imã hajỹr, ne ate ahpyanre na me ikwỳ nõ catêjê mã gũjarěn par na ato prãm. Hamre, ita pit.

JUTA

Ýhÿ, pê Juta pê Jeju jarkwa na memprar catêjê nõ, ne hanea ne cupê Jeju tõ te amji to hapu na kjê. Ne cute pjê cunea kam Jeju na mehwÿ atajê cunea mã, pom cu me hõ kàhhôc cahyt ita kujahêc par. Na pê hõ kàhhôc ita japrỳ pê (Juta). Ne kam cute, por me cupê Jeju na mehwÿ na me amji jarên cacrô, cute amji kam me hapac xà kên kam menxyre to me cumã ihhêj xi atajê cawpa.

Juta te amji jarên xà

1 Hàpà Jeju kam cu ajpên to me pahkjêjê atajê!
Por Pahpãm te amji mã me acapi ne me ana hàhwÿr atajê. Ipê Juta, ne ipê Tijac tõ, ne ipê Jeju Crixto mã ijâpên catê, ne itea wa me amã ihkàhhôc ita ton. Por Pahpãm mã me akînti, mã Jeju Crixto me apytâ atajê mã, wa ite ton.

² Ne imã me ana Pahpãm mã icakôc xà te hajÿr he:
— Me pahkwÿ caprîa ne, ne me caxwãm pê me cumã mehcarîcti gõ, ne amã mehkînti ne. Na ca ha me cumã, pom ite amã ampo crê jarên itajê catia ne agõ — hajÿr.

Pê mehhêj xi catêjê kwÿ aracri mehwÿ mã axà, ne me cumã ihhêj
1 Timot 1.18-20

³ Ýhÿ, imã me ikwÿ kînti atajê. Pê wa ramã ite me amã ihhôc xà na amji kampa, ata pê Pahpãm te me pahkên pê me pahpytâr xà. Na wa ite ajmâr me amã ahna ihhôc. Ne ajteare mã ite to amji kam ijapac, ne hÿrmã ipipkjêr xà na, me amã ihhôc. Pê Pahpãm ramã me pamã cute amji kam hapac xà to hahkre, ne me pamã hõr pyxit, pahte me to amji pytâr xà na. Cwÿrjapê wa ha ate me Pahpãm to ate amji kam hapac xà ita jamâr, ne me hÿtâr, ne me to amji jahôt prãmte, wa ha ahna me amã ihhôc. ⁴ Ne ampo na mã wa ha me amã ihkàhhôc ita hõc to hane? Nee mã ampo na nare. He ramã mehkên catêjê kwÿ aracri me pahcatât kre na me hàr. Atajê cunea pê ampo kêanre to hahkre catêjê, ne me cumã Pahpãm kîn nare, mã ma amempar caca. Ne cute Pahpãm te amji kam hapac xà intête me ato ipintuw prãmte, me amã ihhêj xia jarên to:

— Gapacta ne ate amji mã me ampo kên ton to prãm atajê cunea ton to me apa. Quê ha Pahpãm hõtpê me acaprî, ne nee me anõ kên mã me anõ mên nare, hahpan xà na — hane. Ne mër ampo na mã ame amã ampo kên itajê to hahkre to hane? He taa me ton to me ipa, na ri amji kôat me amã me to hahkre. Ne ramã ma ame Pahpãm me, me pajõ Pahhiti pê Jeju Crixto caca, ne ma ame curê. Atajê quê ha ihtÿj mehkên mã me axà. Ampo na? He pê rÿ pëa mã Pahpãm jõ kàhhôc kam ramã me ahna ihhôc.

Cu ha Pahpãm tekjê na me amji jarê, ne nee catyt kam me papa nare nare

1 Timot 3.1-9; 2 Petrô 2.1-17

⁵ Na wa ha cute me hajÿr catêjê me, ate ajpên cujtên na me amã ihhôc, ne me amã to hahkre, mãr ca atÿj me ajpên cujtê ne me ajpên mã. He pê mam me panquêtjê kwÿ atajê hanea ne ajco cute me amã ampo to hahkre xà kên itajê kwÿa to, ajco mehwÿ mã hahkre to me ipa, ne mehkên mã me axà. Cwÿrjapê ca ha ita pê amji to me guphê. Ne ramã ate me ampo itajê cunea jahkre pej, na ca ate me to amji japackre prãmte, wa me amã harê. Ne pê Pahpãm Ejit jõ pjê kên pê me panquêtjê kwÿ cunea pytâ, ne me to cato, cacrô pê ihtÿj cute mempar nare catêjê cunea jipej, por pjê kam põ capryhti ata kam.

⁶ Jîkjê na pê cõjkwa kam mam Pahpãm mã memprar catêjê jàhtôa ne cute me cumã hàpên jicu, ne mam me hàpên xà ata jirôa pê cute mehnõ to cati ne me to impej to prãm to, hacpÿa mã Pahpãm na me apkjê. Pê Pahpãm amji na me hahkre pej, ne mehcunea pro ne wakÿre to mehcunea juwapre, ne me pajarãa mã, awcapatkôti ata kam me hãm. Mã cormã curia mehcuhhê, rohnÿtti mã. Ne quê ha ahna Pahpãm te me pahcukij, ne me pahto ipicokjêr xà jõ amcro kam ahtwÿ, quê ha hipêr mehkên mã me axà. ⁷ Ata jîkjê na pê Kríhpôc me Kríhcumrãrti me, ipu na krí kwÿ hÿ na pire mã apu ihcuhhê atajê cunea kam, mehwÿ me amji kam hapac xà kêanre itajê to me. Atajê pê cute amji pê mehprõ caxun me, me hÿmre jàhtôa te me ajpên caxun. Cwÿrjapê pê Pahpãm cõjkwa pîn me hÿr mã cuhy kujate, pê me to caxàr tu. Nãmhã cu cormã me hãm xà pupu, ne ma ihkôt me to amji japackre he.

Mehhêj xi catêjê mã nee jÿm cupa nare

⁸ Cuxà mã, me amã ampo kêanre to hahkre catêjê atajê ihtÿj mehkên xà kêanre itajê ton to me ipa. Ne ihtÿj cute mehkên ton xà atajê kôt me amti. Ne me hÿ me, cute amji kam hapac xà mea mã, amji pê me to kên, ne ma ame pajõ Pahhiti pê Pahpãm par caca, ne ihtÿj me cõjkwa kam cumã memprar catêjê carôt tÿjti atajê incrôn kêanre. ⁹ Pê quêt cõjkwa kam Pahpãm mã me hàprê catêjê jõ pahhi pê Miquer nee ihcakôc xà to hajÿr nare. Pê Mojxe xwÿ na Miquer me, me pahcurê

xwÿn pê Xatanaj ajcaxê, ne me ajpën mǎn kam tē. Pê nee Miquer harkwa jàmcrôn xà nõ to hàmcrôn nare, ne cama hõ Pahhiti to me pahcurê xwÿn mǎ ihcakôc to hane he:

— Quê ha jũ caxuw ijõ Pahhiti acrôn xà kêanre nõ to acrô — hane. ¹⁰ Ne me hũmre itajê nee me ampo jahkre pej nare kam, ihtÿj me hàwxũn xà kêanre kam pra. Ne ihhêj rũm me cupê ampo jàprê te amji kôt hakop nare ata, ne ihtÿj ame jũ mǎn to me ipa, ata to quê ha me taa me amji kên mǎ me amji mē, ne me hamre pa.

¹¹ Ýhÿ, quê ha ihkên mǎ hàr to hanea, pom quê pê me panquetti Cǎn apu ihtõ caca ne ihcura he. Pê Parǎw xwÿ ata hanea ne ihkên xà ata to. Ne cute mehkwyǎ mǎ ihkêanre xà to hahkre jahpan xà na, ajco me curê xwÿn atajê jũhkra kam amcwa. Pê Cõre xwÿ ita hanea ne mehkwy to pahhi na apkjê ne ame kam incryc. Jĩkjê na mǎ menquêtjê atajê te amji kam me hapac xàa to me amji kampa he, ne ihtÿj me amji cura, ne amji to me hakràj to prǎm, ne pahhi cuna mǎ mehcajôc kêanre. Hõ, pê menquêtjê incrê atajê ame hanea ne mehcunea me hamre tu, ata jĩkjê na quê ha me amǎ ampo kêanre to hahkre catêjê atajê ihtÿj me hamre.

Mehhêj xi catêjê kôt hamreare

¹² Ca hõtpê hǎn ne me cuprõ, ate ajkam me gàpàn ne me akõm prǎmte. Ampo na? Nee mǎ ampo na nare. Pom ca ame cuprõ itajê me amǎ ajpën kinti na, ca me cuprõ. Ne ahnaa ri Pahpǎm mǎ impej, me akam. Ne pom me hũmre kêanre itajê hǎn ne me acajpuw acjêj, ita na ri ihkêanre, ne nee mehkõm na meh-pahàm nare. Ne ampeaj kam me hõ to mehtũm prǎm. Ne ihhêj rũm me apê cupêhkà impejti jakati ata, ne cute me hajÿr catêjê pê ihhêj rũm ampo tũmti kêanre te ame atũm xà ata. Ne cute me hajÿr catêjê hõtpê me amǎ ampo to awjahkre, ne nee me amǎ hõr nare. Ne jũ caxuw quê me amǎ ampo ata gõ. Ne me cupê ihhêj rũm cama apu ahcakrà, ne nee ta wrÿc nare, mǎ pjê incràre ata pyràac. Ne me cupê ihhêj rũm pĩxõ pàr, mǎ hǎn ne hõ xàa kam ahtwÿ, mǎ nee hõ nare ata pyràac. Ne me cupê pĩxõ pàr jarê me amǎ catõtõc, ne ihcapĩr mǎ incrà ne incrà tu ata pyràac. ¹³ Ne mehkên itajê pê ihhêj rũm cõxwa te ihtu to imprar, ne amji jakàn pê cute hàmprõ tũmti juwahi ata pyràac, ne ampeaj kam me kam pahpahàm. Ne me cupê caxêre pê ihkrĩ xà jamreare ata pyràac, ne amjia kôt ame ipa. Pê Pahpǎm awcapàtkõ tycti kam me to awcapê, mǎr quê curia ame ipa rohnÿtti mǎ.

Quê ha mehhêj xi catêjê mehhêj xi jahpan xà na me amgõ

¹⁴⁻¹⁵ Pê Enoc xwÿ, Atǎw xwÿ jakàn pê, rÿ pèa mǎ ihkrĩ, ne mehkêanre itajê to hũjarèn to hane he:

— Me hõmpu he, quê ha me pajõ Pahhiti pê Pahpǎm ajpën pjê wÿr cumǎ me hǎpèn catêjê impejti jàhtõti atajê to mõ. Quê ha mehcunea cukij, ne mehkên

catêjê cunea kên mǎ me cumē. Pom me Pahpǎm par nare itajê me, cute me ampo kên ton to me ipa catêjê me, cute Pahpǎm cuna mǎ mehcajôc kêanre atajê me, quê ha mehkên mǎ me cumē — hane. Hõ, pê Enoc xwÿ me to hũjarèn to hane.

Mehhêj xi catêjê te amji kam me hapac xà kêanre

Caratĩ 6.1-2; 2 Petrõ 3.3; Tijac 5.19-20

¹⁶ Ne ampeaj kam me hũmre itajê jàhcahhõn xi, ne cute me ahna xwÿ xi, ne cute me ampo kên xen. Ne ampeaj kam me harkwa cràre, kôt hamreare, ata to cute amji to me hǎmnǎn xi. Ne cute me cupê ampo cwÿr prǎmte me hàhcukrêj kôt me cumǎ ihtÿj nare, ne hǎn ne me cumǎ ihcakôc rerecre, ne impejti na, me harê.

¹⁷ Ýhÿ, me ijõ ikwÿ nõ catêjê, nee ca me apê mam itajê pyrác ne apu cute me hajÿr catêjê impar nare, ne quêt me pajõ Pahhiti pê Jeju Crixto mǎ memprar catêjê to, ca me amji japackre kam me to acrà. ¹⁸ Pê hõtpê ajco me amǎ me amji to hũjarèn to hane he:

— Jeju te amji jaxàr xà jõ amcro atajê kam, quê ha me hũmre kêanre itajê me awÿr me cato, ne catyt kam me apa ita na, cama ame ana acxa. Ne amjia kôt, Pahpǎm kaj na, cute amji mǎ me ampo kên xen xà atajê kôt ame pra — hane. ¹⁹ Ne cute me hajÿr catêjê ri ihtÿj me ato ajcokjê. Ampo na? Me kam Pahpǎm Carõ Pejti nare na ri. Mǎ amjia kôt, cute amji mǎ me ampo kên xen xà atajê ton to pit mǎ, me amji mǎ ihhimpej to me ipa.

Cu ha Pahpǎm te amji kam me pajapac xà to ajcamē

²⁰ Me ijõ ikwÿ nõ catêjê, ca ha nee me hajÿr nare, ne quêt cama amji to me apicamèn to me mõ, Pahpǎm te me akam amji to ihhimpej xàa na. Ne cumǎ me acakôc xà wÿr, quê ha Carõ Pejti cumǎ acakôc to me amǎ hahkre, ca ha harkwa kôt cumǎ me acakôc.

Ampo crê itajê to cu ha me, Jeju te amji jaxàr xà jikaj xà na

²¹⁻²³ Ne me pajõ Pahhiti pê Jeju Crixto mǎ me pah-caprĩ catia ata, quê ha ihtÿj jũ caxuw amji wÿr me pajaprõ. Cu ha pahtÿj cahê na amji to me papijapar rohnÿtti mǎ ata jõ amcro, cu ha me hikaj. Hõhõ, ampo crê itajê to ca ha me, Jeju te amji jaxàr xà jikaj xà na. Ca ha Pahpǎm mǎ me pahkinti ita to, nee amji pê me gapac kêt nare. Ne pom kyre pê Pahpǎm kôt me ipa itajê, ca ha me caprĩa ne, ne me cumǎ aprĩa kam, mehkinti kam, me hapackre to me apa, hacpÿa mǎ Pahpǎm jõ pry kam mehpÿm prǎmte. Ne pom cute amji mǎ me ampo kên xenti itajê, ca ha hanea ne me caprĩ, ne guphêa rũm mehtehcajpar to me apa, cõt ca hanea ne mehkôt me pahcurê xwÿn jõ cuhyhti mǎ me axà.

Cu ha Pahpãm te me pahto ihtÿj pyrên me pajakry na,
cumã me amji jarẽ

1 Petrô 1.5-7

²⁴ Ne Pahpãm Pejti na me to pahcakôc xà impejti itajê to, cu ha cumã me pahcakôc he:

— Me ijõ Inxũ, ca ha atÿj me ijamã, wa ha nee apê me ikên nare, ne nee apê me gõ pry hyr nare. Na ca ha ma amji wÿr me ijaprô, ite curia krĩ xà ita kam acahê na me ikrĩ xà na. Na wa ha curi me ipej pit na acuna mã me xa, por wa nee me ikrã kam ampo kên to me amji kam ijapac nare itajê me, me ijĩ tũm nare itajê me, wa ha curi acuna mã me xa, ne ampeaj kam ahna me

ijakry. Ne imã mehcunea te acatihti na me gahkre pej ne apupun na me to prãmte hajÿar, pom quê hãn ne mehcunea me hàhcujro xà nõ jãhcujrohti pupu he.

²⁵ Ne apyxit peaj, ne apê Pahpãm, na ca ate akra pê me ijõ Pahhiti pê Jeju Crixto to me imã me ipytàr catê. Ne ate ampo cunea jahkre pej catia. Mã quêt mehcunea, ampo cunea jirôa pê amji mã me acupa. Ne me cupê pahhi cunea jirôa pê quêt apê Pahhiti cati, ne mehcunea jirôa pê acarôt tÿj ne cati. Ne me imã mehcunea te ampo itajê cunea na me gahkre pej na me ato prãm. Pê ca mam ahnaa akrĩ, ne cormã ahnaa to akrĩ, rohnÿtti mã — hane. Hamre.

IPIPĚ XÀ

Ýhỹ, pĕ Jowāw ihkàhhôc ita to, ne krí te xet kam Jeju na mehkwȳ atajê cunea mã ihkujate. Ne pĕ cupê Jeju jarkwa na memprar catêjê nõ. Ne pĕ mam cupê tep pro catê, pĕ Jeju ihkôt ipa catê na ahna ahwȳ. Pĕ caku crê kam Jeju kôt ipa, ne pĕ Jeju te amji kam hapac xà cunea na hõmpu. Ne ramã ihwejtu kam ri cute Jeju na mehkwȳ mã ihkàhhôc ita hõc, ne ihkujahêc.

Ne pom cu me ihkàhhôc cahyt ita kam ri, cute me cumã, cute me Jeju te amji kam hapac xà jicu na, me cumã cawpa, mãr quê nee me hicu nare. Ne cute Jeju to amji mã mehhimpej cwýrjapê ri, mehkwȳa te me amji pupun xà kêanre na me to, mã me amji pupun to kêanre. Cwýrjapê ri ahna me cumã apô. Ne me cumã pjê ita jamre xà kam, ampo cunea te me hỹrmã cator xà ata jarĕn. Ne me cumã Pahpãm te pjê ita cunea to hamre, ne intuw ton na cute me cumã harĕn. Ne Jeju te me cumã ampo itajê cunea to hahkre, mã harkwa kôt cute me cumã harĕn par. Na ri hõ kàhhôc ita japrȳ te (Ipipĕ Xà).

Jowāw te amji jarĕn xà

Ipipĕ Xà 22.6-7

1 Ýhỹ, ihkàhhôc ita cahyt xà te hajýr he. Ipê Jowāw, ne pa wa ha me amã ihkàhhôc ita hõc. Pĕ mam, ramã rý pĕa mã, Pahpãm Jeju mã ampo te hajýr xà itajê cunea jarĕn pa. Mã Jeju te me cumã hàpĕn catêjê mã ampo itajê jarĕn xà na, imã cumã imprar catê kujahêc, cõjkwa pĕn. Mã iwrȳc, ne iwýr cator ne cute imã ampo itajê cunea jarĕn, ne imã hahkre par. Cwýrjapê wa ha ihkàhhôc ita kam, me amã ampo itajê cunea jarĕ. Ne ampo te hajýr xà itajê, quê ha nee amji to hàhtũm ry nare.

2 Ýhỹ, pĕ Pahpãm, ihkra pĕ Jeju mã ampo itajê cunea jarĕ, pĕ Jeju harkwa na imprar catê mã harĕ, pĕ ma ajpĕn imã harĕ, na wa ha ihkàhhôc ita kam ihcunea na me amã ihhõc partu. Ne quêt Pahpãm cakõc xà ita ampeaj kam ri. **3** Na ca ha ate me ihkàhhôc ita cahyt, ne kam me gapac na, ca ha ampeaj kam me gakry. Ne por quê ha me kampa ne me hahkre pej atajê, quê ha hanea ne ame hakry. Hõ, por quê ha ampeaj kam me Pahpãm jarkwa itajê kam, me hapac pejtĭ atajê, quê ha ihtýj me hakry. He, quê ha nee ampo te hajýr xà itajê amji to hàhtũm ry nare, na quê ha me hakry.

4 Ýhỹ, ipê Jowāw, wa me apê Jeju na mehkwȳ jakrã te xet, ne Axij jõ pjê kam me akrí atajê mã, wa ite ihkàhhôc itajê ton. Ne me amã Pahpãm me, ihkra Jeju Crixto mã me icakõc, ne cumã me acajrĕn to:

— Me to impeaj ne, ne me caxwãm pĕ me cumã acaríctĭ gõ — hane. Ne Pahpãm ita pĕ rý pĕa mã Pahpãm ata, ne cormã cupê Pahpãm rohnýtĭ mã, ne cõjkwa kam Pahhiti krí xà ata kam ihkrí. Ne cahê na Pahpãm Carõ Pejtĭ caca xà te xet atajê mehkrí. **5** Pĕ pjê ita kam Jeju te apu ipa reria mã, ampeaj kam Pahpãm jarkwa atajê to ajco ihcakõc to ipa. Ne cupĕa ri Pahpãm mehcãmter, ne pyxít peaj ne hacpýa mã ihtír cakõnĩ to ihtír, ne taa mã ri pyxít peaj ne cupê pjê kam pahhi catêjê cunea jõ Pahhiti. Ne cumã me pahkĩn, cwýrjapê pĕ ty ne caprõ jaxwȳ. Ne caprõ jaxwýr ata to

me pahkĕn kêanre atajê cunea cuhhõn partu. **6** Ne cute me pahcunea to Hũm mã hàpĕn catêjê na. Na cu ha me harkwa kampa, ne pjê kam mehkrí itajê mã me harĕ. Ne hacpýa mã Pahpãm wýr, pjê kam mehkrí itajê cajrĕn xà atajê to, cu ha me cumã, pjê kam mehcunea to me pahhimpej. Pĕ Jeju Crixto me pamã ampo pejtĭ itajê cunea ton pa. Cwýrjapê ri mehcunea te hahkre pej na imã me to prãm, nãmri Jeju ri quêt mehcunea jirõa pĕ carõt týj rohnýtĭ mã! Ne ahnaa ri imã to prãm!

7 Ne me hõmpu he, ramã pjê wýr ahcakrã kam iwrȳc xàa kam he! Quê ha mehcunea me hõmpu, quê ha hanea ne cute ame caxwýr catêjê ihtýj ame hõmpu. Ne por pĕ pjê kam mehcunea amehcaca atajê, quê ha Jeju te amji jaxàr na me hõmpu, ne ampeaj kam me cumã hũpa. Quê ha hũpate ame amrãa to ame amrã. Ne quêt imã Jeju te hacpýa ne amji jaxàr ita na ri ampeaj kam imã to prãm. **8** Ne me hirõa pĕ Pahpãm pĕ Pahhiti carõt týjtĭ ata te amji jarĕn to:

— Ipê pjê kat me hihõt jõ Pahhiti, ne ipê cumã kat kam ampo cunea jõ Pahhiti, ne ipê hicu xàa kam ampo itajê cunea jõ Pahhiti — hajýr. Ýhỹ, Pahpãm pĕ rý pĕa mã Pahpãm ata, ne cormã cupê Pahpãm rohnýtĭ mã.

9 Ýhỹ, ipê me akrã tũm pĕ Jowāw, ne ipê, por ca Axij jõ pjê kam Jeju kôt me amji pupun xà kêanre to me amji pupu atajê, tõ kàa wa. Ne cu ha pahcunea Jeju cwýrjapê ame amji pupun xà kêanre to me papa, ne pom cu me pahcunea ame amji pupun kêanre itajê mã, cu ha me pahcunea pahtýj me awcanã to mehtýaj ne, ne me pahcunea Jeju kôt amji to me pahhi.

Pĕ Jeju Jowāw mã amji to ajpĕ

Pĕ wa ajco pjê cunea kam Pahpãm jarkwa jarĕn to ipa, por pĕ Jeju imã to hahkre ne imã huwahi ata, pĕ wa ajco harĕn to ipa. Cwýrjapê pĕ me ipro ne ma cõ jipõc ri, pjê japrȳ te Patmo jõ pjê ita wýr me ikujate. wa ita ri apu ipa, ne jũ caxuw icator xà hamreare.

10 Ne pĕ wa me pahkõt xà jõ amcro pĕ tãmĩc na jý ne Pahpãm to amji kampa. Pĕ Pahpãm Carõ Pejtĭ imã

amji gō. Pê wa pea amji caquéc kôt jūm jōkrete, pê ihê rŭm hōhhi jōkre krāhhi tŷjti ata kampa. Pê imā harkwa to:

11 — Wa ha amā ampo jāhtōa ne to ajpē, ca ha hōmpu ne atŷj ahna ihhōc partu. Ne ma krī te xet kam Jeju na mekwŷ atajē mā ihkujahêc pa. Ne por krī atajē japŷy te ri Epet jō krī me, Pīhhōcuxwa jō krī me, Hawēnti jō krī me, Tijat jō krī me, Pyt jō krī me, Ihkjê kīn jō krī me, Ratixa jō krī atajē wŷr ca ha ihkujahêc partu — hane.

12 Wa ite jūm ita pupun prāmte hŷrmā ipipkjêr, ne ite wakŷre prā tepti pê ôr te ihpōc xà mā cuhhê xà te xet atajē pit pupun. 13 Mā hipōc ri jūm pê me Pahhākā Cati pyrācti ata ihkà japjêhti ata kam xa. Ne wakŷre prā tepti pê ôr te ihcahti na hê mā to xa. 14 Ne ihkī jaka ita pê ihhêj rŭm kēn pojre jaka, ne into jarwŷy ita pê ihhêj rŭm cuhy pōc jarwŷy. 15 Ne ihpar prā ita pê ihhêj rŭm me hŷhhi na hê xà crecrti ata prā pyrāc. Ne hōkre par ita pê ihhêj rŭm cōhxocti jāhkrihkrit par. 16 Ne pê awpōc rŭm, hŷhkra ata to caxêre te xet ata cwa ne to xa. Mā harkwa pīn wapo xwahhihti xwapeaj te hŷjê ata cator. Ne ihkuc prā pê ihhêj rŭm pyt te me pahkrā jimoac kam ihkrī prā pyrācti.

17 Wa ite hōmpun, ne pea hŷpate ipê mehtyc pyrāc, ne cuna mā ijō pôpō ne nō. Mā cute ina awpōc rŭm hŷhkra xir ne imā:

— Nee apu icupa nare. Ipê cumā kaat kam ampo cunea jō Pahhiti, ne ipê hīcu xāa kam ampo atajē cunea jō Pahhiti. 18 Ne pê wa ty, ne me ipupu he, wa hacpŷa mā itīr, ne ita caxuw jū caxuw ityc xà nare, ne ipêa ri mehtyc xà jō Pahhiti, ne hanea ne ipêa ri mehtyc catêjê jō Pahhiti.

19 — Na ca ha ate ampo te hajŷr xà atajē pupun xāa na, ahna ihhōc. Ne hanea ne cormā ampo te jū mǎn xà atajē na ihhōc. 20 Ne hamre, wa ha amā ijŷhkra kam caxêre te xet atajē me, ihpōc xà te xet atajē cuhhê xà itajê kôt harē, ca ha kampa. Pom ihpōc xà cuhhê xà te xet itajê pê me ikwŷ jakrā te xet atajē pyrāac. Ne caxêre te xet itajê pê ihhêj rŭm cōjkwa pīn imā me hàpên catêjê te xet atajē pyrāac, quē ha ihtŷj ahpŷanre na me ikwŷ jakrā te xet atajē jamā — hajŷr. Hōhō, cute imā hŷjarēn to hajŷr.

Epet jō krī kam mekwŷ jakrā mā kyre pê Pahpām kīn

2 Ne jūm ata te imā harkwa hyr to hajŷr he:
— Ÿhŷ Jowāw, ita caxuw ca ha Epet jō krī kam, por ikrac ri me ikwŷ jamār catê ata mā ijarkwa kôt, ihkàhhōc ton to hane he:

— “Ipê jūm te hŷhkra to caxêre te xet ne incwŷr ne to xa ata, ne ipê, por jūm ôr te wakŷre te ihpōc xà cuhhê xà cajpuw apu mō ata. Ne ijarkwa kôt ri me amā ihkàhhōc ita. 2 Ne imā ate me ampo ton xà atajē cunea na me gahkre pej. Ne ate amji mā me aprīa kam, ramā me gāpên xà ton to me catia. Ne imā ate nee mehkēanre atajē mā me gūcanār nare na me gahkre pej. Ne ma cute me amā Inxū jarkwa to mehcačkōc catêjê na me amji jarēn atajē cajpē, ne me hahkre pej. Quē ha cute ame amā ihhêj xia jarēn na, ca ha me

hahkre pej pyrentu, ne ma amempar caca, ne ma ame curê. 3 Ne icwŷrjapêa ca ate amji mā me aprīa kam, ame amji pupun xà kēanre to ame amji pupun. Ne ate me amji pupun xà kēanre atajē mā atŷj me awcanā, ne imā ampo itajê cunea na me apej pit.

4 “Ne por ampo pyxit peaj ata na ri imā me ana prām nare he. Nee mā ampo nare, pê ca mam ampeaj kam me amā ikīn, ne ita kam mā ajte kyre pê me amā ikīn, mam kīnte. 5 Xà ca gōtpê ajkī mam me amā ikīnti ata to me amji japackre? Ca ha ate me to amji japackre na, ca ha hacpŷa mā iwŷr me apkjê, ne ikīnti ata to ame ikīn. Nāmri, ca ha ate me akēn jicu nare, ne nee iwŷr me apipkjêr nare na, wa ha hacpŷy ne amji jaxà, ne itŷj me apê gō pōc xà cuhhê xà ata capa, quē ha hām xà kam capŷy. 6 Ne por ca ramā ame ampo pyxit ton to me apa ata na ri, imā ihprāam to prām. Nee mā ampo nare, ca ramā ma ame Nicoraw kôt me ipa catêjê hêj xia to amehcačkōc atajê par caca, ne me apê ipyrāac, ne ma ame curê. Nāmri wa ma ame curê.

7 “Ÿhŷ me ikwŷ, xà ajkī me gapac nare, me gūpar xà caxuw? Hāpā. Ihtŷj me akam me gapac, na ca ha me Apām Carō Pejti te mekwŷ jakrā mā harēn xà na me kampa, ne mempartu. Inxū mā ihkrī xà ata kam pīxō pār pejti ne ihcuhhê. Quē ha jūm te pīxō ata nō krēr na, quē ha nee jū caxuw ihtyc nare, ne quêt ihtŷr na apu ipa, rohnŷtti mā. Ne por quē ha me ampo kēn cunea tohŷjê, wa ha itŷj pīxō ata na me hamā, quē ha ame cuku. Hōhō ita pit” — hajŷr.

Pīhhōcuxwa jō krī kam mekwŷ jakrā te me amji pupun xà kēanre
Me Hàpên Xà 7.54-60

8 Ne cute hipêr imā harkwa hyr to hajŷr he:

— Ÿhŷ Jowāw, ita caxuw ca ha Pīhhōcuxwa jō krī kam, por ikrac ri me ikwŷ jamār catê ata mā ijarkwa kôt ihkàhhōc ton to hane he:

— “Ipê cumā kat kam ampo cunea jō Pahhiti, ne ipê hīcu xāa kam ampo itajê cunea jō Pahhiti. Ne ipê jūm tyc ne hacpŷa mā ihtŷr ata. Ne ijarkwa na ri me amā ihkàhhōc ita. 9 Ne icwŷrjapê ate ame amji pupun xà kēanre to ame amji pupun atajē na, imā me gahkre pej. Ne icwŷrjapêa ri me apê me acukrêj jamre tu, ne me apê hamreare na, ite me gahkre pej. Ne Inxū mā me apê hamreare nare, ne ampeaj kam quêt cumā me gakrāj. Ne imā cute me ato xwahna to kēanre atajē na me hahkre pej, ne me amā me amji to ihhêj xi xà to, ‘Me ipê Juta catêjê impej pit, na wa ha itŷj me amā catyt kam ampo pejti atajê pit to hahkre’ hane. Ne ca ma ame amā ihhêj, ne aracri Xatanaj kôt amji kam me hapac to me ipa, ne toa amji mā mehhimpej to me ipa. 10 Ne ca ha cormā ame amji pupun xà kēanre to ame amji pupu, ne nee ca ha ame amji mā pa nare, ne me ikampa he. Quē ha Xatanaj kôt me ipa catêjê ihtŷj me anō pro, ne me hacjên xà kam me gaxà, ne me acajpēr hiahpuro. Ca ha ame amji pupun xà kēanre to me amcro to me tej cakrō, ca ha ito pit mā amji mā me ahimpej to me apa kam me to acrà, ne ahnaa ame gamre na, wa ha amji wŷr me ato ahtêp, ca ha icahê na ame

apa, rohnýtti mã. Ne pom hãn ne memprar týj catêjê mehkwy re, ne amji mã me hê cwa, ata jíkê na, ca ha ate me gũcanâr na, wa ha itýj me amã me atír xà caxuw me gahĩ xà gã, ca ha me atír rohnýtti mã.

¹¹ “Ýhỹ me ikwý, xà ajkĩ me gapac nare me gũpar xà caxuw? Hãpà! Ihtýj me akam me gapac. Na ca ha me Apãm Carõ Pejti te mehkwy jakrã mã harên xà ne me kampa ne mempartu. Ne por quê ha me ampo kên cunea tohjê atajê, quê ha nee hipêr amehtyc nare, ne nee hipêr ame amji pupun xà kêanre nõ to ame amji pupun nare. Hõhõ ijarkwa ita pit” — hajýr.

Hawênti jõ krĩ kam mehkwy jakrã te nee mehpahàm nare atajê jicu nare

¹² Ne cute hipêr imã harkwa hyr to hajýr he:

— Ýhỹ Jowãw, ita caxuw ca ha Hawênti jõ krĩ kam, por ikrac ri me ikwý jamãr catê ata mã ijarkwa kôt ihkãhhôc ton to hane he:

— “Ipê, por jũm jarkwa kam wapo xwahhihti xwapeaj te hũjê ata jarkwa na mã, me amã ihkãhhôc ita he.

¹³ Ne imã Xatanaj to me amji mã mehhimpej catêjê jipôc ri ate ame akrĩ na, imã me gahkre pej. Ne curia ri cute me Antipa curan. Ito me cumã ihcakôc to ipa, incwýrjapê ri cute mehcuran cacrô, ca nee ate ito amji mã me ahimpej jicu nare, ne ikam me to acrà tu.

¹⁴ “Ne ampo ata pyxit peaj ne ahna imã me ana prãm nare. Nee mã ampo nare, me akwýa kwý ihtýj Parãw xwý himpej xà kêanre atajê to ame amji mã mehhimpej to me ipa. Ne pê Parãw xwý Ixaher catêjê to kên prãmte me cumã Xatanaj me, ampo carõ kên to ihhimpej to: ‘Gapacta ne me pryre jãhtôa ne me to cuprõ ne me hipej, ne Xatanaj me, me amã ampo carõ kĩnti atajê mã me to amji kĩn nõ to, ne hanea ne atýj ahti na amji pê me aprõ to me axý’ hane. Mã me akwýa kwý te ihtýj ihhimpej xà ata mã me amji jõr, ne toa amji mã mehhimpej to me ipa. ¹⁵ Ne hanea ne me akam Nicoraw kôt me ipa catêjê te me to ihhimpej catêjê ame ipa. Ne me imã ampo itajê nõ na prãm nare. ¹⁶ Cwýrjapê wa me amã, ‘Me amji to apkjê, ne me akên itajê jicu. Ca ha ate me akên itajê jicu nare na, wa ha me awýr itêm pyrentu, ne pom ijarkwa pĩn wapo hapôj ita to, ate me hajýr catêjê cunea cuna mã aju’ hane.

¹⁷ “Ýhỹ me ikwý, xà ajkĩ me gapac nare, me gũpar xà caxuw? Hãpà! Ihtýj me akam me gapac. Na ca ha me Apãm Carõ Pejti te mehkwy jakrã mã harên xà na me kampa, ne mempartu. Ne por quê ha ame ampo kên cunea tohjê, wa ha itýj aracri me cumã harte, quê ha nee jũm ite me cumã harte ita na ijahkre pej nare, to hanea, pom quê pê wa Juta catêjê mã me hõ pê mana to harte he. Ne wa ha ahpýanre na kên jakati atajê kam me cumã me haprý to ipintuw partu. Quê ha nee jũm me haprý itajê jahkre pej nare, ne me cumãa quê ha me haprý atajê jahkre pej. Hõhõ ijarkwa ita pit” — hane.

Me hũxy xi cahãj nõ te Tijat jõ krĩ kam mehkwy jakrã mã ihhêj

Juta 3-23

¹⁸ Ne cute hipêr imã harkwa hyr to hajýr he:

— Ýhỹ Jowãw, ita caxuw ca ha Tijat jõ krĩ kam, por ikrac ri me ikwý jamãr catê ata mã ijarkwa kôt ihkãhhôc ton to hane he:

— “Ipê me Apãm kra, ne ito jarwrý pê ihhêj rũm cuhy pôc jarwrý ata, ne ipar prã pê ôr te me hũhhi na hê xà prã pyrãcti ata. ¹⁹ Ne imã me gãpên xà cunea na me gahkre pej. Ne me amã ajpên kĩnti, ne ate me ajpên tehcajpar na, imã me gahkre pej. Ne imã ate itoa me amji mã me ahimpej, ne amji mã me aprĩa kam ampo kên mã me gũcanâr na, imã me gahkre pej. Ne ca mam me acaca xà atajê jirõa pê me to apicamên to me mõi.

²⁰ “Ne por ampo ata pyxit peaj, ne ahna imã me ana prãm nare. Nee mã ampo nare. Por me acahê na pyjê nõ kêanre apu ipa ata, ca ajte nee ihkên têtê me cumã nare, ne cama ahna me hamã. Mã ihtýj apu ihkên xà atajê ton to ipa. Ne pyjê nõ kêanre ata pê ihhêj rũm mam pyjê nõ kêanre japrý te Ixapewkwýj xwý ata pyrãac, ne me amã amji jarên to, ‘Pahpãm te ri me awýr ikujahêc, ite catyt kam me amã ampo to hahkre to hajýr prãmte he. Gapacta ne ahti na amji pê ame aprõ caxu, ne hanea ne atýj cute ampo carõ kên mã me hõ ton atajê ku’ hane. Ne cute me cumã ampo to hahkre to hajýr xà atajê to hãn ne ijõ pry kaj na imã me hãpên catêjê atajê rë. ²¹ Ne tee ite mentête pyjê nõ ata mãn to, ‘Me to kên jicu!’ hajýr. Mã ma apu ipar caca.

²² “Cwýrjapê wa ha to kên prãmte cumã ijarkwa to, ‘Hã, ita caxuw ca ha atýj ahti na ate me hũmre to gikwa, ne ame to axý xà ita kam nõ. Ne ita caxuw quê ha gikwa xà ata amã ihkêanre, ne hanea ne, por quê ha acahê na kam me hikwa atajê mã ihkêanre ne. Ne ihtýj ate me amji pupun xà kêanre to me amji pupun to acuhê na, me ato’ hane. Quê ha cute me ipar nare, ne nee mehkên ton jicu nare atajê cunea mã, quê ha itajê hane. ²³ Ne itýj cupê mehkra cunea jipej. Quê ha pea me ikwý me ahna ijahkre pej, ne hanea ne ite me hũmre cunea mã cute me amji kam hapac xà jahkre pej na me ijahkre pej. Ne pa wa ha ahpýanre na ate me ampo ton atajê mã ampi, ne hahpan xà na me amã ijãmjõr pa.

²⁴ “Por tee me amã harkwa to, ‘Hacu ne Xatanaj jarkwa to ame hahkre, ne to amji mã me pahhimpej to me papa’ hane. Ca nee ate mempar nare, ne nee mehkôt me amji ton nare atajê, wa nee hipêr na me gapackre prãm nare. Ampo na? He ca atýj ramã amjia kôt me gũpar to me apa. ²⁵ Ne kam me to acrà mã me awcanãa ne, wa ha ahnaa me awýr icato. Hõ, hamre, ite me gapackre xà ita pit” hane.

²⁶ — “Ne por quê ha me ampo kên cunea tohjê, ne ma imã ampo na prãmte kĩnti atajê ton kam me to incrà, ne ahnaa amehtyc na, wa ha me to krĩxàre cunea jõ pahhi to hanea, pom quê Inxũ te ito pjê cunea jõ

Pahhi he. ²⁷ Quê ha mehpahytàj kam me to ihhimpej to me ipa. Quê ha jùm te apu Pahpām par caca na, quê ha me gān to hane, pom quê hān ne me pjê te pot gā he. ²⁸ Ne me to ihhimpej xà to prà to hanea, pom quê awcahti xà wýr caxêti prà he. Mā mehcunea me hōmpu, mā me cumā hōmpun xà imepji he.

²⁹ “Ÿhý me ikwý, xà ajkí me gapac nare, me gūpar xà caxuw? Hāpà! Ihtýj me akam me gapac, na ca ha me Apām Carō Pejti te mehkwy jakrā mā harēn xà na me kampa ne mempartu. Hō, ite me gapackre xà ita pit” — hajýr.

Pyt jō krí kam mehkwy jakrā te amji kam me hapac xà kēanre

Ruc 12.35-40

3 Ne cute hipêr imā harkwa hyr to hajýr he:

— Ÿhý Jowāw, ca ha ita caxuw Pyt jō krí kam, por ikrac ri me ikwý jamār catê ata mā ijarkwa kōt ihkàhhōc ton to hane he:

— “Ipê Pahpām Carō Pejti caca xà te xet atajê cahê na ipa catê, ne ipê jùm jūhkra kam caxêre te xet ata. Ne imā me gāpên xà cunea jahkre pej. Mā mehcunea amji mā me garēn to, ‘Jeju kōt me ipa catêjê atajê toa amji mā mehhimpej to me ipa’ hane. Ne cute ikōt me apa na amji mā me garēn catêjê atajê mā ihhêj ne me atīar. Ne mehkīnte imāa ihhêj ne ramā ame acunea tyc. Ampo na? Ca nee amji mā me ito ahimpej nare.

² Ame ampra! Nāmri ca cormā kyre pē ito amji mā me ahimpej, na ca ha ita caxuw ito amji mā me ahimpej to ihtýaj to ihtýj. Nāmri ca ha ate amji mā me ito ahimpej nare na, ca ha atýj ikōt me apa jicu, ne pea imā me apê mehtyc pyrāac. Ne mēr ampo na mā wa ame amā Inxū cawpa to icakōc to hane? Ampo na nare. Pom ca ate me gāpên xà cunea ton itajê ri, nee Inxū cuna mā cumā imej nare.

³ “Cwýrjapê ca ha ate me ampo jahkre pej, ne me hōmpun atajê to me amji japackrea ne, ne hýrmā me apkjê, ne amji mā me hūpahti to me apa. Ampo na? Wa ha hacpý ne pjê wýr me awýr itēm xà ata pē ihhêj rŭm me hàhkj xi tēm xà pyrāac, na wa ha aracri tē. Quê ha nee jŭm itēm xà ata na ijahkre pej nare. Cwýrjapê ca ha me ampra!

⁴ “Ne me akwý kam me pyxitre atajê ri amā mempeaj to mempej. Ne mempej ita pē ihhêj rŭm cute amehkà jakati tŭm nare mā me amji jacjên, ne ma ihtŭm pē me to amji cajhê to ame ipa, mā nee apu ihtŭm nare, ne hakati ata na, ata pyrāac. Ne ikōt me akà jakati kam me apa xà caxuw, ampeaj kam me apej, cwýrjapê ca ha atýj jŭ caxuw icahi na ame apa” hane.

⁵ — “Ne por quê ha me ampo kên cunea tohê, ne ma imā ampo na prāmti kīnti atajê ton kam me to in-crà, ne ahnaa amehtyc na, wa ha itýj me cumā mehkà jakati atajê gō, quê ha kaam ame ipa. Wa ha nee jŭ caxuw hacpýa mā mehtír xà jō kàhhōc kam ramā ame haprý hikwa itajê nō caxàr ne ihhur nare. Ne hirāa pē cama Inxū mā me hàpên catêjê kam mare mā, me ahna amji jarēn to, ‘Pom mempejti mehkà jakati kam

ame ipa atajê cunea pē itekjê, ne me cupê me ikwýa’ hane.

⁶ “Ÿhý me ikwý, xà ajkí me gapac nare, me gūpar xà caxuw? Hāpà! Ihtýj me akam me gapac, na ca ha me Apām Carō Pejti te mehkwy jakrā mā harēn xà na me kampa, ne mempartu” — hane.

Ihkjêkīn jō krí kam mehkwy jakrā mā Pahpām mā hàpên xà

¹ Texarōn 2.13-16

⁷ Ne cute hipêr imā harkwa hyr to hajýr he:

— Ÿhý Jowāw, ita caxuw ca ha Ihkjêkīn jō krí kam, por ikrac ri me ikwý jamār catê ata mā ijarkwa kōt ihkàhhōc ton to hane he:

— “Ipê rý jŭ caxuw jŭm te ampo kên nō ton nare ata, ne ihcunea na ipeaj to ipej. Ipê rý jŭ caxuw jŭm te ampo to ihhêj xi nare ata, ne wa icakōc xà hêj xi nare to icakōc to ipa. Ne pē rý pēa mā pahhi Tawi xwý ikre nō imepji ata kam ihkrí. Pē pea jŭm ata pyxit peaj ne hŭrkwa jihê rēn xà ata to ajco apu ipa. Jíkjê na ri ipyxit peaj ne imā Inxū jŭrkwa jihê rēn xà. Na wa ha to hihê mē, quê ha nee jŭm to hihê nare. Nāmri, wa ha ite to hihê na, quê ha nee jŭm hihê mēn nare. ⁸ Ne ramā ite me gāpên xà atajê na me gahkre pejtu, ne ite me acarōt peacre na me gahkre pej. Cakrō ca atýj ijarkwa kōt ame apa, ne itoa amji mā me ahimpej to me apa. Na wa ite me amā harkwa jihê mēn, ate ahna me gapōj ne iwýr me jŭmjê japrōr ne me to acator, mā me acuxà ikōt me ipa prāmtē. Wa ite me amā hihê mēn, mā ahnaa xa, na quê ha nee jŭm to hihê nare.

⁹ “Ÿhý, me akam jŭmjê ame ipa atajê pē Xatanaj tekjê. Ne ihtýj me amā amji jarēn to ihhêj xi to ipa to, ‘Me ipê Juta catêjê, ne me ipeaj to me ipej, na ca ha atýj me ikampa. Ampo na? Wa ha itýj me amā catyt kam ampo pejti atajê to pit mā me amā hahkre’ hane. Cakrō, wa ha nee me to amji kwý nare. Ne cama me hipy mā me amē. Ne acuna mā, mehkōn krā na amehkrí na me to, quê ha me garēn to, ‘Ampeaj kam ri, quêt me apê Pahpām kōt me apa catêjê, ne ampeaj kam ri quêt me cumā akīn!’ hane.

¹⁰ “Pē wa me amā ijarkwa hyr to hane he: ‘Me awcanāa ne, ne ampo cunea na amji mā me aprīa to me apa’ hane. Ca ate me ijarkwa ita par pyrentu, ne atýj me gŭcanār to me apa. Cwýrjapê wa ha itýj ampo kên atajê cunea pē me apytā. Por ite pjê kam ampo kên cunea to me capi ne to mehcajpêr xà ata pē, wa ha me apytā. ¹¹ Ne wa ha nee amji to ijāhtŭm nare ne ajpên me awýr tē. Ite me amā ijāmjōr prāmtē, wa ha me awýr tē. Cwýrjapê ca ha ite me amā ijāmjōr xà to ajpên me awýr itēm xà ata jahkà na me awcanāa ne. Nāmri ca ha ate me gŭcanār nare na, ca ha nee me gāmcwýr nare, ne me gāmcwýr xà ata to me acto, quê ha jŭm me gaxà kam amji mā cupy” hane.

¹² — Ne por quê ha me ampo kên cunea tohê, ne ma imā ampo na prāmti kīnti atajê ton kam me to in-crà ne ahnaa amehtyc na, wa ha ma jŭm ata to Inxū jŭrkwa wýr tē, ne to axà, ne pea ihhêj rŭm to ikre mā ihcuhhê xà, ne ikre ata mā kam hām. Quê ha curia

ihcuhhê rohnýtti mã. Wa ha pea kam me ijapry încrê na ihhóc to hane he. Wa ha kam Inxũ japy na ihhóc, ne kam, por quê ha Inxũ, cõjkwa pĩn pjê wýr, hõ krĩ tuw Krĩpinkrên kujate ata japy na ihhóc. Ne wa ha hanea ne kam ijapry intuwti ata na ihhóc.

¹³ — Ýhý me ikwý, xà ajkĩ me gapac nare me gũpar xà caxuw? Hãpà! Ihtýj me akam me gapac, na ca ha me Apãm Carõ Pejti te mehkwy jakrã mã harên xà na me kampa ne mempartu — hajýr.

Ratixa jõ krĩ kam mehkwy jakrã me cupê Pahpãm tekjê na me amji jarên na me amji to ihhê

Roman 12.11; Jowãw 9.39-41

¹⁴ Ne cute hipêr imã harkwa hyr to hajýr he:

— Ýhý Jowãw, ita caxuw ca ha Ratixa jõ krĩ catêjê kam, por ikrac ri me ikwý jamãr catê ata mã ijarkwa kõt ihkãhhóc ton to hane he.

— “Ipê mehhê xi nare tekjê, ne ipê mehhê xi nare catêjê xakat, ne ipê jũm te amji jarkwa par to ipa rohnýtti mã ata, ne ipê catyt kam ampo cunea jarên catê. Ne pa pê wa Inxũ jarkwa kõt pjê me ampo cunea ton pa, ne ipêa ri ampo itajê cunea xakat. ¹⁵⁻¹⁶ Ne imã me gãpên xà cunea jahkre pej. Ca ha ikõt me apa na amji to mehtýj tu na, wa ha itýj me ana prãm. Nãmri ca ha ate kyre pê ikõt me apa na, wa ha nee me ana prãm nare. Ampo na? Ihhêj rũm ate me hajýr catêjê pê cõ cacrujre na, imã prãm nare ata. Ne nee me ato ikõm xà caxuw me apej nare, ne nee me gakryti nare, ne nee me acacrohti nare, ne me acacrujre. Cwýrjapê wa ha ijarkwa pê me gaxwý.

¹⁷ “Ampo na mã wa ame amã icakõc xà ita to? Nee mã ampo na nare, ca me caa hãn ne amji mã me garkwa to, ‘Ampeaj kam me pajakràj! Ne ampo cunea na me pahte amji mã me prãm atajê ramã me pamã! Ne nee ahna ihkên nare!’ hane. Hajýr cakrõ, mã me apê amji jahkre kêatre, ca nee ampo kõt me hakop nare kam amji mã ame garkwa to ame hane. Ne Inxũ me imã nee ate me hajýr nare! Ne me imã me apê ampo hamreare, ca me acakrõ ame apa, ne me acunea into tũm pit. Ca nee ate me amji pupun xà kêanre kam me apahãmti ata na, ate me amji pupun ne ahna me amji jahkre pej nare, ne me imãa ri me ate me hajýr xà itajê jahkre pej.

¹⁸ “Cwýrjapê wa ha gapackre, ne me amã. Ajpên iwýr me pra, ne amji mã me ate amji kam me gapac xà pejti pê ôr prã pyrãcti atajê jũhkã, ne pea atýj to Inxũ me imã me gakràj. Ne hanea ne, ca ha iwýr me pra ne amji mã me icarõt jũhkã, ne ihkõat catyt kam me apa, ata pê ri ihhêj rũm me akã jakati atajê mã ate me amji jacjên, ne kam ame apa ata pyrãac, me apahãm cupate. Ne hanea ne iwýr me pra ne amji mã me ite amji jahkre pej pê ihhêj rũm mento cahhê xà pyrãac ata jũhkã, ate me amji jahkre pej, ne me arĩt pej me ate me to ampo pupun xà caxuw.

¹⁹ “Xà ajkĩ me imã me akĩn nare na mã wa ame ato kêanre, ne ame gapackre xà týtji itajê to ame gapackre? Hãpà! Imã me akĩnti, incwýrjapê wa itýj ampo kên itajê cunea intête me amãn to me gapackre to

ihýtaj to ipa. Hõhõ, ita na wa ijõtpê imã mehkĩnti atajê to hajýr to ipa. Cwýrjapê ca ha caxwãm catia mã iwýr me apkjê. ²⁰ Ne wa ihhêj ne ikre cunea jarkwa mã icuhhê to ijãhcukjêr to ipa, ixãr prãmte. Quê ha jũm te ijõkre par, ne imã hihê mên, wa ha ite ixãr ne cahê na ijãpãn na, quê ha ihtýj jũ caxuw hanea ne icahê na apã.

²¹ “Ne por quê ha me ampo kên cunea tohjê, ne ma imã ampo na prãmte kĩnti atajê ton kam me to incrà, ne ahnaa amehtyc na, wa ha itýj amji cahê na ikrĩ xà ata kam me hýr. Quê ha curia icahê na amehkrĩ rohnýtti mã to hanea, pom quê pê wa ampo kên cunea tohjê ne hakren pa, pê Inxũ amji cahê na ihkrĩ xà ita kam ijýr, wa cahê na kam ikrĩ, ita na wa ha me to.

²² “Ýhý me ikwý, xà ajkĩ me gapac nare, me gũpar xà caxuw? Hãpà. Ihtýj me akam me gapac, na ca ha me Apãm Carõ Pejti te mehkwy jakrã mã harên xà na me kampa ne mempartu” — hajýr.

Cõjkwa kam mehkĩrĩ catêjê cunea mã Pahpãm to cati prãm

⁴ Hõ, cute imã harên to hajýr jirõ pê wa ite hipêr ampo pupun. Ne nee mã ampo nare, cõjkwa kam ri harkwa ata te amji jihê mên. Mã jũm jõkre pê ihhêj rũm hõhhi jõkre pyrãcti ata te imã hũjarên to hajýr. Pom pê wa mam kampa ita na ri cute imã hũjarên ne imã:

— Iwýr api, wa ha amã ampo te jũ mãn xà ata jahkre ne amã to ajpê, ca ha hõmpu! — hajýr.

² Me ajkaam mã Pahpãm Carõ te imã amji jõr. Wa curi cõjkwa kam, ite Pahhi krĩ xà kam jũm ata jýr na hõmpun. ³ Mã ihkuc prã pê kên prã tatapti ata pyrãc, ne cupê kên prã tepti ata pyrãc. Ne ihkrĩ xà pu na ihprã krorti ata pê ihhêj rũm ta jõxwýn.

⁴ Ne Pahhi krĩ xà ata pu na mehkĩrĩ xà kwý jãhtõ na cute winticwat, mã kam pahhi catêjê te winticwat, ne mehkã jakati kam mehkĩrĩ, ne ôr te wakýre prã pejti ata te mehcunea krãhkã. ⁵ Ne me hipóc ri Pahhi krĩ xà ata pĩn ri ihcuxê, ne kam me hõkre, ne hàhkrihkrit pê pahhãjê pyrãcti. Ne Pahhi krĩ xà ita cuna mã hàhcujro xà te xet, atajê pê Pahpãm Carõ Pejti caca xà te xet atajê pyrãc, ne hàhcujrohti. ⁶ Ne Pahhi krĩ xà ita cuna mã ampo pê cõ cati pê wit prãti tetetti ata pyrãac ne nõ. Ne Pahhi krĩ xà ita pu na pê jũmjê tĩar te cwat atajê te mehkãrã ne me to xa. Ne jũmjê tĩar te cwat atajê kam into jãhtõa to hàhtõ, me hĩ cunea kam. ⁷ Ne mam ita pê ihhêj rũm rop hõhtia pyrãc. Ne ihcote na ita pê ihhêj ne pryti xũmtia pyrãc. Ne hapu na ita kuc pê ihhêj rũm me hũmre kuac. Ne hapu na ita pê ri ihhêj rũm hàctia te apu ihtor pyrãc. ⁸ Ne cute me cwat itajê kam pê ahpýanre na me hara xêj partu. Ne caxwãm pê mento, ne põ rũm mento. Ne nee caxwa me amcro kam menrcer to hicu nare, ne menrcer to:

“Apejti!

Ne quêt apejti ita pê Pahhiti pê Pahpãm!

Ne ca ri quêt acarõt týtji, mehcunea jirõa pê.

Ne apê mam ata, ne apê cormã ata,
ne apê cormã ata rohnýtti mã" hane.

9 Ne cute me cwat atajê hipêr Pahpãm mã mençrer to:

"Quêt mehcunea mã acatihti na gahkre pej,
ne apejti na me cumã gahkre pej.
Ne mehcunea amji mã me acupa.
Ne mehcunea jirôa pê acarôt týj!" hajÿr.

10 Ne hãn ne cute me cwat atajê Pahpãm pê Pahhiti mã mençrer kam pra, mã pea pahhi te winticwat itajê Pahpãm cuna mã mehpÿpÿm, ne Pahhi krí xà ata cuna mã me hõ krãhkã atajê nõ, ne me harên to:

11 "Me ijõ Pahhiti pê me ijõ Pahpãm,
quêt apejti ne acatihti,
mã quêt mehcunea amji mã me acupahti to me ipa.
Ne quêt acarôt týjti, ne ampeaj kam apej.
Ampo na?
Pê ca quêt ampo cunea to.
Ne ate amji mã to apijapar xà na ihprãmti ata to, ca to ajpa" hane.

Ihkàhhôc na hê xà te xet atajê

5 Wa ite Pahhiti krí xà kam jũm jÿ ata jũhkra kam, awpôc rũm, ihkàhhôc krãre ata pupun. Mã ihkàhhôc ata kam ihhôc te hũjê, caquéc kam ihhôc, ne hanea ne hõkwa kam ihhôc. Mã ahna hê xà te xet atajê te ahna hê. ² Ne hanea ne ite Pahpãm mã memprar catê nõ týjti ata pupun, mã ihkrãhhia kam cute hàhcukjêr to:

— Jũm ri ihkàhhôc ita tète ahna hê xà itajê jirên xà caxuw impej, quê hihê mẽ? — hajÿr.

³ Mã nee cõjkwa kam ihkàhhôc ata caxuw jũm hamreare, ne nee pjê kam caxuw jũm hamreare, ne hanea ne nee pjê krac ri caxuw jũm hamreare, cute ihkàhhôc ata tète ahna hê xà na ihtô xà itajê jirên, ne caxwãm pê hõmpun xà caxuw. ⁴ Pê wa ajco amrãa to amrã. Ampo na? Pê nee ihkàhhôc na hê xà jirên xà ata caxuw jũm impej nare, cute ahna hê xà atajê jirên, ne caxwãm pê irít ne cute hõmpun xà caxuw. ⁵ Mã pahhi na mehwÿ nõ ata te imã:

— Apu acwÿr nare, hõmpu he, Juta na mehwÿ jõ Pahhiti pê rop cahàcti jõkre hõhti pyrãcti ita ri me hirôa pê carôt týj. Ne cupê pahhi Tawi xwÿ tàmxwÿ tàmxwÿ, Juta tàmxwÿ, ne taa mã quê ha ihtÿj ihkàhhôc na ihtô xà te xet itajê jirên pa, ne capô ne hõmpu — hajÿr.

Jeju pê carà cahàcre kra nõ pyrãc, mã jũm jaxà kam cute mehcuran xà

⁶ Wa pea ite carà cahàcre hõhti kra xũmre nõ pupun, mã Pahhiti krí xà cuna mã xa. Mã cute me cwat atajê me, pahhi catêjê atajê te mehkã. He pê ihhêj ne jũm carà cahàcre kra xũmre ata cura, mã hacpÿa mã ihtír ne xa ata pê me pajõ Pahhiti pê Jeju. Ne kam hĩpàr te

xet, ne kam into te xet. Ne cukrã xà te xet atajê pê Pahpãm Carõ Pejti caca xà te xet atajê, mã pjê wÿr hãn ne mehkujate, atajêa ri. ⁷ Mã pea Caràcahàcre Kra ita mõi, ne cute, por Pahhiti hÿr xà kam jÿ ata pê awpôc rũm hũhkra kam ihkàhhôc ata caxàr. ⁸ Mã pea, pom cute me cwat itajê me, pahhi te winticwat atajê me, cuna mã mehkõn krã na mehpÿm. Ne pê ahpÿanre na me cumã me hàkôr xà. Ne ahpÿanre na me cumã ampo kũm cuxwati atajê te wakÿre prãti atajê to hipu par-tu atajê pê Pahpãm na mehwÿ te me to cumã mehçakôc xà pyrãc.

Ihkàhhôc jihê mẽn xà caxuw Jeju pej

9 Pê ajco mençrer tuw to mençrer to me hane he:

"Ate ihkàhhôc ita pyr ne hihê mẽn xà caxuw ampeaj kam apej!

Ampo na?

Pê ca ty, ne acaprô jaxwÿ.

Ne acaprô jaxwÿr ata to Pahpãm mã pjê kam kríxàre cunea pê mehwÿ japrô,

ampo kra me, me harkwa pihho to mehçakôc catêjê me,

pjê cunea kam atajê cunea pê ca me haprô.

¹⁰ Ne amji mã mehcunea to amã me hàpên catêjê.

Ne me taa mã quê ha mehwÿ to me amã mehçakôc, ne me taa pjê cunea to mehhimpej" hane.

Pjê me cõjkwa kam mehcunea ame Jeju catia to me cumã ihçakôc

¹¹ Wa hipêr irít ne ite Pahpãm mã memprar catêjê jãhtôa to hàhtô ne me hõmpun, ne me hàhtôti atajê pê jũm te me cahyt par xà nare. Mã cute Pahhiti krí xà me, cute me cwat itajê me, me pahhi itajê krã tu ne me to xa, ne kÿj cati pêa mã cute me cumã harên to:

¹² "Apê Caràcahàcre Kra pê Jeju.

Pê ca amji to me ikritxwÿ, pê ca ijaxà kam ty ne apeaj to apej.

Ne me hirôa pê atÿj, ne me hirôa pê gakràj, ne me hirôa pê ate amji jahkre pej, ne me hirôa pê ahihtÿj!

Mã pjê cunea kam amji mã me acupa, ne mehcunea mã apejti na gahkre pej, ne me imã mehcunea te acatihti me apejti na me garên na me to prãm!" hajÿr.

¹³ Ne pea ite ampo pryre cunea increr na kam ijapac. Cõjkwa kam cuwënti me, pjê kam pryre me, pjê krac ri pryre itajê me, cõxwa kam tep me, pjê cunea kam, pryre cunea increr na kam ijapac. Mã cute mençrer to hajÿr he:

"Por ca ajÿr xà kam jÿ ata me,

Caràcahàcre Kra ata me,

wa acatihti impejti na me garên to prãm.

Mã pjê cunea kam amji mã me acupa,

ne mehcunea mã apejti na me gahkre pej,

ne mehcunea jirôa pê me acarôt týj rohnýtti mã" ha-jÿr.

14 Mă cute me cwat itajê me kampa ne me cumă:
— Ỳhỹ, ampeaj kam! — hane. Mă pahhi atajê mehkôn kră na mehpȳp̄ym, ne catihti impejti na me harê.

Hũmre cawrô jakati kam jỹ ata pê me cupê amji mă hũtar catê

6 Wa pea ite Caràcahàcre Kra te mam, pom ihkàh-hôc na hap̄yn xà te xet itajê nõ hyr na hõmpun, ne pea ite, pom cute me cwat itajê nõ jõkre pê pahhàjê jàhkrihkrit ita par, mă cute kỹj cati p̄ea mă hàkjêr to:
— Ajpên mõi! — hajỹr. 2 Wa irĩt, ne ite cawrô jakati ata pupun, mă ajpên tẽ. Mă kam me hũmre nõ ata jỹ, ne cumă cuuhê, mă cute me cumă pahhi krăhkà jõr. Mă ma to tẽ ne ihtỹj amji mă me cupê pjê cunea pytar to mõi.

Hũmre cawrô caprêcti kam jỹ ata pê me ipijapu to hapõj catê

3 Jirô pê mă ri, hipêr Caràcahàcre Kra ita te ahna hap̄yn xà nõ ata hyr. Wa pea ite cute me cwat atajê nõ te amji to cote ata par, mă cute hàkjêr to:
— Ajpên mõi! — hajỹr. 4 Mă pea cawrô nõ caprêcti ita cator ne ajpên mõi. Ne kam hỹr catê ata te pjê kam, cute me ipijapu ne me hũmre te pjê kam me amji kwya curan xà caxuw, amji na hũpar. Mă jũm te cumă caxuw wapo xwahhihti nõ catia ita jõr.

Hũmre cawrô tycti kam jỹ ata pê mehkôt prãm cràn catê

5 Ne Caràcahàcre Kra ita te hipêr ahna hap̄yn xà in-crê hyr xà ita kam, wa ite cute me cwat atajê nõ te me to in-crê ata par, mă cute hàkjêr to:
— Ajpên mõi! — hajỹr. Wa irĩt ne ite cawrô tycti ita pupun, mă ajpên mõi. Mă kam hỹr catê ita te hũhkra to cute ampo to ipipên xà ita pyr ne kam to jỹ. 6 Mă cute me cwat itajê cajpuaw jũm jõkre ita jũjarên ita te hajỹr he:
— Amcro pyxit kam me hàpên xà jahpan xà na, me cumă arỹjhy na crat to pyxit peaj ne agõ. Ne kwyr xõm na, ca ha me cumă crat to in-crê ne me cumă agõ, amcro pyxit to me hàpên jahpan xà na. Ne hõ kryjre to ampeaj kam me cumă hĩ to ahwỹ. Ne nee ampo to impê xà me, ampo itajê nõ to apicacwyr nare, ne nee hanea ne ampo cacõ xyre ita me ampo itajê nõ to apicacwyr nare — hajỹr.

Hũmre cawrô tatapre kam jỹ ata pê me hipej catê

7 Jirô pê mă ri Caràcahàcre Kra te ahna hap̄yn xà te cwat ita hyr. Wa ite cute me cwat itajê nõ te me to cwat ata par, mă cute hàkjêr to:
— Ajpên mõi! — hajỹr. 8 Wa pea irĩt ne ite cawrô tatapti ata pupun, mă kam hỹr catê ata kam jỹ, mă cute me cumă haprỹ jõr to Me Hipej Catê. Mă ramã pjê kam mehtyc catêjê ihkôt ame ipa. Ne pea cute pjê kam me hipej na amji na hũpar to hajỹr he:

— Ca ha ahp̄yanre na mehcuran xà cunea to mehcuran to apa. Quê ha me hũmre me cwat, ca ha me ipijapu na me to, quê ha me ajpu ne me amji pyxit ne me amji cura. Ne prãm me, me hà me, pjê kam ampo kên jàprê cunea to mehcuran to hane he. Quê ha me hũmre me cwat, ca ha mehcuran xà itajê to hãn ne me pyxit ne mehcura — hajỹr.

Cute mehkwȳ jipej jahpan xà na, cute me to kên na me ahwỹ

9 Mă pea Caràcahàcre Kra ita te ahna hap̄yn xà te xĩc ita hyr. Wa pea ite Pahpãm mă ampo kũm cuxwati to caxàr xà ata pupun. Mă ihkrac ri me caxw̄yn jàhtõa ne me jỹ, atajê pê Pahpãm jarkwa to mehcajõc catêjê te catyt kam me ipa, mă me curê xw̄yn te amehcuran atajê caxw̄yn, wa ite me hõmpun. 10 Mă mehkrãhhia kam cute ame caràr to:

— Me ijõ Pahhiti impejti ne carõt tỹjti ata! Ampeaj kam apê Pahpãm ata! Jũ caxuw ca ha pjê kam itajê cukij? Ne jũ caxuw ca ha cute ame icuran catêjê itajê to apu ihkên, cute me icuran jahpan xà na? — hajỹr.

11 Mă ahp̄yanre na cute me cumă mehkà jakati atajê jõr partu, ne me cumă:

— Ca ha cama ame akõt to mehkryjre ne. Ne hanea ne cute ame gápên xà ita to me hàpên, ne me ato amji kjê catêjê kwỹ jikaj. Por quê ha cormã hanea ne amehcura atajê, quê ha me akõt me cato ne me aràn. Ne pea cute amji mă me gãhtõ na, cute me ato hũjahkre xà ata mă, me ato hahê — hajỹr.

Quê ha Pahpãm to cute ame kên jahpan xà na ame to kêanre ne

12 Wa pea ite Caràcahàcre Kra te ahna hap̄yn xà te xêj ita hyr na hõmpun. Mă pea pjê jàhcujrõn, ne pyt kam awcapàtkõ tycti ita pê ihhêj rũm cupêhkà tycti ata pyrãac, ne putwrȳ intep pê ihhêj rũm me caprõ tep. 13 Mă caxêre cõjkwa pĩn apu ipijaxwyr te hajỹr, pom quê hãn ne kõc prĩn mă ipar to ahcujrõ, mă hãn ne apu pjê kam ajxwỹ he. 14 Mă cõjkwa jamre xà te hajỹr, pom quê hãn ne ampo kà in-crà amji krã, cu me capõ ne me cumă hikra, mă hãn ne hacp̄ya mă amji krã to pra he. Ne por hakõt apu ihkrĩ atajê me, cõ kam amcrà jacot atajê te amji pê ihkrĩ xà itajê caca, ne ma cupê ipintuw partu.

15 Mă pjê jõ pahhi catêjê me, krĩ jõ pahhi catêjê me, krãhtare jõ pahhi catêjê me, por me hakràj catêjê atajê me, me carõt tỹjti atajê me, me hũmre cunea me, cama me cumă me hàpên catêjê me, me hõ pahhi me, mehcunea pimxur, kên kre me hàhkà jakõt krac ri ame ipimxur partu. 16 Ne cute kên kre me, hàhkà jakõt mă mehkrãhhia kam me caràr to:

— Ame ikam apỹp̄ym ne ame ipro, por hỹr xà kam jỹ ata me, Caràcahàcre Kra ata te ame ikam in-cryc xà atajê cupate, ca ha me cupê me ito amxu. 17 Ampo na? Hamre, ramã cute ame ikam in-cryc to in-cryc jõ amcroa kam hàhhuc, na wa ha nee me inõ cumă ijũcanãr nare — hajỹr.

**Pahpām na mehkwy te 144 mir kuctyj kam haprya na
ihhōc**
Ipipě Xà 9.4

7 Jirō pê mã wa ite cōjkwa pīn Pahpām mã mem-
prar catêjê te cwat te me pjê jō xwahhi jō kōc te
cwat na incwyr, ne me huwahi, ne me to ihcuhhê na
me hōmpun. Ampo na? Cute ame to kên xwýjrea na
mam kōc nõ te pjê me, cō me, pī pâr nõ jakōr cupate ri
cute me to amji týj ne me to xa. ² Wa pea ite Pahpām
mã memprar catêjê nõ pupun, mã pyt japōj xà rŭm
ihtor, ne tē. Ne Pahpām tīar ihkrī ata te haprya na cute
mehhōc catê ata kujahêc, mã ihkwý te cwat te apu pjê
me cō cunea to kên catêjê atajê wýr tē. Ne kýj cati pēa
mã cute ihkwý mã carār to:

³ — Ca ha nee cormã ne ame pjê to kên nare, ne nee
cormã ne ame cō to kên nare, ne nee cormã ne ame pī
pâr nõ to kên nare, wa ha xa me pajō Pahpām tīar ata
jō tekjê na ame ipa atajê kuctyj kam haprya na ihhōc
pa mã — hajýr. Ne cute me kam mehhōc par.

⁴ Wa pea ite, cute Pahpām japry na mehkuctyj kam
ihhōc itajê jàhtō na me harên par. Mã me hàhtō na
cute me 144 mir. Ne me cupê ahpýanre na Ixaher
catêjê jakrã ne ajpên kam mehpým ne me xa. ⁵⁻⁸ Pê Ix-
aher catêjê na ahpýanre na me hakrã kwý amji to ata-
jê, amji to me ajcokjê ne me xa, pê ahpýanre na ajpên
caxuw me hakrã hàhtō na me tōxi mir. Ne Ixaher
catêjê na kjêjê na me amji to ne me xa atajê pê, Juta
me, Rupên me, Cate me, Axer me, Naptar me, Manaxê
me, Ximãw me, Rewi me, Ixaca me, Xepurō me, Joje
me, Pênjamĩ.

Pahpām na mehkwy cunea me cumã cati to ihcakōc

⁹ Jirō pê wa irīt, ne ite me cupê Ixaher catêjê nare pê
mehcakrit jàhtōa pupun. Mã me hàhtōa to me hàhtō,
ne jū wýr quê jūm me cahyt pa. Ne ahpýanre na ajpên
caxuw ampo kra me, pjê kam krīxàre cunea me, me
harkwa pihho me, pjê cunea pīn mehcunea Pahpām
krī xà ata me Caràcahàcre Kra ata cuna mã mehkà
jakati kam me xa, ne me hūhkra kam tēti hô pit mã,
me to xa. ¹⁰ Ne kýj cati pēa mã me hūjarên to:

— Por Pahpām hýr xà kam jý ata, me Caràcahàcre
Kra ata pê ri me ikên pê me ito hapōj catêjê — hane.
¹¹ Pê Pahpām mã memprar catêjê cunea Pahpām krī
xà ata me, me pahhi catêjê cunea me, por cute me
cwat atajê pu na me ajxê ne me to xa. Ne mehcunea
mehkōn krã na me hýr ne pea me Pahpām jarên to:

¹² — Taamã, ampeaj kam quêt acati, ne mehcunea
mã apejti na gahkre pej, ne quêt akrã krea to akrã kre.
Ne ate me imã ampo pejti jōr atajê pyrên ampeaj kam
me ijakry, ne mehcunea amji mã me acupa, ne
mehcunea jirōa pê acarōt týj, ne me hirōa pê ahihtyj
rohnýtti mã. Taamã! — hane.

¹³ Mã me pahhi nõ te icukij ne imã:

— Měr jūmjê mã mehkà jakati kam amehcuhhê ata-
jê? Ne jū pīn mã ame hapōj? — hajýr. Wa ite cumã:

¹⁴ — Pýpýn, ipê me hahkre kēatre, ne quêt amãa ri
me hahkre pej — hajýr. Mã cute imã me harên to:

— Pom me xa itajê pê ame amji pupun xà kēanre to
ame amji pupu, ne Caràcahàcre Kra ita caprō to ri cute
ame amji mã mehkà itajê cahhōn, mã mehkà itajê
jakaa to haka. ¹⁵ Cwýrjapê ri Pahhiti pê Caràcahàcre
Kra ita krī xà ita cuna mã amehcuhhê, ne amcro me
caxwa cunea kam Pahpām to me amji kam me hapac
xà jūrkwá kam me hàpên to pyt, ne me to apê, ne por
hýr xà kam jý ata ri ihtyj haprya na me hamār to ihkrī.
¹⁶ Ne quê ha jū caxuw hipêr me cumã prãm nare, ne
nee me cumã kōr nare. Ne nee quê pyt cacro me am-
po cacrohti me to caxàr nare. ¹⁷ Ampo na? Por Carà-
cahàcre Kra ihkrī xà jipōc ri jý ata, quê ha amji to me
hamār catê catihti, ne ma, por cō impejti te me to ihtír
rohnýtti mã xà ata wýr me to ipa, quê ha pea Pahpām
me cumã mento cacō atajê incrà — hajýr. Hō, cute imã
me harên to hajýr.

Cōjkwa kam ahcarĩcti

8 Ne pea Caràcahàcre Kra te ahna hapyn xà te xet
ita hyr, mã pea cōjkwa kam ahcarĩcti na ahtŭm
ryre. ² Wa pea irīt, ne ite Pahpām cuna mã cumã mem-
prar catêjê te xet ne mehcuhhê na me hōmpun. Mã
cute ahpýanre na me cumã hōhhi jōr partu.

Pahpām na mehkwy te cumã mehcakōc xà

³ Mã pea Pahpām mã memprar catê nõ ata te ampo
run xà prāti pê ôr ita pyr, cumã ampo to me caxàr xà
cahê na ne to xa. Cute kam ampo kŭm cuxwati ata kwý
to hipu prãmte ri to xa. Mã cute me cumã ampo kŭm
cuxwati catia ne hōr. Pahpām na mehkwy te Pahpām
mã mehcakōc xà ata pê ri ihhêj rŭm ampo kŭm
cuxwati te caxàr xà ata. Mã ma ôr te ampo kŭm
cuxwati te caxàr xà ata wýr to mō, Pahpām krī xà cuna
mã xa ata wýr. ⁴ Ne hūhkra pīn ampo kŭm cuxwati ata
kŭm ma hàpir to mō, Pahpām na mehkwy cunea te
me Pahpām mã mehcakōc xà atajê me ajaam mã ma
Pahpām wýr hàpir to mō. ⁵ Mã pea Pahpām mã mem-
prar catêjê nõ ata te ampo run xà ata pyr, ne kam am-
po kŭm cuxwati te caxàr xà ata jō cuhy pôc to hipu, ne
ma ahpār mã pjê wýr to hūcapêr. Mã pea kam pahhãjê
ahkrihkrit, ne kam me carār, ne ampeaj kam, kam
ihcuxê, mã pjê cunea apu ahcujrō.

⁶ Mã Pahpām mã memprar catêjê te xet atajê te
hōhhi te xet atajê cakōr xà caxuw ame to hàhcuprōn.

Pjê kam ampo jàhtōa te caxàr

⁷ Mã mam pyxit ita te hōhhi cakōr. Mã pea cuhy
cator, ne kên te ta me, caprō picacwýr, mã ma pjê wýr
ahpār mã cute to hūcapêr. Ne hanea ne pjê jàhtōa ne
cute to caxàr. Quê ha pjê incrê, quê ha pyxit ne to ca-
pa. Mã cute pī jàhtōa ne to caxàr. Quê ha pī incrê, quê
ha pyxit ne to capa. Ne hanea ne cute kam pōre
kukŭmti ata cunea to caxàr par.

Cōxwa te me caprō na amji jahkre

⁸ Jirō pê mã ri hipêr ita te hōhhi ita cakōr. Mã ampo
pê ihhêj rŭm hàhkà jakōtti te apu ihpōc to ipa pyrãcti

ata ihpôc to mō, mā ma ahpar mā cōxwa kam cute to hūcapêr. Mā pea cōxwa jīkjê te me caprô na amji jahkre. Quê ha cōxwa incrê, quê ha pyxit ne caprô. ⁹ Mā cōxwa kam ampo apu ipa itajê jàhtôa ne ihtyc par, mā hanea ne pàr kre jàhtôa ne hamre. Quê ha ampo incrê, quê ha pyxit ne hamre.

Cô ajpjê atajê nõ xya to hỳ

¹⁰ Mā hipêr incrê ita te hōhhi cakôr. Mā caxêre nõ catia ita pê ihhêj rŭm pahte ame pajŭhkra to ame pĩ pôc cwŷr, mā hăn ne apu ihpôc to ipa, mā ma cōjkwa pĩn cô kam ihpŷm. ¹¹ Ne caxêti ita japrŷ te Xŷhti. Cwŷrjapê ri cô jīkjê kam caxêti ita pŷpŷm atajê xya to hỳ. Quê ha cô incrê ne ajpjê atajê nõ pyxit ne hỳa to hỳ. Cwŷrjapê ri me hŷmre kwŷ jàhtôa ne cute cô ata to mehkôm catêjê cunea tyc partu.

Cōjkwa kam ampo ahcujro atajê cunea jīkjê kam awcapàtkô

¹² Mā cute to cwat ita te hōhhi cakôr. Mā pea pyt me, caxêre me putwŷrŷ jīkjê pot kam awcapàtkô. Ne nee pyt jīkjê pot kam hàhcujro jô amcro jàhcujro nare, ne kam awcapàtkô. Ne caxêre te hajŷar, ne putwŷrŷ te hajŷar, ne nee hīkjê pot kam hàhcujro nare, ne pea cajê to mō.

¹³ Jirô pê mã wa irīt, ne ite hàcti nõ ita tor ne kàaj mã tẽ ata pupun. Mā cute ihkrāhhia kam hŷjarên to:

— Akŷ, akŷ, akŷ, por pjê kam amehkrī atajê, quê ha cormã me Pahpãm mã memprar catêjê incrê te me hōhhi cakôr atajê jôkre kampa, ne pea mehkên mã me axà! — hajŷr.

Ampo kên pê hōxwa catia pyràc atajê me cumã mehkàj xà to

⁹ Jirô pê mã ri Pahpãm mã memprar catê te xíc ita te hōhhi ita cakôr. Wa ite, pom pjê kam caxêti nõ te ampo carô kên jŷrkwa kre jatôhhy nare ata jihê mên xà pyr na hōmpun. ² Mā caxêti te kre jatôhhy nare ata jihê mên, mã ihpĩn ihkŷm jicrôtti ita pê ihhêj rŭm kwŷr cajror xà jicrôt, ne pom kre jicrôt cator ita te pyt pro, mã pea kŷj pê kam awcapàtkô. ³ Mā ihkŷm jicrôt ita pĩn xycxtycti itajê hapôj, ne ma pjê wŷr ajpên pra, ne ihhêj rŭm incaca xà pê pactia incaca xà. ⁴ Mā jŷm te me cumãn to hajŷr he:

— Ca ha nee ame pōre kukŷmti atajê nõ to kên nare, ne nee ame ahkêt to kên nare, ne nee ame pjê kam ampo pĩ pàr atajê nõ to apu mehkên nare. Ne por me hŷmre kuctŷj kam Pahpãm japrŷ na ihhōc nare atajê to pit mã, ca ha atŷj amehkên. ⁵ Ne nee amehcuran nare, ne cama me cumã mehkàj xà to, quê ha mehkàj xà itajê na ame amji pupun kēanre ita to ame putwŷrŷ to xíc — hajŷr. Ne pom quê ha mehkàj xà itajê pê, quê ha ihhêj rŭm pacti te ame caxwŷr xà. ⁶ Putwŷrŷ te xíc ita kam, quê ha me hŷmre atajê tee apu amji to mehtyc xà japê, ne nee ampo te amehcuran xà atajê na ame hapôj nare. Quê ha ihtŷj amehhtyc prãm cakrô, quê ha ma mehtyc xà atajê ame hahpa.

⁷ Ne xycxtycti itajê pê ihhêj rŭm cute ame hàprê xà wŷr cute cawrô pytàr xà ame to hàhcuprôn. Ne ihkrã kam ihhêj rŭm cupê wakŷre prã tepti pê ôr te ihkrãhkã, ne ihkuc pê ihhêj rŭm me hŷmrea kuc. ⁸ Ne ihkĩ pê ihhêj rŭm pyjêa kí. Ne wa pê ihhêj rŭm rop cahàcti jôkre hōhti xwaa. ⁹ Ne hĩ pytàr xà ita pê ihhêj rŭm wakŷti te ame hĩ pytàr xà. Ne hara jàhkrihkrit pê ihhêj rŭm cawrô jàhtôa te me hàprê xà wŷr kujti kjên to ihprôt jàhkrihkrit. ¹⁰ Ne cupê pactia ne hapy kam ihpêrhy, ne ihpêrhy ita pê ihhêj rŭm wakŷti te ame caxwŷr xà, ne wahhi. Ne ihpêrhy ita to quê ha ame hŷmre itajê caxwŷr to ipa ita to putwŷrŷ to xíc. ¹¹ Ne ihtŷj cumã hō pahhi mã to ihhimpej, por caxêti te kre jatôhhy nare jihê mên xà to amji pytàr ata pê ri hō pahhi. Ne Ixaher jarkwa na haprŷ te Apatô ne Crec jô pjê catêjê jarkwa na ri haprŷ te Apôrijô ne, pom haprŷ itajê hŷjarên to “Me to hamre catê”.

¹² Ne mam cute me amji pupun xà kēanre catia ita te ma ramã me hakren. Jirô pê mã, quê ha ihtŷj cormã cute me amji pupun xà kēanre pijakrut atajê cormã me hŷrmã cato.

Krãhtare me hàhtôa jipej

Roman 1.18-27

¹³ Mā pea Pahpãm mã memprar catê nõ te ihkwŷ to xêj ita te hōhhi cakôr. Wa pea ite Pahpãm cuna mã wakŷre prã tepti pê ôr te ampo kŷm cuxwati pôc xà jô xwahhi te cwat ata pĩn jŷm jôkre ita par. ¹⁴ Mā cute hōhhi cakôr catê ata mã:

— Por Cômpejti jô cōhti cahi na Xatanaj mã memprar catêjê te cwat ne me huwapre ne mehcuhhê atajê mã me hê pô, ne me cumã hikra — hajŷr.

¹⁵ Mā cute me Xatanaj mã memprar catêjê te cwat itajê mã me hê pôn, ne me cumã hikran. Ne pê ramã ampo itajêa na me to awjahkre, amcro ata me, putwŷrŷ me, caku me, mār quê pjê kam me hŷmre jàhtôa ne me hipej. Quê ha me hŷmre incrê, quê ha pyxit ne ihcura. ¹⁶ Ne ite me cumã cawrô kam me hàprê catêjê jàhtô na cute me 200 mirjãw na ite me harên par.

¹⁷ Ne irĩat kam ite cawrô itajê pupun, kam me hàprê catêjê mea mã, mã me hĩ pytàr xà itajê tepti ita pê ihhêj rŭm cuhy, ne ihkukŷmti ita pê ihhêj rŭm cōjkwa kukŷm, ne ihtatapti ita pê ihhêj rŭm pyrãre tatap. Ne me hō cawrô krã itajê pê ihhêj rŭm rop cahàcti jôkre hōhti krã, ne harkwa pĩn ihtŷj cuhy hapôj. Ne ihkŷm hapôj ne hanea ne kam ihkŷm tatapti ita hapôj, cute mehcuran xà caxuw. ¹⁸ Ne pom cawrô jarkwa pĩn cuhy me, cuhy kŷm me, ihkŷm tatapti atajê te me hŷmre jàhtôa ne me hipej xà. Quê ha hŷmre incrê, quê ha hōtpê pyxit ne mehcura. ¹⁹ Ampo na? Cawrô itajê cunea jarkwa kam ri hàprê xà, ne hanea ne hapy kam ri hàprê xà. Ne hapy kam ihkrã itajê pê ihhêj rŭm cagã krã, mã to me hŷmre cãmxa, mã mehkàj xà kēanre na, me amji pupun xà kēanre to me ipa.

Ma cute ame amji kam me hapac xà to ipintuw caca

²⁰ Ne ampo te amehcuran nare atajê cahhur jàhhuc atajê te nee me hŷhkra to cute ame amji mã me hō

pahpām cahàc krekà ton atajê kîn jicu nare. Ne nee hanea ne cute ame ampo carõ kên itajê kîn jicu nare, ne pom me hõ pahpām cahàc krekà itajê ri he: Wakÿre prà tepti pê ôr te me hõ pahpām cahàc krekà ita, ne wakÿre prà jakare te pahpām cahàc krekà me, kên te me hõ pahpām cahàc krekà me, pĩ te me hõ pahpām cahàc krekà. Ne me hõ pahpām cahàc krekà itajê nee irĩt, ne nee hũpar nare, ne nee hanea ne ipa nare cakrõ, mã ihtÿj me cumã ihkĩn. ²¹ Ne nee cormã cute mehwÿ curan jicu nare, ne nee cormã cute me hũxy xi jicu nare. Ne hanea ne nee cormã cute ahti na ame pyjê caxun itajê jicu nare, ne nee cormã cute ame hàhkĩj jicu nare.

Ta jàhkrihkrit te xet jarěn xà, Jowāw te ihhòc xà nare

10 Wa pea ite còjkwa pĩn Pahpām mã memprar catê nõ tÿjti ata pupun, mã ajpên ahpar mã iwrÿc to mõ. Ne ihkà ita pê ihhêj rũm ahcakrã, ne ihkrã kam ta jõxwÿn xa, mã to mõ. Ne ihkuc prà ita pê pyt prà. Ne ihte pê cuhy ne kam xa. ² Ne hũhkra kam ihkàhhòc nõ ita crire ne ihpahe hiahpuro mã to tẽ. Ne cute cõ kam awpòc rũm ihpar ita xãm, ne pjê kam cute awke xãm. ³ Ne kÿj cati pẽa mã caràr, ne caràr ita pê ihhêj rũm rop cahàcti jòkre hòhti jòkre. Caràr jirò pê mã còjkwa pĩn me hòkre jàhkrihkrit te xet pê ta jàhkrihkrit pyràcti ita to cute catia. ⁴ Ne cormã cumã mehçakòc kwÿa kam, wa ajmãr ite ahna ihhòc, ne ramã ahna ihhòc xàa caxuw apu amji mã ahcuprõ, mã còjkwa pĩn jũm jòkre ita te imã:

— Aracri acaxwãm pê amji mã me hũjarěn xà itajê nõ, ne nee ahna ihhòc nare — hajÿr. Wa ite impar, ne nee ahna ihhòc nare.

Pê Jowāw mã cute ihkrēr xà caxuw ihkàhhòc crire gõ

⁵ Wa pea ite pjê me cõ kam Pahpām mã memprar catê ata pupun, mã cute còjkwa wÿr awpòc rũm hũhkra pēr, ne ihcakòc. ⁶ Por Pahpām ihtĩar ihkrĩ ne cute còjkwa me, pjê me, cõ kam ampo cunea ton ata jarkwa na hũjarěn te hajÿr he:

— Quê ha nee hipêr amji to amcro nõ mẽn nare!

⁷ Quê ha Pahpām mã imprar catê te ihkwÿ to xet ita hòhhi cakò. Quê ha Pahpām, pom pê ramã cumã me hàpên catêjê pê harkwa to me cumã ihcakòc catêjê mã, amji kam hapac xà na amji jarê ata to hàpên kam tẽ — hajÿr.

⁸ Mã hipêr còjkwa pĩn jũm te imã ihcakòc ata te hipêr imã ihcakòc ne imã:

— Tẽ ne Pahpām mã memprar catê nõ, cõ me pjê kam xa ata jũhkra kam ihkàhhòc nõ curor hiahpuro ata, cupê apy — hajÿr.

⁹ Wa ma tẽ ne ite ihkàhhòc ita na ihwÿr. Mã cute imã hũjarěn to:

— Ihkàhhòc ita py ne krẽ, quê ha garkwa kam inxò pê pen xò, ne gõxà kam quê ha wa xÿ — hajÿr.

¹⁰ Wa ite cupê ihkàhhòc ita pyr, ne ite ihkrēr. Mã ijarkwa kam inxò pê pen xò, wa ite ihkrēr jirò pê mã ri ijõxà kam, wa xÿa to hÿ. ¹¹ Mã cute imã hũjarěn to:

— Ýhÿ Jowāw, hipêr amã ate ampo kra me, krĩxàre me, pjê kwÿ me, me harkwa pihho catêjê kwÿ me, pahhi kwÿ mã Pahpām jarkwa kwÿ jarěn xà — hajÿr.

Pê Jowāw cute me Pahpām kîn catêjê cahyt

11 Ne cute imã ampo to ipipên xà pê pĩ cajrer pyràcti ata jõr, ne imã hũjarěn to:

— Hã, to xa ne tẽ, ne to Pahpām to cute me amji kam hapac xà jũrkwa me, cute cumã ampo to caxàr xà ata to ajpên, ne cute me Pahpām kîn catêjê atajê cahyt. ² Ne põ pê caràhti ata, ca nee to apipên nare. Ampo na? He kaam quê ha mehçakrit atajê, por cupê Juta catêjê nare atajê me amji to caku to incrê ne ihkòt hĩkjê xà, na ri Pahpām te me cumã Krĩmpejre jõ cà caràhti ita jahkre. ³ Ne wa ha ma ijarkwa to mehçakòc catêjê pijakrut te xãc to mehka atajê ajwar kujate, quê ha me ijarkwa jarėan to caku to incrê ne ihkòt hĩkjê — hajÿr.

Pahpām jarkwa to mehçakòc catêjê pijakrut

⁴ Harkwa to mehçakòc catêjê pijakrut itajê pê pĩxò pàr cacò pòc pejti ata pyràac, ne me cupê ihpòc xà pijakrut itajê pyràac, por Pahpām pê pjê jõ Pahhiti cuna mã me xa atajê. ⁵ Quê ha jũm te ame to kên prãm to mõi na, quê ha me harkwa pĩn cuhy cato, ne me curê xwÿn ata to hamre. Hõ, quê ha jũm te ame to kên prãm to mõi na, quê ha cama ty. ⁶ Ne cute me Pahpām jarkwa jarěn to ipa atajê te còjkwa pĩn ta to me iwrÿc nare na, cute amji caxuw me hũpar. Ne hanea ne cute cõ kam me caprõ ton xà caxuw amji na me hũpar. Ne hanea ne cute ampo kên jàhtõa to ame pjê to kên xà caxuw amji na me hũpar.

⁷ Ne caku crê ne ihkòt hĩkjê kam quê ha ame to hane, ne cormã me hũjarěn jicu, me ajkam quê ha ampo kenti ata kre jatòhhy nare ata pĩn mehwyr cato, ne me kam tẽ. Quê ha ame ajpu ne ajwar me tohjê ne mehcura. ⁸ Ne pê mam krĩ catia kam, mam me hõ Pahhiti cura ata jõ krĩ cape na, quê ha me hũmre pijakrut tyc atajê me nõ. Ne por krĩ krã kėanre ata pê Krĩhpòc me Ejit jõ pjê krã kėanre ata pyràac. ⁹ Quê ha ampo kra me, krĩxàre atajê me harkwa pihho catêjê atajê cunea me nõr ita na me hòmpun to amcro to mençrê ne ihkòt me to hĩkjê. Ne nee quê ha jũm me harêt na amji jamãr nare. ¹⁰ Ne pjê kam quê ha mehcuran xà ata to ame amji mã amji kîn to, ne hũrèn ame hakry. Ne quê ha ihtÿj me hũrèn me hakryte ame amji mã me ampo jõr to me ipa. Ampo na? Pom Pahpām jarkwa to mehçakòc catêjê itajê te me hũmre mã mehken xà catia ton, ne mehtyc, na ri ame hakry.

¹¹ Ne me ahna amcro incrê ne ihkòt hĩkjê, quê ha Pahpām pĩn mehtĩr xà jõ kòcti pahtÿjti ata cato, ne ajwar me hakò, ne me cumã axà, quê ha ajwar me jÿ ne me hãm pyrentu. Quê ha cute mehtĩr na me hòmpun atajê mã me hũpa to me hũpa. ¹² Quê ha Pahpām jarkwa to mehçakòc catêjê pijakrut itajê me còjkwa pĩn jũm jòkre pahtÿjti ata kampa, quê ha me cumã hũjarěn to:

— Ajpĕn iwÿr me api! — hane. Quê ha cormã ame curê xwÿn itajê ame hõmpun kwÿa kam, quê ha ma ahcakrã nõ ita kam cõjkwa wÿr me hàpir to mõ.

¹³ Me ajkaam quê ha pjê hàhcujrõn kam tẽ, ne hàhcujrõn to catia to cati. Na quê ha krí jĩkjê pot ne to hamre. Quê ha ikre tej, quê ha pyxit ne hamre. Ne pjê jàhcujrõn ata quê ha me hàhtõ na me to xet mir ne me hipej. Na quê ha mehkwy me hõmpu, ne me cumã hũpaa to hũpa. Na quê ha me cõjkwa jõ Pahpãm mã me catia to cati na, me cumã harê. ¹⁴ Ne ramã cute amji na me cute me amji pupun xà kêanre ata pupun to me ipijakrut, mã ramã hamre. Ne me hõmpu he, quê ha cormã cute amji na mehkên xà kêanre incrê pupun xà ata, quê ha cormã mehwÿr cator pyrentu.

Cõjkwa kam ihtÿj me Pahpãm jarĕn pejti to me ipa

¹⁵ Mã Pahpãm mã memprar catê te xet ita te hõhhi cakõr, mã cõjkwa kam me hõkre ita jũjarĕn xà ita te hajÿr he:

— Hamre, ita caxuw Pahpãm pê me gõ Pahhiti me, ihkra pê Crixto te pjê ita cunea to mehhimpej xàa kam ri ramã hàhhuc, ne taa mã quê ha hõtpê ihhimpej rohnÿtti mã — hajÿr. ¹⁶ Mã me pahhi te me winticwat ne Pahpãm cuna mã mehkri xà kam amehkri atajê, mehkõn krã na pjê kam me hÿr, ne pea pjê kam ame hipõ, ne ame krí, cute me Pahpãm cuna mã amji to mehkryre prãmtē ne pea Pahpãm jarĕn pejti to me harĕn to:

¹⁷ “Me ijõ Pahhiti pê Pahpãm,
ampeaj kam acarõt tÿj,
pê ca mam ramã akrí ita na,
cormã akrí rohnÿtti mã!
Wa itÿj apejti na me garê.
Ampo na?

Ca ramã ate me imã acarõt catia to ampo itajê cunea ton,
ne ita kam ca ha ahimpej xà ata kam to tẽ.

¹⁸ Ne me cupê me akõt me ipa catêjê nare atajê,
ampeaj kam akam mencryc.
Ampo na?

Hamre, ate mehcukij ne ame to kên xàa kam ri ramã hàhhuc.

Ramã ate mehtyc catêjê cukij xàa kam ri ramã hàhhuc.

Ne ate amã me hàpĕn catêjê me,
garkwa to mehcakõc catêjê cunea to imej xàa kam ri ramã hàhhuc.

Ne ca ha hanea ne me akwy cunea to hanea,
ne me cati me, mehkryre atajê mea mã,
cute amji mã me acupa.

Hamre, cute ame pjê to kên catêjê to,
ate hamre xàa kam ri ramã hàhhuc!” hane.

¹⁹ Mã cõjkwa kam Pahpãm to me amji kam hapac xà jũrkwa nõ xa ata jarkwa te amji jihê mĕn. Wa ite pĩ po te Pahpãm jãmcjĕn xà ata pupun, por pê Ixaher catêjê pjê kam ihkõt me to, ne ajco me hapÿ ne me to ipa ata,

Pahpãm me cute me ajpĕn par xà ata na. Me ajkaam mã ihcuxê, ne me hõkre, me ta ahkrihkrit, ne pjê jàhcujrõn, ne kĕn te ta pahtÿjti ata.

Cagã tepti kêanre krã te xet jarĕn xà

¹² Mã cõjkwa kam rÿ jũ caxuw pahte me ampo pupun nare ata te amji to ipipĕ. Ata pê pyjê nõ ata. Ne pê ihkã pê pyt, ne ihpar krac ri putwÿr ajĕt, ne ihkrã kam caxĕre te tõi ne amji to ihkrãhkã ata ihkrã na ajĕt. ² Ne pê ramã ihkra, ne ihkra xà te ampeaj kam carãr.

³ Mã hipĕr cõjkwa kam ampo ita te amji to ipipĕ ata pê nee mã ampo nare, cagãti intepti kêanre nõ ata, ne kam ihkrã te xet, ne kam hĩpar te tej. Ne ahpÿanre na ihkrã atajê na wakÿre prã tepti pê ôr te ihkrãhkã atajê harij. ⁴ Ne cute cõjkwa pĩn hapÿ to caxĕre jãhtõa ne hũhÿr, ne ma pjê wÿr to hũcapĕr. Quê ha caxĕre incrê quê ha pyxit ne to awcapĕ. Ne pea pyjê nõ ata cuna mã hàhhuc ne xa, cumã ihkra ita pÿm kõt mã mã, cute ihkrĕr prãmtē.

Pyjê nõ ata mã ihkra pÿm

⁵ Mã pea pyjê nõ ata mã ihkra ata pÿm, ne cumã hũmre, por quê ha ihpa tÿjti to krĩxãre cunea to ihhimpej ata. Mã ma cute me ahkrare nõ ata pÿn, cagãti pê, ne ma Pahpãm wÿr me to tẽ, ihkrĩ xà kam ihkrĩ ata wÿr.

⁶ Mã ma cagãti te inxi to irõ, ne ahna ipipkjĕr ne apu to kĕn prãm. Mã ma inxi ata, por pê ramã Pahpãm cumã ahkĕt kam ipimxur xà to ata wÿr tẽ, ne curia quê ha me to ipijapar to caku to incrê ne ihkõt hĩkjê.

Cõjkwa pĩn Pahpãm jõ krãhtare me cagãti tohĕ

⁷ Jirõ pê mã ri cõjkwa kam cute me ipijapu kam mehtĕm. Pahpãm mã me hàprĕ catêjê jõ pahhi japÿr te Miquer ata me, cõjkwa kam me hàprĕ catêjê me, cute cagãti kêanre ata mã me hàprĕ catêjê me, me ajpĕn kam mehtĕm, ne ame ajpu. ⁸ Ne cute me cagãti ata tohĕ, na quê nee hipĕr cõjkwa kam cumã me hàprĕ catêjê me, me hàhhuc nare. ⁹ Ne cagã catia kĕn-ti ata, pê mam Xatanaj te mehcunea mã ihhĕj ata. Mã ma cute pjê wÿr me to hũcapĕr, ne cute cumã me hàprĕ catêjê to hajÿr, ne ma ihkõt me to hũcapĕr par.

¹⁰ Wa ite cõjkwa kam jũm jõkre tÿjti ata par, mã cute hũjarĕn to:

— Ita caxuw me Pahpãm te me pahkĕn pê me pahto cator! Ita caxuw ri Pahpãm te cupê Pahhiti na carõt to ipipĕ! Ita caxuw ri Pahpãm kra pê Crixto te ihhimpej xà to ipipĕ. Ampo na? Por me pahkjĕjĕ jarĕn kĕn catê Pahpãm cuna mã xa, ne cute me harĕn kêanre to caxwa ne to apĕ ata, ma cõjkwa pê cute me to hũcapĕr, quê ha jũ caxuw hipĕr me pajarĕn to kĕn nare. ¹¹ Me pahkjĕjĕ te ihtÿj me pahcurê xwÿn tohĕ. Ne nee mã amjia kõt cute me tohĕ nare. Pê Carãcahãcre Kra pê Jeju ata caprõ jaxwÿ, ne me pajaxà kam ty. Cwÿr-japĕ ri ihtÿj me pamã ajpu, caprõ ita kõt. Mã ihcãmtã rũm me pahkjĕjĕ atajê ihtÿj amji to mehtyc japĕn to

me ipa. Ne ihtÿj amji mã me Jeju te me cumã ipijapu na me harĕn to ipa, na ri ihkôat cute me tohjĕ. ¹² Na ca cõjkwa kam me amji to ajpa atajĕ, ca ha me acunea me gakrya ne! Ne pjĕ me cõ kam amji to me ajpa atajĕ, ca ha me apeacre ne. Ampo na? Ma Xatanaj me awÿr iwryc, ne me akam incryc te to hipu tu ramã cumam cumã amcro incrĕre na cute amji jahkre pej na ri — hajÿr.

Xatanaj ihkra xũmre caapõ

¹³ Ne cagã kĕnti ata te ramã pjĕ wÿr amji to hũcapĕr na amji jahkre pej, ne cute, por pyjĕ nõ mã ihkra xũmre pÿm ata, caapõr kam ihtĕm. ¹⁴ Mã cute ahkĕt kam ihkrĭ xà ata wÿr ihtor xà caxuw me cumã hàcti catia jara to me ipijakrut ne me cumã hõr. Por quĕ ha curi amji to me ipijapar to caku to incrĕ ne ihkõt me to hĩkjĕ xà ata wÿr, cagãti ata te apu to kĕn cupate. ¹⁵ Mã cagãti ata te harkwa pĩn cõ mã hikran. Mã ma pyjĕ nõ ata kõt ajpjĕ, cute cõ ata to, ma to ihtĕm prãmte, cute ihkõt cumã hikran. ¹⁶ Mã ihtÿj pjĕ te pyjĕ nõ ata tehcajpar, ne cõ mã harkjĕc. Mã harkwa mã cagãti te cõ kujahĕc ata xàr, mã cute intĕte ihkrĕr. ¹⁷ Mã cagãti ata apu pyjĕ nõ ata kam incryac to incryc, ne ma tĕ, ne cute pyjĕ kwÿ pĕ mehtãmxwÿa atajĕ kwÿ to kĕn kam ihtĕm. Por me Pahpãm jarkwa kampa, ne catyt kam Jeju kõt me ipa atajĕ to ri apu hane. ¹⁸ Ne ma cagãti ita tĕ ne cõxwa tohkà na hàhhuc ne nõ.

Hũmre kĕanre nõ ata pĕ ampo jàprĕa pyrãc

13 Jirõ pĕ mã, wa ite cagãti wÿr ampo kĕnti nõ ata te cõxwa pĩn hàpir na hõmpun. Ne pĕ ihkrã xet, ne kam hĩpãr tej, ne ahpÿanre na hĩpãr itajĕ na cumã ihkrãhkã, ne ihkrã na ihcakõc xà hĕj xi kĕanre na ihkãhhõc ata ajĕt, ne hũjarĕn to: “Ipĕ Me Apãm Cati” hane. Cute ihkãhhõc kam ihcakõc xà kĕanre ita to apu Pahpãm to kĕn prãmte. ² Ne por ite ampo kĕnti pupun ata pĕ ihhĕj rũm rop cahãc krorti, ne ihpar pĕ ihhĕj rũm awcapãtkõkrit jũhkrahti, ne harkwa pĕ rop cahãcti jõkre hõhti jarkwa. Mã cagãti kĕanre ata te cumã hàpĕn xà caxuw carõt catia ne hõr. Ne cute cumã cupĕ pahhi krĭ xà ata jahkre, ne harkwa kõt cute hàpĕn na mĕn. ³ Ne pĕ ampo kĕnti ita krã nõ pyxit ne cupĕ ihhĕj rũm haxõp te ihcuran, ne pĕ ihkĕn xà te ihcuran xà ata ramã cumã hà nõ, mã hacpÿa mã ramã ihtĭr. Mã pjĕ cunea kam hãn ne ame amji mã ame ipikrar to me ipa, ne cute me ampo kĕnti ata pynãr, ne ihkõat me amji ton to me ipa. ⁴ Ne mehcunea ame cagãti kĕanre ata kĩn, ne me cumã ihcakõc to kĕnre nare. Ampo na? Pĕ ampo kĕnti ata mã carõt to cute hàpĕn xà cunea gõ, na pĕ. Ne hanea ne ame ampo kĕnti ata kĩn, ne me ajpĕn mã me to ihcakõc to impejti to hane he:

— Jũm pĕ mã ampoti ita pyrãc, ne cume ipipĕan? Ne jũm ri ampeaj kam ihhihtÿj, cute me ajpĕn cujtĕn xà na? Hamreare! Jũm me quĕ amji cujtĕ! — hane.

⁵ Ne cute me hũmre mã ampo jahkre kĕatre ton xà ata na amji na hũpar, ne hanea ne cute Pahpãm na ihcakõc kĕanre xà na amji na hũpar, ne taa mã quĕ ha

ihhimpej to caku to incrĕ ne ihkõt hĩkjĕ. ⁶ Mã cute Pahpãm cuna mã ihcakõc kĕn kam ihtĕm, haprÿ mea mã, ne hanea ne curi Pahpãm krĭ xà ata mea mã ahna ihcakõc, ne hanea ne ihkõt cõjkwa kam amehkrĭ atajĕ cunea na apu ihcakõc kĕanre. ⁷ Ne cute Pahpãm na mehkwy cunea me apu ajpu, ne cute me hirõ pĕ ihcu-hĕ na amji caxuw hũpar. Ne hanea ne cute ampo kra me, krĭxãre cunea me, me harkwa pihho catĕjĕ atajĕ cunea to ihhimpej xà caxuw, cute amji na hũpar. ⁸ Ne por mehcunea pjĕ kam me amji to me ajpa atajĕ cunea, quĕ ha ampo kĕnti ata kõt me amji kampa, ne toa amji mã mehhimpej. Ne por hacpÿa mã mehtĭr xà jõ kãhhõc kam me haprÿ hikwa atajĕ ri, nee ihkõt me amji kam hapac nare. Ampo na? He pĕ Pahpãm pjĕ ton pĕa mã cute me Carãcahãcre Kra curan na to amji kampa ata to ri amji mã mehhimpej to me ipa. Cwÿr-japĕ ri cute amji mã hõ kãhhõc kam me haprÿ nõ.

⁹ Cwÿrjapĕ ca me ipar peaj ne, me gũpar mã ate me hamãr pãrãpĕn. ¹⁰ Por jũm jaxãr xà caxuw apu mõ ata, quĕ ha ihtÿj me haxà, ne por jũm apu wapo xwahhihti te ihcuran xà caxuw apu mõ ata, quĕ ha ihtÿj wapo xwahhihti to mehcuna. Ne pom ampo itajĕ, me cupĕ Pahpãm na mehkwy caxuaw ri, ne quĕ ha ihtÿj me cumã awcanã, ne Pahpãm to amji mã mehhimpej kam me to incrã tu ne.

Mã hũmre nõa pĕ ampo jàprĕhti pyrãc ata cator

¹¹ Ne ite pjĕ pĩn ampo kĕnti itajĕ nõa jãpir na hõmpun. Mã kam hĩpãr pĕ carã cahãcti hõhtia jĩpãr ne ipijakrut. Ne cama cagãti kĕanre ata cakõc xà me ipipĕan. ¹² Ne mam cagãti kĕanre ata carõat to, kam mare mã hàpĕn to ipa. Ne pjĕ kam mehcunea amehkrĭ atajĕ mã cute mam ampo kĕnti ata kĩn na, incryac kam hũjahkre. Por ajmãr cute wapo xwahhihti to mehcuran, mã hacpÿa mã cutea amji caprãr ne impej ata kĩn, na ri incryac kam me cumã awjahkre. ¹³ Ata te ri me hũmre kam mare mã ampo pihhoti catia ton. Ne cute cõjkwa pĩn cuhy ton, ne pjĕ wÿr ihkujahĕc, mã pjĕ kam ihpÿm. Mã me hũmre cunea te me hõmpun. ¹⁴ Mã hapu na ampo kĕnti cator ita te ri pjĕ kam me hũmre itajĕ cunea mã ihhĕj. Mã Pahpãm te cama cute mam ampo kĕnti ata carõat to ampo ton xà na hamãr, mã cute ton, ata to ri cute me hũmre cunea mã ihhĕj. Ne cute pjĕ cunea kam mehcunea mã harkwa to:

— Ca ha cute wapo xwahhihti to ajmãr me ampo kĕnti curan ita krekà to me amji mã ahimpej, ate amji mã mehkĩn prãmte — hajÿr. ¹⁵ Mã cute me ton, mã pom hapu na ampo kĕnti ita te ampo kĕnti krekà ata jakõr, mã pea ihcakõc, ne cumã mehkĩn ne me hũpa nare atajĕ cunea jipej xà caxuw amji na hũpar.

Ampo kĕnti ata me hàhtõa kam haprÿ nõ

¹⁶ Ne pea cute me hũmre kà me, me ahkrare me, me hakràj me, me cupĕ hamreare me, cama me cumã me hàpĕn catĕjĕ me, amjia kõt me hàpĕn catĕjĕ mã harkwa, mãr quĕ amji kam awpõc rũm amji jũhkra kam me haprÿ nõ, nare, quĕ ha mehkuctÿj kam me cunõ. ¹⁷ Ne

cute me to hajÿr xà ata kam, quē nee jūm kuctÿj kam ampo kēnti japrÿ nare ata mā me ampo to hàhpan nare, ihpore na. Ne nee me cupē ampo japrōr nare, ihpore to. ¹⁸ Ne haprÿ cahyt xà te hajÿr he: “666”. Ca ha ate akrā krea te amji jahkre pejti na, ca ha atÿj kampa.

Por 144 mir atajē Pahpām pej na me harēn

14 Jirō pē mā wa irīt, ne ite Caràcahàcre Kra pē Jeju ata te Xijāw jō hàpkàjti na hām na hōmpun. Mā cahē na cute me 144 mir ne mehcuhhē. Mā mehkuctÿj kam me Jeju haprÿa hikwa, ne me kam Hūm Cati japrÿ. ² Wa ite cōjkwa pīn me hōkre ata par, mā ihhēj rūm cupē cōhxocti jàhkrihkrit, ne hàwrārc ita pē ihhēj rūm pahhàjē jàwrārc, wa ite impar. Mā hōkre pē ihhēj rūm wakÿre japàre ita jōkre par. ³ Mā Pahpām krī xà pu na cute me cwat atajē me, pahhi te me winticwat atajē me, cute mehkrā ne me to xa. Mā me cuna mā cute me 144 mir atajē me xa. Ne menccer xà intuw ata to me cre, ne jū wÿr quē pjē pē cute me jūm pytār nare ata me iràn xà na increr ata jahkre pej ne to cre. ⁴ Ne por me xa atajē te amji kam me hapac xà peaj to impej, ne nee rÿ jū caxuw pyjē na ame hūhkra nare. Quē ha jū kam Caràcahàcre Kra ata mōr prām, quē ha ma ihkōt me mō atajē pē me hūmre cahhur na me hūtà. Ampo na? He me taa mā pē mam Pahpām me Caràcahàcre Kra ata mā me amji gō. ⁵ Ne jū caxuw mehnō te ihhēj xi xà nō ton nare. Ne nee ampo pyxitre na mehnō kēn nare, ne mempeaj to mempej.

Quē ha Pahpām me cupē hō tekjē nare atajē to hamre

⁶ Wa ite Pahpām mā imprar catējē nōa tor, ne kÿj pē ihtēm na hōmpun. Mā cute pjē kam ampo kra me, me harkwa pihho me, ampo krīxàre cunea mā, ihkrāhhia kam Jeju pē me pahkritxwÿ na harēn xà impejti to hūjarēn to ihtēm na, ite hōmpun. ⁷ Mā cute me cumā hūjarēn to hajÿr he:

— Imā me amā ampo pej rohnÿtti mā ata jarēn xà ata pē nee mā ampo nare. Ca amji mā me Pahpām cupa, ne catihti na amji mā me harē! Nāmri cute pjē kam me hūmre cunea cukij xà ne me to ipicokjēr jō amcroa kam ramā hàhhuc. Ca ha, por cute cōjkwa me, pjē me, cōxwa me, hatuj xà cunea ton catē ata, ca ha to me hàmnān prāmte me acakōc to impejti, ne me amā ihkīnti ne — hajÿr.

⁸ Mā ihkōt mare mā ihtor ita te hanea ne hūjarēn to: — Ma krī catia japrÿ te Papirōn jō krī ata pÿm ne hamre. Ampo na? Por pē curi mehkrī atajē pē mehkēanre, ne ajco pjē cunea kam mekwÿ mā ampo to hahkre to hane he: “Hacme ne ahti na ame pyjē kwÿ caxu” hane. Ata pē ihhēj rūm cute mekwÿ mā cōxÿhti jōr, ne amekwÿ to ipipān pyrāac. Ne me caxun ita pē ihhēj rūm cute me cōxÿhti xen, ne ampeaj kam ahti na me cumā me cahāj caxun prām. Cwÿrjapē ri Pahpām te me hō krī mea mā me to hamre tu — hajÿr.

⁹⁻¹⁰ Ne pom hapu na ipijakrut kōt ihtor ita te ri ihkrāhhia kam hūjarēn to:

— Por jūmjē apu ampo kēnti me, ihkrekà kīn, mā cute mehkuctÿj kam haprÿ nōr, nare, cute me hūhkra kam haprÿ nōr atajē, quē ha Pahpām te ame kam incryc xà pē ihhēj rūm cōxÿhti ata to amekhōm. Por mehcunea te ame ita ton atajē, quē ha mehkàj xà atajē uu ne cuhy te kēn to ihprà ata kam me cumā hamre nare. Ne kēn cacro ata, quē ha ihtÿj Pahpām mā memprar catējē me, Caràcahàcre Kra ata kam mare mā mehkà to caxàr to ihcuhhē. ¹¹ Ne pom quē ha cuhy ame cumā ihkàj xà to ita kūm, quē ha ihtÿj hōtpē ma hàpir to ipa rohnÿtti mā. Quē ha cute ame ampo kēnti me, ihkrekà kīn itajē mā, jū caxuw caxwa me amcro kam mehkàj xà itajē amji to ihpec nare. Ne hanea ne, por cute mehkuctÿj kam ame haprÿ nōr atajē cunea mā, quē ha ita hane — hajÿr.

Pahpām na mekwÿ ihtÿj me amji pupun xà kēanre kam ame ipa

¹² Quē ha Pahpām na mekwÿ me, por me harkwa kampa, ne ampeaj kam Jeju to amji mā mehhimpej atajē, quē ha ihtÿj me curē xwÿn te ame to kēanre ata jàhpan xà na, mehkēn mā me hàr na me to amji japackre. Ne quē ha ihtÿj me awcanā, ne cormā Pahpām me Jeju kōat me amji ton to me ipa.

¹³ Wa pea ite cōjkwa pīn jūm jōkre ita par, mā hūjarēn to:

— Ita na ca mehhōc he: “Pom quē ha cormā Pahhiti jàpēn xà kam ame ty atajē quē ha ame hakry” — hajÿr. Mā Pahpām Carō Pejti te me cumā hūjarēn to:

— Ÿhÿ, ita ampeaj kam ri. Hamre. Ita caxuw, quē ha ihtÿj me hàpēn catējē atajē ame kōt. Ampo na? Ramā me hàpēn xà ita kōt me cumā ampo cunea — hajÿr.

Quē ha Pahpām mekwÿ to cuprō ne amji mā me huwahi

¹⁴ Wa irīt, ne ite jūm pē me Pahhàkà cati pyrācti, ne wakÿre prà tepti pē òr te ihkrāhkà ne ihkrā na ajēt ata pupun. Mā cute hūhkra to rōhkrÿt xwahhi pyr ne ahcakrā jakati kam to jÿ. ¹⁵ Mā pea Pahpām mā memprar catējē nō Pahpām to amji kam hapac xà jūrkwā pīn cator, ne cute kÿj cati pēa mā ahcakrā jakati kam jÿ ata mā carār to:

— Gō rōhkrÿt to, pjē kam, me hūmre pē ihhēj rūm pur kam ramā ampo teptu, ne ramā ihkēhkēn xàa na atajē, ca ha to hakep — hajÿr.

¹⁶ Jirō pē mā ri, por ahcakrā kam jÿ ata te pjē na hō rōhkrÿt to ihtēm, ne cute to ampo cunea jakep xà atajē jakep partu.

Quē ha Pahpām cute mehkēn ton atajē to pīxō ne me hatē

¹⁷ Wa ite cōjkwa kam Pahpām to amji kam me hapac xà jūrkwā pīn harkwa na imprar catē nō cator na hōmpun, mā cator, ne hanea ne cumā hō rōhkrÿt xwahhihti. ¹⁸ Jirō pē mā wa ite Pahpām mā imprar catē cuhy to amji pytār ata te Pahpām jūrkwā pē cator na hōm-

pun. Ne cute ihnõ mã rōhkrýt ata mã kÿj cati pēa mã caràr to:

— Ramã pīxō pē uwa itajē cunea inteptu, gō rōhkrýt to pjē kam pīxō atajē cunea jakep partu — hajÿr. ¹⁹ Mã cute pjē na hō rōhkrýt to ihtēm, ne cute to pīxō atajē cunea jakep partu, ipàr pē. Ne cute Pahpãm te incryc to hipu xà pē ihhêj rŭm kwÿr jatên xà ata kam haxwÿr. ²⁰ Ne pē Pahpãm jō kwÿr jatên xà ata krī pē ampÿa mã xa. Ne pē Pahpãm te incryc to hipu xà kam me pīxō jatên kam me tē, ne pē pīxō cacō ata pē me caprō ne ajxwÿ. Ne ihtua to ihtu. Ne kàj mã ihtu na me pajara capō pyxit. Ne mōr jŭwry to cute 300 quirom.

Cute me pahcurē xwÿn carō kên tohjë atajē Pahpãm to amji mã me amnã

15 Ne hanea ne irīt, ne ite cōjkwa kam ampo catia cupahti ata pupun, ne ite amji mã:

— Pÿhàpà ampo mã ajte? — hajÿr. He nee mã ampo nare, Pahpãm mã memprar catêjê te xet atajê te Pahpãm te pjē kam ame to kên xà atajê to me amji tÿj, ne me to xa. Atajê pē ri Pahpãm te ame kam incryc xà cahhur kēanre atajê.

² Ne pea ite wit pē cō catia pyràcti me cuhy picacwÿr ata pupun. Ne hanea ne ite, por cute me cagãti kēanre ata me, carō krekà atajê me, ampo kēnti te me hŭmre kam haprÿ nōr atajê tohjë catêjê pupun, mã me xa. Por wit pē cō catia pyràcti ata cahê na ri me xa. Ne ame wakÿre japàre atajê cakō, por Pahpãm te me cumã hōr atajê. ³ Pē Mojxe xwÿ Pahpãm te mehkên pē me to cator xà na increr to ihkôt me ipa catêjê mã hahkre. Pē hanea ne Caràcahàcre Kra pē Jeju ata Pahpãm te mehkên pē me to cator xà na mehkÿwÿ mã increr to hahkre. Mã me to increr to:

“Me ijō Inxū Cati pē Pahhiti ata, ampeaj kam acarôt tÿj, ne ampeaj kam gápên xà itajê catyt kam ne impej. Ne apē pjē cunea kam ampo krīxàre cunea jō Pahhiti, ne ate amji mã ahimpej xà atajê, ampeaj kam ihcuhtac, ne ampeaj kam ri! ⁴ Ne jŭm quē amji mã acupa nare? Wa me icunea amji mã me acupa. Ne jŭm quē acati na amji mã garên nare? Wa me icunea acati na amji mã me garên to me ipa. Ampo na? Quēt apyxit peaj ne apē ajteare mã, ne apeaj to apej, ne nee akam ampo kên hamreare. Quē ha krīxàre cunea awÿr me apkjê ne me cumã akīn, por ca mehcunea kam mare mã ampo to gápên xà cunea cuhtacti itajê to, mã me hōmpu, na ri me awÿr me apkjê ne me cumã akīn” hane.

Pahpãm mã memprar catêjê ampo kên te xet ne me to cator

⁵ Jirō pē mã, wa ite cōjkwa kam Pahpãm to me amji kam hapac xà jŭrkwa te amji jihê mēn na hōmpun, mã ampo kà te Pahpãm jŭrkwa caxwÿn ata xa. ⁶ Mã Pahpãm mã memprar catêjê te xet atajê te ampo kên te xet atajê to me cator, Pahpãm to me amji kam hapac xà jŭrkwa pīn. Ne cupēhkà jakati pràti atajê to pit mã cute amehkà, ne wakÿre prà tepti pē ôr ata te ri amehcahti na hê, mã ame to ihcuhhê. ⁷ Mã ampo tŭr te cwat ne Pahpãm pu na mehcuhhê atajê nō te Pahpãm mã memprar catêjê te xet atajê mã wakÿre pràti pē ôr te cratti atajê jōr. Mã kam Pahpãm te ame kam incryc xà te hipu partu, por Pahpãm tŭr rohnÿtti mã ata cryc te ri to hipu. ⁸ Mã cute Pahpãm to me amji kam hapac xà jŭrkwa ata kam, Pahpãm carôt jàhcujrohti kam ihkŭmti ata te to hipu tu, ne jŭ wÿr quē cormã ne jŭm cumã axà. Quē ha xa Pahpãm mã memprar catêjê te xet atajê ampo kên itajê to ame hamre, quē ha ihtÿj jŭm cormã cumã axà.

16 Jirō pē mã, wa ite cute Pahpãm to amji kam me hapac xà jŭrkwa pīn, Pahpãm mã memprar catêjê te xet atajê mã, jŭm jōkre tÿjti jŭjarên xà te hajÿr ata na impar:

— Ca ha pjē kam me Pahpãm cryc te cratti te xet to hipu atajê jaxwÿr to mō — hajÿr.

Mam ampo kēanre ata pē ri mehxêt kēanre

² Mã mam cati mã ita te pjē kam cratti pē Pahpãm te ame kam incryc ata jaxwÿr. Mã mehxêt kēanre te, por cute ame amji mã me ampo kēnti me, ihkrekà jŭpa ne to cati, mã cute me kam haprÿ nō atajê kam ihtēm, ne me cumã hàa to hà.

Hapu na ampo kên ata pē ri cōxwa te me caprō na amji ton

³ Mã hapu na ita te cōxwa kam cratti pē Pahpãm te ame kam incryc ata jaxwÿr. Mã hamre cōxwa te me caprō na amji ton ita pē ihhêj rŭm jŭm tyc caprō, ne pea cute cō kam ampo tŭr atajê cunea jipej.

Ampo kên crê ita te ri cō jatuj xà te caprō na amji ton

⁴ Mã incrê ita te cō jatuj xàa kam cratti pē Pahpãm te ame kam incryc ata jaxwÿr. Mã pea cō te me caprō na amji ton. ⁵ Ne ite, por Pahpãm mã imprar catê te cō to amji pytàr ata te hŭjarên xà te hajÿr na impar he:

— Apyxit peaj ne me hirōa pē apej! Caa pē ca mam akrī, ne cormã akrī rohnÿtti mã. Ne catyt kam ate mehcukij xà caxuw apeaj to apej. ⁶ Ampo na? Cute me akwÿ caprō jaxwÿr, ne hanea ne me cumã garkwa to mehcakōc catêjê caprō jaxwÿr, cwÿrjapê quē ha hahpan xà na ihtÿj me caprōa to me ikō, na ca ate me cumã me caprō ita jōr, quē ha ihtÿj me to ikō — hajÿr na, ite impar.

⁷ Ne pea ite Pahpām mā ampo kŭm cuxwati to caxàr xà ata pŭn, jŭm jŏkre jŭjarĕn xà te hajŭr ita par, mā cute hŭjarĕn to:

— Me ijŏ Inxŭ Cati pĕ Pahhiti ata, ampeaj kam quĕt acarŏt tŭj. Ca ate amehcukij ne me to ipicokjĕr xà ita caxuw, acaxwām catia mā apej ne acuhtacti, ne ampeaj kam ri apeaj to apej — hajŭr.

Ampo kĕn te cwat ata pĕ ri pyt cacro te me to caxàr xà

⁸ Jirŏ pĕ mā ri cute cwat ita te pyt kam cratti pĕ Pahpām te ame kam incryc ata jaxwŭr, ne cumā cuhy to cute me hŭmre to caxàr na hŭjahkre. ⁹ Mā cuhy te me to caxàr, mā cute ame Pahpām japyrŭ to ihcakŏc to kĕanre to me hajŭr he:

— Akĕanre! Nāmhā, ne me ito kĕn ita jicu! — hajŭr. Ne nee cute amehkĕn itajĕ jicu nare, ne nee Pahpām catihti ata to cumā mehcakŏc nare.

Ampo kĕn te xĭc ata pĕ ri awcapàtkŏ me, me kàj xà

¹⁰ Mā cute xĭc ita te ampo kĕnti krĭ xà ata kam cratti pĕ Pahpām te ame kam incryc ata jaxwŭr. Mā ampo kĕnti te ihhimpej xà atajĕ cunea kam awcapàtkŏ, na ri curi mehkrĭ catĕjĕ cunea kàj xà. Mā tee mehkàj xàhte ame hahkà cāmxa, por me haxŏp atajĕ xàhte. ¹¹ Ne ame cŏjkwa jŏ Pahpām mǎn to kĕanre, ne nee ajte cormā cute me hŏ pry kĕn ata jicu nare ajte.

Ampo kĕn te xĕj ata pĕ ri me ipijapu xà catia

¹² Jirŏ pĕ mā ri cute xĕj ita te cŏhti japyrŭ te Cŏmpejti ata kam cratti pĕ Pahpām te ame kam incryc ata jaxwŭr. Mā pea cŏ ata crà, ne ihcajpuw pry nŏ, ihkŏt pyt japŏj xà pŭn pahhi catĕjĕ te me ipa, ne me hapŏj xà na. ¹³ Wa ite ampo carŏ kĕn crĕ pĕ pŏrti pyràcti, tŭmti, kĕanre atajĕ japŏj na hŏmpun. Mā pyxit ne cagāti ata jarkwa pŭn cator, ne hanea ne ampo kĕnti ata jarkwa pŭn pyxit ne cator, ne hanea ne cagāti jarkwa kŏt mehhĕj xi to mehcakŏc catĕ ata jarkwa pŭn pyxit ne cator. ¹⁴ Ne ampo carŏ kĕn pĕ pŏrti atajĕ pĕ jŭ caxuw jŭm xŭmre te ampo pihhoti pupun nare atajĕ ton catĕjĕ, ne ihtŭj to me higĕc rĕ. Ne pom ampo carŏ kĕn atajĕ pjĕ cunea kŏt amehcahkŭm, pahhi catĕjĕ kŏt, cute me to cuprŏn prāmte. Mā hàhtŏa ne cute me cuprŏn, Pahpām pĕ Pahhiti carŏt tŭjti ata cuna mā me ipijapu prāmte, hŏ amcro ata kam.

Pahpām na mehkwy ihtŭj Jeju cator jikaj xà me cuprŏ

¹⁵ Ŷhŭ me ikwŭ, he pĕ Jeju me pamā amji cawpa to hane he:

— Me ikampa he, wa ha ajpĕn me awŭr itĕm xà ita to ihhĕj rŭm me hàhkĭj xi prar xà! Ne por quĕ ha me ikampa atajĕ, me irĭat na ame ipa. Quĕ ha mehkà to me amji cŭmpej hiahpuro ne me hakryti to me ipa. Ampo na? Quĕ ha nee me hàhtŏti atajĕ kam mare mā amehcakrŏ na amehpahàmti to me ipa nare — hane.

¹⁶ Jirŏ pĕ mā ri ampo carŏ kĕn crĕ pĕ pŏrti pyràc atajĕ te me cupĕ pahhi catĕjĕ cunea to cuprŏn, por Epew catĕjĕ jarkwa na pjĕ japyrŭ te Mequit jŏ kĕn ata ri.

Ampo kĕn te xet ata pĕ ri pjĕ jàhcujrŏn catia

¹⁷ Mā cute xet ita te cratti pĕ Pahpām te ame kam incryc ata jaxwŭr, kŭj pĕ. Mā pea Pahpām to me amji kam hapac xà jŭrkwa kam ihkrĭ xà ata pŭn, jŭm jŏkre tŭjti ata te hŭjarĕn to:

— Ramā cute amji jipĕj! — hajŭr.

¹⁸ Mā ihcuxĕ, ne me hŏkre, ne hàhkrihkrit jàwrārăc, ne pjĕ jàhcujrŏn catia to cati ata, por rŭ jŭ caxuw jŭm te pjĕ jàhcujrŏn kĕanre pupun nare ata. Ne mam ihkwŭ atajĕ jirŏa pĕ ihkĕanre. ¹⁹ Ne por krĭ catia ata te amji cahhĕc to incrĕ, mā pjĕ cunea kam krĭ atajĕ cunea jamre. Mā Pahpām te Papirŏn jŏ krĭ kĕanre kam, cute incryc to incryc na amji to amji japackre. Ne cute krĭ kam incryc jàprĕhti ata mĕn. ²⁰ Mā cŏ jipŏc ri amcrà atajĕ cunea jamre. Ne hanea ne hàhkà jakŏtti atajĕ cunea jamre. ²¹ Mā ta te amji to kĕn ne me hŭmre kam apu ipijaxwŭr, ne cute ame to kĕanre, ne ta te kĕn atajĕ pytĭ na cute cwarĕnta quir. Mā pjĕ kam me hŭmre itajĕ cunea ame Pahpām mǎn kĕanre, pĕ kĕn te ta ita ame to kĕanre, na pĕ.

Cute Pahpām pynār nare atajĕ pĕ cahĭj xyre kĕanre ata pyrăc

¹⁷ Mā pea Pahpām mā memprar catĕjĕ te xet te cratti te xet cwŭr atajĕ nŏ ajpĕn iwŭr mŏ, ne cute imā hŭjarĕn to:

— Ajpĕn iwŭr mŏ, wa amā cute krĭ cati kĕanre ata to cute amehkĕn xà ata jahkre, ne amā harĕ. Ŷhŭ, por cŏ jàhtŏa cote na, krĭ catia xa ata pĕ ihhĕj rŭm pyjĕ nŏ inxyre kĕanre pĕ impjĕ nare ata pyrăac. ² Mā pjĕ cunea kam krĭ jo pahhi catĕjĕ cunea hŭrmā me pra, cute amji mā ame ampo kĭnti atajĕ wŭr. Ne cute me ampo kĭnti atajĕ pĕ ihhĕj rŭm jŭm cahĭj xyre ata pyrăac. Mā pjĕ cunea pŭn me hŭrmā me pra, ne kam ame ipa ata pĕ ri ihhĕj rŭm cute ame cŏxŭhti xen catĕjĕ te cŏxŭhti to pit mā ame amji japackre — hajŭr.

³ Mā pea Pahpām Carŏ Pejti te imā amji jŏr, mā ma ahkĕt wŭr harkwa na imprar catĕ te ijaprŏr ne ito mŏ. Ne curia wa ite pyjĕ inxyre nŏ ata te ampo kĕnti intepti ata kam hŭr na hŏmpun. Mā ampo kĕnti ata kam, cute me cumā haprŭ kĕanre pyxwŭr atajĕ na ihhŏc. Ne pĕ ampo kĕnti ata kam ihkră xet, ne kam hĭpār tej. ⁴ Pĕ hanea ne cahĭj xyre kà ata inteap to intep, ne hakrŏ xà itajĕ to pĕ amji jakrŏ ne kam jŭ he. Wakŭre prà tepti pĕ ŏr ata me, kĕn prà tepti na hĭ jàhwŭrti ata me, ampo prà pĕ kĕn prà pyrăcti ata me, pĕ to amji jakrŏ ne kam jŭ. Ne pĕ hŭhkra kam wakŭre pràti pĕ ŏr te ihkŏm xà kam me hàhtŏa te me to inxŭ xà tŭm kĕanre ata juwahi ne to jŭ, pom pĕ ajco mehcuea ajco me caxu ata to pĕ jŭ. ⁵ Ne ihkuctŭj kam cute amji jarĕn xà na, ihhŏc ata harĕn to:

— Ijapyrŭ pĕ Papirŏn jŏ krĭ catihti ata, ne ipĕ pjĕ kam pyjĕ inxyre catĕjĕ me, ahti na me hŭmrea te ame amji to inxy catĕjĕ menxi — hajŭr. ⁶ Wa ite pyjĕ nŏ ata pupun, mā cute Pahpām na mehkwy me, por pĕ ampeaj kam Jeju kŏt me amji ton to me ipa, pĕ ajco

mehcura atajê caprô to cute amji to ipipăn tu. Wa ite hõmpun, mã cute imã ipikrar ne ijigěc hyr.

Pjê to mehhimpej catêjê pê ampo jàprê kēanre ata pyrãc

⁷ Mã Pahpãm mã memprar catê ata te icukij ne imã: — Ampo na mã cute amã ipikrar ne gigěc hyr, ca hũ-pate apu ato cara? Apu amji mã pa nare, wa ha amã cahãj ata me, ampo kēnti kam ihkrã te xet ne kam hĩpãr te tej ata, wa ha amã kôt harěn to impej. ⁸ Ne pom ca ampo kēnti pupu ita, ihtĩar cormã, ne nee quē ha cama ihtĩr ata na ahtũm ry nare, quē ha hamre. Quē ha kreti jatõhhy nare ata pĩn cator pê, quē ha Pahpãm to hamre. Ne por mehcunea te ampo kēnti cator na me hõmpun ata te me cumã ipikrar, mã hũ-pate amento cara. Ampo na? Pê mam ampo kēnti ata ihtĩar na apu ipa, ne ajte krã ihtyc, ne quē ha jũ caxuw hacpã mã ihtĩr ne cato. Ne por mam, pjê jamre reria mã Pahpãm te amji mã hacpã mã mehtĩr xà jõ kãh-hõc ata kam ramã me haprũ nõr atajê ri, nee apu amji mã me hũpa nare. Ne mehkĩnte ihkãhhõc kam me haprũ hikwa nare atajê, quē ha ampo kēnti ata pupu, ne me cumã hũpaa to hũpa.

⁹ — Ne pom ite harěn xà itajê, jũm krã kre te amji jahkre pejti quē ha ihtỹj kampa, ne hahkre pej. Pom ampo kēnti krã te xet itajê pê, por hàhkà jakõtti te xet mã kam pyjê nõ jỹ ata pyrãac. Ne hanea ne cupê pahhi te xet atajê pyrãac. ¹⁰ Ne ramã cute xĩc ne hamre, ne cormã pyxit ne ihhimpej, ne nee cormã ihnõ ata cator nare. Ne pom quē ha cormã pahhi cato ita, quē ha cato ne nee ahna ahtũm ry nare, quē ha hamre. ¹¹ Ne pom mam ramã ampo kēnti cator, ne ramã hamre ata te ri ihkwỹ itajê to õjtõ, ne taa mã quē hapu na ihkwỹ te xet itajê to ihhimpej, quē ha ihtỹj hamre.

¹² — Ne por hĩpãr te tej, ca ate hõmpun atajê pê ih-hêj rũm pahhi te tej, ne nee rỹ cute mehhimpej kam ihtēm nare. Na quē ha cormã cute ampo kēnti cahê na mehhimpej to me amcro pyxit xà caxuw amji na me awpa. ¹³ Ne mehcunea te ramã me amji par, quē ha ihtỹj me ampo kēnti ata mã cute me amji jahkre pej atajê gõ, ne hanea ne cumã me carõt gõ. ¹⁴ Ne quē ha ihtỹj Carãcahãcre Kra ata me, me amji cujtê, ne me ajpu, quē ha pea Carãcahãcre Kra ita ihtỹj me hirõ pê xa, ne me tohjê. Ampo na? Cupê me hũmre jõ Pahhiti, ne cupê pahhi cunea jõ Pahhiti na ri. Ne por Pahpãm te amji mã me capi, mã ihkõat me amji kam hapac to me ipa atajê me, quē ha ampo kēnti ata ajpu, ne pea me hirõ pê xa, ne me tohjê — hajỹr.

¹⁵ Ne hipêr Pahpãm mã memprar catê te imã:

— Ne pom ca ate cõ jãhtõa pupun, mã cahê na jũm cahãj xyre jỹ atajê pê pjê cunea kam ampo kra me, krĩxãre me, me harkwa pihho catêjê. ¹⁶ Ne pom ca ate ampo kēnti me, hĩpãr te tej pupun atajê, quē ha ma ame cahãj xyre ata caca, ne ame curê. Ne cupê cute ampo kĩn xà to amji jakrõ atajê cunea to cupê ihpõj partu, ne mehcakrõ to tojnõ quē ha jỹ. Jirõ pê mã quē ha ihtỹj me jũm xyre ata jĩ ku, ne pea cuhy to me to capa, ne me to acto, quē ha hamre. ¹⁷ Ampo na? Pah-

pãm te aracri pahhi atajê mã caxwãm pê me cumã me cute me to jũ mãn xà atajê jõr, ne hanea ne cute caxuw me cumã carõt jõr. Ne hanea ne ampo kēnti te me to ihhimpej xà caxuw cute cumã carõt jõr, mã ampo kēnti ita ihtỹj cahãj ata to apu ihkēanre to ipa, Pahpãm te ahna harkwa hyr xà na. ¹⁸ Ne pom ca ate cahãj xyre pupun ita pê krĩ catia ata pyrãc, mã cute amji wỹr pjê cunea jõ pahhi to cuprõn, ne taa me to ihhimpej ata — hajỹr.

Cute Pahpãm pynãr nare atajê, quē ha me hamre

18 Jirõ pê mã wa ite cõjkwa pĩn Pahpãm jarkwa na memprar catê nõ pupun, mã ajpên ahpar mã tẽ. Por Pahpãm carõt tỹjti ata jarkwa kôt, ajpên ahpar mã tẽ. Ne ampeaj kam ihprã, ne ihprã jãhcujro ita te pjê cunea kujro. ² Mã kỹj cati pēa mã cute carãr to: — Papirõn jõ krĩ catia ata pỹm! Ne ita caxuw quē ha me pahcurê xwỹn pit kam apu ipa, ampo carõ kên tũmti atajê me. Quē ha ihtỹj xõnti me, ampo jara kēanre, kĩn nare atajê me, quē ha hanea ne kam amji to ajpa. ³ Ampo na? Cute me hũmre cunea mã hõ cõxỹhti jõr, ne ihtỹj hõ cõxỹhti ita na mehkwy mã quêt to ipa, ita pê ihhêj rũm cute me cahãj xyre to amenxy to ame ipa pyrãac. Mã pjê jõ pahhi catêjê cunea te ramã amehcaxun par, mã cute ame ampo to ihpore na hàhpan catêjê cunea te amehcaxun xà ita jahpan xà na, ramã amji to ame hakràj par — hajỹr.

⁴ Ne hanea ne ite cõjkwa pĩn jũm jõkre ita par, mã cute hũjarěn to:

“Me ikwỹ, krĩ ita pê me acato, cupê me acato!

Nee ca cuxà ame ampo kên itajê kwỹ ton nare. Ne nee ca ihkên ita mã ihkôt me axãr nare!

⁵ Ampo na?

He ihkên ita ramã amji jipy hakõat to hakôt, ne ramã cute cõjkwa huctu.

Ne Pahpãm ihtỹj cute ihkên ton xà ata to amji japackre.

⁶ Ne cute me amã ampo kēanre jõr atajê jahpan xà na hacpã mã, me cumã me ampo kēanre atajêa gõ.

Ne cute me amã ampo kēanre ton atajê jahpan xà na, ca ha me cumã gãmjõr to catia to ajkrut.

Ne cute me ato kên prãmte ihkõm xà kam me amã cõxỹhti to hipu jahpan xà na, ca ha ihkõm xà ata kam me cumã to hipu to ajkrut, cute me amã ihkõm xà kam ton atajê jirõa pê hacpỹ mã me cumã to.

⁷ Me cumã amji kĩn nare to,

ne hanea ne me cumã ihkên xà kēanre to, ne me cumã agõ.

Ampo na?

Pê ramã taa amji mã ampo pejti jãhtõa ne cugõ.

Atajê kôt ri mehcunea ramã amji mã hakràj cati na me harê.

Mã taa amji to hàmnãn to:

“Wa ipê pahhikwỳj ne ijỳr xà ita kam jỳ!
Ne nee mã ipijapit nare,
ne nee wa ha jũ caxuw amji na ihkên xà nõ pupun
nare’ hane.

⁸ Cwỳrjapê quê ha amcro nõ pyxit,
quê ha hỳrmã ampo kên kwỳ cato,
ne apu to kêanre ne.
Quê ha cumã ampo hà,
quê ha ihtỳj ihkàj xà na amji pupu,
ne ampeaj kam cumã prãm.
Quê ha cama cuhy kam me to capa.
Ampo na?

Pom me pajõ Pahpãm pê Pahhiti carôt tỳjti ata quê
ha ihcukij ne apu to kêanre ne” hajỳr.

Pjê kam me hakràj jamre japête ri ame amrã

⁹ Ne pjê jõ pahhi catêjê atajê te ame cahãj xyre to
amenxy atajê me, menxỳ xà kêanre atajê, quê ha krĩ
pê me cahãj xyre pyrãc ata kam cuhy kũm pupu, ne
ihtỳj ame caràr ne ame amrã. ¹⁰ Ne pea ampỳa mã
cupê amehcuhhê, mehkên mã hàr ne cute me amji
pupun xà kêanre to me amji pupun cupate, ne me
ajpẽn mã:

— Akỳ, akỳ, Papirõn jõ krĩ catia carôt tỳjti ata, ca ajte
amcro pyxit peaj kam akên mã axàr ne gamre pyrentu
— hajỳr.

¹¹ Ne pjê cunea kam me cupê ihpore na ampo to
hàhpan atajê hanea ne hapête ame amrã. Ampo na?
Jũ wỳr quê ha jũm hipêr me cumã ihpore na cute me
cumã ampo to hàhpan xà atajê nõ japrô. ¹²⁻¹³ Jũ wỳr
quê ha hipêr jũm me cupê ampo pejti itajê nõ japrô
he: Wakỳre prà tepti pê ôr me, wakỳre prà jakare me,
kên pejti na hĩ ahwỳ atajê me, caxàt xê pejti me,
cupêhkà intepti me, cupêhkà hêrhêtre me, carà
cahàcre hô te cupêhkà intepti ata me, pĩ na tee ame-
hcukij ata me, ampo jĩpàr jakare impejti atajê me, pĩ na
hĩ ahwỳ ata me, wakỳre cahhyr na impejti ata me,
wakỳre me, kên jaka pejre me, ampo pĩ kà te me hũrk-
wa cuxwa xà me, ampo pĩhòc pê ràm cuxwa pyrãcti
me, ampo cacô cuxwati atajê me, pĩxô cacô xỳre me,
ampò to impê xà me, kwỳr xòm me, arỳjhy me, pryti
me, carà cahàcre hòhti me, cawrô me, cawrô jõ kujti
me, me pahcaxwỳn me, me hũmre me, me cahãj te ca-
ma cumã hàpên xà itajê nõ to ihpore na me ahpa.
¹⁴⁻¹⁵ Ne me cupê ampo to me hàhpan catêjê atajê,
ampỳa mã amehcuhhê, mehkên mã me hàr xà ata cu-
pate, ne ame caràr ne me amrã, ne cama krĩ ata mã
me:

— Por pê ca ampo pejti na ajco mehprãm atajê jam-
re, ne hamre, ca gõtpe apictor! Ne hanea ne gакràj ita-
jê cunea to apictor! Pom kên pràti itajê me, wakỳre
pràti pê ca ajco to amji jakrô atajê me. Ne hamre, jũ
wỳr ca hipêr me cumã acato. Pê wa ajco ampo to me
ijàhpan kam, wa rỳ ame ijakràj. ¹⁶ Akỳ, akỳ, por krĩ cati
ata! Ate cupêhkà increcrti to akà ata, cupêhkà tepti
me irãrãti ata, me hakrô xà cunea pràti pejti atajê me.
¹⁷ Ajte ana amcro pyxit peaj mã ajte ihcunea na gam-
re, me gакràj mea mã! — hane. Mã pàr kre jõ pahhi

catêjê cunea me, kam me ipa itajê cunea me, còxwa
kam cute amji to me ipijapar xà caxuw kam me hàpên
catêjê me, ampỳare mã ajte cupê me xa. ¹⁸ Ne cute
mehkrĩ kũm jàpir to mör na me hõmpun, ne ame caràr
to:

— Wa rỳ jũ caxuw ite krĩ jakràjti nõ te hajỳr pupun
nare — hajỳr.

¹⁹ Ne pea me cumã amji kĩn nare na cute me amji
jarên xà na, cute me amji krã jipro, pjê jacrô to, ne
amencwỳr to:

— Akỳ, akỳ, krĩ cati ata! Gакràj te ri, por còxwa kam
mehcunea mã pàr kre atajê cunea to hakràj par. Ne
ajte ahna ahtũm nare mã ca ajte ihcunea na apictor,
ne amcro pyxit kam ihcunea na gamre! — hajỳr.

²⁰ Hõhõ, ite impar ne hõmpun to hajỳr. Na wa ite ijark-
wa to:

— Còjkwa kam me acunea ame gакry! Krĩ ata jamre
pyrên, ca ame gакry! Me apê Pahpãm na mehkwy me,
me apê Pahpãm mã me cumã acakòc catêjê me, ca
Pahpãm jarkwa kôt me apa catêjê me, ca ame gакry!
Ampo na? Nee mã ampo na nare, pom pê krĩ ita pê
ame ato kêanre itajêa to ri me Pahpãm te hahpan xà
na apu to kêan to kêanre — hajỳr.

²¹ Mã pea Pahpãm mã memprar catêjê nõ, carôt tỳjti
ata te kên catia nõ ata jarĩ ne còxwa kam to hũcapêr,
ne ihkôt me cumã harên to:

— Hõhõ, quê ha me apê Papirõn jõ krĩ kam me akrĩ
catêjê mencryac kam me to hũcapêr to me hanea,
pom quê ite kên to ijũcapêr he, quê ha jũ caxuw hipêr
me apupun nare. ²² Ne nee jũ caxuw akam, cute me
wakỳre japàre cakòr catêjê nõ jòkre kam me hapac
nare, ne nee akam, cute me pohhê cakòr catêjê nõ
jàkòr jòkre kam me hapac nare, ne nee akam hipêr me
hàkòr catêjê nõ jòkre kam me hapac nare. Ne quê ha
jũ caxuw cute me ampo cunea to hàpên jahkre pej ata-
jê nõ, akam hàpên xà nõ mã cator nare. Ne nee me
akam arỳjhy huc nõ jàhkrihkrit nõ kam me hapac nare.

²³ Quê ha jũ caxuw hipêr akam hàhcujro xà nõ, jàhcu-
jro nõ na me hõmpun nare. Ne nee akam, por me
hũmre me pyjê nõ jikwa tuw to me amji mã mehcakòc
atajê nõ jòkre kam me hapac nare. Ne akam ampo to
me hàhpan catêjê atajê, pjê cunea kam mehkwy jiròa
pê me carôt tỳj. Ne me gũxy to ajco pjê cunea kam
mehcunea mã ahê to apa.

²⁴ — Papirõn jõ krĩ catia to cati ata, caa ca akên xà
catia mã axàr. Ampo na? Cute akam me Pahpãm na
mehkwỳ caprô me, Pahpãm jarkwa to mehcakòc
catêjê caprô me, Pahpãm kôt me amji ton to me ipa
catêjê caprô mã me cator. Por ate me hipej atajê caprô
mã ri, cute me cumã cator. Ýhỹ, ne hanea ne, pom
cute pjê cunea kam amehcuran itajê caprô mea mã
cute me cumã cator, cwỳrjapê ri cute ihcunea to ajkam
mehpỳm — hajỳr.

Còjkwa kam Pahpãm na mehkwy amji mã me to amnã

19 Ita jirô pê mã, wa ite còjkwa kam me hàhtòa
jòkre par, mã me harkwa xa, ne cute amji mã
me hũjarên to:

— Cu ha Pahpām catihti mempejti na me harē! Ne cupêa ri quêt me pahcunea kên pê me pahto hapôj catê! Ne mehcunea mã, pjê cunea kam, impejti na me hahkre pej! Ne quêt mehcunea jirôa pê carôt tÿaj to carôt tÿj! ² Ne cute me hahkre pej xàa na ri mehcukij ne me to ajcokjê, cajrerti cuhtacti to hân ne mehcukij, nee mã ihtÿj ame to ipicokjêr nare. Ne cutea ri krí ata pê cahãj xyre inxÿ xà kêanre ata cwÿrjapê ihkên xà kêanre ata mã mên, pjê cunea kam inxÿ xà kêanre ata-jê cwÿrjapê. Ne hanea ne Pahpām te apu to kêanre, cute cumã me hàpên catêjê curan jahpan xà na.

³ — Cu ha Pahpām pejti catihti na me harē. Ampo na? Quê ha krí póc ita kùm ihtÿj hōtpê hàpir to ipa, ne nee hamre nare! — hajÿr. ⁴ Mã pahhi catêjê te me win-ticwat atajê me, cute me cwat atajê me, Pahpām hÿr xà kam jÿ ata cuna mã mehkôn krã na me hÿr, ne cute me amji mã me hÿpa ne to cati prãmtē, cumã harkwa to:

— Ampeaj kam ri! Apê me Ijō Inxū Cati! — hajÿr.

Jeju pê Caràcahàcre Kra ata jikwa tuw xà

⁵ Mã pea Pahpām krí xà ata pîn jùm ita jarkwa cator, ne cute hÿjarēn to:

— Me pajō Inxū Cati pê Pahpām catihti na ca me harē! Me apê cumã me gápên catêjê cunea, me hÿmre kà me, mehkryre me, por ca me acunea amji mã me hÿpahti atajê, ca ha catihti na me harē! — hajÿr. ⁶ Ne pea ite me hàhtôa jarkwa xãmte pê ihhêj rÿm côhxocti jãhkrihkrit me, pahhãjê jãhkrihkrit pyrãcti ata kam ijapac, mã cute me hÿjarēn to:

— Pahpām mã ca me catihti to me acakôc. Ampo na? Me pajō Inxū Cati pê Pahpām pê Pahhiti ita ri mehcunea jirôa pê carôt tÿj, ata ri pjê cunea to ihhim-pej. ⁷ Ne ampeaj kam me pajakry ita mã amji kîn, ne me pajakrya to me pajakry, cwÿrjapê wa catihti na amji mã me harē. Ampo na? He ramã Caràcahàcre Kra jikwa tuw xà jō amji kían kam ri hàhhuc, ne hō amcroa mã he. Ne hÿxi me hikwa xà caxuw cute me ajpên par, ne cute amji cÿmpej xàa kam ri ramã hàhhuc. ⁸ Ne ramã cute ihkà jakati, tÿm nare, prãti ata pyr, cute to ihkà xà caxuw, ne ihkà jakati impejti ata pê Jeju na mehkwy te ampo pejti ton to me ipa xà — hajÿr.

⁹ Jirô pê mã ri cute imã hÿjarēn to:

— Ita na ca ihhóc he:

— “Por Caràcahàcre Kra pê Jeju jikwa tuw xà jō amji kîn wÿr cute me hator atajê, me hakrya to me hakry”. Nãmri itajê pê ri quêt caxwãm catia mã Pahpām cakôc xà impejti atajê, na ca ha ahna ihhóc — hajÿr. ¹⁰ Wa pea Pahpām jarkwa na imprar catê cuna mã ikôn krã na ijÿr, ite amji mã hÿpa ne to cati prãmtē, mã cute amji tēte imã harkwa to:

— Apu ito hajÿr nare, ipê me akjêjê kwÿa nō wa. Ne hanea ne ipê, por Jeju jarkwa to me amji mã mehhim-pej to me ipa atajê kwÿ nōa wa. Pom me kam Jeju jark-wa itajêa ri me to ihhimpej to ipa. Na ca ha quêt apu Pahpām pit kîn — hajÿr.

Quê ha Jeju ajpên tē ne curê xwÿn catêjê to hamre

Ruc 21.25-28; 2 Texarôn 1.6-10

¹¹ Jirô pê mã, wa ite cōjkwa te amji jihê mên na hōm-pun, mã pea cawrô jakati ita cator. Mã kam hÿr catê ata japrÿ te Caxwãm Catia Mã Cute Amji Jarkwa Par Catê. Ne catyt kam hân ne ajpu, ne cute ampo na me hōmpun xà atajêa kôt hân ne mehcukij ne me to ipi-cokjêr to ihcuhê. ¹² Ne into pê ihhêj rÿm cuhy póc hire ata pyrãac, ne ampeaj kam ihkrã kam cumã ihkrãhkà jãhtô. Ne por haprÿ na kam ihhóc ata ri, nee jÿm mã iràn xà na hahkre pej nare, ne cumãa ri hahkre pej. ¹³ Ne ampeaj kam ihkãhti ata na me caprô. Mã cute amji mã haprÿ to: “Pahpām Jarkwa” hajÿr. ¹⁴ Mã ma cōjkwa jō krãhtare te ihkà jakati impejti me, hō cawrô jakati ata to me hÿnãr. ¹⁵ Ne pê harkwa kam wapo xwahhihti ata xa, ne ajco hapôj, ne toa pê ajco ampo kra me, krÿxàre cunea to kêanre to ipa, ne ajco me tohjê! Ne por wakÿre te pÿ cajrer pahtÿjti ata to, quê ha me to ihhimpej to mō. Ne pea Pahpām carôt tÿjti ata te incryc to cuprôn xà pê kwÿr jatên xà ata kam, quê ha cute mehcuran atajê cunea caprô jaxwÿ. Por me caprô pê ampo cacô xÿre intepti ata, quê ha kam haxwÿ ne cormã hatê. ¹⁶ Ne pê ihkãhti me, ihkjê kam ihhóc ata harēn to: “Pahhi Catêjê Jō Pahhiti, Ne Me To Ihhimpej Catêjê To Ihhimpej Catê”.

Pryjara te mehtyc kur atajê mehtyc jãhtôa pyrên hakry

¹⁷ Ne hanea ne, pom Pahpām jarkwa na imprar catê pyt kam xa ata te cōjkwa kam xōnti me, ampo jara cunea mã kjÿ cati pēa mã hàkjêr to:

— Ajpên me cuprô! Pahpām te me amã me gō jōr xà atajê wÿr! ¹⁸ Ajpên ame pra, ne ame cupê pahhi catêjê jÿ ku, ne ame krãhtare jō pahhi jÿ ku, ne ame krãhtare jÿ ku, ne ame cawrô me, kam ihkrí catêjê jÿ ku, ne ame hÿmre me, cama ame hàpên catêjê jÿ ku, hō pahhi jÿ mea mã, ne ame hakràj jÿ ku, ne ame cupê hamreare atajê jÿ ku — hajÿr.

Jeju te me pahcurê xwÿn pê ampo kên jãprê pyrãc ata tohjê

¹⁹ Jirô pê mã, wa ite ampo kēnti ata pupun, ne hanea ne pjê jō pahhi catêjê pupun, mã cute me hō krãhtare to me cuprôn, ne me to xa, cute, por cawrô jakati kam jÿ ata me hō krãhtare cuna mã me hàprê prãmtē.

²⁰ Ne pea cute me ampo kēnti ita kam ihtēm, ne meh-pro, ne hanea ne cute ampo cunea to me cumã ihhêj xi to ipa catê kēanre ata pro, ne ajwar cute me haxàr. Nãmri taa mã pê ajco, por amji mã me hÿpa, mã cute me kuctÿj kam haprÿ nōr atajê mã ihhêj xi to ipa. Cwÿrjapê ri cute ampo kēnti ata me, cute harkwa na me cumã ihhêj xi catê ata me, ajwar cuhy póc te amji to kwa, ne kam kên te me to caxàr xà ata kam, cute mehtÿar na me to hÿcapêr. Mã curia mehkri rohnÿtti mã. ²¹ Ne por cawrô jakati kam jÿ ata jarkwa pîn, wapo xwahhihti hapôj ata te ampo kēnti jō krãhtare cunea

jipej. Mă pea cute me ampo jara cunea mă me hàkjêr itajê te ame hĩ to harte partu.

Pê Xatanaj huwapre ita na ahna caku mir

Ipipě Xà 5.9-10

20 Wa pea ite còjkwa pĩn Pahpãm jarkwa na memprar catê nõ ata pupun, mă ajpên ahpar mă tẽ. Ne hũkra kam cumã kre jatõhhy nare jihê rẽn xà ata, me wakÿti pytĩti te mehcajpre xà ata to ajpên ihtẽm na, ite hõmpun. ² Mă pea iwryc, pê cute cagãti ata pro, ne por cagãti ata pê Xatanaj pê mam cati mă me pahcunea curê xwÿn ata. Mă cute ihpro, ne pea huwapre, quẽ ha huwapre ita na amji to caku to mir. ³ Ne cute kre jatõhhy nare ata kam mẽn. Ne pea hihê xà to ihpro ne ahna to hihê. Cute cator ne ampo krĩxàre kwÿ cunea mă apu ihhêj to ipa to caku to mir ita mă hahêr cupate ri, cute haxàr. Ne quẽ ha ihcuhhê, quẽ haxa caku to mir ita hamre, jirõ pê mă, quẽ ha cormã me cumã hikran to incirre ne.

Quẽ ha Jeju pjê kam mehkřĩ atajê cunea to ihmipej to caku to mir

⁴ Wa ite pahhi krĩ xà atajê pupun, ne kam mehkřĩ catêjê pupun, mă kam mehkřĩ. Ne por mehkřĩ atajêa te ri mehcukij catêjê na amji caxuw me hũpar. Ne hanea ne ite Jeju to cute amji mă mehhimpej to me ipa, ne Pahpãm jarkwa to mehcajõc to me ipa, mă cute incwÿrjapê mehkřã Jakep catêjê atajê caxwÿn pupun. Ne por ite me hõmpun atajê, pê nee ame ampo kenti ata me ihkrekà ata amji mă me hũpa nare, mă nee mehkuctÿj kam me haprÿ nare, ne nee me hũkra kam haprÿ nare. Cwÿrjapê ri hacpÿa mă amehtĩr, ne pea Jeju cahê na cute mehhimpej to caku to mir ita jicu xà mă me hahê. ⁵ Ne mehtyc atajê cahhur, nee hacpÿ mã amehtĩr nare, quẽ ha xa caku te mir atajê hamre, jirõ pê quẽ ha cormã mehcukij xà caxuw hacpÿ mã amehtĩr. ⁶ Ne pom mam mehtĩr xà kam amehtĩr atajê, me hakrya to ame hakry. Ampo na? Quẽ ha Pahpãm quêt me to kẽnre nare, quẽ ha hipêr amehtyc nare. Ne quêt me cupê Pahpãm tehcajpar catêjê, ne me cupê Jeju cahê na mehhimpej catêjê, ne mehhimpej ita to me caku te mir ita jicu xà mă me to hahê.

Quẽ ha Xatanaj mă me hê pôn cri

⁷ Ne caku te mir ata jamre jirõ pê mă, quẽ ha me Xatanaj cator, ihcuhhê xà pê kre jatõhhy ata pê. ⁸ Quẽ ha ma Coc jõ pjê me, Macoc jõ pjê kam, krĩ cunea apu ihcuhhê atajê kõt hapõj to ipa, ne mehcunea mă ihhêj to ipa. Ne cute me cumã ihhêj ita to quẽ ha me hàhtõa ne me haprõ, ne me to cuprõ. Quẽ ha me hàhtõ pê ihhêj rũm pjênxõm carõt jãhtõ, me hàprê xà caxuw.

⁹ Ne ma mehcahkũm to me ipa. Ne cute me Pahpãm na mehkwy jõ krĩ pê cumã Krĩpinkrên kĩnti ata krã, cute me hipej prãmte. Mă còjkwa pĩn cuhy cator, ne cute mehcunea jipej tu.

Cuhy catia mă cute Xatanaj mẽn xà

¹⁰ Ne pea cute me Xatanaj pro, ne cuhy te amji to kwa ata kam me to hũcapêr, por pê ramã kam me ampo kenti me harkwa na me cumã ihhêj catê to me awcapê ata kam. Ne hamre, quẽ ha caxwa me amcro cunea kam, jũ caxuw me cumã mehkàj xà atajê me cumã amji to pec nare, quẽ ha mehkàj xà ita me cumã hà rohnÿtti mă.

Quẽ ha Pahpãm mempej japê mehkõpĩ

Jowãw 5.25-29

¹¹ Ne wa ite Pahhi krĩ xà jakati ata pupun, ne hanea ne kam hÿr catê ata pupun, mă kam jÿ. Mă xà cuna mă pjê me còjkwa xa, wa ite hõmpun, mă krãa, jũ kam hũpate ajwar ipictor. Ne nee jũm te hipêr hõmpun nare. ¹²⁻¹³ Ne hanea ne ite me hàmkřã me, me hàmkřã nare catêjê tyc pupun. Mă cõxwa te me ipĩr catêjê atajê jĩ cunea curia hanea ne me xa. Mă hanea ne pjê cunea kam cute ame harêt atajê jĩ, curi me xa. Mă pea me hÿrmã me carõ japõj par, ne hacpÿa mă cute ame hĩ tÿj par, mă me xa. Ne Pahhi ihkrĩ xà kam jÿ ata cuna mă mehcunea me xa. Mă pea cute ihkãhhõc atajê pahe, ne hipêr ihnõ pahe, por kam me haprÿ hikwa atajê to hacpÿa mã ihtĩr xà caxuw. Ne me cumã ampii, ne ramã ihkãhhõc atajê kam ihhõc ata kõt cute ame ampo ton xà atajêa na, ahpÿanre na cute mehcukij par.

Quẽ ha cuhy catia mă mehkên rẽ

¹⁴⁻¹⁵ Ne por hacpÿa mã mehtĩr xà jõ kãhhõc kam me haprÿ nare atajê to ri, cute cuhy te amji to kwa kam, cute me to caxàr xà ata kam, mehĩ me, me carõ me amã, cute me to hũcapêr. Ne mehtyc catêjê jõ pahhi me, mehkřĩ xà mea mã cuhy te amji to kwa kam, cute me to hũcapêr. Ne pom cuhy te amji to kwa ata pê ri mehtyc jirõ pê hipêr mehcuran xà. Ne ikam mare mã cute me to hajÿr, wa ite me ahna hõmpun.

Quẽ ha còjkwa tuw me pjê tuw kam ampo pej pit

² Petrõ 3.8-13

21 Ne pea ite còjkwa tuw me, pjê tuw te amji to ipipẽ na hõmpun. Ne mam còjkwa ata me, pjê ata me, cõxwa mea mă hamre ne hamre tu. ² Wa pea ite Krĩpinkrên pejti tuwti ata pupun, mă Pahpãm pĩn ahpar mă mõ, ata pê ihhêj rũm jũm cuprÿ te impjên me hikwa xà caxuw, me ajpên cajpar to me mõr. ³ Wa pea ite ihkrĩ xà ata pĩn jũm jõkre tÿjti jũjarên xà te hajÿr ata na impar, mă cute hũjarên to:

— Ita caxuw me hũmre cahi na Pahpãm krĩ xà. Ne Pahpãm ita quẽ ha me cahi na ihkrĩ, ne taa amji to me Hũm Cati. Quẽ ha hanea ne amji to mehkwy ne amji cahi na amehkrĩ, quẽ ha Pahpãm ata amji to me hõ Pahpãm. ⁴ Ne taa mehcunea mă mehkuc na mento cacõ incrà. Quẽ ha pea hipêr jũ caxuw mehtyc xà nare, ne nee me cumã amji kĩn nare nare, ne nee hipêr amencwÿr xà hamreare, ne nee hipêr amehkàj xà nõ me cumã hamreare. Ampo na? Ma ramã mam ampo

wej itajê cunea ma tē, ne ramā ampo tuw cator xàa kam — hajÿr.

⁵ Ne por hÿr xà kam jÿ ata te ri me cumā harkwa to: — Wa ha ita caxuw ampo tuw ton partu — hajÿr. Ne cute imā harkwa to:

— Atÿj amji mā ijarkwa itajê to hane, nāmri wa ha itÿj ihcunea ton pa, na ca ha ahna ihhōc partu.

⁶ — Ne ramā ampo atajê cunea te amji jipêj partu. Ne ipê pjê kat me hihōt jō Pahhiti, ne ipê cumā kat kam ampo cunea jō Pahhiti, ne ipê hīcu xàa kam ampo itajê cunea jō Pahhiti. Ne por jūm mā kōr ata, wa ha cama cumā mehtīr rohnÿtti mā xà jō cō ata kwÿ, quē ha to ikō, ne nee hipêr cumā kōr nare, ne nee hipêr ihtyc xà nare, ne nee quē ha hahpan xà na imā hāmjōr nare. ⁷ Ne por quē ha me ampo kēn cunea tohê atajê, to wa ha amji kra, ne pa amji to me Hūm Cati. ⁸ Ne por amji mā ame ampo cupa to me ipa atajê me, mehkwy ihkēn mā me irēn to me ipa atajê me, ampeaj kam amji mā me ito Pahpām nare atajê me, mehkwy curan to me ipa atajê me, ahti na me pyjê caxun atajê me, me hūxy xi catêjê atajê me, cute amji mā ame hūm cahàc carō kēn kīn to ipa catêjê me, mehhēj xi catêjê cunea, krī xà ri cuhy te amji to kwa, ne kam kēn te me to caxàr xà cacrohti ata, quē ha hipêr amehcura — hajÿr.

Pahpām na mehkwy impej pē Krīpinkrēn tuw pejti pyrāc
Carati 4.26

⁹ Mā pea Pahpām mā membrar catêjê te xet atajê nō te hapua na cratti pē Pahpām cryc jaxwÿr ata ajpēn iwÿr mō, ne cute imā hūjarēn to:

— Ajpēn ikōt mō, wa amā Caràcahàcre Kra me hīxi jikwa tuw xà jahkre, ca hōmpu — hajÿr.

¹⁰ Mā Pahpām Carō Pejti ata te imā amji jōr, mā ma cumā imprar catē te ijaprōr ne ito mō, ne pea cute hahkà jakōtti nō kàa to ihkà ata na ixām. Ne cute imā Krīpinkrēn pejti tuwti ata jahkre, wa ite hōmpun, mā Pahpām pīn cōjkwa pīn ajpēn iwÿc to mō. ¹¹ Ne ampeaj kam Pahpām pejti jàhcujrohti ata te to ihpràa to, to ihprà. Pē krī ita prà pē ihhēj rūm kēn prà tetetti ata. ¹² Ne ampeaj kam intēte kwÿc ata ihkà, ne harkwa jàhtō na cute tōxi, ne hamār xà na Pahpām mā membrar catêjê te tōxi ne ahna amehcuhhē. Ne harkwa atajê kam Ixaher kra te tōxi japrÿ na ihhōc. ¹³ Ne pē harkwa itajê amji jīkjê na ahpyānre na incré pa, ne pyt japōj xà rūm incré, ne hanea ne pyt cjêj xà rūm incré, ne hanea ne ita rūm itajê incré, ne hanea ne hīkjê rūm itajê incré. ¹⁴ Ne krī tēte kwÿc ata pē kēn te tōxi atajê jipy me to kwÿc, ne kam Caràcahàcre Kra jarkwa na membrar catêjê japrÿ te tōxi ne hikwa.

Krīpinkrēn tuw ata kam ihtÿj me hàhtōa ne mehkŕī xà

¹⁵ Ne pom pē Pahpām mā imprar catē imā ihcakōc ata jūhkra kam pē cumā wakÿre pràti pē ôr te pīhhēre ata. Pē cupy ne to xa, cute to krī me, intēte kwÿc me, harkwa to ipipēn xà caxuw. ¹⁶ Pē krī ata hakep pejti itajēa apu ihkrā, ne ajpēn pit. Ihcahpa na ihpo me, ih-

cajpuw ihpo me, hīpē na ihpo me, kàj mā ihpo me, ihcunea ajpēn pit, ne nee ihnō te ajpēn jīkjê nare. Mā pea cute hō pī cajrer ata to ipipēn, mā ihpo te quirom te mir pijakrut ne ihkōt xēj pijakrut. ¹⁷ Ne hanea ne cute ipu na kwÿc ata tic to ipipēn. Mā ihtic na pajara capō te xīncwēnta.

Krīpinkrēn tuw ata peaj to impej

¹⁸ Ne krī pu na kwÿc ata, pē kēn pràti japōc mā apē tetetti ata pit intēte kwÿc. Ne krī ata, pē ôr te wakÿre prà tepti ata to pit mā me krī ata xām, ne pē ihprà pē ihhēj rūm irīt xà prà. ¹⁹ Ne krī mā cuhhē xàkat ata pē ahpyānre na ajpēn jipy, kēn prà pihho pejti itajê to pit mā me to he. Ne mam ita pē ihprà jakati, ne incwÿrpē ita pē ihprà ihkukūmti, ne ihnō ita pē ihprà irārā ahhoti, ne ihnō ita pē ihprà ihkukūm tycti. ²⁰ Ne ihnō ita pē ihprà ihtatapti, ne ihnō ita pē ihprà intep rārāti, ne ihnō ita pē ihprà ihkukūm tatapti, ne ihnō ita pē ihprà ihkukūm jipore, ne ihnō ita pē ihprà ihkukūm tatapre, ne ihnō ita pē ihprà ihkukūm jakati, ne ihnō ita pē ihprà ihkukūm jiwÿr incoti, ne ihnō ita pē ihprà ihkukūm jiwÿr jiproti. ²¹ Ne pē kēn prà jaka jajoti te tōxi atajê kam, ahpyānre na harkwa partu. Ne krī jō krī cape ata, pē wakÿre pràti pē ôr japōc mā apēhti pē wit pyrāc ata to pit mā mehkŕī cape ata to.

²² Ne pē wa tee krī ata kam Pahpām to me amji kam me hapac xà jūrkwā japē, ne nee ihnō pupun nare. Ampo na? Me pajō Pahhiti pē Pahpām me hirōa pē carōt tÿj ata me, ikra pē Caràcahàcre Kra ata pē ri krī ata cunea kam me Pahpām to amji kam hapac xà.

Pahpām jàhcujrohti te Krīpinkrēn tuw kujro

²³ Mā nee krī ata amji kujro xà caxuw pyt me putwÿr na prām nare. Ampo na? Nee mā ampo na nare, Pahpām pejti jàhcujro xà ata ri ihcujro, ne Caràcahàcre Kra ata pē ri hanea ne hàhcujro xà. ²⁴ Quē ha pjê kam mehcunea hàhcujrohti ata kam ame ipa. Quē ha pea pjê kam me cupē pahhi catêjê cunea hÿrmā me pra, me hakràj me, me hāmkrā catêjê me. ²⁵ Ne krī jō harkwa ata, quē ha hihē mēn ata na ihcuhhē. Ampo na? He curi caxwa xà nare na, na quē ha nee jū caxuw me to hihē nare. ²⁶ Quē ha krīxàre jāmkrā cati catêjê me, me hakràj cati catêjê me, ihtÿj krī ata wÿr me hakràj itajê cunea to me ipa.

Nee curi mehkēn ton catêjê cjêj xà hamreare

²⁷ Ne nee krī ata mā mehcunea incjêj xà nare. Ampo na? Por krī ata mā nee cute me amji kam hapac xà tūmti atajê incjêj xà nare. Ne hanea ne, por cute ame ampo ton xà kam me pahpahāmti atajê incjêj xà nare. Ne hanea ne, nee mehhēj xi catêjê incjêj xà nare. Ne por Caràcahàcre Kra jō kàhhōc kam hacpyā mā mehtīr xà kam me hapÿr hikwa atajê ri ihtÿj mencjêj xà.

22 Ne hanea ne cute imā mehtīr rohnÿtti mā xà jō cō to ihkōm xà ata jahkre, wa ite hōmpun. Mā Pahpām me, ihkra pē Caràcahàcre Kra ihkrī xàa pīn ajpjê, ne ampeaj kam ihprà jiwÿr, pē ihhēj rūm kēn prà

jiwrÿhti ata, ne krĭ jō krĭ cape cajpuw ajpjê. ² Ne pĭxō pàr te cō jÿjê ata, quê ha jÿm hô nō krê, ne jÿ caxuw ihtyc nare, na pê haprÿ pê Mehtĭr Rohnÿtti Mă Xà Jō Pĭxō Pàr. Ne ahpÿanre na putwrÿ pyxit kam ajco hô xen xà to hô. Ne caku pyxit kam hô xen xà to hô to tōxi. Ne ihhō atajê pê hanea ne ihtÿj curi krĭxàre cahhê xà na impej, ne ihtÿj me cumă ampej.

Cu ha pahtÿj Pahpām kuc ri me hōmpu

³ Ne krĭ ata kam, por Pahpām mǎ ampo kên kĭn nare atajê jamreare. Ne Pahpām krĭ xà ata ri, krĭ ata kam ihcuhhê. Mǎ mehkwy cunea pê cumă me hâpên catêjê atajê ihtÿj Pahpām mǎ cute mehkĭnti na me amji jarê. ⁴ Ne ihtÿj me Pahpām kuc pupu, ne cute me hōmpun catêjê atajê cunea kuctÿj kam haprÿ pit. ⁵ Ne hipêr curi caxwa xà nare, ne nee cute me amji kujro xà na ame ampo jâhcujro xà na me prām nare, ne nee ame pyt jâhcujro na me prām nare. Ampo na? Me pajō Pahhiti pê Pahpām pê ri mehcujro xà, ne quê ha me taa me to ihhimpej to mehkĭr rohnÿtti mǎ.

Pom Jowāw te me cumă ihcakōc itajê ampeaj kam ri

⁶ Ne por Pahpām mǎ imprar catê apu imǎ ampo to ipipê to harên to mō ata te ri imǎ hÿjarên to:

— Pom ite amǎ ampo cunea jarên itajê, atÿj kampa, nāmri ampeaj kam ri. Ampo na? Pahpām pê me pajō Pahhiti, pê ajco harkwa to mehcakōc catêjê mǎ Carō Pejti kujate, ata te ri awÿr ikujahêc. Ite amǎ ampo te hajÿr xà itajê jarên, ne amǎ to ipipê, ca ate hōmpun prāmte ri, cute awÿr ikujahêc — hajÿr. Mǎ pea Jeju te amji jarên to:

⁷ — Pom ca Inxū Cati jarkwa na ihkàhhōc kam me gapac pejti to me apa atajê, me gakrya ne. Ampo na? Wa ha amji jaxàr pyrentu — hajÿr.

⁸ Ipê Jowāw, ne wa ite ampo itajê cunea impar, ne ihcunea pupun. Ne ite hōmpun ita jirō pê, wa apu Pahpām mǎ imprar catê ata to catia ne imǎ ihkĭn prāmte hÿrmǎ tē, ne pea cuna mǎ ikōn krā na ijÿr, mǎ cute imǎ harkwa to:

⁹ — Apu ito hajÿr nare. He wa nee girōa pê icati nare, nāmri ipê anōa wa, ne hanea ne ipê me akjêjê kwÿa nō wa, ne ipê, por wa me ihkàhhōc ita jarkwa kampa atajê nōa wa. Ne quêt Pahpām to ca me catia ne me amǎ ihkĭn.

Cu ha pahte amji kam me pajapac xà pejti to me papa

¹⁰ — Nee ca apu ihkàhhōc ita te ampo jarên xà itajê to apimxur nare, ne atÿj mehcunea kam mare mǎ harên to apa. Nāmri, pom ampo te hajÿr xà ita, quê ha nee ahna ahtÿm ry nare, quê ha ihcunea cato. ¹¹ Por mehkêanre atajê, quê ha ihtÿj mehkên itajê kam me to incrà tu, ne por mehtÿmti atajê, quê ha ihtÿj mehtÿmti ita kam me to incrà tu. Ne mempejti atajê, quê ha ihtÿj mempej ita kam me to incrà. Ne por me Pahpām cuna mǎ mempejti na me ipa atajê, quê ha ihtÿj Pahpām cuna mǎ impejti ita kam me to incrà tu ne — hajÿr.

¹² Ne ite hipêr Jeju kam ijapac, mǎ cute imǎ hÿjarên to:

— Wa ha amji jaxàr pyrentu! Ne ajpên me hâmcwÿr xà atajê to tē, ahpÿanre na cute me imǎ hâpên xà ton atajê jahpan xà na. ¹³ Ipê pjê kat jō Pahhiti, ne ipê hi-hôt jō Pahhiti. Ne ipê harê me, ihhō me, hô jō Pahhiti. Ne ipê ampo cunea kam to iprar catê, ne ampo cunea to hamre catê.

¹⁴ — Ne por cute ame Caràcahàcre Kra caprō pê icaprō ata kam, cute amji mǎ mehkà cahhōn catêjê, me hakrya to me hakry. Ampo na wa ha me cumă ijÿjarên to hane he:

—“Gapacta ne atÿj Mehtĭr Rohnÿtti Mă Xà Jō Pĭxō ita ku, ne atÿj hanea ne krĭ jō harkwa itajê na me acjêj xà” hane. ¹⁵ Ne por cute ame ampo kên kĭnti atajê ri, pō pê krĭ pu na ame ipa xà, quê nee jÿm hâr nare, krĭ kam ame ipa atajê kĭnte. Ne me hÿxy xi catêjê te hajÿr, ne cute me ampo kam me pahpahâmti ton catêjê me, cute mehcuran catêjê me, cute ame pahpām cahâc krekà kĭn catêjê me, cute ame harkwa me, me hâpên xà to mehhêj to me ipa catêjê atajê cunea, quê ha nee krĭ ata mǎ jÿm hâr nare, ne pō pê ame ipa.

¹⁶ — Ipê Jeju, wa ite imǎ imprar catê kujahêc me amǎ, cute me apê me ikwÿ mǎ ijarkwa na me amǎ ampo itajê cunea jarên xà na. Ne ipê pahhi Tawi wÿr tàmwxwÿ nōa wa. Ne pom mehcunea awcahti xà wÿr me caxêti prà tetetti pejti pupu ata jĭkjê na mǎ, mehcunea me ipupu ne ipej na me ijahkre pej — hajÿr.

¹⁷ Pahpām Carō Pejti me Jeju me hĭxi pê krĭ impejti ata te hàkjêr to:

— Ajpên me acjêj — hajÿr. Ne por cute me ita par catêjê, quê ha mehkwy mǎ harkwa to:

— Hacme, ne me acjêj! — hane. Ne me anō mǎ kōr ata, ajpên mō ne cama cō ita kwÿ to ikō. Ne pom cō ita, quê ha jÿm te to ihkōm ata ihtĭr rohnÿtti mǎ, ne nee jÿ caxuw ihtyc nare.

Ihkàhhōc ita nee kam me to incri xà nare, ne nee kam me to cati xà nare

¹⁸ Ipê Jowāw, pa wa ha caxwām catia mǎ ate Pahpām jō kàhhōc ita kam me gapac catêjê mǎ ihcawpa. Nāmri quê ha ihkàhhōc ita kam harkwa ita kaj na, hirōa pê jÿm te ampo to ipicamên na, quê ha Pahpām hanea ne ihtÿj cumă ihkàhhōc ita kam, cute ihkên na ihhōc atajê to cumă ajcamê. ¹⁹ Nāmri quê ha hanea ne jÿm te Pahpām jarkwa ita tēte, pō mǎ harkwa nō to hÿcapêr na, quê ha hanea ne Pahpām ma apu cupê hō pĭxō te me to ihtĭr rohnÿtti mǎ xà ata intê, ne nee cumă ihnō nare, ne hanea ne ma hō krĭ impejti ata tēte apu curê. Hō, por ramǎ ite ijō kàhhōc kam ahna ihhōc atajê mǎ he.

²⁰ Ne por catyt kam Jeju te ampo itajê cunea jarên ata te ri amji jarên to:

— Ampeaj kam wa ha hacpÿ ne amji jaxàr ne itēm pyrentu, he wa ha nee amji to ijàhtÿm ry nare, ne ajpên tē — hajÿr.

²¹ Ne imǎ me Pajō Pahhiti pê Jeju te me acunea to impej na me ato prām. Hamre.